

क्रांतिकारी



# ଦ୍ରାଘଦଶୀ

ଅଥମ ପର୍ବ

ଅକ୍ଷୟ ମହାପାତ୍ର



କଳକାତା



প্রকাশক :

শ্রীঅমূল্যগোপাল মজুমদার

ডি. এম. লাইব্রেরী

৪২, বিধান সরণি

কলকাতা-৬

প্রচ্ছদপট : প্রণবেশ মাইতি

প্রথম প্রকাশ : পৌষ ১৩৩৯

মুদ্রাকর :

শ্রীশ্রীমলকান্তি বন্দ্যোপাধ্যায়

কমা প্রিন্টার্স

৬৩এ/৩, হরিশোষ স্ট্রীট

কলকাতা-৬

শতরূপা রায়  
অবধ

## লেখকের অন্যান্য উপন্যাস

যার যেথা দেশ

অজ্ঞাতবাস

কলঙ্কবতী

ছুঃখমোচন

মর্ত্যের স্বর্গ

অপসরণ

রত্ন ও অীমতী ১/২/৩

বিশল্যকরণী

ভৃষ্ণার জল

আগুন নিয়ে খেলা

পুতুল নিয়ে খেলা

না

কণ্ঠা

সুখ

রাজ অতিথি

পাহাড়ী

অসমাপিকা

( ছাপা নেই )

काष्ठदशौ



## প্রথম পর্ব

॥ এক ॥

সেবাপ্রতিষ্ঠান পরিদর্শন করতে গিয়ে মধুমালতীর সঙ্গে আলাপ। সে-ই গাইড হয়ে ঘুরিয়ে ফিরিয়ে দেখায়। মানসকে।

একটু আড়ালে নিয়ে গিয়ে বলে, “বাবা আমাকে ডিটেনশন ক্যাম্পে আর ফিরে যেতে দেবেন না বলে নতুন এক বন্দিশালা বানিয়েছেন। এখানে আমার মতো আরো কয়েকজন রাজবন্দিদীকে সম্মানের সঙ্গে আশ্রয় দিয়েছেন। আমরা খাটি, খাই, খেলি, গান গাই, সেবা করি। কিন্তু রাজনীতি একদম বারণ। মাঝে মাঝে ইপিগিয়ে উঠি। কিন্তু কী করি? পাঁচবছর ডেটিনিউ হয়ে থাকার পর এমনিতেই ক্লান্তি এসেছে। তবে যন্ত্রা নয়। ওটা বাবার ডাক্তার বন্ধুদের ছিল।”

ওদিকে ক্যাপটেন মুস্তাফী বলছিলেন যুথিকাকে, “অদৃষ্ট! অদৃষ্ট! অদৃষ্টের পরিহাস। মেসোপোটেমিয়ায় তুর্কদের হাতে বন্দী হই আমি। আর বাংলাদেশে ইংরেজদের হাতে বন্দী হয় আমার মেয়ে। কোতুকটা হোম মেম্বরকে বুঝিয়ে বলতেই তিনি বলেন, আপনি যদি ওর বিয়ে দেন আমরা ওকে বিনা শর্তে মুক্তি দেব। তা শুনে আমার মেয়ে বলে, ওইটেই তো শর্ত। শর্তাধীন মুক্তি আমি চাইনে। ইংরেজকে ও মেয়ে জালিয়েছে, মিসেস মল্লিক। শেষে ওরাই মরীয়া হয়ে ওঠে ওকে ছাড়তে। কিন্তু বিনা শর্তে ছাড়তে ওদেরও তো প্রেস্তিজের বাধে। তা ছাড়া আবার যে ও-রকম কাজ করবে না তার নিশ্চয়তা কোথায়? এমন সময় একটা সমাধান পাওয়া গেল। যন্ত্রা। না, সীরিয়াস কিছু নয়। তবু রোগটা ছোঁয়াচে। মেডিক্যাল বোর্ড স্থপারিশ করতে না করতাই বেকসুর খালাস। তার পর আমি ওকে ভাওয়ালিতে পাঠাই। বছর খানেক বাদে এখানে নিয়ে এসে সেবাপ্রতিষ্ঠানের

ভার দিই। একে একে ওর সাথীরাও এসে যোগ দিয়েছে। সরকার আমাকে বিশ্বাস করে। আমিও বিশ্বাস রক্ষা করি।”

“এখন মুশকিলে পড়েছি জুলিকে নিয়ে।” মধুমালতী বলে মানসকে। “ওর ভালো নাম মঞ্জুলিকা সোম। বিয়ের আগে সিন্হা। চেনেন বোধ হয়।”

“চিনতুম। দশবছর আগে বিলেতে শেষ দেখা। ওর বর তুলাল ছিল আমার বন্ধু। আহা, বেচারী হঠাৎ মারা যায়। তা জুলি এখন কোথায়? অনেকদিন খোঁজ খবর রাখিনি।” মানস বলে।

“জুলি এখন ওর মায়ের কাছে কলকাতায়। ডেটিনিউ ছিল আমার সঙ্গে। বছর না ঘুরতেই ছাড়া পায় লেডী হারিংটন না কার সুপারিশে। বিলেতে ফিরে গিয়ে পড়াশুনা করার শর্ত ছিল। বম্বে অবধি গিয়ে থেমে যায়। আপনি কি সৌম্য চৌধুরীকেও চিনতেন?” মধুমালতী সুধায়।

“চিনব না? ও যে আমার অভিন্নহৃদয় বন্ধু। কিন্তু কদাচিৎ সাক্ষাৎ হয়। ও তো এখন এই শহরেই থাকে।” মানস উত্তর দেয়।

“থাকেন আর কোথায়? মাসের মধ্যে চব্বিশ পঁচিশ দিন গ্রামে গ্রামে ঘুরে বেড়ান। চরকা কাটতে দিয়ে কাটুনিদের মজুরি দেন, স্নাতো থেকে কাপড় বুনিয়ে তাঁতীদের মজুরি দেন, গ্রামে তো কেউ কিনবে না, শহরে এনে ভাণ্ডারে জমা দেন। দেশ সত্যগ্রহের জন্তে প্রস্তুত কি না তার মাপকাঠি নাকি খদ্দের চাহিদা। পড়েছেন গান্ধীর পান্নায়।” মধুমালতী আকসোস করে।

“সেটা তো আজকে নয়। সেই অসহযোগের আমল থেকে। বিলেতেও শুকে খাদি পরতে দেখেছি। তা খাদির চাহিদা কেমন দেখছেন?” প্রশ্ন করে মানস।

“মন্দ নয়। বাবা পরেন, মা পরেন, আমরা সবাই পরি। কিন্তু এই হারে প্রগতি হলে দেশকে স্বাধীন করতে আরো পঞ্চাশ বছর লাগবে।” মধুমালতী হাসে।

“যা বলেছেন।” মানস স্বীকার করে। “কিন্তু জুলির কথা হচ্ছিল।”

“জুলি বম্বে অবধি গিয়েও জাহাজ ধরে না, সৌম্যদার সঙ্গে পুণা যায় ও মহিলা বিশ্ববিদ্যালয়ে ভর্তি হয়। উনি তখন জেল থেকে ছাড়া পেয়ে গান্ধীজীর নির্দেশে হরিজন সেবায় নিযুক্ত ছিলেন। ওঁর প্রভাবে পড়ে জুলি সম্ভ্রাসবাদ ত্যাগ করে। অথচ গান্ধীবাদ গ্রহণ করে না। ও এখন ওর মায়ের সঙ্গে একটা নার্সারী স্কুল চালায়। এখনো একটা বিপ্লবী গোষ্ঠীর সদস্য। ওরা চায় গণ অভ্যুত্থান। সেই উদ্দেশ্য নিয়ে ওরা কংগ্রেসেও যোগ দিয়েছে। আমার অত বুদ্ধি নেই, মিস্টার মল্লিক, আমি বুঝতে পারিনি গান্ধী পরিচালিত কংগ্রেসের নৌকায় এক পা রেখে

কেমন করে মার্কস কথিত বিপ্লবের নোকায় আরেক পা রাখা যায়।” মধুমালতী চিবুকে হাত দেয়।

“ওঃ এই নিয়ে মুশকিল ! এটা শুধু জুলিকে নিয়ে কেন, শত শত কর্মীকে নিয়ে। কংগ্রেসের লক্ষ্য স্বাধীনতা, বিপ্লব নয়। ওদের লক্ষ্য বিপ্লব, ওটাই ওদের মতে স্বাধীনতা। লক্ষ্যে পৌছবার পন্থা নিয়েও ভেদমনি গভীর মতভেদ। গান্ধীকে ছেড়ে কংগ্রেস একাই একটা কিছু করতে পারে না, অথচ এরা কিনা গান্ধীর বিরুদ্ধে কংগ্রেসে বিপরীত নেতৃত্ব খাড়া করবে।” মানস বিশ্বয়ের সঙ্গে বলে।

“কিন্তু মুশকিলটা তা নিয়ে নয়।” মধুমালতী বলে, “জুলি এখানে আসছে ওদের গোষ্ঠীর বৈঠকে উপস্থিত হতে। উঠতে চায় আমাদের বাড়ীতে। কী করি, বলুন দেখি ! ওর বাবা ছিলেন আমার বাবার বন্ধু। দু’জনেই যুদ্ধক্ষেত্র ডাক্তার ও পরে মিডিল সার্জন। জুলি আর আমি দু’জনেই এক শিবিরে বন্দী হয়েছি। আমি থাকতে ও কি আর কারো বাড়ী উঠতে পারে ? ভাবা যায় না, মিস্টার মল্লিক। কিন্তু বাড়ীটা তো আমার নয়, আমার বাবার। প্রাইভেট প্র্যাকটিসে তিনি হাজার হাজার টাকা রোজগার করেন, পেনসনের জন্ত কেয়ার করেন না। বার বার বদলীর পর আর বদলী হতে চান না, এক জায়গায় বসতে চান বলে তিনি অকালে অবসর নিয়েছেন। এই জায়গাটার উপর তাঁর মায়া পড়ে গেছে, নইলে তাঁর মতো ডাক্তারের উপযুক্ত ক্ষেত্র তো কলকাতা। সরকারকে যদিও তিনি কথা দেননি তবু সরকার আশা করে যে তিনি তাঁর মেয়েকে সেবাকর্মেই ব্যাপৃত রাখবেন, বিপ্লবীদের সঙ্গে মিশতে দেবেন না। আর আমি নিজেও তো ওদের সঙ্গে খাপ খাওয়াতে পারছি। যতদিন ওরা জাতীয়তাবাদী ছিল ততদিন আমিও ওদের একজন ছিলাম, কিন্তু ওদের বেশির ভাগই এখন সমাজতন্ত্রবাদী, জাতির একটা অঙ্গকেও ওরা উৎখাত করবে, শুধু ইংরেজদের নয়। এমন অবস্থায় জুলিকে আমি ঘরে ঠাই দিই কী করে ?” মধুমালতী চিন্তাক্লিষ্ট।

মানস এর উত্তর খুঁজে পায় না। বলে, “তা হলে ওকে আমার ওখানেই চালান দিন। তবে তার আগে একবার ওর বৌদির সঙ্গে পরামর্শ করা উচিত। উনি তো ওকে চোখেও দেখেননি। শুধু নাম শুনেছেন। আর ও-ই বা ওঁর সম্বন্ধে কতটুকু জানে ! জুলি এলে পরে আপনি ওকে আমাদের কথা বলবেন। ও বিপ্লবী নাগ্নিকা। আমাদের ওখানে উঠলে ওর হয়তো জাত যাবে তা সন্দেহ যদিও রাজী হয় তবে আমি ওর বৌদিকে বোঝাব।”



“কিন্তু আপনি না উচ্চপদস্থ রাজকর্মচারী?” মধুমালতী অবাক হন। “জুলির জন্তে আপনাকে জবাবদিহি করতে হবে না?”

“চাকরি আর আমার ভালো লাগছে না, মিস মুস্তাকী। যত বড়োই হোক না কেন, চাকর তো! কিন্তু আমার তো আপনার বাবার মতো প্রাইভেট প্র্যাকটিস জুটবে না। দোঁটানায় পড়েছি। তা বলে আমি ভয়ে জড়সড় নই। আমার বন্ধুগণী আমার বাড়ীতে উঠলে আমার জাত যাবে না। তবে এটাও ঠিক যে ও তো এখানে বেড়াতে আসছে না, আসছে একটা বৈঠকে অংশ নিতে, তাতে গরম গরম বক্তৃতাও শোনা যাবে। বক্তৃতা যদি রাজত্বোৎসাহের পর্যায়ে পৌঁছয় মামলা মোকদ্দমাও রুজু হতে পারে। আমিই হতে পারি তার বিচারক। জুলিকে আমি জেলেও পাঠাতে পারি।” মানস বলে শুষ্ক কণ্ঠে।

মধুমালতী চমকে উঠে বলেন, “তাহলে কাজ নেই ওকে আপনার ওখানে চালান দিয়ে। বাবাকে বুঝিয়ে বলব, মাকে বুঝিয়ে বলব। আর ওকেও সচেতন করব। আমি যতদূর জানি ওরা একত্র হচ্ছে যুদ্ধকালে ওদের কর্তব্য নির্ধারণ করতে। ইংরেজদের সঙ্গে লড়াতে যারা চায় তারা কি হিটলারকে জিতিয়ে দিতে চায়? স্টালিনের সঙ্গে হিটলারের একটা চুক্তি হয়েছে বলে হিটলারকে জিতিয়ে দিতে হবে, এটা কি একটা সূক্ষ্মতা? জুলি যেন কখনো অমন কথা মুখে না আনে। শুনলে যেন তীব্র প্রতিবাদ করে।”

মানস জানতে চায় জুলি কি একলা আসছে না তার সঙ্গে কেউ আসছে। গোয়ালন্দ থেকে চাঁদপুর স্ট্রিমারযাত্রা, স্ট্রিমারে ওঠা নামা কি ও একা ম্যানেজ করতে পারবে? যদি সঙ্গে মালপত্র থাকে।

“ও: আপনাকে বলিনি বুঝি!” মধুমালতী এক গাল হাসে। “সহযাত্রী হবেন স্কুয়ার দত্তবিশ্বাস। উনিই ওর মুশকিল আসান। বিলেতে লেডী হ্যারিংটনের কাছে ধন্য দিয়ে সুপারিশ আদায় করেছিলেন। বিলেতেই বসবাস করেন। মাঝে মাঝে দেশে এসে জুলির আপদে বিপদে পাশে দাঁড়ান। চেনেন নাকি!”

“বিলক্ষণ। বিলেতে ওর সঙ্গে ঘনিষ্ঠতা ছিল। দশ বছর দেখা হয়নি। তবে ওর বইয়ের দোকান থেকে বই আনিয়েছি।” মানস স্মরণ করে।

“আমার সঙ্গে আলাপ নেই। তাই ওঁকে আমি বাড়ীতে থাকার আমন্ত্রণ জানাতে পারব না। ওঁকে সৌম্যদার আশ্রমে পাঠাব। কিন্তু তিনি তো বিলিভী খাবারে অভ্যস্ত। পারবেন কি আশ্রমিকদের মতো আঁকাড়া চালের ভাত খেতে? ভায় সঙ্গে অড়হরের ডাল, খোসাসুদ্ধ আলু লিঙ্গ, কাঁচা পেঁয়াজ আর শশার লালাড। মা:

ভুল্লোকের সঙ্গে আমার শত্রুতা নেই। তিনি আসছেন আমার বান্ধবীর রক্ষী হয়ে।  
আচ্ছা, সারকিট হাউসে কি কর্তারা অনুমতি দেবেন ?” মধুমালতী স্বধায়।

“জায়গা থাকলে দিতে পারেন। আমি সুপারিশ করতে পারি। কিন্তু আমারই  
তো উচিত দত্তবিশ্বাসকে আমার হাউস গেস্ট করা। মিসেস মল্লিকের সঙ্গে পরামর্শ  
করে আপনাকে জানাব। কই, উনি গেলেন কোথায় ?”

সেবাশ্রুতিষ্ঠান পরিদর্শন করে যুথিকা ততক্ষণে ক্যাপ্টেন মুস্তাফীর বাসভবনে মিসেস  
মুস্তাফীর সঙ্গে চায়ের পেয়ালা হাতে গল্প করছে। মেয়ের ভক্তে একটি পাত্র ছাড়া  
বিধাতার কাছে তাঁর আর কোনো প্রার্থনা নেই। রাজবন্দিনী বলে সবাই তাকে শ্রদ্ধা  
করে, কিন্তু বিয়ে করতে কেউ সাহস পায় না। পুলিশ লাগবে পেছনে অথচ সরকার  
থেকেই বিবাহের প্রস্তাব উঠেছিল।

“বিয়ে করতে কেউ সাহস পায় না ? বিপ্লবীরাও না ?” অবাক হয় যুথিকা।

“ওমা ! তা কখন বললুম ! বিপ্লবীদের সাহস আছে বইকি, কিন্তু কোনো মা  
বাপ কি তাদের একমাত্র মেয়েকে প্রাণ ধরে বিপ্লবীর হাতে তুলে দিতে পারে ? কবে  
কী করে বসবে ! ফলে কাঁসী কি আন্দামান ! না, আমিই সাহস পাইনে।”  
ভদ্রমহিলা কথা ঘুরিয়ে নেন। ভীতির লক্ষণ তাঁর চোখে মুখে।

বলতে বলতে মধুমালতী এসে পড়ে। পিছু পিছু মানস।

“এঁর সঙ্গে আলাপ হয়েছে, মা ? মিস্টার এম. এম. মল্লিক আই. সি. এস।”  
মধুমালতী পরিচয় করিয়ে দেন।

“বোসো, বাবা। তুমি বলছি বলে কিছু মনে কোরো না। এতক্ষণ বৌমার  
সঙ্গে স্বখদুঃখের গল্প করছিলুম। কেমন লক্ষ্মীপ্রতিমার মতো বৌ পেয়েছ। দেখে  
চোখ জুড়িয়ে যায়। মিলি, তোর সঙ্গে ভাব করিয়ে দিই, আয়। ওর ভালো নাম  
মধুমালতী, তা তো দেশের বেবাক লোক জানে। কিন্তু ওর ডাক নাম মিলি। মিলি  
আর জুলি। ওরা দুই বন্ধু। জুলিকে নিয়ে ভাবনায় পড়েছি। জুলিকে কোথায়  
রাখি সেই হয়েছে সমস্যা। জুলি আমাদের পর নয়, ওর বাবা ক্যাপ্টেন সিন্‌হা  
মিলির বাবার বন্ধু ছিলেন। অকালে মনের দুঃখে মারা যান। যার সঙ্গে মেয়ের বিয়ে  
দিয়েছিলেন সে স্বামী নয়, স্বামীজী। সেও মারা যায় অকালে। নিয়তি ! নিয়তি !  
একেই বলে নিয়তি।” ভদ্রমহিলা চা তৈরি করে মানসের দিকে বাড়িয়ে দেন।

ক্যাপ্টেন মুস্তাফী কোথায় ছিলেন, চায়ের আসরে জাঁকিয়ে বসলেন।

“সমস্যা না কী যেন বলছিলে। ওঘর থেকে গুনতে পাচ্ছিলুম। কিসের সমস্যা ?  
মিলি, তোমার মুখেই গুনতে চাই।” তিনি আদেশ করেন।

“শোন, বাবা। জুলি আমার বন্ধু. ও চায় আমার সঙ্গে দু’দিন কাটাতে। আমি যদি কলকাতা যাই আমিও তো চাইব ওর সঙ্গে দু’দিন কাটাতে। কিন্তু ও তো এমনি বেড়াতে আসছে না। আসছে বিপ্লবী গোষ্ঠীর বৈঠকে যোগ দিতে। ওদের সঙ্গে আমার মনের মিল নেই। তবু আমাকেও সন্দেহ করা হবে। তার জন্তে তুমিও বিব্রত হবে। মিস্টার মল্লিক নাকি জুলির স্বামীর বন্ধু। তিনি তাঁর স্ত্রীর সম্মতি পেলে জুলিকে তাঁদের ওখানে রাখার ঝুঁকি নিতে প্রস্তুত। জুলি তো বিলেতের সেই জুলি নয় যাকে তিনি চিনতেন। সে বন্দীশিরিরে থেকেছে। ক্যাম্প কমাণ্ডারের মুখের উপর বলেছে, তোমরা একদিন আমাদের হৃদয় জয় করেছিলে, তাই তোমাদের জন্ত মেনোপোটেমিয়ায় আমাদের ছেলেরা রক্ত দান করেছে। তার পুরস্কার হলো কিনা জালিয়ানওয়ালা বাগ। তোমরা আমাদের হৃদয় হারিয়েছ। শরীরটা দখল করে কদিন রাখতে পারবে! আবার যদি যুদ্ধ বাধে কেউ কি তোমাদের জন্তে লড়তে যাবে? না একও জওয়ান, না একও রূপেয়া। এইসব কথা উচ্চারণ করেছিল কতকাল আগে। আবার হয়তো করবে তার গোষ্ঠীর বৈঠকে। তখন মল্লিকরা পড়বেন অথৈ জলে।” মধুমালতী বলে যায়।

“কাজ কী ওঁদের ঘাটিয়ে। জুলি এই বাড়ীতেই উঠবে। আমি ওর পিতৃবন্ধু। আমিই ওকে শাসিয়ে দেব ওসব যেন মুখে না আনে। যদিও তা আমারও মনের কথা। মা বদ সতামপ্রিয়ম্।” ক্যাপ্টেন সমস্তার সমাধান করেন।

“বাবা, তুমি বাঁচালে। নইলে হয়তো বন্ধুবিচ্ছেদ ঘটে যেত। কিন্তু এতই যখন করলে তো বাকীটুকুও করবে কি?” মধুমালতী দত্তবিশ্বাসের জন্ত আশ্রয় চায়।

“দত্তবিশ্বাস! কে তিনি। কী তাঁর অভিপ্রায়।” ক্যাপ্টেন সন্দিগ্ধ হন।

“জুলির স্বামীর বন্ধু। জুলিকে বন্দীশিবির থেকে মুক্ত হতে সাহায্য করেছিলেন। লেডী হ্যারিংটনের সেই চিঠি তিনিই বহন করে নিয়ে আসেন।” মধুমালতী মনে করিয়ে দেয়।

“ওঃ! তা হলে তো আমরাও তাঁর কাছে কৃতজ্ঞ। একষাট্রায় পৃথক ফল কেন? দত্তবিশ্বাসও আমাদের এখানেই উঠবেন।” ক্যাপ্টেন স্ত্রীর দিকে তাকান।

মিসেস মুস্তাফী সায় দেন। মধুমালতীর মুখ উজ্জ্বল হয়ে ওঠে।

“আমি তো ভেবেছিলুম আমার পুরাতন বন্ধুকে আমাদের ওখানেই রাখব।” মানস ঘৃথিকার দিকে তাকায়। “অবশ্য তোমার মত নিয়ে।”

“তা আপনারা ওঁকে সাহেবী খানা খাওয়ানোর দায় নিতে পারেন। অন্তত রাতের ডিনারটা।” মধুমালতী অনুরোধ করে।

‘খুশি হয়ে।’ মানস বলে, “কী বলো, জুঁই?”

“রাজী। কিন্তু আপনাদেরকেও ডিনারে আসতে হবে।” যুথিকা প্রস্তাব করে।

“আমার ওসব সহ হয় না, বাছা।” মিসেস মুস্তাফী বলেন।

“আমি ডায়েটে আছি।” ক্যাপ্টেন ওজর দেখান।

শেষপর্যন্ত এই স্থির হয় যে মধুমালতী তাঁর দুই অতিথিকে নিয়ে মল্লিকদের ওখানে ডিনারে আসবে। যতদিন ওরা থাকবেন।

যুথিকা বলে, “আমাদের ডিনার টেবিলে আরো একজনের ঠাই হবে। আরো একজন পুরুষের। কাকে ডাকব?”

মানস উত্তর দেয়, “সৌম্যদাত্তে। ও যদি শহরে থাকে। দশবছর বাদে আমরা চারজন একত্র হব। সৌম্যদা আর আমি, জুলি আর দত্তবিশ্বাস।”

“মিসেস মল্লিক,” মধুমালতী বলে কপট গান্ধীরের সঙ্গে, “পারেন তো কিছু অঁকাড়া চাল. অড়হর ডাল, পালং শাক আর রসুন জোগাড় করে রাখুন। একজনকে সাহেবী খানা খাওয়াতে গিয়ে আরেকজনকে অভুক্ত রাখবেন না। আমার কথা যদি বলেন, আপনারা যা খান আমিও তাই খাব।”

“আমরা আজকাল নিরামিষ খাই, মিস মুস্তাফী। মাছমাংস ছেড়ে দিয়েছি। তবে রান্নাটা হয় ইউরোপীয় ধরনে। রাঁধে মগ বাবুর্চি। আর সার্ভ করে মুসলমান খানসামা। আপত্তি নেই তো?” যুথিকা প্রশ্ন করে।

“আপত্তি? কিসের আপত্তি? ওরাও তো মাছুষ। ওরাও তো ভারতীয়। আমার অত শুচিবাই নেই। যেটুকু ছিল ডিটেনশন ক্যাম্পে সেটুকুও গেছে। মগের রান্নার কি তুলনা আছে? মগের মূল্য যদিও কাম্য নয়। আর মুসলমান বাবুর্চিরাই তো আমাদের কোর্মা কালিয়া কোস্তা কাবাব রেঁধে খাওয়াত। হিন্দু মুসলিম একতা কি নিরামিষ খেয়ে হয়?” মধুমালতী সহাস্তে বলে।

“আচ্ছা, জেনে নিলুম আপনি কী খেতে ভালবাসেন। তবে আমরা নিরামিষ ধরলেও ডিমটা ছাড়িনি। বাচ্চারা পুডিং খেতে ভালোবাসে। আমরাও। আশা করি আপনিও।” যুথিকা আশ্বাস দেয়।

‘নিশ্চয়। নিশ্চয়। আমিও মাঝে মাঝে মুখ বদল করতে ভালোবাসি, কিন্তু আমার জন্তে মাছমাংস রাঁধতে হবে না। শুধু মিস্টার দত্তবিশ্বাসের জন্তেই রাঁধতে বলবেন।’ মধুমালতী চিন্তা দূর করে।

“কেন জুলি আমিষ খাবে না?” মানস আশ্চর্য হয়।

“মল্লিক সাহেব, আপনি কি ভুলে গেছেন যে জুলি বিধবা?” মধুমালতী বলে।

“জুলি কোনোকালেই সধবা ছিল না। ওটা একরাতের ব্যাপার। পরের দিনই ওর স্বামী বিলেত চলে যায়। স্বামীর সন্ধানে জুলিও অবশেষে বিলেতে হাজির হয়। কিন্তু ভাড়া হ্রদয় আর জোড়া লাগে না। না, জুলি সধবাও নয়, বিধবাও নয়। সে কুমারী।” মানস জোর দিয়ে বলে।

“তা কি আমি জানিনে?” মধুমালতী দৃঢ়স্বরে বলে, “তবু এটাও জানি যে ওর মনের ভিতর বৈধব্যের সংস্কার নিহিত রয়েছে। সেইজন্তেই ওর মা ওর বিয়ে দিতে পারছেন না।”

“মেয়েদের বিয়ে ক’বার হয়!” কৌস করে ওঠেন মিসেস মুস্তাফী। “আবার বিয়ে দিলে সেই পাশে আবার বিধবা হতেও পারে। কাজ কী ওকে আবার দুঃখ দিয়ে?”

ক্যাপ্টেন মুস্তাফী এতক্ষণ নীরবে শুনছিলেন। বলেন, “স্বখেরও তো অণু পথ নেই। মেয়েটা সারাজীবন দুঃখ পাবে এই বা কেমন কথা! যেক্ষেত্রে স্বামীস্ত্রী সম্পর্ক পাকা হয়নি সেক্ষেত্রে বিবাহটা এমনিতে অসিদ্ধ। জুলিকে অভয় দিয়ে বলিস, মিলি, যে বয়স থাকতে ও যেন আবার বিয়ে করে ও মা হয়। নয়তো পরে পশতাবে।”

“আচ্ছা, বাবা, তোমার মনের কথাটা তো এই যে, বিপ্লব মেয়েদের দিয়ে হবার নয়। স্বশ্রবাবাড়ীর ডিটেনশন ক্যাম্পে আটক থাকাই ওদের ভাগ্য। অথবা বাপের বাড়ীর।” মধুমালতীর কণ্ঠস্বরে বিদ্রোহ।

“মল্লিক সাহেব, আমি আপনার কোর্টে আপীল করছি,” ক্যাপ্টেন মুস্তাফী করযোড়ে বলেন, “আপনি অনেক পড়াশুনা করেছেন, অনেক দেশবিদেশেও ঘুরেছেন, আপনি এই অবুঝ মেয়েটিকে বুঝিয়ে দিন দেখি যে, যাদের দেশে রুশো জন্মাননি, ভলতেয়ার জন্মাননি, বিপ্লবের জন্তে মাটি তৈরি হয়নি, বীজ বোনা হয়নি সেদেশে বিপ্লবের ফল ফলতে পারে না। তরুণ প্রাণের অপচয় দেখে কষ্ট হয়।”

মানস কী বলতে যাচ্ছিল, মধুমালতীর মুখের ভাব লক্ষ করে থেমে যায়। ওরও কষ্ট হয় তরুণীর জীবনের অপচয় দেখে।

“কেন, বাবা, রুশো ভলতেয়ার যেদেশে জন্মাননি সেদেশেও কি বিপ্লব হয়নি? রাশিয়ার দিকে তাকাও।” মধুমালতী উত্তাপের সঙ্গে বলে।

“সেদেশেও শতাব্দীকাল ধরে ফরাসী বিপ্লবের ভাবধারা প্রবাহিত হয়েছিল। তার সঙ্গে যোগ দিয়েছিল মার্কসবাদী চিন্তাধারা। ওরাও কর্ষণ করেছিল ইনটেলেকটের। তাদের মতো খালি ইমোশনের নয়। শুধু রক্ত দিলেই বিপ্লব হয় না। দিতে হয় কঠোর মানসিক শ্রম। মার্কস বলো, লেনিন বলো, কী প্রচণ্ড এঁদের মানসিক সাধনা!” ক্যাপ্টেন মুস্তাফী ও ঘরে যান।

“বাবার কথা সত্য হলে আরো একশো বছর। আমরা কেউ দেখে যেতে পারব না ভারতের বিপ্লব।” মধুমালতী হতাশায় ভেঙে পড়ে।

ওর মা অত শত বোঝেন না। বলেন, “একশো বছর লাগে লাগবে। বিপ্লব তো পালিয়ে যাচ্ছে না। ভারতও পালিয়ে যাচ্ছে না। পালিয়ে যাচ্ছে তোর আর তোর বান্ধবীদের জীবন যৌবন। বিয়ে থা কর, ঘরসংসার কর, আমরা আর ক’টা দিন আছি, আমাদের শেষবয়সে একটু শান্তি দে। জুলির মার জন্তে অবশ্য তেমন কোনো সাক্ষ্য নেই। ও মেয়ের বিয়ে আর হবার নয়।”

মানস ও যুথিকা বিদায় নেয়। মধুমালতী এগিয়ে দেয়।

বাড়ী ফেরার পর যুথিকা মন খোলে। “তুমি ঝাঁদের ডিনারে ডেকেছ তাঁদের মধ্যে হু’জন হচ্ছেন ডিটেনশন ক্যাম্পের প্রাক্তন বন্দিনী। আরেকজন গান্ধীজীর সঙ্গে যেরওয়াদা জেলের প্রাক্তন বন্দী। এর জন্তে তোমাকে সরকারের কাছে কৈফিয়ৎ দিতে হবে না?”

“হতে পারে। তা বলে আমি আমার যৌবনের বন্ধুদের সঙ্গে সেকালের মতো মিশতে পারব না? হারানো যৌবনকে একদিন কি দু’দিনের জন্তে ফিরে পাব না? চাকরি করছি বলে কি নিজে থেকে বিক্রিয়ে দিয়েছি।” মানস ফেটে পড়ে।

“আহা, অত বিরক্ত হচ্ছে কেন? পুলিশের সঙ্গে তোমার যেমন মধুর সম্পর্ক মধুমালতীর জন্তে সেটা মধুরতর হবে না তো?” কটাক্ষ করে যুথিকা।

জুলিকে নিমন্ত্রণ করলে মধুমালতীকেও নিমন্ত্রণ করতে হয়। জুলি হচ্ছে মধুমালতীর অতিথি। খুবই খারাপ দেখাত যদি মধুমালতীকে বাদ দিতুম। তুমি নিজেই তো ওঁদের সবাইকে ডাকছিলে।” মানস তর্ক করে।

“সবাইকে ডাকলে কথা ওঠে না। ক্যাপ্টেন মুস্তাফী এখানকার সেরা ডাক্তার। পুলিশ সাহেবের কুঠিতেও তাঁর ডাক পড়ে।” যুথিকাও যুক্তি দেখায়।

“তা হলে দেখো, পুলিশ থেকে কেউ আমার নামে লাগাবে না। লাগালে লাগাবে বিপ্লবীরাই। কেন মধুমালতীর এত খাতির? কিন্তু জুলিকে ডাকলে ওর বান্ধবী মিলিকেও ডাকতে হয়? আরে, জুলি হলো আমার বন্ধুজায়া। জুলি বিপ্লবী হবে আমি এটা কল্পনাও করতে পারিনি। ওর নিজের মুখেই জানতে ইচ্ছে করে কেন ওর এই পরিবর্তন হলো।” মানস কোতুল প্রকাশ করে।

“ওর শুভানুধ্যায়ী নাকি ইংরেজদের মধ্যেও ছিলেন। লেডী হ্যারিংটন না থাকলে ও ছাড়া পেত না বোধহয়।” যুথিকা বলে।

“লেডী হ্যারিংটন ভারতীয়দের সকলের বন্ধু। লওনে ওঁদের একটা সমিতি

ছিল। তার কাজ ছিল ভারতীয়দের বিপক্ষে যেতে দেখলে স্থপথে ফিরিয়ে আনা। বিশেষ করে তরুণ তরুণীদের। আমিও ওঁর সঙ্গে চা'খেয়েছি। জুলিকে উনি স্নেহের চোখে দেখতেন। জুলির মা ওঁরই পরামর্শে বিধবা মেয়েকে নিয়ে বিলেতেই থেকে যান ও নিজে মট্টেসরি ট্রেনিং নেন। মেয়েকেও কোথায় যেন ভর্তি করে দেন। আমার ফিরে আসার বছর দুই বাদে ওঁরাও করেন। কলকাতায় মট্টেসরি স্কুল স্থাপন করেন। এমন সময় হঠাৎ খবর পাই জুলিকে ধরে নিয়ে গেছে। ওর ঘরে নাকি চোরাই রিভলভার পাওয়া যায়। জুলির বক্তব্য হলো ওর ঘর সব সময় তালাবদ্ধ থাকে না। নিচের তলায় স্কুল। কে কখন জল খেতে উপরে উঠে আসে। ঘরে ঢোকে। বাথরুমে যায়। জুলি কি পাহারা দিচ্ছে নাকি? রিভলভারটা বাইরের কেউ এসে লুকিয়ে রেখে গেছে। সন্দেহের অবকাশ থাকলে মামলা আইনের ধোপে টেকে না। তাই ওকে ডিটেনশন ক্যাম্পে আটক করা হয়।” মানস যতটুকু জানে জানায়।

“কিন্তু বিলেত ফিরে না গিয়ে ও বসেতে যাত্রাভঙ্গ করে কেন? সরকার টের পেলে আবার ধরে এনে ডিটেন করত না?” যুথিকা প্রশ্ন করে।

“যাত্রাভঙ্গ করে সৌম্যদার সঙ্গে আকস্মিক যোগাযোগের ফলে। সৌম্যদাকে ও ভক্তি করত। স্বামীর বন্ধুদের মধ্যে ওকেই ও মানত। সৌম্যদা ওকে বোঝায় যে বেঙ্গল গভর্নমেন্টের উদ্দেশ্য ওকে বাংলাদেশ থেকে দূরে সরিয়ে রাখা। সে উদ্দেশ্য সিদ্ধ হয় পুণাতে থাকলেও। পরে ওর মা সরকারকে লিখে অনুমতি আনিয়ে নেন। পুণায় সৌম্যদা যেরওয়াদা জেলে বন্দী থাকতেই হরিজন সেবায় আত্মনিয়োগ করে। ছাড়া পেয়ে বসে গিয়ে কিছু রসদও জোগাড় করে। মহাত্মার একজন কাছের মানুষ সৌম্যদা পরে মহাত্মার আস্থানে সেগাঁওতেও যায়। জুলিকে ভর্তি করে দেওয়া হয়েছিল মহিলা বিশ্ববিদ্যালয়ে। সেখানে থাকতেই ও সন্ত্রাসবাদ ত্যাগ করে। কিন্তু গান্ধীজীর কর্মপন্থা ওর মনে ধরে না। সৌম্যদা সেগাঁওতে যেতেই জুলি ওর মায়ের কাছে ফিরে আসে। ততদিনে সন্ত্রাসবাদী আন্দোলন থেমেছে। জুলি স্কুল চালানোর কাজে মাকে সাহায্য করে।” মানস বলে যায়।

“তা হলে ও আর বিপ্লবী নয়?” যুথিকা আশ্চর্য হয়।

“সন্ত্রাসবাদী নয়। কিন্তু বিপ্লবী কথাটার অর্থ আরো ব্যাপক। যারা সরকার ওলটপালট করে তারাও বিপ্লবী, যারা সমাজ ওলটপালট করে তারাও বিপ্লবী। যারা বোমা রিভলভার দিয়ে খুন খারাপী করে তারাও বিপ্লবী। যারা বিদ্রোহী জনতাকে দিয়ে জেলখানা উড়িয়ে দেয় তারাও বিপ্লবী। জুলি শুনছি একটা বিপ্লবী গোষ্ঠীর সঙ্গে

সংযুক্ত রয়েছে। জানিনে ওরা কী রকম বিপ্লবী। সৌম্যদাকে ও মানে। ভক্তি করে। নতুন করে যোগাযোগ হলে সৌম্যদার প্রভাবে জুলি বিপ্লবী মতবাদ ত্যাগ করতেও পারে।” মানস আশা প্রকাশ করে।

“সৌম্যদার উপরে তোমার অগাধ বিশ্বাস। এটা কি সেই বিলেত প্রবাসের সময় থেকে?” যুথিকা বলে পরিহাসের স্বরে।

“আরো আগে থেকে। তুমি বোধহয় জানো না যে আমিও একদা অসহযোগী ছিলাম। সৌম্যদা আমাদের ফ্রেণ্ড, ফিলসভার, গাইড। ও জেলে যায়, আমি যাইনে। তার থেকে ছাড়াছাড়ি। বিলেতে আবার বন্ধু মিলন। দেশে ফিরে ও এবার জেলে যায়, আমি ওর মতো সত্যাগ্রহীদের জেলে দিই। কী করি, বলে? অপ্রিয় কর্তব্য। এমন চাকরি কি কারো ভালো লাগে? একদিন হয়তো জুলিকেও জেলে পাঠাতে হবে। সৌম্যদাকেও।” মানস করুণ স্বরে জানায়।

“এড়াবার জন্যে তুমি চাকরি ছাড়তে চাও। এই তো?” যুথিকা গম্ভীর।

“যা বলেছ। কিন্তু এখনো মনঃস্থির করতে পাবিনি। কংগ্রেসের সঙ্গে সরকারের বোঝাপড়ার সম্ভাবনা আছে। যুদ্ধকালে সত্যাগ্রহ নাও হতে পারে। কংগ্রেস নেতারা ই দ্বিতীয় মসনদে বসতে পারেন।” মানস দোহুলামান।

“যাক, এখন সৌম্যদাকে নিমন্ত্রণ কর। উনি এই শহরে থাকেন, অথচ একদিনও আসেন না। সেই যে কলকাতায় একবার দেখা হয়েছিল সেই শেষ দেখা। আমার সঙ্গে প্রথম দেখাও বটে। আশা করি নিমন্ত্রণ রক্ষা করবেন এই বন্ধুজায়ার খাতিরে নয়, আরেক বন্ধুজায়ার খাতিরে।” যুথিকার কণ্ঠে অভিমান।

“সৌম্যদাও তো বলতে পারে, ছ’মাস হলো বদলী হয়ে এসেছি, ওর সঙ্গে দেখা করতে ওর আশ্রমে যাইনি। আমার দিক থেকে গাফিলতি হয়নি তা নয়।” মানস দোষী বোধ করে। বন্ধুকে বাঁচায়। চিঠি লিখে মাফ চায়।

ওদিকে মধুমালতীও ওকে খবর পাঠিয়েছিল। সৌম্য শহরের বাইরে ছিল। ফিরে এসে খবর পায়। সঙ্গে সঙ্গে মানসকে চিঠি লেখে। দু’জনের দুই চিঠি দু’জনের হাতে একই সময়ে পৌঁছয়। সৌম্যও মাফ চেয়েছে। আসি আসি করে আসা হয়ে ওঠে না। হাতে এনতার কাজ। যুথিকাকে ও বাচ্চাদেরকে দেখবার জন্যে ব্যাকুল। জুলির সঙ্গে দেখা হবে শুনে খুশি। দত্তবিশ্বাসের কথাও ওর মনে আছে।



## । দুই ।

ডিনার তো রাত আটটায়। তার তিন ঘণ্টা আগেই ছিমছাম বিলিভী পোশাকপরা একজন সমুপস্থিত। চাপরাশি তাঁকে সেলাম করে বলে, “সাহেব গেছেন ক্লাবে টেনিস খেলতে। ফিরতে দেরি হবে। মেমসাহেব আছেন।”

“তাঁকে সেলাম দিয়ে বল মিস্টার দত্তবিশ্বাস।” আগন্তুক ডুইং রুমে বসেন।

“স্বাগতম্। স্বাগতম্।” বলে ছুটে বেরিয়ে আসে যুথিকা। এদিক ওদিক তাকিয়ে জিজ্ঞাসা করে, “কই, আর দু’জন কোথায়?”

“ওরা আসবেন যখন ডিনারের সময় হবে। ওঁদের জন্তে অপেক্ষা না করে আমি চলে এসেছি মল্লিকের সঙ্গে আমার পুরনো বন্ধুত্ব বালিয়ে নিতে। আপনি তখন ছিলেন না। আপনার সঙ্গেও আলাপ জন্মাতে চাই। প্রথমেই জানিয়ে রাখি যে আমি সামনের মাসের গোড়ার দিকেই বিলেত ফিরে যাচ্ছি। যুদ্ধ আরম্ভ হয়ে গেছে, কনভয়ের অভাবে আর যাত্রী জাহাজ চলাচল করবে না। আমারটাই শেষ যাত্রী জাহাজ। বৈচে থাকলে ক্ষেয় দেখা হবে, কিন্তু সে যে কবে তা কেউ ভবিষ্যৎ বাণী করতে পারে না। যুদ্ধ যদি ছড়ায় তবে হার জিৎ হয়তো সাত বছর বাদে। আমার তো এদেশে কাজ নেই, কর্ম নেই, বৌ নেই, বাচ্চা নেই। আমার প্রাণটার এমন কী দাম যে সেটাকে বাঁচানোর জন্তে এদেশে পড়ে থাকতে হবে! যখন জানি যে কেউ আমাকে চিনবে না, কেউ আমাকে পুছবে না। আমার পক্ষে ওদেশই ভালো। আমার নিজের একটা আন্তানা আছে। আর আছে একটা সেকেণ্ডহ্যাণ্ড বুকশপ। তবে ভাবনার কথা এই যে, আমার খদ্দেররা বেশীর ভাগ ভারতে থাকে। যুদ্ধের হিড়িকে তাদের মেল অর্ডার সরবরাহ করা সম্ভব হবে না।” দত্তবিশ্বাসকে উদ্বিগ্ন দেখায়।

“তা হলে ফিরে গিয়ে কাজ কী ? তার চেয়ে এইখানেই একটা দোকান টোকান দিয়ে বসে যান।” যুথিকা পরামর্শ দেয়।

“না, মিসেস মল্লিক। এখানে আমার তেমন কন্টাক্টস নেই। ওখানে যেমন আছে। লর্ড ও লেডীদের থেকে শুরু করে কে না চেনে আমাকে ! কন্টিনেন্টের সঙ্গেও আমার যোগাযোগ আছে। তবে তাতে ছেদ পড়বে হিটলার যদি পোলাও থেকে ঘুরে হলাও আক্রমণ করে। যুদ্ধে এবার সব যুবককে কন্ট্রিপট করে ইংরেজরাও নানান কাজে লাগিয়ে দেবে। আমাকেও যদি ধরে নিয়ে যায় তো আমিও একটা কাজ পেয়ে যাব। হতে পারে দমকল বাহিনীর কি হোম গার্ডেব কাজ। বড়ো বড়ো বইয়ের দোকানের কর্মচারীরা যুদ্ধে চালান গেলে তাদের পদও তো খালি হবে। আমি বারো বছর ওদেশের বাসিন্দা হয়ে ওদেশের পাশপোর্ট পেয়ে গেছি। কিছু না হোক বেকার ভাতা তো আমি পাবই। প্রাণের ভয় আছে, জীবিকার ভয় নেই। এদেশে ঠিক বিপরীত। কেন থাকব ? কার আকর্ষণে থাকব ?” দত্তবিশ্বাস বিলাপ করে।

“বুঝেছি। যাকে বিয়ে করতে চান তিনি রাজী নন। আমি কি তাঁকে চিনি ? চিনলে ঘটকালি করতে পারি।” যুথিকা সকৌতুকে বলে।

“চেনেন বইকি। আজকেই তো ডিনারে ডেকেছেন।” দত্তবিশ্বাস আভাস দেয়।

“কোনজন বলুন তো ! মধুমালতী ?” যুথিকা একটু খেলায়।

“বলেন কী। মধুমালতী। দশ মহাবিচার এক মহাবিছা। ঠঁর উপযুক্ত বর কোনো এক মহান নেতা। আমি অতি সামান্য মানুষ।” দত্তবিশ্বাসের চোখে ভীতি।

“তাহলে কি মঞ্জুলিকা ? সেও তো বিপ্লবী নায়িকা।” যুথিকা বলে।

“ওর জননীর ইচ্ছা আমি ওকে বিপ্লবের বিপথ থেকে নিবৃত্ত করি। ঠঁর কথাতেই হু’ হু’বার প্রস্তাব করেছি, হু’ হু’বার প্রত্যাখ্যাত হয়েছি। কাল স্ত্রীমারেও আরো একবার প্রস্তাব করেছি। এবার প্রত্যাখ্যাত হলে চিরবিদায়।” গোপন কথাটি কাঁস করে দেয় দত্তবিশ্বাস।

যুথিকা অহুমান করেছিল যে দত্তবিশ্বাসের আকর্ষণের চুষক আর কেউ নয়, জুলি। ওই চুষকই ওকে বিলেত থেকে দেশে টেনে নিয়ে এসেছে। কলকাতা থেকে সূদূর পূর্ববঙ্গে। যেখানে তেমন কোনো দ্রষ্টব্য নেই সেখানে শুধু শুধু এস্কট হতে কে রাজী হয়। স্ত্রীমারই বিবাহপ্রস্তাবের মনের মতো স্থান।

যুথিকা একটু ভেবে নিয়ে বলে, “আমার সহযোগিতা স্বচ্ছন্দেই প্রত্যাশা করতে পারেন, মিস্টার দত্তবিশ্বাস। ফল কী হবে জানিনে, তবু একবার চেষ্টা করে দেখতে পারি। কিন্তু আমার একটা শর্ত আছে, মিস্টার দত্তবিশ্বাস।”

“অতবার মিস্টার দত্তবিশ্বাস বলে লজ্জা দেন কেন ? আমি মানসের পুরনো বন্ধু, সেই স্ত্রে আপনাবও। স্বকুমার বলতে কি বাধবে ? যদি বাধে তবে স্বকুমারদা বলবেন।” দত্তবিশ্বাস অমুরোধ জানায়।

“তা হলে আপনিও আমাকে আর ‘আপনি’ বলবেন না।” যুথিকা অমুনয় করে।

“অল রাইট। যুথি, তুমি কী শর্ত আরোপ করতে চাও ?” দত্তবিশ্বাস জানতে চায় বিশেষ আগ্রহভরে।

“শর্তটা—” যুথিকা ইতস্তত করে।

“বলো, বলো, বলেই ফ্যালো।” দত্তবিশ্বাস পীড়াপীড়ি করে।

“জুলি যদি তার বৈধব্যের সংস্কার কাটিয়ে উঠতে না পারে তা হলে আপনি ওকে আরো সময় দেবেন। চাইকি আরো সাতবছর। সেটা যদি আপনার পক্ষে অসম্ভব হয়—পুরুষমানুষের পক্ষে হবেই তো—তা হলে আমার দ্বিতীয় শর্ত আপনি আর কালবিলম্ব না করে মধুমালতীর কাছে প্রস্তাব পেশ করুন। মনে করুন এটা একটা জুয়ার দান। লেগে যায় তো ভালো, না লাগে তো উত্তম। আর ওই যে আপনার মহাবিভাভীতি ওটা অমূলক। মধুমালতী কবে বিপ্লবী ছিলেন, এখন অন্য মানুষ। আপনার ও ধারণা এককালে ঠিক ছিল, এখন ভুল।” যুথিকা ঘটকালি করে।

শক কাটিয়ে উঠতে অনেক সময় লাগে। “বৈধব্যের সংস্কার। ব্রাহ্মসমাজের মেয়ে। বিলেতে পড়াশুনা করেছে। বিপ্লবী নায়িকা। তারও কিনা শুনি বৈধব্যের সংস্কার ! ছাট বীটস মী ! আমি হেরে গেছি। দাও, দাও, বোন, একটু বিষ টিখ থাকলে দাও। এ প্রাণ আমি আর রাখব না।” দত্তবিশ্বাস কাতরোক্তি করে।

“অ্যালকোহল বলছেন ? না, হইন্সি, ব্রাণ্ডি, জিন ইত্যাদি এ বাড়ীতে পাবেন না। লেমন স্কোয়াশ, অরেঞ্জ স্কোয়াশ, জিঞ্জার এল দিতে পারি। লেমন বার্কি খাবেন ?” যুথিকা খানসামাকে ডাকে।

“না, না, ওসব কিছু না। এক গ্লাস ঠাণ্ডা জল। ওঃ আমার মাথা ঘুরছে বৈধব্যের সংস্কার ! জানো, যুথি ? ওর জন্তেই আমি এতদিন বিয়ে করিনি। নইলে ওদেশেই আমার বিয়ে হয়ে যেত। গার্ল ফ্রেন্ডের একজনের না একজনের সঙ্গে দেখতে আমি বোধহয় কুপুরুষ নই ?” দত্তবিশ্বাস একটু গর্বের সঙ্গে বলে।

‘কে বলে কুপুরুষ ? দস্তুরমতো সুপুরুষ।’ যুথিকা মনে মনে হাসে।

“বৈধব্যের সংস্কার মুছে যেতে আরো সাতবছর লাগবে ! ততদিনে বানপ্রস্থে বয়স হয়ে থাকবে। আমি আর অপেক্ষা করব না, যুথি। কিন্তু থাকে বিয়ে করতে বলছ তিনি কি আমার মতো একটা নগণ্য পুরুষকে বরণ করতে ঘৃণা বোধ করবে

না? তিনি কি আমার সঙ্গে বিলেতে গিয়ে ঘর বাঁধতে রাজী হবেন? সামনের মাসেই আমার শেষ জাহাজ। তিনি কি সেই জাহাজে আমার সহযাত্রী হতে প্রস্তুত হবেন? কী দরকার এ জুয়াখেলার? হার যেখানে ধুব।” দত্তবিশ্বাস গ্লাসে চুমুক দেয়।

যুথিকা অভয় দিয়ে বলে, “ওসব আপনি আমার উপর ছেড়ে দিন, দাদা। আপনি শুধু একটাবার জানতে দিন যে মধুমালতীকে আপনার পছন্দ হয়েছে।”

“তার আগে আমি একবার জুলির সঙ্গে চূড়ান্ত বোঝাপড়া করতে চাই। আমার কিন্তু বিশ্বাস হয় না যে জুলির ওটা বৈধব্যের সংস্কার। পুত্রশোকে কাতর হয়ে ওর শব্দ মশায় লম্বা ছুটি নেন ও অকালে রিটায়ার করেন। তার পরে সম্পত্তির একটা ব্যবস্থা করে বৃন্দাবনবাসী হন। জুলির নামে তাঁর এন্টেল থেকে মোটা মাসোহারা আসে। সেটা কিন্তু ততদিন ওর পাওনা যতদিন ও তাঁর পুত্রবধূ। জুলির বাবাও ওর নামে কিছু টাকা রেখে গেছেন। ওর কিসের অভাব! অভাবটা ওর বিপ্লবী গোষ্ঠীর। ওর মাসোহারার টাকা ওদেরই ব্যবহারে লাগে। ওরাই বোধহয় ওকে আবার বিয়ে করতে দিচ্ছে না।” দত্তবিশ্বাসের অমুমান।

“বেশ তো। জুলির সঙ্গে চূড়ান্ত বোঝাপড়ার জগ্গে সময় নিন। কলকাতা ফিরে যাবার আগে আমাকে কিন্তু জানিয়ে যাবেন কী স্থির হলো।” যুথিকা বলে।

“না, না, ওকে ওর মায়ের কাছে পৌঁছে না দিয়ে চূড়ান্ত বোঝাপড়া নয়। আমি এসেছি ওর এসকট হয়ে। ফিরে যাব এসকট হয়ে। কলকাতা থেকে মানসকে আমি টেলিগ্রাম করে জানাব জুলি না মিলি কাকে আমি বিয়ে করতে চাই। তাব খোঁজ কাউকেই কোনো আভাস দিও না। খাবার টেবিলে আজ আমাকে বসাবে ছ’জনের মাঝখানে?” দত্তবিশ্বাস অমুরোধ জানায়।

“তা কী করে সম্ভব, ছ’জনের টেবিল ওভাবে সাজানো যায় না। আমি মনে মনে ঠিক করেছি মানস আর আমি বসব মুখোমুখি দুই প্রান্তে। মানসের ডান দিকে জুলি, বাঁ দিকে মধুমালতী। আমার ডান দিকে আপনি, বাঁ দিকে সৌম্যদা। আপনার বাঁ দিকে জুলিকে বসালে আমি বসব কোথায়? মানসের ডান দিকে? স্বামী আর স্ত্রী পাশাপাশি বসে না। সেটা বিয়ের বেদীতে মানায়, কিন্তু খাবার টেবিলে বেমানান।” যুথিকা হেসে উড়িয়ে দেয়।

“আচ্ছা, এমন তো হতে পারে। আমি বসব মানসের জায়গায়, মানস বসবে আমার জায়গায়।” বিকল্প প্রস্তাব করে দত্তবিশ্বাস।

“একই কথা। স্বামীস্ত্রী পাশাপাশি। আপনি বিলেতে বসবাস করেন। আপনাকে এটিকেট শেখাতে যাব আমি! আমি তো ওদেশে যাইনি।” যুথিকা হাসে।

“না, ওটাও বেমানান। আমার মাথায় গোলমাল হয়ে গেছে। আচ্ছা, যুথিকা, মানসদের ক্লাবে বিষ টিষ রাখে?” দত্তবিশ্বাস প্রশ্ন করে।

“রাখে বই কি। ওটা ইউরোপীয়ান ক্লাব।” উত্তর দেয় যুথিকা।

“তা হলে আমাকে অনুমতি দাও, আমি মানসের সন্ধানে যাই। ও নিজে না থাক, আমাকে পাওয়াবে। ওটাই এটিকেট।” দত্তবিশ্বাস ছুটি নেয়।

যুথিকা চাপরাশিকে বলে সাহেবকে ক্লাবে পৌছে দিতে।

বাচ্চা দুটি বাইরে খেলা করছিল। ওদের সঙ্গে ছিল বেয়ারা আর আয়া। দূর থেকে দেখা গেল পায়ে হেঁটে আসছেন কম্পাউণ্ডের ভিতরকার রাস্তা দিয়ে এক সাদা খদ্দেরের ধুতী ও হাতকাটা জামা পরা দাড়িওয়ালা ভদ্রলোক। কাঁধ থেকে নেমেছে পাট দিয়ে তৈরি এক বোলা। মাথায় গান্ধী টুপী।

খবর পেয়ে যুথিকা বেরিয়ে আসে। “সৌম্যদা নাকি? এতদিন পরে মনে পড়ল। সেটা কি জুলির গুণে না আমাদের গুণে?”

“জুলি না এলেও আমি আসতুম। কই, তোমার বাচ্চারা কোথায়? আয়, ঘাখ, কী এনেছি তোদেব জন্তে। বাঘ, ভালুক, হাতী, সিংহ, বাজপাখী।” সৌম্য তার বোলা উজাড় করে দেয়। সব গ্রাম্য কারিগরের তৈরি কাঠের খেলনা। দেশী রঙে ছোপানো।

“সাপ! সাপ নেই কেন?” জিজ্ঞাসা করে সাতবছরের ছেলে দাঁপক।

“তাই তো। আনতে তুলে গেছি। আবার যখন আসব সাপ নিয়ে আসব। সাপ খেলাবার বাঁশিও আনব তার সঙ্গে।” সৌম্য তাকে কাছে টেনে নেয়। আর তার বোন মণিকাকে তুলে নিয়ে কাঁধে বসায়।

“এই! তোমরা প্রণাম করলে না কেন! করো, করো। ইনি কে জানো? জ্যাঠামশায়। গান্ধী মহারাজের শিষ্য।” যুথিকা ওদের প্রণাম করায়।

“এসব ফিউডাল প্রথা তুলে দেওয়াই ভালো। ছোট বড়ো সবাই সবাইকে প্রণাম করতে পারে না। যেটা সবাই সবাইকে করতে পারে সেটা ওদের ওই গুড মনিং বা গুড ইভনিং। কিন্তু ওর বাংলা করতে গেলে কৃত্রিম শোনায়। এ নিয়ে চিন্তা করতে হবে।” সৌম্য তার সঙ্গে জুড়ে দেয়, “মেয়েদেরও।”

“স্বস্তর শাস্ত্রীকে প্রণাম না করে ‘স্বপ্রভাত’ বলে অভিভাদন করবে কোন্ বোমা! দেখবে, তোমার স্বরাজের পরেও কারো সাহসে কুলোবে না। এমন কি, ওদের বিপ্লবের পরেও না।” যুথিকার ইঙ্গিতটা জুলি ও মধুমালতীর প্রতি।

“না, ওদেরও অত সাহস হবে না। সব চেয়ে কঠিন প্রাত্যহিক ব্যবহারে

বৈপ্লবিক পরিবর্তন। ফরাসীরা চাকরকে বলে, ‘মঁসিয়ে’, ঝিকে বলে, ‘মাদাম’, তাদের তুই তোকারি করে না। বলে, ‘আপনি’। ফরাসী বিপ্লব অনেক দিক দিয়ে ব্যর্থ হয়েছে। কিন্তু এদিক থেকে নয়। জুলিকে দিয়ে তুমি তোমার বেয়ারাকে ‘মশাই’ বলিয়ে নিতে পারবে? আর মধুমালতীকে দিয়ে তোমার আয়াকে ‘ঠাকরুণ’? দাড়াও, আমিই ওটা শুদ্ধ করে দেব।” সৌম্য মজা দেখতে চায়।

“এখন নয়। এই মুহুর্তে নয়।” যুথিকা শশবাস্ত হয়ে বলে। “ওরা হয়তো ঠাওরাবে আস্ত পাগল। এমনিতেই তো দাভিগোফে ঢাকা পড়েছে মুখ। দেখলে মনে হয় আদিম গুহামানব।”

“আমি বিলিতি ক্ষুর বর্জন করেছি। দেশী ক্ষুর দিয়ে কামালে ছালশুদ্ধ উঠে আসে। তা ছাড়া এতে কতকটা মুনি ঋষির মতো দেখায়। গ্রামের লোক কথা শোনে। মোলানা মোলবীর সঙ্গেও মিল আছে। মুসলমানদের শ্রদ্ধা পাওয়া যায়। আমার তো পূর্ববঙ্গে আসার কথা ছিল না। আম্রাব স্থান বিহারে। গান্ধীজী আমাকে এখানে পাঠিয়েছেন হিন্দু মুসলমানের মধ্যে পারস্পরিক বিশ্বাস উজ্জীবিত করতে। দুই পক্ষেই সাম্প্রদায়িক শক্তি অবিখ্যাসের বীজ বুনে চলেছে। আমি যেখানেই যাই হিন্দুদের বলি মুসলমানরা তোমাদের শত্রু নয়। মুসলমানদের বলি হিন্দুরা তোমাদের শত্রু নয়।” সৌম্য ব্যাখ্যা করে তার মৈত্রীতত্ত্বের।

“ওতে কিছু হবে না, সৌম্যদা। শুধু কথায় চিড়ে ভেজে না। কেউ কারো হাতে জল খাবে না। ছোঁওয়া লাগলে স্নান করবে। মানুষকে যতরকমে পারে অপমান করবে। এ কি আজকের সমস্যা না সাত শতকের? এ ভেদবুদ্ধি ইংরেজের সৃষ্টি নয়। এর সুযোগ নিচ্ছে ইংরেজ। তোমরা ইংরেজকে তাড়াতে পারো, কিন্তু নিজেদের অতীতের ভূতকে তাড়াতে পারবে না। সে তার ভুতুড়ে কাণ্ড করে যাবেই। আমরাও চেষ্টা করছি মেলাতে মিলতে। আজকের ডিনারেই দেখবে বৌদ্ধ বাবুঁচ ও মুসলমান খানসামা হিন্দু ও ব্রাহ্মণ আহার জোগাচ্ছে।” যুথিকা নিবেদন করে।

“আমার কথা যদি বলে আমি হিন্দু মুসলমান বৌদ্ধ খ্রীষ্টান ব্রাহ্মণ হরিজন ইতর ভদ্র সকলের হাতেই খাই। কিন্তু সব কিছু খাইনে। আমিষ চলে, কিন্তু তেল ঘি চলে না, ময়দা চলে না।” সৌম্য তার খাওয়ার কথা বলে।

“মধুমালতীর কাছে গুনেছি। তবে আমার ধারণা ছিল আপনি যখন গান্ধীজীর শিল্প তখন মাছমাংস খান না। আমরাও খাইনে, তবে তার কারণ অজ্ঞ।” যুথিকার চোখ ছলছল করে।

“আগে তো খেতে।” সৌম্যর মনে পড়ে।

“আপনি জানেন না বুঝি ?” যুথিকা ধরা গলায় বলে, “এখানে বদলী হয়ে আসার মুখেই একজনকে হারাই। জীবনযাত্রাকে শুদ্ধ করতে হবে, সরল করতে হবে, সেকথা ভেবে আমিষ ত্যাগ করি। তবে প্রোটিনের জন্যে ডিমটা ছাড়া হয় না। সুরা ও সিগারেট বর্জন করেছি, কিন্তু চা কফির নেশা কাটিয়ে উঠতে পারিনি। কমিয়ে দিয়েছি।”

সৌম্য সমবেদনা জানায়। তার পরে বলে, “মাছমাংস ছাড়লেই যে জীবনযাত্রা শুদ্ধ হয় এটা কেমন করে বিশ্বাস করব, যখন দেখি রামকৃষ্ণ মিশনের সাধুরাও আমিষ খান ? এক্ষেত্রে আমি বিবেকানন্দের পদাঙ্ক অনুসরণ করি। গান্ধীজীও অহুমতি দিয়েছেন। তবে সুরা ও সিগারেট ছেড়ে ভালোই করেছ। চা কফি তত খারাপ নয়। কিন্তু নেশা হলে খারাপ।”

মণিকাকে নিয়ে ওর মা অগ্ন ঘরে যান। সে সকাল সকাল খেয়ে শুতে যাবে। দীপকের সঙ্গে গল্প করতে থাকে সৌম্য। সাপ থেকে ওরা যখন শজারুতে পৌঁছেছে তখন বাইরে থেকে শোনা যায় হৈ হলা। ঝড়ের মতো ভিতরে ঢোকে জুলি। মস্তুর গতিতে মধুমালতী। স্ট্রিমার আর গাধাবোট।

“হ্যালো, মাস্টার মাল্লিক। হাউ ডু ইউ ডু ?” বলে জুলি দীপকের কবজিতে এমন চাপ দেয় যে বেচারী জ্বালা জ্বালা করে। কিন্তু ওকে ছাড়ছে কে ? দুই গালে সশব্দে চুমু খেয়ে জুলি ওকে দুই হাতে জড়িয়ে ধরে। “ওয়েল, সানি, আই অ্যাম ইয়োর আন্টি জুলি।”

মানস আর যুথিকা ওদের ছেলেমেয়েদের ইংরেজী শেখায়নি। সাতবছর বয়স হলো দীপকের। কিন্তু ও ছেলে ইংরেজী না পারে পড়তে না পারে বুঝতে, না পারে বলতে। জুলির সেটা জানবার কথা নয়। সে মহা বিরক্ত হয়ে সৌম্যদাকে বলে, “রেখেছ বাঙালী করে, মাহুষ করনি।”

আওয়াজ শুনে যুথিকা বেরিয়ে আসে। তার সঙ্গে মণিকা। আড়াই বছরের সেই বাচ্চাকে কোলে তুলে নেয় জুলি। তারপর আকাশে ছুঁড়ে লোফালুফি করে। যেন রবারের বল। তা দেখে ওর মা তটস্থ। এখনো আলাপ হয়নি। তবে ও যে জুলি ছাড়া আর কেউ নয় এটা অনুমান করতে সময় লাগে না যুথির।

“এ বেবীর ইংরেজী শেখার বয়স হয়নি। এই খুকু, আমি তোমার মাসী। জুলি মাসী।” যুথিকার দিকে হাত বাড়িয়ে বলে, “মিসেস মাল্লিক, আই প্রিজিউম।”

আজিকার অরণ্যে একমাত্র শ্বেতাঙ্গকে আবিষ্কার করে স্ট্যানলি যেমন বলেছিলেন “ডক্টর লিভিংস্টোন, আই প্রিজিউম ?”

যুথিকা ওর হাতে হাত রেখে বলে, “আম্বন, মিলেস সোম, মণিকে ঘুম পাড়াবেন। ঘুমপাড়ানী মাসী পিসী ঘুম দিয়ে যা।”

মধুমালতীকে অভ্যর্থনা করে যুথিকা সৌম্যদাকে বলে ওর ভার নিতে। দীপকও প্রণাম করে ওর পড়ার ঘরে চলে যায়। তার গৃহশিক্ষক অপেক্ষারত। পড়া সেরে ও সাতটার সময় থাকে।

“জুলির কাণ্ডকারখানা দেখলেন, সৌম্যদা?” মধুমালতী বলে, “বাচ্চারা যেন ওর খেলার পুতুল। ওর স্বামী বেঁচে থাকলে এতদিনে ওরও দু’তিনটি খোকাখুকু হতো। যে মা হওয়ার জন্তে জন্মেছে সে কেন যে বিধবা হয়? বিধাতার কী অন্ডায়!”

“কথাটা কিন্তু বিপ্লবীর মুখে শোভা পায় না, মিলি। যে বিপ্লবী হওয়ার জন্তে জন্মেছে সে কেমন করে মা হয়?” সৌম্য পরিহাস করে।

“জুলিকে আমি বিপ্লবীর মধ্যে গণ্য করিনে। ওর এক বান্ধবী ওর ঘরে একটা রিভলবার রেখে যায়। ও তখন মৃত্ত বিলেত থেকে ফিরেছে। জানত না যে রিভলবার রাখাটা মস্ত বড়ো একটা অপরাধ। পুলিশ এসে হানা দেয়। বান্ধবীর নাম জানতে চাইলে ও নীরব থাকে। এর জন্তে ওকে ঢের নির্ধাতন সহিতে হয়। শেষে ওকে ওরা বন্দী শিবিরে পাঠায়। সেইখানেই ওর বিপ্লবের দীক্ষা। ওকে না ধরলে ও কোনোদিন বিপ্লবী হতো না। মণ্টেসরি ক্লাস নিয়েই আনন্দ পেতো আর দিত।” মধুমালতী জুলির পূর্বকথা বলে।

“শুনেছি ওর মুখে। কিন্তু বন্দী শিবিরে বাস করার সময় সন্ত্রাসের তপ্ত হাওয়া ওর গায়ে লাগে। ইংরেজরাই ওকে সন্ত্রাসবাদী বানায়। অনেক কষ্টে আমি ওকে সন্ত্রাসবাদ ছাড়াই। কিন্তু বীরত্বের যেসব দৃষ্টান্ত ও দেখেছিল সেসব ওর অন্তরে দেগে গেছে। ও বিশ্বাসই করতে পারে না যে বীরত্বের আরো একটা আদর্শ আছে, আরো সব দৃষ্টান্ত আছে। ধরাস্নায় তো যায়নি। দাঁড়িয়ে দাঁড়িয়ে মার খাওয়া সে দেখেনি। গুলীর সামনে বুক পেতে দেওয়া ও কল্পনা করতে পারে না। মরব, তবু মারব না, এই হচ্ছে আমাদের মতে বীরত্ব। ওদের মতে কাপুরুষত। ওকে আমি দোষ দিইনে। আমরা একটানতুন পথের পথিক। আমরা নিজেরাই নিজেদের আদর্শে স্থির থাকতে পারছিনে। তবে জুলি ঘুরে ফিরে আমাদের পথেই আসবে। যদি না আমরা নিজেরাই পথভ্রষ্ট হই।” সৌম্যের কণ্ঠে গভীর প্রত্যয়।

মধুমালতী বলে, “কেন আপনি ওকে বীরাজনা করতে চান, সৌম্যদা? দেখছেন না সাত সমুদ্র পার হয়ে এক রাজপুত্র এসেছে ওর সন্ধানে? বৈধব্যের সংস্কার না থাকলে এখনি ওর বিয়ে হয়ে যেত। ওই যুথিকার মতো ওরও স্বথের সংসার হতো।”



“যুথিকার সংসার নিছক স্তব্ধের নয়, মিলি। দীপক আর মণিকার মাঝখানে বয়সের ব্যবধান লক্ষ করেছে? আরো একজন ছিল মাঝখানে। সে আর নেই। আমি ওকে দেখেছি। কী সুন্দর ছেলে!” সোম্য ওকে দেখেছিল বছর তিনেক আগে।

“আহা রে!” মধুমালতী ব্যথিত হয়।

ওদিকে মাতে আর মাসীতে মিলে মণিকাকে ঘুম পাড়াতে গিয়ে নাজেহাল। ও মেয়ে কেমন করে টের পেয়েছে যে বাড়ীতে আজ পাটি আছে। তাতে ওরও পাটি আছে। যতরকমের রঙ ওর জানা সব একে একে দেখাবে।

“ওর উপরে জোর জবরদস্তি করতে যেয়ো না, বৌদি। ওর যখন খিদে পাবে তখন ও খাবে। ওর যখন ঘুম পাবে তখন ঘুমাবে। ওটাই ওর পক্ষে সুসময়। আর তুমি যে ওকে ঘড়ির কাঁটা ধরে থাওয়াতে আর শোওয়াতে চাও সেটাই ওর পক্ষে অসময়। আয়, মণি, আমরা বাজনা বাজাই।” এই বলে জুলি ওকে নিয়ে গিয়ে পিয়ানো বাজাতে বসে। মণিকাও ওর কচি আঙুল নিয়ে টুং টাং করে।

“ওর নিজের ছেলেমেয়ে না হলে ওর শিক্ষা হবে না।” যুথিকা বলে মধুমালতীর পাশে আসন নিয়ে।

“বৈধব্যের সংস্কার না কাটলে এ জন্মে নয়।” মিলি মস্তব্য করে।

“সোম্যদা, তুমি অমন চুপ করে বসে কেন? কী ভাবছ? সত্যগ্রহ কবে শুরু হবে।” যুথিকা ওর মনের কথা আঁচ করে বলে।

“ওটা তো আমার চিরদিনের ভাবনা। কিন্তু জোর জবরদস্তি করে যেমন কোলের মেয়েকে ঘুম পাড়ানো যায় না তেমনি দেশের জনগণের ঘুম ভাঙানো যায় না। তারও সময় অসময় আছে। আমরা চেষ্টা করতে পারি, ব্যর্থ হয়ে পিয়ানো বাজাতে পারি, কিন্তু সময়কে এগিয়ে আনতে পারিনে।” সোম্য মৌনভঙ্গ করে।

জুলি হঠাৎ পিয়ানো থামিয়ে উল্টো দিকে ফিরে তর্ক জুড়ে দেয়। “সময় আসবে কী? সময় এসে গেছে। তাকে বয়ে যেতে দিলে চিরতরে হারাবে। সময় আর জোয়ার কারো জন্তে সবুর করে না।”

“তুমি কী বলতে চাও খোলসা করে বল, জুলি।” মিলি উল্টো দেয়।

“সরকারী আমলার বাংলায় বসে আর কত খোলসা করব, মিলি? কেউ আড়ি পেতে শুনেছে কি না কে জানে!” জুলি যুথিকার দিকে তাকায়।

দীপকের গৃহশিক্ষক ছিল পড়ার ঘরে। যুথিকা উঠে গিয়ে দেখে সে ঘুবকটি কখন একলম্ব চল গেছে। বুঝতে পেরেছে যে ছাত্রের মন উড়ু উড়ু। বাড়ীতে লোকজন আসছেন। পাটি হবে।

“তুমি অসঙ্কোচে বলতে পারো, জুলি।” যুথিকা ইতিমধ্যে ‘আপনি’ থেকে ‘তুমি’তে নেমেছে। আর ‘মিসেস সোম’ থেকে ‘জুলি’তে।

জুলি এবার নির্ভয়ে বলে, “ইংলণ্ডের দুর্যোগই ভারতের স্বযোগ। দেশ প্রস্তুত, নেতারা প্রস্তুত নন।”

“ওঃ! তোমাদের গোষ্ঠীর বৈঠকে গিয়ে এইসব শুনেছ বুঝি! যা শুনেছ তারই প্রতিধ্বনি করছ।” সোম্য মুখ টিপে হাসে।

“কেন? আমার কি স্বাধীন চিন্তার ক্ষমতা নেই?” জুলি রেগে যায়। “কার না বুঝতে বাকী আছে যে হিটলারের আক্রমণে ইংরেজ নিজের ঘর সামলাতে ব্যস্ত থাকবে, সাম্রাজ্য সামলাবার অবকাশ পাবে না?”

“জুলি, তুমি তো ইংলণ্ডে বাস করেছ, ওদের খুব কাছে থেকে দেখেছ। তোমার কি বিশ্বাস যে ইংরেজরা সহজে কাং হবে? কাং যদি না হয় তো আবার সাম্রাজ্য ফিরে পেতে কতক্ষণ! যদি না আমরা ওদের চেয়ে আরো বলবান হতে পারি।” সোম্য ওকে শাস্ত করে।

এমন সময় মণিকা বলে ওঠে, “বাবার কাছে যাব।” ও কান পেতে শুনতে পেয়েছে বাবার পায়ের শব্দ।

“ও কে? সোম্যদা নাকি? ডুমুরের ফুল। আর উনি? মধুমালতী দেবী! যাঁর এত মধুর নাম তিনি সাক্ষাৎ রণচণ্ডী।” মানস ঘরে ঢুকে সবাইকে বাউ করে। “আর এই সেই আগুনের ফুলকি! জুলি নয়, জুলকি। তোমরা যে সময়ের আগেই আসবে তা জানলে আমি দত্তবিশ্বাসকে ড্রিন্স অফার করতুম না। আর সেও আমাকে তার দুঃখের কাহিনী শোনাত না।”

মানসের পেছনে দাঁড়িয়ে দত্তবিশ্বাসও সবাইকে বাউ করে।

মণিকা এর মধ্যেই বাবার কোলে উঠেছিল। মানস ওকে কোতুক করে কোলাস্তরিত করতে গেলে দত্তবিশ্বাস এক কদম পেছিয়ে যায়। পোশাকের ভাঁজ নিয়ে ও বিষম খুতখুতে। ভাঁজ নষ্ট হয়ে যাবার ভয়।

“দত্তবিশ্বাস,” মানস বলে সোম্যকে, “সেইরকমই আছে। শরীরের চেয়ে পোশাক ওর কাছে প্রিয়। ইংরেজরা মাহুঘ চেনে কী দেখে? মুখ দেখে নয়, স্টুট দেখে। ওটা যদি হয় সাভিল রোর স্টুট বা বগু স্ট্রিটের স্টুট তা হলে তুমি অভিজাত কুলের। ওর মাথায চাঁটি মারলে ও ততটা ব্যথা পাবে না যতটা পাবে ওর কোট বা ট্রাউজার্স কুঁচকে গেলে। এত বয়স হলো, এখনো ঘর বাঁধল না। তার মূলে ওই একই ভয়।”

“চৌধুরী,” দত্তবিখাস বলে, “তুমি সাধুসন্ত মাহুষ তখনো ছিলে, এখনো আছে। কিন্তু মল্লিকের মধ্যে একটা আমূল পরিবর্তন দেখছি। ও এখন অন্নপায়ী বঙ্গবাসী স্তম্ভপায়ী জীব। আমাদের এক পেগ হইন্সি ধরিয়ে দিয়ে নিজে খায় পাইনেপল জুস।”

মণি ততক্ষণে কোল থেকে কোলে বিহার করছে। অবশেষে উঠেছে মধুমালতীর কোলে। আর দীপক এক কোণে লাজুক ছেলের মতো মাথা নিচু করে দাঁড়িয়েছে। এগোবে না পেছোবে বুঝতে পাবছে না।

সৌম্য বলে, “ওহে মানস, তোমার আসার আগে আমাদের কী নিয়ে আলোচনা হচ্ছিল, শুনবে? ইংলণ্ডের দুর্যোগই ভারতের স্বেযোগ। বৈঠকে গিয়ে জুলি এই স্ত্রী শিখে আসুক বা নিজেই উদভাবন করুক আমরা এ নিয়ে তর্কবত।”

“এমন স্বেযোগে পঁচিশ বছর পরে আরো একবার এসেছে। সেবার আমরা ট্রেন ফেল করেছি। এবারেও যদি করি তবে তৃতীয় মহাযুদ্ধের জন্তে অপেক্ষা করতে হবে। এই হলো বৈঠকের আলাপ আলোচনার সারমর্ম।” জুলি ঘুরিয়ে বলে।

“ট্রেন ফেল করেছি বলতে তুমি কী বোঝাতে চাও, জুলি?” দত্তবিখাস উত্তেজিত হয়। “স্বেযোগই বা কিসের? ইংলণ্ডের দুর্যোগ ভারতেরও দুর্যোগ। ইংরেজ যদি সাম্রাজ্য হারায় তো সে সাম্রাজ্য জার্মানরাই-সন্ধিস্থত্রে পাবে। নাৎসীদের হাতে পড়োনি তো কখনো। পড়লে টের পেতে কী নৃশংস। এটা অবশ্য রাম রাবণের যুদ্ধ নয়, ইংরেজেরও দোষ আছে, তবু দুটো মন্দের মধ্যে ইংরেজরাই কম মন্দ। ওদের হটালে বেশী মন্দের কবলে পড়বে।”

“আমি গভীরভাবে চিন্তিত।” মানস বলে। “এই স্বেযোগে স্বাধীন হয়েই বা আমরা করব কী? একপক্ষ না একপক্ষের শিবিরে যোগ দিয়ে লড়ব। নিরপেক্ষ থাকা সম্ভব নয়। কোন্ পক্ষে যোগ দেব? জার্মান পক্ষে যোগ দেওয়া বুদ্ধিমানের কাজ নয়, যোগ দিতে হলে ইংরেজ পক্ষেই যোগ দিতে হয়। কিন্তু দাসহিসাবে নয়, মিত্র হিসাবে। ওরা যদি আমাদের দাসত্বের শিকল খুলে দেয় আমরা ওদের দিকেই ঝুঁকব? যদি না দেয়—যদি না দেয়—”

“তা হলে আমরা কোনো দিকেই ঝুঁকব না। সত্যগ্রহের জন্তে ক্ষেত্র প্রস্তুত করব। উপযুক্ত লগ্নের জন্তে অপেক্ষা করব।” সৌম্য তার বন্ধুর বাক্য পূরণ করে।

যুথিকার মনে পড়ে দীপকের খাবার সময় হয়েছে। সে সাতটার সময় খায়। আটটার সময় শুতে যায়। তাই যুথিকা উঠে যায়। তর্ক চলতে থাকে।

মণি হঠাৎ বলে, “মার কাছে যাব।” তার ঘুম পেয়েছে।

## ॥ তিন ॥

জুলি এবার মণির সঙ্গে যায় না। পিয়ানোর টুল থেকে নেমে এসে সোফায় বসে। মিলির পাশে। বলে, “সোম্যাঁদা, তোমরা গান্ধীপন্থীরা কি বুঝতে পারছ না যে এবার ট্রেন ফেল করলে তোমরা বরাবরের জন্তে ফেল। তৃতীয় মহাযুদ্ধ যখন বাধবে তখন দেখবে তোমাদের দিন গেছে। তোমাদের গুরু তার আগেই দেহত্যাগ করে থাকবেন। সত্তর বছর বয়স হলো। আর কদিন বাঁচবেন!”

“এমনও তো হতে পারে যে ট্রেন আমাদের জন্তে স্টেশনে দাঁড়িয়ে থাকবে। আমরা যতক্ষণ না তৈরি হচ্ছি ততক্ষণ ছাড়বে না।” সোম্যাঁ হেঁয়ালীর ভাষায় বলে।

“মিলি, তুমি কি এর মর্ম কিছু বুঝলে?” জুলি মিলির মুখের দিকে তাকায়।

“এর মর্ম যুদ্ধ একদিনে খতম হচ্ছে না। গোড়ার দিকে সত্যগ্রহণ না করে পরে একসময় করলেও চলবে। সেবারকার যুদ্ধ চারবছর ধরে চলেছিল। এবারকার যুদ্ধ কদিন চলবে বলতে পারেন, মিস্টার দত্তবিশ্বাস?” মিলি স্বকুমারের হাতে খেঁই ধরিয়ে দেয়। সে সত্তর বিলতে থেকে ফিরেছে।

“সেবারকার যুদ্ধে,” দত্তবিশ্বাস বলে, “রাশিয়া ঝাঁপ দিয়েছিল, আমেরিকা ঝাঁপ দিয়েছিল। এবার ওরা এখনো ঝাঁপ দেয়নি, পরে দেবে কি না বলা যায় না। রাশিয়া তো জার্মানীর সঙ্গে চুক্তি করে সরে দাঁড়িয়েছে। যুদ্ধক্ষেত্র যদি এর চেয়ে বিস্তৃত না হয় তবে যুদ্ধকালও বিস্তৃত হবে না। কাজেই চৌধুরীর ওই ওয়েট অ্যাণ্ড সী পলিসি খুব একটা ভুল নয়। যুদ্ধ যদি সীমাবদ্ধ থাকে তা হলে বছর দুই-ওর স্থিতিকাল। যদি রাশিয়া আমেরিকা জাপান জড়িয়ে পড়ে তবে চার বছর তো মিনিমাম।”

“পাঁচবছরও লাগতে পারে।” মানস মন্তব্য করে।

“হ্যাঁ, কিন্তু জানবে কী করে যে পরে ওই সব শক্তি জড়িয়ে পড়বে? রাশিয়ার গরজটা কিসের? বিনা যুদ্ধেই কেমন অর্ধেক পোলাও হাতিয়ে নিয়েছে। হিটলার হেরে গেলে অর্ধেক জার্মানীও দখল করতে পারে। বাধা দেবে কে? আর হিটলার যদি জেতে তবে লড়তে লড়তে বলক্ষয় করে থাকবে। রাশিয়া যা চাইবে তাই পাবে। বলকান কী বলটিক রাজ্য। আমার মনে হয় না রাশিয়া এবার নামবে। আর আমেরিকা? হ্যাঁ, আমেরিকা নামতে পাবে, ইংলও ফ্রান্সকে রক্ষা করতে। তা হলে ওই চারবছরই আমার এন্টিমেট।” দত্তবিশ্বাস মিলির দিকে চেয়ে বলে।

“হিটলারের সঙ্গে হাত মিলিয়ে স্টালিন যে অপকর্ম করেছেন তাতে আমার বিশ্বাস টলে গেছে কমিউনিস্টদের উপর। গত বছর যেমন টলেছিল ইংলওয়ে রক্ষণশীলদের উপর। ওরা করেছিল মিউনিক চুক্তি। এরা করেছে অনাক্রমণ চুক্তি। কার্ভত পোলাও ভাগ করার ফন্দী। আর আমি মরছি পোলাওকে বাঁচানোর কথা ভেবে। গতবছর যেমন পীড়িত হয়েছিলুম চেকোস্লোভাকিয়াকে বাঁচানো গেল না দেখে। মনে মনে শাপাস্ত করেছিলুম ইংরেজ ফরাসীদের। কী কাপুরুষ ওরা। চেকদের বলি দিয়ে নিরাপদ হলো! এবার ওরা পোলাওর জন্তে ঝাঁপিয়ে পড়েছে। তাই আমি ওদের সাধুবাদ দিচ্ছি। আমার মতে ওরা যাতে জয়ী হয় তার জন্তে সর্বপ্রকার সাহায্য জোগানো উচিত আমাদের। এটা আমাদের মানবিক কর্তব্য।” মানস বলে যায় আবেগের সঙ্গে।

জুলি তেড়ে আসে। “কী বললে! সর্বপ্রকার সাহায্য। না একো জওয়ান, না একো রুপেয়া। সেবার দিয়েছি, দিয়ে ঠকেছি। এবার দেব না, ঠকব না। ওরা আগে তো আমাদের স্বাধীনতা আমাদের ফিরিয়ে দিক। তারপর আমরা ভেবে দেখব ওদের সাহায্য করব কি করব না।”

“তা হলে পোলাও ডুববে, আমরা দাঁড়িয়ে দাঁড়িয়ে দেখব।” মানস আকুল হয়।

“আমি মানসের সঙ্গে একমত।” দত্তবিশ্বাস বলে। “মিউনিক চুক্তির সময় আমি বিলেতের জনমতের বিস্তারিত দেখেছি। ইংরেজরা কেউ যুদ্ধের পক্ষপাতী ছিল না। সকলেই চেয়েছিল শান্তিতে বাস করতে। কিন্তু হিটলারের দ্বিগ্বিজয় অব্যাহত চলতে থাকলে ওরাই বা কদিন নীরব সাক্ষী হয়ে শান্তিতে বাস করতে পারবে? ইংলও ফ্রান্সের পর আসবে ভারতেরও পালা। দাঁড়িয়ে দাঁড়িয়ে দেখা দিন দিন দুষ্কর হবে। মানস ঘরে বসে মন খারাপ করবে। আমি কিন্তু চললুম লগুনে ফিরে। ওদের সঙ্গে কাঁধে কাঁধ মিলিয়ে আমিও লড়ব।”

মধুমালতী শিউরে ওঠে। “সে কী! আপনি এই সেদিন বিলেত থেকে ফিরলেন! আবার যাবেন ওদেশে! যুদ্ধের মাঝখানে। আপনার কি প্রাণের মায়া নেই?”

“প্রাণের চাইতেও মূল্যবান জিনিস আছে, মিস মুস্তাফী। তা নইলে আপনিই বা আগুন নিয়ে খেলতে গেলেন কেন? ইংরেজরা নাৎসী নয় বলেই আপনি বেঁচে গেলেন। নইলে আপনার চিতাভস্ম একটি বোতলে পুরে আপনার মা-বাবার কাছে পাঠিয়ে দিত। দেশ আপনার কাছে প্রাণের চেয়েও মূল্যবান। তেমনি আমার কাছে মূল্যবান ইংলণ্ডের গণতান্ত্রিক জীবনধারা। আমি নির্ভয়ে নিঃশ্বাস নিতে পারি। কথা বলতে পারি। চিন্তা করতে পারি। বিশ্বাস করতে পারি। চলুন না একবার ওদেশে। দেখবেন গণতান্ত্রিক জীবনধারা কত মূল্যবান।” দত্তবিশ্বাস মধুমালতীকে প্রবর্তনা দেয়।

“বলেন কী! আমি যাব আমার প্রভুদের দেশে গণতান্ত্রিক জীবনধারা দেখতে! সে কী রকম গণতন্ত্র যার জন্ম অপর একটি জাতির পিঠে সিদ্ধবাদের বুড়োর মতো চেপে থাকতে হয়? একটি দাসজাতি না থাকলে তাদের মতো প্রভুজাতির সে রকম গণতন্ত্র সম্ভব হতো না। আপনি প্রাণ দিতে যাচ্ছেন আপনার প্রভুজাতির প্রভুত্বের জন্ম। আমি যদি প্রাণ দিই তো দেব আমার দাসজাতির মুক্তির জন্ম।” মধুমালতী বলে।

দত্তবিশ্বাস আর তিনজন বিলেতক্ষেত্ৰের কাছে আপীল করে। “চৌধুরী, মল্লিক, জুলি, তোমরাও তো ওদেশে বাস করেছ। ওদের গণতান্ত্রিক জীবনধারা কেমন মূল্যবান তোমরাও কি উপলব্ধি করোনি? সাম্রাজ্য থাকা না থাকার উপরেই কি কি নির্ভর করে ওদের গণতান্ত্রিক জীবনধারা?”

“গণতান্ত্রিক বিবর্তন এখনো পূর্ণতা পায় নি। পাবে যখন শ্রমিক শ্রেণীর হাতে ক্ষমতা আসবে ও তাদের দুর্গতি দূর হবে।” মানস বলে, “তা হলেও ইংলণ্ডে যা আছে তা অপূর্ণতা সত্ত্বেও মহামূল্য। রাজনৈতিক শরণার্থীদের আর কোন্ দেশ অমন অবাধে শরণ দেয়? মার্কস তো ইংলণ্ডে বসেই বিপ্লবের শাস্ত্র প্রণয়ন করেন। শাস্ত্র না হলে শুধু কি শব্দের দ্বারাই বিপ্লব হয়? লেনিনও তো ব্রিটিশ মিউজিয়মে পড়াশুনা করে বিপ্লবের তাত্ত্বিক ভিত্তি পাকা করেছিলেন। গণতন্ত্রের দেশ না হলে আর কোথায় আশ্রয় নিয়ে এঁরা ধনতন্ত্রের স্বত্বাধার নির্মাণ করতেন?”

“গণতন্ত্রের মাপকাঠি যদি এই হয় যে সাধারণ লোক পুলিশের ভয়ে ভীত নয় তবে ইংলণ্ডে গণতন্ত্র আছে। কিন্তু ওটা হলো একটা নেতিবাচক সংজ্ঞা। সাধারণ

লোকের ক্ষমতা তো ওই ভোট দেওয়া পর্যন্ত। সিদ্ধান্ত নেওয়ার ক্ষমতা মুষ্টিমেয় মন্ত্রী হাতে। তাঁদের মধ্যে প্রধানমন্ত্রীই চূড়ান্ত ক্ষমতার অধিকারী। রাজনৈতিক ক্ষমতার মতো অর্থনৈতিক ক্ষমতাও কেন্দ্রীভূত। মুষ্টিমেয় ধনপতিই পলিসি পরিচালনা করেন। তাঁদের পরিচালনায় লক্ষ লক্ষ শ্রমিক বেকার হয়। বেকারদের সৈনিকে পরিণত করলে সমস্যার একপ্রকার সমাধান হয় বটে, কিন্তু তার জন্তে চাই বিশ পঁচিশ বছর অন্তর অন্তর যুদ্ধবিগ্রহ। যুদ্ধে বহু লোক মরবে, সেটাও একপ্রকার সমাধান। আমি তো মনে করি না যে যুদ্ধ বিনা ওদের গণতন্ত্র নিজের পায়ে দাঁড়াতে পারে।” সৌম্য অভিমত দেয়।

এর পরে জুলির পালা। “ভারত যখন স্বাধীন হবে তখন সে চাইবে সমাজতান্ত্রিক জীবনধারা, তার সঙ্গে যতটা খাপ খায় ততটা গণতান্ত্রিক জীবনধারা। সেদিক থেকে ব্রিটেন আমাদের আদর্শ নয়। ব্রিটেনের ওই পাল’মেন্টারি ডেমোক্রাসীর জীবনমরণ সমস্যা আমাদের জীবনমরণ সমস্যা নয়। ইংলণ্ডের এই ভূখণ্ডে আমরা দুঃখিত কিন্তু আমরা কেন আমাদের এই স্বযোগ হেলায় হারাব?”

দশবছর আগে ওরা চারজনেই লগুনে ছিল। দশবছর পরে আবার মিলিত হয়েছে। এ মিলন কি তর্ক বিতর্কেই কণ্টকিত হবে? দীপকের আহ্বার সারা হলে যুথিকা ফিরে এসে বলে, “চার বন্ধুর এই সম্মিলন বার বার ঘুরে আসুক এটাই আমার অন্তরের কামনা।”

“আমাদের চারজনেরই।” মানস সুর মেলায়।

“আমার কথা যদি বলো, আমি বোধহয় আর এদেশে ফিরব না। বেঁচে থাকলে ওই দেশেই ঘর বাঁধব।” দত্তবিশ্বাসের কণ্ঠে বিষাদ।

“সে কী হে।” সৌম্য বিস্মিত হয়। “এদেশ কী অপরাধ করল?”

“না. দেশের কোনো অপরাধ নেই। আমারই নিয়তি। এমন কেউ নেই যে এদেশে আমাকে টেনে রাখতে পারে বা চায়।” দত্তবিশ্বাস কৈফিয়ৎ দেয়।

“কেন, আপনার মা বাবা ভাই বোন?” মধুমালতী সূধায়।

“মা অনেকদিন আগে দেহরক্ষা করেছেন। বাবা দ্বিতীয় সংসার নিয়ে সূখে আছেন। বোনদের বিয়ে হয়ে গেছে। সোদর ভাই যেটি ছিল সেটি নিরুদ্দেশ। আমার তেমন কোনো বন্ধন নেই এদেশে। ওদেশেই আমার দানাপানি। তা ছাড়া এই ঐতিহাসিক মুহূর্তে বেঁচে থাকার যে উন্মাদনা সে তো ওই দেশেই। ওখানে আমি একজন দর্শক নই, আমি একজন অভিনেতা।” দত্তবিশ্বাস বুক ফুলিয়ে বলে।

“কেন, হুকুমারদা, তোমার কি বিশ্বাস হয় না যে এই যুদ্ধের কল্যাণেই ভারতের মাটিতেও একটা বিপ্লব ঘটবে? যেমন ঘটেছিল সেবার রাশিয়ায়। এই ঐতিহাসিক মুহূর্তে স্বদেশে উপস্থিত থাকাই তো সুবুদ্ধি।” জুলি হাসিমুখে বলে।

“আমিও তাই মনে করি।” জুলির সমর্থক মিলি। “তবে সেটা বিপ্লব না গণসত্যাগ্রহ না সিপাইবিদ্রোহ তা কেমন করে বলব?”

“অমন একটা অনিশ্চিত অঘটনের জন্যে পায়চারি করতে আমি নারাজ। হত্যাশ হয়ে জাহাজ ধরতে চাইলেও আর জাহাজ পাব না। শেষ যাত্রীজাহাজ ছাড়ছে অক্টোবরের গোড়ার দিকে।” দত্তবিশ্বাস ঘোষণা করে।

মানস চমকে ওঠে। “তুমি তা হলে দেশ ছেড়ে চিরকালের মতো চললে আর তিন সপ্তাহের মধ্যে।”

“চললুম ওয়েস্টার্ন ফ্রন্টে। সেবারেও তো বাঙালী সৈনিকরা গেছিল ওয়েস্ট এশিয়ার যুদ্ধক্ষেত্রে। বাঙালীরা যদি ঘরে বসেই বিপ্লব ইত্যাদি করে তবে তাদের ক্ষুদ্র জীবনের অভিজ্ঞতা মহাজীবনের অভিজ্ঞতা হবে না। কী করে ওরা কেউ লিখবে টেলস্টায়ের মতো ‘ওয়ার্‌স আণ্ড পীস’? একা নজরুল বাঙালীর মান রেখেছেন কয়েকটি কবিতা লিখে। তাও করাচীর ওধারে না গিয়ে।” দত্তবিশ্বাস বলে।

“আমার তো খুবই ইচ্ছে করে ফ্রন্টে যেতে, বন্দুক হাতে নয়, কলম হাতে। কিন্তু যেতে দিচ্ছে কে? সেবারকার মতো এবারেও মিডিলিয়ানদের অনেকে সরকারের অনুমতি চেয়েছিলেন ফ্রন্টে যেতে। বড়লাট সবাইকে জানিয়ে দিয়েছেন যে এবার কাউকেই অনুমতি দেওয়া হবে না। প্রধান সেনাপতির সঙ্গে পরামর্শ করে তিনি এ পত্র পাঠিয়েছেন। মনে হয় তিনি অনুমান করছেন যে এই দেশটাই ফ্রন্ট হবে। কিংবা তিনিও প্রতীক্ষা করেছেন বিপ্লবের বা গণসত্যাগ্রহের বা সিপাইবিদ্রোহের। কাজেই আমার ইচ্ছে থাকলেও তোমার সঙ্গে একই জাহাজে পশ্চিমযাত্রা হয়ে উঠছে না, ভাই দত্তবিশ্বাস। না হতে পারছি টেলস্টায়, না নজরুল।” আক্ষেপ করে মানস।

যুথিকা তার স্বামীকে শাসায়। “তোমার মনে মনে এই মতলব! তুমি যুদ্ধ দেখতে ওয়েস্টার্ন ফ্রন্টে যেতে। পারলে না বলে আকসোস করছ।”

“আমার একটুও ভালো লাগছে না ইতিহাসের এই ক্রান্তিকারী লগ্নে নীরব দর্শক হতে। এত বড়ো একটা ঘনঘটা হবে তাতে আমি থাকব না। ভাই দত্তবিশ্বাস, তোমার মতো আমি স্বাধীন নই। একে চাকুরে তার উপর সংসারী। তাই আমি ষোট মিস করছি। ঘটনাস্রোতের পোত।” মানসের খেদোক্তি।



“তোমাকে তো আমি আমার জাহাজের সহযাত্রী হতে বলিনি। আমার আশা ছিল একজন সাহসিক। আমার সহযাত্রী হবেন। সেই আশায় এদেশে আসা। ‘আমার সাধ না মিটল, আশা না পুরিল, সকলি ফুরিয়ে যায়, মা।’ তোমার মতো নীরব দর্শক আমি হব না, তা ঠিক। কিন্তু বোমা যখন বর্ষণ হবে তখন দর্শনেরও স্বযোগ পাবে না, আমাকে গর্তে ঢুকে গা বাঁচাতে হবে। না, কাউকে সহযাত্রী হতে না বলাই ভালো। জাহাজটাই না টর্পেডোর ঘা লেগে বায়েল হয়। তখন হয়তো লাইফবোয় ধরে ভাসতে হবে। আমার ধারণা ছিল না যে লড়াইটা এত তাড়াতাড়ি বাধবে। যেদিন বাধে তার দু’দিন আগেও সার হীরেন তাঁর স্ত্রী লেডী মিটারকে বলেছিলেন যে সবাই মিলে শান্তির প্রয়াস চালিয়ে যাচ্ছে, যুদ্ধ যদি একটা মাসও পেছিয়ে যায় তবে শীত এসে পড়বে, তখন কেউ যুদ্ধে নামবে না। কিন্তু মানুষ ভাবে এক আর হিটলার ঘটায় আরেক।” দত্তবিশ্বাস একটু রসিকতার চেষ্টা করে।

বসবার ঘরেই স্নপ পরিবেশন করা হলো। যে যার নিজের পেয়ালায় চুমুক দিয়ে তারিফ করে খেতে লাগল। তারপর গেল খাবার ঘরে ও যে যার নির্দিষ্ট স্থানে।

যুথিকার ডান পাশে দত্তবিশ্বাস ও বাঁ পাশে সৌম্য। মানসের ডান পাশে মঞ্জুলিকা ও বাঁ পাশে মধুমালতী। আপাতত বন্দুক বেগোনেট নিয়ে লড়াই নয়, কাঁটা চামচ নিয়ে লড়াই। সৌম্যর মতো গান্ধীপন্থীও তাতে অনভ্যস্ত নয়। মগ বাবুটি ওর জন্তে আরো অনেক রকম পদ রেঁধেছিল, যা যুথিকার দেওয়া ফর্দের বাইরে। দেখা গেল তাতেই ওর তৃপ্তি।

এই নিয়ে মধুমালতী কটাক্ষ করলে সৌম্য বলে, “তোমার জানা উচিত মিলি, যে আমরা গান্ধীপন্থীরা কেউ হঠযোগী নই। আমরা কর্মযোগী। আমাদের জন্ত অপেক্ষা করছে কারাগার। সেইজন্তে আমরা প্রিজন্ ডায়েট খেতে অভ্যাস করি। বন্দী হলে আমরা আহার নিয়ে খুঁতখুঁত করব না। তা যদি করি তো লক্ষ্যভ্রষ্ট হব।”

“কিন্তু এ যে অতি পরিপাটি আহার।” মধুমালতী মন্তব্য করে।

“হ্যাঁ। অনেকদিন পরে এর আশ্বাদন নিচ্ছি। কিন্তু এতে আসক্ত হচ্ছিনে। আমাদের যোগ অনসক্তি যোগ।” সৌম্য হাসে।

“আচ্ছা, হিটলার তো নিরামিষভোজী?” জানতে চায় মধুমালতী।

“হ্যাঁ, হিটলারও সেদিক থেকে অহিংসাবাদী। মদও স্পর্শ করেন না। শোনা যায় উর্বশী মেনকারাও তাঁকে ভোলাতে পারে না। অজুনের মতো ব্রহ্মচর্যব্রতধারী। অথচ হিংসার অবতার। কী করে এই প্যারাডক্স সম্ভব হলো?” সৌম্যই জিজ্ঞাসু।

কেউ এর উত্তর দিতে পারে না। মধুমালতী বলে, “হিটলারকে রাক্ষস বলে

চিত্রণ করে কোনো ফল হবে না এদেশে। রাফসরা কেউ নিরামিষভোজী স্বরাত্যাগী ব্রহ্মচারী ছিল না। দেবতারাও না। পুরাণে ইতিহাসে এটি একটি অভূতপূর্ব চরিত্র। জার্মানরা যে ওকে এত মানে তার মূল কারণ রাজনৈতিক নয়, নৈতিক।”

“এদেশে দেখছি হিটলারের অগণ্য ভক্ত। অনেকের বিশ্বাস হিটলার আসলে একজন নিষ্ঠাবান হিন্দু। তার প্রমাণ হিন্দুদের স্বস্তিক হিটলার তাঁর বাহুতে ধারণ করেন। স্বস্তিক তাঁর নাংসী দলেরও প্রতীক। ওরাও নাকি আসলে হিন্দু। এমন কথাও শুনে পাই যে হিন্দু আর জার্মান এরাই আসলে আর্থ। আর্থত্বের উপর জার্মানরা তাই এত জোর দেয়। জার্মানরা জিতলে আর্থরা আবার ভারতে আসবে। এদেশের আর্থদের সঙ্গে হাত মেলাবে। যখন জানতে চাই, কী করে বুঝলে যে ওরা জিতবে তখন উত্তর পাই, যে-মানুষ কামরিপুকে জয় করতে পারে সে-মানুষ জগৎ জয় করতে পারে। হিটলার নাকি সেই মানুষ। ‘হাইল হিটলার’ বলে জয়ধ্বনি করার জন্যে এদেশের বহু লোক উন্মুখ হয়ে রয়েছে। এদের যা কিছু আকোশ তা ইংরেজের বিরুদ্ধে।” দত্তবিশ্বাস দীর্ঘ নিঃশ্বাস ছাড়ে।

“সেই যে একটা কথা আছে, আমার শত্রুর যে শত্রু সে আমার मित्र। ইংরেজ যদি আমাদের শত্রু না হতো হিটলারকে বা তার নাংসীদের কেউ मित्र ভাবত না। ইংরেজ যদি আমাদের मित्रতা চায় তো আমাদের স্বাধীনতার দাবী মিটিয়ে দিক। তা হলে আমরাও ইংরেজের দাসহিসাবে নয় मित्रহিসাবে লড়ব।” মধুমালতী বলে।

জুলি তার উক্তির সংশোধন করে। “ওটা কিন্তু আমাদের পার্টির লাইন নয়, মিলি। আমরা বলি, আগে তো ইংরেজ আমাদের ঘাড় থেকে নামুক। তারপরে আমরা ভেবে দেখব এ যুদ্ধে আমরা আদৌ পক্ষ নেব কি নেব না। নিলে কাদের পক্ষ নেব। কার্যত ইংরেজ ফরাসীর পক্ষই নেব। ফাসিস্টদের পক্ষ নয়।”

“কিন্তু কারো কারো কথাবার্তা শুনে মনে হতে পারে তারা ফাসিস্টদের পক্ষও নিতে পারে, যদি সেই উপায়ে স্বাধীনতা লাভ হয়।” মিলিও সংশোধন করে।

“উদ্দেশ্যসিদ্ধির জন্যে যে-কোনো উপায় অবলম্বনীয়, তাই যদি হয় তবে এটাও তো একটা উপায়। গোঁড়া কমিউনিস্ট স্টালিন যদি গোঁড়া ফাসিস্ট হিটলারের সঙ্গে চুক্তি করতে পারেন তবে গোঁড়া সাম্রাজ্যবাদবিরোধীরা কেন গোঁড়া গণভক্তবিরোধীদের সঙ্গে সমঝোতা করতে পারবে না? উদ্দেশ্যটাই সব, উপায়টা কিছু নয়।” জুলির বক্তব্য। অর্থাৎ তার গোষ্ঠীর।

“জুলি, তুমি ওদের সংসর্গ ত্যাগ করো। ওরা কোনোদিনই সফল হবে না।

মাঝখান থেকে বিপদ ডেকে আনবে তোমার মতো সরলা বালিকাদের উপরে। ইয়া, তুমিও একটি সরলা বালিকা।” মানস ওকে হুঁশিয়ারি দেয়।

“আমি কি এখনো তেমনি বালিকা আছি? লগুনে যেমনটি দেখেছিলে, মানসদা। এই দশ বছরে আমি কত দেখেছি, কত শিখেছি।” জুলি আত্মসমর্থন করে।

“এই তো মিস মুস্তাফী এখানে রয়েছেন। তিনি তো উদ্দেশ্যসিদ্ধির জন্যে বিশ্বের গণতন্ত্রবিরোধী শক্তিজয়ের সঙ্গে সমঝোতা করবেন না।” মানস আন্দাজ করে।

“কী, মিলি? এটাই কি তোমাদের পার্টি লাইন?” জুলি বাজিয়ে দেখে।

“আমি এখন কোন পার্টিতেই নেই। বাবার বারণ। দেশকে ভালোবাসি। তার মুক্তি চাই। এই পর্যন্ত আমি তোমাদের সঙ্গে আছি। কিন্তু যে-কোনো উপায় অবলম্বনীয় এতদূর যেতে আমি অনিচ্ছুক। স্বচক্ষে দেখলুম তো সন্ত্রাসবাদী উপায়ের পরিণাম। ইংরেজ এখন বসিয়ে দিয়েছে মুসলমানকে তার পুরনো মসনদে। লড়াই হলে লড়াই হবে মুসলমানের সঙ্গে। তার বিরুদ্ধে সন্ত্রাসবাদ খাটবে না। বিপ্লববাদও খাটবে কি? আমি এখন অতটা নিশ্চিত নই, জুলি। আমি সেবা দিয়ে চিত্তজয়ের পথ অবলম্বন করেছি। দেখা যাক এ পথ আমাকে কোথায় নিয়ে যায়। কয়েকটি বান্ধবীকে পেয়েছি আমার সহকর্মীরূপে। আমরা এখন আমাদের নিজেদের জীবনকে পুনর্গঠিত করার কাজে মন দিচ্ছি। তবে দেশের সামনে যদি খোরতর সঙ্কট ঘনিয়ে আসে কোনো দিন, আমরাও সেদিন প্রাণ দিতে এগিয়ে যাব।” মধুমালতী অঙ্গীকার করে।

মানস বলে, “ছোটো আলাদা আলাদা ইহ্যাকে আমরা একাকার করে ফেলছি। একটা হলো ভারতের স্বাধীনতা। আর একটা ইউরোপের যুদ্ধ। স্বাধীনতা আজও হতে পারে, একযুগ পরেও হতে পারে, আমাদের জীবনে নাও হতে পারে। কিন্তু যুদ্ধ এর মধ্যেই শুরু হয়ে গেছে, দাবানলের মতো এক মহাদেশ থেকে আরেক মহাদেশে ছড়াতে পারে, ছড়াতে ছড়াতে আমাদের দোরগোড়ায় এসে পৌঁছতে পারে। ভারতও নিরাপদ নয়। এ দুর্ভোগ ভারতেরও দুর্ভোগ। স্ত্রতরাং কে কার দুর্ভোগের স্বযোগ নেবে? সেইজন্যে আমি গভীরভাবে চিন্তিত। ইংরেজকে বেকাদায় পড়তে দেখে তার কাছ থেকে যারা স্বাধীনতা আদায় করে নেবার কথা ভাবছে তাদের কাছ থেকেও ইংরেজ কিছু আদায় করে নেবে। সেটা কখনো নিঃশর্ত স্বাধীনতা হতে পারে না। শর্তটা এই যে, সৈন্য জোগাতে হবে, অর্থ জোগাতে হবে, উপকরণ জোগাতে হবে। যত লাগে, যতদিন লাগে। স্বাধীনতার জন্যে দেশটাই বিকিয়ে যেতে পারে।”

“সেইজন্মেই আমরা চাই নিঃশর্ত স্বাধীনতা।” জুলি বলে।

“সেটা শুধু ইংরেজকে বেকায়দায় পড়তে দেখে। কিন্তু ধরো যদি ওরা আমেরিকার কাছে ভারতকে বন্ধক রাখে?” মানস স্বধায়।

“তা হলে অর্থ পাবে, মালমশলা পাবে, কিন্তু গুর্খা, শিখ, পাঞ্জাবী মুসলমানদের মতো সৈনিক পাবে কোথায়! এদের না পেলে যুদ্ধে হারবে। হারজিৎ নির্ভর ভারতের সহযোগিতার উপর। ঠিক বলেছি কি না!” জুলি তাকায় মিলির দিকে।

“ঠিকই বলেছ। কিন্তু একটা কথা ভুলে যাচ্ছ। ওরা হলো পেশাদার সৈনিক। যার নিমক থাকে তার জন্মে জান দেবে। নিমক এতকাল ইংরেজ দিয়ে এসেছে, দিতে পারে, দিতে রাজী। কেন তবে ওরা যুদ্ধে যাবে না? ওদের উপর তোমাদের এমন কী প্রভাব আছে যে ওরা বেকে দাঁড়াবে? সোমাদা, তোমাদেরই বা কতটুকু প্রভাব?” মিলি প্রশ্ন করে।

“আমাদের প্রভাব আরো কম। আমরা তো সৈনিকের জীবিকা দিতে পারব না। কৃষকের জীবিকা দিতে পারি। তলোয়ারকে ভেঙে আমরা লাঙল বানাব। আমরা শান্তিবাদী।” সোম্য উত্তর দেয়।

“তা হলেও ইংরেজরা ভারত থেকে সৈনিক পাবেই। উপকরণও পাবে। তাতে ব্যবসাদার শ্রেণীর লাভ। বাকী থাকে অর্থ। সেইখানেই টান পড়বে। জোর করে আদায় করতে গেলে দেশস্বদ্ধ লোক রুখে দাঁড়াবে। এইটেই কংগ্রেসের একমাত্র তুরুপের তাস। কংগ্রেসের মানে গান্ধীজীর।” মানস বলে।

“কংগ্রেস আর গান্ধীজী অভিন্ন এটা তোমার ভুল ধারণা, মানস। কংগ্রেস যুদ্ধে যোগ দিতে রাজী হবে, যদি যোগ দেওয়া না দেওয়ার স্বাধীনতা ভারতকে দেওয়া হয়। যে-কোনো দেশের পক্ষে যুদ্ধ ও শান্তির সিদ্ধান্তই তো সবচেয়ে গুরুত্বপূর্ণ সিদ্ধান্ত। আর গান্ধীজী হলেন শান্তিবাদী। যোদ্ধাদের মাঝখানে দাঁড়িয়ে তাঁদের শাস্ত করাই তাঁর মিশন। গতবারে তাঁর মিশন সম্বন্ধে তিনি তেমন সচেতন হননি। মানবজাতি তাঁর কাছে যা প্রত্যাশা করে তা যুদ্ধে যোগদান নয়, শান্তির খাতিরে অসহযোগ। স্বাধীনতা বলতে যদি রাজস্বমত বোঝায় তবে যেটা আপাতত না হলেও চলে। যদি বোঝায় শান্তিস্থাপনের অধিকার তবে তিনি পরীক্ষা করতে রাজী।” সোম্য বিশদ করে।

“গান্ধীজী তো দক্ষিণপন্থীদের দিকে। নইলে স্তম্ভাঘটনাকে সরাতে কেন? তুমি দেখবে উনি দক্ষিণপন্থীদের রাজস্বমতলাভ সমর্থন করবেন, যদি বড়লাটের সঙ্গে কথাবার্তা সফল হয়। সফল হবেই। কারণ ওরাও বুর্জোয়া, এরাও ‘বুর্জোয়া’ জুঁ যেন সব জানে।

“আর বামপন্থীরা বুর্জোয়া নয় ? ক’জন তারা কাস্তে বা হাতুড়ি ধরে ? দক্ষিণ পন্থীরাই বরং চক্রধর ।” মানস বক্তোক্তি করে ।

“বামপন্থীরা চায় সমাজের ও রাষ্ট্রের আমূল পরিবর্তন । দক্ষিণপন্থীরা চায় শুধুমাত্র সরকার বদল । সেইসঙ্গে ছোটখাটো রিফর্ম । ওরা রিফর্মিস্ট । বামপন্থীর রেভোলিউশনারী ।” জুলি ব্যাখ্যা করে ।

“বেশ তো ।” মানস বলে, “আগে তো রিফর্মিস্টদের একটা স্বেযোগ দাঁও । দেখাই যাক না কতদূর ওদের দৌড় । ওরা বৃদ্ধ হয়েছে । এখন না পেলে কখন আন স্বেযোগ পাবে ?”

“না, না, ওরা যদি একবার চেপে বসে তো ছলে বলে কোণলে আর সবাইবে তাড়াবে । যেমন করে তাড়িয়েছে স্বভাষদাকে । ওদের বিশ্বাস নেই । কেন্দ্রীয় সরকার যদি ওদের হাতে পড়ে তবে ভারতরক্ষা আইনের বেডাজালে সব ক’ট বিপ্লবীকে ধরবে । কোনো তফাৎ থাকবে না ইংরেজে কংগ্রেসে ।” জুলি ঘাৎ নাড়ে ।

“কিন্তু, জুলি,” সৌম্য এতক্ষণ পরে মুখ খোলে, “তুমি কি জানো না যে যুদ্ধনীতি নির্ধারণের জগ্রে স্বভাষচন্দ্রও গান্ধীজীব সঙ্গে সাক্ষাৎ করেছেন ? কংগ্রেসের পলিসি যদি হয় ব্রিটেনকে আলটিমেটাম দেওয়া ও মেরাদ পার হয়ে গেলে স্বাধীনতার দাবীতে আপসহীন বিরামবিহীন সংগ্রামে ঝাঁপ দেওয়া তা হলে তিনি সব অপমান ভুলে গিয়ে আবার কংগ্রেসের দক্ষিণপন্থী নেতাদের সঙ্গে মিলে মিশে কাজ করবেন । একথা শুনে বল্লভভাই বলেন, স্বভাষ একটিকচি খোকা । এটা একটা পলিসিই নয় বল্লভভাইদের পলিসি হলো সরকারের সঙ্গে মীমাংসার পথ সব সময় খোলা রাখা । সংগ্রাম যদি অনিবার্হ হয় তবে না হয় সংগ্রামে ঝাঁপ দেওয়া যাবে, কিন্তু ন্যূনতম দাবী মিটিয়ে দিলে আর ইংরেজের সঙ্গে নয় হিটলারের সঙ্গেই সংগ্রাম । কংগ্রেস হিটলার বিরোধী এটা প্রমাণ করতে হবে । নয়তো ইংরেজের বিপক্ষে সংগ্রামকারীদের হিটলারের পক্ষে সংগ্রামকারী বলে অপবাদ দেওয়া হবে ও কোর্টমার্শাল করে ঝুলিয়ে দেওয়া হবে । যুদ্ধকালে সরকারমাত্রই নির্মম । সংগ্রাম অনিবার্হ হলে গান্ধীজীব উপরেই সমস্ত ভার গুস্ত হবে । তিনিই স্থির করবেন সংগ্রাম বলতে কী বোঝাবে । নিছক অসহযোগ না সক্রিয় প্রতিরোধ । যিনি সব চেয়ে অভিজ্ঞ তিনিই সর্বাধিনায়ক । স্বভাষচন্দ্রকেও মানতে হবে তাঁর নির্দেশ । নয়তো তাঁকে কংগ্রেসের বাইরে গি পৃথক নীতি অবলম্বন করার স্বাধীনতা দেওয়া যাবে । সে পন্থা কি বামপন্থীরা সব সমর্থন করবেন ?”

“বলা শক্ত। জবাহরলাল আবার দক্ষিণপন্থীদের সঙ্গে ভিড়েছেন। উনি কি সত্যিকার বিপ্লবী? না উনি শুধুমাত্র অ্যাটিকাসিস্ট? তাই যদি হয়ে থাকেন তবে উনিও অবিলম্বে সরকারের সঙ্গে ভিড়ে যাবেন।” জুলি বিমর্ষভাবে বলে।

“তা হলে বামপন্থী বলে আর বাকী রইল কে?” মানস বলে, “যারা অ্যাটিকাসিস্ট নয় তারাই? কার এত সাহস হবে যে বলবে আমি অ্যাটিকাসিস্ট নই, আমি অ্যাটাইম্পোরিয়ালিস্ট?”

“সোমাদা,” জিজ্ঞাসা করে জুলি, “তোমরাও কি অ্যাটিকাসিস্ট? মানে তোমরা গান্ধীপন্থীরা।”

“আমরা অ্যাটিকওয়ার।” সোম্যা উত্তর দেয়, “ওগার যদি হয়ে থাকে ফাসিস্টদের স্বার্থে তবে আমরা অ্যাটিকাসিস্ট। যদি হয়ে থাকে ইম্পোরিয়ালিস্টদের স্বার্থে তবে আমরা অ্যাটাইম্পোরিয়ালিস্ট। যদি হয়ে থাকে বুর্জোয়াদের স্বার্থে তবে আমরা অ্যাটিবুর্জোয়া। আমরা চাই যে এ যুদ্ধ আজ এখনি থেমে যাক। মানুষ মেরে, তার দেশ দখল করে, তার ঘরবাড়ী ধ্বংস করে, তার সম্পদ লুট করে কোনো সত্যিকার বিরোধ মিটবে না। বিরোধ মেটাবার অগ্র উপায় আছে। যুদ্ধবিগ্রহের নৈতিক বিকল্প হচ্ছে সত্যগ্রহ। আমরা তারই সাধনায় আত্মনিবেদন করেছি।”

“আমাদের এখানে ছ’জন ইংরেজ অফিসার রয়েছেন।” মানস বলে, “যুদ্ধ বেধে গেছে শুনে আমি গেলুম ওঁদের সহানুভূতি জানাতে। ইংলণ্ডের দুর্যোগে আমি আন্তরিক দুঃখিত। ছ’বছর ছিলুম ওদেশে। কত আনন্দ পেয়েছি! কত ভালোবাসা! তা মিস্টার শেফার্ড কী বললেন, জানো? বললেন, গান্ধী কি হিটলারকে নন-ভায়োলেন্ট হতে পরামর্শ দিতে পারেন না? ইংরেজদেরকেই তিনি পরামর্শ দিয়েছেন বিনা যুদ্ধে দেশ ছেড়ে দিতে ও তারপরে অসহযোগ ও সত্যগ্রহ করতে। আমি চূপ করে গুনলুম। গান্ধীজীব ওই পরামর্শ কেউ কানে তুলবে না, ভারতীয়রাও না, যদি ভারত আক্রান্ত হয়।”

“তা কি আমরা জানিনে, মানস?” সোম্যা বলে, “যতক্ষণ না আমরা কাজে প্রমাণ করেছি যে ভারতের জনগণ বিনা অস্ত্রে ব্রিটিশ শাসকদের হারিয়ে দিয়েছে, তোমার ওই শেফার্ড সাহেবকেও, ততক্ষণ কেউ আমাদের কথায় কর্ণপাত করবে না। এমন কি কংগ্রেসের নেতারাও না। ওঁদের চালনা করতে হলে কিছূদর ওঁদের সঙ্গে চলতে হয়। গান্ধীজী ওঁদের বেশ পানিকটে রাশ ছেড়ে দিয়েছেন। তবে আমাদের উপর নির্দেশ আছে আমরা যেন যুদ্ধে সহযোগিতা না করি। লবণ যদি তার লবণত্ব হারায় তা হলে তাকে লবণাক্ত করবে কে?”

“ওঃ তোমরাই হলে ধরিজীর লবণ !” পরিহাস করে দত্তবিশ্বাস।

“হাসতে পারো, কিন্তু এটা তো মানবে যে আজকের এই বিশ্বব্যাপী হিংসার বিরোধী শক্তি বলতে ওই ক’জন গান্ধীপন্থী কর্মাই সক্রিয়। ওদের কাছে সর্বপ্রধান সমস্যা ভারতের পরাধীনতা নয়, যদিও তার জন্তে তারা সর্বক্ষণ ব্যথিত। সর্বপ্রধান সমস্যা হিংসার উত্তরে হিংসার উপরে অত্যধিক বিশ্বাস। মাহুষ কি বুঝতে পারে না যে হিংসার সঙ্গে হিংসার প্রতিদ্বন্দ্বিতায় উভয় পক্ষই চূড়ান্ত হিংসায় পৌঁছবে? শেষে একপক্ষ হেরে যাবে। তখন তার গৌরব করবার মতো কী থাকবে? জিতবে যারা তারা অবশ্য গৌরবে মশগুল হবে, কিন্তু সে আর ক’টা দিন? লুটের মালের বখরা নিয়ে ঝগড়া বেধে যাবে মিতায় মিতায়।” সৌম্য ভবিষ্যদ্বাণী করে।

“আপাতত হিটলারকে রুখতে হবে, এ ছাড়া আর কোনো কর্তব্য নেই বিশ্বমানবের। তোমরা যদি তোমাদের অহিংস উপায়ে তা পারতে তা হলে তোমাদের পরামর্শই শোনা যেত। কিন্তু হিটলার না শোনে অহিংসার কাহিনী।” মানস টিপ্পনী কার্টে।

“তারপর, মানসদা, আপনার অপর ইংরেজ অফিসার কী বললেন?” জুলি স্তূধ্যায়।

“তিনি যা বললেন তা আরো চমৎকার। বললেন, আমার ছেলের বয়স এখন চোদ্দ। আরো চার বছর বাদে যুদ্ধ বাধলে ওকে ধরে নিয়ে যেত। তার চেয়ে এই ভালো হয়েছে। যুদ্ধ যখন বাধতই একদিন না একদিন। হিটলার থাকতে যুদ্ধ না বেধে পারে? বললেন মিস্টার বার্লো। ওঁর ওই একটিমাত্র সন্তান। স্ত্রীর সঙ্গে ডিভোর্স হয়ে গেছে। ছেলে থাকে ইংলণ্ডে। কিন্তু বোমাকে তিনি ভয় করেন না। কতারা নিশ্চয়ই অ্যান্টিএয়ারক্রাফট গান ব্যবহার কববেন। শেলটারও খোঁড়া হবে। ছেলেমেয়েদের শহর থেকে দূরে পাঠিয়ে দেবেন। বলতে ভুলে গেছি যে শেফার্ড আর বার্লো দু’জনেই গত মহাযুদ্ধে জার্মানদের সঙ্গে লড়েছেন। শেফার্ড ছিলেন গোলন্দাজ। আর বার্লো পদাতিক বাহিনীর অফিসার। তাঁরা কেউ দ্বিতীয়বার যুদ্ধ বাধুক এটা চাননি। অল্পমতি পেলে আবার যোগ দিতেন। দেশ আগে। মাই কাণ্ট্রি রাইট অর রং।” মানস তাঁদের মনোভাব জানায়।

“মাই কাণ্ট্রি রাইট অর রং, এটাই ঠিক। কিন্তু কার কাছে বড়ো তার কাণ্ট্রি?” বিলাপ করে মধুমালতী। “কংগ্রেসের ভিতরেই দ্বন্দ্ব। বাইরে মুসলিম লীগ, হিন্দু মহাসভা, কমিউনিস্ট পার্টি। যে যার নিজের তালে আছে। দেশের হয়ে কথা বলবে কে? গান্ধীজী? দশবছর আগে হলে পারতেন। এখন আর নয়।”

## ॥ চার ॥

যুথিকা এতক্ষণ চূপ করে শুনছিল। এবার মুখ খোলে। “আচ্ছা, তোমার ওই বার্লো সাহেবের ছেলেকে কি চারবছর আগে যুদ্ধ না থামলে ধরে নিয়ে যাবে? যখন তার বয়স আঠারো।”

“যুদ্ধের জন্তে লোক কম পড়লে আরো আগেও ধরে নিয়ে যেতে পারে। অবশ্য আইন বদলে দিয়ে।” মানস বলে।

“সে কী!” যুথিকা চমকে ওঠে। “ছেলের নিজের ইচ্ছা অনিচ্ছার প্রশ্ন উঠবে না? কর্তার ইচ্ছায় কর্ম। একেই তোমরা বলবে গণতান্ত্রিক জীবনধারা? কেউ যদি স্বেচ্ছায় যুদ্ধ করতে যায় সে স্বাধীনতা তার আছে। কিন্তু তার ইচ্ছার বিরুদ্ধে তাকে ধরে নিয়ে গেলে তার স্বাধীনতা রইল কোথায়।”

“ইংলণ্ডের পার্লামেন্ট যদি আইন পাশ করে কনক্রিপশন চালায় তবে সেটা জনপ্রতিনিধিদের অধিকাংশের ভোটেরই সম্ভব। জনপ্রতিনিধিরা জনসাধারণের অধিকাংশের ভোটেরই নির্বাচিত।” মানস ব্যাখ্যা করে।

“তোমার ও যুক্তি আমি শুনব না। দরকার হলে ষোল বছরের ছেলেকে যুদ্ধে ধরে নিয়ে যাবে, তার ইচ্ছা অনিচ্ছার তোয়াক্কা রাখবে না, এটা অত্যাচার। তা সে নাৎসীদের দেশেই হোক আর ডেমোক্রেটদের দেশেই হোক। তা হলে তো একদিন মেয়েদেরও ধরে নিয়ে যেতে পারে।” যুথিকা আঁতকে ওঠে।

“সে শুদ্ধবও শোনা যাচ্ছে,” দত্তবিশ্বাস তার বিলেতের অভিজ্ঞতা থেকে বলে। “ভয় পেয়ো না। মেয়েদের ওরা লড়তে পাঠাবে না, পুরুষের অভাবে যেসব কাজ অচল সেইসব কাজে লাগিয়ে দেবে। যেমন অ্যাথ্‌লান্স চালানো, টেলিফোন অপারেট করা, সৈনিকদের জন্তে রান্না। অমনি করেই হবে মেয়েদের মুক্তি। ওরাও বলবে, ‘সব



কাজে হাত লাগাই মোরা সব কাজেই। বাধাবাঁধন নেই গো নেই।’ কেরানীগিরির দরজা আগেই খুলে গেছে, এবার আরো দরজা খুলবে। ওরাও কনক্ৰিপশনে আপত্তি করবে না, যদি বিবাহিতা না হয়ে থাকে। এই যেমন এদেশে যুদ্ধের সময় মেয়েদের ডাক দিলে তুমি আপত্তি করতে পারো, মিস মুস্তাফী করবেন না।”

মধুমালতী খুশি হয়ে বলে, “তা হলে তো বেঁচে যাই। বাবা তো বলেন, যুদ্ধ জিনিসটাকে দূর থেকে যত ভয়ঙ্কর মনে হয় নিকট থেকে সেটা তত ভয়ঙ্কর নয়। যুদ্ধক্ষেত্রে যাবার আগে তাঁরও মৃত্যুভয় ছিল। গিয়ে দেখেন ভয় ভেঙে গেছে। আমাকে বন্দুক ধরতে ডাকলেও আমি আপত্তি করব নাকি? আমি শুধু জানতে চাই যে আমি স্বাধীন দেশের নাগরিক। কারো তাঁবেদার নই। বাবা তো বলেন, ইংরেজ এতকাল বাঙালীকে বন্দুক ধরার স্বযোগ দেয়নি। এবার দেবে। দিতে বাধ্য হবে। তা হলে এ স্বযোগ দেশকে স্বাধীন করারও স্বযোগ।”

“তা বলে তোমার ইচ্ছার বিরুদ্ধে তোমাকে কনক্ৰিপট করলে তুমি বিদ্রোহ করবে না?” যুথিকা উত্তেজিত হয়ে ‘তুমি’ বলতে শুরু করে।

“আগে বন্দুকটা তো হাতে পাই, মিলিটারি ট্রেনিংটা তো নিই, সবাই মিলে দলবদ্ধ তো হই, তাঁর পরে ওই বন্দুক দিয়েই দেশ স্বাধীন কর।” মধুমালতী নিশ্চিত।

“কিন্তু বন্দুকটা ধরিয়ে দেবে কে? ইংরেজেই তো। ট্রেনিংটাও দেবে ইংরেজ। সে কি বুঝবে না যে এর শেষপর্ব তাঁরই বিরুদ্ধে বিদ্রোহ?” যুথিকা স্তব্ধ।

“এর উত্তর আমিই দিচ্ছি।” মানস বলে, “সে ভালো করেই বোঝে তাঁর বিরুদ্ধে বিদ্রোহটা পর মুহূর্তেই পাত্ৰান্তরিত হবে। হিন্দু আক্রমণ করবে মুসলমানকে। মুসলমান হিন্দুকে। রক্ষা করবে কে? ওই ইংবেজ।”

“তোমার ও খীসিস বিলকুল ঝুটা। না একো জওয়ান, না একো রুপেয়া। এইটেই মাচ্চা।” জুলি স্মরণ করিয়ে দেয়।

“কিন্তু আমি ভেবে মরছি এ যুদ্ধ যদি পাঁচবছর গড়াগ তবে বাল্লোর ছেলেটার কী গতি হবে। বাল্লোঁ বেচারার তো আর একটিও ছেলে কি মেয়ে নেই। তাঁরই বা কী দশা হবে?” যুথিকা সমবেদনায় গলে যায়।

“আহা, এটা তো একজন ব্যক্তির সুখদুঃখের ব্যাপার নয়। একটা জাতির জীবনমরণের প্রশ্ন।” দত্তবিশ্বাস বলে। “জার্মান জাতির সঙ্গে সংঘর্ষে পরাজয় ঘটলে বাল্লোঁই বা কোথায় আর তাঁর পুত্রই বা কোথায়! পরাজিত জাতির পতনের দৃশ্য দেখবার জন্তে বেশীদূর যেতে হবে না। পালযুগের বাঙালী কী ছিল আর লক্ষণসেনের

পরবর্তী যুগের বাঙালী কী হলো। কোথায় তার সেই সব সমুদ্রগামী পালতোলা জাহাজ? বণিকরা যা চড়ে জাহাজে স্রমাত্ম্য য়েত। বৌদ্ধ শ্রমণরাও। ইংরেজরা যুদ্ধে হেরে গেলে নৌশক্তি হারাবে। সঙ্গে সঙ্গে সাম্রাজ্য ও বহির্বাণিজ্য। ওদের স্বাচ্ছন্দ্যের মান নেমে যাবে। বেকারসংখ্যা আরো বাড়বে। ওদের ভবিষ্যৎ ভেবে ওরা শিউরে উঠেছে বলেই না সময় থাকতে কনক্টিপশন জারি করেছে। গত যুদ্ধেও করেছিল। দেরিতে। সেবার ছিল মাস হিষ্টিরিয়া। সবাই ছুটে যায় যুদ্ধে কাঁপ দিতে। তাই গোড়ার দিকে স্বেচ্ছাসৈনিকদের অভাব হয়নি। শেষের দিকে হয়। ততদিনে মাস হিষ্টিরিয়া থেমে গেছে। এবার একটি অনিচ্ছুক জাতিকে বাধ্য হয়ে যুদ্ধে নামতে হয়েছে। নইলে আবার মিউনিকের মতো আত্মসমর্পণ। সেইজন্মেই প্রথম থেকেই কনক্টিপশন। বালোর বরাত ভালো। তাঁর ছেলের যুদ্ধে যেতে আরো চারবছর বাকী। ততদিনে হিটলার হেরে গিয়ে থাকবে।”

“কী করে এতটা নিশ্চিত হলে, স্কুমারদা?” জুলি জেরা করে।

‘ঢাথ, জুলি। জার্মানীকে কেউ জিততে দেবে না। না রাশিয়া। না আমেরিকা। অত বড়ো শক্তিশালী এক প্রতিদ্বন্দ্বীকে ওরা আরো শক্তিশালী হতে দেবে কেন? ব্রিটিশ নৌবহর যদি জার্মানদের হাতে পড়ে ওদের হাত থেকে আমেরিকার পরিত্রাণ নেই। পেছন থেকে আক্রমণ করবে জাপান। আর অর্ধেক ইউরোপের যুদ্ধোপকরণ যদি জার্মানীর এখতিয়ারে আসে তা হলে তার দাপট থেকে রাশিয়াকে রক্ষা করবে কে? ওই দুই শক্তি নেপথ্যে অপেক্ষা করছে। মঞ্চে প্রবেশ করবে যথাকালে। হিটলার আখেরে হারবেই, জুলি।” দত্তবিশ্বাস নিশ্চয়তা দেয়।

“তা হলে তো আমাদের এ স্বযোগ ব্যর্থ হবে।” জুলি মূড়ে পড়ে।

“তুমি দেখছি জার্মানদের ভাগ্যের সঙ্গে ভারতের ভাগ্যকে জড়িয়ে ফেলছ, জুলি। জার্মানদের হারজিং জার্মানদের। আমাদের হারজিং আমাদের। ইংলণ্ডের জুয়োগ আমাদের স্বযোগ নয়। আমাদের অগ্রণ্ড অগ্ররকম, রণকৌশলও অগ্ররূপ। জনতা উদ্বেল হয়েছে বলে নেতাদেরও উদ্দাম হতে হবে এর কোন অর্থ নেই। কিছু না করাও শ্রেয় হতে পারে। পরিস্থিতিতে পাকতে দাও।” সৌম্য পরামর্শ দেয়।

“অমন করলে জোয়ার চলে যাবে। দেয়ার ইজ আ টাইড ইন দি অ্যাফেয়ার্স অভ মেন।” জুলি উদ্ধত দেয়। “টাইম অ্যাণ্ড টাইড ওয়েন্টস ফর নো মান।’

“একটি বিরাট দেশ তার যুদ্ধনীতি স্থির করবে এইসব প্রবাদ প্রবচন মেনে! এ যেন পাঁজি দেখে যুদ্ধযাত্রা!” মানস উপহাস করে। “দেশে কি কেবল

বিপ্লবীরাই আছে আর আছে উদ্বেল জনতা? রাইটস অ্যাণ্ড রংস্ নিয়ে মাথা ঘামাবার জন্তে কেউ নেই? নেই রবীন্দ্রনাথ, নেই অরবিন্দ, নেই গান্ধী? গোটা সভ্যতারই আজ সঙ্কট। শুধু ইংলণ্ডের দুর্যোগ নয়। এতদিন ছিল নেশনে নেশনে যুদ্ধ। এবার তার সঙ্গে যোগ দিয়েছে মতবাদের সঙ্গে মতবাদের। ইডিওলজির সঙ্গে ইডিওলজির। আমি গভীরভাবে চিন্তিত।”

জুলি বলে, “মানসদা, দশবছর আগেও তোমার মুখে শুনেছি তুমি গভীরভাবে চিন্তিত। চিন্তা করতে করতেই তোমার জীবন ভোর হবে। তোমাকে দিয়ে কোনো কাজ হবে না। তুমি যদি হিটলারের বিরুদ্ধে যুদ্ধ করতে চাও তো যুদ্ধে ঝাঁপ দাও। আর যদি ইংরেজের বিরুদ্ধে বিপ্লব করতে চাও বিপ্লবে ঝাঁপ দাও। কুলে বসে ঢেউ গোণার চেয়ে শ্রোতে ঝাঁপ দিয়ে পড়াই প্রাণবন্ত পুরুষের কাজ।”

“ঝাঁপ! ওই একটা কথাই তুমি শিখেছ। যুদ্ধে ঝাঁপ দেবার অর্থ তবু বুঝি, কারণ যুদ্ধ সত্যি সত্যি বেধে গেছে। কিন্তু বিপ্লব। সে তো সম্পূর্ণ অনিশ্চিত।” মানস বলে।

“ও কী বলছ, দাদা! দেশের চারদিকে কত বড় বড় সভা হচ্ছে। নেতারা বক্তৃতা দিয়ে বেড়াচ্ছেন। বুদ্ধুর মতো একঠাঁই বসে আছেন শুধু গান্ধীজী। বিপ্লব ঘনিষে আসছে। তুমি তোমার গজদন্তের গম্বুজ থেকে নেমে এলে সারা অঙ্গে আগুনের আঁচ অল্পভব করতে পারবে।” জুলি বলে।

“আপনিও অল্পভব করতে পারছেন নাকি?” মধুমালতীকে স্তম্ভায় দত্তবিশ্বাস।

“কই, না। আমাদের এদিকে ছিল কৃষকপ্রজা আন্দোলন। সেটাও মিইয়ে গেছে। দিন দিন বাড়ছে মুসলমানদের গাঁড়ামি। ব্যারিস্টাররাও আচকান পায়জামা আর ফেজ পরে ঘুরছেন। আর সেই সঙ্গে বাড়ছে হিন্দুদেরও গাঁড়ামি। বাবা সেদিন বলছিলেন, এতদিন কেবল একপক্ষই কমিউনাল ছিল, এখন আরেকপক্ষও সমান কমিউনাল হয়ে উঠেছে। পরিণাম ভেবে আমি তো ভয়ে শিউরে উঠছি। বিপ্লব ঘারা করে তারা সামনের দিকে তাকায়। এদের দৃষ্টি পেছনের দিকে। এরা ফিরে যাবে মধ্যযুগে। না, মিল্টার দত্তবিশ্বাস, আমি জুলির সঙ্গে একমত নই।” মিলি বলে।

“আমি লক্ষ্য করছি যে আপনারা দু’জনেই একসঙ্গে ডিটেনশন ক্যাম্পে বন্দী থাকলেও আপনাদের পন্থা এক নয়।” দত্তবিশ্বাস বলে।

“মাঝখানে গঙ্গা দিয়ে অনেক জল গড়িয়ে গেছে যে! আপনার উপরে আমার অভিমান আছে, আপনি বিলেত থেকে চিঠি নিয়ে এসে জুলিকে ছাড়িয়ে নিয়ে

গেলেন। যদিও পারলেন না বিলেত অবধি নিয়ে যেতে। ও বধ্বে থেকে পুণা চলে গেল। আর আমি ওর বন্ধু হয়েও আটকা পড়ে থাকলুম। যতদিন না রোগে ধরে।” মিলির কণ্ঠে তিরস্কার।

“আপনার কথা কেউ আমাকে বললে তো চেষ্টা করতুম, মিস মৃত্যুফী। তা ছাড়া আমার কেরামত তো মিস হারিংটনের কাছ থেকে জুলির জন্তে সুপারিশপত্র জোগাড় করা। আর জুলির মায়ের কাছ থেকে প্রতিশ্রুতি যে জুলি বিলেত ফিরে যাবে। এসব তো আপনার বেলা খাটত না। তবে আরো একটা কথা ছিল, সেটা সকলের সামনে খুলে বলতে সঙ্কোচ বোধ করছি। আমার প্রত্যাশা ছিল জুলি আমার জীবনসঙ্গিনী হবে। সেটা তো আপনার বেলা ছিল না।” দত্তবিশ্বাস সমস্কোচে বলে।

“স্বার্থ! স্বার্থ!” মধুমালতী হেসে বলে, “নইলে কেউ বিলেত থেকে ছুটে আসে বন্দিনীকে মুক্ত করতে? এবারকার অভিযানটাও কি স্বার্থমূলক?” মিলি প্রশ্ন করে।

“খুলে যদি বলতেই হয় তবে আর ঢাকাঢাকি কেন? বাড়ীর সঙ্গে আমার সম্পর্ক ভালো নয়, দেশের উপরেও তেমন নাড়ীর টান নেই। আমি যতদিন বিলেতে থাকি ততদিন আপ-টু-ডেট থাকি। দেশে ফিরে এলে আউট-অভ-ডেট হয়ে যাই। তা হলে আসি কেন? আসি জুলিকে নিয়ে যেতে। সেটা ওর মায়ের চিঠি পেয়ে। সেবারেও পেয়েছিলুম। এবারেও পেয়েছি। মাসিমার ধারণা সরকার আবার বন্দীশিবির খুলতে যাচ্ছে। পুরনো বন্দিনীদের একে একে ধরবে। এখন তো লেডী হারিংটন নেই। কে সুপারিশ করবে? আর কেনই বা করবে? যার জন্তে লগুনের বেডফোর্ড কলেজে সীট রিজার্ভ করতে আমি হিমশিম খেয়ে গেলুম, অবশ্য খরচ জোগাতেন ওর মা, আমার মাসিমা, সে কিনা পুণার মহিলা বিশ্ববিদ্যালয়ে গিয়ে ভর্তি হলো। এর জন্তে, চৌধুরী, তুমিই দায়ী। তোমার উপরে আমার রাগ আছে। যাক, এবারেও আমি এসেছি জুলিকে বন্দীশিবির থেকে অগ্রিম উদ্ধার করতে। এবারেও আমার সেই একই প্রত্যাশা। কিন্তু যা শুনছি তাতে আমার আশাভরসা প্রায় নিঃশেষ। ও বাঁপ দেবার জন্তে দুই বাহু তুলে দাঁড়িয়েছে। ও যদি বাঁপ দেয় তো নিষািত ডুববে। আমি কী করতে পারি! আমার জাহাজ এবারেও আমাকে একলা নিয়ে যাবে।” কল্পিত কণ্ঠে বলে দত্তবিশ্বাস।

“জুলি, এখনো সময় আছে।” মধুমালতী বলে।

“কিসের সময়? জাহাজের? তার আগেই যা হবার তা হয়ে যাবে। ওরা

আমাকে ধরে নিয়ে আটকে রাখতে পারবে না। বিপ্লবী জনতা আমাকে পাঁচিল ভেঙে উদ্ধার করবে। জীবনসঙ্গিনী হওয়া না হওয়া তার পরের কথা। বিলেত যাওয়ার কথাই ওঠে না। মা আমাকে ভালোবাসেন। স্বকুমারদাও। কিন্তু আমি যে বিপ্লবের পথে অনেকদূর এগিয়েছি। স্বকুমারদাকে আশা দিতে অক্ষম। “জুলি সোজাশুজি প্রত্যাখ্যান করে।

“স্বকুমারদা,” যুথিকা বলে, “আপনার উপরে মিস মুস্তাফীর অভিমান আছে, সেবার আপনি তাঁকেও জুলির সঙ্গে মুক্ত করেননি। এবারেও পুরনো বন্দীদের একে একে ধরবে শুনেছেন। তা হলে তাঁদের একজনকে শুধু কেন, আরেকজনকেও অগ্রিম উদ্ধার করতে হয়।”

‘আরেকজনকে?’ দত্তবিশ্বাস আশ্চর্য হয়। ‘কে তিনি?’

‘বুঝতে পারলেন না? আপনার দক্ষিণ পার্শ্ববর্তিনী।’ যুথিকা হাসে।

‘সে কী!’ দত্তবিশ্বাস খতমত খায়। ‘উনি যে সাক্ষাৎ অগ্নিকণ্ঠা। আমি নিজেই জ্বলে পুড়ে ছাই হয়ে যাব যে!’

মধুমালতী যুথিকার উপর কপট কোপভরে বলে, “মিসেস মল্লিক, এ কী কৌতুক! উনি এসেছেন জুলিকে নিয়ে যেতে। তার বদলে আমাকে নিয়ে যেতে নয়। ওঁর সঙ্গে গিয়ে আমি করবই বা কী? এটা কি দেশভ্রমণের সময়?”

যুথিকা জিভ কেটে বলে, “আমারই ভুল হয়েছে। অভিমান শুনে আমাব মনে হলো হয়তো কোনো পূর্বসম্বন্ধ ছিল।”

“লেশমাত্র না। অভিমানটা এইজন্মে যে, জুলির কেমন একজন বান্ধব আছে. আমার কেন নেই। তার মানে এই নয় যে উনিই আমার বান্ধব। মিস্টার দত্তবিশ্বাস, আপনি মহৎ কাজ করেছিলেন জুলিকে বন্ধনমুক্ত করে। কিন্তু আমাকে মুক্ত করা অত সহজ ছিল না, আমার কেসটা আরো খারাপ! বাবারও বহু সাহেব বন্ধু ছিলেন। কিন্তু আমার ওই এক কথা। অল ইজ ফেয়ার ইন লাভ অ্যান্ড ওয়ার। যুদ্ধে আর ভালোবাসায় সবই ন্যায়সঙ্গত। আমাদের দেশের লোকের হাতে অস্ত্র থাকলে যেটার নাম হতো যুদ্ধ আমরা ছুঁচায়জন গোপনে অস্ত্র সংগ্রহ করলে সেটার নামই হয় সম্ভ্রাস। আমার কাজই ছিল অস্ত্র পাচার করা। জুলির মতো বোকা মেয়েদের হাত দিয়ে। ওরা আমাকে ধরেছিল ঠিকই, আটক করেছিল ঠিকই, ছাড়তেও যে চায়নি সেটাও ঠিক। তবে এখন আমার আর ওসব কাজে বিশ্বাস নেই। কিসে বিশ্বাস আছে সে কথা বলাও শক্ত। তবে একটু একটু করে আমি সৌম্যদার ব্রতের দিকেই ঝুঁকছি।” মধুমালতী বলে।

“সেই ভালো, সেই ভালো।” যুথিকা বুঝতে পারে যে স্বকুমার আর মধুমালতী পরস্পরের জন্তে নয়। তবে সৌম্য আর মধুমালতী পরস্পরের জন্তে কি না বিবাহিত গানেন। সে লক্ষ করে জুলি খুব খুশি হয় না সৌম্যদার ব্রতের দিকে মিলির একটু একটু ঝোঁক শুনে। সৌম্য সম্পূর্ণ অবিচলিত।

“এই মেয়ে!” জুলি বলে মিলিকে, ‘তুমি কবে থেকে গান্ধীবাদী হলে? জানো ওটা আদৌ বৈজ্ঞানিক নয়। ধনিকদের সঙ্গে যাদের এত দহরম মহরম তার। শ্রমিকদের শোষণের উপর একটু ত্যাগের প্রলেপ বলিয়ে দিলেই অমনি বনবে শ্রেণীশৃঙ্খল সমাজের উদ্গাতা। ওদের ভূমিকা ওই স্বরাজের সঙ্গে সঙ্গেই শেষ হয়ে যাবে।”

“অন্তত সেটুকুও তো হোক। ওরা আট আটটা প্রদেশে কংগ্রেস গভর্নমেন্ট স্থাপন করেছে। কেন্দ্রেও করতে পারে। এটা কি সামান্য কৃতিত্ব? ওদের পলিসি মেনে না নিলে ওরা ইস্তফা দিয়ে আবার লড়তে পারে। এটাও কি সামান্য শক্তিমত্তা? ওরা যদি স্বরাজ অর্জন করতে ব্যর্থ হয় তবে আমি তোমাদের দিকেই ঝুঁকব, জুলি। ইতিমধ্যে তোমরা কী করতে চাও, করো।” মধুমালতী বলে।

“ওদের আগেই আমরা লক্ষ্যে পৌঁছে যাব। সারা দেশ আমাদের পেছনে। ওদের পেছনে গোটাকতক মল্লিঝুলোভী আপসপ্রয়াসী।” জুলি নিঃসন্দেহ।

“কী সৌম্যদা, তুমি যে একেবারে চুপ।” যুথিকা বলে।

“আমিও গভীরভাবে চিন্তিত। রবীন্দ্রনাথ বলেছেন যুদ্ধ করতে, অরবিন্দ বলছেন যুদ্ধ করতে, রলী বলছেন যুদ্ধ করতে, রাসেল বলছেন যুদ্ধ করতে। নাংসী বা ফাসিস্টদের বিরুদ্ধে। কিন্তু কংগ্রেস নেতারা বিনা শর্তে যুদ্ধ করবেন না। শর্তটা ভারতের স্বাধীনতা। অথচ স্বাধীনতার প্রতিশ্রুতি পেলে যুদ্ধ করবেন এটাও তো শর্তাধীন স্বাধীনতা। বিনা শর্তে স্বাধীনতা ঢের বড়ো জিনিস। তার জন্তে সত্যগ্রহ ভিন্ন গতি নেই। কিন্তু সত্যগ্রহে মতি কোথায়? মতি যেটা দেখা যাচ্ছে সেটা হিংসাত্মক বিপ্লবে। তার থেকে দেশকে নিবৃত্ত না করলে সত্যগ্রহের জন্তে ক্ষেত্র প্রস্তুত হবে না। সেই দুরূহ দায় বর্তেছে যাদের উপরে তাদেরই একজন আমি। জুলিকে আমি পুণা থেকে ভজাতে শুরু করি। সে সম্রাসের পথ ছেড়ে দেয়। কিন্তু সত্যগ্রহের পথ ধরে না। পুণাতে টিলক মহারাজের প্রভাব এখনো সক্রিয়। জুলি সে প্রভাব কাটিয়ে উঠতে পারে না। ও যা বলছে টিলক মহারাজ বেঁচে থাকলে ওই কথাই বলতেন। ভাষাটী বোধহয় একটু অন্তরকম হতো। হিটলারের বিরুদ্ধে যুদ্ধ না ইংরেজের বিরুদ্ধে বিপ্লব এই দুই চরমপন্থার দুটোই হিংসাত্মক। আমরা গান্ধী-

পছীরা এই দুটোর থেকেই তফাতে থাকতে চাই। আমাদের সময় আসবে। তখন যেন জনগণকে প্রস্তুত দেখতে পাই।” সোম্য ধীরে ধীরে বলে।

“তার মানে গান্ধীজী সহসা কিছু করবেন না।” মানস ভাষ্য করে।

“তার মানে গান্ধীজী আর কাউকে কিছু করতে দেবেন না।” জুলি আলাদা ভাষ্য করে।

“তোমরা কিছু করতে চাইলে গান্ধীজী বাধা দেবেন কী করে?” জানতে চায় মধুমালতী। “দিলে দেবে ব্রিটিশ রাজ।”

“বুঝতে পারলে না? কংগ্রেস যদি যুদ্ধে যোগ দেয় কংগ্রেস সরকারই আমাদের বাধা দেবে। আর কংগ্রেস সরকার তো গান্ধীজীরই আঁচলধরা। জনতা অবশ্য আমাদের পক্ষে। তবু জনতা এখনো গান্ধীজীকে মানে।” জুলি উত্তর দেয়।

“তা হলে তোমাদের বিপ্লবটা নির্ভর করছে গান্ধীজীর সম্মতির উপরে।” মানস জুলিকে তর্কে কোণঠাসা করে।

“কিছুদিনের জন্তে নির্ভর করবে। কংগ্রেস মন্ত্রীদের আমরা মসনদ থেকে নামাবই নামাব। আবার আমরা আমাদের একজন নেতাকে কংগ্রেস প্রেসিডেন্ট পদে বসাব। তিনি আসন থেকে নড়বেন না। নড়তে হবে বল্লভাচারী সম্প্রদায়কেই।” জুলি রসিকতা করে।

মধুমালতী দত্তবিশ্বাসকে বুঝিয়ে দেয় যে বল্লভাচারী সম্প্রদায় মানে কংগ্রেসের উচ্চতম নেতৃমণ্ডলী। বল্লভভাই পটেল যাঁদের সর্দার। মন্ত্রীরা তাঁদের আজ্ঞাবহ। কেন্দ্রীয় সরকারে রদবদল হলে তাঁরাই সেখানে অধিষ্ঠান করবেন।

দত্তবিশ্বাস বলে, “ভাবতে কষ্ট হচ্ছে যে বল্লভাচারীদের পদত্যাগের সঙ্গে সঙ্গে দেশময় ধরপাকড় শুরু হয়ে যাবে। আপনাকেও ধরে নিয়ে যাবে। আমি দেশে থেকেও আপনার মুক্তির জন্তে কলকাঠি নাড়তে পারব না। আমার কী স্বার্থ!”

“ওঃ! স্বার্থ কথাটা আপনার মনে লেগেছে বুঝি!” মধুমালতী হুঃখিত।

“নাগবে না? ঘরের খেয়ে বনের মোষ তাড়ানো আর কাকে বলে? আমার কী গরজ বলুন দেখি, কেন আমি নিজের কাজকর্ম ফেলে জুলিকে বাঁচানোর জন্তে সাগর পারাপার করি? এতে খরচও কি কম নাকি? ওর মা আমার পাতানো মাসিমা। অমন মাসিমা পিসিমা আমার ইংরেজ ও ভারতীয় মিলে জনা দশ বারো আছেন। সকলেরই কাঁই ফরমাস খাটি। লাভলোকসান হিসেবের মধ্যে ধরিনে। লাভও যে হয় না তা নয়। উচ্চতর সমাজে মেশবার সুযোগও মস্ত বড়ো একটা লাভ। এই যেমন ছিল লেডী হারিংটনের বাড়ী অব্যবহৃত ষাঁড়। কতজনের জন্তে সুপারিশ

আদায় করেছি, কিন্তু নিজের জন্তে নয়। কেউ একটু বললেই এদেশেও আমার একটা হিল্লো হয়ে যেত। সেটা আমার ইচ্ছে নয়। আমি ওইদেশেই থেকে যেতে চেয়েছি। থেকে গেছিও। কারো সুপারিশে নয়। কাজ দেখিয়ে। তবে এটাও ঠিক যে কাজ দেখানোও যথেষ্ট নয়। কাকে কাকে চিনি, কে কে আমাকে চেনেন, কোন্ সমাজে মেলামেশা, এসবও গণনার মধ্যে পড়ে। তাই মাসিমা পিসিমাদের সম্বন্ধে রাখতে হয়। তাঁরাই আমার অ্যাসেটস।” দত্তবিশ্বাস পরিহাস করে।

‘তা হলে স্বার্থ কখাটা ভুল নয়। কী বলেন?’ মিলিও পরিহাস করে।

‘জুলির বেলা ওটা স্বার্থ নয়, ওটা আরেকটা শব্দ। দুই অক্ষরের। আন্দাজ করুন।’ দত্তবিশ্বাস উত্তরের প্রতীক্ষা করে।

‘প্রেম।’ মিলি মুচকি হাসে।

‘ঠিক বলেছেন। মনে হচ্ছে অভিজ্ঞতা থেকে বলেছেন।’ সুকুমারও হাসে।

‘অভিজ্ঞতা?’ মিলি চমকে ওঠে। ‘অগ্নিকণা বলে যায় সুখ্যাতি তার ধারে কাছে আসতে সাহস পাবে কোন পতঙ্গ? তাকে আবার ধরে নিয়ে যাবে বলে সেই যে আশঙ্কা সে আশঙ্কা থাকতে তার সঙ্গে ঘর বাঁধতে রাজী হবে কোন্ সুজন?’

‘ট্রাজিক!’ দত্তবিশ্বাস করুণ সুরে বলে, ‘ট্রাজিক। আপনাকে দেখে মনে হয় মৃত্যুমতী একখানি ট্রাজেডী। একদিন না একদিন দেশ স্বাধীন হবে। তখন আপনার স্ট্যাচু তৈরি হবে। কিন্তু তাতে হয়তো দেখানো হবে আর একজন জোন অভ আর্ক। বেদনার নয়, বিজয়ের প্রতীক।’

‘জোন অভ আর্ক কে? মিলি না আমি?’ জুলি চেষ্টা করে ওঠে। ‘তুমি কি ভুলে গেলে যে তোমাকে না আমি বলেছিলাম আমার আদর্শ জোন অভ আর্ক? ওর আদর্শ তো ঝাঁসীর রানী লক্ষ্মীবাদি।’

‘আচ্ছা, বেশ, তোমারও তো স্ট্যাচু বানানো হবে। তোমারটাই না হয় জোনের মতো হবে আর তোমার বন্ধুরটা লক্ষ্মীবাদিয়ার মতো। ই্যা, আমার মনে আছে তুমি চেয়েছিলে জোনের মতো হতে। তোমাকে এবার উদ্ধার করা গেল না। ওরা য’<sup>১</sup> তোমাকে জোনের মতো পুড়িয়ে মারে তা হলে কিন্তু আমি টেমস নদীতে ঝাঁপ’<sup>২</sup> মধু জুলি।’ দত্তবিশ্বাস শ্লেষের সঙ্গে বলে।

‘ওসব কী অলঙ্ঘণে কথা হচ্ছে ডিনার টেবিলে বসে?’ শাসন করে যুথি-রিছি সে

‘মাফ করো, যুথি। নদীতে ঝাঁপ দেব বলেছি, ডুবে মরব বলিনি দত্তবিশ্বাস বীরপুরুষ নই, মরতে ভয় পাই।’ দত্তবিশ্বাস বলে, ‘কিন্তু বিপ্লব একটা



অপেরা নয়, জুলি। প্রতিবিপ্লবীরা তোমাকে হাতে পেলে অমর করে দেবে। আমরা যারা বেঁচে থাকব তারা কি তোমার স্ট্যাচু দেখে সান্ধনা পাব ?”

“মিস্টার দত্তবিশ্বাস,” মধুমালতী বলে, “আপনি আজ আমাদের যে কমপ্লিমেন্ট দিলেন আমি তার যোগ্য নই। বিপ্লব সম্বন্ধে এই সাত আট বছরে আমার ধ্যান ধারণা বদলে গেছে। বিপ্লবের পরে ক্ষমতা যাদের হাতে পড়বে তারা আমার শ্রেণীর লোক নয়, তারা আমার শ্রেণীটাকেই সমূলে উচ্ছেদ করবে। করলে আশ্চর্য হবার কী আছে? আমাদের পাপের বোঝা জমতে জমতে পাহাড় হয়েছে। একদিন হিসাবনিকাশের দিন আসবেই। সেদিন যদি স্বতঃপ্রবৃত্ত হয়ে বোঝা নামিয়ে দিই তবেই রক্ষা। নয়তো জোর করে বোঝা নামানো হবেই। কিন্তু আমার নিজের ভূমিকা ওতে কোথায়? আমি আপনার লোকের রক্তপাত করতে পারব না। তারা পনিকই হোক আর শ্রমিকই হোক। স্ট্যাচু যদি হয় তো জুলিরই হবে, আমরা নয়।”

“আপনার লোকের রক্তপাত করতে কি আমরাও চাই, মিলি?” জুলি প্রতিবাদ করে। “ওরা যদি পা দিয়ে ভোট দেয় তা হলে ওদের ধরতে বাঁধতে মারতে হবে কেন? হা হা হা হা! ব্যতীত পারলে না মর্য? লেনিন কী বলেছিলেন? জমিদাররা পা দিয়ে ভোট দেবে। মানে, পালাবে। তখন কৃষকরা জাম দখল করবে। এটাও কি একপ্রকার গণতন্ত্র নয়? এই গণভোট?”

জুলির হাসিতে আর কেউ যোগ দেয় না। এর নাম রেভোলিউশন মেড ইজি। সে আপন মনে বকে যায়, “যে বাঁটা দিয়ে আমরা ইংরেজকে তাড়াব সেই বাঁটা দিয়ে রাজারাজড়াদেরও। সেই বাঁটা দিয়ে জমিদারদেরও। সেই বাঁটা দিয়ে পুঁজিপতিদেরও। তবে বুর্জোয়াদের সবাইকে তাড়ানো একই কালে হতে পারে না। রাজ্য চালাবে কে? কলকারখানা চালাবে কে? দোকান বাজার চালাবে কে? তবে ওদের মাইনে কমাও। মানসদা, আপনাকেও অল্পে সন্তুষ্ট হতে হবে।”

“চল হে, মল্লিক, আমার সঙ্গে ইংলণ্ডে। সেখানে তোমার গুণের কদর হবে। যেদেশে মুড়ি মিছরির একদর সেদেশে থাকতে নেই।” দত্তবিশ্বাস বলে।

“জুলি, তোমার ধারণা আমরা আমাদের দায়িত্বের তুলনায় অত্যধিক পাই।

গরজ বলুন, আমরা যদি আমাদের দায়িত্ব কমিয়ে দাও আমরাও কম নিতে রাজী হব।” মানস

পারাপার ক’স দেয়।

আমরা তার জন্তে তৈরি হচ্ছি, বোন। স্ট্যাটাস বজায় রাখার জন্তে বিস্তর

অমন মাসিখ খরচ করতে হয়। তোমরা আমাদের স্ট্যাটাস খাটো করলে আমরাও বেঁচে

সকলেরই যুথিকা বলে।

হয় না।

যেমন কি

“স্টাটিস সকলেরই সমান হবে। কৌশলী আর মোক্তার, মার্জন আর হাতুড়ে সব সমান। বুর্জোয়াদের দেক্লাসে করতে হবে। মানে, শ্রেণীচ্যুত। ওদের মারব না। ধরব না, তাড়াব না। শুধু নিচের শ্রেণীতে নামিয়ে দেব। যেমন স্কুলের ছাত্রদের করা হয়। অমনি করেই শ্রেণীশূন্য সমাজ গড়ে উঠবে।” জুলি উৎসাহের সঙ্গে বলে।

মল্লিক, তুমি কি এমন দেশে থাকবে না আমার সঙ্গে যাবে? আমি একদণ্ডও তিষ্ঠতে চাইনে।” দত্তবিশ্বাস উদ্বেগ প্রকাশ করে।

‘আপনাকে জুলি ভয় পাইয়ে দিচ্ছে, মিস্টার দত্তবিশ্বাস। আপনি ওব একটি কথাও বিশ্বাস করবেন না। ওরা আত্মায়রা সবাই ব্যারিস্টার, ডাক্তার, পদস্থ অফিসার, কোম্পানীর ডাইরেক্টর। ওর স্বপ্তর রিটায়ার্ড ডিষ্টিক্ট ম্যাজিস্ট্রেট। বিপ্লব ওঁদের শ্রেণীচ্যুত করুক তো আগে। তারপরে আপনাকে করবে। আপনি নিজের দেশেই থেকে যান। কেন এই যুদ্ধের মুখে ওদেশে যাবেন? আমি যদি বলি, যেতে নাহি দিব?’ মধুমালতী ওর চোখে চোখ রাখে।

“জুলি আমাকে না তাড়িয়ে ছাড়বে না। আপনি কি আমাকে রক্ষা কবতে পারবেন। আপনি কি আমার তারিণী?” দত্তবিশ্বাস আবেগের সঙ্গে বলে।

“আপনি আমাকে অগ্রিম উদ্ধাব করবেন।” মিলি হঠাৎ বলে ওঠে।

দত্তবিশ্বাস হকচকিয়ে যায়। “কী করে তা সম্ভব? আমি তো দেশ ছেড়ে চললুম।”

‘আপনাকে দেশে থেকে যেতে বলব না। কথা ফিরিয়ে নিচ্ছি। আমি ভাবছি আমিই বিদেশে যাব। তা হলে তো কেউ আমাকে জেলে পুরতে পারবে না। না, সেখানেও আটক করবে?’ মিলি কী জানি কী ভেবে বলে।

‘আরে না। ইংলণ্ডে কাউকে বিনা বিচারে আটক করে না। এক যদি না সে যুদ্ধকালে শত্রুপক্ষের লোক হয়। যুদ্ধটা তো জার্মানদের সঙ্গে। আপনি তো জার্মান নন। আপনি যদি জেল এড়াতে চান তো ইংলণ্ডেই চলুন।” দত্তবিশ্বাস আহ্বান করে।

“দেখি মা-বাবার সঙ্গে পরামর্শ করে। মাসোহারা তো ওঁদেরকেই পাঠাতে হবে। কখনো ওদেশে যাইনি। আপনার সঙ্গেও পরামর্শ করতে চাই।” মধুমালতী বলে।

“আনন্দের সঙ্গে পরামর্শ দেব। জুলির জন্তে যে ব্যবস্থা করেছি সে ব্যবস্থা আপনারই কাজে লাগবে, ও যদি না যায়, আপনি যদি যান।” দত্তবিশ্বাস জুলির দিকে তাকায়।

“ঢং ! ঢং ! এটা একটা ঢং !” জুলি অবিশ্বাসের সঙ্গে বলে, “মিলি যাবে বিলেত । ইংরেজরা যার জাতশত্রু ।”

‘এটা শত্রুতার সময় নয় । ওরা বিপন্ন । ওদের বিপদ কেটে যাক, আবার শত্রুতা করা যাবে । পড়াশুনা তো তেমন কিছু করিনি । বেডফোর্ড কলেজে জায়গা পাই তো জ্ঞানের ভাণ্ডার ভরিয়ে নেব । মিস্টার দত্তবিশ্বাস আমাকে নেবে তো ?’ মিলি স্তব্ধ ।

“নেবে না কেন ? আপনার পলিটিকাল রেকর্ড নিয়ে ওরা মাথা ঘামাবে না । অ্যাকাডেমিক রেকর্ডটাই দেখবে । সঙ্গে কিছু রেফারেন্সও দরকার । সেটা আমি যেমন করে পারি ম্যানেজ করব । আপনার বাবার ওয়ার রেকর্ডও কাজে লাগবে । মেসোপোটেমিয়ায় টার্কদের হাতে বন্দী হয়েছিলেন । আপনার অ্যাডমিশন হয়ে গেছে বলে ধরে নিন । কালকেই টমাস কুককে লেখা যাবে প্যাসেজের জন্তে আর বেডফোর্ড কলেজকে অ্যাডমিশনের জন্তে । যদি আপনার গুরুজন অহুমতি দেন ।” দত্তবিশ্বাস আগ্রহ দেখায় ।

“পাশপোট নিয়ে গঙগোল বাধবে না ?” যুথিকা স্তব্ধ ।

“সেটা আমার উপর ছেড়ে দাও । আমি শেফার্ডকে বোঝাব ” মানস আশ্বাস দেয় । শেফার্ড সুপারিশ করলে সঙ্গে সঙ্গে পাশপোট মিলবে ।”

“পুলিশ থেকে বাধা দেবে না ?” যুথিকা প্রশ্ন করে ।

“আমি জাফর হোসেনকেও বলব । জাফর তো প্রায়ই মুস্তাফীকে কল দেয় । ওঁর মেয়ের জন্তে এক লাইন লিখতে পারবে না ?” মানস অভয় দেয় ।

সৌম্য এতক্ষণ চুপ করে শুনছিল । বলে, মিলি, তুমি কি সত্যি এ সময় দেশ ছেড়ে যেতে চাও ? তোমার সেবাপ্রতিষ্ঠান চালাবে কে ?”

‘আমি তার উপযুক্ত ব্যবস্থা করে যাব, সৌম্যদা । দেশে তো আমি কারো সঙ্গেই পা মিলিয়ে নিতে পারছি নে । এক আপনার সঙ্গেই কতকটা মেলে । কিন্তু আপনারা কবে সত্যাগ্রহ করবেন তা আপনারাও জানেন না । বয়স গড়িয়ে যাচ্ছে । না হলো বিয়ে । না একটা কেরিয়ার । আমার ব্যক্তিগত সুখদুঃখের কথা কি ভাবব না ?” মিলির কণ্ঠে বিদ্রোহের স্বর ।

“ওঃ তোমার সেই অভিজ্ঞতা !” জুলি টিটকারি দেয় ।

“হ্যাঁ সে অভিজ্ঞতাও জীবনের সম্পদ । কেন কেউ আমার দিকে ফিরে তাকাবে না ? কেন প্রপোজ করবে না ? তোমার কাছে প্রপোজ করবে । তুমি প্রত্যাখ্যান করবে । আমি অগ্নিকণ্ঠা হতে চাইনে, আমি স্ট্যাচু চাইনে, আমাকে বাঁচতে দাও ।”

মিলি বিদ্রোহ ঘোষণা করে। দত্তবিশ্বাসের দিকে অর্থপূর্ণভাবে তাকায়।

“জুলি ওর শেষকথা বলে দিয়েছে। আমি এখন ফ্রী।” দত্তবিশ্বাস মিলির দিকে অর্থপূর্ণভাবে তাকায়। দৃষ্টিবিনিময় হয়ে যায়।

মানস তা লক্ষ করে টিপে টিপে হাসে। স্বকুমারের উদ্দেশে গেলাস তুলে বলে,  
“বেস্ট, অভ্ লাক।”

স্বকুমার উৎসাহের চোটে দাঁড়িয়ে উঠে সবাইকে চমকে দেয়। “আমার একটু নাচতে ইচ্ছে করছে। মল্লিক, চল হে আমরা ক্লাবে ফিরে যাই। নাচের পার্টনার হতে অমরোধ করি মিস্ সিন্‌হা ও মিস্ মুস্তাফীকে।”

মানস হো হো করে হেসে বলে, “তোমার পার্টনার কে হবেন জানি। কিন্তু আমার পার্টনার তো জুলি নয়, জুঁই। হায়! নাচতে আমরা ভুলে গেছি।”

স্বকুমার অপ্রস্তুত হয়ে নিজের আসনে আছাড় খেয়ে পড়ে। “কেন যে মামুষ মরতে এদেশে আসে? কী সুখ পায় বেঁচে? মল্লিক, তুমি এদেশে ফিরে এসে প্রাণে বেঁচে আছো, কিন্তু জীবনটাকেই হারিয়েছ। তোমার জন্যে আমি সত্যিই মর্মান্বিত।”

## । পাঁচ ।

যুথিকার এক চোখ ছিল জুলির উপরে, আরেক চোখ মিলির উপরে। মিলির মুখে একটুখানি গোলাপী আভা। জুলির মুখ টকটকে লাল।

“এই মেয়ে!” জুলি বলে মিলিকে, ‘বিপ্লবের দিন তুমি থাকবে বিলেতে। শত্রুপক্ষের খাল তালুকে। এর নাম কী, জানো? বিশ্বাসঘাতকতা। এর লাজা কী, জানো? ফ্যারিং স্কোয়াড।”

মিলি শিউরে ওঠে। “জুলি! তুমি দেখছি এখন থেকেই মারমুখো। লেনিন যখন ব্রিটিশ মিউজিয়ামে পড়াশুনা করতেন তখন তুমি থাকলে তাঁকেও ভয় দেখাতো। আমিও যে ব্রিটিশ মিউজিয়ামে পড়াশুনা করব না তানয়। বিপ্লবীরা বরাবরই ইংলণ্ডে আশ্রয় নিয়েছে ও পেয়েছে। মনে করো আমিও যাচ্ছি আশ্রয় নিতে। এদেশে থাকলে তো নিৰ্ঘাত জেল।”

‘জেল।’ জুলি অবজ্ঞার সঙ্গে বলে, “জেল! তুচ্ছ জেল। তাকেই এত ভয় যে তুমি জাহাজে চড়ে পালাবে। কেন, আমি কি বলিনি যে জনতা এসে জেল ভেঙে উদ্ধার করবে? চারদিকে রব উঠবে, ইনকিলাব জিন্দাবাদ। ইনকিলাব জিন্দাবাদ। আর তখন কিনা তুমি ব্রিটিশ মিউজিয়ামে পুঁথি পড়ছ।”

“যেক্ষয়ারি বিপ্লবের দিন লেনিনও তো পেট্রোগ্রাডে ছিলেন না। তখন তিনি সুইজারলণ্ডে। জার্মান শত্রুরাই গুঁকে ওদের স্পেশাল ট্রেনে করে রাশিয়ায় পৌঁছে দেয়। এ রকম যে হবে তা কি তুমি সেদিন থাকলে জানতে? জানলে ক্ষমা করতে? তুমি বলতে লেনিন জার্মানদের চর। ফ্যারিং স্কোয়াড ডাকতে। বিপ্লব যেদিন হবে সেদিন যদি আমি বিদেশে থাকি তবে ওরাই আমাকে ওদের স্পেশাল ট্রেনে করে ভারতে পৌঁছে দেবে। চর বলবে কতক লোক, কিন্তু পরে দেখবে আমারই জিং।

কার সাধি আমাকে ফায়ারিং স্কোয়াডের সামনে দাঁড় করায়।” মিলি জলে গুষ্ঠে।

“সব বিশ্বাসঘাতকেরই ওই একই যুক্তি। সবাই যেন এক একটি লেনিন। তার চেয়ে সোজাছদ্ম স্বীকার করলেই পারো যে তুমি বিপ্লবের ভয়ে পলাতক। ভয় পাবারই কথা। ওই যে একজন পাতি বুর্জোয়া উনি দশ বছর আগে থেকেই পলাতক হয়ে ৮গুনে বসে আছেন।” জুলি দত্তবিশ্বাসের উপর কোপদৃষ্টি হানে।

“দশবছর কেন বলছ, জুলি? বারো বছর।” দত্তবিশ্বাস শুধরে দেয়।

“একই কথা। যাঁহা বাহান তাঁহা তিপান্ন। তবে তোমাকে আমরা বিশ্বাস-ঘাতক বলব না। তুমি বিপ্লবীদের একজন ছিলে না। নিহাস্ত এক স্ববিধাবাদী ভাগ্যান্বেষী পুরুষ। তোমার স্বপ্ন নিচের শ্রেণীতে নামা নয়, উপরের শ্রেণীতে গুঠা। ইংলওই তোমার উপযুক্ত দেশ। জাতকে জাত ওরা তোমারই মতো নব। তোমার তো গার্ল ফ্রেন্ডের অভাব নেই। মিলিকে নিয়ে তুমি করবে কী? বিয়ে?” জুলি রাগতভাবে বলে।

“বিয়ে!” দত্তবিশ্বাস গদগদভাবে বলে, “আমার মতো অভাগার তেমন সৌভাগ্য কি হবে! আমি চাইলে কী হবে, উনি রাজী হলে তো!”

“গুঠা আমার প্রাইভেট ব্যাপার, জুলি। এখন থেকে আমি আমার হাতের তাস দেখাব না। খেলবার সময় হলে খেলব। মিস্টার দত্তবিশ্বাস, এখন থেকেই ধরে নেবেন না যে আমি আপনাকে বা আর কাউকে বিয়ে করব। বা আদৌ বিয়ে করব। কিন্তু করতে চাইলে আমাকে ঋখবে কে? বিপ্লবী নায়িকারা কি বিয়ে করেন না? রোজা লুকসেমবুর্গ কি বিয়ে করেননি? তাঁর স্বামীটি যে বিপ্লবী ছিলেন তা নয়। বিশ্বস্ত হলেই যথেষ্ট। স্ববিধাবাদী ভাগ্যান্বেষী পুরুষও কি বিশ্বস্ত হতে পারে না? আমার কাছে একজন বিশ্বস্ত পুরুষের মূল্য অসীম। জুলির প্রতি দশ বারো বছর বিশ্বস্ত রয়েছেন দেখেই আমি চিনতে পেরেছি যে এটি একটি দুর্ভাগ্য।” মিলি প্রকারান্তরে স্বীকার করে যে এমন রত্ন পেলে সে আঁচলে বেঁধে রাখবে।

যুথিকা বলে, “সৌম্যদা, আপনার কী মনে হয়? আমার তো মনে হচ্ছে জুলি মনঃস্থির করতে পারছে না স্বকুমারদাকে ছাড়বে, না ধরে রাখবে।”

“মনঃস্থির করা শক্ত। স্বকুমারকে প্রত্যাখ্যান করলে স্বকুমার মধুমালতীকে বিয়ে করবে। তখন লোকে বলবে স্বকুমারই মঞ্জুলিকাকে প্রত্যাখ্যান করেছে। কী অপমান। অথচ স্বকুমারের কী দোষ।” সৌম্য অভিযত দেয়।

“না, সৌম্যদা, তা নয়। স্বকুমারদাকে আমি কি কোনোদিন আশা দিয়েছি যে

আজ নতুন করে প্রত্যাখ্যান করলুম ? উনি অল্প কাউকে বিয়ে করুন, আমি দারুণ খুশি হব। কিন্তু মিলি ! ও যে আমার প্রিয় বান্ধবী। ও যদি অল্প কাউকে বিয়ে করত তা হলে আমি পরম আনন্দিত হতুম। কিন্তু হুকুমারদাকে ! না, না, এটা ভাবা যায় না। এ বিয়ে যদি হয় তবে আমি জানব যে মিলি বা হুকুমারদা ফেউ আমার বন্ধু নয়। ওরা আমার সঙ্গে বন্ধুতার সুযোগ নিয়েছে।” জুলি বিষণ্ণ স্বরে বলে।

“অপূর্ব মনস্তত্ত্ব।” মানস মন্তব্য করে। “এ না হলে নারী ! তুমি নিজে বিয়ে করবে না। দশবছর কেন, এগারো বছর ধরে চলেছে সাধাসাধনা। তবু মন গলছে না। যেই তৃতীয় এক ব্যক্তি মাঝখানে এল অমনি দেখা দিল চিরন্তন জিভুজ। মিলি আর হুকুমার, তোমরা তাড়াতাড়ি মনঃস্থির করে ফ্যালো। মিলির যা রেকর্ড, জুলির আগেই মিলি বন্দী হবে। জুলি হয়তো ফেরার হয়ে আগারপ্রাউণ্ডে যাবে। কিন্তু মিলির কি সে সামর্থ্য আছে ! শরীর শক্ত নয়। দত্তবিশ্বাস, তুমি কালকেই ওর মা-বাবার সামনে বিয়ের প্রস্তাব পেশ করো। ওঁরা যদি রাজী হন তা হলে শুভকর্মটা সমুদ্রযাত্রার পূর্বেই সমাধা হবে। তার পর লম্বা হানিমুন।”

“আহা, অত তড়িৎদ্রুতি কেন ? আমাকেও একটু মনঃস্থির করতে সময় দিন। জুলিকে বঞ্চিত করে তার বরকে কেড়ে নিয়েছি বলে যে অপবাদ রটবে তার প্রতিকার না করেই যদি বিলেত চলে যাই তবে ওটা পলায়নের মতোই দেখাবে। জুলি, ভাই, তুমি আশ্বস্ত হও। বিয়ে আমি রাতারাতি করব না। পাত্রটিকে চিনলুম কবে যে চোখ বুজে বিয়ে করব ? চিনতেও সময় লাগবে। না সমুদ্রযাত্রার পূর্বে শুভকর্ম নয়। সমুদ্রযাত্রা আমি আত্মরক্ষার জন্তেই করব। মিস্টার দত্তবিশ্বাসকে সাথী পাওয়া যাবে বলে নয়। বিয়ের কথাবার্তা চলবে, কিন্তু বিয়েটা কোথায় ও কবে হবে, আদৌ হবে কি না, সম্পূর্ণ অনিশ্চিত। জুলিকেও পুনর্ভাবনার জন্তে যথেষ্ট অবকাশ দেওয়া হবে। সে যদি চিঠি লিখে জানায় যে সে তার হুকুমারদাকে বিয়ে করতে রাজী তা হলে আমি তখনই সেরে দাঁড়াব। বন্ধুর বরকে চুরি করার অপবাদ আমি সহ্য করব না। আমি তো আশা করছি জুলি নিজেই একদিন আমাদের বিয়েতে মত দেবে। যখন বুঝবে যে আমরা ওর সুখের অন্তরায় নই।” মধ্যমালতী ধীর গম্ভীরভাবে বলে।

মানস হেসে বলে, “তবে সমুদ্রবক্ষে লম্বা হানিমুন নয়, দীর্ঘ কোর্টশিপ। দত্তবিশ্বাস, আই এনডি ইউ।”

একথা শুনে যুথিকা পালটা দেয়, “মিস মুস্তাকী, আই এনডি ইউ।”

জুলির অবস্থা তখন দুটো বেলুনের মতো। সৌম্যদার দিকে হেলে ওর কানে কানে বলে, “বিধবার বিয়ে কি পাপ ?”

“কে বলে পাপ? মহাত্মাজী তো আজকাল বালবিধবা দেখলেই তার বিয়ের সম্বন্ধ কবতে নির্দেশ দিচ্ছেন। রবীন্দ্রনাথ তো ছেলের বিয়ে দিয়েছেন বালবিধবায় লড়ে। ব্রাহ্মসমাজে তো এটা বহুদিন থেকেই চলতি। তুমি ব্রাহ্মসমাজেই জন্মেছ। হিন্দু মতে যদিও তোমার বিয়ে। বিদ্যাসাগর মশায় তো বিধান দিয়ে গেছেন যে হিন্দুর মেয়েরও আবার বিয়ে হতে পারে। তিনি নিজের ছেলের বিয়ে দেন এক বিধবা কন্যার সঙ্গে। না, জুলি, পাপ নয়। তোমার ওই মিথ্যে পাপবোধ কাটিয়ে ওঠ। মিলি তোমার জন্তে অপেক্ষা করবে। তবে কোর্টশিপ যদি বেশীদিন গড়ায় স্কুন্সুমার আর পিছু হটবে না। হটলে সেটা অনারেবল হবে না।” সৌম্য পরামর্শ দেয়।

“অনারেবল যদি বল, আমার পক্ষেও কি অনারেবল হবে আমি যদি দশবছর বিধবার মতো থেকে হঠাৎ সধবা সাজি? এয়ারো কেউ নেবে আমাকে তাদের দলে? লোকে মুখ ফুটে না বলুক মনে মনে বলবে না অসতী? বিপ্লবী দাদারাও আমার সতীত্বে সন্দেহ করবেন। রানী কমলিনীর মতো আমাকেও আত্মগোপন করতে হবে বিলেতে।” জুলি বলে।

‘বিলেতে আমরা তো তাঁকে খুব শ্রদ্ধা করতুম।’ সৌম্য বলে।

“বিলেতের আবহাওয়ার গুণে। এদেশে থাকলে তাঁকে শ্রদ্ধা করতে কি না অপ্রমাণিত। এদেশে সধবারা বিধবা হয়, কিন্তু বিধবারা সধবা হয় না। হলে আড়ালে আড়ালে থাকে। প্রকাশ সভাসমিতিতে নামে না। আমাকে তা হচ্ছে দেশের কাজ ছাড়তে হয়। বিপ্লবের দিন আমারও কি কোনো ভূমিকা থাকবে না?” জুলি জিজ্ঞাসা করে।

“থাকবে না কেন? নিশ্চয় থাকবে।” সৌম্য আশ্বাস দেয়। “লোকে শ্রদ্ধাও করবে। বীরত্বের পরিচয় যদি পায়। সধবা কি বিধবা এ নিয়ে মাথা ঘামাবেন যাঁরা তাঁরা সমাজপতি শ্রেণীর লোক। তাঁদের বিরুদ্ধেই তো বিপ্লব।”

“কী আশ্চর্য! তুমিও বিপ্লবে বিশ্বাস করে।” জুলি উৎফুল্ল হয়।

“কেন করব না? আমরাও তো বিপ্লবের জন্তে ক্ষেত্র প্রস্তুত করছি। আমাদেরও ভরসা জনগণ। কিন্তু তারা প্রাণ বিসর্জন করবে, প্রাণ নাশ করবে না। তোমরা মেরে মরবে, আমরা মারব না, মরব। আমাদের সাধনা আরো কঠোর। যদি সিদ্ধিলাভ করি আমাদের সিদ্ধিও হবে আরো গৌরবময়। তোমাদের বীরত্বের আমরা প্রশংসা করি, কিন্তু আমাদের বীরত্ব আরো উচ্চ স্তরের।” সৌম্য বিনম্রভাবে বলে।

“তোমাদের পথ সময়সাপেক্ষ। আমাদের হাতে অত সময় নেই, সৌম্যদা।



স্বযোগ হাতছাড়া হলে আর ফিরবে না। অবশ্যই কিছু রক্তপাত হবে। সেটা ছুঁতরফা। তার জন্তে আমরা দুঃখিত। ইংরেজদের মহত্বের পরিচয়ও তো আমি পেয়েছি। তা বলে কি ওদের দাসত্ব আর সহ্য হয়?” জুলি আবার তেজস্বিনী।

ডিনারের পর যুথিকা বলে, “দশবছর পরে চারজন একত্র হয়েছ তোমরা। আবার কবে হবে কে জানে! এস, চারজনে মিলে তাস খেলো।”

সৌম্য বলে, “আমি তাস খেলিমে। আমাকে বাদ দাও।”

জুলি বলে, “আমি তাস খেলি, কিন্তু আজ আমার সে মুড নেই। কেন, বুঝতেই পারছ।”

তখন দত্তবিশ্বাসের পার্টনার হয় যুথিকা, আর মানসের পার্টনার মধুমালতী। ব্রিজ খেলায় দত্তবিশ্বাসের গুস্তাদি আছে। চড়া স্টেকে খেলে। হারে যত তার চেয়ে জেতে টের বেশী। ওর আয়ের একটা প্রধান উৎস হলো ব্রিজ। আজ কিন্তু স্টেক রাখতে মানা।

“মানা! মানা। সব কিছুতেই মানা। স্টেক রাখতে মানা। বিষ খেতে মানা। তবে আমি খেল দেখাব কী করে।” দত্তবিশ্বাস অহুযোগ করে।

“আমরা খেল দেখতে চাইনে। খেলা করতে চাই।” মধুমালতী উত্তর দেয়।

“নইলে আজ দুই পরিবারের সঞ্চয় লুট হয়ে যায়।” যুথিকা হুঁশিয়ারি দেয়।

“এক পরিবারের লুটের মাল অর্ধেকটা ফিরে আসবে। কিন্তু অপর পরিবারের অর্ধেকটা ফিরবে কি না কে বলতে পারে। সব নির্ভর করছে সেই পরিবারের গুরুজনের সম্মতির উপর।” মানস এই নিয়ে গভীরভাবে চিন্তিত।

মধুমালতী আরক্ত হয়। “ওটা আমার প্রাইভেট ব্যাপার।”

জুলির ভালো লাগছিল না। সে বলে, “চলো, সৌম্যদা, বাইরে গিয়ে বস। যাক। তোমার সঙ্গে একরাশ কথা আছে। কবে আবার দেখা হবে কে জানে।”

বিশাল বারান্দার একপ্রান্তে ওরা বেতের চেয়ার টেনে নিয়ে বসে। আকাশের দিকে মুখ। আকাশে তখন ঠান্ডা নেই, নক্ষত্রের মেলা। তারাগুলো এত স্পষ্ট আর এত কাছে যে হাত বাড়ালে গাছ থেকে পেড়ে আনা যায়।

“রোজ রাতে আমি আকাশের তলায় শুই। নক্ষত্রলোকের সঙ্গে পাই। ভুলে যাই পৃথিবীর দুশ্চিন্তা। যুদ্ধ বলো, বিপ্লব বলো, সবই তো সাময়িক।” সৌম্য বলে।

“ইতিহাসের সমস্তটাই তো সাময়িক, সৌম্যদা। মহাকালের তুলনায় তিন হাজার বছরের ভারত ইতিহাস তো কালকের দিনের খবরের কাগজ। তা বলে কি তার গুরুত্ব কিছু কম? আমরাও ইতিহাস তৈরি করে যাচ্ছি। কালকের দিনের জ্ঞে। নইলে আমার জীবনের মূল্য কী?” জুলি জানতে চায়।

“আমারও সেই এক জীবনজিজ্ঞাসা। কিন্তু তোমার মতো আমি ইতিহাসের জীব নই। আমি টাইম-স্পেসের ভিতরেও আছি, তার বাইরেও আছি, আমি অমৃতের সন্ধান। একদিন তোমারও এই উপলব্ধি হবে।” সৌম্য আশ্বাস দেয়।

“তোমার সঙ্গে দেখা হলে জীবনজিজ্ঞাসার কথা ওঠে। কথা ওঠে নীতি জিজ্ঞাসার। আমিও কত বড়ো হয়ে যাই। কিন্তু তোমাকে তো সব দিন পাইনে। পাবও না। যাদের সঙ্গে মেলামেশা তারা কেউ সময়ের উদ্দেশ্যে উঠতে চায় না। পারেও না। আমিও তাদেরই একজন। তোমার কাছে প্রথম ও শেষ বস্তু অমৃত ও অমৃতের সন্ধান। যাতে তোমাকে অমৃত না করবে তা নিয়ে তুমি কী করবে? আমার কাছে ওসব নিছক তত্ত্বকথা। মানুষের দুঃখ দুর্দশাই আমাকে বিচলিত করে। আমি চাই এমন কিছু ঘটুক যাতে মানুষের সব দুঃখদুর্দশা এক রাত্রির প্রাণে ধুয়ে মুছে সাফ হয়ে যায়।” জুলি কাতরভাবে বলে।

“হুলালেরও সেই ধ্যান ছিল। হুলাল দেখছি তোমার মধ্যে বেঁচে আছে। ওর কথা কি তোমার মনে পড়ে?” সৌম্য অন্তরঙ্গ প্রশ্ন করে।

“পড়বে না? ওঁর সঙ্গে যে আমার বিয়ে হয়েছিল। যদিও সেটা ওঁর মতে একরকম শিকল পরানো। সোনার শিকল। উনি যেন ইচ্ছে করেই শিকল কাটিয়ে গেলেন। সব মনে আছে, সৌম্যদা! কিন্তু সব ভুলে যেতে চাই। তাই তো কাজের মধ্যে ডুবে থাকি। জানি সাময়িক। তবু মূল্যবান।” জুলি তার মনের ঢাকা খোলে।

“হুলাল বিয়ে না করেই বিলেত যেতে চেয়েছিল, ওব বাবা তাতে নারাজ। তিনি আর সব বিষয়ে একেলে হলেও ওই একটি বিষয়ে সেকেলে। তাঁর ধারণা বিয়ে না করে বিলেত গেলে ছেলে মেম বিয়ে করে ঘরে ফিরবে। হুলাল বিলেত যাবার জ্ঞে অধীর হয়ে উঠেছিল, চাপে পড়ে বিয়ে করল। কিন্তু ওর বিবেক ওকে একমুহূর্তও সোয়াস্তি দিল না। তোমার উপরে ওর বিরাগ ছিল না, ছিল বাপের বিরুদ্ধে বিদ্রোহীভাব। বিবাহটা ও মেনে নিতে নারাজ। বাপ-বেটার গৃহযুদ্ধে তুমি হলে উলুখড়।” সৌম্য দরদের সঙ্গে বলে।

“আমি কেমন করে জানব বিয়েতে ওঁর অনিচ্ছা ছিল? জানলে কি আমি বিয়ে করতে রাজী হতুম? যাক, যা হবার তা হয়ে গেছে। ওঁর বাবারও তো

অনুশোচনার অন্ত নেই। আমাকে মোটা মাসোহারা পাঠান। ফিরিয়ে দিতে চাই, কোন স্ববাদে নেব? কিন্তু না নিলে তাঁর জীবন দুর্বহ হবে। কাজ কী ওঁকে আরো কষ্ট দিয়ে? নিই, কিন্তু নিজের জন্তে নয়। কমরেডদের প্রয়োজন মেটাই।” জুলি সাফাই দেয়। তার বিবেকের সাফাই।

“দুলাল চেয়েছিল স্বামীস্বীর মিথ্যা অভিনয় থেকে মুক্তি পেতে ও মুক্তি দিতে। তোমাকে ও মুক্ত করে দিয়ে গেছে, জুলি। তুমি সমাজের চোখে বিবাহিতা, কিন্তু ঈশ্বরের চোখে অবিবাহিতা। কেন তবে সম্পর্কটার জের টেনে যাচ্ছ? মাসোহারা নেওয়াটাও জের টেনে চলা। তোমার শ্বশুর অবশ্য তাঁর পুত্রের সঙ্গে সম্পর্কের জের টেনে চলেছেন। সেটা তাঁর পক্ষে স্বাভাবিক। কিন্তু তোমার পক্ষে মিথ্যার অভিনয়। ঠর মনে যাতে আঘাত না লাগে সেকথা ভেবে তুমি ঠর টাকা নিচ্ছ, কিন্তু নিজেও বাঁধা থাকছ। দ্বিতীয়বার বিবাহে আমি তো কোনো নীতিগত বাধাই দেখছিলাম। তুমি যদি স্বকুমারের প্রস্তাবে রাজী থাক তবে এখনো সময় আছে। কাল কিন্তু থাকবে না। কালকেই মিলির জন্তে বাস রিজার্ভ করা হবে। অবশ্য ঠর মা বাবা যদি সম্মতি দেন।” সৌম্য অনুভব করে জুলির জন্তে কত বড়ো শক অপেক্ষা করছে।

“সৌম্যদা, তোমার কাছে আমার গোপন কিছু নেই। তোমাকেই আমি সব চেয়ে বিশ্বাস করি।” বলতে বলতে জুলির গলা ধরে আসে। “স্বকুমারদা আমাকে আজ যে শক দিয়েছেন তা আমাকে থ করে দিয়েছে। আমি যদি ওঁকে বিয়ে না করি উনি মিলিকে বিয়ে করবেন। মিলি যদিও ঝট করে কথা দিচ্ছে না তবু আমি বেশ বুঝতে পারছি ও ভিতরে ভিতরে উল্লসিত। তুমি দেখবে কালকেই ও বাগদান করবে। বিয়েটা হয়তো এদেশে হবে না, কিন্তু ওদেশে হতে কতক্ষণ? তার মানে স্বকুমারদাকে আমি চিরকালের মতো হারাচ্ছি। ঠর চরিত্র নিষ্কলঙ্ক নয়, কিন্তু বিয়ে তো করেননি আর কোনো মেয়েকে। অপেক্ষা তো করে এসেছেন আমার সম্মতির জন্তে। এগারো বছর তো একটা যুগ বললেও চলে। প্রস্তাবও তো করলেন এই নিয়ে তিনবার। একবার বিলেতে, একবার বন্দীশালা থেকে মুক্তির পর, একবার এই সম্মতি পদ্মার স্ত্রীমারে। জানি উনি আমার অশেষ উপকার করেছেন ও করবেন। প্রতিদানে আমারও তো কিছু করণীয় আছে। কিন্তু সে কি বিয়ে? না, দাদা, আমার মন কিছুতেই সায় দিচ্ছে না। বিয়ে আমি কাউকেই করব না। আমি ঘরপোড়া গোরু। সিঁদুর হচ্ছে সিঁদুরে মেঘ। সিঁদুর পরতে আমি ডরাই।”

“তা হলে তুমি মিলির জন্তে স্কুমারকে ছেড়ে দাও। মিলির হাতে স্কুমারকে তুলে দাও। স্কুমারের প্রতি সেটাই তোমার করণীয়। সেটাই সব চেয়ে বড় উপকার। জানি তোমার মন এর জন্তে তৈরি ছিল না। হঠাৎ মিলির সঙ্গে স্কুমারের সংযোগ তোমাকে চমকে দিয়েছে। তুমিই তো একজনকে নিয়ে এলে আরেকজনের বাড়ী। তুমিই তো ওদের আলাপ করিয়ে দিলে। তোমারই তো এ ঘটকালি। তোমারই তো খুশি হওয়া উচিত যে মিলির মতো বান্ধবীর একটি বর জুটল। আর স্কুমারের মতো বন্ধুর একটি বো জুটল। তার পর ওদেব ভাগ্য ওদের হাতে। মিলি ওদেশে না যেতেও পারে, স্কুমার এদেশে থেকে যেতেও পারে, মুস্তাফীদের একজন দরজামাই হলে ভালো হয়, যার হাতে ওঁরা রাজকন্যা ও অর্ধেক রাজত্ব নীপে দেবেন। হ্যাঁ, বলেছেন আমাকে একথা। অনেকদিন আগে। তখন আমিই বোধ হয় ছিলুম তাঁদের লক্ষ্য। কিন্তু এ-মহাদেবের তপোভঙ্গ ও-পার্বতীর অসাধ্য। মিলি যদিও হিংসার পথ থেকে বেশ কিছুদূর সরে এসেছে।” সৌম্য মুখ টিপে হাসে।

“তবে তুমিই ওকে বিয়ে করে পুরোপুরি অহিংসাবাদী করো না কেন? গান্ধীজীর যেমন কস্তুরবা তোমার তেমনি মধুমালতী দেবী।” জুলি সীরিয়াসভাবে বলে। “তা হলে তো আমার কোনো খেদই থাকে না।”

“কেন, খেদ তোমার কিসের? চির অন্তর্গত জনকে হারাচ্ছ বলে? এগারো বছরের সম্পর্ক কাটিয়ে উঠতে পারছ না বলে?” সৌম্য সহানুভূতির সঙ্গে বলে।

“না, মিলির ভবিষ্যৎ চিন্তা করে। তুমি আর মিলি রাজযোটক। মিলি আর স্কুমারদা সম্পূর্ণ বিপরীত ধাতু দিয়ে গড়া।” জুলি স্থনিশ্চিত।

“মুস্তাফীরা ভালো করেই জানেন যে জেলে যাবার জন্তে আমি সদলবলে প্রস্তুত হচ্ছি। মিলি যদি আমার কস্তুরবা হয় তাকেও জেলে যেতে হবে। ওর মা-বাবা সেটাকে ভয় করেন। আর তাঁদের ওই অর্ধেক রাজত্ব নিয়ে করবই বা কী? আমার পৈত্রিক সম্পত্তির মতো আরো একটা ট্রাস্ট? গান্ধীজীর ট্রাস্টশিপ থিওরির অনুসরণ?” সৌম্য ব্যাখ্যা করে।

“সেও মিলির পক্ষে ভালো। কিন্তু বিলেত ফেরৎ জামাই নিয়ে ওঁরা করবেন কী? যদি এদেশে ওর মন না বসে। ও একদিন উড়ে যাবেই। মিলি যদি ওর সঙ্গে উড়ে যেতে না চায় বা না পারে তা হলে বিচ্ছেদ অবধারিত। আর সে মিলনই বা কোন্ স্থরের হবে? সাম্রাজ্যবাদীর সঙ্গে বিপ্লববাদীর গরমিল অনিবার্য।” জুলি লিখে দিতে পারে।

“আচ্ছা, জুলি, তোমরা কেউ যদি ওকে বিয়ে না করো তবে ও বেচারি যাবে

কোথায় ? ওদেশেই বিয়ে থা করে দেশকে ভুলে যাবে। চিরকাল তো অপেক্ষা করতে পারবে না। ওর তো তেমন কোনো ব্রত নেই, যেমন আছে আমার। ফিরে গিয়ে এয়ার ও বিয়ে করবেই। মিলিকে না হোক আর কাউকে।” সৌম্য অহুমান করে।

জুলি একটু গুছিয়ে নিয়ে বলে, “মা আমাকে জানতেই দেননি যে তিনি খবর পেয়েছেন যুদ্ধ বাধার মাসখানেকের মধ্যেই শতখানেক পুরনো রাজবন্দীকে আবার ধরে নিয়ে জেলে পোরা হবে ও তাদের তালিকায় আমারও নাম থাকবে। তিনি হস্তদস্ত হয়ে বিদেশে স্বকুমারদাকে চিঠি লেখেন। সে যেন ওদেশের কলেজে আমার ভর্তি ব্যবস্থা করে ও অবিলম্বে দেশে ফিরে এসে ভর্তির প্রমাণ দেখিয়ে আমাকে ওদেশে নিয়ে যায়। চিঠিতে অবশ্য এমন কোনো কথা ছিল না যে যাবার আগে বা পরে আমার সঙ্গে বিয়ে হবে। তার জন্তে চাই আমার মতামত। আমি তো আরেক পরিবারের বৌ। মা আমাকে না বলে ও কথা লিখতে পারতেন না। তাঁর লক্ষ্য আমার নিরাপত্তা। সেটুকু সম্ভব হলে বাকীটা স্বকুমারদার উদ্ধোগিতা আর আমার ইচ্ছা।”

সৌম্য হেসে বলে, “উদ্ধোগিনঃ পুরুষসিংহম্ উপৈতি লক্ষ্মী। গৃহলক্ষ্মী।”

“সংস্কৃত বুঝিনে। মানে কী ওর ?” জুলি স্বধায়।

“উদ্ধোগী পুরুষের লক্ষ্মীলাভ হয়। এক্ষেত্রে গৃহলক্ষ্মী।” সুধী উত্তর দেয়।

“স্বকুমারদার বোধ হয় সেই ধারণাই ছিল। সে সত্যি সত্যি ভর্তির কাগজপত্র নিয়ে এসে হাজির। টাকাও আগাম দিয়ে এসেছে। জাহাজও বুক করা হয়েছে। মা তো মহা খুশি। জানো তো মেজদির বর স্ট্যাণ্ডিং কাউন্সেল। তিনি সরকারের পেয়ারের লোক। স্বকুমারদাকে নিয়ে যান পুলিশ কডার দফতরে। তালিকা থেকে ওরা আমার নাম কাটতে রাজী হয়। সেটা কিন্তু দেশ ছেড়ে রওনা হবার পরে। কিন্তু আমি তো তেমন কোনো অঙ্গীকার করিনি যে বিপ্লব হলে তাতে বাঁপিয়ে পড়ব না। বাঁপ দেবার জন্তেই আমি তৈরি। ওরা যদি পারে তো আমাকে ধরে নিয়ে যাবে। জনতা যদি পারে তো আমাকে জেল ভেঙে খালাস করে নিয়ে আসবে। বিলেত গিয়ে নিরাপদ হওয়ার আমি কোনো তাৎপর্য বুঝিনে। আর তার মাশুল যদি হয় বিয়ে সেটা তো আরো অর্থহীন।” জুলি মাথা বাঁকিয়ে বলে।

“কিন্তু এমনও তো হতে পারে যে তোমাদের বিপ্লবে তোমরা ছাড়া আর কেউ লাড়া দিল না। জনতা অসাড়। মাঝখান থেকে তোমাদেরই কারাদণ্ড। প্রাণদণ্ডও হতে পারে। যুদ্ধকালে বিপ্লব তো চরম রাজদ্রোহ। তোমাদের বাঁচাতে পারে

একমাত্র কংগ্রেস। যদি কেন্দ্রে ক্ষমতা পায়। কিন্তু কংগ্রেসকেও তো তোমরা অমান্য করছ। গান্ধীজীর বিরুদ্ধেও তোমরা উঠে পড়ে লেগেছ। যাতে তাঁর প্রভাব কমে আর তোমাদের নেতাদের বাড়ে। কিন্তু আপংকালে সেই গান্ধীই তোমাদের ভরসা। না, জুলি, ওসব অবাস্তব পরিকল্পনা ত্যাগ করো। তা যদি করো তবে তোমাকে দেশ ছেড়ে পালিয়ে যেতে হবে না। স্বকুমারকে বিয়ে করতেও হবে না। ও তোমার প্যাসেঞ্জটা মিলিকে দেবে, তোমার নামের অ্যাডমিশনটা মিলির নামে করিয়ে নেবে। মিলি ওকে বিয়ে করবে কি করবে না সেটা পাবে স্থির করবে। সেটা তোমার ভাবনা নয়। তোমার ভাবনা তুমি কী করে বাঁচবে, যদি বিপ্লব ব্যর্থ হয় বা কংগ্রেস অসমর্থ হয়। কংগ্রেস মন্ত্রীরা হয়তো অবিলম্বে গদী ছাড়বেন।” সৌম্য যতদূর জানে।

“আমরা কংগ্রেসের কল্যাণে মুক্ত হতে চাইনে। জনতার অভ্যুত্থানে মুক্তি পেতে চাই। তেমন সৌভাগ্য যদি আমাদের না হয় আমরা জেলের ভিতর থেকে লড়ব। প্রাণের ভয় এখনো আমার আছে, কিন্তু সেটাও ক্রমে ক্রমে যাবে।” জুলি বলে যায়, “তবে সব চাল বেচাল হয়ে যেতে পারে। নাংসীদের সঙ্গে ইংরেজদের সন্ধি। তারপরে জার্মানে ইংরেজে একজোট হয়ে সোভিয়েটের সঙ্গে যুদ্ধ। তখন আর ইংলণ্ডের দুর্ধোগই ভারতের স্বযোগ নয়। রাশিয়ার দুর্ধোগই ভারতের দুর্ধোগ। তেমন দিন যদি আসে আমি সব ছেড়ে ছুড়ে দিয়ে বৈরাগী হয়ে পথে বেরিয়ে পড়ব। মীরার মতো বৃন্দাবনেই আশ্রয় নেব আমি। কোনো এক কুঞ্জে গাইব। বৃন্দাবনকে কুঞ্জ গলিনমে তেরি লীলা গাঁতু।” বিপ্লব এগিয়ে আসবে না, পেছিয়ে যাবে কতকাল!” জুলি হতাশভাবে বলে।

সৌম্য অনেকক্ষণ চুপ করে থাকে। তারপর বলে, “জুলি, তুমি তো একবার বৈষ্ণবী হয়ে বৃন্দাবনে আশ্রয় নিয়েছিলে। সে অভিজ্ঞতা প্রীতিকর হয়নি। সব ছেড়েছুড়ে দিয়ে কোথাও যদি আশ্রয় নিতে চাও তো আমাকে একটা খবর দিয়ো। যদি জেলের বাইরে থাকি আমিই তোমার ভার নেব।”

“তা হলে তো আমি বর্তে যাই, সৌম্যদা! তোমার মতো নির্ভরযোগ্য আর কে আছে আমার!” জুলির কণ্ঠস্বরে ভাবাবেগের আভাস।

“কই, তুমি তো আমার খোঁজখবর রাখো না।” সৌম্য ক্ষোভ জানায়।

“আর তুমি! তুমি যেন আমার কত খোঁজখবর রাখো!” জুলি পালটা দেয়।

“কলকাতা হয়ে যাওয়া আসা করতে হয়। কিন্তু সেখানে থামিনে। সেইজন্তে কারো খোঁজ নেওয়া হয় না, শুধু কি তোমার!” সৌম্য কৈফিয়ৎ দেয়।

“ওঃ তোমার বান্ধবীদের কথা বলছ। হায়, তাঁদের সকলেরই বিয়ে হয়ে গেছে। শুই যে তোমার অলকনন্দা, যে তোমাকে বিয়ে করবে বলে ব্যাকুল হয়েছিল, ওর এখন তিনটি ছেলেমেয়ে। খাচ্ছে, দাচ্ছে, পরচর্চা করছে। তোমার বিরহে দিন দিন মোটা হয়ে যাচ্ছে। হবে না কেন? স্বামীর মোটা আয়। সলিড বুর্জোয়া। তবে এখনো গান নিয়ে পাগল। গানের আসরে ওকে প্রায়ই দেখতে পাই।” জুলি বলে।

সৌম্যর মনে পড়ে যায়। সেসব দিনের জন্তে মন কেমন করে। অলকনন্দা শুকে সত্যি ভালোবাসত। কিন্তু ওর দাবী ছিল সৌম্যকে ব্যারিস্টার হতে হবে। কলকাতায় বসতে হবে। খবরের প্র্যাকটিস তিনি তাকে দিয়ে যাবেন। এদিকে সৌম্য মুক্ত থাকতে চায় দেশকে মুক্ত করতে। প্রয়োজন হলে আজীবন। কে জানে হয়তো আমরণ। সত্যগ্রহীকে মৃত্যুর জন্তেও প্রস্তুত থাকতে হয়।

“অলকনন্দার সঙ্গে দেখা হলে বোলো আমি ওর ছেলেমেয়েদের দেখতে যাব একদিন। কিন্তু কবে তা আমার হাতে নয়। হঠাৎ সত্যগ্রহ শুরু হয়ে যেতে পারে। আমার এখানকার কাজের ভার কার উপর দিয়ে যাই সে এক সমস্যা। মিলির যদি খাদি ও কুটিরশিল্পে মতি থাকত ওকেই বলতুম দেখতে। ওকে আশ্রম-বাস করতে হতো না। আমরা মেয়েদের দিনের বেলা কাজ করতে দিই, কিন্তু রাতের বেলা থাকতে দিইনে। যদি না স্বামী স্ত্রী ছ’জনেই আমাদের কর্মী হয়।” সৌম্য বুঝিয়ে বলে।

“তা মিলি তো তোমার দিকে এক পা বাড়িয়েই রেখেছে। একটু একটু করে এগোচ্ছে। স্বকুমারদা হঠাৎ কোন্ দিক থেকে এসে দিগ্ভ্রম ঘটিয়ে না দিলে ও হয়তো মূর্তিমতী কস্তুরবা হতে পারত। মহাত্মাটি কে তা আমি উচ্চারণ করব না। হ্যাঁ, সৌম্যদা, এটাও একটা সম্ভাবনা ছিল। কিন্তু তুমি তো দেশের স্বাধীনতা না দেখে নারীর পাণিগ্রহণ করবে না। ততদিন অপেক্ষা করবে কোন্ নারীর রূপ-মৌল। এমনতেই ও মেয়ের চেহারা যা হয়েছে তা স্বকুমারদার মতো রাতকানার চোখেই চলনসই। তোমার জন্তে অপেক্ষা করলে ও চেহারা হতো নন্দলাল বহুয় শবরীর প্রতীক্ষা’র বৃদ্ধা শবরীর মতো।” জুলি উপহাস করে।

“মিলিকে আমার জন্তে প্রতীক্ষা করতে হবে না, জুলি। তুমি যা ভেবেছ তা নয়। মিলির দিক থেকে যা আছে তা শ্রদ্ধা, তা প্রেম নয়। আর আমার দিক থেকে যা আছে তা বিস্তৃত কল্যাণকামনা। কিসে ওর কল্যাণ হয় সেই ভাবনা। বিপ্লব ওর মতো মেয়ের জন্তে নয়। ওর মতো মেয়েও বিপ্লবের জন্তে নয়। সন্ধ্যাসকেই ও বিপ্লব বলে ভুল করেছিল। সে ভুল ভেঙেছে। এখন যাকে বিপ্লব বলে বোঝানো

হচ্ছে সেও একপ্রকার অ্যাডভেঞ্চার। তাতে ও যে ওর অন্তরের সায় আছে তা নয়। মুসলিম জনতার মারযুক্তিকে ওর প্রাণে ভয়। আছে তো এখানে দুটিমাত্র সাহেব। দুটিকে মেরেই কি ওদের উন্মাদনা থামবে? বর্ধিষু হিন্দুদেরও ওরা মেরে খতম করবে। মিলি তাই ও পথ থেকে সরে আসছে, কিন্তু গান্ধীজীর উপরেও ওর পুরোপুরি বিশ্বাস জাগেনি।” সৌম্য বলে।

“কী এতক্ষণ ধরে গুজগুজ ফিসফিস করছ তোমরা?” যুথিকা বারান্দায় বেরিয়ে এসে সুধায়। আমাকে ডামি করে সুকুমারদা যা খেলছে দেখবার মতো। কাউকে একটা হাতও নিতে দিচ্ছে না। তাসগুলো যেন ওর বোল মানে। যাকে যা করতে বলে তাই করে।”

তৃতীয়জনের আবির্ভাবে কথাবার্তায় ছেদ পড়ে যায়। সৌম্য জিজ্ঞাসা করে বাচ্চাদের কথা। যুথিকা আশ্বাস দেয় যে ওরা অকাতরে ঘুমচ্ছে। তা হলেও বার বার গিয়ে দেখে আসতে হচ্ছে মণিকে। মাকে ছাড়া ও শতে পারে না।

জুলি লক্ষ করছিল যে দাদা ও বৌদির দুই ধরে দুই বিছানা। মণি শোয় মায়ের সঙ্গে আর দীপক আলাদা খাটে। এ রকম ব্যবস্থা ও আর কোথাও দেখেনি। ওটাও কি একপ্রকার অসিদ্ধার ব্রত? সৌম্যদা না থাকলে প্রশ্ন করত বৌদিকে।

“আমি জানতে এলুম তোমাদের কালকের প্ল্যান কী। ডিনারে আসবে তো? আমাদের এখানে বাঁধা নিমন্ত্রণ।” যুথিকা বলে।

“আমাকে কাল আবার গ্রামে গ্রামে ঘুরতে হবে। রাজে ফিরব না। কাজেই আমাকে বাদ দিয়ো, বোন।” সৌম্য ক্ষমা চায়।

“তুমি নিশ্চয়ই থাকছ, জুলি।” যুথিকা ধরে নেয়।

“আমি ভাবছি সুকুমারদাকে এস্‌কর্ট না করে আর কাউকে সঙ্গে নিয়ে বালকেই ফিরে যাব। ওর যতদিন ইচ্ছে ততদিন এখানে থাকতে পারে। যে খেলাটা ও খেলছে তা দেখবার মতো। সেটা কিন্তু তাস নয়, বৌদি। সেটা মন দেওয়া নেওয়া। কবি রবীন্দ্রনাথ কাকে লক্ষ করে ওসব লিখেছিলেন জানিনে, কিন্তু ওর বেলা অক্ষরে অক্ষরে খাটে। ‘মন দেওয়া নেওয়া অনেক করেছি মরেছি হাজার মরণে। নৃপূরের মতো ফিরেছি চরণে চরণে।’ এখন ও যতদিন ইচ্ছে ফিরবে চরণে চরণে। তুমি আমাকেও বাদ দিয়ো, বৌদি। কালকের ডিনারটা জমবে আরো ভালো।” জুলি ক্ষমা চায়।

“আমি সত্যিই দুঃখিত, সৌম্যদা ও জুলি। ব্যাপার কী আমি ঠিক ঠাওয়ারতে পারছি নে। কেন তোমরা দু’জনেই এখান থেকে যাবে? জুলির বৈঠক তো আরো



কয়েক দিন চলবে। আর তোমার গ্রাম পরিত্যজ্য কি এতই জরুরি যে তুমি মানসের সঙ্গে যুদ্ধ নিয়ে আলোচনা না করেই বিদায় নেবে, সৌম্যদা ? তা হলে, চল ওদিকে, তাস খেলা বন্ধ করে দিই।” যুথিকা বলে।

তাস খেলা বন্ধ হয়। সৌম্য আর মানস বসবার ঘরে গম্ভীর বিষয়ে আলোচনা করে। জুলি আর যুথিকা শোবার ঘরে চটুল বিষয়ে। আর স্বকুমারকে পাঠিয়ে দেওয়া হয় মধুমালতীর সঙ্গে বারান্দায়। সেখানে বসে ওরা স্বপ্নদুঃখের কথা বলে। আর কেউ শুনতে যায় না।

স্বকুমার মধুমালতীর মুখোমুখি আসন নিয়ে মন খোলে। “আপনাকে নিয়ে যাবার দায়িত্ব যেমন আমার, ফিরিয়ে দিয়ে যাবার দায়িত্বও তেমন আমারই। কিন্তু দু’বছর যেতে না যেতেই যদি আপনি হোমসিক বোধ করেন তা হলে যুদ্ধকালে কেমন করে সেটা সম্ভব ? যুদ্ধ হয়তো আর দু’বছর গড়াবে। আপনি আরো হোমসিক হবেন। কিন্তু টর্পেডোর ভয়ে যাত্রীজাহাজ এ মুখে হবেই না। কী লাংঘাতিক বিপদ।”

“আবার দেখছি সেই বন্দীশিবিরের মতোই হলো। সেবার স্বদেশে। এবার বিদেশে। তফাতের মধ্যে আপনাকে কাছে পাব।” মধুমালতী বলে।

“কিন্তু আমাকে কন্সট্রিক্ট করে কোথায় নিয়ে যায় কে জানে। তবে ওয়া খুবই বিবেচক। বুঝিয়ে বললে বুঝবে। আমার চেনাজানা প্রভাবশালী ব্যক্তির অভাব নেই। তবু আপনাকে সব রকম অবস্থার জগ্রে প্রস্তুত থাকতে হবে। ওয়ার ইজ ওয়ার। ইংরেজরা নিজেরাই বিপন্ন।” স্বকুমার হুঁশিয়ারি দেয়।

“বিয়ে যদি হয় তো স্বীর কর্তব্য স্বামীর বিপদের ভাগী হওয়া, স্বামীকে ছেড়ে পালিয়ে আসা নয়। হোমসিক তো আমি বন্দীশিবিরেও ছিলাম।” মধুমালতী বলে।

## ॥ ছন্দ ॥

সেদিন বিদায় দেবার সময় মানস বলে সৌম্যকে, “কত কথা বলবার ছিল, শোনবার ছিল, তার সিকির সিকিও হলো না। তুমি আরেকদিন এসো, সৌম্যদা।”

যুথিকা যোগ করে, “আমাদের সঙ্গে ডে স্পেণ্ড করবেন। সকাল থেকে শুরু। ডিনারের পর সারা। তা হলে বাচ্চাদেরও সঙ্গ পাবেন।”

“সেটাই তো সব চেয়ে বড়ো ভোজ। কিন্তু লোভ সংবরণ করতে হবে। আস্ত একটা দিন খরচ করার স্বাধীনতা কি আমার আছে? রবিবারেও না। ছুটির দিন দেখে একদিন দুপুরটা তোমাদের সঙ্গে কাটাও। কিন্তু,” সৌম্য একটু থেমে বলে, “এত ঘন ঘন দেখাসাক্ষাৎ হলে তোমার নামে পুলিশ রিপোর্ট যাবে না তো?”

“গেলে কী হবে? কৈফিয়ৎ দিতে হবে। এই তো। আমি তার চেয়ে কিছু বেশী দেব। বেগীর সঙ্গে মাথা।” মানস রহস্যময় করে।

“না, না, ওসব করতে যেয়ো না। তোমার যাতে অনিষ্ট হয় তার মধ্যে আমি নেই। সেইজন্মেই এতদিন দেখা করতে আসিনি। আচ্ছা, আবার আসব একদিন। বাচ্চাদের জন্মেই। দীপকের জন্মে সাপ আর শজারু আনতে হবে।” সৌম্য বিদায় নেয়।

এর পরে বিদায় নিতে আসে জুলি। বলে, “আপাতত এই শেষ দেখা। আমি কালকেই কলকাতা ফিরে যাচ্ছি, দাদা, বৌদি।”

“সে কী?” মানস বিস্মিত হয়। “তুমি একলা যাবে কী করে?”

“পথ চিনে গেছি। একলা যেতে খুব পারব। তবে একজন কমরেডকেও সঙ্গে নেব। স্কুয়ারদার কবে সুবিধে হবে, তার জন্মে বসে থাকব নাকি?” জুলি উদ্বত ভঙ্গীতে বলে।

“কেন? কালকেই তুমি যেতে চাও কেন? তোমার বৈঠক তো তিনদিনের আগে শেষ হবে না। ততদিনে আমিও যেতে পারব।” দত্তবিশ্বাস নিবেদন করে।

“তুমি পারবে কি না সেটা নির্ভর করছে তৃতীয় একজনের উপরে। পাশপোর্ট, রিজার্ভেশন ইত্যাদির জন্তে অ্যাপ্লাই করতে হবে না? তবে সমস্তটাই কেঁচে যেতে পারে, যদি গুরুজনের আপত্তি থাকে।” জুলি সাবধান করে দেয়।

“ওটা আমার প্রাইভেট ব্যাপার।” মিলি একটু কাঁজের সঙ্গে বলে।

জুলির সঙ্গে ওরাও মোটরে ওঠে। কিন্তু জুলি ওদের সঙ্গে পেছনের সীটে বসে না। সামনে শোফারের পাশে আসন নেয়।

যুথিকা হেসে বলে সৌম্যকে, “প্রজাপতির নির্বন্ধ। এগারো বছর তপস্বী করেও স্বকুমারদা জুলির মন পেলেন না। দেখে শুনে মনে হচ্ছে একদিনেই মিলির মন পেয়েছেন। তবে গুরুজনের মত না পেলে আবার যে কে সেই। স্বকুমার না চিরকুমার!”

“না, চিরকুমার নয়। ও ফিরে গিয়ে বিয়ে করবেই। ওর গাল’ ফ্রেণ্ডের একজনকে।” মানস আভাস পেয়েছে।

“তা হলে মিলির জন্তে আমি হুঃখিত হব। ওর আর বর জুটবে না। ওর মা বলেছিলেন বলে আমি চেষ্টা করেছি ও কতকটা সফলও হয়েছি।” যুথিকা বলে।

“আমার মনে হয় তুমি পুরোপুরি সফল হবে, জুঁই। ঘটকালিতে তোমার সহজাত কুশলতা। তবে কিনা যুদ্ধের অনিশ্চয়তার মধ্যে মেয়েকে বিলেত পাঠাতে রাজী হবে কোন্ মা বাপ! ওরা হয়তো জামাইকে দেশে ধরে রাখতে চাইবেন। চাকরির টোপ দেখাবেন। দেখা যাক দত্তবিশ্বাস কী করে।” সৌম্য অপেক্ষমান।

“স্বকুমারদা দেশ থেকে বহুদিন বিচ্ছিন্ন। ও বিদেশে ফিরে যাবেই। মিলি যদি যেতে নারাজ হয় তবে সেই কারণে এ সম্বন্ধ ভেঙে যেতে পারে। পূর্ণ সফলতা লাভ করব যখন মিলি রাজী হবে যুদ্ধের দুর্যোগ সত্ত্বেও বিলেত যেতে।” যুথিকা আশা করে। তবে ভরসা রাখে না।

শুভে যাবার আগে মানস বলে যুথিকাকে, “দশ বছর আগে আমি লক্ষ করেছি যে জুলির মনের কম্পাসের ধ্রুবতারা স্বকুমার নয়, সৌম্য। দশ বছর পরেও পরিবর্তন দেখছিনে। রাজনৈতিক মতান্তর থেকে ওদের মনান্তর ঘটেনি।”

“সে কী!” যুথিকা অবাক হয়। “তুমি বলতে চাও জুলির বিয়ের আশা আছে, সৌম্যদা যদি তপোভক্ত করে?”

“না, সৌম্যদা তপোভঙ্গ করবে না। বলতে পারো, সৌম্যদার তপস্শা যদি ভারতের স্বাধীনতায় পর্যবসিত হয়। তার অনেক দেরি। কারো কারো মতে ১৯৫৭ সালের মিউটিনির আগে নয়। তা যদি হয় তবে জুলি বেচারিকে আরো আঠারো বছর প্রতীক্ষা করতে হবে।” মানস দীর্ঘনিঃশ্বাস ফেলে।

“ততদিনে ওর মা হবার বয়স গড়িয়ে গিয়ে থাকবে।” যুথিকা আপসোস করে। “যদি দেখতে আমাদের বাচ্চাটিকে নিয়ে ও আজ কত আদর সোহাগ করছিল। মণি যেন ওর চক্ষুর মণি। যেন ওর খেলার পুতুল। ওর স্বভাবটা মায়ের স্বভাব। মা হয়েই ওর সার্থকতা। ও যদি মা না হয় তবে ওর জীবন বৃথা। ভগবানের কী যে বিচার! যে স্নেহময়ী মা হতে পারত সে হলো অকালে বিধবা।”

“অধু বিধবা নয়, কুমারী বিধবা।” মানস সংশোধন করে।

“ভগবান কি মুখ তুলে তাকাবেন না? কবে ১৯৫৭ সাল আসবে, তার আগে কি মিউটিনি কি বিপ্লব কি যুদ্ধে পরাজয় ঘটবে না? ফলে ভারত স্বাধীন হবে না? জুলি তো পারলে এই বছরই বিপ্লব ঘটায়। তা হলে পরের বছর ওর পরিণয়। বলা, ওর মনের কথাটা ঠিক ধরতে পেরেছি কি না।” যুথিকা জানতে চায়।

“যথার্থ।” মানস বলে, “আমার এখন মনে হচ্ছে জুলি সৌম্যদাকে বোঝাবার জন্তেই এখানে এসেছিল। গান্ধীজীকে সৌম্যদা যেন গণসত্যাগ্রহের জন্তে তাড়া দেয়। জুলির চেয়ে মিলি ঢের বেশী বাস্তববাদী। তাই ঢের কম বিপ্লববাদী।”

“ওদের দু’জনার মধ্যে কে বড়ো কে ছোট বলতে পারো?” জানতে চায় যুথী।

“মিলিই বড়ো। যদিও দেখতে ছোট। বুদ্ধিবিজ্ঞাও জুলির চেয়ে বেশী। জুলি ওর তুলনায় ছেলেমানুষ। ও আরো কিছুদিন অপেক্ষা করতে পারবে। মিলি কিন্তু বড়িয়ে যেত। হঠাৎ ওর কপাল খুলে গেল।” মানস আনন্দিত।

“খুলত না, যদি না সৌম্যদার আকর্ষণে জুলি এখানে আসত, আর জুলির আকর্ষণে সুকুমারদা। তবে এটাও আমি লক্ষ্য করেছি সৌম্যদার দিকে মিলি একটু একটু করে ঝুঁকছিল। দেখছ না, এর মধ্যে ও খন্দর ধরেছে। জুলি কিন্তু ধরেনি।” যুথিকা বলে।

“সব কেমন ওলটপালট হয়ে গেল।” মানস বলে, “সৌম্যদার দিকে নয়, সুকুমারের দিকে ঝোঁক। পল্লীর দিকে নয়, বিলেতের দিকে মুখ। কোন্ মস্ত্রে এটা সম্ভব হলো! বিয়ের মস্ত্রে। বিয়েটা যদি হয়।”

“কেন, তোমার মনে সন্দেহ আছে নাকি?” যুথিকা জেরা করে।

“কালকের দিনটা দেখি। তারপর বলব।” মানস পাশ কাটায়।

পরের দিন বিকেলে মিলি এসে হাজির। স্কুমারকে ক্লাবে নামিয়ে দিয়ে এসেছে। মিলির প্রথম কথা হলো ওরা আজ ডিনারে আসবে না।

“ব্যাপার কী, মিস মৃন্তাফী?” যুথিকা সভয়ে স্তব্ধ।

“সংক্ষেপে বলছি। আমরা স্থির করেছিলুম জুলি চলে গেলে তার অসাক্ষাতে মাকে সব কথা খুলে বলব। তারপর বাবাকে। কিন্তু যাবার মুখেই জুলি একটা বেকঁস কথা ছুঁড়ে ফেলে যায়। হয়তো ইচ্ছে করেই বেকঁস। বলে, কেউ বা বিলেত যাবার জন্তে বিয়ে করে। কেউ বা বিয়ে করবার জন্তে বিলেত যায়। যেমন ওই তুলাল। যেমন এই মিলি।”

“তার পরে?” যুথিকা রুদ্ধশ্বাসে শুনতে চায়।

“তার পরে মা আমাকে চেপে ধরেন। জুলির কী! ও খিল খিল করে হাসে। কত বড়ো একটা তামাশা! আমি বলি, মা, পাগলে কী না বলে। জুলি যে একটা পাগলী একথা কে না জানে? তুমিই তো কতবার ওকে পাগলী বলেছ।”

“মা বিশ্বাস করলেন?” যুথিকা কৌতূহলী।

“মা একবার আমার দিকে তাকান, একবার জুলির দিকে। তলে তলে একটা কিছু চলেছে আন্দাজ করবেন। কিন্তু তখনকার মতো থামেন। পরে আমরাই খাবার টেবিলে কথাটা পাড়ি। মিস্টার দত্তবিশ্বাসই কয়েকবার ঢোক গিলে আগ বাড়িয়ে বলেন, আমি আপনারা ক্ষমা করবেন না, তবু জোড়হাতে ক্ষমা চেয়ে রাখছি। কথা ছিল জুলি আমার সঙ্গে শেষ জাহাজে বিলেত যাবে। সেখানে বেডফোর্ড কলেজে ভর্তি হবে। তা হলে ওকে আর বন্দীশিবিরে ধরে নিয়ে যাবে না। সিদ্ধান্তটা জুলির মায়ের। মিসেস সিন্‌হার। জুলি কিন্তু বেকে বসেছে। জাহাজের বার্থ খালি। কলেজের সীট খালি। এমন সন্ধ্যোগ তো চাইলেও মেলে না। কেউ কি হাতের লক্ষ্মী পায়ে ঠেলে? অধ্যমের প্রস্তাবে মধুমালতী দেবী এ সন্ধ্যোগ গ্রহণ করতে সম্মত হয়েছেন।”

“তারপরে?” যুথিকা রুদ্ধশ্বাস।

“তার পরে মা কেঁদে ওঠেন। কী কান্না! কী কান্না! দে কান্না এখনো থামেনি। যাকে বলে ননস্টপ। মিস্টার দত্তবিশ্বাস মনের দুঃখে বিষপান করতে গেছেন। সেখানেই মিস্টার মল্লিকের সঙ্গে দেখা হবে। আমি ওঁকে সোজা-সুজি ‘না’ বলিনি। বাবাও ছিলেন খাবার টেবিলে। তিনি কাঁদছেনও না, হাসছেনও না। সম্পূর্ণ মৌন। বোধহয় চিন্তামগ্ন। দু’জনেই ইঙ্গিতটা ধরতে পেরেছেন। বিলেত

গিয়ে পড়াশুনাটা লক্ষ্য নয়, উপলক্ষ। লক্ষ্য হচ্ছে বিবাহ। এর একটা উটোদিকও আছে। বিলেত থেকে যদি না ফিরি। যদি যুদ্ধে নিহত হই। এত কম নোটসে বিলেত যাওয়াটাও মন থেকে মেনে নিতে পারছেন না। অথচ এর চেয়ে কম নোটসেও বন্দীশিবিরে ধরে নিয়ে যেতে পারে। যুদ্ধের সময় ওরা বিপ্লবীদের বাইরে ছেড়ে দিয়ে নিশ্চিন্ত হতে পারে না। বাবা এটা বোঝেন। মা অবুঝ। অথচ মাই তো চেয়েছিলেন আমার বিয়ে দিতে।” মিলি লজ্জায় নত হয়।

“আমাদের সকলেরই সেই ইচ্ছে। আমার মনে হয় আপনার বাবা এ প্রস্তাবে সম্মতি দেবেন। তিনি সব দিক ওজন করে দেখবেন যে এইটেই সব চেয়ে ভালো। তখন তিনিই বোঝাবেন আপনার মাকে।” যুথিকা আশ্বাস দেয়।

“কিন্তু সব দিক বিবেচনা করতে হলে পাত্রটির সম্বন্ধেও আরো জানতে শুনতে হয়। যা কিছু চকচক করে তাই সোনা নয়। পাত্রটি অবশ্য বিয়ের প্রস্তাব তোলেননি, আমিও আমার মতামত হাতে রেখেছি। কিন্তু ওঁরা হলেন সেকলে মানুষ। অমনি তো একজন অজানা অচেনা পুরুষের সঙ্গে সাত সমুদ্র তেরো নদীর ওপারে যেতে দেবেন না। বিয়ে না হোক, বিয়ের কথাবার্তা পাকা হওয়া চাই। আপনারা এক্ষেত্রে পাত্রের বন্ধু। মধ্যস্থও বলা যেতে পারে। আপনারা পেছনে না থাকলে আমি নিজেই জোর পেতুম না। আপনাদের কি আজ সন্ধ্যায় সময় হবে? আমাদের ওখানে যেতে পারবেন? বাবার সঙ্গে কথা বলতে পারবেন মিস্টার মল্লিক। আর মায়ের সঙ্গে আপনি।” মিলি ব্যাকুলভাবে বলে।

“দরকার হলে একশোবার আসব। বিয়ের সিদ্ধান্ত অবশ্য আপনাকেই নিতে হবে। ভুল করলে পশতাবেন তো আপনিই।” যুথিকা সাবধান করে দেয়।

“সে আমার প্রাইভেট ব্যাপার। কিন্তু মা বোধহয় অনিশ্চিতকে নিশ্চিত করতে চাইবেন বিলেত যাবার আগে বিয়ে দিয়ে। তা হলে আর সময় কোথায়? আমাকেও তো বিয়ের সিদ্ধান্ত নিতে হবে ঘোড়ার পিঠে চড়ে। মানুষকে গুলী করতে যত সময় লাগে বিয়ে করতে তার চেয়েও কম সময় লাগবে।...মিলি গম্ভীরভাবে বলে।

ক্যাপটেন মুস্তাফী অপেক্ষা করছিলেন। মানসকে নিয়ে যান তাঁর চেয়ারে। একথা সেকথার পর বলেন, “বিলেত যাওয়া, বেডফোর্ড কলেজে পড়া, এসব কথায় ভবী ভুলবে না। ভবী শুধু জানতে চায় একটি কথা। মেয়ের বিয়ে হবে কি না। যদি হয় তবে শুধু শুধু বিলেত যাওয়া কেন, কলেজে পড়া কেন? যদি না হয় তবে অকারণে বিলেত যাওয়া কেন, কলেজে পড়া কেন? এখন আমি এর কী উত্তর দিই, বলুন? বন্দীশিবিরের হাত থেকে পুরিজ্ঞানের আর কোনো উপায় নেই

বলে ভবী বিশ্বাস করবে না। মেয়ে তো রাজনীতি ছেড়েই দিয়েছে। সেবাকর্ম নিয়েই আছে। সরকার যদি অল্প কোনো শর্ত আরোপ করেন তাতেও ওর মা রাজী। কিন্তু বিলেত? এই যুদ্ধকালে বিলেত? যে পারছে সে পালিয়ে আসছে। যে পালায় সে-ই বাঁচে।”

মানস কেমন করে বোঝাবে যে সমস্তাটা দত্তবিশ্বাসের সৃষ্টি নয়। সে তো আজ এখনি বিয়ে করতে পারলে বর্তে যায়। মিলিই মনঃস্থির করতে পারছে না। কারণ বিয়ে করলে দত্তবিশ্বাস যেখানে থাকবে মিলিও সেখানে থাকবে। দত্তবিশ্বাস থাকবে বিলেতে। দেশে ওর কোনো কাজও নেই, বন্ধনও নেই। বিলেতেই ওর অন্নসংস্থান। বইয়ের দোকান। ওর দোকান থেকে বই আনিয়েছে মানস কয়েকবার।

“মিলিকে বিলেতেই থাকতে হবে?” মুস্তাফী মেনে নিতে অক্ষম। “কেন, মিস্টার দত্তবিশ্বাস কি এদেশেই যেতে পারেন না? কাজের মানুষের কাজের অভাব কী? গভর্নমেন্ট থেকে আমি ব্যাণ্ডেজ সরবরাহের অর্ডার পেয়েছি। যুদ্ধক্ষেত্রে পাঠানো হবে। তার জন্তে আমি একটা কোম্পানী ক্লোট করব। ম্যানেজমেন্টের জন্তে লোক চাই। হোয়াই নট ডাট বিশোয়াস?”

“বলে দেখব। কিন্তু ও দেশে ও লর্ড ও লেডীদের সঙ্গে মেশে। এ দেশে কার সঙ্গে মিশবে? বারো বছর ও দেশে থেকে ওর অনেকগুলি কন্টাক্ট হয়েছে ওদেশে। এ দেশে ওকে চিনবে কে? মফস্বল বারের এক উকীলের ছেলে। সংমায়ের শাসনে দেশছাড়া। বিয়ে করতে এসেছে। বিয়ে করার কথা জুলিকে। জুলি নারাজ। জুলি এখন ইংরেজের নাম শুনে জলে ওঠে। বিলেত যেতে বললে মারতে আসে। মিস মুস্তাফীরও সেই একই মনোভাব। তাই আমরা কেউ আশাবাদী নই। তবে মিসেস মুস্তাফী একটি পাত্রের সন্ধান দিতে বলেছিলেন। এটিও একটি পাত্র। দৈবাৎ উড়ে এসেছে। কিন্তু জুড়ে বসবে কি না নির্ভর করছে আপনার উপর।” মানস নিবেদন করে।

“আপনার বন্ধু, এ ছাড়া ওঁর সম্বন্ধে আমরা কিছুই জানিনে। জানবার দরকারও নেই। যার তার সঙ্গে আপনার বন্ধুতা হয় না। তবে জানতে ইচ্ছে করে ওঁর পড়াশুনা কতদূর। কোন্ ইউনিভার্সিটিতে।” মুস্তাফী জানতে উৎসুক।

“লণ্ডন স্কুল অভ ইকনমিকসের ছাত্র। লণ্ডন ইউনিভার্সিটির বি. এসসি। এমিকে ক্যালকাটা ইউনিভার্সিটির বি. এ.। দেশে ফিরে এলে একটা কিছু জুটে যেত হয়তো, কিন্তু তেমন কোন চাড়া ছিল না। একজন মানুষের পক্ষে যাঁহা স্বদেশ তাঁহা বিদেশ। সেখানেও চেষ্টা করলে একটা কিছু জুটে যায়। এতকাল পরে

একজনের জায়গায় দু'জন হতে যাচ্ছে। নিজের একটা আস্তানা আছে। স্থানাভাব হবে না। আয়ের অগ্ন্যন্ত উৎসও আছে। চলে যাবে। যদি বিয়ে হয়। আপাতত বিয়ের কথা উঠছে না। মধুমালতী আগে পড়াশুনা করবেন, তারপরে বিয়ে। যদি ইচ্ছে হয়।” মানস বলে যায়।

“তার মানে কী দাঁড়াল ? পাত্র পাত্রী কারো পক্ষে কোনো বাধ্যবাধকতা নেই। বিয়ে হলেও হতে পারে। না হলেও না হতে পারে। অথচ এই দুঃসময়ে ইংলণ্ডে যাওয়া চাইই চাই। লাগে টাকা দেবে কালী মুত্তাকী।” তিনি গজগজ করেন।

“বাধ্যবাধকতার কথা যদি বলেন, দত্তবিশ্বাস এক্ষুণি বিয়ে করতে রাজী। চোখ বুজে বিয়ে করবে। পলিটিকাল রেকর্ডের দিকে তাকাবে না। মেডিকাল রেকর্ডের দিকেও না। পণ্যবৌতুকও নেবে না, বিলেতযাত্রার খরচপত্রও না। ও চায় জুলির পরিবর্তে মিলিকে। খালি হাতে ফিরবে না। ওর মানসম্মানের প্রশ্নও জড়িত। কিন্তু আপনার কন্টার মন পাওয়া অত সহজ নয়। উনি কারো পরিবর্ত হতে চান না। ওঁর জন্তেও তপস্বী করতে হবে। আমার বন্ধু তাতেও রাজী। কিন্তু একটি শর্তে। কন্টাকে বিলেতে গিয়ে বেডফোর্ড কলেজে পড়াশুনা করতে হবে। নয়তো আমার বন্ধু বার বার তিনবার প্রত্যাখ্যানের জ্বালা সহ্যেতে পারবে না। ফিরে গিয়ে থাকে পাবে তাকে বিয়ে করবে।” মানস তার শেষ তাসটি খেলে।

“হঁ। বুঝেছি। জেদের মাথায় বিয়ে। একজনকে না একজনকে উনি বিয়ে করবেনই। সম্ভব হলে আজ এক্ষুণি। কিন্তু মিলি প্রস্তুত নয়। ওরও তো মানসম্মানের প্রশ্ন আছে। মল্লিক সাহেব, আপনিই বলুন আমার কী করা উচিত। একটি পাত্রকে হাতছাড়া করলে আর একটি পাত্র জুটবে না। মিলিও কয়েকটি খারিজ করেছে। নিজেও খারিজ হয়েছে। দত্তবিশ্বাসকে তো আমার খুব তুখোড়, স্মার্ট ও করিংকর্মী মনে হয়। কিন্তু আমার কন্টাটি যে আইডিয়ালিস্ট। আইডিয়ালিজমের জন্তে ওর জীবনটাই ব্যর্থ। আমি তো ধরে নিয়েছিলুম যে এ জীবনে ওর বিয়ের আশা নেই। হঠাৎ একটু আলোর আভাস দেখতে পাচ্ছি। মল্লিক সাহেব, আপনার মেয়ে হলে আপনি কী করতেন ? এক্ষুণি বিয়ে দিতেন না আরো কিছুদিন দেখতেন ?” মুত্তাকী উদ্ভাস্ত।

“মেয়ে যেখানে সাবালিকা সেখানে সিদ্ধান্তটা মেয়ের উপরে ছেড়ে দেওয়াই সমীচীন। মধুমালতী শুধু সাবালিকা নন, তিনি স্থিরমতি। মনঃস্থির করতে তাঁর সময় লাগবে। অথচ দত্তবিশ্বাসের হাতে অত সময় নেই। ওর শেষ জাহাজ তিন সপ্তাহের মধ্যেই বসে ছাড়েবে। একজন যদি সমুদ্রের এপারে থাকে আরেকজন ওপারে



তা হলে চিঠিপত্রই মিলনের সূত্র। কিন্তু যুদ্ধকালে সেটাও ক্ষীণ হতে হতে ছিন্ন হতে পারে। তা হলে আরেকজনকেও ওপারে যেতে হয়। এই পর্যন্ত তাঁর বাধ্যবাধকতা। এর বেশী নয়। পছন্দ না হয় বিয়ে করবেন না। দত্তবিশ্বাসকে মুক্তি দিলে সেও আর কাউকে বিয়ে করবে। তবে আমার নিজের মত হচ্ছে হাতের লক্ষ্মী পায়ে না ঠেলা। আইডিয়াল ম্যাচ এ পৃথিবীতে কোথায়? যতই দিন যাবে ততই রূপখোবন ক্ষয় হবে। শেষে কেউ ফিরেও তাকাবে না। ওল্ড মেড হয়ে জীবন কাটবে।’ মানস তার মত জানায়।

“ঠিক। ঠিক। যতই দিন যাবে ততই বিবাহের অযোগ্য হবে। এটা কি ওর মা বোঝেন না? না বুঝলে কী করে বোঝাই বলুন তো? মিসেস মল্লিকের সহায়তা চাই। তিনি তো ঘরে বসে মিলির মায়ের সঙ্গে কথা বলছেন। একটু পরে জানতে পাব কী বললেন। এ ঘটকালি তো ওঁরই কীর্তি।” মুস্তাফী তারিফ করেন।

মিলির মা নরম হয়েছেন শোনা গেল। কিন্তু মেয়ে যদি বিয়ে না করেই ফিরে আসে লোকে ছি ছি করবে। পরে ওকে আর কেউ বিয়ে করবে না। লাভের মধ্যে হবে বিলিভী শিক্ষা। তাতে মাথা উঁচু হবে। সব চেয়ে ভালো হয় মিলি যদি বয়স থাকতে বিয়ে করে। বয়স কি আর অপেক্ষা করবে? যুথিকা নাকি পরামর্শ দিয়েছে চোখ বুজে কাঁপ দিতে। নারীর জীবনে এটাও তো একটা বিপ্লব। বিপ্লব মানেই বুঁকি। বিয়ে মানেও তাই। দু’তিন বছর বয়স পার করে দিয়ে এমন কী নিশ্চয়তা বাডবে? সময় আর জোয়ার কারো জন্তে সবুর করে না। জুলি যথাকালে পথ ছেড়ে দিয়েছে। ওর বন্ধু মিলির জন্তে। এটাকে বন্ধুত্ব্য বলেই মনে করা উচিত। মিলি কেন দোনোমনো করছে? ওর নজরে কি আর কোন পাত্র আছে? পুরুষ হচ্ছে প্রজাপতির মতো। ওকে পিন দিয়ে এঁটে না রাখলে ও উড়ে গিয়ে অল্প কোনো ফুলে বসবে। অল্প কোনো মালতীর মধু পান করবে। আদর্শ পুরুষ নয়। কিন্তু তার জন্তে শবরীর প্রতীক্ষা নিরর্থক।

মা বলেন মেয়েকে, “মনঃস্থির তুই দিন সাতেকের মধ্যেই কর। তুই ‘হ্যা’ বললেও আমি রাজী। ‘না’ বললেও রাজী। কিন্তু ঝুলিয়ে রাখিস্নে।”

নৈশভোজন সেদিন মুস্তাফীদের ভবনেই হয়। বিদায় দেবার সময় মানস বলেন, “বেশ, সাতদিন পরেই এসপার কি ওসপার। কিন্তু ইতিমধ্যে পাসপোর্টের দরখাস্তটা করে রাখলে সময় বাঁচে। দরকার না হয় তুলে রাখবেন। পরে কাজে লাগতে পারে।”

পরের দিন পাসপোর্টের ফর্ম আনতে স্বয়ং মুস্তাফী যান জেলা শাসকের অফিসে। চারদিকে সাড়া পড়ে যায়। লোকে ভাবে তিনিই বিদেশে যাচ্ছেন। এর পরে তিনি

শেফার্ড সাহেবের কুঠিতে গিয়ে সাক্ষাৎ করেন। সঙ্গে মিলি ও স্নুসুমার! শেফার্ড একগাল হেসে বলেন, “এই বাধিনীর বিয়ে দেবার জন্তে সরকার থেকে কত না ফাঁদ পাতা হয়েছে! কিন্তু কারো মাথায় আসেনি যে একে বিলেত পাঠাতে হবে। সেখানেই অপেক্ষা করছে ফাঁদ। আমার ঘাড় থেকে একটা ভূতাবনার বোঝা নামল। দরখাস্ত মনজুর করতে এই আমি স্থপারিশ করলুম। বেগ্ট অভ লাক টু ইউ, মিস মুস্তাফী, অ্যাণ্ড টু ইউ ইয়ং ম্যান।”

মধুমালাতী বলে, “আমি কিন্তু এখনো কথা দিইনি যে আমি বিয়ে করব।”

“আমিও তো উল্লেখ করিনি যে আপনি বিয়ে করতে যাচ্ছেন। আপনি যাচ্ছেন পড়াশুনা করতে। মঞ্জুলিকা সোমের জন্তে সংরক্ষিত স্থানে। এস্কট হচ্ছেন মিস্টার ডাট বিশোয়াস। যাঁর লগুনে বইয়ের দোকান আছে। এর থেকে যদি কেউ অহুমান করে যে এর পরিণতি বিবাহাস্ত তবে ক্ষতি কী?” শেফার্ড চোখ টেপেন।

ক্যাপটেন মুস্তাফী সাহেবকে ধন্যবাদ দিয়ে বলেন, “এমনও হতে পারে যে পাসপোর্ট পেলেও যাওয়া হবে না। কাজেই ব্যাপারটা গোপনীয় রাখবেন, সার।”

সাতদিনের মধ্যেই পাসপোর্ট পৌছে যায়। পাসপোর্টখানা হাতে পেয়ে মিলির সে কী বিষয়। ইংরেজদের উপর ওর বিশ্বাস একেবারেই ছিল না। অন্তত ছ’টি মাস না ঘুরিয়ে ওরা কি পাসপোর্ট ইস্থ্য করবে ওর মতো বিপ্লবী নায়িকাকে? ও যদি বিলেত থেকে স্নাইডেন চলে যায় ও সেখানে থেকে রাশিয়ায় তা হলে ওরা কী করতেপারে?

“তা হলে তুই কী স্থির করলি, মিলি?” মা জানতে চান।

“এ পাসপোর্ট তুলে রাখলে ওরা যে-কোন দিন কেড়ে নিতে পারে। আমি এটা নিয়ে সাগর পাড়ি দেব, মা।” মিলি উত্তর দেয়।

“তা হলে, বাছা, এবার আমার কথা শোন। বিয়ের পাট চুকিয়ে দিয়ে যা। কবে ফিরে আসবি কে জানে! ততদিন যদি বেঁচে না থাকি! তার আগে আমি দেখে যেতে চাই তোর সিঁথিতে সিঁদুর।” মা বলতে বলতে কঁদে ফেলেন।

“তোমার হাসিমুখ দেখে যেতে চাই, মা। তোমাকে কাঁদিয়ে যেতে চাইনে। তুমি যা বলবে তাই হবে।” মিলি মাথা নত করে।

“তোমার যাকে পছন্দ তারই সঙ্গে তোর বিয়ে দেব, মিলি। যাবার আগেই দেব। অজ্ঞানপর্বস্ত থাকলেই ভালো হতো, কিন্তু ততদিন তো জাহাজ দাঁড়িয়ে থাকবে না। ঝাঁপ্তিকেই বিয়ের দিন ফেলতে হবে। অরক্ষণীয় কন্টার বিয়ে কাঁপ্তিকেও হয়। হাতে সময় বড়ো কম। তেমন বেশী ধুমধাম হবে না। মনে খেদ থেকে যাবে। উপায় কী! তুই যে রাজী হয়েছিল এতেই আমি কৃতার্থ।” তিনি হাঁফ ছেড়ে বাঁচেন।

মুস্তাফী স্কুয়ারকে ডেকে বলেন, “মিলি মত দিয়েছে, এখন আমরাও মত দিচ্ছি। ইংরেজরা বলে, ম্যারেজেন্স আর মেড ইন হেডেন। আমরা নিমিত্তমাত্র। মিলির বিয়ে ভাবতে পারিনি যে স্বচক্ষে দেখতে পাব। যত তাড়াতাড়ি সম্ভব তত তাড়াতাড়ি দিচ্ছি। তুমি কাকে কাকে নিমন্ত্রণ করতে চাও ফর্দ করো। তোমাদের পক্ষ থেকে কে কে আসবেন? তোমার পিতৃদেব? তাঁকে চিঠি লিখ কি?”

“লিখলে ভালো দেখায়। কিন্তু ওঁর খাঁই মেটাতে পারবেন না। টাকা ছাড়া আর কিছু বোঝেন না। পাঠাইনে বলে আমার উপর খাল্লা।” স্কুয়ার লজ্জিত।

“মিলি আমাকে অনেকদিন আগে থেকেই বলে রেখেছে যে বিপ্লবীর জীবনে বিবাহ নিষিদ্ধ নয়, কিন্তু পণ্যযৌতুক দানগ্রহণ নিষেধ। ত্যাগ ও শৌর্ধের দ্বারা ও যেটুকু স্কৃতি অর্জন করেছে তার সবটাই নষ্ট হবে যদি ওর বিবাহ হয় বুর্জোয়া বড়লোকের মেয়ের মতো। সত্যি কথা বলতে কী, এতদিন যে ওর বিয়ে হয়নি তার প্রধান কারণ এরপক্ষ আশা করে পণ্যযৌতুক আর কণ্ঠাপক্ষ তাতে নারাজ। এক বিপ্লবী ভিন্ন আর কে ওকে বিয়ে করত, বলা? তাতে কিন্তু ওর জননীরা আপত্তি। মেয়েকে যার হাতে দেবেন তার জেল হবে কি স্বীপাস্তুর হবে কে জানে! ফাঁসীও হতে পারে।” মুস্তাফী শিউরে ওঠেন।

“আমিও তো কালাপানি পার হয়েছি ও হব।” স্কুয়ার সবিনয়ে বলে।

“সেইজন্মে তোমার বেলাও তাঁর আপত্তি ছিল। কিন্তু তিনিও চান যে মিলি আর কোথাও যাক, এদেশে থাকলে হয় বন্দীশিবিরে নয় আগুণগ্রাসিত। বিপ্লব থেকে যত দূরে যায় তত ভালো।” মুস্তাফীর সেই মত।

“তা হলে এত কান্নাকাটি করলেন কেন? আমার তো মনে হলো মিলিকে ছেড়ে তিনি একদিনও বাঁচবেন না।” স্কুয়ার দুঃখিত।

“ওটা শক থেকে। এতদিনে সয়ে গেছে। তুমি চালাক চতুর ছেলে, যুদ্ধের সময় আপনাকে বাঁচাবে, বোকেও বাঁচাবে, তোমাকে দেখে শুনে তাঁর প্রত্যয় হয়েছে। আমার তো সন্দেহই ছিল না। বিপদ বরং এই দেশেই বেশী।” মুস্তাফীর ধারণা।

“আমি সামান্য মানুষ। আমার উপর আপনাদের এই বিশ্বাস আমাকে অভিজ্ঞত করেছে, মেসোমশায়।” স্কুয়ার এর মধ্যে মেসোমশায় ও ‘মাসিমা’ ডাকতে শুরু করেছে। সেটা জুলির অঙ্গুরণে।

“বিলেত গেলে মিলিও চালাক চতুর হয়ে উঠবে। এদেশে থাকলে ওর জীবনের সর্বাঙ্গীণ বিকাশ হবে না। আমার মনেও তো একটা খেদ রয়ে গেছে যে আমার মা আমাকে বিলেত যেতে দিলেন না। নইলে আমিও একজন আই. এম. এস. হতে

পারতুম। এতদিনে কর্নেল মুস্তাফী। মা বেঁচে থাকতে আমাকে যুদ্ধে যেতেও দিতেন না। গেছি বলেই ক্যাপটেন মুস্তাফী হয়েছি। আরো উঁচু র‍্যাঙ্ক আমার পাওনা ছিল, স্কুয়ার। মেজর মুস্তাফী হবার আগেই আমি সরে পড়ি। জানতুম যে বন্দীশিবিরে মিলিকে ওর বন্ধুরা ধিক্কার দেবে। যার মেয়ে বিপ্লবী বন্দী তার মেজর হওয়া সাজে না। তুমি হয়তো ভাবছ আমি র‍্যাঙ্কের জন্তে লালায়িত। না, বাবা। তবে এটাও কবুল করছি যে লোকে যদি আমাকে ক্যাপটেন মুস্তাফী না বলে ডাক্তার মুস্তাফী বলে আমি ব্যথা পাই। যুদ্ধে এবার বহু ডাক্তার নেবে। বহু ক্যাপটেন হবে। যুদ্ধ জিনিসটা সেদিক থেকে খুব একটা খারাপ জিনিস নয়। কী বলো, স্কুয়ার?” তিনি সিগারেটান দেন।

“আমিও তাই ভাবছি, মেসোমশায়। এই হিড়িকে আমিও ক্যাপটেন বনে যেতে পারি। হোম গার্ডে আমাকে নেবে, যদি রেগুলার আর্মীতে না নেয়। এবারকার যুদ্ধে সিভিল ডিফেন্স বলে একটা বিভাগ থাকবে। মিলিটারী ডিফেন্সই সব নয়।” স্কুয়ার উৎসাহের সঙ্গে বলে।

‘যুবকদের মধ্যে আমি এমন উৎসাহ দেখতে ভালোবাসি। বাঙালীর জীবনে সামরিক অভিজ্ঞতার স্বযোগ কোথায়? যেটুকু পাওয়া যাচ্ছে সেটুকুর জন্তে ধন্যবাদ দিতে হয়। তবে, হ্যাঁ, আপনাকে বাঁচিয়ে।’ মুস্তাফী সাবধানী মানুষ।

বিয়ের দিন শেফার্ডকে নিমন্ত্রণ করা হয়েছিল। তিনি স্বতঃপ্রবৃত্ত হয়ে একখানি পরিচয়পত্র দিয়ে যান। লগুনে তাঁর এক বোন থাকেন। ওঁর নামে। মিসেস দত্তবিশ্বাসের সঙ্গে আলাপ হলে উনি সুখী হবেন। প্রয়োজনের সময় সহায়তা করবেন।

“ভালো কথা,” শেফার্ড মনে করিয়ে দেন, “কলকাতায় পাসপোর্ট অফিসারের সঙ্গে দেখা করে বলবেন যে ইতিমধ্যে আপনার বিয়ে হয়ে গেছে। আপনার পদবী তাই পালটে গেছে। প্রমাণ চাইলে নিমন্ত্রণপত্র দেখাবেন।”

মধুমালতী তার আন্তরিক ধন্যবাদ জানায় ও করমর্দন করে তাঁকে বিদায় দেয়।

তখন পুলিশ সাহেব খোন্দকার জাফর হোসেন বলেন মুস্তাফীকে, কানে কানে, “আর কিছুদিন পরে ওই শেফার্ডের হাত দিয়েই আমি সই করিয়ে নিতুম গ্রেফতারি পরোয়ানা এই মেয়ের নামে। তার আগেই পাখী উড়ে যাচ্ছে। শুভ হোক।”

শহরের গণ্যমান্তরা প্রায় সকলেই নিমন্ত্রণ রক্ষা করেছিলেন। দস্তরমতো হিন্দু বিবাহ। সালস্কারা কন্ঠাকে দেখে কে বলবে যে ইনি শ্রমিক বা কৃষক শ্রেণীর! তবে পণ ঘোড়কের আড়ম্বর ছিল না। তার বদলে সেবাপ্রতিষ্ঠানে মুস্তাফী পঞ্চাশ হাজার টাকা দান করেন।

কিন্তু বরকর্তা কোথায়? তিনি আসেননি। পত্রের উত্তরে তিনি জানিয়ে দিয়েছেন যে তাঁর পুত্রের সঙ্গে তাঁর কোনো সম্পর্ক নেই। এ বিবাহে তাঁর সমর্থন নেই।

বরকর্তা বা তাঁর প্রতিনিধি না হলে বরকে সভাস্থ হতে অস্বমতি দেবে কে? সৌম্যকেই বরকর্তা সাজতে হয়। বরের চেয়ে বয়স যদিও খুব বেশী নয় তবু দাড়ি গোঁফের বাহুল্যে প্রৌঢ়ের মতো দেখায়। কন্যাকর্তার অস্বরোধে সৌম্য বরকর্তার আসন নেয়।

বিয়ের পরে সৌম্যর কর্তাগিরির মুখোশ খসে পড়ে। সে বন্ধুর হাতে হাত মিলিয়ে ঝাঁকানি দেয়। “সত্য ত্রেতা দ্বাপরমে এ্যায়না কাম কোই নেহি কিয়া। লাটিন ভাষায় জুলিয়াস সীজার একবার একটা দেশ জয় করে বলেছিলেন, ভেনি ভিডি ভিসি। বাংলাভাষায় তুমিও বলতে পারো, এলুম, দেখলুম, জয় করলুম।”

“কেন লজ্জা দিচ্ছ, ভাই চৌধুরী? তুমি তো জানো সব কথা। কাকে পেতে এতদূর এসেছিলুম, কাকে হারালুম, কাকে তার বদলে পেলুম।” স্বকুমার বলে ধরা গলায়।

“কাকে হারালে সেটা বড়ো কথা নয়, কাকে পেলে সেইটেই বড়ো কথা। এই নারীর জন্তেও তপস্যা করতে হয়। বিনা তপস্যায় এমন নারী মেলে না। তুমি যে পাচ্ছ এটা মেহাং বরাত জোরে। বোধহয় তোমার সেই তপস্যাই তোমার এই সাফল্যকে বল জুগিয়েছে। মিলি তোমার সেই তপস্যায় মুগ্ধ। তা হলেও তোমাকে নতুন করে তপস্যা করতে হবে। মিলির মন পেতে। মিলি তোমাকে পরখ করে নেবে। সময় লাগবে। বিয়ে করেছে বলে ধরে নিয়ে না যে ভালোবাসা পেয়েছে।” সৌম্য উপদেশ দেয়।

“তুমি যে আমাকে ভয় পাইয়ে দিলে, ভাই।” স্বকুমার বলে।

“কেন, ভয় কিসের? জুলি মিলি দু’জনকেই আমি চিনি। জুলির সঙ্গে বিয়ে হয়ে থাকলে ওর হাত থেকে চড়টা চাপড়টা খেতে। বকুনি তো হতো নিত্য আহার্য। মিলি ঠাণ্ডা মেয়ে। সম্ভ্রাসবাদী যুগে দেশের অপমানে আগুন হয়ে কী করেছিল না করেছিল সেসব পূর্বজন্মের মতো শোনায়। তবে আগুন পুরোপুরি নেবেনি, বিপ্লবের আবহাওয়ায় আবার জলে উঠতেও পারে, সেইজন্মেই তো ওকে বিদেশে চালান করে দেওয়া। কিন্তু তেমন কোনো অঘটন না ঘটলে ও তোমাকে স্থখী করবে, স্বকুমার। তুমিও ওকে স্থখী করবে, আশা করি। আর কারো দিকে দৃষ্টি দিয়ো না। আর কেউ যেন তোমাদের দু’জনের মাঝখানে না আসে। মিলি

প্রাচ্য নারী। ওদেশের রীতিনীতি বোঝে না। তোমার গার্ল ফ্রেন্ডদের থেকে শতহস্ত দূরে থেকে। একদা তুমি একজন গ্যালাণ্ট ছিলে। সেকথা বেবাক ভুলে যেয়ো। আলিবামে ছবি টবি থাকলে পুড়িয়ে ফেলো। কষ্ট বোধ হলে ফেরৎ দিয়ে। জুলির নামও করতে মানা করি। ওদের দু'জনের মধ্যে একটা রেযারেশির ভাব লক্ষ্য করেছি। প্রিয় বন্ধু, অথচ প্রতিদ্বন্দ্বী।” সৌম্য সতর্ক করে দেয়।

স্বকুমার গদগদ হয়ে বলে, “তোমার মতো শুভার্থী আর কে আছে আমার! তুমিই প্রকৃত বরকর্তা। তবে এ বিয়েটা যুথিকার কীর্তি। ভাগ্যিস, ওরা এখানে ছিল। মানস আর যুথিকা। ভাগ্য ফলতি সর্বত্র।”

## ॥ সাত ॥

জুলিকে টেনে তুলে দিয়ে স্বকুমার সঙ্গে সঙ্গে টেলিগ্রাম করেছিল ওর মাকে। তিনি তা পেয়ে অবাক। মেয়েকে শেয়ালদায় রিসিভ করতে এসে তিনি ওর মুখে যা শোনেন তা আরো বিচিত্র। তিনি হতবাক হন। শেষে যখন বিয়ের নিমন্ত্রণ আসে তখন তিনি স্তম্ভিত হন। জুলিকে উদ্ধার করার জন্তে বিলেত থেকে যে ছুটে এল সে কিনা জুলিকে পথে বসিয়ে ওর বান্ধবী মিলিকে নিয়ে উধাও হবে।

“স্বকুমারের মতো বিশ্বাসী ছেলে, এগারো বছর ধরে যে বিশ্বাস রক্ষা করে এসেছে, সেও শেষকালে বিশ্বাসভঙ্গ করল। ও তোকে বিট্টে করেছে, জুলি।” মিসেস বিনীতা সিন্ধা হাহতাশ করেন।

“না, মা, তুমি ভুল বুঝেছ। স্বকুমারদা আমাকে বিট্টে করেনি। আমিই ওকে জিল্ট করেছি। এই নিয়ে ও তিনবার প্রণোজ করল। তিনবারেই আমি ‘না’ করলুম। ওর জীবনের উচ্চাভিলাষ হলো বুর্জোয়াদের সমাজে আরো, আরো, আরো উপরে ওঠা। পৈঠার পর পৈঠা পার হয়ে ‘দার স্বকুমার’ কি ‘লর্ড ডাট বিশোয়াস’ বনা। আর আমি তো ওর বিপরীত মার্গে চলেছি। দিন দিন দেক্সাসে হচ্ছি। চাষানী কি মজুরনীর সঙ্গে আমার কোনো তফাৎ থাকবে না। ও আমাকে টেনে উপরে তুলতে পারবে না। আমিও ওকে টেনে নিচে নামাতে পারব না। এমন বিয়ে কি সফল হতে পারে? তা ছাড়া আরো কথা আছে।” জুলি একটু থামে।

“কী কথা?” ওর মা উৎসুক হন।

“ও ব্রহ্মচারী নয়।” বলতে গিয়ে জুলি লজ্জায় লাল হয়। হৃ’হাত দিয়ে মুখ ঢাকে।

“ওঃ এই কথা !’ যার বয়স হলো গিয়ে পঁয়ত্রিশ কি ছত্রিশ সে কতকাল সাধু সন্ন্যাসীর মতো থাকবে ? আজকাল সেটল্ড না হয়ে বিয়ে করা যায় না। আর সেটল্ড হতে অর্ধেক জীবন কেটে যায়। অত বাহবিচার করলে কি তোর দুই দিদির বিয়ে হতো ? বিয়ের সময় ওসব বিষয়ে চোখ বুজে থাকতে হয়।” মাও লজ্জায় লাল হন।

“এ তো ভারী অজ্ঞায়। মেয়েদের বেলা এক নিয়ম, ছেলেদের বেলা আরেক। এর বিরুদ্ধে বিদ্রোহ করা উচিত।” জুলি ক্ষেপে যায়।

“তা হলে তো উপার্জনকম হবার আগেই ছেলেদের বিয়ে দিতে হয়। ছিল আগে এ প্রথা। এখন উঠে গেছে। তোর নিজের বেলা আমরা ও প্রথা মানতে গিয়ে বিপাকে পড়েছি। বিশ বছর বয়সের ছেলের সঙ্গে ষোল বছর বয়সের মেয়ের বিয়ে। দু’বছর যেতে না যেতেই বিধবা। নইলে তুই যেমনটি চেয়েছিলি তেমনটিই পেয়েছিলি। ওটা একটা বিয়েই নয়। তাই আমি তোর আবার বিয়ে দিতে চেয়েছি। স্বকুমারের মতো আর কেউ তো এগিয়ে আসেনি বিধবাকে বিয়ে করতে। এখন স্বকুমার হাতছাড়া হলো। কোথায় আবার পাত্র খুঁজব ! তোর বয়সের সঙ্গে সঙ্গতি রেখে বিয়ে দিতে গেলে আবার ওই বয়সী ছেলের খোঁজ নিতে হবে। সেও কি শুদ্ধসত্ত্ব হবে ?” মা সংশয় প্রকাশ করেন।

“বিয়ে তো তুমি একবার দিয়েছিলে, মা। আবার দেওয়া তো তোমার দায়িত্ব নয়। যদি আবার হবার থাকে তো আমার দায়িত্বে হবে। তার দেরি আছে। তখন তুমি দেখবে যে আমার ভুল হয়নি।” জুলি আশ্বাস দেয়।

“কার কথা ভেবে বলছিছ ? আমি কি তাকে চিনি ?” মা কৌতূহলী হন।

“খুব চেনো। এগারো বছর ধরে চেনো।” জুলি টিপে টিপে হাসে।

“কে ? কে ? আমি তো ভেবে পাইনে।” মা পীড়াপীড়ি করেন।

“সৌম্যদা।” জুলি ফাঁস করে দেয়।

“কী যে বলিস্।” মা যেন আকাশ থেকে পড়েন। “পাগল আর কাকে বলে।” “ওর না আছে চাল, না আছে চুলো। বাপের সম্পত্তি ও ট্রাস্ট করে দিয়েছে। তার পর থেকে আশ্রমে আশ্রমে ঘুরছে। তোর সঙ্গে বিয়ে হলে তাকে নিয়ে ও রাখবে কোথায় ? সংসারটা চলছে যে দুটো চাকায় তাদের একটার নাম টাকা। আরেকটার নাম লাঠি। গান্ধী মহারাজ এর দুটোর একটাতেও বিশ্বাস করেন না। তাঁর শিষ্ণুও হয়েছে তাঁরই মতো। সংসার চলবে কী করে ?” মা বার বার মাথা নাড়েন।



“তার অনেক দেবি আছে, মা। আগে তো দেশ স্বাধীন হোক। তার আগে ওঁর ব্রতভঙ্গ হবে না। ওঁর সঙ্গে আমার সম্পর্কটা এখনো অনিদিষ্ট। উনিও কথা দেননি, আমিও কথা দিইনি। আমি ইচ্ছে করলে আর কাউকে বিয়ে করতে পারি। উনিও আর কাউকে। তবে এটাও মনে রেখো, মা, আমি আমার দিদিদের মতো টাকার জন্তে বিয়ে করব না। বিপ্লবের দিন কোথায় থাকবে ওঁদের স্বামীদের সম্পত্তি! সব বাজেয়াপ্ত হবে। ওরা এমিগ্রি হয়ে বিদেশে পালিয়ে যাবে। নয়তো কচুকাটা হবে। তুমি ভাবছ সংসারের চাকার কথা। আমি ভাবছি ইতিহাসের চাকার কথা। সব টাকা সমাজের। সব লাঠি সমাজের। নিজের বলতে কারো কিছু থাকবে না।” জুলি করে ইতিহাসের ব্যাখ্যা।

ওর মা তর্ক করতে পারেন না। হাল ছেড়ে দেন। বলেন, “তার আগেই যেন আমার মরণ হয়। আমার যাতে আতঙ্ক তাতেই তোর উল্লাস। দেব্লাসে হওয়া যেন মস্ত বড়ো একটা বাহাদুরি।”

“সৌম্যদাও ওই লক্ষ্যে বিশ্বাসী। তবে ওর পন্থা অহিংস ও সত্যাশ্রয়ী। সেটা নীতিহিসাবে শ্রেয়, কিন্তু পলিসিহিসাবে অকেজো। সেইজন্তেই তো আমি ওর সঙ্গে যোগ দিতে পারছিলাম। ও বেচারী মিসঙ্গ।” জুলি দুঃখিত।

“সৌম্যকে আমি স্নেহও করি, শ্রদ্ধাও করি। ও তো মানুষের ভালো ছাড়া আর কিছু ভাবে না ও করে না। কিন্তু দুনিয়া বড়ো কঠিন ঠাঁই। যীশুকেও ক্রশে বিঁধে মারে। কেন? কারণ তিনি মানুষের চেয়ে বড়ো। তিনি অতিমানব। অতিমানব দেখলে আমি ডরাই। মহাত্মা যে এখনো বেঁচে আছেন এটাই আশ্চর্য। বড়ো হওয়ার শাস্তি আছে। সৌম্যর সঙ্গে তোর বিয়ে হলে আমার ভাবনা বাড়বে।” মা উদ্বিগ্ন।

মা ও মেয়ে দু’জনেই দুটো গ্রীটিংস টেলিগ্রাম পাঠিয়ে দেন স্বকুমারকে ও মিলিকে। দু’জনেরই শুভকামনা আন্তরিকায় ভরা।

কলকাতা এসে স্বকুমার জুলিদের বাড়ীতেই ওঠে। সেখানে ওর বাঁধা নিয়ন্ত্রণ। এবার কিন্তু তার ব্যত্যয় ঘটে। কলকাতায় মুস্তাফীদের নিজস্ব বাড়ী আছে। সেটার একটা অংশ ভাড়াটেদের দখলে। একটা অংশ খালি। মুস্তাফীরা কলকাতা এলে সেখানে ওঠেন। এবার মিলি ও তার বরকে নিয়ে মুস্তাফীরা স্বামীস্বী দু’জনেই আসেন। দু’জনেই যাবেন ওঁদের নিয়ে বসে। তুলে নিয়ে আসবেন জাহাজে।

হঠাৎ মিলি বলে বলে, “শুশুরবাড়ী যাব। শুশুরশাস্ত্রীকে প্রণাম করব।”

স্বকুমার বিব্রত হয়ে বলে, “কেন মিছিমিছি অপমান হতে যাবে? টাকা ছাড়া ওঁরা আর কিছু বোঝেন না। টাকা পাননি, সমর্থন করেননি।”

“আচ্ছা, সে ভার আমার উপর ছেড়ে দাও।” এই বলে মিলি অনেক টাকার বাজার করে, উপহার কেনে। যশোরে একটা টেলিগ্রাম করে দেয় যে পরের দিন আসছে। তারপরে আর যা করে তা শুধু বাবাকেই জানায়।

বাবা বলেন, “বিয়ের আগে যেটা দেওয়া হয় সেটার নাম পণ। বিয়ের পরে যেটা দেওয়া হয় সেটার নাম প্রণামী। আমি তো এতে নীতিবিরুদ্ধ কিছু দেখিনি। তোমার যা সাধ্য তা তুমি দেবে। একটা মোহরও দিতে পারো, একশো একটা মোহরও দিতে পারো। খশুর শাশুড়ী দু’জনকেই দিয়ে। যদিও সংশাশুড়ী।”

জুলি কাউকে জানতেই দিল না দোকানে গিয়ে ক’টা মোহর কিনেছে। তোড়া ছোটর আকার আর ওজন দেখে মুস্তাফী অনুমান করেন আড়াইশো আর আড়াইশো। স্বকুমার তো বিষয়ে থ।

বিয়ের আসল মন্ত্র তো এই। মন্ত্রের মতো কাজ করে। খশুর শাশুড়ী দু’জনেই ছুটি তোড়া পেয়ে মন্ত্রমুগ্ধ। এ তাঁদের আশার অতীত। শাঁখ বেজে ওঠে, যথারীতি বধুবরণ হয়। মিলির কি আর সেই মিলিটাণ্ট চেহারা আছে? সে লাবণ্যময়ী লজ্জানম্র স্তম্ভলী বধু। পাড়ার মেয়েরা তাকে লুট করে নিয়ে যায়। প্রত্যেকের বাড়ীতে সেও কিছু না কিছু প্রণামী দেয়।

জিতেনবাবু সঙ্গে সঙ্গে একটা বোভাতের আয়োজন করেন। এই জিনিসটি মিলি মনে মনে কামনা করেছিল। সব মেয়ের বিয়ের পরে বোভাত হয়। ওর কেন হবে না? বিপ্লবের পরে কি বিয়ে থাকবে না, বোভাত থাকবে না? থাকবে, থাকবে, সব থাকবে। স্ত্রী আচার লোকাচার কিছুই বাদ যাবে না। বাদ যাবে শুধু অলঙ্কারের বাহুল্য। বাবা যা দিয়েছিলেন তা বিলেত নিয়ে যাওয়া বুখা। বিলেতে কেউ অত গয়না পরে না। যুদ্ধের প্রয়োজনে সরকার একদিন সব সোনা কিনে নেবে। মিলি তাই সাধারণ ব্যবহারের জন্যে কয়েকখানা রেখে আর সমস্ত বিক্রী করে দেয় ও সেই টাকায় মোহর কেনে।

স্বকুমার অনুমোদন করে না। মুখ ভার করে থাকে। মিলির মা নন্দরানীরও সেই রকম মনোভাব। কিন্তু ক্যাপটেন মুস্তাফী মেয়ের বুদ্ধির তারিফ করে বলেন, “মিলি যা ষটিয়েছে তা একটা বিপ্লব ছাড়া আর কী? স্বকুমার এখন আর ত্যাজ্য-পুত্র নয়, পিতার উত্তরাধিকারী। তার বিবাহ এখন সর্বস্বীকৃত। তার বোকে এখন সবাই আদর করে ঘরে তুলেছে। খরচ যা হয়েছে তা আমি পরে পুষিয়ে দিতে পারব। আনন্দ করো, আনন্দ করো। মধুরেণ সমাপয়েৎ।”

জুলির মাকে স্বকুমার মাসিমা বলে ডাকে। তিনিও তাকে মাসিমার মতো

ভালোবাসেন। বিলেতে যতদিন ছিলেন স্কুমার ছাড়া তাঁর একটা সপ্তাহও চলত না। অত রকম ফাইফরমাস খাটবে কে? জুলিকে স্কুমার বিয়ে করতে চেয়েছিল বিলেত থাকতেই। আবার তাকে বন্দীশিবির থেকে মুক্ত করার পর। সেদিন আবার ওর এস্কর্ট হয়ে। জুলি যদি বার বার প্রত্যাখ্যান করে তবে আরেকজনকে বিয়ে করা তো অপরাধ নয়। মিসেস সিন্‌হা স্কুমারের জন্তে অপেক্ষা করছিলেন। মিলির জন্তেও। ওরা তাঁর সঙ্গে দেখা করে প্রণাম করতেই তিনি ওদের দু'জনাতে দুই হাতে জড়িয়ে ধরে দু'জনের গালেই চুমু খান।

বলেন, “তোমাদের বিবাহে আমার সম্পূর্ণ অনুমোদন আছে, মিলি ও স্কুমার। আমার সঙ্গে সম্পর্ক যেমন ছিল তেমনি রয়েছে। তবে জুলির সঙ্গে বদলে গেল।”

জুলি তখন বাড়ীতে ছিল না। তার মা বলেন, “জুলির বিয়ে যখন হবার তখন হবে। না হলেও যে আমি কাতর হব তা নয়। একবার তো ওর বিয়ে দিয়েছিলুম। কপালে সইল কই? জুলির না হয়ে মিলির হলো এতে আমি আরো খুশি। এ না হলে মিলি বেচারির একবারও বিয়ে হতো কি না সন্দেহ। স্কুমার, তুমি ঠিকই করেছ মিলির কাছে প্রপোজ করে। মিলি, তুমিও ঠিক করেছ অ্যাকসেপ্ট করে। এখন তোমরা হানিমুনে যাচ্ছ। যাত্রা শুভ হোক। স্কুমার, ওদেশে পৌঁছেই পুরোনো বন্ধুবান্ধবদের একটা রিসেপশন দিয়ো। আমাকে ধারা চেনেন সবাইকে আমার প্রীতি জানিয়ো।”

জুলির সঙ্গে যাবার আগে দেখা করতে ব্যাকুল ছিল স্কুমার। মিলি এটা জানত, কিন্তু বাধা দিতে চায়নি। এগারো বছরের সম্পর্ক একদিনে বদলে যেতে পারে, কিন্তু কেটে যেতে পারে না। সে বলে, “মাসিমা, জুলিকে বোলো হাওড়া স্টেশনে আমাদের সী অফ করতে। ইঁা, ইম্পীরিয়াল ইণ্ডিয়ান মেল। বোট ট্রেন। যুদ্ধের পরে দেশে ফিরব। আপাতত দীর্ঘকালের জন্তে বিদায়। জুলি আর মিলি আমরা ছেলেবেলার থেকে বন্ধু। এ বন্ধুতা যেন অক্ষয় থাকে। ও যেন বিশ্বাস করে যে ওর বরকে আমি ভুলিয়ে কেড়ে নিইনি। ও যেন বিশ্বাস করে যে এটা ঘটনাচক্রে ঘটেছে। ওর যাতে ভালো বিয়ে হয় তার জন্তে আমি যথাসাধ্য করব।”

ট্রেন ছাড়বার একটু আগে জুলিকে দেখা গেল হস্তদস্ত হয়ে ছুটে আসতে। দুই হাতে দুটো ফুলের তোড়া। বিরাট বিরাট। ওর পেছনে পেছনে ছুটে আসছে এক কাঁকা মুটে। তার কাঁকায় আপেল নাসপাতি কমলালেবু ইত্যাদি ফল। মিলি আর স্কুমার কামরায় তুলে নেয়।

“কী করব আমরা এত ফলমূল নিয়ে ?” মিলি জিজ্ঞাসা করে।

“যত ইচ্ছে থাকবে। বাকীটা বিলিয়ে দেবে।” জুলি উত্তর দেয়।

“তা হলে এখনি বিলিয়ে দিই।” এই বলে মিলি যাঁরা উপস্থিত ছিলেন তাঁদের সকলের হাতে দুটি তিনটি করে ফল ধরিয়ে দেয়। ক্যাপ্টেন মুস্তাফী, মিসেস মুস্তাফী, এঁরা তো ছিলেনই, ছিলেন বহু আত্মীয় স্বজন বন্ধু বান্ধব। যশোর থেকেও এসে-ছিলেন অনেকে।

মুস্তাফীরা সেই ট্রেনেই যাচ্ছিলেন। তাঁরা কিছুক্ষণ পরে নিজেদের কামরায় চলে যান। অত্যাচারও নেমে যান। তখন জুলি বলে মিলিকে ‘ও স্বকুমারকে, “যা হয়েছে ঠিকই হয়েছে। আমি মিলির জন্তে পথ ছেড়ে দিয়েছি। মিলি আমার জন্তে পথ ছেড়ে দিয়েছে। আমার যেদিন বিয়ে হবে সেদিন হিসাব মিলে যাবে। গরমিলটা সাময়িক।”

স্বকুমার স্বধায় মিলিকে, “এর অর্থ কিছু বুঝলে ?”

“পরিষ্কার। জুলির মতো বুদ্ধিমতী মেয়ে ক’জন !” মিলি হাসে।

“কিন্তু আমি তো কিছুই বুঝতে পারলুম না।” স্বকুমার বলে।

“বুঝবে একদিন, যদি ওর স্বপ্ন সার্থক হয়।” মিলি সঙ্কেতে বলে।

জুলি বিদায় নিয়ে নেমে যায় ও রুমাল নাড়ে। ট্রেন ছেড়ে দিতে স্বকুমার বলে, “তুমি কার জন্তে ওকে পথ ছেড়ে দিলে ?”

“সৌম্যদার জন্তে।” মিলি মুখ নিচু করে। তার চোখে জল।

“বুঝেছি। সৌম্যদা মহান। তুমিও মহীয়সী। সোনায়ে সোহাগা হতো তুমি যদি ওকে বিয়ে করতে। আমি কি তোমার যোগ্য ! আমি যে মাঝারি ! কিন্তু আকাশের চাঁদ যেমন দুর্লভ সৌম্যদাও তেমনি। মাটির প্রদীপই স্থলভ।” স্বকুমার সখেদে বলে।

“যে মাহুষ নিজের উত্তোঙ্গে পড়াশুনা চালিয়ে নিজের উত্তোঙ্গে বিদেশে গিয়ে নিজের উত্তোঙ্গে উচ্চতর শিক্ষা লাভ করে সেদেশেই সুপ্রতিষ্ঠিত হয়েছে সে কি স্বয়ংবরসভায় উত্তীর্ণ হয়নি ? আমি কি কৃত্তী পুরুষের কণ্ঠে মালা দিইনি ? আমি ধরসংসার করতে চাই। আমার পক্ষে মাটির প্রদীপই ভালো।” মিলি তার হাতে হাত সঁপে দেয়।

জুলি যে ওকে প্রত্যাখ্যান করেছে এ কাঁটা স্বকুমারের মনে বিধে রয়েছে। সে বলে, “তোমাকে কখনো প্রত্যাখ্যানের বেদনা বহন করতে হয়নি, মিলি। তোমার কাছে আমি প্রার্থনা করি সমবেদনা। এই যে তোমাকে নিয়ে আজ বিলেতের পথে

রওনা হচ্ছি এমন একদিন জুলিকে নিয়েও রওনা হয়েছিলুম, বিয়ের আশায়। কিন্তু বসেতে ও আমাকে ছেড়ে সৌম্যদার সঙ্গে পুণা যায়। সে বেদনা কি আমি ভুলতে পারি? তবু আবার ও মেয়ের পেছনে ছুটেছি। আবার সেই বিয়ের আশায়। আবার সেই সৌম্যদার সঙ্গে দেখা। আবার তেমনি ভাঙচি। ভাগ্যিস তোমার সঙ্গে যোগাযোগ হয়। নইলে আমাকে আবার খালি হাতে বিলেত ফিরে যেতে হতো। তুমি আমার মুখরক্ষা করেছ। তুমি আমার মানরক্ষা করেছ। তুমি যেন ঈশ্বরের প্রেরিত। গডসেও। জুলির চেয়ে তুমি কোন্ অংশে খাটো? আমি তো মনে করি তুমিই ওর চেয়ে বড়ো। ইতিহাসে তোমারই নাম থাকবে। যদি না জুলি পরবর্তী অধ্যায়ে বীরত্বের পরিচয় দিয়ে আরো নাম করে। কোথায় বিপ্লব! ও একটা আলেয়ার পানে ছুটেছে। তেমনি আরেক আলেয়া সৌম্যদা। ওর ভীষ্মের প্রতিজ্ঞা দেশ যতদিন না স্বাধীন হয়েছে ততদিন ও অবিবাহিত থাকবে। তা হলে জুলির কী আশা! স্বাধীনতা কি কেউ জয় করে নেবার জন্মে প্রস্তুত হয়েছে? হতে কতকাল লাগবে! সৌম্যদা দশবছর অপেক্ষা করতে পারে, জুলি কি ততকাল পারবে? যদি পারে তবে হয়তো একদিন ওর স্বপ্ন সার্থক হবে। আর নয়তো একটা বাজে ছেলের সঙ্গে ওর বিয়ে হবে, দেখো। যেমন চেখভের গল্পে হয়।”

মিলি একটু ভেবে নিয়ে বলে, “জুলি বা আমার মতো মেয়ের স্বপ্ন কি একটি মনের মতো বর ও শাস্তিময় ঘর? আমাদের স্বপ্ন বিশাল ব্যাপক কর্মক্ষেত্র, মুক্ত পক্ষে অবাধ সঞ্চরণের আকাশ। আমাদের স্বপ্ন আত্ম আবিষ্কার, আত্মবিকাশ। আমরা যখন দেশের স্বাধীনতার বা তার বৈপ্লবিক রূপের ধ্যান করি তখন বর ও ঘর যেন সিন্ধুর মাঝখানে বিন্দু। তার অস্তিত্ব আছে, কিন্তু মহিমা নেই। বিয়ে না হলে নারী অপূর্ণ থেকে যায়, নারীত্বের হানি হয়, আমরা একথা মানিনে। মা না হলে নারীর জীবন অচরিতার্থ এটাও তেমনি অসত্য। কিন্তু বয়স যতই বাড়ছে ততই অগ্নুভব করছি যে পাখীর কাছে আকাশ যেমন আবশ্যক নীড়ও তেমনি প্রিয়। স্বভাবতই মন চাইছে স্থিতি। দেহ চাইছে সঙ্গ। আমি আর অপেক্ষা করতে পারছিলাম না। তুমি আমাকে বাঁচালে। এখন জুলির বাঁচা দরকার। সেও কি বেশীদিন অপেক্ষা করতে পারবে? দশ বছর! জাতির জীবনে দশটা বছর এমন কিছু বেশী সময় নয়, দেখতে দেখতে কেটে যাবে। কিন্তু ব্যক্তির জীবনে? বিশেষ করে নারীর জীবনে।”

“বেচারি জুলি! ওর জন্মে কী আমরা করতে পারি? ও যদি আর কাউকে বিয়ে করতে রাজী হয় তো ছেলের খোঁজ করতে পারি। কিন্তু সৌম্যদাকে পেতে হলে ওকে সুদীর্ঘকাল অপেক্ষা করতে হবে।” স্বকুমার দীর্ঘনিঃশ্বাস ছাড়ে।

“যদি না অকস্মাৎ একটা কিছু ঘটে যায়। বিপ্লব কি গণসত্যাগ্রহ কি মিউটিনি। জুলির বিশ্বাস তেমন কিছু ঘটবে ও তাতে তার হাত থাকবে। সে-ই তাকে ঘটাবে। এই নিয়ে সে বর ও ঘর ভুলে থাকছে। কিন্তু কদ্দিন পারবে! সাতবছর আগেও তো মনে হয়েছিল বিপ্লব আসন্ন। সাহেব খুন করলেই সাহেবরা পালাবে। ক্ষমতা দখল করবে বিপ্লবীরা। কিন্তু মাহুষ ভাবে এক, হয় আরেক। বাংলার ভাগ্যে যা হয়েছে তাতে কি বিপ্লবীদের কোনো ঠাই আছে? জেল থেকে তাদের ছেড়ে দেওয়া হয়েছে। যেন ছাড়া পাবার জগ্গেই তারা লড়েছিল। আরো একবার লড়তে কে উৎসাহ বোধ করবে? আমি তো নয়। জুলির উৎসাহ আমাকে লজ্জা দেয়। ওকে তো আমার মতো পাঁচ বছর দুর্ভোগ পোহাতে হয়নি। তুমি যদি ওকে সে সময় উদ্ধার না করতে তা হলে ওকেও আমারই মতো দুর্ভোগ পোহাতে হতো। তবে ওর অপরাধটা আমার মতো অত গুরুতর ছিল না। কিন্তু তুমি সৌম্যদার উপর অবিচার করলে, স্বকুমার।” মিলি ওর স্বামীকে নাম ধরেই ডাকে। যেমন স্বামী ওকে।

“অবিচার!” স্বকুমার চমকে ওঠে। “কেন অবিচার?”

“বন্ধুতে জুলির সঙ্গে সৌম্যদার দেখা পূর্ব পরিকল্পিত নয়। সৌম্যদা জুলিকে তোমার কাছ থেকে ভাঙিয়ে নেয়নি। ও ভাবতেই পারেনি যে তুমি জুলিকে নিজের স্বার্থে উদ্ধার করে নিয়ে যাচ্ছ। ও ভেবেছিল তুমি নিঃস্বার্থ ও নিঃস্পৃহ পরমহংস। জুলিকে প্রশ্ন করে ও জানতে পারে যে বিলেতে ফিরে যাবার ইচ্ছে ওর একেবারেই নেই। ইংরেজদের উপর ওর ঘেন্না ধরে গেছে। ও দেশে থেকে দেশের মুক্তির কাজে নিজেকে উৎসর্গ করতে চায়। বিবাহে ওর রুচি নেই। বিধবার বিবাহ দেশের লোক শ্রদ্ধার চোখে দেখে না। সেইজগ্গেই তো ওকে পুণার মহিলা বিশ্ব-বিদ্যালয়ে ভর্তি করিয়ে দেওয়া হলো। আচার্য কার্বে বিধবাবিবাহের সমর্থক। সৌম্যদা সেটা নিজের স্বার্থে করেনি। ও জানত যে দেশের স্বাধীনতা পেছিয়ে গেলে ওর নিজের বিবাহও পেছিয়ে যাবে অনিদিষ্টকাল। জুলি বা তার বয়সের একটি মেয়ে অনিদিষ্টকাল অপেক্ষা করতে পারে না। জুলির সঙ্গে ওর সম্পর্কটা সম্পূর্ণ নিষ্কাম। আমার সঙ্গেও তাই। জুলিও যে ওর জগ্গে তোমাকে ছাড়বে এটাও তো সে কোনদিন প্রকাশ করেনি। এই প্রথম করছে। এর জগ্গে সৌম্যদা দায়ী নয়। মিলি না হয়ে জুলি হলেও সে মানন্দে বরকর্তার ভূমিকা নিত। তুমি যদি ওকে অন্তরঙ্গভাবে জানতে তা হলে এটাও জানতে যে ও দেশের স্বাধীনতার জগ্গে জান দিতেও প্রস্তুত হচ্ছে। ও বলে দেশের জগ্গে কতক লোককে মৃত্যু বরণ করতে হবে, কিন্তু স্বাশ-

বাদীদের মতো মেরে মরতে নয়। ও কি বাঁচবে যে বিয়ে করবে।” মিলির হুঁচোখ সজল হয়।

“সৌম্যদা কিন্তু আগে এ রকম ছিল না, মিলি। বিলেতে ওর সঙ্গে বছর দুই কাটিয়েছি। তখন ও আদর্শ প্রাচীন ভারতের ব্রহ্মনিষ্ঠ গৃহস্থ। তাঁরা বিবাহ করতেন। তাঁদের পুত্রকত্তা হতো। তপোবনের ঋষিরাই সমাজের পথপ্রদর্শক। সৌম্যদা চেয়েছিল এমন একজনকে যে হতো সেকালের ঋষিপত্নী। বাস করত শহরে নয়, গ্রামে। যে গ্রাম অরণ্যবেষ্টিত। প্রকৃতির কোলে লালিত হতো ওদের সন্তান। গ্রামই তো প্রকৃত ভারত। শহর বিজাতীয়। বিলেতে থাকতেই অলকা বলে একটি মেয়ে ওর প্রেমে পড়ে যায়। কিন্তু ওর আদর্শের প্রেমে নয়। অলকা চায় কলকাতায় ঘরসংসার পেতে নাগরিক সমাজের একজন হতে। ওর বাবা ছিলেন ব্যারিস্টার। সৌম্যকে ও মেয়েটি নিজের হাঁচে ঢালাই করতে চেয়েছিল। কিন্তু ওর সনির্বন্ধ অনুরোধ ছিল সৌম্য যেন একটা বিলিভী ডিগ্রী নিয়ে ফেরে। পদস্থ রাজকর্মচারী হয়। নয়তো ব্যারিস্টার। সৌম্যদা তেমন শর্তে বাঁধা পড়তে নারাজ। অপর পক্ষে অলকাও পল্লীবাসিনী ঋষিপত্নী হবে না। প্রেম পরাজিত হয় ভিন্নমুখী জীবনধারার কাছে। এই তো আমি জানতুম। অসহযোগ আন্দোলনের সময় থেকেই সত্য ও অহিংসায় সৌম্যদার বিশ্বাস। কিন্তু যতদিন না দেশ স্বাধীন হয়েছে ততদিন ব্রহ্মচর্য রক্ষা করতে হবে এমন কোনো পণওকে গার্হস্থ্যবিমুখ করেনি। দশবছর আগে এই তো আমি জানতুম। এখন দেখছি ওর আদর্শ ঋষিদের তপোবন নয়, সন্ন্যাসীদের আশ্রম। স্বী থাকলে সেও হবে সন্ন্যাসিনী। দেশের স্বাধীনতার জন্তে এই পরিমাণ ত্যাগ স্বীকার করতে ঠারা প্রস্তুত তাঁদের আমি শ্রদ্ধা করি, কিন্তু আমার মতে তাঁদের এই আদর্শ সামাজিক মানুষদের জন্তে নয়।” হুঁমার অনুমোদন করে না।

“অলকার কথা কেউ আমাকে বলেনি। সৌম্যদা তা হলে গৃহস্থ হতে রাজী ছিল, যদি অলকা ওর সঙ্গে ওর গ্রামে গিয়ে নীড় বাঁধত। জীবনের সেই মাহেন্দ্রক্ষণটি পার হয়ে যাবার পর ওর মতিগতি বদলে যায়। ও লবণ সত্যগ্রহে গান্ধীজীর অনুচর হয়ে কারাবরণ করে। মুক্তির পর তাঁরই নির্দেশে হরিজন সেবায় লেগে যায়। তিনিই ওকে পূর্ববঙ্গে বাঁটি গড়তে প্রবর্তনা দেন। লক্ষ্য রাখতে বলেছেন যাতে হিন্দু মুসলমানের সম্পর্কটাতে চিড় না ধরে। মহাত্মার আশঙ্কা যে সমস্তাটা তাঁর আয়ত্তের বাইরে চলে যাচ্ছে। নেতারা সবাই তো কলকাতার মোহে মত্ত। মকঃম্বলে তাঁরা সফর করতে আসেন। দু’দিন থাকেন। চরকার মতো ঘোরেন। তারপর মধুচক্রে

ফিরে যান। সৌম্যদা মাটি কামড়ে পড়ে আছে। মাঝে মাঝে সেগাঁওতে যায়, পথে কলকাতায় একদিন কি দু'দিন থাকে। কাজের জন্তেই। ওর জীবনদর্শন ক্রমে স্টেইক হয়ে উঠছে। স্বথ শাস্তি ওর জন্তে নয়। ওর জন্তে কঠোর কষ্টসাধন। নিজের মুক্তির জন্তে নয়, দেশের মুক্তির জন্তে। তবে ও হাসতে ভুলে যায়নি। খেলাধুলাও করে। যাত্রায় নারদ সাজে। মুসলমানদের নাটকে আলীবাবা। ও গায়ও ভালো। বাঁশিও বাজায়। অথচ খাবে ওই আঁকাড়া চালের ভাত। গান্ধীজীর আশ্রমে ওইসব পরীক্ষা-নিরীক্ষা চলছে।” মিলি কৌতুকের সঙ্গে বলে।

“সব ভালো যার শেষ ভালো। শেষ ভালো হচ্ছে ভারতের স্বাধীনতা। হবে একদিন তার অভীষ্ট পূরণ। তখন আসবে ধরসংসার পাতার সময়। আশা করি জুলির সঙ্গেই। লেবার পার্টিতে আমার বন্ধুবান্ধব আছেন। তাঁরা ভারতের ডোমিনিয়ন স্ট্যাটাসের পক্ষে। স্বাধীনতা বলতে যদি ডোমিনিয়ন স্ট্যাটাস বোঝায় তো দশবছর লাগবে না। তার আগেই লেবার গভর্নমেন্ট আসবে। কিন্তু যুদ্ধকালে নয়। যুদ্ধকালে সর্বদলীয় সরকার। সকলের পক্ষে একমত হওয়া সম্ভবপর নয়। তাই যুদ্ধকালে ইংলণ্ডের উপর চাপ না দিয়ে ধৈর্য ধরতে হবে। তা হলেও আমি অধ্যাপক ডালটনকে ভারতের জন্তে তদ্বির করতে বলব। জানো তো আমি তাঁর ছাত্র। ইয়া, ল্যান্সির কাছেও পড়েছি।” সুকুমার সগর্বে বলে।

“ভারতের স্বাধীনতা হবে রাজ অমুগ্রহে!” মিলি চোঁট ওলটায়।

পরের দিন রেষ্টোর। কারের ব্রেকফাস্ট টেবিলে মুস্তাকী দম্পতির সঙ্গে ভোজন। রাত্রে ঘুম কেমন হলো জিজ্ঞাসা করতে মিসেস বলেন, “চোখের পাতা এক করতে পারিনি। সাত সমুদ্র পার তোরা যাচ্ছিল। তাও যুদ্ধক্ষেত্রে।”

“যুদ্ধক্ষেত্রে আমি কিন্তু অঘোরে ঘুমোতুম। ভয়ের মাঝখানে পড়লে ভয় চলে যায়। তোমরা দেখবে ইংরেজরা কেমন নির্ভীক। ন’শো বছর আগে নরমানরা ওদের দেশ আক্রমণ করেছিল। তারাও পরে ইংরেজ বনে যায়। তার পর থেকে আর কেউ ওদের আক্রমণ করেনি। না স্পেনের আর্মাদা। না নেপোলিয়নের আর্মি। এবার কিন্তু হিটলারের জার্মানরা হানা দেবে জলে স্থলে আকাশে। নরমানের পর জার্মান। ভাবনা করি। ঘুম আসে না।” ক্যাপটেন বলেন।

“আকাশপথে ক’হাজার ল্যাণ্ড করতে পারে? সঙ্গে সঙ্গে কোতল হবে। জনপথ নিয়েই ভাবনা। কিন্তু আমাদের নেভী ওদের নেভীর চেয়ে প্রবল। ওরা ল্যাণ্ড করার আগেই খতম হবে। বোমাবর্ষণকেই ভয়। তা আমরাও পাণ্টা দিতে ছাড়ব না দেখবেন।” সুকুমারের ‘আমরা’ অবশ্য ভারতীয়রা নয়। সবাই হাসে।



ব্রেকফাস্টের পরে যে যার কামরায় যান। লাঞ্চের সময় আবার একত্রভোজন।

“তোমাদের কুশলসংবাদে জন্তে আমরা উদ্গ্রীব হয়ে থাকব। এয়ার মেল চিঠি লিখো। আশা করি জাহাজের ডাকও বন্ধ হবে না।” মুস্তাফী বলেন।

“জাহাজের ডাকের অন্য ব্যবস্থা হবে। তবে দেরি হতে পারে।” স্কুমার হুনিষ্ঠিত।

মিলির মা এমন দৃষ্টিতে মেয়ের দিকে তাকান যেন আর কোনোদিন ওর সঙ্গে দেখা হবে না। ওই শেষ দেখা। বাবা যদিও ভিতরে ভিতরে উদ্বিগ্ন তবু বাইরে নিবিকার।

বসেতে পৌঁছে টমাস কুকের অফিসে গিয়ে জানা গেল যে জাহাজ যাবে জুমধ্য সাগর দিয়ে যথারীতি। কারণ ইটালী এখনো যুদ্ধঘোষণা করেনি ও ইটালিয়ান জাহাজ নিয়মিত যাতায়াত করছে। সুতরাং স্কুমারের পি অ্যাণ্ড ও জাহাজ ‘ক্লেমেন্টিন’ তো স্যুয়েজের পথে যাবেই, ঐ জাহাজও শেষ ব্রিটিশ যাত্রী জাহাজ নয়।

“ওঃ। যা তাড়াহুড়ো লাগিয়ে দিলে তুমি। কী ক্ষতি হতো আরো কিছুদিন বাদে গেলে?” মিলি অল্পযোগ করে।

“আহা, আমি কী করে জানব যে মুসোলিনি হিটলারের সঙ্গে পা মিলিয়ে চলবে না? সঙ্গে সঙ্গে যুদ্ধঘোষণা করবে না!” কৈফিয়ৎ দেয় স্কুমার। “তা ছাড়া তোমার কলেজ তো এর মধ্যেই খুলে গেছে। আরো দেরি করলে ওরা এ বছর নেবে না।”

“তা হলে তুমি সত্যিই চাও আমি আরো পড়াশুনা করি?” মিলি স্তব্ধ।

“নিশ্চয় চাই। আধুনিক জগতের কেন্দ্রস্থল হলো লন্ডন। সেখানে বাস করে তুমি আরো পড়াশুনা করবে, আরো জানবে শুনবে শিখবে। তখন বুঝতে পারবে যে এতদিন যা সত্য ভেবেছ তা সত্য নয়, যা অসত্য ভেবেছ তা অসত্য নয়। তোমার কর্মপদ্ধতি কেন সফল হয়নি তার অর্থ খুঁজে পাবে। বিপ্লব কি চাইলেই হয়? জুলি একটা ভ্রান্তির গোলোকধাঁধার মধ্যে ঘুরপাক খাচ্ছে।” স্কুমার আবার জুলিকে স্মরণ করে।

“জুলি তো বলে তুমি একজন এমিগ্রি, তোমার সঙ্গে এসেছি বলে আমিও তাই। বিপ্লবের আগে ভাগেই আমরা দেশ ছেড়ে পালিয়েছি। আমারও কতকটা সেইরকম মনে হচ্ছে। মা বাবার জন্তে আশঙ্কা হচ্ছে। বিপ্লবী জনতা যদি ওঁদের বুর্জোয়া বলে শেষ করে না দেয় বিপ্লবী সরকার ওঁদের লিকুইডেট করবে। আমি দেশে থাকলে আমার নাম ক’রে হয়তো ওঁরা বেঁচে যেতেন। কিন্তু আমি এমিগ্রি বলে উণ্টো ফল হবে।” মিলি কাতর হয়।

“ওঁদের যথেষ্ট প্রভাব আছে। ডাক্তারকে কেউ মারবে না। দানশীলতার জন্তে ওঁরা বিখ্যাত। হিন্দু-মুসলমান সবাই ওঁদের চায়। ওঁরা বাঁচবেনই। পিছুটান ছেড়ে চল আমরা বেরিয়ে পড়ি।” স্কুয়ার বলে।

মিলির বিয়েতে তার দাদা শিবপ্রসাদ উপস্থিত হতে পারেন নি। থাকেন তিনি বম্বে প্রেসিডেন্সীর দক্ষিণপ্রান্তে ধারওয়ায়ে। উচ্চপদস্থ রেলওয়ে অফিসার। বোনকে বিদায় দিতে বম্বে আসেন। ক্রিকেট ক্লাব অভ ইণ্ডিয়াতে তাঁর বন্ধু জয়ন্ত চক্রবর্তীর স্থায়ী অধিষ্ঠান। দাদা নিজেও সেখানকার সদস্য। দুই বন্ধুতে মিলে ক্রিকেট ক্লাবেই মিলিদের চারজনের বন্দোবস্ত করে দেন।

ছোটবোনের বিয়ে না হলে দাদাও বিয়ে করবেন না, এ রকম একটা ভীষ্মের প্রতিজ্ঞাও ছিল তাঁর। মিলি তাঁকে সেকথা স্মরণ করিয়ে দিয়ে বলে, “দাদা, এবার তোমার পাল। তুমি যদি ঘরে বোঁ আনো তো মা বাবা একটু শান্তি পান। বুঝতেই তো পারছ, আমি যাচ্ছি সাত সমুদ্রপারে। যেখানে যুদ্ধ বেধে গেছে। কবে দেখা হবে, আদৌ হবে কি না কে জানে? আমি না থাকলে তুমিই একমাত্র সন্তান।”

“ছি! অমন কথা বলতে নেই, বোন। দেখা আবার হবেই। লগুনে আমার বন্ধুবান্ধব আছে। ভারতীয় আর ইংরেজ। সবাইকে আমি চিঠি লিখেছি। চিঠিগুলো তোরা হাতেই দিচ্ছি। পৌঁছেই ডাকে ছেড়ে দিস। কিন্তু ভাবনার কথা হচ্ছে পৌঁছবি কেমন করে। যুদ্ধের অবস্থা ঘণ্টায় ঘণ্টায় বদলাচ্ছে। মুসোলিনি যদি যুদ্ধ ঘোষণা করে তা হলে ভূমধ্যসাগর দিয়ে জাহাজ চলাচল বন্ধ হবে। দক্ষিণ আফ্রিকা ঘুরে কবে যে ইংলণ্ডে পৌঁছবে কে জানে।” শিবপ্রসাদ চিন্তিত হন।

“কেন, কুক তো আমাদের বলেছে এ জাহাজ ভূমধ্যসাগরের পথেই যাচ্ছে।” মিলি স্কুয়ারকে সাক্ষী মানে।

“কুক কেমন করে জানবে মুসোলিনির মনে কী আছে। কাজেই অতটা আশাবাদী না হওয়াই ভালো। তবে হতাশারও হেতু নেই। পৌঁছে দেবে ঠিকই। ভালোই তো। হানিমুন আরো দীর্ঘ হবে।” শিবপ্রসাদ রঙ্গ করেন।

স্কুয়ারও সকৌতুকে বলে, “মুন মানে এখানে চাঁদ নয়, মুন মানে মাস। পুরো একমাস যদি জাহাজে কেটে যায় সেটাকে তো দীর্ঘ বলা চলে না।”

“তা হলেই হয়েছে আমার কলেজে ভর্তি হওয়া।” মিলি রাগ করে। “আমি কি তবে বিলেত যাচ্ছি ঘরকন্না করতে? না, আমি ক্যানসেল করব।”

“তুমি না থাকলে আমি একা একা গেরস্তালী করব নাকি? যুদ্ধে নাম লিখিয়ে আমি ফ্রন্টে গিয়ে লড়াই।” স্কুয়ার হাসিমুখে বলে।

“কী সর্বনাশ ! সেই ভয়ে আমাকে ছ’বেলা হাঁড়ি ঠেলতে হবে ?” মিলি আঁতকে ওঠে ।

“ক্ষপেছ ? রান্নার পাট ওদেশে খুবই লংক্ষিপ্ত । চল তো আমার সঙ্গে । দেখবে তোমার জন্তে কলেজের দুয়ার খুলে যাবে । স্বয়ং সার জন অ্যাগারসনকেই ধরব । পুরনো টেরিস্টদের দিকে তিনি সাহায্যের হাত বাড়িয়ে দেন ।” হুসুমার আশ্বাস দেয় ।

“আমি তাঁর সাহায্য চাইব কোন মুখে ? খবরদার, তুমি ঠর কাছেরে যেনো না । আমি নিজেই কলেজে গিয়ে সব কথা খুলে বলব ।” মিলি দৃষ্ট কণ্ঠে বলে ।

ক্যাপটেন মুস্তাফী বলেন, “জাহাজের উপরে তো কারো হাত নেই । সেটা কি ওরা বুঝবে না ? আমিও এয়ার মেলে চিঠি লিখে সব কথা খুলে বলেছি ।”

“আমিও আমার বন্ধুদের কাছে এয়ার মেলে এই সমস্তার কথা জানিয়ে রাখছি । দেখাই যাক না জাহাজ কোন পথে যায় ।” শিবপ্রসাদ ভরসা দেন ।

মিলির মা মনটাকে বেঁধে শক্ত করেছিলেন । মিলি দেশে থাকলে নির্বাত জেল । যাত্রাভঙ্গ করা কিছুতেই নয় । একবার যখন বেরিয়ে পড়েছে তখন এগিয়েই যাক । যা থাকে কপালে । গুর বাপ তো যুদ্ধক্ষেত্র থেকে অক্ষত ফিরেছিলেন । ভগবান রক্ষা করবেন ।

মিলির শেষ অনুরোধ, “মা, এবার দাদার বিয়ে দিয়ে । শুনছি ও নাকি বসেতেই হৃদয় হারিয়েছে । দাদা, শুভস্ব শীঘ্রম্ ।”

## ॥ আট ॥

মণিকা ওইটুকু মেয়ে। ও “জ্যাঠামশায়” বলতে পারে না। তাই ওর মা ওকে শিখিয়ে দিয়েছে সোম্যাকে ‘জেঠু’ বলে ডাকতে। দীপক কিন্তু ‘জ্যাঠামশায়’ বলে ডাকে।

“জেঠু”, “জেঠু”, “জ্যাঠামশায়”, “জ্যাঠামশায়।” দূর থেকে সোম্যাকে আসতে দেখে ভাই বোন দু’জনে বারান্দা থেকে নেমে গিয়ে দৌড়য়। সোম্য মণিকে দুই হাতে তুলে নিয়ে কাঁধে চড়ায়। সেও জেঠুর মাথা চেপে ধরে। দীপক ততক্ষণ জ্যাঠামশাইয়ের বগল থেকে বোলা কেড়ে নিয়ে বগলদাবা করেছে।

“শভুবাবু এসেছেন।” ভিতরে গিয়ে খবর দেয় বেয়ারা।

“শভুবাবু” শুনে যুথিকা মানসের দিকে তাকায়। মানস যুথিকার দিকে। কিন্তু বাড়ের মতো দীপক ঘরে ঢুকে বলে, “জ্যাঠামশায় কী এনেছে, তাখ। হা হা হা! গণ্ডার। শজার বানাতে গিয়ে গণ্ডার বানিয়েছে। সাপটা কিন্তু অজগর।”

সোম্যার কাঁধ থেকে মণি নামে না। নামতে চায় না। সোম্য ওকে কাঁধে নিয়েই ঘরে ঢোকে। চেয়ারে বসে। ওর মা রাগ করে। জেঠু ওর জন্তে একটা পুতুল এনেছিল, সেটা দিতেই নামে।

“দত্তবিধাস বসে থেকে টেলিগ্রাম করে জানিয়েছে যে ওরা নিরাপদে পৌঁছেছে। তোমাকে জানাতে বলেছে।” মানস বলে।

“আমি মুস্তাফীদের ওখান থেকেই জেনেছি। গুঁরাও প্রতিষ্ঠানে টেলিগ্রাম করেছেন ও আমাকে জানাতে বলেছেন।” সোম্য বলে।

“আমিও বঁ ভোয়াজ জানিয়ে টেলিগ্রাম করেছিলুম কুকের কেয়ারে। বসেতে। যাতে জাহাজে গুঁরা আগে পায়।” মানস আরো বলে।

“কুকের কথায় মনে পড়ল বছর ছয়েক আগে জুলিকে নিয়ে স্বকুমার আর আমি ওদের ওখানে যাই। জুলি ওর প্যাসেজ ক্যানসেল করে। স্বকুমার তো আমাকেই দোষ দেয়। আমি ওকে বুঝিয়ে বলি যে জুলি কারাগার থেকে মুক্ত হলেও সন্ত্রাসবাদ থেকে মুক্ত হয়নি। ওর দাদারা ওকে যে নির্দেশ দেবে ও বিলেতে গিয়েও সেই নির্দেশ পালন করবে। তখন তো আবার সেই কারাগার। তার চেয়ে ছেড়ে দাও আমার হাতে। ওকে আমি পুণায় নিয়ে যাব। আমাকে ওখানে থাকতে হবে গান্ধীজীর কাছাকাছি। জুলি থাকবে আমার কাছাকাছি ওকে দেব মহিলা বিশ্ববিদ্যালয়ে। সেখানে ও পড়াশুনা করবে। মাঝে মাঝে আমার সঙ্গে দেখা হবে। গান্ধীজী জেল থেকেই হরিজনদের সেবা করে যাচ্ছেন। আমি ছাড়া পেয়ে বাইরে থেকে ওঁর কাজে সাহায্য করেছি। জুলি যদি আমাদের কাজকর্ম দেখে তবে ওরও অন্তঃপরিবর্তন হবে। বিয়ের সময় এখন নয়। বিলেতে গেলেই যে ও বিয়েতে রাজী হবে তা নয়। স্বকুমার যেন ধৈর্য ধরে।” সৌম্য শোনায় শ্রুতিকথা।

“ওর মা তখন ওর সঙ্গে ছিলেন না?” জিজ্ঞাসু হয় মানস।

“না। স্বকুমারকে উনি বিশ্বাস করতেন। তা ছাড়া উনি তো ধরে নিয়েছিলেন যে ওটা বিবাহের পূর্ব শর্ত। পরে আমি তাঁকে চিঠি লিখতেই তিনি সমর্থন করেন। জুলির সঙ্গে যথেষ্ট ট্রাভেলার্স চেক ছিল। পরে ওর মা আরো টাকা পাঠান। কিন্তু শেষপর্যন্ত জুলির মন টেকে ন। সন্ত্রাসবাদটা ও সত্যি কাটিয়ে ওঠে। দেশেরও আবহাওয়া বদলে গেছে। জুলি মায়ের কাছে ফিরে যায়। সরকার বাধা দেয় না। আমিও গান্ধীজীর পিছু পিছু ওয়ার্ধা যাই। সেখান থেকে সেগাঁও। জুলির দায় থেকে আমিও মুক্ত। আমার তত্ত্বাবধান থেকে জুলিও মুক্ত। ওদিকে স্বকুমারও বিবাহের পূর্ব প্রস্তাব থেকে মুক্ত।” সৌম্য মুক্তির সমাচার শোনায়।

“কিন্তু জুলিকে কারামুক্ত করে ও যে উপকার করেছিল সেটার পরিবর্তে ওর তো কিছু পাবার কথা ছিল। ও কি এতদূর এসেছিল অমনি ফিরে যেতে?” মানস স্বধায়।

“ওটা বন্ধুত্ব। বিবাহ ওর প্রতিদান নয়।” সৌম্য দৃঢ়তার সঙ্গে বলে।

“সব ভালো যার শেষ ভালো। দত্তবিশ্বাসকে শুধু হাতে ফিরে যেতে হলো না। কিন্তু হতেও তো পারত। তখন বন্ধুত্ব বলে কী করে ওকে সাহসনা দিতে? তোমার উপরে ও রীতিমতো বিরূপ। তুমি ওকে একবার শিশুপাল করেছিলে, কিন্তু নিজে কল্লিগীকে বিয়ে করেনি। আবার শিশুপাল করলে, এবারেও কল্লিগীকে বিয়ে করার বামগন্ধ নেই। তবে শিশুপাল এবার শুধু হাতে ফিরে যায়নি। কল্লিগীর সখীকে

বিয়ে করে নিয়ে গেছে। জুলির মা যা চেয়েছিলেন তা হলো না। মেয়ের সামনে বন্দীশিবিরের বিপদ। সে নিজেও বিবাহবন্ধনের পরিবর্তে কারাবন্ধন পছন্দ করে। পাগলীর ধারণা ফরাসী বিপ্লবে যেমন বাস্তবের পতন এদেশেও তেমনি বক্সার পতন ঘটবে। জনতা গিয়ে পাঁচিল ভেঙে উদ্ধার করবে বন্দীদের। জুলি পড়াশুনা কিছু কম করেনি। কিন্তু সমস্তই একতরফা। বিপ্লবের তত্ত্ব ও ইতিহাস বা পুরাণ। পুরাণকে ইতিহাস বলে চালানো কেবল প্রাচীন হিন্দুদের একচেটে নয়। আধুনিক বিপ্লববাদীদেরও পুরাণ তৈরির উপর আগ্রহ। ট্রটস্কি বলে আস্ত একটা ঐতিহাসিক চরিত্রকে ইতিহাস থেকে বেবাক মুছে ফেলা হয়েছে স্টালিনের মহিমা প্রচার করতে। জুলিকে তুমি পুণা নিয়ে গেলে সম্ভাব্যদের মোহ থেকে মুক্ত করতে। সেটা দৃষ্টবিশ্বাসকে দিয়ে হতো না। কিন্তু পারলে কি ওকে বিপ্লববাদের মোহ থেকে মুক্ত করতে? কলকাতায় ফিরে এসে ও আবার সেই পুরাতন চক্রে ভিড়ে যায়। এবারকার তাত্ত্বিক প্রতিষ্ঠাভূমি মার্কস কথিত হুসমাচার। সম্ভাব্যবাদীরা আর ক'টা মানুষ মারত! এরা তো শ্রেণীকে শ্রেণী লিকুইডেট করবে।” মানস শিউরে ওঠে।

“তার আগে ব্রিটিশ সাম্রাজ্যকে ধ্বংস করতে হবে। সে কাজটা যদি ওরা নিষ্পন্ন করার আগে ভারতীয় জাতীয়তাবাদীরাই নিষ্পন্ন করে তা হলে ভারতীয় জাতীয়তাবাদীরাই জনগণের নির্বাচিত সরকার গঠন করবে। সে সরকার যতদিন না জনগণের আস্থা হারাচ্ছে ততদিন ফরাসী বিপ্লব বা রুশ বিপ্লবের পুনরাবৃত্তি ঘটেতে পারে না। মাঝখানকার এই যে অধ্যায়টা এটাকে ইতিহাস থেকে মুছে ফেলা সম্ভব নয়। বিপ্লব যদি পরাধীন ভারতের মাটিতে ঘটে তবে সেটা হবে জাতীয়তাবাদী বিপ্লব। তাতে গান্ধী, বল্লভভাই, রাজেন্দ্রপ্রসাদেরও ভূমিকা থাকবে। ভূমিকা থাকবে জবাহরলাল, সুভাষচন্দ্র, জয়প্রকাশ নারায়ণেরও। মার্কস লেনিনবাদীরা এঁদের পর বিপ্লব করতে গেলে দেখবেন যে বিপ্লবের যা প্রেক্ষিজ তা এঁরাই অর্জন করে বসে আছেন। এঁদের বঞ্চিত করতে হলে পৃথকভাবে বিপ্লব ঘটতে হয়। সেটা কি এঁদের মাঝে কুলোবে? তাই এঁরা কংগ্রেসের ভিতরে ঢুকেছেন। কিন্তু তাতেও কি এঁদের উদ্দেশ্যসিদ্ধি হবে? আসল সিদ্ধান্তটা তো গান্ধীজীর হাতে। তিনি এগিয়ে না এলে কেউ তাঁর আগে এগোতে সাহস পাবে না। যদি সাহস পায় তবে অসময়ে ধরা পড়বে। জনগণ সাড়া দেবে না। গান্ধীজীর যখন সিদ্ধান্ত নেবার দিন আসবে তখন তিনিই তো সংগ্রামের একমাত্র পরিচালক। সফল হলে তাঁরই তো একচ্ছত্র নেতৃত্ব। বিফল হলে অবশ্য অন্য কথা। সেক্ষেত্রে মার্কসগন্থী বিপ্লবীদের একটা ভূমিকা অস্বীকার করা যায় না।

সফল হলে তাঁদেরই একচ্ছত্র নেতৃত্ব হবে। বিফল হলে তাঁরাও নেতৃত্ব হারাবেন। সফল যে তাঁরা হবেনই এটা যুক্তির কথা নয়, বিশ্বাসের কথা।” সৌম্য নীরব হয়।

এমন সময় মধ্যাহ্নভোজনের আহ্বান আসে। ছোটদের খাওয়া হয়ে গেছে। এখন বড়োদের পালা।

“মিলির তো একটা হিল্লো হলো,” যুথিকা বলে, “এবার জুলিরও একটা হিল্লো হয় না? নিজের ঘরসংসার হলে ও মা দুর্গার মতো তাই নিয়ে ব্যস্ত থাকবে। মা কালীর মতো মার মার কাট কাট করে বেড়াবে না।”

“ওর মায়েরও সেই বক্তব্য। কিন্তু কে শোনে কার কথা!” সৌম্য সায় দেয়।

“শুনবে, যদি একজন তপস্বী তপোভঙ্গ করেন।” ইঙ্গিত করে যুথিকা।

“করবেন যখন তপস্তার ফল ফলবে। দেশের স্বাধীনতা। সেই স্বর্গে দেশের স্বাধীনতাসংগ্রামীদের ইচ্ছা। তিনি তখন সরে দাঁড়াবেন।” সৌম্য আশা দেয়।

“কেন? কেন? তিনি কি ইচ্ছা কামনা করেন না।” যুথিকা আশ্চর্য হয়।

“ইচ্ছাকেও প্রয়োজনে বজ্র প্রয়োগ করতে হয়। রাষ্ট্রের দায়িত্ব বাঁদের হাতে তাঁদের হাতে শান্তির ক্ষমতাও থাকবে। যারা সৈন্ত পুলিশ ব্যবহার করতে অনিচ্ছুক তাঁদের কর্তব্য রাষ্ট্রব দায়িত্ব না নেওয়া। গান্ধীজী কংগ্রেসকে মন্ত্রিত্ব গ্রহণের অহুমতি দেবার আগে আপনি কংগ্রেসের সদস্যপদ ত্যাগ করেছেন। কংগ্রেসের লক্ষ্য কেবল স্বাধীনতা অর্জন নয়, শাসনের দায়িত্ব গ্রহণ ও ক্ষমতায় অধিষ্ঠান। স্বাধীনতা অর্জনে অহিংসাই যথেষ্ট, কিন্তু শাসনের কাজও যে সৈন্ত পুলিশ জেল আদালত বিনা চলে একথা কংগ্রেস নেতারা মেনে নিতে নারাজ। গান্ধীজীও বোঝেন যে সেটা আপাতত অবাস্তব। কিন্তু সে আদর্শ তো তিনি ত্যাগ করবেন না। একা একাই যতদূর পারেন এগোবেন। আমিও তাঁর সঙ্গে পা মেলাব।” সৌম্য খুলে বলে।

“অবাস্তব বলে অবাস্তব।” মানস তার অভিজ্ঞতা থেকে বলে। “শাসনের দায়িত্ব নিলে শাসনের ক্ষমতাও হাতে থাকা চাই। তবে ক্ষমতা আছে বলে বেহিসাবীভাবে প্রয়োগ করা উচিত নয়। গণতন্ত্রে হিসাবনিকাশের দায় আছে। পার্লামেন্টের কাছে। ইলেকটোরেটের কাছে। ক্ষেত্রবিশেষে উচ্চতর আদালতের কাছেও। স্বাধীনতার পরে গণতন্ত্র প্রতিষ্ঠা করতে হবে। গণতান্ত্রিক সংবিধান রচনা করতে হবে। কংগ্রেস নেতারা তাই সংবিধান সভার দাবী তুলেছেন।”

যুথিকার জ্ঞাতব্য ছিল জুলির ভাগ্যে বিবাহ আছে কি না। সে বলে, “তা হলে, দাদা, তুমি স্বাধীনতার পরেও তোমার তপস্তা চালিয়ে যাবে? আশ্রমেই তোমার অবশিষ্ট জীবন কাটবে?”

“বুঝেছি তুমি যা শুনতে চাও।” সৌম্য হেসে বলে, “না, স্বাধীনতার পরে তেমন কোনো ভীষ্মের প্রতিজ্ঞা আমার নেই। লবণ সত্যায়ণে যোগ দেবার আগে তো আমি বিবাহের জন্তে দ্বার খোলা রেখেছিলুম। অলকনন্দা যদি গ্রামে গিয়ে মংসার পাততে রাজী হতো আমিও তাকে বিয়ে করতে রাজী ছিলাম। মানস তোমাকে বলেনি ও কথা? মানস, তোমার মনে পড়ে অলকাকে?” সৌম্য যুথিকাকে ছেড়ে মানসকে স্মরণ।

“কই, আমাকে তো উনি বলেননি।” যুথিকা উত্তর দেয়।

“মনে পড়ে বইকি। সার অজিত মজুমদারের কণ্ঠা অলকনন্দা। তুমি ওকে গ্রামিকা করতে চেয়েছিলে। আর ও চেয়েছিল তোমাকে নাগরিক করতে। আমি তখন ছিলাম অলকনন্দারই পক্ষে। কারণ আমি ছিলাম আধুনিকতার পক্ষে। ইতিমধ্যে আমি গ্রামে গ্রামে ঘুরে গ্রামের পক্ষপাতী হয়েছি। আধুনিকতার সে জলস ও আর নেই, সে আবার এক মহাযুদ্ধ বাধিয়ে বসেছে। আমার এখন অজ্ঞানবিবাদ।” মানস গীতার আশ্রয় নেয়।

“অজ্ঞানবিবাদ!” সৌম্য জিজ্ঞাস্ত হয়।

“জার্মানীতে আমি কত সুন্দর সুন্দর জায়গা দেখেছি। কত অজানা অচেনা লোকের কাছে সহৃদয় ব্যবহার পেয়েছি। সবাই তো নাৎসী নয়, কিন্তু সবাই হচ্ছে জার্মান। নাৎসীদের বিনাশ করতে গিয়ে জার্মানদের নির্বিচারে বিনাশ করতে হবে। ধ্বংস করতে হবে তাদের যুগ যুগান্তরের শিল্পকীর্তি। কেমন করে আমি শহরকে শহর গুড়িয়ে দেব? পরিবারকে পরিবার উড়িয়ে দেব? তেমন বাঁচা কে বাঁচতে চায়, যে বাঁচার শরিক জার্মান জাতি নয়? যুদ্ধে যোগ দেবার জন্তে অস্থির হয়ে উঠেছিলুম, কিন্তু যখন মনে পড়ে যায় ডাক্তার নয়মান বা ফ্রাউ নয়মানের মুখ বা তাঁদের ভাই হাইনরিখের মুখ তখন অনিচ্ছায় অন্তর ভরে যায়। আমার বিশ্বাস হয় না যে ওঁরা সবাই নাৎসী। হতে পারে হাইনরিখ এখন কনসক্রিপ্ট। ওর ইচ্ছার বিরুদ্ধে ওকে ধরে নিয়ে গেছে। কিন্তু ওর বুড়ো বাপ মার বা ছোট ভাগনে ভাগনীর কী দোষ! কেন আমি তাঁদের বোমা দিয়ে বধ করব? শত্রু বলে? বালবুদ্ধ বনিতাও শত্রু? হিটলার অবশ্য বলছে টোটাল ওয়ার। কিন্তু আমরা তো তার বিপরীতটাই বলি। কার্যকালে একই রকম দাঁড়ায়।” মানস মর্মবেদনায় অভিভূত হয়।

সৌম্য তা শুনে বলে, “তুমি অজ্ঞান হতে পারো, আমি কিন্তু শ্রীকৃষ্ণ নই। কৌরবদের হারিয়ে দিতে হলে কৌরবদের মতো নির্বিবেক হতে হবে এ শিক্ষা আমার নয়। যুদ্ধে নামলে মায়াবী বিচার বিবেক প্রজ্ঞা সব কিছুই কাছ থেকে বিদায় নেয়।



বর্বরতায় শত্রুকেও ছাড়িয়ে যায়। বিংশ শতাব্দীতে পৌছেও তার স্বভাবের পরিবর্তন হলো না। বিজ্ঞান মানুষকে সভ্যতর করেছে না অসভ্যতর করেছে যুদ্ধকালে সেটা ধরা পড়ে যায়। উপরে উপরে সভ্য, ভিতরে ভিতরে অসভ্য, এই হচ্ছে ইউরোপের পথ। ভারতও কি এই পথ ধরবে? অন্তত একটা দেশও কি এ জগতে থাকবে না যে বালবুদ্ধ বনিতাকে নির্বিবেকভাবে হত্যা করতে অস্বীকার করবে? না হয় নাই বা হলো জয়।”

“সে কী কথা! জয় না হলে যে সর্বনাশ! হিটলার তার শত্রুদের কাউকে আশ্রয় রাখবে না। যারা অহিংস প্রতিরোধ করবে ভাবছে তাদেরও মেরে শহীদ করে দেবে। নৈতিক জয় নিয়ে তুমি সুখী হতে পারো, সৌম্যদা, আমি কিন্তু সুখী হতে পারিনি। অথচ জার্মানদের সবাইকে আমি নাৎসী বলে উজাড় করতেও পারিনি। এখানেও সেই নীতির প্রমাণ। যুদ্ধ করতে হবে, হিটলারকে হারাতে হবে, অথচ যারা নাৎসী নয় তাদের বাঁচাতে হবে। কী করে এটা সম্ভব? গীতায় এর উত্তর নেই।” মানস উত্তর খোঁজে।

“এ সমস্যা তো গীতার খুঁজে ছিল না। তখন যুদ্ধ হতো লোকালয়ের বাইরে এক মাঠে বা ময়দানে। বালবুদ্ধ বনিতা সেখানে থাকত না। অসামরিক পুরুষরাও না। লড়াই হতো শত্রুধারীর সঙ্গে শত্রুধারীর। বিবাদ সেক্ষেত্রে হৃদয়দোর্বল্য। কিন্তু একালের যুদ্ধ তো সিভিল পপুলেশনকেও মেরে সাবাড় করে। দুই পক্ষই এটা মেনে নিয়েছে। একালের যুদ্ধ কাউকেই রেহাই দেয় না। না শিশুকে, না স্ত্রীজাতিকে, না অসামরিক পুরুষকে। মানুষ যদি এর থেকে নিবৃত্ত না হয় তো সভ্যতার নিদর্শন বিশেষ কিছু টিকে থাকবে না। গত মহাযুদ্ধের পর সাহিত্যের বা সঙ্গীতে বা চিত্রকলার বিকাশ যেটুকু দেখছি সেটুকু তার নিছক নূতনত্ব। নূতন পুরাতন হলে তার দিকে ফিরে তাকাতে কে? যদি না থাকে চিরন্তনের ছাপ। কোথায় কতটুকু তা দেখছি? বিজ্ঞান আর মারণাস্ত্র ছাড়া গর্ব করবার মতো আর কী আছে? গণতান্ত্রিক জীবন ধারাও তো যুদ্ধকালে সংকীর্ণতর হয়।” সৌম্য খুঁত ধরে।

‘কিন্তু একপক্ষকে বাধা দেবার ভগ্নে আরেকপক্ষ যদি না থাকে, যদি অস্ত্র হাতে নিয়ে কাঁপিয়ে না পড়ে তবে অস্ত্রিয়া, চেকোস্লোভাকিয়া, পোলাও এক এক করে তাদের অস্তিত্ব হারায়। কোথাও এক জায়গায় দাঁড়ি টানতে হয়। নইলে ভারতও একদিন নাৎসী পদানত হবে। অর্জুনকে যুদ্ধ করতেই হবে, সৌম্যদা। ওয়েস্টার্ন ফ্রন্টে না হোক, হোম ফ্রন্টে। তোমার অহিংসা তখন কোন্ কাজে লাগবে?’ মানস সংশয়ান্বিত।

“আমরা যদি আমাদের অহিংস পদ্ধতির সংগ্রামে ব্রিটিশ রাজকে অচল করতে পারি। তবে নাৎসী রাজকেও অচল করতে পারব। মারতে মারতে ওরা ক্লান্ত হয়ে পড়বে, কিন্তু সহযোগিতা পাবে না। নেপোলিয়নের রুশ অভিযানের মতো হিটলারের ভারত অভিযানও ব্যর্থ হবে। আমরাই আমাদের ঘড়বাড়ী দোকান বাজার ক্ষেত্রে খামার দখল করে ওদের বঞ্চিত করব। আমাদের ক্ষতি যা হবে তা পুষিয়ে যাবে। বিরাট দেশ, তার বিশাল অভ্যন্তর। আলেকজান্ডারের সৈন্যদের মতো ওরাও ভিতরে ঢুকতে সাহস পাবে না। পাছে পেছনের রাস্তা কাটা যায়। নাৎসীরা কখনো অহিংস প্রতিরোধের সম্মুখীন হয়নি। যদিও অসিয়েটস্কির মতো শান্তিবাদী জার্মানীতে জন্মেছেন। আমরা যদি অন্তরে নির্ভয় হই কে আমাদের পদানত করতে পারে? সঙ্গে সঙ্গে আত্মনির্ভরও হতে হবে। খাণ্ড আর বন্য এ দুটিতে আত্মনির্ভর হবে প্রত্যেকটি গ্রাম। গঠনকর্মের উপর সেইজন্মে আমরা এতটা জোর দিই। ওটাই আমাদের দেশরক্ষার প্রগতি। যে দেশরক্ষায় সর্বসাধারণ অংশ নিতে পারে। কেবল মুষ্টিমেয় পেশাদার সৈনিক নয়। অথবা একরাশ অনিচ্ছুক কনসক্রিপ্ট নয়।” সৌম্য অবিচলিত কণ্ঠে বলে।

জুলির বিয়ের কথাটা পাড়বার অবকাশ পায় না যুথিকা।

আহারের পর আরাম। মানস বলে, “আমি একটু গড়াতে চাই। তুমি চলো আমার শোবার ঘরে বসে গল্প করবে। তোমাকে দেওয়া হবে একটা ডেক চেয়ার।”

সৌম্য বলে, “দুপুরের যাওয়ার পর আমিও একটু গড়াই।”

“বেশ তো, তোমার যদি অসুবিধে না হয় তবে তুমি আমার ক্যাম্প খাতে শুতে পারো। ডেক চেয়ারে হেলান দিয়ে বসব আমি।” মানস প্রস্তাব করে।

সৌম্য লক্ষ করে যে মানস ক্যাম্প খাতে শোয়। তাতে গদীর বদলে একটা চাদর পাতা।

“কবে থেকে এই কুচুসাধনা শুরু?” সৌম্য জানতে উৎসুক।

“আমার জীবন শূন্য হয়ে গেছে যেদিন, সেদিন থেকে।” মানস নিশ্চিন্তভাবে বলে। সৌম্য বুঝতে পারে। দীপকের ভাই রূপক আর নেই। সে “আহা” করে ওঠে।

“ভাই সৌম্যদা, আমি যে কিছুতেই শান্তি পাচ্ছি নে। আমার সব সময় মনে হচ্ছে ওর তো ঘাবার কথা ছিল না, ও গেল কেন, গভীরতর কারণটা কী।” মানস প্রশ্ন করে।

“এল কেন আর গেল কেন, এই দুই প্রশ্নের উত্তর তো আদিকাল থেকেই খোঁজা হচ্ছে, ভাই। এখনো কেউ নিশ্চিত উত্তর পায়নি। পাবে কী করে? মাহুষের

জ্ঞানবুদ্ধি সীমাবদ্ধ। সত্যের উচ্চতম স্তরে পৌঁছতে হলে জ্ঞানবুদ্ধিই যথেষ্ট নয়। তার জন্তে চাই আধ্যাত্মিক উপলব্ধি। যার জন্তে চাই সব মাহুষকে ভালোবাসা, সব প্রাণীকে ভালোবাসা। প্রেমের গভীরতম স্তরে যদি কেউ পৌঁছয় তবেই সত্যের উচ্চতম স্তরে পৌঁছতে পারে। সে রকম সাধক বিরল। তাঁরাই ভেদ করেছেন জন্ম মৃত্যুর চূড়ান্ত রহস্য। জিজ্ঞাসা করলে তাঁরা মৌন থাকেন। কিংবা উত্তর দেন, ওপারে না গেলে ওপারের সত্য এপার থেকে প্রতিভাত হয় না। ওপার বলে কিছু আছে যদি মানো তবে ওপারে গেলেই তুমি তোমার প্রশ্নের উত্তর পাবে। নিশ্চিত উত্তর। ওপারের অস্তিত্ব সম্বন্ধে সংশয় যদি থাকে তবে অবশ্য অগ্র কথা। সাধারণ লোকের সংশয় নেই। তাই তারা বিশ্বাস করে ভগবান দিয়েছিলেন, ভগবান নিয়ে গেলেন। কিংবা পূর্বজন্মের কর্মফলে এসেছিল, কর্ম ফুরিয়ে গেল, তাই চলে গেল। কিংবা যার যতদিন আয়ু তার ততদিন স্থিতি। ললার্টলিখন।” সৌম্য তার বন্ধুকে শোনায়।

মানস মন দিয়ে শোনে। চোখ বুজে থাকে। রূপককে স্মরণ কবে। ফুলেব কুঁড়ির মতো অকালে বারে পড়ল। এর একটা জৈব ব্যাখ্যা আছে, কিন্তু অন্তব চায় গভীরতর ব্যাখ্যা।

“ও বোধ হয় বলতে এসেছিল যে, বাবা, তুমি কি জানো তুমি কেন এসেছ, কী তোমার প্রকৃত কাজ, সে কাজ না কবে অকাজ করছ না তো? তোমাকে যে জীবন দেওয়া হয়েছে তা কি ব্যক্তিগত স্বার্থের জন্তে? না মহত্ত্ব কল্যাণের জন্তে? তুমি কেবল পদোন্নতির চিন্তায় মগ্ন থেকেছ। দারুণ আঘাত না পেলে তুমি জাগতে না। সত্যি, আমাব পতন হতে যাচ্ছিল। দেখতে আরোহণের মতো। আসলে অবরোহণ। আমি নিজেই অশান্ত বোধ করছিলুম আমাব উচ্চাভিলাষ আমাকে কোন্ পাতালে নিয়ে যাচ্ছে অনুভব করে। আমার অবরোহণ রোধ হয়েছে। কিন্তু আমার আর এ চাকরি ভালো লাগছে না। এটা আমার স্বধর্ম নয়। তুমি ভালো করেই জানো কেন, কার জন্তে, কোন্ অবস্থাত্রে আমি এ পথে পদার্পণ করেছিলুম। তার সঙ্গে আমার সম্পর্ক বদলে গেছে। আমাকে তার ভার নিতে হয়নি। তা হলে কেন আমি অতীতের জের টেনে যাচ্ছি? আমি চাই নতুন করে শুরু করতে।” মানস বলে আকুল হয়ে।

“কিন্তু ইতিমধ্যে তুমি বিবাহ করেছ, তোমার গুরুকণ্ঠা হয়েছে, তাদের প্রতি কি তোমার কোনো কর্তব্য নেই? তাদের বাঁচবার একটা বিকল্প উপায় খুঁজে বার করো। সেটা এই যুদ্ধের বাজারে আরো দুরূহ। যেটাকেই জীবিকা করবে সেটাই পরধর্ম।

স্বধর্মে নিধনঃ শ্রেয়ঃ। তা বলে কি সপরিবারে নিধনঃ শ্রেয়ঃ ? আমি যে বিয়ে করিনি সেটা এইসব ভেবেই।” সৌম্য তার আপনার কথা বলে।

“যে ব্যক্তি সব মানুষকে ভালোবাসবে, সব প্রাণীকে ভালোবাসবে সে কি একটি নারীকে ভালোবাসবে না! ভালোবাসলে বিয়ে করবে না? বিয়ে কবলে সন্তানের জনক হবে না? আমি আমার স্বভাবের অনুসরণ করেছি। যুথিকাও তার। আমাকে বিয়ে করে ও ত্যাগ্যকণ্ঠা হয়েছে, জানো? অত বড়ো ত্যাগের উপরে আরো বড়ো ত্যাগ কি চাপানো উচিত? আমি যদি এমন কোনো বিকল জীবিকা খুঁজে না পাই, যেটা পরধর্ম নয়, তা হলে ও হবে ভিখারী শিবের অন্তর্গণ। একালে তার মানে ওকেই পরের বাড়ী রাঁধুনীর কাজ নিতে হবে। ও আমাকে অভয় দিয়ে বলেছে ও কিছু না কিছু রোজগার করবেই। শুনে আমি আরো ভয় পাই। না, ওটা একটা সমাধান নয়। নিজের বিবেককে নির্মল রাখব বলে প্রার বিবেককে বন্ধক দিতে পারেন। সৈরিক্তী পরের গৃহে থাকলে কাঁচকও থাকে। অথচ কাঁচকবধের জন্তে ভীম নেই। আমার এই সাজানো সংসারে মৃত্যু হানা দিয়েছে, সেই শোকে অন্ধ হয়ে অন্ধকারে কাঁপ দিলে সংসারটাই তছনছ হবে, সৌম্যদা।” মানস উদ্বিগ্ন হয়ে বসে।

“আমার মতে দুটোই বাড়াবাড়ি। চাকরি ছেড়ে দেবার উপযুক্ত কারণ যেখানে নেই সেখানে সেটা বাড়াবাড়ি। অপর পক্ষে, উপযুক্ত কারণ যেখানে আছে সেখানে অনিশ্চিতের ভয়ে হাত পা গুটিয়ে বসে থাকাটাও বাড়াবাড়ি। সেক্ষেত্রে কাঁপ দিতেই হবে, যা থাকে কপালে। ইতিমধ্যে যুথিকাকে তৈরি করে নাও। সেবাপ্রতিষ্ঠান চালাবে। খাদি ভাণ্ডারের ভার নেবে। কিছু না হোক টিউশনি করবে। ও তো ভালো পিয়ানো বাজায়। ওটাই ওর লাইন।” সৌম্য পথ দেখায়।

মানস চিন্তা করে। বলে, ‘ছেলেমেয়েরা একটু বড়ো না হলে ওদের মা কোনোটাতেই মন দিতে পারবে না। মন পড়ে থাকবে বাড়ীতে। এমন কাজ চাই যা বাড়ীতে বসেই করা যায়। কিন্তু চরকা কেটে তো দিনে আট আনার বেশা হয় না।’

“তুমি কী করে জানলে যে আমি এখন এই সমস্তা নিয়েই গান্ধীজীর সঙ্গে কথা বলতে যাচ্ছি? তিনিই ডেকেছেন। মজুরি আরো বাড়াব কী করে? পড়তায় পোষাবে কেন? লোকে খাদি না কিনে মিলের কাপড় কিনবে। একটা মজার কথা শুনবে? আমার কাটুনীরাই আমার কাছ থেকে মাসে পনেরো টাকা গুনে নেয়, নিয়ে মিলের কাপড় কেনে। নিজেদের হাতে কাটা সূতোর খাদি নিজেরাই পারবে না। বাপু এই নিয়ে বোরতর চিন্তিত। দেশের স্বরাজ হয়তো বিঘ্নিত হবে না, কিন্তু

সে স্বরাজ কি জনগণের স্বরাজ হবে, না বড়ো বড়ো কলওয়ালাদের রাজ হবে?”  
সৌম্যও ঘোরতর চিঙ্কিত।

“ওঃ তুমি তা হলে সেগাঁও যাচ্ছ? ফিরে এসে বলবে তো ওখানকার হালচাল।  
থবরের কাগজে যেটুকু লেখে সেটুকুতে মন ভরে না। আমার তো ইচ্ছে সোজাসুজি  
গান্ধীজীর সঙ্গে সাক্ষাৎ করে আমার নিজের প্রশ্নেব উত্তর চাওয়া। নচিকেতার প্রশ্নই  
আমার প্রশ্ন। জানি তিনি যমরাজ নন, সেগাঁও নয় যমরাজ্য, তবু মর্ত্যলোকে আর  
কে আছেন যিনি আমাকে আমার সংশয়ে নিশ্চিতি দিতে পারেন? তাছাড়া এটাও  
আমার ভিজ্ঞান যে দেশ যখন দুই শিবিরে বিভক্ত হয়ে যাচ্ছে, সত্যগ্রহীদের শিবিরে  
আর সাম্রাজ্যবাদীদের শিবিরে, তখন আমার মতো ব্যক্তির স্থান কোন্ শিবিরে? আমি  
কি তোমাকে জেলে পুরব নাকি।” মানস শিউরে ওঠে।

“তোমার কর্তব্য হবে আমাকে সর্বাধিক দণ্ড দেওয়া, আর নয়তো নিজে পদত্যাগ  
করা। ডজ ক্রমফিল্ডকে যা বলেছিলেন গান্ধীজী ১৯২২ সালে। কিন্তু এর জন্তে  
সেগাঁও যাবার দরকার কী? বাপু তো গান্ধী সেবাসঙ্ঘের অধিবেশনে যোগ দিতে  
বাংলাদেশে আসবেন, কথাবার্তা চলছে। সাক্ষাৎকারের ব্যবস্থা সে সময় করা যেতে  
পারে। তাড়া কিসের?” সৌম্য ভরসা দেয়। “কিন্তু নচিকেতার প্রশ্নের উত্তর  
যম ভিন্ন আর কে দিতে পারবেন? মহাত্মাও যমের অধীন।”

আবার ওরা গান্ধীজীর প্রশ্নে ফিরে আসে। মানস জানতে চায়, “মহাত্মাজীর  
সঙ্গে কি তোমার কেবল চরকার অর্থনীতি নিয়ে কথাবার্তা হবে? ওর চেয়ে সারিয়াস  
কোনো বিষয় নিয়ে নয়?”

“ওর চেয়ে সারিয়াস আর কী হতে পারে, মানস?” সৌম্য আবেগের সঙ্গে বলে,  
“বুধকে অভিভূত করেছিল মানুষের জরা ব্যাধি মৃত্যু। গান্ধীকে অভিভূত করেছে  
মানুষের দীনতা হীনতা অধীনতা। আপাতত ভারতের স্বাধীনতাই তাঁর লক্ষ্য। কিন্তু  
ভারত বলতে ভারতের দীনহীনদেরও বোঝায়। তাদের দীনতা দূর হবে কী করে,  
যদি সবাইকে কাজে লাগিয়ে না দেওয়া যায়? আর, সবাইকে কাজে লাগিয়ে দেওয়া  
যাবে কী করে? যদি তাদের হাতে চরকা বা তারই যতো সহজ শ্রুত হাতিয়ার ধরিয়ে  
না দেওয়া যায়? কলকারখানার কাজ শতকরা পাঁচজন কি দশজনকে সক্রিয় রাখতে  
পারে, কিন্তু আর-সবাই তো নিষ্ক্রিয় থাকবে। বিদেশী সরকার সেই নিষ্ক্রিয় জনতাকে  
আহার জোগাতে বাধ্য নয়। তারা দুর্ভিক্ষে মরলে বিদেশীর আসন টলে না। কিন্তু  
স্বদেশী সরকারকে সক্রিয় নিষ্ক্রিয় নির্বিশেষে সবাইকে অন্ন জোগাতে হবে। কেউ  
দুর্ভিক্ষে মরলে সরকারের আসন টলবে। যাদের আমরা খাওয়াব তাদের কি আমরা

বসিয়ে রেখেই খাওয়াব? না, যাদের আমরা খাওয়াব তারা আমাদের পরাবে। আমরা জোঁগাব খাচ্ছি, ওরা জোঁগাবে খাদি। কেউ অনাহারে থাকবে না, কেউ নিষ্কর্ম হবে না। বিদেশী শাসনের বিরুদ্ধে আমাদের প্রধান অভিযোগ ওরা আমাদের বেশীর ভাগ লোককে অনাহারে বেখেছে বা মরতে দিয়েছে। তাদের হাতে কাজ নেই, তাদের কাজ কেড়ে নিয়েছে বিদেশী কলকারখানার শ্রমিক। বিদেশীর জায়গায় স্বদেশী কলকারখানা হলে যে তাদের দুঃখ দূর হবে তা নয়। তারা যে তিমিরে তারা সে তিমিরে। সেইজন্তেই তো চরকার অর্থনীতি।” সৌম্য যতদূর বোঝে।

মানস মন দিয়ে শোনে ও ভাবে। “এ তো গেল দীনদের দীনতা দূর করার উপায়। হীনদের হীনতা দূর হবে কী করে?”

“সেটা আরো কঠিন, আরো সময়সাপেক্ষ। হিন্দুসমাজের বর্ণবিচ্ছিন্নতা এমনভাবে হয়েছে যে সব চেয়ে দরকারী কাজ যারা করে তারাই সব চেয়ে হীন। তারা যদি দেশ ছেড়ে পালায় বা একধার থেকে মুসলমান হয়ে যায় তা হলে হিন্দুসমাজের পতন অবশ্যম্ভাবী। আর হিন্দুসমাজ মানে তো দেশের অধিকাংশ লোকের সমাজ। তাদের পতন হলে তারা আর সবাইকে টেনে নামাবে। তখন আমাদের স্বাধীনতা বিপন্ন হবে। গান্ধীজী তাই বর্ণগর্বিত হিন্দুদের অন্তঃপরিবর্তনে তৎপর হয়েছেন। ইংরেজের সঙ্গে এর কোনো সম্পর্ক নেই। সেইজন্তে ইংরেজবিরোধী রাজনীতিকরা এর মর্ম বোঝেন না। কিন্তু দীনের দীনতা দূর করার মতো হীনের হীনতা দূর করাও গান্ধীজীর জীবনের উদ্দেশ্য। হরিজন যাদের তিনি বলছেন তাদের জন্তে তিনি গোড়া থেকেই গিরিয়াস। তবে হরিজন আন্দোলনটা বেশীদিনের নয়। পুণায় যখন তিনি হরিজন আন্দোলনের সূচনা করেন তখন আমিও তাঁর একজন অনুগামী হই। এ সমস্তা দু’শো বছরের চেয়ে অনেক বেশী পুরনো। ভারত উদ্ধার যত না কঠিন তার চেয়ে বহুগুণ কঠিন হরিজনদের উদ্ধার। বর্ণ হিন্দুরা ক্ষেপে যাচ্ছে, অশুচিদের সঙ্গে খাওয়াদাওয়া ও বিয়েসাদী করলে শুচিতা থাকবে না। এ কী রকম মহাত্মা যিনি অশুচিকে শুচি করতে গিয়ে শুচিকে অশুচি করতে যাচ্ছেন? বর্ণ হিন্দুদের ভিতরে উত্তেজনা বাড়ছে। সঙ্গে সঙ্গে বাড়ছে গান্ধীবিরোধিতা। সমাজে হাত পড়বে না, অথচ দেশ স্বাধীন হবে এ মানসিকতা গান্ধীজীর নেতৃত্বের পূর্বেও ছিল। নতুন কিছু নয়। তবু খারাপ লাগে, যখন শুনি যে হরিজনদের বাদ দিয়েও দেশকে স্বাধীন করা যায়। সেটা যেন নিগ্রোদের ক্রীতদাস রেখে আমেরিকাকে স্বাধীন করা।” সৌম্য আক্ষেপ জানায়।

মানস বলে, “তার মানে স্বাধীনতায়ুদ্ধের পরের অধ্যায় গৃহযুদ্ধ। ভারতকেও তার ভিতর দিয়ে যেতে হবে। বর্ণ হিন্দুরা কি লড়তে প্রস্তুত?”

“পরে কী হবে না হবে তা ইতিহাসের উপরেই ছেড়ে দেওয়া যাক। আপাতত প্রথম কর্তব্য স্বাধীনতা অর্জন। তাতে হরিজনদেরও অংশগ্রহণ।” সৌম্য বলে।

মানস জানতে চায় কংগ্রেস কি গান্ধীজীর মতবাদ সর্বাংশে সমর্থন করে। না কেবল তাঁর রাজনৈতিক নেতৃত্বটুকুই মানে।

“কংগ্রেস একটা রাজনৈতিক সংগঠন। রাজনৈতিক সংগ্রামের অধিনায়ক হিসাবে সে গান্ধীজীকে মানে। কিন্তু তাঁর মতবাদকে মানে না। এইখানেই গান্ধীজীর দুঃখ। অধীনতা দূর হবে, কিন্তু দীনতা ঘুচবে না, হীনতা মুচবে না। কংগ্রেসের তাতে আগ্রহ নেই। আমরা যারা বিশ্বাস করি যে গান্ধীজীই এ যুগের বুদ্ধ তারা অধীনতা দূর করার জন্তে কংগ্রেসে থাকলেও দীনতা ও হীনতা দূর করার জন্তে স্বতন্ত্র একটা সঙ্ঘের প্রয়োজন অনুভব করি। বৌদ্ধদের যেমন বুদ্ধ আর ধর্ম আর সত্য আমাদেরও তেমনি গান্ধী আর গান্ধীবাদ আর গান্ধীসেবাসঙ্ঘ। কংগ্রেসের সঙ্গে আমাদের যোগাযোগ আছে, কিন্তু বিভিন্ন প্রক্ষেপে আমাদের ভিন্ন মত। এই ধরো না কেন, বুদ্ধ আমরা চাই পৃথিবী জুড়ে নিরস্ত্রীকরণ। আপনি আচরি ধর্ম অপরে শেখায়। ভারতই সকলের আগে নিরস্ত্র হবে। কংগ্রেস নেতারা এতে নারাজ। কিংবা ধরে বিকেন্দ্রীকরণ। আমরা কেন্দ্রীভূত রাজনৈতিক ক্ষমতাকে বিকেন্দ্রীকৃত করতে চাই কংগ্রেস নেতারা তাতে নারাজ। আমরা কেন্দ্রীভূত অর্থনৈতিক ক্ষমতাকেও বিকেন্দ্রীকৃত করতে চাই। কংগ্রেস নেতাদের মধ্যে যারা সমাজতন্ত্রী তাঁরা রাষ্ট্রকেই করবেন অর্থনৈতিক ক্ষমতার একমাত্র কেন্দ্র। আর যারা ধনতন্ত্রী তাঁরা বড়ো বড়ো কোম্পানীর হাতে মূলধনকে কেন্দ্রীভূত হতে দেবেন। তারপর তাদের উপর নিয়ন্ত্রণ চাপাবেন। গান্ধীজী তাঁদের ট্রাস্টি হতে বললেও তাঁদেরও বিকেন্দ্রীকৃত করার পক্ষে কিন্তু ধনতন্ত্রীদের মতো সমাজতন্ত্রীরাও বিকেন্দ্রীকরণ পছন্দ করবেন না। তার বদলে করবেন ধনসম্পদ রাষ্ট্রসাং। তা হলেই দেখছ কংগ্রেসীদের সঙ্গে গান্ধীবাদীদের কত তফাৎ। আমরা অধীনতা দূর করার জন্তে কংগ্রেসে আছি, কংগ্রেসের সঙ্গে আছি, কিন্তু দীনতা ও হীনতা দূর করার জন্তে কংগ্রেসেব উপর নির্ভর করতে পারিনি, তাই পৃথক সঙ্ঘ গঠন করেছি। এ না হলে গান্ধীবাদ বাঁচবে না, গান্ধীজীর সঙ্গে সঙ্গেই দেহত্যাগ করবে। কংগ্রেস মস্ত থাকবে রাজনৈতিক ক্ষমতা ভোগ করতে। প্রাদেশিক স্তরে য' দেখছ কেন্দ্রীয় স্তরেও তাই দেখবে। তাই আমরা কংগ্রেসের বাইরে সঙ্ঘবদ্ধ হতে চাই। এটা কি অগ্ণায়? তুমি কী মনে করো, মানস?” সৌম্য ব্যাকুলভাবে বলে।

“না, অগ্ণায় কিসের? বুদ্ধ থাকলে সঙ্ঘ থাকে।” মানস রাগ দেয়।

“কিন্তু বামপন্থীদের ধারণা এটা দক্ষিণপন্থীদের বর্ণচোরা সংগঠন। বামপন্থীর

।।দি কংগ্রেস ক্যাপচার করে দক্ষিণপন্থীরা তাদের তাড়াবার জন্তে গান্ধীসেবাসঙ্ঘের  
 গরণ নেবে। বামপন্থীরা যখন রাষ্ট্র ক্যাপচার করবে গান্ধীসেবাসঙ্ঘ তখন দক্ষিণ-  
 পন্থীদের মদত দেবে। ওদের এ ধারণা গান্ধীজীকে অত্যন্ত মর্মান্বিত করেছে। সন্দেহ  
 নেই বহু দক্ষিণপন্থী নেতা আমাদের সঙ্ঘের সদস্য। গান্ধীবাদী বলে যদি কেউ  
 পরিচয় দেন আমরা কি তাঁকে ফেলতে পারি? তেমনি বহু ধনিক গান্ধীবাদী বলে  
 পরিচয় দিয়ে সদস্য হয়েছেন। তাঁদের ফিরিয়ে দিলে অনেকের উপর অবিচার করা  
 হবে। হুমুখরা বলছে যে কংগ্রেসের হাতে প্রাদেশিক সরকার না থাকলে এঁরা সঙ্ঘ  
 ভিড়ে যেতেন না। কংগ্রেস যেদিন প্রাদেশিক মন্ত্রিত্ব ত্যাগ করবে এঁরাও সেদিন যে  
 যার পথ দেখবেন। সঙ্ঘ কি থাকবে?” সৌম্য সুধায়।

“দেখা যাক। প্রাদেশিক মন্ত্রিত্বত্যাগ তো একরকম নিশ্চিত। ব্রিটিশ কর্তারা  
 কেন্দ্রে তেমন কোনো ক্ষমতা দেবেন না কংগ্রেস নেতারা যেমনটি আশা করেন।  
 সেদিন শেফার্ডের সঙ্গে এই নিয়ে কথাবার্তা হয়। তিনি বলেন ইংরেজ হোম মেশ্বর  
 ফাইনান্স মেশ্বররা যাবেন কোথায়? যুদ্ধকালে যে যার পদে থাকবেন।” মানস  
 ভিতরের খবর দেয়।



## ॥ নয় ॥

মাঝখানে বিরতি। যুথিকা এসে দু'জনের সামনে দু'গেলাস সরবৎ রেখে যায়।  
লেবুর সরবৎ। সৌম্য তো বাজারের লেমন স্কোয়াশ খাবে না।

মানস বলে, “তুমি ধন্য, তোমার বিশ্বাসের জোর আছে। তুমি তোমার বিশ্বাসের  
জন্তে জীবন উৎসর্গ করেছ। প্রাণ দিতেও প্রস্তুত হচ্ছ। কিন্তু আমি তো আঁকড়ে  
ধরবার মতো একটা খড়কুটোও খুঁজে পাচ্ছি নে। ভগবানে আমার অটল বিশ্বাস ছিল।  
সে বিশ্বাসও টলতে টলতে অজ্ঞেয়বাদের পর্যায়ে পৌঁছেছে। তেমনি আত্মার অমরত্বে  
বিশ্বাস। পরলোকে বিশ্বাস। পরজন্মে বিশ্বাস। জগতের মঙ্গলবিধানে বিশ্বাস। মরাল  
অর্ডারে বিশ্বাস। সত্যের জয় হবে, সত্যের জয় হবে, প্রেমের জয় হবে এই অবশ্যসত্যবিতায়  
বিশ্বাস। একালের মানুষের ভুলভ্রান্তি দোষত্রুটি ভাবীকালের মানুষ শুধরে দেবে, এই  
নিশ্চয়তায় বিশ্বাস। ভাবীকাল যে একালের চেয়ে নিখুঁত হবেই এই নিশ্চিতিতে  
বিশ্বাস। ভালো মন্দের দ্বন্দ্ব যে চিরকালের নয়, কালক্রমে মানবসংসার যে নির্জলা  
ভালো হতে পারে, এই শিবস্ত্রে বিশ্বাস। নেতি নেতি করতে করতে আমি শূণ্যের  
অভিমুখেই চলেছি।”

সৌম্য ওকে সাধুনা দেবার চেষ্টায় বলে, “এটা বোধহয় তোমার পুত্রশোকের  
প্রতিক্রিয়া। সে আঘাত কাটিয়ে উঠতে সময় লাগবে।”

“সেই কি একমাত্র আঘাত? চোখের স্রুমেই দেখছ চেকোনোভাকিয়ার দশা।  
আর পোলাণ্ডের দশা। কতকাল ধরে কত শত দেশপ্রেমিক তোমার মতো জীবন  
উৎসর্গ করে প্রাণদান করে দেশকে স্বাধীন করেছিলেন। ত্রিভঙ্গ পোলাণ্ডকে একত্ব  
দিতে সে কী দুর্মর সাধনা! অথচ বিশ বছর যেতে না যেতেই আবার দ্বিভঙ্গ।  
ভারতের স্বাধীনতার তপস্বীও একদিন সফল হবে, আমিও তোমার মতো বিশ্বাস

করি। কিন্তু সঙ্গে সঙ্গে আশঙ্কাও করি যে কোনো একজন সর্বজনমান্য নেতা না হলে এই বিচিত্র দেশ ছত্রভঙ্গ হতে পারে। গান্ধীজী কি চিরদিন থাকবেন? সংগ্রাম চলছে বলেই তাঁর নেতৃত্বের একান্ত প্রয়োজন আছে। সংগ্রাম সারা হলে কী প্রয়োজন? এর মধ্যেই তো তাঁকে মানতে চাইছে না লীগপন্থী মুসলমান, মহাসভাপন্থী হিন্দু, বামপন্থী কংগ্রেসী। ইংরেজ যখন বিদায় হবে তখন জাপানী কি আসবে না বিভেদের সুযোগ নিয়ে? ব্রিটিশ রাজত্বই যে সব চেয়ে বড়ো ইভিল এটা সত্য নয়। সাম্প্রদায়িকতা ও প্রাদেশিকতা তার চেয়েও বড়ো ইভিল। আরো বড়ো ইভিল বর্ণভেদ ও জাতিভেদ।” মানস বলে চিন্তাকুল ভাবে।

“যা বলেছ সব ঠিক। কিন্তু ঐ যে বলে, প্রথম জিনিসগুলি প্রথমে। বিদেশীর ছত্রছায়ায় বাস করলে কোনো দিনই আমরা মানুষ হব না। আগে তো ওরা বিদায় হোক, তার পরে দেখা যাবে কতদিন আমরা স্বাধীন থাকতে পারি, এক থাকতে পারি। মুক্তির জন্তেই ভারতের অস্তরায়্যা ব্যাকুল। এই সত্যের সঙ্গে যোগ দিয়েছে ভারতের অধিতীয় উপায় অহিংসা। গান্ধীজী সফল না হলেও এ সংগ্রাম চলবে। কারণ, প্রথম জিনিসটি প্রথমে। ভারত তখন যে-কোনো উপায় অবলম্বন করবে। ঋণ্ড ঋণ্ড হলেও যদি স্বাধীন হওয়া যায় তাও মই। অথও পরাধীনতার চেয়ে ঋণ্ডিত স্বাধীনতাও শ্রেয়। যেখানে সত্যিকারের ঐক্য নেই সেখানে শিকলে বাঁধা একত্ব নিয়ে আমরা কী করব! বিভেদের সুযোগ নিয়ে জাপানী ঢুকবে? ঢুকলে তার সঙ্গেও লড়ব। অহিংসভাবে সম্ভব না হয়, সহিংসভাবে। ইংরেজকে এবার আমরা হটাবই। যদি না ওরা মানে মানে হটে যায়। গান্ধীজী ওদের মানে মানে হটে যাবার জন্তে একটা রাস্তা খোলা রেখেছেন। কিন্তু সেটারও একটা সময়সীমা আছে সীমা পার হয়ে যাচ্ছে দেখলে তিনি সংগ্রামের সঙ্গে ত দেবেন। আমরা ঝাঁপিয়ে পড়ব। ফলাফল ভগবানের হাতে। হেরে যেতেও পারি। মরে যেতেও পারি। কিন্তু বসে থাকতে পারিনে। লগ্নের প্রতীক্ষা করে বসে থাকা নয়।” সৌম্য দৃঢ়তাব সঙ্গে বলে।

“প্রথম জিনিসটি প্রথমে।” মানস বলে, “কিন্তু তোমার আমার কাছে যেটি প্রথম আমাদের মুসলমান বন্ধুদের কাছে সেটি প্রথম নয়। তাঁরা বলেন, আগে হিন্দু মুসলমানের একতা, তার পরে ভারতের স্বাধীনতা। একতা যদি পেছিয়ে যায় তো স্বাধীনতাও পেছিয়ে যাবে। একতা যদি এগিয়ে আসে তো স্বাধীনতাও এগিয়ে আসবে। একতার আগেই যদি স্বাধীনতা চাও তো মুসলমানরা সরে দাঁড়াবে ও বাধা দেবে। ওদের চোখে ইংরেজরা যেমন বিধর্মী হিন্দুরাও তেমনি বিধর্মী। বিধর্মীরা শাসনে ওরা বাস করবে না এতদিন যে বাস করেছে সেটা যুদ্ধে পরাস্ত হয়ে।

নয়তো ওরাই তো রাজত্ব করত। স্বদেশী বিদেশীর প্রশ্ন ওদের কাছে বড়ো নয়। কারণ ওরাও তো বিদেশী বংশধর। বিদেশীকে বিদায় করতে হলে ওদেরও তো বিদায় কবতে হয়। ইংরেজদেব তবু ফিরে যাবার একটা স্থান আছে, ওদের ফিরে যাবার স্থান কোথায়? আরবে ইরানে মধ্য এশিয়ার কেউ ওদের স্থান দেবে না। সেইজন্তে ওরা ভারতেরই একাংশকে বানাতে চায় পাকিস্তান। এটা যদি মেনে নাও তো ওরা স্বাধীনতার প্রশ্নে বাদ সাধবে না। নয়তো ওরা স্বরাজকে বলবে হিন্দুরাজ আব ওর বিরুদ্ধে রুখে দাঁড়াবে।’

“যা বলেছ সব ঠিক। কিন্তু কোনো শর্তেই ওরা আমাদের স্বাধীনতা সংগ্রামে যোগ দেবে না। ওরা মানে লীগপন্থী মুসলমানরা। মোলানা আবুল কালাম আজাদ ও খান্ আবদুল গফ্ফার খানের মতো মুসলমানরা আমাদের সঙ্গে আছেন। লীগপন্থীরা সংগ্রামে যোগ না দিয়েই সংগ্রামের ফল ভোগ করবে, কংগ্রেসপন্থী মুসলমানদের ভোগ করতে দেবে না। ওরা নাকি মুসলমানদের প্রতিনিধিই নয়। এমন কি খাঁটি মুসলমানই নয়। শোন কথা। আজাদ খাঁটি মুসলমান নন, বাদশা খান্ খাঁটি মুসলমান নন। খাঁটি মুসলমান কিনা মহম্মদ আলী বীণাভাই খোজানী, যার পিতৃনামের ইংরেজী সংস্করণ জিন্না। যার পিতামহ হিন্দু। আমরা এখন আমাদের সংগ্রামী কমরেডদের তাঁদের ভাগ থেকে বঞ্চিত করি কী করে? তা যদি করি তবে অসমাপ্ত সংগ্রাম সমাপ্ত করার জন্তে ডাক দিলে তাঁরা আমাদের সঙ্গে যোগ দেবেন কেন? অবশ্য বাদশা খান্ বা মোলানার মতো লোক মন্ত্রিস্বের জন্তে লালায়িত নন। তাঁরা ডাক পেলে সংগ্রামে যোগ দেবেনই। কিন্তু আমাদেরও তো একটা কৃতজ্ঞতাবোধ আছে। যারা আমাদের দুঃখের দিনের সাথী তাঁরা কি আমাদের সুখের দিনের সাথী হবেন না? যারা কারাগারে বছরের পর বছর কাটিয়েছেন তাঁরা কি মন্ত্রী আসনে বসতে পাবেন না? কেন্দ্রে যদি সরকার পুনর্গঠন হয় জিন্নাও থাকবেন, আজাদও থাকবেন, কিন্তু আজাদ থাকলে জিন্না থাকবেন না, এটা হলো অত্যায জেদ। এর দরুন দেশকে দু’ভাগ করতে হবে, এটা তো পাগলের প্রলাপ। কোনো স্বহ্মমন্ডিক মুসলমান এমন প্রলাপ বকতে পারে না। দেশ দু’ভাগ হলে মুসলিম সম্প্রদায়ও দু’ভাগ হয়ে যায়। মুসলিম ঐক্য থাকে কোথায়? হিন্দু রাজত্ব এড়াতে চাইলে কতক মুসলমান তা পারবে, কিন্তু সব মুসলমান তা পারবে না। তবে, হ্যাঁ, ভারতের একাংশে মুসলিম রাজত্ব পুনঃপ্রতিষ্ঠা সম্ভব হবে, তা ঠিক।” সৌম্য স্বীকার করে।

“আরে, সেইটেই তো আসল।” মানস বলে, “ইংরেজ চলে গেলে তার উত্তরাধিকারী হবে কারা? কংগ্রেস বলবে, যাদের মেজরিটি তারা। কিন্তু তা হলে

তো হিন্দুরাই হবে উত্তরাধিকারী, যেহেতু তারাই মেজরিটি। তাদের সঙ্গে জনাকতক মুসলমান খ্রীস্টান পার্সী থাকলেও তারা মূলত হিন্দু। তাই লীগের বক্তব্য, লীগপন্থী মুসলমানদের বক্তব্য, ইংরেজ চলে যাবার আগেই স্থির করতে হবে যারা উত্তরাধিকারী হবে তারা কি মেজরিটিব তথা মাইনিরিটির সমান আস্থাভাজন, না কেবলমাত্র মেজরিটির আস্থাভাজন? সমান আস্থাভাজন বলতে বোঝাবে কংগ্রেস লীগ দুই দলই সমান শরিক, লীগ খাটো নয়। নয়তো লীগকে আলাদা উত্তরাধিকার দিতে হবে।”

সৌম্য এটা জানত। কিন্তু মানত না। হিন্দু মুসলমান প্রত্যেকটি গ্রামে ও শহরে দুটি তারের মতো জড়িয়ে গেছে! বেশীর ভাগ মুসলমানই ধর্মাস্ত্রিত হিন্দুর সন্তান। ধর্ম ব্যতীত আর সব বিষয়েই তাদের মধ্যে মিল। গোটাকতক চাকরিবাকরির জন্তেই কি তারা একান্তবর্তী পরিবার থেকে বেরিয়ে গিয়ে পৃথক পরিবাব গঠন করবে? পারবে কি সবাইকে সঙ্গে করে নিয়ে যেতে? যারা থেকে যাবে তারা তো আরো ক্ষুদ্র মাইনিরিটি হবে। ওদিকে হিন্দুরের দশা কী হবে?

সৌম্য বলে, “হিন্দু মুসলমানের বা কংগ্রেস লীগের বোঝাপড়া সত্যিই অত্যা-বশক। স্বাধীনতার আগেই হোক আর পরেই হোক এ সমস্যার সমাধান অবশ্যকর্তব্য। আমরা কেউ চাইনে যে হিন্দুরাই ইংরেজের পর সর্বসর্বা হয়। মুসলমানদের আস্থা না পেলে কোনো সরকারই টিকবে না। দেখছ না বিভিন্ন প্রদেশের কংগ্রেস সরকারগুলির দোটানা? লীগপন্থীদের বাইরে রাখলে তারা লোক ক্ষেপিয়ে দাঙ্গা বাধায়। দাঙ্গা থামাতে গেলে গুলি চালাতে হয়। অপর পক্ষে লীগপন্থীদের ভিতরে ঢুকতে দিলে কংগ্রেসপন্থী মুসলমানদের বহিষ্কার করতে হয়! ফলে স্বাধীনতাংগ্রাম দুর্বল হয়। কেন্দ্র নিয়েও একই দোটানা দেখা দেবে। স্বাধীনতাংগ্রাম যদি অসমাপ্ত থাকে তবে তা দুর্বল হবেই। আগে তো স্বাধীনতা লাভ করি, তার পরে আমরা এ সমস্যার সমাধান উভয়পক্ষের শুভবুদ্ধির সাহায্যে করব।”

“ওরা যে বিশ্বাসই করতে চায় না ইংরেজ চলে গেলে রাজস্বটা ওদেরও রাজস্ব হবে, যদি না আগে থেকেই ঐত শাসন প্রবর্তিত হয়। তার মানে হিন্দু মুসলমানের স্বতন্ত্র প্রতিনিধিত্বের ভিত্তিতে কংগ্রেস লীগ স্বৈরাজ্য। সেটা যদি অকার্যকর হয় তবে দুই শরিকের মধ্যে পার্টিশন। যেমন জমিদারির ক্ষেত্রে হয়।” মানস তার সহকর্মীদের কথা শোনায়।

“ভারত কি কারো জমিদারি? ভারত এক ও অবিভাজ্য। দেশরক্ষার দিক থেকে এক ও অবিভাজ্য। বাণিজ্যের দিক থেকে এক ও অবিভাজ্য। পররাষ্ট্রনীতির

দিক থেকে এক ও অবিভাজ্য। ইংরেজদের কাছে এটা স্বতঃসিদ্ধ। ইংরেজ রাজত্ব যতদিন থাকবে ততদিন এটা স্বতঃসিদ্ধই থাকবে। তারা বিদায় নিলেই এটা অসিদ্ধ হবে কী করে? ধর্ম এক নয় বলে? তা হলে তো খ্রীষ্টান, শিখ, এদেরও এক একটা স্বতন্ত্র রাষ্ট্র দিতে হয়।” সৌম্য বলে।

“তোমারও কথা আমারও কথা। কিন্তু আমাদের কথাই তো চূড়ান্ত নয়। যেহেতু আমরাই মেজরিটি। ইংরেজরা যদি কারো হাতে ক্ষমতা হস্তান্তর না করে সিংহাসন শূন্য রেখে যায় তবে যাদের যেখানে মেজরিটি তারাই সেখানে ক্ষমতাসীন হবে। কোথাও কংগ্রেস, কোথাও লীগ, কোথাও অন্য কোনো পার্টি। ভারত এক ও অবিভাজ্য থাকবে কিসের জোরে? ব্রিটিশ বেয়োনেটের জোরে নয়। কংগ্রেস বেয়োনেটের জোরে নয়। অহিংসার জোরে তো নয়ই। কন্সটিটিউশনের জোরেও না, কারণ ইংরেজের দেওয়া কন্সটিটিউশন আমরা মেনে নিইনি। নিজেদের একটা কন্সটিটিউশন রচনা করার অধিকারও আমাদের অন্যতম দাবী। আর ধর্ম অনুসারে দেশভাগ ইতিহাসে অভূতপূর্ব নয়। প্রথম মহাযুদ্ধের পরে আয়ারলণ্ডে হয়েছে। দ্বিতীয় মহাযুদ্ধের পরে ভারতেও হলে আশ্চর্য হবার কী আছে? ক্যাথলিক আর প্রটেস্ট্যান্ট যদি এক নেশন হতে না পারে হিন্দু মুসলমান এক নেশন হবে কোন্ তপোবলে? নানক, কবিরের সাধনার ফলে কি দাঙ্গা বন্ধ হয়েছে? গান্ধীজীও কি পেরেছেন বন্ধ করতে? কংগ্রেস মন্ত্রীরা গদী ছেড়ে দিলেই সেটা বন্ধ হবে? না দিলে নয়? গদী ছেড়ে দিলে শাসন চালাবে কে? ওই ইংরেজ? তা হলে ইংরেজকেই চিরকাল আটকে রাখতে হয়। যাদের দুই হাতে আটক করবে তাদের সঙ্গে দুই হাতে লড়বে কী করে?” মানস স্তব্ধ।

“না, না, ওদের আটক করা আর নয়। ওরা যদি নিরপেক্ষ হতো তা হলেও বা কথা ছিল। ওরা মুসলিম লীগের সঙ্গে ভিতরে ভিতরে মিতালি পাতিয়েছে।” সৌম্য উত্তর দেয়।

“ইঙ্গ-মুসলিম মিতালির কথা যদি বল তবে সেটা মুসলিম লীগের বেলা খাটে, কিন্তু জিন্নার বেলা নয়। এই সেদিনও তিনি ছিলেন ইণ্ডিপেন্ডেন্ট পার্টির নেতা, তাঁর দলের সদস্যরা কেউ হিন্দু, কেউ পার্সী। কখনো এঁরা কেন্দ্রীয় আইনসভায় কংগ্রেসের পক্ষে ভোট দিতেন, কখনো ইংরেজের পক্ষে। জিন্না সাহেব সরকারী খেতাবও পাননি, পদও নেননি। একদা কংগ্রেসের নেতা ছিলেন, কিন্তু গান্ধীজীর অসহযোগ নীতি তাঁর মতবিরুদ্ধ বলে তিনি কংগ্রেস থেকে সরে এসেছেন। মুসলিম লীগেও তাঁর স্থান ছিল, নইলে তিনি মুসলমানদের স্বতন্ত্র নির্বাচনকেন্দ্র থেকে ভোটের জোরে

জিততে পারতেন না। দুই নৌকায় পা রেখে তিনি কংগ্রেস লীগ চুক্তির ঘটকালিও করেছিলেন। সেটা মহাত্মা গান্ধীর উদয়ের পূর্বে। এমন মানুষ কেমন করে যে ইণ্ডিপেন্ডেন্ট পার্টি ভেঙে দিয়ে মুসলিম লীগের সর্বময় নেতা হলেন ও নিজের হিন্দু ও পার্শী সহকর্মীদের ত্যাগ করলেন সে এক রহস্য। তা বলে যে তিনি সরকারের ধামা ধরলেন তাও নয়। প্রাদেশিক মন্ত্রীমণ্ডলী গঠনের সময় মাইনরিটির প্রতিনিধিদেরও আসন দিতে হবে, এটাই শাসনতন্ত্রের নির্দেশ। কংগ্রেস এ নির্দেশ পালন করেছে নিজের দলের মুসলিম সদস্যদের দিয়ে। তার আগে তাঁদের স্বতন্ত্র মুসলিম নির্বাচন কেন্দ্র থেকে জিতিয়ে দিয়েছে। জিন্নার দলের মুসলিম সদস্যরা মন্ত্রী হতে পারেননি, বহু কেন্দ্রে জিততেও পারেননি। বোম্বাই শহরে তাঁর বাস, অথচ বোম্বাই প্রদেশের মন্ত্রীমণ্ডলীতে তাঁর দলের লোক নেই। এ দুঃখ কি ভোলা যায়? তাঁর মতে এটা কংগ্রেসের মহা অপরাধ। এ অপরাধ কি ক্ষমা করা যায়? তাঁর লক্ষ্য দ্বিতীয় এক কংগ্রেস-লীগ চুক্তি। যে চুক্তির জোরে মুসলিম মন্ত্রীদের মনোনয়ন করবে মুসলিম লীগ, লীগপন্থীদের স্বতন্ত্র মুসলিম নির্বাচন কেন্দ্রে জিতিয়ে দেবে মুসলিম লীগ। কংগ্রেসপন্থী মুসলিমরা সরে দাঁড়াবেন। সেই লক্ষ্যে তিনি অটল। কিন্তু এর দ্বারা প্রমাণ হয় না যে তিনি কংগ্রেসের শত্রু বা ইংরেজের মিত্র। এই পর্যন্ত বলা যায় যে তিনি বিশেষ বিশেষ পরিস্থিতিতে কখনো কংগ্রেসের পক্ষ সমর্থন করবেন, কখনো ইংরেজের পক্ষ। তিনি ইণ্ডিপেন্ডেন্ট।” মানস যতদূর জানে।

“আহা, সেইখানেই তো কাঁটা! দেশ যখন দুই শিবিরে বিভক্ত তখন কংগ্রেসের শিবির আর ইংরেজের শিবির এর মাঝামাঝি বা এর বাইরে তৃতীয় একটা শিবির মেনে নেওয়া যায় কি? ইংরেজরাও কি মেনে নেবে? এই যুদ্ধে ইংরেজের পক্ষ না নিলে বাংলাদেশের মন্ত্রীমণ্ডলীতে লীগ সদস্যদের কারো আসন পাকা নয়। জিন্মা ধরে নিয়েছেন যে কংগ্রেস তার অসহযোগের প্রতিজ্ঞা বরাবরের মতো ভুলে গেছে। তা নয়। কংগ্রেস আইনসভা দখল করেছে আর-কাউকে দখল করতে না দিতে। কংগ্রেস মন্ত্রিত্ব নিয়েছে আর-কাউকে মন্ত্রী হতে না দিতে। কংগ্রেস যদি যুদ্ধে মতভেদের দরুন মন্ত্রিত্ব বর্জন করে তা হলেও আর কোনো দল মন্ত্রিত্ব করতে পারবে না, কারণ আর-কোনো দলেরও সংখ্যাগরিষ্ঠতা নেই। এ পলিসি কি জিন্মা সাহেব মেনে নিতে রাজী হবেন? তাঁর শিবিরটি তো সঙ্কটের মুহূর্তে ইংরেজের পক্ষে, কংগ্রেসের বিপক্ষে। কংগ্রেস তা হলে কেমন করে তাঁর সঙ্গে চুক্তি করবে? তা ছাড়া তাঁর দাবীরও কি অন্ত আছে? মন্ত্রীমণ্ডলীতে তিনি চাইবেন ওয়েটেজ। তিনি চাইবেন সব চেয়ে গুরুত্বপূর্ণ পদ। ইংরেজদের সঙ্গে যাদের গাঁটছড়া বাঁধা

তেমন সব নাইট ও নবাবকে কি কংগ্রেস ট্রয়ের ঘোড়ার মতো দুর্গের ভিতর ঢুকতে দেবে ? তা হলে হিন্দু মডারেটরা কী দোষ করলেন ?” সৌম্য তর্ক করে।

মানস হাল ছেড়ে দিয়ে বলে, “জিন্নাকে বাদ দিয়ে গাশনাল গভর্নমেন্ট হতে পারে না, সৌম্যদা। যদি হয় তবে নির্ধাত গৃহযুদ্ধ। গৃহযুদ্ধে যদি কংগ্রেসের কুচি না থাকে তবে একভাবে না একভাবে আপস করতেই হবে। জিন্নার সঙ্গেও, ইংরেজের সঙ্গেও। শেষ তাসটা মুসলিম মাইনরিটির হাতেই।”

সৌম্য ব্যথিত স্বরে বলে, “মুসলিম মাইনরিটি মানে কি মুসলিম লীগ ? তার হাতেই শেষ তাস মানে কি মুসলিম লীগেব হাতেই ভীটো ? কিংবা তার মিতা বড়লাটের হাতেই ভীটো ? তা হলে তো আমাদের সংগ্রাম এ শতাব্দীতে শেষ হবে না। আমবা চাই নিখাদ স্বাধীনতা। তার সঙ্গে খাদ মেশালে তো খোদ ইংরেজদের সঙ্গেই আপস হতে পারত। অসহযোগ আন্দোলনের বা আইন অমান্যের দরকারটা কী ছিল ? মহাত্মা একদিন মুসলিম নেতাদের সঙ্গে কথাবর্তায় নাজেহাল হয়ে বলেন, এঁদের সঙ্গে মিটমাটের চেয়ে ইংরেজদের সঙ্গে মিটমাটে পৌছনো আরো সহজ। হিন্দু মুসলমানের একতা মহাত্মার চেয়ে কে বেশী চায় ? কিন্তু তার অর্থ কি এই যে প্রত্যেকটি মাইনরিটিকে প্রাপ্যের অতিরিক্ত ওয়েটেজ দিয়ে মেজরিটি তার নিজের প্রাপ্য থেকে বঞ্চিত হবে ? তেমন গভর্নমেন্ট চালানোর দায়িত্ব নেবার চেয়ে অপোজিশনে থাকার ও সত্যগ্রহ চালাবার সিদ্ধান্ত অধিক শ্রেয়। আপস করতে হয় কংগ্রেস করতে পারে, কিন্তু গান্ধীজী কখনো না। তাঁর লক্ষ্য নিখাদ স্বাধীনতা। তাই তিনি কারো সঙ্গে কোনো রকম শর্তে রাজী হবেন না। কংগ্রেস নেতারা হয়তো বড়ো বড়ো পদেব টোপ গিলতে হাঁ করে বঁড়শীর কাঁটাও গিলবেন, গান্ধীজীর কিন্তু তেমন কোনো উচ্চাভিলাষ নেই। নিজের জন্তে তিনি রাজস্বমতাও চান না। তাঁকে গৃহযুদ্ধের ভয় দেখিয়ে তাঁর কাছ থেকে কিছু আদায় করা যাবে না। উচ্চতম পদের লোভ দেখিয়ে তো নয়ই।”

মানস চিন্তাধ্বিত হয়ে বলে, “কিন্তু এটা তো তাঁকে স্বীকার করতে হবে যে একদিন না একদিন দেশের নেতাদের উপরেই দেশের শাসন পরিচালনার দায় বর্তাবে। ইংরেজরাও এটা স্বীকার করে। তবে ব্যালাল অব পাওয়ার হাতে রাখতে চায়। কংগ্রেসের সঙ্গে ব্যালাল রক্ষার জন্তেই মুসলিম লীগের সৃষ্টি। কংগ্রেসকে একভাগ দিলে মুসলিম লীগকেও একভাগ দিতে হয়। একপ্রকার না একপ্রকার কমিউনাল অ্যাওয়ার্ড হচ্ছে ওদের বেসিক পলিসি। আর লীগপন্থী মুসলমানরাও এটা উত্তমরূপে বোঝেন যে তাঁদের স্বার্থ ইংরেজদের হাতেই নিরাপদ। এখন কথা হচ্ছে তাঁরাই কি

মুসলিম মাইনরিটির একমাত্র প্রতিনিধি ? এটা নির্ভর করছে মুসলমান সম্প্রদায়ের অধিকাংশের ভোটের উপরে। আবার যখন সাধারণ নির্বাচন হবে তখন মুসলিম লীগ প্রত্যেকটি আসন জিতে নিতে পারে। তখন কংগ্রেসের মন্ত্রীমণ্ডলীতে একজনও মুসলিম মন্ত্রী থাকবেন না। কেন্দ্রেও এ রকম হতে পারে। সেখানেও কংগ্রেস মন্ত্রীমণ্ডলী বলতে বোঝাবে মুসলিম মাইনরিটিবর্জিত মন্ত্রীমণ্ডলী। তার হাতে ক্ষমতা সম্প্রদান করলে সেটা হয়তো নিখাদ স্বাধীনতা হবে, কিন্তু যার পেছনে মুসলিম ভোট নেই একা মোলানা আজাদের কল্যাণে সেটা হিন্দু মুসলমানের যৌথ মন্ত্রীমণ্ডলী হবে না। সেদিন জিন্নার গুরুত্ব আজাদের চেয়ে বেশী। জিন্না বিমুখ হলে মুসলিম মাইনরিটি বিমুখ হবে। মুসলিম মাইনরিটি বিমুখ হলে সংঘর্ষ বেধে যাবে। মুসলিম সৈন্যদলও আসরে নামতে পারে। ইংরেজ না থাকলে কংগ্রেস একা এত বড়ো একটা দেশকে সামলাতে পারবে কি ? আর ইংরেজ যদি কংগ্রেসকে মদত দেয় তবে সে কি তার মাশুল আদায় করে নেবে না ? মাশুলটা লীগের জন্তে একভাগ।”

“তুমি ভুলে যাচ্ছ যে গান্ধীজীর হাতেও আছে আরো একখানা তাস। কংগ্রেসকে তিনি পরামর্শ দেবেন পদত্যাগ করতে। ইংরেজ যদি একা সামলাতে পারে তবে সেই ভালো। যদি লীগকে মশনদে বসিয়ে দিয়ে তাকে মদত দেয় সেও ভালো। কংগ্রেসকে হতে হবে সর্বপ্রকার শক্তি জোটের চেয়ে আরো শক্তিমান। দারুণ এক অগ্নিপরীক্ষার ভিতর দিয়ে যেতে হবে ভারতীয় জাতীয়তাবাদীদের সবাইকে। তাদের মধ্যে উত্তর-পশ্চিম সীমান্ত প্রদেশের মুসলমানরাও থাকবে। কংগ্রেসকে ওরা ছাড়বে না। কংগ্রেসও ওদের ছাড়বে না। ওরা ছাড়পত্র না দিলে লীগ নেতাদের সঙ্গে কংগ্রেস নেতাদের নিষ্পত্তি হবে না। তখন ইংরেজদের দেখতে হবে ভারতের সঙ্গে ব্রিটেনের নিষ্পত্তি হবে কেমন করে। সেদিন গান্ধীজীর সঙ্গেই বড়লাটের চুক্তি। আর-একটা গান্ধী আরউইন প্যাক্ট।” সৌম্য নিঃসংশয়।

“আর-একটা গান্ধী-আরউইন প্যাক্ট ইংরেজরাও হতে দেবে না, মুসলিম লীগপন্থীরাও না। উভয়েরই পূর্ব শর্ত আর-একটা কংগ্রেস-লীগ চুক্তি। তার মানে গান্ধী-জিন্না চুক্তি। তবে তার সঙ্গে আরো একটা শর্ত রয়েছে। যুদ্ধে সহযোগিতা।” মানস জানায়।

“তা হলে কাজ নেই অমন চুক্তিতে। দৈত্যের সঙ্গে বামনের চুক্তির গল্প মনে আছে ? যুদ্ধ করতে বেরিয়ে দৈত্যের একখানা হাত কাটা পড়ে তো বামনের হুঁখানা হাতই। দৈত্যের একটা পা কাটা পড়ে তো বামনের হুঁহুটো পা-ই। যুদ্ধে হার হবে না, জিৎ হবে, কিন্তু ইংরেজের এই বাড়-বাড়ন্ত থাকবে না, ভারত তো আরো কাঁড়াল



হবে। অমনধারা চুক্তি না করাই ভালো। বড়লাটের সঙ্গে যদি চুক্তি না হয় জিন্না সাহেবের সঙ্গে চুক্তি কেন? কে না জানে তাঁর মনের অভিপ্রায়? তিনি চান প্রত্যেকটি প্রদেশে কোয়ালিশন, অথচ সংগ্রামের দিন কংগ্রেসের সঙ্গে কাঁধে কাঁধ মিলিয়ে লড়াইবেন না। সংগ্রামের দিন তিনি ইংরেজের সঙ্গে সম্পর্ক অটুট রাখবেন। দেশের স্বার্থে নয়, মুসলমানের স্বার্থে। যেন মুসলমানের স্বার্থ ইংরেজের হাতেই নিরাপদ।” সৌম্য বিশ্বাস করে না।

“তুমি তো মুসলিম অফিসার শ্রেণীর সঙ্গে মেশো না। মিশলে বুঝতে ওঁরা এখন কোন্ লাইনে ভাবছেন। ইংরেজ যে চিরদিন থাকবে না এটা ওঁরা এতদিনে উপলব্ধি করেছেন। এক্ষুণ্ড কংগ্রেস যে ইংরেজের শৃঙ্খান একাই পূর্ণ করবে এটা তাঁদের কাছে আনন্দের না হয়ে আতঙ্কের বিষয়। গান্ধীজীকে তারা শ্রদ্ধা করেন, কিন্তু নিবপক্ষ মনে করেন না। তাঁদের দৃষ্টিতে গান্ধীজী হিন্দু পুনরুজ্জীবনের প্রতীক। তাঁর অহিংসাও হিন্দুর স্বকায় সাধনা। তাঁর জাতীয়তাবাদও হিন্দু জাতীয়তাবাদ। তাঁর গণতন্ত্রও হিন্দু সংখ্যাগরিষ্ঠতা। সুতরাং মুসলমানকে তার স্বতন্ত্র নৈয়তির সন্ধান করতে হবে। সম্ভব হলে ভারতের ভিতরে। নয়তো ভারতের বাইরে। অর্থাৎ যে ভারত হিন্দুপ্রধান সে ভারতের বাইরে।” মানস স্থষ্টি করে।

‘অর্থাৎ পার্কেসানে।’ সৌম্য আরো খোলসা করে। “তোমার অফিসার বন্ধুদের সঙ্গে না মিশলেও লীগপন্থা মুসলমানদের সঙ্গেও তো আমি মিশি। তাঁদের মধ্যেও আমার খেলাফতী দোস্ত আছেন। একসঙ্গে জেলও খেটেছি আমরা। কেমন করে যে তাবা খেলাফত। থেকে পার্কেসানী হলেন সে এক ঘোরালো ইতিহাস। আসলে ওটা প্যান-ইসলামিজমের অধুনাতন প্রকাশ। ইসলাম যৌদিন ভারতে এসেছে সেইদিন থেকেই সেই শ্রোতাও প্রবহমান। মুসলমানের স্বার্থ ও ভারতের স্বার্থ এক ও অভিন্ন নয়, মুসলমানের স্বার্থ ও বিশ্ব-মুসলিমের স্বার্থ এক ও অভিন্ন। খেলাফৎ আন্দোলনের সময় আমরাও এটা মেনে নিয়েছিলুম। নয়তো ওঁরা আমাদের স্বরাজের আন্দোলনে যোগ দিতেন না। দুই আন্দোলন জুড়ে গিয়ে যুগ্ম আন্দোলন হয়। পরে তুরস্ক থেকেই খেলাফতের উচ্ছেদ ঘটে। খেলাফৎ আন্দোলন বিফল হয়। স্বরাজ আন্দোলন থেকে ওঁরাও সরে যান। ব্যতিক্রম মোলানা আজাদ ও বাদশা খান। এখন খেলাফতের মানসিকতা রূপ নিয়েছে স্বতন্ত্র মুসলিম বাসভূমিতে। জিন্না এটা চাননি। তিনি খেলাফতী ছিলেন না। তিনি চান হিন্দু মুসলমানের দ্বৈত শাসন। কেউ গরিষ্ঠ নয়, কেউ লঘিষ্ঠ নয়। কংগ্রেস যদি এতে রাজী হয় তো তিনি স্বতন্ত্র রাষ্ট্র চাইবেন না। নয়তো চাইবেন। কিন্তু সব দাবী

মেনে নিলেও তিনি ইংরেজের বিরুদ্ধে সংগ্রামে যোগ দেবেন না। ইংরেজই তাঁর শেষ ভরসা। হিন্দুদের বিশ্বাস কী? ওরা কেড়ে নিতেও পারে। ঠকাতেও পারে।” সৌম্য আক্ষেপ করে।

“এর মূল কোথায়, জানো? সিপাই বিদ্রোহে। হিন্দু দৈত্য আর মুসলিম বামন মিলে যে লড়াইটা কবে তার ফলে হিন্দুর কম ক্ষতি, মুসলমানের সর্বনাশ। তার বাদশাহী যায়। তার তালুক মূলুক ইংরেজরা বাজেয়াপ্ত করে ও রাজভক্ত হিন্দুদের দেয়। তখন থেকেই মুসলমানদের মনে বন্ধমূল অবিশ্বাস। একমাত্র গান্ধাজীকেই ওরা বিশ্বাস করেছিল। এখন তাঁকেও বিশ্বাস করে না। সেইজন্তে ওদের দাবা দিনকের দিন বাড়ছে। মেটাবে কে? ওই গান্ধাজী। যদি তিনি না মেটান তবে মেটাবে ইংরেজ।” মানস আফসোস করে।

সৌম্য ব্যথা বোধ করে। “মুসলমানরা একদা ভারত জয় করেছিল, সেই থেকে তাদের সকলের না হোক অনেকেরই ধারণা হিন্দুরা চিরদিন দুর্বল, দুর্বল বলেই গ্রহিণীসার বুলি আড়ায়, গণতন্ত্রের খেলা খেলে। একরূপ ধারণা হিন্দুদেরও অনেকের আছে। দুই দিকেই বলপরাক্ষার জন্তে অর্থহান ব্যাকুলতা। মেরে কেটে মেজরিটিকে কোনাধন মাইনারিটি করা যাবে না। অথবা মাইনারিটিকে কোনাধিন নিমূল করা যাবে না। মিলে মিশেই থাকতে হবে। বিবাদের বিষয়গুলো আপসে মিটিয়ে নিতে হবে। যেকালে মুসলমান ছিল না, হিন্দুই কেবল ছিল, সেকালে কি বিবাদ বিসংবাদ ছিল না? সব মুসলমানকে বিদায় করলেও বিবাদ বিসংবাদ থাকবে। তেমনি, মুসলমানের হাতে যখন রাজ্যভার ছিল তখন কি মুসলমানে মুসলমানে হানাহানি ছিল না! নবাব বাদশাদের কি হিন্দুর সাহায্য নিতে হয়নি? ইকনমিক পাওয়ার ছিল হিন্দু ব্যবসায়ী, মহাজন, জমিদারদের হাতেই। হিন্দুরাই করত রাজস্ব আদায়। সব হিন্দুকে বিদায় করলেও মুসলমানে মুসলমানে মারামারি থাকবেই। নতুন যোগলরাও পুরনো যোগলদের মতো রাজসিংহাসনের জন্তে লড়তে লড়তে সর্বনাশ ডেকে আনবেন। বাহরে থেকে আসবে একদল বিদেশী বণিক। তারাই নতুন এক পলাশীর যুদ্ধে জিতবে। হিন্দুরা যে মেজরিটি হয়েছে এটার জন্তে দায়ী ইতিহাস। ইতিহাসকে উলটিয়ে দেবার সাধ্য আছে কার! সেইজন্তে ভূগোলকে পালাটিয়ে দেবার কথা উঠেছে! ভারতের একটা অংশ কেটে নিয়ে তাকেই বানাতে হবে মুসলমানের বাসভূমি। যেন সমস্তটাই তার বাসভূমি নয়। সে যেন আর-সব জায়গার বিদেশী। এতে রাজী হলে আমাদেরও বনতে হবে বাংলাদেশে বিদেশী। কলমের এক খোঁচায় কোটি কোটি মানুষ হবে নিজ বাসভূমে পরবাসী। কত বড় অত্যাচার বলা দেখি।

এই মূল্য না দিলে নাকি একদিন গৃহযুদ্ধ বেধে যাবে। আমরা এখন তার জন্তে তৈরি হতে পারছিনে, কারণ স্বাধীনতার সংগ্রাম এখনো শেষ হয়নি, সমগ্র শক্তি ব্রিটিশ রাজের বিরুদ্ধেই নিয়োগ করতে হবে। আগে তো এই অধ্যায় সারা হোক। তার পরে মুসলিম স্বাভাব্যবাদের সঙ্গে ভারতীয় জাতীয়তাবাদের বলপরীক্ষার অধ্যায়। অর্ধেক মুসলমান আমাদের দিকেই থাকবে। তাদের উপর আমরা হিন্দু রাজত্ব চাপাব না। মুসলিম লীগ বল সংগ্রহ করবে কোন্ উৎস থেকে? ওই ইংরেজ শাসকদের কাছ থেকেই। মুসলিম মিতাদের ক্ষমতাব এক ভাগ পাইয়ে না দিয়ে ওরা শাস্তিপূর্ণভাবে ক্ষমতার হস্তান্তর করবে না। আর শাস্তিপূর্ণ হস্তান্তরই হলো কংগ্রেস নেতাদের লক্ষ্য। ইংরেজের মিতাদের দেওয়া মানে ইংরেজকেই পরোক্ষ দেওয়া। তা হলে আর স্বাধীনতা হলো কী করে?”

“তা হলে শাস্তিপূর্ণ হস্তান্তরের লক্ষ্য ত্যাগ করতে হয়। তার পরিবর্তে লক্ষ্য হবে বৈপ্লবিক পরিস্থিতির সুযোগ নিয়ে ক্ষমতার আসন অধিকার। গান্ধী নেতৃত্বে এটা সম্ভব নয়। সেইজন্তে নেতাবদলের প্রবল উঠেছে। এ প্রবলের উত্তর সুভাষচন্দ্র। জবাহরলালের ভিতরে একটা দোনোমনো ভাব আছে। তিনি বিপ্লবী নায়ক নন। কে জানে ইতিহাস কোন্ অভিমুখে যাচ্ছে? শাস্তিপূর্ণ হস্তান্তরের না বৈপ্লবিক ক্ষমতা অধিকারের? কিন্তু হিন্দু প্রভুত্ব হলে মুসলিম বিদ্রোহকে তুমি এড়াতে কী করে? তার সঙ্গে যদি যোগ দেয় মিউটিনি? কতকগুলো প্রদেশ বা অঞ্চল ওরা ক্যাপচার করবেই। গৃহযুদ্ধ এড়াতে হলে চাই হিন্দু মুসলিম বৈত প্রভুত্ব। সেইটাই বা কেমন করে সম্ভব? ইংরেজকে বিদায় করার আগে দশবার ভাবতে হবে বিকল্প রাজত্বের কথা। চাকের উপর সেটা ছেড়ে দেওয়া যায় না। কমিউনিস্টরাও ষোপ বুঝে কোপ মারতে পারে। বিপ্লবের থিয়োরি ওদের মুখস্থ। কৃষক, শ্রমিক ও সৈনিকদের মধ্যে ওদের কর্মীরা সক্রিয়। আপাতত সুভাষচন্দ্রকে তুলে ধরলেও ওরা পরে নিজেদের লোককে গদীতে বসাবে। ওদের দলে মুসলমানও আছেন। তাঁদের বসিয়ে মুসলমানদেরও মন পাবে।” মানস যেন সবজান্তা।

সৌম্য একপ্রকার যন্ত্রণা বোধ করে। “তাই মানস, আমরা বুঝি শুধু একটি কথা। স্বরাজ। আমাদের শুধু একটি লক্ষ্য। সারা ভারতের সার্বজনীন মুক্তি। আমাদের শুধু একটি পন্থা। অহিংস অসহযোগ। যার চরম পর্যায় গণসত্যাগ্রহ। এর কোনো শট কাট নেই। লক্ষ্যের মধ্যপথে প্রাদেশিক স্বায়ত্তশাসনে পৌছতেই আমাদের সতেরো বছর লেগে গেল। তা হলে হিসেব করে দেখতে পারো পূর্ণ স্বাধীনতায় পৌছতে কতকাল লাগবে। আরো সতেরো বছর লাগলেও আশ্চর্য হবার

কিছু নেই। গান্ধীজীরাই তো সব চেয়ে অধীর হবার কথা। কারণ তাঁরই বয়স সকলের চেয়ে বেশী। সত্তর বছর। বাইবেলে লিখেছে সত্তর বছরই মানুষের পরমায়ু। ইতিমধ্যেই তিনি কংগ্রেস থেকে নাম কাটিয়ে নিয়েছেন। তাঁর উপর যাদের আস্থা নেই তাঁরা ইচ্ছা করলেই অস্ত্র পন্থা গ্রহণ করতে পারেন। অস্ত্র নেতা বরণ করতে পারেন। তিনি তাঁর সঙ্গী বেছে নিয়ে সজ্ঞ গঠন করবেন। কেন তা হলে তাঁকে নিয়ে দুই দলের টাগ অভ ওয়ার? কেন একদল তাঁকেই পাঠাচ্ছেন ব্রিটিশ রাজপ্রতিনিধির সঙ্গে কথাবার্তা চালাতে? যাতে আর এক-দফা সংগ্রাম নিবারণিত হয়, জেলে যেতে না হয়, প্রাণ বিপন্ন করতে না হয়। জমি বাজেয়াপ্ত করা না হয়। সম্পত্তি ক্রোক করা না হয়। জরিমানায় সর্বস্বান্ত হতে না হয়। তাও যদি নিশ্চিত জানতেন যে জনগণ তাঁদের এই সংগ্রামে সবাই মিলে ঝাঁপ দেবে। নিয়মিত কুচকাওয়াজ না করে কোনো দেশের সৈন্যদল যুদ্ধে ঝাঁপ দেয় কি? লেনিনের বোলশেভিকরাও কি ১৯০৫ সালের বিপ্লবে সফল হয়েছিলেন? বারো বছর তাঁকে বিদেশে অজ্ঞাতবাস করতে হয়েছিল। বিপ্লব যখন ঘটে তখন ১৯১৭ সালের ফেব্রুয়ারিতে স্বতঃস্ফূর্তভাবেই ঘটে। লেনিনের জন্তে বা দলের জন্তে অপেক্ষা করে না। দেশে ফিরে অক্টোবর মাসে তিনি জারের বিরুদ্ধে নয়, মেনশেভিকদের বিরুদ্ধে দ্বিতীয় বিপ্লব ঘটান। আমাদের বামপন্থীরা বিপ্লবের জন্তে অধীর। কিন্তু সেই ভুলটি তাঁরা করবেন ১৯০৫ সালে লেনিনপন্থীরা যেটি করেছিলেন। কমসে কম বারোটি বছর নির্বাসনে কাটাতে হবে। ইতিমধ্যে স্বতঃস্ফূর্তভাবে একদিন বিপ্লব ঘটে যাওয়া বিচিত্র নয়। দেশে ফিরে এসে তাঁরা দ্বিতীয় বিপ্লব ঘটাতে চাইবেন। সেটা নাও ঘটতে পারে। ক্ষমতার আসন জুড়ে যারা বসে থাকবেন তাঁরা মেনশেভিকদের চেয়ে আরো হুঁশিয়ার হয়ে থাকতে পারেন। ইতিহাসে রুশবিপ্লবের পুনরাবৃত্তি হবার নয়। সেটাও ফরাসী বিপ্লবের পুনরাবৃত্তি নয়। ইতিহাস আমাদের উপর ভার দিয়েছে নতুন এক পরীক্ষার। সেটা যুদ্ধের তথা বিপ্লবের নৈতিক বিকল্প আবিষ্কারের। যাকে বলে মরাল ইকুইভালেন্ট। আমরা অস্ত্রের পুনরাবৃত্তি করব না, নিজেরাই নজীর রেখে যাব। বহু দেশ আমাদের দিকে একদৃষ্টে তাকিয়ে রয়েছে। গান্ধীজীর কাছে পাঁচ মহাদেশ থেকে চিঠি আসে। মরাল ম্যান ইন্ অ্যান ইমমরাল ওয়াল্ড। অথচ তাঁর সঙ্গে ক'জন আছেন? তাঁদের পাঁচ আঙুলে গোনা যায়। বাপু আমাকে ডেকেছেন। যাচ্ছি দেখা করতে। ফেরার পর তোমার এখানে আসব।”

“সৌম্যদা”, মানস ধরা গলায় বলে, “গান্ধীজীকে আমার বিনয় প্রণাম জানিয়ে শুধু এই কথাটি বোলো যে ব্রিটিশ শাসন যদি তাঁর মতে একটা ইভিল হয়ে থাকে

তবে তার চেয়ে শতগুণ ইভিল নাংসী ডিকটেক্টরশিপ, যেটা অবশ্যম্ভাবী, এই যুদ্ধে যদি ইংরেজ হারে, হিটলার জেতে। এই পরিশ্রেক্ষিতে ভারত স্বাধীন হবে এটা আদর্শ-বাদীদের স্বপ্ন হতে পারে, বাস্তববাদীদের কাণ্ডজ্ঞান নয়। তিনি আমাদেরও বাপু। আমরাও চরকা কাটি, খন্দর পরি, হিন্দু মুসলমানের মৈত্রীর জন্তে যথাসাধ্য করি, বাড়ীতে মুসলমান খানসামা, মগ বাবুচি। নিরামিষ থাই, মদিরা স্পর্শ করিনে, সত্যে মতি আছে, সাধ্যমতো অহিংসাও মানি, কিন্তু ব্রহ্মচর্য! এই ভরা যৌবনে? শিরসি যা লিখ, মা লিখ, চতুরানন।

হুই বন্ধুতে মিলে হাসাহাসি করে। মজা দেখতে বাচ্চারা ছুটে আসে। তারাও হালে

## ॥ দশ ॥

চায়ের টেবিল থেকে যুথিকার ডাক আসে। ছই বন্ধুতে আবার তর্ক কবতে করতে খাবার ঘরে যায়। যুথিকাও তাদের কথাবার্তায় যোগ দেয়।

“আচ্ছা, সৌম্যদা,” যুথিকা বলে, “সমুদ্রমহানে কি শুধু অমৃত উঠেছিল? গরলও কি ওঠেনি? একরত্তি ক্ষমতা হাতে আসতে না আসতেই অমনি বেধে গেছে অন্তর্বিবাদ। কৃষক প্রজা দলের সঙ্গে মুসলিম লীগের, মুসলিম লীগের সঙ্গে কংগ্রেসের, কংগ্রেসের ডান হাতের সঙ্গে বাঁ হাতের, ওয়ার্কিং কমিটির সঙ্গে প্রেসিডেন্টের। এর পরে যখন কেন্দ্রেও ক্ষমতা আসবে তখন কি বাধবে না মিলিটারির সঙ্গে সিভিলের, দেশীয় রাজ্যের সঙ্গে প্রাক্তন ব্রিটিশ ভারতের, বাংলার সঙ্গে বিহারের, গুজরাটের সঙ্গে মহারাষ্ট্রের, তামিলের সঙ্গে তেলুগুর, হিন্দীর সঙ্গে উর্দুর, মুসলমানের সঙ্গে হিন্দুর? অমৃতের সঙ্গে সঙ্গে গরলও উঠে আসবে। সে গরল পান করবেন কে? নীলকণ্ঠ হবেন কে? কেউ যদি সে গরল পান না করেন তবে সারা দেশ জলে পুড়ে থাক হয়ে যাবে।”

সৌম্য চায়ের পেয়ালা সরিয়ে রাখে। কী উত্তর দেবে স্থির হয়ে ভাবে। তার পর বলে, “সব ঠিক, কিন্তু স্বাধীনতার পথে এতদূর এগিয়ে এসে চলার মোমেন্টাম থামাই কেমন করে? আমাদের নিয়তি আমাদের পেছন থেকে ঠেলে নিয়ে চলেছে। বিবাদ তো আগে থেকে মেটানো যায় না। বিয়ের আগে কি দাম্পত্য কলহ মেটানো যায়? গান্ধীজীকে তো কাছে থেকে দেখেছি। তাঁর বৃকে সমস্তক্ষণ স্বাধীনতার আগুন জলছে। সঙ্গে সঙ্গে বইছে ব্রাহ্মস্বেহের অমৃতধারা। মুসলমান, খ্রীষ্টান সকলেই তাঁর ভাই। এমন কি ইংরেজও পর নয়। অ্যাণ্ড্রুজকে আর মীরাবেনকে তিনি কত ভালোবাসেন। আমাদের সংগ্রাম যদি অহিংসভাবে সারা হয়,

আমাদের জয় যদি অহিংসার জয় হয়, তবে অমৃতবটনের একটা অহিংস পদ্ধতি পাওয়া যাবেই। আমরাই আমাদের ভাগ খেছায় ত্যাগ করব। তবে তার আগে নিশ্চিত হব যে স্বদেশের স্বার্থই সকলের উপরে। সম্প্রদায়ের স্বার্থ নয় বা প্রদেশের স্বার্থ নয় বা শ্রেণীর স্বার্থ নয়। বিদেশের স্বার্থ তো নয়ই।”

মানস হেসে বলে, “একেই বলে কাউন্সেল অভ পারফেকশন। প্রথমেই ধরে নিয়েছ যে অহিংসার জয় হবে। তার পরে ধরে নিয়েছ যে কংগ্রেসের ভাগ কংগ্রেস খেছায় ত্যাগ করবে। তার পরে ধরে নিয়েছ যে স্বদেশের জন্তে যারা বিন্দুমাত্র ত্যাগ স্বীকার করেনি তারা স্বদেশের স্বার্থকে সম্প্রদায়ের বা প্রদেশের স্বার্থের উপরে স্থান দেবে। তোমরা গ্রাশনালিস্ট বলে কি সবাই গ্রাশনালিস্ট? তোমরা অহিংস বলে কি সবাই অহিংস?”

“আমরাও কি অহিংস?” সৌম্য হেসে বলে, “আমাদের ক’জন অহিংস তা আঙুলে গোনা যায়। সেই ক’জনকে নিয়ে গান্ধী সেবাসভ্য গড়তে গিয়ে দেখেছি তাতেও ভেজাল ঢুকেছে। না, ভাই, আমরা অহিংস নই, তবে আমরা আমাদের কর্মপদ্ধতি থেকে হিংসা প্রতিহিংসা বাদ দিয়েছি। আর গ্রাশনালিস্ট বলতে আমরা এইটুকু বুঝি যে আমরা সকলেই পরাধীন ও আমাদের জন্মভূমি যে ভারতবর্ষ সে দেশও পরাধীন। পরাধীনতা একটা ইভিল। তার বিরুদ্ধে লড়াইতে হবে। কিন্তু সেই জাতীয়তাবোধ কোথায় যা আমাদের একত্বকে বাঁধবে? পরাধীনতার বন্ধনই হয়েছে একমাত্র শত্রু। বন্ধন খুলে গেলে আমরা মুক্ত হব ঠিকই, কিন্তু মুক্ত হওয়া আর মুক্ত হওয়া কি এক? ঐক্যের সাধনাও স্বাধীনতার সাধনার মতো একটা অবশ্যকরণীয় সাধনা। কিন্তু আমরা ব্রাহ্মণ শত্রু, হিন্দু মুসলমান, বাঙালী বিহারী প্রভৃতি বিভেদ সত্ত্বে যেমন সচেতন ভারতীয়ত্ব সত্ত্বে তেমন সচেতন নই। ইংরেজ চলে গেলে জাতীয়তাবাদ কতদূর পজিটিভ আর কতদূর নেগেটিভ তার পরীক্ষার সময় আসবে। আশ্চর্য হব না যদি দেশটা তুর্কদের অপসারণের পর বলকান হয়ে ওঠে। বলকান দেশগুলোও স্বাধীন, কিন্তু তাদের রাষ্ট্র এক নয়, কেন্দ্র এক নয়, পলিসি এক নয়, বাণিজ্য এক নয়। সেটা কি ভালো? না মন্দ?”

“তা হলে, সৌম্যদা, তুমি নিজেই স্বীকার করলে যে সেটা মন্দ। ইংরেজরা; আর কিছু না করুক এ দেশে একটা ঐক্যবদ্ধ রাষ্ট্র গঠন করেছে। ইণ্ডিয়ান আর্মি, ইণ্ডিয়ান সিভিল সার্ভিস, ইণ্ডিয়ান পুলিশ, ইণ্ডিয়ান এডুকেশন সার্ভিস, ইণ্ডিয়ান অর্ডিট অ্যান্ড অ্যাকাউন্টস থেকে শুরু করে ইণ্ডিয়ান রেলওয়েজ, ইণ্ডিয়ান পোস্টস অ্যান্ড টেলিগ্রাফস প্রভৃতি ভারতকে এমন এক সংহতি দিয়েছে যা আমরা নিজেরা

গড়ে তুলতে পারতুম বলে মনে হয় না। ওরা হয়তো সেটা নিজের জন্তেই করেছে, কিন্তু আমরাও কি তার থেকে উপকৃত হচ্ছিনে? ওদের তৈরি কাঠামো যদি ওদের অবর্তমানে ভেঙে খান্ খান্ হয়ে যায় তা হলে আমরা কি সেই টুকরোগুলোকে জুড়ে জুড়ে একাকার করতে পারব? তেমন সামর্থ্য, তেমন শব্দবুদ্ধি, তেমন সম্ভাব কি আমাদের বিভিন্ন সম্প্রদায় ও বিভিন্ন ভাষাগোষ্ঠীর আছে? ক্ষমতা হাতে পেলে যে যার নিজের রাজত্ব স্থাপন করবে। তার খানিকটে কেটে নিয়ে স্বেচ্ছায় কেন্দ্রীয় সরকারকে দেবে না। কেন্দ্রকেই সেটা জোর করে কেটে নিতে হবে। গণতন্ত্রের বিচারে ওটা হয়তো ক্ষমতার কেন্দ্রীকরণ। কিন্তু জাতীয়তাবাদের দিক থেকে ওটা অত্যাবশ্যক। মুশকিল হচ্ছে এইখানে যে মোলানা আজাদকে মোসলেম ভারত আপনাদের বলে গ্রহণ করছে না ও করবে না। মোসলেম ভারতের আত্মগত্য চাইলে আজাদের জায়গায় জিন্নাকে নিতে হবে। নইলে কংগ্রেস হাই কমান্ড কেন্দ্রীয় হাই কমান্ড হতে পারবে না। কেন্দ্রকে কন্ট্রোল করতে পারবে না। ইংরেজ শাসনের শৃঙ্খতা বহু পরিমাণে পূরণ করতে পারবে, কিন্তু সম্পূর্ণভাবে নয়। সত্যগ্রহ তখন কোন্ কাজে লাগবে?” মানস সংশয় প্রকাশ করে।

“কংগ্রেস হাই কমান্ড একটা পার্টি হাই কমান্ড। তাতে জিন্নার স্থান হবে কী করে? তিনি তো কংগ্রেস ছেড়ে দিয়ে অন্য পার্টির নেতৃত্ব করছেন। যদি তিনি কংগ্রেসে ফিরে আসতেন তা হলে অবশ্য তাঁর কথা ভাবা যেত। তেমন কোনো সম্ভাবনা আছে কি? তবে দেশ স্বাধীন হলে কংগ্রেস হাই কমান্ড সম্প্রসারিত হয়ে শাসনাল হাই কমান্ড হবে। তাতে জিন্না সাহেবকেও নিতে পারা যাবে। কিন্তু আজাদকে বাদ দিয়ে নয়। ই্যা, এইখানেই মুশকিল। জিন্না আজাদকে বর্জন করতে বলবেন। আজাদকে কংগ্রেস পার্টি বর্জন করবে না। সংগ্রামী কমরেডকে কেউ কখনো বর্জন করে? ইংরেজও কি রাজী হবে লীগপন্থী মিজ্রদের বাদ দিয়ে শাসনাল গভর্নমেন্ট গঠন করতে? কংগ্রেস যদি গঠন করে ওরা কি স্বীকৃতি দেবে? এটা এমন একটা প্রশ্ন যার উত্তর দিতে না পারলে মোসলেম ভারত স্বতন্ত্র হতে চাইবে। এখন থেকেই তার লক্ষণ দেখা যাচ্ছে। সব মুসলমান চাইবে না, জানি। কিন্তু যারা চাইবে তারা যদি আয়ত্তের বাইরে চলে যায় তবে তাদের উপর গুলি চালাবে কে? ইংরেজও না, কংগ্রেসও না। সে এক অসহনীয় পরিস্থিতি। উদ্ধারের উপায় এক কংগ্রেস যদি স্বেচ্ছায় অযোধ্যা ত্যাগ করে নির্বাসনে যায়। কিন্তু তা যদি হয় তবে শাসনাল গভর্নমেন্ট গঠন করবে কে?” সৌম্য ভেবে পায় না।

“শাসনাল গভর্নমেন্ট আর কংগ্রেস গভর্নমেন্ট এক জিনিস নয়। মুসলিম



রেজিমেন্টগুলো কংগ্রেস গভর্নমেন্টের কাছে আত্মগতের শপথ নেবে না। কংগ্রেস গভর্নমেন্টের নিশানকে সেলাম করবে না। পাঞ্জাব, সিন্ধু, বাংলা সরকারও কেন্দ্রের কংগ্রেস গভর্নমেন্টকে মান্য করবে না। যতদিন বড়লাট ও ইউনিয়ন জ্যাক, যতদিন ব্রিটিশ বেয়োনেন্ট ততদিন শাস্তি। তার পরেই বিক্ষোভ। অযোধ্যা ত্যাগ করে নির্বাসনে গেলে তো সৈনিকে সৈনিকে লড়াই, জনতায় জনতায় দাঙ্গা। স্বাধীনতা মানে কি অরাজকতা? অরাজকতা কোনো দেশ সহ করতে পারে না। যে শাসন করতে পারবে তাকেই সে রাজা করবে। হলোই বা বিদেশী।” মানস বলে।

“সব ঠিক, কিন্তু বিদেশীকে কেউ ডেকে আনবে না। অহিংসার নিয়ম যদি লোকে মানে তবে দেশ অরাজক হবে না। যদি না মানে তবে গৃহযুদ্ধের ভিতর দিয়ে যাবে। গৃহযুদ্ধই নির্ধারণ করবে দেশের ভবিষ্যৎ। যে জিতবে সে-ই রাজত্ব করবে। পরাজিত প্রতিপক্ষকে ডেকে এনে সে রাজত্বের একভাগ দেবে।” সৌম্যর মতে এই হচ্ছে সমাধান।

“গৃহযুদ্ধ?” মানস আঁতকে ওঠে। “এক একটা গৃহযুদ্ধে কত লোক মরে, জানো? আর সে যুদ্ধ কতকাল ধরে চলে, জানো? জার্মানীর ত্রিশ বছরের যুদ্ধে লোকসংখ্যা এক-তৃতীয়াংশ কমে যায়। তোমরা তো যুদ্ধবিরোধী। আন্তর্জাতিক মহাযুদ্ধ রোধ করতে চাও। গৃহযুদ্ধ নিশ্চয়ই রোধ করবে।”

“করব নিশ্চয়ই! গণেশশঙ্কর বিদ্যার্থীর মতো শহীদ হতে হবে। মহাত্মার মনেও তেমনি শহীদ হওয়ার সংকল্প। গৃহযুদ্ধের দিন আমরা দুই আশুনের মাঝখানে দাঁড়িয়ে শান্তির জন্তে প্রয়াস চালিয়ে যাব।” সৌম্য প্রতিশ্রুতি দেয়।

“কিন্তু আরোগ্যের চেয়ে নিবারণ শ্রেয় নয় কি?” মানস তর্ক করে। “গৃহযুদ্ধ পর্যন্ত যেতে হবে কেন? প্রত্যেকটি প্রদেশে কোয়ালিশন সরকার গঠন করো। তার পরে কেন্দ্রেও তার অনুসরণ করো। কংগ্রেস লীগ একমত হলে ইংরেজ কতদিন ঠেকাতে পারবে? তার জন্তে আর এক দফা সত্যাগ্রহ করতে হবে কেন?” মানস জানতে চায়।

“মনে হচ্ছে এটা তোমার মুসলিম বন্ধুদের ধ্বনির প্রতিধ্বনি।” সৌম্য মুচকি হাসে। “কিন্তু তেমন কোয়ালিশন ক’টা বিষয়ে একমত হতে পারবে? এই ধরো না কেন, যুদ্ধে যোগদান। শর্তে না বনলে কংগ্রেস মন্ত্রীরা পদত্যাগ করবেন। লীগ মন্ত্রীরা পদত্যাগ করবেন কি? তাঁরা যেখানে যেখানে আছেন তাঁরা সেখানে থাকবেন। ব্রিটিশ রাজ্যের সঙ্গে অসহযোগ মুসলিম লীগ পলিসি নয়। তাঁদের পলিসি পারস্পরিক সহযোগিতা। ইংরেজরা মুসলমানদের স্বার্থ রক্ষা করবে।

মুসলমানরা ইংরেজদের স্বার্থ রক্ষা করবে। এরাও মাইনরিটি। ওরাও মাইনরিটি। মাইনরিটিকে মাইনরিটি রক্ষা না করলে কে রক্ষা করবে? ইংরেজ চলে গেলে মুসলিম মাইনরিটির কী দশা হবে? ইংরেজ থাকতে কংগ্রেসের ভূমিকা হচ্ছে অপোজিশনের ভূমিকা। লীগের ভূমিকা তা নয়। ইংরেজ যখন থাকবে না তখন লীগের সঙ্গে কোয়ালিশনের সম্মত আসবে। নেহাৎ যদি প্রতিনিধিত্বের চড়ায় আটকে না যায়। মুসলমানদের একমাত্র প্রতিনিধি মুসলিম লীগ এ দাবী মেনে নিতে কংগ্রেস কখনো রাজী হবে না। হলে তার নিজেরই প্রতিনিধিত্ব কেবলমাত্র হিন্দুদের হয়ে দাঁড়ায়। লীগ যখন প্রতিষ্ঠিত হয়নি তখন কংগ্রেস ছিল। বিশ একুশ বছর ধরে সে হিন্দু মুসলমান নির্বিশেষে সর্ব সাধারণের প্রতিনিধিত্ব করে এসেছিল। লীগ প্রতিষ্ঠিত হওয়ার ফলে কি কংগ্রেসের প্রতিনিধিত্ব সংকীর্ণ হয়ে গেল? কংগ্রেস কি সঙ্গে সঙ্গে মুসলিমবর্জিত হলো? কই, না। জিন্না সাহেব যেমন কংগ্রেসে ছিলেন তেমনি কংগ্রেসে রয়ে গেলেন। অধিকন্তু লীগেও যোগ দিলেন। জিন্নার কংগ্রেসত্যাগ অসহযোগের পরবর্তীকালে। গান্ধী এসে অসহযোগের স্বরূপাত না করলে জিন্না কংগ্রেসের ঘরের পিসী ও লীগের ঘরের মাসী হয়ে দুই প্রতিষ্ঠানের মধ্যে সেতুবন্ধন করতেন। নীতির সঙ্গে নীতির বিরোধ তো মডারেটদের সঙ্গেও হয়েছে। তা বলে কেউ তো কংগ্রেসকে সাম্প্রদায়িক প্রতিষ্ঠানে পরিণত করতে চাননি। কোয়ালিশন যদি কোনোদিন হয় তবে প্রতিনিধিত্বের প্রশ্ন উপেক্ষা করেই হবে। যেমন হয়েছে কৃষক প্রজা দলের সঙ্গে মুসলিম লীগের। হক সাহেব হয়েছেন প্রধানমন্ত্রী। উনিও এককালে কংগ্রেসে ছিলেন। কংগ্রেসের জেনারেল সেক্রেটারি হয়েছিলেন। সঙ্গে সঙ্গে মুসলিম লীগেও ছিলেন। এককালে এটা দোষের কথা ছিল না। গান্ধীজী যদি না আসতেন, কংগ্রেস যদি সহযোগিতার নীতি ত্যাগ না করত, কোয়ালিশন অনেকদিন আগেই সম্ভব হতো। জিন্নাই হতেন তখন কংগ্রেসের প্রতিভূ। এখন যেমন আজাদ। কিন্তু ইংরেজ থাকতে কংগ্রেস তার নীতি পরিবর্তন করবে না। গান্ধীজী থাকতেও না।”

“আমাদের ছেলেবেলায় কংগ্রেসের সঙ্গে মুসলিম লীগের একটা চুক্তি হয়েছিল। জিন্নার মধ্যস্থতায়ই সেটা সম্ভব হয়েছিল। তখন নামে না হোক কার্যত মুসলিম লীগ হয়েছিল মুসলিম সম্প্রদায়ের প্রতিনিধি ও কংগ্রেস অমুসলমান সম্প্রদায়বর্গের। ইংরেজরা সেইভাবে নির্বাচকমণ্ডলী ভাগ করেছিলেন। একভাগে মুসলমান, অপর ভাগে অমুসলমান। শিখরা বাদে। কংগ্রেস সেটা মেনে নিতে নারাজ হয়েছিল, কিন্তু লখনউতে ১৯১৬ সালে রাজী হয়। এর পরে ওঠে ওয়েস্টমিনস্টার প্রশ্ন। হিন্দুদের

যেসব প্রদেশে সংখ্যাগরিষ্ঠতা সেসব প্রদেশে মুসলমানরা চায় সংখ্যাগরিষ্ঠতার অতিরিক্ত আসন আইনসভায়। মুসলমানদের যেখানে সংখ্যাগরিষ্ঠতা সেসব প্রদেশে অমুসলমানরা চায় সংখ্যাগরিষ্ঠতার অতিরিক্ত আসন আইনসভায়। কংগ্রেস ও মুসলিম লীগ মিলে এ প্রশ্নের ফয়সালা করে অমুসলমানের ভাগ থেকে কেটে মুসলমানকে ওয়েটেজ দিয়ে ও মুসলমানের ভাগ থেকে অমুসলমানকে ওয়েটেজ দিয়ে। বলা বাহুল্য অমুসলমান মানে প্রধানত হিন্দু। পরে তার জায়গায় বসানো হয় 'জেনারল'। ওয়েটেজের এই আদানপ্রদান শাসনসংস্থারের সামিল হয়। কথা হচ্ছে এতদূর এসে তোমরা পিছিয়ে যাবে কোন যুক্তিতে? অসহযোগই করো আর সহযোগিতাই করো তোমরা অমুসলমানদের তরফ থেকে ওয়েটেজ দিয়েছ ও পেয়েছ। ওরাও মুসলমানের তরফ থেকে ওয়েটেজ পেয়েছে ও দিয়েছে। মুসলিম নির্বাচকমণ্ডলী থেকে কংগ্রেসপন্থী মুসলমানরা জয়ী হয়েছে বলেই কি কংগ্রেস মুসলমানদের তরফ থেকেও আদানপ্রদানের অধিকারী হলো? আদানপ্রদানটা হবে কার সঙ্গে কার, যদি কংগ্রেসই হয় দুই তরফের প্রতিনিধি? আর লীগ হয় মুসলমানের ক্ষুদ্র একটি শ্রিডিগের? কংগ্রেস একাই সকলের হয়ে ব্রিটিশ রাজ্যের সঙ্গে মোকাবিলা করবে, দেশের-জন্তে স্বাধীনতা আদায় করে নেবে? উত্তম। কিন্তু সংবিধান রচনার সময় মুসলিম সম্প্রদায়ের হয়ে সেকগার্ড দাবী করবে কারা? কংগ্রেসপন্থী মুসলমানরা বা লীগপন্থী মুসলমানরা? এই প্রশ্নে মুসলিম নির্বাচকমণ্ডলীর ভোট পড়বে কাদের দিকে বেশী? জিন্মাকে তাঁর পাওনা দিতে হবেই। তিনি সায় না দিলে ইংরেজ সায় দেবে না। ব্রিটিশ পার্লামেন্টই তো আইন পাশ করে ক্ষমতা হস্তান্তর করবে। তবে তোমরা যদি গায়ের জোরে মননদ দখল করতে পারো সেকথা আলাদা। গায়ের জোরে তোমরা বিশ্বাসই করো না। তবে কি আত্মার জোরে দখল করবে?" মানস হালে।

“পারালাইজ করব। দিল্লীর হুকুম দিল্লীর বাইরে পৌছবেই না। কলকাতার হুকুম কলকাতার বাইরে পৌছবেই না। জেলার সদরের হুকুম সদরের বাইরে পৌছবেই না। মহকুমার সদরের হুকুম মহকুমা সদরের বাইরে পৌছবেই না। গ্রামে গ্রামে গজিয়ে উঠবে গ্রাম পঞ্চায়েৎ। তার উপরে থানা পঞ্চায়েৎ। তার উপরে মহকুমা পঞ্চায়েৎ। তার উপরে জেলা পঞ্চায়েৎ। তার উপরে প্রদেশ পঞ্চায়েৎ। সকলের উপরে দেশ পঞ্চায়েৎ। সব চেয়ে কম ক্ষমতা সকলের উপরে। সব চেয়ে বেশী ক্ষমতা সকলের নিচে। ব্রিটিশ পার্লামেন্ট যদি স্বীকৃতি না দেয় কী আসে যায়? আমাদের সংবিধান আমরাই রচনা করব। সে সময় পঞ্চায়েতী পদ্ধতিতে নির্বাচিত হয়ে মুসলমান

সদস্যরাও থাকবেন। লেফগার্ড যদি চান, যা চান আপসে মেনে নেওয়া হবে। সর্ব  
 ত্তরেই তাঁদের উচ্চস্থান থাকবে। তবে তাঁরা সম্প্রদায়ের প্রতিনিধি না হয়ে সাধারণের  
 প্রতিনিধি হবেন। সেইজন্তে ওয়েটেজ ইত্যাদির প্রশ্ন উঠবে না। যদি ওঠে তখন  
 পারস্পরিক আদানপ্রদান হবে। তবে কেজ্রে মুসলমানরা কেমন করে ওয়েটেজের  
 প্রতিদানে ওয়েটেজ দেবেন বলতে পারছিলেন। একটাই তো কেজ্রে। সেখানে এক  
 মাইনরিটিকে ওয়েটেজ দিলে অত্যন্ত মাইনরিটিদেরও ওয়েটেজ দিতে হবে। সেটা  
 দিতে গেলে মেজরিটির ভাগে কতটুকু বাকী থাকে ?” সৌম্য সংশয়ান্বিত।

“এই নিয়েই বিরোধ বেধে যাবে, সৌম্যদা। সেটা যেন জার্মানীর মতো  
 প্রটেস্ট্যান্ট ক্যাথলিকের সশস্ত্র যুদ্ধে না গড়ায়। হিন্দু মুসলমান তো প্রটেস্ট্যান্ট  
 ক্যাথলিকের চেয়ে আরো বেশী ফারাক। দুটো সম্প্রদায় বললে ঠিক বোঝানো যায় না।  
 দুটো নেশন বললেও ভুল বোঝানো হয়।” মানস ভেবে পায় না কী বলে বোঝানো  
 যায়।

যুথিকা কর্ণক্ষেপ করে। “নেশন বললে কি ভুল হবে ?”

“আলবৎ।” মানস উত্তর দেয়। “মুসলমান তো আফগান, ইরানী, তুর্ক এরা  
 সবাই। তা হলে সবাই মিলে এক নেশন ? তা নয়, চীনা মুসলমানরা চীনা,  
 ইন্দোনেশিয়ান মুসলমানরা ইন্দোনেশিয়ান, ভারতীয় মুসলমানরা ভারতীয়। তবে  
 তারা হিন্দু নয়। যেমন আইরিশ প্রটেস্ট্যান্টরা ক্যাথলিক নয়। তা সত্ত্বেও বার্নার্ড শ  
 আইরিশ, য়েটস আইরিশ, এ. ই. হার ছদ্মনাম সেই জর্জ রাসেল আইরিশ। আইরিশ  
 নেতা পার্নেলও ছিলেন প্রটেস্ট্যান্ট।”

“কিন্তু শেষপর্যন্ত দেখা গেল আইরিশরা স্বাধীন হয়ে এক নেশন রইল না।  
 প্রটেস্ট্যান্টরা পৃথক হয়ে গেল।” যুথিকা বলে। “উত্তর আয়ারল্যান্ডের প্রটেস্ট্যান্টরা  
 আর আইরিশ বলে পরিচয় দেয় না। ওরা ব্রিটিশ পার্লামেন্টেই ওদের সদস্য পাঠায়।  
 নেশন বলতে ওরা বোঝে ব্রিটিশ নেশন। যে নেশন প্রধানত প্রটেস্ট্যান্ট। ধর্মভেদ  
 থেকে নেশনভেদ বিংশ শতাব্দীতেও অপ্রচলিত হয়নি। ভারতীয় মুসলমানরা যদি  
 ভারতীয় বলে পরিচয় দেয় তবে ওরা আলাদা নেশন হতে পারে না। আর যদি  
 আলাদা নেশন বলে পরিচয় দেয় তবে ওরা ভারতীয় থাকতে পারে না। ওদেরকেই  
 মনঃস্থির করতে হবে। ওদের লিঙ্কাস্টাই আমরা আপসে মেনে নেব। গৃহযুদ্ধ বাধতে  
 যাবে কেন ?”

“তুমি তো বেশ বললে!” মানস বিরক্ত হয়। “আলাদা নেশন হলে আলাদা  
 নেশনকে আলাদা ভূমি দিতে হবে। ওরা যদি দিল্লী চায় তা হলে কি আমরা ওদের

দিল্লী ছেড়ে দেব? কুঙ্কজ বাধবে না? ওরা যদি বলে কলকাতা ওদের আমরা কি কলকাতা ছেড়ে দেব? লঙ্কাবাণ বাধবে না? আবার শিখরাও তো বলবে লাহোর ওদের, অমৃতসর ওদের, নানকানা সাহেব ওদের। ওরাও তো বলবে ওরাও আলাদা এক নেশন, ওদেরও আলাদা বাসভূমি। মুসলমানরা কি তাতে রাজী হবে? বেধে যাবে না চতুর্থ পানিপথের যুদ্ধ? মুসলমানরা যে প্রত্যেকবারে জিতবেই এমন কী কথা আছে? যেটুকু ওরা বিনা দ্বন্দ্ব পাবে সেটুকুই ওদের। আর সেটুকু কি ওদের মনে ধরবে? ওতে কি ওদের পেট ভরবে?”

সোম্য মৌনভঙ্গ করে। “জাথ, মানস, মুসলমানরা বেশীর ভাগ আমাদেরই ঘরের ছেলে। এক একটি মাইকেল মধুসূদন দত্ত বা তরু দত্ত। ওরা যদি আলাদা নেশন হয় তো আরবী নামকরণের মোহেই হবে। আলাদা বাসভূমি যদি চায় তবে সেটাও হবে মোহবশে চাওয়া। পুরুষায়ক্রমে যদি চাইত তা হলে জানতুম যে ওরা দীর্ঘকাল ধরে বিচার বিবেচনা করে ও রকম একটা সিদ্ধান্ত গ্রহণ করে রেখেছে। কিন্তু পাকিস্তানের প্রসঙ্গ সবে উঠতে শুরু করেছে। তার সংজ্ঞা যে কী তাও কেউ বলতে পারছেন না। লীগপন্থীদের ওয়েটেজ, ভীটো ইত্যাদি দাবী মিটলে তাঁরা কংগ্রেসের সঙ্গে কোয়ালিশনেই রাজী হবেন। তবে এটাও তাঁদের প্রত্যাশা যে আবার যখন নির্বাচনের সময় আসবে তখন একই নির্বাচন কেন্দ্র থেকে কংগ্রেস ও মুসলিম লীগ প্রতিযোগিতায় নামবে না। কংগ্রেসকেই মুসলিম আসনের দাবী ছেড়ে দিতে হবে। এখন থেকেই কংগ্রেসপন্থী মুসলিমদের কোয়ালিশন থেকে বাদ দিতে হবে। কিন্তু কংগ্রেস কখনো তার সংগ্রামী কমরেডদের বর্জন করবে না। লীগ যদি অবু্য হয় তো কোয়ালিশন স্বদ্রপরাহত। অগত্যা আলাদা একটা রাষ্ট্রের প্রস্তাব উঠবেই। সব মুসলমান সে প্রস্তাব সমর্থন করবে না। করবে যারা তারা সেপারেটিস্ট। এদের সংখ্যা কত, প্রভাব কত তা বলা শক্ত। যদি খুব বেশী হয় তবে গৃহযুদ্ধের আশঙ্কা অমূলক নয়। কারণ হিন্দুরা কেউ তেমন প্রস্তাবে রাজী হবে না, শিখরাও না, কংগ্রেসপন্থী মুসলমানরাও না। গোটা উত্তরপশ্চিম সীমান্ত প্রদেশ নারাজ হবে। লীগপন্থীরা যদি মনে করে থাকেন যে সেই মর্মে আপস হবে তা হলে তাঁরা স্বপ্ন দেখছেন। ইংরেজরাও যদি মনে করে থাকেন যে তাঁরা সে রকম একটা রোয়েদাদ চাপিয়ে দিয়ে যাবেন তা হলে তাঁরাও নির্বোধের স্বর্গে বাস করছেন।”

“আমাদের ছেলেবেলায় আমাদের গুরুজনদের মুখে শুনতুম ভারতের আদর্শ হচ্ছে সর্ব ধর্ম সমন্বয় আর হিন্দু মুসলিম ঐক্য।” মামল বলে। “কিন্তু আমাদের চোখের সম্মুখেই হিন্দু মুসলমানের সম্পর্ক দিন দিন তিক্ত হয়ে উঠছে। আমরা বতই বলি না

কেন তৃতীয় পক্ষ এর জন্তে দায়ী, আমাদের দুই পক্ষের মনেই পরস্পরের প্রতি ভয় আর অবিশ্বাস, ঈর্ষা আর ঘেঁষ। যেন অর্থনৈতিক আর রাজনৈতিক ক্ষমতাই হচ্ছে মোক্ষ। যার আছে সে কিনা হাভ। যার নেই সে কিনা হাভ-নট। এদের মধ্যে ঐক্য কেমন করে সম্ভব? আর সম্বন্ধ বলতে কি বোঝায় প্রার্থনা সভায় যে যার মতে প্রার্থনা করা? ওটার নাম সম্বন্ধ নয়, সহ-অবস্থান। সহনশীলতা।”

“তিক্ততা যে দিন দিন বাড়ছে তা তো প্রত্যক্ষ সত্য। কিন্তু সেটা কি ধর্মের সঙ্গে ধর্মের মিল নেই বলে? সাধারণ মানুষ এ নিয়ে একটা বোঝাপড়ায় পৌঁছেছে। সেটা সম্বন্ধ নয়, কিন্তু ‘লিভ অ্যাণ্ড লেট লিভ’। তুমিও বাঁচো, আমিও বাঁচি। এইভাবে বহু শতাব্দী ধরে শান্তি রক্ষিত হয়েছে। ক্রুসেডও বাধেনি, ত্রিশ বছরের যুদ্ধও বাধেনি। মাঝে মাঝে এখানে সেখানে দাঙ্গা বেধেছে। তাও ধর্ম নিয়ে নয়, গোহত্যা নিয়ে। রসজিদের সামনে বাজনা নিয়ে। কিন্তু আজকের দিনে যে অশান্তি দেখছ এটা তত্ত্বের মামলা নয়, স্বত্ত্বের মামলা। কোন্ সম্প্রদায়ের ভাগে ক’টা চাকরি পড়বে, ক’টা আসন পড়বে, ক’টা মন্ত্রীপদ পড়বে এই নিয়ে রেবারেবি। হিন্দুরা ইংরেজী শিক্ষায় পঞ্চাশ বছর স্টার্ট পেয়ে চাকরিবাকরিতে সংখ্যাভূপাতের অতিরিক্ত পেয়েছে। পঞ্চাশ বছরের পথ মুসলমানরা পাঁচ বছরে অতিক্রম করবে কী করে? জার্মানী আর জাপান যেমন চাইছে ইংলণ্ড আমেরিকার শিল্পায়নের দেড়শো দু’শো বছরের প্রগতিককে পঞ্চাশ ঘাট বছরে অতিক্রম করতে। পাল্লা দিয়ে পারছে না। তাই যুদ্ধ করছে। ইয়া, যেমন ওদেশে তেমনি এদেশে অর্থনৈতিক ও রাজনৈতিক ক্ষমতাই হচ্ছে মোক্ষ! তার জন্তে ওরা যুদ্ধ করছে, বিপ্লব করছে। আমরা করছি ধর্মের নামে দাঙ্গা। হাভ আর হাভ-নট যদি বলো, শতকরা ক’জন হিন্দু হাভ! বেশীর ভাগই তো হাভ-নট। আর মুসলমানদের মধ্যেও কি হাভ নেই? ভারতের সব চেয়ে ধনী মানুষটিই তো মুসলমান। হায়দরাবাদের নিজাম। ধনসম্পদের অসম বণ্টন তো সম্প্রদায় অনুসারে হয়নি। হয়েছে পরিবার বা গোষ্ঠী বা ব্যক্তি অনুসারে। এর মধ্যে সম্প্রদায়কে টেনে আনা হচ্ছে যারা স্টার্ট পায়নি তাদের স্বার্থে। তারাই কি তাদের সম্প্রদায়ের শতকরা একশো জন? জনগণের এতে লাভ কতটুকু হবে? তারা হিন্দুই হোক আর মুসলমানই হোক। অথচ তারাই মরছে দাঙ্গাহাঙ্গামায়। হিন্দু মুসলমানের ঐক্য আমরা লক্ষ্য অন্তরের সঙ্গে কামনা করি! তা না হলে দেশ ধ্বংস হয়ে যাবে। কিন্তু তৃতীয় পক্ষ থাকতে দাবীদাওয়ার শেষ নেই। তৃতীয় পক্ষই অলক্ষ্যে দর বাড়িয়ে দিচ্ছে। তারা আরো বেশী দিতে পারে এই বিশ্বাস থেকে উঠছে অতিরিক্ত দাবী।” সৌম্য বলে।

“তৃতীয় পক্ষকে কথায় কথায় জড়াতে চাও কেন? তুমি কি দেখতে পাচ্ছ না যে

জমিদার হিন্দু, প্রজা মুসলমান, মহাজন হিন্দু, খাতক মুসলমান ? তার মানে হিন্দু ছাড়া, মুসলমান ছাড়া-নট। সাম্প্রদায়িক রূপ নিলেও আসলে এটা শ্রেণীসম্মত। শ্রেণীসংঘর্ষ এদেশে সাম্প্রদায়িক সংঘর্ষের মূর্তি ধরতে পারে। অন্য দেশে যারা কমিউনিস্ট এদেশে তারা কমিউনালিস্ট। কিন্তু উদ্দেশ্য একই। জমিদারি বিলোপ। মহাজনী বারণ। যাদের স্বার্থহানি হবে তারা হিন্দুধর্মের নাম করে বাধা দেবে। কংগ্রেসও যে বাধা দিচ্ছে না তা নয়। আইনগতায় দেখা যাচ্ছে মুসলিম লীগই প্রগতিশীল, কংগ্রেস প্রগতিবিরোধী। বাংলার কথাই বলছি। কংগ্রেস যে কেবল মধ্যবিত্ত মুসলমানদের আস্থা হারাচ্ছে তাই নয়, প্রজা ও খাতক শ্রেণীর মুসলমানেরও বিশ্বাস হারাচ্ছে ? ওরা দেশের স্বাধীনতার মহিমা বোঝে না। বোঝে কম খাজনা ও বিনা স্বদের মর্ম।” মানসও সহায়ত্বীতিশীল।

“যারা কমিউনিস্ট হতে পারত তারা কমিউনালিস্ট হচ্ছে। এটা আমিও লক্ষ করেছি। এইভাবে জনগণকে বিভ্রান্ত ও বিভক্ত করা হচ্ছে। এই খেলা খেলছে হিন্দু মহাসভা। হিন্দু জমিদার ও মহাজনদের স্বার্থ রক্ষা করতে। বাংলার কংগ্রেস যদি দূরদর্শী হতো জমিদার মহাজনদের স্বার্থের চেয়ে প্রজা ও খাতকদের স্বার্থের উপর আরো জোর দিত, যেমন দিচ্ছে মাদ্রাজের কংগ্রেস। এই অর্থনৈতিক বিরোধটাকে কংগ্রেস যথেষ্ট গুরুত্ব দিতে পারছে না দলের সংহতি রাখতে গিয়ে। এই ইস্যুতে যদি দল ভেঙে যায় তো স্বাধীনতার জন্যে লড়বে কে ? প্রথম কাজটি প্রথমে। একমুঠো জমিদার লক্ষ লক্ষ প্রজার প্রতিরোধের সামনে দাঁড়াতে পারবে না। কিন্তু সেটা এখন নয়, স্বাধীনতার পরে। মহাজনদের হটানো আরো শক্ত, কারণ ওরাই গ্রাম অঞ্চলের ব্যাঙ্ক। ব্যাঙ্কের বিস্তার না হলে অভাব অনটনের সময় লোকে যাবে কার কাছে ? মানছি ওরা এক একটি শাইলক আর ওরা হয় হিন্দু নয় কাবুলী মুসলমান। সাধারণ মুসলমান ইসলামের অলুশালন মেনে চলে। হুদ নেওয়াকে মনে করে হারাম। ডাকঘরে যাদের আমানত আছে তারা স্বদের টাকা তুলবে না। ও টাকা জমতে জমতে আসলকে ছাড়িয়ে যায়। এইখানেই ইসলামের জোর। এমন জোর তো আর কোনো ধর্মের নেই। যদিও কুসীদবৃত্তির নিন্দাবাদ আছে খ্রীষ্টধর্মেও। হিন্দুধর্মেও ওটা গর্হিত। যেসব ব্রাহ্মণ কুসীদজীবী তারা ছোট ব্রাহ্মণ। আমি অবাক হই ভেবে ইসলামের কঠোর হস্ত কাবুলীদের বেলা নরম কেন ? কাবুলীদের উৎপাতে বাঙালী হিন্দুরাও তো কমিউনাল হতে পারত। কিন্তু হয় না। তা হলে সাহা মহাজনদের উৎপাতে মুসলমানরা কমিউনাল হবে কেন ?” সৌম্য বিস্মিত হয়।

“তবে কি তুমি বলতে চাও ওরা কমিউনিস্ট হবে ? কংগ্রেসী হয়ে তো কোনো

লাভ নেই। তোমরা পরাধীন থাকতে প্রতিকার করবেও না, করতে দেবেও না। মন্দ কী, যদি ওরা কমিউনিস্ট হয়ে প্রতিকার খোঁজে?" মানস ইচ্ছে করে খোঁচায়।

“কমিউনিস্টদের প্রতিকারের উপায় তো আগে রাষ্ট্র দখল করা, তার পরে অগ্নায় দূর করা। রাষ্ট্র দখল করা কি আজ এখনি সম্ভব? কমিউনিস্টরা বিপ্লবের জন্তে তোড়জোড় করবে। তাদের শাস্ত্রে বলে বিপ্লব না হলে রাষ্ট্র দখল করা যায় না। তোড়জোড় করতে করতেই লগ্ন অতীত হবে। যে লগ্নে গণ সত্যাগ্রহ করে প্রশাসনকে প্যারালাইজ করা সম্ভবপর। তুমি দেখবে ওদের আগেই আমরা লগ্ন জেনে জয়যাত্রায় বেরোব ও জয়যুক্ত হব। তার পরে আসবে সামাজিক যত অগ্নায়ের প্রতিকার। মেরে কেটে নয়, বিনা রক্তপাতে আমরা সব রকম শোষণ রদ করব। কমিউনিস্ট বা কমিউনালিস্ট না হয়েও অগ্নায়ের প্রতিকার করা যায়, মানস। যদি তার আগে স্বাধীনতা অর্জন করতে পারি। আপাতত আমাদের এক লক্ষ্য। লক্ষ্যভেদ করতেই হবে। শরবৎ তন্নয়ো ভবেৎ।” সৌম্য উপনিষদ্ থেকে উদ্ধৃতি দেয়।

“আমার কী জানি সন্দেহ হয় যে কংগ্রেস হবে ভারতের কুওমিনটাং। মাণ্ডুদের বিরুদ্ধে বিপ্লব ঘটিয়ে মান ইয়াং সেনও তো কত বড়ো বড়ো কথা বলেছিলেন। জীবনে দেখে যেতে পারলেন না তাঁর সাধু সংকল্পের রূপায়ন। চিয়াং কাইশেকের নেতৃত্বে ধনীরা আরো ধনী হচ্ছে, দরিদ্ররা আরো দরিদ্র। ওদেশেও সমাজ-বিপ্লবের জন্তে তোড়জোড় চলছে। মাওপস্চীরা লং মার্চ করে একটা অঞ্চল দখল করে ফেলেছে। ওরাও কমিউনিস্ট, তবে ঠিক লেনিনের পদাঙ্ক অনুসরণ করে না। কংগ্রেস যদি কুওমিনটাং হয়ে ওঠে এদেশেও চীনদেশের পুনরাবৃত্তি ঘটতে পারে, সৌম্যদা। এটা গরিব লোকদেরই দেশ। দেশকে মুক্ত করলে কী হবে, গরিবকে মুক্তি দিতে হবে। হুদ থেকে, খাজনা থেকে, মুনাকা থেকে, বেগার থেকে, বেকারি থেকে, জাতপাত থেকে, ধর্মান্ধতা থেকে। যদি সম্ভব হয়, বিনা রক্তপাতে। নয়তো—”মানস শেষ করে না। চোখ বোজে।

“ক্ষমতা হাতে পেলে চরিত্রভ্রংশ ঘটে এটা কংগ্রেসের বেলাও যে সত্য হতে পারে না তা নয়। আমরা তো এর জন্তে আগে থেকেই প্রস্তুত হয়ে রয়েছি। কংগ্রেসের অধঃপতন দেখলে আমরা কংগ্রেস থেকে সরে যাব ও সম্ভব হলে বিভিন্ন ইস্যুতে সত্যাগ্রহ করব। কংগ্রেসের বিনাশ নয়, তার সংশোধনই আমাদের কাম্য হবে। কংগ্রেস যদি গান্ধীনির্দিষ্ট পন্থায় চলে তবে হুদ, মুনাকা, খাজনা প্রভৃতির দুর্বহ ভার থেকে দেশের শোষিত জনগণ মুক্তি পাবে। মার্কসবাদীদের মতো আমাদেরও



লক্ষ্য শোষণমুক্ত সমাজ। যেটা ওদের কল্পনার বাইরে সেটাও আমাদের ধ্যানে আছে। শাসনমুক্ত রাষ্ট্র।” সৌম্য বলে যায়।

“কেন, ওরাও তো বিশ্বাস করে যে রাষ্ট্র ক্রমে ক্রমে শুকিয়ে শূন্য হয়ে যাবে। ধরো, একশো বছর পরে।” মানস মুখ টিপে হাসে।

“আমরা কিন্তু আরো আগে লক্ষ্যভেদ করব আশা করি। ধরো, পঞ্চাশ বাট বছরের মধ্যে। হাসছ যে! বিশ্বাস হয় না?” সৌম্যও হাসে।

“বিশ্বাসে মিলয়ে গান্ধী, তর্কে বহুদূর।” যুথিকা ফোড়ন কাটে।

“দেখবে তোমরা, আগে স্বরাজ্যটা তো হোক। সঙ্গে সঙ্গেই বিকেন্দ্রীকরণ শুরু হয়ে যাবে। সেই প্রক্রিয়া যখন সারা হবে তখন দেখবে দেশের জনগণ আর প্রত্যেকটি বিষয়ে রাষ্ট্রের মুখাপেক্ষী নয়। লোকে যদি রাষ্ট্রের মুখের দিকে তাকিয়ে না থাকে তবে রাষ্ট্রকেই বা পুছতে যাবে কেন? রাষ্ট্র তবু থাকবে। তার কাজ হবে কো-অর্ডিনেশন। নয়তো ভারতের সাত লক্ষ গ্রাম পরস্পরের থেকে বিচ্ছিন্ন হয়ে যাবে।” সৌম্য আশঙ্কা করে।

“তা হলেও কংগ্রেসের মতো একটি সংগঠন বা গান্ধীসেবাসঙ্ঘের মতো একটি সঙ্ঘ আবশ্যক হবে পরিচালনার জন্তে বা সমলোচনার জন্তে বা প্রতিরোধের জন্তে। তা ছাড়া একটা বাহিনী তো আবশ্যক হবেই দেশরক্ষার জন্তে। উচ্চতম বিচারশালাও আবশ্যক হবে। যত ক্ষুদ্র হোক না কেন; একটা ব্যুরোক্রাসীও আবশ্যক না হয়ে পারে না। সকলের উপরে আবশ্যক হবে একটা কনস্টিটিউশন। গান্ধীজীকেও এসব কথা ভেবে দেখতে হবে।” মানস বলে।

“গান্ধীজীর মতে সব কিছু গড়ে উঠবে নিচের থেকে উপরে।” সৌম্য বোঝায়।

“কিন্তু কার্যত সব কিছু নামছে উপরের থেকে নিচে। গান্ধীজী, তাঁর নিচে কংগ্রেস হাই কমান্ড, তাঁর নিচে কংগ্রেস ওয়ার্কিং কমিটি, মায় কংগ্রেস প্রেসিডেন্ট। মন্ত্রিসভ গ্রহণ করলে বিভিন্ন প্রদেশের মন্ত্রীমণ্ডলী। এর পরে হয়তো কেন্দ্রীয় শাসন-পরিষদের সদস্যগণ। আপাদমস্তক নয়, মাথা থেকে পায়ের নখ।” মানস টিপে টিপে বলে।

“এটা হচ্ছে সংগ্রামের অহরোধে। আমাদের তো আর কোনো সৈন্তদল নেই। ঐ কংগ্রেসই আমাদের সৈন্তদল। আর গান্ধীজীই আমাদের প্রধান সেনাপতি। তাঁর নিচে সৈন্তদলের হাই কমান্ড। সংগ্রামের পর এর প্রয়োজন থাকবে না।” সৌম্য যেন সব জানে।

“আমার তো মনে হয় এ ব্যবস্থা থাকতে এসেছে। স্বাধীনতার পর কংগ্রেসের সঙ্গে রাষ্ট্রের সম্পর্ক হবে সেকালের ইউরোপের রোমান ক্যাথলিক চার্চের সঙ্গে স্টেটের।

গান্ধীজীই হবেন পোপ। পোপ যেমন সম্রাটের উর্ধ্বে তিনিও তেমনি রাষ্ট্রপতির উর্ধ্বে। পরে একসময় ঘটবে উভয়ের সংঘর্ষ।” মানস অহুমান করে।

“রাজনীতি যদি নীতির অহুশাসন মেনে চলে তা হলে সংঘর্ষের উপলক্ষ থাকবে না। কংগ্রেস যদি কেবল রাজনীতি নিয়ে মত্ত থাকে, নীতি নিয়ে মাথা না ঘামায় তবে দেশের যিনি সব চেয়ে বিবেকবান পুরুষ তিনি বিবেকের বাণী শোনাবেন। না শুনলে সংঘর্ষ বাধবে। গান্ধীজী পোপও হতে চান না, চার্চও গড়তে চান না। তোমার ও মন্দেই অযথা। পার্লামেন্টারি প্রোগ্রাম যতদিন কংগ্রেস হাই কমাও ততদিন। আবার যখন সত্যগ্রহের ডাক আসবে তখন গান্ধীজীই হলেন একমাত্র কমাণ্ডার। হাই কমাও কেউ নয়। কেন ওঁদের অত গুরুত্ব দেওয়া? ওঁদের বিরুদ্ধে বিদ্রোহ করা?” সৌম্য উপেক্ষা করে।

## ॥ এগারো ॥

“দাদা,” যুথিকা আর এক পেয়ালা চা বাড়িয়ে দিয়ে বলে, “এই মানুষটির সঙ্গে কী করে ঘর করি, বলতে পারো? সারা রাত ইনি পায়চারি করবেন। এঁর ওই একই চিন্তা, একই ধ্যান। গেল, গেল, ব্রিটিশ মিউজিয়াম গেল। গেল, গেল, লুভর মিউজিয়াম গেল। ভীনাঁস ডি মাইলো, তোমাকে কি আর দেখতে পাব? মোনা লিসা, তোমাকে কি আর দেখতে পাব? বিশ্বমানবের কী অপূরণীয় ক্ষতি! আমি কি নীরব দর্শক হতে পারি? বলুন দেখি দাদা, নীরব দর্শক না হয়েই বা আমরা কী হতে পারি। সশস্ত্র যোদ্ধা? তাতে কি ক্ষতি কমবে না বাড়বে? ইংরেজ ফরাসীরাও পাণ্টা দিতে গিয়ে রোম মিউনিক ড্রেসডেন ধ্বংস করবে। ইউরোপে যদি যাই আমি কি দেখতে পাব রাফেলের অঁকা সিষ্টিন মাদোনা? মাইকেল এঞ্জেলোর গড়া মোজেস?”

“বোন, ওটা আমারও জিজ্ঞাসা।” সৌম্য ব্যথিত হয়ে বলে, “হিংসা এখন বিশ্ব জুড়ে সজ্জবদ্ধ হয়েছে হিংসার সঙ্গে বলপরীক্ষা করতে। মানুষই মানুষের হাতে গড়া সভ্যতাকে বোমা ও গোলা দিয়ে চূর্ণ বিচূর্ণ করবে। শহরকে শহর জালিয়ে দেবে। গুঁড়িয়ে দেবে। প্রাণের প্রতিও বিন্দুমাত্র মমতা নেই। নিরীহ নারী ও শিশুর প্রাণ যাবে। যুদ্ধ যেদিন শেষ হবে সেদিন আবার শুরু হবে আরো এক যুদ্ধের প্রস্তুতিপর্ব। সেদিন যদি মানস বেঁচে থাকে তাকে সেই একই প্রশ্ন সারারাত জাগিয়ে রাখবে। আমি যদি বেঁচে থাকি আমাকেও। এর একটিমাত্র উত্তরই সম্ভব। হিংসা যেমন সজ্জবদ্ধ হয়েছে অহিংসাও তেমনি সজ্জবদ্ধ হবে। হিংসার সঙ্গে একদিন অহিংসার বলপরীক্ষা হবে। তাতে যদি অহিংসার জয় হয় তবেই মানুষ এ পৃথিবীতে আরো কয়েক হাজার বছর বাঁচবে। তার সভ্যতাও নিরুপেক্ষ হবে। নয়তো এই

শতাব্দীতেই ইউরোপ আত্মঘাতী হবে, ভারতকেও নিজের সঙ্গে জড়িয়ে বেঁধে সহমরণে নিয়ে যাবে। আমাদের সব চেয়ে জরুরি কাজ এখন নিজেদের ছাড়িয়ে নেওয়া ও সম্ভবদ্বি হিংসার প্রতাপকে সম্ভবদ্বি অহিংসা দিয়ে প্রতিরোধ করা। তা সে ইংরেজেরই হোক আর জার্মানিরই হোক আর জাপানিরই হোক। বিশ্ব এখন ভারতের কাছেই এর পরীক্ষা নিরীক্ষা দেখবে বলে অপেক্ষা করছে। আমরা কি প্রস্তুত? হার জিৎ আমাদের হাতে নয়, ঈশ্বরের হাতে। হেরে গেলেও আমরা অপরের জন্তে দৃষ্টান্ত রেখে যাব। গান্ধীজীই যে অহিংসার শেষ প্রোফেট তা নয়। আমরাও যে শেষ সাধক তাও নয়। কিন্তু আজকের জগতে এই হচ্ছে আমাদের প্রকৃত ভূমিকা। না, আমরা নীরব দর্শক নই। এই দাবানলের দমকল বাহিনী যদি কোথাও থাকে তবে তা ভারতের সম্ভবদ্বি অহিংসাবাদী মণ্ডলী। কংগ্রেস বলতে পারলে গবিত হতুম, কিন্তু সে গর্ব আমাদের সাজে না। গান্ধী সেবাসম্মত বলতে পারলে আরো গৌরব বোধ করতুম, কিন্তু সেখানেও সুবিধাবাদীর ভিড়।”

মানস তা শুনে বলে, “সভাতার সঙ্কট ক্রমেই ঘনিয়ে আসবে, সোম্যাদ। হিটলার হয়তো পোলাণ্ডের পর মালিনের সঙ্গে চুক্তি ভঙ্গ করে রাশিয়াকেই আক্রমণ করবে। প্রতিবিপ্লব ঘটিয়ে রুশ বিপ্লবকে পরাভূত ও বিপর্যস্ত করবে। আমি নিজে কমিউনিস্ট না হলেও ওদের ওই বিরাট পদক্ষেপের ট্রাজিক পরিণাম কামনা করিনে। সব লাল হয়ে যাবে না বলে বহু দেশ স্বস্তির নিঃশ্বাস ফেলবে, কিন্তু সব কালো হয়ে যাবে এটাও কম অস্বস্তিকর নয়। এটা হবে আরো বড়ো ট্রাজেডী। কে জানে হয়তো ব্রিটেন ও ফ্রান্সের রক্ষণশীলরা হিটলারের সঙ্গে সন্ধি করে যুদ্ধক্ষেত্র থেকে অপসরণ করবেন।”

“তাই যদি হয় তো ব্রিটেন ফ্রান্স বেঁচে গেল। ওরাই তো তোমার বিশ্বমানব। ওদের নিয়তিই তোমার মানবনিয়তি।” সোম্য পরিহাস করে।

“আহা! তুমি বুঝতে পারলে না? জার্মানীর সঙ্গে সংগ্রামে রাশিয়া যদি জেতে বিপ্লব দেশে দেশে ছড়াবে। ভারতও লাল হয়ে যাবে। আর জার্মানী যদি জেতে তবে বিপ্লব রুশদেশেই ব্যর্থ হবে। দুনিয়ার কোনোখানেই সফল হবে না। নাৎসীবাদ দিকে দিকে ছড়াবে। বিপ্লব বলে প্রতিবিপ্লব বলে উভয়েরই ভবিষ্যৎ নির্ধারিত হয়ে যাবে রুশ জার্মান রণক্ষেত্রে। এ যুদ্ধ কি কেবল আলসাস লোরেন আর উপনিবেশের জন্তে হচ্ছে? পোলাণ্ড থেকে হিটলার পূর্ব মুখেও এগিয়ে যেতে পারে, পশ্চিম মুখেও মোড় ঘুরতে পারে। বিশ্বমানব বলতে আমি রুশদেরও বুঝি। ইতিহাসে ওরা একটা নতুন পরীক্ষা চালাচ্ছে। ওদের গুরু মার্কস লেনিন। যেমন আমাদের এদেশে চলছে অহিংসার পরীক্ষা। যার গুরু গান্ধীজী। আমার সবতাতেই ইন্টারেস্ট

আছে। তবে সব চেয়ে বেশী লিবারল ডেমোক্রাসীতে। সুতরাং ইংলণ্ড, ফ্রান্স ও আমেরিকায়।” মানস বিশদ করে।

“ভাই, মানস, ওদের ওই লিবারল ডেমোক্রাসী অক্ষয় হোক। আমি সর্বাঙ্গ-  
করণে প্রার্থনা করি। ইংরেজ বা ফরাসী হলে আমিও ওর জন্তে প্রাণ দিতুম, তবে  
প্রাণ নিতে আমার বিবেকে বাধত। কিন্তু আমাদের এদেশে ও জিনিস আমদানী  
করা বুখা। যেমন বুখা রুশদেশের সোভিয়েট সমাজতন্ত্র। আমাদের ঐতিহ্য  
অগ্ররূপ। তাই আমাদের পক্ষে অগ্র ব্যবস্থাই শ্রেয়। যার নাম রাখতে পারি  
পঞ্চায়েতী গণতন্ত্র তথা সমাজতন্ত্র। এর পরীক্ষানিরীক্ষা চলবে দেশ স্বাধীন হলে।”  
সৌম্য আশ্বাস দেয়।

“সেটাও একপ্রকার সোশিয়াল ডেমোক্রাসী। জার্মানীতে যার পরীক্ষা  
হিটলারের দৌরাণ্যে অকালে অসমাপ্ত থেকে গেল।” মানস আক্ষেপ করে।

“আমাদের এদেশে আমরা এমনভাবে গোড়াপত্তন করব যে চূড়ায় উঠে কেউ  
ভিৎ পর্যন্ত টলিয়ে দিতে পারবে না। চূড়া ভেঙে দিলেও কেউ গোড়া ভেঙে দিতে  
পারবে না। গ্রামে গ্রামে পঞ্চায়েৎ রাজ অবাদে কাজ করে যাবে। গ্রামগুলো  
হবে অগ্নে বস্ত্রে স্বয়ংসম্পূর্ণ। দেশের রাজধানী বেহাত হলেও গ্রামের রাজধানী বেহাত  
হবে না। কোনো ডিকটেক্টরই সাত লক্ষ পঞ্চায়েতের উপর গায়ের জোর খাটাতে  
পারবে না। ওদের সবাইকে বশ করাও অসম্ভব। অসহযোগের দ্বারা, সত্যগ্রহের  
দ্বারা ওরা যে কোনো ডিকটেক্টরের শাসনকে অচল করে দিতে পারবে। সেইভাবে যে-  
কোনো শোষণকারীর শোষণকেও।” সৌম্য অভয় দেয়।

“সাধু! সাধু!” মানস হাততালি না দিয়ে শান্তিনিকেতনী কেতায় বলে,  
“সাধু! সাধু!” কিন্তু তর্ক না করে থাকতে পারে না। “তুমি ধরে নিয়েছ যে  
দেশটা ভারত বলে আর-দশটা দেশের বেলা যেটা সত্য তার বেলা সেটা সত্য নয়।  
সর্বত্র দেখা যাচ্ছে কৃষিপ্রধান দেশ হয়ে উঠছে যন্ত্রশিল্পপ্রধান। তাই গ্রামপ্রধান না  
হয়ে নগরপ্রধান। জার্মানীর ভারকেন্দ্র সত্তর বছর আগে ছিল গ্রাম, এখন নগর।  
ব্রিটেনে সেটা আরো আগে থেকে হয়েছে। তার প্রধান কারণ ব্রিটেন তার  
সাম্রাজ্যকে কৃষিভিত্তিক রেখে নিজেকে করেছে যন্ত্রশিল্পভিত্তিক। ভারত যেন একটা  
গ্রামসমষ্টি আর ব্রিটেন যেন একটা নগরসমষ্টি। বিরোধ অনিবার্য। ভারতেরও চাই  
যন্ত্রশিল্প। সে আর কাঁচা মাল রপ্তানি করবে না, নিজের কলকারখানায় ব্যবহার  
করবে। তার যন্ত্রশিল্পের যতই প্রসার হবে তার নগরসংখ্যা ততই বৃদ্ধি পাবে,  
নাগরিকসংখ্যাও ততই ফাঁত হবে। জার্মানীর বেলা সত্তর বছর, ভারতের বেলা

হয়তো পঞ্চাশ বছর। কংগ্রেস নেতারা এখন সোভিয়েট ইউনিয়নের মতো প্ল্যান আঁটছেন। যাতে আরো সময়সংক্ষেপ হয়। সত্তরের জায়গায় পঞ্চাশ নয়, বিশ কি পঁচিশ বছর। এঁদের কথামতো যদি কাজ হয় তবে দেশ হয়তো স্বয়ংসম্পূর্ণ হবে, কিন্তু গ্রাম কদাপি নয়। বিরোধ অনিবার্য। কেবল যে ইংরেজদের সঙ্গে তা নয়, এই দেশেরই টাটা বিড়লাদের সঙ্গে। প্রাইভেট ক্যাপিটাল থাকতে সত্তর বছরকে বিশ বছরে পরিণত করা যায় না। আর প্রাইভেট ক্যাপিটালকে স্টেট ক্যাপিটালে পরিণত করতে গেলে সোশিয়াল ডেমক্রাসীকেও পরিণত করতে হয় কমিউনিজমে। জার্মানীতে এই রূপান্তরটাই ঘটতে ঘটতে ঘটল না। নাৎসীরা এসে এক হাতে সোশিয়াল ডেমোক্রাটদের, অন্যহাতে কমিউনিস্টদের হটিয়ে দিল। আফসোসের কথা সোশিয়াল ডেমোক্রাটদের জন্তে কেউ অশ্রুবর্ষণ করছে না। কমিউনিস্টদের জন্তেও না। অথচ কেউ যে নাৎসীদের পছন্দ করছে তাও নয়। আমি ব্রিটেন ফ্রান্সের দিক থেকেই বলছি।” মানস যতদূর জানে।

“ভাই মানস,” সোম্যার কণ্ঠস্বরে বিষাদ, “আমি ঘর ছেড়ে, কলেজ ছেড়ে বেরিয়েছিলুম উনিশ বছর আগে একবছরের মধ্যে স্বরাজ জিতে নিতে। জয় এখনো হয়নি। ইংরেজরা জাঁকিয়ে বসে আছে। আমাদের যা দিয়েছে তা প্রাদেশিক স্বায়ত্তশাসন। স্বরাজ পেতে আরো উনিশ বছর লাগবে কি না কে বলতে পারে? যে দেশ রাশিয়ার মতো স্বাধীন নয় সে দেশ লেনিনের মতো বিপ্লবের স্বপ্ন দেখছে। বিপ্লবের পরেও কমিউনিস্টদের দশবছর কেটে গেল মনঃস্থির করতে রাশিয়াকে কলকারখানা দিয়ে শিল্পায়িত করা সমীচীন হবে কি না। সেই পদক্ষেপটি নেওয়া যখন হলো তখন দেখা গেল গ্রাম ছেড়ে মানুষ চলে আসছে শহরে, চাষের জন্তে ক্ষেতমজুর বিরল। ফসল যা ফলে সরকার তা জোর করে কেড়ে নিয়ে আসেন, চাষীকে ধরিয়ে দেন কাগজের নোট। তা দিয়ে সে কম দামে পরনের কাপড় কিনতে পারে না। জুতো কিনতে পারে না। হুন কিনতে পারে না। কেরোসিন কিনতে পারে না। চাষী তাই যেটুকু তার খোরাকের জন্তে প্রয়োজন সেইটুকুই ফলায়। ফলে শহরের খোরাকে টান পড়ে। শ্রমিকরা খেতে পেলে তো গতির খাটাবে। দুর্ভিক্ষে বহু লোক মারা যায়। এটা কিন্তু মানুষের তৈরি দুর্ভিক্ষ। লেনিন হলে শিল্পায়নে ঢিলে দিতেন। এক কদম পেছিয়ে যেতেন, যাতে পরে দুই কদম এগোনো যায়। কিন্তু কর্তা এখন লেনিন নন, স্টালিন। তিনি পেছোবার পাত্র নন। ক্রমাগত এগিয়ে যাওয়াই তাঁর নীতি। এক পরিকল্পনার পর আরেক পরিকল্পনা। এই হলো তাঁর রীতি। সাখীদের পরামর্শ অগ্রাহ্য করে তিনি চাষের জমিকেই চাষীর হাত

থেকে কেড়ে নিলেন। এখন থেকে খামার হলো খাসমহলের খামার বা এজমালী খামার। চাষীদের পরিণত করা হলো মজুরে। নারাজ হলো যারা তাদের চালান করা হলো হাজার হাজার মাইল দূরে। সেখানে তারা বেগার খাটে, খাল কাটে। বাড়তি লোকজনকে সৈন্তদলে ভর্তি করে নেওয়া হয়। এমনি করে হয় বেকার সমস্তার সমাধান। অপোজিশন বলে কোনো পদার্থই নেই। যারাই অপোজ করবে তারাই কোতল হবে। হলোই বা তারা সর্বত্যাগী বিপ্লবী কমিউনিস্ট। এই যদি হয় স্বরিত শিল্পায়নের মূল্য তবে এ মূল্য দিতে স্বাধীন ভারত কি রাজ্যী হবে? আকাশে কেলা গড়ে কার কী লাভ? এত দলাদলিই বা কেন?”

“এখন থেকেই পরস্পরকে বলা হচ্ছে, আমরা রেভোলিউশনারী, তোমরা রিফরমিস্ট। অথচ কাজ দিয়ে বোঝানোর এখনো অনেক দেরি। না, ইংরেজরা স্বেচ্ছায় যাচ্ছে না। বড়লাট চিঠি লিখে জানিয়ে দিয়েছেন যে যুদ্ধে যারা যোগ দিতে চায় তাদের যুদ্ধক্ষেত্রে পাঠানো হবে না, ভারতেই যে যার কর্মস্থলে থাকবে ও শাসন-কার্য চালিয়ে যাবে। সেবারকার যুদ্ধে তো বহু ইংরেজ যুদ্ধক্ষেত্রে যায়। তাদের জায়গায় ভারতীয় অফিসারদের বসানো হয়। এবার কিন্তু ওরা আরো জাঁকিয়ে বসবে।” মানসের খেদ।

“দেখলে তো? ওঁরাও তোমার মতো নীরব দর্শক। শেফার্ড আর বালো। যত রাজ্যের ভাবনা যেন তোমার একার। সেই যে বলে, যার বিয়ে তাব মনে নেই পাড়াপড়শীর ঘুম নেই। বিপদটা তো বিলেতের। দুর্ভাবনাটা ভারতের।” যুথিকা কটাক্ষ করে।

মানস তা স্বীকার করবে কেন? বলে, “বিপদটা বিবাহস্থত্রে ভারতেরও। বিবাহবিচ্ছেদ তো হয়নি, কেউ চায়ও না। চাইলে এই মুহূর্তে স্বাধীনতা ঘোষণা করতেন। চাইছেন যেটা সেটা ব্রিটেনের সঙ্গে ডিভোর্সও নয়, সেপারেশনও নয়। প্রাদেশিক স্বায়ত্তশাসনের পরের ধাপ, কেন্দ্রীয় স্বায়ত্তশাসন। বাকীটা যুদ্ধজয়ের পর। কিন্তু যুদ্ধে যদি হার হয় তখন কী হবে? টার্কি আর ইরানের ভিতর দিয়ে জার্মানরা এসে হাজির হবে। তখন বিপদটা কার?”

“সে রকম দুর্ভাগ্য যদি হয় তবে আমরা সেই মুহূর্তেই স্বাধীনতা ঘোষণা করব ও সঙ্গে সঙ্গে যুদ্ধঘোষণা।” সৌম্যর কণ্ঠস্বরে প্রত্যয়।

“তখন তোমাদের অহিংসা কোথায় থাকবে?” মানস জেরা করে।

“দেশের লোক যদি হিংসা দিয়ে হিংসাকে রুখতে না পারে তবে অহিংসা দিয়ে প্রতিরোধ করবে। তার জন্তে জনগণকে তৈরি থাকতে হবে।” সৌম্য উত্তর দেয়।

“অহিংসা কি অব্যর্থ ?” মানস মানতে চায় না।

“রাশিয়ার জনগণ যদি একজোট হয়ে নেপোলিয়নের সৈন্যদলকে রাশিয়া থেকে ফিরে যেতে বাধ্য করে থাকতে পারে তবে হিটলারের সৈন্যদলকেও ভারতের জনগণ ভারত থেকে ফিরে যেতে বাধ্য করতে পারবে। জনগণের অসাধ্য কী আছে, যদি ওরা একজোট হয় ? যদি একজোট হয়ে শহরকে শহর গ্রামকে গ্রাম খালি করে দিয়ে যায়, থাক করে দিয়ে যায় ? জার্মানরা কার কাছে সহযোগিতা আশা করবে, সবাই যদি অসহযোগী হয় ?” সোম্যও তর্ক করে।

“কার্যক্ষেত্রে দেখবে সবাই একজোট নয়, অনেকেই সহযোগিতা করতে রাজী। না, সোম্যাদা, ভারত রাশিয়া নয়। যে ভুলটা কমিউনিস্টরা করেছে সেই ভুলটা তোমরাও করছ। এ দেশটা কেবল যে পরাধীন তাই নয়, জরাজীর্ণ ও দুর্বল। তার উপর জাত নিয়ে, ধর্ম নিয়ে, ভাষা নিয়ে শতধা বিভক্ত। বাইরে থেকে জোড়াতালি দেওয়া এক, আর ভিতর থেকে একতাবদ্ধ করা আরেক। তার লক্ষণ এখন পর্যন্ত দেখা গেল না। হঠাৎ একদিন স্বতঃস্ফূর্তভাবে দেখা দেবে এটা হলো বিশ্বাসের কথা। তুমি বিশ্বাস কর, আমি করিনে। হিসাব নিলে দেখবে বেশীর ভাগ লোকই বিশ্বাস করে না।” মানস স্থান্শিত।

“যারা এখন করে না তারাও ক্রমে ক্রমে করবে, যখন দেখবে যে কতক লোক বিশ্বাসের জোরে অকুতোভয়।” সোম্যও স্থান্শিত।

যুথিকা বলে, “এখন থেকে এ নিয়ে তর্ক করে কার কী লাভ ? ইংরেজদের হারতেও অনেক দেরি, জিততেও অনেক দেরি। ওদের হাবভাব দেখে মালুম হয় না যে ওরা একটুও বিচলিত। ওরা ভালো করেই জানে যে পেছনে মামা আছে। শুনছি নাকি চার্চিলকেই প্রধানমন্ত্রী কবা হবে। আমেরিকা তাঁর মামাব বাড়ী।”

সোম্য তা শুনে খুশি হয়। “তা হলে জমবে ভালো। ভারতের অত বড়ো অকপট বন্ধু আর নেই। খোলাখুলি জানিয়ে দেবেন যে স্বাধীনতা তিনি থাকতে হবে না। আর যুদ্ধকালে তিনি ছাড়া আর কে আছে যে ইংরেজদের মনের জোর জোগাবে ? চার্চিল থাকতে আমাদের মুক্তি নেই জানলে আমাদেরও মোহভঙ্গ হবে, আমরাও সহযোগিতায় মুক্তি নেই জেনে অসহযোগের চূড়ান্ত পর্যায়ে যাব। হিটলারের সঙ্গে নয়, চার্চিলের সঙ্গেই সংগ্রাম।”

মানস আঁতকে ওঠে। “কিন্তু এটা কি তোমরা বুঝতে পারছ না যে চার্চিল যার হৃশমন হিটলার তার দোস্ত ? আর হিটলার যার দোস্ত হিটলারের পরাজয়ে তারও



পরাজয়? হিটলার যদি জেতে তা হলেও ভারতের ক্ষতি। হিটলার যদি হারে তা হলেও ভারতের ক্ষতি। এই সঙ্কটে পলিসি নির্ধারণ করা একেবারেই সহজ নয়। ইংরেজরা হেরে গেলেও ওদের জাহাজগুলো ওরা কিছুতেই হিটলারের হাতে পড়তে দেবে না। কানাডা অস্ট্রেলিয়ায় চালান করে দেবে। সেগুলো হাতে গেলে জার্মানরা সমুদ্রপথে বম্বে, মাদ্রাজ, কলকাতায় এসে হাজির হতো। তিন দিক থেকে ঘিরে ফেলত ভারতকে। কোন্ দিকে তোমরা পালাতে? কোন্ দিকটা খালি করে দিতে, থাক করে দিতে? সমুদ্রে ইংরেজের হার নেই, সে তার নৌবলের সাহায্যে আবার তার রাজ্য উদ্ধার করবে। জার্মানরা যদি টার্কি ও ইরান পেরিয়ে আসে জাহাজের অভাবে বেকায়দায় পড়বে। জার্মানদের হাত থেকে ইংরেজরাই আমাদের রক্ষক। তোমরা যা করতে চাও যুদ্ধের পরে কোরো। যুদ্ধকালে চলুক তার প্রস্তুতি। কিন্তু প্রয়োগ নয়।”

“তোমার কথাগুলো মডারেটদের মতো শোনাচ্ছে। ওঁরাও মন্তব্য দিচ্ছেন সেই মর্মে। কংগ্রেসে এখন নানা মুনির নানা মত। এক মুনি বলেছেন, এই তো সুযোগ এ সুযোগ হাতছাড়া করলে আর কখনো ফিরবে না। যুদ্ধে জিতে ইংরেজ জগদ্বলের মতো চেপে বসবে। তখন তাকে হটাতে হলে আরো দীর্ঘকাল সংগ্রাম চালাতে হবে, আরো কতবার জেল যেতে হবে, আরো কত লোককে প্রাণ দিতে হবে। সময় আর জোয়ার কারো জন্তে সবুর করে না। আরেক মুনি বলেছেন, হিটলার যদি মরে তো মরণকামড় দিয়ে মরবে। ইংরেজের নখ দাঁত ভেঙে দিয়ে যাবে। তখন সে স্বাধীনতা দিতে সহজেই রাজী হবে। নয়তো তখন আমাদের চূড়ান্ত সংগ্রাম। আরো এক মুনি আছেন, তিনি বলেছেন, হিন্দু মুসলমান যদি এক হয় তো স্বাধীনতা পেতে কতক্ষণ! যদি এক না হয় তো ইংরেজ চলে গেলেই গৃহযুদ্ধ। তাকে ধরে রাখাই সুবুদ্ধি। মুসলমানদের যা মনোভাব তা স্বাধীনতার প্রতিকূল। এত বড়ো একটা সম্প্রদায়কে সঙ্গে না নিয়ে সংগ্রামে নামতে যাওয়া যেন অকূলে কাঁপ দেওয়া। সমুদ্র থেকে অমৃত উঠে আসবে না গরল উঠে আসবে কে জানে?” সৌম্যও চিন্তিত।

“ভাবনার কথা বইকি।” মানস বলে, “আমার তো মনে হয় প্রকৃষ্ট পলিসি হচ্ছে মুসলমানদের সঙ্গে নিয়ে চলা। তার জন্তে যদি সাত বছর অপেক্ষা করতে হয় তো সাত বছর অপেক্ষা করাই সমীচীন। লীগপন্থী মুসলমানরাই যে একমাত্র মুসলমান তা অবশ্য মেনে নেওয়া যায় না। তা বলে কংগ্রেসপন্থী মুসলমানরাই যে একমাত্র মুসলমান তাও নয়। মোটের উপর বলতে গেলে মুসলমানরা মনে করে ইংরেজরা বিদায় নিলে হিন্দুরাই তাদের শৃঙ্খল স্থান পূরণ করবে, মুসলমানরা যে তিমিরে সেই

তিমিরে। তাদের বক্তব্য শ্রুত স্থান পূরণ করবে দুই পক্ষ মিলে, স্বতরাং দুই পক্ষের মধ্যে আগে থেকেই একটা মিটমাট চাই। তা যদি সম্ভব না হয় তবে দুই পক্ষেই একটা সেপারেশন চাই। তাদের মতামত উপেক্ষা করে ইংরেজের সঙ্গে সংগ্রামে তাদেরও জড়াতে গেলে তারাও আপত্তি করবে যেমন আপত্তি করছে কংগ্রেস, ভারতীয়দের মতামত উপেক্ষা করে ব্রিটেন জার্মানীর সঙ্গে যুদ্ধে ভারতকেও জড়িয়েছে বলে।”

“এইখানে একটু সংশোধন দরকার। ব্রিটেন ভারতকেও যুদ্ধে জড়িয়েছে বলে কংগ্রেস আপত্তি করছে তা নয়, ভারতের জনগণকেও যুদ্ধে জড়িয়েছে বলে। ভারতীয়রা কেন রিজুট হবে, কেন ট্যাক্স দেবে, কেন খাত্ত পরিধেয় বিদেশে পাঠিয়ে ভাতকাপড়ের অভাবে কষ্ট পাবে? এটাই হলো হিন্দু মুসলমান নির্বিশেষে সর্বসাধারণের বক্তব্য।” সৌম্য বুঝিয়ে বলে।

“মুসলমান বন্ধুরা বলছেন কংগ্রেস যদি ইংরেজের সঙ্গে সংগ্রামে নামে তাঁদেরও তো জড়াবে। এই ধরো, তোমরা যদি মস্তিষ্ক বর্জন কর ওঁদেরও তো মস্তিষ্কের আশা ছাড়তে হবে। কাউন্সিল অ্যাসেম্বলি যদি বন্ধ থাকে তবে ওঁরাও তো সেখানে ঢুকতে পারবেন না, লোকসান দেবেন।” মানস বলে।

সৌম্য হুঃখিত হয়ে বলে, “এর মধ্যেও হিন্দু মুসলমান! সরকার যদি কংগ্রেসের প্রস্তাবে রাজী হয়ে যান তো মন্ত্রীরা পদত্যাগ করতে যাবেনই বা কেন? আর কাউন্সিল অ্যাসেম্বলি বন্ধ হবেই বা কেন? মুসলিম লীগের সঙ্গে কোয়ালিশনের দরজা তো খোলাই থাকবে, যদি না তাঁরা ডাক্তার খান সাহেব, রফি আহমদ কিদোয়াই, সৈয়দ মাহমুদ প্রভৃতি কংগ্রেসপন্থী মুসলমানদের বর্জন করার জন্তে জেদ ধরেন। যদি সরকারের সঙ্গে মিটমাট না হয় তবে কংগ্রেসকে আবার বনবাসে যেতে হবেই, মন্ত্রীদেরও শ্রীবরবাস অবধারিত। হিন্দু মুসলমান নির্বিশেষে। কাউন্সিল অ্যাসেম্বলি বন্ধ হলে কংগ্রেসপন্থী মুসলমান সদস্যদেরও কম লোকসান হবে না। উপরন্তু তাঁরাও জেলে যাবেন। তাঁরা আমাদের স্বত্বহুম্বের সাথী। আর এঁরা তো কেবল কোয়ালিশনের বেলায়ই আমাদের সঙ্গে, জেলযাত্রার বেলায় নয়।”

এর পরে ওঠে গান্ধীজীর প্রসঙ্গ। “তুমি যাচ্ছ তবে ওঁর সঙ্গে সাক্ষাৎ করতে?” মানস সুধায়।

“না গিয়ে সোয়ান্তি পাচ্ছিনে। উনিই আমাদের দেশের বিবেক। আমাদের যুগেরও। কাঁহা কাঁহা মূলক থেকে তাঁর কাছে চিঠি আসে। জিজ্ঞাসুরা উদ্গ্রীব। এই সঙ্কটে তাঁর কী নীতি ও পন্থা? তাঁদের মধ্যে যারা অহিংস তাঁদেরই বা করণীয়

কী ? যুদ্ধে যোগ দেওয়া উচিত, না যুদ্ধ প্রতিরোধ করা উচিত ? স্বাধীন দেশের নাগরিক যারা তাঁরাও চোখ বুজে কাঁপ দিতে নারাজ। তাঁরাও উপলব্ধি করেছেন যে যুদ্ধ ব্যাপারটা একেবারে মিটে যাবার নয়। পঁচিশ বছর আগেও তো বেধেছিল, বলা হয়েছিল যে এই যুদ্ধই শেষ যুদ্ধ। কিন্তু একটা শেষ হতে না হতেই বিশ বছর ব্যবধানে আর একটা শুরু হয়েছে। এবারেও শোনা যাচ্ছে এই যুদ্ধই শেষ যুদ্ধ। বিশ্বাস করা শক্ত। মূল কারণগুলো যদি একই রকম থাকে তবে যুদ্ধ বার বার বাধবেই। আর মূল কারণগুলো কাইজার বা হিটলার বা অল্প কোনো ডিকটেটরের অস্তিত্ব নয়, সভ্য মানুষ পড়ে গেছে ধনপতি আর রণপতিদের ফাঁদে। ধনপতিরা সৃষ্টি করেছেন অর্থনৈতিক সঙ্কট। রণপতিরা সে সঙ্কটে দিশাহারা হয়ে রণপতিদের হাতে আত্ম-সমর্পণ করেছেন। অস্ত্রসস্ত্রার বৃদ্ধি করলেই নাকি বাজার তেজ হবে, মন্দা দূর হবে, কেউ বেকার থাকবে না, কাজের সঙ্গে সঙ্গে খোরাকও জুটবে। কিন্তু সবাই যদি অস্ত্রবৃদ্ধি করতাই থাকে যুদ্ধ একদিন আপনা আপনি বেধে যাবে, যে-কোন একটা উপলক্ষে। তখন তারস্বরে চিংকার উঠবে, ওরাই বাধিয়েছে, আমরা বাধাইনি। আমরা ধোয়া তুলসী পাতা। এস, কাঁপ দাও, না দিলে কনসক্রিপশন। সভ্য মানুষ এখন মিলিটারি-ইণ্ডাস্ট্রিয়াল কমপ্লেক্সের হাতের পুতুল। কোথায় তার স্বাধীনতা। ইংলও ফ্রান্সও স্বাধীন নয়। তাদের স্বাধীনতাও যন্ত্রচালিতের স্বাধীনতা। তেমন স্বাধীনতা নিয়ে আমরা করবই বা কী ? তাদের মতো যুদ্ধ ? এই তো ? আমরা চাই যুদ্ধ না করার স্বাধীনতা। ভারতের মতো একটা বৃহৎ দেশ যদি বেঁকে বসে তা হলে ধনপতি ও রণপতিদের খেলা মাং। ইতিহাসে একটা নতুন যুগ আরম্ভ হবে। ভারত তার নেতা। গান্ধীজী তার প্রোফেট। সভ্যতারও হবে নয়া মোড়। সমাজেরও নতুন শৃঙ্খলা। আমরা নিছক রাজনৈতিক স্বাধীনতার জন্তে সংগ্রাম করছি, মানস। আমরা ওদের ওই মিলিটারি-ইণ্ডাস্ট্রিয়াল কমপ্লেক্সের থেকে সরে থাকতে চাই। ওটা একটা মারাত্মক প্লেগ। যার থেকে ওরা নিজেরাও ভুগছে, আমাদেরও ভোগাচ্ছে। এরোপ্লেন দেখে উচ্ছ্বসিত হচ্ছে। জানো, ওইসব বিমান রাতারাতি বোমারু বিমানে রূপান্তরিত হবে ? মোটরগাড়ীর কারখানা থেকে বেরিয়ে আসবে ট্যাঙ্ক। জাহাজের ইয়ার্ড থেকে সাবমেরিন বার টর্পেডো। কেন, তোমার রেলপথও তো মিলিটারির জন্তে তৈরি। যুদ্ধ বাধলে প্রত্যেকটাই হবে সৈন্য চলাচলের পথ। তেমনি তোমার টেলিগ্রাফের তার।” বলতে বলতে সৌম্য অগ্নমনস্ক হয়ে যায়।

ওদিকে টর্পেডোর উল্লেখ থেকে যুথিকারও ভাবান্তর। সে বলে গুটে, “বেচারি মিলি ! ভালোয় ভালোয় পৌছতে পারলে বাঁচি !”

ইতিমধ্যে মিলি এডেন থেকে কেবল করে তার বাবাকে জানিয়েছিল যে কনভয়ের ব্যবস্থা হয়েছে। তার জাহাজ স্বেচ্ছা হয়ে যাচ্ছে। ক্যাপটেন মুস্তাফী কেবল পেয়ে ছুটে এসেছিলেন মানস আর যুথিকাকে দেখাতে। খবরটাতে কে না খুশি হবে! তবু একটু ‘কিন্তু’ থেকে যায়। সেই কিন্তুের নাম ‘মুসোলিনি’। তিনি এখনো যুদ্ধে নামেননি। গড়িমসি করছেন। যুদ্ধে নামলে তাঁর নিজের সাগরপারের উপনিবেশগুলির জলপথও টর্পেডোসঙ্কুল হবে। তিনি যতদিন দেরি করবেন ততদিনে মিলি ও স্কুয়ারও সাগর পার হয়ে থাকবে। কিন্তু যদি হঠাৎ হিটলারের নির্দেশে যুদ্ধে নামেন? স্তবরাং না আঁচালে বিশ্বাস নেই। যুদ্ধ জিনিসটাই সারপ্রাইজের ভরা। কারো সাধ্য নেই যে ভবিষ্যদ্বাণী করে বা করলে তা ফলে।

“ওরা পৌঁছে যাবে ঠিক।” মানস আশ্বাস দেয়। “কনভয় আছে কী করতে? বিজ্ঞান যেমন মারণাস্ত্র বানিয়েছে তেমনি তার মুশকিল আহ্‌মানও বাতলে দিয়েছে। বোমারু বিমানও যেমন হানা দেয় বিমানবিন্দুসমী কামানও তেমনি আসমান থেকে ওদের পেড়ে আনে। মজা করে দেখবে ওসব দত্তবিশ্বাস, কিন্তু দেখবে কী করে, যদি গন্ত খুঁড়ে আশ্রয় নেয়?”

‘মজা!’ যুথিকা শিউরে ওঠে, “তোমার কাছে মজা! আর ওদের কাছে জীবন মরণ সমস্ত।”

সৌম্য এইবার বিদায়ের উত্তোগ করে। বলে সেগাও থেকে ফিরে আবার দেখা করবে। ইতিমধ্যে মিলদের নিরাপদে পৌঁছানোর খবর এসে থাকবে। যাবার আগে সে একবার মুস্তাফীদের ওখানে ওর খোঁজ খবর নেবে।

“দাদা,” যুথিকা পই পই করে বলে, “কলকাতায় জুলির সঙ্গে দেখা করতে ভুলো না। ওকে যেমন করে হোক বিপ্লবের পথ থেকে নিবৃত্ত করা চাই।”

“উন্টো ফল হবে, বোন। জুলি এমন মেয়ে যাকে বাধা দিলে অবাধ হয়, বোঝাতে গেলে অবুঝ হয়, নিবৃত্ত করলে প্রবৃত্ত হয়। সাঁকো নাড়িস্নে বললে সাঁকো নাড়ে। আমার চেয়ে ওর বিপ্লবী দাদাদের উপরে ওর আরো বেশী বিশ্বাস। ওঁরা মনে করেন বিপ্লবের দিন ঘনিয়ে আসছে, গণ অভ্যুত্থান আসন্ন, জুলিও তাই মনে করে। বেশ তো, ওঁদের কথাই সত্য হোক। আমাদের দিন আসবে, যখন সরকারের সঙ্গে কথাবার্তার পালা সাদৃশ্য হবে। যখন কংগ্রেস এক হয়ে মহাত্মার পেছনে দাঁড়াবে। যখন মহাত্মা অহিংসার পরীক্ষা নেবেন, পরীক্ষায় সন্তুষ্ট হবেন, তার পরে সংগ্রামের সঙ্কেত দেবেন। জুলিকে এসব বোঝানো যাবে না, বোন। তা হলেও আমি যাব ওকে দেখতে, ওর মাকেও দেখতে! ওঁরা আমার আপন জন।” সৌম্য আবেগের সঙ্গে বলে।

“হ্যাঁ, তোমার মতো আপন জন আর কে আছে ওঁদের! তুমিই শেষ ভরসা। কিন্তু তোমার তো দুশ্চর তপস্যা। সিদ্ধিলাভ না হলে তপোভঙ্গ করবে না। রজ্জা মেনকাও পরাস্ত হয়। জুলি তো তেমন হুন্দরী নয়। রূপে তোমায় ভোলাবে না। পারে তো একদিন ভালোবাসায় ভোলাবে। ভালোবাসা ফল্গুধারার মতো অন্তঃসলিলা। কিন্তু ওর বৈধব্যের সংস্কার আরো প্রবল।” যুথিকার প্রত্যয়।

“আমার মনে হয় ওটা বৈধব্যের সংস্কার নয়, পাতিব্রতের সংস্কার। পতির মৃত্যু হলেও নারী পতিব্রতা থাকে। তা ছাড়া জুলি ওর স্বামীকে প্রাণ দিয়ে ভালোবাসত। সে ভালোবাসা তো স্বামীর অবর্তমানে পাত্রান্তরিত হতে পারে না। আমি ওর সমস্তাটা বুঝি বলেই নীরব থাকি।” সৌম্য বলে আবেগভরে।

“আচ্ছা, সৌম্যদা, এটা কী করে সম্ভব! দুলাল আর জুলি প্রেমে পড়ে বিয়ে করেনি, করেছে পিতামাতার নির্বন্ধে। বিয়ের পরে স্বামীস্বী সম্পর্কও পাতায়নি। তার আগেই দুলাল বিলেত চলে যায়। জুলি যখন ওদেশে যায় তখন মায়ের সঙ্গেই থাকে। স্বামীর সঙ্গে নয়। তা হলে ভালোবাসা জন্মায়ই বা কী করে, বৈধব্যের দশ বছর বাদেও বেঁচে থাকেই কিসের জোরে? আমার তো মনে হয় ওটা নিছক হিন্দু সংস্কার, ব্রাহ্ম মেয়েরাও তার থেকে মুক্ত নয়।” মানস রায় দেয়।

“এমন না হলে ইনটেলেকচুয়াল!” সৌম্য পরিহাস করে। “নারীর হৃদয় কি পুরুষের মস্তিষ্ক দিয়ে বিশ্লেষণ করা যায়? যুথিকা তোমার চেয়ে ঢের ভালো বোঝে। মেয়েদের ভালবাসা দেহধর্মের অপেক্ষা রাখে না। তা যদি বলো, পুরুষের ভালোবাসাও কি দেহধর্মের অপেক্ষা রাখে? প্লেটোনিক প্রেম একটা কথার কথা নয়, এর অসংখ্য দৃষ্টান্ত আছে! এটা বিয়ের পর স্বামীস্বীতেও হতে পারে। গান্ধীজীও বিশ্বাস করেন যে বিবাহের পর এটাই আদর্শ। তিনি তো তাঁর শিষ্যদের বিয়ে করতে বারণ করেন না, যদি সে বিবাহ প্লেটোনিক হয়। আমরা অবশ্য তেমন কোনো অঙ্গীকার করতে পারিনে। একতরফা অঙ্গীকারের মূল্য কতটুকু। দুই তরফের অঙ্গীকারও ক্ষণভঙ্গুর।”

তিনজনেই হাসে। দীপক আর মণিকা একটু দূরেই খেলা করছিল। তারা জানতে পায় না কারণটা কী। কেন এত হাসি। সৌম্যকে উঠতে দেখে ওরা দু’জনেই ছুটে আসে।

মণি জেঠুর কোলে লাফিয়ে ওঠে। দীপক গা ঘেঁষে দাঁড়ায়। বলে, “জ্যাঠামশাই, তুমি এবার আমার জন্তে কী আনবে?”

“তুমিই বলো কী আনলে তুমি খুশি হবে?” সৌম্য তাকে জড়িয়ে ধরে।

“আমি ভাবছি একটা সার্কাসের দল করব। তাতে থাকবে হাতী ঘোড়া বাঘ

বানর ডালকুস্তা টিয়াপাখী পায়রা এমনি সব জীবজন্তু। সত্যিকার নয় কিন্তু। কাচের বা চীনেমাটির। তোমার জন্তে আমি একটা নকশা তৈরি করছি। তাতে দেখাব বাঘের সঙ্গে হাতীর লড়াই। আচ্ছা, জ্যাঠামশায়, বাঘের সঙ্গে যদি হাতীর লড়াই হয় কে জেতে আর কে হারে?” দীপকের প্রশ্ন।

“বাঘই জিতবে। বাঘ হলো রয়াল বেঙ্গল টাইগার।” সৌম্যর উত্তর।

“কিন্তু যদি ঈগলপাখীর সঙ্গে বাঘের লড়াই হয় তা হলে কে জিতবে কে হারবে?” দীপক আবার প্রশ্ন করে।

“সেইটেই তো বাধতে যাচ্ছে, বাবা। জার্মান ঈগলের সঙ্গে ব্রিটিশ সিংহের লড়াই। সিংহ বলছে, ভাই হাতী, এস, তুমিও আমার হয়ে লড়াই। হাতী বলছে, তুমি যে আমাকে হারিয়ে দিয়ে দাবিয়ে রেখেছ, আগে আমার পিঠ থেকে নামো দেখিনি। সিংহ এখন কী করবে? হাতীর পিঠ থেকে নামবে? না হাতীর পিঠে চেপেই ঈগলের সঙ্গে লড়াই?” সৌম্য বলে ধাঁধার মতো করে।

দীপক ভাবনায় পড়ে! চট করে উত্তর দিতে পারে না। তার মা তাকে উৎসাহ দেয় নিজের বুদ্ধি খাটাতে। আর তার বাবা উৎকর্ষ হয়ে উত্তরের প্রতীক্ষা করে।

“হাতীর সঙ্গে বাঘের যদি বন্ধুতা না হয়, শত্রুতা চলতে থাকে তা হলে ঈগল এসে হেঁা মেরে ছটোকেই ধরে নিয়ে যাবে, গরুড় যেমন করেছিল গজ আর কচ্ছপকে। তার পর এক পর্বতের চূড়ায় বসে একটার পর একটাকে খাবে।” দীপক উত্তর দেয়।

মানস বলে ওঠে, “সাবাস!” সৌম্য একেবারে চুপ। যুথিকা মনে মনে গর্বিত হয় ওইটুকু ছেলের প্রত্যুৎপন্নমতি দেখে।

মণিকে ঘাড় থেকে নামিয়ে চুমু খেয়ে সৌম্য দীপককে ছাড়া দিয়ে বলে, “হাতীর ইচ্ছা নয় লড়াই, সে চায় লড়াই খামিয়ে দিয়ে স্বাধীন হতে।”

## ॥ বারো ॥

টেনিস র‍্যাকেট হাতে মানস বেরিয়ে পড়ে ক্লাবের অভিমুখে। সৌম্যকে বলে,  
“তোমাকে আমি এগিয়ে দিই। আমাকে তুমি এগিয়ে দাও।”

“ওনে থাকতে যেমন আমরা প্রায়ই করতুম। আচ্ছা, মানস, তোমার কি মনে আছে দু’জনেই আমরা লীগ অভ নেশনস ইউনিয়নের সভ্য হয়েছিলুম? একবার কি দু’বার গিয়ে তুমি ছেড়ে দাও। আমি নিয়মিত ওদের সভায় যেতুম। কোয়েকারদের সঙ্গেও আমার বিশেষ ঘনিষ্ঠতা ছিল। সে সম্পর্ক এখনো ছিন্ন হয়নি। ওঁরা কেউ চাননি যে আবার মহাযুদ্ধ বাধে। মানুষের পক্ষে যা সম্ভব ওঁরা তা করে এসেছেন। ওই ধ্বংসের শাস্তিবাদী জার্মানীতেও ছিলেন ও আছেন। অসিয়েটস্কি তো বিদেশ থেকে প্রচারকার্য চালানোর চেয়ে দেশে ফিরে এসে কারাবাসের ঝুঁকি নিলেন। বললেন বাইরে থেকে তাঁর কর্তৃত্ব কাঁপা শোনাবে। যা কাঁপা শোনায় তাতে কেউ কান দেয় না। কারাগারেই তাঁর মৃত্যু হয়। বেঁচে থাকলে তো তিনিও হতেন যুদ্ধকালে যুদ্ধবিরোধী কারাবাসী। সময় যখন আসবে তখন তুমি দেখবে আমিও নীরব দর্শক নই। আমাকেও কারাবাস করতে হবে। সেটা যদি দীর্ঘমেয়াদী হয় আমিও তো অসিয়েটস্কির মতো চরম মূল্য দিয়ে কারামুক্ত হতে পারি। যমরাজ তাঁর দূত পাঠিয়ে আমাকে ব্রিটিশ রাজের কবল থেকে মুক্ত করতে পারেন।” সৌম্য ভাবে উচ্চস্বরে।

মানস দুঃখ পেয়ে বলে, “না, না, জেলখানায় তোমার উপর কেউ অত্যাচার করবে না। তবে তুমি যদি গান্ধীজীর মতো অনশন কর সেকথা আলাদা। তিনি তো তোমাদের সবাইকে বারণ করে দিয়েছেন অনশন করতে। একমাত্র তিনিই করতে হয় কবলেন। তোমাকে জেলে যেতে হবেই বা কেন? কংগ্রেস যদি

কেন্দ্রীয় সরকারে যোগ দেয় তবে তো কারো জেলে যাবার প্রশ্নই ওঠে না। কংগ্রেস ক্ষমতার আসনে থাকতে কেই বা তোমাদের বন্দী করবে? কেনই বা করবে?”

“সেটা তুমি ইংরেজ ও কংগ্রেস এই দুই শিবিরের উপর ছেড়ে দাও। আমবাও ছেড়ে দিয়েছি। গান্ধীজী কংগ্রেসের উপর কোনরকম চাপ দিচ্ছেন না। শুধু বলছেন, আমাকে আমার পথে একলা চলতে দাও। তিনি একজন বিবেকচালিত সত্যাগ্রহী। তাঁর বিবেকের নির্দেশ পেলে তিনি সত্যাগ্রহ করতে পারেন। ভুলে যেয়ো না যে তিনি কেবল স্বদেশের মুক্তি আন্দোলনের নেতা নন। সারা বিশ্বের শান্তিবাদীরাও তাঁর দিকে একদৃষ্টে তাকিয়ে রয়েছেন। তাবা প্রত্যাশা করেন তাঁব কাছ থেকে বিবেকচালিত আপত্তিকারীর চেয়ে কিছু বেশী। তিনি যাব নাম দিয়েছেন সত্যাগ্রহ। যার প্রথম পদক্ষেপ অহিংস অসহযোগ। তিনি কি তাদের সেইভাবে মনের জোর জোগাবেন না? সঙ্কটকালে তিনি কি তাঁদের হতাশ করবেন? তাঁর মতো শান্তিসংগ্রামের নেতা তাঁরা পাবেন কোথায়? স্বাধীনতা সংগ্রামের নেতার অভাব হবে না, সব দেশেই তেমন নেতা আছেন। কিন্তু-শান্তিসংগ্রামের নেতৃত্ব নিতে পারেন একমাত্র গান্ধীজী। সেক্ষেত্রে তিনিই এক ও অধিতীয়। কংগ্রেস যদি-বা তাঁকে ছাড়ে আমি কিন্তু তাঁকে ছাড়ব না। আমবা বিশ্বাস কবি যে শান্তির সংগ্রামই স্বাধীনতার সংগ্রাম, যুদ্ধকালে। শান্তির বিনিময়ে যে স্বাধীনতা সেটা সত্যিকারের স্বাধীনতা নয়। কংগ্রেস যুদ্ধকালে সরকার চালিয়ে সেটা ঠেকে শিখবে। তোমারও চোখ ফুটবে। হিটলারকে হিটলার না হয়ে কেউ হারাতে পারবে না। নাৎসীদের নাৎসী না হয়ে কেউ সায়েন্স্টা করতে পারে না। ইংরেজ ফরাসীও সমান হিংস্র হলে উঠবে, তাদের সঙ্গে জুটে কংগ্রেসীরাও। ইংরেজের সঙ্গে আবার যদি বিরোধ বাধে তখন আর সত্যাগ্রহের পথ খোলা থাকবে না। ডাক দিলে জনগণ সাড়া দেবে না।” সৌম্য জানিয়ে রাখে।

“আচ্ছা, সৌম্যদা,” মানস প্রসঙ্গ পরিবর্তন করে, “মিস ম্যানিংকে তোমার মনে আছে? ষাঁর বান্ধবী মুরিয়েল লেসটারের ভাই কিংসলীর নামে কিংসলী হল। যেখানে গান্ধীজী উঠেছিলেন। রাউণ্ড টেবিল কনফারেন্সের সময়।”

“মনে আছে বইকি! কোয়েকারদের সভায় তো প্রায়ই ওঁব সঙ্গে দেখা হতো। কালেভদ্রে এক আধখানা চিঠিও তো পাই। হাতে বোনা কাপড়ের পোশাক পরতেন, হাতে গড়া চামড়ার জুতো পায়ে দিতেন, হাতে তৈরি ব্রাউন ব্রেড খেতেন। ভারতের বন্ধু ও গান্ধীজীর ভক্ত। লীগ অভ নেশনস ইউনিয়নের উৎসাহী কর্মী। আর কী শুনতে চাও?”



“বলতে পারতে জার্মানীরও বন্ধু ও জার্মান সঙ্গীতের ভক্ত। সেই তিনি আমাকে সেদিন লিখেছেন তাঁর নিশ্চিত প্রত্যয় হিটলারই বাইবেল বর্ণিত অ্যাঙ্টি-ক্রাইস্ট। অতএব ধরো অস্ত্র করো যুদ্ধ। তাঁর মতো শাস্তিবাদীও এ যুদ্ধের সমর্থক। বাইবেল কী লিখেছে বলতে পারো?” মানস জিজ্ঞাসু হয়।

“লিখেছে পৃথিবী একদিন শেষ হয়ে যাবে। তার আগে কে জানে কোনখানে থেকে আসবে অ্যাঙ্টি-ক্রাইস্ট। খ্রীস্টের প্রতিপক্ষ ও প্রবল শত্রু। কিন্তু বিয়াট্রিস এ তবু বিশ্বাস করবেন এটা আমার কাছে সংবাদ। এ যেন সেই, ‘হে অজুর্ন, যুদ্ধ করো।’ হিন্দুর মুখে মানায়, কিন্তু খ্রীস্টানের মুখে নীতিবিরুদ্ধ। যীশু যে অমৃত্যু দিয়ে গেছেন, ‘শত্রুকেও ভালোবাসবে।’, যুদ্ধকালে ভালোবাসতে পারাটাই অমৃত্যুর অগ্নিপরীক্ষা। জার্মানদের বিয়াট্রিস ভালোবাসেন, একথা আমারও জানা। কিন্তু হিটলারের হিংস্রতার জন্মে কি তাঁকে অ্যাঙ্টি-ক্রাইস্ট বলে তার জাতির বিরুদ্ধে ক্রুসেড ঘোষণা করতে হবে? স্টালিনের সঙ্গে শাস্তি চুক্তি না করে যুদ্ধে নামলে কি তাঁকে অ্যাঙ্টি-ক্রাইস্ট না বলে প্রো-ক্রাইস্ট বলা হতো? খ্রীস্টকে এর মধ্যে টেনে আনা কেন? আমি ভাবছি যুদ্ধকালীন প্রোপাগান্ডা কত নিচে নামতে পারে। সত্য যেমন অহিংসার সঙ্গে বন্ধনীভুক্ত অসত্য তেমনি হিংসার! যুদ্ধের উত্তেজনায় মাহুষ মিথ্যা প্রচার করে, মিথ্যায় বিশ্বাস করে, মিথ্যাকে বেদীতে বসিয়ে পূজো করে। মহাত্মাকে বলা হবে অ্যাঙ্টি-ক্রাইস্ট, যদি তিনি যুদ্ধকালে ব্রিটিশ রাজের বিরুদ্ধে বিদ্রোহ ঘোষণা করেন, যদিও সেটা পুরোপুরি অহিংস।” সৌম্যর সন্দেহ।

এর পরে ওরা ক্লাবের কাছাকাছি পৌঁছে যায়। মানস বলে, “চল না কয়েক-জনের সঙ্গে আলাপ করিয়ে দিই। দেখবে আমার বন্ধুরা কেউ অ্যাঙ্টি-গান্ধী নন। তবে আইন অমান্য তাঁরা সমর্থন করেন না। একবার যদি লোকের মাথায় ঢোকে যে আইন অমান্য করলে বাহবা মেলে তা হলে স্বরাজের পরে সে পোকা মাথা থেকে বেরোবে না। প্রশাসন অচল হয়ে যাবে। কেরানীরা অফিসারদের মানবে না, সিপাইরা পুলিশ কর্তাদের মানবে না, জওয়ানরা সেনাপতিদের মানবে না। দেশ অরাজক হবে। তা বলে তোমাদের কেউ নিষ্ক্রিয় হতে বলছেন না। গদী ছেড়ে দিয়ে প্রতিবাদ জানাতে পারো। আসন ছেড়ে দিয়ে আবার সাধারণ নির্বাচনে দাঁড়াতে পারো। জেলে না গেলে কি নয়? তবে আর একটা পোকাও মাথা খুঁকছে। জেলফেরৎ না হলে মন্ত্রী হওয়া যায় না, নির্বাচনে জেতা যায় না। গ্রেপ্তার না হয়ে তোমাদের গতি নেই। এর জন্মে একদিন পশতাত্তে হবে। ক’জনই বা মন্ত্রীপদ পাবেন আর ক’জনই বা নির্বাচনের সময় কংগ্রেস টিকিট? জেলফেরৎদের মধ্যেও অসন্তোষ বনাবে।”

সৌম্য অগ্নমনস্ক থাকে। অর্ধেক কথা ওর এক কান দিয়ে ঢোকে, আর-এক কান দিয়ে বেরিয়ে যায়। “হ্যাঁ। কী বলছিলে? অ্যাণ্টি-গান্ধী? শোন, মানস, তুমি পরিহাস ছলে যে কথাটা বললে, সেটা একদিন সত্যি সত্যি ফলে না যায়। আমার অনেকদিন থেকে সন্দেহ যে, ইংরেজরা নয়, মুসলমানরা নয়, কমিউনিস্টরা নয়, তাঁর স্বধর্মীরাই তাঁকে একদিন সরাবে। সরাবে হিংসার উপরে অহিংসার জয় প্রত্যক্ষ করে। সেইভাবেই তারা প্রমাণ করতে চাইবে যে অহিংসার চেয়ে হিংসা বলবান। কিন্তু ফল হবে ঠিক উল্টো। গান্ধীর জন্তে সারা দুনিয়া কাঁদবে। ভারতকে তো অনন্তকাল অশৌচ পালন করতে হবে। আমাদের হেঁট মাথা ধার জন্তে উঁচু হয়েছিল তাঁর প্রতিপক্ষ অ্যাণ্টি-গান্ধীর জন্তেই আবার হেঁট হবে। বছর কয়েক আগে আমার এক মামাতো ভাই জাপান থেকে শিক্ষা শেষ করে ফিরে আসে। গান্ধীজীর অস্থখের খবর পড়ে অচেনা অজানা জাপানীরা এসে তার কাছে খোঁজ নিত গান্ধী কেমন আছেন। গান্ধীর জন্তে ওদের এত মাথাব্যথা কেন জানতে চাইলে বলত, গান্ধী যে গরিবের মা বাপ। পরে জিজ্ঞাসা করত, আচ্ছা, কে বড়ো? গান্ধী না মিকাদো? আমার ভাই পাণ্টা প্রশ্ন করত, গান্ধী কেমন করে মিকাদোর চেয়ে বড়ো হবেন? মিকাদো যে মহাশক্তিমান সম্রাট, সূর্যদেবীর বংশধর। মিকাদোই বড়ো। ওরা মাথা নাড়ত। না, না, গান্ধীই বড়ো। উনিই এ যুগের বুদ্ধ। স্বদেশে পূজ্যতে রাজা। বুদ্ধ সর্বত্র পূজ্যতে।”

ভাবাবেগের আতিশয্য অমন একজন সংযত পুরুষের মধ্যেও থাকতে পারে মানস এতে বিস্মিত। সৌম্য আপনাকে সামলে নিয়ে বলে, “না, ভাই, আমার কাজ আছে। তোমার ক্লাবে আজ আসতে পারছিলেন বটে, কিন্তু সময় যখন হইবে তখন আসিব, বাসবদত্তা। হবেই একদিন, যেদিন ওখানে ত্রিবর্ণ পতাকা উড়বে, আর মদ বন্ধ হবে। প্রতি বিশ বছর অন্তর অন্তর একবার করে যদি মহাযুদ্ধ বাধে আর চার পাঁচ বছর ধরে চলে তা হলে তো মানব জাতটাই নির্বংশ হয়ে যাবে। এখন আর শুধু নিক্ষেপ্ত্রিয় নয়, এখন সবাই মারণাস্ত্রের নির্মাণে নিযুক্ত, সবাই মারণাস্ত্রের লক্ষ্য। এখন নিব্রাক্ষণ, নিবৈশ্ব, নিশ্বজ্র। এসব কথা যখন মনে আসে তখন বুঝতে পারি যে মিলিটারিজম থাকতে শান্তি নেই, আর শান্তি না থাকলে কিছুই গড়ে উঠবে না, গড়ে উঠলেও ভেঙে চুরমার হয়ে যাবে। ইংলণ্ডের মিলিটারিস্টরাও অ্যাণ্টি-ক্রাইস্ট। কিন্তু দোহাই তোমার, বিয়াট্রিসকে একথা লিখে না, লিখলে আমার উল্লেখ করো না। উনি ঠাওরাবেন আমরাও নান্সী বনে গেছি। জার্মানদের পক্ষ নিয়েছি। ভুল, ভুল, তেমন ধারণা সত্যের বিপরীত। ওঁরা যদি বিশ্বাস না করেন তবে বাপুকে আবার অনশন করতে হবে।”

সোম্য জোর কদমে পা চালিয়ে দেয়। মানস ক্লাবের লনে গিয়ে টেনিসের জন্তে অপেক্ষমানদের সঙ্গে গল্প জুড়ে দেয়। একদলের পালা সাক্ষ হলে আর একদলের পালা আসবে। দুটি কোর্টে আটজন খেলোয়াড়। একজন মাত্র মহিলা। হাফ-প্যাট পরা বাঙালী মেমসাহেব। কিছুক্ষণ পরে মানসের পালা আসে।

খেলার সময় খেলা। তার পরে মেলা। ক্লাব বাড়ীর ভিতরে গিয়ে যে যার পছন্দনতো পানীয় অর্ডার দেয়। কেউ-বা নিজের খরচে কেউ-বা পরের খরচে। দু'একজন তার আগেই বাড়ী চলে যায়, দু'একজন বিলিয়ার্ড খেলতে আসে। রকমারি খোশগল্পের মধ্যে যুদ্ধে জয় পরাজয়ের কথাও ওঠে। কংগ্রেস কী করবে এটাও একটা জল্পনার বিষয়। সরকারী কাজকর্মের প্রশঙ্গ ওঠে। আর ওঠে বদলীরও প্রশঙ্গ, প্রমোশনেরও প্রশঙ্গ। ধর্ম নিয়ে কেউ মাথা ঘামায় না, একজন বাদে। ছেলেটি খাঁটি মুসলমান। যদিও গান্ধীভক্ত।

স্টেশনে উচ্চপদস্থ অফিসারদের মধ্যে আটজনই ভারতীয়, তাঁদের মধ্যে চারজন হিন্দু আর চারজন মুসলমান। পূর্ববঙ্গের জেলাগুলির প্রশাসনিক গঠন মোটামুটি এইরকম। ইংরেজরা ইতিমধ্যেই কলকাতায় বা দিল্লীতে জড়ো হয়েছেন। হিন্দুদেরও গতি কলকাতা বা পশ্চিমবঙ্গ অভিমুখে। মুসলমানদের মধ্যে তিনজনই পশ্চিমা মুসলমান। তাঁদের প্রবণতাও পশ্চিমমুখী, অথচ তাদের জোর করে পদ্মাপারে ঠেলে দেওয়া হয়েছে। কারণ অফিসার মহলে বাঙালী মুসলমানের সংখ্যা কম। উচ্চতর পর্যায়ে তো নিশ্চয়ই, নিম্নতর পর্যায়েও।

“ফ্রেগুস, রোমানস অ্যাণ্ড ক্যাটি\_মেন” এই বলে হঠাৎ ভাষণ দিতে শুরু করেন, ক্লাবের সেক্রেটারি খোন্দকার জাফর হোসেন, “লেগু মী ইয়োর ইয়ার্স।”

“ভুল করলেন, খোন্দকার” বাধা দেন হায়দার, “রোমানরা আজ কেউ উপস্থিত নেই। শেফার্ড এখন যুদ্ধ ও তার প্রতিক্রিয়া নিয়ে বাতিবস্ত্র আর বালো তো প্রায়ই ফাঁসীর হুকুম দিয়ে দূরবীণ নিয়ে বসেন আসমানের তারা গুনতে।” বলেন তিনি ইংরেজীতে।

“অল রাইট। ফ্রেগুস, আই. সি. এস. মেন অ্যাণ্ড ক্যাটি\_মেন”, হায়দার, মল্লিক প্রভৃতির উপরে কটাক্ষ করেন পুলিশম্যান, “টু বী আর নট টু বী গার্ট ইজ জু কোশেন। না, না, বাধা দেবেন না, মল্লিক, আমি জানি এটা ‘জুলিয়াস সীজার’ থেকে নেওয়া নয়, ‘হামলেট’ থেকে নেওয়া, আমরা বিলেত যাইনি বটে, কিন্তু কলেজে তো পড়েছি।” এসব কথাও ইংরেজীতে। নইলে পশ্চিমারা বুঝবেন না।

“গো অন, গো অন” উল্লেখ দেন বক্সী, “হীয়ার, হীয়ার।”

জাফর হোসেন যা বলেন তার মর্ম। “এই ক্লাব আর বেশীদিন চলবে বলে মনে হয় না। লোকে বলে, আদাব ব্যাপারীর জাহাজের খবরে কাজ কী? আদা তো বিদেশ থেকে আমদানী করতে হয় না। জাহাজ না এলে আদার দামও বাড়ে না। কিন্তু যুদ্ধের দরুন জাহাজ চলাচল নিয়মিত হলে ছইক্ষির দাম হু হু করে বেড়ে যায়, ব্রাণ্ডিও দাম হু হু করে বেড়ে যায়, বীগারের দাম হু হু করে বেড়ে যায়। সেই কারণে ক্লাবের খরচও হু হু কবে বেড়ে যায়। এখানে সাচ্চা মুসলমান যারা আছেন তাঁরা সরাব স্পর্শ না করলেও তাঁদের বিল আকাশ স্পর্শ করবে, যদি তাঁরা তাঁদের দোস্তদের ড্রিন্স অফার করেন। আমি নিজে একজন পাক্সা মুসলমান, তবু আমাকেও আমার উপরওয়াদের ড্রিন্স অফার করতে হয়। তাঁরা কিছু মনে করতে পারেন বলে গেলাসে গেলাস ঠোকাঠুকি করতে হয়। তারপর অলক্ষ্যে সরিয়ে রাখি। হলফ করে বলতে পাবব না যে মুখেও একফেঁটা লাগে না। শ্রাস্পেন যদি কেউ অফার করেন, যেমন লাটসাহেবের টেবিলে, আমি এমন কিছু মোল্লা মৌলভী নই যে, নরকের ভয়ে পেছিয়ে যাব। চরম অভদ্রতা হবে তা যদি আমি করি। রিপোর্ট যাবে যে লোকটা চোকব্ব হলে কী হয় সামান্য কাণ্ডজ্ঞানবর্জিত। সাহেব মেমসাহেবদের প্রকাশ্যে অপমান করে। না, বন্ধুগণ, আমার অতো বড়ো বুকুর পাটা নেই। চাকরিতে কর্মদক্ষতাই কি সব? শুধু কর্মদক্ষ বলেই কি কারো প্রমোশন হয়? রোমে না যাই রোমানদের সঙ্গে তো কাজ করেছি। রোমানদের সঙ্গে বোমানদের মতোই আচরণ করতে অভ্যস্ত হয়েছি। তাই তো জেলা পুলিশের ভার পেতে পেরেছি। কিন্তু যুদ্ধ যদি চার পাঁচ বছর গড়ায়, জাহাজ যদি নিয়মিত চলাচল না করে, সব ক’টা মদের ব্যাপারীকে জেলে পুরলেও আমি মূল্যবুদ্ধি রোধ করতে অক্ষম। অভাবে স্বভাব নষ্ট। ওদের মধ্যে যারা সাধু তারাও অসাধু হবে। আর আমাদের মধ্যে যারা নেশাখোর তারাও অসাধু হবে। সেটা তো ভালো নয়। বিল মেটাতে না পারলে ক্লাব ছেড়ে দেওয়াই ভালো। কিন্তু বেশীর ভাগ মেম্বর ক্লাব ছেড়ে দিলে বা বিল চুকিয়ে দিতে গড়িমসি করলে ক্লাব থেকে মদের পাট উঠিয়ে দিতেই হয়। তা হলে এটা আর ইউরোপীয়ান ক্লাব থাকবে না, হয়ে উঠবে ইণ্ডিয়ান ক্লাব। তা যদি হয় তবে ইউরোপীয়ানরা আর এ মুখে হবেন না, তাঁদের সঙ্গে মেলামেশার স্বযোগ ইণ্ডিয়ানদের হবে না, হাফিজকে দেখা যাবে চরকা কাটতে আর নামাজ পড়তে। আর মল্লিক তো এখন থেকেই শাকাহারী, ডিনার পাটি কি তা হলে আমিষবর্জিত হবে? যে যার ওয়াইফকে নিয়ে আসার রেওয়াজ এমনতেই বিরল, কারণ ইউরোপীয়ানরা বিরল, হিন্দুরা তবু তাদের শূত্ৰতা কতকটা পূরণ করেছেন, কিন্তু

মুসলমানদের বেলা কড়া পর্দা। মহিলারা বড়ো একটা আসেন না, এলেও পান করেন না।”

মানসের বরাত ভালো। মিসেস মল্লিকের না আসার জন্তে কেউ কৈফিয়ৎ চান না। সকলেরই জানা আছে তিনি এখনো শোকাহত।

হোসেন বলে যান, “আমাদের এখন হামলেটের মতো দোটানা। ক্লাব থেকে ডিক্স তুলে দেওয়া ইংরেজ আমলে হবে না। হবে কংগ্রেস আমলে বা লীগ আমলে। বড়ো বড়ো পদগুলো হিন্দু মুসলমানদের দেওয়া হলেও মাঝে মাঝে ইউরোপীয়ান জজ ম্যাজিস্ট্রেট আসবেনই। তাঁদের সৃষ্টি যে ক্লাব তাকে বিলুপ্ত করবে কে? ক্লাব থাকছে, কিন্তু আয় যথেষ্ট না হলে টেনিস, বিলিয়াড’স, ডিনার ইত্যাদি একে একে বন্ধ হচ্ছে। স্টাফ হাঁটাই করতে হবে। সেক্রেটারি যদি বলেন যে সেই অগ্রিয় কাজটি তাঁকে দিয়ে হবে না তবে তাঁকে অব্যাহতি দিলে কেমন হয়? আমি যতদূর দেখতে পাচ্ছি ক্লাব কোনো মতে বেঁচে থাকবে, কিন্তু মেম্বর হতে বিশেষ কারো আগ্রহ থাকবে না, কারণ চাঁদার সঙ্গে সঙ্গতি রেখে আমেনিটি কোথায়? আপনারা কি বর্ধিত হারে চাঁদা দিতে প্রস্তুত? না আপনারা ব্যবসাদার শ্রেণীর লোকদের অবাধে প্রবেশ করতে দেবেন? তারা টাকা ঢালবে আর ফেভার চাইবে। সেটা আমি থাকতে নয়। ফেভার আমি কখনো কাউকে দেখাইনে। আমি জানি আপনারা এ বিষয়ে একবাক্যে একশব্দে ‘না’ বলবেন।”

“না।” “না।” “না।” “না।” না।” “না।”

হোসেন তাতে আনন্দ প্রকাশ করেন। এটা হলো অফিসারদের ক্লাব। তাও উচ্চপর্যায়ের অফিসারদের। জমিদার শ্রেণীর প্রতি বিশেষ সৌজন্য এর পুরাতন ঐতিহ্য। তাও বিশিষ্ট জমিদার না হলে নয়। যারা রাজা কিংবা নবাব। তাঁরা বডলোক বলে নয়, তাঁরা অভিজাত বলে। তবে ইঁা, ইউরোপীয় প্ল্যাণ্টারদের বেলা অন্য নীতি। তাঁরা রাজা রাজডা না হলেও রাজার জাত তো বটে। বিলেতফের্তা বলে ব্যারিস্টারদেরও প্রবেশ আছে, কিন্তু বিলেতফের্তা না হলে উকিলদের নয়। ডাক্তারদেরও নয়, অধ্যাপকদেরও নয়। আগে ছিল এটা ইউরোপীয়ানদের ক্লাব, এখন যেতানদের সংখ্যাগত প্রাধান্য নেই, কিন্তু প্রভাব অসামান্য। প্রেসিডেন্ট হন সাধারণত কলেকটর অথবা জজ। তাঁদের একজন অন্তত ইউরোপীয়। সেক্রেটারি হন পুলিশ সুপারিনটেনডেন্ট অথবা মিডিল মার্জন। আজকাল দু’জনেই ভারতীয়। একদা মিডিল মার্জন ছিলেন বলে মুস্তাকীকেও মেম্বর করা হয়েছে। তিনি বিলেতফের্তা না হলেও যুদ্ধফের্তা। সেই স্ববাদে একজন যুদ্ধফের্তা মুসলিম ডেপুটিকেও

নেওয়া হয়েছে। যাতে মুসলমানদের অল্পপাত বাড়ে। তিনি বাঙালী হলেও তাঁর বেগম লখনৌয়ের তালুকদার ঘরানা। ইসাবেলা থোবান কলেজে পড়েছেন। ক্লাবে আসেন, নাচেরও পার্টনার হন। কিন্তু কদাচিৎ। স্বামীর সঙ্গে কেউ নাচতে চান না বলে তাঁর মলিন মুখ দেখে বেগমও লজ্জিত।

ক্যাপটেন লাহা জানতেন যে প্রথা অনুসারে সিভিল সার্জনকেই এ দায় নিতে হবে, যদি পুলিশম্যান সত্যি সত্যি সেক্রেটারি থাকতে নারাজ হন। তিনি বলেন, “খোন্দকার সাহেব, আপনি ধরে নিয়েছেন যে ফ্রান্সই একমাত্র দেশ যেখানে আঙুর ফলে, যার থেকে ব্রাণ্ডি হয়। আর জার্মানীই একমাত্র দেশ যেখানে বালি আর হপ থেকে বীয়ার বানায়। আর স্কটল্যান্ডই একমাত্র দেশ যেখানে মণ্ট ইত্যাদি থেকে ছইস্কি চোলাই করে। এই বিশাল ভারতে এর প্রত্যেকটির উৎপাদন সম্ভব। কিন্তু ইউরোপীয় কায়মী স্বার্থ তার অন্তরায়। তাই সাত সমুদ্র পার থেকে আমদানী করতে হয়। আমদানী বন্ধ হলে গেরা অফিসারদের অসুবিধা আরো প্রবল হবে। মূলধন খাটাতে তো মাড়োরারীরাও স্বেচ্ছায় এগিয়ে আসবে, অবশ্য গেরা কোম্পানীর বেনামীতে। ওদের ভয় কেবল এই যে কংগ্রেসের প্রোহিবিশন নীতি হবে আরো বড়ো অন্তরায়। আর মুসলিম লীগ প্রভৃতি মুসলমানদের দলগুলিও এই একটি বিষয়ে একমত। কে এত টাকা এসব ব্যবসায় খাটাতে সাহস পাবে?”

“ক্যাপটেন ল,” জাফর হোসেন বলেন, “আপনি তো যুদ্ধক্ষেত্র দেখে এসেছেন পানী ছাড়া মীন যেমন বাঁচে না পানায় ছাড়া মিলিটারি তেমনি বাঁচে না। তেঁষ্টায় ওদের বুক ফেটে যাবে, লড়বে কী করে? এক্ষেত্রে হিন্দু মুসলমান ইণ্ডিয়ান ইউরোপীয়ান ভেদ নেই। সরবরাহ বজায় রাখার জন্তে গভর্নমেন্টকে উৎপাদনের ব্যবস্থা করতেই হবে। মাড়োরারীদের চেয়ে পার্শীরাই এগিয়ে আসবে, কারণ এটা ওদের নিত্য নৈমিত্তিক পানীয়। ওদের বিয়ের ভোজেও পানীর গেলাসের সঙ্গে পানীয়ের গেলাস থাকে। তাতে পানীয় ঢেলে দিয়ে যায় উপবীতধারী পার্শী ব্রাহ্মণ, পদবী পাণ্ডে। ওরাই সত্যিকার আর্থ বংশধর। আর্থ যুগের সোমরস ওরাই সংরক্ষণ করে এসেছে। শুধু কি সোমরস? বংসতরী ভক্ষণও। বৌদ্ধ জৈনদের প্রভাবে পড়ে সেটাও আপনারা ছেড়ে দিয়েছেন। বরং আরো কঠোরভাবে বন্ধ করেছেন। নৈতিক জয় হয়েছে বৌদ্ধ জৈনদেরই। আপনারা নৈতিক অর্থে পরাজিত। এখন পার্শীদের কথা হচ্ছিল, ওরা সোমরস বর্জন করবে না বলে স্বদেশ থেকেই চিরবিদায় নিয়েছে। ওদের উপর প্রোহিবিশন জারি করলে ওরা এদেশ থেকেও চিরবিদায় নিয়ে আর্থদের সংস্কার সংরক্ষণ করতে ইউরোপে আমেরিকায় গিয়ে

বসবাস করবে। অথচ ভেবে দেখুন ইগুস্তি এদেশে যে ক'টি গড়ে উঠেছে সে ক'টি ওদেরই উত্তোগে। মার্কিন গৃহযুদ্ধের মরসুমে ওরাই প্রথম কটন মিল পত্তন করে। প্রথম মহাযুদ্ধের মওকায় প্রথম ইস্পাতের কারখানাও ওদেরই উত্তোগিতায়। অভয় দিলে ওরাই প্রথম ভারতীয় হুইস্কি আর ব্রাণ্ডি, জিন আর বীয়ার উৎপাদন করবে। কিন্তু আপনি তো ভালো করেই জানেন যে ইংরেজ থাকতে ওরা অহুমতি পাবে না, বিলেতের কায়েমী স্বার্থ বাধা দেবে, ওদের মিতা ফ্রান্সের কায়েমী স্বার্থও। যুদ্ধ শেষ হলে সন্ধিস্থত্রে জার্মান কায়েমী স্বার্থও। ইংরেজ যদি কংগ্রেসকে মসনদে বসিয়ে দিয়ে যায় কংগ্রেসও বাধা দিবে, গান্ধী বেঁচে থাকতে কংগ্রেসের এত সাহস হবে না যে মহাত্মাকে অমান্য করবে। আর লীগ দলপতি কায়েদে আজম জিন্না সাহেব, যদিও আর সব বিষয়ের মতো সুরাপানেও সাহেব তবু তিনিও তাঁর সম্প্রদায়ের ভোট পাবার জন্তে তাঁর জিন্নবাসিনী পার্শী পত্নীর সঙ্গে যা নিত্য সেবন করতেন তার বেলা পার্শীদের সঙ্গে নয় মোল্লা মোল্লাভীদের সঙ্গে সুর মেলাবেন। মসজিদ থেকেই মসনদ, আলাদা একটি মসনদ, এটাই তো পাকিস্তানের বিবর্তনের সূত্র। এ বিবর্তন রোধ করবে কে?”

প্রসঙ্গটা রাজনীতির দিকে মোড় নিচ্ছে দেখে ক্যাপটেন নিতাইচাঁদ লাহা শঙ্কিত হয়ে বলেন, “খোন্দকার, এই একটি জিনিস আছে যা হিন্দু মুসলমান পার্শী খ্রীষ্টান শিখ একসঙ্গে বসে পান করতে পারে। এই একটি জায়গা আছে যেখানে সেটা সম্ভব। স্ততরাং ক্লাব যাতে বাঁচে তাই হোক আমাদের ভাবনা। যুদ্ধ কি চিরকাল চলতে পারে? চার বছর বাদেই হোক, পাঁচ বছর বাদেই হোক একদিন না একদিন থামবে। তখন আবার জাহাজ চলাচল নিয়মিত হবে, আবার জার্মানী থেকে বাঁয়ার আমদানী হবে, ফ্রান্স থেকে ব্রাণ্ডি, স্কটল্যান্ড থেকে স্কচ। আপনার আমার বদলীর চাকরি, বরাবরের জন্তে সিদ্ধান্ত নেওয়া আমাদের কর্ম নয়। আপনি সেক্রেটারি থাকতে নারাজ হলে আমিই তো সেক্রেটারি হব। আমি এই মহামানবের সাগরতীরে সবাইকে মেলাব ও সবার সাথে মিলব। মার্কান, পুছো।”

মার্কান তখন জনে জনে সুধায় কে কী খেতে চান। বিল তো মেটাবেন ডাক্তার তাঁর প্রাইভেট প্র্যাকটিসের আয় থেকে। হোসেন বলেন, “ডাক্তারকে চটালে নিশ্চিত পরলোক। কল দিলে প্রেসফ্রাইব করবেন ব্রাণ্ডি। তখন তো তাঁর আঞ্জা মানতেই হবে। মেডিকাল লীভ চাইলে তিনিই তো রেকমও করবেন। যদি না করেন তা হলে তো প্রিভিলেজ লীভ নিতে হবে। মার্কান, ছোট্টা পেগ।” বলা বাহুল্য হুইস্কির।

মানসের ফিরতে দেরি হচ্ছে দেখে যুথিকা খোঁজ নিতে লোক পাঠিয়েছিল। মানস তৎক্ষণাৎ বাড়ী ফিরে যায়। শোনে ক্যাপটেন মুস্তাফী তার জন্তে অপেক্ষা করছেন।

“মাফ করবেন, ক্যাপটেন মুস্তাফী, পুলিশের কবলে পড়েছিলুম, শেষে ডাক্তার এসে আমাকে উদ্ধার করেন।” মানস হাসতে হাসতে বলে।

“অ্যাঁ!” মুস্তাফী চমকে উঠে বলেন, “জজকে ধরতে আশ্পর্ধা হয় পুলিশের! এমন বিচিত্র কাহিনী তো কখনো শুনিনি।”

“শোনাব। শোনাব। তার আগে শুনতে চাই মিলির খবর। কিন্তু আরো আগে শুনতে চাই কী খাবেন?” মানস যুথিকার দিকে তাকায়।

“সেটা কি এতক্ষণ বাকী আছে নাকি? যুথী মা আমাকে কি অমনি বসিয়ে রেখেছেন? ই্যাঁ, মিলির খবর দিতেই আজ আমার আসা। মিলি পোট সেড থেকে কেবল করে জানিয়েছে যে মেডিটেরানিয়ান দিয়েই মার্সেলস যাচ্ছে। কোনো ভয় নেই। সব ভালো। এডেন থেকে এয়ার মেলে চিঠিও পেয়েছি। তাতে আপনাদের দু’জনকে ওদের দু’জনের প্রীতি নমস্কার জানাতে বলেছে। জাহাজে যাত্রীর সংখ্যা এত কম যে সকলেই সকলের চেনা। সাহেব মেমদেরও অণু চেহারা। যেচে আলাপ করেন। সব সময় কুশল প্রশ্ন করেন। লিখেছে আমি কি জানতুম যে ওরা ‘হাউ ডু ইউ ডু’ বললে আমাকেও তার উত্তরে বলতে হবে ‘হাউ ডু ইউ ডু’? আমি বলি, ‘নট ভেরি ওয়েল, আই ফীল সিক।’ কথাটা সত্যি, কিন্তু ইংরেজদের স্বভাব হচ্ছে ওরা মুখ ফুটে ওকথা জানায় না। চেপে রাখে। অন্তরঙ্গতা জন্মালে কথাপ্রসঙ্গে বলে। আর আমরা তো সম্পূর্ণ অপরিচিতকে রোগের খুঁটিনাটি বিবরণ শোনাই। কিংবা বলি, ‘আমি ভালো আছি। আপনি?’ তখন হয়তো শুনতে হয় আধিবি্যাদির বিশদ বর্ণনা। যাত্রীদের সবাইকে ক্যাপটেন সাহেব নিজের টেবিলে বসান, আমাদের মতো দ্বিতীয় শ্রেণীর যাত্রীদেরও প্রথম শ্রেণীর মর্যাদা দেন। খাবারও পাই প্রথম শ্রেণীর। তবে ক্যাবিনের শ্রেণীভেদ মানতে হয়। ক্যাপটেন সাহেবের সঙ্গে আমাদের বেশ ভাব হয়ে গেছে। একটা বাইনোকুলার ধার দিয়ে বলেছেন যতদিন খুশি রাখতে পারি, নামবার আগে ফিরিয়ে দিলেই চলবে। ডেক চেয়ারে বসে হাওয়া খাই আর বাইনোকুলার দিয়ে যতদূর দৃষ্টি যায় দেখি। এই অপূর্ব অমুভূতির জন্তে সমুদ্রযাত্রার আবশ্যক ছিল। আর সমুদ্রযাত্রার জন্তে বিবাহের আবশ্যক ছিল। আর বিবাহের জন্তে অমন একজন দেবদূতের আবশ্যক ছিল। কিন্তু একটুও ভালো লাগছে না ভাবতে যে জুলির বরকে আমি ছিনিয়ে নিলুম। যুথীকে বোলো জুলিকে বোঝাতে



যে এর জন্তে জুলিই দায়ী। ও যদি ওর বরকে বার বার তিনবার প্রত্যাখ্যান না করত তা হলে উনিও আমাকে চাইতেন না, আমিও ওঁকে চাইতুম না। প্রজাপতির নির্বন্ধ ব্যতীত এর আর কী ব্যাখ্যা আছে? তোমরা যতবার নির্বন্ধ করেছ ততবার ব্যর্থ হয়েছ। আমি তো চেষ্টাই করিনি। যাই হোক, বিয়ে যখন হয়েই গেছে তখন যথাসাধ্য চেষ্টা করতে হবে বিয়ে যাতে সুখের হয়। আমি ওঁকে অভয় দিয়েছি যে ওঁর জীবনে আমি যখন ছিলুম না তখন আর কেউ ছিলেন কি না, কার সঙ্গে কী সম্পর্ক ছিল, তা নিয়ে একটিও প্রশ্ন করব না। উনিও কথা দিয়েছেন কখনো প্রশ্ন করবেন না আমি সম্ভাবাদীদের কোন্ দলে যোগ দিয়েছিলুম, আমার কমরেডদের কার কী নাম, কার কী ঠিকানা, কার কী কীর্তি বা অপকীর্তি, কোন জন সাচ্চা, কোন্ জন মেকী, কতবার সর্পতে রজ্জুভ্রম করেছি, কতবার বজ্জুতে সর্পভ্রম করেছি। আমাদের ড'জনের জীবনেই জন্মান্তর ঘটে গেছে, আমার তো সেই সঙ্গে গোত্রান্তর।”

চিঠিখানা তিনি পড়ে শোনান। তার পর মানস ও যুথিকার কাছে তাঁর সহধর্মিণীর ও তাঁর নিজের আন্তরিক কৃতজ্ঞতা জানিয়ে মধুরেণ সমাপয়েৎ করেন।

তখন পুলিশ ও ডাক্তারের কাহিনী শুধু যুথিকাকেই শোনাতে হয়।

খুব একচোট হাসাহাসির পর যুথিকা বলে, “তোমরাও এবার নিশ্চিন্ত হলে। যে পথ দিয়ে মিলি গেছে সেই পথ দিয়ে ছইস্কি ব্রাণ্ডি আসবে। বীয়ার কিন্তু আসবে না। তার জন্তে হিটলারের সঙ্গে লড়াইতে হবে। তাকে হারাতে হবে। মিউনিকের সেই বীয়ারগার্টেনেই তো নাৎসী পার্টির সমাবেশ হয়।”

“ভেবো না, বীয়ার বাঁকা পথ দিয়ে আসবে ঠিকই। গোটা কয়েক নিরপেক্ষ দেশও তো থাকবে।” মানস আশ্বাস দেয়।

“বেল পাকলে কাকের কী? আমি তো ক্লাবেও যাইনে, মদও খাইনে। যে দুটির ভার ভগবান আমাকে দিয়েছেন সে দুটিকে বাঁচিয়ে রাখা ও মাহুষ করে তোলাই আমার প্রথম ও প্রধান কাজ। বলতে পারতুম সব সময়ের কাজ, কিন্তু আমি তো কেবল মাতা নই, কেবল বধূ নই, আমি নারী। আমার নারীত্বের বিকাশ তো থেমে থাকতে পারে না। যেমন তোমার পৌরুষের বিকাশ। শোক আছে, কিন্তু ভবিষ্যতের দিকেও তো দৃষ্টি রাখতে হবে। স্বাস্থ্যের জন্তেই তোমার টেনিস খেলতে যাওয়া। আড্ডা দেবার জন্তে নয়। বেচারী ক্যাপটেন মৃত্যুকী! কতক্ষণ থেকে এখানে এসে বসে আছেন। বাড়ীতে ওঁর মিসেসও তো এমনি উতলা।” যুথিকা শুনিয়ে দেয়।

মানস নীরবে শুনে যায়। সত্যিই তো। ক্লাবে এত বেশী সময় নষ্ট করা ঠিক

হয়নি। তবু মেম্বর মাত্রেই ক্লাবের প্রতি একটা কর্তব্য আছে। মদের অভাবে নয়, মেম্বরের অভাবে ক্লাব উঠে যেতে পারে। তখন কোথায় খেলতে যাবে টেনিস ?

“ছেড়ে দাও। যা হবার তা হয়ে গেছে।” যুথিকাই আবার বলে, “এখন থেকে জুলির কথাটা একটু ভেবো। মিলিব বিয়েতে ও দারুণ আঘাত পেয়েছে। বর ছিনিয়ে নিল বলে নয়, বিপ্লবের প্রতি চরম বিশ্বাসঘাতকতা করল বলে। যেত যদি রাশিয়া জুলি ওকে বুক জড়িয়ে ধরত। ধরে নিত যে বিপ্লবকে এগিয়ে দেবার জন্তেই যাচ্ছে। তখন মনে হতো বিয়েটা যেন রোজা লুকসেমবুর্গের বিয়ে। প্রেমের জন্তে নয়, রাজনৈতিক উদ্দেশ্যসিদ্ধির জন্তে। তা তো নয়, চলল কিনা বিলেত। যে দেশ আমাদের দেশকে বুটের তলায় পিষে মারছে। জনগণকে চুষে খাচ্ছে। না, না, এসব আমার নিজের উক্তি নয়, জুলির উক্তির পুনরুক্তি। আমি ওর মতো আঁবাবে কাঁপ দিতে চাইনে। ইংরেজ শুধু অনিষ্টই করেছে, ইষ্ট কি একটুও করেনি ? বিপ্লব কি শুধু ইষ্টই করে, অনিষ্ট একটুও করে না ?”

মানস বলে, “সামনে আসছে একটা ঘোরতর পরিবর্তন। সেটা বিপ্লবের রূপও নিতে পারে, জুঁই। সেটা ভালো কি মন্দ তা এককথায় চিহ্নিত করা যায় না। কারো মতে মন্দ, কারো মতে ভালো। সৌম্যদা চাইছে সেটাকে নির্জলা অহিংস রূপ দিতে। নির্জলা একাদশীর মতো সম্পূর্ণ কল্যাণকর। যেটা হবে সকলের মতে ভালো। আমার দুর্ভাগ্য এই যে আমি কারো সঙ্গে একমত হতে পারছি নে। ইংরেজদের চাইতেও মন্দ আছে, তারা হিটলারপন্থী জার্মান। সেইজন্তে কংগ্রেস নেতারা বিপ্লবীদের মতো অন্ধ ব্রিটিশবিদ্বেষী নন। বিপ্লবের দিন তাঁরাও তো কোতল হবেন। বর্জোয়া বলে তাঁরাও তো রক্তশোষক। কংগ্রেস ভেঙে যাচ্ছে বাম দক্ষিণের কোঁদলে। বিকল্পে যে তেমনি একটা শক্তিমান সঙ্ঘ গড়ে উঠছে তা নয়। ক্ষমতার হস্তান্তর নির্বিবাদে না হলে চরম অরাজকতা। গান্ধীজীও বুঝতে পারছেন যে অরাজকতা অবশ্যস্তাবী। তিনিও তখন অসহায়। আর আমি ? আমি নীরব সাক্ষী। তোমাদেরও যে প্রোটেকশন দিতে পারব সে ক্ষমতা আমার নেই। কে দেবে তাও জানি নে। বিশ্বের ভবিষ্যৎ আমাকে ভাবায়, অচ আগেকার মতো ভগবানে বিশ্বাস, তাঁর মঙ্গলময় বিধানে বিশ্বাস আজ আমার নেই। সেটা আছে সৌম্যদার। ওর দৃষ্টি ধ্রুবতারার উপরে।”

## ॥ তেরো ॥

এর পরে যখন ক্যাপটেন লাহাব সঙ্গে দেখা হয় মানস তাঁর করমর্দন করে বলে,  
“ক্যাপটেন, আপনি কি গালিলেও না নিউটন না আইনস্টাইন? সেদিন কত বড়ো  
একটা তত্ত্ব আবিষ্কার করে শোনালেন!”

লাহা তো অবাক। “আমি নিউটন বা আইনস্টাইন। তত্ত্ব আবিষ্কার।”

“ওই একটি জিনিসই হিন্দু মুসলমান ইণ্ডিয়ান ইউরোপীয়ান সবাইকে একসঙ্গে  
মেলায়। আর এই একটি জায়গাই মহামানবের সাগরতীর। কেন আপনাকে  
আই. এম. এস করেনি, তাই ভেবে আকুল হচ্ছি।” মানস গম্ভীরভাবে বলে।

“অমন করে আঁতে না দিতে নেই, মল্লিক। আমি বিলেতে যাবার সুযোগ  
পাইনি। যুদ্ধে যাবার মওকা জুটেছিল। ফিরে এসে সরকারী চাকরি পেয়ে যাই।  
সেই থেকে ক্যাপটেন র‍্যাঙ্কটাও থেকে যায়। ফলে সামাজিক মর্যাদা বাড়ে। ক্লাবে  
চুকতে চাইলে কেউ ব‍্যাকবল করে না। সাহেব মেমদের সঙ্গে সমানে মিশতে পারি,  
তার জন্তে ওই জিনিসটি খেতে ও খাওয়াতে হয়, তবে মাসের শেষে বিল কত উঠবে  
তারও একটা হিসেব রেখে চলি। কোথাও সিভিল সার্জনের পদ খালি হলে,  
আই. এম এস দাবীদার না থাকলে আমাকেই অফিসিয়েট করতে ডাকে। চাকরিতে  
যারা আমার সীনিয়র তাঁদের এই বলে স্তোক দেওয়া হয় যে ওটা তো লীভ ভেকেস্পী।  
পার্মানেন্ট ভেকেস্পী তো নয়। লাভের চেয়ে লোকসানই বেশী। প্রাইভেট  
প্র্যাকটিসে ছেদ পড়ে। সরকারী ডাক্তারেরা একস্থানে স্থির হয়ে না বসতে পেলে  
তাঁদের প্রাইভেট প্র্যাকটিস জমে না। এই জন্তে অনেকে অস্থায়ী পদোন্নতি  
প্রত্যাখ্যানও করেন। তখন আমাকেই মনে পড়ে। আমি প্রাইভেট প্র্যাকটিসের  
মায়া কাটিয়ে প্রমোশনের মায়াবিনীর কাঁদে পড়ি।” লাহা একটু রসিয়ে রসিয়ে বলেন।

মানস তা শুনে আরেক দফা করমর্দন করে। “নোবেল প্রাইজ। নোবেল প্রাইজ ফর মেডিসিন।”

“থামুন থামুন। এখনো তো সব কথা বলা হল না।” ডাক্তার সাহেব কানে কানে বলেন, “আপনাদের মতো আমরা তো বিলেতও যাইনি, কোমর জড়িয়ে হাত ধরাধরি করে নাচবার সুযোগও পাইনি। আমাদের পক্ষে এই সেই বিলেত, এখানে যারা নাচতে জানে তারা ইণ্ডিয়ান হলেও অপাঙ্ক্বে নয়। কিন্তু কৃষ্ণকেও সঙ্গে করে আনতে হয়। নইলে কৃষ্ণকে ওঁরা মন্দেহ করেন। আমি তো চিরকুমার, আমার কে আছে যে কাকে সঙ্গে করে আনব! আমার মতো ইউরোপীয়ানও তো আছেন। তাঁরা যদি মার্জনা পান আমিও কি পেতে পারিনে? আর ওই বেটা সাহনী কাপটেন থেকে মেজব হয়েছে, মেজব থেকে লেকটনার্ট কর্নেল হয়েছে শুধু তাই নয়, আই. এম. এসও হয়েছে। কেন বলতে পারেন? ও হলো ক্রিস্চান, মাইনরিটি সম্প্রদায়ভুক্ত। ওর নাকি ফরাসী মেমসাহেব। এ দেশ সহ্য হলো না, বাচ্চাকে মাত্র্য করার নাম করে প্যারিসে বসবাস করছেন। কেউ কখনও তাঁকে চক্ষে দেখেনি। ধাপ্পাও হতে পারে। তবু তাসের আসরে ওর বাঁধা আসন। মেম-সাহেবরা ওকেই পার্টনার পেলে ভরসা পান যে বাজীমাং করবেন। ব্রিজ খেলায় লোকটা পয়মস্ত। টাকা পায় ও পাইয়ে দেয়। অমন ভাগ্যবান পুরুষকে যে নাচের পার্টনার হতে দেওয়া হয় তার এটাও একটা হেতু। আমি কিন্তু তাসের আসরে লক্ষ্মীছাড়া। ওদিকে প্রাইভেট প্র্যাকটিসেও হতভাগ। আমার বন্ধু মুস্তাফী কেমন জাঁকিয়ে বসেছেন দেখেছেন? এক স্টেশনে চিরস্থায়ী হতে চান বলে চাকরিটাই দিনে ছেড়ে। উনি ভালো করেই জানতেন যে ওঁকে সিভিল সার্জন পদে পারমানেন্ট করা হবে না, কেননা ওঁর মেয়ে একজন নাম-করা টেরিস্ট। এটাই বা কোন সুবিচার। মেয়ের অপরাধে বাপের প্রাণদণ্ড। মুস্তাফীর চেয়ে বিচক্ষণ কোন্ সাহেব ডাক্তার! ও বেটা সাহনী তো একটা মানুষমারা সার্জন। প্রাণদণ্ড দিতে হলে সাহনীকেই দিতে হয় সব আগে। যা বলছিলুম, আমি পড়ে গেছি আরো এক মায়াবিনীর ফাঁদে। ব্রিজে আমাকে কেউ পার্টনার করে না, সেদিক থেকে আমি পয়মস্ত নই। কিন্তু বল নাচে আমার পার্টনার হতে কেউ সাড়া না দিয়ে পারেন না। কেন বলতে পারেন?”

মানস নির্বাক। লাহা আরো চুপি চুপি বলেন, “খবরদার, ফাঁস করবেন না। তা যদি করেন আমার কপালে আছে বাঁদর নাচ। আপনি তো লেখেনও শুনেছি। কে জানে কোন্‌দিন নভেল কি নাটকে আমাকে দিয়ে বল নাচ নয়, বাঁদর নাচ নাচাবেন। দেশশুদ্ধ লোক হাসবে। লাহা পরিবারের মাথা হেঁট হবে।”

মানস তাঁকে অভয় দেয় যে তেমন কোনো অভিলাষ তার নেই। ক্যাপটেন লাহাকে সে যথেষ্ট শ্রদ্ধা করে। তিনি একই ব্রাদারহুডের মেম্বর, যদিও একই সার্ভিসের নন। তেমন কাজ যদি করে তবে সবাই তাকে একঘরে করবেন। বলবেন সে একটা ক্যাড।

তখন লাহা রসিয়ে রসিয়ে বলেন, “শক্ররা বলে আমার নাকি সেই জিনিসটি আছে বা রুডলভ ভালেন্টিনোর ছিল। আরো খোলসা করে বোঝাতে হবে? ওই শব্দটা কি মুখে না আনলে নয়? দুটি হরফ উহা রেখে বলি, এক্স অ্যাপীল।”

হো হো করে হেসে ওঠে মানস। হাসতে হাসতে পেটে খিল ধরে যায়। পানের মাত্রা বোধ হয় বেশী হয়ে গেছে। ভহ্লোক কৃষ্ণবর্ণ হলেও কৃষ্ণ নন। তাঁর সঙ্গে রাসলীলার জন্মে গোপীরা উদ্বাহ হবেন না। ক্লাবের মেম্বরমাত্রেরই তেমন সৌভাগ্য হয় না। “কোনো কোনো ভাগ্যবান নাচিবারে পায়।”

মানস কথা রাখে। এসব কথা আর কারো কানে যায় না। কিন্তু এখন বুঝতে পারে ইউরোপীয়ান ক্লাবের মেম্বর হবার জন্মে ইণ্ডিয়ানরা কেন লালায়িত আর তাঁদের মেম্বর করতে ইউরোপীয়ানরা কেন আতঙ্কিত। ইণ্ডিয়ান মিডিলিয়ানদের একজনকে মেম্বর করেও কেন পরে পুকুরের জলে পাতিহাঁসের মতো চোবানো হয়েছিল। অশালীন ভাষায় যাকে বলে “ডাকিং”।

ক্যাপটেন সঙ্গে সঙ্গে উধাও হন। কয়েকদিন ক্লাবেই আসেন না। আবার যেদিন দেখা হয় সেদিন মাফ চেয়ে বলেন, “একটু বাড়াবাড়ি করে ফেলেছি। না? সেদিন নিজের হাতে পোস্ট মটম করতে হয়েছিল। শেফার্ডের হুকুম। কেসটা হয়তো আপনার কোর্টে পাঠানো হবে। আপনি যেমন নরম মানুষ আসামীকে হয়তো সন্দেহের অবকাশ দেবেন। তবে এসব কেস সাধারণত বালোঁ নিজেই বিচার করেন ও আসামীকে ঝুলিয়ে দেন। যুদ্ধক্ষেত্র ইংরেজরা মরণের মুখোমুখি হয়ে অসাড় হয়ে গেছে। শেফার্ড ও বালোঁ দু’জনেই ফ্রণ্টে গেছেন। গুলী চালাতে বা ফাঁসী দিতে তাঁদের বিবেকে বাধে না। আমিও ফ্রণ্টে গেছি। কিন্তু আমার তো কর্তব্য আহতদের প্রাণ রক্ষা করী, তার জন্মে নিজের প্রাণ বিপন্ন করা। আমি অসাড় হয়ে যাইনি। তাই অপ্ৰিয় কর্তব্য করবার সময় একটু আধটু টানতে হয়। ওই বীভৎসতা কি নেশা না করলে সহ্য হয়! সেদিন তারই খোয়ারি ভাঙছিলুম। সেইজন্মে ওসব কথা আপনাকে বলতে সাহস হয়েছিল। এখন হাত পা কামড়াছি।”

মানস হেসে ওঠে। “হাত পা কামড়াবেন কেন? বন্ধু মহলে কে না অমন কথা বলে? কার না ধারণা যে সেও একজন ভালেন্টিনো হলেও হতে পারত, যদি

আমেরিকায় গিয়ে সিনেমায় নামত। ওটাকে আমরা স্পোটসম্যানের মতো নিই। মনে রাখি নে। নিভয়ে বলবেন, ডাক্তার সাহেব।”

আশ্বাস পেয়ে ক্যাপটেন লাহা বলেন, “কারই বা ভালো লাগে নিজের হাতে পোর্ট মট্টেম করতে! সিভিল সার্জনরা এসব কাজ সাব-অ্যাসিস্ট্যান্ট সার্জনদের দিয়ে করান। আমি যদি সাহেব হয়ে জন্মাতুম শেফার্ড কি আমাকেই আদেশ দিতেন একাঙ্গ স্বহস্তে করতে? ওঁর আদেশ দেবার পদ্ধতিটাও চমৎকার। ‘বাই ও ওয়ে, ল, মে আই আঙ্ক অ ফেভার?’ অর্থাৎ আমাব অফিসিয়াল সুপীরিয়র আমার অলুগ্রহপ্রার্থী। কে জানে, বাবা, আপনিও কোনদিন আমার অফিসিয়াল সুপীরিয়র হবেন। এর মধ্যেই কোথায় যেন ডিসটিক্ট ম্যাজিস্ট্রেট হয়েছেন।”

“হ্যাঁ, কিন্তু অস্বাভাবিক। আপনি আমার চেয়ে বয়সে তো সীনিয়র। অনেক সীনিয়র। আপনাকে কি অমন আদেশ দিতে পারতুম? কিন্তু বলা যায় না। সীনিয়র কেস হলে আমরা কনভিকশনের দিক থেকেই ভাবি। কিন্তু ম্যাজিস্ট্রেট না হয়ে জজ হলে আবার উটো দিক থেকে ভাবতে হয়। প্রত্যেকটি আমাদের নির্দোষ বলেই ধরে নিতে হয়, যতক্ষণ না সে অপরাধী বলে প্রমাণিত হয়। এটাই ব্রিটিশ ধর্মাধিকরণের বৈশিষ্ট্য। জুরি প্রথার প্রবর্তনও এর অঙ্গ। জুডিসিয়ারিকে প্রভাবিত করার ক্ষমতা লার্টসাহেবেরও নেই। শেফার্ড তো মুখ ফুটে তেমন কোনো ফেভার চাইতেই ভয় পাবেন। ব্রিটিশ শাসন যে এতকাল ধরে টিকে আছে এটা কি শুধু গায়ের জোরে? তার সঙ্গে জায়ের জোরও আছে। ম্যাজিস্ট্রেট হলেন শাস্ত্রশক্তির প্রতীক, আর জজ হলেন শাস্ত্রশক্তির প্রতীক। একজন হলেন আমাদের ভাষায় ক্ষত্রিয়, অপর জন ব্রাহ্মণ। দুই শক্তিই পরস্পরকে চেক ও ব্যালান্স জোগায়। এটাই হলো নিয়ম, তবে সঙ্কটকালে এর ব্যতিক্রম ঘটে। অর্ডিন্যান্সের শাসন আইনের শাসনকে ছাড়িয়ে যায়।” মানস এর জন্তে হুঃখিত।

“ওরা সংঘাতের সময় বলে, মাইট ইজ রাইট। শান্তির সময় বলে, রাইট ইজ মাইট। কখনো বিবেকের উপর জয়ী হয় স্বার্থবুদ্ধি। কখনো স্বার্থবুদ্ধির উপর বিবেক। লোহার হাত আর মথমলের দস্তানা দুটোই মিলে ব্রিটিশ রাজ। পোষ না মানলে ডাঙা। পোষ মানলেই ঠাণ্ডা। ভালো কথা, মল্লিক, আপনি কি জানেন এখানে মিলিটারি আসছে? থামবে না, আরো দক্ষিণে চলে যাবে। বর্মায় কি মালয়ে। বোধহয় সিঙ্গাপুরে ঘাঁটি গাড়বে। কেন, বলুন দেখি? জার্মানরা কি সিঙ্গাপুর অবধি ধাওয়া করবে?” ক্যাপটেনের কথায় কিসের যেন সঙ্কট।

“তা যদি হয় আপনি যাবেন নাকি সিঙ্গাপুর ফ্রণ্টে ? তেমন কোনো অঙ্গীকার দেননি তো ?” মানস উদ্ভিগ্ন হয়ে প্রশ্ন করে।

“ওরা চায়ও নি। আমি দিইও নি।” লাহাব উত্তর।

“আমিও এককালে ইউনিভার্সিটি ট্রেনিং কোরে ভর্তি হয়েছিলুম। যেদিন বলে ভারতের বাইরে যখনি দরকার হবে তখনি যেতে হবে, সেদিন বগু সই করতে অঙ্গীকার করি। বলে, ওটা একটা মামুলি ফর্মালিটি। আমি কি তাতে ভুলি ? মানে মানে সরে সড়ি। একবার সই করলে পরে আর ফিরিয়ে নেওয়া চলে না। কোট মার্শাল।” মানস শিউরে ওঠে।

“যাঃ! আপনি দেখছি নেহাৎ এক ভেতো বাঙালী। সাধে কি বলে আমরা মার্শাল রেস নই ? আর্মিতে আমাদের অফিসার করে না, কারণ আমরা লডুইয়ে জাত নই। আমরা ভাবি কাবণটা রাজনৈতিক। তা নয়, সামরিক। মেসোপোটো-মিয়ার গিয়ে বেকলী রেজিমেন্ট নোক হাসিয়ে এসেছে। নিজেদের মধ্যেই লড়াই।” আপসোস করেন লাহা।

“কেন, আমি তো একজনকে জখম হয়ে ফিরতে দেখেছি। ফিরে এসে হয়েছেন সাব-ডেপুটি ম্যাজিস্ট্রেট।” মানস আশ্চর্য হয়ে বলে।

“ওটা কি টার্কদের গুলিতে না বাঙালীদের গুলিতে ?” লাহা মুচকি হাসেন।

“অবশ্যই টার্কদের গুলিতে।” মানস দৃঢ়তার সঙ্গে বলে।

‘আপনি দেখছি সহজেই সকলের সব কথা বিশ্বাস করেন। ইংরেজরা অত নীরেট নয় যে অকারণে একটা রেজিমেন্ট ভেঙে দেবে। ডিসিপ্লিন ইজ গু ওয়ার্ড। অনাব ইজ গু ওয়ার্ড। লয়ালটি ইজ গু ওয়ার্ড। কথা দিয়ে কথার খেলাপ করলে মিলিটারিতে রাখে না। মিডিলে হয়তো রাখে, কিন্তু নিচের তলায়। ডাক্তারদের মধ্যেও কৌদল। যেখানেই বাঙালী সেখানেই দলাদলি। ফ্রণ্টে গিয়েও ঢেঁকি ধান ভানে। ফলে আর সরকারী চাকরি জোটে না! অবশ্য ডাক্তারি ব্যবসা করতে বাধা নেই। সে রকম কেস কিন্তু বিবল। ডাক্তাররা মোটের উপর মাথা ঠিক রেখে কাজ করেছেন। বাঙালীরা ডাক্তার হিসেবে খুব নাম করে ফিরেছেন। আমাকেও এতদিনে মেজর কি লেফটেন্যান্ট কর্নেল করে থাকত, আমি যদি ফ্রন্টিয়ারে কি বেলুচীস্থানে চাকরি নিয়ে থেকে যেতুম। সেটা যে হলো না তার কারণ আমি ভীতু বাঙালী বা ভেতো বাঙালী নই। আমি চেয়েছিলুম বুড়ো বাপ মার কাছে না হোক কাছাকাছি থাকতে। কিন্তু তাঁদের শেষ সাধটা মেটাতে কি পারলুম ?” লাহা আবেগের সঙ্গে বলেন।

“শেষ সাধ ? তার মানে কী, ক্যাপটেন ? শুনতে চাইলে কি অশিষ্টতা হবে ?’ মানস কৌতূহলী হয়।

“না, না, অশিষ্টতা নয়। সেটা আমারই দুর্ভাগ্য। তাঁরা আমাকে বিলেত যেতে দেননি, জেদ ধরেন যে তার আগে বিয়ে করতে হবে। আমি দেখি মহাবিপদ। তা হলে আর বিলেত গিয়ে স্বাধীনতা কী হলো ? হাত পা বাঁধা। মেয়েদের সঙ্গে মেলামেশা করতে পাবব না। যার জন্তে সবাই বিলেত যায়। আপনি হয়তো ব্যতিক্রম। প্রজেক্ট কম্পানী অলগুয়েজ একসেপটেড। আই বেগ ইয়োর পাড ন, সার।” লাহার কাঁচুমাচু মুখ।

মানস হা হা করে হেসে ওঠে। “মেলামেশা আমিও কামনা করছি। সেটা কিন্তু অত সুলভ নয়। কেউ ইনট্রোডিউস করে না দিলে রীতিমতো দুর্লভ। নেহাৎ যদি এল-এল ডি না হয়।” মানস রঙ্গ করে।

“সে কী, মশায় ! তার মানে তো তো ডক্টর অভ ল। আমি যেমন ডক্টর ল। ওদেশের মেয়েরাও কি তাই ? ডক্টরেট এত সুলভ ?” লাহা বিশ্বাস করেন না।

“আরে দূর ! আপনি কি ঠাট্টাও বোঝেন না ? এল-এল ডি মানে ল্যাণ্ডলেডাস ডটার। ওদের সঙ্গে ঘরে নাচতে পারা যায়, বাইরেও অসম্ভব নয়। আমি ওসব কিছু করিনি। করলে বাঙালী মহলে টি টি পড়ে যায়। বেটার সার্কলেই মিশেছি। তবে মেলামেশাটা প্রধানত বাঙালী মহিলাদের সঙ্গেই হয়েছে। যেটা দেশে থাকলে হতো না। যা কড়া পর্দা। এই দশ বছরে কতকটা কমেছে। রাজনৈতিক আন্দোলন মেয়েদের কতকটা মুক্তি দিয়েছে। জেল থেকেও রাজবন্দিনীদের চিঠিপত্র পেয়েছি। এ যে অভাবনীয় পরিবর্তন।” মানস উচ্ছ্বসিত।

“জেল থেকে ? রাজবন্দিনীদের ! আপনাকে দিল পড়তে !” লাহা তো অবাক।

“সেন্সর যদি পাস করে পড়তে দেবে না কেন ? তবে পুর্লিশের খাতায় আমার নিজের নাম উঠল কি না কে জানে ! কিন্তু কেউ জিজ্ঞাসাবাদ করতে আসেনি। অতি নির্দোষ চিঠি। বড়ো দুঃখ হয় যে কাউকে আমি ছাডরে আনতে পারিনি। তাঁরাও চাননি। দেশের মুক্তির জন্তেই তাঁরা জেলে গেছেন, অকুতোভয়ে ঝাঁপ দিয়েছেন সংগ্রামে। কেউ অগ্ন হাতে, কেউ নিরস্ত্র হয়ে। আমি তাদের বন্দনা করি। তবু মনটা কেমন করে। জেল যে কী জিনিস তা কি আমি জানিনে ?” মানস ব্যথিত।

“সে কী ! আপনি আবার জেলে গেলেন কবে ? অসহযোগ করেছিলেন নাকি ? তা হলে তো পরীক্ষায় বসতেই দিত না।” লাহার মুখে বিস্ময়।



“অসহযোগের দিন জেলে যেতে পা বাড়িয়োঁছিলুম আমরা ক’জন, কিন্তু এই শর্তে যে আমাদের গুরুমশাইরাও যাবেন। তাঁরা পেছিয়ে যান। আমরাও আগ্রহ হারিয়ে ফেলি। লগ্ন উত্তীর্ণ হলে যা হয়। চৌরীচৌরা এসে গান্ধীজীকেও নিরুত্তর করে। কিন্তু এমনি বিধাতার বিধান যে পরে চাকরি করতে হয় সেই সবক’বেব অধীনেই। জেলে যেতে হয় হপ্পায় হপ্পায়, অন্তত একবার। খোঁজ করতে হয় আণ্ডারটায়ালদের। তাদের কোনো নালিশ থাকলে প্রতিকার করতে হয়। এটা রামরাজ্য না হলেও দেশীয় রাজ্য নয়।” মানস সপ্রশংস হয়।

“আব বলতে হবে না। ইংরেজের ব্যবস্থা ঢের ভালো। তবু আরো অনেক ভালো হতে পারত ওদেরই কল্যাণে। ডিটারেন্ট সেনটেন্স বলে সেই যে একটা বিবি আছে সেটাকে যতদূর সম্ভব প্রয়োগ করতে হয় জেলখানার ভিতরে। জেল যদি আরামেব জায়গা হয় তবে আর ডিটারেন্ট সেনটেন্সের ত্রাস রইল কোথায়! সাজা আর মজা তো একাকার হলো।” ক্যাপটেন সাক্ষী দেন। তাকেও জেলে যাওয়া আসা করতে হয়।

“যা বলেছেন। সেদিন শেফার্ড খুব উত্তেজিত হয়ে অভিযোগ দিবেন, আমাব মুখে যখন শোনেন যে কংগ্রেসীরা আইন সভা থেকে সরাসরি জেলখানায় যাবেন যুদ্ধের প্রতিবাদে। ‘ওঁরা কি কম তুখোড়!’ শেফার্ড বলেন, ‘জানেন ওরা জেল কোড বদলে দিয়েছেন আটটি প্রদেশে, যেখানে ওঁদের মন্ত্রিত্ব? জেল কি আর জেল? জেল এখন গেস্ট হাউস। সরকারী খরচে ফার্স্ট ক্লাস কমফর্ট ভোগ করা হবে। ফিরে এসে আবার গদীয়ান হয়ে বসবেন। দেশের লোক ঠাওরাবে এঁরা কত বড়ো বীর।’ গান্ধীজী চডেন থার্ড ক্লাস ট্রেনে, তা শুনে শেফার্ড বলেন, ‘সেটাও কি ত্যাগস্বীকার। কামবাটা তো ওঁর জন্তে আর ওঁর দলবলের জন্তে বিজার্ড। ধুয়ে মুছে তকতকে কবে রাখতে হয়, নইলে বডলাটকে লিখে বিব্রত করবেন। দেশের লোক তো এই নিয়ে চেষ্টামিচি করবেই। মিস্টার গ্যাণ্ডী একজন সেন্ট কি না জানিনে, কিন্তু একজন ওস্তাদ পলিটিসিয়ান। আমাদের বাধ্য করবেন ওঁকে সদলবলে জেলে পাঠাতে। ছুনিয়ার লোক বিশ্বাস করবে যে তিনিই রাইট, আমরাই বং। টেররিস্টদের আমরা বুঝি, যদিও তারিফ করিনে। কিন্তু কংগ্রেস একটি প্রহেলিকা। শেফার্ড বিরক্ত।” মানস টিপে টিপে হাসে।

“কথাটা, সত্যি, মল্লিক সাহেব। সোজা মাল্লুষটাকে বাঁকা মাল্লুষগুলো কেমন স্ক্রকোশলে তাড়িয়েছে। বাঙালীকে ওরা দু’চক্ষে দেখতে পারে না। স্ভাষকে ওরা পুতুল প্রেসিডেন্ট করে রাখবে, ওরাই হবে পুতুল নাচের স্ত্রদ্ধার। বাগড়া বাধবে না?

তা বলে ঘাড ধরে বার করে দেওয়া হলো ? ওদের কারো উপর আর আমার আস্থা নেই, ভাই। হিন্দুস্থানের মসনদে ওরাই তো বসবে। তা হলে আমাদেরও কি একই দশা হবে না ? স্বরাজের জন্তে আমার তেমন ব্যস্ততা নেই। কিন্তু ক্লাইভ যদি মীর-জাফরকে আবার বাংলার মসনদে বসিয়ে দিয়ে ছাতার আড়ালে থেকে যায় তা হলেই বা আমাদের কোন্ সুখ ?” লাহার কাছে সেটাও অসম্ভব।

“তা হলে আপনি কী চান, ক্যাপটেন ?” মানস স্বধার, “সুভাষ নেতৃত্ব ?”

‘কেন নয় ? সুভাষের মতো ব্রহ্মচারী আর কে আছে ? কার এত ব্রহ্মতেজ ? গান্ধী মহারাজও বিবাহ করেছেন, সেইসঙ্গে প্রচুর শুক্রক্ষয় করেছেন। আর সুভাষের তো এক বিন্দুও ক্ষয় হয়নি। ভিতরে ভিতরে সবটাই কপাত্তরিত হয়ে যাচ্ছে বজ্রকঠিন বীরত্বে। হিটলারও সেইরকম এক নিষ্কাম ব্রহ্মচারী। হিটলার যদি জেতে তবে সেই পুণ্যের ফলেই জিতবে। খবরদার, একথা যেন আর কারো কানে না যায়, প্রিয় বন্ধু।” লাহা মিনতির স্বরে বলেন হাত যোড করে।

মানস তাকে অভয় দেয় যে এসব গোপন কথা আর কারো কাছে ফাঁস করা হবে না। “কিন্তু, ক্যাপটেন ল, আপনার বন্ধু হিসাবে আমি কি জানতে পারব না যে আপনারও চিরকুমার হবার মূলে তেমনি কোনো সংকল্প বা ব্রত ছিল, যেমন ছিল সুভাষচন্দ্রের বা হিটলারের ? পরাধীন দেশের উদ্ধার বা পরাজিত দেশের জয় ?”

“না ভাই, তেমন কোনো ব্রত নয়। নিছক জেদ। আগে বিলেত, তার পরে বিয়ে। তার মানে আগে আই. এম. এস, তার পরে পদের উপযুক্ত মিসেস। যাকে আমি সমাজে বার করতে পারি, ক্লাবে নিয়ে যেতে পারি। ক্লাবই তো অফিসারদের সমাজ। রোমে গেলে রোমানদের মতো আচরণ করতে হয়। ক্লাবে গেলে ইংরেজদের মতো। ওরাও নাচে, আমরাও নাচব। ওরাও খানাপিনা করে, আমরাও করব। আমার যুক্তি কি ভ্রান্ত না অভ্রান্ত ? যেদিন জানব যে রোমান সাম্রাজ্যের পতন ঘটেছে সেদিন আমরা আর ওদের ক্লাবের সঙ্গে সম্পর্ক রাখব না। ওদের মতো আচরণ করব না। সেদিন আমিও আই. এম. এস থেকে বিদায় নিয়ে প্রাইভেট প্র্যাকটিসে নামব। আরে, ডাক্তারকে মারে কে ! ডাক্তারই সবাইকে মারে। গান্ধী বলো নেহরু বলো, সুভাষ বলো, কেউ আমাদের মারবে না। না, খোদ হিটলারও না, যদি তিনি বায়ুরথে আকাশ পাড়ি দিয়ে ভারতে অবতীর্ণ হন। আজন্ম ব্রহ্মচারী বলে নতজাহ্নু হয়ে দেশস্বত্ব হিন্দু তাঁর চরণ বন্দনা করবে। মুসলমানরাও করবে, সেটা তাঁর সংহারযুতি দেখে। এই কলেরা ম্যালেরিয়ার দেশে এসে নাংসাদেরও তো আধিব্যাধি হবে। জার্মান ডাক্তারদের কি এসব রোগ সারাবার যোগ্যতা থাকবে ?

থাকবে আমাদেরই। আমাদেরই ডাক পড়বে। তা হলে, ভাই, আমাদের মারবে কে? কিন্তু দোহাই তোমার, এসব কথা মণিমুক্তার মতো কুয়োর জলে ফেলে দিয়ে। প্রয়োজন হলে তুলবে।” লাহা কী বলতে কী বলে বসেন।

মানস পরিহাস করে বলে, “আপনিও তো হিটলারের মতো ব্রহ্মচারী ও আপনার হাতেও মারণাস্ত্র। আপনিই বাঁচবেন, আমরা মরব। কিন্তু এখনো আমার আসল কথাটা শুনতে বাকী। আপনার মা বাবা কি আপনার সরকারী চাকরি হয়েছে দেখে আবার বিয়ের প্রসঙ্গ তোলেননি? কল্যাণকর্তারাও কি পণযৌতুকের টোপ ফেলেননি? কই, আপনার মতো আর একজনকেও তো দেখছেন?”

“কেন, ডাক্তার রায়?” সঙ্গে সঙ্গে উত্তর দেন ক্যাপটেন। “হঁ হঁ। হঁ হঁ হঁ হঁ। উঁ হঁ। উঁ হঁ উঁ হঁ। বলব না।”

মানসকে বলতে হয় না। সে ফিক করে হাসে। “থাক, নাই বা বললেন।”

“যাক, যেকথা আমি মা বাবাকে বলি সেই কথা অতি সরল ও সহজ ভাষায়, নেই বিলেত তো নেই বিয়ে। নো ইংলও তো নো ম্যারেজ। আর ভাই, এটাও কি বলতে হয় যে আই. এম. এস হলে আমার বিয়ের বাজারে পণযৌতুকের হারও পাঁচগুণ হতো? ওসবও আমি তুচ্ছ করতুম বো যদি হতো সুন্দরা, সুমধ্যমা, রত্নাগীতনিপুণা, আধুনিকা। সোনা জ্বরং দিয়ে যার সর্বাঙ্গ মোড়া তেমন একটি সাজানো প্রতিমাকে নিয়ে ঘরকন্না করা যায়, রত্ননিপুণা হলে তো ঝালটা ঝোলটা অঞ্চলটাও মুখরোচক হয়, দেশী খাবারই আমার বেশী ভালো লাগে। সেদিক থেকে আমি রোমানদের মতো নই, ওই অ্যাংলো-মোগলাই খানা আমার অসহ্য। লর্ড সিন্‌হার তো রোজ স্নক্তো না হলে চলত না। রাঁধতেন স্বয়ং লেডী সিন্‌হা। সবার সেরা বাঙালী সাহেব ও বাঙালী মেম এই বচনে বিশ্বাস করতেন যে, পর রুচি পিন্‌হা আপ রুচি খানা। আমিও তাঁদের অনুগামী। বিয়ে করলে এমন একজনকেই করতুম যিনি হয়তো একদিন হতে পারতেন লেডী ল। আর তোমার ওই পর্দানশীন গৃহলক্ষ্মী? মা বাবার পছন্দ, আমার অপছন্দ। দেবদেবীকে দেবভাষায় প্রার্থনা করি ভাষাঃ মনোরমাঃ দেহি। প্রজাপতি শুনলেন না। মা দুর্গা বললেন, কার্তিকো ভব। অগত্যা ব্রহ্মচর্য ব্রতধারী। পতিযোগ্য নহি, বরান্বনে।”

“দাদা,” মানস হাসি চাপে “বাকীটুকু ভুলে যাচ্ছেন কেন? শেষে সেই চিত্রাঙ্গদাই সেই অর্জুনকে বলেন, ‘গর্ভে আমি ধরিয়ছি যে সন্তান তব’। সুন্দরী রাজেন্দ্রনন্দিনী যদি আপনার সম্মুখে উদয় হতেন আপনিও বাকীটুকু পূরণ করে বলতেন, ‘প্রিয়ে, ধন্য আমি।’ ইংরেজরা তো পঞ্চাশের পরেও বিয়ে করে সংসারী

হয়। পুত্রকন্টার জনকও হয়। ইচ্ছে করলে আপনি এখনো বিলেত যেতে পারেন। এই মহাযুদ্ধের মরুত্বে চেষ্টা করলে আই. এম. এসও হওয়া যায়। মনোরমার দর্শন এখনো মিলতে পারে। এমন কোনো পণও আপনি করেননি যে দেশ স্বাধীন না হলে আপনি পাণিগ্রহণ করবেন না। তেমন পণ করেছেন আমার বন্ধু সৌম্য চৌধুরী। তাঁর জন্মে পার্বতীর মতো প্রতীক্ষা করছেন বহুদিন ধরে একটি কন্যা। আমার বোন না হলেও বোনের মতো প্রিয়। জীবনটা কি এতই দীর্ঘ যে অনিদিষ্টকাল অবিবাহিত থাকলেও চলে ?”

“সৌম্য চৌধুরী তোমার বন্ধু ? কটর গান্ধীবাদী আর পাক্ষা সাহেব ! উত্তর মেরু দক্ষিণ মেরু !” লাহা তো শুনে থা।

“আমিও তো ছাত্রজীবনে গান্ধীর অনুগামী ছিলাম, কিন্তু তাঁর সব কথা কি বিনা বাক্যে মেনে নিতে পারতুম ? সত্যের মহিমা আমি তখনো মানতুম, এখনো মানি। আমারও একটা সত্যের অন্বেষণ আছে। অহিংসা আমি হিংসার চেয়ে মহত্তর বলে তখনো মানতুম, এখনো মানি, কিন্তু স্বাধীনতার সংগ্রামে অপরিহার্য মনে করিনে। কোথাও এর নজীর নেই। এক ভারত যদি নজীর রাখতে চাব সেটা হয়তো সম্ভব, কিন্তু তার জন্মে কে চিরকাল অপেক্ষা করবে ? নেহরুর মতো দুই দরজা খোলা রেখেছি। গান্ধীজীর মতো হিংসার দরজা বন্ধ করে দিইনি। কিংবা স্ভাষচক্রের মতো অহিংসার দরজা। কিন্তু ব্রহ্মচর্যের বেলা গান্ধীজীর সঙ্গে আমাব গোড়া থেকেই অমিল। তিনি কোনো দিন প্রেমে পড়েননি, আর আমি প্রেমের খাতিবে ব্রহ্মচর্য ছাড়তে রাজী। তবে আমারও একটা ধর্মুর্ভঙ্গ পণ ছিল। প্রেমে না পড়লে আমি বিয়ের বাঁধনে বাঁধা পড়ব না। আমার জীবনে প্রেম না এলে আমিও আপনার মতো অবিবাহিত থাকতুম। দেশপ্রেমের মতো নারীর প্রেমও সাধনা আরাধনার ধন। সৌম্যদা আর আমি দু’জনে নিজেদের মধ্যে একটা বোঝাপড়া করে নিয়েছি। তাই আমাদের বন্ধুতা ছাত্রবয়স থেকেই অব্যাহত। তবে আমরা আগের মতো মেলামেশার সুযোগ পাইনে। ও ভাবে ও আমার সঙ্গে মিশলে আমার উপর ওয়ালার। আমাকে সন্দেহ করবেন। আমি ভাবি আমি ওর সঙ্গে মিশলে ওর সংগ্রাম সাধীরা ওকে সন্দেহ করবেন। সেইজন্মে দীর্ঘকাল দেখাসাক্ষাৎ হয়নি। সম্প্রতি আবার শুরু হয়েছে। এটাও বেশী দিন চলবে না। ওরা হয়তো আবার জেলে চলে যাবে।” মানস বুঝিয়ে বলে।

লাহা কৌতূহল-চেপে রাখতে পারেন না। “আচ্ছা, সেই যে একটি কন্যা সৌম্য চৌধুরীর জন্মে শবরীর মতো প্রতীক্ষা করছেন তিনি কি আমার বন্ধুকন্যা মধুমালতা মুস্তাফী ? ওর তো বিয়ে হয়ে গেল আরেকজনের সঙ্গে।”

“ভুলেছি তিনিও প্রত্যাশা করেছিলেন সৌম্যদার সঙ্গে বিবাহ, কিন্তু আমি যার কথা বলছি সে আর একটি মেয়ে। ওকে আপনি চিনবেন না। ওর জীবনটা বড়ো দুঃখের। ইচ্ছার বিরুদ্ধে বালাবিবাহ, মিলনের পূর্বেই বিরহ ও বৈধব্য। লোকচক্ষে বিবাহিতা, কিন্তু ঈশ্বরের চক্ষে কুমারী। ও আর বিয়ে করতে চায় না, যদি না সৌম্যদাকে পায়। মিলির সঙ্গে যার বিয়ে হলো সেই পাত্রটিকে জুলি-বার বার তিনবার প্রত্যাখ্যান করেছে। দশবছর অপেক্ষার পর স্বকুমার হাল ছেড়ে দেয়।” বলতে বলতে মানস নামগুলো কাঁস করে দেয়।

“বুঝেছি তুমি কার কথা বলছ।” লাহা স্বরণ করেন। “ওর বাবা ক্যাপটেন সোম যুদ্ধে আমার সমসাময়িক, কিন্তু চাকরিতে বছর পাঁচেক সীনিয়ার। মুতাকী আর সোম তো আই. এম. এসের জন্মে মনোনয়নও পেয়েছিলেন, কিন্তু নানা কারণে ওঁদের স্থায়ীভাবে বহাল করা হয়নি। জালিয়ানওয়ালাবাগের পর থেকে ওঁদের ভিতরে একটা বিদ্রোহীভাব লক্ষ করা যায়। মিলি তো সোজাসুজি টেরিস্ট বনে যায়। সোম ওঁর ছোট মেয়ের বিয়ে দিয়ে মেয়ের দুঃখে মনমরা হয়ে মারা যান। অথচ এমন পাত্র হাতছাড়া করা যায় না। ওঁর স্ত্রী ওঁকে নিত্য খোঁটা দিতেন যে কেন ওঁকে ক্যাপটেন থেকে মেজর করা হচ্ছে না, কেন তিনি স্বদেশিয়ানা করে সরকারকে বিরূপ করে তুলছেন। যাক, সেসব পুরনো কান্ডের ঘেঁটে কী হবে? সাহেবদের সঙ্গে দহরম মহরম না করলে কি অমনি প্রমোশন হয়? হতে পারে চিকিৎসার গুণে প্রাইভেট প্র্যাকটিস। তাতে তো তিনি ভালোই করছিলেন। কিন্তু প্রতিদ্বন্দ্বীদের চক্রান্তে ওঁকে দেওয়া হতো এমন সব জেলা যেখানকার লোক নেহাং গরিব। মিডিল সার্জনের ডাকবার মতো অর্থবল নেই। তিনি আবার কম ফী নেবেন না। তাতে মর্যাদাহানি। তবে প্রথমবার পুরো ফী নিয়ে দ্বিতীয়বার সেই রুগীর কাছ থেকে আদৌ কিছু নিতেন না। ভেট তো সকলেই নেয়। দিলে ফিরিয়ে দিতেন। তাতে জমিদারদের সম্মানহানি। স্ত্রীর বিরক্তি। পারিবারিক জীবনের গতি চূড়ান্ত অশান্তিতে পৌঁছয় যখন জুলি নাকি নিরুদ্দেশ হয়ে যায়। তার খবরবাড়ী থেকে। পরে অবশ্য তাকে পাওয়া যায়। কিন্তু ততদিনে তাঁর মন ভেঙে গেছে। শরীরও। নিত্য অল্পশোচনা করতেন। ছেলেটিকে বিলেত যাবার আগে ওর ইচ্ছার বিরুদ্ধে বিয়ে দেওয়া হলো। বছর দু’তিন সবুর করলে কী এমন ক্ষতি হতো! ছেলেটিও তার বাপের বিরুদ্ধে বিদ্রোহী হতো না। স্ত্রীর উপরেও বিমুখ হতো না। জুলি তো বিলেতেও যায়। বিধবা মায়ের সঙ্গে স্বামীর সঙ্গে মিলিত হতে। ততদিনে ওরও অন্তরিকে মন গেছে। তাতে জুলির মনোভঙ্গ হয়। এসব কথা আমার চেয়ে তুমিই বেশী জানো, মল্লিক।”

“তার পরের অধ্যায় আপনারও আরো বেশী জানা। সে অধ্যায়ও বাসি হয়ে গেছে। ও মেয়ে বন্দীশিবির থেকে ছাড়া পেয়েছে অনেক দিন আগে। ওর টান সৌম্যদার উপরে। জুলি ওকে দেবতার মতো পূজা করে। অথচ সৌম্যদা হলো সত্য, অহিংসা আর ব্রহ্মচর্য এই ত্রিনীতিতে বিশ্বাসী। কটুর গান্ধীবাদী। আইন ভঙ্গ করে জেলে যাবে, কিন্তু ব্রতভঙ্গ করে বিয়ে করবে না। তবে আমি যতদূর জানি দেশ যেদিন মুক্ত হবে সেদিন ব্রহ্মচর্যব্রত থেকে ওর মুক্তি। জুলির উপরেই ওর টান সব চেয়ে বেশী। কিন্তু ওটা স্নেহ বা প্রেম না কম্পানিয়নশিপ তা তো বোঝা যাচ্ছে না। ওদের সম্পর্কের পরিণতি কী হবে তা স্বরাজ আন্দোলনের পরিণতির মতোই দুর্বোধ্য। তাই আমি কোনো ভবিষ্যদ্বাণী করব না। মিলনাস্ত্র হলে আনন্দিত হব। বিয়োগাস্ত্র হলে মর্মান্বিত হব।” মানস ও প্রসঙ্গের উপর যবনিকা টেনে দেয়।

“স্বরাজের কথা যদি বলো, আমার দিন দিন মালুম হচ্ছে যে ইংরেজরা ছাড়তে চাইলেও হিন্দু মুসলমান ওদের ছাড়বে না। কমলী নেহি ছোড়তি। এমন মারামারি বাধাবে যে সেটা থামাবার জন্যে একটা তৃতীয় পক্ষকে সালিশ মানতে হবেই। ওরাই সেই তৃতীয় পক্ষ যারা উভয় পক্ষেরই আস্থাভাজন। পুরোপুরি নিরপেক্ষ না হলেও মোটামুটি ফেয়ার। তুমি দেখবে ওরাই আর একটা রোয়েদাদ দিয়ে শেষরক্ষা করবে। কোনো পক্ষই সন্তুষ্ট হবে না, অথচ দুই পক্ষই মেনে নেবে। নয়তো দিল্লীর সিংহাসন নিয়ে হিন্দু মুসলমানের এই ঝন্ড সেই কৌরব পাণ্ডবের কুরুক্ষেত্রের মতো তলোয়ার দিয়ে মীমাংসিত হবে। কোথায় থাকবে তোমার বন্ধুর সত্য ও অহিংসা!” লাহা ভবিষ্যদ্বাণী করেন।

## ॥ চোদ্দ ॥

ক্যাপটেন লাহা নিজের গাড়ীতে করে মানসকে বাড়ী পৌছে দিতে চান। বলেন, “তোমার মিসেসকে বিশ্বাস করতে অল্পরোধ করব যে তোমার কোনো দোষ নেই। আমিই তোমাকে আটক করে রেখেছিলুম। তার জন্তে ক্ষমাপ্রার্থনা করব।”

“দেরি করিয়ে দিয়েছেন তা ঠিক, কিন্তু তাতে আমার অভিজ্ঞতাও বেড়েছে। লেখক যারা হতে চায় তাদের অভিজ্ঞতাই তাদের সম্বল। ভাবছি প্রথম চৌধুরী মহাশয়ের মতো আমিও একখানা ‘চার ইয়ারী কথা’ লিখব। সেটাও হবে ক্লাবভিত্তিক কাহিনী। আপনার নাম তাতে থাকবে না, কিন্তু আপনিও হবেন চার ইয়ারের এক ইয়ার। কেমন?” মানস না ভেবে চিন্তে যা বলে যায় তার সবটাই বানানো।

“কী সর্বনাশ! তুমি তো দেখছি একটি বিপজ্জনক প্রাণী। আর কার কার সর্বনাশ করতে আমাদের চিড়িয়াখানায় অল্পপ্রবেশ করছ?” লাহা কপট আশঙ্কার সঙ্গে কৌতুহল মেশান।

“সর্বনাশ কেন বলছেন? কী লিখতে চাই তা আগে গুনতে হয়।” মানস তাঁকে একটু খেলিয়ে খেলিয়ে বলে, “আমার নায়কদের চারজনের একজনের প্রার্থনা হলো, ভাষণ মনোরমাং দেহি। দেবী তাঁকে বর দিলেন, কার্তিকো ভব। দেবীর বর কি বার্থ হতে পারে? কার্তিকের মতোই রূপবান হলেন তিনি, কিন্তু কার্তিকের মতোই চিরকুমার। বৃথাই একটি বিশেষ শ্রেণীর মনোরমার কার্তিক মাসে কার্তিক পূজা করেন। তিনি যে মূনিপুত্র শুকদেবের মতো নিষ্পাপ ব্রহ্মচারী এর আরো এক কারণ ছিল। তাঁর বাসনা ছিল তিনি বিলেত গিয়ে উচ্চতর ডাক্তারি ডিগ্রী নিয়ে আই. এম. এস হয়ে দেশে ফিরবেন। স্বর্য়কুমার চক্রবর্তীর মতো গুড়িভ সাহেবের কন্যা বিবাহ করে নিজের পদবীর সঙ্গে শ্বশুরের পদবী যুক্ত করার অভিলাষও

ছিল। কিন্তু মাতা শত্রু পিতা বৈরী। বিলেত যাওয়া হয় না। জীবনের সাধ মেটে না। প্রাদেশিক সরকারের চাকরি নিয়ে মফস্বলের জেলায় জেলায় অ্যাসিস্ট্যান্ট সার্জন হয়ে বেড়ান। এমন সময় বেধে যায় প্রথম মহাযুদ্ধ। বাঙালী পলটনের সঙ্গে যুদ্ধে যোগ দিয়ে মেসোপটেমিয়ায় প্রেরিত হন। যুদ্ধের পরে দেশে ফিরে অস্থায়ী সিভিল সার্জন। এক মুসলিম জমিদারের চার নম্বর বেগম সতীনদের সঙ্গে ঝগড়া বাধিয়ে সতীনের বাটিতে বিষ গুলে খেয়ে মারা যান। জমিদার পুলিশে খবর না দিয়ে বেগমকে গোরস্থানে নিয়ে গিয়ে কবর দেন। জেলা ম্যাজিস্ট্রেট এক উড়ো চিঠি পেয়ে জানতে পান যে ওটা আত্মহত্যা নয়, হত্যা। অপরাধী তিন সতীন। জমিদারও কম অপরাধী নন। কেন তিনি সাক্ষ্য গোপন করলেন? সাহেব হুকুম দেন কবর থেকে লাশ উদ্ধার করে পোস্ট মর্টেম করতে হবে। কিন্তু সাধারণ সাব-অ্যাসিস্ট্যান্ট সার্জনকে দিয়ে নয়। সিভিল সার্জনকে দিয়ে। কে সেই সিভিল সার্জন? ক্যাপটেন ব্রহ্মচারী ছাড়া আর কে? তিনিই সর্বাপেক্ষা বিশ্বাসভাজন ও দায়িত্বশীল। তাঁরই রিপোর্টের উপর নির্ভর করছে জমিদার ও তাঁর বেগমদের শাস্তি বা মুক্তি। সিভিল সার্জন ‘না’ বলতে পারেন না। তিনি পড়ে যান বিষম ধাঁধান্ন। তার পর কী হলো তা ক্রমশ প্রকাশ।” মানস এইখানে ছেদ টানে। চেয়ে দেখে ডাক্তার সাহেব একেবারে কাৎ।

“লিখবে তুমি এইসব কথা! তা হলেই হয়েছে আমার প্রমোশন। আমাকে দেখছি মিলিটারির সঙ্গে ভাব করে ওদের সঙ্গেই সিদ্ধাপুর পাড়ি দিতে হবে। সেখান থেকে তদ্বির করে বিলেত। আমার রিপোর্টে আমি কী লিখেছি তা কিন্তু কান করছি, মল্লিক। আমার বিভাগের মন্ত্রী মুসলমান, তিনি জমিদারও বটে। যদি মিলিটারিতে যাওয়া না হয় তা হলে আমার ভাগ্যে কী আছে কে জানে? প্রমোশন না ডিমোশন।” লাহা ভাবনায় পড়েন।

গাড়ী থেকে নেমে ডাক্তার সাহেব মানসকে পেছনে ফেলে ছুটে যান যুথিকার কাছে ক্ষমাপ্রার্থনা করতে। সে তখন গাড়ীর আওয়াজ শুনে নিজেই এগিয়ে এসেছে স্বামীর কাছে কৈফিয়ৎ চাইতে। সাহেব ডান হাত বাড়িয়ে দিতেই সে দুই হাত জোড় করে মাথা হুইয়ে বলে, “নমস্কার।”

ক্যাপটেন আগে থেকে তাঁর পাঁচ মুখ করে এসেছিলেন! অপদৃষ্ট হয়ে বাড়িয়ে দেওয়া বাত ফিরিয়ে নিয়ে বলেন, “গুড ইভনিং, মিসেস মল্লিক, আই হ্যাভ কাম টু অ্যাপলোজাইজ।”

যুথিকা তাঁকে অভয় দিয়ে বলেন, “আমারই তো মাফ চাইবার কথা। কেন



আমি আপনার মতো বড়ো সাহেবের দিকে ডান হাত বাড়িয়ে না দিয়ে নেটিভদের মতো দুই হাত জুড়ে নমস্কার করেছি। কিন্তু এর নজীর আছে, ক্যাপটেন সাহেব। মনে করুন আপনি বড়লাট লর্ড চেমসফোর্ড, আর আমি সামান্য প্রজা, মিসেস জিনা। স্থানটা সিমলায় বড়লাটের প্রাসাদ আর কালটা আজ থেকে বিশ একুশ বছর আগে কোনো এক সন্ধ্যা। এই সেই মহিলা যিনি কোটিপতি পার্শী পিতার অবাধ্য হয়ে মোসলেম ব্যারিস্টার জিন্নাকে বিবাহ করে ত্যাজ্যকণ্ঠা হয়েছেন। জিন্নারই বা তখন কী এমন পসার! মাঝারি মাপের ব্যারিস্টার। তেমনি বাড়িঘর। তাঁর স্ত্রী কি না মহামান্য রাজপ্রতিনিধির প্রসারিত হাত উপেক্ষা করেন।”

“এত বড়ো আশ্চর্য্য!” লাহা স্তম্ভিত হন। “এ কে? সেই রতনপ্রিয়া পেতিত! ডানা কাটা পরী! এটা কি রূপের দেমাকে না রূপেয়ার দেমাকে? বলুন, বলুন, মিসেস মল্লিক। আপনি তখন কোথায়?”

“সিমলাতে। সেইখানেই আমার জন্ম। সেইখানেই কনভেন্টের পড়াশুনা। আমার বাবা তখন বড়লাটের পার্সনাল স্টাফে। তাঁর উপরে অতিথি আপ্যায়নের সরঞ্জাম তদারকির ভার। যেন পান থেকে চূণ না খসে। তিনি একজন প্রত্যক্ষদর্শী। বড়লাট এত লোকের মাঝখানে অগ্রস্তুত হন বইকি। কিন্তু নিমন্ত্রিত অতিথিকে অসম্মান দেখাতে পারেন না। ভদ্রমহিলাকে আদর করে পাশে বসিয়ে হিতোপদেশ শোনান। মিসেস জিনা, আপনি ছেলেমানুষ, তাই আপনি হয়তো জানেন না। হোয়েন ইউ আর ইন রোম ডু অ্যাজ লু রোমানস ডু।’ হ্যাঁ, সাহেবরা উচ্চারণ করেন জিনা। আর গুজরাটীরা বীণা। আসলে ওটা একটা গুজরাটী হিন্দু নাম। ওর মানে ছোট। আর-সবাই উচ্চারণ করে জিন্না। মুসলমানরা ইদানীং উচ্চারণ করতে শুরু করেছেন জিন্নাহ্। যেমন আল্লাহ্। আরবীর মতো শোনায়। জিন্না কিন্তু সে সময় কমিউনাল ছিলেন না। পাক্সা সাহেব, সেইসঙ্গে খাঁটি ন্যাশনালিস্ট। আর তাঁর মিসেস শিক্ষাদীক্ষায় ইংরেজ হয়েও আচারে আচরণে কট্টর স্বদেশী। বড়লাটকে তিনি মুখের মতো জবাব দেন। ‘ইয়োর একসেলেস্ট্রী, এটাই তো রোম, আমিই তো রোমান। আমিই তো ইয়োর একসেলেস্ট্রীর সঙ্গে রোমানদের মতো আচরণ করেছি। আমিও সেটাই প্রত্যাশা করেছি। আমাদের সঙ্গে ইয়োর একসেলেস্ট্রী যদি আমাদেরই একজনের মতো আচরণ করতেন তা হলে আমরাও আত্মসম্মান বজায় রাখতেন পারতুম।”

“মাই গড! সো শী ইজ ইয়োর মডেল!” হকচকিয়ে যান লাহা।

“না, ডাক্তার সাহেব। আমি কখনো আমার স্বামীকে ছাড়ব না। পরে তিনি

স্বামীর আদর না পেয়ে বাপের বাড়ী ফিরে এসেছিলেন। স্বামীর সঙ্গে পরে পুনর্মিলন হয়। কিন্তু ভাঙা সংসার জোড়া লাগবে কেন? স্বামীও ততদিনে কমিউনাল হয়েছেন। রতনপ্রিয়া তো মুসলমান হননি। আরবী নাম নেননি। মুসলিম আইনে ইহুদীর মতো পার্শীও কিতাবী। কলমা না পড়িয়েও বিয়ে করা চলে। আচরণ তাঁর বিয়ের পরেও বদলায়নি। মুসলিম সমাজ সহ্য করে না। অকালে মারা যান। একটি সম্ভান রেখে যান। এই সেদিন ও মেয়ে সার নেস ওয়াড়িয়ার ছেলে নেভিল ওয়াড়িয়ার সঙ্গে ইলোপ করেছে। জাতে ওঁরাও পার্শী, ধর্মে কিন্তু খ্রীষ্টান। বিয়েটা বোধহয় সিভিল মতে হয়েছে। জিন্না সাহেব ওকে ত্যাজ্য কত্তা করেছেন। মুসলিম লীগের দলপতি থাকতে হলে খ্রীষ্টান পাত্রের সঙ্গে মুসলিম কত্তার বিবাহ মেনে নেওয়া চলে না। মেয়ের বিয়ে কিতাবীর সঙ্গে বারণ। জিন্না ওকে প্রাণভরে ভালোবাসতেন।” বলতে বলতে যুথিকা কঁদে ফেলেন।

“হোয়াই আর ইউ ক্রাইং, মাই সিস্টার?” লাহা আরেকবার স্তম্ভিত হন।

“এমনি। পরের দুঃখে চোখে জল এসে পড়ে।” চোখের জল মোছে যুথিকা। বলে, “আপনি এত বার কেন ইংরেজীতে বলছেন, দাদা? আপনিও বাঙালী, আমিও বাঙালী। এ বাড়ীতে কেউ ইংরেজীতে কথা বলে না। ছেলেমেয়েদের আমরা বাঙালীও করব, মানুষও করব। আমাদের হোম হচ্ছে আমাদের রোম। এখানে এলে রোমানদের মতো আচরণ করতে হয়। তবে সাহেব মেম এলে আমরা তাঁদের সঙ্গে ইংরেজীতেই কথা বলি। উনি যদি সত্যি সত্যি চাকরি ছেড়ে দেন তা হলে আমরা ওঁদেরও রেয়াং করব না। কিন্তু তেমন খুঁটির জোর কোথায়? সংসার চলবে না বই লেখার টাকায়। আর আমিও সঙ্গীত শিখিয়ে উপার্জন করতে পারিনে। যত্ন করে পিয়ানো বাজাতে শিখেছি। কিন্তু তার জগে উপযুক্ত পরিবেশ তো কলকাতা। কলকাতায় থাকলে আবার রাজসিক ধারায় জীবন তরী ভাসাতে হয়। আমরা ও ধারা ছেড়ে সাদ্বিক ধারা শরণ করেছি। আমাদের জীবনে সেই যে শোকাবহ ঘটনা ঘটে গেল সেটা আমাদের মতে শূন্যগর্ভ সাহেবিয়ানার পরিণাম।” যুথিকা আবার চোখের জল মোছে।

“আই অ্যাম সো সারি!” বলেই লাহা জিব কাটেন। “আমি এত হুঃখিত!”

মানস মন্তব্য করে, “গুটা ঠিক বাংলার মতো শোনায় না, ডাক্তার সাহেব। কিন্তু ও প্রসঙ্গ থাক। চা না কফি? কী খাবেন, বলুন।”

“আমারই উচিত ছিল জিজ্ঞাসা করা। অপরাধ মার্জনা করবেন।” যুথিকা ভুলে গেছে বলে সত্যিই লজ্জিত।

“ওটাও ঠিক বাংলার মতো শোনায় না, জুঁই। ওটা ইংরেজী না হলেও ইংরেজী-তরো। যেমন ফজলি না হয়ে ফজলিতরো।” মানস হাসিমুখে বলে।

“বলুন, কী খাবেন, দাদা। বিদেশী তো দূরের কথা বিস্কুট স্বদেশী মদিরাও আমরা রাখিনে। তবে চা কফি ছাড়তে পারিনি। আমরা তো সৌম্যদার মতো গান্ধীবাদী বা গান্ধীপন্থী নই। অতিথিদের দিতে হয়, নিজেরাও অন্নায় মনে করিনে। কী দেব বলুন।” যুথিকা নতুন করে স্তব্ধ।

“নো। থ্যাঙ্কস। ক্লাবে আমি যা পান করে এসেছি তার উপর আর কিছু পান করতে আগ্রহ নেই। আজ থাক আরেকদিন আসব। তখন যেটা খুশি দিয়ে। কিন্তু তুমি আমাকে ভাবিয়ে দিলে, বোন। তুমি ঋণ মেয়ে তিনি তো তোমাকে কনভেন্টেও পড়িয়েছেন। পিয়ানো বাজাতেও শিখিয়েছেন। কিন্তু তিনি হাজার সাহেব সাজলেও ব্রাহ্মণ। তাঁর অসবর্ণ বিবাহে আপত্তি। তিনি কি তোমাকে ত্যাজ্যকণ্ডা করেছেন? সার জাহাঙ্গীর পেতিতের মতো? বা জিন্নার কণ্ডাকে জিন্নার মতো? তার উপরে এই পুত্রশোক। কী করবে, ভগবানের মার।” লাহা দরদের সঙ্গে বলেন।

“ও প্রসঙ্গ থাক, দাদা।” মানস মিনতি করে। “জিন্না সাহেব যে একবার কত বড়ো একটা কাজ করেছিলেন সেকথা খুব কম লোকেরই জানা। কুম্ভদাসের বই ক’জনেই বা পড়েছে! এখন সেটি একটি দুস্ত্রাপ্য গ্রন্থ। সেদিন হঠাৎ আমার চোখে পড়ে। মাস সিভিল ডিসওবিভিয়েন্সের জন্তে সারা দেশ অধীর, ঘোষণার দিনক্ষণ ধার্য হয়ে গেছে গুজরাটের বারদোলী তালুক থেকেই শুরু হবে, তার পর গ্রাম থেকে গ্রামে চড়াবে দাবানলের মতো। অকস্মাৎ যুক্তপ্রদেশের অখ্যাত অজ্ঞাত চৌরী চৌরা গ্রামে ঘটে যায় এক মর্মান্তিক ঘটনা। কী কারণে পুলিশের উপর চড়াও হয় জনতা, থানাভুক্ত পুলিশকে জালিয়ে দেয়। মহাত্মা সেই ঘটনাকে উপলক্ষ করে মাস সিভিল ডিসওবিভিয়েন্স স্থগিত রাখেন। আর আমরা সবাই তাঁর সেই পশ্চাদ্ অপসরণে হতাশ হই, ক্ষুব্ধ হই। অনেকেই তাঁর আশা ছেড়ে দিয়ে অগ্ন নেতা বরণ করেন। কেউ ফিরে যান পাল’মেন্টারি পন্থায়, কেউ এগিয়ে যান বিপ্লবী পন্থায়। কিন্তু এই ডিগবাজির পেছনে আসলে কী ছিল তা কোথাও প্রকাশ পেল না। চৌরীচৌরা গ্রামেব আকস্মিক সেই লুণ্ঠাদহনের পূর্বেই একদিন গভীর রাত্রে বহের থেকে বারদোলীতে গিয়ে গান্ধীজীর শিবিরে গোপনে সাক্ষাৎ করেন এক গুজরাটী ব্যারিস্টার বন্ধু। ষাঁর নাম বীণা থেকে জিন্না। তাঁকে সমঝিয়ে দেন যে তিনি যেমন প্রস্তুত সরকারও তেমনই প্রস্তুত। আমি মোবাইলাইজ করা হয়ে গেছে। অদূরেই তাদের শিবির।

গান্ধী আদেশ দিলেই বড়লাটও হুকুম দেবেন। তখন আবার জালিয়ানওয়ালাবাগ। গণবিদ্রোহ সাতদিনের মধ্যেই থতম। তার চেয়ে আরো একবার কথাবার্তা চালানো যাক। মালবীয়জী আর জিন্না সাহেব লর্ড রেডিংকে বৈঠকে বসতে রাজী করিয়েছেন। গান্ধীজী তো থাকবেনই, মালবীয়জীও থাকবেন, জিন্না সাহেবও থাকবেন। এখন গান্ধীজী রাজী হলে হয়। মহাত্মা কিছুতেই মাস সিভিল ডিসওবিডিয়েন্স স্বগিত রাখবেন না। রাখলে ধুমায়িত আগুন নিবে জলে ওঠবার আগেই নিবে যাবে। জিন্না সাহেব ব্যর্থ হয়ে সেই রাত্রেই বম্বে ফিরে যান। গোপন সাক্ষাৎকার গোপন থেকে যায়। এর পরে ঘটে চৌরী চৌরার সেই ঘটনা। মহাত্মার মনে পড়ে জিন্নার হুঁশিয়ারি। তিনি বুঝতে পারেন যে ওটা নতুন এক জালিয়ানওয়ালাবাগের পূর্বাভাস। তিনি তার প্রতিকার করতে পারবেন না। তাকে নিবারণ করাই স্ববুদ্ধি। মিলিটারির সঙ্গে পাঞ্জা কষতে জনগণ প্রস্তুত নয়। তিনি তার পরিকল্পনা আপাতত ত্যাগ করেন। কিন্তু অসহযোগ নীতি ত্যাগ করেন না। প্রস্তাবিত বৈঠক বসে না। তাতেও তাঁর অনীহা। বড়লাট তাঁকে জেলে পোরেন। উপলক্ষ কয়েকটা পুরাতন প্রবন্ধ। তিনিও হাসিমুখে কারাবরণ করেন। জিন্না সাহেবেরও তাঁর সঙ্গে বিচ্ছেদ ঘটে। মালবীয়জীরও। পরে একজন যদি হন মুসলিম লীগের নেতা, তো অপর জন হন হিন্দু মহাসভার নেতা। তাঁদের পরস্পরের সঙ্গেও যোগসূত্র ছিন্ন হয়। দেশ জুড়ে ব্যয়ে যায় সাম্প্রদায়িকতার জোয়ার। তলিয়ে যায় হিন্দু মুসলমানের একতা। দাঙ্গার পর দাঙ্গা বেধে এমন আগুন জালিয়ে রাখে যে জেল থেকে বেরিয়ে মহাত্মা তাঁর একুশ দিনের অনশনেও কোনো পক্ষের হৃদয় গলাতে পারেন না। দাঙ্গা খামাতে হয় ওই ইংরেজকেই। তার মানে শাস্তিরক্ষার দায়িত্ব তৃতীয় পক্ষকেই নিতে হবে। দায়িত্ব যার ক্ষমতাও তারই। ক্ষমতা যার নেই সে দায়িত্ব নেবে কী করে? অসহযোগও স্বগিত রাখা হয়। সেটা আরেক ডিগবাজি। আমরাও যে যার পথ দেখি।” -

“অত কথা আমার জানা ছিল না, ভাই। আমি ততদিনে সরকারী চাকুরে। তাও আই. এম. এস নয়। আই অ্যাম অ্যাস। আমি একটি গাধা।” শুনে সবাই হো হো করে হাসে।

একথা বলেই ক্যাপটেন একদোড়ে গাড়ীতে গিয়ে ওঠেন।

আবার যখন ক্লাবে দেখা হয় তিনি বলেন, “মল্লিক, আমি ভেবে দেখলুম এই জন্মে আই. এম. এস. হতে হলে আবার মিলিটারিতে যোগ দিতে হবে। আগে থেকেই বোঝাপড়া আছে যে সিভিল থেকে আমি মিলিটারিতে ফিরে যেতে পারি, তবে যুদ্ধ

বাধলে ভারতের বাইরেও যেতে হবে। বিয়ে তো করিনি। আমাকে ঠেকায় কে? ভগবান যা করেন তা মঙ্গলের জন্তে। কেন একটি মেয়েকে বিধবা করে দ্বন্দ্ব হতে দিতুম? চিতার আগুন নয়, একান্নবর্তী পরিবারের ঈর্ষার আগুনে। এক ভাই আই. এম. এস হলে আরেক ভাই বিধবা বৌদিকে জালিয়ে মারত! মামুষটা আমি সাহেব হতে পারি, সমাজটা তো হিন্দু সমাজ। আমাদের আবার পুরনো বনেদী একান্নবর্তী পরিবার। জাতিবিরোধে জর্জর। থাকে সবাই একই ছাদের তলায়। কর্তার ছাতার আড়ালে। কিন্তু তলে তলে সেই ঘড়িরপুর চক্রান্ত। কাম ক্রোধ লোভ মোহ মদ মাংসর্ষ। বিয়ে করিনি বলেই আমি স্বাধীন। আমি জানি যে যুদ্ধক্ষেত্রেও ডাক্তারকে কেউ মারবে না। জখম হলে শত্রুও তার চিকিৎসায় বাঁচবে। তবে দূর পাল্লার কামানের গোলায় ডাক্তারেরও প্রাণ উড়ে যেতে পারে। আর আকাশ থেকে বোমা পড়লে তো কথাই নেই। সেটারই সম্ভাবনা বেশী। তবু আমি যাবই। আজকেই একখানা চিঠি ছেড়ে দিয়েছি। জানতে চেয়েছি আই. এম. এস কমিশন সরাসরি দেবে কি না। তোমাকে যথাকালে জানাব। তোমাদের সবাইকে নিমন্ত্রণ করব। শ্রাম্পেনের স্রোত বইয়ে দেব।”

মানস সকৌতুকে উচ্চারণ করে, “আই নী অ্যাস।”

“তার মানে কী হলো? তুমি যাকে দেখছ সে একটি গাধা। আমারি টিল আমারই উপর ছুঁড়ছে। আই অ্যাম অ্যাস?” তিনি খেঁকিয়ে ওঠেন।

“মাফ করবেন, দাদা। আমি যা জানি আপনি তা জানেন না। এবারকার যুদ্ধে প্রধান সেনাপতির সঙ্গে পরামর্শ করে বড়লাট স্থির কবেছেন উচ্চপদস্থ সিভিল অফিসারদের কাউকেই ফ্রন্টে যেতে দেবেন না। আপনিও একজন উচ্চপদস্থ সিভিল অফিসার। ফ্রন্টে আপনি যেতে না পারলেও পদোন্নতি প্রত্যাশা করতে পারবেন। ঘরে বসেই আই. এম. এস হতে পারবেন। যাঁদের অবসর নেবার বয়স হবে তাঁদের তো আটকে রাখতে পারা যাবে না। তাঁদের স্থান পূরণ করতে হলে নতুন রিক্রুট সংগ্রহ করতে হবে। বিলেত থেকে তো নতুন কেউ আসবেন না। অগত্যা ডেকেস্ট্রী পূরণ করতে হবে আপনার মতো পুরনো অফিসার দিয়ে। এ লড়াই যদি চার পাঁচ বছর গড়ায় তো আপনারাই পূরণ করবেন। সিভিল থেকে মিলিটারিতে যেতে চান বলে চিঠি লিখতে গেলেন কেন? অবশ্য মিলিটারিতেই ডেকেস্ট্রীর সম্ভাবনা বেশী। তা হলে কিন্তু ফ্রন্টে যেতে হবে। আপনি কি তার জন্তেও ব্যগ্র?” মানস প্রশ্ন করে।

“হ্যাঁ, ভাই। এই একঘেয়ে ডিউটি কারই বা ভালো লাগে। স্টেশনটা ভালো।

পদটাও পাকা। আর আমাকে নিচে নামতে হবে না। কিন্তু প্রাইভেট প্র্যাকটিস তো প্রাইভেট ডাক্তারদেরই একচেটে। উপরি আয় বলতে একে ওকে সার্টিফিকেট দেওয়ার জন্তে ফী। সেটা আমি চোখ বুজে সহ্য করিনে। সুস্থ মানুষটাকে অসুস্থ বলে ঘোল টাকা পকেটে পুরতে আমার বিবেকে বাধে। বনেদিয়ানায়ও বাধে। কলকাতায় আমাদের যে সম্পত্তি আছে তার একটা হিসসা তো আমি পাবই। এ টাকা দুই হাতে উড়িয়ে দিলেও ও টাকা তো আমার কেউ কেড়ে নিচ্ছে না। পেনসন পেলেও আমার টাকার অভাব হবে না। অভাব হবে যেটার সেটা ওই মেজর বা লেফটন্যান্ট কর্নেল বলে পরিচিতির। আর ওই যাকে বলে আই এম. এস.। এই গাধার লাজ হবে ওটা, আর কান দুটোর নাম হবে লেফটন্যান্ট কর্নেল কি মেজর। ক্যাপটেন হয়ে আমি মরতে চাইনে। তার আগে আমি ব্রিগেডিয়ারের সঙ্গে ভাব করে ওঁকে ভিজিয়ে সিঙ্গাপুর বা পেনাং কোথাও এক জায়গায় গিয়ে শত্রুর অপেক্ষায় বাঁচব বা শত্রুর হাতে মরব। যদি বন্দী করে তাও সহ্য। ক্লাবটা তো বলতে গেলে সাহেবশৃঙ্খ। শেফার্ড কালেভদ্রে আসেন। টেনিসের পর অন্তর্ধান। বার্লো তো ডুমুরের ফুল। শেফার্ডের সহধর্মিণী স্বদেশে বাস করছেন। বার্লোর পুত্র আর তার জননীও সেই দেশে। তবে এখন তিনি আর মিসেস বার্লো নন। বিবাহবিচ্ছেদের পর পুনর্বিবাহ হয়েছে। ই্যা, এই স্টেশনে একজন মেমসাহেব আছেন বটে, কিন্তু তাঁর স্বামী একজন মরাসী জমিদার। তাঁরা ক্লাবের মেম্বর হলেও কদাচিৎ আসেন, কারণ মেমসাহেব বহুদিন ধরে অসুস্থ। এখন এই সাহেবমেমশৃঙ্খ ক্লাবে নাচবেই বা কে, আর নাচতে চাইলে কার সঙ্গেই বা নাচবে? বেগম হায়দারও নাচবেন না, মিসেস বকসীও নাচবেন না। বলবেন নাচতে জানেন না। আবে, ওটা কি একটা কথা হলো? নাচতে নাচতেই আমি নাচতে শিখেছি। ওঁরাও শিখতেন। বাধছে কোথায়, জানো? অষোধ্যার লোক সীতার মতো সন্দেহ করবে। ই্যা, বুকের পাটা আছে বটে শামসুর রহমানের। দশ বছর আগেও আমি ওকে আর ওর বেগমকে নাচতে দেখেছি। ক্লাবে সাহেব মেমের সঙ্গে। এখানে নয় অবিশি। এখনো আমি সিভিল সার্জন হইনি। কী আমার ক্রেম? আমি যুদ্ধক্ষেত্র ক্যাপটেন আর রহমান তো বিলেতক্ষেত্রও নয়, যুদ্ধক্ষেত্র নয়। সে তখনো পুলিশ স্পার হয়নি। তবু তো একজন আই. পি। তারই মতো আই. পি. ছিল আর একজন মুসলমান। সেও ছিল ক্লাবের মেম্বর। কিন্তু ওর বেগমকে ক্লাবে আসতে দিত না। কেউ কল করলেও কারো সামনে বেরোতে দিত না। অথচ ধর্মের বেলা একান্ত উদার। সম্পূর্ণ সংস্কারমুক্ত। রহমান অতটা নয়। রহমানই বরং কমিউনাল।

ওদের দু'জনের কাছে আমি ঋণী। ওরাই আমাকে ক্লাবের টেনিস কোর্টে ধরে নিয়ে যায়। খেলায় ওস্তাদী দেখে মেধর করিয়ে নেয়। কেউ যে আমাকে ব্ল্যাকবল করেনি সেটা বোধহয় ওদেরই তব্বিরে। পরে আমি তাসেও ওস্তাদী দেখাই। বদলী হয়ে যে স্টেশনেই যাই গিয়ে দেখি আমার আগে আমার ওস্তাদীর খ্যাতি সেখানে পৌঁছেছে। কখন একসময় আবিষ্কার করি আমি নাচতেও পারি। মেমশাহেবরাই আমাকে নাচান। ই্যা, দুই অর্থে। তবে আমি তোমাদের ওই পাতিহাঁসের মতো সীমা ছাড়িয়ে যাইনি। ভুলেও ফ্লাট করি'ন। তাই সাহেবের বাচ্চাদের বিষ নজরে পড়িনি। আরে, বাবা, কোথায় লাইন টানতে হয় সেটা যদি না জানো তো খেতাব সমাজে মিশতে যাও কেন? বিজ্ঞার জোরে আই সি এস হয়েছ বলে কি জাতে উঠেছ? ওরাও জাতিভেদ মানে। ওদেরও বর্ণাশ্রম আছে। বর্ণ মানে একজন গৌরবর্ণ ও আরেকজন কৃষ্ণবর্ণ। আমাদের ধর্মেও সেই অর্থে একজন হতো ব্রাহ্মণ, আরেক জন শূদ্র। তেমনি ক্ষত্রিয় আর বৈশ্য। তাদের গায়ের রং মনে পড়ছে না। বোধহয় লোহিত ও পিঙ্গল।” বলতে বলতে শ্রান্ত হন ক্যাপটেন ল।

লাহা যদি কেউ বলে তিনি চটে যান। কলকাতা যেদিন থেকে ক্যালকাটা, লাহা সেদিন থেকে ল। সেকালের উচ্চারণ লা। কিন্তু বানান ডবল-ইউ দিয়ে। মানস তাঁকে আশ্বাস দেয় যে ইংরেজকে বন্দী করার মতো ক্ষমতা জার্মান ভিন্ন কারো নেই। আর জার্মানও সাবমেরিন দিয়ে সাত সমুদ্র পেরিয়ে সিঙ্গাপুরে আসবে না। আসতে পারে জাপানী। যদি যুদ্ধে ঝাঁপ দেয়। কিন্তু তা যদি করতে যায় ওরা নিজেরাই জব্ব হবে। অ্যাডমিরাল পেরীর জাহাজ আবার জাপানে গিয়ে হাজির হবে। ওরা ভাবছে নৌশক্তিতে ওরা সমান সমান। তা হলেও মোটের উপর অসমান। কারণ ব্রিটেন আর আমেরিকার মিলিত নৌশক্তি জাপানের দ্বিগুণ। জার্মানীর নৌশক্তি তার সঙ্গে মিলিত হলেও দুই পক্ষের নৌশক্তি অসমান।

দিন কয়েক পরে মানস ক্লাবে গিয়ে টেনিস খেলছে এমন সময় তার খোঁজে আসেন তার দুই সিভিলিয়ান বন্ধু পাকড়াশী আর ঘোষাল। দু'জনেই এখন ডেপুটি সেক্রেটারি, কলকাতায় অধিষ্ঠান। সেখান থেকে মফঃস্বলে টুর করতে বেরিয়েছেন। যে ঘর ডিপার্টমেন্টের কাছে।

“খেলা কতক্ষণ চলবে?” পাকড়াশী স্বধান। “আমরা কি তেঁটায় গলা শুকিয়ে মরব?”

“মার্কার, পুছে।” বলে মানস সেটটা শেষ করতে অহুমতি চায়।

সেটটা সমাপ্ত হতেই র্যাকেটখানা ঘোষালের হাতে দিয়ে বলে, “এবার তুমি খেল

দেখাও। টেনিস কাকে বলে।” খেলার সাথীদের ডেকে বলে, “ইনি কে, জানেন ? স্বনামধন্য টেনিস চ্যাম্পিয়ন বিনোদ ঘোষাল।”

ঘোষাল একটু ওজর আপত্তি জানান। “আমি আজ ফ্যাগড্ ফীল করছি।”

ওই আজব বাংরেঙ্গী শুনে সবাই হেসে ওঠেন। জোরজোর করে ওঁকে কোটে নামানো হয়। তার পর মানস গিয়ে পাকডাশীর সঙ্গে বসে।

“তার পর, স্বামী মানসানন্দ পরমহংস।” পাকডাশী ওকে একটু আড়ালে টেনে নিয়ে চুপি চুপি বলেন, “কবে থেকে তুমি রামকৃষ্ণ পরমহংস হলে ? এই যে শুনছি তুমি নাকি প্রতিজ্ঞা করেছ যে এ জীবনে আর কামনীকাঙ্ক্ষন স্পর্শ করবে না। চাকরিটা অকালে ছেড়ে দিলে কাঙ্ক্ষনও আপনি ছেড়ে যাবে। তবে কামনীকে ছাড়তে চাইলেও কামিনী নেহি ছোড়তি। না তিনিও একজন সারদামণি দেবী ?”

মানস তাজ্জব বনে যায়। “কে এসব রটায় ! কে এত খবর রাখে !”

“কেন, যার সঙ্গে দেখা হয় সেই বলে, উনি এখন সন্ন্যাস নিয়েছেন। কেবল গেলুয়াটা পরেন না এই যা তফাৎ। মাছ মাংস ছেড়েছ, মদও তুমি তেমন কিছু খেতে না, শুধু সঙ্গ রাখার জন্তে এক আধ চুমুক। কিন্তু এ কী কথা শুনি আজ স্নফলার মুখে !”

“স্নফলা। স্নফলা কে ?” মানস জানতে চায়।

“আহা, মিসেস বক্সী ! তিনি একদিন তোমার ওখানে গিয়ে লক্ষ করে আসেন যে তোমাদের দু’জনের বিছানা দুই আলাদা বেডরুমে। ব্যাপার কী, মল্লিক ? জীবনে একটা শোক পেয়েছ, আমাদের সমবেদনা জেনো। কিন্তু তোমার বয়স তো বোধহয় পয়ত্রিশও পেরোয়নি, আর ওঁর বোধ করি সাতাশ কি আটাশ। নিজের উপর রিপ্রেসন চালাতে চাও, দেখা যাবে কদিন পারো ! কিন্তু ওঁর উপরে চালাতে গেলে একদিন একটা বিস্ফোরণ ঘটবে। কিছু মনে কোরো না, ভাই। তোমার ভালোর জন্তেই বলা। শোকেরও একটা সামা আছে। সব কিছুর মতো।”

মানস আর হাসি চাপতে পারে না। “সব বিলকুল বুট্ হ্যায়। শুধু স্নফলা বক্সী কেন মহিলা আগন্তুকদের সকলের মুখেই সেই একই প্রশ্ন। যুদ্ধিকা এক একজনকে এক একটা উত্তর দিয়ে কৌতুহল নিবৃত্ত করে। স্নফলাকে কী বসেছে, জানিনে। কিন্তু প্রকৃত উত্তরটা হচ্ছে এই যে, হঠাৎ একটিকে হারিয়ে ওর মনে ভয় ঢুকেছে। কে জানে আব’র কোন্টিকে কখন হারায়। তাই ছুটিকেই দুই পাশে শোওয়ায়। মেয়েটি তো একবার কৈঁদে উঠবেই, একবার জেগে উঠে খেলা করবেই। আমি, বাপু, রাতের ঘুমটা মাটি করতে পারিনে। পরের দিন আদালতে গিয়ে চুলব। আলাদা



ঘরে শোওয়া বেশ কিছুদিন থেকে আমার অভ্যেস হয়ে গেছে। কিন্তু এই সব নয়, পাকড়াশী।”

“এ ছাড়া আর কী কারণ?” পাকড়াশীর মুখে অবিশ্বাসের ভাব।

“তবে শোন। হিটলার যেদিন চেকোস্লোভাকিয়া নেয় সেইদিন থেকেই আমার রাতে ঘুম নেই। পোলাও যেদিন আক্রমণ করে সেদিন থেকে আমি বারান্দায় পায়চারি করতে করতে ভাবি, এ যুদ্ধ এইখানেই থামবে না। ইংলও আর ফ্রান্স তো যুদ্ধ ঘোষণা করবেই, এক এক করে আরো অনেকে সমবেত হবে বিংশ শতাব্দীর দ্বিতীয় কুরুক্ষেত্রে। আমি কি শুধু নীরব দর্শক হব? না আমারও একটা ভূমিকা আছে? থাকলে কী সে ভূমিকা? আহা! নিদ্রা মৈথুন আর আপিস আদালতের রুটিন। এই কি জীবন! না জীবনের আর কোনো অর্থ আছে? কী সে অর্থ? জীবনের অর্থ কি জীবিকা? আর বিনোদনের জন্তে তাস, স্বাস্থ্যরক্ষার জন্তে টেনিস? আমি বারান্দায় পায়চারি করে ভাবি। ঘুম পেলে বিছানায় যাই। দুঃস্বপ্ন দেখি। হিটলার আসছে তেড়ে। ইংরেজ যাচ্ছে ছেড়ে।”

পাকড়াশী হো হো করে হেসে ওঠেন। “ওরে ভীক, তোমার পরে নাই ভুবনের ভার। তুমি তোমার আপিস আদালতের ভার নিয়েই নিজেকে ব্যাপৃত রাখবে। যা হবার তা হবেই। কেউ রোধ করতে পারবে না।”

“কেন? দিল্লীতে যদি গ্র্যাশনাল গভর্নমেন্ট প্রতিষ্ঠিত হয়? দেশের লোক যদি তাদের নির্বাচিত প্রতিনিধিদের উপরে ভারতের ভার সমর্পণ করে? চল্লিশ কোটি ভারতীয়ই এককাটা হয়ে রুখবে।”

“ওটাও একটা স্বপ্ন। দিবাস্বপ্ন। ইংরেজরা সাক্ষ্য জানিয়ে দিয়েছে যুদ্ধকালে ওরা ক্ষমতা হাতছাড়া করবে না। বড়লাটের শাসন পরিষদের কয়েকটা আসন ছেড়ে দিতে পারে, কিন্তু সেখানেও একমাত্র কংগ্রেসকে নেবে না। মুসলিম লীগকেও নেবে। লীগেরও তেমনি জেদ যে মুসলমানদের জন্তে বরাদ্দ পদগুলোতে একমাত্র লীগ সদস্যদেরই নিতে হবে। নইলে লীগ যোগ দেবে না। যুদ্ধের পরে স্বরাজের দাবী যদি মনজুর হয় তবে সেইসঙ্গে পাকিস্তানের দাবীও মনজুর করতে হবে। মুসলমানদেরকে নেকড়ের মুখে সঁপে দিয়ে যাওয়া চলবে না। ওদিকে গান্ধীরও সমান জেদ যে ওটা আমাদের ঘরোয়া সমস্যা। আমরাই যেমন করে পারি মেটাব। তৃতীয় পক্ষ কেন নাক গলাবে? আর একটা কমিউনাল অ্যাওয়ার্ড তিনি মেনে নেবেন না। তা হলেই দেখছ কোনো পক্ষই কোনো পক্ষের সঙ্গে সহযোগিতার জন্তে হাত বাড়িয়ে দেবে না। পর্দার আড়ালে গলাকাটা দর কষাকষি চলেছে। এর পরে আসছে বল কষাকষি।

ইংরেজের হাতে আছে আর্মি, গান্ধীর হাতে সিভিল ডিসঅবিডিয়েন্স, জিন্নার হাতে দাঁড়াবাজি। এর মধ্যেই সাগরপার থেকে আরো কয়েক ব্রিগেড সৈন্য আনিয়ে নেওয়া হয়েছে। সাতদিনের মধ্যেই স্বভাবের শত্রু বিপ্লব আর গান্ধীর নিরস্ত্র বিদ্রোহ ক্রাশ করে দেওয়া হবে। তা যদি হয় জিন্নাকে কিছু না দিলেও চলবে। কংগ্রেসকে যদি কিছু দাও, লীগকেও কিছু দিতে হবে, এই তো তাঁর আজি। কংগ্রেসকে কেক না দিলে লীগকেও কেকের ভাগ দেওয়ার প্রশ্নই ওঠে না। কেক ইংরেজরা নিজেরাই খাবে। নিজেরা খেতে না পেলে বরং জার্মানদের কেড়ে নিতে দেবে, পরে আবার বলবান হয়ে কেড়ে নেবে, ভারতীয়দের দু'চারটে ক্রাশ ছুঁড়ে দেওয়া ছাড়া আর কিছু করবে না। কাজেই তুমি নিয়তির উপর ওসব ছেড়ে দাও। আমরা যা করছি।” পাকড়াশী সম্প্রদায় দেন।

মানস নীরব থাকে। ইতিমধ্যে ঘোষাল এসে জুটেছিলেন। প্রসঙ্গটার আভাস পেয়ে মস্তব্য করেন, “কংগ্রেস মন্ত্রীরা অপূর্ব ডিসিপ্লিন দেখিয়েছেন। সবাই একযোগে গদীতে বসেন। সবাই একযোগে গদী থেকে স্বেচ্ছায় নেমে আসেন। এত বড়ো ত্যাগ, এতখানি ডিসিপ্লিন কে কবে দেখিয়েছে! তাও যুদ্ধের মরশুমে। যখন কোটি কোটি টাকা খরচ বা লুট করার মওকা। কংগ্রেস হাই কমান্ডকে বাহবা দিতে হবে। ওঁরা সত্যিই স্বরাজের যোগ্য। কিন্তু যোগ্যতা প্রমাণ করার পথে এখনো বিস্তর কাঁটা। লীগ তো বাধা দেবেই রাজচ্যুরাও অবাধ্য হবেন। ওঁদের লক্ষ্য বলকানিস্থান। এঁদের লক্ষ্য পাকিস্তান।

## ॥ পনেরো ॥

অল্প সময় হলে ওরা মানসের ওখানেই উঠত। কিন্তু ওরা জানে যে মনের দিক থেকে যুথিকা ও মানস এখন প্রস্তুত নয়। পরের দিন ওরা যথারীতি কল করবে ও একসঙ্গে কিছুক্ষণ কাটাবে। তা শুনে মানস বলে, “তা হলে ডিনারের নিয়ন্ত্রণ রইল।”

মানসের ওরা বিলেতের সমসাময়িক বন্ধু। তথা কর্মজীবনের সতীর্থ। কিন্তু যুথিকার সঙ্গে সাক্ষাৎ কদাচিৎ ঘটেছে। এক স্টেশনে কখনো বদলী হয়নি। আলাপটা বালিয়ে নিতে চায়।

যুথিকা তো সানন্দে সায় দেয়। ওদের জন্তে ভালোমন্দ নিজেই রাঁধে। অমিষ খেতে আপত্তি। রাঁধতে নয়। অতিথিদের কেনই বা তাদের খাওয়া থেকে বঞ্চিত করবে? কিন্তু পানীয় সম্বন্ধে সে আপসবিরোধী। না, ও পাপ ও ঘরে ঢুকতে দেবে না।

“মল্লিক নাকি সারা রাত পায়চারি করে মহাশুদ্ধের কথা ভেবে উতলা হয়?” পাকড়াশী যুথিকাকে স্তব্ধায়।

“সত্যি। ওকে নিয়ে কী যে করব ভেবে পাইনে। জোর করে ধরে এনে শুইয়ে দিলেও ঘুমের ঘোরে বকবক করে, পোলাও! হতভাগ্য পোলাও! তোমার জন্তে আমি কী করতে পারি।” যুথিকা হাসে।

“কী করতে পারি।” পাকড়াশী ব্যঙ্গ করে। “ওই পোল ব্যাটারি কি কম বজ্জাত! মাফ করবেন, মিসেস মল্লিক। আমি লোকটা মুখফোঁড়। যা মনে আসে তাই বলে ফেলি। ভাষাটাও মহিলাদের সমাজে জলচল নয়। আপনি হয়তো মনে আঘাত পেলেন। কিন্তু পোলদের মতো পাজী জাত কি বেশী দেখেছেন? স্বাধীন

হতে না হতেই বিশ লাখ ইহুদীকে দিল খেদিয়ে। ওরাও হুঁমুড় করে জার্মানীতে চোকে। যে জার্মানী যুদ্ধে বিধ্বস্ত। অবশ্য নিজেদের বুদ্ধির দোষে। বিসমার্ক তো ওদের পই পই করে বারণ করে গেছেন। খবরদার, ইংরেজের সঙ্গে লড়তে যেয়ো না। নেপোলিয়নের দশা হবে। কায়জারের মতিচ্ছন্ন হয়েছিল। নইলে বিসমার্ককে অপমান করে তাড়িয়ে দেয়! যে বিসমার্ক জার্মান নেশনের জনক।”

মল্লিক বলে, “তা তোমার ইহুদীরা নিরীহ মেঘশাবকটি নয়, পাকড়াশী। জার্মানীতে শরণার্থী হয়ে এসে জাঁকিয়ে বসে। ইহুদীবিদ্বেষ তলে তলে জার্মানদের ভিতরে বহু শতক ধরে কাজ করছিল। কিন্তু নবাগতদের বাড়বাড়ন্ত দেখে ওদের চোখ টাটায়। তার সঙ্গে নিজেদের অভাব অনটন তুলনা করে ওরা এমন উত্তেজিত হয় যে ইহুদীবিদ্বেষী এক পাগলকে বসিয়ে দেয় বিসমার্কের আসনে। তার পরে সে বিসমার্ককেও ছাড়িয়ে গিয়ে সর্বসর্বা বনে যায়।”

“আহা, আমি কি বলেছি যে ইহুদীরা নিরীহ মেঘশাবক!” পাকড়াশী বোঝায়। “ও ব্যাটার! যে ডালে বসে সেই ডাল কাটে। ওদের কপালে দুঃখ আছে। কিন্তু কথা হচ্ছিল পোলদের নিয়ে। এক হাতে তালি বাজে না। পোলরা ইহুদীদের জার্মানদের উপর চাপিয়ে দিয়ে জার্মানদের বোঝা বাড়িয়ে দিয়েছে, এটা যদি মানো তো পোলদের জন্তে তোমার অত দরদ কেন? শুধু পোলদের জন্তে নয়, গোটা ইউরোপের জন্তেই তুমি চিরদিন ভেবে আকুল। বার্লো বা শেফার্ড কেউ তোমার মতো ওদের নিজেদের দেশের জন্তে অত কাতর নয়। একেই বলে মায়ের চেয়ে মাসীর বেশী দরদ!”

“হা হা!” ঘোবাল হেসে ওঠে। “বার্লো রাত জেগে দূরবাণ দিয়ে গ্রহনক্ষত্র দেখেন। আর মানস রাত জেগে মানসিক দূরবাণ দিয়ে পোল জার্মান ফরাসী ইংরেজ দেখে। কিন্তু গ্রেট ওয়ারের আড়ালে যে এক লিটল ওয়ার ঝু করছে সেদিকে নজর নেই। তুমি কি কাছেরটা দেখতে পাও না, দূরেরটাই দেখতে যাও? না, তোমার ওটা পাশ্চাত্য প্রেমের পরিণতি?”

মানস চমকে উঠে বলে, “তার মানে কী হলো, বিনোদ?”

“না, না, আমি বলতে চাইনি তুমি পশ্চিমে গিয়ে প্রেমে পড়েছিলে। ওটা বাঙালীদের সনাতন স্বভাব। কিন্তু পাশ্চাত্য প্রীতি মানে ইউরোপের উপর অন্ধ অহুরাগ। সেই অহুরাগ তোমাকে দেখতে দিচ্ছে না যে তোমার নিজের দেশেই, এমন কি তোমার নিজের এলাকাতেই, গৃহযুদ্ধের উত্তোগপর্ব শুরু হয়ে গেছে। ইয়া, হিন্দু মুসলমানের লিটল ওয়ার।” ঘোবাল গম্ভীর হয়ে যায়।

মানস চিন্তিত হয়ে বলে, “আমাদের উকিল সরকারও তার আভাস পেয়ে আতঙ্কিত। তাঁর কথা হলো একপক্ষ কমিউনাল তো বরাবরই ছিল, এখন আরেকপক্ষও কমিউনাল হয়ে উঠেছে। পরে সে যা হবে তা ভাবতেও গায়ে কাঁটা দেয়। পূর্ববন্ধ যে এতদূর উন্নত হবে তা আমি বিশ্বাস করিনে। আবার মোহিনীবাবুর মতো এমন উকিল আছেন যিনি ওসব ভয়ভাবনা হেসে উড়িয়ে দেন। তাঁর মতে মুসলমানরা হিন্দুদের গভীরভারে ভালোবাসে। হিন্দুরাও মুসলমানদের। আর দু’পক্ষই বাংলা বলতে, বাংলাদেশ বলতে, বাঙালী জাতি বলতে অজ্ঞান। যত নষ্টের গোড়া অবাঙালী হিন্দু মুসলিম পলিটিসিয়ানরা। ইংরেজরা যদি বাঙালীর হাতে বাংলাকে সঁপে দিয়ে যেত তা হলে দু’দিনেই সব বিরোধ মিটে যেত। এটা আমাদের স্বাধীনতার ঝগড়া। দাম্পত্য কলহ। ইংরেজ যে তৃতীয় পক্ষ কে না সেটা জানে? কিন্তু কংগ্রেসও তৃতীয় পক্ষ। মুসলিম লীগও তাই। এর মধ্যে হিন্দু মহাসভা ঢুকে মুসলিম লীগকে আরো বলবান আর কংগ্রেসকে আরো দুর্বল করে তুলেছে! তাই কৃষকপ্রজা দলকে আরো জোরদার করা দরকার। কিন্তু রাজা মহারাজা নবাব নবাবজাদারা কি তাতে রাজী হবেন? শ্রেণীসংগ্রামকে তাঁরা দিতে চাইবেন সাম্প্রদায়িক সংগ্রামের রূপ। বিপদটা তো সেইখানে।”

“যত সব বাজে কথা।” পাকড়াশী তুড়ি মেরে উড়িয়ে দেয়। “ভুলে যেয়ো না, মল্লিক, তোমার মতো অসাম্প্রদায়িক অফিসারকে সরিয়ে দেওয়া হয়েছে জুড়িসিয়ারিতে। আর আমাদের মতো অসাম্প্রদায়িক অফিসারদের সেক্রেটারিয়াটে। আমাদের তিনজনের ও আমাদের মতো আরো যারা আছে তাদের কারো প্রমোশন হবে না এটা স্থনিশ্চিত। তবে মন্দের ভালো এইটুকু যে ইংরেজ আমাদের নেকড়েয় মুখে ঠেলে দিয়ে যাবে না। আর কোথাও না হোক বিলেতে আমাদের চাকরি দেবে। দিতে বাধ্য। কারণ আমাদের কভেনেন্ট সেক্রেটারি অভ স্টেটের সঙ্গে। ওঁর বিরুদ্ধে খাস বিলেতেই আমরা গিয়ে মামলা রুজু করে দেব। সেক্রেটারিয়াটে বসে কলকাতার বড়ো বড়ো কাউন্সেলের সঙ্গে শলা পরামর্শ করতে পারছি। নইলে ডেপুটি সেক্রেটারি একটা পদ। কোথায় সেই প্রেক্ষিজ যা আমরা জেলা ম্যাজিস্ট্রেটের গদীতে বসে পেয়েছি! কী করি, বলো। শক্ত হাতে দাঙ্গা না থামালে চলে? বাড়তে দিলে গৃহযুদ্ধের আকার ধারণ করবে না?”

“আরে, আমিও তো সেই কথাই বলতে চেয়েছিলুম। সুপ্রকাশ যা বলেছে তা আমারও কথা।” ঘোষাল বলেন, “কড়া হাতে না থামালে পরে দেখবে আয়ত্তের বাইরে চলে গেছে। তাতে ইংরেজের কী? তার গায়ে তো আঁচড়টি লাগবে না।

মরবে হিন্দুর ছাওয়াল, মুসলমানের পোলা। গৃহযুদ্ধ কি আমরা কেউ বাধাতে দিতুম, যদি ক্ষমতা থাকত আমাদের কারো হাতে? মুসলিম মন্ত্রীদের আমরা চোখের বালি। আর হিন্দু নেতাদেরও পথের কাঁটা। ওঁদের ধারণা আমরা সবাই দেশদ্রোহী, তাঁরা সবাই দেশভক্ত। আরে বাবা! রাজনীতির খেলায় তোমরা ধুরন্ধর হতে পারো, কিন্তু প্রশাসনের বেলায় তোমরা শিশু ভিন্ন আর কিছু নও। ইংরেজ কি দেশকে অরাজক হবার আগে স্বরাজ দিয়ে যাবে? সেই দেশব্যাপী অরাজকতার দিন কারা তোমাদের বাঁচাবে? তোমাদের চোখ কান কারা? হাত পা কারা? এতত্ত্ব বোঝেন রাজগোপালাচারীর মতো বিচক্ষণ ও বহুদর্শী নেতা। বোঝেন না নেহরুর মতো ব্রীফলেস ব্যারিস্টার, যিনি আই. সি. এস. হতে না পেরে তখন থেকেই প্রতিশোধের দিন গুনছেন।”

“না, না। ওটা ঠিক নয়, বিনোদ। নেহরুর ত্যাগশক্তির সীমা নেই। দেশ যাকে ভালোবেসে রাজার আসনে বসাবে আমরা তাঁর কাছেই আত্মগত্যের শপথ নেব। যদি তিনি আমাদের অভয় দেন যে আমাদের চাকরিও যাবে না, প্রমোশনও আটকাবে না। আসলে হয়েছে এই যে গান্ধীজী যেমন ভালোমানুষ, নেহরুজীও তেমনি ছেলেমানুষ। যাদের সঙ্গে এঁরা তাস খেলতে বসেছেন তাঁরা দু’জন বাহু খেলোয়াড়। ত্রিভুজ খেলায় একজন আরেকজনের ডামি। যেমন তুখোড় লিনলিথগাউ তেমনি তুখোড় জিনা। ইয়া, বিলিভী উচ্চারণ জিনা। দুটি ব্যাটাই বদ।” এই বলে পাকড়ানী জিব কাটে। “মাফ করবেন, মিসেস মল্লিক।”

“জিম্মাকে তুমি জিনা বলতে পারো, কিন্তু ডামি বলছ কোন্ আঙুলে? বলতে পারতে বড়লাটই জিঞ্জার ডামি।” ঘোষাল অহুযোগ করে।

“আমি বলেছি একজন আরেকজনের ডামি। তার মানে কখনো বড়লাটের ডামি জিনা, কখনো জিনার ডামি বড়লাট। কখনো নোকোর পিঠে গাড়ী, কখনো গাড়ীর পিঠে নোকো। তবে ইংরেজদের শুভবুদ্ধির উপর আমার আস্থা আছে। ও ব্যাটারী বাহুবলে ভারত শাসন করছে এটা আমাদের নেতাদের ভুল। করছে বুদ্ধির বলে। বুদ্ধি যে সব সময় দুর্বুদ্ধি তা নয়। বিপদ কালে স্ববুদ্ধিও হতে পারে। গতবারের যুদ্ধে বড়লাট স্মরণ করলেন কাকে? ওই গান্ধীকে। বড়লাটের প্রস্তাবের সমর্থন করলেন কে? ওই গান্ধী। কই, তখন তো আর কাউকে মনে পড়েনি? না মডারেটদের, না মুসলমানদের? সেইরকম বিপদ যদি আবার ঘনিয়ে আসে, যদি দূরে বহুদূরে টেমস নদের তীরে নয়, সেন নদীর তীরে নয়, কাছে আরো কাছে? তখন আবার মনে পড়বে ওই ভালোমানুষ গান্ধীকেই। ছেলেমানুষ নেহরুকেও। লড’

আরউইনের নতুন নাম লর্ড হ্যালিফাক্স। আর লর্ড রোনল্ড্‌শের নতুন নাম লর্ড জেটল্যাণ্ড। এঁদের দু'জনেরই এখন আরো বেশী প্রতিপত্তি। এঁরা জানেন কখন কার সঙ্গে কথাবার্তা চালাতে হয়। এঁরা হলেন কবিগুরু বীদের বলেছেন বড়ো ইংরেজ। জাতটা সত্যিই বড়ো। গ্রেট ব্রিটেন সত্যিই গ্রেট। ওরা গ্রেট না হলে এতদিন ধরে এত বড়ো একটা সাম্রাজ্যকে একমুঠো সিভিলিয়ান দিয়ে শাসন করতে পারত না। এখনো ব্রিটিশ জাস্টিসের উপর ভারতবাসীর শ্রদ্ধা আছে। হাইকোর্টে সুবিচার হয়, নয়তো প্রিভি কাউন্সিল তো আছেই। কবে, কোন্‌ যুগে ছিল এমন সুবিচার?" পাকড়াশী গুণগান করে বড়ো ইংরেজের।

"তা হলে তুমি জুডিসিয়ারিতেই থেকে যাও, মল্লিক।" পরামর্শ দেয় ঘোষাল। "যথাকালে হাইকোর্টে যাবে। কেউ ঠেকাতে পারবে না।"

"না, ভাই। আমার তেমন কোনো উচ্চাভিলাষ নেই। আমি প্রথম সুযোগেই অপসরণ করব। যদি মহাযুদ্ধের মাঝখানে ক্ষুদ্রযুদ্ধ বা রাষ্ট্রবিপ্লব বাধে আমি কাউকে গুলীও করতে পারব না, ফাঁসীও দিতে পারব না। জেলায় থাকলে এ দায় আমার ঘাড়ে চাপবেই। তোমরা এসব অপ্রিয় কর্তব্য থেকে বেঁচে গেছ। তাতেও সন্তুষ্ট নও। তা বলে আমি যে জেলা থেকে সেক্রেটারিয়াটে গিয়ে দিস্তা দিস্তা নোট লিখতে পেল ধন্য হব তাও নয়। আমি চাই এমন কিছু লিখতে যা আমার অন্তরের কথা, যা না লিখে আমার মুক্তি নেই, যা লিখতে পেলই আমি ধন্য। যা নোট নয়, রিপোর্ট নয়, রায় নয়, অর্ডার নয়। যাতে আমাকে অমৃত না করবে তা নিয়ে আমি কী করব!"

"তার মানে তুমি এসকেপিষ্ট।" পাকড়াশী বলে। "ওটা মহত্বের লক্ষণ নয়। আমি হলে গুলীও করতুম, ফাঁসীও দিতুম, যেমন করে পারি লক্ষ লক্ষ নিরীহ মানুষকে রক্ষা করতে কয়েক শো বদমায়েসকে পিষে মারতুম। তারা হিন্দুই হোক আর মুসলমানই হোক, তারা গুণ্ডা। তারা সমাজের শত্রু। তারা দেশের মিত্র বা ধর্মের মিত্র হতে পারে না। তারা যদি নাই পেয়ে মাথায় ওঠে তবে সর্বনাশ হবে। তেমন স্বরাজ নিয়ে আমরা করব কী? তেমন পাকিস্তানই বা কার কোন্‌ কাজে লাগবে?"

"যদি পাকিস্তান হয়!" ঘোষাল আপত্তি করে। "তুমিও যেমন। কে চায় পাকিস্তান! ওটা কি' জিন্না সাহেবের সত্যিকার দাবী? আমাদের কী দেবে দাঁও, না দিলে আমি পাকিস্তান চাইব। শাদা কথায়, গোটা কেকটা তোমরাই খাবে সেটি হবে না, গান্ধী নেহরু! আমাদেরও ভাগ দিতে হবে। আমি যদি রাজত্বের ভাগ পাই তবে রাজত্বের ভাগ চাইব না। আমিও শাহজাহানের আরেক ছেলে। ভাগ

না পেলে বড়ো ভাইয়ের সঙ্গে লড়ব। পাকিস্তান হবে না, যদি আমাকে পার্টনার করে নাও। হয় পার্টনারশিপ, নয় পার্টিশন। কড়া হাতের শাসন এর উত্তর নয়, স্বপ্রকাশ। তোমাকে আপসের চেষ্টা করতে হবে।”

“তার মানে কংগ্রেসপন্থী মুসলমানদের বিসর্জন দিতে হবে। কী অপরাধ ওঁদের! ওঁরা কি মুসলমানের ভোটে নির্বাচিত হননি? ওঁরা কি কারো চেয়ে কম জেল খেটেছেন, সম্পত্তি হারিয়েছেন? আঠারো বছর দুর্ভোগের পর যদি একটু স্বদিনের মুখ দেখে থাকেন সেটা কি তাঁদের প্রাপ্য পুরস্কার নয়? তাও তো কংগ্রেসের আহ্বানে পদত্যাগ করে জেলের দিকে পা বাড়িয়েছেন আবার। মুসলিম সম্প্রদায়ের প্রতিনিধি বলতে কি এঁদেরও বোঝাবে না, বোঝাবে শুধু লীগপন্থী মুসলমানদের? কেন, ফজলুল হক, সিকন্দর হায়াৎ খান, আল্লা বক্স, এঁরা কী দোষ করলেন? ব্রিটিশ সরকার তো এঁদের দলগুলিকেও স্বীকার করে নিয়েছেন। সেই স্বীকৃতি খারিজ করবেন কী কারণে? জেদ, জেদ ছাড়া জিনার আর কোনো যুক্তি নেই। আর যা আছে তা বিলেতের রক্ষণশীল দলের সঙ্গে গোপন আঁতাত। জিনার শর্তে রাজী না হলে ব্রিটেনের সঙ্গে কংগ্রেসের ফাইনাল সেটলমেন্ট হবে না। জিনাকে পার্টনার না করলে কংগ্রেসকে ভারতের সেন্ট্রাল গভর্নমেন্টের পরিচালনা ভার দেওয়া হবে না। কংগ্রেস যদি সেই মর্মে আপস করে নিজের পায়ে নিজে কুড়ুল হানবে। আমি বলবার কে? আমাকে পোছে কে? আমি তো সরকারী চাকরি করছি বলে দেশদ্রোহী। জানো তো, টেররিষ্টরা আমাকে খুন করবে বলে হুমকি দিয়েছিল?”

পাকড়াশী আবেগের সঙ্গে বলে।

“ওরা তো শুধু হুমকি দিয়েছিল। মারেনি তো। আর এরা কী করেছিল, জানো? কংগ্রেসী হিন্দুরা আমার নামে বদনাম রটিয়েছিল যে আমি নাকি ওঁদের লাথি মেরেছি, চাবকেছি, ঘর ভেঙে দিয়েছি। বদনাম রটানোও কি খুন করার চেয়ে কিছু কম? চরিত্রহত্যাও একপ্রকার হত্যা। অহিংস হত্যা!” ঘোষাল তার আবেগ হাসি দিয়ে ঢাকে।

মানস এতক্ষণ চূপ করে শুনছিল। বলে, “যেতে দাঁও। যেতে দাঁও। পাবলিক লাইফে এলে অমন অনেক বদনাম, অমন অনেক হুমকি হজম করতে হয়। ওরাই একদিন তোমাদের খুলা বুঝবে। তোমাদের সাহায্য চাইবে। তখন তোমরা নোবল রিভেঞ্জ নেবে।”

যুথিকা না শোনার ভাণ করছিল। বলে, “ও প্রসঙ্গ থাক। এখন একটু সংসারের কথা হোক। মিসেসরা কেমন আছেন? ছেলেমেয়েদের খবর কী?”



“ওসব জানতে চেয়ে কেন লজ্জা দিচ্ছেন? আপনাদের তিন ছেলেমেয়ে। একটিকে হারালেও তবু তো দুটি থাকে। আমাদের ওই একটিই সবে ধন নীলমণি! যখন বলি, আরেকটি হলে ভালো হতো না? তখন শুনি, মিছা ঘোষালের যদি না হয় আমার কেন হবে! আহামরি, কী যুক্তি! শুনতে পাই মিছা ঘোষালও বলেন, রমি পাকড়াশীর যদি না হয় আমার কেন হবে? মহিলারা আজকাল তলে তলে একটা প্যাকট করেন না তো?” পাকড়াশী রসিকতা করে।

“কই, আমি তো কারো সঙ্গে সে রকম কোনো প্যাকট করিনি।” যুথিকা হাসে। “আমার মনে হয় ওটা একরকম বিউটি ইনশিওরান্স। রূপযোবন অক্ষুণ্ণ রাখার উপায়। এক একটি বাচ্চা এসে এক এক গুণা বয়স বাড়িয়ে দেয়। কুড়িতেই বুড়ি।”

“বেয়াদবি মাফ করবেন, আপনাকে দেখলে কিন্তু উন্টেটাই মনে হয়। আমার উনিই বরং বিউটি ইনশিওরান্স করতে গিয়ে চড়া প্রিমিয়াম গুনছেন।” পাকড়াশী লোকটা মুখফোড় বলে মুখফোড়। একেবারে ঠোটকাটা।

“থাক, থাক। অমন কথা মুখে আনতে নেই। উনি যদি শুনতে পান বিষয় রাগ করবেন। একবার যে মা হয়েছেন এটাও কি কম ত্যাগস্বীকার! ভুলে যাচ্ছেন কেন যে মা হতে গিয়ে আমরা যমের মুখোমুখি হই। আপনাদের কী! বৌ মারা গেলে আর একটি বিয়ে করবেন। বৌ বুড়ি হলেও আর একটি বৌ আনবেন।” যুথিকা বলে।

“এই হলো মহিলাদের চিরকালের অভিযোগ।” ঘোষাল বলে।

“এ যুগে তাঁদেরই জিং। তাঁরা যদি মা না হতে চান কে তাঁদের বাধ্য করতে পারে? শেষ তাসথানা তো তাঁদেরই হাতে। পুরুষ এখানে অসহায়। বহুবিবাহ এখনো পুরুষের হাতের পাঁচ, কিন্তু সব ক’টা বৌ যদি তলে তলে প্যাকট করে তো বহুবিবাহের ফলে বহু সন্তান হবে না। আমরা পুরুষরাই তখন ব্রত মানত ষষ্ঠীপূজা করব। তাতেও কি ফল হবে!” পাকড়াশী ফোড়ন দেয়।

মানস কোনো মতে অশ্রু সঞ্চরণ করে বলে, “বাকে বাঁচাতে পারিনে তাকে পৃথিবীতে আনতে যাই কেন? তাতে তারও দুঃখ, তার মায়েরও দুঃখ, তার বাপেরও দুঃখ। যে যা পেয়েছে তাই নিয়ে সন্তুষ্ট থেকে। বেশী চাইতে নেই। পেলে হারাবার ভয়ও বাড়ে। নারীর রূপযোবনের ইনশিওরান্সটা মিথ্যে আশ্বাস। দশটি সন্তানের জননীকেও রূপসী যুবতীর মতো দেখতে। মা না হয়েও কেউ কেউ অকালে বুড়ি। এর রহস্য আমার জানা নেই। বোধহয় আছে একরকম তন্ত্রমন্ত্র বা

জড়িটু। মেয়েরাই মেয়েদের কাছ থেকে পায়। ব্যাপারটা পুরুষদের কাছে ফাঁস করে না। নিজের চোখে দেখিনি। তবে শুনেছি পঞ্চাশ বছর বয়সেও চিরযুবতী। রাইডার হ্যাগার্ডের ‘শী’। আমরা কতটুকুই বা জানি !”

পাকড়াশী কারো কোন কথা শুনবে না। এমন অবস্থা ! “আমি কেবল সেই নারীকেই শ্রদ্ধা করি যে বহুসন্তানবতী। যেমন আমার মা কাকিমা মাসিমা পিসিমা মামিমা। আমি মানসের মতো ফেমিনিষ্ট নই। অথচ মজা গাখ, নিজেই তিনটি সন্তানের বাপ হয়ে বসে আছে। বৌকে আটপৃষ্ঠে বেঁধেছে।”

হাসির ধুম পড়ে যায়। মানস বলে, “আমি কিন্তু সব নারীকেই শ্রদ্ধা করি। যে মা হয়েছে তাকেও। যে মা হয়নি তাকেও। যে একসন্তানবতী তাকেও। যে বহুসন্তানবতী তাকেও। নারীকে শ্রদ্ধা করি তার নারীত্বের জন্তে। মাতৃত্ব তো উপরন্তু। সেই উপরন্তু সকলের বরাতে জোটে না। কেউ অকালে বিধবা হয়। কেউ বিনা দোষে বন্ধ্যা হয়। তা বলে শ্রদ্ধার পাত্রী হবে না কেন ? বৈষম্যবাদের আরাধ্য রাধা। শাক্তদের আরাধ্য শ্রামা। এঁদের কারো সন্তান ছিল বলে ধর্মগ্রন্থে লেখে না। তা বলে কি এঁরা কম ভক্তি পান !”

“তা যদি বলো, উমার ওই একটিই গর্ভজাত সন্তান, গণেশ। কান্তিকের জন্ম হয় বোন কৃত্তিকাদের গর্ভে। কুমারসম্ভব পড়েছ ?” ঘোষাল জিজ্ঞাসা করে।

পাকড়াশী মাথা নাড়ে। “আমি বিজ্ঞানের ছাত্র।”

“আমি আর্টসের ছাত্র ! আমার অন্যতম বিষয় ছিল সংস্কৃত। তা হলে শোন। শিবের প্রথম পক্ষ সতী নিঃসন্তান। আর তাঁর তৃতীয় পক্ষ গন্ধা। তাঁরও সন্তান হয়নি। পার্বতীর তো ওই একটিমাত্র সন্তান, গণেশ। তা হলে তোমার আমার পত্নীদের কাছে আর প্রত্যাশা না করাই ভালো।” ঘোষাল বলে।

“প্রত্যাশা কাকে বলছ, ভাই ? ওটা যে অলিখিত শর্ত। বাপ আর মা মিলে দুই। ছেলে আর মেয়ে মিলে দুই। দুইয়ের জায়গায় দুই। দুইয়ের জায়গায় এক হলে হিসেব মিলবে কী করে ? জনসংখ্যা অর্ধেক কমে যাবে। কয়েক পুরুষ বাঁচে গুল্মে ঠেকবে। এ রকম সিদ্ধান্ত কি এককভাবে নেওয়া যায় ? অবলারা হঠাৎ প্রবলা হয়ে উঠে কী যে বিপ্লব বাধাতে যাচ্ছে তার ফলাফল কেউ খতিয়ে দেখেছে কি ?” পাকড়াশী উত্তেজিত হয়।

“লোকটা রসকষবর্জিত।” ঘোষাল হেসে উড়িয়ে দেয়।

“তর্কে পরাস্ত হলে সকলেই ঘোড়ার মতো হাসে। বলো, আমার যুক্তি কোনখানে ভুল ?” পাকড়াশী চেপে ধরে।

“যুক্তি তোমার সম্পূর্ণ নির্ভুল। কিন্তু যুক্তিটাকে প্রয়োগ করবে কী করে? অনিচ্ছুক নারীর বিরুদ্ধে আদালতে গিয়ে কনজুগাল রাইটের মামলা দায়ের করবে? তাতেও কি এর কোনো প্রতিকার আছে? বৌকে ধরে নিয়ে এসে বিছানায় শোওয়াতে পারা যায়, কিন্তু মা হতে বাধ্য করা অসম্ভব। সভ্য মানুষ এখানে পরাজিত। বর্বর হয়তো হত্যার ভয় দেখিয়ে কাজ হাসিল করতে পারে। তাকে আদালতেও যেতে হয় না। কিন্তু তুমি আমি বর্বর নই। আর একটা উপায় অবশ্য হিন্দু বলে তোমার হাতের পাঁচ। বৌকে বলতে পারো, এই চলনুম বর-বর খেলা খেলতে। আবার বর হতে। তোমার তো ছেলে হলো না। ছেলে না হলে বংশরক্ষা হবে কী করে? পাকড়াশী বংশ কি নির্বংশ হবে! তা শুনে বৌ বেচারি ভয় পেয়ে আবার মা হবার ঝুঁকি নেবে। হয়তো আঁতুড়ঘরেই পটল তুলবে। সুপ্রকাশ, ইজ ইট ওয়ার্থ হোয়াইল?” ঘোষাল টিপে টিপে হাসে।

“তুমি আমাকে বলেছ রসকষর্ভজিত। আমি তোমাকে বলব স্নৈগ। ওর বাড়ি গাল নেই।” পাকড়াশী বিজ়েতার মতো বুক ফোলায়।

“বলো, বলো, যা মুখে আসে বলো। কিন্তু এটাও মনে রেখো যে বাইরে তুমি দণ্ডমুণ্ডের কর্তা হতে পারো, ঘরে কিন্তু তুমি নারীমুখাপেক্ষী। সেখানে কর্তার ইচ্ছায় কর্ম নয়, কর্ত্রীর ইচ্ছায় কর্ম। আমি এ নিয়ে মাথা ঘামাইনে। ক’টি সন্তান হলো, আদৌ হলো কি না এসব ভেবে সময় নষ্ট না করে এক সেট টেনিস খেলা ভালো। জ্বর কাছে আমি সব খেলায় পরাজিত হতে রাজী, শুধু টেনিসে নয়। তোমার মনে খালি বাজছে, তুমি পরাজিত। তুমিও একটি ক্ষেত্রে অপরাজিত। আমাদের সকলের মধ্যে তুমিই হচ্ছে দীর্ঘতম। তা বলে দীর্ঘতমা ঋষি হতে যেয়ো না।” ঘোষাল হেসে ওঠে।

দীর্ঘতমা ঋষির উপাখ্যান জানতে চাইলে ঘোষাল বলে, “সে এক দীর্ঘ উপাখ্যান। সংক্ষেপে শোনাচ্ছি।”

দীর্ঘতমা ধার্মিক ও বেদজ্ঞ হওয়া সত্ত্বেও যত্রতত্র সঙ্কম করার জন্তে প্রতিবেশী ক্রুদ্ধ মুনিগণের দ্বারা পরিত্যক্ত হন। তাঁর স্ত্রীও অন্ধ স্বামীকে ভরণ পোষণ করতে অস্বীকার করেন। পুত্ররা মাতার আদেশে তাঁকে ভেলায় করে ভাসিয়ে দেন। সেকালে সন্তান উৎপাদনের জন্তে নিয়োগ প্রথা ছিল। বলিরাজা তাঁকে স্বগৃহে নিয়ে যান ও নিজের রানী স্ত্রীদেবীকে তাঁর শয্যায় যেতে বলেন। রানী নিজে না গিয়ে দাসীকে পাঠান। অন্ধ তো তফাৎ বুঝতে পারেন না। দাসীর গর্ভেই একাদশ পুত্রের জন্ম দেন। তা শুনে রাজা আবার রানীকে ঋষির শয্যায় পাঠান। এবার

রানীর গর্ভে পাঁচটি পরাক্রান্ত পুত্র হয়। পাঁচজনের নামে পাঁচটি দেশ নামাঙ্কিত হয়।  
অঙ্গ, বঙ্গ, কলিঙ্গ, পুণ্ড্র ও সুঙ্গ।

পাকড়াশীর তো মুখ চুণ। “আমি টেনিস খেলিনে। ডুয়েল লড়ি।”

যুথিকা বুঝতে পারে যে এর পরে হয়তো হাতাহাতি বেধে যাবে। সে শাস্তিভুল ছিটিয়ে দেয়। “ছি! এই সামান্য কথায় কেউ ডুয়েল লড়ে? একটি ছেলে কি মেয়েকেই আজকাল মনের মতো করে মাহুষ করা এত শক্ত যে দুটির দায়িত্ব নিতে কেই বা সহজে রাজী হয়? কিন্তু দুটি না হলে খেলার সাথী জোটে না। খেলার সাথী না জুটলে একা একা থাকতে হয়। তাতে চরিত্রের ঠিকমতো বিকাশ হয় না। তা হলে খুব কম বয়সে নার্সারি স্কুলে পাঠাতে হয়। কোথায় মেলে তেমন স্কুল? আমরা দুটিই চেয়েছি। দুটিই যখন পেলুম তখন দেখলুম দুটিই ছেলে, মেয়ে একটিও নয়। মেয়ে না হলে ঘর আলো হয় না। তাই মেয়েও চাইলুম। বিধাতা সে বাসনা পূরণও করলেন। তখন কি জানতুম যে সমতা রাখার জন্যে একটি ছেলেকে ফিরিয়ে নেবেন? জানলে হয়তো মেয়ে চাইতুম না। তাই বা কেমন করে বলি! মণিকা আমার চ’চক্ষের মণি।”

ঘোষাল এবার রসিকতা করে বলেন, “সাবধান, মিসেস মল্লিক। মিছ যদি মণিকে দেখতে পায় এখন থেকেই আপনার সঙ্গে বেয়ান সম্পর্ক পাতাবে। ওর ছেলের জন্যে ও এখন থেকেই বৌ খুঁজতে শুরু করেছে। ইতিমধ্যে রমি পাকড়াশীর সঙ্গেও বেয়ান সম্পর্ক পাতানো হয়ে গেছে। সেই সুবাদে সুপ্রকাশ আমার বেয়াই। বেয়াইতে বেয়াইতে ডুয়েল। তামাশা মন্দ নয়। তবে বেয়ানদের সাক্ষাতে হওয়া চাই।”

পাকড়াশী ঠাণ্ডা হয়ে বলে, “তা হলে তুমি কথা ফিরিয়ে নাও। আমি বর্বর, আমি দীর্ঘতমা। আমি যত্নতত্ন সঙ্গম করে বেড়াই। এসব কী কথা।”

“কবে বলেছি যে তুমি দীর্ঘতমা? আমি বরঞ্চ বলেছি দীর্ঘতমা হতে যেয়ো না। তুমিই আমাকে বলেছ স্নেহ। যার বড়ো গাল নেই। কিন্তু আমি তো মনে করি ওটা নিন্দার কথা নয়, প্রশংসার কথা। মিছকে শোনালে ও কত খুশি হবে! আমি খেলোয়াড় মাহুষ। সব কিছু আমি খেলোয়াড়ের মতো নিই। ডুয়েল যদি লড়তে বলো, খেলোয়াড়ের মতোই লড়ব। টেনিস র্যাকেট হাতে। সিঙ্গেলস খেলবে আমার সঙ্গে?” ঘোষাল চ্যালেঞ্জ করে।

“না, টেনিস র্যাকেট হাতে নয়। তবে ব্রিজের টেবিলে খেলতে পারি। চড়া টেকে। মল্লিক আর মল্লিকা, তোমরাও খেলবে নাকি? তাস ঘরে আছে? বিনোদকে আজ আমি দেউলে করে ছাড়ব।” পাকড়াশী চ্যালেঞ্জ করে।

“বিনোদের পার্টনার যে হবে তাকেও। কে অমন প্রস্তাবে রাজী হবে!” মানস যুথিকার দিকে তাকায়।

“আমি রাজী। আমার খেলার পার্টনার যদি জেতেন তো আমিও জিতব। তাতে আমার বাড়ীর পার্টনার হেরে গিয়েও জিতবেন। আর আমার খেলার পার্টনার যদি হারেন তো আমিও হারব। সে হার পুষিয়ে দেবে আমার বাড়ীর পার্টনারের জিং। কারো পকেট থেকে কিছু যাবে না, কারো পকেটে কিছু আসবে না।” এই পৰ্বন্ত বলে যুথিকা কথা ঘুরিয়ে নেয়। বলে, “কিন্তু আমরা যে স্টেক রেখে খেলা ছেড়ে দিয়েছি।”

পাকড়াশী উঠে দাঁড়ায়। “চলো হে চলো, বিনোদ। ক্লাবে গেলে এখনো ব্রিজের টেবিলে জনা দুই পার্টনার মিলবে। তোমাকে আজ আমি হারাবই হারাব।”

“বেশ, চলো। কিন্তু আমার পার্টনার যদি হন ক্যাপটেন ল তোমার এ গুমোর ফাঁস হবে।” ঘোষালও বিদায় নেবার জন্যে উঠে দাঁড়ায়।

পরের দিন টেনিসে আবার দেখা হলে মানস জানতে চায় ব্রিজ খেলার খবর। ঘোষাল বলে, “আমরা গিয়ে দেখি কেউ কোথাও নেই। ক্লাবের দুয়ার বন্ধ। তখন সারকিট হাউসে গিয়ে যে যার ঘরে ঢুকি। সকালে উঠে সব ভুলে যাই।”

“আমরাও কি মনে আছে? অমন কত হয়।” পাকড়াশী বলে।

মানস জানতে চায় স্ত্রপ্রকাশ হঠাৎ ক্ষেপে গেল কেন। তুচ্ছ কারণে কেই ডুয়েল লড়ে?

“আখ, মল্লিক, তোমার কাছে যা তুচ্ছ আমার কাছে তা তুচ্ছ নাও হতে পারে। ধড়াচড়া আমার একেলে, স্টুট আমার বানায় অ্যাসকুইথ অ্যাণ্ড লর্ড, কিন্তু মাছুষটা আমি সেকেলে। ওই ব্যাটা হিটলারকে যদিও আমি সর্বান্তঃকরণে ঘৃণা করি তবু ও ব্যাটা যা বলেছে তা লাখ কথার এক কথা। কিরণে, কুথেন উণ্ড কিণ্ডেরগার্টেন। গির্জা, কিচেন আর নাসারি! এই তিন হলো নারীজাতির স্বরাজ্য। এর বাইরে তাদের পররাজ্য। এর খাঁটি বাংলা হচ্ছে মন্দির, রামায়ণ আর আঁতুড়ঘর। এই তিন নিয়ে যারা আছে তারাই আমার আদর্শ নারী। এইজন্যেই মিসেস মল্লিককে আমি বন্দনা করি। কিন্তু আমার আর বিনোদের দুই রূপসী নবযুবতীকে পারলে বন্দী করতুম। আমরা অক্ষয়। আমরা কাপুরুষ। আমার মা আমাকে বার বার জিজ্ঞাসা করেন, বোমার আর একটি হয় না কেন? আমি এর কী উত্তর দিতে পারি? বলতে পারতুম বোমাই জানে। সাহসে কুলয় না। বলি, ভগবান জানেন। মা আমার সেকেলে মাছুষ। এখানে ওখানে সেখানে মানত করে বেড়ান। ঘণ্টাব্রত

করেন। নাতনি হয়েছে, কিন্তু সে পরের বাড়ী চলে যাবে। নাতি চাই। সে স্বর্গে দেবে বাতি। বেচারি মা আর কদিন বাঁচবেন! রূপবতীর কি সেদিকে হোঁশ আছে। অথচ বিনোদ কিনা ওর নবযুবতীর পক্ষ নিয়ে আমাকে অপ্রস্তুত করছে। আমি যদি বলে থাকি স্ত্রী এমন কী অন্ধ্যা করেছে? কোদালকে কোদাল বলা কি অন্ধ্যা? তর্কে হেরে গিয়ে ও এক গল্প ফেঁদে বসেছে। আমি কিনা দীর্ঘতমা ঋষি।” পাকড়াশী উপরে উপরে ফুক হলোও ভিতরে ভিতরে পুলকিত।

“ওঃ এই কথা!” মানস ওকে প্রবোধ দেয়। “কী করবে বলা? ওটা যুগধর্ম। যে নারীকে আমরা সব দেশেই জেগে উঠতে দেখছি সে নারীকে ইংরেজীতে বলে নিউ উওয়ান। সে নারী ঘর নিয়ে সন্তুষ্ট নয়, বাইরেকেও তার চাই। সেও ক্লাবে যাবে, আফিসে যাবে, খেলার মাঠে যাবে, আকাশে উড়বে, সমুদ্রে সাঁতার কাটবে, নির্বাচনে ভোট দেবে, জিতলে মন্ত্রী হবে। শুনিছি সোভিয়েট রাশিয়াতে নাকি ওরা যুদ্ধক্ষেত্রেও যায়, রাতের বেলায় সঙ্গ দিতে নয়,—সেটা তো হোমারের যুগেও ছিল,—চিত্রাঙ্গদার মতো শত্রুর সঙ্গে শত্রু হাতে লড়তে। মারতে ও মরতে। এই যে নিউ উওয়ান একে তুমি হিটলারী অলুশাসন জারি করে ঘরে ফেরাতে পারবে না। যদি না সে আপনা থেকে নীড়ের বন্ধন মানে। যুথিকাকে আমি সম্পূর্ণ স্বাধীনতা দিয়েছি। কিন্তু সে হচ্ছে সেই দেবী যা দেবী সর্বভূতেশু মাতৃরূপে সংস্থিত। তা না হলে সেও নব্য নারী। সে সনাতনী নয়। সে বিংশ শতকেরই কন্যা। যেমন তোমার উনি বা বিনোদের তিনি। স্প্রকাশ, তুমিও মেনে নাও, যেমন মেনে নিয়েছে বিনোদ। দেখবে ফল ভালোই হবে। যথাকালে।” ইতি মানস।

“তোমার মুখে ফুল চন্দন পড়ুক। কিন্তু যথাকাল যে কতকাল তা আমার মাকে কে বোঝাবে? বা বিজনের মাকে? সেই বৃদ্ধার সঙ্গে যথনি দেখা হয় তিনিও জানতে চান, হাঁরে, আমার বোমার আর হচ্ছে না কেন? বিনোদের মা নেই, তাই রক্ষে। এটা হলো শাস্ত্রী জাতির সাধারণ জিজ্ঞাসা। যেমন মৈত্রেয়ী গার্গীদের ব্রহ্মজিজ্ঞাসা।” অর্থ স্প্রকাশ।

মানস বলি-বলি করে বলতে পারে না যে কোনো কোনো নব্য নারীর বেলা অঘটনও বার বার ঘটে। সেটা অবশ্য পরের মুখে শোনা।

## ॥ ষোল ॥

কংগ্রেস মন্ত্রীদের এক ধার থেকে পদত্যাগের পর হামিদ বলেন মানসকে, “আপনারা অমন করে পালিয়ে গেলেন কেন?”

“পালিয়ে গেলুম আমরা!” চমকে ওঠে মানস। “এর মানে কী, হামিদ?”

“আহা, আপনারা মানে কি আপনি আর মিসেস মল্লিক!” হামিদ বুঝিয়ে বলেন, “আপনারা মানে কংগ্রেসমন্ত্রীরা। পালিয়ে যাওয়া মানে শাসনকার্য ছেড়ে বনবাসে যাওয়া। কী দরকার ছিল এই মহাপ্রস্থানের? এটা কি জিন্মা সাহেবের ভয়ে, না বোস বাবুর ডরে?” স্বভাষচক্রকে তিনি বলতেন বোসবাবু।

মানস সামলে নিয়ে বলে, “তাই বলুন। আমি তো ভেবেছিলুম আমরাই আবার ইলোপ করেছি। হা হা হা হা! আরে ভাই, ওসব আপনাদের বয়সেই সাজে। আমরা এতদিনে ষোরতর ঘরপোষা। যাকে বলে ডোমিস্টিকেটেড।”

হামিদ জানতেন না মল্লিক দম্পতীর পরিণয় কেমন ভাবে হয়েছিল। তাঁর নিজের বিবাহ হয়েছে বিস্তৃত শরীয়তী মতে। গুরুজনের নির্বন্ধে। ভাগ্যে হয়েছিল, তা নইলে ঠুঁকেও মুশকিলে পড়তে হতো গুর সতীর্থ ইমতিয়াজ মির্জার মতো। ইমতিয়াজ হলেন খানদানী পাঞ্জাবী মুসলমান। চেহারা দেখে মালুম হয় সেকালের গ্রীকদের বংশধর। গৌরবর্ণ সেই সুপুরুষের সঙ্গে কৃষ্ণবর্ণা বঙ্গকন্ঠার সাদী দিতে সাধ বেগম জাফর হোসেনের। তাঁর বিশ্বাস মুসলমানমাজেই এক জাতি। ইসলাম যে জাতিভেদ মানে না।

বেগমের দাদার সঙ্গে রাজশাহীতে থাকতে ঘনিষ্ঠতা হয়েছিল। সেই স্ববাদে মানসকেও বেগম বলতেন ভাই। একদিন বিশ্বাস করে বলেন, “আমার মনের সাধ কি মিটবে না? মির্জার সঙ্গে কি রোকেয়ার হতে পারে না? কেন হতে পারে না?”

মানস কী করে বোঝাবে যে বাঙালী মুসলমানদের হিন্দুস্থানী ও পাঞ্জাবী মুসলমানরা অন্তরের সঙ্গে অবজ্ঞা করে। যেমন অ্যাংলো-ইণ্ডিয়ানদের ইংরেজরা। মানসও যেহেতু বাঙালী সেহেতু ঠুঁদের বাক্যবাণ তারও গায়ে বেঁধে। বেচারারা মুসলমান বলে নয়। বাঙালী বলেই অবজ্ঞেয়। বাঙালীরা নাকি মার্শাল রেস নয়। যোদ্ধা জাতি নয়। তবে, হ্যাঁ, বাঙালী সম্রাসবাদীদের ঠুঁরা জুজুর মতো ডরান। ভয় থেকে আসে ভক্তির। সুভাষচন্দ্রকে ঠুঁরা ভক্তি করেন। গান্ধীজীকে মনে করেন দুর্বল বলেই অহিংস। এক হামিদ বাদে। হামিদ নিজে চরকা কাটেন, কেউ ভিক্ষা চাইতে গেলে তাকেও কাটান। খাদির উপরে তাঁর আস্থা আছে। কিন্তু অহিংসার উপরে নেই। তাই তিনি থাকসার হয়েছেন। পাঠান বলে পাঞ্জাবী ও হিন্দুস্থানী মুসলমানদের থেকে তিনি ভিন্ন।

মানসের চার মুসলিম সহকর্মীর মধ্যে একজন তো বাঙালী, আরেকজন হিন্দুস্থানী, তৃতীয়জন পাঞ্জাবী ও চতুর্থজন পাঠান। আশ্চর্যের কথা, পাঠানের সঙ্গেই তার মনের মিল বেশী। বোধহয় গান্ধীজীর সঙ্গে যে কারণে বাদশা খানের মনের মিল সেই কারণে মানসের সঙ্গেও হামিদের মনের মিল। হামিদ কিন্তু সোজা জানিয়ে দিয়েছেন যে স্বাধীনতা সংগ্রামে অহিংসা কোনো কাজের নয়। আর তিনি নিজে প্যান-ইসলামিজমে বিশ্বাসবান। ইণ্ডিয়ান গ্র্যানালিজম তাঁর কাছে পরধর্ম। অথচ কোরানের আত্মোপাস্ত তাঁর কণ্ঠস্থ হলেও তিনি গীতাও পড়েছেন, বাইবেলও পড়েছেন। মুহম্মদের পরে যদিও আর কোনো নবী জন্মাননি ও জন্মাবেন না তবু তাঁর আগেও তো আরো কয়েকজন নবী জন্মেছিলেন। তা নইলে তাঁকে শেষ নবী বলার অর্থ কী? তেমনি দু'জন নবী ছিলেন বাইবেলের যীশু ও গীতার কৃষ্ণ। না, এঁরা কেউ ভগবান বা ভগবানের পুত্র বা ভগবানের অবতার নন। কিন্তু মহাপুরুষ নিশ্চয়ই। এঁদের বাণী প্রণিধান করতে হয়। অত বড়ো না হলেও গান্ধীও মহাত্মা। মানস যখন বলে ‘গান্ধী’ হামিদ শুধরে দিয়ে বলেন, “মহাত্মা গান্ধী। তিনি একজন ইন্সপায়ার্ড লীডার।” কিন্তু মহাত্মার মহাত্ম্য স্বীকার করলেও তিনি আলামা মাহরিকির শিষ্য। ধীর আসল নাম ইনায়তুল্লাহ খান। তিনিও পাঠান। তাঁর প্রতিষ্ঠিত দল হলো থাকসার পার্টি। মুসলিম লীগের সঙ্গে আড়াআড়ি। খোন্দকার জাফর হোসেন মুসলিম লীগের পক্ষপাতী। আলী হায়দারও কতকটা তাই। নেতা হিসাবে জিন্না সশ্বেত তাঁর দ্বিধা আছে। জিন্না যে শিয়া মুসলমান। হায়, ইকবাল যদি আরো কিছুদিন বাঁচতেন! ইমতিয়াজ মির্জা পাঞ্জাবের প্রধানমন্ত্রী সিকন্দর হায়াৎ খানের অহুগামী ইউনিয়নিস্ট। হাফিজ জানেন যে এঁরা কেউ থাকসারদের মতো



লড়নেওয়ালা নন। এঁরাও জানতেন যে খাকসাররা কৌন্‌দিন হয়তো ইংরেজদের সঙ্গে মারামারি বাধিয়ে দেবে। তাই হাফিজ কতকটা একঘরে।

“কিন্তু আপনি তো আমার প্রশ্নের উত্তর দিলেন না, পাশ কাটিয়ে গেলেন, মিস্টার মল্লিক। আট আটটা প্রদেশের শাসনভার ছেড়ে অমন করে বনবাসে যাওয়ার তাৎপর্য কী? ওইটুকু করলেই কি ইংরেজ বিদায় হবে?” হামিদ স্থান।

“আরে, না। ওটা তো সবে যাত্রারম্ভ। কংগ্রেসকে অনেকদূর যেতে হবে। মহাযুদ্ধের মাঝখানে গণসত্যাগ্রহ বাধালে সে আন্দোলন হিংসার দিকেই মোড় নিতে পারে। কাজেই ফাঁসীর সম্ভাবনাও রয়েছে। কিংবা ফায়ারিং স্কোয়াডের। আমি যে কী দারুণ সঙ্কটে পড়ে গেছি, কী করে বোঝাব!” মানস কল্পণস্বরে বলে।

“আপনি! সঙ্কটে পড়েছেন! কেন, আপনার কিসের সঙ্কট।” হামিদ বিস্মিত।

“শুনুন তা হলে খুলে বলি। জার্মানদের একটা প্রিয় গান আছে, হাইডেলবার্গে হৃদয় হারিয়েছি। আমি হাইডেলবার্গে গেছি, তবে হৃদয় হারাইনি। কিন্তু তার চেয়েও গৃহতর অর্থে হৃদয় হারিয়েছি ইউরোপে। সেইজন্তে আমার হয়েছে অজুর্নবিবাদ। কেমন করে আমি হিটলারকে হিট করতে গিয়ে জার্মানদের হাইডেলবার্গ, ড্রেসডেন, হুরেনবার্গ মিউনিকের মতো সুন্দর সুন্দর শহর ধ্বংস করব? কেমন করে বোমাবর্ষণ করব নারী ও শিশুদের উপর? কত বড়ো একটা বনেদী সংস্কৃতি জার্মানদের! কেমন করে তার হস্তারক হবে? অথচ হিটলারের নাৎসী বাহিনী পোলাণ্ডের পর পশ্চিমমুখো হয়ে হলান্ড, বেলজিয়াম, ফ্রান্স আক্রমণ করবে আর পক্ষপালের মতো সব সাফ করে দেবে এটাও কি আমি দাঁড়িয়ে দাঁড়িয়ে দেখতে পারি! বিশেষ করে প্যারীসের পতন! চ্যানেল পার হওয়া অবশ্য অত সহজ হবে না, তবু বিশ্বাস কী! ইংরেজদের ভয়ঙ্কর বিপদ। এই দুর্বোলের সুযোগ নেওয়া ভারতীয়দের পক্ষে মারাত্মক অন্মায় হবে। তাই আমি কংগ্রেসের এই পদক্ষেপ অন্তর থেকে সমর্থন করতে পারছি। কিন্তু এখানেই যদি ওরা থামত তা হলেও কথা ছিল। আমার আশঙ্কার কারণ আছে যে ওরা পূর্ণ স্বাধীনতার জন্তে এই ছবিপাকের পূর্ণ সুযোগ নেবে। তা যদি হয় তবে আমার নিজের কর্তব্য কী হবে? আমি কি আমার দেশের মুক্তিযোদ্ধাদের সদলবলে জেলে পাঠাব? ম্যাজিস্ট্রেট হলে গুলীর হুকুম দেব? জজ হলে ফাঁসীর হুকুম দেব? না আমিও তার আগে পদত্যাগ করব? তা যদি করি তো চালাব কেমন করে? বিশ্বের সঙ্কট, ভারতের সঙ্কট, আমার সঙ্কট, সব একাকার হয়ে গেছে, হামিদ। আমার একমাত্র আশা ছিল কংগ্রেসের সঙ্গে ইংরেজের একটা মিটমাট হবে। কিন্তু তার জন্তে চাই ইংরেজ পক্ষেরও অন্তঃপরিবর্তন। শেফার্ড কী বললেন, শুনবেন?” মানস বলতে চায়।

“শুনতে কৌতূহল হয় ?” হামিদ শুনতে চান।

“কংগ্রেসমন্ত্রীরা সবাই একসঙ্গে পদত্যাগ করেছেন শুনে শেফার্ড আমাকে বললেন, জানেন ওঁরা কী রকম ধূর্ত ? জেলে যাবেন বলে আগে থেকে জেল কোড সংশোধন করে বসে আছেন ! এবার জেলে গেলে মহা আরামে বাস করবেন। ওদিকে লোকে ভাববে না জানি কত বড়ো ত্যাগবীর !” মানস হাফিজকে শোনায।

“তা শেফার্ড সাহেবরাও তো কম ধূর্ত নন। তাঁরা আশা করেছিলেন যে কংগ্রেস যা পেয়েছে তাই নিয়ে সম্বল থাকবে ও বিনা শর্তে যুদ্ধের জন্তে জান মাল ধন সমর্পণ করবে। যেমন করছেন পাঞ্জাবের সিকন্দর হায়াৎ খান ও তাঁর দল। কিন্তু কংগ্রেসকেও ভেবে দেখতে হবে যে এই পলায়নের রাজনীতি মুসলমানদের মনে কোন্ ধারণার সৃষ্টি করবে। লীগপন্থীরা বলাবলি করছেন এটা তাঁদের ফাঁকি দেবার ছিল। কোয়ালিশন এড়াবার কৌশল। কোয়ালিশনে রাজী হলে সবাই মিলে ব্রিটিশ সরকারের উপর চাপ দিয়ে কেন্দ্রেও রদবদল ঘটানো সম্ভব হতো। এতে লাভ কী হলো ? বাকী তিনটে প্রদেশে তো অকংগ্রেসী মন্ত্রীরা কেউ পদত্যাগ করবেন না। যুদ্ধকালে জান মাল ধন বিনা শর্তে জোগাবেন। অর্ধেক সহযোগ ও অর্ধেক অসহযোগ কি দেশের পক্ষে স্ববিধে নীতি নয়। দেশ তো এমনি করেই দু'ভাগ হয়ে যাচ্ছে। পাকিস্তানের ইস্যুতে নয়। সহযোগী অংশটাই একদিন সহযোগিতার পুরস্কার প্রত্যাশা করবে। তাকে বঞ্চিত করে ব্রিটেন কি কংগ্রেসকে সর্বময় ক্ষমতা দেবে ?” সংশয় প্রকাশ করেন হামিদ।

“না, না, কংগ্রেসের তেমন কোনো অভিসন্ধি নেই। কংগ্রেসও সহযোগিতার হাত বাড়িয়ে দেবে, যদি ভারতের ভাগ্য ভারতীয়দের নির্ধারণ করতে দেওয়া হয়। সেটা একটা কনস্টিটিউয়েন্ট অ্যাসেম্বলির মাধ্যমে। আপাতত ভারত সরকার যেন গঠিত হয় জনপ্রতিনিধিদের দিয়ে। তাঁদের মধ্যে লীগপন্থীরাও থাকবেন। সর্বময় ক্ষমতা আসবে যুদ্ধের পরে। কংগ্রেস, লীগ প্রভৃতি সকলেরই হাতে। শুধুমাত্র কংগ্রেসের হাতে নয় ? এক কথায় বলা যেতে পারে সাম্রাজ্যের হাত থেকে নেশনের হাতে। যে নেশন হিন্দু মুসলমান শিখ খ্রীষ্টান সকলেরই নেশন। শুধুমাত্র হিন্দুর নয়।” মানস পরিষ্কার করে বলে।

“ওইখানেই তো মুশকিল।” হামিদ মাথা নাড়েন। “আমরা কখনো আপনাদের সঙ্গে এক নেশন গড়ব না, মিস্টার মল্লিক। শ্রাশনালিঙ্গ্য আপনাদের কাছে একটা ধর্ম বিশেষ। আমাদের কাছে ইসলামই সব। সাম্রাজ্য যতদিন আছে আপনারা ও আমরা একঘাটে জল খাচ্ছি। কিন্তু সাম্রাজ্য যেদিন থাকবে না সেদিন দেখবেন

মুসলমানের টানটা আরব, ইরান, তুরস্ক, আফগানিস্থানের দিকে। তাদের যারা শত্রু মুসলমানের তারা শত্রু। তাদের যারা মিত্র মুসলমানের তারা মিত্র। মুসলমানের কাছে তারা এলিয়েন নয়, তাদের কাছে মুসলমানও এলিয়েন নয়। ভারতীয় নেশনের থেকে ভিন্ন প্যান-ইসলামিক ব্রাদারহুড। বেছে নিতে হলে আমরা প্রথমটাকে নয়, দ্বিতীয়টাকেই বেছে নেব। আপনাদের সঙ্গে নেশন গড়লে আমাদের আরবে ইরানে বিদেশী ও বিজাতীয় মনে করবে। আমরাও তাদের বিদেশী ও বিজাতীয় মনে করব। আমাদের শত্রু অল্পসারে আমরা সব দেশের মুসলমানই একজাতি। ইসলাম শুধু একটা ধর্মমত নয়, ইসলাম হচ্ছে একটা সমাজ, একটা রাষ্ট্র। আর খেলাফৎ হচ্ছে তার একটা মূল স্তম্ভ। খেলাফৎ উঠিয়ে দিয়ে তুরস্ক এক মহা অপরাধ করেছে। আমরা সেটাকে পুনঃপ্রতিষ্ঠিত করতে চাই, যদি স্বযোগ পাই। পাকিস্তান আমাদের পক্ষে একটা স্বযোগ। আপনাদের পক্ষে একটা দুর্যোগ। ইংরেজ চলে গেলে মিলনের স্রষ্টা আবিষ্কার করতে হবে। যেমন খেলাফৎ আন্দোলনের সময়। মহাত্মা গান্ধীকে উভয়পক্ষই নেতা বলে মেনে নিয়েছিল। ইতিমধ্যে তাঁর প্রভাব কমেছে। জিন্না সাহেবের প্রভাব বেড়েছে। এখন চাই গান্ধী-জিন্না সমঝোতা। কংগ্রেস-লীগ চুক্তি। তবে আমার কথা যদি বলেন, আমি নিজে জিন্নাপন্থী নই। আমি একজন থাকসার। মুসলিম লীগই যে মুসলমানদের একমাত্র প্রতিনিধি দল এটা আমি মানিনে। আর ক্র্যাশনালিজম এই তত্ত্বটাই ইসলামের সঙ্গে বেখাপ। তাই ওদের মুখে মুসলিম নেশন বা পাকিস্তানী নেশন শুনলে আমি কাঁপরে পড়ি।” হাফিজ প্রাণ খুলে প্রকাশ করেন।

“দেখুন, হাফিজ”, মানস বলে, “মুসলমানরা যদি একাই একটা ভ্রাতৃসঙ্ঘ গঠন করতে চায় সেটা সম্পূর্ণ সম্ভব ও বাস্তব। কিন্তু ওরা যদি একাই একটা নেশন গঠন করবে বলে মনঃস্থির করে তবে সেটা কোথাও সম্ভব নয়, কোথাও বাস্তব নয়। না পাঞ্জাবে, না বাংলাদেশে, না উত্তরপশ্চিম সীমান্তপ্রদেশে। সেসব প্রদেশের উপর হিন্দু ও শিখদেরও জন্মগত দাবী আছে। ইতিহাস বলে যে পাঞ্জাব শিখদের রাজ্য ছিল, এখনো থাকত, ইংরেজরা যদি শিখদের হারিয়ে না দিত। কিংবা শিখরা যদি ইংরেজদের অহুগত হতো। পাতিয়ালায় শিখরা যেমন রয়েছে। মুসলমানরা মাইনরিটি হিসাবে যত ইচ্ছা সেকগার্ড চাইতে পারে, সেটা অণ্যায় নয়, কিন্তু কতকগুলি প্রদেশে মেজরিটি বলে সেই প্রদেশগুলিকে বিচ্ছিন্ন করে নিয়ে তাদের একক স্বার্থে পাকিস্তান চাইতে গেলে সেখানকার মাইনরিটির স্বার্থহানি হবে। তারা তো প্রতিরোধ করবেই। কংগ্রেস কি তাদের অসন্তুষ্ট করে লীগের সঙ্গে মিটমাট করতে

সাহস পাবে ? সে সাহস ইংরেজেরও কি আছে ? শিখরা যদি ঘৃণাক্ষরে জানতে পায় যে ব্রিটিশ রাজ তাদের পাকিস্তানের কর্তাদের হাতে সঁপে দিয়ে যাবেন তা হলে কি তারা জার্মানদের সঙ্গে লড়তে গিয়ে জান দেবে, না আব একটা সিপাহী বিদ্রোহে ঝাঁপ দেবে ? ইংরেজরা যদি শিখদের সঙ্গে বেইমানী করে তবে তাদের রাজত্ব আরো আগে খতম হবে। তার পর চতুর্থ পানিপথের যুদ্ধে স্থির হবে পাঞ্জাব কার। মুসলমানের না শিখের, শিখের সঙ্গে হিন্দুর। জিন্না সাহেব হুচতুর ব্যারিস্টার, কিন্তু তিনি কোন্ পক্ষের ব্যারিস্টার ? মুসলিম মাইনরিটির না মুসলিম মেজরিটির ? এতদিন তিনি ছিলেন মুসলিম মাইনরিটির ব্যারিস্টার। এখন তিনি মুসলিম মেজরিটির ব্যারিস্টার। যদি মুসলিম মেজরিটির ইচ্ছায় পাকিস্তান প্রতিষ্ঠিত হয় তাহলে অবশিষ্ট ভারতে মুসলিম মাইনরিটির কী হাল হবে ? আর পাকিস্তানে হিন্দু শিখ মাইনরিটিদেরই কী দশা হবে ? যেখানে যত সংখ্যালঘু আছে সকলেই বিপন্ন হবে। একবার ভেবে দেখুন জিন্না সাহেবের নিজের প্রদেশের মুসলমানদের অবস্থা। তিনি না হয় পালিয়ে বাঁচবেন, কিন্তু তাঁর সম্প্রদায়ের সবাই কি পালিয়ে বাঁচবে। তাদের ঘরবাড়ী ভূসম্পত্তির কী ব্যবস্থা হবে ?”

হামিদ স্বীকার করেন যে এসব প্রশ্ন উঠবেই। কিন্তু অধিকাংশ মুসলমান যদি পাকিস্তান দাবা করে তবে তাদের সে দাবা এককথায় খারিজ করার মালিক কারা ? হিন্দুরা না শিখরা না ইংরেজরা ? স্বরাজের দাবীর মতো এটাও একটা বৈধ দাবী, কারণ এটার পেছনেও অধিকাংশের ইচ্ছা, অধিকাংশের ত্যাগ, অধিকাংশের স্বার্থ।

“না, মিষ্টার মল্লিক, আমি লাগপস্থা না হলেও লীগের ওই দাবার বিরুদ্ধে দাড়াতে পারব না। খান্ আবদুল গফ্ফার খান্ কেমন করে দাঁড়াবেন তিনিই জানেন। এটা এমন একটা প্রশ্ন যে প্রশ্নে মুসলমানদের ছুঁভাগ করতে পারা যাবে না। মাহাত্মা গান্ধী যদি তেমন কোনো মোহ পোষণ করেন তো একদিন তাঁর মোহভঙ্গ হবে। সব চেয়ে ভালো সমস্যাটাকে অত দূর গড়াতে না দেওয়া। সময় থাকতেই মিটিয়ে দেওয়া। কংগ্রেসকেই এগিয়ে আসতে হবে।”

“কিন্তু কংগ্রেস যতবারই এগিয়েছে ততবারই ব্যর্থ হয়েছে, হামিদ। লীগ নেতারা কিছুতেই তাঁদের শেষ তাসটি দেখাবেন না। কিছুতেই বলবেন না যে এই হচ্ছে তাঁদের চূড়ান্ত দাবী, এর পরে তাঁদের আর কোনো দাবী নেই। হাতের পাঁচটি সব সময়েই তাঁদের আঙিনের তলায়। এই যে পাকিস্তানের দাবী এটাও কি চূড়ান্ত দাবী ? এর আড়ালেও আছে একটি গোপন স্বত্র। পাকিস্তান ইচ্ছা করলে ব্রিটিশ সৈন্যকে ঘাঁটি দিতে পারবে, ব্রিটেনের সঙ্গে সামরিক চুক্তি করতে পারবে। লীগ

নেতারা যদি ইংরেজদের সঙ্গে তলে তলে গাঁটছড়া না বাঁধতেন তা হলে কবে মিটমাট হয়ে যেত। কিন্তু তাঁদের মূলনীতিটা হলো এই যে, তাঁরাই ভালো ছেলে, কংগ্রেস নেতারা মন্দ ছেলে, সুতরাং তাঁরা পাবেন ভালো ছেলে হওয়ার জন্তে পুরস্কার, আর কংগ্রেস নেতারা পাবেন মন্দ ছেলে হওয়ার জন্তে শাস্তি। এই মূলনীতির কাছে নতিস্বীকার করবে কে? কেনই বা করবে? এতে কি স্বাধীনতা সূগম হবে? স্বাধীনতার বদলে তার চেয়ে কম দামী জিনিস নিয়ে কী করবেন গান্ধী, নেহরু, বল্লভভাই, আজাদ, বাদশা খান? কী করবেন সুভাষ, জয়প্রকাশ, মেহের আলী? কয়েকটা প্রদেশ বাদ গেলে এমন কোনো ক্ষতি হতো না, যদি বাকী সব প্রদেশ সত্যি সত্যি স্বাধীন হতো। কিন্তু তা তো হবার নয়। পাকিস্তানে ব্রিটিশ সৈন্য থাকতে ভারতের কোনো অংশই নিষ্কটক হতে পারে না। এখানে লীগ স্বার্থ ও ব্রিটিশ স্বার্থ একাকার হয়ে গেছে। লীগ চাইবে পাকিস্তান রক্ষার জন্তে ব্রিটিশ প্রোটেকশন। আইন অনুসারে সে অধিকার তার থাকবে। সুতরাং তেমন কোনো আইনে সায দেওয়া কংগ্রেসের পক্ষে দেশকে বিকিয়ে দেবার সামিল। লীগের পেছনে যদি ভারতের মুসলমানরা সার বেঁধে দাঁড়ায় তা হলে সে এক ভয়ঙ্কর ট্র্যাগেডী হবে। স্বাধীনতার সংগ্রাম পরিণত হবে দ্বিতীয় এক কুরুক্ষেত্রের যুদ্ধে। কুরু পাণ্ডবের ভূমিকায় নামবে হিন্দু মুসলমান। গান্ধীজী কি তেমন মঞ্চে কৃষ্ণের ভূমিকায় অভিনয় করবেন? কখনো না। তিনি মাঝখানে ঝাঁপিয়ে পড়ে দেহত্যাগ করবেন। আমরা যারা মুসলমানদের ভালোবাসি তাদের জীবন দুর্বহ হবে। আপনাদের অনেকের মধ্যেও তো হিন্দুদের প্রতি ভালোবাসার অভাব দেখিনে। তাঁদের জীবনও কি দুর্বহ হবে না? জিন্না সাহেব তো ইণ্ডিপেন্ডেন্ট পার্টির নেতা ছিলেন, তাঁর অনুগামীরা ছিলেন কেউ মুসলমান, কেউ পার্শী, কেউ হিন্দু। হঠাৎ ভোল বদল করে মুসলিম লীগের একচ্ছত্র অধিনায়ক হতে গেলেন কেন? তিনি যেমন হিন্দু ও পার্শীদের ছেড়েছেন তেমনি গান্ধীজীও মুসলমান, খ্রীষ্টান, শিখ ও পার্শীদের ছাড়বেন, বিশুদ্ধ হিন্দু নেতার পর্যবসিত হবেন, এটা কি একটা গণতান্ত্রিক দাবী না এটা একটা স্বৈরতন্ত্রী ফরমান? মুসলিম লীগ মুসলিম সম্প্রদায়ের একমাত্র প্রতিনিধি এটা মেনে নিলে কংগ্রেস-পন্থী মুসলিমদের অস্তিত্ব থাকে না, আর কংগ্রেস-পন্থী মুসলিমদের অস্তিত্ব না থাকলে ইংরেজের সঙ্গে সংগ্রামের দিন সংগ্রামী মুসলিম বলতে একজনও থাকে না,। সবাই ভালো ছেলে হয়ে ইংরেজের হাত থেকে কয়েকটা প্রদেশ পুরস্কার পাবে, এটা কি স্বাধীনতাপ্রিয় মুসলমানদের পক্ষে গৌরবের কথা? না সংগ্রাম বলতে বোঝায় ইংরেজের সঙ্গে সংগ্রাম নয়, হিন্দুর সঙ্গেই সংগ্রাম? তাই যদি হয়ে থাকে তবে সে সংগ্রাম আজকের দিনের

সংগ্রাম নয়, কালকের দিনের সংগ্রাম, আজকের প্রাণ কংগ্রেস কি ইংরেজকে যুদ্ধকালে আরো বিপন্ন করবে, না শুধুমাত্র যুদ্ধে অমত জানিয়ে দূরে সরে থাকবে? আমি তো মনে করি এই একটি পদক্ষেপই যথেষ্ট। এতে ইংরেজকে ত্রিভুত করা হচ্ছে না, শুধুমাত্র নৈতিক সমর্থন থেকে বঞ্চিত করা হচ্ছে। এটা অন্মায় নয়, কারণ কংগ্রেস তো আমার মতো একটি ব্যক্তি নয় যে হিটলারের বিরুদ্ধে যুদ্ধ করাই শ্রেয় বিবেচনা করে। কংগ্রেস একটা রাজনৈতিক দল দলকে কাজ করতে হয় অধিকাংশের মতামত অনুসারে, নইলে দল ভেঙে চৌচির হয়। আত্মরক্ষাই দলের প্রাথমিক কর্তব্য। সেদিক থেকে কংগ্রেসকে দোষ দিতে পারিনে। তবু আমি দুঃখিত যে হিটলারের বিরুদ্ধে কংগ্রেস সংগ্রাম করবে না, যতদিন না ইংরেজরা কংগ্রেসের পরামর্শ শোনে। এবার শোন। যাবে হিটলারের বিরুদ্ধে ভালো ছেলেরা কে কী বলেন। কে কে জান মাল ধন কবুল করে যুদ্ধে যোগ দেন। এখন পর্যন্ত একমাত্র সিকন্দর হায়াৎ খানকেই অগ্রণী হতে দেখা যাচ্ছে। তিনি ভালো ছেলেদের চেয়েও আরো ভালো ছেলে। তাঁকে বিসর্জন দিয়ে কি লাগপহীদের পুরস্কার দেওয়া সম্ভব?” মানস হেসে উড়িয়ে দেয়।

হামিদ মুচকি হেসে বলেন, “সিকন্দর হায়াৎ খানের রাজভক্তির সঙ্গে আর কার রাজভক্তির তুলনা! তিনি যেমন করেই হোক যুদ্ধের জন্তে জওয়ান রিক্রুট করবেনই। শিখদের বোঝাবেন তোমরা যদি যুদ্ধে না যাও মুসলমানরা যাবে, অস্ত্রশস্ত্র তাদের হাতেই পড়বে, তাই দিয়ে তারাই ইংরেজের পরে পাঞ্জাবের রাজত্ব পাবে। মুসলমানদের বোঝাবেন তোমরা যদি যুদ্ধে না যাও শিখরা যাবে, অস্ত্রশস্ত্র তাদের হাতেই পড়বে। তারাই পরে পাঞ্জাবের মসনদে বসবে। হিন্দুদের বোঝাবেন তোমরা যদি যুদ্ধে না যাও মুসলমানরা যাবে, শিখরা যাবে। অস্ত্রশস্ত্র তাদের হাতেই পড়বে। তারাই মিলেমিশে তোমাদের উপর প্রভুত্ব করবে। এই প্রোপাগান্ডা খুবই ফলপ্রসূ হয়েছে। দলে দলে রংকট নাম লেখাচ্ছে আর বন্দুক ঘাড়ে করে মার্চ করে যাচ্ছে। একদল আওয়াজ দিচ্ছে ‘আল্লা হো আকবর’। আরেক দল ‘সং ত্রী অকাল’। তৃতীয় দল ‘কালী মাজী কী জয়’। না, ‘বন্দেমাতরম্’ নয়। দেশ বা নেশন বোধটাই ওদের কারো মধ্যে নেই। তবে পাঞ্জাবের জন্তে ওরা লড়তে তৈরি। এখন বিদেশী বাদশার জন্তে, পরে একই হাতিয়ার হাতে নিয়ে যে যার নিজের সম্প্রদায়ের জন্তে। যদি ইংরেজরা সত্যি সত্যি চলে যায় ও তার আগে সাম্প্রদায়িক সমস্যার সমাধান না হয়।”

মানস চিন্তিত হয়ে বলে, “লক্ষণ শুভ নয়। সৈনিকদের মধ্যেই যদি দেশবোধ বা নেশনবোধ না থাকে তবে তাদের দায়িত্ব কংগ্রেস নেবে। কিসের ভরসায়?

আলুগতোর ? কার প্রতি আলুগতোর ? ক্ষমতার হস্তান্তর মানে তো সৈন্যদলের হস্তান্তর। সিভিল সার্ভিসের হস্তান্তর। সৈন্যদলের উপরে যদি নির্ভর না করতে পারে তো সিভিল সার্ভিসের উপরেই বা নির্ভর করবে কিসের ভরসায় ? আলুগতোর ? কার প্রতি আলুগতোর ? দেশবোধ বা নেশনবোধ যদি না থাকে। যে যার সম্প্রদায়ের জন্তেই যদি মমতা বোধ করে। সম্প্রদায়ের সঙ্গে সম্প্রদায় জুড়ে জুড়ে যে একা সে তো একটা ছোড়াতালি। আলুগতোর সঙ্গে আলুগত্য জুড়ে কি একটা মিশ্র আলুগত্য হয় ? তেমন আলুগত্য একালুগতোর মতো অটুট নয়। ক্ষমতার হস্তান্তর অসম্ভব নয়, কিন্তু আলুগতোর হস্তান্তর কেমন করে সম্ভব হবে ? সম্রাটের স্থান নেবেন কে ? দেশীয় রাজকুমারি বা কার কাছে আলুগতোর শপথ নেবেন ? সম্রাট যদি না থাকেন ? সম্রাটের শ্রুততা পূরণ করাই কঠিন, সাম্রাজ্যের শ্রুততা পূরণ করা কঠিন নয়।”

হামিদের বয়স কম। তিনি অত বোঝেন না। বলেন, “সমস্তা রীতিমতো জটিল হবে যদি সাম্রাজ্যের স্থান নেয় নৈরাজ্য।”

এর উপরে আর কথা চলে না। কে না জানে যে মুসলিম স্বাভাব্যবাদীদের সঙ্গে মিটমাট না হলে ব্রিটিশ সাম্রাজ্যবাদীদের সঙ্গেও মিটমাট হবে না ? আর মিটমাট না হলে কি ইংরেজরা অনন্তকাল সাম্রাজ্য পাহারা দেবে ? তখন একতরফা সিংহাসন ত্যাগ। বিপ্লবীরা ঠিক যে জিনিসটি চায়। যে যেখানে পারে পুলিশ স্টেশন দখল করবে, রেলস্টেশন দখল করবে, রেডিও স্টেশন দখল করবে, সরকারী আফিস দখল করবে, ট্রেজারি দখল করে নেবে। কোথায় এত সৈন্য সামন্ত, কোথায় এত আমীর ওমরাহ, কে কাকে হটিয়ে দিয়ে একছত্র হবে ? জমিদার মহাজন পুঁজিপতি শিল্পপতি যে যেখানে পারে পা দিয়ে ভোট দেবে। ইংরেজদের সঙ্গে সঙ্গে পাকড়াশী, ঘোষাল, জাফর হোসেন প্রভৃতি ইম্পীরিয়াল অফিসাররা কলকাতায় বসেতে মাদ্রাজে করাচীতে জাহাজ ধরবেন কিংবা দিল্লীতে কবাচীতে বিমান ধরবেন। দেশে থাকতে চাইলে চাকরি দিচ্ছে কে ? কোন্ অথরিটি ? মাইনে জোগাচ্ছে কে ? কোন্ ট্রেজারি ? কোন্ ব্যাঙ্ক ? তখন পদত্যাগ করলেই বা কী ? না করলেই বা কী ? তখন পদমর্যাদা বলে কিছু থাকবে না। তখন পদযোগে পলায়ন, যদি বিপ্লবীরা পালাতে দেয়।

জাফর হোসেনের বাংলায় গেলে মানস দেখতে পায় বেগম বসে আছেন মাথায় হাত দিয়ে। “বলুন দেখি, ভাই, কী করতে পারি ? সেটলমেন্ট ক্যাম্পের দিন এগিয়ে আসছে। মির্জা তৈরি হচ্ছে চারমাসের জন্যে ক্যাম্পে যেতে। তারপরে কোথায় কোন্ মহকুমায় বদলী হবে কে জানে ! কথাটা যখনি পাড়তে যাই পাশ

কাটিয়ে যায়। বলে, আমাদের দেশে বিয়ে সাদী হয় বাপ মায়ের নির্বন্ধে। আমি তো মালিক নই, আমি কী করে কথা দেব? আপনারা কি পারবেন লাহোরে গিয়ে রোকিয়াকে দেখাতে? ওঁরা এদেশে আসবেন না। আমরা কী করে এত খাটো হই বলুন তো? হাজার হোক একটা জেলার পুলিশ সাহেব। লাটসাহেব ডাকেন খান। খেতে। প্রায়ই তো কলকাতায় যান মোলাকাং করতে। সাহেব স্নেহে এলে ক্লাবে পার্টি দেন। বাড়ীতেও আমি পর্দা মানি। শুধু আপনার মতো আপন জনের সামনে নয়।”

মাহুশটি অতিশয় সরল। তার একমাত্র ভাবনা সমাজে কেমন করে উঠবেন। উচ্চ পদে অধিষ্ঠিত হওয়াই সব নয়। এমন একটি সুপাত্র হাতছাড় হতে যাচ্ছে। আবার কবে তেমন সৌভাগ্য হবে। যদি না কলকাতায় বদলী হন। তার দেরি আছে। মানস তাঁকে সাহায্য দেয়। মেয়ের বয়স এমন কিছু হয়নি। চোদ্দ কি পনেরো। লেখাপড়ায় সিনিয়র কেমব্রিজও পেরোয়নি। নিদেনপক্ষে ম্যাট্রিক।

জাফর হোসেন আফসোস করে বলেন, “আরে, ভাই, শুধু ইংরেজী নয়, মুসলমানের মেয়েকে ভালো করে উর্দু টাও শিখতে হবে। নইলে তাকে মুসলমান বলে কেউ চিনবে না। উর্দু বলতে পারিনে বলে ওরা কি আমাদের কম ঘেন্না করে? আমাদের সবাইকে ভালো করে উর্দু শিখতে হবে। আমি তো কোনো মতে কাজ চালাতে পারি। আমার বেগম যে পদে পদে হৌচট খান। মুসলিম সমাজে ওঁকে বার করি কেমন করে? ইংরেজ সমাজেও না। চেষ্টা করি ওঁর সঙ্গে উর্দুতে বাতচিং করতে। কিন্তু বুখা চেষ্টা। হাড়ে হাড়ে বাঙালী।”

“তা হলে আপনারা পাকিস্তান চাইছেন যে বড়ো!” মানস রঙ্গ করে।

“পাকিস্তান চাইছি কি সাধে?” জাফর হোসেন উষ্ণ হয়ে বলেন, “চাইছি আপনারদের চেয়ে খাটো না হতে। আপনারা চলেন ডালে ডালে তো আমরা চলি পাতায় পাতায়। আপনারা চান কংগ্রেস রাজ তো আমরা চাই মুসলিম লীগ রাজ। আপনারা চান মেজরিটি রুল তো আমরাও চাই মেজরিটি রুল। যে যার নিজের এলাকায়।” একটু ঠাণ্ডা হয়ে জুড়ে দেন, “মানছি এটা হিন্দু-শিখ মাইনরিটির পক্ষে উপাদেয় নয়। কিন্তু এর একমাত্র প্রতিকার কংগ্রেস লীগ ডায়ালিক বা বৈরাজ্য।”

“কিন্তু ভোটসংখ্যা সমান সমান হলে কাস্টিং ভোট দেবেন কে? প্রধানমন্ত্রী হবেন কে?” মানস ভেবে পায় না।

“প্রধানমন্ত্রী কি আমেরিকায় আছেন? একজন প্রেসিডেন্ট থাকলেই হলো। পাল!



করে কংগ্রেস থেকে ও লীগ থেকে একজনকে প্রেসিডেন্ট করা যাবে। তা যদি না হয় তবে বড়লটিই হবেন প্রেসিডেন্ট।” জাফর হোসেন মীমাংসা করেন।

“তার মানে ইংরেজই চিরকাল ডিভাইড অ্যাণ্ড রুল চালাবে?” মানস হাসে।

“না, না, হাসির কথা নয়। ও ছাড়া আর কোনো শান্তিপূর্ণ সমাধান সম্ভব নয়, মল্লিক। স্বৈরাজ্য না হয় তো নৈরাজ্য। তখন জোর যার মূলুক তার। আপনারা গায়ের জোরে যতটা পারেন জবর দখল করবেন। আমরাও গায়ের জোরে যতটা পারি জবর দখল করব। এর নাম তলোয়ারের দ্বারা মীমাংসা। এটা যদি পছন্দ না হয় তো ইংরেজকে মধ্যস্থ করে পার্টিশন।” জাফর হোসেন দম্বরমতো সীরিয়াস।

“তার মানে আর একটা কমিউনাল অ্যাওয়ার্ড?” মানস আশঙ্কা করে।

“মন্দ কী! প্রাদেশিক স্তরে তো সেটা মেনে নিয়েছেন।” হোসেন বলেন।

পান করতে নয়, পান খেতে ভালোবাসেন আলী হায়দার। অক্সফোর্ডফোর্টা আই সি এস। টেনিসেও তাঁর অনীহা ছিল। বাড়ীতে বসে উর্দু পত্রিকার জগ্গে প্রবন্ধ ইত্যাদি লেখেন। মানসও লেখে বাংলা পত্রিকার জগ্গে। সেইসঙ্গে দু’জনের অন্তরঙ্গতা। কোনো মানস যায় হায়দারের ওখানে, কখন হায়দার আসে মানসের এখানে।

“কংগ্রেস মন্ত্রীদের পদত্যাগ আমাদের ভাবিয়ে তুলেছে, ভাই মল্লিক।” আলী হায়দার বলেন। “এর পরে আর কে চাইবে কংগ্রেসের সঙ্গে কোয়ালিশনের গাঁটছড়া বাঁধতে? কংগ্রেস যখন খুশি তার মন্ত্রীদের সরিয়ে নেবে, সঙ্গে সঙ্গে লীগকেও তার মন্ত্রীদের সরিয়ে নিতে হবে। ইস্তফা দিতে না চাইলেও ইস্তফা দিতে হবে। এ কী জুলুম বলেন দেখি। মেজরিটি পদত্যাগ করলেই মাইনরিটিকে পদত্যাগ করতে হবে! আইনসভা বন্ধ থাকবে! মেজরিটি যদি ভুল করে মাইনরিটিও ভুল করবে!”

“ভাই হায়দার, আপনি কি বলতে চান কংগ্রেসের পলিসি ভুল?” মানস স্তব্ধ।

“যুদ্ধকালে ব্রিটেনকে নাজেহাল করা তো প্রকারান্তরে জার্মানীকে সাহায্য করা। চাপ দিয়ে ত্রাশনাল গভর্নমেন্ট আদায় করাও তো প্রকারান্তরে কেন্দ্রীয় স্তরেও মেজরিটি রুল আদায় করা। মুসলিম লীগের তথ্য মুসলিম জনমতের এতে তীব্র আপত্তি। ত্রাশনাল গভর্নমেন্ট যদি কংগ্রেস গভর্নমেন্টেরই নামাস্তর হয় তবে মুসলিম লীগ ওতে যোগ দেবে না। আর মুসলিম লীগ যোগ না দিলে মুসলিম জনমতও মেনে নেবে না। মুসলমানরা মোটের উপর মাইনরিটি হলেও কয়েকটা প্রদেশে তো মেজরিটি। সেসব প্রদেশের গভর্নমেন্ট মুসলিম জনমতের চাপে কেন্দ্রীয় সরকারকে অমান্য করবে। প্রথমে চাইবে আরো বেশী ক্ষমতা। পরে চাইবে পুরোপুরি

স্বাধীনতা। এরই একটা সহজবোধ্য নাম পাকিস্তান। পাকিস্তান একটাও হতে পারে, দুটোও হতে পারে, তিনটেও হতে পারে। যেখানেই হবে সেখানেই মুসলিম মেজরিটি কল।” হায়দার বিশদ করেন।

মানস চূপ করে শুনে যায়। ভেবে চিন্তে বলে, “কংগ্রেস তো হিন্দু মেজরিটি কল চাইছে না, চাইছে ভারতীয় মেজরিটি কল। দুটো এক জিনিস নয়। অথচ আপনার কথায় মনে হয় মুসলিম লীগ চাইছে ইহুদীদের গ্যাশনাল হোমের অনুসরণে বিপুল মুসলিম গ্যাশনাল হোমল্যাণ্ড। সেখানে গ্যাশনাল গভর্নমেন্ট দেশভিত্তিক অর্থে প্রতিষ্ঠিত হবে না, সেইজন্মে নেশন কথাটার কদর্থ করা হচ্ছে মুসলিম নেশন। পাকিস্তান সম্ভব হলে সে রাষ্ট্রে সব অমুসলমান রাতারাতি এলিয়েন হবে। আর বাকী স্থানে সব মুসলমান রাতারাতি এলিয়েন। দুই ধারেই কোটি কোটি লোক এলিয়েন। এলিয়েনদেরকে একপক্ষ সন্দেহ করবে অপরপক্ষের অনুগত বলে। তাদের নয়ালটি নিয়ে বিতর্ক বাধবে। হয় তারা পালিয়ে বাঁচবে, নয় তারা ঠায় মারা যাবে। আমরা বিংশ শতাব্দীতে দেখতে পাব জার্মানীর ক্যাথলিক ও প্রটেস্টান্টদের সপ্তদশ শতাব্দীর ত্রিশবছরের যুদ্ধের পুনরাবৃত্তি। শিখরা কি পাকিস্তান একমুহূর্তের জন্মে বরদাস্ত করবে? হিন্দুরা করতে পারে, তারা স্বভাবত সহিষ্ণু। তা বলে কলকাতা কেউ পাকিস্তানকে অমনি ছেড়ে দেবে না। অথবা দিল্লী। অথবা লাহোর। রক্তপাত অনিবার্য। কার কী পাওনা তা স্থির হবে চতুর্থ পানিপথের যুদ্ধে। ইংরেজদের দেওয়া রোয়েদাদে নয়।”

“এ তো বড়ো আফসোসের কথা!” হায়দার বলেন পান মুখে দিয়ে, “হিন্দু মুসলমান ভাই ভাই। আমরা কি ভাইয়ে ভাইয়ে মিলে আপসে বাঁটোয়ারা করতে পারিনে? পাকিস্তান কথাটার আসল মানে পার্টিশন। পার্টিশন যেনে নিলে নেশন শব্দটার কদর্থের কোনো প্রয়োজন থাকে না। জার্মানীতে যেটা দেখা গেল সেটাও তো একপ্রকার পার্টিশন। কোথাও ক্যাথলিক মেজরিটি, কোথাও প্রটেস্টান্ট মেজরিটি, যার যেখানে মেজরিটি তার সেখানে আধিপত্য। তা বলে মাইনরিটি বাঁচল না তা নয়। এখন তো ওরা কাঁধে কাঁধ মিলিয়ে লড়ছে।”

## ॥ সতেরো ॥

উকিলদের সঙ্গে মেলামেশা জঙ্গমাহেবদের রীতি নয়। পাতে পক্ষপাতিস্থের অপবাদ রটে। কিন্তু রায় বাহাদুর বাহুদেব হালদার ভো। কেবল উকিলহিসাবে অগ্রগণ্য নন, মানুষ হিসাবেও সর্বজনপ্রিয়। পিতাব বয়সী এই সজ্জনের সঙ্গে মানস কথা বলতে যায় তার পুত্রশোকে শান্তির অন্বেষণে।

“আমাকেই বা শান্তির সন্ধান দেয় কে, মল্লিক সাহেব?” রায় বাহাদুর বলেন, “আমিও যে আপনার মতোই ভুক্তভোগী। দ্বিতীয়বার যখন ওই শোক পাই তখন আমার মাথা হেঁট হয়ে যায়। ভগবানকে বলি, প্রভু আর কত মার মারবে? আমাকে মারতে চাও, মারো। কিন্তু আমার বাচ্চাদের বাঁচতে দাও। ওদের তো বারে পড়ার বয়স নয়। তাঁর হাতের মার খেতে খেতেই আমি হিউমিলিটি শিখেছি।”

এর পর তিনি বলেন তাঁর নিজের জীবনের কাহিনী। কিছু কম ট্যাজিক নয়। দীর্ঘ শ্বাস খেলে বলেন, “কিন্তু আছে, আছে এর মানে। আমরা বুঝিনে। আমরা অবোধ। এতে আমাদের ভগবানের দিকে টানে। আমরা তাঁর আরো কাছে যাই। আমার নিজের কথা যদি বলেন্, আমি বেটার ম্যান হয়েছি।”

মানস বলে, “কিন্তু ভগবান আছেন কি না তাই বা আমি নিশ্চিত জানব কেমন করে? অনবরত চেষ্টা করছি বিশ্বাস করতে। পারছিনে। ছেলেবেলায় করতুম। বড়ো হয়েও করেছি। কিন্তু পশ্চিমে গিয়ে দোটানায় পড়েছি। হামলেটের মতো টু বি অর নট টু বি, ল্যাট ইজ লু কোয়েশেন। আপনার মধ্যে একটা স্থিতির ভাব আছে। আমার মধ্যে শুধু অস্থিরতা।”

রায় বাহাদুর এর উত্তরে একটি গল্প বলেন। একটি মা সত্তা সন্তানহারী। কিন্তু সে কাঁদারও সময় পাচ্ছে না। জিজ্ঞাসা করলে বলে, আগে তো আর সকলের জন্যে

রান্নার জেগাড় করি। এদের খাইয়ে দাইয়ে ঘুম পাড়িয়ে তারপরে কাঁদতে বসব। দেখছ না আমার হাত জোড়া।

“মল্লিক সাহেব, আমিও তেমনি ভাববার সময় পাইনি ভগবান আছেন কি নেই, থাকলে এমন দুঃখ দেন কেন, না থাকলে এত লোক তাঁর কাছে দুঃখ জানায় কেন, তাঁকে পূজা কবে কেন। তিনি কি প্রত্যেকের অভীষ্টপূরণের যত্ন ? না প্রত্যেকেরই তাব অভীষ্টপূরণের যত্ন ? ভগবান কি মানুষের জ্ঞে। না মানুষ ভগবানের জ্ঞে ? আমি তাই অত কথা ভাবিনে, ভাবি শুধু একটি কথা যে, যাবা রয়েছে তাদের জ্ঞে বান্নার জেগাড় কবতে হবে। সেই যাবা শুধু আমার সংসারের ক’জন নয়, আত্মীয় অনাত্মীয় প্রতিবেশী শহবাসী জেলাবাসী সর্বাসামান্য। ‘গড’ আর ‘গুড’ দুটি আলাদা শব্দ নয়, একই শব্দ। গুড কবতে করতেই আমি গডকে মানব। প্রার্থনা উপাসনা পূজা আর্চাব জ্ঞে সময় কোথায় ? এবা কি আমাকে একদণ্ড দ্বন্দ্ব দেয় ?” বায় বাহাদুর বলেন।

“গান্ধীজী আগেকার দিনে বলতেন, গড ইজ টুথ। আজকাল বলেন, টুথ ইজ গড। তেমনি ছেলেবেলায় আমি পড়েছি, গড ইজ গুড। আত্ম আপনার মুখে যা শুনছি তাব মর্ম গুড ইজ গড। ঠিক কি না, বায় বাহাদুর ?” মানস জ্ঞায়।

“ঠিক। কিন্তু আমাকে অতাব বায় বাহাদুর বলে লজ্জা দেবেন না ? ওটা শুনলে মনে হবে আমি যেন সাহেবদের চাটুকাব। আমি তো নেই ভনে কোবাও যাইনে। নইলে আপনাব ওখানেই আমাকে দেখতে পেতেন। আমার এখানে আপনাকে আসতে হতো না। শেরফার্ড সাহেবকেও আসতে হয়।” বায় বাহাদুর মুচকি হাসেন।

এব পব থেকে তাব অভিপ্রায় অন্তসাবে তাঁকে হালদাব মশায় বলে ডাকতে হলো। আবেকদিন ভাবিনিময়েব জ্ঞে তাঁর ওখানে গেলে তিনি ওকে বিচক্ষণ বসিয়ে বাথেন। তারপব এসে মাক চেয়ে বলেন, “আদালত থেকে ফিবেছি খুব দেবিতে। কাপড ছেড়ে গঙ্গাজলে মুখ ধুয়ে এই আপনাব কাছে আসছি, মল্লিক সাহেব।”

“গঙ্গাজলে মুখ ধুতে হয় কেন ? গঙ্গা তো এখানকার নদী নয়।” মানস অবাক। হালদাব মশায় অগ্রতিভ হয়ে বলেন, “আদালত থেকে ফিবেই আমার প্রথম কাজ হয় গঙ্গাজলে মুখ প্রক্ষালন। উকিলের মুখ তো ? কত মিছে কথা মুখে আনতে হয়। পতিতোদ্ধারিণী গঙ্গে। হাসছেন যে। বিশ্বাস হয় না ?”

“কিন্তু উকিলকে এত মিছে কথা বলতে হয় কেন ? না বললে ক্ষতি কী ?

সাক্ষীদের সত্য পাঠ করতে হয়, যাঁহা বলিব তাহা সত্য হইবে, সত্য ভিন্ন অসত্য হইবে না, সম্পূর্ণ সত্য হইবে।” মানস মনে করিয়ে দেয়।

“আপনাকে তো কখনো ওকালতি করতে হয়নি। হলে জানতেন যে সত্যের সঙ্গে মিথ্যার খাদ না মেশালে মামলা টেকে না। দুই পক্ষই যে যার মামলার দুর্বল জায়গাগুলো মিথ্যা সাক্ষ্য বা মিথ্যা তর্ক দিয়ে মজবুৎ করে। এটা একটা ওপেন সীক্রেট। ভাগিস্ মাথার উপরে ধর্মাবতার বলে একজন থাকেন। তিনিই তুলাদণ্ড হাতে নিয়ে তৌল করে সত্যাসত্য নির্ধারণ করেন। তাই আমরা মনে শান্তি পাই। নইলে অশান্তিতে ছটফট করতুম। গঙ্গাজলেও পাপমোচন হতো না।” হালদার স্বীকার করেন।

“শুনে আমার বডো কষ্ট হয়, হালদার মশায়, যে সত্যাসত্য নির্ধারণের সমস্ত দায় আপনারা সঁপে দিয়েছেন বিচারকদের উপরে। বিচারকরা কী করে নিঃসন্দেহ হবেন? সন্দেহের অবকাশ যদি থাকে তবে তো আসামীকে খালাস দিতে হবে। অত্যাচারের প্রতিকার হবে কী করে? আর যদি আসামীর তেমন কোনো খুঁটির জোর না থাকে তবে তো তারই উপর অত্যাচার করা হবে। আপনারা উকিলেরা অমন মার্সিনারি কেন? অপরাধীকেও জেনে শুনে প্রশ্রয় দেন কেন?” মানস মহাবিরক্ত হয়।

“এসব প্রশ্নের জবাব আপনি গোটা বারের কাছেই তলব করতে পারতেন। আমি একাই জবাবদিহি করি কী করে? সাধ্যমতো সত্য মামলাই হাতে নিই। আরো উপার্জনের লোভ সংবরণ করি। নিশ্চয়ই জানেন যে উপার্জনের নিরিখে আমি পয়লা নম্বর নই। প্রতিদিনই অল্পভব করি যে এ ব্যবসা এ দেশের উপযোগী নয়। কিন্তু কোন্টা যে এ দেশের উপযোগী তাও বলতে পারিনে। এইটুকুই বুঝি যে আমি পরের চাকর নই, স্বাধীনভাবে উপার্জন করি। সরকার আমাকে গভর্নমেন্ট প্রীডার আর পাবলিক প্রোসিকিউটর করেছেন বলে আমি তাঁদের কেনা গোলাম নই, কিন্তু সরকারী মামলা আমি প্রত্যাখ্যান করতে পারিনে। পুলিশ না থাকলে ধন প্রাণ বিপন্ন হয়। পুলিশ কেস যদি সত্য ঘটনামূলক না হয় কী করা যায় বলুন! কালো ভেড়া তো সব দলেই আছে। পুলিশের মধ্যে থাকা বিচিত্র নয়। তা ছাড়া ওরাই বা করবে কী? কেস যদি কাঁচা হয় তবে ওটা কি সব সময় পুলিশের দোষে? এক একটা মামলা দারুণ জটিল। সমাজতত্ত্ব, মনস্তত্ত্ব সব মিলেই তো সত্য। জটিল তত্ত্বের ব্যাখ্যা করতে গেলে মামলা কেসে যেতে পারে। লোকটা খারাপ, কাজটা খারাপ, এই সরল ব্যাখ্যাই আদালতের সামনে পেশ করতে

হয়। সত্যিকার অপরাধীও ভগবানের চোখে নিরপরাধ হতে পারে। কিন্তু আইনের চোখে অপরাধী হলেই আমাদের জিং। পসারও নির্ভর করে জয়পরাজয়ের উপরে। আদালতও একপ্রকার যুদ্ধক্ষেত্র। সভ্য সমাজে বিচারশালা আছে বলেই শৃঙ্খলা আছে, শাস্তি আছে। নয়তো আইনকে যে যার হাতে নিত। একমাত্র আইন হতো জঙ্গল আইন। কিংবা আফ্রিদি বা মোহন্দের মতো ব্রাড ফিউড। রহিম খান যদি করিম খানকে মারে করিম খানের ছেলে রহিম খানকে বা তাব ছেলেকে মারবে। তার চেয়ে ভালো ইংরেজের আইন। করিম খানের ছেলে নয়, আদালতের বিচারই রহিমকে মারবে। আপনি আমি নিমিত্তমাত্র।” হালদার মশায় থামেন।

চায়ের সঙ্গে প্রচুর স্বখাদ্য পরিবেশন করা হয়। হালদার অভুক্ত ছিলেন। মানসও তাঁর সঙ্গ রাখে। কিন্তু মনটা খচখচ করে।

“তা বলে সত্যের সঙ্গে অসত্যের মিশেল দিতে আপনার বিবেকে বাধে না?” মানস প্রশ্ন করে। “মামলাটা যাতে কেঁচে না যায়।”

হালদার মশায় সাফাই দিতে গিয়ে বলেন, “সে কাজ তো রাজনীতিক্ষেত্রে তু বেলা দেখা যায়। গান্ধীজীও উকিল, জিন্না সাহেবও উকিল। বিনিতী মতে ওঁরা ব্যারিস্টার। যে যার দলের হয়ে মামলা সাজিয়ে ব্রিটিশ গভর্নমেন্টের সামনে পেশ করেন। ওটাই ওঁদের পেশা না হোক নেশা! মামলার হার জিতের উপরেই ওঁদের নেতৃত্ব নির্ভর করে। গান্ধীজীর অবস্থা আরো একটা বলপরীক্ষার ক্ষেত্র আছে। সেখানকার নিয়ম সত্যগ্রহ বা প্রত্যঙ্গ সংগ্রাম। জিন্না সাহেবের একমাত্র ক্ষেত্র ব্রিটিশ পার্লামেন্ট। সেখানেই পাশ হয় ভারত শাসন আইন। এখন কথা হলো কংগ্রেসের কেমনটা কি যোল আনা সত্য? আর মুসলিম লীগেরটা যোল আনা অসত্য? কংগ্রেসই কি নিখিল ভারতের সব সম্প্রদায়ের একমাত্র প্রতিনিধিত্বসম্পন্ন প্রতিষ্ঠান? মুসলিম লীগ কি মুসলমানদের এক বৃহৎ অংশের প্রতিনিধিত্ব করে না? আবার মুসলিম লীগ যদি বলে সে একাই সারা দেশের সব মুসলমানের প্রতিনিধিত্বসম্পন্ন প্রতিষ্ঠান সেটাও কি অত্যাুক্তি নয়? তা হলে কংগ্রেসপন্থী মুসলমানরা দাঁড়ান কোথায়! গান্ধীজীর মনে অভিমান, বড়লাট কেন তাঁর সঙ্গে জিন্না সাহেবকেও পরামর্শের জন্তে ডাকলেন, এক একজনের সঙ্গে এক একরকম কথা বললেন! গান্ধী কথা বলবেন বড়লাটের সঙ্গে সর্বভারতের পক্ষে। আর জিন্না কথা বলবেন গান্ধীর সঙ্গে মুসলমানদের একটি বৃহৎ অংশের পক্ষে। বড়লাটের সঙ্গে জিন্না সরাসরি কথা বলতে পারবেন না। তিনি উণ্টো দূরে গাইলে ভারতের পক্ষে এককণ্ঠস্বর না হয়ে দুই কণ্ঠস্বর হবে। সেটা গান্ধীজীর মতে জাতীয় স্বাধীনতাবিরুদ্ধ। ওদিকে

জিন্না-সাহেব বলতে শুরু করেছেন যে জাতীয় বলতে বোঝায় হিন্দু জাতীয় তথা মুসলিম জাতীয়। দুই জাতির জন্তে দুই বাসভূমি। দুই স্বতন্ত্র স্বাধীনতা। হায়! সত্য আর অসত্যের কী রকম মিশোল! এটা ক্রমে ক্রমে জন আদালতেও পেশ হবে। তার লক্ষণ দেখা যাচ্ছে। তারও পাণ্টা দিতে যাচ্ছেন সাভারকর। ইংরেজদের মতো মুসলমানরাও বিদেশী তথা বিজেতা তথা বিধর্মী। অতএব এলিয়েন। একথা শুনে কোন্ মুসলমানের না রক্ত গরম হয়ে ওঠে! তা দেখে হিন্দুর রক্তও যদি রাগে টগবগ করে তবে সে যা হবে তা ভাবতে গেলেও শিউরে উঠতে হয়, মল্লিক সাহেব।”

মানস বলে, “হ্যাঁ, মনে পড়ছে সাভারকারও আরেক ব্যারিস্টার।”

“কিন্তু একটা দিনও প্র্যাকটিস করেননি। তাই তাঁর কাছে ভারতের দশকোটি মুস মান এলিয়েন। বেশীর ভাগই তো ধর্মাস্ত্রিত হিন্দুবংশীয়। এদের সবাইকে এলিয়েন করতে গেলে প্রতিদিন পেতে হবে সমসংখ্যক হিন্দুকেও।” হালদার মশায় ইশিয়ারি দেন।

“সাভারকরের মামলাটা ভাঙা মিথ্যা। যেমন হিটলারের আর্য়ত্বের মামলা। ইহুদীদের অন্য গতি নেই, কিন্তু মুসলমানদের তো আছে। যেখানে তারা মেজরিটি সেখানে তারা পাকিস্তান কার্যে করলে হিন্দুরাই হবে এলিয়েন। তখন তাদের রক্ষা করবে কে? সাভারকার?” মানস সে মামলা সরাসরি ডিসমিস করে।

“আপনি তো দু’দিন পরে বদলী হয়ে যাবেন, আমরাই মারা পড়ব, মল্লিক সাহেব। আর নয়তো ঘরবাড়ী ছেড়ে হিন্দুস্থানে আশ্রয় নেব।” হালদার কুণ্ঠিত।

“না, না, ওসব কিছু হবে না। আপনি নিশ্চিন্ত থাকুন। ইংরেজরা যদি যায় তো তার আগে নিরাপত্তার পাকা বন্দোবস্ত করে যাবে। যেমন মুসলমানের তেমনি হিন্দুর। আর গান্ধীজীও সচেতন। জিন্না সাহেবও ধর্মাস্ত্র নন।” মানস অভয় দেয়।

“দেখুন, মল্লিক সাহেব, শাহ্ জাহানের বেঁচে থাকা আর না থাকা এ দুয়ের মধ্যে নিশ্চয়ই একটা তফাৎ ছিল। তা না হলে তিনি বেঁচে থাকতেই তাঁর পুত্রদের মধ্যে উত্তরাধিকার নিয়ে যুদ্ধ বেধে গেল কেন? দারা নিঃসন্দেহ জ্যেষ্ঠপুত্র। কিন্তু তৈমুরবংশের প্রথা অনুসারে নির্বিবাদে পিতৃসিংহাসনের একমাত্র উত্তরাধিকারী ছিলেন না। ওয়ার অভ সাকসেলন অনিবার্য ছিল। পিতার মৃত্যুপর্যন্ত কারো স্বর সইল না। যে আগে দিল্লী দখল করতে পারবে তারই জ্বর দখল হবে ধারাবাহিক স্বত্ব। তাই দিল্লী অভিযুখে সশস্ত্র অভিযান। দারা হেরে যান, বন্দী হন, তখন শত্রীদের ইচ্ছায় শাস্ত্রীরা তাঁকে প্রাণদণ্ড দেন। সে দণ্ড স্বয়ং বাদশা শাহ্ জাহানও মকুব করতে অপারগ।

এই তো ভারতের ঐতিহ্য। এদেশে এ ছাড়া আর কী আপনি আশা করেন? ভাইয়ে গাইয়ে আপসে ভাগাভাগি করে নিলেই চলত। সেকালে এটা দারাজ শিকোর মাথায়া গ্রাসেনি। তাই মাথাটা কাটা গেল। একালে যদি কেউ আপসে ভাগাভাগির প্রস্তাব তোলেন তাঁকে কেমন করে বোঝাবেন যে সেটা আইনবিরুদ্ধ বা নীতিবিরুদ্ধ বা প্রথাবিরুদ্ধ বা স্বার্থবিরুদ্ধ? ইংরেজদের দেওয়া ভারতশাসন আইন আমাদের নতাদের পছন্দ হয়নি। তাঁরা নিজেরাই কনস্টিটিউয়েন্ট অ্যাসেম্বলি বসিয়ে স্বদেশের সংবিধান প্রণয়ন করতে চান। তার মানে ভারতের স্থায়ী সংবিধান এখনো প্রণীত ও গৃহীত হয়নি। এমন অবস্থায় বাংলাদেশ বা সিন্ধুপ্রদেশ বা পঞ্চনদ যদি সেলফ-ডিটারমিনেশনের দাবী তোলে সেটা কি অণ্যায় দাবী? হ্যাঁ, অণ্যায় হতো, যদি আগে থেকে একটা ঘরোয়া চুক্তি থাকত। ভাইয়ে ভাইয়ে চুক্তি। যেমন কংগ্রেস-নাগ চুক্তি। বা গান্ধী-জিন্মা চুক্তি।” হালদার মশায় চিন্তাধিত।

মানস চিন্তা করে। বলে, “এসব পয়েন্ট ভেবে দেখবার মতো। বাংলাদেশ যদি বেরিয়ে যেতে চায় কে তাকে বাধা দেবে? দিলে গৃহযুদ্ধ ডেকে আনা হবে। কিন্তু ওরা তো বাংলাদেশের সেলফ-ডিটারমিনেশনের কথা মুখে আনছে না। তুলছে মুসলিম সম্প্রদায়ের তথা মুসলিম দেশের স্বতন্ত্র রাষ্ট্রের দাবী। বাংলাদেশ যদি দিল্লীর থেকে বিচ্ছিন্ন হতে চায় হিন্দুদের অনেকেও বিচ্ছিন্নতার পক্ষে ভোট দেবে। তারা কংগ্রেস হাই কমান্ডের উপর আস্থা হারিয়েছে। প্রম্মটা সেক্ষেত্রে হিন্দু মুসলিম প্রশ্ন নয়। বাঙালী অবাঙালী প্রশ্ন। ফজলুল হক সাহেবকে হিন্দুবাও বিশ্বাস করে। তিনিও হিন্দুদের বিশ্বাস করেন। যে যাই বলুক বর্তমান মন্ত্রীসভা হিন্দুর স্বার্থবিরোধী নয়। কতক পরিমাণে জমিদারস্বার্থবিরোধী, বহু পরিমাণে মহাজনস্বার্থবিরোধী। কিন্তু জমিদার কি মুসলমানদের মধ্যে নেই? আর মহাজন বলতে কাবুলী মহাজনও বোঝায়। এই তুচ্ছ কারণে হিন্দুরা এই মন্ত্রীমণ্ডলের আসন টলাতে যাবে না। তবে এঁরা যদি হিন্দু অফিসার শ্রেণীর উপর ক্রমাগত অবিচার করে যান তা হলে অবশ্য তাঁদের আস্থা হারাবেন। তাঁদের অনাস্থা ধীরে ধীরে তাঁদের সম্প্রদায়ের মধ্যেও চারিয়ে যাবে। আমি পড়ে যাব উভয় সঙ্কটে। মুসলমানদের আমি ভালোবাসি। তারাও আমাকে ভালোবাসে। আমার মতে এটাও একটা তুচ্ছ কারণ। কিন্তু আমার সহকর্মী হিন্দু অফিসারদের কাছে জীবনমরণ প্রশ্ন। আমি পদত্যাগের জন্তেই প্রস্তুত হচ্ছি।” মানস হালদারকে বিশ্বাসভাগী করে।

“সে কী কথা! আপনি পদত্যাগ করতে যাবেন কেন?

এস্কেপিষ্ট? এস্কেপ করে কোথায় পালাবেন আপনি? ...। নিষিদ্ধ মাংস



সেখানেই দেখবেন হিন্দুও আছে মুসলমানও আছে, স্ততরাং মতান্তর আছে, মতান্তর থেকে মনান্তরও আছে, মনান্তর থেকে বাগড়াবাটিও আছে, বাগড়াবাটি থেকে দাঙ্গাহাঙ্গামাও আছে। শাহজাহান বেঁচে থাকতেই এই। মারা গেলে তো দেশের অবস্থা চরমে উঠবে। পলায়ন এ সঙ্কটের সমাধান নয়। তা ছাড়া সঙ্কট থেকে হতভাগ্যদের ত্রাণ করবে কে, আপনি যদি পালান বা আমি যদি পালাই। না, মল্লিক সাহেব, আমরা পালাব না। অভয় দেব।” হালদারের কণ্ঠে দৃঢ়তা।

পদত্যাগের জের টেনে মানস জিজ্ঞাসা করে কংগ্রেস মন্ত্রীদের পদত্যাগ সম্বন্ধে হালদার মশায়ের মত কী। তিনি একটুও ইতস্তত না করে উত্তর দেন, “কাজটা চটকদার হতে পারে, কিন্তু অহুচিত হয়েছে, মল্লিক সাহেব। লাটসাহেব কি মন্ত্রীদের শাসনকর্মে হস্তক্ষেপ করেছিলেন? ব্রিটিশ গভর্নমেন্ট কি কংগ্রেসকে প্রোভোকেশন দিয়েছিলেন? আরে, বাবা, ডিফেন্স এখনো হস্তান্তরিত হয়নি, ওটা ব্রিটিশ গভর্নমেন্টেরই দায়িত্ব। ফরেন অ্যাফেয়ার্স? না, সেটাও হস্তান্তরিত হয়নি, সেটাও তাঁদেরই দায়িত্ব। গায়ে পড়ে ইস্তফা দেওয়ার তো কোনো সম্ভব কারণই দেখিনি। আরো এক বছর অপেক্ষা করলে হয়তো একটা সত্যিকার উপলক্ষ জুটত। যেমন যুদ্ধের জন্তে নতুন কোনো ট্যাক্স বসত। কিংবা জোর করে রংকট ধরে নেওয়া হতো। ব্যাপারটা আসলে তা নয় কিন্তু। আর মাস কয়েক বাদে আবার কংগ্রেস প্রেসিডেন্ট পদের জন্তে দলীয় নির্বাচন। সে সময় স্বভাব না হোক গুঁর বামপন্থী গোষ্ঠীর একজন দাঁড়াত ও হাই কমান্ডের নমিনীকে হারিয়ে দিত। এবার আর গান্ধাজীর কাছে যাওয়া নয়, সরাসরি আপনার লোক দিয়ে ওয়ার্লিং কমিটি গঠন। হাই কমান্ড চলে সাজা। ফলে প্রত্যেকটি প্রদেশে মন্ত্রীমণ্ডলের রদবদল। তখন তো গদী যেতই, গেলে বেড়াল কুকুরও কাঁদত না। তাই এখন থেকেই মানে মানে বিদায়। যেন মগ্ন বড়ো একটা ত্যাগ। একেই বলে, উড়ো খই গোবিন্দায় নমঃ।”

মানসও তাঁর সঙ্গে সঙ্গে হেসে ওঠে। তা বলে সে একমত নয়। বলে, “এটা কিন্তু কংগ্রেসনেতাদের প্রতি কটাক্ষপাত। যাকে দেখতে নারি তার চলন বাঁকা।”

“মল্লিক সাহেব,” হালদার মাফ চেয়ে বলেন, “আপনি রাজনীতিক্ষেত্রে একটা খোকা। শেফার্ড সাহেবও যে আপনার চেয়ে বেশী বোবোন তা নয়। দেখি তিনি মহা উত্তেজিত। কংগ্রেস মন্ত্রীরা জেলে যাবেন বলে আগভাগে জেল কোড সংস্কার করে রেখেছেন। এমন ধড়িঝাজ যে দল তাকে বিশ্বাস কী? আমি তখন কংগ্রেসের পক্ষেই ওকালতি করি। অথচ আপনি বলছেন কটাক্ষপাত। তা নয়। আমি

সম্পূর্ণ নির্দলীয়। স্বভাষও আমার কেউ নয়। তবে ওই বুড়ো ছেলেটাকে ফাঁকি দিল। শেফার্ডকে বলি, সাহেব, তুমি যা ভেবেছ তা ঠিক নয়। ওরা মাস কয়েক বাদে ফিরে আসবেই। যখন দেখবে কংগ্রেস প্রেসিডেন্ট পদে ওদেরই নমিনী জিতেছেন। স্বভাষদের আরো একটি বছর অপেক্ষা করতে হবে। ততদিন কি ওরা ধৈর্য ধরতে পারবে? ছেলেমানুষের দল। হৈ হৈ করে জেলে চলে যাবে। তখন মন্ত্রীদের পুনঃপ্রবেশ। ইতিমধ্যে একটা মুখরক্ষাকারী সূত্র খুঁজে বার করা চাই। যাতে মানে মানে প্রত্যাবর্তন সুগম হয়। নইলে লোকে দুয়ো দেবে। কেন্দ্রে একটা রদবদল কি সম্ভব নয়? শেফার্ড সাহেব তো রেগে ট। বলেন, আগে তো ওরা মুসলিম লীগের সঙ্গে সমঝোতা করুক। নইলে মুসলমানরা আমাদের সিপাহী সংগ্রহে বাণ্ডা দেবে। লড়াইটা চালাবে তবে কারা? ওইসব পেটমোটা হিন্দু বানিয়া? যাদের মুখপাত্র ছাট ম্যান গ্যাণ্ডা। আমি বলি, ছাট ম্যান ইজ আমহান্না। তা শুনে সাহেব আরো ক্ষেপে যান। বলেন, টেল ছাট টু হিটলার। আমি তো বোকা বনে যাই। অথচ এই শেফার্ডই আমাকে মাস খানেক আগে বলেছেন, খ্যাক্স গড ফর মহাট্‌মা গ্যাণ্ডা। তখন গান্ধীজী সহানুভূতি জানিয়েছিলেন কিনা। সাহেবকে বালি, ইংরেজদের মতো কুটনীতিবিশারদ আর কোন্ জাত! ভেবে চিন্তে বার করুন আপনারা একটা কমপ্রমাইজ ফরমুলা। তা হলে দেখবেন কংগ্রেস নেতাদের বদলে যাবে মতটা। সাহেব গোসা হয়ে বলেন, গ্যাণ্ডা যা বলবেন কংগ্রেস নেতারা তাই করবেন। তাই কমপ্রমাইজ অসম্ভব।”

মানস আর কথা বাড়ায় না। করমর্দন করে বিদায় নেয়। তিনি তাকে এগিয়ে দিয়ে বলেন, “দেখবেন গরিবের কথা বাসী হলেই ফলে।”

রোজগারের দিক থেকে পয়সা নম্বর উকিল মোহিনীমোহন ধর ইদানীং তার ওকালতির পেশা ছেড়ে রাজনীতির নেশায় বুঁদ হয়ে রয়েছেন। সেটা কিন্তু কংগ্রেসী রাজনীতি নয়, যা নিয়ে তাঁর যাত্রা শুরু। তিনি কৃষক প্রজা দলের অত্যন্ত প্রতিষ্ঠাতা ও শীর্ষস্থানীয় নেতা। কংগ্রেসে যেমন বহু মুসলমান রয়েছেন কৃষক প্রজা দলেও বহু হিন্দু। দলটি ধর্মনিরপেক্ষ। যে যার ধর্মে বিশ্বাস করতে পারে, যে যার সমাজে বিয়ে সাদী করতে পারে, কিন্তু রাজনীতি অর্থনীতির বেলা কেউ হিন্দু নয়, কেউ মুসলমান নয়, সবাই কৃষক প্রজা বা তাদের দরদাঁ। বড়ো বড়ো মামলায় তিনি এখনো আদালতে হাজির হন, মোটা ফাঁ নেন। কিন্তু তার বেশীর ভাগই চলে যায় দলের তহবিলে। তা দিয়ে তিনি একরাশ কর্মী পুষছেন। বেশীর ভাগই মুসলমান। আদালতের বাইরে তিনি সারাক্ষণ মুসলিম পরিবেষ্টিত হয়ে থাকেন। নিবিদ্ধ মাংস

ছাড়া আর সবই একসঙ্গে বসে খান। ফলে হিন্দু মহলে বিশেষ অপ্রিয়। হিন্দু উকিলরা বলেন তিনি প্রচ্ছন্ন মুসলমান। অথচ দুর্গাপূজায় কালীপূজায় সরস্বতী পূজায় হিন্দুরাই তার কাছ থেকে চৌথ আদায় করে সব চেয়ে বেশী। তিনিও হাসিমুখে তাদের খাই যেটান। একশো দু'শো টাকা তাঁর কাছে নশ্টি। কাউকে একশোর কমে দেন না। কাঙ্গেই হিন্দু ভোট নির্বাচনের দিন তাঁর পাতেও পড়ে।

তাঁর এক ভাই মুস্তাফীর সঙ্গে গতবার যুদ্ধে যান। সেই সুবাদে মুস্তাফীরও তিনি দাদা। একদিন মুস্তাফীর ওখানে নিমন্ত্রণে মানসের পাশে মোহিনীবাবুর আসন। নিমন্ত্রণের উপলক্ষ মিলির নিরাপদে ইংলণ্ডের মাটিতে পদার্পণ। ডোভার থেকেই সে লম্বা এক কেবল পাঠিয়েছে। বলেছে সব ভালো যার শেষ ভালো। ধন্যবাদ জানিয়েছে মানসকে, যুথিকাকে, শেফার্ডকে, জাফর হোসেনকে ও আরো কয়েকজনকে। তাই এঁদের সবাইকে নিমন্ত্রণ করেছেন মুস্তাফী। শেফার্ড ও জাফর হোসেন এখন টুরে। তাঁদের খালি জায়গায় বসিয়ে দেওয়া হয়েছে মোহিনীবাবুকে ও হালদার মশাইকে। বারের দুই নেতাকে। বিভিন্ন মামলায় এঁরা দু'জনেই পরস্পরের বিপরীতে দাঁড়ান। হালদারের ফী পরিমিত, ধরের অপরিমিত। তা বলে হালদারের হাত কম দরাজ নয়। কিন্তু তিনি রাজনীতির পেছনে টাকা ঢালেন না। তিনি ভোটপ্রার্থী নন, মন্ত্রিত্বপ্রার্থীও নন। মানস শুনেছিল যে হক সাহেব নাকি মোহিনীবাবুকেও মন্ত্রী করতে চেয়েছিলেন, গভর্নর তাতে রাজী হননি। কৃষক প্রজাদের বরাদ্দ আসন শুধুমাত্র মুসলমানদেরই বরাতে জোটে।

এই নিয়ে কথা উঠতেই মোহিনীবাবু বলেন, “দশচক্রে ভগবান ভূত। হক সাহেবও আমাদের মোলানা ইসলামাবাদীর মতে আর একটি র‍্যাঙ্কে মাকডোনাল্ড। নিজের দল ছেড়ে এখন পরের দলে মোড়লী করছেন। বোঝেন না যে প্রথম স্তরযোগেই নাজিমউদ্দীন আর স্তরহরাদী সাহেবরা গুঁকে মোড়ল পদ থেকে হটাবেন। জিন্নার সঙ্গে এতকাল তাঁর রেবারেচি চলছিল। এখন শুনছি মিটমাট হয়েছে। উপরের দিকের রাজনীতিতে জিন্না যা বলবেন তাই হবে। তলার দিকের রাজনীতিতে হক যা বলবেন তাই হবে। হক সাহেবও জপ করছেন পাকিস্তান। তবে একটা নয়, একজোড়া পাকিস্তান। কিন্তু কৃষক প্রজা দল এতে কিছুতেই রাজী হতে পারে না, মিষ্টার মল্লিক। এই ইস্যুতে দল ভেঙে দু'টুকরো হয়ে যেতে পারে। আমরা কেন জিন্নার নির্দেশ মান্য করব? আমরা কেন পাকিস্তানে যাব?”

মানস হুঃখিত হয়ে বলে, “আপনাকে তা হলে রাজনীতিক্ষেত্রে অনাথ হতে হবে।”

“তার জন্তে আমি পরোয়া করিনে, মিস্টার মল্লিক। আমার পপুলারিটি তাতে একফোঁটাও কমবে না। পীপল আমার সঙ্গে। আমিও পীপলের সঙ্গে। মাসে যদি এক হপ্তা আদালতে যাই তো তাতেই আমার একমাসের খরচ উঠে আসে। তার বেশী এ বয়সে আর আমি চাইনে। ছেলেরা বড়ো হয়েছে, তারাও ভালোই করছে। আমার ছায়া সরিয়ে নিলে তারা আরো ভালো করবে। বুড়ো বয়সে লোকে কান্না বৃন্দাবন যায়। মনে করুন আমিও একহিসাবে তীর্থবাসী। আমার তীর্থ কিন্তু মানবতীর্থ। এদেশের কৃষক প্রজার দুর্দশার সীমা নেই। এদের জন্তে যদি কিছু না করে যাই তো স্বর্গে আমাব স্থান হবে না, মিস্টার মল্লিক। স্বর্গ যদি থাকে।”

মুস্তাফী কথা কেড়ে নিয়ে বলেন, “কৃষক প্রজার দুর্দশার কথাটা তো শেফার্ড স্বীকারই করতে চান না। দাদা! শেফার্ডের মতে ওদেশের কৃষক প্রজাদের তুলনায় এদেশের কৃষক প্রজারা ভাগ্যবান। ওদেশে নাকি ছেলেমেয়ের বিয়ে দিতে চাইলেও জমিদারের অনুমতি নিতে হয়। বিংশ শতাব্দীতেও ফিউডাল ব্যবস্থা খাস বিলেতেই এখনো কায়ম রয়েছে। সাহেব আমাদের বলেন, হোয়াই নট সেও মোহিনী টু মাই কাক্সি ? কৃষক প্রজা আন্দোলন এদেশের চেয়ে ওদেশেই আরো দরকার।”

“তার মানে,” মোহিনীবাবু হেসে বলেন, “শেফার্ড আমাদের শীপ বানাতে চায়। আমি শীপ নই। আমি সাহেবদের কথায় ওঠ বস করিনে। তোমার ওই নাজিম-উদ্দীনের মতো। কী কৌশলেই না ওরা ও বেচারাকে রাজনীতিতে টেনে এনেছে। প্রথমে করে দেয় গভর্নরের একজিকিউটিভ কাউন্সিলের মেম্বর। সে পদ যখন উঠে যায় তখন ওকে বানাতে চায় নতুন মন্ত্রীমণ্ডলের প্রাইম মিনিস্টার। সার জন অ্যাগারসন আর তাঁর প্রাইভেট সেক্রেটারি গিয়ে বিদায়ী এম. এল. এ-দের জনে জনে সাধেন, আপনারা ফিরে এলে নাজিমউদ্দীনকেই প্রাইম মিনিস্টার করবেন। তা ও বেটারদের ফিরে আসতে দিচ্ছে কে? এদিকে যে হক সাহেবকে শীর্ষে রেখে কৃষক প্রজা দল গড়ে তুলেছি আমরা পুরনো কংগ্রেস ও খেলাফৎ কর্মীরা। আমরা যারা হাড়ে হাড়ে উপলব্ধি করেছি যে কংগ্রেস আর কোথাও না হোক বাংলাদেশে রায়তের নয়, জমিদারের পক্ষে। খেলাফৎ তো একটা লস্ট কজ। খলিফা কোথায় যে খেলাফৎ থাকবে? খলিফার জায়গায় মুসলিম লীগ এখন জিন্মাকেই বানাতে চায় আরেক রকম খলিফা। বাংলার মুসলমান কেন তাঁকে খলিফার মতো মানবে? দিল ওরা হক সাহেবের দলকেই জিতিয়ে। নাজিম সাহেব গেলেন দুই জায়গায় হেরে। কিন্তু এমনি আমাদের অদৃষ্ট যে আমাদের দল একক মেজরিটি পায় না। কোয়ালিশনের জন্তে কংগ্রেসকে ডাকে। কংগ্রেস সাড়া দেয় না। ওদের পলিসি

নাকি আর কোনো দলের সঙ্গে কোয়ালিশন না করা। ওদের ইচ্ছাটা নাকি এই যে হক সাহেবকেও সদলবলে কংগ্রেসে যোগ দিতে হবে। তার পরে সবাই মিলে স্থির করবে কাকে প্রধানমন্ত্রী করবে। হক সাহেবকে না শরৎ বোসকে। সেটা হক সাহেব কেন যেনে নেনেন? এমন অবস্থায় মুসলিম লীগেব সঙ্গেই হাত মেলাতে হয়। ওদের দলকেই ছেড়ে দিতে হয় হোম মিনিষ্টার প্রভৃতি কয়েকটি হোমরা চোমরা গদী। স্বয়ং হকসাহেবকেই নিতে হয় একটা দ্বিতীয় শ্রেণীর মন্ত্রীর যা পাওনা। ক্রমে ক্রমে মালুম হয় মুসলিম লীগই সিনিয়র পার্টনার। কৃষক প্রজা দল জুনিয়র পার্টনার। নাজিম সাহেবই আরো শক্তমান। হক সাহেবের মুখে এখন শোনা যাচ্ছে গ্যাসনালিস্ট যে সে মুসলিম নয়, গ্যাসনালিজম আর ইসলাম পরস্পরবিরোধী। আর একটি র‍্যামজে ম্যাকডোনাল্ড।”

মানস শুনে চুঃখিত হয় যে কৃষক প্রজাদের ধর্মনিরপেক্ষ নেতৃত্ব ক্রমে ক্রমে ধর্ম-ভিত্তিক নেতৃত্বের খপ্পরে পড়ে চরিত্রভ্রষ্ট হচ্ছে। কিন্তু এর জগ্গে কংগ্রেসের অদূরদর্শিতাও কম দায়ী নয়। বাংলাদেশে কোয়ালিশন ছাড়া আর কী সম্ভব হতে পারে? কস্মিন্ কালেও কি কংগ্রেস একক সংখ্যাগরিষ্ঠতা লাভ করতে পারবে? বাধ্য হয়ে একদিন তাকে অপর একটি দলের সঙ্গে কোয়ালিশন কবতে হবে। সেই হলটি যদি টুকরো টুকরো হয়ে যায় আর তার প্রধান নেতা যদি ধর্মভিত্তিক দলের হলপতি হয়ে মুসলিম লীগকেই দলে ভারী করেন তা হলে আর কোয়ালিশনেরই প্রয়োজন হবে না। কংগ্রেস কোণঠাসা হবে।

হালদার মশায় এতক্ষণ মৌন ছিলেন। এবার তিনি মুখর হন। “পার্লামেন্টারি ডেমোক্রাসীর বৈশিষ্ট্য হলো এই যে ক্রিকেটখেলার মতো একটা দল যখন ব্যাট ধরে তখন আরকটা দল বোল করে। একটা দল যখন গভর্নমেন্ট চালায় আরেকটা দল তখন অপোজিশন চালায়। নির্বাচনে হার জিৎ নির্ধারিত হলে অপোজিশন হয়তো মেজরিটি পেয়ে গভর্নমেন্ট গঠন করে, শাসকদল অপোজিশনের ভূমিকা নেয়। নয়তো শাসকদলই আবার শাসন চালায়, অপোজিশন বিরোধিতা করে যায়। কিন্তু বরাবরই তার মনে এই আশা থাকে যে তার উপরেও একদিন শাসনভার বর্তাবে। এই আশাটুকু যদি নিবে যায় তবে সে পার্লামেন্টারি ডেমোক্রাসীর উপরেই আস্থা হারায়। তখন সে বামপন্থী হয়ে থাকলে বিপ্লবের স্বপ্ন দেখে আর দক্ষিণপন্থী হয়ে থাকলে দেশভাগের। বামপন্থীরা এদেশে সংখ্যালঘু। নির্বাচনে যাদের জয়লাভ স্বদূরপর্যাহত। তারা তো বিপ্লবের স্বপ্ন দেখবেই। তেমনি মুসলিম লীগের দক্ষিণপন্থী রাজনীতিকরা জানেন যে নির্বাচনে তাঁরা কয়েকটি প্রদেশে মেজরিটি পেতে পারেন, কিন্তু সারা

ভারতে কখনো নয়। তাঁদের একমাত্র আশা কংগ্রেসের সঙ্গে একটা চিরস্থায়ী চুক্তি, যেমন ১৯১৬ সালের লখনউ প্যাক্ট। কিন্তু চুক্তি হয় সমানে সমানে। কেন্দ্রীয় আইনসভায় কংগ্রেসের ভোট মুসলিম লীগ ভোটের প্রায় তিন গুণ। ভবিষ্যতে সব ক'টা মুসলিম আসন লীগের দখলে এলেও কংগ্রেসের একক মেজরিটি অটল অনড়। সুতরাং কংগ্রেসই হবে কোয়ালিশনের মীনায়র পার্টনার। যদি তেমন কোনো চুক্তি সম্ভব হয়। অথচ জিন্না সাহেবের স্বপ্ন ইকুয়াল পার্টনারশিপ। এ স্বপ্ন তিনি এখনো ছাড়েননি। তবে ক্রমশই উপলব্ধি করছেন যে হিন্দু জনমত কিছুতেই তাঁর সম্প্রদায়কে কেন্দ্রীয় স্তরে প্যারিটি দেবে না কিংবা শতকরা চল্লিশ অবধি ওয়েটেজ দেবে না, দিলে অগ্নাশ্র সম্প্রদায়কেও অল্পরূপ ওয়েটেজ দিয়ে হিন্দু মেজরিটিকে মাইনরিটিতে পরিণত হতে হয়। এই উপলব্ধি তাঁকে নিজের স্বপ্ন ছেড়ে ইকবালের স্বপ্ন দেখতে প্ররোচিত করছে। তার মানে পাকিস্তানের স্বপ্ন। মুসলিমপ্রধান প্রদেশগুলিকে নিয়ে সংগঠিত হবে মুসলিমপ্রধান রাষ্ট্র। এক বা একাধিক। সেখানেও কংগ্রেস লীগ দুই দলই থাকবে, কিন্তু উন্টে যাবে তাদের ভূমিকা। লীগ হবে মীনায়র পার্টনার, কংগ্রেস হবে জুনায়র পার্টনার। যদি তারা চুক্তিবদ্ধ হয়। নয়তো লীগই তার একক মেজরিটির জোরে গভর্নমেন্ট চালাবে, কংগ্রেস হবে তার অপোজিশন। দুই স্বতন্ত্র ও স্বাধীন রাষ্ট্রের মধ্যেও পরে একটা চিরস্থায়ী আন্তর্জাতিক চুক্তি হতে পারে। যদি তারা হয় সমান সমান। সেকথা মনে রেখে জিন্নাসাহেব মুসলিমপ্রধান পাঁচটি প্রদেশের উপর ওয়েটেজ হিসাবে আসামকেও জুড়ে দিতে চান। ইকবালের স্বপ্নের চেয়ে জিন্না সাহেবের স্বপ্ন মুসলিম সম্প্রদায়ের পক্ষে আরো মনোমুগ্ধকর। এখন কথা হচ্ছে হিন্দু বেড়ালের গলায় ঘণ্টা বাঁধবে কে? ইংরেজ সরকার? না কনস্টিটুয়েন্ট অ্যাসেম্বলি? আমি তো ভেবে পাইনে। তোমার কী মনে হয়, মোহিনী?”

মোহিনীবাবু চোখ বুজে ধ্যান করছিলেন। চোখ মেলে বলেন, “বাহুদেব, তুমি ধরে নিয়েছ যে পার্লামেন্টারি ডেমোক্রাসী ব্রিটেনের মতো ভারতেরও চিরস্থায়ী বন্দোবস্ত? কমিউনিস্টরা তা বিশ্বাস করে না। প্রথম সূযোগেই ওরা ধনতন্ত্র তথা গণতন্ত্র লোপ করবে। লীগপন্থী মুসলমানরা বিশ্বাস করেন, কিন্তু যেখানে তাঁদের সম্প্রদায়ের মেজরিটি সেখানেই করেন, অগ্নাশ্র নয়। এই বিশ্বাস তাঁদের প্রেরণা দিচ্ছে পার্টিশনের। একান্নবর্তী পরিবারের ছোট ভাইয়ের মতো। কিংবা এজমালী জমিদারির ছোট শরিকের মতো। আমি তো এতে নীতিগতভাবে অগ্নায় কিছু দেখিনে। অগ্নায় যেটা সেটা হচ্ছে তৃতীয় পক্ষের সঙ্গে ষড়যন্ত্র করে দ্বিতীয় এক কমিউনাল এ্যাওয়ার্ড হিসাবে গাওয়া।”

## ॥ আঠারো ॥

যুদ্ধ এতদিন স্থূদূর ছিল। হঠাৎ একদিন দেখা গেল এই শহরের দৃক দিয়েই সৈন্য চলাচল শুরু হয়ে গেছে। আস্ত একটা রেজিমেন্ট এখানে এসে বিশ্রাম করছে, কিছুদিন পরে দক্ষিণমুখে যাত্রা করবে। চট্টগ্রাম থেকে জলপথে বা স্থলপথে বর্মা মালয় সিঙ্গাপুর অভিমুখে। রেজিমেন্টাল মেস থেকে নিমন্ত্রণ এল। সান্ধ্য পার্টিতে মিস্টার ও মিসেস মল্লিক যদি যোগ দেন কমাণ্ডান্ট তাঁদের আনন্দের সঙ্গে অভ্যর্থনা করবেন।

যুথিকা সাফ শুনিয়ে দেয়, “তুমি চাকরি করছ। তুমি যেতে বাধ্য। আমি তো চাকরি করিনে। আমার কী বাধাবাধকতা!”

মানস চূপ করে থাকে। যুদ্ধযাত্রী মিলিটারি অফিসারদের সঙ্গে তাঁদের সহধর্মিণীরা নেই। সিভিল অফিসারদের পত্নীরা যদি বিব্রত বোধ করেন তবে তাঁদের বাড়ীতে রেখে যাওয়াই তো সুবুদ্ধি। অথচ সেটাও অস্বস্তিকর। এসব ক্ষেত্রে ক্যাপটেন লাহার মতো একজন অভিজ্ঞ ব্যক্তির পরামর্শ নিতে হয়।

“কেন, তোমার মিসেস কি লার্টসাহেবের পার্টিতে যোগ দেননি? তা হলে কমাণ্ডান্টের বেলা আপত্তি কিসের? ওরা বাঘও নয়, ভালুকও নয়, খাসা ভদ্রলোক। মিলিটারিকে লোকে যমের মতো ভয় করে। যম ওরা ঠিক, কিন্তু যুদ্ধকালে ওদের শত্রুপক্ষের।” ক্যাপটেন লাহা অভয় দেন।

“না, দাদা, ওর আপত্তিটা ভয় থেকে নয়। কথা হচ্ছে, অত বড়ো একটা শোকের পর তুচ্ছ সামাজিকতায় ওর অক্লিষ্ট ধরে গেছে। দেবে তো রকমারি মদ। ওসব আমাদের চলে না।” মানস যুথিকার হয়ে কৈফিয়ৎ দেয়।

“আরে, ওটা কি একটা কথা হলো! মদ খেতে না চাও খেয়ো না। সফ্ট

ড্রিক্স তোমাদের জন্তে মজুত থাকবে। কিন্তু মিসেস মল্লিক যদি না যান কথা উঠবে। কে না জানে তিনি এখানকার ফার্স্ট লেডী? মিসেস শেফার্ড বা মিসেস বাল্‌গো না থাকলে মিসেস মল্লিকই তো এই স্টেশনের অগ্রগণ্য মহিলা। তিনি যোগ না দিলে আর কে তাঁর স্থান নেবেন? মিসেস হায়দার, মিসেস জাফর হোসেন এঁরা তো পর্দানশীন। মিসেস বকসী? হা হা হা! আমি তো ভেবে পাইনে মিসেস মল্লিক থাকতে মিসেস বকসী কী করে ফার্স্ট লেডীর শাট প্লে করবেন? এটা কি টেনিস?” ক্যাপটেন লাহা হাসি চাপতে পারেন না। টেনিসের বেলা ঐ মহিলা হাফ প্যান্ট পরে দৌড় বাঁপ করেন।

“তা হলে আপনিই বুঝিয়ে বলুন আপনার বোনকে।” মানস সে ভার নেবে না।

ক্যাপটেন লাহার কথা শুনে যুথিকা বলে, “আমাকে মাপ করবেন, দাদা। আমি ক্লাবেই যাইনে, ক্লাবের পার্টিতেই যোগ দিইনে, লক্ষ করেছেন নিশ্চয়। নেহাৎ অভদ্রতা হবে বলে পারিবারিক নিয়ন্ত্রণ এড়াতে পারিনে, কিন্তু এটা হলো পরিবারের বাইরের নিয়ন্ত্রণ। এ ধরনের জীবনে আমার বৈরাগ্য এসেছে। আগে যদি আসত তা হলে হয়তো অমন শোচনীয় ঘটনা ঘটত দা। বিপথে চলেছি বলেই বিপদে পড়েছি। কারো জন্তে কিছু আটকায় না। কামাণ্ডাণ্টের পার্টি এসব ছোট খাটো মকদ্দম স্টেশনে জমতে পারে না, এটা গুঁরাও জানেন। না জমলে মিসেস শেফার্ডকে বা মিসেস বাল্‌গোকে দোষ দিন। কেন গুঁরাও বিলেতে গিয়ে বসে আছেন?” যুথিকা অনুযোগ করে।

“মিসেস শেফার্ড এমনতরো ছোটোখাট স্টেশনে আরাম পান না বলেই বিলেতে সময় কাটাচ্ছেন। আর শেফার্ড ও তো মাসে বিশ দিন টুর করে বেড়ান, বাকী দশ দিন সুশীকৃত ফাইল সাফ করেন। স্ত্রীকে সঙ্গ দেবেন কখন? আর বাল্‌গোর তো ডিভোর্স ঘটে গেছে। কার দোষে তা বলতে পারব না। মিসেস বাল্‌গো এখন অন্তের স্ত্রী। তা ছাড়া বিলেতে থেকে ছেলের পড়াশুনা দেখাও তো মায়ের কর্তব্য।” ক্যাপটেন তাঁদের মুখরক্ষা করেন।

“মায়ের কর্তব্য যদি বলেন তো আমারও সেই একই জবাবদিহি। আমার কোলের বাছাকে কার কাছে রেখে আমি পার্টিতে যাব? আগ্নাদের আমি বিশ্বাস করিনে, তাই আগ্না রাখিনে। বুড়ো বেয়ারাটি খুব বিশ্বাসী। ওই ওদের ভুলিয়ে রাখে বলেই আমি মাসে একদিন কি দু’দিন বেরোতে পারি। তাও দিনের বেলা। ব্যতিক্রম একবার ‘কি দু’বার ঘটেছে। যেমন মরুমালতী ‘মুন্সাকীর বিয়ে।’ যুথিকা স্মরণ করে।



ক্যাপটেন লাহা এর পরে মিলির আনকোরা খবর জানতে আগ্রহ দেখান। আছে কেমন মেয়েটা আচমকা বিয়ে করে ও তড়িঘড়ি বিলেত গিয়ে? বিশেষত অমন যে চণ্ডিকা চামুণ্ডী।

যুথিকা সলজ্জভাবে বলে, “কোন মেয়ে না চায় বিয়ে থা করে স্থখী হতে? স্থখী করতে? আপনি তো মেয়েদের সবাইকে ঝাঁকি দিলেন, দাদা। নইলে দেখতেন মিলির মতো কোনো এক চণ্ডিকা কি চামুণ্ডী আপনাকেও স্থখী করে স্থখী হতো। আপনার বোধহয় এদেশের মেয়েদের কাউকেই মনে ধরে না। মনটা বোধহয় পড়ে রয়েছে সাত সমুদ্র তেরো নদীর পারে কোনো এক রাজকন্টার কাছে।”

লাহা কবুল করেন যে ওটা ওঁর প্রথম বয়সের স্বপ্ন। যে বয়সে বিলেত যাবার কথা সে বয়সে মোসোপোর্টেমিয়ায় গিয়েই না সব গোলমাল হয়ে যায়। এখন কমাণ্ডান্টকে ধরে যদি ফ্রণ্টে যেতে পারেন তা হলে আপাতত দক্ষিণপূর্ব এশিয়ায় গেলেও পরে ফ্রান্সে বেলজিয়ামে জার্মানীতেও বদলী হতে পারেন। যুদ্ধের পরে তিনি অবসর নিয়ে বিলেতেই ঘর বাঁধবেন। তখন ঘরগীরও প্রয়োজন হবে। এদেশ থেকে কেই বা ওদেশে যেতে চাইবে? অগত্যা তিনি ওদেশেই স্থপ্নের সার্থকতা অন্বেষণ করবেন।

মিলির খবর যুথিকা ইতিমধ্যে আরো কিছু পেয়েছে। বেডফোর্ড কলেজ থেকে নিতে রাজী হয়নি। একজনের বদলে আরেকজনকে নেওয়া ওদের রীতি নয়। জুলি পড়াশুনা করেছিল বলে তার কেসটা ওরা সদয়ভাবে বিবেচনা করেছিল। মিলি তো এই প্রথম ওদেশে যাচ্ছে। এদেশের ডিগ্রীও নেই। বিপ্লব করতে গিয়ে কলেজের সঙ্গে বিচ্ছেদ ঘটেছে। পরে প্রাইভেট পরীক্ষা দিতে পারত, অস্থখের দরুন সেটাও হয়ে ওঠেনি। বেডফোর্ড ওসব অজুহাত শুনবে না। তাই বেচারিকে নিরাশ হতে হয়েছে। তা বলে সে বসে থাকেনি। বইয়ের দোকানের কাছে ভিড়ে গেছে। আর কিছু না হোক রোজগার তো হচ্ছে। ভদ্রঘরের মেয়েরা কেউ রোজগার করতে কুণ্ঠা বোধ করে না। তা সে যত কমই হোক না কেন।

ক্যাপটেন লাহা হায় হায় করেন। “ওই অগ্নিকন্টার কিনা এঠ পরিণতি! বইয়ের দোকানের সেলসগার্ল! তার চেয়ে ও মেয়ে শহীদ হলো না কেন! লোকে ধন্য ধন্য করত। ওর বরের তো শুনেছিলুম লর্ড আর লেডীরা মুঠোর মধ্যে। তাঁদের একজন স্থপারিশ করলে কলেজে জায়গা হতো না?”

“স্থকুমারদা নাকি চেয়েছিলেন সার জন অ্যাণ্ডারসনের শরণ নিতে। কিন্তু মিলি নাকি আশুন হয়ে বলে, খবরদার! কালিদাস বলে গেছেন ‘নাথমে লঙ্কামা’। উত্তমের

কাছে অহরোধ করে ব্যর্থতাও বরং ভালো, তবু অধর্মের কাছে হাতযোড় করে সিদ্ধিলাভ ভালো নয়। মিলি এখনো অগ্নিকণা, তবে চাইটাকা আগুন।” যুথিকা গুকে শ্রদ্ধা করে।

যেখানে ছিল ফাঁকা খেলার মাঠ সেখানে রাতারাতি গজিয়ে ওঠে সামরিক শিবির। হাজার দুয়েক সৈনিকের ছাউনি। একদিন সন্ধ্যাবেলা ক্যাপটেন লাহা তাঁর গাড়ীতে করে মানসকে নিয়ে যান অফিসারদের মেসে। রীতিরক্ষার জন্তে নামের কার্ড যথাস্থানে লগ্ন হয়। কমাণ্ডান্ট এসে সাদরে করমর্দন ও কুশলপ্রশ্ন করেন। তার পর কোথায় নিরুদ্দেশ হয়ে যান। অতিথিদের সংখ্যা তো কম নয়। সারা শহরের গণ্যমান্যরা ভেঙে পড়েছেন মিলিটারির সঙ্গে মেলামেশা করতে। করমর্দন ও কুশলপ্রশ্ন। ওইপর্বন্ত বাক্যালাপ। বাকীটা পানভোজন।

ক্যাপটেন লাহা কমাণ্ডান্টের সঙ্গে লেপটে থাকেন। তিনিই তাঁর মিডিল অ্যাডভাইজার। আমন্ত্রিতদের কার কী পরিচয় তিনিই শোনান। মানস চেষ্টা করে চেনা মানুষ খুঁজে পেতে বার করতে। মহিলাদের মধ্যে চোখে পড়ে মিসেস বক্সীকে। শাড়ী পরা প্রজাপতির মতো সাজে শোভা পাচ্ছেন। জিজ্ঞাসা করেন যুথিকাদি কোথায়। মানস মুশকিলে পড়ে। সত্য বলতে সাহসে কুলয় না, মিথ্যা বলতে বিবেকে বাধে, শুধু বলে, “তিনি মাফ চেয়েছেন।”

বক্সী তাঁর স্ত্রীর দিকে চেয়ে ফিক করে হাসেন। “পত্নীর পুণ্যে সতীর পুণ্য। নহিলে খরচ বাড়ে। সাজগোজের খরচ।”

বক্সীরীও উধাও হয়ে যান। এমন সময় একটি ইংরেজ ছোকরা এসে মানসকে খুব খাতির করে চারদিক ঘুরিয়ে দেখায়। লেফটন্যান্ট উইলকিনসন তার নাম। বচব আঠারো কি উনিশ তার বয়স। এই সেদিন দেশ ছেড়ে সৈন্যদলে চাকরি করতে বেরিয়েছে। যুদ্ধের অভিজ্ঞতা নেই। একদল ডোগরা জওয়ানকে নিয়ে ফ্রন্টে চলেছে। জানে না কী আছে কপালে। মরণ না বন্দীদশা।

“হোমের জন্তে মন কেমন করে না?” স্নেহে প্রশ্ন করে মানস।

“ওয়েল, সার, হোমে যদি সবাই থাকতে চায় তো এম্পায়ার রক্ষা করবে কে? এটা কিন্তু আপনাদেরই দায়িত্ব। আপনারাও এগিয়ে আসুন। আমাদের এখানে ক্যাম্প করার উদ্দেশ্যই হলো আপনাদের মনোদেশরক্ষার আগ্রহ সঞ্চার করা। আর আপনাদের শুভকামনা লাভ করা। সৈনিকদের মনোবলের জন্তে এটারও প্রয়োজন।” ছেলেটি সরল মনে বলে যায়।

মানস বলতে পারত যে এর জন্তে চাই রাজনৈতিক মীমাংসা। কিন্তু বিষয়টা এত

জটিল যে বিলেত থেকে সত্ত্ব আগত একটি অল্পবয়সী সাব-অলটান'কে বোঝানো যাবে না। বলে, “আমার আন্তরিক শুভকামনা সৈনিকদের সকলের প্রতি। পারলে আমিও লড়তে যেতুম। ইংলণ্ডকে রক্ষা করতে হবে। ভারতকেও।”

“অজ্ঞপ্ত ধনুবাদ, সার।” ছেলোটের চোখে মুখে কৃতজ্ঞতা।

সাধারণ ইংরেজ সাধারণ ভারতীয়ের শত্রু নয়। সাধারণ ভারতীয়ও সাধারণ ইংরেজের শত্রু নয়। পরস্পরকে রক্ষা করাই পরস্পরের কর্তব্য। অথচ রাজনৈতিক কারণে জনমত ক্রমেই ব্রিটিশবিরোধী ও যুদ্ধে উদাসীন হচ্ছে। এখানে ওখানে শিবির করে জনসমর্থন অর্জন করা অত সহজ নয়। কিন্তু যারা মৃত্যুপথযাত্রী তাদের মনোবল বজায় রাখাও জরুরি।

শিবিরে অনেক রকম অস্ত্র শস্ত ছিল। সেসব পরিদর্শন করা সম্ভাব্যে মঙ্গল নয়। তার জন্তে দিনের বেলা আবার আসতে হয়। কিন্তু সময় কখন? আদালতে ব্যস্ত থাকতে হবে। লেফটেন্যান্ট উইলকিনসন মানসকে গছিয়ে দেয় মেজর হুইনারটনের হাতে। প্রায় দ্বিগুণবয়সী বহুদর্শী অফিসার। যথেষ্ট সৌজন্য দেখান। মিলিটারি ঔদ্ধত্যের লেশমাত্র লক্ষণ নেই। হয়তো আসন্ন অগ্নিপরীক্ষার চিন্তায় বিনম্র।

মেজর বলেন, “সেদিন কি আর আছে যখন আমিই আমার সেনাবাহিনী সংগ্রহ করে উৎসাহভরে যুদ্ধে ঝাঁপিয়ে পড়তুম? সেটা হতো একটা অ্যাডভেঞ্চার। সামান্য তার প্রস্তুতি। আজকাল প্রত্যেকটি জগুয়ানের প্রত্যেকটি অভাব অভিযোগ শুনতে হয়। রোজ পাঠাতে হয় ডাক্তারের কাছে। কারো চোখ খারাপ। কারো দাঁত খারাপ। কারো কান খারাপ। কারো পেটে ব্যথা। কারো পায়ে ব্যথা। কারো হাড়ে ব্যথা। এদের নিয়ে অন্তহীন ঝামেলা। এরা প্রাণ দিতে এসেছে, কিন্তু তার আগে যে যত পারে আদায় করে নিতে চায়। এদের প্রেরণা দেবার মতো ধর্মীয় উদ্ভাদনা কোথায়? কিন্তু তারই অনুরূপ জাতীয় উদ্ভাদনা? রাজার হুকুমে এরা লড়তে যাচ্ছে। রাজার নিমক খায়। নিমকহারামী করতে পারে না। আমরা এদের আত্মগতের উপর নির্ভর করতে পারি। কিন্তু আধুনিক যুদ্ধবিগ্রহ কি মাসিনারিদের দিয়ে জেতা যায়?”

বিষয় প্রশ্ন। এতদিন মাসিনারিদের দিয়ে যুদ্ধ জেতা গেছে, সাম্রাজ্যের সঙ্কটে মাসিনারিরাই সঙ্কটট্যাণ করেছে। কিন্তু অতীতের অভিজ্ঞতা কি বর্তমান সঙ্কটে ফলপ্রসূ হবে? নাৎসীরা মাসিনারি নয়, ফাসিস্টরা মাসিনারি নয়, জাপানীরা মাসিনারি নয়। কারো প্রেরণার উৎস দেশপ্রেম। কারো প্রেরণার উৎস সামাজিক মতবাদ।

কিন্তু এই ভোগরা জওয়ানদের প্রেরণার উৎস কী? রাজ্যের প্রতি আত্মগত? নিমকের প্রতি আত্মগত? এদের মনোবল কি অগ্নিপরীক্ষার দিন অটুট থাকবে?

বলা বাহুল্য অফিসাররা সবাই মানসকে ডিক্স অফার করেন। সে সফট ডিক্স চেয়ে নেয়। আর ক্যাপটেন ওদিকে দামো, সুরা খেতে খেতে আবা মাতাল। তাঁকে কোনো মতে টেনে নিয়ে মানস গাড়ীতে তোলে।

তিনি তো প্রায় শাকাপাকি করে এনেছেন যে সিঙ্গাপুরে গিয়ে এই রেজিমেন্টে যোগ দেবেন। এই কমাণ্ডেটের অধীনেই কাজ করবেন। কিন্তু মানস তাঁকে ধাবড়িয়ে দেয়। বলে, “ক্যাপটেন ল, আপনি কি ঠিক জানেন যে এরা দুর্ধর্ষ জাপানীদের রুখতে না পেরে আত্মসমর্পণ করবে না? তারপর যুদ্ধবন্দী হয়ে বছরের পর বছর কাটাতে না?”

“কেন? কেন তোমার ওকথা মনে এল?” লাহা স্বধান।

“জাপানীদের প্রেরণার উৎস তাদের দেশের স্বাধীনতা, যার জন্যে সর্বস্ব ত্যাগ করা যায়। আর ভারতীয়দের প্রেরণার উৎস তাদের রাজ্যহীনতা, যার জন্যে ত্যাগস্বীকারের সীমা আছে। দেখবেন, আপনাকে যেন জাপানে ধরে নিয়ে না যায়।” মানস ভয় দেখায়।

“হঁ! আমাকে ধরে নিয়ে যাবে। এত বড়ো কথা!” গর্জে ওঠেন লাহা। “আমাদের জওয়ানরা যখন ‘দুর্গা মাইকী জয়’ বলে যুদ্ধে ঝাঁপিয়ে পড়বে তখন জাপানী সেনার ‘বানজাই’ আওয়াজ শ্রুতে মিলিয়ে যাবে, ওরাও ঝাঁপ দিয়ে পড়বে, কিন্তু সমুদ্রের জলে। তারপর সাঁতার কেটে নিশ্বাস নেবে।” লাহা হা হা করে হেসে ওঠেন।

মানস আর কথা বাড়ায় না। লাহা গজ গজ করতে থাকেন। “তুমি একজন কবি, তাই ওসব তোমার কবিকল্পনা। আরে, কোথায় জাপান, আর কোথায় সিঙ্গাপুর! জাপানীরা আসবে কী করে সেখানে? জাহাজে করে? কেন, ইংরেজদেও কি ডেডনট নেই? ডেস্ট্রটয়ার নেই? টর্পেডো নেই? সিঙ্গাপুর বেস হলো ব্রিটিশ নেভীর দুর্ভেজ ঝাঁটি। জাপানীরা সেখানে ল্যাণ্ড করতে পারবে না। তা হলে সেখানে ফোজ মোতায়েন করা কেন? এরা যাচ্ছে কী করতে? এটা হলো মিনিটারি সীক্রেট। আমি যতদূর আঁচ করতে পারি এদের কাজ হবে আচমকা আক্রমণ প্রতিরোধ করা। আক্রমণ তো আকাশপথেও হতে পারে। যেটা ইংলণ্ডের লোক আশঙ্কা করছে সেটা মালয়ের লোকও আশঙ্কা করতে পারে। যদি জাপানের সঙ্গে যুদ্ধ বাধে।” ক্যাপটেন যুক্তি দেখান।

মানস সেটা মেনে নিয়ে বলে, “তা হলেও আপনার ওদেশে না যাওয়াই শ্রেয়। সব চেয়ে খারাপটা যদি ঘটে তবে আপনার কপালে আছে বন্দী দশা। আপনার

অন্তিম লক্ষ্য তো ইংলণ্ড। সেখানে যাবার পথ সিঙ্গাপুর দিয়ে নয়। আপনি বরং শিখদের সঙ্গে ফ্রান্সে বা বেলজিয়ামে যাবার উদ্দেশ্যে করুন। বন্দী হলেও মুক্তির পর ইংলণ্ডে হাজির হবেন।”

লাহা মানসকে বাড়ী পৌছে দেন। যুথিকা তাঁকে ঠেস দিয়ে স্বধায়, “ফার্স্ট লেডীর ভূমিকায় অবতীর্ণ হলেন কে?”

“গায়ে মানে না আপনি মোড়ল যে।” লাহা কারো নাম করেন না।

মানস বলে, “মহিলাদের সংখ্যা তো একটি কি দুটি। ফরাসী জমিদারপত্নী মাদাম দুপোঁ তাঁদের একজন। মিসেস বক্সীকেও লক্ষ্য করা গেল।”

এখন পরিষ্কার হয় আপনি মোড়ল কে। যুথিকার মুখে হাসি ফোটে।

এর পরে সে এক মোক্ষম প্রশ্ন করে। “তার পর মিলিটারি অফিসারদের মধ্যে ইণ্ডিয়ান অফিসার কেউ ছিলেন? না সবাই ইউরোপীয়?”

লাহা মানসের দিকে তাকান। মানস লাহার দিকে। দু’জনেই অপ্রস্তুত। সেই যে ভারতীয়করণের প্রতিশ্রুতি দেওয়া হয়েছিল তার কতদূর প্রগতি হলো?

“বুঝেছি, আর বলতে হবে না।” যুথিকা ঝাঁঝালো স্বরে বলে, “এত বড়ো দুর্দিনেও শাদা কালোর ভেদ যেমনকে তেমন। যুদ্ধে যাবার জন্মে নাচছেন যারা তাঁদের কি কিছুতেই শিক্ষা হবে না? ইংরেজ যাচ্ছে তার সাম্রাজ্য রক্ষা করতে। আপনারা যাবেন আপনাদের দাসত্ব রক্ষা করতে। থিক্!”

এর পরে ক্যাপটেন লাহা আর এমুথো হন না। ক্লাবে মানসের সঙ্গে মুখোমুখি হলে শিষ্টাচার বিনিময়ের পর সরে পড়েন। বেশ কিছুদিন অল্পপস্থিত থাকার পর স্টেশনে ফিরে তল্লিতল্লা গোটান। মানসদের ওখানে পাটিং কল দিতে এসে বিগলিত কণ্ঠে বলেন, “এখন আমি মেজর ল। মিলিটারি সার্জন হয়ে কলম্বো হয়ে সিঙ্গাপুরবাড়ী।”

ইতিমধ্যে সৌম্য ফিরেছিল সেগাঁও থেকে। সেখানে হুগো তিনেক ও কলকাতায় হুগো খানেক কাটিয়ে সে দেশের বর্তমান পরিস্থিতি সম্বন্ধে গুয়াকিবহাল হয়েছে। শান্তিনিকেতনে কবিগুরুর সঙ্গে ভাববিনিময় করেছে।

“কবিগুরুর অভিমত কী?” জিজ্ঞাসা করে মানস, সৌম্যকে বাড়ীতে পেয়ে।

“জার্মানীতে তিনি শান্তিপ্রচার করে এসেছিলেন। ভেবেছিলেন ওরা শান্তির পথেই ওদের মহত্বের পরিচয় দেবে। এখন তাঁর সম্পূর্ণ মোহভঙ্গ ঘটেছে। এবার যিনি সর্বাধিনায়ক হয়েছেন তিনি সর্ব মানবের শত্রু। শুধু ব্রিটেনের বা ফ্রান্সের নয়। তাঁর বিরুদ্ধে সবাইকে অস্ত্র ধরতে হবে। ভারতকেও। ইয়া, ব্রিটিশশাসিত ভারতকেও।

ইংরেজদের সঙ্গে বোঝাপড়া একসময় হবে। এইমুহুর্তে নয়।” সৌম্য যা শুনেছে তার মর্ম শোনায়।

“কবি তা হলে সশস্ত্র সংগ্রামের পক্ষে? আর সে সংগ্রাম জার্মানীর বিরুদ্ধে?” মানস খুঁটিয়ে জানতে চায়।

“হ্যাঁ, তাই তো মনে হলো।” সৌম্য স্বরণ কবে বলে, “নাৎসীদের বিরুদ্ধে সংগ্রাম যেন কৌরবদের বিরুদ্ধে সংগ্রাম। ওদের সঙ্গে লড়াতে হবে অর্জুনের মতো। বিষাদমুক্ত হয়ে। বিদ্বেষমুক্ত হয়ে। অর্জুন তো নিমিত্তমাত্র।”

মানস এটা অনুমান করেছিল। অবাক হয় না। রবীন্দ্রনাথ তাঁর দেশবাসীকে দানবের সঙ্গে সংগ্রামের জন্যে প্রস্তুত হতে বলে আসছিলেন কিছুদিন থেকে। আর সে দানব দেশের শত্রু ইংরেজ নয়, মানবের শত্রু হিটলার।

“তার পর গান্ধীজীর কী অভিমত?” মানস মিলিয়ে দেখতে চায়।

“গান্ধীজী এখন পড়ে গেছেন মহা দোটানায়। তাঁর অনুগামীদের একদল অবিকল কবিগুরুর মতো নাৎসীবিরোধী, কৌরববিরোধী। তারা প্রথম স্বেচ্ছায়ই সশস্ত্র সংগ্রামে নামবে ইংরেজদের সঙ্গে কাঁধে কাঁধ দিয়ে। অহিংসার ধার ধারবে না। কিন্তু পরে যদি ভারতের স্বাধীনতার জন্যে ইংরেজদের সঙ্গে লড়াতে হয় তখন কোন্ মুখে জনগণকে ডাক দেবে নিরস্ত্র সংগ্রামে অহিংসভাবে লড়াতে? জনগণ বিভ্রান্ত হবে। সহিংস সংগ্রামে পরাস্ত হবে। গান্ধীজীর সারাজীবনের বাণী তখন বার্থ হবে। তিনি তাঁর সেইসব অনুগামীদের স্বাধীনতা দিয়েছেন, তাঁরা তাঁদের সুবিধামতো অহিংসা ত্যাগ করতে পারেন, কিন্তু তাঁকে তাঁর স্বধর্মে স্থির থাকতে হবে, তিনিও চান তাঁর বিশ্বাসের স্বাধীনতা। ইতিহাস একদিন তাঁকেও একটা স্বেচ্ছা দেবে। না দেয় তো স্বধর্মে নিধনঃ শ্রেয়ঃ পরধর্মো ভয়াবহঃ। তিনিও গীতার ভাষায় কথা বন্ধন। কিন্তু কৌরবনিধনে অর্জুনের মতো নিমিত্তমাত্র হতে বলেন না। কৌরবকে জয় করতে হবে অহিংসা দিয়ে। সেইখানেই গৌরব।” সৌম্য অগ্ন অর্থ করে।

“এ তো গেল একদল অনুগামীর কথা। আরেক দল অনুগামী তাঁকে কোন্ দিকে টানতে চায়?” মানস জিজ্ঞাসা করে।

“গুঁরা ঠিক অনুগামী নন, অহিংস উপায় সশস্ত্রে বরাবরই সন্দিহান। তবু একসঙ্গে সংগ্রাম করেছেন, এখনো করতে ইচ্ছুক। কিন্তু সে সংগ্রাম সাম্রাজ্যবাদের বিরুদ্ধে সংগ্রাম, নাৎসীদের বিরুদ্ধে নয়। আর সে সংগ্রাম সর্বপ্রকার উপায়ে, কেবলমাত্র অহিংস উপায়ে নয়। গান্ধীজী এঁদের দেশপ্রেমের প্রশংসা করেন। কিন্তু এঁদের নেতা হতে নারাজ। তিনি এঁদেরও স্বাধীনতা দিয়েছেন, এঁরা যে যার উপায়ে

নড়াই করতে পারেন, কিন্তু তাঁকে জড়াতে পারবেন না, তাঁর নির্দিষ্ট উপায়কেও না। অমন করলে জনগণ অহিংসার গুণাগুণ বিচার করতে শিখবে না। বিভ্রান্ত হবে। আর তাঁকেও হিংসার দায় বহন করতে হবে। প্রতিপক্ষ বিশ্বাস করবেন না যে তিনি হিংসার নির্দেশ দেননি। এটা তাঁর মিশনের পক্ষে ক্ষতিকর। ভারতের স্বাধীনতার পক্ষেও যে হিতকর তাও নয়। তাঁকেও তাঁর কর্মপদ্ধতির স্বাধীনতা দিতে হবে। দেশের লোক বিচার করবে কার কর্মপদ্ধতি শ্রেয়স্কর।” সৌম্য গান্ধীজীর বক্তব্য যিশদ করে।

“তা হলে এই দোটানার থেকে পরিজ্ঞাণ কিসে?” মানস অস্থির হয়।

“পরিজ্ঞাণ গঠনের কাজে। আমাদের বলা হয়েছে গ্রামে গ্রামে ছড়িয়ে পড়তে। গ্রামেব মানুষকে ভাত কাপড়ে স্বাবলম্বী হতে উদ্বুদ্ধ করতে। এক একটি গ্রাম হবে এক একটি রেপাবলিক। সর্বতোভাবে আত্মনির্ভর। সাত কোটি গ্রাম যদি আত্মনির্ভর হয় তবে তাদের সজ্জশক্তিই তাদের রক্ষা করতে সমর্থ হবে। শস্রশক্তির প্রয়োজন হবে না। তাদের সেই সজ্জশক্তির দ্বারা যে আত্মরক্ষা সেটাই তো বৃহত্তর ক্ষেত্রে দেশরক্ষা। গান্ধীজী যতদূর দেখতে পাচ্ছেন অহিংস উপায়ে স্বাধীনতার পর দেশরক্ষার জন্তে সশস্ত্র বাহিনীর প্রয়োজন থাকবে না, যদি থাকে তবে সেটা হবে আকারে প্রকারে পরিমিত। আকস্মিক আক্রমণ রোধ করার জন্তে সে বাহিনী সীমাস্ত্রে মোতায়েন থাকবে। এই পর্যন্ত আপস করতে গান্ধীজী সম্মত। এর বেশী নয়। কিন্তু সেগাঁওতে গিয়ে দেখি গান্ধীজীকে ঘিরে রয়েছে একটি মিলিটারিস্ট লবি। তাদের মতে ভারতরাষ্ট্রকে দেশরক্ষার খাতিরে সশস্ত্র বাহিনী সব সময় তৈরি রাখতেই হবে আর সে বাহিনী আকারে প্রকারে চীন জাপানের সমতুল্য হবে। তেমন একটি বাহিনী গড়ে তুলতে হবে ব্রিটেনের সঙ্গে হাত মিলিয়ে। এখন থেকে গড়ে তোলাই সুবুদ্ধি। আগেকার দিন হলে ওরা বাধা দিত, এখন বুঝতে পেরেছে যে ভারতরক্ষা ওদের একার সাধ্য নয়, ভারতীয়দেরও সহযোগিতা চাই। তাই লক্ষ লক্ষ জওয়ান নেওয়া হবে, হাজার হাজার অফিসার। তাদের ইউরোপীয় রীতিকে ক্যাপটেন, মেজর, কর্নেল ইত্যাদি পদ দেওয়া হবে। যথাকালে প্রধান সেনাপতি পদে উন্নীত করা হবে। গান্ধীজীকে ঘিরে আরো একটি লবিও দেখা গেল। ক্যাপিটালিস্ট লবি। যুদ্ধকালে শিল্পায়নের অবাধ বিস্তৃতি হতে যাচ্ছে। সৈন্যদলের জন্তে সর্বপ্রকার উপকরণ এদেশেই নির্মিত হবে, বাইরে থেকে আমদানী বন্ধ থাকবে। বড়ো বড়ো কারখানা গড়ে উঠবে। শ্রমিকদেরও স্বরাহা হবে। শুধু তাঁত চরকার দৌলতে তো একটা দেশ সমৃদ্ধ হতে পারে না। জাপানের দিকে তাকান। এই

দুই লবি এখন মেনকা রস্তার মতো তপস্বীর তপোভঞ্জে সচেতন।” সোম্য পরিহাস করে।

মানসের মনে পড়ে একটি বিলিতি পত্রিকার মন্তব্য। গান্ধীজীর পলিসিকে ওরা বলে গত মহাযুদ্ধে লেনিনের পলিসির মতো ‘রেভোলিউশনারি ডিফটিজম’। তিনি সাম্রাজ্যকে জয়ী হতে সাহায্য করবেন না, সে যদি পরাজিত হয় তবে তার সেই পরাজয়টাকে বিপ্লবের পাদপীঠ করবেন। অথচ অকালে আঘাত হানবেন না। অপেক্ষা করবেন।

“পত্রিকার ওই মন্তব্য যথার্থ হলে গান্ধীজীই সত্যিকার বিপ্লবী, জবাহরলাল তা নয়। যুদ্ধে সাহায্য করলে আর যাই হোক বিপ্লব হবে না। জবাহরলাল যা বিনা বিপ্লবে লাভ করবেন তা শাস্তিপূর্ণভাবে ক্ষমতার হস্তান্তর। ঠিক ওই জিনিসটা আবার স্বভাষচন্দ্রের চোখে বীরস্বর্জিত বুর্জোয়া কৌশল। জবাহরলাল লড়তে চান হিটলারের বিপক্ষে, তাই ইংরেজ তাঁর মিত্র। স্বভাষচন্দ্র লড়তে চান ইংরেজের বিপক্ষে, তাই হিটলার তাঁর শত্রু নয়। শত্রুর শত্রু। শত্রুর শত্রুকে মিত্র বলেই গণ্য করতে হয়।” মানস বোঝাতে চেষ্টা করে।

“বুঝেছি। কিন্তু কংগ্রেসের ঐতিহ্য সে রকম নয়। গত মহাযুদ্ধে কংগ্রেস একমত হয়ে ব্রিটেনের পক্ষে নিয়েছিল, এবার একমত না হলেও বিপরীত মতাবলম্বী নয়। অধিকাংশ কংগ্রেস সদস্য ব্রিটেনের পক্ষে, যদি কেন্দ্রীয় সরকারে বড়োরকম রদবদল হয়। তা না হলে তাঁরা নিরপেক্ষ থাকবেন, ব্রিটেনের পক্ষে বা বিপক্ষে দাঁড়াবেন না। এটাই হচ্ছে সাধারণ জনমত। এই যুদ্ধে ভারতের জনসাধারণ ইংরেজ বা জার্মান কারো সঙ্গে শত্রুতাও করতে চায় না, কারো সঙ্গে মিত্রতাও করতে চায় না। তাদের মত না নিয়ে তাদের যুদ্ধে জড়িয়ে দেওয়া হয়েছে, তাই তারা দুনিয়াকে জানাতে চায় যে তারা মত দেয়নি। পদত্যাগের দ্বারা কংগ্রেস মন্ত্রীরা ঠিক এইটুকুই বিশ্বজনকে জানিয়েছেন। এর বেশী না। এর থেকে কেউ যেন টেনে না নেন যে ‘ভারতের জনমত ব্রিটেনের বিপক্ষে বা জার্মানীর পক্ষে। এটাও তো একটা ভুল ধারণা যে গান্ধীজী মনে করেন ব্রিটেন এ যুদ্ধে হেরে যাবে ও তখন তিনি বিপ্লব ঘটাবে ক্ষমতা কেড়ে নেবেন। না, তিনি তাঁর বিপ্লববিরোধী অহুগামীদের সঙ্গে বিচ্ছেদ কামনা করেন না। বিচ্ছেদ যদি ঘটে তো অনিবার্য কারণেই ঘটবে। ক্যাপিটালিস্ট ও মিলিটারিস্টদের লবি যদি কংগ্রেসকে ইংরেজের শিবিরে টেনে নিয়ে যায় ও ইংরেজ যদি কংগ্রেসকে পার্টনার করে নেয় তা হলে গান্ধীজীকে আর কংগ্রেসের প্রয়োজন থাকবে না। গান্ধীজীরও আর কংগ্রেসকে প্রয়োজন থাকবে না। বিচ্ছেদ অনিবার্য



হবে। লোকেও জানবে যে গান্ধী ও কংগ্রেস এক ও অভিন্ন নয়। যারা তাঁর খুব কাছের মানুষ তাঁরা অঁচ করতে পারছেন যে এরকম একটা সম্ভাবনা তাঁর ভাবনার বাইরে নয়। যুদ্ধে যোগ দিলে ভারতের বণিকরা বড়ো বড়ো কন্ট্রাক্ট পাবেন, আর সৈনিকরাও পাবেন বড়ো বড়ো কমিশন। কংগ্রেস নেতারাও পাবেন বড়ো বড়ো পদ। সংবাদপত্র হাতে থাকলে জনমতকেও যুদ্ধাভ্যুত্থান করে তোলা শক্ত নয়। তবে কংগ্রেসের মুখ্য শ্রোতা গান্ধীজীকে ঘিরে। বড়লাটকে ঘিরে নয়। সেগাঁওকে ঘিরে। দিল্লীকে ঘিরে নয়। গান্ধীজীর সঙ্গে বিচ্ছেদ যদি ঘটে তবে সেটা হবে মুখ্য শ্রোতের সঙ্গে বিচ্ছেদ। যুদ্ধসমর্থকরা নিজেস্বাই বিচ্ছিন্ন হবেন। পক্ষান্তরে বিপ্লবসমর্থকরাও ব্রিটেনের দুর্ভোগকে ভারতের সুযোগ করতে গিয়ে মুখ্যশ্রোত থেকে বিচ্ছিন্ন হয়ে পড়বেন।” সৌম্য এ বিষয়ে নিশ্চিত।

মানস অজুনের মতো যুদ্ধ করার কথাই ভাবছিল। রবীন্দ্রনাথের সঙ্গেই তার মতের মিল। চেকোস্লোভাকিয়ার পর পোলাণ্ড, পোলাণ্ডের পর হলান্ড ও বেলজিয়াম, তার পরে ফ্রান্স ও ইংলণ্ড একথা কল্পনা করতেই তার রক্ত গরম হয়ে ওঠে। তখন তার মনে থাকে না যে সে স্বাধীন নয় পরাধীন ভারতীয়, সে শ্বেতাঙ্গ নয়, সে কৃষ্ণাঙ্গ। সে একলাফে যুদ্ধক্ষেত্রে ঝাঁপ দিতে চায়, যুথিকা না থাকলে সে এতদিনে ঝাঁপ দিয়ে থাকত।

সৌম্য জানত মানস কী ভাবছিল। বলে, “দুঃখ, মানস, ব্যক্তিহিসাবে তুমি যা ভালো মনে কর তা করবে, রবীন্দ্রনাথও তাই। কিন্তু দেশের লোককে সঙ্গে নিয়ে চলা যদি তোমার কর্তব্য হয় তবে দেখবে দেশের অধিকাংশ লোক তোমার সঙ্গে চলতে রাজী নয়। যুদ্ধে তাদের লাভ যত হবে ক্ষতি হবে তার চেয়ে বহুগুণ বেশী। তারা ধনে প্রাণে মারা যাবে। ফুলে কেঁপে উঠবে আর ক’জন! ইংলণ্ডের সাধারণ লোক লড়তে চলবে তাদের অধিকার রক্ষা করতে। ভারতের লোকের অধিকার বলতে কী আছে? ভোট দেবার অধিকারও তো সকলের নেই। বুভুক্ষুকে তুমি আরো বুভুক্ষু করবে, বিবস্ত্রকে তুমি আরো বিবস্ত্র করবে, নির্জীবকে তুমি আরো নির্জীব করবে, নীট ফল যা হবে তা পরাজয়ের চেয়ে কি কম ভয়ঙ্কর? পরাজয়ও যে এড়াতে পারবে তাও নয়। ইংলণ্ড হেরে গেলে তুমিও হেরে যাবে। আর ইংলণ্ড যে হারবে না তা তুমি কেমন করে জানলে? এত বড়ো একটা সাম্রাজ্য নিয়ে যে বসে আছে তার নৈতিক শ্রেষ্ঠতা কোথায়? ফ্রান্স, হলান্ড, বেলজিয়াম এদের নৈতিক শ্রেষ্ঠতাই বা কোথায়? এরা সাম্রাজ্যের মায়া কাটিয়ে এদের নৈতিক শ্রেষ্ঠতা প্রমাণ করুক। তারপর তুমি এদের সঙ্গে যোগ দিয়ে অজুনের মতো লড়বে। আর তোমার দেশের লোকও ত্যাগ-

স্বীকারে সম্মত হবে। নীতিগতভাবে যুদ্ধবিরোধী এদেশে খুব বেশী নেই। গান্ধীজীও সেকথা জানেন। সারা দেশে হয়তো হাজার খানেক লোক সব অবস্থায় যুদ্ধবিরোধী। এমন কি দেশ আক্রান্ত হলেও তাই। নীতিগতভাবে যুদ্ধবিরোধী ধারা তাঁদের মত তাঁদের ব্যক্তিগত মত। যেমন আমার। কিন্তু রাজনীতিগত ভাবে যুদ্ধবিরোধী এদেশের সাধারণ জনমত। এমনটি গত মহাযুদ্ধের বেলা দেখা যায়নি। গত মহাযুদ্ধের উপর যেসব ঘটনা ঘটেছে তার অবশুস্তাবী পরিণাম এই যুদ্ধবিরোধিতা। গান্ধীজী এর জন্তে দায়ী নন। উনি তো বরাবর ইংরেজদের বন্ধু। দক্ষিণ আফ্রিকায় থাকতে জুলু যুদ্ধে ও বুয়র যুদ্ধে উনি ইংরেজদের সাহায্য করেছিলেন। গত মহাযুদ্ধেও তিনি সৈন্য সংগ্রহ করতে নেমেছিলেন। কিন্তু এখন তিনি সর্বতোভাবে যুদ্ধবিরোধী। যেমন নীতিগতভাবে তেমনি রাজনীতিগতভাবে। তাঁর মতের পরিবর্তন হতে পারে, যদি ইংলও তার সাম্রাজ্য থেকে নিজে মুক্ত হয় ও অপরকে মুক্তি দেয়। তা যদি হয় তবে যুদ্ধবিরোধী হলেও তিনি কংগ্রেসকে তাঁর মতবাদ অনুসরণ করতে বলবেন না। সে তার স্বকীয় নীতি অবলম্বন করবে। সে যদি স্বেচ্ছায় গান্ধীবাদী হয় সেকথা আলাদা। তা যদি হয় তবে পৃথিবীতে ভারতই হবে একমাত্র দেশ যে তার স্বাধীনতা প্রয়োগ করবে যুদ্ধজয়ের জন্তে নয়, শান্তিজয়ের জন্তে। স্বাধীন ভারত অস্ত্র প্রতিযোগিতার দুষ্ট চক্র ভেদ করবে। নিরস্ত্রীকরণের জন্তে তৎপর হবে। হিটলার তো দুষ্ট চক্রেরই যোগফল। যেখানে দুষ্ট চক্র নেই সেখানে হিটলারও নেই। গান্ধীর জয়ই হিটলারের পরাজয়। বিনা যুদ্ধেই হিটলারের পরাজয় ঘটতে পারে। কিন্তু সেটাকে পরাজয় না বলে সম্মানজনক সন্ধি বলা যেতে পারে। মাহুষে মাহুষে যতরকম বিরোধ আছে সমস্তই মেটানো যায়, যদি হিংসা ছেড়ে মাহুষ অহিংসার দিকে মোড় ঘোরে।”

মানস তারিফ করে। কিন্তু মানতে নারাজ হয়। “হিটলারের পরাজয় অত সহজ হবে না, সৌম্যদা। গান্ধীজী হয়তো ইংরেজকে হটাতে পারবেন, সত্যগ্রহই তার জন্তে যথেষ্ট। কিন্তু হিটলারকে সম্ভব করেছে প্রথম মহাযুদ্ধ আর রুশ বিপ্লব। হিটলারকে হটাতে হলে শুধু সাম্রাজ্য ত্যাগই যথেষ্ট নয়, ধনতত্ত্বও বর্জন করতে হবে। ধনতত্ত্ব তো ভারতেও প্রবল। কংগ্রেসও তার একটা শক্তিশালী বাঁটি।”

## ॥ উনিশ ॥

যুথিকা বাড়ী ছিল না। বাচ্চাদের নিয়ে বেড়াতে বেরিয়েছিল। সোমাকে দেখে বলে, “ওমা, সোমাদা যে! কতক্ষণ!”

“এই কিছুক্ষণ। কই, মণি কোথায়? দীপক কোথায়?” সোম্য খোঁজ করে।

“জেরু” বলে মণিকা ছুটে আসে। “জ্যাঠামশায়” বলে দীপক। ওদের কাছে টেনে নিয়ে সোম্য আদর করে। এবার দীপকের জন্তে এনেছে একটা শাস্তিনিকেতনী ঝোলা আর মণিকার জন্তে ইলামবাজারের গালার খেলনা।

যুথিকা বলে, “মিলির খবর শুনেছ, আশা করি। লগুনে পৌঁছে বর সংসার গুছিয়ে নিয়েছে। বরের সঙ্গে দোকানেও যাওয়া আসা করছে ও দোকানে কাজ শিখছে। বর যদি যুদ্ধে যায় ওকেই তো দোকান চালাতে হবে। বুদ্ধিমতী মেয়ে। মিলির খবর তো পাচ্ছি, কিন্তু জুলির খবর কী?”

“ভালোই আছে। ওদের বাড়ী গিয়ে দেখা করেছি, একবেলা খেয়েছি। ওর মা শকু কাটিয়ে উঠেছেন। স্বকুমারের বিশ্বাসঘাতকতার শকু। আর জুলি তো এমন ভাব দেখাচ্ছে যেন কত বড়ো একটা আপদ থেকে বেঁচে গেছে। কৃতজ্ঞতার খাতিরে বিবাহ। তবে এখনো ওই চিন্তা। কবে বিপ্রব ঘটবে।” সোম্য হাসে।

“তার মানে জেলে না গিয়ে ছাড়বে না। কী যে মতিগতি ও মেয়ের! কিন্তু এবার জেল থেকে উদ্ধার করবে কে? স্বকুমার তো ফিরেও তাকাবে না। ষাঁর তাকানো উচিত তিনিও তো জেলে গিয়ে বসে থাকবেন।” যুথিকা কটাক্ষ করে।

“কার কথা ভেবে ওকথা বললে, যুথী?” সোম্য গম্ভীর হয়ে বলে, “যদি আমাদের কথা হয়ে থাকে তবে তোমাকে আশ্বাস দিচ্ছি যে বাপু আমাদের এবার জেলে যেতে দেবেন না। হিন্দু মুসলমানকে দৈনন্দিন কর্মে একসাথ করতে হবে। এটাই

আমার উপর বরাত। জাহাজ পুড়ে দেখলে জাহাজের পটান্নের উপর কাসা-  
 বিয়াক্সার মতো খাড়া থাকতে হবে। জলে ঝাঁপ দিয়ে আপনা বাঁচানো চলবে না।  
 তবে তার আগে চেষ্টা করতে হবে জাহাজ যাতে না পোড়ে।” সৌম্য ঝাঁপার মতো  
 করে বলে।

“বুঝতে পারলুম না, সৌম্যদা।” যুথিকা আরো মনোযোগী হয়।

“বুঝতে পারলে না? স্বরাজ যতই নিকট হচ্ছে হিন্দু মুসলমানদের দ্বন্দ্ব ততই  
 প্রকট হচ্ছে। এতদিনে আমাদের ধারণা ছিল ইংরেজরাই মুসলমানদের একদলকে  
 খেলার ঘুঁটির মতো চালচ্ছে। এখন দেখছি মুসলমানদের একদলই ইংরেজদেরকে  
 খেলার ঘুঁটির মতো চালচ্ছে। দশরথ এখন কৈকেয়ীর কাছে প্রাতজ্ঞাবদ্ধ। এতবড়ো  
 দুঃখপাকেও ইংরেজ কতারা কংগ্রেস কতাদের বাড়িয়ে দেওয়া হাত ধরতে পারছেন  
 না। মুসলিম লীগ কতটা চোখ রাঙাচ্ছেন। কংগ্রেসমন্ত্রারা পদত্যাগ করছেন। কিন্তু  
 সেটা তো অন্তর থেকে নয়। গান্ধীজী এখন মহা ভাবনায় পড়ে গেছেন। তিনি  
 নিজে যুদ্ধবিরোধী। যুদ্ধের বিকল্প প্রচার ও প্রমাণ করাই তাঁর নিজের কাজ। কিন্তু  
 কংগ্রেসের অগ্রগণ্য নেতা হিসাবে তাকে তাঁর অনুগামীদেরও সঙ্গে নিয়ে চলতে হয়।  
 সঙ্গে নিয়ে চলতে হলে পাঁচজননের পরামর্শ শুনতে হয়। প্রক্কাভাজন সহযোগীরা তাঁকে  
 বোঝাতে চাইছেন যে ইংলণ্ড, ফ্রান্সের মতো স্বাধীন দেশকেও আত্মরক্ষার জন্তে অগাচ্চ  
 দেশের সঙ্গে মিতালি পাতাতে হয়। ভারত যদি স্বাধীন দেশ হতো তাকেও আত্ম-  
 বক্ষার জন্তে মিতালি পাতাতে হতো। স্বাধীন ভারতের স্বাভাবিক মিতা চীন বা  
 জাপান নয়, কমিউনিস্ট রাশিয়া তো নয়ই। ওই ইংলণ্ড বা ফ্রান্স। বা আমেরিকা।  
 এটা যে শুধু ধনিকদের স্বার্থে তা নয়। শ্রমিকদের এত বেশী অধিকার আর কোথায়  
 আছে? মধ্যবিত্তদেরও এতবেশী সিভিল লিবার্টি আর কোন্‌খানে? সুতরাং গান্ধীজী  
 যেন যুদ্ধবিরোধিতা না করেন, কংগ্রেসকে করতে না বলেন। কংগ্রেস যেন মুসলিম  
 লীগের মতোই ভালো ছেলে হয়। কংগ্রেস মন্দ ছেলে বলেই না মুসলিম লীগের প্রতি  
 ইংরেজ সরকারের এত টান। এখন ভালো ছেলের সঙ্গে পাল্লা দিয়ে আরো ভালো  
 ছেলে হওয়াই পলিসি। গান্ধীজী এঁদের পরামর্শ চূপ করে শুনে যান। ই্যা কি না  
 বলেন না। তবে আমরা যারা তাঁকে চিনি তারা বিশ্বাস করতে পারিনে যে তিনি  
 অমন করে আত্মবিলোপ করবেন। অন্তত একটি কণ্ঠস্বর এত বড়ো দেশে থাকবে যা  
 কোনো দিকে দৃষ্টিপাত না করে যুদ্ধবিরোধী। কংগ্রেসকে তিনি আরো সময় দেবেন  
 মনঃস্থির করতে। দেখাই যাক না ভালো ছেলে মুসলিম লীগের দৌড় কতদূর। আর  
 সেই দৌড়ের শেষে সে কোন্‌ পুরস্কার পাচ্ছে।” সৌম্য মুচকি হাসে।

এবার মুখ খোলে মানস। “তার মানে কি স্টেনমের্ট? ইংরেজ বনাম কংগ্রেস। কংগ্রেস বনাম লীগ।”

“সেইরকমই তো মনে হচ্ছে। স্টেনমের্ট যাদের অসহ্য হবে তারা ইচ্ছে করলে বিপ্লব ঘোষণা করতে পারে, সাধ্য থাকলে ক্ষমতা দখল করতে পারে। নয়তো জুলির মতো দিনরাত ফরাসি করতে পারে। এবেলার খামিস ওবেলা বদলে যায়। কেবল গালিগালাভ সার। সাম্রাজ্যবাদী ইংরেজ, বুর্জোয়া কংগ্রেস, ধনিকদের সখা গান্ধী। তবে কংগ্রেস মন্ত্রীদের পদত্যাগের ফলে হাই কমান্ডের নিন্দাবাদ অত বেশী জনপ্রিয় হচ্ছে না। বল্লাভাচারী সম্প্রদায়কে নিয়ে হাসি টিটকারি কমে আসছে। জুলির মা সেদিন বললেন, মন্ত্রীদের বেতন যদি আগেকার মতো পাঁচহাজার টাকা হতো তা হলে কি ওঁরা অত সহজে পদত্যাগ করতেন? পাঁচশো টাকা বলেই এটা সহজ হলো। গান্ধীজীর দূরদর্শতার প্রশংসা করতে হবে।” সৌম্য তার কলকাতার অভিজ্ঞতার কথা শোনায়।

“আর জুলি কী বলল?” জানতে চায় যুথিকা।

“জুলি? ও কি কোনোদিন কংগ্রেসের প্রশংসা করেছে না করবে? জুলি বলল, পদত্যাগ করে ওঁরা পা দিয়ে ভোট দিয়েছেন। নইলে ওঁদের পদাঘাত করে তাড়াতে হতো। আর কিছুদিন বাদে কংগ্রেস প্রেসিডেন্ট হতেন আবার সুভাষচন্দ্র বা তাঁর মতো আর কোনো বামপন্থী। তাঁর প্রথম কাজ হতো ওয়ার্কিং কমিটি পুনর্গঠন। তার পরের কাজ হাই কমান্ড কব্জা করে মন্ত্রীদের বিতাড়ন। তার পরে আপসহীন বিরামবিহীন সংগ্রাম। সেগাঁওতে বামপন্থীদের মুখেও এইসব কথা শুনেছি। জুলির ওটা ধিনি নয় প্রতিধ্বনি! ওঁরাও গান্ধীজীকে ভজাচ্ছেন যে আর কালবিলম্ব নয়। এইমুহুর্তেই সংগ্রাম শুরু করে দেওয়া উচিত। নইলে উত্তাপ জুড়িয়ে জল হয়ে যাবে। জনচিন্তের উত্তাপ। একবার জুড়িয়ে গেলে ফের কতকাল লাগবে তপ্ত করতে! দেশ প্রস্তুত, নেতারা প্রস্তুত নন। মুসলিম লীগের নেতাদের প্রসঙ্গ তুললে ওঁরা এককথায় উড়িয়ে দেন। জনাকতক নাইট আর নবাব আর খান বাহাদুর আর খান সাহেবই নাকি সরকারের পক্ষে। আর-সব মুসলমান নাকি বিরোধী পক্ষে। বিপ্লবে কাঁপ দেবার জন্তে নাকি পা বাড়িয়ে রয়েছে। জিন্নাকে এঁরা ধর্তব্যের মধ্যে আনতে রাজী নন। পার্লামেন্টের বাইরে নাকি ওঁর শিকড় নেই। গান্ধীজী এঁদের পরামর্শ চূপ করে শুনে যান। ই্যা কি না বলেন না। তবে আমরা যাঁরা তাঁকে চিনি তারা ভাবতেই পারিনে যে তিনি পরের মুখে ঝাল খেয়ে পরের কথায় নাচবেন।” সৌম্য দৃঢ়তার স্বরে বলে।

“তা হলে শেষপর্যন্ত দাঁড়ায় স্টেলমেন্ট।” মানস মন্তব্য করে।

“তার মানে যুদ্ধে যারা সহযোগিতা করতে চায় তাদের কেউ বারণ করছে না। যারা করতে চায় না তাদেরও কেউ মানা করছে না। যারা সরকারের পক্ষে লড়তে চায় তারাও স্বাধীন। যারা সরকারের বিপক্ষে লড়তে চায় তারাও স্বাধীন। আর গান্ধীজীও স্বাধীন, কিছু করা না করার স্বাধীনতা তাঁর আছে।” সৌম্য তাৎপর্য শোনায়।

“বুঝতে পারছি। গান্ধীজী ও তাঁর দলবল এক নয়, বিভক্ত।” যুধিকা বলে।

“যা বলেছ। এমন অবস্থায় নেতৃত্ব করা যায় না। অপেক্ষা করতে হয় যতদিন না একতা ফিরে আসে। কংগ্রেস যা করবে এক হয়ে করবে। সেটা যদি হয় যুদ্ধে সহযোগিতা তবে সেও ভালো। কিন্তু সেক্ষেত্রে গান্ধীজীকে নেতাকপে পাওয়া যাবে না। কংগ্রেস পাবে নারায়ণকে বাদ দিয়ে নারায়ণা সেনা। তিনিও নিশ্চিন্ত হয়ে বিবেকচালিত সত্যগ্রাহীর কর্তব্যে মন দেবেন। তিনি বেশী লোকজন চান না। বাদ্যের চান তাঁরা হবেন খাঁটি সোনা। আটজন কি দশজন হলেও তাঁর উদ্দেশ্য সিদ্ধ হবে। উদ্দেশ্য স্বরাভ্যস্ত নয়। হিংসার উন্নত পৃথীর শুভবুদ্ধির কাছে আবেদন। হিংসার উত্তরে হিংসা, তার উত্তরে হিংসা, এ ভাবে চললে পৃথিবী প্রাণশূন্য হবে। তখন সেই মরুভূমিতে বাস করবে কে? তেমন বিজয়ের কা মূল্য? পরাজিত হলেও তবু একটা প্রতিকার থাকে। সত্যগ্রহ। কিন্তু হিটলারের উপর টেকা দিতে গিয়ে যা হবে তা মনুষ্যত্বের দিক থেকে দেউলেপনা। ভারতকে যদি আমরা এর আওতার বাইরে রাখতে না পারি তো অস্ত্র তার অঙ্গ পাড়াগাঁগুলোকে বাঁচাতে চেষ্টা করব। ভবিষ্যতের সত্যগ্রহ সেই কোণ থেকে আসবে।” সৌম্য দৃঢ়নিশ্চয়।

“তোমার কথাবার্তা শুনে মনে হয় তোমরা সত্য সত্যি রেভোলিউশনারি ডিফিটিস্ট। যোদ্ধাদের মনোবল জোগাবে না। তারা হেরে গেলে সত্যগ্রহ করবে। অবিকল লেনিনের স্ট্র্যাটেজী। শুধু ট্যাকটিক্স আলাদা।” মানস রায় দেয়।

সৌম্য হেসে উঠে বলে, “আমরা ধরা পড়ে গেছি। কিন্তু শুধু তোমার কাছেই জুলি তো মনে করে আমরা রিয়াকশনারি।”

- আবার জুলির প্রশ্ন ওঠে। যুধিকা বলে, “জুলিরা যা মনে করে তা যদি ঠিক না হয় তো বাধছে কোথায়? কেন ওদের সঙ্গে তোমাদের এত অমিল?”

সৌম্য একটু চমকে উঠে বলে, “তা কি এককথায় বোঝানো যায়? আমরা সবাই চাই দেশের স্বাধীনতা ও সমাজের পুনর্বিষ্ঠা। কিন্তু উদ্দেশ্য এক হলেও

উপায় এক নয়। আর উপায় যদি এক না হয় তো উপায়ের দ্বারা উদ্দেশ্যও প্রভাবিত হয়। অহিংস উপায়েব দ্বারা অর্জিত স্বাধীনতা রাষ্ট্রকে সর্বশক্তিমান কবে না, তার সৈন্যবল খর্ব করে, খর্বতর করে, খর্বতমও করতে পারে। পুলিশবল সম্বন্ধেও সেই কথা। সমাজের পুনর্বিষ্ঠাসে রাষ্ট্রের ভূমিকাও খর্ব থেকে খর্বতর, খর্বতর থেকে খর্বতম হয়। আমরা সেইজন্মে উপায়শুদ্ধির উপর এত বেশী গুরুত্ব আরোপ করি। গান্ধীজী তো এখন বলতে শুরু করেছেন যে উপায়ই সব। উপায় পেকেই প্রবাহিত হবে উদ্দেশ্য। এণ্ডস আগে থেকে স্থির করে নিয়ে সেই অনুসারে মৌনস্ নয়। মৌনস আগে থেকে স্থির করে নিয়ে সেই অনুসারে এণ্ডস। এতে কংগ্রেস নেতারা ক্ষুব্ধ। একটা গান্ধীবিরোধী মনোভাব এখন কংগ্রেসের সকল অঙ্গে। কেবল বাম অঙ্গে নয়। উপায়কে অহিংস করতে যারা রাজী তারাও সেটাকে উদ্দেশ্যানুগ কবতে চায়। উদ্দেশ্যকে উপায়ানুগ করতে চায় না। অথচ সবাই মানে যে গান্ধী ভিন্ন আব কেউ নেতা হলে কংগ্রেস নতুন কোনো সংগ্রামে নামতে পারে না। যারা নামবে তারা কংগ্রেসের নামে নয়, অন্য কোনো সংস্থার নামেই নামবে। কংগ্রেস অপেক্ষা করবে যতদিন না গান্ধীজী নেতৃত্ব নিতে রাজী হন, আর গান্ধীজীও অপেক্ষা করবেন যতদিন না উপায় সম্বন্ধে কংগ্রেস তাঁর সঙ্গে একমত হয়। জুলি যদি অপেক্ষা করতে নারাজ হয় তো পতঙ্গের মতো আগুনে কাঁপ দিয়ে পড়বে। প্রাণে বাঁচলে হয়।”

যুথিকা কুপিত হয়ে বলে “আর তুমি ওকে না বাঁচিয়ে আপনা বাঁচবে! ধিক্, সৌম্যদা, ধিক্। কে যে ওকে বাঁচাবে তাই ভাব। এখন তো সুকুমারদাও নেই।”

“বোন, তুমি কেন ধরে নিচ্ছ যে আমরা অহিংসাবাদীরাও প্রাণে বাঁচব? দেশ যদি আক্রান্ত হয় তা হলে গ্রামে গ্রামে প্রতিরোধ গড়ে তুলতে হবে। হিংসাবাদীরা যদি এ কাজ না করেন বা এতে ব্যর্থ হন তা হলে আমাদের উপরেই বর্তাবে এ দায়। প্রাণ হাতে করেই আমাদের বাঁচতে হবে। যেমন সেগাঁওতে তেমনি প্রত্যেকটি গ্রামে। তাই প্রত্যেকটি গ্রামকেই করে তুলতে হবে সেগাঁও। গান্ধীজী একদিন না একদিন সংগ্রাম ঘোষণা করবেনই, যদি না ব্রিটিশ রাজশক্তি মানে মানে বিদায় হয়। সংগ্রাম শুরু হলে গান্ধীজীকে তো জেলের বাইরে পাওয়া যাবে না, তখন কর্মীদের প্রত্যেকেই হবে যে যার নেতা। কর্মীদের সবাইকে জেলে পুরলে সাধারণ মানুষকেই মনোনয়ন করতে হবে কে হবেন কোন অঞ্চলের নেতা। তাও যদি সম্ভব না হয় তবে সাধারণ মানুষকেই শিখে নিতে হবে নেতৃত্বহীন সংগ্রামের পদ্ধতি। জুলি যদি আমাদের সঙ্গে মিলে মিশে এ দায় বহন করতে রাজী হতো তা হলে আর ভাবনা কী ছিল? কিন্তু তা তো হবার নয়। জুলি সম্মানবাদ ত্যাগ করলেও উদ্দেশ্যশুদ্ধির জন্তে

যে-কোনো উপায় অবলম্বন করতে ইচ্ছুক। যাদের সঙ্গে ওর নিত্য মেলামেশা তারা উপায় সম্বন্ধে নিবিবেক। আমার উপরে ওর বিশ্বাস আছে, ‘কিন্তু আমার কর্মপন্থার উপরে বিশ্বাস নেই। ওকে নিয়ে আমি করব কী? আর আমাকে নিয়ে ওই বা কী করবে? তুমি কী চাও, তা আমি জানি। কিন্তু আমি, বোন, নিরুপায়।’ সৌম্য দীর্ঘশ্বাস ফেলে।

যুথিকাও হাল ছেড়ে দেয়। ‘যাক্, জুলি তো কচি খুকীটি নয়। কেমন কবে আত্মরক্ষা করতে হয় তা নিশ্চয় জানে। কেনে শুনে আগুনে কাঁপ দিলে পতঙ্গের মতো পুড়বে। আমার তো মনে হয় না সেরকম কিছু ঘটবে। গদী ছেড়ে দিবে কংগ্রেস মন্ত্রীরা এখন আবার জনপ্রিয় হয়েছেন। তাঁদের বিরুদ্ধে বিক্ষোভ এখন শাস্ত। আর সেই বিক্ষোভই তো ছিল জুলির বারবার বিপ্লবের পূর্বাভাস। জুলিবা আসলে ছিল মন্ত্রিবিরোধী। ওদের উদ্দেশ্য ছিল মন্ত্রীদেব মসনদ থেকে নামানো। সে উদ্দেশ্য সিদ্ধ হয়েছে। তাব চেয়ে বৃহত্তর উদ্দেশ্য ইংরেজকে দেশ থেকে বিতাড়ন। তার ফলে দেশ অরাজক হলে দুষ্টির দমন ও শিষ্টের পালন। তাবপরে দেশ আক্রান্ত হলে সশস্ত্র প্রতিরোধ। এসব দায়িত্ব জুলিবা সাধ করে ঘাড়ে নিতে যায় তো পশতাবে। জনতা যদি ওদের পেছনে থাকে তো জনতাই ওদের ফেলে পালাবে। ওরা বিচ্ছিন্ন হবে।’

মানস বলে, ‘বিপ্লব যেদেশে ঝেঁটেছে সেদেশে এটাও দেখা গেছে যে বিপ্লবীরা কেবল তাদের শাসক বা শোষকদের নিপাত কবেই নিবস্ত হয় না, নিজেদের বিভিন্ন গোষ্ঠীকেও নিমূল করে। ফ্রান্সের ইতিহাসে এটা আমবা দেখেছি, রাশিয়াব ইতিহাসে দেখছি। কে বলতে পারে যে ভারতব ইতিহাসেও বিপ্লবীরা পরস্পরকে মেরে সাবাড় করবে না? তারপর এটাও কি দেখা যায় না যে বিপ্লবীদের ঘবোয়া গোলমাল মেটাতে ডাক পড়ে সেনাপতিদের, আর তাঁদেরই একজন সর্বসর্বা হয়ে বিপ্লবকেই বিসর্জন দেন? যেমন নেপোলিয়ন বোনাপার্ট। রাশিয়ায় এখনো সে পর্যায় আসেনি। কে বলতে পারে যে কখনো আসবে না? স্টালিন নিজেই একদিন সেনাপতি হয়ে নেপোলিয়নের ভূমিকায় নামতে পারেন। জুলিরা ইংরেজকে হটাবে হয়তো, কিন্তু যার জন্তে পথ করে দেবে তিনি যে ওদের আমল দেবেন তা নয়। মাথা তুলতে গেলেই মাথা গুঁড়িয়ে দেবেন।’

‘সম্ভব। সম্ভব। সব কিছুই সম্ভব।’ সৌম্য সায় দেয়, ‘তবে আমরা যে এতকাল ধরে তপস্যা করলুম সেও সম্ভাবনাময়। কোথাও কি এর তুলনা বা নজির আছে? যুদ্ধের সময় তো মন্ত্রীদের হাত দিয়ে কোটি কোটি টাকা খরচ হয়, আত্মসাৎও হয়।



আমাদের মন্ত্রীরা সে প্রলোভন স্বৈচ্ছায় দমন করেছেন। জুলির মতো অনেকেই ভাবছে এটা একটা চাল। কিন্তু ওঁরা যদি চাল ফিরিয়ে না নেন, গোটা যুদ্ধকালটাই সরকারের বাইরে কাটিয়ে দেন, তা হলে লোকে ওঁদেরই জয়ধ্বনি করবে।”

যুথিকার ওই একই ভাবনা। “এখন জুলির কী হবে বলতে পারো? সময় আর জোয়ার আর কতকাল সবুর করবে? জোয়ার যদি সত্যি সত্যি আসে জুলিও কি জোয়ারের মুখে ভেসে যাবে? আহা, বেচারি।”

“কী কবে বলব, বোন?” সোম্যা ঈষৎ হাসে। “যুদ্ধঘোষণা করলেই যেমন যুদ্ধে নামা যায় না বিপ্লব ঘোষণা করলেই তেমন বিপ্লবে এগোনো যায় না। ইংরেজরা যুদ্ধ ঘোষণা করেও যুদ্ধ করছে না। তেমনি জুলিরা বিপ্লব ঘোষণা করেও বিপ্লবে বাঁপ দেবে না। বন্দী হওয়া বোধ হয় জুলির বরাতে নেই। খুব সম্ভব ও মাটির তলায় যাবে। ওই যাকে বলে আগারগ্রাউও।”

“আগারগ্রাউও।” যুথিকা অবাক হয়। “আগারগ্রাউও তো নগনের টিউব রেলকে বলে। এদেশে তো টিউব রেল নেই। ওরা কি তা হলে মাটির তলায় স্কুডং খুঁজবে? না পাহাড়ে পর্বতে গিয়ে স্কুডং খুঁজবে?”

“হা হা। আগারগ্রাউও কাকে বলে জানো না?” মানস হেসে ওঠে। “ওই কলকাতা শহরেই এমন সব গলি ঘুঁজি আছে যেখানে গা ঢাকা দিলে টিকটিকির বাবাও টের পাবে না। জুলিকে ওর বদ্ধ বা পিস্তল বা রিভলবারের মতো বেমালুম পাচার করে দেবে। ও নিরাপদে থাকবে। তবে ওর মা বেচারির বিপদ।”

“সেটা তো ভালো নয়। ওঁকে বাঁচাবে কে?” যুথিকা উদ্বিগ্ন হয়।

সোম্যা অভয় দিয়ে বলে, “উনিও নিরাপদ। ওঁর এক জামাই স্ট্যাণ্ডিং কাউন্সেল। তবে ধরপাকড় একচোট হবেই। জুলিকে বাগে পেলে ওরা ছাড়বে না। কিন্তু জুলিরাও কম ফন্দিবাজ নয়। ওদেরও টিকটিকি আছে। ঠিক সময়ে খবর এনে দেবে। শঠে শাঠ্যম্! এই হলো ওদের নীতি। হিংসার জুটি অসত্য। যেমন অহিংসার জুটি সত্য। জুলিদের সঙ্গে আমাদের নীতিগত বিভেদ।”

“কিন্তু আরো একটা ভয়ের সম্ভাবনা আছে, সোম্যাদা সেটা শুধু ওদের বেলা নয় তোমাদের বেলাও খাটে। কিছু একটা করতে গেলেই ইংরেজরা রটাবে যে জুলির দল হিটলারের পঞ্চমবাহিনী। আর তোমারাও হিটলারের শত্রুর শত্রু, অতএব মিত্র। এই অপবাদের ছাপ জেলখানার দাগের চেয়েও কলঙ্কময়। কুকুরকে বদনাম দিয়ে ওরা কাঁসীতে লটকাবে।” মানস হিশিয়ারি দেয়।

সোম্যা স্বীকার করে যে ইংরেজদের হাতে ওটাও একটা তাস। বেকায়দায় পড়লে

ওই তাসটা ওরা খেলবে। কিন্তু সব অপবাদ কাটিয়ে ওঠবার ক্ষমতা তাদের আছে যারা সত্য আর অহিংসায় কায়মনোবাক্যে প্রতিষ্ঠিত। একথা অবশ্য জুলিদের বেলো পুরোপুরি খাটে না। হুঁশিয়ারিটা জুলিদের মনে রাখা উচিত।

মানস বলে, “ইংরেজীতে একটা কথা আছে, যুদ্ধকালে পথমেই নিহত হয় সত্য। সত্য কী কাউকেই জানতে দেওয়া হয় না। অসত্য বা অথ সত্যকেই সত্য বলে চালিয়ে দেওয়া হয়। এটা তো মহাভারতের যুগ থেকেই চলে আসছে। যুদ্ধিষ্ঠিরেব মতো সত্যনিষ্ঠ পুরুষকেও উচ্চারণ করতে হয় অথথামা হতো ইতি গজঃ। শেষ অংশটুকু ঢাক ঢোল পিটিয়ে চাপা দেওয়া হয়। একালের যুদ্ধে যত রকম মাঝামাঝি অস্ত্র ব্যবহার করা হয় তাদের মধ্যে সব চেয়ে সামান্যতক তচ্ছে কলম আর কণ্ঠ। ইংরেজরা বড়াই করে যে গত মহাযুদ্ধে তারা প্রোপাগান্ডার দ্বারাই জিতেছে। এবারেও তাই হবে, সৌম্যদা। যুদ্ধকালে যদি ওদের বিরুদ্ধে সংগ্রাম শুরু কবে দাও তোমাদের বিরুদ্ধে চুনীয়া জুড়ে কুৎসা রটনা হবে খবরের কাগজে আর রেডিয়োতে। তোমরা আত্মসমর্জন করতে গেলে দেখবে সভাসমিতি নিষেধ, মুখ ফুটে কিছু বলতে গেলে ধরে নিয়ে যাচ্ছে, ছাপার উপরে কড়া সেনসরশিপ, চিঠিপত্র বাতিলে রাখা। তোমরা একেবারে নীরব। স্বতরাং সর্বপ্রকারে নিরস্ত।”

সেগাঁওতে যে এ নিয়ে আলোচনা হয়নি তা নয়। সৌম্য বলে, “বাপুর সব চেয়ে অন্তরঙ্গ সুন্দরদ্রাই তাঁকে সাবধান করে দিয়েছেন যে যুদ্ধকালে ইংরেজরা তাঁকে একটা কথাও বলতে দেবে না। সত্যকে বিকৃত করতেও ওদের বাধবে না। এ তোমার লবণ সত্যগ্রহ নয় যে আমেরিকা থেকে ওয়েব মিলার এসে রিপোর্ট করবেন। আর আমেরিকার লোক ব্রিটিশ অত্যাচারের বিবরণ পড়ে স্তম্ভিত হবে। এবার কোনো রিপোর্টারকেই ঢুকতে দেওয়া হবে না। কেউ রিপোর্ট পাঠালে মাঝপথে আটক করা হবে। আব আমেরিকানরাও যদি হিটলারের বিরুদ্ধে যুদ্ধে নামে তো রিপোর্ট ছাপছেই বা কে? পড়ছেই বা কে? যুদ্ধকালে সংগ্রাম স্থগিত রাখাই শ্রেয়। গান্ধীজী এঁদের কথা মেনে নেন, কিন্তু তা সত্ত্বেও নিজের সংকল্পে দৃঢ় থাকেন। তাঁর সংগ্রাম নিছক ভারতের স্বার্থে নয়, ইংলণ্ডেরও স্বার্থে, সারা বিশ্বের স্বার্থে। স্বাধীন ভারত হিটলারকে বুঝিয়ে স্থিতিয়ে নিরস্ত করবে। হিটলার যদি অবুধ্য হয় তবে স্বাধীন ভারতের নৈতিক সমর্থন পাবে সাম্রাজ্যহীন ব্রিটেন। স্বাধীন ভারত আত্মরক্ষার জন্য প্রয়োজন হলে অস্ত্রধারণ করবে। তিনি আপনাকে সরিয়ে নেবেন। কিন্তু তাঁর সভ্যভাষণের স্বাধীনতা থাকবে। তিনি সত্যের উপর নিষেধাজ্ঞা সহ্য করবেন না। সত্য তাঁর কাছে অহিংসার চেয়েও গুরুত্বপূর্ণ। সেইজন্তে তাঁর সংগ্রাম-

শক্তির নাম সত্যগ্রহ। ব্রিটিশ প্রোপাগান্ডাকে তিনি ব্রিটিশ অস্ত্রশস্ত্রের মতোই ব্যর্থ প্রতিপন্ন করবেন। কিন্তু ব্রিটেনকে তিনি বিব্রত করতে অনিচ্ছুক। তাই যতদিন সম্ভব সংগ্রাম সংবরণ করবেন। তা বলে গোটা যুদ্ধকালটা নয়। ইংরেজরা যদি তাদের কাজকর্মের দ্বারা ভারতীয়দের অতিষ্ঠ করে না তোলে তা হলে তিনিও তাদের অতিষ্ঠ করে তুলবেন না। কিন্তু জোর করে যদি সৈন্য বা শ্রমিক সংগ্রহ করা হয়, জোর করে যদি টাকস বসানো বা চাঁদা আদায় হয়, জোর করে যদি মুখের অন্ন বা গায়ের কাপড় চালান দেওয়া হয় তবে সংঘাত অনিবার্য। সংঘাতকে তিনি অহিংস আকার দিতে বন্ধপরিকর, কিন্তু ইংরেজরা যদি খেলোয়াড়ের মতো খেলার নিয়ম মেনে না খেলে তবে দেশের লোককে তিনি কাঁহাতক ঠেকিয়ে রাখবেন?”

মানস আশ্বস্ত হয়ে বলে, “সংগ্রামটা আপাতত বছর কয়েক সংবরণ করে দেখা যাক ব্রিটেন কতদূর সামলে উঠতে পাবে। যুদ্ধ তো চার বছরের আগে খামছে না। আমেরিকা ইতিমধ্যে নামবেই। হিটলার পাগলের মতো ইহুদীদের মেরে তাড়াচ্ছে। ওরাও আমেরিকায় গিয়ে আমেরিকানদের উসকাচ্ছে। সবচেয়ে মুশকিল হয়েছে টোমাস মানের মতো স্বদেশপ্রেমিক জার্মানদের। তাঁর সহধর্মিণী ইহুদীবংশীয়। তা বলে কারো চেয়ে কম স্বদেশপ্রেমিক নন। কিন্তু এখন জাতীয়তাবাদ নিরীথ জার্মান ভাষা ও সংস্কৃতি নয়, ন্যাঁড়ক রক্ত। মানের নিজেরই সেটা নেই, মাতৃকুল জিওল। গত মহাযুদ্ধে তিনি কাইজারের সমর্থক ছিলেন, সবাই জানত তিনি পাকা জার্মান। এবার তিনি হিটলারের সমর্থক নন। তাই নাসীদার মতে কাঁচা জার্মান। তাদের মতে তাঁর সহধর্মিণী জার্মানই নন। আর সন্তানদেরও ওরা জার্মান বলে স্বীকার করবে না। পারিবারিক নিরাপত্তার জন্তে তাঁকে স্বদেশ ত্যাগ করতে হয়েছে। আমেরিকা যদি যুদ্ধে যোগ না দেয় তবে তিনি দেশের শত্রু বলে চিহ্নিত হবেন না। নয়তো তাঁকে গণ্য করা হবে দেশের শত্রু বলে। তাঁর পরিবারের আর সবাইকেও। গত মহাযুদ্ধের সেই জার্মান গ্যাশনারিগে টোমাস মানের এই মহাযুদ্ধে কী দুঃসহ সঙ্কট!”

যুথিকা তা শুনে বলে, “কেন? তোমার সঙ্কটটাই বা কম দুঃসহ কিসে? এই যুদ্ধে তুমি ইংরেজ পক্ষে। কিন্তু যুদ্ধকালে যদি গান্ধাজী তার সংগ্রাম শুরু করেন তবে দেশের লোকের চোখে তুমিও দেশের শত্রু। দেশের স্বাধীনতাসংগ্রামীদের তুমি জেলে পাঠাবে। ওরা যদি হিংসার পথ ধরে তবে ওদের ফাঁসীও দিতে পারো। আর আমি তোমার সহধর্মিণী বলে তোমারই মতো দেশদ্রোহী। চাকরি ছাড়তে চাইলেও অত্মমতি পাবে না। অত্মমতি পেলেও এই যুদ্ধে ইংরেজ পক্ষেই থেকে যাবে। দেশের লোক তোমাকে সাধুবাদ দেবে না, অথচ সরকারী কর্মচারীরাও তোমাকে ছেই ছেই

করবে। তুমি হবে না-ঘরকা না-ঘাটকা। আর তোমার হাত ধরেছি বলে আমিও তাই। অর্থনৈতিক সমস্যা তো থাকবেই, তোমার তো আন্তর্জাতিক খ্যাতি বা উপার্জন নেই। রবীন্দ্রনাথ ইংরেজ পক্ষে থেকেও খ্যাতি প্রতিপত্তি অর্থ ও স্বস্তি এর কোনোটাই হারাবেন না। আর তুমি হবে সর্বহার।”

মানস একেবারে মুক। টোমাস মানের প্রশ্ন তুলে বোকা বনে গেছে। সৌম্যর দিকে করুণভাবে তাকায়।

“হ্যাঁ, তোমার অবস্থাটা উদ্বেগজনক বইকি।” সৌম্য সহৃদয়ভাবে বলে। “তবে তুমিই একমাত্র নও। আরো অনেকেই তোমার মতো ইংরেজদেব পক্ষে। যেমন পণ্ডিত জবাহরলাল। হিটলারের বিরুদ্ধে লড়াই ছেড়ে তিনি ইংরেজের বিরুদ্ধে লড়তে চান না। কিন্তু গান্ধী যদি সংগ্রাম শুরু করেন তাঁকেও চোখ বুজে ঝাঁপ দিতে হবে। গান্ধীজী এ যুদ্ধে নিরপেক্ষ। কিন্তু জবাহরলাল তা নন। তিনি ইউরোপে গিয়ে সবাইকে জানিয়ে এসেছেন যে তিনি ও তাঁর দেশ ঘোরতর নাৎসীবিরোধী ও সেই কারণে হিটলারের সঙ্গে আপসবিরোধী। তিনি যদি এ যুদ্ধে ইংরেজপক্ষে না দাডান তো ইউরোপে তাঁর মানসম্মান ধুলোয় লুটাবে। সেও তবু ভালো, কিন্তু যদি উনি ইংরেজ সরকারের বিরুদ্ধে সংগ্রামে অংশ নেন তবে সবাই ধরে নেবে যে তিনি একজন প্রচ্ছন্ন নাৎসী। এর মতো অপবাদ তাঁর পক্ষে আর কী হতে পারে? হিটলারের অত বড়ো শত্রু কি খাস ইংলণ্ডেও বেশী আছে? কল্পনা করো জবাহরলালের অবস্থা। গান্ধীজী সব জানেন, সব বোঝেন। তাই অপেক্ষা করছেন। কে জানে যদি ইতিমধ্যে কংগ্রেসের সঙ্গে ইংরেজের একটা বোঝাপড়া হয়। যেটা উভয় পক্ষেই সম্মানের।”

“তা হলে তো আমি বেঁচে যাই। চাকরি ছাড়তে আমি মনে মনে তৈরি, কিন্তু ইংরেজ পক্ষ থেকে ডিগবাজি খেয়ে ইংরেজের বিপক্ষে যেতে পারব না। দেশের লোকের সাধুবাদে আমার কান্ন নেই। হিটলার হচ্ছে যুঁতিমান শয়তান। স্বাধীন ভারত প্রথম দিনই তারও বিরুদ্ধে সৈন্য পাঠাবে। আমিও লড়তে না হোক লড়াই দেখতে যাব। কিন্তু কংগ্রেসের সঙ্গে বোঝাপড়া কি এ জন্মে হবে? মুসলিম লীগ কি হতে দেবে? ভুলে যেয়ো না যে বাংলা, পাঞ্জাব আর সিন্ধু তিনটে প্রদেশই ভিন্নদের শাসকদের দখলে। এঁরা কংগ্রেসকে কেন্দ্রে মেজরিটির অধিকার দিতে নারাজ। এঁদের উপর কংগ্রেসপ্রাধান্য চাপিয়ে দিলে এঁরাও আন্দোলন শুরু করবেন। যুদ্ধকালে ইংরেজরা এঁদের সহযোগিতা হাতছাড়া করবে না। বিশেষ করে পাঞ্জাবে। সেখানে সৈন্যসংগ্রহ পুরো দমে চলেছে। পাঞ্জাবী মুসলমানরা বৈকে বসলে কে তাদের উপর

জোর খাটাবে ? আমি তো শুনতে পাই যে ভারতীয় সৈন্যদলের ওরাই শতকরা চল্লিশজন।” মানস ভাবনায় পড়ে।

“কঠিন সমস্যা।” সৌম্য বলে, “বাপু সমস্তই জানেন ও বোঝেন। এসব কথা তাঁর অন্তরঙ্গরাও তাঁকে শুনিয়েছেন। কিন্তু আমি যতদূর আভাস পেয়েছি তিনি দীর্ঘকাল অপেক্ষা করলেও চিবকাল অপেক্ষা করবেন না। যুদ্ধ যদি আপনা থেকে না থামে তবে তাকে থামাবার জন্যে পথিবীতে ওই একজন আছেন। সেটা তাঁর পবিত্র কর্তব্য। তাঁর মুখের কথায় কোনো পক্ষই সাদা দেবে না। স্বতরাং তাঁকে সত্যগ্রহে নামিয়েই হবে। এটাও তাঁর পবিত্র কর্তব্য। মানবিক কর্তব্য। যদিও দৃশ্যত জাতীয়তাবাদী কর্তব্য। তাঁকে প্রমাণ করতে হবে যে হিংসার চেয়ে অহিংসার জোর আরো বেশী। অসত্যের চেয়ে সত্যের জোর আরো বেশী। তাঁর পেছনে যদি সারা দেশের সমগ্র জনগণ না-ও থাকে তবু তিনি একাই এগিয়ে যাবেন। কিন্তু যেদিন অন্তরের নির্দেশ পাবেন সেদিন। তার একদিন আগেও নয়, একদিন পরেও নয়। তাঁর সমাবোধ লেনিনের মতোই সঠিক।”

এর পরে সৌম্য বিদায় নিতে উঠোগী হয়। কিন্তু যুথিকা আহতার আয়োজন করেছিল। না খাইয়ে ছাড়বে না। ওজর আপত্তি শুনবে না। সৌম্য বলে, “এসব যদি খাই তো জেলখানার পথ্য আমার মুখে রুচবে না। আমার অভ্যাস নষ্ট হবে। কী করি ? পড়েছি মোগলানীর হাতে। খানা খেতে হবে সাথে।”

“তোমাদের একটা খবর দেওয়া হয়নি।” সৌম্য বলে, “মালিকান্দায় এবার গান্ধী সেবাসঙ্ঘের অধিবেশন হচ্ছে। স্বয়ং গান্ধীজী যোগ দিচ্ছেন। আমাদেরও যেতে হবে। সেবাসঙ্ঘের পক্ষে এটা জীবনমরণ প্রশ্ন। গান্ধীজী কংগ্রেস থেকে আপনাকে ছাড়িয়ে নিয়েছেন। সঙ্ঘের সঙ্গেও জড়িয়ে থাকতে অনিচ্ছুক।”

“মালিকান্দা ?” মানস জানতে চায়, “কোথায় সে জায়গা ?”

“স্টীমারে আসবার সময় পাশ দিয়ে এসেছ। পদ্মার ধারে। ঢাকা জেলায়। ডক্টর প্রফুল্ল ঘোষের স্বস্থান।” সৌম্য উত্তর দেয়।

“তা হলে তো কাছেই। একবার ঘুরে আসা যায় না ? বাপুকে আমি একটা ব্যক্তিগত প্রশ্ন করতে চাই।” মানস তার অভিপ্রায় ব্যক্ত করে।

“তা হলে তাঁর সঙ্গে একটা অ্যাপয়েন্টমেন্ট করতে হয়। তোমার হয়ে আমি তার বন্দোবস্ত করতে পারি। কিন্তু তোমার উপর সরকারের নিষেধ নেই তো ? পরে হয়তো জবাবদিহি করতে হবে।” সৌম্য আশঙ্কা প্রকাশ করে।

“সেটা আমার উপর ছেড়ে দাও। আমার উদ্দেশ্যটা রাজনৈতিক নয়। আমার জিজ্ঞাসা হচ্ছে নচিকেতার জিজ্ঞাসা। যমরাজকে তো হাতের কাছে পাচ্ছিনে, তাঁর কাছে যাবারও সময় হয়নি। তাঁর মতো যোগ্য উপদেশক আব কে হতে পারেন? মানুষের মধ্যে মহাযুদ্ধই তো সব চেয়ে বিজ্ঞ।” মানস মনে কবে।

এই স্থির হলো যে অববেশনের একদিন আগে সৌম্য এসে মানসকে সন্ধে করে সমস্ত পথ নিবে যাবে। ফেব্রুয়ার সময় মানস একাঠি ফিরবে। তাব দেরি আছে।

যুথিকা জিজ্ঞাসা করে, “আচ্ছা, সৌম্যদা, আমাকে বলতে পারো ব্যক্তিগত জীবনের বাইরে অসি সার ভবিষ্যৎ কী? ব্যক্তি অহিংস হতে পারে, কিন্তু আশু একটা জাতি। আশু একটা রাষ্ট্র!”

সৌম্য হকচকিয়ে যায়। “সেইটাই তো এ যুগের সর্বাধীন জিজ্ঞাসা। মার্কস লেনিন এব উত্তর দিয়ে যাননি।। দেন আর একটা মহামন্ত্র বাবত না। গান্ধাজী যদি দিতে পারেন।। তেনে এই মহাযুদ্ধই হবে শেষ মহাযুদ্ধ, তৃতীয় মহাযুদ্ধ বাধ্যবে না। আর নয়তো একটার পর একটা মহাযুদ্ধ বাধ্যবেই, তার মাঝখানে বা পরে সমস্ত বিপ্লবও। মানবজাতিং অস্তিত্ব য ৭-৭ থাকে সে জাতি নীতির দিক থেকে কচির দিক থেকে কমাগত অধোগামী হবে। বিজ্ঞান বা প্রযুক্তি বিচার প্রগতিই তো সব নয়। তাই যদি হতো রাবণের পক্ষার মতো প্রগতিশীল আর কোন্ দেশ ছিল সেকালে? যা কিছু চকচক করে তাই সোনা নয়। অন্তত একটি দেশকে বেছে নিতে হবে সত্যিকার মহত্ত্বের পথ। গান্ধীমোহর রাক্ষসের পথ নয়। সেই দেশটি কি ভারত? না ভারত নয়? এই জিজ্ঞাসার উত্তর দিতে হবে গান্ধাজীকে। নয়তো তিনি একজন জাতীয়তাবাদা নেতারূপেই ইতিহাসে থাকবেন, তার বেশী নয়।”

যুথিকা তা শুনে বলে, “কিন্তু সৌম্যদা, মহাযুদ্ধের রকমারি কারণ যদি থাকে, সেসব কারণ যদি সবাই মিলে দূর না করে তবে মহাযুদ্ধ তুমি ঠেকাবে কী করে?”

“ঠেকাতে না পারলে যুদ্ধবিগ্রহের একটা অহিংস পদ্ধতি অনুসরণ করতে হবে। মামলা মোকদ্দমাও একপ্রকার অহিংস বিকল্প। বিশ্ব আদালতে বিচার হবে। বিচারকরা নিরপেক্ষ। তা যদি না হয় তবে অহিংস অসহযোগ থেকে গণ সত্যগ্রহ পর্যন্ত সব রকম অহিংস উপায় পরীক্ষা করে দেখতে হবে। আমাদের এসব পরীক্ষা বিশ্বজনের কাছে দৃষ্টান্ত হয়ে থাকবে। ব্যর্থতাও সিদ্ধির সোপান।” সৌম্য স্থির-নিশ্চয়।

## ॥ বিশ ॥

কলকাতা থেকে স্বপনদার চিঠি। চিঠিখানা যুথিকার হাতে দিয়ে মানস বলে, “পণ্ডিচেরী থেকে মুকুলদা এসেছেন। তাঁর থাকবার মেয়াদ সাতদিন কি আটদিন। তাঁর বিশেষ ইচ্ছা আমি যেন একবার তাঁর সঙ্গে মিলিত হই। ইচ্ছাটা শুধু তাঁর নয়, স্বপনদারও। কেউ-বা যুদ্ধে গিয়ে যুদ্ধক্ষেত্রে ক্যাজুয়ালটি হয়, কেউ-বা ঘরে বসেই ক্যাজুয়ালটি। স্বপনদা এদের একজন।”

যুথিকা চমকে উঠে স্বধায়, “কেন? কী হয়েছে তোমার বন্ধুর? বেঁচে আছেন তা তো চিঠি থেকেই প্রমাণ। জখম হলেন কবে ও কী করে?”

“আরে না, না। জখম টখম নয়।” মানস অভয় দেয়। “ওটাকে আক্ষরিক অর্থে ব্যবহার করিনি। মুকুলদা যেমন গান নিয়ে পাগল স্বপনদারও তেমনি আরেক রকম পাগলামি। এত বয়স হলো, তবু বিয়ে করেনি, করবেনও না। ফ্লোরেন্সার গুঁর আদর্শ। সারাজীবন সাহিত্য নিয়েই কাটিয়ে দেবেন। এমন কিছু সৃষ্টি করে যাবেন যা ‘মাদাম বোভারি’র মতো অমর ও বিশ্বজনীন। কিন্তু গুঁর প্রস্তুতিপর্ব এখনো শেষ হলো না। কবে যে সত্যি সত্যি লিখতে বসবেন তা নিজেও জানেন না। গুঁর স্টাডিতে গেলে দেখবে চারিদিকে কেবল বই আর বই। ইংরেজী, ফরাসী, জার্মান, বাংলা। গুনবে বাংলাকে ওদের পর্যায়ে তুলতে হবে। নয়তো জীবন বুখা। বিলেত থেকে ব্যারিস্টার হয়ে ফিরেছেন। কিন্তু তার চেয়ে বড় কথা, লণ্ডনের মিডল টেম্পলে বছরে চারবার ডিনার খেয়ে বাকী সময়টা প্যারিসে আর হাইডেলবার্গে কাটিয়েছেন। সেই যে বিখ্যাত গান আছে, ‘হাইডেলবার্গে হৃদয় হারিয়েছি’, সেটা গুঁর বেলাও খাটে কি না জানিনে, কিন্তু আছে গুঁর জীবনের নেপথ্যে একটা প্রেমের উপাখ্যান।

একসঙ্গে বহুদিন আমরা ইউরোপ ঘুরে বেড়িয়েছি, কখনো আমাদের ঠাঁয়ে গোপন কথা বলেননি। বতদূর জানি কন্ঠাটির অগ্ন্যত্র বিয়ে হয়ে গেছে, তাঁকে ধরে আনার উপায় নেই। কিন্তু ঘরে বসেই ক্যাজুয়ালটি আমি সেকথা ভেবে বলিনি।”

“তবে কোন কথা ভেবে?” যথিকা জিজ্ঞাসা হয়।

“পুরুষের ঠাঁয়ে বিবাহই কি সব? স্বপনদার ব্রত হলো ফ্রোয়েয়ারের মতো। অমনি একটি উপাখ্যান লেখা। তার জন্মে নানা ভাষার বইপত্র পড়া। সর্ঙ্গাতের রেকড শোনা। চিত্রকলার রিপ্ৰোডাকশন দেখা। গুর রেকর্ড সংগ্রহিও অসাধারণ। গা শুনতে চাইবে শোনাবেন। আর আলবামের পর আলবাম তোমার সামনে মেলে পরবেন। কার কার আকা ছবি দেখতে চাও বলো। এক এক করে দেখাবেন। এখন গুর সমস্তাটা হচ্ছে এই যে জার্মানী থেকে গুর বন্ধুবন্ধুনীদের চিঠিপত্র আসছে না, বইপত্রও সরকার আটক করছেন। ফ্রান্স এখন আক্রমণের মুখে। প্যারিস থে- কোনোদিন শত্রুর হাতে পড়বে। ছবির রিপ্ৰোডাকশন আর আসবে না। রেকর্ড কিছু কিছু লগুন থেকে আনিবে নেওয়া সম্ভব। কিন্তু আনলেও সমস্তা মিটবে না। রোজ রাতে গুর বাথ, বেঠোভেন, মোংসাট, গুবাট, ভাগনার শোনা অভ্যাস। নইলে গুর ঘুম হবে না। এতদিন কেউ কিছু মনে করেনি। এখন বাড়ার লোক ভয় পাচ্ছে। পুলিশ যদি টের পায় তবে নাৎসী গুপচব বনে সন্দেহ করবে। বাড়ী খানাতল্লাস হবে। ঘরে নিশে যেতেও পারে। ব্যারিস্টারকে জেলে পুরতে পারবে না। তবু চারি দিকে টি টি পড়ে যাবে। কেলেকারিকে দাদা বড্ড ভরান।” মানস তার বন্ধুর দুঃখের কাহিনী শোনায়।

“ওঃ। এইজন্মেই বলছ ক্যাজুয়ালটি।” যথিকা মন্তব্য করে।

“আরো কথা আছে।” মানস বলে, “ইউরোপ থেকে ফিরে দাদা একটি ক্লাব পত্তন করেন। ইস্ট ওয়েস্ট ক্লাব। কিপলিংয়ের প্রত্নত্তর। আমিও তার মেম্বর। তা তুমি জানো। সেই ক্লাবও একটি ক্যাজুয়ালটি হতে চলেছে।”

“ওমা! ক্লাব আবার কী অপরাধ করল?” যথিকা অবাক। সেখানেও সন্দেহ।”

“না, না। কথাটা সে অর্থে বলিনি।” মানস খোলসা করে। “আমাদের মেম্বররা কেউ নাৎসীদের পক্ষে নন। ধারা জার্মানীকেতা তাঁরাও ইংরেজ-ফরাসীদের পক্ষে। তাঁরা জার্মানীকে ভালোবাসেন, কিন্তু নাৎসীদের ঘৃণা করেন। তাঁরা প্রকাশে ঘোষণা করেছেন যে তাঁরা টোমাস মান, হাইনরিখ মান প্রভৃতি পলাতক জার্মান বুদ্ধিবীদ্যের প্রতি সহানুভূতিশীল। নতুন একটা সমিতি স্থাপনের উদ্যোগও চলেছে। কাসিস্টবিরোধী সমিতি। তাঁরাও উদ্যোক্তাদের মধ্যে আছেন। স্বপনদা কিন্তু



সাতেও নেই পাঁচও নেই। তিনি রাজনীতির উর্ধ্বে। ক্লাবটিকেও বাঙ্গনীতির উর্ধ্বে বাখতে চান। কিন্তু সদস্যরা এ বিষয়ে একমত নন। অনেকেই নীরব সাক্ষী হতে নারাজ। যেমন আমি। স্বপনদা এতে ক্ষুব্ধ। সব হওয়া মানে সরকারের কণ্ঠস্বরের সঙ্গে কণ্ঠস্বর মিলিয়ে নেওয়া। আর সাক্ষীর ভূমিকা ছেড়ে সৈনিকের ভূমিকায় নামলে তো মসী ছেড়ে অসি ধরতে হয়। তার মানে সরস্বতীকে ছাড়পত্র দেওয়া। তা হলে কোন্ সুবাদে আমি ক্লাবের মেম্বর থাকব? মেম্বরশিপের একটা অলিখিত শর্ত হচ্ছে স্বাধীনভাবে মসীচালনা। এ ছাড়া আরো একটা শর্ত আছে।”

যুথিকা কৌতূহলী হয়। “জানতে পারি?”

‘তা হলে শোন।’ মানস বিশদ করে। “দেয়ালির রাতে একজনের দীপ নিবে গেলে সে আরেকজনের দীপ থেকে নিজের দীপ জালিয়ে নেয়। তেমনি সংস্কৃতির জগতেও এক দেশের দীপ থেকে আরেক দেশের দীপ। এক সভ্যতাব দীপ থেকে আরেক সভ্যতার দীপ। এমন করেই ইটালীতে ও অন্যান্য ইউরোপীয় দেশে রেনেসাঁসের দীপ জ্বলেছে। তার থেকে বাংলাদেশে তথা ভারতে। আমাদের রেনেসাঁস এখনো অসমাপ্ত। তাকে সমাপ্ত করার দায় আমাদের উপরে। তাই আমরা ইউরোপের দীপ থেকে আমাদের দীপ জালিয়ে নিতে সচেষ্ট। কিন্তু এখন দেখছি জার্মানীর দীপ নিবে গেছে। বুদ্ধিজীবীরা কে যে কোথায় পালিয়ে গিয়ে প্রাণরক্ষা ও সৃষ্টিরক্ষা করছেন তাব খবর মিলছে না। যারা দেশে পড়ে আছেন তারা হয় কারারুদ্ধ নয় রুদ্ধবাক্। সভ্যতা বলতেও দেশে বিশেষ কিছু অবশিষ্ট নেই। ফ্রান্সের দীপশিখাও নিবু নিবু। নাৎসারা আক্রমণ করলে প্যারিস কি প্রতিবোধ করতে পারবে? বুদ্ধিজীবীরা দোটিনায় পড়বেন। গড়বেন, না গা-চাকা দেবেন? পালাবাব অভিপ্রায় নেই। এ অবস্থায় ফ্রান্সের কাছ থেকেই বা আমরা নতুন কী পেতে পারি? বাকী থাকে ইংলণ্ড। বইপত্র ওদেশ থেকে কিছু কিছু আসছে। কিন্তু লিখছেন কারা, বেশী ভাগই তো যোগ দিয়েছেন সেনাবাহিনীতে বা দমকল বাহিনীতে বা বোমাবর্ষণের থেকে নাগরিকরক্ষা বাহিনীতে। অনবরত চর্চা না করলে সঙ্গীতেরও উন্নতি হয় না, চিত্রকলারও না, সাহিত্যেরও না। এই যুদ্ধ যদি চারবছর গড়ায় তো ইংলণ্ডের দীপশিখাটিও নিবে যাবে। ইংরেজদের কাছ থেকেই বা আমরা নতুন কী পেতে পারি? বুদ্ধিজীবীদের দিক থেকে বলছি, রাজনীতিকদের দিক থেকে নয়। তা হলে আমাদের ক্লাব আর প্রাচ্য প্রচীচ্যের মিলনকেন্দ্র হবে না। তার চরিত্র বদলে যাবে। স্বপনদা তার দায়িত্ব নিতে চান না। আমাকে ডাকছেন এর একটা

বিহিত করতে। আমবা কি পাট গুটিয়ে নেব না সুদিনেব ভবসায়. অস্তিত্ব বজায় রাখব ?”

যুথিকা চিন্তাশ্রিত হয়। “তা তুমি একবার কলকাতা ঘুরে আসতে পারো। স্বপনদা আর মুকুন্দদা দু’জনের সঙ্গেই ভাবাবিনিময় হবে। এখানে তো সরকারী মহলের বাইরে পা বাড়াবার জো নেই তোমাব। কিন্তু আমার একটি অনুরোধ রাখবে ?”

মানস ঠাণ্ডা করে। কিছু একটা কিনে আনাব বরাত। শানয়। জুঁলিকে খুঁজে বার করতে হবে। ও কেমন আছে ? ওর মা কেমন আছেন ? যুথিকাব মন কেমন করে।

শিয়ালদা দেশনে স্বয় স্বপনদা হাজির। দুই হাতে কাঁকানি দিয়ে অভ্যর্থনা জানান। “কী আফসোস, তুমি পরশু কিবে যেতে চাও ? আরো দু’তিন দিন থাকলে ভালো হতো না ? ক্লাবটার একটা সদগতি করতে হবে। আমাব ইচ্ছা নয় যে সেটা হয় একটা অ্যাটিকাসিস ফোরাম।”

স্বপনদার নিজের গাউ ছিল না। এক বন্ধুর গাটা। পবে যেতে যেতে মানস বলে, “ছুটি চাইলে পাওয়া যায়। কিন্তু মামলা পেছিয়ে দেওয়া আমি পছন্দ করিনে, স্বপনদা। কত লোকের কত ক্ষতি হয়। তা ছাড়া যুথিকা এখনো শোক কাটিয়ে উঠতে পারেনি। ওকে একলা রেখে আসা স্থথের নয়।”

“আখ, মানস, তোমাকে আমি ডিস্টার্ব করতুম না। কিন্তু অমোদের বন্ধুদের মনোভাব লক্ষ করে আমি হতাশ হয়ে পড়েছি। আমার মনে হচ্ছে আমি সব দিক থেকেই একটা ফেইলিওব। কোটে যাই আসি। পসার জমে না। তাই গাড়ী কিনতে পারিনে। ভাগ্যে একখানা বাডী আছে। বাবার সারাজীবনের সঞ্চয়ের ফল। ঠুঁরও তো বয়স হয়েছে। উনি আর কদিন ! বাবার আগে আমাকে সেটলড দেখে যেতে চান। আর সকলের মতো সুপ্রতিষ্ঠিত ও সংসারী। তোমার যেমন পুত্রশোক বাবার তেমনি পোজ শখ। কিন্তু বিয়ে আমার কপালে থাকলে তো ! যাক, ছেড়ে দাও ওকথা। এই ক্লাবটাই আমার সন্তান। এ যদি গত হয় আমিও শোকসন্তপ্ত হব। কিন্তু একে বাঁচিয়ে রাখা আমার একার সাধ্য নয়।” স্বপনদা খেদোক্তি করেন।

“কেন ? কী হয়েছে ? কেউ চাঁদা দিচ্ছে না ?” মানস অস্থায়ন করে।

“না, সেটা কোনো সমস্যা নয়। কিন্তু তুমি তো জানো আমার ব্রত হলো পূর্ব পশ্চিম মিলন। পশ্চিমের তিনটি দেশ আমি বিশেষ করে বেছে নিয়েছি। ইংলণ্ড, জার্মানী ও ফ্রান্স। ইটালীকেও বেছে নিতে চেয়েছিলুম। কিন্তু জোচের সঙ্গে

সাক্ষাৎ করতে গিয়ে যে শিক্ষা হয় তার পরে ইটালী সম্বন্ধে আমি হতাশ। ইটালী মজ্জেছে। মুসোলিনি ওকে মজিয়েছে।” স্বপনদা বিলাপ করেন।

“কই, আমাকে বলনি তো ক্রোচে তোমাকে কী বলেছিলেন?” মানস স্তূহায়।

“ক্রোচে আমার প্রশ্নের উত্তরে মুখে হাত চাপা দিয়ে ইঙ্গিতে বোঝান যে তিনি মোনীবাবা। লিখিত উত্তরও দেবেন না। মুসোলিনির নিষেধ। না মানলে দেশত্যাগ। এত বড়ো লাইব্রেরী ফেসে কোথায় তিনি যাবেন? তাঁর লাইব্রেরীই তাঁর বোধিবৃক্ষ। তেমনি আমারও। আমিও দেশত্যাগ করব না স্থির করেছি। তাই মৌনব্রত গ্রহণ করেছি। যুদ্ধই হোক আর বিপ্লবই হোক আমি নীরব সাক্ষী। কিন্তু আমার বন্ধুরা তা নন! তাঁরা সবাই সরব। কেউ কেউ তো সাক্ষী না হয়ে সক্রিয় হতে চান। এই যুদ্ধে অংশ নিতে আগ্রহী। তা না হয় হলো, কিন্তু পূর্ব পশ্চিমের মিলন ঘটল কোথায়? জার্মানীর সঙ্গে এডলে কি মিলন হয়, না বিরোধ হয়? ওঁরা বলেন বিরোধটা জার্মানীর সঙ্গে নয়, নাৎসীদের সঙ্গে। কেন, নাৎসীরা কি জার্মান নয়? দৃশ্যকর তারাই তো অধিকাংশ।” স্বপনদা তাই মনে করেন।

বালীগঞ্জে স্বপনদাদের বাড়ী। উপরতলায় থাকেন বাবা, নিচের তলায় ছেলে। মা নেই সং মা আছেন। মানস তাঁদের প্রণাম করে। অবসরপ্রাপ্ত বর্ষীয়ান অধ্যাপক যা বলেন তা মনে রাখবার মতো। “মানস, তোমার ছেলেদের আমি দেখেছি। কী স্নন্দর উত্তরেছে! ওঁইরকম আরো কয়েকটি তৈরি করো।” ভদ্রলোক জানেন না যে ইতিমধ্যে ওঁদের একটি এ ভগতে নেই। মানসের মনে লাগে।

কথাটা স্বপনদাকে শুনিয়ে শুনিয়ে। বেচারী মুখ বুজে পালান। মানসের স্নানাহারের আয়োজন করেন। আহারের সময় আবার সেই ক্লাবের প্রসঙ্গ। ক্লাব যদি লক্ষ্যভ্রষ্ট হয় তবে তাকে জাইয়ে রেখে কার কী লাভ? যাক না ওরা, অ্যান্টি-ফাসিস্ট সমিতি গড়ুক। সময়ের শ্রোতে গা ভাসিয়ে দিক।

মানস বলে, “ওঁরা যে জার্মানীকে ভালোবাসেন এটা যদি সত্য হয় তবে পূর্ব পশ্চিমের মিলনের পক্ষে এই যথেষ্ট নয় কি? জার্মানীকে ভালোবাসেন বলে কি নাৎসীদেরও ভালোবাসতে হবে? গের্নিকার উপর যারা অকারণে বোমাবর্ষণ করেছে তাদের ঘৃণা করা চলবে না? চেকদের স্বাধীনতা হরণ করার পরও ক্ষমা করতে হবে?”

“কিন্তু এটাও তো ভেবে দেখতে হবে যে ক্ষমাহীন ঘৃণার লজিকসম্মত পরিণাম কী। পরিণাম সংঘর্ষ, রক্তপাত, যুদ্ধ। নাৎসীদের সঙ্গে যুদ্ধ করা মানেই জার্মানদের

দক্ষে যুক্ত করা। তাতে শত্রুমিত্র নির্বিশেষে মরবে। তাদের ধরবাড়ী নির্বিশেষে ধ্বংস হবে। তাদের সভ্যতাও নির্বিশেষে লুপ্ত হবে। তা হলে মিলনটা হবে কার সঙ্গে কার ? মিলনের জন্তে যদি চাড় থাকে তবে আমার মতো মৌন হও। একমনে নিজের কাজ করে যাও। ক্রোড়ে যেমন করে গেছেন।”

স্বপনদার যুক্তি মানসের চিত্ত স্পর্শ করে। প্রসঙ্গটা পালটে দিয়ে সুধায়, “তোমার জার্মান বন্ধুবান্ধবীদের খবর পাচ্ছ তো ?”

“সরাসরি পাচ্ছিনে। সুইডেন বা সুইটজারলণ্ডের মাধ্যমে পাচ্ছি। ফ্রাউ নয়মানকে তোমার মনে আছে ?” স্বপনদা প্রশ্ন করেন।

“থাকবে না ? ওঁদের বাড়ীতে তিনদিন ছিলুম। কী বস্তু ! কী আদর ! ওঁর মা বাবা কি এখনো বেঁচে ? ওঁর স্বামী ডাক্তার নয়মান আমাকে পরীক্ষা করেছিলেন। আর ওঁর ভাই হাইনরিখ তো ছিল আমার নিত্য সঙ্গী। ওঁর মেয়েটির বোধহয় বিয়ে হয়ে গেছে। ছেলেটিও বড়ো হয়েছে এতদিনে।” মানস বলে যায়।

স্বপনদার মুখে বিষাদের প্রলেপ। “তুমি শুনে দুঃখিত হবে যে হাইনরিখকে যুদ্ধে ধরে নিয়ে গেছে। সে এখন ইস্টার্ন কি ওয়েস্টার্ন কোন্ ফ্রন্টে, জানিনে। যদি ওয়েস্টার্ন ফ্রন্টে নিযুক্ত হয়ে থাকে তবে বেলজিয়ান আর ফরাসীদের মারবে বা তাদের হাতে মরবে। দুই পক্ষই ক্যাথলিক। তা যদি বলো, পোলরাও ক্যাথলিক। ধর্মমত এ যুদ্ধে অবাস্তব। এ তোমার সপ্তদশ শতাব্দী নয়। এবারকার যুদ্ধের বিশেষত্ব ধর্মের গান নিয়েছে ইডিওলজি। অর্থাৎ কমিউনিজম অথবা ন্যাশনাল সোশিয়ালিজম। হাইনরিখ কখনো ইডিওলজি নিয়ে মাথা ঘামাত না। কিন্তু মন্দার সময় যাট লক্ষ বেকারের মধ্যে সেও ছিল একজন। নাৎসী দলে নাম না লেখালে বেকার দশা ঘুচবে না বলে নাৎসী বনে যায়। সেটা তো মন থেকে নয়, পেট থেকে। ওই মতবাদের কল্যাণে ক্যাথলিক হিটলার এখন প্রটেষ্ট্যান্ট জার্মানীর কর্ণধার হয়েছেন। ক্যাথলিক অস্ট্রিয়াকে একসঙ্গে মিশিয়েছেন। নাৎসী না হলে আর কেউ কি এ কাজ পারত ? বিস্মার্ক যে কাজ সমাপ্ত করে যেতে পারলেন না হিটলার তা পারলেন। এটা একটা অলিখিত ম্যাগুেট যা হিটলারকে নেতার আসনে বসায়। তেমনি আর একটা অলিখিত ম্যাগুেট ভেরসাই সন্ধি রদবদল করা। ইংলও ও ফ্রান্স এতে রাজী হলে ওয়েস্টার্ন ফ্রন্টে লড়াই অমনি বন্ধ হয়ে যাবে।”

মানস চমৎকৃত হয়। “আর ইস্টার্ন ফ্রন্টের লড়াই ?”

“বলা শক্ত। গত যুদ্ধের পর জার্মানীতেও কমিউনিস্টরা বিপ্লব বাধিয়েছিল, কিন্তু নকল হয়নি। তাদের ভয়েই তো লোকে নাৎসীদের দিকে ঝোঁকে। নাৎসীরাই

কমিউনিস্টদের বিপরীত মেরু, সোশিয়াল ডেমক্রাটরা নয়। জার্মানীর ভিতরেই একটা পোলারাইজেশন ঘটে গেছে। সোশিয়াল ডেমক্রাটরা ধুলিসাং। আর কখনো মাথা তুলবে না। আহা, কী স্থখের ছিল সেই দিনগুলি যখন আমরা ওদেশে ছিলাম! তুমি কয়েক সপ্তাহ। আমি ঘুরে ফিরে বছর দুই। এখন নাৎসীরা কমিউনিস্টদের ঘরে হারিয়ে দিয়েছে বটে, কিন্তু বাইরে হারিয়ে দেয়নি। ওদের ওটা তো একটা আন্তর্জাতিক মতবাদ। যেমন মুসলমানদের। ওদের মস্কা হচ্ছে মস্কা। ওদের হারিয়ে দিতে হলে মস্কা অবধি তাড়িয়ে নিয়ে যেতে হয়। পোলাও তার পথে পড়ে। আপাতত একটা চুক্তি হয়েছে বটে, কিন্তু আখেরে রাশিয়াতে জার্মানীতে বেধে যাবে। কমিউনিস্টে নাৎসীতে। পেছনে আরো অনেকে দাঁড়াবে। শেষ ফল কী হবে তা কে বলতে পারে! সেইজন্তেই বলছিলাম যে ইস্টার্ন ফ্রন্টের লড়াই বন্ধহবার নয়। যদিও ওয়েস্টার্ন ফ্রন্টের লড়াই থেমে যেতে পারে।” স্বপনদার অভিমত।

মানস একটু ভেবে নিয়ে বলে, সেটা জার্মানীর পক্ষে সুবিধের। কিন্তু ইংলণ্ড, ফ্রান্সের পক্ষে নয়। ফরাসীদের একটা বচন আছে—‘সাদোয়র পরে সেডান।’ উচ্চারণটা বোধহয় সেদা। সাদোয়াতে অস্ত্রিয়াকে হারিয়ে দিয়ে প্রাশিয়া সেডানে ফ্রান্সকে হারিয়ে দেয়। তেমনি পূর্বদিকের কোঁনো এক যুদ্ধে রাশিয়াকে হারিয়ে দিয়ে জার্মানী পশ্চিমদিকে ফ্রান্সকে হারিয়ে দেবে, ইংলণ্ডকে হারিয়ে দেবে। শুধু যে আলসাস লোরেন ফিরে পাবে তা নয়, উপনিবেশগুলো ফেবং পাবে। এ যুদ্ধ মাঝপথে থামবার নয়, স্বপনদা। ইংলণ্ড ও ফ্রান্স জার্মানীকে আরো বাড়তে দেবে না। দিলে ব্যালাস অভ পাওয়ার বিপদশ্রু হবে। কমিউনিজমের আতঙ্ক ওদের নেই। ফাসিজমকেই ওদের শঙ্কা। রাশিয়া বছং দূরে। জার্মানী নাকের ডগায়। যুদ্ধ কি কেবল মতবাদের সঙ্গে মতবাদের হব? জাতীয় স্বার্থও যুদ্ধ ডেকে আনে।”

“যে কথা তোমাকে বলতে যাচ্ছিলুম,” স্বপনদার মনে পড়ে, “হাইনরিখ্ যেমন পেটের দায়ে নাৎসী হয় তেমনি আবো লক্ষ লক্ষ তরুণ। তাদের আমি ঘৃণা করি কেমন করে? নাৎসী না হলে ওরা যে না খেয়ে মারা যেত। হিটলার ওদের অন্নদাতা। তবে এটাও ঠিক যে আরো লক্ষ লক্ষ তরুণ নাৎসী হয়েছে ভেরসাই সঙ্ঘি বরবাদ করার উদ্দেশ্য বা কমিউনিজমকে সমূলে বিনাশ করবার উদ্দেশ্যে। লজ্জার সঙ্গে স্বীকার করতে হচ্ছে যে আরো অনেক লক্ষ নাৎসী বনেছে ইহুদীদের ঘরবাড়ী চাকরিবাবরি কলকাবখানা দোকানপসার আত্মসাৎ করতে। যেহেতু তারা আর্য বংশ নয়, সেমিটিক বংশ। এতকাল জাতীয়তার আইন ছিল ius soli অর্থাৎ যে-দেশে যার ওন্ম সেই দেশের সে নাগরিক। এখন তার বদলে ius sanguinis প্রচার করা

হচ্ছে। জন্মভূমি অহুসারে নাগরিক নয়, রক্তধারা অহুসারে নাগরিক। ইহুদীদের রক্তধারা স্বতন্ত্র। সুতরাং ওরা জার্মান নাগরিক হবার অযোগ্য। যদিও ওরা দেড় হাজার বছর ধরে জার্মানীর অবিবাসী। জার্মানীতেই ওদের পুরুষানুক্রমে ভ্রম ও মৃত্যু। নাৎসীরা তাদের আর্থিক জাহির করার জন্তে স্বস্তিক ধারণ করে। সেটা সংস্কৃত শব্দ। শুভ আর অশুভ উভয়েরই প্রতীক। ডান দিকে মোড় না বাঁ দিকে মোড় সেই অহুসারে। নাৎসীদেরটা অশুভ।”

মানস সংশোধন করে। “শব্দটা সংস্কৃত, কিন্তু চিহ্নটা নিশ্চিতভাবে আর্থ নয়। আমেরিকার আদিবাসী ইণ্ডিয়ানদের মধ্যেও ওর প্রচলন। কিন্তু এ নিয়ে তর্ক করব না। আক্ষেপের সঙ্গে বলতে বাধ্য হচ্ছি যে ইহুদীরাও রাজা ডেভিডের পঞ্চকোণ তারকা ধারণ করে। ওদের অনেকের আহুগত্যা প্রাচীন জায়নের প্রতি, আধুনিক জার্মানীদের প্রতি নয়। ওরাও একটা হোমল্যান্ডের স্বপ্ন দেখছে। আর ওরাও আর্থ জাতিতত্ত্বের মতো ইহুদী জাতিতত্ত্বে বিশ্বাসী। ইংলণ্ডে ওরা ইংরেজ, ফ্রান্সে ফরাসী, জার্মানীতে জার্মান, কিন্তু সবত্র ইহুদী। সর্বত্র ওদের জাতি। যুদ্ধকালে কে ওদের বিশ্বাস করবে? কে জানে কার চর। নিষ্কটক হবার জন্তে নাৎসীরা ওদের বিদায় করে দিতে চাইছে। কিন্তু ওরা যাবেই বা কোথায়! যেখানেই যাবে সেখানেই বিরোধ বাধবে। এমন কি তাদের প্রাচীন হোমল্যান্ডেও। সেখানে এখন আরব বসতি। সেও প্রায় দেড় হাজার বছরের। আম তো এ সমস্যার কূল খুঁজে পাইনে। যদি না দুই পক্ষ মিশ্রণে সম্মত হয়। অর্থাৎ অতাবিবাহে।”

“তাতেও কি রক্ষা পাচ্ছে? টোমাস মান তো তাই করেছেন। এখন স্ত্রীপুত্র-কন্যার জন্তে দেশত্যাগ করতে বাধ্য হয়েছেন।” স্বপনদা ব্যতিত।

রাত্রে টেনে ভালো ঘুম হয়নি। মানস ছুপুরে একটু গভীর। তার উঠতে কিছু দেরি হয়। স্বপনদা চাবের টেবিলে প্রতীক্ষা করছিলেন। উঠে এসে জাগিরে তোলেন।

কথাপ্রসঙ্গে মানস বলে, “কই, ফ্রাউ নয়মানের কাহিনী শেষ করলে না তো?”

“ওনে দুঃখ পাবে। বাপ মা বুড়ো হয়েছিলেন, মারা যান। তার পর মারা যায় ছেলেটি। যার টি বি হয়েছিল। এখন ওই বিশাল বাড়ীতে উনি আর ওঁর মেয়ে মারিয়া। স্বামীর সঙ্গে বিচ্ছেদ ঘটে গেছে। তিনি আবার বিয়ে করেছেন। ছিলেন তো ঘরজামাই। সেটা বোধহয় মনোমালিগের হেতু। ওঁদের সঙ্গে তুমি তো মাত্র তিনদিন কাটিয়েছ। আমি পুরো সিমেন্টার। সেইখান থেকেই রোজ বহু বিশ্ব-বিদ্যালয়ে যাওয়া আসা করতুম।” স্বপনদা শ্রবণ করেন।

“আমি তো জানতুম হাইডেলবার্গ।” মানস জেরা করে।

“হাইডেলবার্গেও এক সিমেন্টার। জার্মানীতে আমি মোট চার সিমেন্টার পড়াশুনা করেছি। হাইডেলবার্গ, বন, বার্লিন আর লাইপৎসিগ। ওদের দেশে ওরা এক বিশ্ববিদ্যালয় থেকে আরেক বিশ্ববিদ্যালয়ে স্থানান্তরিত হতে দেয়। ক্রেডিটও মেলে। চারটেই যে কোনো একটার থেকে ডক্টরেট নিতে পারা যেত। কিন্তু ঐসিস লিখতে আমি গা করিনি। লিখলে জার্মান ভাষায় লিখতে হতো। আমার জার্মান বিজ্ঞা শতং বদ মা লিখ। ফরাসীও তাই। সরবনেও তো একবছর পড়েছি। বাকী একবছর গ্রেনোবলসে। ডিগ্রী চাইনি, পাইনি। বার-এ কল্ড হয়ে দেশে ফিরেছি। সেইটেই ছিল আমার আসল লক্ষ্য।” স্বপনদা স্মৃতিচারণ করেন।

চায়ের পরে মানস মুকুলদার সঙ্গে দেখা করতে যাবে ভেবেছিল। স্বপনদা ওকে উঠতে দেন না। “এইখানেই ক্লাবের মেম্বরদের সঙ্গে আড্ডা বসবে। মুকুলকে আমি কথা দিয়েছি কাল সকালে তোমাকে নিয়ে যাব ওর গুরুভগিনী মিসেস মুখার্জির ওখানে।”

এক এক করে সদস্য সমাগম হয়। মানসের সঙ্গে কারো কারো পরিচয় ছিল, কারো কারো নতুন করে ঘটে। জার্মানীফের্তাই বেশীর ভাগ।

“নীরব সাক্ষী হয়ে থাকা উটপাখীর মতো বালিতে মাথা গুঁজে থাকা। স্বপন হয়তো সেটা পারে, আমি তো পারিনি,” বলেন কান্তি পালিত। “হিটলার এসে ইতিহাসের চাকা ঘুরিয়ে দিয়েছে। জার্মানরা জাতকে জাত পেগান হয়ে গেছে। যীশুর ধর্মে বিশ্বাস করে না। যেহেতু তিনি ইহুদী। আর যেহেতু সে ধর্ম শক্তিমানেকে বিবেকবান ও হৃদয়বান হতে শেখায়। হিটলারের আদর্শ নাটশের সুপাবম্যান আর ভাগনারের অপেরার সিগ্‌ফ্রীড। আর ওঁর পূর্বসূরী বিসমার্কের মতো ওঁরও মূলমন্ত্র ‘রক্ত আর লোহ’। ওঁর লক্ষ্য আপাতত ইউরোপের উপর আধিপত্য। ‘আপাতত’ বলেছি, ‘আখেরে’ বলিনি। আখেরে রাশিয়ার সঙ্গে দ্বন্দ্ব ও রাশিয়া কুপোকাং হলে আমেরিকার সঙ্গে মুখোমুখি।”

বেণীমাধব কাজিলাল তা শুনে বলেন, “আমেরিকার সঙ্গে মুখোমুখির আগে আধখানা এশিয়া মুখে পুরবে। বুঝলে, স্বপন?”

“আমি নিয়তি মানি। যা হবার তা হবেই। তোমার আমার কথায় একচুলও নড়চড় হবে না। সেইজন্তেই চুপ করে থাকি।” স্বপনদার কৈফিয়ৎ।

“তোমাকে লক্ষ্য করেই জুলিয়া বাদা লিখেছিলেন তাঁর বিখ্যাত সন্দর্ভ। বাংলা করলে যার মানে দাঁড়ায় বুদ্ধিজীবীদের বিশ্বাসঘাতকতা। সঙ্কটের দিন চাচা আপনা

বাঁচা, সঙ্কট কেটে গেলে চুলচেরা বিশ্লেষণ। কেন অমন হলো, কেন তেমন হলো না। তখন সবাই মুখর। কিন্তু কার্যকালে যুক। বোবার শত্রু নেই, এই হচ্ছে তোমার পলিসি।” কাক্সিলাল খোঁচা দেন।

“ক্রোচেরও পলিসি তাই।” স্বপনদার সাফাই।

তা শুনে সরোজ পুরকায়স্থ মন্তব্য করেন, “আমি কিন্তু মেনে নিতে পারব না যে আজকের এই ঐতিহাসিক রক্তমঞ্চে আমার কোনো ভূমিকা নেই, আমার হান রক্ত-মঞ্জের বাইরে যেখানে দর্শকরা সমাসীন।”

সিদ্ধাডার খালা বাড়িয়ে দিয়ে স্বপনদা বলেন, “সবাই যদি রক্তমঞ্চে অভিনয় করতে যায় তো রক্ত দেখবে কে? মুচি আর মুদ্‌ফরাস, ভিস্তি আর ফিরিওরালা, মিস্তি আর ময়রা, দজি আর গয়লা এদেরও কি রক্তমঞ্চে তুলতে চাও? সবাই হবে অভিনেতা, দর্শক কেউ নয়? যুদ্ধ ব্যাপারটা কি একটা জেলপাড়ার সঙ, না একটা সীরিয়াস ব্যাপার?”

পুরকায়স্থ অপ্রস্তুত হন। “আমি কি তাই বলেছি? আমার বলার উদ্দেশ্য বুদ্ধিজীবীরা নিষ্ক্রিয়ভাবে ঘটনার সাক্ষী হতে পারেন না। তাঁদের অ্যাকশনে নামতে হবে। কেউ হয়তো অসি হাতে নিয়ে সৈনিক হবেন, কেউ হয়তো মসীকেই অসির মতো এফেকটিভ করবেন। সৈনিক যেমন নিষ্ক্রিয় থাকতে পারে না, থাকলে নিষীত পরাজয়, বুদ্ধিজীবীও তেমনি নিষ্ক্রিয় থাকতে পারে না। থাকলে নিশ্চিত পরাজয়। পরাজয়ের খুঁকি আগেকার যুগে নেওয়া হয়েছে, এযুগে নেওয়া যায় না। কারণ এযুগে রাজত্ব বদলে যাবার সঙ্গে সঙ্গে রাষ্ট্রের কাঠামো বদলে যায়, সমাজের বিচ্ছিন্ন বদলে যায়। এটা ইন্ডিওলজির যুগ। দরকার হলে মুচি আর মুদ্‌ফরাসকেও একভাবে না একভাবে লড়তে হবে। রম্মা রল' সেবার ছিলেন ‘অ্যাবড দ্য ব্যাটল’। এবার তা নন। তেমনি বারট্রাও রাসেল সেবার ছিলেন যুদ্ধের না হোক কনক্টিপশনের বিরোধী। তার জন্তে জেল খেটেছিলেন। এবার তিনিও নাৎসীদের বিরুদ্ধে যুদ্ধ সমর্থন করেন, কনক্টিপশনেও তাঁর আপত্তি নেই। “অ্যাবড দ্য ব্যাটল’ কি তবে তুমিই?”

স্বপনদা সেইসব মহান সাহিত্যিকদের সঙ্গে বন্ধনীভুক্ত হয়ে আত্মপ্রসাদ বোধ করেন। “আরে নাও, নাও, আর-একটা সিদ্ধাড়া নাও। ফুলুরি আসছে। কী যে বলো, আমি কি রাসেল বা রল'র সঙ্গে এক সারিতে বসার যোগ্য? গতবারের যুদ্ধে রিল্‌কের মতো কবিকেও কনক্টিপস্ট করা হয়েছিল। ফল কী হলো তাতে? অস্ট্রিয়া জিতল? মাঝখান থেকে কাব্যের ক্ষতি হলো। একবার ভেবে চাখ ক্রোবেরার যদি



অসিযুদ্ধ বা মসীযুদ্ধ চালাতেন তা হলে আর-একজন অসিযোদ্ধা বা মসীযোদ্ধা বাড়ত, কিন্তু কোথায় থাকত ‘মাদাম বোভারি’র মতো অপূর্ব সৃষ্টি ? ফরাসীরা কী নিয়ে আজ অবধি গর্ব করত ? কতক লোককে সৃষ্টির কাজ নিয়ে থাকতে হবে। যেমন নারীকে থাকতে হয় গর্ভধারণের কাজ নিয়ে, শিশুপালনের কাজ নিয়ে। তার বেলা সে-যুগ এ-যুগ নেই। শ্রষ্টারা সব যুগেই শ্রষ্টা, মাতারা সব যুগেই মাতা। তেমনি চানীকেও চায়বাস নিয়েই থাকতে হবে, নইলে সবাই অভুক্ত থাকবে, যোদ্ধারাও। তাঁতীকেও কাপড় বোনা নিয়ে থাকতে হবে, নইলে সবাইকে বস্ত্রস পরতে হবে, সৈনিকদেরও। মানুষ ফিরে যাবে কোন্ আদিযুগে, যদি যুদ্ধের দাবী সর্বগ্রাসী হয় ? আমি যুদ্ধবিরোধী নই। শান্তিবাদী নই। কিন্তু বিপ্লব শিল্প নিয়ে থাকতে চাই।”

তা শুনে আদিত্য বর্মণ সবাক হন। “আজকের দিনে বিপ্লব শিল্প বলে কিছু আছে নাকি ? পিকাসোকেও গের্নিকার ছবি এঁকে প্রতিবাদ জানাতে হয়। তাতে স্পেনের লোকের প্রতিরোধেরও শক্তি বাড়ে। অথচ কে বলবে যে সেটা শিল্প নয় ?”

‘রক্ষে করো।’ স্বপনদা বলেন, “পিকাসোকে আমার আদর্শ করতে যেয়ো না। উনি অসংখ্য ছবি এঁকেছেন, একখানা একটু অগুরুকম হলে কী আসে যায় ! আর আমি তো পরীক্ষার পর পরীক্ষা করেই চলেছি। ক্লাসিক লিখতে চাই, কিছুতেই পারছি।”

“আমি বলতে যাচ্ছিলুম যে আজকাল চিত্রকরকেও চিত্রের ভিতর দিয়ে সমকালীন ব্যাপারে বক্তব্য জানাতে হয়, স্বপনদা। নইলে তিনি এ যুগের লোক নন। তুমিও সেকেলে বলে গণ্য হবে। ক্লাসিকের দিন গেছে। পরে ফিরে আসতেও পারে, যদি সভ্যতা স্থিতি পায়। নাৎসীদের দৌরাণ্যে সভ্যতা বিপন্ন।” বর্মণ উদ্বিগ্ন।

তা শুনে স্বপনদা জলে ওঠেন। “সভ্যতা বিপন্ন কি শুধু নাৎসীদের দৌরাণ্যেই ? কমিউনিস্টদের দৌরাণ্যেও নয় ? ডেমক্রেট বলে যারা ঢাক পেটায় সেইসব প্লুটোডেমক্রেটদের দৌরাণ্যেও নয় ? যত দোষ নন্দঘোষ ! আমি তিন তিনটে দেশে চার চারটে বছর কাটিয়েছি। সাধারণ মানুষ কোথাও খারাপ নয়, ধনপতি গণপতি রণপতিরা কোথাও ধোয়া তুলসীপাতা নয়। সমস্তক্ষেপ যদি অস্ত্রপ্রতিযোগিতা চলতে থাকে তবে নিরস্ত্রীকরণ কি কোনোদিন সম্ভব ? একতরফা নিরস্ত্রীকরণ কোন্ রাষ্ট্র মেনে নিতে পারে ? জার্মানরা নাৎসী না হয়ে কমিউনিস্ট হলেও অস্ত্রবল বাড়াত, প্লুটোডেমক্রেট হলেও অলক্ষে তাই করত। প্রথম মহাযুদ্ধের পর ওই সোনার দিন-

গুলিতে আমি ইউরোপে ছিলাম। সেই স্বর্ণ স্বযোগ ইউরোপের লোক হেলায় হারিয়েছে। নিরঙ্কুশ অস্ত্র প্রতিযোগিতার অবশ্যজ্ঞাবী পরিণাম যুদ্ধক্ষেত্রে বলপরীক্ষা। দোষ ধরতে গেলে সকলেরই দোষ ধরতে হয়। বুদ্ধিজীবীরা যদি নীরব দর্শক না হয়ে দরব অভিনেতা হতে চান তো বাক্যবীর না হয়ে কর্মবীর হোন। ধর্মপাত করুন। যেমন করছেন গান্ধীজী। অন্তত একটা দেশকে অস্ত্র প্রতিযোগিতার থেকে বিরত থাকতে শেখাচ্ছেন। তোমাদের যুক্তিতর্কের সারমর্ম নো এই যে ভারতকেও অস্ত্র হাতে নিয়ে লড়তে হবে। আগুনে কাঁপ দিতে হবে। আমি কিন্তু আগুনে কাঁপ দিতে চাইনে। আমাব হাতে সৃষ্টির কাজ। সৃষ্টির অবহেলা করলে সভ্যতা বলে কিছু থাকবে না। এইচ জি ওয়েলসের ভাষায় আমিই সেই সভ্যতা যাকে বন্ধা করার জন্তে তোমরা লড়াই করছ।”

গরম গরম ফুলুরি খেতে খেতে নিখিল বাগচী চিবিয়ে চিবিয়ে বলেন, “ভাই স্বপন, তুমি যখন জামানীতে ছিলে তখন ওদেশের শাসকদের অধানে সেনাবাহিনী ছিল, পুলিশ বাহিনী ছিল, কিন্তু ছদ্মনামে একটা গুণাবাহিনী ছিল না। রাষ্ট্রের কর্তব্য ছিল দুষ্টির দমন ও শিষ্টের পালন, কিন্তু নাস্তী আমলে বেটা হলো সেটা দুষ্টির পালন ও শিষ্টের দমন। ইতিহাসে কোথাও এর নজির নেই, এক মুসোলিনির ফাসিস্ট ইটালী বাদে। এর যদি মূলোচ্ছেদ না করো তো এইটেই সব দেশের নিয়তি, ভারতও তাদের অন্ততম। এখন থেকেই জবাহরলাল তার লক্ষণ দেখে সরব। আমরা যারা দর্শক তারা পূর্ণাভাব দেখে শিউরে উঠছি। তবে অভিনেতা হবার মতো যোগ্যতা যে আমাদের সকলেরই আছে, তা নয়। যদি কেউ হতে চান তাঁর কাজ হবে যুদ্ধে যোগদান। যেমন জবাহরলালের।”

জবাহরলালের নাম শুনে তর্কবিভর্কের বাড় বয়ে যায়। মানবেন্দ্রনাথ কেন নন? স্ত্রীবাচস্প কেন নন? কেউ চান ঘোড়ার সামনে গাড়ী। কেউ গাড়ীর সামনে ঘোড়া। যুদ্ধের সামনে বিপ্লব। বিপ্লবের সামনে যুদ্ধ। মানস নীরব শ্রোতা।

স্বপনদা তার দিকে তাকান। “মামু, তুমিও কিছু বলো।”

মানস বলে, “মানবতার এত বড়ো সঙ্কট আর কখনো হয়নি। এত বেশী মানুষও আর কখনো অস্ত্র হাতে নেয়নি। এতরকম মারাত্মক অস্ত্রও আর কখনো তৈরি হয়নি। আজকের দিনে বুদ্ধিজীবীরা যদি উদাসীন থাকেন তবে ভাবীকাল তাঁদের কমা করবে না। যদি না তাঁরা যুদ্ধকালে একখানি অনবত্ত কাব্য উপন্যাস রচনায় নিমগ্ন থাকেন, যেমন রয়েছেন স্বপনদা। কিন্তু মুশকিল এই যে বাইরে যেমন সঙ্কট ভিতরেও তেমনি সঙ্কট। যারা স্বদেশের জন্তে অস্ত্র ধরেননি ও ধরবেন না তাঁরা

বিদেশের জন্যে অল্প ধরতে দেশের লোককে ডাক দেবেন কোন্ মুখে ? তা হলে কি তাঁরা এককভাবে লড়বেন ? লড়তে যারা প্রস্তুত নন তাঁরা কলরব করলেই কি নাৎসীরা নিরস্ত বা পরাস্ত হবে ?”

এর পরে আড্ডা জমে না। ঘর খালি হয়ে যায়। তখন স্বপনদা বলেন, “তুমি আজ আমার মুখরক্ষা করেছে, মাস্ত। অ্যাণ্টিফানিস্ট বলে যারা পরিচয় দিচ্ছেন তাঁদের অনেকেই বর্গচোরা কমিউনিস্ট। তাঁদের মতে হিটলার নাকি দানব আর স্টালিন নাকি দেবতা। হিটলারকে এঁবা ঋখবেন, স্টালিনকে ঋখবেন না। স্টালিন এসে আমাকে লিকুটডেট করাও আগেই আমি এই ক্লাবকে লিকুইডিশনে দিতে চাই।”

## ॥ একুশ ॥

আড্ডায় যে কথা অমুক্ত থেকে যায় সেকথা নৈশভোজনের সময় উত্থাপন করেন। স্বপনদা। “সভ্যতা বিপন্ন বলে রাত্রে ঘুম নেই কাদের? না বুদ্ধিজীবীদের। কী করে তুমি এঁদের বোঝাবে যে বিপদটাকে প্রতিদিন বাড়িয়ে তুলছেন সভ্য দেশের বুদ্ধি-জীবীরাই? নিত্য নতুন মারণাস্ত্র উদ্ভাবন করছেন কারা? সেসব অস্ত্র রণপতিদের হাতে ধরিয়ে দিচ্ছেন কারা? রণপতিরা যদি সেসব অস্ত্রের অপপ্রয়োগ করেন তবে সেই পাপের ভাগী হবেন কারা? একবারও তাঁরা চিন্তা করে দেখছেন না যে পরস্পরের বোমাবর্ষণে বিধ্বস্ত হবে লগুনের ব্রিটিশ মিউজিয়াম, প্যারিসের লুভর, ইটালীর ফ্লোরেন্স তথা রোমের অসংখ্য প্রাকীতি, জার্মানীর কোলন, মিউনিক, ড্রেসডেন ও ন্যূনবার্গের অমূল্য শিল্পসম্পদ। আর অস্ট্রিয়ার নগরীরানী ভিয়েনা। সভ্যতা বলতে কোথায় কতটুকু থাকবে যুদ্ধ যদি আরো দূরে ছড়ায়? মস্কো আর লেনিনগ্রাড যদি পুড়ে ছাই হয়? এই সর্বনাশ থেকে সভ্যতাকে বাঁচানোর উপায় কি সাহিত্যিককে সৈনিক করা ও সেই সৈনিকের উপর আকাশ থেকে বোমাবর্ষণের বরাত দেওয়া? তার চেয়েও আরো মারাত্মক কাজ খবরের কাগজে বা রেডিওতে মিথ্যা প্রচার করে জনমনকে বিযাক্ত করা। সাহিত্যিকরাও যদি পরস্পরের সঙ্গে পাল্লা দিয়ে এই অপকর্ম করতে যান তবে সর্বস্বতী তাঁদের ক্ষমা করবেন না। তাঁদের দিয়ে মহৎ কোনো সৃষ্টি হবে না। সভ্যতা তার সত্যতা হারাবে।”

মানস বলে, “তা কি কেউ অস্বীকার করতে পারে? তবু সভ্যতার এই সঙ্কটে উদাসীন থাকা যায় না, স্বপনদা। সৃষ্টির কাজ নিয়ে আমি ব্যাপ্ত থাকতে চাই, কিন্তু সমস্তরূপ অস্বস্তি বোধ করি। রোম পুড়ছে, নীরো বাঁশি বাজাচ্ছেন।”

“এর উত্তরে আমি বলব, ভিয়েনার উপর গোলাবর্ষণ হচ্ছে, বেঠোভেন কানে শুনতে

পাচ্ছেন না, একমনে পিয়ানো বাজিয়ে চলেছেন। অমর সঙ্গীত সৃষ্টি হচ্ছে।” স্বপনদা উদাহরণ দেন।

“সেটা সম্ভব হয়েছিল তিনি বধির ছিলেন বলে। নইলে তিনিও অস্বস্তি বোধ করতেন, স্বপনদা।” মানস স্থানান্তরিত।

“তা হলে তুমিও কানে তুলো গুঁজে চোখে ঠুলি পরে সৃষ্টির কাজ নিয়ে থাকবে। যুদ্ধের খবর তোমার কানে পৌঁছবে না, চোখে পড়বে না।” স্বপনদার পরামর্শ।

“চোখে ঠুলি পরলে লিখব কী করে?” মানসের প্রশ্ন।

“সে বিজ্ঞা তোমাকে অভ্যাস করতে হবে।” স্বপনদা হাসেন। ওটা একটা ধাঁধা।

“আমি তো কিছুতেই বুঝতে পারছি নে স্বপনদা, চোখ মুখ বুজে আমি কেমন করে সৃষ্টির কাজে তন্ময় হতে পারি। ওটা তো উটপাখীর মতো বালিতে মাথা গুঁজে থাকা। তুমি কি বুদ্ধিজীবীদের উটপাখী হতে বলবে? তা হলে সব চেয়ে অতন্ত্র প্রহরী হবে কারা? এটা সেকালের সেই মঠবাড়ীতে আবদ্ধ থাকার ঐতিহ্য। রেনেসাঁসের পর থেকে দেখা যাচ্ছে লেওনার্দো, মিকেল আঞ্জেলো প্রভৃতি শিল্পীরা স্টুডিও ছেড়ে বেরিয়ে পড়েছেন নাগরিক হিসাবে তাঁদের কর্তব্য করতে। দুর্গ নির্মাণ করতে, অস্ত্র ধারণ করতে।” মানস তর্ক করে।

“প্রাচীন গ্রীসেও তুমি তার নজির পাবে, মাহু। কিন্তু সেকালের যুদ্ধ একালের মতো এমন সর্বগ্রাসী ছিল না। কতক লোককে বীজধান রক্ষা করতে হবে, সেই বীজ থেকে নতুন ধান গজাবে। সেই কাজটাই বুদ্ধিজীবীদের প্রকৃত কাজ। নয়তো দেখবে বানের জলে সব ভেসে গেছে, বীজধানটুকুও নেই। যুদ্ধকালে চাষীকে চাষ করতে দেওয়া হয়, নইলে সৈনিকদের খোরাকে টান পড়ে। আমরাও আরেকপ্রকার খোরাক জোগাই। নইলে মনের খোরাকে টান পড়ে। মাহুষ তো কেবল কুটি খেয়ে বাঁচে না। সাধুসন্তরাও আরো একপ্রকার খোরাক জোগান। সেটা আত্মার খোরাক। তার জগ্রে মঠবাড়ীরও সার্থকতা আছে। হিটলার নাকি পাদ্রীদেরও যুদ্ধে টেনে নিয়ে যাচ্ছেন। চ্যাপলেন হবার জগ্রে নয়, অফিসার হবার জগ্রে। হিটলার খ্রিস্টধর্মে বিশ্বাসই করেন না। কিন্তু যারা করেন তাঁদের কর্তব্য কি হিটলারের শাসন মানা, না খ্রিস্টের অহুশাসন মানা? রুশদেশেও একই সঙ্কট। যীশু তো যীশু খোদ ঈশ্বরকেই কমিউনিস্টরা খারিজ করেছে। এখন আত্মার খোরাক, যে ধান সে ধানের বীজধান রক্ষা করবে কারা? কতক লোককে প্লাবনের দিন নোয়ার মতো ভেলা বানিয়ে ভাবী সৃষ্টির বীজধান বাঁচাতে হবে।”

দুই বন্ধুতে মতভেদ যখন গভীর থেকে গভীরতর হয়ে উঠছে তখন বসবার ঘরে টেলিফোন বেজে ওঠে। স্বপনদা উঠে যান। ফিরে এসে বলেন, “জুলি বলে কে একটি মেয়ে তোমাকে ডাকছে। ও কি তোমার জুলিয়েট না জুলেথা?” স্বপনদা রঙ্গ করেন।

“ওর নাম মঞ্জুলিকা সোম। বন্ধুপত্নী। যুথিকা আমাদের বনেছে ওর খোঁজ নিতে। ফোন করা হয়নি।” মানস উঠে যায়।

টেলিফোনে জুলি অভিমানের স্বরে বলে, “বেশ! বেশ মানসদা! এই তোমার বন্ধুতা! আমি যেমন তোমাদের ওখানে উঠেছিলাম তুমিও কেন আমাদের এখানে উঠলে না? অন্তত একটা খবর দিতে পারতে তোমার উঠবে। তা হলে আমি স্টেশনে গিয়ে তোমাকে রিসিভ করে সেই ঠিকানায় পৌঁছে দিই।”

“কিন্তু তুমি জানলে কী করে আমি কলকাতা এসেছি ও এখানে উঠেছি? আমার ইচ্ছে ছিল তোমাকে সারপ্রাইজ দেওয়া।” মানস বলে।

‘হা হা। ওটা আমার সীক্রেট। আমাদেরও একটা সীক্রেট সার্ভিস আছে। তোমার গতিবিধি আমরাও লক্ষ করছি।’ জুলি কৌতুক করে।

“এতই যদি জানতে তো স্টেশনে গেলে না কেন?” মানস জেরা করে।

“কারণ যুথীদির চিঠিখানা আমি সব বাড়া ফিরে পাচ্ছি। এই যা! ফাঁস হয়ে গেল আমার সীক্রেট। যাক। তুমি কি এখন ফ্রী আছো? দিনের বেলা আমি ফ্রী থাকিনে। কালকেও দিনের বেলা দেখা হবে না। হতে পারে রাত্রে এইরকম সময়। আমাদের এখানে ডিনারে আসবে? তোমার বন্ধুকে নিয়ে? বলা তো আমি তাঁকে আজ এখনি গিয়ে স্বয়ং নিমন্ত্রণ করি। তোমার সঙ্গে একরাশ কথা আছে, মানসদা।” জুলি এক নিঃশ্বাসে বলে যায়।

“চলে এসো।” মানস এককথায় উত্তর দেয়।

“জুলি আসছে তোমাকে স্বয়ং নিমন্ত্রণ করতে।” স্বপনদাকে বলে মানস।

জুলির পরিচিতি শুনে স্বপনদা বলেন, “ওর ভগ্নীপতির সঙ্গে ঘনিষ্ঠতা আছে। মহা ধুরন্ধর ব্যারিস্টার। আদালতে বেস্ট ড্রেসড মান বলে ওঁর সূখ্যাতি। কিন্তু দিনরাত মামলা মোকদ্দমা নিয়ে ব্যস্ত থাকার দরুন বোকে সময় দিতে পারেন না। বোকে বেড়াতে যেতে দেন জুনিয়রের সঙ্গে। বেড়াতে বেড়াতে বৌ একদিন হাওয়া।”

স্বপনদা হো হো করে হেসে ওঠেন। মানস স্তম্ভিত হয়।

“বোকে সময় দিতে পারো না তো বিয়ে করতে যাও কেন? সেইজন্মেই তো

ক্লোবেয়ার বিয়ে করেননি। নইলে লুইজ কোলে কি তাঁকে কম সাধাসাধি করে-  
ছিলেন? শেষে একদিন প্যারিস ছেড়ে তাঁর মফস্বলের বাড়ীতে গিয়ে হাজির।  
ক্লোবেয়ার সেই বিখ্যাত লেখিকাকে ঘাড় ধরে বার করে দেন। তা দেখে মর্মান্বিত  
হন তাঁর মা মাদাম ক্লোবেয়ার। ছেলেকে বলেন, তুমি আজ সমগ্র নারীজাতির  
অবমাননা করলে। কাজটা সত্যিই গহিত হয়েছিল, মানস। কিন্তু নিয়তি! নারীর  
মনোরঞ্জন করতে গেলে আটের বিঘ্ন হয়। আটের অধিষ্ঠাত্রী দেবীও এক ঈর্ষাপরায়ণা  
দেবী। আটের পূজারী হওয়াই তাঁর নিয়তি। তাঁর নিয়তিই তাঁকে নির্মম  
করেছিল। নয়তো সত্যিই কি তিনি হৃদয়হীন ছিলেন? যাকে শরৎ তন্নয় হয়ে  
ক্লাসিক লিখতে হবে সে নারীর দাবী যেটানোর জন্তে সময় পাবে কখন?” স্বপনদা  
বোধহয় নিজের নিয়তির ইঙ্গিত দেন।

মানস দুঃখিত হয়। “কিন্তু কথা হচ্ছিল জুলির ভগ্নীপতির।”

“হ্যাঁ, যা বলছিলুম। বৌ হাওয়া হয়ে যাবার পর চারদিকে টি টি পড়ে যায়।  
সে এক মহা কেলেক্কারি। হাইকোর্টে ডিভোর্সের মামলা। বারের মুখ চেয়ে জজ-  
সাহেব ক্যামেরাতে বিচার করেন। ডিভোর্সের পর দু’জনেই আবার বিয়ে করেন।  
জুলির দিদি হচ্ছেন দ্বিতীয় পক্ষ। তার কৰ্তা তাঁকে মাথায় করে রেখেছেন। আর  
সেই প্রথম পক্ষ পড়েছেন অনটনের কবলে। ওঁরা কলকাতা ছেড়ে চলে যান পাটনায়।  
সেখানে নতুন করে প্র্যাকটিস জমাতে কষ্ট হয়। দেখা গেল ধনের চেয়ে মনই বড়ো জিনিস।  
নারীর মন চায় পুরুষের মন। অনটনে পড়লেও তিনি অম্লতপ্ত নন। মা হয়েছেন।  
একেই বলে নিয়তি। সবই নিয়তি। সবই নিয়তির খেলা।” স্বপনদার জীবনদর্শন।

জুলিকে রিসিভ করে বসবার ঘরে নিয়ে যাওয়া হয়। মানস বলে, “ইনি আমার  
বন্ধু স্বপনদা। আর এই আমার বন্ধুপত্নী জুলি।”

জুলি একবার ভেবে নেয় কী করবে। পা ছুঁয়ে প্রণাম, না হাতঘোড় করে  
নমস্কার, না হাওশেক, না লাল সেলাম। তার পর হাওশেকের জন্তে ডান হাত  
বাড়িয়ে দেয়। “প্লীজড টু মীট ইউ, মিস্টার গুপ্ত।”

স্বপনদাও ব্যরিস্টারি ঢঙে জবাব দেন, “সো প্লীজড টু মীট ইউ, মিসেস সোম।  
আমি আপনার ভগ্নীপতিকে চিনি। এইমাত্র ওঁর কথা বলছিলুম।”,

“আমাকে মিসেস সোম বলে লজ্জা দেবেন না। আর আমাকে ‘আপনি’ বললে  
আমি আরো লজ্জা পাব।” এই বলে জুলি জাঁকিয়ে বসে।

তখন মানসকেই ব্যাখ্যা দিতে হয় যে বিয়ের অল্পদিন পরেই ওঁর স্বামীর সঙ্গে  
ছাড়াছাড়ি হয়ে যায়, তার পর ঘটে অকালবৈধব্য। তখন থেকেই ও কুমারী নাম

ব্যবহার করে আসছে। পিতৃপরিচয় ক্যাপটেন সিন্হা। সিভিল সার্জন। স্বর্গত।

“হাউ শ্রাড ! হাউ ভেরি স্যাড, মিস সিন্হা !” স্বপনদা প্রথমে ইংরেজীতে বলে পরে শুধরে নেন। “নিয়তি ! তোমার নিয়তি।”

“আমাকে জুলি বললেই আমি খুশি হব, মিষ্টার গুপ্ত। আরো খুশি হব, যদি আমাকে স্বপনদা বলার অধিকার দেন।”

“স্বচ্ছন্দে। তুমি আমাকে তুমি বললেও আমি রাগ করব না। বরং না বললেই রাগ করব, জুলি।” স্বপনদা অভয় দেন।

এর পর মানস বলে, “যুথিকা তোমার জন্তে বিষম উদ্ভিগ্ন। তুমি কি জেলে গেছ না জেলের বাইরে আছো না মাটির তলায় লুকিয়ে রয়েছ না দেশ ছেড়ে ফেরার হয়েছ ? একখানা চিঠি লিখতে সময় পাও না ?”

জুলি খিল খিল করে হেসে ওঠে। “কেন ? আমার কি ক্লাট করার বয়স গড়িয়ে গেছে ? না আমি দেখতে খুব বিশী ? না আমার বিবাহে বাধা আছে ?”

মানস অপ্রস্তুত হয়ে স্বপনদার দিকে তাকায়। স্বপনদা আশ্বাস দিয়ে বলেন, “আমরা কেউ কিছু মনে করব না। তুমি নির্ভয়ে বলে যাও।”

“মানসদা, তুমি তো জানো আমি একটা দলের সঙ্গে যুক্ত হয়েছি। দলের লক্ষ্য বিপ্লব। কিন্তু আগেকার মতো সম্রাসবাদী অর্থে নয়। এখন মার্কসবাদী অর্থে। তাই নিয়ে আমরা আজকাল সারাক্ষণ ব্যস্ত। আব কিছু পারি না পারি পুলিশকে কলুর চোখ ঢাকা বলদের মতো ঘোরাচ্ছি। ওরাও বিরক্ত হয়ে বলে, একটা কিছু ঘটচ্ছ না কেন ? আমরাও বিরক্ত হয়ে বলি, গান্ধী বুড়ো কেন ঘটাতে দিচ্ছে না ?” জুলি শুনিয়ে যায়।

“দেশ প্রস্তুত না হলে গান্ধীজী ডাক দেবেন না। আর প্রস্তুত বলতে তিনি বোঝেন অহিংস অর্থে প্রস্তুত। তোমরা ওঁর মুখের দিকে চেয়ে আছো কেন ?” মানস জানতে চায়।

“আমরা যদি আগ বাড়িয়ে আরম্ভ করি আর তিনি যদি বুকের মতো নিষ্ক্রিয় হয়ে বসে থাকেন তো আমরাই আইসোলেটেড হব।” জুলি অকপটে স্বীকার করে।

“তার মানে জনতা তোমাদের ডাকে লাড়া দেবে না।” মানস এই অর্থ করে।

“তার মানে গান্ধীজী ওদের হিপনোটাইজ করেছেন। এটা একটা আজব দেশ। এদেশে ভেক না পরলে ভিখ মেলে না। নির্বাচনে দাঁড়ালে ভোট মেলে না। কংগ্রেসের ডাক দিলে লাড়া মেলে না। গান্ধীজীর ভেক হচ্ছে খন্দের নেংটি। আর



খদ্বেষ টুপি। আমাদের বাধা হয়ে খাদি পরতে হচ্ছে, তবে নেটি পরতে কেউ বাজী নয়। সেইজন্মে তো আমরা হিপনোটাইজ করতে পাবছিনে। প্রতিদিন আমরা এব বৈজ্ঞানিক বিশ্লেষণ করি। বস্তুবাদী ব্যাখ্যা অন্বেষণ করি। কিন্তু সমস্তাব মীমাংসা মেলে না। গান্ধীজী থাকতে মিলবেও না।” জুলিকে শান্ত মনে হয়।

স্বপনদা মোনভঙ্গ কবেন। “ত্যাখ, জুলি, রুশ বিপ্লবের পরে জার্মানীতেও বিপ্লবের আগুন জ্বলি উঠেছিল। কিন্তু সঙ্গে সঙ্গে নিবে গেল। তোমাকে দেখে আমার রোজা লুকসেম্যুর্গের কথা মনে আসে। তুমিও তেমনি আদর্শবাদী এক বিপ্লবী নায়িকা। কিন্তু তাব আদর্শবাদ তাঁকে বাঁচাতে পারে না। তাঁর বিপ্লববাদ তাঁকে সাকল্য এনে দিতে পারে না। গান্ধীজী না থাকলেও যে তোমরা বিপ্লব ঘটাতে পারতে বা তাতে সফল হতে পাবতে তা নয়। তিনি আছেন বলেই তোমরা একটা অজুহাত দেখাতে পাবছ। হিপনোটাইজম দিয়ে এর ব্যাখ্যা হয় না। ভেক দিয়েও না। সোজা অর্থ এই যে কাইজারের শাসন জারের শাসনের মতো দুর্বহ ছিল না, ইংবেজের শাসনও জারের শাসনের মতো দুর্বহ নয়। যুদ্ধের চাপে যদি কোনোদিন দুর্বহ হয় তবে জনগণ তোমাদের ডাকেও সাড়া দেবে। তবে সব বিপ্লব সফল হয় না। ফরাসী বিপ্লবও শেষপর্যন্ত বিফল হয়। তোমাদের বিপ্লবেরও শেষ পরিণতি কী হবে কে জানে? গান্ধীজী সেইজন্মে বিপ্লবের নাম মুখে আনছেন না। তাঁব লক্ষ্য দেশের স্বাধীনতা। উপায় অহিংস সংগ্রাম। তাঁব সঙ্গে তোমাদের না উদ্দেশ্যেব মিল, না উপায়েব মিল। কেন তবে তোমরা তাঁর দোষ ধরছ?” স্বপনদা স্থান।

“কারণ তাঁর জন্মেই সময় বয়ে যাচ্ছে। সময় আর জোয়ার কাবো জন্মে সবুব করে না। ইংলণ্ডব দুর্গোগই ভাবতের স্বযোগ। এ স্বযোগ একবার হাতছাড়া হলে আবার মিলবে না। ইংলণ্ড সামলে নেবে। আমেরিকা সাহায্য করবে। ভারতব স্বাধীনতা এক পুরুষ পেছিয়ে যাবে।” জুলি আশঙ্কা করে।

“স্বাধীনতা পাওয়া যত না কঠিন রাখা তার চেয়েও কঠিন। দেখলে না তুমি পোলাণ্ডের কী হাল হলো। পোলাণ্ড দেড়শো বছর পরাধীন ছিল। তোমরা কি পোলদের চেয়ে বেশী সংগ্রাম কবেছ? পোলদেব চেয়ে বেশী নির্ধাতনে ভুগেছ? পোলদেব চেয়ে বেশী বীৰত্ব দেখিয়েছ? আগে স্বাধীনতাব যোগ্য হও। পরে স্বাধীন হবে। মওকার উপর যারা নির্ভর করে তাবা দুর্বল। তারা জুগাড়ি।” বলে স্বপনদা মাফ চান।

জুলি ক্ষুব্ধ হয়। কিন্তু প্রতিবাদ করে না। স্বপনদা তাকে সাহসনা দিয়ে বলেন,

“তোমার বয়স কম। তুমি অনায়াসেই আরো বিশবছর অপেক্ষা করতে পারবে। গান্ধীজীর বয়স ঢের বেশী। তিনি বিশবছর অপেক্ষা করতে পারবেন না, তার আগেই শেষবারের মতো লড়বেন। কত আর দেরি হবে! ততদিন তাঁর কথামতো কাজ করে।। তাঁকে পেছনে ফেলে তোমরা কেউ এগিয়ে যেতে পারছ না, পারবেও না। তুমি এত মিষ্টি মেয়ে, তুমি এর মধ্যে কেন? তোমাকে আমি উড়নচণ্ডী দেখতে চাইনে। চুলে চিহ্ননি পড়েনি কদিন?”

জুলি মনে মনে খুশি হয়। কিন্তু বিপ্লবী নায়িকার ভাষায় উত্তর দেয়, “দ্রোপদীর মতো আমি প্রতিজ্ঞা করেছি যে দেশ স্বাধীন না হওয়াতক কেশ বাঁধব না।”

“পাগল মেয়ে।” স্বপনদা স্নেহে বলেন, “তার আগে জট পাকিয়ে যাবে। থাকত যদি তোমার বৌদি তা হলে এছুনি ধরে নিয়ে গিয়ে মাথায় চিহ্ননি বুলিয়ে দিত। স্বাধীনতার অনেক দেরি। দিল্লী অনেক দূর।”

এরপর তিনজনে মিলে স্টাডিতে গিয়ে বসে। কফি আর ক্রীম পরিবেশিত হয়। চাকরকে দেখে জুলির খটকা বাধে। “স্বপনদা, বৌদি কোথায়? বৌদিকে দেখছিনে কেন?”

“বৌদি!” স্বপনদা সকৌতুকে বলেন, “বৌদি যে কোথায় তাই যদি জানতুম তবে এতদিন আইবুড় থাকতুম না।”

“ওঃ! তোমার বিয়েই হয়নি!” জুলি আশ্চর্য হয়। “কেন বলো তো?”

“কারণটা খুব সোজা। আমি যাকে চাই সে আমাকে চায় না। যে আমাকে চায় আমি তাকে চাইনে। এমনি করে প্রায় বড়ো হতে চললুম। তোমাকে একটা কবিতা পড়ে শোনাই। আমার নয়, আইরিশ কবি য়েটসের।” এই বলে স্বপনদা তাঁর বুকশেলক থেকে একখানা কাব্যসংগ্রহ পেড়ে নিয়ে আসেন। আর পড়েন।

“Pardon, old fathers, if you still remain

Somewhere in ear-shot for the story's end...

Pardon that for a barren passion's sake,

Although I have come close on forty-nine,

I have no child, I have nothing but a hook,

Nothing but that to prove your blood and mine.”

স্তব্ধতা ভঙ্গ করে মানস। “তোমার বয়স উনপঞ্চাশ নয়, তোমার আশা আছে। য়েটস তো ওই কবিতা লেখার তিন বছর বাদেই বিয়ে করেন। দুটি সন্তান হয়। কিন্তু তোমার যে আবার ভীষ্মের প্রতিজ্ঞা তুমি ফ্লোবেয়ারের মতো ক্লাসিক লিখবে।”

“সেটাই বা হচ্ছে কোথায় ? কেবল খলড়ার পর খলড়া মুসাবিদা করা চলছে।  
আমার পরিস্থিতিটা না ধরকা না ঘাটকা।” স্বপনদা স্বীকারোক্তি করেন।

“ওঃ।” জুলি সাধুনা দেয়। তার চোখে জল এসে পড়ে। মুখ ফুটে জানায় না  
যে তার নিজেরও সেই একই পরিস্থিতি।

বইধানার পাভা ওলটাতে ওলটাতে এক জায়গায় মানসের দৃষ্টি আটকে যায়। সে  
জুলির দিকে তাকায় আর তাকে শুনিয়ে শুনিয়ে উচ্চারণ করে—

“Dear shadows, now you know it all,

All the folly of a fight

With a common wrong or right.

The innocent and the beautiful

Have no enemy but time...”

মানস পড়া শেষ করে বলে, “জুলি, ওটা তোমাকেই উদ্দেশ্য করে লেখা হয়েছে।  
মনে রেখো, তোমার আর কোনো শত্রু নেই, তোমার একমাত্র শত্রুর নাম সময়।”

স্বপনদারও চোখে জল এসে পড়ে। “জুলি, তুমিও সময়ে সচেতন না হলে ওই  
দুটি স্তন্দরী মেয়ের মতো শুকিয়ে কঙ্কালসার হয়ে যাবে। দেশের স্বাধীনতা অপেক্ষা  
করতে পারে, নারীর যৌবন অপেক্ষা করতে পারে না।”

জুলি দুই হাতে দুই চোখ চেপে ফুঁপিয়ে ফুঁপিয়ে বলে, “তুমি কি জানো না,  
মানসদা, কেন আমাব এই দশা। কেন তবে নাকাল কবতে যাও। আর স্বপনদা,  
তুমি যদি সব কথা জানতে তা হলে আমাকে ভুল বুঝতে না।”

এর পর জুলি স্বপনদাকে ও মানসকে পরের দিন ডিনারের নিমন্ত্রণ করে বিদায়  
নেয়।

মানসের ঘুম পেয়েছিল। সে উঠতে চায়, কিন্তু স্বপনদা তাকে ছাড়বেন না।  
শুনতে হবে তাঁর বহুদিনের না বলা কথা।

“ভ্যানিটি অভ্ ভ্যানিটিজ। অল ইজ ভ্যানিটি !” স্বপনদা দীর্ঘশ্বাস ফেলেন, “যেন  
আমার একার মাথাব্যথা, আর কারো নয়।”

“কোন্ প্রসঙ্গে বলছ ?” মানস ঠাহর করতে পারে।

“প্রাচ্য পাশ্চাত্য সমন্বয়। যার স্বপ্ন ছেলেবেলা থেকে এসেছি। এমন করে  
স্বপ্নভঙ্গ হবে কে পেয়েছিল ভাবতে। আমার চারিদিকের বাতাসে আজ কী উৎকট  
ইংরেজ বিশেষ ! যেন ওরা অমরত্বের প্রতীক। শনি কিংবা রাহু। ওদের গ্রাস  
থেকে দৃঢ় হলোই বাঁচি। ওরা যে ইউরোপীয় সভ্যতার দূত একথা বলতে গেলে

উলটো বুঝলি রাম। গোটা ইউরোপীয় সভ্যতাই অসভ্যতা। ইউরোপ বলতে ওরা বোঝে সাম্রাজ্যবাদ, ধনতন্ত্রবাদ, বস্তুবাদ, ভোগবাদ। আর আমি বুঝি প্রাচীন গ্রীস ও রোম যার প্রতিভূ হোমার ও ভার্জিল, তার সঙ্গে যোগ দিয়েছে জুডিঘা থেকে আগত খ্রীস্টধর্ম, যার প্রতিভূ দাস্তে। এই ত্রিবেণীসঙ্গমের থেকে উথিত বেনেসাঁস, রেফরমেশন ও এনলাইটেনমেন্ট। যার প্রতিভূ শেক্সপীয়ার, রুশো, গ্যেটে। এঁদের বর্জন করে কি কোনো সমস্বয় হতে পারে? কিন্তু গ্রহণশীল মনোভাবটা আজ কোথায়? বিশ্বজুড় ভারতীয় সভ্যতার স্বপ্নে যারা বিভোর তাঁদের আমি কেমন করে বোঝাব যে আলেকজান্ডারের সঙ্গে আগত হেলেনিক প্রবাহকে প্রাচীন ভারত বিজেতা বলে বর্জন করেনি, আরব ইরান তুর্কিস্থান থেকে আগত সারাসেনিক মোহম্মদী বর্ষণকে মধ্যযুগের ভারত বিধর্মী বলে বর্জন করেনি, তা হলে ব্রিটেন থেকে আগত আধুনিক ইউরোপীয় ভাবধারা তুমি বিদেশী বলে বর্জন করবে কোন যুক্তির জোরে? বিদেশী বস্ত্র বা বিদেশী লবণ বর্জন করা এক জিনিস, তা দিয়ে স্বদেশী শিল্পের সংরক্ষণ হয়, শিল্পীদের প্রতিপালন হয়। কিন্তু সেই যুক্তি কি বিদেশী জ্ঞান বিজ্ঞানের বেলা খাটে? বিদেশী কাব্য নাটকের বেলা? সেসব অণু জিনিস। তার যেটুকু আমরা গ্রহণ করেছি তার সংযোগে কি আমাদের যাবনী মিশাল সংস্কৃতির নব রূপান্তর ঘটেনি? বলতে পারো, এই যথেষ্ট নয়, কিন্তু বলতে পারো কি, এটা সত্য ও সৌন্দর্যহীন ব্যর্থ অহুসরণ? বিজাতীয় উন্নয়নগামিতা?”

“কে বলছে এমন কথা, স্বপনদা? আমি তো বলিনি।” মানস ক্ষুব্ধ হয়।

“না, তোমাকে দোষ দিচ্চিনে।” স্বপনদা শুধরে দেন। “প্রজেক্ট কম্পানী অলওয়েজ এক্সেসপ্টেড। তুমি তো আমার দিকে। কিন্তু অণু দিকে যারা আছেন তাঁরা খোদ রবীন্দ্রনাথেরই মহিমা অস্বীকার করছেন। রবি বাদ দিলে কী বাকী থাকে চন্দ্র। বঙ্কিমচন্দ্র, শরৎচন্দ্র। চন্দ্রকেও অনেকে বুজোঁয়া বলে বাতিল করবেন। চন্দ্রকেও বাদ দিলে বাকী থাকে কী? তারা। যাক, আমি আর নাম করব না। পাছে কেউ ভাবে আমি তাঁদের প্রতিদ্বন্দ্বী। না, আমি কারো প্রতিদ্বন্দ্বী নই। আমি সকলের সঙ্গেই মিশি, সকলেরই তারিফ করি। সকলেই যে যার বক্তব্য বলছেন, আমি মন দিয়ে শুনছি। কিন্তু আমার সাধনা আমার নিজস্ব। এই যে লাইব্রেরী দেখছ এর গ্রন্থরাজি থেকে আমি তিল তিল করে রূপ আহরণ করে তিলোত্তমা সৃষ্টি করছি। তেমনি জীবনের বিচিত্র অভিজ্ঞতার থেকে বিন্দু বিন্দু করে রস আহরণ করে সেই তিলোত্তমাকে মাধুরী অভিষিক্ত করছি। আমারও কিছু দেবার আছে। সে দান আমি যদি না দিই আর কে দেবে? তাই আমি অনন্ত। শুধু আক্ষেপ আমার এই যে মনের মতো পাঠকমণ্ডলী নেই।”

“আচ্ছা, মুকুলদা,” মানস জিজ্ঞাসা করে, “তুমি যে লিখেছিলে শ্রী অরবিন্দ এই যুদ্ধে ইংরেজদের পক্ষে যোগদানের পক্ষপাতী সেটা কি নিঃশর্তে না শর্তাধীন ভাবে? যদি নিঃশর্তে হয়ে থাকে তো দেশের স্বাধীনতার সংগ্রাম কি ব্যাহত হবে না?”

মুকুলদা এর উত্তরে বলেন, “তোমার এই প্রশ্ন শ্রী অরবিন্দের কাছে আরো আগে আরো অনেকে করেছেন। তাঁর মতো গ্রাশনালিস্ট কে? কিন্তু সেটাই কি তাঁর একমাত্র পরিচয়? তাঁর মুখের দিকে চেয়ে আছে নানা দেশের জিজ্ঞাসু মানুষ। তিনি কি শুধু দেশপ্রেমিক, মানবপ্রেমিক নন? তিনি কি কেবল গ্রাশনালিস্ট, ইন্টারগ্রাশনালিস্ট নন? সব দিক বিবেচনা করে তিনি এই সিদ্ধান্তে পৌঁছেছেন যে ভারত স্বাধীন হলেও নিরপেক্ষ থাকতে পারবে না, নিরপেক্ষ থাকাটা একটা পাপ, কারণ এই যুদ্ধটা হচ্ছে একটা মহাভয়ঙ্কর অশুভ শক্তির সঙ্গে একটা কম ভয়ঙ্কর অপেক্ষাকৃত শুভ শক্তির। এককথায় কৌরবের সঙ্গে পাণ্ডবের। ভারতের ভূমিকা হচ্ছে কুরুক্ষেত্রে শ্রীকৃষ্ণের। তাই যদি হয়ে থাকে তবে স্বাধীনতা পেলেও ভারত লড়বে, না পেলেও লড়বে। আর মিত্রপক্ষেই লড়বে। স্বাধীনতার জন্তে সংগ্রাম আপাতত অবাস্তব। আগে তো অশুভ শক্তি পরাভূত হোক, বিশ্বমানব মহাভয় থেকে পরিত্রাণ পাক। তার পরে ভারতের স্বাধীনতার দাবী আরো জোরালো হবে। সে দাবী কেউ প্রতিরোধ করতে পারবে না। স্বাধীনতা আপনি আসবে।”

এবার স্বপনদা মুখ খোলেন। “তার মানে স্বাধীনতার জন্তে আর কখনো সংগ্রাম করতে হবে না। বিনা শর্তে যুদ্ধে যোগদানের ফলে বিনা শর্তে স্বাধীনতালাভ। কিন্তু, মুকুল, দেশের লোক যে ইংরেজদের শুভবুদ্ধির উপর আস্থা রাখতে পারছে না। গোটা ইউরোপীয় সভ্যতাটাকেই অভিশপ্ত ও পতনোন্মুখ ভাবছে। তা নইলে এঁরাই বা ইউরোপ ছেড়ে ভারতে বনবাস করতেন কেন? আমরা যারা ইউরোপের গুণমুগ্ধ তারা পড়ে গেছি বিষম সঙ্কটে। এ সঙ্কট কায়িক নয়, মানসিক। ইংরেজরা লড়ছে স্বাধীনতার ইচ্ছাতে, গণতন্ত্রের ইচ্ছাতে। আমরা যদি তাদের পক্ষে অস্ত্র ধরি ও প্রাণপাত করি তবে সেটাও স্বাধীনতার ইচ্ছাতে, গণতন্ত্রের ইচ্ছাতে। কিন্তু ইংরেজের পক্ষে যেটা সত্যিকার আমাদের পক্ষে সেটা অভিনয়। গান্ধী, সুভাষ, জবাহরলাল অভিনেতা নন, দেশনেতা। দেশের লোক এঁদের মুখের দিকে চেয়ে আছে। দেশবাসীর কাছে এঁরা সত্যবদ্ধ। কেমন করে এঁরা সত্যভঙ্গ করবেন? আমার দুঃখ হচ্ছে এই ভেবে যে ইংরেজদের সঙ্গে আমাদের অন্তরে অন্তরে একটা বিচ্ছেদ ঘটে যাচ্ছে, যদিও এত ভালোবাসি ওদের সাহিত্য, ওদের আইন, ওদের পার্লামেন্টারি সিস্টেম। নিয়তি! আমাদের নিয়তি।”

## ॥ বাইশ ॥

এর পবে কখন একসময় অল্পরাগীদের অল্পরোধে গানের আসর বসে। মুকুলদার সঙ্গে যোগ দেন তাঁর প্রিয় শিষ্য মাধুরী। ভিড বাড়তে বাড়তে ঘর ভরে যায়। বারান্দায় উপচে পড়ে। “এ যে দেখছি অভিমুখ্যর ব্যুহ।” মানস কানে কানে বলে স্বপনদার। “চল, পালাই” স্বপনদার উত্তর। সঙ্গে সঙ্গে প্রস্থান।

“এটা আমি শিখেছি গ্যোটার কাছ থেকে।” স্বপনদা বলেন। “যখন মনে হবে তুমি অবরুদ্ধ তখন সাত পাঁচ না ভেবে দৌড় দেবে। প্রেমিকাদের দিকে ফিরেও তাকাবে না। ফ্লাইট। তোমাব মূলমন্ত্র হবে ফ্লাইট।”

“তোমার বয়সে ওঁকেও সংসাব পেতে বসতে হয়। যদিও বিবাহস্থত্রে নয়। পরে পুত্রকলজের নিরাপত্তার কথা ভেবে বিয়ের মন্ত্রও পড়েন। ফ্লাইট তোমার জীবনে যথেষ্ট হয়েছে। এবার একটু গুছিয়ে বসলে গ্যোটার মতো তুমিও সৃষ্টির কাজে মগ্ন হতে পারবে।” মানস মন্তব্য দেয়।

“ছাখ, মাহু। এটা ইউরোপ নয়। আগে একসঙ্গে বসবাস, বনিবনা হলে তার পরে বিয়ে, ওদেশে ওটা জলচল। এদেশে নজির থাকলে না হয় ভেবে দেখা যেত। চোখ বুজে বিয়ে করলুম, তার পরে দেখলুম বনিবনা হচ্ছে না, তখন কোথায় তোমার মুক্তি? কোথায় তোমার শান্তি?” স্বপনদা দীর্ঘশ্বাস ফেলেন।

“বিবাহের বেলাও নিয়ম হচ্ছে, নো রিস্ক নো গেন। তোমাকেও রিস্ক নিতে হবে। গেন যদি না হয় তবে ডিভোর্সের কথা ভাবা যাবে। সমাজ তো অনেকটা উদার হয়েছে।” মানস প্রবোধ দেয়।

“ছাই উদার হয়েছে! হিন্দু আইনে এখনো ওটা নিষেধ। আর ব্রাহ্মরাও তেমনি পিউরিটান। চরিত্রদোষ দেখাতে না পারলে তো ডিভোর্স হয় না। আমার উনি

যদি নির্দোষ হন আমি কোন্ মুখে ডিভোর্স চাইব ? তা হলে আমাকেই দোষী হতে হয়। অস্তুত দোষী সাজতে হয়। তা হলেও কি উনি আমাকে ত্যাগ করতে রাজী হবেন ? বিলেতে ওরা নিজেদের মধ্যে চক্রান্ত করে। দোষী না হয়েও স্বামী কলঙ্ক মাথায় নেয়। স্ত্রী মুক্তিপণ আদায় করে। ছু'জনই আবার সংসার পাতে। যদি সাথী জোটে। স্বীর পক্ষে সেটা তেমন সহজ নয়। ছেলেমেয়ে হয়ে থাকলে তাদের রক্ষণাবেক্ষণ নিয়েও বামেলা। না, মামু, আমি কখনো আমার ছেলেমেয়েদের হাতছাড়া করব না।” স্বপনদার দুর্জয় পণ।

মানসের মনটা উদাস হয়ে যায়। সেও কি পারবে তার ছেলেমেয়েদের হাতছাড়া করতে ? কিন্তু দূর হোক সে চিন্তা ! বিয়ে তার সুখেরই হয়েছে। কেউ কাউকে ছেড়ে একটা দিনও থাকতে পারে না। এই যে ছু'দিনের ছুটি নিয়ে কলকাতায় এসেছে মানস এর মধ্যেই ফিরে যাবার জন্তে পিছুটান শুরু হয়েছে।

“ও প্রমত্ত থাক।” স্বপনদা দীর্ঘশ্বাস ফেলেন। “মুকুলের বিশ্বাস ধর্মের প্রেরণা থেকেই মহৎ আর্টের উদ্ভব। সেইজন্তে সে পণ্ডিচেরী গিয়ে শ্রী অরবিন্দের কাছে দীক্ষা নিয়েছে। তবে বিরজা হোম করে সন্ন্যাসী হয়নি। মুকুল সাধু নয়, সাধক। আর তার বন্ধু কৃষ্ণপ্রাণ সাধক তথা সাধু। কিন্তু আমার তো বিশ্বাস হয় না যে ধর্মের সাধক হলেই সঙ্গীতের সাধনাতেও মহত্তর সিদ্ধিলাভ ঘটে। কই, বেঠোভেনের জীবনে ধর্মের প্রভাব কোথায় ? মানছি, সেটা ছিল বাধু-এর জীবনে। অনেকের মতে তিনি বেঠোভেনের চেয়েও বড়ো। কিন্তু তাঁর পরবর্তীকালে মহৎ সৃষ্টি ধারা করেছেন তাঁদের কেই বা ধর্মের দ্বারা অনুপ্রাণিত ? আমার কাছে একরাশ রেকর্ড আছে। শুনবে ?”

“জুলিদের ওখান থেকে ফিরে এসে শোনা যাবে রাজে।” মানস কথা দেয়।

ম্যাণ্ডেভিল গার্ডেনসের পেছনের সারির একটি বাংলায় থাকেন সন্তোষক মিসেস সিন্হা ও তাঁর এক সম্পর্কীয়া দিদি মিসেস নন্দী। জুলির মা ও মাসিমা। জুলির বাবার সম্পত্তি। রাতের বেলাটা জুলিকে এইখানেই পাওয়া যায়। দিনের বেলা সে নিখোঁজ।

সেদিন সন্ধ্যাবেলা স্বপন আর মানস সেখানে গিয়ে সাদর অভ্যর্থনা পায়। জুলি তখনো বাড়ী ফেরেনি। তার মা ও মাসিমা ওদের ছু'জনকে ছু'পাশে বসিয়ে কুশলপ্রশ্ন করেন ও বেয়ারাকে ডেকে পানীয়ের ফরমাস দেন। ছু'জনই বিধবা।

“তোমাকে আমার বেশ মনে আছে, মানস। একবার আমাকে তুমি ছাতা ধরে টিউব স্টেশনে পৌঁছে দিয়েছিলে। সে কি আজকের কথা। কেটে গেছে বছর

এগারো বারো। ছুলাল তখন বেঁচে। আহা, বেচারি ছুলাল!” বিনীতা সিন্হা  
ঝুমালে চোখের জল মোছেন।

“হ্যাঁ, আমারও মনে আছে, মিসেস সিন্হা।” মানস স্মরণ করে।

“আবার মিসেস সিন্হা কেন? তখন তো মাসিমা বলতে। ছুলাল ছিল তোমার  
প্রাণের বন্ধু। তা হলে তার শাশুড়ী কেমন করে তোমার পর হয়?” অকাট্য  
যুক্তি।

“এখন মনে পড়ছে, মাসিমা।” মানস শুধরে দেয়।

“কিন্তু তোমাকে তো ওদেশে দেখেছি বলে মনে হয় না, স্বপন। তোমাকে তুমি  
বলছি বলে কিছু মনে করছ না তো?” বিনীতা বিনীতভাবে বলেন।

“না, মিসেস সিন্হা। তুমি না বলে আপনি বললেই কষ্ট পাব। আপনার মেজ  
জামাই আমার দাদার মতো। একসঙ্গে কত মামলায় লড়েছি। কখনো কখনো  
বিপক্ষেও। আপনি আমার পূজনীয়।” স্বপনদা মিসেস নন্দীর দিকে চেয়ে বলেন,  
“আপনিও।”

“তা হলে শোন, বাবা স্বপন। তুমি আমাকে মাসিমা বলে ডাকতে পারো।  
আর আমার শোভনা দিদিকেও। তোমাদের দু'জনকে দেখে আমরা যে কত খুশি  
হয়েছি তা কি বলবার? কিন্তু তোমাকে কি আমি আগে কোথাও দেখেছি?  
কবে দেখেছি, বলতে পারো? চেনা চেনা ঠেকছে কেন?” বিনীতা মাসিমা  
স্বধান।

“আমিও তাই ভাবছি। কিন্তু আপনারা যে সময় বিলেত যান তার আগেই  
আমি ইউরোপ ছাড়ি। আমার চার বংরের মেয়াদ পার হয়। বেশীর ভাগ সময়  
থাকতুম কন্টিনেন্টে। মারো মারো লগনে গিয়ে টার্ম রাখতুম। তা হলে আপনাকে  
আমি দেখেছি আরো আগে কিংবা আরো পরে। কিন্তু কোথায় ও কবে?”  
স্বপনের জিজ্ঞাসা।

“আচ্ছা, তুমিই বিশ্ববছর আগেকার সেই তরুণ চিত্রকর স্বপন নাগ না? ফোর  
আর্টস ক্লাবের বৈঠকে প্রায়ই যোগ দিতে। চেহারি বদলে গেলেও চেনা যায়।”  
বিনীতা মাসিমা বলেন।

“আপনি যার কথা বলছেন তার নাম গোকুল নাগ। আমরা তো নাগ নই,  
গুপ্ত। আর আমি তো চিত্রকর নই, সাহিত্যিক।” স্বপনদা শুধরে দেন।

“হ্যাঁ, হ্যাঁ, তুমি কী যেন একটা নভেল লিখে খুব নাম করেছিলে। কিন্তু তার  
পরে তুমি কোথায় হারিয়ে গেলে। ক্লাবটাও উঠে গেল। এখনো আমি ভুলতে



পারিনি সেই শব্দ। বুঝলে, দিদি। এরা ক'জন মিলে যে চমৎকার ক্লাবটা গড়ে তুলেছিল তার সুযোগ নিয়ে লীলাখেলা শুরু করে দেয় অচ্যুত কয়েকজন। তার। বয়সে বড়ো! বিবাহিত বিবাহিত। ছেলেমেয়ের বাপ মা। একদিন শোনা গেল ক্লাবের প্রাণপ্রতিমা সুবি চার্টার্ড ও প্রবীণ সদস্য শিবু গোস্বামী ইলোপ করে উধাও। এদের বয়সী কুমার কুমারী হলে কেউ শব্দ পেতো না। কিন্তু দু'জনেরই ঘরে বৌ আছে, বর আছে, ছেলেমেয়ে আছে। কী ঘেরা। এর পরে কি ক্লাব চলতে পারে? সবাই সবাইকে সন্দেহ করতে শুরু করে। কার মনে কী আছে কে জানে! তেঁমার কি সেসব কথা মনে আছে, স্বপন?" জুলির মা স্থান।

“আছে বইকি, মাসিমা। কিন্তু ক্লাবের কল্যাণে কয়েকটি ভালো বিয়েও তো হয়েছিল। যেখানেই কিছু ভালো সেখানেই কিছু মন্দ, এটাই তো দুনিয়ার রীতি। আমাদের ক্লাবও তার ব্যতিক্রম নয়। এ রকম ঘটনা কোথায় না ঘটছে, কবে না ঘটছে? সেকালের সবচেয়ে সুন্দরী যে হলেন আর সব চেয়ে সুপুরুষ যে পারিস তাঁরাও তো ইলোপ করে উধাও হয়ে যান। তাই নিয়ে বেধে যায় ট্রয়ের যুদ্ধ। আর সেই যুদ্ধ নিয়ে অমর কাব্য ইলিয়াড রচনা করেন হোমার। ওঁরাও ছিলেন বিবাহিতা নারী ও বিবাহিত পুরুষ। ওঁদের বয়স হয়েছিল। সন্তানও ছিল হেনোনের। লোহা টানে চুষককে আর চুষক টানে লোহাকে। ওটা মেন্টাল নয়, এক প্রকার এলিমেন্টাল আকর্ষণ। মাছুঁষ অসহায়।” স্বপনদা ব্যাখ্যা করেন।

“সব চেয়ে সুন্দরী না হোক, সুন্দরী ছিল বটে সুবি। শুধু কি সুন্দরী, ওর মতো শক্তিমতী করুণাময়ী কল্যাণময়ী ক'জন? আর শিবুও ছিল তেমনি শিবতুল্য স্বামী, শুধু সুপুরুষ নয়। সেইজন্মেই ওদের পদাঙ্কলন সবাইকে তাক লাগিয়ে দেয়। বিলেতে গিয়ে ওরা নাকি খ্রীষ্টীয় মতে বিয়ে করে। জানিনে কেমন করে দু'জনে ডিভোর্স পায়। শুনেছি ওদের নাকি ছাড়াছাড়ি হয়ে গেছে। কিন্তু ঘরে ফেরার পথ বন্ধ। শিবু নাকি বিলেতেই থেকে গেছে। আর সুবি নাকি মুসোরিতে না কোথায় হোটেল খুলে বসেছে।” মাসিমা যতদূর জানেন।

তাঁর দিদি এতক্ষণ মুখ খোলেননি। আর চুপ করে থাকতে পারেন না। বলেন, “বড়লোকের মেয়ে বলে সুবি ধরাকে সরা জ্ঞান করত। শিবু ছিল শিবের মতোই গরিবের ছেলে। বুটো আভিজাত্যের মোহে পড়ে আপনি মজেছে আর লক্ষা মজিয়েছে। হিঁইজু আ ব্রোকেন ম্যান।”

“তাঁ যদি বলেন, মাসিমা, তৈ গোষামী লাহেঁবের প্রথম পক্ষ বনেদী ভূমিদার কেশের কস্তা। আভিজাত্যের মোহে একেঁজে অবাস্তব নয় কি?” মানস প্রতিবাদ

করে। “তার চেয়ে স্বীকার করা ভালো যে গোস্বামী সাহেবের প্রথম বিবাহটারই ব্রেকডাউন ঘটেছিল। তেমনি মিসেস চ্যাটার্জির প্রথম বিবাহটারও। সারাজীবন দুঃখবহন না করে তাঁরা চেয়েছিলেন নতুন সাথীর সঙ্গে নতুন করে জীবন আরম্ভ করতে। এটাও একটা মোহ। নতুন যখন পুরনো হয়ে যায় তখন মোহভঙ্গ ঘটা বিচিত্র নয়। কিন্তু কারো কারো বেলা প্রথম বিবাহের ব্যর্থতাটাই দ্বিতীয় বিবাহের সার্থকতার সোপান। এদেশে না হোক ওদেশে তো এসব ঘটনা আকছার ঘটছে। দেখে শুনে মনে হয় নতুন করে জীবন আরম্ভ করার সব চেয়ে বড়ো অন্তরায় প্রথম বিবাহের সন্তান। এটা আরম্ভের সময় খেয়াল থাকে না। পরে একটু একটু করে হাঁশ হয়। তখন অনুশোচনা জন্মায়। আবার সন্তান হলে, আবার জড়িয়ে পড়লে আর নিষ্কৃতি নেই। আরো বড়ো দুঃখবহন করতে হয়। বিশেষত নারীকে। আপনি হলে বলতেন, শী ইজ আ ব্রোকেন উওয়ান।”

স্বপনদা কী জানি কেন আহত বোধ করেন। তাঁর মুখ দেখে মনে হয় তিনি বাণবিন্দ। বেয়ারা এসে পানীয় পরিবেশন করলে তিনি ছইস্কির গ্লাস টেনে নিয়ে জোরে চুমুক দেন। সঙ্গে সঙ্গে তাঁর বাক্যের ফোয়ারা খুলে যায়।

“ওটা একটা শাশ্বত সমস্যা, মানস। ওর থেকে এসেছে সেকালে ইলিয়াড। একালে আনা কারেনিনা।” পারি তো আমিও তেমনি একখানা ক্লাসিক লিখব। যার পরিণতি বেদনাদায়ক। ই্যা, পুরুষের পক্ষেও।” স্বপনদা সংশোধন করেন।

স্বপনদা আরো কিছু বলতে যাচ্ছিলেন এমন সময় দমকা হাওয়ার মতো ঘরে ঢোকে জুলি আর তার দুই কমরেড, বাবলী সেন ও চাঁহু লাহিড়ী। ভালো নাম অপরাজিতা ও প্রণব। পরিচয়পর্ব সারা হলে জুলি বলে, “স্বপনদা, বাবলীর বহুদিনের সাধ তোমার সঙ্গে আলাপ। তোমার জন্মেই ওর আসা।”

“আমার সঙ্গে!” স্বপনদা আশ্চর্য হন। “মহিলাদের কাছ থেকে আমি শতহস্ত দূরে থাকি। আর বিপ্লবীদের কাছ থেকে সহস্রহস্ত দূরে। তবে এমন একদিন ছিল যখন আমার কাহিনীর নায়িকা হবার জন্মে কত মেয়েই না আসাযাওয়া করত। সেই যে ফোর আর্টস ক্লাবের দিন, যার কথা একটু আগে হচ্ছিল মাসিমাদের সঙ্গে।”

তা শুনে খিল খিল করে হেসে ওঠে বাবলী আর জুলি। বাবলী বলে, “তখন মডেলের জন্মে অর্পনাকে আর কারো দিকে তাকাতে হতো না। ঘরে বসেই পেয়ে যেতেন মডেল। কী মজা।”

“মডেল!” স্বপনদা চমকে ওঠেন। “না, কাউকে মডেল করার কথা স্বপ্নেও ভাবিনি। আমার ছবি আঁকার পদ্ধতি অন্তরীকম। মডেল সামনে রেখে আমি

আঁকিনে। আপনি ধরে নিতে পারেন যে আমার নায়িকারা অর্ধেক মানবী আর অর্ধেক কল্পনা। আমি বাস্তববাদী নই, তবে যা আঁকি তা অবাস্তবও নয়।”

“আমার তো মনে হয় সব সত্যি, একটুও কল্পনা নয়। এক একখানা উপল্লাস যেন এক একটা আর্ট গ্যালারি।” বাবলী বলে, “এখন আমি কৈফিয়ৎ দাবী করি, আপনি লেখা বন্ধ করে দিলেন কেন?”

স্বপনদা গলে গিয়ে জবাব দেন, “লেখা তো আমার পেশা নয়, আমার নেশা। পেশার জ্ঞান অল্প কিছু করতে হয়, তার আগে শিখতে হয়। গেলুম বিদেশে ব্যারিস্টারি পড়তে। লেখায় ছেদ পড়ে গেল। ফিরে এসে প্র্যাকটিস শুরু করলুম। জানো তো, ল ইজ অ জেলাস মিগ্‌ট্রেস। আইন একটি ঈর্ষাপরায়ণা দেবী। লক্ষ্মী দেবী সরস্বতী দেবীকে সহ্য করবেন না। সরস্বতীই বা সহ্য করবেন কেন? তিনিও তেমনি ঈর্ষাপরায়ণ। একে তো দেবীতে দেবীতে ঈর্ষা, তার উপর মানবীতে মানবীতে। এর জন্মে আপনিও কৈফিয়ৎ দাবী করেন নি, আমিও কৈফিয়ৎ দিতে রাজী নই। আমি জানি যে আমার কাছে পাঠকরা অনেক প্রত্যাশা করে, কিন্তু এইসব দেবী আর মানবী মিলে আমাকে একেবারে শুরু করে দিয়েছেন। আর প্র্যাকটিসও যে জমাতে পারলুম তাও নয়। সেখানেও জোর প্রতিদ্বন্দ্বিতা। আমি তো মুখচোরা মানুষ। দাঁড়াতে গেলেই স্টেজ ফ্রাইট। ওই জুনিয়র হয়েই বারো বছর কেটে গেল। আমিই খেটে খুটে ব্রীফ তৈরি করে দিই, লড়াই করেন যখন যিনি সীনিয়র। সিংহের ভাগ তাঁরই পেটে যায়। ছেড়ে দেবার কথাও মাঝে মাঝে ভাবি। কিন্তু তা হলে আমার পেশা কী হবে? নেশাটাকেই পেশা করতে পারলে এ প্রশ্নের উত্তর মিলে যায়, কিন্তু তাতে অন্তরের সায় নেই। সে কাজে সফল হয়েছিলেন প্রভাত মুখুজ্যে। কিন্তু শরৎ চাট্টোজ্যের সঙ্গে প্রতিযোগিতায় পারবেন কেন? আমিও কি তাঁর সঙ্গে বা তাঁর সগোত্রদের সঙ্গে পারতুম? আমার গোত্রই আলাদা। আমি সব দিক থেকে হেরে গেছি, ব্যর্থ হয়েছি, বাবলী ভাই।”

বাবলী তা শুনে গদগদ হয়ে বলে, “না, না, আপনি আবার উঠবেন, দাদা। আমরাই আপনাকে টেনে তুলব। আপনার কাছে আমরা একটা আঁজি নিয়ে এসেছি। আপনিই আমাদের টুর্গেনিভ। আপনিই, একমাত্র আপনিই লিখতে পারেন আর একখানা ‘ভার্জিন সয়েল’। জুলি যা বলে বলুক, বিপ্লবের ঢের দেরি। তার আগে জমি চষতে হবে। অহল্যা জমি। টুর্গেনিভ না হলে, গোর্কি না হলে লেনিন হয় না। টুর্গেনিভের খোঁজ পেয়েছি, কিন্তু গোর্কি নিখোঁজ।”

স্বপনদা অভিভূত। ওদিকে জুলি মানসের সঙ্গে গল্প জুড়ে দিয়েছে। হঠাৎ

নিজের নাম শুনে ঘাড় বেঁকিয়ে জানতে চায়, “আমার নামে কী চুকলি কাটছিল, বাবলী ?”

“চুকলি নয়, বলছি তোর মতে বিপ্লবের আর দেরি নেই, আমার মতে ঢেব দেরি। এটা কি ঠিক নয় ?” বাবলী সাফাই দেয়।

“দেশটা আগ্নেয়গিরির চূড়ায় বসে আছে। যে কোনো দিন লাভাবর্ষণ হতে পারে। তারই নাম বিপ্লব। কী বলিস্, চান্স ? তুই তো আমাদের থিয়োরিটিসিয়ান।” জুলি চান্সকে সালিশ মানে।

চান্স চাণক্যের মতো মহাধূর্ত। জুলিকেও চটাবে না, বাবলীকেও না। হিসেব করে কথা বলে। “বিপ্লবের আর দেরি নেই এটাও যেমন ঠিক ওটাও তেমনি ঠিক যে বিপ্লবের সিগনাল আসবে কমরেড স্টালিনের কাছ থেকে কমরেড রজনী পাম দত্তের কাছে, তার পর রজনী পাম দত্তের কাছ থেকে কমরেড ডাক্সের কাছে, তার পর কমরেড ডাক্সের কাছ থেকে আমাদের কাছে। দিনক্ষণ স্থির করার ভার কমরেড স্টালিনের উপরে ! কারণ তিনিই সব চেয়ে অভিজ্ঞ। সব চেয়ে বিচক্ষণ।”

জুলি অর্ধৈর্ষ হয়ে স্তব্ধ, “কিন্তু সেই দিনটি কবে ?”

“যে কোনো দিন। ছ’মাস পরেও হতে পারে ছ’বছর পরেও হতে পারে।” চান্স ছেলেটি বাহু। একবার এর মুখের দিকে তাকায়, একবার ওর মুখের দিকে।

সালিশের রায় শুনে ছ’জনেরই চক্ষু স্থির। বাবলী বলে, “ছ’মাস পরে যদি হয় তবে স্বপনদাকে দিয়ে ‘ভার্জিন সয়েল’ লেখানো যাবে না। কী আফসোস !”

জুলি বলে, “ছ’বছর দেরি হলে গান্ধী বুডো কি হাত গুটিয়ে বসে থাকবে ? বামপন্থীদের উপর দক্ষিণপন্থীরাই টেকা দেবে।”

বিনীতা মাসিমা বিনীতভাবে প্রশ্ন করেন, “আগ্নেয়গিরিটা তো ভারতের মাটিতে। লাভাবর্ষণটাও মস্কো থেকে সহস্র যোজন দূরে। তবে সিগনালটা কী করে আসবে কমরেড স্টালিনের কাছ থেকে ? তাও বিলেত ঘুরে ? ওদেশের ইংরেজরা ওটা ইন্টারসেপ্ট করবে না ?”

বাবলী এর উত্তরে বলে, “সেইজন্মেই বামপন্থীদের কতক এখন স্তব্ধ বোসের দিকে ঝুঁকছে। কতক এম. এন. রায়ের দিকে। স্টালিন যাদের কাছে অভ্রান্ত তাদের কতক আবার বিলেতের দিকে তাকাতে নারাজ। আমরা কি প্রত্যেকটি ব্যাপারেই বিলেতের মুখাপেক্ষী ? বিপ্লবের ব্যাপারেও ? আমাদের মধ্যে যারা সরাসরি মস্কোর সঙ্গে সম্পর্ক পাতাতে চাই তারা বিলেতকে বাদ দিতে চাই।”

“মরণ !” শোভনা মাসিমা মন্তব্য করেন, “বিলেতকে বাদ দিয়ে কিছুই কি

হবার জো আছে এদেশে? রাজা রামমোহন থেকে শুরু করে সংস্কারকরা সবাই বিলেতমুখো। মাইকেল মধুসূদন থেকে শুরু করে কবিরা সবাই বিলেতমুখো। স্বামী বিবেকানন্দের রামকৃষ্ণ মিশনও হয় আমেরিকামুখী, নয় বিলেতমুখী। তোমার নরমপন্থী চরমপন্থী সব কটি নেতাই তো বিলেতে পড়াশুনা করেছেন বা বিলেতে গিয়ে স্বরাজের জগ্গে তব্বির করেছেন। বিলেতফের্তা না হলে কেউ আজকাল নৃত্য গীত অভিনয়েও পাত্তা পায় না।”

বাবলী তা শুনে ক্ষুব্ধ হয়। সাহেব খুন করতে গিয়ে ব্যর্থ হয়ে পাঁচটি বছর জেলখানায় কাটিয়েছে। সেই সুবাদে সে সর্বত্র সমীহ পায়। কিন্তু তা নিয়ে সে গর্ব বোধ করে না। কেউ বন্দনা করলে বলে, “সাহেব বেঁচে গেছে, আমিও বেঁচে গেছি। সাহেব মাঝে গেলে আমিও মারা যেতুম। তোমরা শহীদ বলে পূজা করতে জানি। কিন্তু আমার জীবনে আরো মহৎ কাজ আছে।”

বাবলীর মুখভাব দেখে জুলি ত্রস্ত হয়ে বলে, “মাসিমা, বাবলী বিলেত যায়নি বলে ওর কি কম খাতির?”

“খাতির যা দেখছিছ সেটাও ওই সাহেব মারতে যাওয়ার জগ্গেই। নেটিভ মারতে গেলে অত খাতির পেতো না।” মাসিমা উত্তর দেন।

বাবলী বেচারির মুখ চুণ। জুলির মা সেটা লক্ষ করে দিদিকে নিয়ে ঘর থেকে বেরিয়ে যান। বলেন, “আমরা বুড়ীরা যদি এখানে থাকি ওঁরা যুবাবয়সীরা প্রাণ খুলে কথাবার্তা বলতে সঙ্কোচ বোধ করবে। চল, দেখি গিয়ে রান্নার কতদূর কী হলো।”

সঙ্গে সঙ্গে ঘরের হাওয়া বদলে যায়। বাবলীকে উৎফুল্ল দেখায়। জুলিও কলরব বাধায়। চাষকে নড়েচড়ে বসতে দেখা গেল। ওদের ফুঁতি বেড়ে যায় যখন আরো এক যুঁতির আবির্ভাব হয়। জুলির সন্ধানে সোম্য চৌধুরীর।

পরিচয়পর্বের পর সোম্যকে ঘিরে আলোচনা জমে ওঠে। সবাই জানতে চায় গান্ধীজী কী ভাবছেন। কংগ্রেসের ভিতরের খবর কী। বিপ্লবের প্রসঙ্গ তলিয়ে যায়।

সোম্য যা শুনেছে তার মর্ম, গান্ধীজী বামপন্থীদের কাজকর্মে বাধা দিতে চান না। তারা যা ভালো মনে করে করুক। শুধু কংগ্রেসকে বা তাঁকে না জড়ালেই হ'লো। তিনি এ যুদ্ধে সহযোগিতা করবেন না, কংগ্রেস যদি করে তবে তাঁকে বার্দ দিয়েই করবে। ওরা স্বাধীন, উনিও স্বাধীন। যখন সত্যগ্রহের লগ্ন আসবে তখন তিনি কারো জন্তে অপেক্ষা করবেন না। একাই এগিয়ে যাবেন।

“কিন্তু সেটা কবে?” সৌম্যদার পেয়ালায় চা ঢালতে ঢালতে জুলি স্থায়।

“যে কোনো দিন। লগ্নের কোনো ঠিক ঠিকানা আছে নাকি? তবে আমার যতদূর অহুমান সেটা খুব কাছেও নয়, খুব দূরেও নয়।” সৌম্যর অহুমান।

“মিলে যাচ্ছে।” চাহু খুশি হয়ে বলে, “আমার সঙ্গে মিলে যাচ্ছে।”

“কিন্তু তোমারটা তো বিপ্লব। ওঁরটা তো সত্যগ্রহ।” বাবলী একটার সঙ্গে আরেকটার তুলনা করে।

“আর সিগনালটা তো একই উৎস থেকে নয়।” জুলি ছিঁদ্র ধরে।

“আসুন, সৌম্যবাবু, আমরা হাত মেলাই।” চাহু হাত বাড়িয়ে দেয়। “আমাদের উপর নির্দেশ হচ্ছে আপনাদের সঙ্গে মোর্চা গঠন করে বিপ্লব ঘটানো। অবশ্য আমাদের মধ্যেও কতক লোক আছেন যাদের বিশ্বাস গান্ধী ও কংগ্রেস জনগণের কেউ নন, সাম্রাজ্যবাদের বা ধনতন্ত্রবাদের বর্ণচোরা মিত্র। এটাও একপ্রকার গোঁড়ামি। ইংরেজ যতদিন আছে তার বিরুদ্ধে আপনারা ও আমরা একজোট হয়ে লড়ব। তার পরে একসঙ্গে কাজ করা অসম্ভব হলে জোট ভেঙে দেওয়া যাবে।”

সৌম্য হেসে বলে, “প্রস্তাবটা তো ভালোই, কিন্তু আপনাদের যে আবার প্রতি ছ’মাস অন্তর খাঁসিস পালটে যায়। একদিন হয়তো শুনব ইংরেজ আপনাদের মিতা, কারণ রাশিয়ানরা ইংরেজদের মিতা। আমরা লড়ব একটা মরাল ইস্যুতে। যুদ্ধের বিরুদ্ধেই আমাদের যুদ্ধ। মিলিটারিজম তো রাশিয়াতেও ঘাঁটি গেড়ে বসেছে। আর স্টেট ক্যাপিটালিজমও তো আরেক রকম ক্যাপিটালিজম। ভারতের জনগণকে আমরা যে কেবল ইংরেজদের কবল থেকে উদ্ধার করতে চাই তা নয়, যুদ্ধবাজ ও যন্ত্রবাজ স্বদেশীয় প্রভুদের হাত থেকেও।”

স্বপন আর মানস ভিতরে ভিতরে অধীর হয়ে উঠছিল। বাড়া ফিরে বেঠোভেন শুনতে হবে। কিন্তু কোথায় ডিনারের লক্ষণ! এমন সময় বেয়ারা এসে খবর দেয় খানা তৈয়ার। ডাইনিং রুমে গিয়ে যে যার নামের কার্ড চিনে নিয়ে নির্দিষ্ট চেয়ারে উপবেশন করে।

টেবিলের দুই মাথায় বিনীতা সিংহা আর শোভনা নন্দী। মিসেস সিংহার বাঁ দিকে স্বপন আর ডান দিকে মানস। মিসেস নন্দীর বাঁ দিকে সৌম্য আর ডান দিকে চাহু। স্বপন আর মানসের মাঝখানে বাবলী। সৌম্য আর চাহুর মাঝখানে জুলি। সৌম্যের জন্তে নিরামিষ তরকারি ছিল। বিধবারাও নিরামিষ খান। জুলিও তাদের তালিকায় পড়ে। তবে সে কটর নিরামিষাশী নয়। পাঁচজনের খাতিরে নিয়মভঙ্গ করে।

জুলি জিজ্ঞাসা করে সোম্যকে, “ওসব তো বাইরের কথা। ভিতরের কথা কী ভনেছ ? যা কোথাও বেরোয়নি।”

“গান্ধীজীর কাছে গোপনীয় বলে কিছু নেই। তাঁর তাসগুলো সকলের সামনে মেলে ধবা। যেটা গোপনীয় সেটা হচ্ছে কংগ্রেস নেতাদের পলিসি। তাঁরা স্থির কবে ফেরেছেন যে দরজা সব সময় খোলা রাখবেন। কোনো অবস্থায় বন্ধ করবেন না। তার মানে সবকারের সঙ্গে কথাবার্তা ভিতরে ভিতরে চলছে ও চলতেই থাকবে। গ্রহণযোগ্য ফরমূলা এখনো পাওয়া যায়নি। পাওয়া গেলেই গুঁরা সদলবলে যুদ্ধে ঝাঁপ দেবেন। কারো মানা মানবেন না। মহাত্মারও না। বাপু এখন ভীষণ নিঃসঙ্গ। তাঁর তো আলাদা কোনো দল নেই। ওই কংগ্রেসই তাঁর দল। নতুন একটা দল তৈরি করার মতো বলও নেই, বয়সও নেই। মনে মনে প্রার্থনা কবছেন, সবকো সন্মতি দে, ভগবান। বাঘ হরিণ মেরে তার মাংস ফেলে রেখে এসেছে। ফিরে গিয়ে ভূরি ভোজন লাগাবে। অর্থাৎ মন্ত্রীরা খালি বেখে আসা গদীতে বসবেন। সুভাষচন্দ্র তো রাগ করবেনই, কিন্তু গ্রহণযোগ্য একটা ফরমূলা যদি পাওয়া যায় আর মন্ত্রীরা যদি মনসদে ফিরে যান কী করে তিনি তাঁদের তাড়াবেন ? কংগ্রেসে তাঁদেরই তো ভোটবল বেশী। আব কংগ্রেস চলে ভোটের জোরে। যুদ্ধে যোগদান-কারীদের গায়ের জোরে হটানো যাবে না। তাঁদের হাতেই অস্ত্রশস্ত্র। কংগ্রেসের ডাঙন অনিবার্ণ, ইংরেজ যদি তাকে ডেকে নিয়ে কেন্দ্রের শাসন পরিষদে ক্ষমতার সিংহভাগ দেয়। সেক্ষেত্রে সুভাষচন্দ্রের বিদ্রোহ কোনো কাজেই লাগবে না, অথচ খুব কাজে লাগবে জিন্না সাহেবের বিদ্রোহ। গান্ধীজী আশা করছেন যে বড়লাট পেছিয়ে যাবেন। তাঁর কাছে যেটা আশার কথা কংগ্রেস নেতাদের কাছে সেটাই আশঙ্কার কথা। তাঁরা এখন ভাবছেন কী দিয়ে জিন্নাকে তোষণ করা যায়। তাঁর আশু বাক্য হচ্ছে মুসলিম লীগই ভারতীয় মুসলমানদের একমাত্র দল। কংগ্রেস যদি মুসলিম লীগের কলমা না পড়ে তবে তিনি কংগ্রেসের সঙ্গে কথা বলবেন না। আর বড়লাট যদি প্রকারান্তরে স্বীকার না করেন তো বড়লাটের সঙ্গেও না। সবাই ভেবে অবাক হচ্ছে জিন্নার এতখানি তেজ আসে কোন্‌খান থেকে। গান্ধীজী বলেছেন, জিন্না সকলের উপর ডিক্টেটরি করবেন, শাসকদের উপরেও। কংগ্রেস তার দরজা খোলা রাখলে কী হবে, লীগ তার দরজা বন্ধ করে দিয়েছে ! আর লীগের দরজা বন্ধ মানে বড়লাটের দরজাও বন্ধ।

মানস মুহূর্তে প্রতিবাদ করে, ‘তাই যদি হয় তবে যুদ্ধে সকলের সহযোগিতা চাওয়া কেন ? কেন্দ্রে রদবদল না হলে কেই বা রাজী হবে সহযোগিতা করতে ?’

জুলি চেষ্টা করে ওঠে, “না একো রূপেয়া, না একো জওয়ান। মরুক ব্যাটারা বেলজিয়ামের যুদ্ধক্ষেত্রে।”

ওর মা বাধা দেন। “ও কী বলছিস্, জুলি! কেউ যদি রিপোর্ট করে তোর খবরের পেনসস বন্ধ হয়ে যাবে।”

“এই, তোমরা কেউ রিপোর্ট করবে নাকি?” জুলি চুপসে যায়।

“ক্ষেপেছিস্? আমরা কেউ কখনো অমন কাণ্ড করতে পারি!” বাবলী অভয় দেয়। চাহুও। স্বপনদা শুকে সতর্ক করে দেন। দেওয়ানের কান আছে।

মিসেস সিন্হা কাঁটা চামচ নামিয়ে রেখে মাথাগ হাত দিয়ে বলেন, “এ মেয়ে আমাকে পাগল করে ছাড়বে। এরই জন্মে কোন্ দিন না আমাকে হুঙ্ক ধরে নিয়ে যায়। বিপ্লব, আগ্নেয়গিরি, লাভাবর্ষণ এমন শুনতে শুনতে কান কালাপালা।”

স্বপনদা তাঁকে আশ্বাস দেন। “ওদের বিপ্লব তো ইংরেজের বিকল্পে নয়, কংগ্রেসের বিরুদ্ধে। কংগ্রেস মন্ত্রীদেব পদত্যাগের সঙ্গে সঙ্গে ওরাও এখন বেফার। আবার যেদিন মন্ত্রীরা মসনদে ফিরে যাবেন আবার আগ্নেয়গিরির লাভাবর্ষণ হবে, অবশ্য সমস্তটাই মুখে। ওদিকে জিন্না সাহেবেরও ধনভঙ্গ পণ কংগ্রেস মন্ত্রীদেব তিনি মসনদে ফিরে যেতে দেবেন না। যেতে দিলে তিনিও অগ্নিবর্ষণ করবেন। তার মানে দেশ জুড়ে হিন্দু মুসলিম দাঙ্গা। একদিকে বিপ্লব, আরেকদিকে দাঙ্গা, এ যেন সেই হোমার বর্ণিত সীলা আর ক্যারিবডিস। এ ছুয়ের মাঝখান দিয়ে জাহাজ চালাতে হবে স্বাধীনতার পাইনটকে। কী করে তা সম্ভব তা জানেন একমাত্র গান্ধীজী। কিংবা তিনিও জানেন না। জানে আমাদের নিয়তি। যাকে বলে হিস্টরিকাল ডিটারমিনিজম। মানুষ তো নিমিত্তমাত্র।”

ডিনারের পর সকলের সঙ্গে করমর্দন করে স্বপনদার সঙ্গে মানসেরও বিদায়। সৌম্যও উঠতে যাচ্ছিল, জুলি তাকে উঠতে দেয় না। বাবলীরাও সেবাগ্রামের ভিতরের খবর শুনতে চায়। কিন্তু সৌম্য নিজে জানলে তো? গান্ধীজীর মুখ বন্ধ।

বাড়ী ফিরে গ্রামোফোনে বেঠোভেনের ‘এরোইকা’ চড়িয়ে স্বপনদা কিছুক্ষণ নীরব হয়ে শোনেন। তার পর বলেন, “তুমি বোধ হয় জানো না যে এই হারোর নাম নেপোলিয়ন। তখনো তিনি সম্রাট হননি, অথচ দিগ্বিজয়ী। বেঠোভেনের মনে হয়েছিল তিনি শুধু ফরাসী বিপ্লবের নয় বিশ্বব্যাপী বিপ্লবের বীর। হুতরাং সকলের শ্রদ্ধেয়। পরে তাঁর মোহভঙ্গ হয়। তাই বলে তিনি তাঁর সৃষ্টি প্রত্যাহার করেন না বা তার সঙ্গে হস্তক্ষেপ করেন না। একবার যেটা সৃষ্ট হয়েছে সেটা বরাবরের জন্মে



সৃষ্ট হয়েছে। নেপোলিয়নের সাম্রাজ্য হাওয়ার সঙ্গে উড়ে গেছে, কিন্তু ‘এরোইকা’র সমাদর এখন জগৎ জুড়ে। ধর্মের পরে আর্টই চিরজীবী।”

তন্ময় হয়ে শোনে মানস। বলে “নেপোলিয়নের সাম্রাজ্যের মতো এই ব্রিটিশ সাম্রাজ্যও একদিন হাওয়ার সঙ্গে উড়ে যাবে। কিন্তু কোথায় আমাদের বেঠোভেন, কোথায় তাঁর ‘এরোইকা’! আমাদের এই দুই শতাব্দীর কোন্ সৃষ্টি আজি হতে শতবর্ষ পরে দেশ বিদেশের মানুষের অন্তরে এমনি দোলা দেবে!”

প্রশ্নটা স্বপনদাকেও ভাবিয়ে দেয়। তিনি বলেন, “বোধহয় রবীন্দ্রনাথের কয়েকটি গান ও কবিতা। হয়তো শ্রী অরবিন্দের ‘সাবিত্রী’।”

“তা হলে তুমিই তোমার আর-সব কাজ ছেড়ে ‘এরোইকা’র সঙ্গে তুলনীয় কিছু সৃষ্টি করো, স্বপনদা।” প্রস্তাব করে মানস।

স্বপনদা চমকে ওঠেন। “আমি! আমি কি বেঠোভেনের সঙ্গে তুলনীয়! তবে আমারও একটা মহৎ কল্পনা ছিল, এখনো আছে, রূপ দিতে পারলে ক্লাসিক পর্যায়ে ঠাই পেতো। কিন্তু বকুল কি আমাকে লিখতে দেবে! সে এখন পরের ঘরনী। পূর্ব প্রেমের উপাখ্যান তাকে বিষম বিভ্রত করবে। সীতার মতো অগ্নিপরীক্ষার ভয়ে সে অস্থির। ভয়টা অমূলক নয়। যা সমাজ আমাদের! আমার আশা ছেড়ে দাও, মানুষ। আমি ফেল। পারো তো তুমিই একখানা ক্লাসিক লেখো।”

“আমি!” মানস অপ্রস্তুত হয়ে বলে, “আমার কাছে প্রথম কথা হচ্ছে ঠিকমতো বাঁচা। তার পরের কথা ঠিকমতো লেখা। জীবন ঠিক না হলে আর্ট ঠিক হবে কী করে!”

“ওখানেই তোমার ভুল। আর্ট হচ্ছে পঙ্কজ। দাস্তে, গ্যোটে, টলস্টয়, টুর্গেনিভ কারই বা জীবন অকলঙ্ক চন্দ্র! অথচ জ্যোৎস্না তো ফিনিক ফুটেছে।” স্বপনদা বলেন।

## ॥ তেইশ ॥

দুই বন্ধুব নৈশ সংলাপ গভীর থেকে গভীরতর ও গাঢ় থেকে গাঢ়তর স্তরে পৌছয়।  
ওদিকে রাত্রিও গভীরতর ও অন্ধকারও গাঢ়তর হয়।

“তোমাকে কেমন করে বোঝাব, স্বপনদা, আমার কী যন্ত্রণা, কী বিষাদ !  
বিশ্বরঙ্গমঞ্চে কত বড়ো বড়ো ঘটনার অভিনয় চলেছে, আমি শুধু নীরব দর্শক।  
আমাকে সমস্তক্ষেপ দৃষ্ট করছে আমার এই অসহায় দশা, এই ইম্পোটেন্স। আমার  
বিষে সুখের হয়েছে, তা ঠিক। কিন্তু আমবা ছ’জনে সুখী হলে কী হবে কোটি কোটি  
মানুষ এই যুদ্ধের আগুনে পতঙ্গের মতো পুড়ে মরবে। তাদের পারিবারিক সুখ নষ্ট  
হবে। কোন্ অধিকারে আমরা সুখী হব ? আমি তো মনে মনে অপরাধী বোধ  
করছি।” মানস এলিয়ে পড়ে।

“একেই বলে সুখে থাকতে ভুতে কিলোয়।” স্বপনদা কফির পেয়ালায় চুমুক  
দিতে দিতে বলেন, “নাও, খাও দাও ফুটি করো। আজ বাদে কাল কী হবে তার  
ঠিক নেই, যুদ্ধ যে কতদূর গড়াবে তার স্থিরতা কী ? এই কলকাতা শহরই যুদ্ধের  
অঙ্গন হতে পারে আর আমিও এয়ার রেডের শিকার হতে পারি। নীরব দর্শক না  
হয়ে সরব অংশীদার হয়েই বা আমার সার্থকতা কী ? পারব কি আমি আগুন  
নেবাতে ? আমিও হব আর-একটি পতঙ্গ। বিশ্বরঙ্গমঞ্চে কত বড়ো বড়ো ঘটনার  
অভিনয় হচ্ছে সেটা দর্শন করাও তো একটা করণীয় কর্ম। দর্শন না করলে ব্যাস  
কখনো মহাভারত রচনা করতে পারতেন না। বাণ্মীকি কখনো রামায়ণ রচনা করতে  
পারতেন না। বেশীর ভাগ কল্পনা হলেও খানিকটা তো সাক্ষাৎ অভিজ্ঞতা।”

“তা হলে আমাদের ওয়ার কনসপেণ্ডেন্ট হয়ে ফ্রন্টে যেতে হয়, স্বপনদা। আমাদের  
ভূমিকা সঙ্কয়ের ভূমিকা।” মানস বলে।

“ফ্রন্ট কি একটা? ফ্রন্ট ক্রমশ বাড়তে বাড়তে পৃথিবী জুড়বে। একদিন এই বাংলাদেশেই হবে অন্তিম ফ্রন্ট। যদি না যুদ্ধ হঠাৎ শেষ হয়ে যায়। অসম্ভব নয়। একপক্ষ আত্মসমর্পণ করলেই যুদ্ধ থেমে যাবে।” স্বপনদা স্বপ্ন দেখেন।

“অসম্ভব নয়, কিন্তু সম্ভবপরও নয়।” মানস বলে। “জার্মানরা সেবার আত্মসমর্পণ করেছিল সৈনিকদের খোরাকের অভাবে। এবার যাতে খোরাকে টান না পড়ে তার জন্তে তারা প্রথমেই দখল করে নিচ্ছে পোলাণ্ড। তার অসামান্য শস্ত-ভাণ্ডার। একদিন না একদিন উক্রাইন আক্রমণ করবে। দখল করতে পারলে অফুরন্ত শস্তভাণ্ডার। হাঙ্গেরী, যুগোস্লাভিয়া, রুম্যানিয়া, বুলগারিয়া এরাও শস্ত জোগাবে, যদি পদানত হয়। এবারকার যুদ্ধ সেবারকার মতো খোরাকের অভাবে থামবে না, স্বপনদা। নাংসীরা যেমন নিষ্ঠুর, ওরা নাকি সৈনিকদের জন্তে খোরাক বাঁচাবে অস্ত্র ও রুগ্ন মানুষদের বাঁচাতে না দিয়ে। তার পরের ধাপটা ইহুদী ও জিপ্সী জাতির বিনাশ। তারও পরের ধাপ স্লাভ জাতির নিকাশ। ওদের ওই সর্বনেশে জাতিতত্ত্ব বিংশ শতাব্দীতে অভাবনীয়। ওদের মিরস্ত করতে হলে পরাস্ত করতেই হবে, কারণ ওরা আত্মসমর্পণ করবে না বলে বদ্ধপরিকর।”

স্বপনদা স্বপ্নের অতলে তলিয়ে যান। যুদ্ধে হেরে যাবার মানি ওরা এক মুহূর্তের জন্তেও ভুলে যায়নি। রাতকে ওরা দিনে পরিণত করবে। হারকে জিতে পরিণত করবে। ওই ম্যাগেট নিয়েই হিটলার নেতৃত্বে নাংসীরা এসেছে। কেবল ইংরেজ ও ফরাসীদের উপর জিতলে চলবে না, রাশিয়ানদের উপরেও জিততে হবে। তা না হলে ওদের জয় অসম্ভব হবে না। তার পরে আমেরিকার উপরেও জিততে হবে। নইলে জয় অসমাপ্ত থেকে যাবে। নেপোলিয়নের পরে হিটলারের মতো উচ্চাভিলাষী আর জন্মায়নি। কিন্তু নেপোলিয়নের পেছনে ছিল ফরাসী বিপ্লবের বিরাট পটভূমিকা। বিপ্লবের সার্বজনীন বাণী। নেপোলিয়ন নিজেকে ফরাসী ছিলেন না। আর এই হিটলার জার্মান ভিন্ন আর কারো প্রাণে আশার সঞ্চার করেন না। এর যে বাণী তা বিপ্লবের নয় প্রতিবিপ্লবের। তুমি তো জানো জার্মানদের প্রতি আমার কী পরিমাণ ভালোবাসা। তা বলে কি আমি ফরাসীদের কিছু কম ভালোবাসি? আমার দেশকে স্বাধীন হতে, সমান হতে দিচ্ছে না বলে ইংরেজদের উপর রাগ থাকলেও অহুরাগ কিছুমাত্র কম নয়। এ যুদ্ধে ওদের হার হোক এটা আমি চাইনে। তা হলে দাঁড়ায় এই যে আমি এবারকার যুদ্ধে নিরপেক্ষ। তবে ইংরেজরা যদি বিনা শর্তে আমার দেশকে স্বাধীনতা দেয় আমিও নেহরুর মতো মিত্রপক্ষে যোগ দেব। কিন্তু জার্মান জাতিকে আমি লান্হিত হতে বা তাদের দেশকে বিধ্বস্ত হতে চাই না।

এবারকার সন্ধিটা সেবারকার মতো অচ্যায় সন্ধি হলে আমি বাধা দেব। অর্থাৎ ভারত বাধা দেবে।”

মানস প্রীত হয়ে বলে, “তোমার সব কথা আমার না হলেও মোটের উপর আমারও সেই কথা। জার্মানদের পরাজয়ের গ্লানি মুছিয়ে দিতে হবে, যাতে ওরা তৃতীয়বার যুদ্ধ বাধাতে না চায়। কিন্তু সেটা বলা যত সহজ করা তত সহজ নয়। হিটলার বাদে সর্বনাশ করবে তারা তার প্রতিশোধ নেবে গোটা জার্মান জাতিরই উপর। যদি না গোটা জার্মান জাতিই সময় থাকতে হিটলারকে ক্ষমতাচ্যুত করে। আর তার নাৎসীদের চরম শাস্তি দেয়। জার্মান জাতির সহায়ত্ব না থাকলে কি ওরা পনের সর্বনাশ করতে পারে! দণ্ড যখন আসবে তখন জার্মানীর উপরেই আসবে। এটা কি ওরা বোঝে না? তবে এ দুর্ঘটনা কেন?”

স্বপনদার সেই বাধা উত্তর। “হিস্টরিকাল ডিটারমিনিজম। ঐতিহাসিক নিয়তি। জার্মানীতে যত জ্ঞানোত্তী আছেন তত আর কোন্ দেশে? বিবেকী পুরুষেরও অভাব নেই। ইচ্ছে থাকলে উপায় থাকে। যুদ্ধ থেকে নিবৃত্ত হওয়া যায়। কিন্তু এক অপ্রতিরোধ্য নিয়তি জার্মানদের জ্ঞানোত্তী বিবেকীদেরও এই বলে ভুলিয়েছে যে হিটলার তো জার্মান ভিন্ন আর কারো দেশ আত্মসাৎ করার কথা বলছেন না। সারল্যাও জার্মানীর একাংশ, অস্ট্রিয়াও জার্মানীর একাংশ, বোহেমিয়ার জার্মানভাষী অঞ্চলও জার্মানীর একাংশ, পোলাণ্ডের একাংশও জার্মানভাষী। তাঁদের ধারণা হিটলার ওখানেই দাঁড়ি টানবে। সেটা নিয়তিকে চোখ ঠারা। হিটলার এখন বাঁচবার মতো জায়গার ধুরো ধরেছেন। আর জায়গা না পেনে নাকি জার্মান জাতি বাঁচবে না। তা হলে বাদের জায়গা কেড়ে নেবেন তারা কি বাঁচবে? তাদের অপরাধ তারা জার্মান নয়। জার্মানীর জ্ঞানোত্তীরা বিবেকীরা চোঁচিয়ে বসছেন না যে এটা তাদের প্রতি অচ্যায়। এই ইহ্মাতে তারা জেলে যেতে পারতেন। অসিগ্রেটস্কি ছাড়া আর কেউ জেলে গেছেন বলে শোনা যায় না। তিনি তো জেলেই দেহরক্ষা করেছেন। নিয়তি! নিয়তি! নিয়তিই জার্মানদের চালিয়ে নিয়ে যাচ্ছে কুরুক্ষেত্র অভিমুখে। তাদের প্রতিবেশীদেরও। কেন এরকম হলো? আমার মনে হয় সারা ইউরোপটাই টোমাস মানের “ম্যাজিক মাউন্টেনের” সেই স্ট্যানিটারিয়াম। যেখানে সকলেই অস্থূল। অথচ সকলেই চালাক চতুর, ভোগস্থখে রত। সভ্যতাই যেন একটা ব্যাধি। ইউরোপ সভ্যতার ব্যাধিতে ভুগছে, ডেথ উইশ কাজ করছে। যুদ্ধই ইউরোপের নিয়তি। যুদ্ধের করোলারি বিপ্লব। বিপ্লবও তার নিয়তি। যদিও

স্বপনদার নয়।”

এর পরে যে যার ঘরে গুতে যায়।

মানসের পুরাতন সতীর্থ বিজ্ঞান বর্ধন সাত ঘাটের জল খেয়ে কলকাতায় বদলী হয়েছে। সে এখন বেঙ্গল সেক্রেটারিয়াটে কোন্ একটা ডিপার্টমেন্টের ডেপুটি সেক্রেটারি। তার বাসগৃহ পায়ে হেঁটে গেলে দশ মিনিটের পথ। মানস গরের দিন স্বপনদাকে একা রেখে প্রাতঃভ্রমণে বেরোয় আধ ঘণ্টার জন্তে। বিজ্ঞানকে একটা চমক দেয়। সে তখন ড্রেসিং গাউন পরে তার বাসগৃহের লন্‌এ পায়চারী করছে। সেটাই তার একমাত্র ব্যায়াম। মানসকে দেখে ছুটে এগিয়ে এসে হাতে হাত মিলিয়ে ঝাঁকানি দেয়।

“কবে এলে? কই, আমাকে তো খবর দাওনি? কোথায় উঠেছ? কী উপলক্ষে আসা? যুক্তিকাকেও সঙ্গে এনেছ নাকি? তোমার তো এখন বদলীর কথা নয়। কে যেন বলছিল তুমি চাকরি ছেড়ে দেবাব কথা ভাবছ। পাগল।” এক নিঃশ্বাসে বলে যায় বিজ্ঞান আর মানসকে ধরে যায় নিয়ে ড্রয়িং রুমে। মানস উত্তর দিতে দিতে যায়।

একটু পরে গৃহকর্তী উদিতার উদয়। যথারীতি চায়ের আয়োজন। পারিবারিক কুশলপ্রশ্ন। প্রশ্নের উত্তরে প্রতিপ্রশ্ন। ওরা ওদের একমাত্র সন্তান স্ত্রীজনকে দার্জিলিং এর সেন্ট পল্‌সে ভর্তি করে দিয়ে এখন বাড়ি হাত পা। যেখানে খুশি যতবার খুশি বদলী করুক সরকার। ওরা সবসময় তৈরি।

ওদের বিয়েতে মানসেরও একটা ভূমিকা ছিল। কনে দেখার জন্তে জহরী হিসাবে সঙ্গে করে নিয়ে যান বিজ্ঞানের বাবা বর্ধন মশায়। মানস প্রশংসা করে। কর্তা নাকি ইতিমধ্যে তিনশোটি মেয়ে দেখে নাকচ করেছিলেন।

ওদিকে মানসের বিয়েতেও বিজ্ঞানের একটা ভূমিকা ছিল। বিয়ের আগে ততটা নয়, পরে যতটা। দুই বছর যৌথ গৃহস্থালীর ভার বিজ্ঞান যুক্তিকাকেই ছেড়ে দেয়। আর নিজের বিয়ের তারিখ ছ’মাস এগিয়ে দিতে তৎপর হয়।

এইসব পুরনো কাহিনী ঘাঁটতে ঘাঁটতে আর হাসাহাসি করতে করতে; আধঘণ্টা কেটে যায়। তখন বিজ্ঞান তার ড্রাইভারকে ডেকে গাড়ী বার করতে; ছকুম দেয়।

কথায় কথায় জাশনাল গভর্নমেন্টের প্রসঙ্গ ওঠে। বিজ্ঞান বলে “এখানকার ইউরোপীয়ানদের সকলের ধারণা এই যুদ্ধে গান্ধাজী একজন ডিফিটিস্ট। তিনি নাকি প্রকাশ্যেই সন্দেহ ব্যক্ত করছেন যে এযাত্রা ইংরেজদের জয় অনিশ্চিত। এমন লোকের সঙ্গে নেগোশিয়েট করতে শাসকদের আন্তরিক আপত্তি। তবে গান্ধাজীর উপর আস্থা

না থাকলেও কংগ্রেস নেতাদের উপরে তাঁদের ভরসা আছে। তাঁরা সহযোগিতার রাজী, যদি সরকার তাঁদের শর্ত অতুসারে পুনর্গঠিত হয়। এটা একটা নেগোশিয়েবল ব্যাপার। কিন্তু মুশকিল হচ্ছে তাঁদের উপরে মিষ্টার গ্যাণ্ডার অপরিদায় প্রভাব। তাঁরা কি তাঁর মুঠোর ভিতর থেকে বেরিয়ে আসতে পারবেন? ইতিমধ্যে কংগ্রেস মন্ত্রীরা পাইকারী পদ ত্যাগ করে মুসলিম লীগের সঙ্গে কোয়ালিশনের সম্ভাবনার পথে কাঁটা দিয়েছেন। প্রদেশগুলিতে যদি কোয়ালিশন না হয় তবে কেন্দ্রে কোয়ালিশন হবে কী করে? একই দল কি কেন্দ্রে শাসক পক্ষ হবে, প্রদেশে বিরোধী পক্ষ হবে? কিংবা প্রদেশে শাসক পক্ষ, কেন্দ্রে বিরোধী পক্ষ? যুদ্ধকালে এই গুণগোল ডেকে আনার চেয়ে স্থিতিবস্থা বজায় রাখাই শ্রেয় নয় কি? গান্ধীজী তাঁর মুঠো আলগা করলেও ভিন্ন সাহেব নাছোড়বান্দা।”

মানস স্বীকার কবে। তাঁর মন্তব্য শুধু এই যে, “লণ্ডনের নিউ স্টেটসম্যানের মতে গান্ধীজী একজন রেভেনিউশনারি ডিফিটিস্ট। যেমন ছিলেন লেনিন। গত মহাযুদ্ধে। ভারতেও তেমনি কিছু খটতে পারে, সম্রাট যদি যুদ্ধে হেরে যান।”

মানসকে গাড়ীতে তুলে দিয়ে তার সঙ্গে এক বাক্স খাবার দেয় উদ্ভিত। বলে, “দীপক আর মণির জন্তে তাদের মাসিমার স্নেহের নিদর্শন।”

“স্বজনকে আমার ভালোবাসা ছানিয়ে”, বলে মানস বিদায় নেয়।

স্বপনটা খবরের কাগজ থেকে মুখ তুলে মানসকে দেখে বলেন, “এই তোমার আধ ঘণ্টা! জানি ওরা চা না খাইয়ে ছাড়বে না। এখন ব্রেকফাস্টের জন্তে সবুর করতে হবে। নতুন কথা কী শুনে এলে বর্ধনের ওখানে?”

“গান্ধীজী এই যুদ্ধে ডিফিটিস্ট বলে সরকার তাঁর সঙ্গে নেগোশিয়েট করবে না। কংগ্রেস নেতাদের সঙ্গে করবে, যদি ওঁরা গান্ধীজীর মুঠো থেকে বেরোন। তার মানে নদীর মাঝখানে ঘোড়া বদল করেন।” মানস ব্যাখ্যা করে।

“প্রশ্নটা হচ্ছে কে কার পেছনে ধাওয়া করবে। বড়লাট গান্ধীজীর পেছনে না গান্ধীজী বড়লাটের পেছনে। যুদ্ধে সহযোগিতাটা কার পক্ষে অত্যাশঙ্কক। সরকারের পক্ষে না গান্ধীজীর পক্ষে। আমি শুনেছি যে গান্ধীজীর শিবির থেকে কংগ্রেস নেতাদের ভাঙিয়ে নেবার একটা চেষ্টা চলেছে। কয়েকজন বরের বরের পিসী আর কনের বরের মাসী জুটেছেন, তাঁরাই এ ব্যাপারে সচেষ্ট। বুঝা চেষ্টা। গান্ধী তাঁদের উপর নির্ভর করেন না, ওঁরাই করেন গান্ধীর উপর নির্ভর। কংগ্রেস নেতারা কখনো গান্ধীজীকে অমান্য করবেন না, যদিও ক্ষমতার জন্তে ছটকট করবেন। যুদ্ধ একটা ছেলেখেলা নয়। ভারত যদি এতে জড়িয়ে পড়ে তা হলে মাহবুবের হুঁখকষ্ট বেড়ে

যাবেই। অভিশাপটা পড়বে নেতাদের উপরে, যদি তাঁরা ক্ষমতার ভাগী হন। আবাব! ডক্টর দিক থেকেও বিচার করতে হবে। ভারত যদি সৈন্তসামন্ত দিঘে-সাহায্য না করে ইংরেজ একা লড়তে পারবে না। গুর্খা শিখ আর পাঞ্জাবী মুসলমান সৈন্ত তার গাইই চাই। কিন্তু এদের সাহায্য পেতে হলে কংগ্রেসকে ক্ষমতার ভাগ না দিলেও চলে। গান্ধীজীর তো এদের সঙ্গে যোগাযোগই নেই। কেন তা হলে সরকার কংগ্রেসের পেছনে বা গান্ধীজীর পেছনে ধাওয়া করবে?" এই পর্যন্ত বলে স্বপনদা আবাব কী মনে করে বলেন, "তবে হ্যাঁ, লড়াই যদি চার পাঁচ বছর গড়ায় তবে দেশের লোক খেতে পরতে পাবে না, তখন দেশের নেতাদের ডাক পড়বে দায়িত্বের ভাগ নিতে। বড়লাট ধাওয়া করবেন নেতাদের পেছনে। গান্ধীজীব পেছনে। অপেক্ষা করতে গান্ধীজী প্রস্তুত। কিন্তু নেতারা প্রস্তুত নন! এঁদের মুখ চেয়ে একটা আন্দোলন আরম্ভ করতেই হবে তাঁকে। জানিনে কবে ও কী আকারে।"

"ব্যাপক আকারে নিশ্চয়ই।" মানস ধরে নেয়।

"ব্যাপক আকারে করলে কি বেশী লোক সাড়া দেবে? এই যে বাংলাদেশ এর অর্ধেক লোক তো মুসলমান। তাদের একজনও কি কংগ্রেসী আন্দোলনে ঝাঁপ দেবে? বাকী অর্ধেক লোক যদিও হিন্দু তাদের অধিকাংশই এখন গান্ধীবিশ্বাস, সুভাষ বিশ্বাস। অহিংসার উপরে তাদের লেশমাত্র বিশ্বাস নেই। গান্ধীজীব আন্দোলনের আড়ালে ওরা হিংসাত্মক কাণ্ড কারখানা করে যাবে। ফলে সরকার হবে আরো নিষ্ঠুর। যুদ্ধকালে কেউ দয়ামায়া দেখায় না। কোর্ট মার্শাল কবে বুলিয়ে দেয়। এর দায়িত্ব কি গান্ধীজীর উপরেও অর্শাবে না? একই কথা খাটে পাঞ্জাব সম্বন্ধেও। সেখানেও অর্ধেক মুসলমান। কেউ ঝাঁপ দেবে না। অর্ধেক হিন্দু-শিখ। অধিকাংশই অহিংসাবিশ্বাস। মার্শাল রেস বলেই তাদের গর্ব। বাকী থাকে সিন্ধু প্রদেশ। সেখানে মুসলমানের অত্যাচারে হিন্দুর জ্ঞান অতিষ্ঠ। আন্দোলনটা মাঠে মারা যাবে।" স্বপনদা আফসোস করে বলেন, "সেই যে একটা কথা আছে গাঁয়ে মানে না আপনি মোড়ল। গান্ধীজীর দশা হয়েছে তাই। বিশ্ববহর আগে তাঁর যে অথরিটি ছিল, এমন কী দশবছর আগেও যে অথরিটি ছিল, সে অথরিটি আজ নেই। তিনি তা মর্মে মর্মে উপলব্ধি করেন। আগে তাঁকে তাঁর অথরিটি পুনরুদ্ধার করতে হবে। তার পরে ব্যাপক আন্দোলন।" স্বপনদার অহুমান।

ব্রেকফাস্টের মাঝখানে আচমকা দুই কন্ঠার আবির্ভাব। জুলী আর বাবলী। স্বপনদা দশবাস্ত হয়ে বলেন, "চা না কফি? পরিজ না ফোস? অমলেট না পোচ? না, বেকন আমাদের এখানে চলে না। আমার মুসলমান বাবুটির গুটিবাতিক আমাকে মানতে হয়।"

“আমরা কিন্তু খেতে আসিনি, স্বপনদা।” জুলি তাঁর একপাশে বসে, বাবলী তাঁর অপর পাশে। আমাদের অহুরোধ—আবদারও বলতে পারো—ছোটবোনদের আবদার—তোমাকে টুর্গেনিভের মতো আর একখানা ‘ভার্জিন সয়েল’ লিখতে হবে। তুমি ‘না’ বলতে পারবে না। এটা তোমার ঐতিহাসিক দায়িত্ব।” জুলির অহুন্নয়।

স্বপনদা মানসের দিকে তাকিয়ে কপট ভঙ্গি বলেন, “তুমি তো জঙ্গ না ম্যাগিস্ট্রেট। তুমি আমাকে এই দুই বিপ্লবী নায়িকার হাত থেকে উদ্ধার করো।”

“আমিও তো ওদের পক্ষে। তোমাকে দিয়ে জোর করে না লেখালে তুমি কি কোনো কালে লিখবে?” মানস জুলিকে ও বাবলীকে উদ্বেগ দেয়।

“আপনার উপর আমরা জোর জুন্ম করব না, দাদা। আপনি আপনার খুশিমতো লিখবেন। আমরা যদি জেলের বাইরে থাকি মাঝে মাঝে আপনাকে তাগাদা দেব। কী লিখলেন, কতখানি লিখলেন চেয়ে নিয়ে দেখব।” বাবলী বলে মিষ্টি করে।

“এই দুটি নাবালিকা কিশোরীকে নিয়ে উপন্যাস জমানো যায় না। এদের নিয়ে বড়জোর রূপকথা লেখা যায়!” স্বপনদা বলেন মানসকে। “এই যে জুলি, এর নাম মিস ক্যারামেল। আর এই যে বাবলী এর নাম মিস চকোলেট। এদের দু’জনের অ্যাডভেঞ্চার লিখলে সেটাও একটা অমর কীর্তি হবে। যেমন ‘অ্যালিস ইন ওয়াণ্ডারল্যান্ড’। কিন্তু উপন্যাসের নায়িকা যারা হবে তাদের জীবনে চাই আরো বেশী ম্যাচিওরিটি। বছর পয়ত্রিশ বয়স না হলে, দু’তিনবার প্রেমে না পড়লে বা বিবাহের অভিজ্ঞতার ভিতর দিয়ে না গেলে তাদের নিয়ে যা লেখা হয় তা নেহাৎ পান্সে বা প্যানপ্যানে। তার জন্তে আমাকে কলম ধরতে হবে কেন? দেশে কি কলমগীরের অভাব? না উপন্যাসের অভাব?”

বাবলী আর জুলি প্রথমটা খুশি হয় নাবালিকা কিশোরী কমপ্লিমেন্ট পেয়ে। পরে রেগে যায় প্রেমের ও বিবাহের উল্লেখ শুনে। তার পর প্রকৃতিস্থ হয়।

“আমরা কি বলেছি যে আমাদের নিয়েই নভেল লিখতে হবে?” বাবলী তর্ক করে। “আমাদের বাদ দিলেই আমরা কৃতার্থ হব, দাদা। কিন্তু ‘ভার্জিন সয়েল’ের বৈশিষ্ট্য হলো বিপ্লব শুধু পুরুষদের ব্যাপার নয়। নারীরও তাতে সক্রিয় ভূমিকা। আর নারীর উপর টুর্গেনিভের যত দরদ তত তাঁর আগে আর কারো নয়। অনেকটা আপনার সঙ্গে মিলে যাচ্ছে। সেইজন্তেই তো আপনার উপর পক্ষপাত।”

স্বপনদা আপ্যায়িত হয়ে বলেন, “পড়েছি মোগলের হাতে খানা খেতে হবে সাথে। অ্যা! আমি অবাক হচ্ছি হে, মাহু, কী করে এরা আমাকে খুঁজে বার



করল। কেমন করে এরা টের পেলো যে আমার জীবনেও একজন মাদাম ভিয়ার্দো আছেন, যার জন্তে আমিও আমার জীবন উৎসর্গ করে দিয়েছি, বিনা প্রতিদানে। হ্যাঁ, তিনিও দেশবিখ্যাত গায়িকা। ইতিহাস একদিন বলবে যে তিনি গানের জগতে যত বড়ো আমি সাহিত্যের জগতে তার চেয়েও বড়ো। তা না হলে আমাকে বিয়ে না করে তিনি আরেকজনকে বিয়ে করলেন কেন? টুর্গেনিভেব সঙ্গে মিল আমার ওইপর্যন্তই। ওর বেশী নয়। তাঁর মতো আমার কোনোও অবিবাহিতা পত্নী বা প্রাকৃতিক কণ্ঠা নেই।”

হঠাৎ যেন বোমার আওয়াজ শুনে চমকে ওঠে বাবলী আর জুলি। মুখদুটি ফ্যাকাসে দেখায়। লক্ষ করে মানসও তটস্থ।

মেয়েরা চূপ মেরে যায়। স্বপনদা মুছ হেসে বলেন, “তোমরা যখন আরো বড়ো হয়ে বিশ্বসাহিত্য পড়বে তখন জানবে বিশ্বের সেরা সাহিত্যিকরা কেউ সামাজিক মালুষ ছিলেন না। সামাজিক মাপকাটি দিয়ে তাঁদের বিচার হয় না। হয় সাহিত্যিক মাপকাঠি দিয়ে। সেদিন থেকে টুর্গেনিভ অনেক উঁচুতে। আর আমি অনেক নিচুতে। ‘ভার্জিন সয়েল’ লিখতে পারি তেমন অভিজ্ঞতা কি আমার আছে!”

“আমাদের পাঁচজনের অভিজ্ঞতা আপনার কাছে আমরা ভুলে ধরব, স্বপনদা, আপনার যদি অর্চনা না থাকে।” বাবলী বলে সসঙ্কোচে।

“তোমরা যদি পূর্ণ সত্য বলো তবে তা দিয়ে একটা মূল্যবান দলিল তৈরি করতে পারি, কিন্তু দলিলকে উপাঙ্গাসে রূপান্তরিত করব কী করে? মিথ্ ও লেজেও দিয়ে তাকে সাধারণের আকর্ষণীয় করা যায়, কিন্তু তা হলে সে টেলিটায়ের ‘ওয়ার অ্যাও পীসে’র পর্যায়ে উন্নীত হবে না। চাই প্রেম, চাই ককণা, চাই দুই বিবদমান পক্ষের বিচিত্র মানবিক গুণাগুণ। কেবলমাত্র হিংসাদ্বৈতকে অবলম্বন কবে তো মহাকাব্য বা মহা উপাঙ্গাস হয় না। যেখানে বিষ আছে সেখানে অমৃতও আছে, এটা যদি রূপায়িত করতে না পারি তবে আমি ব্যর্থ হব. বোন।” স্বপনদা আবেগের সঙ্গে বলেন।

“আমরা মাঝে মাঝে আসব, যে যা জানি শোনাব। তাব থেকে আপনি যা নিতে পারেন নেবেন। যদি কিছু মিশোল দিতে চান দেবেন। আমরা যে পুরোপুরি নির্দোষ তা তো নয়। আমাদের বিবেকের দংশন আছে। আমি তো ক্ষমা করতে পারিনি আমার কৃতকর্মকে। নিমিত্তমাত্রো ভব সব্যসাচী, এই যা সাস্থনা। না, আমি হীরোইন নই! হতেও চাইনে। আমাকে যে শক্তি চালিত করেছিল সে শক্তির নাম হিংসাদ্বৈত নয়, তা দেশপ্রেম। সে শক্তি আর কিন্তু আমাকে সেই পথে

চালিত করে না। তার জায়গা নিয়েছে আরো এক শক্তি। এর নাম সামাজিক  
জায়গা।” বাবলী আপনার কথা বলে যায়।

গতশু শোচনা নাপ্তি। যা ঘটে গেছে তা ঘটে গেছে।” স্বপনদা আশ্বাস দেন।  
“কিন্তু যেটা ঘটতে চাও সেটা একটা মায়ী। একটা মবীচিকা। তুমি বতই তার  
দিকে এগোবে সে ততই দূরে সবে যাবে। একদিন দেখবে যে দেশে বিপ্লব বলতে যা  
বোঝায় তা হয়নি। শুধু তুমিই ওল্ড মেড হয়েছ। আর তুমিও।” এই বসে  
স্বপনদা জুলির দিকে তাকান।

মানস ও বেচা রদের পক্ষ নিয়ে বলে, “ওবা কেন ওল্ড মেড হবে, তুমিই হবে  
ওল্ড ব্যাচেলর। যদি না তোমরা ওই মানাম ভিয়ার্দোব ড্রাহ্মের কাটাও। তোমরা  
মেয়েরা যদি নাছোড়বান্দা হও স্বপনদা তোমাদের একজনকে বিয়ে করবেন, আর  
নয়তো তোমাদের এড়াবার দ্বন্ডে আর একজনকে।”

“দূর! আমরা কি বিয়ের জন্তে এসেছি না আসতে চাই? অমন কথা বললে  
আর আমরা আসব না কিন্তু।” জুলি ঠোট ফোলায়।

“বিয়ে আমাদের জন্তে নয়। আমরা বিপ্লবের কাছে অর্পিত হয়ে রয়েছি।  
বিপ্লবের পরে যদি সন্যোগ পাঠি বিপ্লবী কমরেডের সঙ্গেই বিয়ে হবে। বুর্জোয়া বরের  
সঙ্গে নয়। কোন্ বুর্জোয়া বরই বা আমাদের বিয়ে করতে রাজী হবে! বিয়ে করে  
পুলিশের নেকনদরে পড়বে!” বাবলী উদাসীন!

“এই দুই উদাসিনী রাজকন্যাকে নিয়ে দিব্যি একখানা উপন্যাস লেখা যায়, মামু।  
তা তোমরা তোমাদের গুপ্তকথা আমাকে জানাতে পাবো, বাবলী আর জুলি।  
উপন্যাসটা কিন্তু বৈপ্লবিক হবে না। হবে রোমান্টিক।” স্বপনদা কথা দেন।

বাবলী ভুক কুচকে বলে, “তাতে কি বিপ্লবের দিন স্বাধীন হবে, দাদা? তা  
যদি না হয় তবে কাজ কি অমন রোমান্টিসিজম? আমরা চাই ফলাকাঙ্ক্ষী রচনা।  
ফুল নয়, ফল আমাদের লক্ষ্য।”

“স্বরাশ্রিত!” স্বপনদা ফোঁস করে ওঠেন। “সম্ভব হলে বিলম্বিত করতুম।  
যারা প্রাদেশিক সরকার চালাতে গিয়ে ডুটো বছরও টিকতে পারল না, নিজেদের  
মধ্যে ঝগড়া বাটি করে যুদ্ধের অজুহাতে পদত্যাগ করল, তাদের হাতে কেন্দ্রীয় সরকার  
পড়লে খেরোখুয়ি করে ছ’মাসের মধ্যেই নতুন এক অজুহাতে আবাব দৌড় দেবে।  
বিপ্লব হলে দেশকে সামলাবে কিনা এদের চেয়ে আরো অনভিজ্ঞ আবো বয়ঃকনিষ্ঠ  
বামপন্থী দল। বিপ্লব কি ছেলেখেলা না জেলেপাড়ার সঙ! বোনেদের সামনে  
বলতে লজ্জা করে, কিন্তু না বলে উপায় নেই যে, বিপ্লব হচ্ছে দেশের বা সমাজের

প্রসবযন্ত্রণা। যার থেকে নবজন্ম হয়। আর সেই প্রসবযন্ত্রণারও পূর্বে থাকে শতাব্দী-কালের গর্ভযন্ত্রণা। ফ্রান্সের ইতিহাস পড়েছ? রাশিয়ার ইতিহাস পড়েছ? পড়ে না থাকলে আমার লাইব্রেরীতে এসে পড়তে পারো। আমি পড়াব। এর কোনো শর্টকাট নেই, বোন। বিপ্লব হঠাৎ একদিন হয়, সেকথা সত্যি। কিন্তু সেই হঠাতের পেছনে থাকে বছরেকের পটভূমিকা। গোটাকয়েক সাহেব মেরে যেমন রাষ্ট্রবিপ্লব হয় না, তেমনি হাজার কয়েক জমিদার মহাজন ব্যবসাদার বধ করেও সমাজবিপ্লব হয় না। যেটা হবার নয় সেটার জন্তে জীবন উৎসর্গ করতে চাও তো করো, কিন্তু তার আগেই তোমরা ওল্ড মেড হয়ে ব্যর্থ হবে, বাবলী আর জুলি, আমার দুটি প্রিয় বোন।” স্বপনদার স্বর কাঁপে।

ওরা দু'জনে নির্বাক হয়ে পরস্পরের মুখ চাওয়াচাওয়ি করে। কী যেন বলার আছে, অথচ ভাষা কোটে না।

“আমি জানি তোমাদের উদ্দেশ্য মহৎ।” স্বপনদা বলেন ধরা গলায়, “কিন্তু মহৎ উদ্দেশ্যের জন্তে চাই বৃহৎ প্রস্তুতি। চুরি করে, ডাকাতী করে, খুন করে, ফেরার হয়ে কি বৃহৎ কোনো প্রস্তুতি হয়? মুষ্টিমেব ব্যক্তি আত্মত্যাগের চরম দৃষ্টান্ত দেখাতে পারে, কিন্তু সমষ্টিগত বীরত্বের পূর্বাভাস কোথায় ও কতটুকু? বিপ্লব কি ভারতের মাটিতে কখনো এর আগে হয়েছে? তার ঐতিহ্যই আমাদের জনমানসে নেই। বিদ্রোহ মাঝে মাঝে ঘটেছে, সিপাহী বিদ্রোহও তেমনি এক ঘটনা। সব চেয়ে বড়ো। কিন্তু ফরাসী বা রুশ বিপ্লবের পর্যায়ে পড়ে তেমন বিপ্লব যদি চাও তো স্বরাষ্ট্রের আশা ছেড়ে দাও। বরং বিলম্বিতের জন্তেই মনটাকে তৈরি করো। তা হলে অথবা আত্মত্যাগ করতে হবে না। তোমাদের মতো মেয়েদের ভাববিহীন আত্মত্যাগ আমাকে মুগ্ধ করে, বিন্মিত করে, কিন্তু বেদনায় অভিভূত করে তার চেয়ে বেশী। তাই তোমাদের হৃর্ভোগ নিয়ে আমি ফলাকাঙ্ক্ষী রচনা লিখতে পারিনি। লিখলে রোমাণ্টিক রচনাই লিখব। কিন্তু এখন নয়। এখন আমার উপরে ক্লাসিক সৃষ্টির বরাত। যতদিন না লিখতে পাবছি ততদিন আমার শাস্তি নেই, বোন। তার আগে না যুদ্ধ এসে পড়ে। তা হলে আমার ঘরবাড়ী লাইব্রেরী সামলানোই দায় হবে। এ যুদ্ধ যে কতকাল গড়াবে, কতদূর গড়াবে তা কে বলতে পারে!”

জুলি ফরফর করে বলে, “ওটা ইংরেজদের ব্যাপার। আমাদের নয়।”

‘হ্যাঁ, কিন্তু ইংরেজরা যদি হেরে যায় আর তাদের শত্রুরা এদেশে এসে হানা দেয় তবে আমাদের ব্যাপারও হতে পারে।’ মানস কণ্ঠক্ষেপ করে। “কিন্তু, স্বপনদা, বাবলী আর জুলি কচি খুকি নয়, এরা জেলফেরং বীরান্না, আর বাবলী তো

জলখানায় বসে এম. এ. পাশও করেছে। তুমি এদের পড়াবে কী! এরা সব ডেছে।”

স্বপনদা তাঁর দুই বোনের শিঠে দুই খাল্লড় দিয়ে মাপ চান। “এর পরে আবার ষ্টিন আসবে সেদিন এক বাক্স ক্যারামেল আর এক বাক্স চকোলেট পাবে। আমার চোখে তোমরা নাবালিকা কিশোরী ছাড়া আর কিছু নও। তোমাদের জন্মে গাটো দুই রূপকথা লিখব কি না ভাবছি। রূপকথার শেষে কী থাকে জানো তো? দ ম্যারেড অ্যাণ্ড লিভ্‌ড হ্যাপিলি এভার আফটার।” তোমরা ‘যদি গুপ্ত কথা গানাতে চাও শুনব, কিন্তু গুপ্ত চক্রান্তের মধ্যে আমি নেই। নীতিহিসেবে ওটা বন্ধ্য। চতা মাক কোরো, ওর মধ্যে সমাজের বা সমষ্টির না আছে গর্ভযন্ত্রণা, না প্রসবযন্ত্রণা। বজ্রয়ের জন্মে আমিও ব্যাকুল। কিন্তু যা নেই তাকে নিয়ে আর একখানা ‘ভার্জিন ইয়ল’ লিখতে পারিনে। অত্বে কেউ যদি পারেন তাঁকে আমি শিরোপা দেব। বাবলী ার জুলি, আমার আদরের দুটি বোন, তোমরা গুপ্ত পন্থার চোরাগলি ছেড়ে দাও। াজপথ দিয়ে চলো, তা হলে হয়তো একদিন আমি ‘এরোইকা’র মতন কিছু লিখতে প্ররণা পাব।”

বিদায়ের পূর্বে জুলি স্ধায়, “মানসদা কি আজকেই ফিরে যাচ্ছ? সৌম্যদা কিন্তু ারো দিনকয়েক থাকছে। গান্ধীজী নাকি পূর্ববঙ্গ ভ্রমণে বেরোবেন। তার জন্মে নেরাপত্তার ব্যবস্থা করতে হবে। একদল নাকি ক্ষেপেছে তাঁকে মারতে। আপনিও কিছু করবেন না, আর-কাউকেও কিছু করতে দেবেন না। বসে বসে চরকা টাটবেন। লোকে তো যা তা বলবেই। সাম্রাজ্যবাদের দালাল, ধনতন্ত্রের দালাল, মনি কত কথা। আমরা এদিকে হাঁ করে বসে আছি কবে উনি গংসত্যাগ্রহের ক্তে দেবেন। আগ্নেয়গিরি লাভা বর্ণণ করবে। তা নয়, উনি কিনা চললেন ‘দ্বানদীর জলযানবিহারে।”

“অমন কথা মুখে আনতে নেই, জুলি।” মানস ব্যথা পায়। “অনেকদিন াগে থেকেই স্থির হয়ে রয়েছে যে গান্ধী সেবাসজ্জের বার্ষিক অধিবেশন এবার ডক্টর ষ্ফুল্লচন্দ্র ঘোষের স্বগ্রামে বসবে। গান্ধীজীর যোগদান একান্ত আবশ্যক। কী যেন াক গুরুত্বপূর্ণ সিদ্ধান্ত নেওয়া হবে। বোধহয় যুদ্ধ ও শান্তি সম্পর্কে গঠনকর্মীদের াতিনির্ধারণ। এসব দায়দায়িত্ব চুকিয়ে না দিয়ে কি আন্দোলনের ডাক দেওয়া ায়? এতই যদি তোমাদের তাড়া তবে তোমাদের বামপন্থী নেতারা তাঁর অপেক্ষায় াত গুটিয়ে বসে আছেন কেন?”

বাবলীই এর জবাব দেয়। “নেতায় নেতায় গুরুতর মতভেদ। কেউ বা তাকিয়ে

আছেন গান্ধীজীর দিকে, কেউ বা কমরেড স্টালিনের দিকে। স্ভাষচন্দ্রের ভক্তেরা তৃতীয় একদিকে। এম এন রায়ের শিষ্যরা চতুর্থ একদিকে।”

স্বপনদা মুচকি হেসে বলেন, “আর জনগণের দিকে তাকিয়ে আছেন কে?” উত্তর না পেয়ে নিজেই মন্তব্য করেন, “শ্রমিক শক্তি যদি তৈরি না থাকে, কৃষক শক্তি যদি প্রস্তুত না থাকে, সৈনিক শক্তি যদি স্বপক্ষে না থাকে তবে বিপ্লব দূর অশু। গান্ধীজী যদি বিপ্লব চাইতেন তা হলে তিনিও অক্ষম হতেন। তিনি চান বিপ্লব নয়, স্বরাজ। যেটা রাশিয়ায় ছিল, ভারতে নেই। স্বরাজই হচ্ছে প্রথম ধাপ, একে ডিঙিয়ে বিপ্লবের ধাপে পা রাখা যায় না। স্বরাজের জন্তেও জনগণ সব রকম কষ্ট সহিতে প্রস্তুত নয়। ইংরেজ কি ঘাড় মটকে না দিয়ে ঘাড় থেকে নামবে? সব চেয়ে যেটা খারাপ সেটার জন্তেও জনগণকে তৈরি করে নিতে হবে। বামপন্থী নেতারা বরাবরই গান্ধীজীর আড়াল থেকে লড়েছেন, তাই তাঁদের দায়িত্ববোধ জন্মালে টের পাবেন যে কুস্তুকর্ণকে অকালে জাগাতে নেই। জাগলে নিশ্চিত পরাজয়।”

জুলি জলে ওঠে। “তার মানে কি এই যে, যুদ্ধের সময় বিপ্লবের সময় নয়?”

স্বপনদা ওর পিঠে হাত বুলিয়ে ওকে ঠাণ্ডা করেন, “হতেও পারে, না হতেও পারে। কে জানে কোন্টা আমাদের ঐতিহাসিক নিয়তি! গান্ধীজীও বিজানেন?”

## ॥ চব্বিশ ॥

বিদায় নিতে গিয়ে বাবলী বলে, “দাদা, আপনি কিন্তু আমাদের হাতে মোয়া  
রিয়ে দিয়ে নিরাশ করলেন।”

স্বপনদা স্থিত মুখে বলেন, “আচ্ছা, আমি কথা দিছি, এদেশের মাটিতে সত্যি-  
তার বিপ্লব যেদিন ঘটবে সেদিন আমি যদি বেঁচে থাকি ও আমাকে যদি লিখতে  
দওয়া হয় তবে আমি সেই ঐতিহাসিক ঘটনাকে সাহিত্যে রূপান্তরিত করব। কিন্তু  
আমি না জন্মাতে রামায়ণ রচনা আমার দ্বাৰা হবে না। তাতে করে তোমাদের  
বিপ্লবেরও তেমন কোনো সুবাহা হবে কি না সন্দেহ। উল্টে আমাকেই দেশ ছেড়ে  
গালিয়ে গিয়ে প্যারিসে আশ্রয় নিতে হবে। তোমরা কি মনে করেছ টুর্গেনিভ ও বই  
শিয়ায় বসে লিখেছিলেন?”

জুলি মানসকে বলে, “ফিরে গিয়ে যুথিকাকে আমার প্রীতি জানানো আর দীপক  
ও মণিকাকে ভানোবাসা। চিঠি আমি ইচ্ছে করেই লিখিনি, লিখলে সে চিঠি  
মুন্সিগের হাতে পড়বে! যুথিকাও সন্দেহভাজন হবে।”

মানস তাকে অভয় দেয়। আমি তো স্বেচ্ছায় রাজকর্ম থেকে অপসরণ করতে  
চাচ্ছি। ওটা না হয় একটু ত্বরান্বিত হবে।”

“ত্বরান্বিত!” স্বপনদা তেড়ে আসেন, “বিলম্বিত বলো। স্থখে থাকতে ভুতে  
কিলোয়! কী করতে পারো তুমি দেশের ও বিশ্বের এই সঙ্কটে? অসি তোমার  
আমার জন্তে নয়। মসীহ আমাদের হাতিয়ার। কিন্তু এ দিয়ে যুদ্ধও করা যায় না,  
যুদ্ধ নিবারণও করা যায় না, আমরা অক্ষম। আমাদের পক্ষে শ্রেয় আমাদের যেখানে  
ক্ষমতা সেখানেই সীমাবদ্ধ থাকা। অর্থাৎ সাহিত্যের অন্তরমহলে।”

“কিন্তু,” মানস আপত্তি জানায়, “এই বাবলী জুলিদের সাজা দিতে কি আমার  
হাত উঠবে? বিবেকে বাধবে না? আর এরাও কি আমাকে সাজা না দিয়ে  
ছাড়বে? এদের হাত থেকে আমাকে বাঁচাবে কে?”

“কী যে বলো, মানসদা,” জুলি প্রতিবাদ করে। “আমরা ধরা পড়লে তে তুমি আমাদের সাজা দেবে? এবার আমরা হুঁশিয়ার হয়ে গেছি।”

বাবলী আশ্বাস দেয়, “আর যদি ধরা পড়ে সাজা পাই তো অনিচ্ছুক বিচারকদে আমরা বাঁচতে দেব। ওঁরাও তো নিমিত্তমাত্র।”

ওদের বিদায়ের পর স্বপনদা বলেন, “ওদের খীসিসটাই ভুল। কিন্তু কী কী ওকথা ওদের মুখের উপর বলি? ওদের ধারণা ক্ষমতা চলে আসবে মধ্যবিত্তদে ডিভিডিয়ে সরাসরি শ্রমিক শ্রেণীর হাতে। গণতন্ত্র এড়িয়ে সরাসরি সমাজতন্ত্রের হাতে সেটা হবার নয়। হবার যেটা সেটা দুই দফায় হবে। প্রথমে বুর্জোয়া গণতন্ত্র। তার পরে শ্রমিক সমাজতন্ত্র। মাঝখানে হয়তো ত্রিশ চল্লিশ বছর ব্যবধান। অসম কুস্তকর্ণকে জাগাতে নেই। জাগাতে গেলে যেটা হবে সেটা ফাসিজম বা নাসিজম ইউরোপে চারবছর থেকে এটাই আমি দেখে ও ঠেকে শিখেছি। এদের শিক্ষা পুঁথিগত। মার্ক্স বলো এঙ্গেলস বলো লেনিন বলো কেউ কি ফাসিজম নাসিজমের সম্ভাবনা কল্পনা করেছিলেন? তাঁদের শাস্ত্রে এই পর্বটি বাদ গেছে এবারকার যুদ্ধে ক্যাপিটালিজম খতম হবে না, সেটা একটা ভ্রান্তি। খতম হ ইম্পিরিয়ালিজম। সেবারকার যুদ্ধে গোটা চারেক সাম্রাজ্যের পতন ঘটেছিল রাশিয়ান, জার্মান, অস্ট্রোহাঙ্গেরিয়ান, টার্কিশ। এবারেও গোটা পাঁচেক সাম্রাজ্য ভেঙে পড়তে পারে। ব্রিটিশ, ফ্রেঞ্চ, বেলজিয়ান, ডাচ, পটুগীজ। হয়ে জাপানীজও। তার মানে সাম্রাজ্যবাদের যুগ যাবে। কিন্তু ধনতন্ত্রবাদের যুগ সেইস যাবে না।”

“আমাদের কর্তব্য তা হলে কী?” মানস জানতে চায়।

“ব্রিটেনকে রক্ষা করা, কিন্তু ব্রিটিশ সাম্রাজ্যকে নয়। ফ্রান্সকে রক্ষা করা, ফরাসী সাম্রাজ্যকে নয়। ব্রিটেনকে ও ফ্রান্সকে আমরা ভালোবাসি, কিন্তু তা সাম্রাজ্যকে নয়। সাম্রাজ্যরক্ষার জন্তে আমরা প্রাণ দিতে নারাজ, ধন দিতে নারাজ ওই জুলি পাগলীর ভাবায়, না একো রুপেয়া না একো জওয়ান। ওদের সাম্রাজ্য যদি ওরা মানে মানে গুটিয়ে নেয় তা হলে হিটলারের হাত থেকে ব্রিটনকে বাঁচানো জন্তে, ফ্রান্সকে বাঁচানোর জন্তে, আমরা যে যা পারি তা করতে ছুটে যাব। তুমি আমি, জবাহরলাল, এমন কী, গান্ধীজী—আমরা সবাই ইংরেজদের ভালোবাসি, চাপরাশি খানসামার মতো নয়। চাপরাশি খানসামার সঙ্গে আমরা রাজভিত্তি প্রতিযোগিতায় নামতে পারব না। বড়লাট যদি আমাদের তাঁর সঙ্গে এক টেবিলে খান খেতে ডাকেন তা হলে আমরা সবার সম্মানসহ এক টেবিলে, বিদায়দায়ী

মতো তফাতে দাঁড়িয়ে থেকে সাহেবলোকের থানা জুগিয়ে দেব না। আমাদেরও তো মানসম্মান আছে। কী দরকার, বাবা, লাটবাড়ীর তল্লাট মাড়াবার? সেখানকার থানার টেবিলে বসবার জন্তে ধস্তাধস্তি করাও হীনতা। কেন আমরা বড়লাটের নিমন্ত্রণ প্রত্যাশা করব? না গেলে কুস্তি শুরু করে দেব? সংঘর্ষের ভিতরে একটা ঘৃণার ভাব আছে। এমন কী, অহিংস আন্দোলনও ঘৃণামুক্ত নয়। ব্যাটােদের হাতে না মেয়ে ভাতে মারব, গলাধাক্কা দিয়ে না তাড়িয়ে ধোপানাপিত বন্ধ করে তাড়াব, এটাও তো ঘৃণার অভিব্যক্তি। যাদের আমি ভালোবাসি তাদের আমি ঘৃণা করি কী করে? গান্ধীজী না হয় পাপকে ঘৃণা করেন, পাপীকে নয়, কিন্তু তাঁর নেতৃত্বাধীন জনগণ কি অত স্বল্প বিচার করতে পারে? ওদের যদি তাতিয়ে তোলা হয়, মাতিয়ে তোলা হয়, ইংরেজদের সবাইকে ওরা ঘৃণা করবে। এই যুদ্ধের মাঝখানেও তাদের বিব্রত করবে, আশ্চর্য হব না যদি গায়ে হাত দেয় বা দোকানপাট জালিয়ে দেয়। আগুন নিয়ে খেলার সময় এটা নয়। তবে সরকার যদি জোর করে টাকা আদায় করে, যুদ্ধের জন্তে জওয়ানদের ধরে নিয়ে যায়, আগুন আপনি জ্বলে উঠবে। আমরা কেউ নেবাতে যাব না। তোমার ডিউটি, তুমি যেতে বাধ্য, আমি কিন্তু নীরব দর্শক।”

“আমি যাতে বাধ্য না নই সেইজন্তেই তো আগে থেকে চাকরি ছাড়তে চাই, স্বপনদা। শোনা যাচ্ছে চেম্বারলেনের বদলে চার্চিল নাকি প্রধানমন্ত্রী হবেন। ওঁর এমন অহঙ্কার যে গান্ধীজী যখন রাউণ্ড টেবিল কনফারেন্সে রাজ অতিথি হয়ে বিলেত যান তখন উনি তাঁকে ইন্টারভিউ পর্যন্ত দেন না। তাঁর অল্পরোধ প্রত্যাখ্যান করেন। চার্চিল প্রধানমন্ত্রী হলে গান্ধীজীর সঙ্গে বোঝাপড়া হবার নয়। অথচ চার্চিল প্রধানমন্ত্রী না হলে হিটলারের সঙ্গে মোকাবিলা সহজ হবে না। আমি তো চোখে আঁধার দেখছি, স্বপনদা। সাম্রাজ্য পাশ দৃঢ় করাই চার্চিলের লক্ষ্য। সাম্রাজ্য পাশ ছিন্ন করাই গান্ধীজীর লক্ষ্য। কী করে দু’পক্ষের মতের মিল হবে? মতভেদ থেকে পথভেদ। পথভেদ থেকে সংঘর্ষ। ঘৃণা এড়াতে পারবে ক’জন! ঘৃণার ভাব প্রবল হলে ভালোবাসার ভাবও দুর্বল হবে। আমরা যারা ব্রিটেনকে ভালোবাসি, ফ্রান্সকে ভালোবাসি, তারা একদিন কোণঠাসা হব। দুই পক্ষই আমাদের ভুল বুঝবে। একপক্ষ ভাববে রাজদ্রোহী, অপরপক্ষ ভাববে দেশদ্রোহী। আমার মনের শান্তি যাবে। আমি কি বেঠোভেনের মতো বধির যে সেই গোলমালের মধ্যেও নিবিষ্ট চিন্তে হৃষ্টির কাজ কাজ করতে পারব? না, চাকরি থেকে বেরিয়ে এলেও না। নীরব দর্শক হওয়া আমার স্বভাবে নেই। আমি কিংকর্তব্যবিমূঢ়।”



স্বপনদা সব শুনে বলেন, “ওয়েট অ্যাণ্ড সী।”

কথাটা মানসের মনে ধরে। দেখাই যাক না কোথাকার জল কোথায় গড়ায়।  
ওদিকে যুদ্ধ যাদের মাথার উপরে তাদের তেঁা মাথাব্যবহার লক্ষণ নেই। যত মাথাব্যথা  
কি ভারতের রাজনীতিক তথা ভাবুকদের? তাছাড়া যুদ্ধের সঙ্গে স্বাধীনতাকে  
বন্ধনীভুক্ত কি না করলেই নয়? আর স্বাধীনতার সঙ্গে বিপ্লবকেই বা বন্ধনীভুক্ত করা  
কেন? তলে তলে চলেছে পাকিস্তানের উদ্যোগ, যাতে স্বাধীনতার লক্ষ্য থেকে দশ  
কোটি মুসলমানকে লক্ষ্যভ্রষ্ট করা যায়। ওরা লক্ষ্যভ্রষ্ট হলে পরে হিন্দুরাও লক্ষ্যভ্রষ্ট  
হবে। এর ফলে ব্রিটিশ সাম্রাজ্য যুদ্ধের পরেও টিকে যেতে পারে, কিন্তু ব্রিটেনের প্রতি  
সহানুভূতি ইতিমধ্যেই ধোঁয়া হয়ে যাবে।

স্বপনদা তা শুনে বলেন, “আমিও একদা ভাবপ্রবণ ছিলাম মামু। কিন্তু চার  
বছর ইউরোপে বাস করে ক্রমে ক্রমে মোহমুক্ত হই। দেশ যতদিন পরাধীন থাকে  
স্বাধীনতার জন্তে সংগ্রাম মানুষকে মহৎ হবার প্রেরণা দেয়। আদর্শবাদী নরনারীতে  
শিবির ভরে যায়। কিন্তু যেই স্বাধীনতা অর্জিত হলো অমনি ক্ষমতা নিয়ে কাড়াকাড়ি  
ও হানাহানি। সেই আদর্শবাদীদেরই কুসিত এক চেহারা। যারা শহীদ হলো  
তারা যদি বেঁচে থাকত তারাও ক্ষমতার দ্বন্দ্ব অংশ নিয়ে মহত্ত্ব খোঁজত। অতদূর  
যেতে হবে কেন, এই ভারতেরই আর্টটি প্রদেশে কংগ্রেস মন্ত্রিত্ব গঠিত হবার পর থেকে  
আদর্শবাদীদের চরিত্র বদলে গেছে। ক্ষমতার দ্বন্দ্ব তাঁদেরও চেহারা মলিন হয়েছে।  
কেন্দ্রীয় সরকার হলে পরে দেখবে ক্ষমতার দ্বন্দ্ব তাঁদের চরিত্রভ্রষ্ট করবে। তখন তাঁদের  
চেহারা দেখে তুমি শিউরে উঠবে। কংগ্রেস যদি আবার সংগ্রামে নামে তা হলে তার  
ইমেজ কতকটা ফিরে পাবে। কিন্তু সে সংগ্রাম যদি দীর্ঘমেয়াদী না হয়, যদি তার  
আগেই দম ফুরিয়ে যায়, যদি ক্ষমতার ছিটেকোটা পেয়েই দক্ষিণপন্থীরা রণে ভঙ্গ দেয়  
আর বামপন্থীরা ইংরেজদের বিরুদ্ধে না লড়ে দক্ষিণপন্থীদের বিরুদ্ধে লড়ে  
তা হলে তোমারও মোহভঙ্গ হবে। ইংরেজীতে আরো একটা বচন আছে। ‘থিংস  
আর নট হোয়াইট দে সীম’। এই যুদ্ধে ইংরেজ বা ফ্রান্স ধোঁয়া তুলসী পাতা নয়।  
জার্মানীও নয় গুয়ে গ্যাঁদালপাতা। চেম্বারলেনও নন দেবতা। হিটলারও নন অস্তুর।  
যুদ্ধটা যে ডেমোক্রাসীর ইস্যুতে ডিকটেরশিপের সঙ্গে হচ্ছে এটাও উগর থেকে  
দেখতে, আসলে তা নয়। স্বার্থে স্বার্থে বেধেছে সংঘাত। তুমি আমি কেন এতে  
জড়িয়ে পড়তে যাই? তবে এটাও আমি বলব যে ইংরেজদের হেরে যেতে দেখলে  
আমি গভীর ব্যথা পাব, ফরাসীদের বেলাও তাই। না, আমি এদের পরাজয় চাইনে।”

“আর জার্মানদের হেরে যেতে দেখলে?” মানস জেরা করে।

“তাখ, জার্মানদের বিশ্ববহর ধরে খোঁচানো হয়েছে। ভুখমী বাঘকে বার বার খোঁচালে সে তো মরীয়া হয়ে মরণকামড় দেবেই। তা হলেও তাকে হারানো সহজ হবে না, যদি না রাশিয়া বা আমেরিকা বা উভয়েই তার শত্রু হয়। এখন থেকে আমি ভবিষ্যদ্বাণী করব না। ওয়েট এণ্ড সী। শেষপৰ্বন্ত যদি জার্মানী হেরে যায় তবে তার জন্তে আমিও গভীরভাবে ব্যথিত হব। বাখ আর বেঠোভেন, গ্যোটে আর শিলারের জাতির পরাজয় কত বড়ো একটা ট্রাজেডী! একে নিবারণ করতে পারলেই সভ্যতার প্রতি যথাকর্তব্য করা হতো। কই, পারলেন কি কেউ নিবারণ করতে? ইউরোপে কি মহান ব্যক্তিত্বের অভাব? রল্লা আর রাসেলপৰ্বন্ত এবার-কার যুদ্ধে শান্তিবাদী নন। একমাত্র শান্তিবাদী গান্ধীজী। কিন্তু তাঁর পেছনে যদি রাজশক্তি না থাকে তবে তিনি কেমন করে মধ্যস্থতা করতেন বা কববেন? আর তাঁর নিজের সেরকম অভিপ্রায় থাকলেও তাঁর সহকর্মীদের সে মনোভাব কোথায়?” স্বপনদা সংগয় প্রকাশ করেন।

মানস বিষয় মুখে বলে, “মহাত্মার পক্ষে এটা একটা চ্যালেঞ্জ। এর সম্মুখীন হতে তিনি ইচ্ছুক। কিন্তু অন্তত একটি নেশনকে নিরস্ত্র হয়ে দৃষ্টান্ত দেখাতে হবে যে নিরস্ত্র হয়েও আত্মরক্ষা করা যায়। সেই নেশনটি ভারত ভিন্ন আর কে? তাঁর শিষ্যদের হাতে ক্ষমতা এলে তাঁরা কি দেশকে নিরস্ত্র করতে রাজী হবেন? একজন কি ছুঁজন হয়তো গুরুর মুখ চেয়ে সম্মতি দেবেন, কিন্তু অধিকাংশেরই তাতে অমত। হিটলার, চার্চিল, স্টালিন কেউ কর্ণপাত করবেন না। কেউ ঝুঁকি নেবেন না। প্রত্যেকেরই বিশ্বাস যে অস্ত্রপরীক্ষায় তিনিই জিতবেন, তাঁর প্রতিপক্ষ পরাস্ত হবে। মহাত্মাকে ব্যর্থ হয়ে ফিরে আসতে হবে। স্বয়ং যীশু খ্রীষ্ট থাকলে তাঁকেও। যুদ্ধরত সব ক’টা নেশনই তো খ্রীষ্টান। জাপান যদি যোগ দেয় লেও তো বৌদ্ধ। অথচ একটিরও অন্তঃপরিবর্তন সম্ভবপর নয়। এ যুদ্ধ চলছে, চলবে, দাবানলের মতো ছড়িয়ে যাবে। কে হারবে, কে জিতবে, সেটা এখন থেকে বলা যায় না। যদি হিটলার হারে তবে স্টালিনকে ঝুঁকবে কে? বিপ্লবের রক্তশ্রোতে সারা জার্মানী লাল হয়ে যাবে। তার পরে সারা কন্টিনেন্ট। আর হিটলার যদি জেতে তবে ফরাসী বিপ্লবের মতো রুশ বিপ্লবও স্বপ্নের মতো মিলিয়ে যাবে। তুমি কি খুশি হবে?”

“খুশি হব!” স্বপনদা চমকে ওঠেন। “না, যাহু। জার শাসিত রাশিয়ার নামনে আর কোনো পথ খোলা ছিল না, তাই বিপ্লবই ছিল উদ্ধারের একমাত্র উপায়। তা বলে সব দেশেই বিপ্লব হবে, কোথাও আর কোনো পথ খোলা নেই, এটা একটা

স্বযুক্তি। ক্যাথলিকদের মতো কমিউনিস্টদের এটাও একটা ডগমা। গোটা পৃথিবী দূরের কথা গোটা ইউরোপও পুরোপুরি ক্যাথলিক হয়নি, যারা পুরোপুরি ক্যাথলিক হয়েছিল তাদের একভাগও পরে একদিন প্রটেষ্ট্যান্ট হয়ে যায়। মার্কসবাদীদেরও সেই দশা হবে। ইতিহাস ভারতের স্বাধীনতার পর ভারতীয় জাতীয়তাবাদীদেরও একটা স্বযোগ দেবে, যাতে তারা শোষিত বঞ্চিত জনগণকে বিনা বিপ্লবেই বিপ্লবের সফল জোগাতে পারে। সেইজন্মেই আমি বিপ্লবকে বিলম্বিত করতে চাই। স্বরাধিত করতে নয়। কে না জানে যে বিপ্লব মানে মহতী বিনষ্ট? রাশিয়ায় কত লক্ষ মানুষ মরেছে, কত লক্ষ মানুষ উৎখাত হয়েছে, কত লক্ষ মানুষ বন্দীশালায় বেগাব খাটছে, খবর রাখো? আমি সেটা এড়াতে পারলেই খুশি হব। কিন্তু ইতিহাস যাদের একটা স্বযোগ দেবে তারা যদি তার সদ্ব্যবহার না করে তবে বিপ্লব ভিন্ন আর কোন পথ খোলা থাকবে, তুমিই বলো?”

মানস চিন্তা করে। বলে, “যে দেশের রেনেসাঁস হলো না, রেফরমেশন হলো না, এনলাইটেনমেন্ট হলো না, সে দেশে রেভোলিউশন হবে, এটাও কতকগুলো ধাপকে ডিঙিয়ে যাওয়া। রেভোলিউশন হলে তার মোড় ঘুরিয়ে দিতে বেশীদিন লাগবে না। গুরু পুরোহিত মোল্লা মোলভীরাই ঘুরিয়ে দেবে। আমি চাই ধাপে ধাপে এগোতে। শেষ ধাপটা হয়তো রেভোলিউশন। ওটাকে আমি অসম্ভব বলব না, অবশ্যস্বাবীও বলব না। সব দেশেই রেভোলিউশন ও ভায়েলেন্স সমার্থক হয়ে গেছে। ভারতেও যদি হয় তবে আশ্চর্য হব না। যদি না হয় তা হলেই বরং আশ্চর্য হব। গান্ধীজীর শিক্ষা জনগণের অন্তর জয় করলে বিপ্লবের দিন তারা অহিংস থেকে ইতিহাসে এক আশ্চর্য নজির সৃষ্টি করবে। সেদিন হবে এক নবযুগের সূচনা। আমি যে গান্ধীজীর উপর আশাভরসা রাখি তার কারণ ভারতের জনগণকে তিনি নতুন একটা পথে চালিত করছেন, যে পথের একটি ধাপ পরাধীনতামুক্তি, আরেকটি ধাপ শোষণমুক্তি। নতুন বস্ত্রে বোঝায় অহিংস উপায়ে। কিন্তু সেইসঙ্গে রেনেসাঁস, রেফরমেশন, এনলাইটেনমেন্টও চাই। তিনি যে এসব বিষয়ে অচেতন বা নিষ্ক্রিয় তা নয়। কেউ যদি ভগবান না মানে, কিন্তু সত্যকে মানে তা হলেও সে তাঁর প্রিয় হতে পারে, কারণ তাঁর বিচারে সত্যই ভগবান। এদিক থেকে তিনি একজন ধর্মসংস্কারক। সমাজসংস্কারও তিনি তৎপর। অস্পৃশ্যতার বিরুদ্ধে তাঁর অক্লান্ত অভিযান। স্পৃশ্য অস্পৃশ্যের বিবাহও তাঁর আশীর্বাদ আছে। এই তো সেদিন সেরকম একটা ঘটনা ঘটে গেল। কিন্তু যেখানে তাঁর সঙ্গে আমার অমিল সেটা হচ্ছে শিল্প ও সংস্কৃতির ক্ষেত্র। সেক্ষেত্রে গান্ধীপন্থীদের গতি সীমাবদ্ধ ও নিয়ন্ত্রিত। শৃঙ্খলা সেক্ষেত্রে

শুধুনের নামান্তর। তবে তাঁর চিন্তাপ্রণালী সম্পূর্ণ বৈজ্ঞানিক। সেদিক থেকে তিনি রেনেসাঁসের ধারাবাহক।”

স্বপনদা যথাসময়ে মানসকে ট্রেমে তুলে দেন। বলেন, “আবার এসো। ক্লাবটার একটা হিল্ডে করতে হবে। লিকুইডেশনে আমার মন সায় দিচ্ছে না। যে বুক আমি স্বয়ং রোপণ করেছি সে যদি বিষবৃক্ষও হয় তবু তার মূলোচ্ছেদ করতে মায়া করে। ভাবছি ওটাকে ক্রমে ক্রমে ফোর আর্টস ক্লাবে রূপান্তরিত করলে কেমন হয়। হ্যাঁ, মহিলারাও আসবেন, স্ক্যাণ্ডাল ছোটো একটা হবে, কিন্তু বিয়ে খাঁদের হচ্ছে না বিয়েও তো তাঁদের হতে পারে।”

মানস ফিক করে হেসে বলে, “যেমন তোমার। যেমন বাবলীর, জুলির। যদিও ওরা আর্টের ধার ধারে না তবু ওদের গেস্ট করে নেওয়া যেতে পারে। অমনি করে ওরা আর্টের সমজ্ঞদার হবে। কী বলো, স্বপনদা?”

স্বপনদা হাসেন। “না, ওদের মতো বিপ্লবী নায়িকাদের আসতে দেওয়া হবে না। ওরা ঘরে ঘরে বিপ্লব ঘটাবে। বিবাহিত পুরুষদেরও মাথা ঘুরিয়ে দেবে। তাঁদের সহধর্মিণীদের সঙ্গে সংঘর্ষ বাধবে। সেবারকার অভিজ্ঞতার ফলে আমি হুঁশিয়ার হয়েছি। সাবধানের মার নেই। পঞ্চশরের পরে।”

স্বস্থানে ফিরে গিয়ে মানস যুথিকাকে সব কথা জানায়। জুলির সঙ্গে দেখা হয়েছে, তার বান্ধবী বাবলীর সঙ্গেও, ঘটনাচক্রে সৌম্যদার সঙ্গেও। আপাতত কেউ জেলে যাচ্ছে না, জেল এড়াবার জন্তে পাতাল প্রবেশ করছে না। কলকাতার রাজনীতিক আবহাওয়া খমখমে। বুদ্ধিজীবী খাঁদের বলা হয় তাঁদের বেশীর ভাগই নাংসীদের বিপক্ষে। কিন্তু হিটলারের পক্ষেও একভাগ আছেন। স্বদেশের স্বাধীনতার জন্তে তাঁরা ব্রিটেনের পরাজয় কামনা করেন। কিন্তু এসব ডিফিটিট তো গান্ধীপন্থী নন। গান্ধীজীকে সতর্ক থাকতে হবে যেন তিনি এঁদের সঙ্গে বন্ধনীভুক্ত না হন। তাঁকে তাঁর স্বাভাব্য রক্ষা করতে হবে।

“তারপর তোমার স্বপনদার সমাচার কী?” যুথিকা কৌতূহলী হয়। তোমার মুকুলদার কী খবর? ওই দুই চিরকুমার কি ভীষ্মের মতো প্রতিজ্ঞাবদ্ধ? তা হলে দেশের কুমারীজর কী ভবিষ্যৎ? ওরা কি বরের আভাবে চিরকুমারী হবে?”

“স্বপনদা এখন কবি গ্রেটলারের মতো পরিত্রাণ করছেন। এত নয়স হলো, এখনো কিছুকণ শোধ করা হলো না। গ্রেটলার জীবনে কোন এড গন্স স্বপনদার জীবনে ফ্রেন্সি স্কুল চাকর্য্য। কী হোজা যে জঁকে দেয়েছেন আমার কোনো মেয়েকে হোজা লাগে না। কাদের দলটা গুলোর মতো হয়ে গেছে কবে। বড়ের মতো।”

ক্ষিরে তাকান না। রোমান্সের ঘোর তবু কাটে না। জীবনে দ্বিতীয় এক রোমান্স ক'জনের ভাগ্যে ঘটে! না ঘটলে উনি বিয়ে করবেন না। ওই প্রথম প্রেমের প্রতি একনিষ্ঠ থাকবেন। তা নিয়ে একটা ক্লাসিকও লিখবেন। কিন্তু কোনোদিক থেকেই সফল হচ্ছেন না। পেশার দিক থেকেও না। কেবলি হা হতাশ করছেন। 'আমি ফেল'।" মানস বলে যায়।

যুথিকা দুঃখিত হয়। "আর মুকুলদা?"

"মুকুলদার কেসটা বিপরীত। তাঁকে ভালোবাসেন এক বিবাহিতা মহিলা। পতিপরিত্যক্ত। কিন্তু হিন্দু মতে ডিভোর্সের উপায় নেই। স্বতরাং পুনর্বিবাহেরও আশা নেই। এই হতাশাকে দু'জনেই মহিমাম্বিত করেছেন। নিকাম সাধনায়। মানবিক প্রেম পরিণত হয়েছে ভাগবত প্রেমে। মুকুলদার তেমন কোনো অভাববোধ নেই। গানের মধ্যেই তিনি তাঁর জীবনের অর্থ পাচ্ছেন। সংসারী মানুষের মতো তাঁর অর্থচিন্তা নেই। আশ্রমে বাস করেন। আশ্রমই তাঁকে চালায়। গান করে যদি কিছু মেলে তবে তা নিজের নামে নয় আশ্রমের নামে গ্রহণ করেন। অথচ তিনি সন্ন্যাসী নন। মুকুলানন্দ স্বামী বললে তিনি রাগ করেন। সবাই তাঁকে ডাকে মুকুলদা বলে। তাতেই তাঁর আনন্দ। তাঁর সঙ্গে দেখলুম দুই গোরা সন্ন্যাসী। কৃষ্ণপ্রাণ আর হরিপ্রাণ। হিমালয়ে তাঁদের আশ্রম। নিবেদিত আত্মা।"

যুথিকা রসিকতা করে। "আরো দুটি ওল্ড মেড সৃষ্টি করা হলো!"

এর পরে মানস জানতে চায় তার অল্পপস্থিতিতে নতুন কিছু ঘটেছে কি না। বাড়ীতে-কিংবা শহরে।

"ক্যাপটেন মুস্তাফী এসেছিলেন মিলির চিঠি নিয়ে। বেডফোর্ড নাকি ওকে পরের বছর ভর্তির আশা দিয়েছে। যুদ্ধের জন্তে কারো মনে এতটুকু আতঙ্ক নেই। বরং সকলেই দেশের জন্তে কিছু না কিছু ত্যাগ স্বীকার করতে চায়। মিলির গায়েও ত্যাগের বাতাস লেগেছে। রোমে এলে রোমানদের মতো আচরণ করতে হয়। মিলিও এখন একজন রোমান। ভারতের স্বাধীনতার নিরিখে ইংলণ্ডকে বিচার করতে তার ইচ্ছে করে না। যতই অন্ডায় করে থাকুক না কেন এখন ওরা বিপন্ন। বিপন্নকে বিব্রত করা উচিত নয়। ওদের একদিন স্মৃতি হবে। তার জন্তে অপেক্ষা করাই শ্রেয়। এ কী কথা শুনি আজ মালতীর মুখে! লঙ্কায় যেই যায় সেই রাক্ষস হয়। মিলির এই অধঃপতন কি তার বিপ্লবী বান্ধবীরা স্নানজরে দেখবে? জুলি কী মনে করবে? সৌম্যদা কী মনে করবেন? তবে আমার কথা যদি বলো আমি মিলির এই পরিবর্তন সঙ্গত মনে করি। যে দেশে ওকে বাস করতে হবে সে দেশের বিপক্ষে ওরও

তো বিপদ। যে ডালে বসেছে সে ডাল কাটা গেলে ওরও তো পতন। ভারতের স্বাধীনতার ভাবনা ভারতবাসীদের। ব্রিটেনবাসিনীর নয়। ক্যাপটেন মুস্তাফীরও সেই মত। দর কষাকষি যদি করতে হয় দেশের রাজনীতিকরা করবেন। মিলির কাজ বিনা শর্তে যুদ্ধের কাজে সহায়তা করা। সেবা প্রতিষ্ঠানে তালিম পেয়েছে, সেবার কাজটাও তো সে করতে পারে। অস্ত্র যদি ধরতে হয় তো স্কুয়ার ধরবে।” যুথিকা শোনায়।

“বিলেতে থাকলে আমিও তাই করতুম। তুমিও।” মানস মন্তব্য করে।

“অগত্যা। কিন্তু প্রথম স্বেচ্ছায় আমি দেশে চলে আসতুম ও বিলেত সম্বন্ধে দায়মুক্ত হতুম। মিলি বেচারি সবে ওদেশে গেছে। ফেরারও পথ বন্ধ। টর্পেডোর ঘাঘ জাহাজডুবি হবে। এদেশে থাকলে জেলে যেতে হতো। মনে করো ওটাও ওর কারাবাস। কয়েদীর মতো খেটে মরতে হবে।” যুথিকা আপসোস জানায়।

“আমি হলে উদ্দীপনা বোধ করতুম, জুঁই। এমন স্বেচ্ছায় ক’জনের ভাগ্যে জোটে! যুদ্ধক্ষেত্রে প্রত্যক্ষদর্শী। মিলি যদি উপন্যাস লেখে চাইকি আর একটা ‘ওয়ার অ্যাণ্ড পীস’ লিখতে পারবে। আমি তো পারব না। আমি ওকে ঠেঁধা করি। ওকে আমার অভিনন্দন জানিয়ে। স্কুয়ারকেও, সেও যদি অস্ত্র হাতে নেয়।”

দিনকয়েক পরে সোম্বা এসে হাজির। বলে, “সব ঠিক। বাপু তোমার জন্তে বিশেষ ফেক্সারি সকালবেলা পনেরো মিনিট সময় নির্দিষ্ট করেছেন। এখন সেই পনেরো মিনিটের জন্তে তোমাকে রাত একটার ট্রেন ধরতে হবে। ট্রেন থেকে নেমে স্টীমার। স্টীমার থেকে নেমে মাইল খানেক পদযাত্রা। তার পরে গান্ধী কুটার। দুপুরে তুমি সেবাসজ্জের অতিথিশালায় পণ্ডিত ভোজনে বসবে। তারপর আবার পদযাত্রা। আবার স্টীমার। আবার ট্রেন। বাড়ী ফিরতে রাত দশটা। আমি যাবার বেলা তোমার সহযাত্রী হব, কিন্তু আসবার বেলা নয়। আমাকে সেবাসজ্জের বার্ষিক অধিবেশনে উপস্থিত থাকতে হবে। গান্ধীজীর প্রস্থানের পর আমারও প্রস্থান। সিদ্ধান্ত কী হলো জানা আমার দরকার। গুরুতর সঙ্কট।”

মানস সোম্বার সঙ্গে যাবে, এটা তো একরকম আগে থাকতেই স্থির ছিল। কবে, কখন, কেমন করে আগে জানত না, এখন জেনে নিশ্চিন্ত হওয়া গেল। ইংরেজী মতে যেদিন রওনা হবে সেইদিনই ঘুরে আসবে। একটা পুরো দিনও লাগবে না। গান্ধী-জীকে তো আর কখনো এত নিভুতে পাওয়া যাবে না। মানস রাজী হয়। “গুরুতর লঙ্কট।” শুনে তার কোতূহল বেড়ে যায়।

“সবুট কি গণসভ্যাগ্রহ নিয়ে ?” মানস জিজ্ঞাসা করে।

“না, ভাই। সেটা গান্ধীজীর নিজস্ব সিদ্ধান্ত। কাউকে তিনি ঘৃণাকরেও জানতে দেবেন না কবে, কোন্ ইচ্ছাতে গণসভ্যাগ্রহ ঘোষণা করবেন বা আদৌ করবেন না। সেটাও তো একপ্রকার যুদ্ধ। যুদ্ধের নৈতিক বিকল্প। একপ্রকার বিপ্লবও বলতে পারো। বিপ্লবের নৈতিক বিকল্প। নীতিগতভাবে সেটা ঠিক কি ভুল এ বিচার তাঁরই সাজে, আর কারো নয়। আমরা কেউ তাঁর উপর চাপ দিতে চাইনে। এই অধিবেশনটা গান্ধী সেবাসঙ্ঘের ঘরোয়া ব্যাপার। আমরা যারা তার সদস্য তাদের উপর চারদিক থেকে আক্রমণ আসছে এই বলে যে আমরা নাকি আমাদের নতুন ক্রীস্টের নামে নতুন এক ক্রীস্টীয় চার্চ পত্তন করেছি। গান্ধীয়ান চার্চ। একদিন এই গান্ধীয়ান চার্চ ইণ্ডিয়ান স্টেটকে নিজের ইচ্ছামতো নিয়ন্ত্রণ করবে। এর যিনি পোপ হবেন তিনিই হবেন ভারতভাগ্যবিধাতা। রাষ্ট্রপতি মনোনয়ন করবেন তিনিই। কংগ্রেস হবে তাঁরই পরোক্ষ প্রভাবাধীন। ইউরোপের ইতিহাসে এ নিয়ে যে অনর্থ ঘটে গেছে এদেশেও তারই পুনরাবৃত্তি ঘটবে। আমরা এই আক্রমণের উত্তর দিতে মিলিত হচ্ছি। কিন্তু কী উত্তর দেব তা নিয়ে আমাদের মন ভারাক্রান্ত।” সৌম্যকে চিন্তাধিত-দেখায়।

“আমি তো এর একটা আভাস দিয়েছি তোমাকে,” মানস মনে করিয়ে দেয়। “রাষ্ট্রের বাইরে তোমরা একটা চার্চ গঠন করছ, চার্চই হবে রাষ্ট্রের নিয়ন্তা। কিন্তু কংগ্রেস হাই কমান্ডের কথা ভেবেই ওকথা বলেছি, সেবাসঙ্ঘের কথা ভেবে নয়। সেবাসঙ্ঘ তো একটা অরাজনৈতিক প্রতিষ্ঠান।”

“যথার্থ। আরম্ভটা সেইভাবেই হয়েছিল।” সৌম্য ব্যাখ্যা করে, “কিন্তু কংগ্রেস যখন পাল’ামেন্টারি প্রোগ্রাম নিয়ে মেতে ওঠে তখন কংগ্রেসের বামপন্থী পক্ষ দক্ষিণ-পন্থী পক্ষের সঙ্গে সেবাসঙ্ঘকেও অভিন্ন মনে করে। আসলে দক্ষিণপন্থীদের সঙ্গেও আমাদের আসমান জমিন ফারাক। ওঁদের কাছে অহিংসা একটা পলিসি। আমাদের কাছে অহিংসা একটা প্রিন্সিপল। কংগ্রেস একটা গণতান্ত্রিক প্রতিষ্ঠান। তার দরজা খোলা। যে-কোনো ব্যক্তি চার আনা পয়সা দিয়ে কংগ্রেসের সদস্য হতে পারে। ভোটার অধিকারী হতে পারে। অধিকাংশের ভোটে কংগ্রেস একদিন পলিসি হিসাবেও অহিংসা বর্জন করতে পারে। তার মানে গান্ধীকে বিসর্জন দিতে পারে। ছলে বলে কৌশলে যে-কোনো উপায়ে ক্ষমতা দখল করা বাম দক্ষিণ কারো পক্ষে মূলনীতিবিরুদ্ধ নয়, এর পূর্বাভাস লক্ষ করে গান্ধীবাদীরা কংগ্রেসের থেকে স্বতন্ত্র একটি সংস্থার প্রয়োজন অনুভব করেন। কোনো অবস্থাতেই তাঁরা গান্ধীজীকে বিসর্জন

দেবেন না, অহিংসা ও সত্য বর্জন করবেন না। ক্ষমতার উপরে তাঁদের লোভ নেই, সেটার উপরে অস্থূল প্রয়োগ করাই তাঁদের কাম্য। গান্ধী সেবাসজ্জ প্রথম দিকে বেশী লোকের ব্যাপার ছিল না, কিন্তু কংগ্রেস যেদিন থেকে পাল'মেণ্টারি প্রোগ্রাম গ্রহণ করে সেদিন থেকে এই সজ্জের ভিতরেও বেনো জল প্রবেশ করে। কাউকে আমরা বহিষ্কারও করতে পারিনে, কারো উপর নিষেধাজ্ঞাও জারী করতে পারিনে। ভদ্রতার ফল হয়েছে এই যে আমরাও পাল'মেণ্টারিয়ানদের সঙ্গে ওতপ্রোত হয়ে গেছি। লাভ তাঁদেরই হয়েছে, আমাদের হয়েছে বদনাম। পাল'মেণ্টারি প্রোগ্রাম আপাতত স্বগিত রাখা হয়েছে, কিন্তু জড় রয়ে গেছে। কংগ্রেস মন্ত্রীরা গদী ছেড়েছেন, কিন্তু আইন সভার কংগ্রেস সদস্যরা আসন ছাড়েননি। ইংরেজদের সঙ্গে ফয়সালা হলে কংগ্রেস যে-কোনো দিন পাল'মেণ্টারি প্রোগ্রাম পুনরারম্ভ করতে পারে। তখন সেবাসজ্জ আরো বেনোজল ঢুকবে। অর্থনীতিক্ষেত্রে যেমন গ্রেসামের আইন ধর্মনীতিক্ষেত্রেও তেমনি একটা অলিখিত আইন আছে। মেকী টাকাই আসল টাকাকে তাড়াবে। গান্ধীজী কংগ্রেস থেকে নাম কাটিয়ে নিয়েছেন। সেবাসজ্জ থেকেও নাম কাটিয়ে নেবেন। তা হলে কাকে নিয়ে আমরা থাকব? কী নিয়ে আমরা থাকব?"

মানসের সময় লাগে ব্যাপারটাকে অস্থূধান করতে। সে বলে, "তোমরা তোমাদের মতবাদের স্বাধীনতা রক্ষা করতে চাও। অথচ স্বতন্ত্র হয়েও স্বকীয়তা রক্ষা করতে পারছ না। লবণ যদি তার লবণস্থ হারায় তা হলে তাকে লবণস্থ দেবে কে? গান্ধীজী কি চিরায়ু? তা তোমরা বেছে বেছে সদস্য কর না কেন?"

"আমরা গঠনকর্মে বিশ্বাসী দেখলেই সদস্য করি। সাধারণত তাঁরা সত্য ও অহিংসায় বিশ্বাসী। কিন্তু তাঁদের কেউ যদি কংগ্রেসী মন্ত্রী বা বিধায়ক হন তাঁদের বাধা দেব কী করে? আর যঁারা মন্ত্রী বা বিধায়ক তাঁরা যদি সেবাসজ্জের সদস্য হতে চান তাঁদেরই বা ঠেকিয়ে রাখি কী বলে? যদি তাঁদের গঠনকর্মে রুচি থাকে। তাঁরা কি মত্তপান নিবারণ করেননি? খাদির প্রসারে সাহায্য করেননি? সবাইকে নিয়ে কাজ করাই গান্ধীজীর অভীষ্ট। অথচ ভেকধারী ভণ্ড সাধুও তো বিস্তর। কংগ্রেসে বেনো জল ঢুকলে কংগ্রেস সামলে নেবে। রাজনীতি জিনিসটাই ঘোলা জল। কিন্তু সেবাসজ্জ হলো সাধুজনের শাসিত মঠবাড়ীর মতন। এখানে মেজরিটির ভোট খাটে না। এখানে মঠাধ্যক্ষেরই অথরিটি। অথচ তা যদি বলবৎ হয় সজ্জ ভেঙে যায়।"

যুথিকা মানসকে বলে, "তুমি যে বাপুর সঙ্গে দেখা করতে যাচ্ছ সরকার এর জন্তে



জবাবদিহি তলব করতে পারে। তুমি সৌম্যদার মতো স্বাধীন নও। যেতে চাও তো মনঃস্থির করে যাও যে সরকার অসন্তুষ্ট হলে মানে মানে পদত্যাগ করবে।”

“মনঃস্থির কি আমি করিনি, জুঁই? দেশ যদি দুই শিবিরে বিভক্ত হয় আমি সৌম্যদার বিপরীত শিবিরে থাকব না। তাকে জেলে পুরব না। তবে স্বপনদা যা বলেছেন সেই কথাই শিরোধার্য। ওয়েট অ্যাণ্ড সী। যুদ্ধকালে ইংরেজকে বিব্রত না করলে ইংরেজও বিরক্ত করবে না। একটা ফয়সালাও হয়ে যেতে পারে।”

“তুমি আমাকে জেলে পুরলে আমি একটুও দুঃখিত হব না, মানস। বরং না করলেই দুঃখিত হব। আমরা তো দেশের জন্তে দুর্ভোগ সহ্যেই চাই। না সওয়াটাই তো কাপুরুষতা। তবে মরতে এখনো মনঃস্থির করিনি।” সৌম্য হাসে।

## পাঁচিশ

স্টীমার থেকে নামতেই দূর থেকে আওয়াজ কানে আসে। “গান্ধীবাদ ধ্বংস হোক।” “গো ব্যাক, গান্ধী।” “উই ডোন্ট ওয়ান্ট গান্ধী।” কখনো ইংরেজীতে, কখনো বাংলায়।

“মহাত্মা এখন আর বাংলাদেশে স্বাগত নন। এখন তিনি মহাত্মাই নন।” সৌম্য আফসোস করে। “তাকে ওরা আসতে বারণই করেছিল, ভয়ও দেখিয়েছিল। কিন্তু না এলেও লোকে ভাবত তিনি ভীক, তিনি দুর্বল।”

মানস আফসোস করে। “বাংলাদেশ এমনি করে আপনাকে ভারত থেকে বিচ্ছিন্ন করে নিচ্ছে। বাঙালীর যেমন সেক্টিমেণ্ট আছে আবঙালীরও তেমনি সেক্টিমেণ্ট আছে। সেবাসজ্জের সর্বভারতীয় প্রতিনিধিরা কী মনে করছেন! খবরটা যখন নারা ভারতে রটে যাবে তখন বাঙালীও কি অন্তত স্বাগত হবে?”

সৌম্য সেবাসজ্জের শিবিরের অভিমুখে এগোতে এগোতে বলে, “তবু ভালো যে ওরা গান্ধীকে ধ্বংস করতে চায় না, তাঁর মতবাদকেই ধ্বংস করতে চায়। ওরা কি বোঝে ওঁর মতবাদটা কী? আমাদের কর্তব্য ওদের বোঝানো। আমরা যারা বাপুজীর সহকর্মী ও সেবাসজ্জের সেবক।”

“তোমরাও কি পারবে বোঝাতে? তোমরা কেবল ‘চরকা’, ‘খন্দর’, ‘স্বয়ং সম্পূর্ণ গ্রাম’ ইত্যাদি নিয়েই আছ। এই যদি হয় গান্ধীবাদ তো এই কলকারখানার যুগে গান্ধীবাদ তো আপনা থেকেই ধ্বংস হচ্ছে।” মানস সহানুভূতির সঙ্গে বলে।

সৌম্য তাকে বোঝাতে চেষ্টা করে! “ত্যাগ, মানস, পৃথিবীতে ইভিল যতদিন থাকবে তার সঙ্গে লড়াইও ততদিন চলবে। কিন্তু লড়বে যে সে নিজেই যদি হয় ইভিল আর যে হাতিয়ার নিয়ে লড়বে সেটাও যদি হয় ইভিল তা হলে পৃথিবীতে ইভিলই

জয়ী হবে। গান্ধীজী এই শিক্ষা দিতে পৃথিবীতে এসেছেন যে ইভিলের সঙ্গে লড়াই নিশ্চয়ই চলবে, কিন্তু চালাবে যারা তারা নিজেরা হবে না ইভিল আর তাদের হাতিয়ারও হবে না ইভিল। তুমি যদি নাৎসীদের সঙ্গে লড়তে চাও এই কারণে যে ওরা ইভিল তা হলে তোমাকেও হতে হবে ইভিল থেকে মুক্ত আর তোমার হাতিয়ারকেও করতে হবে ইভিল থেকে বিযুক্ত। সেটা যদি তুমি না করো তবে তোমার জয়ও ইভিলের জয়। বড় জোর দাবী করতে পারো যে তোমারটা কম ইভিল। তোমার সঙ্গে আমার এই তফাৎ যে আমারটা আদৌ ইভিল নয়।”

“কিন্তু তুমি তো নাৎসীদের সঙ্গে লড়তেই চাইছ না। ওদের পথ ছেড়ে দিচ্ছ। ওরা এবার পশ্চিমমুখে হয়ে হাওয়া, বেলজিয়াম ফ্রান্স আক্রমণ করবে। ফ্রান্সের ভিতরে নাকি ওদের পঞ্চম বাহিনী সক্রিয়। এটা কেবল নেশনে নেশনে যুদ্ধ নয়, মতবাদে মতবাদে যুদ্ধ। কমিউনিজম বনাম ফাসিজম। ফ্রান্সে যেমন একদল ফাসিস্ট সক্রিয় তেমনি একদল কমিউনিস্টও। ফাসিস্টরা নাৎসীদের পথ দেখিয়ে ডেকে নিয়ে আসবে, কমিউনিস্টরা কোতল হবে। এমন পরিস্থিতিতেও ভারত লড়াইতে নামবে না। নামবে, যদি ব্রিটেন কংগ্রেসের শর্তে রাজী হয়। ষাট মণ ঘি পুড়বে, তারপর রাধা নাচবে।” মানস সৌম্যকে খোঁচায়।

“কংগ্রেস নাচবে, কিন্তু গান্ধীজী নাচবেন না। তিনি তাঁর নিজস্ব সময়ে নিজস্ব উপায়ে নিজস্ব প্রতিপক্ষের সঙ্গে লড়বেন। লড়বেন তিনি ঠিকই, কিন্তু এখন নয়, বন্দুক হাতে নয়, জার্মানদের সঙ্গে নয়।” সৌম্য বুঝিয়ে বলে। “কংগ্রেস ইংরেজের পক্ষে যোগ দিয়ে সমান শর্তে স্বাধীন মিত্রের মতো লড়তে পারে। তিনি কিন্তু নৈতিক সমর্থনের চেয়ে বেশী কিছু দেবেন না।”

“কেন?” মানস বিস্মিত হয়। “তিনি কি দেশেব স্বাধীনতার চেয়েও আরো বেশী কিছু চান?”

“না। ভারতীয় জাতীয়তাবাদী হিসাবে তাঁর দাবী ওর চেয়ে বেশী বা কম নয়। কিন্তু তিনি কি কেবল ভারতীয় জাতীয়তাবাদী? তার চেয়েও বেশী কিছু নন? তিনি যে আন্তর্জাতিক ক্ষেত্রেও অহিংসার প্রয়োগে বিশ্বাসী শান্তিবাদী। যুদ্ধ জিনিসটারই তিনি বিপক্ষে। সেটাকে ছাড়াতে দিতে নয়, থামিয়ে দিতেই তিনি চান। এটাই তাঁর জীবনের মিশন।” সৌম্য তার বক্তব্য পরিষ্কার করে।

মালিকান্দায় সেদিন পাঁচখানা গ্রামের হিন্দু মুসলমান সমবেত হয়েছিল। ভারতের বিভিন্ন প্রান্ত থেকে সেবাসঙ্ঘ সদস্যদেরও স্ববৃহৎ সমাবেশ। মানসকে কিছুক্ষণ বিশ্রাম

কক্ষে বসতে বলে গান্ধীজীকে সংবাদ পাঠায় সৌম্য। একজন স্বেচ্ছাসেবক এসে দুই বন্ধুকে তাঁর পূর্ণকুটীরে পথ দেখিয়ে নিয়ে যায়।

“বাপুজী,” সৌম্য মানসের পরিচয় দিয়ে বলে, ‘মানসকে আগে আমার বন্ধুর পুত্রব্রিয়োগ হয়। শোকে সাঙ্ঘনার জন্তে তিনি অনেক ধর্মগ্রন্থ পাঠ করেন, কিন্তু কোথাও পান না সেই রহস্যের নিরসন যার জন্তে নচিকেতা হয়েছিলেন যমরাজের অতিথি। একালে এ জগতে আপনার চেয়ে বড়ো সত্যদ্রষ্টা কে? তাই আপনার দর্শনপ্রার্থী হয়ে এসেছেন।’ কথাবার্তা ইংরেজীতেই হয়।

মহাত্মা অন্তরের অতলে তলিয়ে যান। তাঁর চোখে ফুটে ওঠে এক অসাধারণ দৃষ্টি। চোখের তারা যেন আকাশের তারা। অনেকক্ষণ মৌন থেকে করুণাঘন কণ্ঠ বলেন, “মৃত্যুর উপরে কার হাত আছে? ইজ দেয়ার এনি হেল্প?”

মানস উপলব্ধি করে যে তিনিও তার সহানুভবী। বেদনায় তাঁর মুখমণ্ডল পাণ্ডুর। সাঙ্ঘনার বাণী তাঁর কণ্ঠে নেই। মনে হয় তিনি একজন স্টোইক। দুঃখশোক অকাতরে বহন করতে অভ্যস্ত। কিংবা গীতাকথিত স্থিতপ্রজ্ঞ। স্বথ দুঃখ দুই তাঁর কাছে সমান। যেন মূর্তিমান বুদ্ধ। মানবমহিমায় অবিচলিত।

মানস তাঁকে একমনে নিরীক্ষণ করে। তার হয়ে সৌম্যই আবার বলে, “দেশ যখন দুই বিপরীত শিবিরে ভাগ হয়ে যাচ্ছে, ইংরেজের আর কংগ্রেসের, তখন আমার বন্ধু বিপরীত শিবিরে থেকে দমননীতির ভাগী হতে অনিচ্ছুক। তাই সরকারী চাকরি থেকে বেরিয়ে আসার কথা ভাবছেন।”

গান্ধীজী খোঁজ করেন মানস এখন কোন্ পদে অধিষ্ঠিত। তার উত্তর শুনে শুধু তার উজ্জির পুনরুজ্জীবিত করেন। নিজের মতামত ব্যক্ত করেন না।

মানসের ব্যক্তিগত জিজ্ঞাসার এইখানেই ইতি। সে আর মহাত্মার সময় নষ্ট করতে চায় না। শুধু জানিয়ে দিতে চায় যে তারও হিংসার উপর বিশ্বাস টলেছে। “মহাত্মাজী, ব্রিটেনের কী হবে জানিনে, কিন্তু ফ্রান্স তো মনে হচ্ছে চিং হবে। ভায়োলেন্স কোন কাজে লাগল!”

“আমিও তো তাই জিজ্ঞাসা করি। ভায়োলেন্স কোন কাজে লাগল!” তিনি মানসের উজ্জির পুনরুজ্জীবিত করেন। তাঁকে অত্মমনস্ক দেখায়।

সে কুটীরে আরো একজন ছিলেন। তিনি বাপুর সহধর্মিণী কস্তুরবা। তিনি বসেছিলেন ঘরের এক কোণে। দেখতে যেন কনে বউটি। সম্পূর্ণ নির্বাক। আর বাপু বসেছিলেন দেয়ালের দিকে পিঠ করে একটি নিচু ডেস্কের সামনে মেজেতে মাদুরের উপর। সৌম্য ও মানসের মুখোমুখি।

যুথিকা মানসকে মানা করেছিল রাজনীতি নিয়ে আলোচনা করতে। তা হলেও একটা কথা তার মাথায় ঘুরছিল। পনেরো মিনিট কেন, দশ মিনিট না হতেই সৌম্যর ইচ্ছিতে সে উঠে দাঁড়ায়। দাঁড়িয়ে দাঁড়িয়ে হাত ঘোড় করে সবিনয়ে নম্রভাবে নিবেদন করে, “মহাস্বামী, আমার অন্তরের প্রার্থনা আপনি আরো সাত আট বছর বৈচে থেকে ফেডারেশনটা হাসিল করে দিয়ে যান।”

তিনি ধন্যবাদ জানিয়ে মুহূ হেসে হাত ঘোড় করেন। মানস আর সৌম্য তাঁকে ও কস্তুরবাকে প্রণাম করে কুটার থেকে নিষ্কাশ্ত হয়। গান্ধী দর্শন যেম গঙ্গায় অবগাহন। দেহমন পবিত্র হয়।

সৌম্য এর পরে মানসকে আরো কয়েকজনের সঙ্গে পরিচয় করিয়ে দেয়। তাঁদের একজন সর্দার বল্লভভাই পটেল। প্যাটেল নয়। তেল মেখে গামছা কাঁধে পদ্মান্নানে যাচ্ছেন। খুবই নম্র ও বিনীতভাবে মানসের সঙ্গে কথা বলেন। দেখে মালুম হয় না যে আটটি প্রদেশের হর্তাকর্তা ছিলেন। কিন্তু মন্ত্রীদের পদত্যাগের পর কেমন যেন চুপসে গেছেন। মনে হয় যেন মাটির মাছুষ।

“ফিক্ট শুধু নয়, ফিক্টলি অনেস্ট।” সৌম্য আড়ালে গিয়ে বলে, “বাঁপুর দক্ষিণ হস্ত। কিন্তু পার্লামেন্টারি ব্যাপারে। সে ব্যাপার তো আপাতত শিকয়ে তোলা। কমসে কম সাতবছরের জন্তে। এবার যে পর্ব আসছে তাতে তিনি তাঁর দক্ষিণ হস্ত নন। সত্যগ্রহের তো শুধু বারডোলি তালুকায় নিবন্ধ থাকবে না। ভারতময় প্রসারিত হবে। দক্ষিণ হস্ত যিনি হবেন তাঁকে হতে হবে কট্টর অহিংসাবাদী ও নীতিগতভাবে যুদ্ধবিরোধী। এর কোনোটাই দক্ষিণপন্থীরা নন। বামপন্থীরা তো ননই। বৃথাই দু’পক্ষের অন্তর্ভব্দ।”

এর পরে ওরা ভোজনশালায় গিয়ে হাজার জনের সঙ্গে পঙক্তি ভোজনে বসে। মানসের এপাশে একজন চাষী মুসলমান, সৌম্যর ওপাশে একজন চাষী নম্রশূদ্র। জাত ধর্মের বিচার নেই। পুরীর শ্রীক্ষেত্রের চাইতেও উদারতর মিলনক্ষেত্র। পরিবেশকরা কেউ হিন্দু কেউ মুসলমান, হরিজনও তাদের মধ্যে আছে। তেমনি পাচকদের মধ্যেও। তবে আহাৰ বলতে খিচুড়ি ও ঘোঁট, সঙ্গে একটা চাটনী। সমস্তটাই নিরামিষ।

খেতে খেতে সৌম্য জিজ্ঞাসা করে, “বাঁপুজীকে কেমন দেখলে?”

“আর একটি ধ্যানীবুদ্ধ। দশ মিনিটের মধ্যে সাত মিনিট কি আট মিনিটই নীরব শ্রোতা। বাক্য উচ্চারণ করেছেন সবহুদ্ধ চারটি কি পাচটি। এটা কি শুধু আমাদেরই বেলা না সকলের বেলা?” মানস উত্তর দেয়।

“কমেই তিনি ভিতর থেকে ভিতরে সরে যাচ্ছেন। যে যা বলে মন দিয়ে শোনেন। কিন্তু ধরাছোঁয়া দেন না। হ্যাঁ, ধানীবুদ্ধ। এবার আসছে তাঁর চূড়ান্ত পরীক্ষা। হিংসা যখন তুঙ্গে তখন তিনি অহিংস থাকতে পারবেন কি না। দেশকে, দেশের লোককে অহিংস রাখতে পারবেন কি না। ভারতের বৈশিষ্ট্য তো এই অহিংস নীতিতেই। ভারত যদি তার বৈশিষ্ট্য হারায় তবে তাঁর জীবনের মিশন ব্যর্থ। তিনি সাত আট বছরও বাঁচবেন না মানস, দেশ যদি হিংসায় উন্নত হয়। ফেডারেশন এখন বিশ বাঁও জলের তলে। রাজকুমা চান না, লীগপন্থী মুসলমানরা চান না, কংগ্রেসের বামপন্থীরা চান না, দক্ষিণপন্থীরাও যে চান তাও নয়। আমরা এখন ওসব তর্ক কন্সট্রাক্টিয়েন্ট অ্যাসেম্বলির উপর ছেড়ে দেবার প্রস্তাব করেছি। যা স্থির হবে তা উপর থেকে স্থির হবে না, নিচের থেকে স্থির হবে। সর্বসাধারণের ভোটে। সর্বসাধারণ একটি শব্দই বোঝে। সে শব্দটি স্বরাজ। ফেডারেশন বললে ওদের কাছে দুর্বোধ্য হয়ে পড়ে। ওটা আপাতত ধামাচাপা থাক। ইতিমধ্যে ওরই প্রতিক্রিয়ায় পাকিস্তান বলে আরো একটি শব্দের উৎপত্তি হয়েছে। ক্রিয়া থাকলে প্রতিক্রিয়া থাকে। ফেডারেশন থাকলে পাকিস্তান। একটাকে ধামাচাপা দিলে অপরটাকেও ধামাচাপা দেওয়া হয়। স্বরাজ ছাড়া আমাদের আর কোনো লক্ষ্য নেই। সত্যগ্রহ ছাড়া আমাদের আর কোনো সংগ্রামপদ্ধতি নেই। গান্ধী ছাড়া আমাদের আর কোনো নেতা নেই। কিন্তু আমরাই তো সমগ্র দেশের সমূহ জনগণ নই। জনগণকে সঙ্গে নিয়ে চলতে হলে তারা যেখানে থাকে সেইখানে গিয়ে তাদের সঙ্গে মিলে মিশে বাস করতে হবে, কাজ করতে হবে।” সৌম্য মানসকে স্টীমারে তুলে দিয়ে সভায় যায়।

বাড়ীতে ফিরতে রাত এগারোটো। যুথিকা খাবার নিয়ে বসে আছে, নিজের খায়নি। ছেলেমেয়ে খেয়ে দেয়ে ঘুমিয়ে পড়েছে।

“কেমন দেখলে বাপুকে?” যুথিকা সুধায়।

“ছাই ঢাকা আগুন। আবার জলে উঠবে। গুর ভিতর একটা শক্তির রিজার্ভ রয়েছে। সেটা কায়িক নয়, মানসিক ও আত্মিক। এটাও আরেক রকম ইম্পাত। সামনে আসছে ইম্পাতের সঙ্গে ইম্পাতের ঠোকাঠুকি। একপক্ষে ইংরেজ, অপর পক্ষে কংগ্রেস।” মানস যতদূর দেখতে পায়।

“ঠোকাঠুকির সময় তুমি কোন শিবিরে থাকবে, এ নিয়ে তোমার নৈতিক দৃষ্টির কথা বলেছিলে?” যুথিকা জানতে চায়।

“সৌম্যদাই আমার হয়ে বলে। বাপু তা শুনে খোঁজ নেন আমি কোন্ পক্ষে

অধিষ্ঠিত। জেনে নিয়ে নীরব থাকেন। বোঝা গেল না তাঁর কী মত। চাকরি ছাড়ব কি ছাড়ব না।” মানস উত্তর দেয়।

“তার মানে তিনিও চিন্তা করছেন ঠোকাঠুকি আদৌ বাধবে কি না। ফয়সালা হয়ে যেতে পারে। দক্ষিণপন্থীরা বৈকে বসতে পারেন। তোমাকে ‘হ্যা’ বললেও ধরাচোঁয়া দেওয়া হতো, ‘না’ বললেও তাই। তাঁর সিদ্ধান্তটা তিনি হাতে রেখেছেন। সেটাও এক অর্থে রিজার্ভ।” যুথিকা এই বোঝে।

দিন পনেরো বোল বাদে রামগড় কংগ্রেস অধিবেশনে যোগ দিতে যাবার মুখে সোম্য মানসের সঙ্গে আবার দেখা করে। বিষয় বদন।

“অত বিমর্ষ কেন! মুখে নাই হর্ষ কেন!” মানস স্কুয়ার রায়ের নাটকের ভাষায় কৌতুক করে। “তোমাকে তো কখনো এমন বিরস দেখিনি।”

“গান্ধীবাদ ধ্বংস হয়নি, গান্ধী সেবাসজ্জেরই কার্যত বিলোপ ঘটেছে। বাপু হুঁচুয়ায় নয় জন বাদে আর সকলের সদস্যপদ গেছে। ধরে নেওয়া হয়েছে তাঁরা স্বেচ্ছায় পদত্যাগ করেছেন। আমিও। এতদিন ধরে যেটা আমরা সবাই মিলে গড়ে তুললুম সেটা এখন থেকে শুধু অহিংসা তত্ত্ব নিয়ে নিবিড়ভাবে গবেষণা করবে। পরিচালনা করবেন নয় জন নৈকশ্য কুলীন। নির্বাচিত নয়, মনোনীত। গান্ধীর সব চেয়ে আস্থাভাজন। রাজনীতির নিরিখে নয়, ইডিওলজির নিরিখে। অহিংসায় যাদের অটল ও অগাধ প্রত্যয়। এঁরা পরে নিয়ম কাহ্নন তৈরি করে আরো সদস্য নিতে পারবেন। এঁদের মীতিপরীক্ষায় নিকষে আমি উত্তীর্ণ হব কি না কে জানে!” কণ্ঠস্বরে বিষাদ।

“আমি যতদূর অনুমান করতে পারছি এটা একপ্রকার পার্জ। এর দ্বারা সজ্জের ভিতর থেকে অত্যাচারের সঙ্গে বন্ধভাই ও তাঁর গোষ্ঠীকেও স্ককৌশলে অপসরণ করা হলো। এতে গান্ধীবিরোধীদের গায়ের জালা মিটবে। তাঁরা আর আওয়াজ তুলবেন না যে গান্ধীবাদ ধ্বংস হোক। গান্ধীসজ্জ ভাঙল, কিন্তু গান্ধীবাদ বাঁচল। তোমার তো খুশি হবারই কথা।” মানস সাঙ্ঘনা দেয়।

যুথিকা হেসে বলে, “যিনি স্ভাষচক্রকে একভাবে কংগ্রেস থেকে সরিয়েছেন তিনিই বন্ধভাইকে আরেকভাবে সেবাসজ্জ থেকে সরালেন। বামপন্থীদের দাবার বিনিময়ে দক্ষিণপন্থীদের দাবা খোয়া গেল।”

“এসব কথা আমার মাথায় আসেনি,” সোম্য আশ্চর্য হয়। “বাপু যে কী ভেবে কোন্‌চাল দেখে তা তিনিই জানেন।”

“আমি এই ভেবে খুশি হচ্ছি যে এর পরে তাঁকে কেউ পোপ বলে অপবাদ দেবে না। স্ভাষ তাঁর সজ্জকে চার্চ বলে।” মানস তাঁর প্রশংসা করে।

সামনে রামগড় কংগ্রেস। সেখানে কী হয় না হয় তা নিয়ে সৌম্যর মন ভরাক্রান্ত। স্বভাবপন্থীরাও ঠিক সেইখানেই আপসবিরোধী সম্মেলন বসাবেন। দুই পক্ষে হাতাহাতি না বেধে যায়।

সৌম্য সেদিন তাড়াতাড়ি ওঠে। বামগড় থেকে ফিরে আবার আসবে। ওর ধারণা এইবার একটা এস্পার কি ওস্পার হয়ে বাবে। ভারত ব্রিটেনকে যুদ্ধের সময় কী দেবে না দেবে। কংগ্রেস সহযোগিতা করবে না সংগ্রাম করবে। গান্ধীজী সংগ্রামের সর্বাধিনায়ক হবেন কি হবেন না।

‘চাট ওল্ড ম্যান,’ শের্ফার্ড একদিন মানসকে বলেন, “কংগ্রেসের পিঠ থেকে নাগবেন না। যেমন সিদ্ধবাদ নাবিকের পিঠ থেকে সেই বুদ্ধ। সব চেয়ে আফসোস হয় নেহরুর জন্তে। এরই মধ্যে তিনি উন্টো সুরে গাইতে শুরু করেছেন। সাম্রাজ্যবাদী ব্রিটেনের বিরুদ্ধেই তাঁর সংগ্রাম, নাৎসী জার্মানীর বিরুদ্ধে নয়। কিন্তু ব্রিটেনের বিরুদ্ধে সংগ্রাম মানেই তো জার্মানীর পক্ষে সংগ্রাম। শত্রুর শত্রু মানেই তো মিত্র।”

মানস আশা করেছিল গ্যান্শনাল গভর্নমেন্ট হবে। তাতে জবাবহরলাল তো থাকবেনই, বল্লভভাই, রাজেন্দ্রপ্রসাদ, রাজগোপালাচারীও থাকবেন। কয়েকটা পদ না হয় ইংরেজদের জন্তে সংরক্ষিত, সেসব তাঁরা অভিজ্ঞ বলে। কয়েকটা অবশ্য লীগপন্থীদেরও প্রাপ্য। কেন্দ্রীয় আইনসভায় তাঁদেরও তো ভোটবল আছে। কিন্তু ঘটনার শ্রোত ক্রমে ব্রিটেনের বিরুদ্ধেই যাচ্ছে। তা সত্ত্বেও যুদ্ধকালে ব্রিটেন কেন্দ্রীয় সরকারে বড়োরকম রদবদল করতে নারাজ। যুদ্ধের পরেও যে ভারতকে তার কনস্টিটিউশন রচনা করার অধিকার দেবে তাও নয়। ওদিকে মুসলিম লীগও শোর তুলেছে যে নতুন কোনো কনস্টিটিউশন রচনা করলে মুসলিম ‘নেশনের’ জন্তে ভারতের দুই প্রান্তে দুটো হোমল্যাণ্ড বানিয়ে দিতে হবে। সেখানে তারা স্বাধীন ও সার্বভৌম ক্ষমতার অধিকারী হবে। ইংরেজ, কংগ্রেস ও মুসলিম লীগ মিলে গ্যান্শনাল গভর্নমেন্ট কি সম্ভব? ইংরেজ মন্ত্রীরা কি নেশনের অন্তর্গত? লীগ মন্ত্রীরা কি নেশনের বহির্ভূত? না ওটা তিন নেশনের ত্রিপাক্ষিক বৈঠক? যার একমাত্র যোগসূত্রে যুদ্ধকালে ব্রিটেনের পক্ষে ভারতের যোগদান। কংগ্রেসকেই তো জনসাধারণের ঠেলা সামলাতে হবে। সৈন্তসংগ্রহে বিরোধিতা, অর্থসংগ্রহে বিরোধিতা, রসদসংগ্রহে বিরোধিতা। কংগ্রেস ভেঙে চোঁচির হয়ে যেতেও পারে।

শের্ফার্ড একদা কংগ্রেসবিরোধী ছিলেন, কিন্তু এখন কংগ্রেসের উপর তাঁর আস্থা জন্মেছে। কংগ্রেস প্রমাণ করে দিয়েছে যে সে দায়িত্বশীলভাবে শাসনকার্য চালাতে



পারে। বিশেষত রাজাজী আর গোবিন্দবল্লভ পন্তের উপর তাঁর আন্তরিক শ্রদ্ধা। তা বলে তিনি লীগপন্থীদের সঙ্গে বিচ্ছেদ চান না। নাজিমউদ্দীনকে তাঁর বিশেষ পছন্দ। আর সিকন্দর হায়াৎ খান তো তাঁর মনের মানুষ। যদিও তিনি লীগপন্থী নন, ইউনিয়নিস্ট। জিন্না সাহেব তাঁর নিজের দলটিকে একমাত্র মুসলিম দল বলে দাবী করলেও শেফার্ডের কাছে পাঞ্জাবের ইউনিয়নিস্ট দলটিও ফেলনা নয়। যুদ্ধকালে তারও গুরুত্ব আছে। মোট কথা ইংরেজ রাজনীতিকরা কংগ্রেসের খাতিরে লীগকে বেহাত করবেন না। তা হলে কি তাঁরা কংগ্রেসকে বেহাত করবেন? না, সেটাও তাঁদের মনের বাসনা নয়, কিন্তু রাগটা তাঁদের মিস্টার গ্যাণ্ডীর উপরেই। কোথায় অহিংসা! কে মানে অহিংসা! একজন কংগ্রেসীও অহিংসা মানে না। কংগ্রেস আমলে গুলীও চলেছে, দাঙ্গাও বেধেছে।

“আমাকে বিশ্বাস করুন,” শেফার্ড একদিন মানসকে অন্তরালে বলেন, “আমি কংগ্রেসের বন্ধু। কিন্তু ওই ‘অসহযোগ’ আর ‘সত্যাগ্রহ’ আর সাম্রাজ্যের বাইরে ‘স্বাধীনতা’ আমি ভালো মনে করিনে। আমরা যে চিরকাল কর্তৃত্ব করতে চাই এটা ঠিক নয়, আমরা তো ইতিমধ্যেই প্রদেশগুলোর উপর কর্তৃত্ব শিখিল করেছি। কেন্দ্রের উপর শিখিল করার জগ্গেই তো ফেডারেশন পরিকল্পনা। কিন্তু তার জগ্গে চাই কংগ্রেস, লীগ, রাজ্য এই ত্রিপক্ষের মধ্যে পারস্পরিক সহযোগিতা ও মিলে মিশে কাজ করার আগ্রহ। অসহযোগ ও সত্যাগ্রহ নয়। তার কিন্তু কোথাও কোনো লক্ষণ দেখতে পাইনে। সেটা দেখবার জগ্গেই আমরা থাকছি। সেটা দেখতে পেলেই চলে যাব। কিন্তু চলে যাবার সময় জেনে যাব যে ভারত কখনো ব্রিটেনের সঙ্গে শত্রুতা করবে না, ব্রিটেনের শত্রুদের সঙ্গে মিত্রতা করবে না, ব্রিটেনের শত্রুদের ঘরে ডেকে আনবে না, ঘাঁটি দেবে না। অপর পক্ষে ব্রিটেনও ভারতের আভ্যন্তরিক ব্যাপারে হস্তক্ষেপ করবে না। গৃহযুদ্ধে দেশ-বিদীর্ণ হলেও আমরা ছুটে আসব না। দেশ আক্রান্ত হলে অবশ্য অল্প কথা। সেক্ষেত্রে আমাদের ছুটে আসতেই হবে, নয়তো রাশিয়া বা জাপান এদেশ গ্রাস করবে। আত্মরক্ষা করতে পারবেন তত্থানি ক্ষমতা কি কংগ্রেস বা লীগ নেতাদের বা রাজরাজড়াদের আছে? স্বাধীনতার পরেও কি থাকবে? ব্রিটেনের সঙ্গে ডিফেন্স প্যাক্ট করতেই হবে। আমরা আসব আপনাদের পক্ষে লড়তে। আপনারা যাবেন আমাদের পক্ষে লড়তে। হ্যাঁ, আমাদেরও চাই গুর্খা, ভোগরা, শিখ, পাঞ্জাবী মুসলমান সৈন্ত। আমাদের সদর দরজার নাম বেলজিয়াম। সেখানে ওরাই দারোয়ান হবে। যুদ্ধের সময়, অল্প সময় নয়। এসব কথা এখন কংগ্রেস নেতাদের বোঝায় কে? জাট ওল্ড ম্যান, মিস্টার গ্যাণ্ডী,

‘তাদের মাথা খেয়েছেন।’

মানস তর্ক করে না। কথাগুলো শৌ অযৌক্তিক নয়। নেতারা যে বোঝেন না তাও নয়। কংগ্রেস তো সহযোগিতার জগ্রে হাত বাড়িয়েই বয়েছে। দিল্লী ষাবার জগ্রে পা বাড়িয়েও। গান্ধীজী যে অমন চিন্তাকুল তাব মূল কারণ তো এই।

‘আপনি যদি কিছু না মনে কবেন,’ মানস বলে, ‘সব কিছু নির্ভর কবছে আপনাদেরই উপরে। কেডাবেশন কবে হ.৭. আদৌ হবে কি না তাব জগ্রে অপেক্ষা না কবে আজকের এই সঙ্কটের ক্ষণেই বডলাটের শাসনপরিসদেব বদবদল করা হোক। ষাতে লোকের ধারণা জগায় যে ওটা তাদের নিক্দের ন্যাশনাল গভর্নমেন্ট। সেটা যে কংগ্রেস গভর্নমেন্ট হ.৭ এমন কথা কেউ বলছেন না। তবে সেখানে বদ্বভভাই, বাজেন্দ্রপ্রসাদ, আবুল কালাম আজাদ, জবাহরলাল নেহরুকে আসন দিতে হবে। ংরা কেউ ছোট মাপের নেতা নন যে প্রাদেশিক মন্দির পেলেই হাতে স্বর্গ পাবেন। ভুলটা তো হচ্ছে এইখানে যে, ংদের উপযুক্ত কাজে ব্যবহার করতে পারা যাচ্ছে না। তাই ংরা গান্ধীজীর চ’র দিকে ঘুর ঘুর করছেন। তিনিই বা ংদের কী দিবে ষাণ্ঠিত রাখবেন? অসহযোগ আব সত্যগ্রহ ছাড়া আর কী আছে তাঁর ভাণ্ডারে?’

‘কিন্তু ওই চারজনকে শাসন পবিষদে নিতে হলে মুসলিম লীগ থেকেও হু’জনকে নিতে হয়। জিনা আব লিবাকং আর্নী। শিখদেব একজনকেও নিতে হয়। তা হলে বাকী থাকে একটিমাত্র আসন। সেটি তো জঙ্গীলাটকে দিতেই হবে। আইনে তার নির্দেশ আছে। তা হলে আই. সি এসদেব বেবাক বাদ দিতে হয়। আহা, আমরা কেন তাতে রাজী হব? হোম ডিপার্টমেন্ট আমবা ছাড়া আব কে চালাতে পারবেন? আর মুসলিম লীগের নেতারা কি কংগ্রেস মুসলিমকে সঙ্ক করবেন? এই দুই প্রশ্নের উত্তর পেলেই বডলাট তাঁর শাসন পরিসদেব রদবদলের কথা ভেবে দেখবেন।’ শেফার্ড আশ্বাস দেন।

এব পর ব্যক্তিগত প্রশঙ্গ। শেফার্ড মানসকে চাকরি ছাড়তে বারণ করেন।

রামগড় থেকে ফিরে সৌম্য আবাব দেখা করতে আসে। তার মুখ উজ্জ্বল। ‘কংগ্রেস এখন একটি সুসঙ্গর সেনা। তাব সেনাপতি—একমাত্র ও একচ্ছত্র সেনাপতি—এখন বাপুজী। সবাইকে তাঁর ডিসিপ্রিন মেনে নিতে হবে। নয়তো সেনা থেকে সরে যেতে হবে। এটাও একপ্রকার পার্জি। কংগ্রেস কমিটিবাজেই হ.৭ সত্যগ্রহ কমিটি। তার কাজ হবে সত্যগ্রহের প্রস্তুতি চালানো। ডাক আসবে একদিন, যদি তার প্রয়োজন হয়। প্রয়োজন না-ও হতে পারে। কে জানে,

ব্রিটেনের যদি স্বমতী হা! যুদ্ধকালে ব্রিটেনকে বিভ্রত করতে আমাদের সকলেরই অনীহা। তা বলে আমাদের সংগ্রাম আমরা শিকের তুলে রাখতে পারিনে। সংগ্রাম বাধেই এমন কথা বলে ভুল হবে, কিন্তু যদি বাধে তা হলে সে সংগ্রাম ততদিন চলবে যতদিন ব্রিটেনেব স্বতঃপরিবর্তন না হয়। কে জানে, হয়তো সাত আট বছর। আমি আপাততঃ বিদ্রোহে। গঠনের কাজই আমার নিত্যকর্ম। ক্ষমতার রাজনীতি আমার জ্ঞানে নয়। মুসলিম লীগ তো ক্ষমতা ভিন্ন আর কিছু বোঝে না। কংগ্রেসও যে আর কিছু বোঝে তা নয়। তাই কংগ্রেসকে নিয়ে হয়েছে আমাদের মুশকিল। ক্ষমতা হাতে পেলে কংগ্রেস যা গড়ে তুলবে তা ওই ব্রিটিশ বাঁচের সোনার ঠাকুর মাটিব পা। শক্তিশালী কেন্দ্র, দুর্বলতম গ্রাম। বিত্তশালী শিল্পপতি শ্রেণী, দীনতম ক্ষেত্রমজুর শ্রেণী। যুদ্ধকালে কংগ্রেসের সহযোগিতা মানেই ধনীকে আরো ধনী আর গরিবকে আরো গরিব করা। কংগ্রেসকে নিবৃত্ত করাই হচ্ছে সমস্যা। ব্রিটেন এতে সহায়তা করছে কংগ্রেসের প্রস্তাবে কর্পাত না করে। জিন্না সাহেব সহায়তা করছেন কংগ্রেস মরাদেব ফিরতে দেবেন না বলে ধনুর্ভঙ্গ পণ করে। বামপন্থীরাও সহায়তা করছে গাঙ্গুলীহীন বিরামবিহীন সংগ্রামের জন্তে রামগড়েই পালটা কনফারেন্স হবে। আমরা এখন সোনার ঠাকুর হস্তান্তরের কথা ভুলে মাটির পায়ের দিকেই দৃষ্টি ফেঁদাব। মাটিব পা'কেই পাথরের পা করতে হবে।”

মানস হেসে বলে, “আর সোনার মাথাকে কিসের মাথা করবে? সোনার অঙ্গকে কিসেব অঙ্গ? বড়লাটের শাসন পরিষদ, গভর্নরদের মর্হামুদল, এসব যদি পুথোপুথি কংগ্রেসের হয় কংগ্রেস কি এসব টেনে সাঁজবে? যাতে স্বয়ংক্রিয় বিকেন্দ্রীকরণ হয়? কিন্তু থাক ওসব কথা। তোমরা মৌলানা সাহেবকে কংগ্রেস প্রেসিডেন্ট করে এ কী কাণ্ড করলে? এ যে এক টিলে দুই পাখী মারা। জিন্না সাহেব কোনোদিন গুঁর সঙ্গে কথা বলবেন না। জিন্নার ভয়ে বড়লাটও না। তা হলে কংগ্রেসেব সঙ্গে মিটমাট হবে কী করে? শাসন পরিষদের রদবদল হবে কী করে? না, সেটা তোমাদের অভিপ্রেত নয়? তোমরা যুদ্ধকালে অসহযোগ করবেই।”

সোম্য অবাক হয়! “না, না। আমাদের তেমন কোনো অভিপ্রায় নেই। আমরা শুধু এইটুকুই বোঝাতে চাই যে কংগ্রেস মুসলমানদেরও আপনার প্রতিষ্ঠান। সুতরাং কংগ্রেসের সংগ্রামে মুসলমানদেরও যোগ দেওয়া উচিত। ওরা যেন সংগ্রাম থেকে সরে না দাঁড়ায়। যেটা ব্রিটিশ রাজের পলিসি। তথা মুসলিম লীগেরও পলিসি। তাস খেলার টেবিলে বড়লাট ও জিন্না দু'জনে দু'জনের পার্টনার। একই পলিসি দুই পার্টনারের। ছুনিয়াকে গুঁরা দেখাতে চান যে কংগ্রেসের সংগ্রামটা কেবল

হিন্দুদেরই সংগ্রাম। মুসলমানদের নয়। মোলানা সাহেবকে কংগ্রেস প্রেসিডেন্ট করে আমরাও হুনিয়াকে দেখাতে চাই যে আমাদের সংগ্রাম হিন্দু মুসলমান নির্বিশেষে ভারতীয়দের সকলের সংগ্রাম। স্বাধীনতা সকলেরই লক্ষ্য। মোলানা সাহেবের মতো অত বড়ো একজন মুসলিম শাস্ত্রবিদকে কাকের বলার ধুঁটতা কার হবে? আর কেউ না দিক সীমান্তের মুসলমানরা লাড়া দেবে ঠিক।”

কংগ্রেসের রামগড় প্রস্তাবের কালি শুকোতে না শুকোতেই মুসলিম লীগের লাহোর প্রস্তাব। প্রস্তাবক ফজল হক সাহেব। মুসলিম প্রধান অঞ্চলগুলিকে বিচ্ছিন্ন করে স্বতন্ত্র ও স্বাধীন রাষ্ট্রের পরিকল্পনা। একটি উত্তর-পশ্চিমে, অপরটি উত্তর-পূর্বে। পাকিস্তান নামটি অল্পলিখিত। তবু পাকিস্তান নামটিই প্রচারিত।

খোন্দকার জাকির হোসেনের মুখে চোখে হগ। “ফেডারেশন হবে না, মল্লিক। হতো, যদি রাজকুমা যোগ দিতে রাজী হতেন। যোগ দিয়ে কংগ্রেস ও লীগের ব্যালান্স বাখতেন। তাঁরা বিমুখ না হলে লীগও বিমুখ হতো না। ব্যালান্স রক্ষাব জন্মেই অত্যাশঙ্কক হিন্দু নেশনের জন্মে হিন্দুস্থান আর মুসলিম নেশনের জন্মে পাকিস্তান। নইলে ইংরেজকেই চিবকাল বেকে যেতে হয়। নো পার্টিশন, নো ইণ্ডিপেন্ডেন্স।”

মানসের চোখে মুখে বিবাদ। “পনাবীর যুদ্ধে ইংরেজদেরই জয় হয়েছিল, খ্রীষ্টানদের নয়। তাদের রাজত্বকে লোকে ইংরেজ রাজত্ব বলেই জানে, খ্রীষ্টান রাজত্ব বলে নয়। ইংরেজের সঙ্গে লড়াতে হলে ভারতীয় বলেই পরিচয় দিতে হয়, হিন্দু বা মুসলমান বলে নয়। দুই শতাব্দী ধরে আমরা এই লাইনেই ভেবেছি, কাজ করেছি। ইংরেজ চলে গেলে আমরা দুই শতাব্দী পেছিয়ে যেতে পারিনে। সেটা সম্ভবও নয়, সম্ভবও নয়। পাকিস্তান প্রস্তাব হচ্ছে মধ্যযুগে ফিরে যাবার প্রস্তাব। লীগ-তারা মধ্যযুগের সম্মোহনে মুগ্ধ হতে পারেন, কিন্তু মুসলমানরা সবাই তো লীগ-পন্থী নন। কংগ্রেসপন্থী আছেন, ইউনিয়নিস্ট আছেন, কমিউনিস্ট আছেন। তাঁরা তো আধুনিক যুগেই থাকতে চান, রাজপরিবর্তনকে তাঁরা মধ্যযুগে প্রত্যাবর্তন মনে করেন না। পাকিস্তান হলে সেটা হবে এঁদের গোরস্থান। এঁদের অগ্ন্যগামীরা কি রাজী হবেন, হোসেন?”

নিঃের ব্যক্তিগত সমস্যার সমাধান খুঁজে না পেয়ে মানস অস্থির হয়ে উঠেছিল। আপাতত চার মাসের ছুটিতে যাবে, শান্তিনিকেতনে গিয়ে গুরুদেবের সঙ্গে পরামর্শ করে স্থির করবে ছুটির পরে চাকরি ছাড়বে না রাখবে।

“সেই ভালো।” সৌম্য তা শুনে সমর্থন করে। “অত বড়ো একটা ব্যাপারে

মনঃস্থির কি পরিণাম চিন্তা না করে করা উচিত। আমরাও কি পারছি মনঃস্থির করতে ? এ যাবৎ আমরা যতবার লড়েছি একটি ক্রণ্টেই লড়েছি। আবার যদি লড়তে হয় তো লড়তে হবে দুটি ক্রণ্টে। ব্রিটিশ ক্রণ্টে তথা মুসলিম লীগ ক্রণ্টে। লাহোর প্রস্তাবের তাৎপর্যই হলো দ্বিতীয় ক্রণ্টের ছমকি। আমরা যদি ভয় পেয়ে রণে ভঙ্গ দিই তবে ইংরেজ রাজত্ব থেকে গেল। তখন কোথায় স্বাধীনতা আর কোথায় পার্টিশন ! যদি ভয় না পেয়ে সংগ্রামে নামি তবে শুধু রাজশক্তির সঙ্গে নয়, মুসলিম জনতার সঙ্গেও মোকাবিলা করতে হবে। মুসলিম লীগের সৃষ্টি হয়েছিল কংগ্রেসকে মুসলিমশূন্য করতে। বকশিস, ওদের জন্তে সেপারেট ইলেকটোরেট। এবার তার ছমিকা কংগ্রেসের সংগ্রামকে মুসলিমবর্জিত করা। বকশিশ, ওদের জন্তে সেপারেট স্টেট বা স্টেটস। বাপু তো বলছিলেন একমাসের মধ্যেই সংগ্রামের ডাক দেবেন। এখন বলছেন তার আগে হাজারবাব ভাববেন। আমরাও তাই কূলে বসে ঢেউ গুনছি। ডাক এলেই বাঁপ দেব।”

“তা হলে জুলির কী হবে, দাদা ?” যুথিকার সেই একই ভাবনা।

“জুলি যদি আমার হয়ে থাকে তবে আমার অহুত্রতা হবে। কিন্তু ওর দাদাদের যা মতিগতি ওঁরা বোধ হয় একুশি বাঁপিয়ে পড়বেন। ওঁদের কথায় জুলিও।” সোম্য একটু থেমে আবেগের সঙ্গে বলে, “যুদ্ধকালে বিপ্লবীদের বিচার তো ক্ষোভদারী আদালতে হয় না। হয় সামরিক আদালতে। তারপরে ফাঁসী কি দ্বীপান্তর।”

“না। না। না।” যুথিকা কাতর স্বরে অহুনয় করে। তুমি ওর হাত চেপে ধরো, সোম্যদা।”

## প্রথম পর্ব শেষ

# କ୍ରାନ୍ତଦର୍ଶୀ

ଦ୍ଵିତୀୟ ପର୍ବ

ଅନନ୍ତମୋହନ ରାୟ



ଡି. ଏସ. ଜାହିରେସି / କଲକାତା-୭୦୦୦୦୭

প্রকাশক :

শ্রীঅমূল্যগোপাল মজুমদার

ডি. এম. লাইব্রেরী

৪২, বিধান সরণি

কলকাতা-৬

প্রচ্ছদপট : প্রণবেশ মাইতি

প্রথম প্রকাশ : শ্রাবণ ১৩৬১

মুদ্রাকর :

শ্রীশ্রামলকান্তি বন্দ্যোপাধ্যায়

রুমা প্রিন্টার্স

৬৩এ/৩, হরিশোষ ষ্ট্রীট

কলকাতা-৬

ସର୍ଗୀୟ ଅନନ୍ଦାଫ୍ରସାଦ ଚୌଧୁରୀ  
ସ୍ମରଣେ





## ভূমিকা

কবিগুরুর মতো আমারও বলতে ইচ্ছা করে,

“এ কী কৌতুক নিত্য-নতন

ওগো কৌতুকময়ী,

আমি যাহা কিছু চাহি বলিবারে

বলিতে দিতেছ কই !”

প্রবন্ধে আমার কথা আমি অবোধে বলতে পারি, কিন্তু উপন্যাসে আমি যা খুশি লিখতে পারিনে। বাইরের আদেশে নয়, অন্তরের নির্দেশে আমি এমন সব কথা লিখি যা আমার কথা নয়, যা চরিত্রের কথা। তারা আমার স্পষ্ট হলেও আমার হাতের পুতুল নয়। যে যার স্বভাবের অনুসরণ করে। যার যা নিয়তি। আমি নিজেই ওদের ব্যাপার স্থাপ্য দেখে বিস্মিত। ওরা আমার ইচ্ছামতো বাঁচবে না, যে যার ইচ্ছামতো বা বিধাতার ইচ্ছামতো বাঁচবে। আমি আমার মনটাকে খোলা রেখেছি।

এক বন্ধু প্রথম পর্ব পড়ে প্রশ্ন করেন, “এইসব চরিত্র কি আপনি মডেল দেখে এঁকেছেন?” এব উত্তরে আমি বলি, “কোনো একটি চরিত্রের মডেল কোনো একজন নয়। একাধিক ব্যক্তির কাছ থেকে তিল তিল করে সংগ্রহ করা হয়েছে বিভিন্ন বৈশিষ্ট্য। তাই কাউকে চিনতে পারা যাবে না। চিনলে সেটা ভুল হবে! কিন্তু এমন কথা আমি বলব না যে এঁরা সবাই আমার কপোলকল্পিত।”

বই চার পর্বে শেষ হলে আমি আরো একটা স্বীকারোক্তি করব। তার দেরি আছে। আগে তো দেখি কার কী গতি হয়। আমিও কি জানি?

ঐতিহাসিক ঘটনাগুলো আমি জানি। কিন্তু ব্যক্তির জীবনের ক্রমপরিণতি আমি জানিনে। লিখতে লিখতে জানতে পারব। উপন্যাস লেখাও একটা নিরুদ্দেশযাত্রা। এটা ইতিহাস নয়, ঐতিহাসিক উপন্যাসও নয়। আরম্ভের পূর্বে এর থীম ছিল রিনিউয়াল। পুনর্নবীকরণ। লিখতে লিখতে তার থেকে সরে এসেছি। উপন্যাস তার নিজের নিয়মেই চলে। আমাকেও সে নিয়ম মানতে হবে।

অন্নদাশঙ্কর রায়



ବ୍ରାହ୍ମଦର୍ଶୀ  
( ଦ୍ଵିତୀୟ ପର୍ବ )



## ॥ এক ॥

দীপিকা বোদির আদরের কুকুর এলফ স্বপনদার পায়ের কাছে চোখ বুজে শুয়েছিল। সিঁড়িতে কার পায়ের শব্দ শুনে গা বাড়া দিয়ে ওঠে। প্রথমটা গরর গরর করে, তার পরে ঘেউ ঘেউ করে দরজার দিকে তেড়ে যায়।

দরজার ওপার থেকে আওয়াজ আসে, “আসতে পারি?”

স্বপনদা ফরাসী ভাষায় উত্তর দেন, “আঁত্রে।” উনি তখন মনে মনে প্যারিসে বাস করছিলেন। টেবিলের উপর একরাশ ফরাসী পত্রিকা খোলা। সেসব তিনি জার্মান দখলী ফ্রান্স থেকে বাঁকা পথে সংগ্রহ করেছেন।

বাবলী ঘরে ঢুকে বলে, “এটাকে তো আমি আগে কখনো দেখিনি। বাপ রে! কী বিকট গর্জন! যেন চোর কি ডাকাত পড়েছে।”

“ও: তুমি!” স্বপনদা চেয়ার ছেড়ে উঠে বাবলীকে দুই হাতে জড়িয়ে ধরে বলেন, “আমার প্রিয় বোন চকোলেট। আমার প্রিয় বোন চকোলেট।” বলতে বলতে আবেগে তাঁর কণ্ঠরোধ হয়। চোখে জল এসে পড়ে।

“কই, বোদি কোথায়?” বাবলী তার হাত থেকে ফুলের সাজি নামিয়ে রেখে বলে, “তোমাদের বিয়েতে আমি যোগ দিতে পারিনি। জেলের বাইরে থাকলেও ওসব বুজোয়া অমুঠানে ষোণ দিইনে। যাক, বিয়ে যখন হয়েছে গেছে তখন অভিনন্দন জানাতেই হয়। সেইসঙ্গে দিতে হয় কিছু উপহার। আমরা প্রোলিটারিয়ানরা ফুলই দিই। কই, তিনি কোথায়?”

“তিনি!” স্বপনদা কপট দীর্ঘশ্বাস ফেলে বলেন, “তিনি আমাকে তাঁর পেয়ারের কুকুরের বেবী সিটার করে বসিয়ে রেখে বাজার করতে বেরিয়েছেন! বাড়ীতে একটা পাউটি আছে। তোমার যদি অল্প কোনো এনগেজমেন্ট না থাকে তবে যেয়ো না, থেকে যাও। আমাদের সঙ্গে থাকে। বিয়েতে তুমি যোগ দিতে না, কিন্তু বোভাতে তো দিতে। তোমাকে আমি খুব মিস করেছি। তোমার স্বাক্ষরী ক্যারামেলকেও। সেও কি ছাড়া পেয়েছে?”

“না, টুর্গেনিভদা।” বাবলী বিষন্ন মুখে বলে, “সে অনেক কথা। কিন্তু তোমাকে আর আমি টুর্গেনিভদা বলব না। টুর্গেনিভ ঠাঁকে ভালোবাসতেন তাঁর প্রতি একনিষ্ঠ থাকতে গিয়ে সারাজীবন অবিবাহিত থেকে গেলেন। আর তুমি! বিশ বছর না বাইশ বছর একনিষ্ঠ থাকার পর সবাই যা করে তুমিও তাই করলে। কোথায় রইল তোমার প্রেমের আদর্শ! তোমার অসাধারণত্ব! পারবে কি তুমি কখনো আর একখানা ‘ভাজিন সয়েল’ লিখতে? তুমি আমাকে হতাশ করলে, স্বপনদা!”

“আগে তো শোন সব কথা। তার পরে যা বলতে চাও বলো।” স্বপনদা চাকরকে ডেকে চায়ের হুকুম দিয়ে জমিয়ে বসেন।

“বেশ তো, শুনব।” বাবলী এলফের গায়ে হাত বুলোতে বুলোতে বলে। ইতিমধ্যে তার সঙ্গে ভাব হয়ে গেছে।

“চকোলেট তোমাকে আমি বার বার বলেছি আমি টুর্গেনিভ নই। আমার গুরু স্কোবয়োর। বহুদিন থেকে চেষ্টা করে আসছি আর একখানা ‘মাদাম বোভারি’ লিখতে। তাঁর মতো অবিবাহিত রয়েছি। এটা আর্টের প্রতি একনিষ্ঠতা। প্রেমের প্রতি একনিষ্ঠতা নয়। ই্যা, প্রেমের প্রতি একনিষ্ঠতা ছিল। কিন্তু সেটা কতকাল একতরফা থাকতে পারে বলো? দশ বছর অপেক্ষা করেছি, বিশ্বাস করেছি যে ওর ছেলে বড়ো হলে ও আমার কাছে চলে আসবে। এদেশে না হোক ওদেশে গিয়ে আমরা বিয়ে করব। আমাদের ফোর আর্টস ক্লাবে এর নজির আছে। বুঝতে পারি আমাদের বেলায় তা হবার নয়। বুঝা অপেক্ষা। তখন ইস্ট ওয়েস্ট ক্লাব গড়ে তুলি। এখানেও মহিলাদের সঙ্গে মেলামেশার যথেষ্ট সুযোগ। কিন্তু মন দেওয়া নেওয়া হলো না। আমি ঠাঁকে চাই তিনি আমাকে চান না। যিনি আমাকে চান আমি তাঁকে চাইনে। আমি তো বিয়ের আশা একরকম ছেড়েই দিয়েছিলুম। এমন সময় বাবাব পরলোকের সমন আসে। তিনি আমাকে ডেকে বলেন, আমি আর বেশী দিন নেই। আমার একটা সাধ অপূর্ণ থেকে যাচ্ছে। সেটা ছিল তোমার মায়েরও সাধ। তিনি থাকলে তিনি তোমার উপর চাপ দিতেন। আমি কখনো চাপ দিইনি ও দেব না। কিন্তু আমি আশা করেছি ও করব যে তুমি তোমার পূর্বপুরুষের বংশলতিকায় ছেদ পড়তে দেবে না। প্রেমে পড়ে বিয়ে করতে চাও করো, কিন্তু বিয়ে করলেই পিতৃঋণ থেকে মুক্ত হবে। নয়তো নয়। একথা শুনেই আমি মনঃস্থির করে ফেলি। ক্লাব তখন ভাঙনের মুখে।

যুদ্ধ নিয়ে নানা জনের নানা মত। কারো কারো মত ক্লাবের ঘুলনীতি-বিরোধী। নাৎসীদের বিরোধিতা করতে গিয়ে আমি বাথ্‌ বেঠোভেন গোটে শিলারের বিরোধিতা করতে পারিনি। কেউ কেউ আবার নাৎসীদের জয় কামনা করেন। পুলিশ শুনতে পেলে রক্ষে আছে! আমার সঙ্গে যার মতের মিল তিনিই হন তোমার বোদি। তাঁর একটিমাত্র শর্ত। লাভ্‌, মী, লাভ্‌, মাই ডগ। তাঁকে ভালোবাসলে তাঁর কুকুরকেও ভালোবাসতে হবে।” স্বপনদা হাসেন।

“এমন শর্ত কোনো কালেই শুনিনি। ধন্য বোদি!” বাবলীও হাসে।

“শতপথ ব্রাহ্মণে আছে। পুরুষবা যখন উর্বশীকে বিয়ে করতে চান তখন উর্বশী বলেন, আমার শয্যার পাশে পুত্রবৎ প্রিয় দুটি মেঘ বাঁধা থাকবে ও এরা কখনো অপহৃত হবে না। পুরুষবা বলেন, বেশ, তাই হবে। একদিন রাত্তিকালে গন্ধর্বরাজ বিশ্বাবসু মেঘ দুটিকে হরণ করেন। উর্বশী তাদের উদ্ধার করার জন্যে কান্নাকাটি করলে পুরুষবা শয্যা থেকে উঠে বিবস্ব অবস্থায় বিশ্বাবসুর পশ্চাদ্ধাবন করেন। উর্বশীর আরো এক শর্ত ছিলো পুরুষবাকে যেন তিনি কখনো বিবস্ব না দেখেন। হঠাৎ বিদ্যাতের ঝলকানিতে তাঁর সেই রূপ দেখে উর্বশী তৎক্ষণাৎ অদৃশ্য হয়ে যান।” স্বপনদা বলতে বলতে এল্‌ফের উপর কড়া নজর রাখেন।

বাবলী ভয় পেয়ে বলে, “এল্‌ফ যদি চুরি যায়?”

“ভাবনার কথা বৈকি। তবে আমাদের বেলা তেমন কোন শর্ত হয়নি। আমি শুধু ভালোবেসেই খালাস।” স্বপনদা অভয় দেন।

“তা ভালোবাসার মতো কুকুর বটে। কোন্‌ জাতের?” বাবলী স্বধায়।

“গোমেরানিয়ান। তার মানে জার্মান।” স্বপনদা বলেন।

“তা হলে আমি একে ভালোবাসতে পারব না। জানো তো তোমার প্রিয় জার্মানরা আমার প্রিয় রাশিয়ানদের ঘাড়ে কাঁপিয়ে পড়েছে। রাশিয়া যদি হেরে যায় সর্বনাশ হবে, স্বপনদা। বিপ্লব ব্যর্থ হবে। রাশিয়ায় ব্যর্থ হলে ভারতেও ব্যর্থ হতে বাধ্য। তা হলে আমি কী নিয়ে বাঁচব! রুশকে তার চরম সঙ্কটের দিন যে-ই মদত দেবে সে-ই আমার মিত্র। সে যদি ইংরেজ হয় তবে সেও আমার মিত্র। আমাদের খীলিস বদলে গেছে। তাই আমাদের জেল থেকে মুক্তি দেওয়া হয়। জুলি তা শুনে যেনে আশ্বস্ত। বলে, তোমরা দেশদ্রোহী। দেশের চরম সঙ্কটের দিন যে-ই মদত দেবে সে-ই আমার মিত্র।



সে যদি হিটলার হয় তো সেও আমার মিতা। একথা শুনে কেই বা ওকে মুক্তি নেবে? ওর সঙ্গে আমার বিচ্ছেদ ঘটে গেছে, স্বপনদা। মনটা খারাপ বলে খারাপ। একযাত্রায় পৃথক ফল।” বাবলী আফসোস করে।

স্বপনদা স্তম্ভিত হয়ে বলেন, “বিচ্ছেদ! ও যে বড়ো অলঙ্ঘন কথা! আমার প্রিয় বোন চকোলেটের সঙ্গে আমার প্রিয় বোন ক্যারামেলের বিচ্ছেদ। না, না, কথাটা অতি রুঢ়। বলতে পারো মতান্তর। মনান্তর কখনো নয়।”

“জুলি আমাকে শাসিয়েছে আমাদের মিতা ইংরেজরা যেদিন লাথি খেয়ে সমুদ্রের জলে ভেসে যাবে সেদিন আমরাও লাথি খেয়ে এক নৌকায় ভাসব। এদেশে আমাদের ঠাঁই হবে না। আমাদের পিতৃভূমি রাশিয়া। সেইখানেই আমাদের শেষ আশ্রয়। যদি সে তার স্বাধীনতা রক্ষা করতে পারে।” বাবলীর কণ্ঠরোধ হয়।

“পারবে। পারবে। আলবাং পারবে।” স্বপনদা স্থানান্তরিত। “হিটলারের দশা হবে নেপোলিয়নের মতো। হিটলার কি নেপোলিয়নের চেয়েও বড়ো? কেঁদো না, বোন চকোলেট। কেউ মদত দিক আর নাই দিক, রাশিয়া আত্মরক্ষা করবেই। ইংরেজ কেন ওকে মদত দিতে ছুটে গেছে, জানো? ইংরেজের আশঙ্কা রাশিয়া কিছু জায়গা ছেড়ে দিয়ে আবার না একটা ব্রেস্ট-লিটোভস্ক সন্ধি করে। তখন হিটলার আবার মোড় ঘুরে ইংরেজের ঘাড়ের কাঁপিয়ে পড়বে।” স্বপনদারও সেই আশঙ্কা।

“অসম্ভব। জায়গা ছেড়ে দিয়ে সন্ধি! অসম্ভব! সন্ধিই অসম্ভব। একবার যে চুক্তি ভঙ্গ করেছে আবার সে তাই করবে। হিটলারকে টিট করতে হবে। তার জন্যে যদি সাম্রাজ্যবাদীদের সঙ্গে হাত মেলাতে হয় তাও সহ্য। জুলি একথা শুনে আরো ক্ষেপে যায়। বলে, মিলির মতো তুমিও আগে থাকতে বিলেতে পালিয়ে যেতে পারো। বিয়ে করে স্বখে থাকবে।” বাবলী কাঁদো-কাঁদো স্বরে শোনায়।

“মিলি মিলিটি কে?” স্বপনদা উৎসুক হন।

“নামকরা বিপ্লবী নায়িকা মধুমালতী মুস্তাফী। বিয়ের পর দত্তবিশ্বাস। স্বামী বহুদিন থেকে লণ্ডনের অধিবাসী। অগত্যা মিলিও বিয়ের পর সেখানকার বাসিন্দা। আগে থাকতে পালিয়ে গেছে এ কী রকম কথা! ইংরেজরাও কি ভারত থেকে পালিয়ে যাচ্ছে নাকি? বিপ্লবের ঢের দেরি। আগে তো রুশ বিপ্লব নিকটক হোক। রাশিয়া রাহমুস্ত হোক। তার পরে আমরা দিকে

দিকে আগুন জ্বালাব। আপাতত আমাদের হাতের তাল হাতে রাখতে হবে। লোকে বলবে আমরা সাম্রাজ্যবাদীদের অশুচর। সেইজন্মেই আমাদের জেল থেকে খালাস দেওয়া হয়েছে। লোকের ভয়ে আমিও তো আজকাল বন্ধুবান্ধবদের কাছ থেকে শতহস্ত দূরে থাকি। তোমার কথা আলাদা। তুমি আমাকে ভুল বুঝবে না, স্বপনদা।” বাবলী মিনতি করে।

“আরে না। আমি কি আমার বোনদের ভুল বুঝতে পারি! তোমাকেও না, ক্যারামেলকেও না। তোমাদের দিক থেকে তোমরা দুজনেই ঠিক। মাহুঘের মনটা উকিল। বলে গেছেন পরমহংসদেব। আমরা হাইকোর্টে গিয়ে নিত্য দু’পক্ষে দাঁড়িয়ে দু’পক্ষের হয়ে মামলা লড়ি। কিন্তু যুদ্ধক্ষেত্রে তো আদালত নয়। সেখানে দুই পক্ষ নয়, আরো এক পক্ষ। তার নাম নিয়তি। ডেষ্টিনি। তোমাদের দুই পক্ষের যুক্তিই ভুল প্রমাণ হয়ে যেতে পারে। তখন তোমরা দুজনেই আবার কোলাকুলি করতে পারো। এ বিচ্ছেদ চিরবিচ্ছেদ নয়। কেউ কি জানত যে বিপ্লবী নায়িকা মধুমালতী মুত্তাকী রাতারাতি ভোল পালটে বিলেত গিয়ে হাজির হবেন! নিয়তি। ডেষ্টিনি। এই যুদ্ধের শেষ কী ভাবে হবে তা তুমিও জানো না, জুলিও জানে না, আমিও জানিনে, কেউ জানে না। হিটলারও না, স্টালিনও না, চাচিলও না।” স্বপনদা চায়ের পেয়ালা বাড়িয়ে দেন। হস্টেসের অল্পপস্থিতিকে তিনিই হস্টেসের স্থলে অভিষিক্ত।

“চাচিল!” চাচিলের কথায় বাবলীর মনে পড়ে, “মিলি এখন চাচিলের পরম ভক্ত। অমন নেতা নাকি হয় না। ব্রিটেনকে বাঁচিয়ে দিয়েছেন। লেবার পার্টির সদস্যরাও ওঁর কাছে কৃতজ্ঞ।”

“চাচিল!” স্বপনদা উদ্দীপ্ত হয়ে বলেন, “পুরুষশু ভাগ্যং দেবা ন জানন্তি কুতো মহুগ্যাঃ। লেবার পার্টির অত বড়ো শত্রু নাকি আর আছে? শুধু লেবার কেন টোরি পার্টির অধিকাংশ সদস্য ওঁর উপর বিরূপ। যতবার মন্ত্রী হয়েছেন প্রত্যেকবারই মারাত্মক সব ভুল করেছেন। কত লোক যে ওঁর জন্মে যুদ্ধে বুথা প্রাণ দিয়েছে যুদ্ধের সময় আর কত অর্থ যে বরবাদ হয়েছে! এ যুদ্ধের আগের দশটি বছর ধরে ওঁর বনবাস। একজন ইংরেজও বিশ্বাস করত না যে ওঁর কোনো রাজনৈতিক ভবিষ্যৎ আছে। ইংরেজদের একটা মন্তব্য ওঁর যুদ্ধের সময় ওরা দলবাজি ভুলে যায়। লেবার পার্টির সদস্যরা বলেন চাচিল যদি প্রধানমন্ত্রী হন তা হলেই ওঁরা কোয়ালিশনে রাজী হবেন। আর টোরিদের

অধিকাংশ ঠর উপরে বিরূপ হলেও আর-কোনো নেতাকে পান না যিনি লেবারকে বাদ দিয়ে এককভাবে যুদ্ধ চালাতে পারবেন। নিয়তি! একেই বলে নিয়তি। নইলে দু'বছর আগেও কি কেউ বিশ্বাস করত যে চার্চিল আবার মন্ত্রী হবেন? প্রধানমন্ত্রী হওয়া তো দূরের কথা। সব চেয়ে আশ্চর্যের কথা সোভিয়েট রাশিয়ার এত বড় শত্রু আর ছিল না। সেই মহাশত্রু কেমন করে মিত্র হলেন সে এক দুর্ভেদ্য রহস্য। আমি যেটুকু বুঝি সেটুকু এই যে, রাশিয়া তো কোনোদিন ব্রিটেন আক্রমণ করবে না, করলে জার্মানীই করবে। কোনোদিন ফ্রান্স আক্রমণ করবে না, করলে জার্মানীই করবে। সুতরাং জার্মানীই এক নম্বর শত্রু। তার বিরুদ্ধে যুদ্ধে হলে পূর্ব দিকেও মিত্র চাই, শুধু পশ্চিম দিকে নয়। পূর্ব দিকের সেই মিত্র ছিল পোলাও। সে তো একমাসের মধ্যেই কুপোকাং। রাশিয়াই একমাত্র শক্তি যে জার্মানীকে রুখতে পারে। যদি প্রয়োজনমতো অস্ত্রশস্ত্র পায়। হলোই বা সে কমিউনিস্ট। বিপদে পড়লে বাঘে গোকতে একঘাটে জল খায়। ক্যাপিটালিস্টের সঙ্গে কমিউনিস্টের এটা সেয়ানে সেয়ানে কোলাকুলি। সেই চার্চিল আর সেই স্টালিন! ভাবতে পারো একথা? ইতিহাসের পরিহাস। একদিন যেটা ছিল অসম্ভব আজ সেটা সম্ভব। আসলে যুদ্ধ ব্যাপারটা ব্যক্তির সঙ্গে ব্যক্তির সংঘর্ষ নয়, শক্তির সঙ্গে শক্তির সংঘাত। আর সে শক্তিকে বলতে পারো ইম্পার্নাল। যেমন সাইক্লোন বা ভূমিকম্প। ব্যক্তি সেখানে নিমিত্তমাত্র। তা বলে চার্চিলের জায়গায় চেম্বারলেনকে বসিয়ে দিলে চলত না। তেমনি স্টালিনের জায়গায় টুটস্কিকে। বিপ্লবের দিন টুটস্কির ভূমিকা ছিল স্টালিনের চেয়ে বড়ো। টুটস্কি না হলে রেড আর্মির সৃষ্টি আর কেউ করতে পারতেন না। পরে ঠর উপর দারুণ অত্যাচার হারেছে, তা তুমি স্বীকার করো আর নাই করো, বোন। কিন্তু আজকের দিনে স্টালিনই ভরসা।”

“বা বলেছ। আমরা উবেগ নিয়ে তাকিয়ে আছি তাঁরই মুখের দিকে। এতদিন তিনি গার্টার কর্ণধার ছিলেন। এখন সরকারের কর্ণধার হয়েছেন। শাসনযন্ত্র এখন তাঁর মুঠোর মধ্যে। যুদ্ধ পরিচালনার অভিজ্ঞতাও তাঁর আছে। হিটলার তাঁর তুলনায় কী! আঙুল ফুলে কলাগাছ! কিন্তু জার্মান সেনা যে হাঙ্গে এগিয়ে যাচ্ছে তাতে আতঙ্কের কারণ না থেকে পারে না। মস্কোর পতন আসন্ন। লেনিনগ্রাদের পতন অদূরে। আমরা কি স্থির থাকতে পারি। সম্ভব হলে ক্রপ্টে গিয়ে লড়তুম। মনটা পড়ে আছে মস্কোতে, লেনিনগ্রাডে।

দেহটা কলকাতায়। তুমি তো টুর্গেনিভ নও, তুমি কী বুঝবে আমার বাতনা ! অবশ্য কমিউনিস্ট তুমি কোন কালেই ছিলে না। বিপ্লবীদের প্রতি সহানুভূতি, এইটুকুর জন্তেই তোমার কাছে আসি। তা তুমি কি তোমার মাদাম ভিয়ারদোর সঙ্গে সম্পর্ক একেবারেই কাটিয়ে দিলে ? ব্যক্তিগত প্রশ্ন করছি, কিছু মনে কোরো না।” বাবলী ফুলুরি খেতে খেতে বলে। স্বপনদার প্রিয় ভোজ্য।

“বান্ধববান্ধবী সম্পর্ক যেমন ছিল তেমনি আছে। কিন্তু প্রেমিকপ্রেমিকা সম্পর্ক আর থাকতে পারে না। বহুদিন থেকেই নেই। মানুষের হৃদয় এক বিচিত্র বস্তু। একবার যদি হারায় তবে সহজে তাকে ফিরে পাওয়া যায় না। ষতদিন না তাকে ফিরে পাচ্ছি ততদিন আর কাউকে হৃদয় দিতে পারিনে। হৃদয় না দিয়ে দেহ দিলে সেটা হতো দ্বিচারিতা। সেইজন্তে আমি বাবার পীড়াপীড়ি সত্ত্বেও বিয়ে করিনি। একটা না একটা অজুহাতে এড়িয়ে গেছি। কিন্তু ক্রমেই উপলব্ধি করছিলুম যে এমনভাবে চলতে পারে না। দেবতা বলো, মানুষ বলো, পশুপাখী বলো সকলেরই ছোড়া আছে। জুটি আছে। একক কেউ নয়। আমিই বা কেন ব্যতিক্রম হতে যাই ? ফ্লোবেয়ারের মতো একনিষ্ঠ আর্টিস্ট হতে চাই বলে ? এটা উনবিংশ শতাব্দী নয়। ফরাসী সমাজও নয়। ও রকম একটা ক্লাসিক লিখলে সেটা না হবে কালোপযোগী, না দেশোপযোগী। এখন আমি ভাবছি একখানা নাটক লেখার কথা। বিশ্বরঙ্গ-মঞ্চে যার অভিনয় দেখছি তারই আদলে লিখলে সেটাই হবে আমার ‘ফাউন্ট’। ও বই লিখতে গ্যোটের ক’বছর লেগেছিল, জানো ? চল্লিশ বছর। আমার বয়সেই তিনি আরম্ভ করেন। সমাপ্ত করেন আমার বাবার বয়সে। এর জন্তে চাই একটি নারী। এই বয়সেই তিনি নারী গ্রহণ করেন। তাকে গির্জায় গিয়ে বিয়ে করেন সত্তেরো বছর বাদে। ও কী ! চমকে উঠলে যে !” স্বপনদা বিশ্বয়ের ভাণ করেন।

“ক্লশো যা মানতেন না, ভলতেয়ার যা মানতেন না, গ্যোটে স্বয়ং তাঁর যৌবনে যা মানেননি বৃদ্ধ বয়সে তাই মেনে নিলেন ! গির্জায় গিয়ে মন্ত্রপাঠ করে সমাজসম্মত কনভেনশনাল ম্যারেজ। চমকে উঠে না ?” বাবলী উত্তর দেয়।

“তোমরা কি তা হলে বিবাহও তুলে দিতে চাও ?” স্বপনদা স্থান

“না, বিবাহ তুলে দেব না। তবে আইনের কড়াকড়ি রাখব না, ধর্মীয়

অহুষ্ঠান রাখব না। ইচ্ছা হলো একসঙ্গে থাকলুম, ইচ্ছা হলে সঙ্গত্যাগ করলুম। বিবাহ হবে বন্ধুতার মতো।” বাবলীর জবাব।

“ছেলে কার তা নিয়ে যদি বিরোধ বাধে সম্পত্তির উত্তরাধিকার কার উপর বর্তাবে?” স্বপনদা জেরা করেন।

“এক্ষেত্রে মায়ের সাক্ষ্যই শেষ কথা।” বাবলী গম্ভীরভাবে বলে।

“ছাথ, চকোলেট, সবাই তোমার মতো সত্যবাদিনী নয়। মিথ্যাবাদিনীও আদালতে দেখেছি। সব চেয়ে ভালো হচ্ছে সম্পত্তি বলে কিছু না থাকা। উত্তরাধিকার বলে কিছু না রেখে যাওয়া। কিন্তু সোভিয়েট রাশিয়াতেও সম্পত্তি রেখে যাওয়া ও জন্মস্বত্বে পাওয়া ফিরে আসছে। রাষ্ট্রের কাছে সব সম্ভানই সমান, অবৈধ কেউ নয়। কিন্তু সমাজের চোখে কে কার সম্ভান এ প্রশ্ন অবাস্তব নয়। সমাজটা যদি মাতৃতান্ত্রিক হতো তা হলে কেউ কেয়ার করত না। কিন্তু সমাজতন্ত্রের দেশেও সমাজ এখনো পিতৃতান্ত্রিক। কমিউনিস্টরা যখন ‘সমাজ’, ‘সমাজ’ বলে চিৎকার করে তখন ওরা যা বলতে চায় তা ‘রাষ্ট্র’, ‘রাষ্ট্র’। বিবাহের বেলা কড়াকড়ি গোড়ায় ছিল না। এখন একটু একটু করে ফিরে আসছে। এর জন্তে পুরুষদের দায়িত্বহীনতাও দায়ী। বাপ হবে, ছেলের দায়িত্ব নেবে না। সব দায়িত্ব রাষ্ট্রের। রাষ্ট্র কাঁহাতক সহ্য করবে! ফরাসী বিপ্লবের দিনেও এই দায়িত্বহীনতা দেখা দিয়েছিল। কবি ওয়ার্ডসওয়ার্থ তখন প্যারিসে। যার সঙ্গে বাস করেন তাঁর একটি কণ্ঠা হয়। সেই কণ্ঠাকে কবি তার মায়ের দেশে ফেলে যান। জীবনে কোনো দিন স্বীকৃতি দেন নি। সম্প্রতি এই তথ্য আবিষ্কার করা গেছে। কবির মহিমা এতে খর্ব হয়নি, কিন্তু তিনি তো কেবল কবি নন, তিনি ঋষি।” স্বপনদা কটাক্ষ করেন।

বাবলী তো হাঁ। “বলো কী, স্বপনদা! ওয়ার্ডসওয়ার্থ!”

“হ্যাঁ, বোদ, ওয়ার্ডসওয়ার্থ। ফরাসী বিপ্লবের প্রথম দিবসে তিনি বিপ্লবের মোহে মুগ্ধ ছিলেন। সেকথা স্মরণ করে লিখেছিলেন—

‘Bliss it was in that dawn to be alive

And to be young was very heaven.’

বিপ্লব যখন সম্রাসের রাজত্বে পরিণত হয় তখন আরো অনেকের মতো তাঁরও মোহভঙ্গ হয়। তিনিও কোতল হতেন, যদি না দেশে ফিরে যেতেন। ত্রিটেনও দিনে দিনে বিপ্লববিরোধী হয়ে ওঠে। নেপোলিয়নের আমলে যুদ্ধে

জড়িয়ে পড়ে ফ্রান্সবিরোধীও হয়। আদিপর্বের কথা গোপন রাখাই তো তখন নির্বিরোধী কবির আত্মরক্ষার পথ। তোমার মনে যা নিয়ে খটকা বাধছে তা এই বিবাহবহির্ভূত সন্তান। তখনকার দিনে বিবাহমাত্রই ছিল যাবজ্জীবন বিবাহ। বিপ্লবীদের পক্ষে যাবজ্জীবন কারাদণ্ড। বিবাহবিচ্ছেদ আইনসম্মত হয় তার অনেক পরে। তুমি যদি পুরুষমানুষ হতে আর তোমার বান্ধবী ক্যারামেল যদি হতো তোমার ধর্মপত্নী তা হলে এই যুদ্ধের ইস্যুতেই তোমাদের বিবাহবিচ্ছেদ ঘটে যেত। নয়তো তোমরা দু'জনেই জলে পুড়ে মরতে। সন্তান থাকলে তার যে কী দশা হতো অহুমান করতে পারো।”

“জুলি আমাকে কী বলে শাসিয়েছে, শুনবে?” বাবলী কঁদো কঁদো স্বরে বলে, “ইংরেজদের সঙ্গে আমরা যদি এক জাহাজে যাত্রা না করি তবে দেশদ্রোহী পঞ্চমবাহিনী বলে আমাদের ফায়ারিং স্কোয়াডের সামনে খাড়া করা হবে। এক রাশিয়া যদি স্বাধীন ভারতকে স্বীকৃতি দেয় তবে গুলী না করে আন্দামানে পাঠানো হবে।”

স্বপনদা সমবেদনা জানিয়ে বলেন, “ক্যারামেলটা একটা পাগলী। ওর কথা ধরতে নেই, বোন। স্বাধীন ভারতেও আইন আদালত উকীল ব্যারিস্টার থাকবে। আমরা তোমাকে নতুন সরকারের কবল থেকে ছাড়িয়ে আনব। তবে ক্যারামেলকে ছাড়িয়ে আনবে কে জানিনে, স্বাধীনতার কিছুদিন বাদে যদি অক্টোবর রেভোলিউশন হয় আর তোমরাই ওর দলের সবাইকে ধরে ধরে ফায়ারিং স্কোয়াডে খতম করো বা অপরাধ লঘু হয়ে থাকলে ধীপাস্তুরে পাঠাও। তখন আমরাও বেকার। আদালতও ফাঁকা। তোমরা যেভাবে রাশিয়ার মাছিমাঝা নকল করে চলেছ তাতে শ্রমিক কৃষক ভিন্ন আর সকলের আতঙ্কের যথেষ্ট কারণ আছে। রাতারাতি ভোল পালটালেও ধনীরা কেউ প্রাণে বাঁচবে না, মধ্যবিত্তরাও মধ্যপদলোপী হবে। তুমি হয়তো তোমাদের এই দাদাটিকে বাঁচাতে চাইবে, কিন্তু আপনি বাঁচবে কিনা সন্দেহ। এক মাছের ভেড়ি থেকেই তোমাদের বছরে লাখ টাকা আয়।”

বাবলী অপ্রতিভ হয়ে বলে, “ওটা তোমার ভুল ধারণা। এদেশের কমিউনিষ্টরা কখনো ওদেশের মাছিমাঝা নকল করবে না। এদের সবাই তো মধ্যবিত্ত। নিজেদের শ্রেণীটিকে লোপ করতে হাত উঠবে কেন? তবে, হ্যাঁ, প্রাইভেট প্রপার্টির উপর পাবলিকের অগ্রাধিকার প্রতিষ্ঠা করতে হবে। আমাদের মাছের ভেড়ি পাবলিক প্রপার্টি হতে পারে। তার বদলে আমরা যদি

ক্ষতিপূরণ না পাই তবে খোরপোষ পেতে পারব। মধ্যবিত্তদের এমন দাপট থাকবে না তা ঠিক। কিন্তু এমন বেকারিও থাকবে না। সব ছেলের চাকরি জুটবে। সব মেয়ের বর জুটবে। নয়তো চাকরি। অকারণ নরহত্যা মহান স্টালিনও করেননি। করেছেন বিরোধীদের মূলোচ্ছেদ করতে। বাধ্য হলে এদেশের বড়কর্তাও তাই করবেন। তার জন্তে বিরোধীরাই দায়ী।”

স্বপনদা হাল ছেড়ে দিয়ে বলেন, “স্টালিন ছাড়া গ্রেট। যেমন পিটার ছাড়া গ্রেট। ক্যাথারিন ছাড়া গ্রেট। আচ্ছা, ইংরেজরা কতদিন তোমাদের সহযোগিতা পাবে?”

“যুদ্ধ যতদিন শেষ না হয় ততদিন। তার আগে ওদের আমরা নড়াতে চাইনে।” বাবলীর সাফ জবাব।

“খুব ভালো কথা। কিন্তু লোকে যদি খেতে না পেয়ে দলে দলে মারা যায়, মেয়েরা যদি পরতে না পেয়ে দলে দলে বেআক্ৰ হয়ে ঘুরে বেড়ায় তার দায়িত্ব নেবে কারা? যুদ্ধক্ষেত্রে হাজার হাজার কুলীমজুরের দরকার হয়, সিপাহীর তো হয়ই। তাদের অনিচ্ছা থাকলে জোর করে ধরে নিয়ে যাওয়াও সম্ভবপর। এর দায়িত্ব নেবে কারা? যুদ্ধের খরচ জোগানো কি কঠিন সমস্যা নয়? মুদ্রাস্ফীতি ছাড়া এ সমস্যার আর কী সমাধান আছে? টাকার কোনো দাম থাকবে না, তাই জিনিসপত্রের দাম আকাশছোঁয়া হবে। তার দায়িত্ব নেবে কারা? ইংরেজরা তো অপ্রিয় হবেই, তাদের সঙ্গে সঙ্গে তোমরাও। তুমিও কি আর সে-রকম সমাদর পাবে!” স্বপনদা ঘাড় নাড়েন।

“সব বুঝি, দাদা। আমিও ভেবে দেখেছি। কিন্তু রাশিয়া যদি হেরে যায় তবে বিপ্লবেরও সমাধি হবে। বিপ্লবী বলে আমি পরিচয় দেব কোন্ মুখে? আমি তো ভূতপূর্ব হয়ে যাব। রাশিয়ার হারজিং আমার পক্ষেও জীবনমরণ সমস্যা। জুলির কথা আলাদা। সেও বিপ্লবী, কিন্তু কৃষকশ্রমিকের কেউ নয়। সেও জনগণের কথা আওড়ায়, কিন্তু জমিদারের বিরুদ্ধে মহাজনের বিরুদ্ধে লড়বে না। দ্রোপদীর মতো সে বেগী বাঁধবে না, যতদিন না হুঃশাসনের নিধন হয়। কিন্তু তার পরে পাণ্ডবরা ভারতময় চোর পোষণ করবে। ও যদি জেলখানায় আরো চার পাঁচ বছর কাটাতে চায় আমি বলবার কে? ওর থীসিসটাই ভুল। এ যুদ্ধে ইংরেজ হারতে পারে না। ইংরেজকে হারতে দেখলে আমেরিকা ছুটে আসবে। একদিকে রাশিয়া, আরেকদিকে আমেরিকা, এদের সঙ্গে লড়াই করে নাৎসীরা যে কেমন করে জিতবে তা আমার মাথায়

আসে না। কিন্তু বিশ্বাসে মিলয়ে কৃষ্ণ তর্কে বহু দূর। জুলির বিশ্বাস হিটলার জিতবেই। ব্রহ্মচর্যের জয় হবেই, নিরামিষ আহারের জয় হবেই, আর্থডেক্সের জয় হবেই। স্বস্তিকচিহ্নের জয় হবেই। স্টালিনের সঙ্গে ছ'বছরের অনাক্রমণ চুক্তি ছিল বলে আমি জুলির সঙ্গে তর্ক করিনি। মুখ বুজে সহ্য করে গেছি। কিন্তু চুক্তির খেলাপ করে হিটলারের সৈন্য যখন সোভিয়েট পিতৃভূমি আক্রমণ করে তখন কি আর চূপ করে সব কথা মেনে নিতে পারি! ঘরে আগুন লাগলে এক বালতি জল নিয়ে যে ছুটে আসে সে যদি এককালে শত্রু হয়ে থাকে তবু আজ তো সে বন্ধু। চার্চিল অবশ্য ভারতের স্বাধীনতা পছন্দ করেন না, কিন্তু আমরা কেন ধরে নেব যে যুদ্ধের পরেও চার্চিল থাকবেন? তখন যিনি প্রধান-মন্ত্রী হবেন তিনি যদি ভারতের স্বাধীনতা মঞ্জুর না করেন আমরাই সকলের আগে মুক্তিযুদ্ধে নামব। শ্রমিক কৃষক একজোট হয়ে দিকে দিকে লাল ঝাণ্ডা তুলবে। সৈনিকরাও তাদের সঙ্গে যোগ দিয়ে লাল কেলা দখল করবে। কংগ্রেসকে দিয়ে আপস ছাড়া আর কিছু হবার নয়। গান্ধীর দোড় তো দেখা গেছে। আর সুভাষ বোস তো হাওয়া। শুনিছি উনি নাকি জার্মানীতে গিয়ে অস্ত্র সংগ্রহ করছেন। কিন্তু সেদেশে থেকে এদেশে আসবেন কোন্ পথে? রাশিয়া তো দুয়ার বন্ধ করেছে। স্বপনদা, জুলির জন্যে আমি সত্যিই দুঃখিত। ও বেচারী খামোখা জেলে পচছে। পারো তো তুমি ওকে জেল থেকে বার করে নিয়ে এস। বিচ্ছিন্ন হলেও আমি ওর শুভাকাঙ্ক্ষী বন্ধু।" বাবলী একনিঃশ্বাসে বলে যায়।

“আচ্ছা, বোন চকোলেট, আমি ওর মায়ের সঙ্গে পরামর্শ করে ওর সঙ্গে সাক্ষাতের অহুমতি চাইব। তবে ওর যা জেদ! না একো রূপেয়া না একো জওয়ান। জেল থেকে বেরিয়ে ও যদি আবার ফোট উইলিয়ামে গিয়ে ওই ধূয়ো ধরে তা হলে ওকে ওরা এবার কোর্ট মার্শাল করবে। এবার আর বিনা বিচারে আটক নয়, সামরিক বিচারে ফাঁসী বা বীপাস্তুর বা কারাবাস। যুদ্ধের সময় যে-কোনো গভর্নমেন্ট নির্মম। ইংরেজরা দিন দিন কঠোর হচ্ছে।” হ'লিয়ানি দেন স্বপনদা।

বাবলী এবার অল্প প্রসঙ্গ পাড়ে। “আচ্ছা, স্বপনদা, একটা কথা তোমাকে জিজ্ঞাসা করলে তুমি কি খুব রাগ করবে? তোমার বিয়েতে মাদাম ডিয়াদোঁ কিছু মনে করেননি?”

স্বপনদা গম্ভীর হয়ে যান। “ম্যাথ চকোলেট, আমি টুর্গেনিভ নই, তিনিও



আদাম ভিয়ার্দো নন। বিয়ের আগে বাঁশরিকে আমি চিঠি লিখে খবরটা দিয়েছিলুম বইকি। লিখেছিলুম পিতার অস্তিত্ব ইচ্ছা, আমারও অনিচ্ছা নয়। এর উত্তরে বাঁশরি কী লেখেন শুনবে? তোমার মুখে একটি কথা শোনার জন্যে আমি বছরের পর বছর কান পেতে রয়েছি। সেই কথাটি না বলে তুমি বিদেশে চলে গেলে, ফিরলে চার বছর বাদে। বাঙালীর মেয়ের বিয়ের বয়স একবার পার হয়ে গেলে পরে তার পাত্র জোটে না। বাপ মা জোর করে বিয়ে দিয়ে দেন। লেখাপড়া তো তেমন শিখিনি যে চাকরি করব। শিখেছি ছবি আঁকতে। সেই সুবাদে দাদার সঙ্গে তোমাদের ফোর আর্টস ক্লাবে যাওয়া আসা করি। তোমার সঙ্গে আলাপ হয়। তুমি আমার ছবি দেখতে আমাদের বাড়ী আসতে শুরু করো। ওসব ছবির সমঝদার যত ছিল খরিদদার তত ছিল না। আমিও পেশাদার আর্টিস্ট হতে চাইনি। তোমাকে চিঠি লিখে জানাই যে আমার গুরুজন আমার বিয়ে দিতে যাচ্ছেন, পাত্রও পেয়েছেন। পাকাপাকি এখনো হয়নি, এখনো সময় আছে। কিন্তু তার আগে তোমার ফিরে আসা চাই। তুমি লিখলে ব্যারিস্টার না হয়ে দেশে ফিরলে তোমার জীবন ব্যর্থ হবে। তা তো ঠিকই। পুরুষমানুষের কাছে তার জীবিকাই পরম পুরুষার্থ। প্রেম তার তুলনায় গৌণ। আর নারীর কাছে প্রেমই মুখ্য, যদিও তার গুরুজন সৈদিকে দৃকপাত করেন না, ধরে বেঁধে বিয়ে দেন। তখন নারীর জীবন ব্যর্থ। বিদেশ থেকে ফিরে তুমিই আমাকে বলেছিলেন যে তুমি আমার জীবন ব্যর্থ হতে দেবে না। আমাকে উদ্ধার করবে। ও বিয়ে বিয়েই নয়। সত্যি সত্যি তুমি অপেক্ষা করেছিলে। আমি কিন্তু সন্তানের জননী হয়ে আরো বেশী করে জড়িয়ে পড়ি। আমার ছবি আঁকার পাট উঠে যায়। তোমাকে আমি সম্পূর্ণ অব্যাহতি দিই। তখন তুমি যদি বিয়ে করতে আমি আশ্চর্য হতুম না। আশ্চর্য হচ্ছি এই কথা ভেবে যে তুমি এতকাল গৃহ করার পর অবশেষে প্রেমের যুদ্ধে হার মানলে। প্রার্থনা করি তোমরা সুখী হও। আমার কথা ভুলে গেলেই আমি সুখী হব।”

“তার পরে?” বাবলী আরো শুনতে চায়।

“তার পরে আর কী? আই অ্যাম আ ডিফিটেড ম্যান। আমি একজন পরাজিত পুরুষ। আমার অহঙ্কার ছিল যে আমি অপরাজিত। মহাত্মা যেহেমন বলেন অহিংসার অসাধ্য কিছু নেই আমিও তেমনই বলতুম প্রেমের অসাধ্য কিছু নেই। আমার প্রেমই একদিন শ্রামের বাঁশরির মতো আমার

প্রিয়াকে টেনে নিয়ে আসবে। ওর বিবাহবিচ্ছেদ যদিও সহজ নয় তবু অসম্ভব নয়। কিন্তু সন্তানের মায়া ও কাটিয়ে আসবে কী করে? আমি হেরে গেছি। এমন এক সময় ছিল যখন এটা নিবারণ করতে পারা যেত। কিন্তু বিলেত না গিয়ে আমার স্বস্তি ছিল না, ইউরোপ না দেখে আমার শান্তি ছিল না, ব্যারিস্টার না হয়ে আমার মর্যাদা ছিল না। আমার জন্তে বাঁশরির জীবনটাও ব্যর্থ হলো। নিয়তি! ডেষ্টিনি! এ ছাড়া তুমি আর কী ব্যাখ্যা দেবে? এখন এ ভাঙা জীবন জোড়া দিতে পারলে বাঁচি। দীপিকা যদি আমার ভাঙা ঘরে চাঁদের আলো হয়।” স্বপনদা আবেগের সঙ্গে বলেন।

এলফ হঠাৎ এক লাফে বাবলীর কোল থেকে নেমে এক ছুটে নিচের তলায় গিয়ে ষেউ ষেউ জুড়ে দেয়। না, চোর নয়, ডাকাত নয়, বাড়ীর গৃহিণী। পেছনে বাড়ীর চাকর রামদীন। তার সঙ্গে বাজার থেকে কেনা লটবহর। এলফ তাঁর আগে আগে সিঁড়ি ওঠে। আজকাল দোতালাতেই স্বপনদারা থাকেন। যেখানে এতদিন থাকতেন অধ্যাপক গুপ্ত। অধুনা স্বর্গীয়।

## ॥ দুই ॥

স্বপনদার স্বভাবই হলো গড়িমসি করা। যেটা আজ করার কথা সেটা তিনি কাল করবেন। যেটা কাল করবার কথা সেটা পরশু। যেটা বিলেত যাবার আগে করার কথা সেটা করবেন বিলেত থেকে ফিরে। অমনি করেই বাঁশরি দেবীকে হারালেন। দীপিকা দেবীকেও হারাতেন, যদি না পরলোকের ডাক শুনে বাবা অস্তিম্ব ইচ্ছা জানাতেন। আর বেশী দিন নেই সেটা ডাক্তার-দেয়ও ধারণা।

তাঁর পাতানো বোমদের তিনি “আমার প্রিয় বোন” বলে ডাকতেন বাবলী ও জুলির মতো। তাঁর প্রিয় বোনদের সংখ্যা ছিল সাত কি আটজন। এঁদের কারো কাছে বিবাহের প্রস্তাব করা তাঁর পক্ষে অশোভন হতো। প্রস্তাব শুনে অপর জন যদি বলে, “ছি!” দীর্ঘদিনের পরিচয়ের ফলে একজনকে তিনি “আমার প্রিয়তম বোন” বলতেও শুরু করেছিলেন। ক্লাবের অধিবেশন পালা

করে ঝাঁদের বাড়ীতে বসত তিনিও ছিলেন তাঁদের একজন। সেইসঙ্গে গুরুজনদের সঙ্গেও আলাপ পরিচয় নিবিড় হয়েছিল। কারণে অকারণে ছ'জনই ছ'জনের বাড়ী গিয়ে ক্লাবের ভবিষ্যৎ নিয়ে গবেষণা করতেন। কুকুরকে যদিও স্বপনদা যমের মতো ডরাতেন তবু দীপিকাদের বাড়ী গেলে এলুফকে বিস্কুট দিয়ে ভোলাতেন।

ক্লাবের নিয়ম ছিল ইউরোপ, আমেরিকা বা জাপান ফের্তা না হলে কেউ সদস্য হতে পারতেন না। ওটা কেবল পূর্ব পশ্চিমের মিলনের সেতু নয়, নরনারীর মেলামেশারও সোপান। গত সাত আট বছরের মধ্যে কয়েকটি শুভবিবাহের ঘটনাও ঘটেছে। দীপিকার গুরুজন আশা করেছিলেন যে সেরকম ঘটনা তাঁদের বাড়ীতেও ঘটবে। কত্না ইতিহাসে অক্সফোর্ডের ফার্স্ট ক্লাস অনার্স পেয়ে অসাধারণ যোগ্যতার প্রমাণ দিয়েছে। কিন্তু এমনি এদেশের সমাজ যে এর উপরেও পণ যৌতুক নিয়ে দরাদরি করে। গুরুজন নরম হলেও দীপিকা পাথরের মতো শক্ত। তাঁরও একটা পণ আছে। তাঁকে ভালোবাসলে তাঁর কুকুরকেও ভালোবাসতে হবে। তাঁর পণে তিনি অটল। তাই বছরের পর বছর যায়, সমবয়সিনীদের সকলেরই বিয়ে হয়ে যায়, জিশের কোঠায় পা দিয়েও দীপিকা অনুচা। তখনকার দিনে অভাবনীয় ব্যাপার। হ্যাঁ, হিন্দু সমাজে।

বাবার জন্তে স্বপনদা কিছুই করেননি, ছেলের জন্তে বাবা সব কিছুই করেছেন। একথা মনে আসতেই মনটা ছ ছ করে ওঠে। ছ'চোখ জলে ভরে যায়। বিয়ে যদি কোনোদিন করতেই হয় তবে আজ নয় কেন? কাল অবধি বাবা যদি না বাঁচেন। কিন্তু কাকে? এ প্রশ্নের উত্তর খুঁজছেন এমন সময় দীপিকার প্রবেশ। ক্লাবের মায়া যেন কাটতেই চায় না। সেই উপলক্ষে আগমন।

“আমার প্রিয়তম বোন দীপিকা”, স্বপনদা না ভেবে চিন্তে স্বতঃস্ফূর্তভাবে বলে কেলেন, “আমি যদি বোন কথাটা বাদ দিই, তুমি কি আমাকে ঘৃণা করবে?”

“এতদিন দাওনি কেন সেইটেই আমাকে ভাবায়। কিন্তু, জানো তো, আমি পাথর দিয়ে তৈরি। আমার একটা শর্ত আছে। লাভ মী, লাভ মাই ডগ।” দীপিকার মুখ উজ্জ্বল হয়ে ওঠে।

“তা হলে চলো আমার সঙ্গে বাবার ঘরে। ছ'জনে মিলে তাঁকে প্রণাম করে তাঁর আশীর্বাদ ভিক্ষা করব।” স্বপনদা বলেন।

“কিন্তু অমন করে আমার শর্তটা এড়িয়ে গেলে চলবে না। পরিষ্কার বলতে হবে আমার এল্ফকে তুমি ভালোবাসবে। আমার শোবার ঘরে সারা রাত ও ছাড়া থাকে। ও আমাকে পাহারা দেয়, আমিও ওকে পাহারা দিই।” দীপিকা বলেন।

স্বপনদার মনে পড়ে শতপথ ব্রাহ্মণের উর্বশী পুরুষবা উপাখ্যান। ওটা দীপিকাকে শোনান। “তুমি কি পূর্বজন্মে উর্বশী ছিলে? আর এল্ফ ছিল তোমার ভেড়া? তা নইলে এমন উদ্ভট শর্ত কার মাথায় আসে? কিন্তু ওই একটি শর্তেই আমি রাজী। ওর বেশী না।”

“না, আমার আর-কোনো শর্ত নেই। আমি তোমার তুমি আমার আর এল্ফ আমাদের।” দীপিকা সম্মতি দেন।

তখন থেকেই এ বাড়ীর এই রীতি। এল্ফ রাত্রে ছাড়া থাকে। আর কর্তাগিন্নীর শোবার ঘর ওরও শোবার ঘর। অগ্ন্যাগ্ন ঘরেও ওর আবাস প্রবেশ।

বৌদি ঘরে ঢুকতেই বাবলী তাঁকে প্রণাম করে তাঁর হাতে ফুলের তোড়া ধরিয়ে দেয় আর তাঁর গলায় পরিয়ে দেয় ফুলের মালা। তিনি চিনতে না পেরে স্বপনদার দিকে তাকান।

“অপরাজিতা সেন। ডাক নাম বাবলী। আমার প্রিয় বোন চকোলেটে সম্প্রতি জেল থেকে মুক্তি পেয়ে আমাদের বিয়েব খবর শুনে অভিনন্দন জানাতে ছুটে এসেছে। আমি ওকে থাকতে বলেছি, আমাদের পার্টিতে যোগ দেবে। মনে করো এইটাই বোভাত।” স্বপনদা বলেন।

দীপিকা বাবলীর গালে বিনিত্যী কেতায় চুমু খেয়ে বলেন, “হাউ স্মুট অভ ইউ! আমার প্রিয় ননদ। কিন্তু জেলে ঘরে নিয়ে গেল কেন?” দীপিকা জিজ্ঞাস্থ।

“যুদ্ধবিরোধী কার্যকলাপের জগ্লে।” বাবলীর জবাব।

“তা হলে ছেড়ে দিল কেন?” দীপিকা বুঝতে পারেন না।

“আমাদের থিসিসটা বদলে গেল বলে। এ যুদ্ধ আর সাম্রাজ্যবাদী যুদ্ধ নয়। এটা সোভিয়েট রাশিয়ার জনযুদ্ধ। অতএব আমাদেরও।” বাবলী বোঝায়।

“ও মা তাই নাকি!” দীপিকা কৌতুক বোধ করেন। “চাল নেই তলোয়ার নেই, নিধিরামের দল জনযুদ্ধে নামবে। ইংরেজরা ছত্রভঙ্গ করবে না?”

“আহা ! তা কেন করতে যাবে ? ওরা তো ইংরেজের শত্রু নয়, মিত্র ।  
ওদের যুদ্ধ হচ্ছে ওদের আর ইংরেজদের কমন এনিমির বিরুদ্ধে । বর্বর  
ফাসিস্টদের বর্বর নেতা হিটলারের বিরুদ্ধে । সভ্যতাকে বাঁচানোর জন্তে  
এই যুদ্ধ । এখানে ইংরেজরা আর আমরা এক শিবিরে ।” বাবলী প্রত্যয়ের  
সঙ্গে বলে ।

“আচ্ছা, আমি যখন অক্সফোর্ডে পড়াশুনা করতুম সে-সময় ওখানকার  
বাঙালী ছাত্রদের মুখে শুনেছিলুম অপরাজিতা সেন বলে একটি কলেজের ছাত্রী  
হিজলী বন্দীশালার হত্যাকাণ্ডের প্রতিবাদে কলকাতার এক ক্লাবে ঢুকে এক  
সাহেবকে গুলী করে । সাহেব বেঁচে যান । মেয়েটির শাস্তি হয় । তবে  
ফাঁসী কি দাঁপান্তর নয় । কী দুর্জয় সাহস ! আর কী জলন্ত দেশপ্রেম !  
কোথায় যে নিবে গেল মেয়েটি ! কেউ আর ওর নাম করে না । তোমার  
নামের সঙ্গে ওর নামের মিল আছে, বাবলী ।” দীপিকা বলেন ।

“চরিত্রের সঙ্গেও মিল আছে ।” স্বপনদা মন্তব্য করেন । আগুন !  
আগুন ! আমার প্রিয় বোন চকোলেট আগুন দিয়ে তৈরি ।”

“এত যদি মিল তবে তুমি কি সেই অপরাজিতা ?” দীপিকা অবাক হন ।

“হ্যাঁ, বৌদি, আমিই সেই ।” বাবলী উত্তর দেয় । “ইংরেজদের উপর  
আমার রাগ পড়ে গেছে । সোভিয়েট রাশিয়ার এই জীবনমরণ সংগ্রামে  
স্বাধীন ভারতেরই উচিত সর্বতোভাবে সাহায্য করা । তা যখন সে পারছে না  
তখন যে পারছে তার সঙ্গে সহযোগিতা করাই তো যুদ্ধজয়ের পূর্ব শর্ত । ওরা  
আমাকে অশেষ কষ্ট দিয়েছে, কিন্তু অসম্মান কখনো করেনি । এবার তো  
রানীর হালে ছিলুম । যুদ্ধের পরে আবার ওদের সঙ্গে মোকাবিলা হবে ।  
আপাতত যুদ্ধজয়ই একমাত্র লক্ষ্য । স্বাধীনতা অপেক্ষা করতে পারে ।”

“রানীর হালে ছিলে বলছ, কিন্তু তোমার চেহারা দেখে তো তা মনে হয়  
না । তোমার কি অসুখ করেছিল ?” বৌদি মমতার সঙ্গে স্তব্ধান ।

“অসুখ নয়, বৌদি । অ-সুখ । আমার অন্তরে সুখ নেই । আমি অসুখী ।  
আমার মতো অসুখী আর নেই ।” বাবলী ভাবাবেগে ভেঙে পড়ে ।

“কেন, ভাই বাবলী ? কী তোমার দুঃখ ?” বৌদি গলে যান ।

“দুঃশমনরা চুক্তির খেলাপ করে অতর্কিতে রুশ পিতৃভূমি আক্রমণ করেছে,  
তা জানেন । মস্কো বিপন্ন, লেনিনগ্রাড বিপন্ন । আমরা কি আপাতত ওসব  
বাঁটি ছেড়ে দিয়ে দূরে সরে যাব ? টাইমের বদলে স্পেস বিনিময় করব ?

টাইম পেলে তৈরি হয়ে পালটা আক্রমণ করব ? স্পেস কেড়ে নেব ? জনগণমন অধিনায়ক রুশভাগ্যবিধাতা মহামতি স্টালিন কী চিন্তা করছেন বলতে পারব না। কিন্তু মস্কো লেনিনগ্রাদের বাসিন্দাদের জন্তে আমরা দিব্যারাত্রি চিন্তিত। এ তো গেল আমাদের কমরেডদের সকলের মাথাব্যথা। এর উপর আমার নিজের বুক ব্যথা। আমার বাস্কবী জুলির সঙ্গে আমার বিচ্ছেদ ঘটে গেছে। মতামতের দিক থেকে আমরা এখন উত্তরমেরু দক্ষিণমেরু। যুদ্ধের ফলাফলের জন্তে সবুর না করে ইংরেজকে ভারত থেকে তাড়াতেই হবে। এই হলো ওর মত। তা হলে ইংরেজ কেমন করে রাশিয়াকে মদত দেবে ? কে জানে কেমন করে ? তা হলে রাশিয়া যুদ্ধে জিতবে কী করে ? কে জানে কী করে ? আচ্ছা, দেশ যদি আজ এখনি স্বাধীন হয় সে কি রাশিনাকে মদত দেবে ? না, তেমন কোনো বাধ্যবাধকতা নেই। ভারতের স্বাধীনতার জন্তে রাশিয়া কবে কী করেছে যে ভারত ত্রায়ত বাধ্য ? এখন এই অবোধ বালিকার সঙ্গে আমি কাঁহাতক তর্ক করব ! আমি শুধু বলেছি যে, জুলি, যদি হিটলার আর স্টালিন এই দু'জনের মধ্যে একজনকে বেছে নিতে হয় তুমি কাকে বেছে নেবে ? ও বলে, হিটলারকে। আর তুমি ? আমি বলি, স্টালিনকে। ব্যস ! এক কথায় তালুক। আমার মতো অসুখী আর কে ?” বাবলী থামে।

“সত্যি আমি এত দুঃখিত !” বোদি বলেন দরদের সঙ্গে।

“এই সব নয়, বোদি।” বাবলী আরো বলে, “আমার বড়ো সাধ ছিল যে স্বপনদা হবেন বাংলার টুর্গেনিভ, আর একথানা ‘ভার্জিন সয়েল’ লিখবেন আমাদের জন্তে ও আমাদের নিয়ে। অমর করে দেবেন আমাদের। ওঁকে তো আমি টুর্গেনিভদা বলে ডাকতে শুরু করেছিলুম। উনি আমাদের হতাশ করেছেন। উনি টুর্গেনিভ নন। উনি আর একথানা ‘ভার্জিন সয়েল’ লিখবেন না। লিখবেন আর একথানা ‘ফাউন্ট’। জার্মান ক্লাসিকই এখন ওঁর আদর্শ। রুশ ক্লাসিক নয়। সহানুভূতিটা মনে হয় জার্মানদের প্রতি। ওই যে ফাউন্ট ও হিটলার ছাড়া আর কে ? শয়তানের সঙ্গে কার অমন চুক্তি ? ফাউন্টকে আথেয়ে জিতিয়ে দেওয়া মানে হিটলারকে আথেয়ে জিতিয়ে দেওয়া। স্বপনদা, তুমি আমাকে হতাশ করলে। আমার মাথাব্যথা আর বুক ব্যথার উপর হাড়ে ব্যথা।” বাবলী নালিশ করে।

“আমার প্রিয় বোন চকোলেট, তুমিও আমাকে ভুল বুঝলে।” স্বপনদা হতভম্ব হয়ে বলেন, “হিটলার তো বর্বর। আমি যার কথা লিখতে চাই

সে সভ্য মানুষ। যে মানুষ ইউরোপে আমেরিকায় জাপানে মানবপ্রগতির ধ্বজাবাহক। সে মানুষ যে একটার পর একটা মহাযুদ্ধে জড়িয়ে পড়ছে এটা কি সে সাম্রাজ্যবাদী বা সাম্যবাদী বলে? না আছে এর কোনো গভীরতর ব্যাখ্যা? যেমন ফাউস্টের মতো শয়তানের সঙ্গে চুক্তি? শয়তান মানে অশুভ শক্তি।”

“বাবলী, তুমি তোমার দাদাকে ভুল বুঝেছ। উনি জার্মানদের ভালো-বাসলেও হিটলারকে ও তার দলবলকে নয়। হিটলারের জয় উনি কামনা করেন না,” বৌদি বলেন।

“দাদা,” বাবলী নরম হয়ে বলে, “তা হলে তুমি টেলস্টায়ের মতো আর একথানা ‘ওয়ার অ্যাণ্ড পীস’ লেখ। তাতে রাশিয়ার জিং দেখানো হবে।”

“তা হলে তো আমাকে অবিলম্বে মস্তো যেতে হয়। ইংরেজ সরকার আমাকে পাশপোর্ট দেবে, না রুশ সরকার ভিসা দেবে? আমরা এদেশের লোক বহুকাল যুদ্ধবিগ্রহ দেখিনি। প্রত্যক্ষ অভিজ্ঞতা না হলে এদেশের পটভূমিকাতেও অমন উপন্যাস লেখা সম্ভব নয়। এই বাল্যবিবাহের দেশে তুমি নায়িকা পাচ্ছ কোথায়? আগে তো সামাজিক পরিবর্তন হোক। কাল্পনিক চরিত্র দিয়ে ‘ওয়ার অ্যাণ্ড পীস’ হয় না। আমার তেমন কোনো উচ্চাভিলাষ নেই, বোন। তুমি বলতে পারো, কেন? ‘ফাউস্ট’? সেটাও কি আমার উচ্চাভিলাষ নয়? ওই নাম আমি ব্যবহার করব না। ও কাহিনীও না। আমি শুধু অনুসরণ করতে চাই খীম্টা; মানুষ সভ্য হতে গিয়ে তার আত্মাকে বিকিয়ে দিচ্ছে। পরিবর্তে যা পাচ্ছে তা পার্থিব উন্নতি। যত উচ্ছে উঠুক না কেন, অসন্তোষ ওর কপালে লেখা। অশান্তি ওর নিত্য সহচর। ভ্রাণ করতে পারে ওকে ঐশী করুণা। আর নারীর প্রেম। আমারও মৌল বিশ্বাস ওই দুটিতে। মানুষকে বাঁচানো মানুষের সাধ্য নয়। সে যদি বাঁচে তো বাঁচবে ঐশী করুণায়। তোমরা কমিউনিস্টরা তো ঈশ্বর মানবে না। আমিও কি মানতুম? আমি হিউমানিস্ট। কিন্তু পাশ্চাত্য মানবিকতার ভিতর থেকে এখন দানবিকতা বেরিয়ে এসেছে। আকাশ থেকে বোমা ফেলে এখন নির্বিচারে নারী শিশু বধ করছে। তার জন্তে এতটুকু বিবেকের দংশন নেই। এই আসন্ন প্রলয়ের দিন যদি আমি ঐশী করুণায় বিশ্বাস করি সেটা আমার প্রতিক্রিয়াশীলতা নয়। আর নারীর প্রেম? এ

জগতে তার মতো আর কী আছে ? আমরা পুরুষরা কি যোগ্য ?” বলতে বলতে স্বপনদার গলার স্বর অস্পষ্ট হয়ে আসে।

বাবলী শুক্ন হয়ে শোনে। “হ্যাঁ, লেখবার মতো খীম বটে। ঐশী করুণা সম্বন্ধে দ্বিমত থাকতে পারে, কিন্তু নারীর প্রেমের বেলা আমরাও তোমার সঙ্গে একমত। তবে নারী ও পুরুষ এখন পরস্পরের কমরেড। আমাদের দলের ছেলেরা আমাদের ‘দিদি’ বলে ডাকে না। বুড়োরাও ‘বোন’ বলে ডাকেন না। সকলের কাছেই আমি ‘কমরেড’। আমিও সবাইকে বলি ‘কমরেড’। স্ত্রী পুরুষ নির্বিশেষে। নরনারীর বাছবিচার একটা বুজোয়া কুসংস্কার। তা বলে প্রেম একটা কুসংস্কার নয়। আমাদের পরিকল্পিত সমাজেও প্রেম থাকবে।”

“বাঁচালে। অন্তত একটা জায়গায় তোমাদের সঙ্গে আমার মিল থাকবে। বুজোয়া বলে আমার লেগা অপাঙ্ক্তেয় হবে না।” স্বপনদা দীপিকার সঙ্গে দৃষ্টি বিনিময় করে বাবলীর দিকে তাকান।

হঠাৎ এলফ তেড়ে গিয়ে ঘেউ ঘেউ শুরু করে দেয়। কলিং বেল বাজবার আগেই টের পায় কারা ঘেন আসছেন।

“আরে, এস, এস।” স্বপনদা দরজার সামনে গিয়ে সিঁড়ির সামনে দাঁড়ান। পার্টির অতিথিরা একে একে বা জোড়ে জোড়ে হাজির হন।

“ব্যাপার কী হে! আত্মকের এই পার্টি কেন? তোমাদের কারো জন্মদিন নয় তো। উপহার আনা হয়নি।” বলেন সুবিনয় তালুকদার।

“না, তেমন কোনো উপলক্ষ নেই। এমনি একটু আড্ডা দিতে খেয়াল হলো। ক্লাব উঠে গেছে। ভাব বিনিময় তো উঠে যায়নি। তোমরা যদি রাজী হও আমরা ক’জন মিলে ছোট একটা গ্রুপ গঠন করতে পারি। কালচারাল গ্রুপ। যুদ্ধবিগ্রহের দিনে কেবল যে মানুষ ধ্বংস হয় তা নয়, তার সৃষ্টিও ধ্বংস হয়। আমাদের কাজ হবে নতুন সৃষ্টির নকশা তৈরি করা। যাতে শূন্যতা পূরণ হয়।” স্বপনদা নিবেদন করেন।

সিগারেট ধরাতে ধরাতে সুবিনয় বলেন, “এই নিয়ে ক’বার হলো? সেই স্কুলজীবন থেকেই তুমি একটার পর একটা গ্রুপ গঠন করে আসছ। পারলে কি একটাকেও বাঁচিয়ে রাখতে? আচার্য প্রফুল্লচন্দ্র একবার একটা বাগী দিয়েছিলেন। তাতে ছিল, বাঙালীর উৎসাহ খড়ের আগুনের মতো দপ করিয়া জলিয়া উঠিয়া দপ করিয়া নিভিয়া যায়। তখন মানতে চাইনি।



এখন মানতে হচ্ছে। আড্ডা দিতে বাঙালীর জুড়ি নেই। আমরা আবার আড্ডা দেব। কিন্তু নতুন সৃষ্টির নকশা আমাদের কাছে প্রত্যাশা করা বৃথা। তার জন্ত চাই দৃষ্টি। দৃষ্টি আমাদের সীমিত। ইংরেজ এদেশে না এলে আরো সীমিত থাকত। ওরা চলে গেলে আমরা আমাদের পুরানো গণ্ডিতে ফিরে যাব। সেই অষ্টাদশ শতাব্দীর মনোজগতে। ওরা লুটাই করতে এসে থাকুক আর রাজত্বই করতে, ওরা নিয়ে এসেছিল আশু একটা যুগকে। যুগটাও যদি ওদের সঙ্গে সঙ্গে চলে যায় তবে আমরা আবার পদাবলী আর মঙ্গলকাব্য আর পাচালী লিখব। নতুন সৃষ্টির নকশা? তার রূপায়ণ করবে কারা? কাদের জন্তে? তোমার আমার দিন গেছে বসেই ধরে নাও। আমরা কেবল বাঙালী নই, আমরা উনবিংশ শতাব্দীর রেনেসাঁসের ফসল। ফসল থেকে ফসিল। আমাদের সম্বন্ধে লেখা হবে, ন ভূতো ন ভবিষ্যতি। এমনটি আগেও হয়নি, পরেও হবে না।”

“তার মানে,” স্বপনদা টিপ্পনী কাটেন, “ব্রিটিশ রাজত্বের সঙ্গে সঙ্গে আধুনিক যুগের অস্তিত্বও শেষ হয়ে এল। তার শূন্যতা পূরণ করবে মধ্যযুগের পুনরাবর্তন। কিন্তু আমি যা নিয়ে ভাবছি তা কেবল ভারতের ভবিষ্যৎ নয়, বিশ্বের ভবিষ্যৎ। মানবজাতির ভবিষ্যৎ। মানবসভ্যতার ভবিষ্যৎ। এই যুদ্ধ যে শূন্যতা রেখে যাবে সেই শূন্যতার পূরণ। আমরা ক’জন কি শুধু বাঙালী, শুধু ভারতীয়? আমরা কি মানুষ নই? এ সঙ্কট মানবিকতারও সঙ্কট। মুসলমানরা যেমন বলে, ইসলাম ইন ডেঞ্জার, তেমনি আমারও বলতে ইচ্ছা করে, হিউমানিজম ইন ডেঞ্জার। আমরা এমন কিছু হারাতে যাচ্ছি যা পাঁচশো বছর ধরে ইউরোপকে সৃষ্টিশীল রেখেছে, দেড়শো বছর ধরে ভারতকেও, বিশেষ করে বাংলাকেও। এই যুদ্ধ যদি আরো সংক্রামক হয়, যদি রাশিয়া থেকে এশিয়ায় ছড়ায়, যদি ইরান হয়ে ভারতেও ঢোকে তা হলে আমরাও হব যুদ্ধক্ষেত্রের সান্নিধ্য। মহাযুদ্ধ হচ্ছে মহাসংক্রমণ। দেশ স্বাধীন হলেও যে যুদ্ধ এড়াতে পারত তা নয়। এটা কোন একটি নেশনের একক সাধের অতীত। কিন্তু এই মহামারীর পরে যারা বেঁচে থাকবে তারা মানুষ বলে পরিচয় দিলেও হিউমানিজমের মহিমা উপলব্ধি করবে না। এইসব চিন্তা করেই আমি আবার এক গ্রুপের পত্তনে উত্তোষী হয়েছি।”

“ওদিকে আরো একটা গ্রুপের পত্তন হয়েছে।” ইন্দ্রজিৎ রাহা সংবাদ দেন। “মানবেন্দ্রনাথ রায়ের র্যাডিকাল হিউমানিস্ট গ্রুপ। হিউমানিজমকে

বাঁচিয়ে রাখার একমাত্র উপায় তাকে র‍্যাডিকাল করা। কিন্তু আমাদের যা ঐতিহ্য তা লিবারল হিউমানিস্ট ঐতিহ্য। এর থেকে একচুল সরে গিয়ে যদি আমরা র‍্যাডিকাল হিউমানিস্ট হই তবে আরো একচুল সরে গিয়ে কমিউনিস্ট হিউমানিস্ট হব না কেন? তাই গোলে হরিবোল দেবার জন্তে রব উঠেছে সবাইকে হতে হবে অ্যাঙ্টিফাসিস্ট। তবে, অ্যাঙ্টিফাসিস্ট তো মোল্লা মৌলবী গুরু পুরোহিতরাও। যারা হিউমানিজমের ধার ধারে না তারাও। যারা বলে লিবারল হিউমানিজমের যুগ গেছে তাদের সঙ্গে হাত মিলিয়ে আমরা অ্যাঙ্টিফাসিস্ট হতে রাজী নই। আমি বরাবর লিবারল হিউমানিস্ট ছিলাম এখনো তাই, পরেও তাই থাকব। যুগ যদি যায় যাবে। তাকে আটকে রাখার দায় আমার নয়। আমাদের গ্রুপেরও নয়। আচ্ছা, একটা ম্যানিফেস্টো বার করলে কেমন হয়? কমিউনিস্ট ম্যানিফেস্টোর মতো লিবারল হিউমানিস্ট ম্যানিফেস্টো। না, না, হাসির কথা নয়। আমি সীরিয়াস।”

বাবলী এতক্ষণ উসখুস করছিল, এবার দীপিকা বোদির কানে ফিস ফিস করে বলে, “মাফ করো। বোদি, আমার একটু কাজ আছে। আরেকদিন আসব।”

“সে কী!” স্বপনদা টের পেয়ে বলেন, “তুমি উঠছ কেন? তোমাকে তো বলেছি আজ এটা তোমার খাতিরে আরেকবার বোঁভাত। লুচি, পোলাও, মাছ, মাংস, চাটনি, মিষ্টি সব কিছুই পাবে। শুধু একটু ধৈর্য ধরতে হবে। সেইজন্তে কথাবার্তা চালু রাখা দরকার। তোমাকে তো কেউ লিবারল হিউমানিস্ট হতে বলছে না। তুমি কমিউনিস্ট হিউমানিস্ট, আমরা লিবারল হিউমানিস্ট। আধাআধি মিল তো আছে। অমিল যেটা সেটা আপাতত চাপা পড়ছে। তবে আমরা ওই অ্যাঙ্টিফাসিস্ট ভেক ধারণ করতে নারাজ। আমাদের পক্ষে ওটা হবে ভণ্ডামির ভেক। ভাগনার (Wagner) আমার প্রিয় সঙ্গীতকার। আমার যখন খুশি তখন আমি ভাগনার বাজাব। ওদিকে জার্মানীতে বসে হিটলারও তাই করছেন। হিটলার ভাগনার ভালোবাসেন। ওঁর সঙ্গে আমার এইখানে একটা মিল রয়েছে। গুপ্তচরের ভয়ে আমি এটা গোপন করতে পারব না। আরো জোরে ‘সিগফ্রিড’ বাজাব। যে সঙ্গীত দেশোত্তর ও কালোত্তর তাকে ফাসিস্ট বলে চিহ্নিত করা যুঁখত। আমি সেই যুঁখতার পায়ে আত্মসমর্পণ করব না। আমি জানতে চাই ক’জন অ্যাঙ্টিফাসিস্টের এ সাহস আছে।”

এটা যেন বাবলীর প্রতি একটা চ্যালেঞ্জ। বেচারি একলা পড়ে গেছে, ওর নিজের দলবল এখানে নেই। মস্কো বিপন্ন, লেনিনগ্রাড বিপন্ন, ঠিক এই মুহূর্তে যদি কেউ ‘সিগফ্রিড’ বাজায় তাতে জার্মান পক্ষের মনের জোর বাড়ে, রুশ পক্ষের মনের জোর কমে। সঙ্গীতের উপরে হার জিৎ নির্ভর করে বইকি। বাবলী বলে, “স্বপনদা, তুমি কি কখনো চাইকোভস্কির ‘নাট্যকার’ বাজাও না?”

“বাজাই বইকি। রিমস্কি-কোরসাকোভও আমার প্রিয়।” স্বপনদা উত্তর দেন।

“তা হলে আমি শুনতে আসব, যেদিন বার্লিন বিপন্ন হবে সেদিন। ওঁরা কেউ কমিউনিস্ট ছিলেন না। ওঁদের সঙ্গীতও দেশোত্তর ও কালোত্তর। তা হলে তো কারো আপত্তি থাকার কথা নয়। সেদিন ধরা পড়বে তোমার নিজের সেটিমেন্ট কোন্ দিকে। তবে আমার মিনতি শোন। বুক ফুলিয়ে ভাগনার বাজাতে যেয়ো না। ওতে আমাদের শত্রুপক্ষের উল্লাস বাড়বে। আমাদের মিত্রপক্ষের বিষাদ গাঢ় হবে।” বাবলীর কর্ণস্বর কাঁপে।

“সঙ্গীতের কী অসামান্য প্রভাব!” অনীতা তালুকদার বলেন। “আমাদের দেশেই আমরা দেখেছি ‘বন্দে মাতরম্’ কেমন করে একটি নিরস্ত্র জাতিকে সংগ্রামের বল জোগায়। আচ্ছা, মিস সেন, ‘বন্দে মাতরম্’ সম্বন্ধে আপনাদের কী মত? ওটা কি অ্যাষ্টিফিসিস্ট সম্মেলনে গান করতে পারা যাবে?”

“ওতে মুসলমান কমরেডদের আপত্তি আছে। ‘ঈং হি দুর্গা দশপ্রহরণ-ধারিনী’ ওরা আমাদের সঙ্গে গলা মিলিয়ে গাইতে পারে না। সেটাও আরেক রকম ভণ্ডামি। ওর বদলে ‘জনগণমন’র প্রস্তাব উঠেছে। ‘ভারত-ভাগ্যবিধাতা’ কে? কেউ বলে ব্রিটিশ রাজরাজেশ্বর, কেউ বলে ঈশ্বর। আমরা কমিউনিস্টরা ঈশ্বরবিশ্বাসী নই। তাই আমাদের আপত্তি ঈশ্বরে। আর জুলিদের আপত্তি ব্রিটিশ রাজরাজেশ্বরে। তৃতীয় কোনো সঙ্গীত খুঁজে পাওয়া যাচ্ছে না। ‘ইন্টারন্যাশনাল’ আজকাল রাশিয়াতেও অচল। ওরা নাকি নতুন একটা সঙ্গীত সৃষ্টি করেছে, যেটা ওদের দেশোপযোগী। ওদেশে এখন দেশভক্তির জোয়ার এসেছে। দেশ বাঁচলে তো ধর্ম বাঁচবে। ধর্ম বলতে ওদেশে কমিউনিজম বোঝায়। ‘পিতৃভূমি’র জন্তে ওরা প্রাণ দিচ্ছে। ওদেশেও তো কতক লোক আছে যারা কমিউনিস্ট নয়। ওরাও সমানে প্রাণ

দিচ্ছে। মতবাদের দিক থেকে যে যাই হোক না কেন, দেশরক্ষার বেলা সবাই ওরা পেট্রিয়ট। পেট্রিয়টিক সঙ্গীতই ওরা আজকাল বাজায়।” বাবলী বিশদ করে।

“আমরা ভারতীয়রাও তো পেট্রিয়ট। আমাদের মাতৃভূমি বিপন্ন হলে আমরা কী বাজাব? এমন কোন্ সঙ্গীত আছে যাতে মুসলমানদের আপত্তি হবে না, কমিউনিস্টদের আপত্তি হবে না? অ্যাণ্টিফাসিস্ট বলে যাঁরা সম্মিলিত হচ্ছেন তাঁদের পায়ের তলায় কোন্ দেশের মাটি? কথাটার মধ্যে দেশের তো নামগন্ধ নেই। মতবাদেরও কি আছে? অ্যাণ্টিফাসিস্ট বললে কেবল যে কমিউনিস্ট বোঝায় তা নয়, লীগপন্থী মুসলমান, মহাসভাপন্থী হিন্দুও বোঝায়। এমন এক জগাখিচুড়ির জন্তে জান দেবে ক'জন! দেশ যদি বিপন্ন হয়।” জিজ্ঞাসা করেন আদিত্য বর্মণ।

বাবলী উত্তর দিতে গিয়ে হিমশিম খায়। দীপিকা বৌদি তার দশা দেখে মুখ খোলেন। “এ বেচারি সব জেল থেকে ছাড়া পেয়েছে। এর কাছে জবাবদিহি প্রত্যাশা করা অত্যাচার। তা ছাড়া জবাবদিহির দায়টা তো কেবল কমিউনিস্টদের নয়। গ্রাশনালিস্টরাও কি হিটলারবিরোধী মুসোলিনিবিরোধী তোজোবিরোধী নন? তাঁদেরও জবাবদিহি করতে হবে। টার্কি যদি জার্মান শিবিরে যোগ দেয় তবে হিটলারের ফোজ অনায়াসে ইরানে ঢুকবে, ইরান পেরিয়ে বেলুচীস্থানে। মুসলমানদের মতিগতি কোন্ দিকে তা তো এখন থেকেই আঁচতে পারা যাচ্ছে। ওরা চায় পাকিস্তান। হিটলারবাহিনী যেদিন বেলুচীস্থানে ঢুকবে সেদিন সেখানে পাকিস্তানের নিশান উড়বে।”

অতিথিরা সকলেই দমে যান। টু শব্দটি করেন না। খবর আসে, খাবার তৈরি। আজ দেশী মতেই রান্না। সাহেবী মতে নয়।

বাবলী না থাকলে মহিলার সংখ্যা কম পড়ত। জোড় মিলত না। ও মেয়েকে বসিয়ে দেওয়া হয় ওরই মতো অবিবাহিত একজন পুরুষমাহুষের পাশে। ওই আদিত্য বর্মণ। স্বপনদার অন্তরঙ্গ বন্ধু। রাজনীতি থেকে দূরে থাকতে চান। কালচারাল গ্রুপ গঠন করতে উৎসাহী। বাবলীকেও সঙ্গে পেলেন স্থখী।

“নো কমিটমেন্ট। আপনার দিক থেকেও না। আমাদের দিক থেকেও না। আপনাকে আমরা স্বধর্ম ত্যাগ করতে বলব না। আপনিও আমাদের স্বধর্ম ত্যাগ করতে বলবেন না। আমরা কেউ ফাসিস্ট নই। তা বলে

অ্যাণ্টিফাসিস্ট বলে নাম জাহির করতেও চাইনে। ওর মধ্যে একটা রাজ-নৈতিক ইঙ্গিত প্রচ্ছন্ন। যারা অ্যাণ্টিফাসিস্ট বলে পরিচয় দিচ্ছেন তাঁরা সরকারের সঙ্গে সহযোগিতা করতে কমিটেড। আমরা কমিটেড নই। সরকারের সঙ্গে সহযোগিতা করতে গিয়ে কেন আমরা আমাদের কংগ্রেসী বন্ধুদের কাছে অপ্রিয় হতে যাই? ওঁদের অনেকেই এখন জেলে। ওঁরা কী মনে করবেন, আমরা যদি রাশিয়ার স্বার্থে ইংরেজের সঙ্গে হাত মেলাই! ভারতের স্বার্থ বলতে কি স্বতন্ত্র কিছু নেই?” বর্মণ স্বধান।

“ভারতের স্বার্থ বলতে যদি বোঝায় ভারতের কৃষক শ্রমিকের স্বার্থ, যারা শতকরা আশিজন, তা হলে ভারতের স্বার্থ এ যুদ্ধে কৃষক শ্রমিক শ্রেণীর একমাত্র রাষ্ট্র সোভিয়েট রাশিয়ার অন্তিতরঙ্গ। এ লড়াই ভারতের কৃষক শ্রমিকদেরও লড়াই। তাই এর নাম জনযুদ্ধ। ইংরেজরা এর শরিক বলে মহাভারত অন্তর্ভুক্ত হয় না। ওদের সঙ্গে সহযোগিতা করলেও আমাদের জাত যায় না। ওদের সঙ্গে আমাদের পাণ্ডব কোরব সম্পর্ক। আপংকালে পাণ্ডব ও কোরব মিলে একশো পাঁচ ভাই। আমার প্রাণের বন্ধু মঞ্জুলিকাকে আমি কিছুতেই এ তত্ত্ব বোঝাতে পারিনি। ও বেচারি জেলে পড়ে আছে। কী করা যায়, বলুন। শতকরা আশিজনের স্বার্থটাই তো বড়ো। সোভিয়েট রাশিয়ার বিপদে ওদেরও বিপদ। দেশ মানে কি খালি দেশের মাটি? না দেশের অধিকাংশ মানুষ?” বাবলীর পালটা প্রশ্ন।

বাবলীর ডানদিকে বসেছিলেন সুবিনয় তালুকদার। তিনি এই প্রশ্নের উত্তর দেন। “এমনও তো হতে পারে যে অধিকাংশ মানুষের স্বার্থ বিদেশী পুঁজিপতিদের স্বার্থবিরোধী। তেমন ক্ষেত্রে বিদেশী পুঁজিপতির হাত থেকে পরিত্রাণই কি সর্বপ্রথমে প্রার্থনীয় নয়? এটা কি স্পষ্ট নয় যে ইংরেজরা ইংলণ্ডের বাইরে লড়ছে ভারতীয় জওয়ানদের কাঁধে চড়ে? গতবারের যুদ্ধে তেরো লাখ জওয়ান ওদের কাঁধে চড়িয়ে লড়েছিল। ক্যান্ডুয়ালটি এক লাখের উপর। কী লাভ হলো তাদের জাতভাইদের? তাদের শ্রেণীভাইদের? কী করে আমরা জানব যে এবারকার যুদ্ধের পর ইংরেজ আবার আমাদের ভাঁওতা দেবে না? একনম্বর ভাঁওতাবাজ ওই চাচিল মহাপ্রভু। ওঁর নীতি হচ্ছে কাজের বেলায় কাজী, কাজ ফুরোলে পাজী। ওঁর অনিচ্ছুক মুষ্টি থেকে স্বাধীনতা আদায় করে নিতে হবেই যুদ্ধের পরে। যদি ওঁর দেশ জয়ী হয়। তা হলে যুদ্ধের মাঝখানে কেন নয়? এটাই হলো ভারতের পেট্রিয়টদের

যুক্তি। রাশিয়ার পেট্রিয়টদের যুক্তির সঙ্গে এর অমিল কোথায়? রাশিয়ানরাও এখন পেট্রিয়ট হিসাবেই লড়ছে। ভারতীয়রাও পেট্রিয়ট হিসাবে লড়তে রাজী। যদি ইংরেজরা তাদের কাঁধ থেকে নামে। কংগ্রেস যদি স্বাধীন হয়ে সমান হয়ে লড়তে পারে তবে রাশিয়ার পক্ষেই লড়বে, মিস সেন।”

“দেশ যদি আজ এখনি স্বাধীন হয় আমিই সব চেয়ে স্বাধীন হব, দাদা। কিন্তু এর জগ্গে আমি ইংরেজকে জেরবার করতে পারব না। জেরবার হলে সে কেমন করে সোভিয়েটের শত্রুর সঙ্গে লড়বে? একবছর আগে আমরাও তো যুদ্ধবিরোধী কার্যকলাপে যোগ দিয়েছি ও জেলে গেছি। তখন ইংরেজ আমাদের শত্রু ছিল। এখন সে মিত্র। অবস্থার পরিবর্তনে ব্যবস্থার পরিবর্তন।” বাবলী কৈফিয়ৎ দেয়।

স্বপনদা বিরক্ত হয়ে বলেন, “এরই নাম কালচারাল গ্রুপ! প্রাথমিক অধিবেশনেই রাজনীতি! চকোলেট, তুমি খাবারে মন দাও।”

“উনি নিজেই তো একটি খাবার!” রসিকতা করেন অদিতি রাহা। “অমন রসনারোচন নাম রাখল কে?”

“ওটা আমারই কীর্তি।” জবাব দেন স্বপনদা। “ওরা দুই বান্ধবী আমার সঙ্গে দেখা করতে এসেছিল। বাবলী আর জুলি। আমার চোখে ওরা দুই বিপ্লবী নায়িকা নয়, দুটি নিরীহ নাবালিকা। আমি ওদের একজনকে খেতে দিই চকোলেট, আরেকজনকে ক্যারামেল। সেই থেকে ওদের ডাকনাম দাঁড়িয়ে যায় মিস চকোলেট আর মিস ক্যারামেল। ফী বার অবশ্য চকোলেট আর ক্যারামেল জোগাতে পারিনে। তবে ওরা যখন আসে তখনি কিছু না কিছু খেতে পায়। দুঃখের বিষয় ক্যারামেলকে আর দেখতে পাচ্ছি। সে এখন জেলে বসে লপসী খাচ্ছে।”

“না, দাদা।” বাবলী শুধরে দেয়। “দিব্যি ব্রেকফাস্ট খাচ্ছে। ওখানে ওর যা দাপট ওয়ার্ডররাই মেমসাহেব বলে সেলাম ঠুকছে। ওদের মনে আস জন্মেছে, প্রাণহানির নয়, চাকরিহানির। জুলি ওদের এই বলে শাসিয়েছে যে দেশ তো স্বাধীন হবেই, তখন সে যার যার বিরুদ্ধে রিপোর্ট করবে তার তার চাকরি যাবে। ওর হাতে নোটবই দেখলেই ওরা জাহি জাহি করে। লপসী খাবে কে? জুলি? পরিজ ছাড়া ওর ব্রেকফাস্ট হয় না। কোয়েকার ওটস। আমেরিকায় তৈরি।”

“এই তোমাদের স্বদেশিয়ানা!” স্বপনদার মুখে হাসি। “অবশ্য আমরাও তাই দিয়ে ব্রেকফাস্ট করি। লোকে বলে সেটা সাহেবিয়ানা।”

“এখন তো ইংরেজ তোমাদের মিত্র। তোমরাও দেশের ঘরে ঘরে সাহেবিয়ানা চালাও।” পরামর্শ দেন বোদি।

“শুধু সাহেবিয়ানা কেন? রুশিয়ানা।” জুড়ে দেন অদিতি রাহা।  
“ভাই, তুমি আমাকে একটা সামোভার কিনে দেবে?”

## ॥ তিন ॥

সামোভার যে কী বস্তু আর কোথায় কিনতে পাওয়া যায় এ বিষয়ে বাবলীর বিন্দুমাত্র জ্ঞান ছিল না। মেয়েটি ঠাট্টাও বোঝে না। ভাবনায় পড়ে যায়।

“চায়ের কেটলী হচ্ছে বিদেশিয়ানা। ওকে বর্জন করতেই হবে। কিন্তু সামোভার তো স্বদেশিয়ানা নয়। আচ্ছা, চা জিনিসটাও তো বিদেশী। দেশ স্বাধীন হলে চা কফি সিগারেট থাকবে, না ইংরেজদের সঙ্গে সঙ্গে যাবে? তোমরা কি হুকো ফিরিয়ে আনবে? সিদ্ধি থাকবে?” কৌতুকের সঙ্গে স্তূধান বর্মণ।

“আমাদের এটা একটা আন্তর্জাতিক গ্রুপ। এখানে চা কফি সিগারেটও চলবে, কেটলীর মতো সামোভারও চলতে পারে। হুকো আর সিদ্ধি কিন্তু অচল, কারণ অনাধুনিক। আমরা রিভাইভালিস্ট নই।” স্বপনদা বিধান দেন।

“সামোভার চলুক, আমাব আপত্তি নেই, কিন্তু দোহাই আপনার, মিস সেন, কমিউনিজ্‌মের নামে আপনারা রাশিয়ানিজম ডেকে আনবেন না।” হাত জোড় করেন তালুকদার। “আজকাল কেউ কেউ বলতে ও লিখতে শুরু করেছেন সোভিয়েট রাশিয়া নাকি তাঁদের পিতৃভূমি। বিদেশ যদি কারো কাছে স্বদেশ হয় তবে স্বদেশও তাঁর কাছে বিদেশ। এঁরা কি তবে বিদেশী? অধ্যাপক চ্যাটার্জিকে জিজ্ঞাসা করতে হবে।”

“চ্যাটার্জি?” বর্মণ বলেন, “তাঁর পিতৃভূমি যদি সোভিয়েট রাশিয়া হয়

তবে তো তিনি চ্যাটারস্কি। আর তাঁর কমরেডরা ঘোষ্কি, বোষ্কি, মুখারস্কি, ব্যানারস্কি।”

“এ প্রসঙ্গে স্বপনমোহন তপনোভিচ গুপ্তোভ কী বলেন?” রাহা বানিয়ে বানিয়ে প্রশ্ন করেন। “আর দীপিকা নরেশোভ না গুপ্তোভ?”

হাসির ধুম পড়ে যায়। এ এক মজার খেলা। স্বপনদা প্রতিবাদ করেন। “সে কী কথা। আমরা যে ভারতের প্রাচীনতম রাজবংশ। চন্দ্রগুপ্ত মোর্য আমাদের পূর্বপুরুষ। তবে কালক্রমে আমরা বৈয়্য বৃত্তি অবলম্বন করেছি।” স্বপনদার নিবেদন।

“ধন্বন্তরি গোত্রটাও কি কালক্রমে বর্তেছে?” রহস্য করেন রাহা।

“আর এই যে বাবলী দেখছ এঁদের বংশ আরো প্রাচীন। কংসের পিতা উগ্রসেন এঁদের পূর্বপুরুষ। কালক্রমে এঁরাও বৈয়্যবৃত্তি অবলম্বন করেন।”

স্বপনদার বক্তব্য।

“না দাদা, আমরা বৈয়্য নই, কায়স্থ।” বাবলী সংশোধন করে।

“এখন কথা হচ্ছে,” রাহা বলেন, “কশিয়ানা চলতি হলে চ্যাটার্জি যদি হয় চ্যাটারস্কি, গুপ্ত যদি হয় গুপ্তোভ, সেন হবে কী? সেনিন?”

“তা হলে দাঁড়াবে অপরাজিতা শিবশঙ্করোভ না সেনিনা।” বর্মণের উক্তি।

বাবলী বিরত হয়ে বলে, “আমি বাঙালীই থাকব। কমিউনিজম আর রাশিয়ানিজম এক জিনিস নয়।”

“এই কথাটাই আপনাব মুখ দিয়ে কবুল করিয়ে নিতে চেয়েছি আমরা। কিছু মনে করবেন না, বোন।” তালুকদার বলেন, “এদেশের সুদীর্ঘ ইতিহাসে এ রকম ঘটনা আগেও ঘটেছে। ইসলাম ধর্মে দীক্ষা নিয়ে যারা মুসলমান হলেন তাঁরা সঙ্গে সঙ্গে আরবী নাম নিয়ে হজরত মোহাম্মদের স্বজাতি বনে গেলেন। আরব দেশই হলো তাঁদের স্বদেশ আর ভারত তাঁদের বিদেশ। তাঁরা এখন নিজ বাসভূমে পরবাসী। তাঁদের জন্মে চাই পাকিস্তান। আরবরা তাঁদের স্থান দেবে না। তেমনি কমিউনিজমে দীক্ষা নিয়ে আপনারাও যদি সঙ্গে সঙ্গে রাশিয়ান কালচার গ্রহণ করেন তবে হয়তো একদিন আপনাদের জন্মেও একটা আলাদা হোমলাও দাবী করবেন। মস্কো আর মদিনার মতো আপনাদের পবিত্র তীর্থ তো মস্কো আর লেনিনগ্রাড। মস্কো আর লেনিনগ্রাড বিপন্ন বলে আপনারা তেমনি মর্যাহত হয়েছেন যেমন উতলা হয়েছিলেন মস্কো



আর মদিনা খলিকার শাসনে থাকবে না শুনে ভারতের মুসলমানরা। তাদের সেই যে খেলাফৎ আন্দোলন তাতে সহায়ত্ব দিতে গিয়ে আমরাও জড়িয়ে পড়েছিলুম। পড়াশুনা ছেড়ে জেলে গেচলুম। এবারেও আপনারা বিপদে আমাদের সহায়ত্ব আছে, তবে জেলে যেতে আপনারাও বলছেন না, আমরাও রাজি নই। এক জীবনে দু'বার একই ভুল হয় না। আমরা কেউ বা ক্যাশনালিস্ট, কেউ বা র‍্যাশনালিস্ট, কেউ বা সোশিয়ালিস্ট। কিন্তু কেউই বিদেশকে স্বদেশ আর স্বদেশকে বিদেশ বলে ভ্রম করেন।”

বাবলী বেচারি কোণঠাসা হয়ে বোদির দিকে কাতর দৃষ্টিতে তাকায়। তিনি তার পক্ষ নিয়ে বলেন, “ওটা কিন্তু ঠিক হলো না, সুবিনয়দা। খেলাফৎ আন্দোলনে জড়িয়ে পড়ে আপনারা জেল হয়নি। তার সঙ্গে যুক্ত ছিল স্বরাজ আন্দোলন। মুসলমানরা বিনা শর্তে স্বরাজ আন্দোলনে যোগ দিত না। হিন্দুরা বিনা শর্তে খেলাফৎ আন্দোলনে যোগ দিত না। দুই নোকায় পা রেখে যাত্রা করলে যা হয়। পা ফসকে যে যেদিকে পারে ভেসে যায়। মুসলমানরা ভাসতে ভাসতে এখন পাকিস্তানে কূল খুঁজছে। হিন্দুরা স্বাধীন ভারতের জগ্রে সত্যাগ্রহে নেমেছে। অবশ্য হিন্দুর সঙ্গে মুসলমানও আছে। কমিউনিস্টরাও থাকত, যদি না রাশিয়ার বিপদে ইংরেজরা সাহায্যের হাত বাড়িয়ে দিত। কে যে আজকের দিনে ভুল করছে আর কে যে ঠিক করছে তা বলবার সময় আসেনি। রাশিয়া যদি জার্মানদের রুখতে না পারে তবে ওরা কি টার্কি ও ইরান ভেদ করে ভারতের ঘাড়ে এসে পড়বে না, সুবিনয়দা? মস্কো আর লেনিনগ্রাদের জগ্রে সহায়ত্ব অহেতুক নয়। ওতে আমাদের স্বার্থ আছে। তা বলে আমরা রাশিয়ান বনে যাব না। বাবলীও খাঁটি বাঙালীই আছে ও থাকবে। তবে সামোভার একটা আমিও কিনবই। আমাদের এটা একটা আন্তর্জাতিক গ্রুপ। কেটলী আর সামোভার উভয়ের স্থান আছে।”

“আমার স্ক্রব্য হলো, ইসলাম গ্রহণ করলে আরব্য কালচার গ্রহণ করতে হবে, খ্রীষ্টধর্ম গ্রহণ করলে ইউরোপীয় কালচার গ্রহণ করতে হবে, কমিউনিজম গ্রহণ করলে রুশ কালচার গ্রহণ করতে হবে এটা একটা ভ্রান্তি। মাইকেল মধুসূদন এর থেকে মুক্ত হয়েছিলেন। নইলে ‘মেঘনাদবধ’ হতো না। বাংলার কমিউনিস্টদের একথা মনে রাখতে হবে। রুশ সাহিত্য আমার কাছে ইংরেজীর মতোই প্রিয়। টলস্টয়, ডস্টয়েভস্কি, টুর্গেনিভ, চেকভ, গোর্কি এঁরা আমার

আপনজন। রাশিয়ার প্রতি সহানুভূতি আমার পক্ষে সহজাত। তা বলে রাশিয়াকে আমি পিতৃভূমি বলে ওর জন্তে লড়তে যাব না। যদি না রুশরাও আমার মাতৃভূমির স্বাধীনতার জন্তে লড়ে।” তালুকদার স্বস্পষ্ট করেন।

বাবলী যে অস্বস্তি বোধ করছে এটা আঁচতে পেরে স্বপনদা বলেন, “তুমি রক্তভূতে সর্পভ্রম করছ, স্ববিনয়। আমার এই প্রিয় বোনটিকে আমি চকোলেট বলে ডাকি, তাই বলে বোনটি কি ইংরেজ বনে গেছে? এ কখনো রাশিয়ান বনে যাবে না, তুমি দেখো। তবে রাশিয়ার দুর্দিনে তার প্রতি সহানুভূতি না জানিয়ে পারে না। আমিও সহানুভবী। রাশিয়া তো জার্মানী আক্রমণ করেনি। জার্মানী কেন রাশিয়া আক্রমণ করতে যায়? তবে মহাযুদ্ধের পরিপ্রেক্ষিতে আছে এর তাৎপর্য। মহাযুদ্ধ হচ্ছে একপ্রকার মহামারী। ছড়িয়ে পড়াই তার স্বভাব। মহাযুদ্ধের প্ররোজন রাশিয়াই যে আফগানিস্থান ভেদ করে ভারতে এসে হাজির হবে না তাই বা কে বলতে পারে? রিবেনট্রপের সঙ্গে মলোটভের কোলাকুলি দুটো বছরও টিকল না। চার্চিলের সঙ্গে স্টালিনের কোলাকুলি সেখানে সেখানে কোলাকুলি। চকোলেটকে সাবধান থাকতে বলি। কালকের শত্রু আজকের मित्र। আজকের मित्र কালকের শত্রু। আবার কখন জেলে ধরে নিয়ে যায় কে জানে!”

এর থেকে ওঠে জুলির প্রশঙ্গ। জুলি এখনো জেলে। বিনা বিচারে আটক। ওর জন্তে কী করা যায় সে এক সমস্যা। বিচার দাবী করলে বিচারে দণ্ড হবেই। ক্ষমা ভিক্ষা করলে জুলি নিজেই মারতে আসবে। এক যদি কর্তারা স্বতঃপ্রবৃত্ত হয়ে মুক্তি দেন। কেনই বা দেবেন, যদি মুক্তি পেয়ে ও মেয়ে আবার যুদ্ধবিরোধিতা করে? ও কি মুচলেকা দিতে রাজী আছে আর অমন কর্ম করবে না? ওর হয়ে ওর মাও কি রাজী আছেন? মুশকিল হচ্ছে ওর মা ওর গার্জেন নন। ওর নিজস্ব আয় আছে। শ্বশুরবাড়ী থেকে মালো-হারা আসে। বিধবার জীবনস্বত্ব।

‘চকোলেট আর ক্যারামেল দুই আমার কাছে সমান মিষ্টি। কে কমিউনিস্ট, কে ক্যাপিটালিস্ট সেটা আমার গণনা নয়। আমি তো লঘুচেতা নই। আমার বহুদৈব কুটূষকম্। চকোলেটের জন্তে আমার দুর্ভাবনা গেছে, ক্যারামেলের জন্তে আছে। ও যদি ছাড়া পায় তবে আরো একদিন ওর খাতিরে বোভাত হবে। কী বলো, বো?’ স্বপনদা হৃদান। তিনি সত্যিই চিন্তিত।

“বেশ তো। আমি খুশি হব।” বধূর উত্তর।

“আমি কিন্তু ওর সঙ্গে সম্মুখ সমরে নারাজ।” বাবলী সন্ত্রস্ত স্বরে বলে।  
“দেশদ্রোহী বলে ও আমাকে সকলের সামনে অপমান করবে। আমি যে  
গায়ে পেতে নেব তা নয়। দেশ কি শুধু বুর্জোয়াদের দেশ? শতকরা আশি-  
জন শ্রমিক কৃষকের দেশ নয়? ওদের স্বার্থেই আমি লড়েছি, এখনো লড়ছি।  
আজকের লড়াইটা রাশিয়ান ফ্রন্টে। আমার হয়ে আমার রুশ কমরেডরা  
লড়ছে।”

দুই রণরঙ্গিণীর ধন্দ্ব দেখতে কারো উৎসাহ ছিল না। এটা একটা কাল-  
চারাল গ্রুপ। রাজনীতির আখড়া নয়। স্বপনদা খেদ প্রকাশ করেন।

“কী দুর্ভাগ্য আমাদের।” তালুকদার বলেন, “একদিকে কংগ্রেস লীগ  
বিরোধ। তার মানে হিন্দু মুসলমানের বিরোধ। আরেকদিকে কংগ্রেস  
কমিউনিস্ট বিরোধ। তার মানে শ্রেণীতে শ্রেণীতে বিরোধ। ইংরেজ যদি  
কংগ্রেসকে রাজস্ব সঁপে দিয়ে যায় তবে নতুন সরকারকে একহাতে মুসলমানদের  
দমন করতে হবে, আরেক হাতে কৃষক শ্রমিকদের। যদি না তারা দেশের  
স্বার্থকে সাম্প্রদায়িক স্বার্থের তথা শ্রেণীস্বার্থের উপরে স্থান দেয়।”

“দুর্ভাগ্য। দুর্ভাগ্য। দুটোই দুর্ভাগ্য।” রাহা হাহাকার করেন।

“কংগ্রেস সরকার দু’দিন বাদে পদত্যাগ করবে। কংগ্রেস নেতারা তিন-  
দিন বাদে ডেলে ফিরে যাবেন। দেশ শাসন করবে কে? যে শাসন করতে  
পারবে সে। আমি যতদূর দেখতে পারছি ওই ইংরেজ।” বর্মণ বলেন।

“ওরাও আমাদের ছাড়বে না, আমরাও ওদের ছাড়ব না। অগচ বাগডাও  
করব। এটাও এক প্রকার দাম্পত্য কলহ।” তালুকদার পরিহাস করেন।

“সেই সঙ্গে দুয়ো স্ত্রীর কোন্দল।” বর্মণ হাসি চাপেন।

“চিরন্তন জিভুজ। ইংরেজ থাকতে এ কোন্দল মিটবে না। এ কোন্দল  
না মিটলে ইংবেজ যাবে না। নিয়তি! আমাদের নিয়তি! ভাবতেই পারা যায়  
না যে ইংরেজ নেই, হিন্দু মুসলমান শান্তিতে আছে।” স্বপনদার বন্ধমূল ধারণা।

বাবলী তা শুনে সবাক হয়। “এর একমাত্র প্রতিকার ডিকটেক্টরশিপ অভ  
জ প্রোলিটারিয়াট। তখন কে হিন্দু কে মুসলমান! সবাই এককাটা। এখন  
যেটা দেখছি সেটা একদল বুর্জোয়ার সঙ্গে আরেকদল বুর্জোয়ার বিবাদ।  
দু’পক্ষই জনগণের মাথায় কাঁঠাল ভেঙে খাচ্ছে। জনগণকে কাঁঠালের একটি  
কোয়াণ্ড খেতে দিচ্ছে না।”

চমকে ওঠার মতো ব্যাপার নয়। কমিউনিষ্টরা তো ওকথা হামেশাই বলে থাকে। তবু অপ্রত্যাশিত বলে সকলেই সকলের মুখ চাওয়াচাওয়ি করেন।

“কিন্তু, চকোলেট, তোমার যুক্তির সঙ্গে তোমার কর্মের সামঞ্জস্য কোথায়? চার্চিলের চেয়ে বড়ো কাঁঠালখোর কে? তাঁর মতো আরেক কাঁঠালখোরের সঙ্গে সংগ্রামে প্রোলিটারিয়ানদের ডিকটের নিচ্ছেন তাঁরই দেওয়া অস্ত্রসম্বল। আর তোমরাও সেই একনম্বর কাঁঠালখোরের সঙ্গে হাত মিলিয়েছ। প্রতিকারের জন্তে তোমাদের দিকে তাকাতে কোন্ হিন্দু, কোন্ মুসলমান?” স্বপনদা সংশ্লিষ্ট।

“আর প্রতিকার যাকে বলছ তা ব্যাধির চেয়েও খারাপ।” দীপিকা বোদি বলেন। “বুর্জোয়া নিম্ন ল হলে দেশের কালচার রক্ষা করবে কারা? সেই সম্পদকে বাড়িয়ে তুলবে কারা? রূপদেশে কি সে সম্পদ বেড়েছে। অস্ত্রত রক্ষা পেয়েছে? এই তো সেদিন পর্যন্ত চেকভ পড়তে পাওয়া যেত না। ডক্টরেভস্কি তো এখনো অপ্রাপ্য। বাশিয়ার জনগণের সাংস্কৃতিক উত্তরাধিকার থেকে ডক্টরেভস্কিকে বাদ দিলে জনগণেরই ক্ষতি। বুর্জোয়া বলে তোমরাও কি বক্সিম রবীন্দ্রনাথকে বাদ দেবে না? হিন্দু মুসলিম বিরোধের প্রতিকার কি এই যে ধর্ম জিনিসটাকেই আঁফিং বলে নিষিদ্ধ হবে? এ যেন মাথাব্যথা সারানোর জন্তে মাথাটাকেই কেটে বাদ দেওয়া।”

“না, বোদি! সে রকম অভিসন্ধি আমাদের কারো নেই। আমরা সংস্কৃতিও রাখব, ধর্মও রাখব। কিন্তু বুর্জোয়া আধিপত্য রাখব না। তা হলেই দেখবেন হিন্দু মুসলমান মিলে মিশে বাস করছে, কথায় কথায় মারামারি করছে না। আর সংস্কৃতিরও তখন রূপান্তর ঘটবে। বক্সিম রবীন্দ্রনাথের সমকক্ষ চাষী মজুরের ঘরে ঘরে জন্মাবে। ওরা উঠতে চায়, ওদের উঠতে দেওয়া হচ্ছে না। উপর থেকে জগদল পাথরের চাপ সরে গেলে ওরাও মাথা তুলে দাঁড়াবে। ‘বল বীর, চির উন্নত মম শির।’ কাজী নজরুল ইসলাম তার নমুনা।” আশ্বাস দেয় বাবলী।

ইতিমধ্যে রবীন্দ্রনাথের তিরোধান ঘটেছে। সভ্যতার সঙ্কটে তাঁর শরীর মন ভেঙে পড়েছিল। নাৎসীদের রুশ আক্রমণ জুন মাসে। কবিগুরু মহাপ্রয়াণ আগস্ট মাসে। একটার সঙ্গে আরেকটার সম্বন্ধ ছিল বলে স্বপনদার ধারণা

“রবীন্দ্রনাথ থাকতেও, কাজী নজরুল থাকতেও বাংলার হিন্দু মুসলমানকে

মেলানো গেল না। আজ তো রবীন্দ্রনাথও নেই। নজরুলেরও স্তনেছি মানসিক দুর্বলতা। একদিন দেখতে যেতে হবে।” স্বপনদা বলেন।

“দু’পক্ষের কাগজগুলো পড়ে দেখছ, স্বপন? দাকার পূর্বাবস্থা। যেকোনোদিন বেধে যেতে পারে।” রাহার কণ্ঠে আতঙ্কের সুর।

“তখন আমরা ভালোমানুষ সেজে বলব ইংরেজের চালবাজি। একই নিঃশ্বাসে বলব, মুসলমানদের বজ্জাতি।” বর্মণ বলেন, “আশ্চর্যের ব্যাপার, যারাই সব চেয়ে উগ্র ব্রিটিশবিশ্বেষী তারাই সব চেয়ে উগ্র মুসলমানবিশ্বেষী।”

তালুকদার মন্তব্য করেন, ‘তার চেয়েও আশ্চর্যের ব্যাপার তাঁদের প্রতিপক্ষ পলাশীর পরাজয়ের জগ্গে হিন্দুদেরই দায়ী করেন, আর বিজেতাদের হাত থেকে নবাবী ফিরে পেতে চান। নবাবী বলতে অবশ্য মীর জাকেরের নবাবী, সিরাজের নবাবী নয়। ইংরেজের সঙ্গে লড়াতে হয় লড়াতে হিন্দুরা। মরতে হয় মরবে হিন্দুরা। মুসলমান ওর মধ্যে নেই।”

“বাঙালী যদি দুই ভাগ হয়ে যায় বাংলাও দুই ভাগ হয়ে যেতে পারে।” স্বপনদা হুঁশিয়ারি দেন। “কাগজ যারা লেখে তাদের কি মতিভ্রংশ হয়েছে। এ হলাহল পান করার মতো নীলকণ্ঠ হতে পারতেন রবীন্দ্রনাথ ও নজরুল। তাঁদের বদলে পান করবে কে? আমি তো অক্ষম।”

“ওকে স্বপন,” তালুকদার বলেন, “তুমি তো ইংলণ্ড, ফ্রান্স, জার্মানী তিনটি দেশেই দীর্ঘকাল বাস করেছ। তুমি কি লক্ষ করনি যে ইংলণ্ডে প্রটেস্ট্যান্টদের একাধিপত্য, ফ্রান্সে ক্যাথলিকদের একাধিপত্য, জার্মানীতে এ সমস্তার সমাধান হয়নি বলেই জার্মানী এক নয়, দুই? তার অপরভাগের নাম অস্ট্রিয়া। জার্মান একীকরণের জগ্গে অস্ট্রিয়া থেকে এসেছেন হিটলার, তিনি জোর করে দুই রাষ্ট্রকে এক করেছেন, কিন্তু প্রটেস্ট্যান্ট বা ক্যাথলিক কোনো এক সম্প্রদায়কে একাধিপত্যের সুযোগ দেননি। দুই সম্প্রদায়ই সমান সমান বলে দুইপক্ষের জোড়াগালিও দেননি। তাঁর সমাধান হচ্ছে কেউ ক্যাথলিকও নয় কেউ প্রটেস্ট্যান্টও নয়, এমন কি খ্রীষ্টানও নয়। সকলেই আর্থ আর টিউটন। যাদের প্রাচীন উপকথা অবলম্বন করে ভাগনার তাঁর অপেরা পর্যায় রচনা করেছেন। ধর্মের নামে জার্মানরা কি কম লড়াই করেছে? তাতে কোনো সম্প্রদায়েরই জয় হয়নি। হয়েছে জার্মান জাতির বিভাজন ও বলক্ষয়। অত বড়ো গুণবান জাতি কি আর আছে? আত্মকলহের ফলে ওরাই ইংরেজ ফরাসীর তুলনায় বলহীন। জার্মানদের দিকে তাকাও। তা হলে বাঙালীদের

আত্মকলহের অর্থ খুঁজে পাবে। এর অর্থ হিন্দু মুসলমান ক্যাথলিক প্রটেষ্ট্যান্ট সমান সমান। কেউ কারো একাধিপত্য সহ্য করবে না। ফিফটি ফিফটি মেনে নিলেও প্রথম ওঠে তৃতীয় পক্ষ চলে গেলে গভর্নর হবেন কাদের লোক ? প্রধানমন্ত্রী হবে কাদের লোক ? দ্বিমত হলে সালিশী করবেন কে ? সিদ্ধান্ত নেওয়া হবে কেমন করে ? এক পক্ষ সরকার চালাবেন, অপর পক্ষ অপোজিশনে থাকবেন, এটা কি পালা করে হওয়া সম্ভব ? চাই মিশ্র দল। তাও যথেষ্ট নয়। চাই হিন্দু মুসলিম বিভেদের উদ্দেশ্যে উঠে প্রাচীন বাঙালীত্বের উদ্বোধন। চাই একজন ভাগনার। যিনি পুরাতনকে নতুন রূপ দেবেন।”

“এর পরে তুমি বলবে, চাই একজন হিটলার” উপহাস করেন বর্মণ।

“হিটলার ! হিটলার কি বাংলার হিন্দু মুসলমানকে একাবদ্ধ করে সেইখানেই থাকবেন ! বৃহত্তর বঙ্গের দাবীতে আসাম আক্রমণ করবেন না, বিহার আক্রমণ করবেন না ? আর ভাগনার ? ভাগনার কি লাউসেনকে নিয়ে, ময়নামতীকে নিয়ে গীতিনাট্য রচনা করতে পারবেন ?” বিশ্বাস হয় না রাহার।

“ভয়ে বলি কি নির্ভয়ে বলি ?” বাবলী বোদির দিকে তাকায়।

“কেন, ভয় কিসের ? আমরা কেউ পুলিশে রিপোর্ট করব না।” তিনি আর-সকলের হয়ে অভয় দেন ওকে।

“হিন্দুই হোক আর মুসলমানই হোক, শতকরা আশিজন বাঙালী হচ্ছে চাষী আর মজুর। একজন বাঙালী হিটলার এদের কতটুকু উপকার করতে পারে ? উপকার যা করবার ওই বিশজন বাঙালীরই করবে। কয়েকটা ভেল্কি আর ভোজবাজি দেখিয়ে তাদের মস্তমুগ্ধ করার পর হঠাৎ একদিন জামশেদপুর চড়াও হবে। কারণ তার কয়লার ঘাটতি। তার পরে আরেক-দিন আসাম আক্রমণ করবে। কারণ তার পেট্রল না হলে চলবে না। এসব জায়গায় বাঙালী আছে। সেটাই হবে তার অজুহাত। কিন্তু শতকরা আশিজনকে ছুলিয়ে রাখতে পারবে কদিন ! শত্রুর হাতে যদি পরাজিত না হয় ভো বিন্দুবিদের হাতেই নিপাত যাবে। জেলে বসেই আমি হিটলারের প্রশংসা শুনেছি। বেরিয়ে এসে যা শুনেছি তা কেবল প্রশংসা নয়। তা জয়ধ্বনি। এখন আমি যদি বলি, বাঙালীর যাকে প্রয়োজন তিনি একজন হিটলার নন, তিনি একজন স্টালিন, তা হলে আমি একঘরে হব।” বাবলী ভয়ে ভয়ে বলে।

“আরে, না, না। একবরে কেন? তোমাদের দলটিও কম ভারী নয়। দলের অধিকাংশই বুর্জুয়া। কিন্তু হিটলারের যেমন ভাগনার স্টালিনের তেমন কে? এ তো বড়ো রক্ত, বোন, এ তো বড়ো রক্ত। নাম যদি বলতে পারো যাব তোমার সঙ্গ।” স্বপনদা বোদির দিকে আড়চোখে তাকান। দু’জনেরই গাল লাল হয়ে ওঠে।

“আমার অত বিচ্ছেদ নেই, স্বপনদা।” বাবলী কবুল করে। “স্টালিনের সঙ্গীত শ্রীতির কথা কোথাও পড়িনি। জারের আমলের সঙ্গীতের উপরে বিপ্লবীদের স্বাভাবিক বিরাগ। ব্যালের খাতিরে যেটুকু সহ করতে হয় সেটুকুই করে। ব্যালে ওদের সবার প্রিয়। তোমার প্রশ্নের জবাব বোধহয় চাইকোভেস্কির ‘সোয়ান লেক।’ না, বোদি?”

“কী জানি, বাপু। তোমরা ভাইবোনে কে কার সঙ্গে যাবে আমি কী করে জানব? আমি আর আমার এল্ফ। এই জেনেছি সার।” এল্ফ তাঁর পায়ের কাছে।

“চকোলেট, তুমি বলতে পারলে না। হিটলারের যেমন ভাগনার স্টালিনের তেমন কেউ থাকলে তো? ওটা একটা কালচারাল গ্যাপ। বিপ্লবও ওটা পূরণ করেনি।” স্বপনদা বোদির মুখরক্ষা করেন।

“কালচারাল গ্যাপ!” বাবলী গ্রাহ না করে বলে “সেটা এমন কী জরুরি? বিপ্লব যে তার জন্মে আটকায় না এটা তো রাশিয়ার বেলা প্রত্যক্ষ। ভাগনারের মতো কেউ ছিলেন না, কিন্তু পুশকিন ছিলেন, টুর্গেনিভ ছিলেন গোকি ছিলেন। সেইজন্মেই তো আমরা তোমার কাছে এসেছিলুম। তুমি গ্যাপ পূরণ করতে স্বপনদা।”

“আমি!” স্বপনদা নিঃস্পৃহভাবে বলেন, “জন্ম রোমাণ্টিক। আমার কাছে তোমরা আশা করো বিপ্লবের রোমাণ্টিক চিত্র। ফরাসী বিপ্লবের গোড়ার দিকে রোমাণ্টিসিজম যদি বা কিছু ছিল রুশবিপ্লবের আগাগোড়া রোমাণ্টিকতাবর্জিত। বিপ্লববাদীদের মধ্যে রোমাণ্টিক খারা ছিলেন তাঁরা হয় আত্মহত্যা করেছেন, নয় কোতল হয়েছেন, নয় মৌন ব্রত নিয়েছেন, নয় পালিয়ে বেঁচেছেন। মাহুশের জীবনে কেবল রিয়ালিজম থাকবে, তাও শুধু সোশিয়াল রিয়ালিজম, এ যেন একপ্রকার ইসলামী ফতোয়া। যার ফলে আরবী সাহিত্য হয়েছে আরব মরুভূমির মতো আরেক মরুভূমি। এখানে ওখানে দুটো একটা ওয়েসিস যে নেই তা নয়, কিন্তু মরক্কো থেকে বাগদাদ

পৰ্ধন্ত বিরাট ভূখণ্ড রসের অভাবে খাঁ খাঁ করছে। অথচ ইসলামের মতো বৈশ্ববিক ধর্ম আর কোথায় !”

বাবলী একেবারে চূর্ণ। তালুকদার বলেন, “অর্ধেক বাঙালী বৈশ্ববিক ধর্ম ইসলাম মেনে নিয়েছে। বাকী অর্ধেকও বৈশ্ববিক মতবাদ কমিউনিজম বরণ করবে, ইংরেজ যদি দেশছাড়া হয়। আর কংগ্রেস যদি গদী না পায়। সুজলা সুফলা শস্যশ্যামলা বঙ্গভূমিও হবে আরেক মরুভূমি। আমাদের হাতে খুব বেশী সময়ও নেই, স্বপনমোহন। এই যুদ্ধে রাশিয়া যদি জেতে কমিউনিজমও দিকে দিকে ছড়াবে। অর্ধেক বাঙালী কমিউনিস্ট বনে গেলে আশ্চর্য হবার কী আছে। আগে যেমন মুসলমান বনে গেল। এটা তো একদা বৌদ্ধদের দেশ ছিল। বৌদ্ধরা আজ ক’জন !”

“তোমার ওটা বাড়াবাড়ি !” রাহা প্রতিবাদ করেন। “অর্ধেক মুসলমান হতে সাতশো বছর লেগেছে। অর্ধেক কমিউনিস্ট হতে তার চেয়ে কম সময় লাগবে না। যদি না বলপ্রয়োগ হয়। বলপ্রয়োগ হলে সেটা একতরফা থাকবে না, জেনে রেখো। আমরা গৃহযুদ্ধ এড়াতেই চাই। কিন্তু এঁরা যদি গৃহযুদ্ধ চাপিয়ে দেন তবে আমরাও বিনা যুদ্ধে হুচ্যাগ্র মেদিনী ছাড়ব না। তার মানে আমাদের প্রাইভেট প্রপার্টি।”

“আপনি নিশ্চিত থাকুন, দাদা, ব্যাপার ততদূর গড়াবে না। মালিকরা পা দিয়ে ভোট দেবেন। গ্রামকে গ্রাম খালি হয়ে যাবে।” বাবলীর মুখে হাসি।

“কিন্তু শহর ! শহর তো আমাদেরই শক্ত ঘাঁটি।” রাহা তর্ক করেন।

“সেকথা ঠিক। শহরের বেলা অগ্নি স্ট্রাটেজি।” বাবলী সেটা ফাঁস করে না।

“ওই শহরগুলোই হবে এদেশের ওয়েসিস। যদি টিকে থাকে।” স্বপনদা বলেন।

“কিন্তু কথা হচ্ছিল কালচারাল গ্যাপ সম্বন্ধে।” তালুকদার খেই ধরিয়ে দেন। “বিপ্লব মানেই তো একটা ক্লীন ব্রেক। একটা পরিষ্কার ছেদ। অতীতের সঙ্গে বর্তমানের। পূর্বতনের সঙ্গে অধুনাতনের। জীবনের অন্তান্ত বিভাগে যদি ছেদ পড়ে তো সংস্কৃতিই কি হবে একমাত্র ব্যতিক্রম ? কালচারাল গ্যাপ অনিবার্য। নয়তো ওটা বিপ্লবই নয়। রেভোলিউশন নয়, রিফর্ম। স্বপন, তুমি একজন রিফর্মিস্টের মতো কথা বলছ। মিস্ সেন তোমার ফাঁদে পা দেবেন কেন ? তিনি যে একজন রেভোলিউশনিস্ট।”



স্বপনদা হেসে বলেন, “আমি হচ্ছি কচ্ছপ আর আমার এই বোনটি হচ্ছে খয়গোস। ওর ধারণা ও আমার আগে লক্ষ্যস্থলে পৌছবে। ও তো জানে না যে পরিবর্তনেরও একটা অন্তর্নিহিত নিয়ম আছে। যে দেশ বা জাতি যত পুরাতন সে দেশ বা জাতি তত ধীরে ধীরে বদলায়। রাশিয়া কি পাঁচ হাজার বছরের পুরানো দেশ? রাশিয়ানরা কি পাঁচহাজার বছরের পুরানো জাতি? ওরা তো এগিয়ে যাবেই। কিন্তু আমরাও যে চিরকাল পেছনে পড়ে থাকব তা নয়। আমরাও ওদের ধরে ফেলব ও ছাড়িয়ে যাব। কী, বোন? তোমার বিশ্বাস হয় না? দেখবে কার কথা ফলে।”

“তোমরা বুর্জোয়ারা কচ্ছপের মতোই মন্থর। কিন্তু ওই রেটে এগোলে তোমরা কোনো কালেই লক্ষ্যস্থলে পৌছবে না, স্বপনদা। এ যুগটা তোমাদের যুগ নয়। তোমাদের যুগ ছিল মার্কসপূর্ব দুই তিন শতাব্দী। এখন এটা মার্কসোত্তর শতাব্দী। ইতিহাস তোমাদের মহাপ্রস্থানের দিন ধার্য করে দিয়েছে। ব্রিটিশ সাম্রাজ্যের স্বর্ষ্য যেদিন অস্ত যাবে সেদিন তোমাদের উপরেও অন্ধকার নেমে আসবে। অ্যারিস্টোক্রাসী, ব্যারিস্টোক্রাসী প্লুটোক্রাসী সব একধার থেকে ফৌত হবে।” বাবলীর মুখে চোখে হাসি।

‘খাথ, চকোলেট।’ স্বপনদা ওকে বোঝাবার চেষ্টা করেন, “আমরা এদেশের বুর্জোয়ারা এদেশে গ্যাশানালিজম আর ডেমোক্রাসী এই দুই মহাতত্ত্বের প্রবক্তা। আমরা না থাকলে এদেশে এসব তত্ত্ব কোনোদিন গজিয়ে উঠত না। আরো একটি মহাতত্ত্ব সোশিয়াল জাস্টিস। এতেও আমাদের অনীহা নেই। কিন্তু বুঝতেই তো পারছ আমাদের কিছু কিছু প্রপার্টি আছে। তার মায়া কাটানো মুখের কথা নয়। আমরা যদি তোমাদের মতো সর্বহারা হতে না চাই তবে সেটা আমাদের অপরাধ নয়। প্রাইভেট প্রপার্টি মাত্রেই শোষণলব্ধ নয়। আমার বাবা প্রাণপণ পরিশ্রমে যা অর্জন করে গেছেন তা পারিশ্রমিকের পর্যায়ে পড়ে। আর আমিও কি কম পরিশ্রম করি?”

বাবলী একটু ভেবে নিয়ে বলে, “তোমাদের পক্ষেও যথেষ্ট যুক্তি আছে, স্বপনদা। তোমাদের আমরা সম্পূর্ণ নিঃস্ব করব না। কেমন ব্যবহার তোমরা পাবে সেটা নির্ভর করবে কেমন ব্যবহার তোমরা করবে তারই উপরে। তোমরা যদি শত্রুতা করো তবে আমরাও শত্রুতা করব। তোমরা যদি মিত্রতা করো তবে আমরাও মিত্রতা করব। প্রাইভেট প্রপার্টির বৈধতা স্বীকার না করলেও আমরা আমাদের মিত্রদের প্রাইভেট প্রপার্টি বেদখল করব না, বাজেয়াপ্ত করব

না। তবে তাঁদের উত্তরাধিকারীদের জন্মগত অধিকার অবাধ হবে না। জন্মস্বত্ব বলে কারো কিছু থাকবে না। যেটা থাকবে সেটা কর্মগত অধিকার সবাইকে কাজ দেওয়া হবে। সবাইকে খোরপোস দেওয়া হবে। উন্নতির সোপানও খোলা থাকবে। যারা কাজের লোক হবে তারা উচ্চতর সোপানে উঠবে।”

“আমি তো শুনেছিলুম যোগ্যতা অনুসারে নয়, প্রয়োজন অনুসারেই যে যা পাবে। যে দশ টাকা মজুরির যোগ্য নয় সে বিশ টাকার ভোগ্য উপকরণ দাবী করতে পারবে। যেহেতু তার কাচ্চাবাচ্চা বেশী।” তালুকদার হাসেন।

“কাচ্চাবাচ্চার ভার রাষ্ট্র নেবে। রাষ্ট্র যদি বলে তাদের সংখ্যা কমাও তবে সে নির্দেশ মান্য করতে হবে। প্রয়োজন যদি অপদার্থতার পোষক হয় তবে সেটা গ্রাহ্য হতে পারে না।” বাবলী ব্যাখ্যা করে।

তালুকদার গম্ভীরভাবে বলেন, “দেখুন, মিস সেন, আপনাদের সব চেয়ে প্রবল বাধা আসবে বুজোয়াদের দিক থেকে নয়। কৃষকদের দিক থেকেই। প্রাইভেট প্রপার্টি ওরা কিছুতেই হাতছাড়া করবে না। আর কাচ্চাবাচ্চা তো ওদের অগুণ্টি। কাচ্চাবাচ্চার ভার ওবা রাষ্ট্রের জিম্মায় সঁপে দেবে না। গৃহযুদ্ধ বেধে যাবে এই দুটি ইস্যুতেই। সম্পত্তি আর সন্তান।”

বাবলী না থাকলে আলাপ আলোচনা সংস্কৃতিকে ঘিরেই চলত। তা নয়, বার বার কক্ষচ্যুত হচ্ছে। দীপিকা অর্ধৈর্ষ হয়ে উঠেছেন লক্ষ করে স্বপনদা মোড় ঘুরিয়ে দেন।

“নতুন রেকর্ড আর আসছে না কিছুদিন থেকে।” স্বপনদা বলেন, “তাই পুরানো রেকর্ড বাজিয়ে সঙ্গীতের তৃষ্ণা মেটাতে হচ্ছে। চকোলেট কী মনে করবে, জানিনে। আমার তো ইচ্ছে করছে ভাগনারের ‘মাইস্টারসিঙ্গার’ বাজিয়ে শুনতে ও শোনাতে। সেকালে আমাদের দেশের মতো জার্মানীতেও কবির দল ছিল। সেইরকম একটি দলের মূল গায়ের এক মুচি। নাম হান্স সাক্স। ভাগনার তাই নিয়ে একটি অপেরা লেখেন, অপেরাটি এখনো জনপ্রিয়। মিউনিকে মানস আর আমি দেখে মুগ্ধ হয়েছি।”

মানসের উল্লেখ শুনে বাবলী জানতে চায়, “মানসদা এখন কোথায়? আর তাঁর বন্ধু সৌম্যদা?”

“মানস চাকরি ছাড়বে কি ছাড়বে না তাই নিয়ে ছাহ্মলেটের মতো

দোনোমনো করছিল। কিছুদিন শান্তিনিকেতনে থেকে সব দিক বিবেচনা করে বুঝতে পারে যে চাকরির বিকল্প বেকারি। অগত্যা চাকরিতেই ফিরে গেছে। কলকাতার পশ্চিমের এক জেলায়। কিন্তু যেখানেই যাক ওর সেই একই ভাবনা। সেবার ছিল পোলাওকে নিয়ে, তারপর ফ্রাঙ্ককে নিয়ে, তারপর ব্রিটেনকে নিয়ে, অবশেষে রাশিয়াকে নিয়ে। ও কি নীরব সাক্ষী হবে, না যুদ্ধে ঝাঁপিয়ে পড়বে? অবশু হিটলারের বিপক্ষে। কিন্তু ওকে ঝাঁপিয়ে, পড়তে দিচ্ছে কে? বড়লাট তো সিভিল অফিসারদের সবাইকে জানিয়ে দিয়েছেন যে কাউকেই যুদ্ধে যেতে দেওয়া হবে না। ইংরেজদেরও না। মানস ন যথো ন তস্থো। আর তার বন্ধু সৌম্য? সেও তো ছটকট করছিল ব্যক্তি সত্যগ্রহে যোগ দিতে। কিন্তু গান্ধীজী ওকে মনোনয়ন দেননি। অযোগ্য বলে নয়, অল্প কারণে। গঠনকর্মে যারা নিযুক্ত তারা যেন সিভিল অফিসার। তাদের থাকতে হবে স্বস্থানে। সত্যগ্রহ তো একপ্রকার যুদ্ধ। নৈতিক যুদ্ধ। তাতে যারা অংশ নেবে তাদের যেতে হবে যুদ্ধক্ষেত্রে। অর্থাৎ কারাগারে। সৌম্য যদি জেলে যায় তবে গঠনকর্ম পরিচালনা করবে কে? সেটাও কি কম আবশ্যক? মাঝে মাঝে কলকাতা এলে দেখা করে যায়। কিন্তু ওর আশ্রম ওই পদ্মাপারে। ওর দাড়ি এখন আরো বর্ধিষ্ণু হয়েছে।” স্বপনদা মুচকি হাসেন।

“মুসলমান বলে ভুল হয়।” বাবলী মুখ টিপে হাসে।

“হ্যাঁ, হিন্দু মুসলিম একতার ওটাও পূর্বশর্ত।” স্বপনদা পরিহাস করেন।

“যতই যাই করো ভবী ভুলবে না।” তালুকদার মন্তব্য করেন। মুসলমান ভুলবে না যে সে একদিন এদেশের বাদশা ছিল। আবার হবে, যদি চাকা ঘুরে যায়। তখন কোথায় তোমার স্বরাজ আর কোথায় তোমার বিপ্লব।’

স্বপনদা উঠে গিয়ে গ্রামোফোনে ভাগনারের রেকর্ড চাপিয়ে দেন। আর সবাইকে বলেন, “এখন মন দিয়ে শোন।”

এল্ফ তা শুনে ঝেঁউ ঝেঁউ করে আপত্তি জানায়। দীপিকা তাকে কোলে করে নিয়ে শোবার ঘরে চলে যান ও দরজা বন্ধ করে ফিরে আসেন। সেও আশ্বে আশ্বে চুপ করে।

কিন্তু বাবলীকে ধরে রাখা যায় না। হিটলারের প্রিয় ভাগনার। অতএব বাবলীর অপ্রিয়। স্বপনদা যতই বোঝান ও মেয়ে অবুঝ। তখন বলেন, “আরেকদিন এসো, শালিয়াপিনের ভল্গা বোটম্যান শোনাব।”

## ॥ চার ॥

মনীষীদের কারো কারো মতে রুশবিপ্লব হবে ফুরিয়ে গেছে, এখন যেটা চলছে সেটা বিপ্লবের পরবর্তী নেপোলিয়নীর পর্যায়। নেপোলিয়ন পরাস্ত হলে বুরবঁরা ফিরে আসবেন। তার মানে আবার রোমানোভ বংশের আমল। কেউ বিশ্বাস করেন না যে রোমানোভরা গণতন্ত্র প্রবর্তন করে প্রজাদের হাতেই শাসনক্ষমতা ছেড়ে দেবেন।

“এই মনীষীরা ধরে নিয়েছেন যে স্টালিনই একালের নেপোলিয়ন। এটা কিন্তু ঠিক নয়।” মানস বলে তার জেলার সিভিল সার্জন ডাক্তার ঘটককে।

“আমার মেয়ে বারনাও তো তাই মনে করে।” ডাক্তার ঘটক বলেন।

“আচ্ছা, তা হলে বাৎনাকে মনে করিয়ে দেবেন যে নেপোলিয়নের রাশিয়া আক্রমণের তারিখ ছিল ২৩শে জুন। আর হিটলারের রাশিয়া আক্রমণের দিন ২২শে জুন। প্রায় কাঁটার কাঁটায় মিশে যাচ্ছে। নেপোলিয়নের দুই দিকে ছিল দুই মহাকণ্টক। তাদের নিয়ূল না করে তিনি নিষ্কণ্টক হতে পারছিলেন না। কিন্তু ব্রিটেনকে আক্রমণ করতে গিয়ে দেখেন নৌবল নেই। যতদিন না নৌবল গড়ে ওঠে ততদিন অপেক্ষা করতে হবে। ইতিমধ্যে স্থলসৈন্য দিয়ে রাশিয়াকে হারিয়ে দেওয়া যেতে পারে। রাশিয়ার পরে ব্রিটেন। গত শতাব্দীতে নেপোলিয়নের সেই যে সিদ্ধান্ত এই শতাব্দীতে হিটলারের সিদ্ধান্তও তাই। হিটলার যদি নেপোলিয়নের মতো নিষ্কণ্টক হতে চান তবে তাঁকেও প্রথমে রাশিয়াকে ও পরে ব্রিটেনকে হারিয়ে দিতে হবে। ব্রিটেন সেটা বোঝে। সেইজন্মে রাশিয়াকে মদত দিয়ে জোরদার করেছে। রাশিয়া যে কমিউনিস্ট আর ব্রিটেন যে ক্যাপিটালিস্ট এ গণনা আপাতত শিকেষ তোলা রয়েছে। ইউরোপের কন্টিনেন্ট ধার একচ্ছত্র শাসনাধীন তিনিই নেপোলিয়ন। যেমন সেকালে তেমনি একালে। তিনি কে? তিনি হিটলার? ভবিষ্যতে যদি ইউরোপের কন্টিনেন্ট স্টালিনের একচ্ছত্র শাসনাধীন হয় তবে স্টালিনই হবেন নেপোলিয়ন। কিন্তু তখন ব্রিটেন হবে তার প্রধান অন্তরায়। আমেরিকাও ব্রিটেনের পেছনে দাঁড়াবে। তখন ক্যাপিটালিস্ট বনাম কমিউনিস্ট যতবানের সংঘাত। সন্ধিও হতে পারে।” মানস অতুমান করে।

এর পর ডাক্তার সাহেব চলে যান তাঁর পারিবারিক প্রসঙ্গে। “ঝরনাকে নিয়ে আমরা কী মুশকিলেই না পড়েছি, মিস্টার মল্লিক! ওর বিয়ের বয়স পেরিয়ে যেতে বসেছে। কিন্তু ম্যাচ করে যদি বিয়ে দিতে যাই তবে ওর বর হবে হাজার টাকা মাইনের চাকুরে। তার কম হলে ও বিয়ে করবে না। যদি করে প্রেমে পড়ে বিয়ে করবে। কিবা হাড়ি কিবা ডোম।”

মানস হেসে বলে, “ঝরনার মতো গুণবতী কন্নার প্রার্থীর অভাব হবে না। আর তাঁর বয়স এমন কী হয়েছে ষাঁহা মুশকিল তাঁহা আসান।”

“না, না, মিস্টার মল্লিক, ব্যাপার অত সহজ নয়। আমরা ওকে পোস্ট-গ্রাজুয়েট ক্লাসে ভর্তি হতে দিইনি। আমরা কো-এডুকেশনকে ভয় করি। কিসে থেকে কী হয় কে বলতে পারে! প্রেমের নামে কত মেয়ের সর্বনাশ হচ্ছে। আমরা চিরকাল ঘটকালি করেই বিয়ে দিয়ে এসেছি। সেটাই ছিল আমাদের পেশা। মেয়ে এখন বায়না ধরেছে যুদ্ধে যাবে। উইমেন অক্জি-লারি কোরে যোগ দিয়ে ওয়াকি হবে।” ডাক্তারের চোখে মুখে হাস।

“ভালোই তো। মন্দ কী?” মানস উৎসাহের সঙ্গে বলে, “যুদ্ধক্ষেত্রে উপস্থিত থাকা কত বড়ো একটা সৌভাগ্য! একভাবে না একভাবে অংশ নেওয়া কত বড়ো একটা স্বযোগ! আপনি ডাক্তার, আপনারই তো কর্তব্য অ্যাকটিভ সার্ভিসে নাম লেখানো। ফিরে এলে হতেন ক্যাপটেন গটক। ঝরনা যদি যান ওঁকেও হয়তো ক্যাপটেন র‍্যাঙ্ক দেওয়া হবে। বিয়েও হয়ে যেতে পারে কোনো এক অফিসারের সঙ্গে।”

প্রবলভাবে মাথা নেড়ে ডাক্তার সাহেব বলেন, “গতবারের যুদ্ধটা শেষ হয়ে না গেলে আমাদেরও ফ্রন্টে যেতে হতো, মল্লিক সাহেব। ফ্রন্টে যাইনি, ক্যান্টনমেন্টে কাজ করেছি। তার আশে পাশে থাকে লালবাজার। লাল-বাজারে কী বিক্রী হয়, জানেন? নারীদেহ। যুদ্ধে যারা প্রাণ দিতে যায় তাদের সঙ্গদানের জন্তে নারীরও প্রয়োজন হয়। কোন্ ভদ্রঘরের মেয়ে যেতে রাজী হবে? যায় ওই লালবাজারের পণ্যরাই। প্রচুর অর্থ পায়। মিলিটারি বাজেটে ওটাকে দেখানো হয় এনটারটেনমেন্ট কন্স হিসাবে। এবারকার যুদ্ধের নতুনত্ব হচ্ছে অফিসারদের বিনোদনের জন্তে সমান ঘরের ওয়াকি প্রবর্তন। ক্লাবে গিয়ে ভাস খেলা, টেনিস খেলা, গ্রামোফোন বাজানো, হাত ধরাধরি করে নাচা, একসঙ্গে বসে ডিনার খাওয়া। এইসব আর কী! তফাতের মধ্যে ক্লাবের বদলে মেস। কলকাতায় বেশ লাড়া পাওয়া গেছে।

ধনীকন্ডারীও অগ্রণী হয়েছেন। গভর্নমেন্ট সমস্ত দায়িত্ব নিচ্ছেন। কিন্তু আশুন আর ঘি একসঙ্গে রাখলে যা হবার তা হবেই। নজর রাখবে কে ? বিয়ে যাদের হবে তারা কলঙ্ক এড়াবে, কিন্তু তাদেরও তো বৈধবোর ভয় থাকবে।”

ভাবনার কথা বইকি। মানস শুধু বলে, “হঁ।”

“ঝরনার মা এখন শয্যা নিয়েছেন। মিসেস মল্লিক যদি একবার দেখতে যান তো বড়ো উপকার হয়। সব চেয়ে ভালো হতো যদি মেয়েকে রাতারাতি পাত্রস্থ করতে পারতুম। চেষ্টা যে করছি নে তা নয়। কিন্তু ওই হাজার টাকা মাইনের লক্ষ্য ভেদ করবে কে ? আমার নিজেরই মাইনে তার চেয়ে অনেক কম। এতদিন চাকরি করেও আই. এম এস. হতে পারলুম না। আই. এম. এসের বদলে আই. এম. ডি। যেন আমার বদলে আমড়া।” ডাক্তার সাহেব কাষ্ঠহাসি হাসেন।

“আই. এম. এস. হতে চান তো এখনি তার মওকা। যুদ্ধে ধারা যাচ্ছেন তাঁরা আই. এম. এস. হয়ে ফিরবেন।” মানস আশা দেয়।

“ক্ষেপেছেন। কোথায় পাঠাবে তার ঠিক ঠিকানা নেই। হয়তো লিবিয়ায় কি সাইরেনাইকায়। এবাব টার্কদের খপ্পরে নয়, জার্মানদের খপ্পরে। বাপ রে বাপ, রমেল ! রমেলের সঙ্গে লড়াতে পারে তেমন ইংরেজ কে আছে ! ইজিপ্ট গেল বলে ধরে নিন। ইংরেজ জেতে কি না সন্দেহ।” ডাক্তার ঘটক কানে কানে বলেন।

“দেখুন, ডাক্তার সাহেব, ইংরেজদের সী পাওয়ার আছে। সী পাওয়ার থাকতে কেউ তাদের পরাস্ত করতে পারবে না। ওরা সাময়িকভাবে হটে আসবে। যেমন ডানকার্কে। কিন্তু অপসরণ তো পরাজয় বরণ নয়। আপনি হয়তো কিছুদিনের জন্যে বন্দী হবেন। কিন্তু পরে সেটাই হবে আপনার প্রমোশনের সোপান। এখনো সময় আছে।” মানস উৎসাহ দেয়।

“তাতে আমার পারিবারিক সমস্যার কোনো স্বরাহা হবে না, মল্লিক সাহেব। ঝরনা জেদ ধরেছে ওয়াকী হবেই। তাতে আর কিছু না হোক অফিসার র‍্যাঙ্ক ও র‍্যাঙ্কের উপযোগী মাইনেও তো হবে। আমার নিজের মাইনের চেয়ে কম নয়। একটা মফঃস্বল শহরে ভেরেণ্ডা ভাজার চেয়ে মিলিটারি ক্যাম্পে দহরম মহরম করাও ভালো। চরিত্র যে সকলের নষ্ট হয় তা নয়। ও নিজের ইজ্জৎ নিজে রখেতে জানে। বরাবরই সাহসী মেয়ে।

ঘোড়ায় চড়ত কম বয়সে। আমাদের তো পুত্রসন্তান নেই! দুই মেয়ের পর ওই আমাদের ছেলে। কিন্তু তা বলে তো ওকে ছেলেদের সঙ্গে কলেজে পড়তে দিতে পারিনে। ওর মা ওকে চোখে চোখে রেখেছেন।’ ডাক্তার সাহেব বলেন।

“তা যদি বলেন, আজকাল ছেলেদের কলেজে মেয়েদের যাওয়া তো নতুন কিছু নয়। আমাদের প্রতিবেশী রিটার্ডেড জজ রায় বাহাদুর সুবোধকুমার ভদ্র তো তাঁর মেয়ে শীলাকে ছেলেদের কলেজে পাঠাচ্ছেন।” মানস দৃষ্টান্ত দেখায়।

“আপনি বোধহয় জানেন না যে শীলার বিয়ে ঠিক হয়েই রয়েছে। ছেলেটি পুলিশ ট্রেনিং কলেজ থেকে ফিরলেই শুভকর্ম সারা হবে। স্টাটিং পে আড়াইশো। বরনা হলে পত্রপাঠ খারিজ করত।” ডাক্তার সাহেব একটু পরে জুড়ে দেন, “যদি না প্রেমে পড়ে বিয়ে সম্ভব হতো।”

‘বরনার চোখে প্রেমের মূল্য বিত্তের চেয়ে চারগুণ বেশী। এখন এদেশের যুবকদের চোখে বরনার প্রেমের মূল্য কয়গুণ বেশী কী করে বোঝা যাবে? আপনাদের উচিত ওকে যুবকদের সঙ্গে মিশতে দেওয়া। এই মফঃসল শহরে সেটার সুযোগ কোথায়? দিন না ওকে বাইরে যেতে।’ মানস আবেদন করে।

“তা হলে ওর মা মনের দুঃখে মারা যাবে। আর বাবা চাকরি ছেড়ে বৈরাগী হয়ে যাবে। এই যুদ্ধ বাঙালীর সমাজে অধঃপতন ডেকে আনছে। শুনছি ওয়াকির জন্তে ভদ্রবরের কন্যাদের আগ্রহ ভেকেন্সরী চাইতেও বেশী। যাদের ধনসম্পদের অভাব নেই তাদেরও। যুদ্ধক্ষেত্র যেন একটা রোমান্সের কেলিকানন। সোসাইটি গালদের প্রত্যেকের ধারণা একজন কর্নেল বা মেজরের সঙ্গে তার বিয়ে হবে। অবশ্য প্রাণে বেঁচে ঘরে ফিরে এলে। এদের চেয়ে কত ভালো সেইসব যুদ্ধবিরোধী মেয়েরা যাদের স্নোগান হলো ‘না একো রুপেয়া, না একো ফুগ্যান।’ কেন যে ওদের ধরে ধরে জেলে দেওয়া! জেলখানায় গিয়ে অমন কত মেয়ে দেখলুম।” ডাক্তার সাহেব আক্ষেপ করেন।

“কিন্তু ওদের মধ্যেও তো নাৎসীদের রুশ আক্রমণের পর দু’মত দেখা যাচ্ছে। কলকাতা থেকে আমার বন্ধু স্বপনদা লিখেছেন বাবলী সেন জেল থেকে ছাড়া পেয়ে এখন যুদ্ধের পক্ষে ঘুরে দাঁড়িয়েছে।” মানস জানায়।

“কিন্তু বাবলী সেন বরনা ঘটকের মতো এত বোকা মেয়ে নয় যে ওয়াকি

হয়ে যুদ্ধক্ষেত্রে যাবে। অবশ্য সরকারও ওকে বিশ্বাস করে যুদ্ধে যেতে দেবে না। দেশীয় জওয়ানদেরকে ও হয়তো ইংরেজের বিরুদ্ধেই হাতিয়ার বাগাতে ভজাবে। আর-একজন জোন অফ আর্ক।” ঘটকের উপহাস।

“কিন্তু ও যে রাশিয়ার বন্ধু কমিউনিস্ট।” মানস বিস্মিত হয়।

“আমরা তো জানি ও বর্ণচোরা গ্যাশনালিস্ট।” ঘটক মুচকি হাসেন।  
“পুলিশের লোক ওকে চোখে চোখে রেখেছে।”

“সব কমিউনিস্ট কি তাই?” মানস স্থায়।

“আরে, না, না। সবাই কেন হবে? ওই যারা আগে টেররিস্ট ছিল ওরা ওদের দীক্ষা ভুলে যায়নি। দীক্ষা কি কেউ ভোলে? টেররিজম ছেড়েছে, কিন্তু গ্যাশনালিজম ছাড়েনি। তবে এটাও ঠিক যে ওরা এখন রাশিয়ার জয় চায়। সুতরাং ইংরেজের পরাজয় নয়।” ডাক্তার খোলসা করেন।

মানস এর পরে জিজ্ঞাসা করে, “আচ্ছা, ডাক্তার সাহেব, আপনান তো নানান জেলায় জেলখানার ভিতরে গেছেন। সেটা আপনার ডিউটির সামিল। বাবলীর বন্ধু মঞ্জুলিকা সোম বলে একটি মেয়েকে কি দেখেছেন?”

“শুধু জেলখানায় কেন, বৈঠকখানায়ও দেখেছি। ওর বাবা ক্যাপটেন সিন্ধা ছিলেন আমার সীনিয়র। আহা, অমন ভালো মানুষ আমি দেখিনি। কিন্তু মানুষ ভালো হলেই ডাক্তার ভালো হওয়া যায় না। আবার ডাক্তার ভালো হলে মানুষ ভালো হওয়াও নিশ্চিত নয়। যাক, জুলির কথা হচ্ছে।” ঘটক স্মরণ করে বলেন, “ও হলো বিলেতফের্তা পরিবারের বিলেতফের্তা মেয়ে। ইংরেজদের সঙ্গে ওর সম্পর্কটা একই কালে প্রেম-স্বণার সম্পর্ক। লাভ-হেট রিলেশনশিপ। সাহেব মেমদের ও যত বেশী ভালোবাসে তত বেশী ঘৃণা করে। সাইকোলজিকাল কেস।”

“এরকম কেস আপনি আর ক’টা দেখেছেন?” জানতে কৌতুহল হয় মানুষের।

“শত শত। তার জন্মে বিলেত যেতে হয় না। ইংরেজী লেখাপড়া যারাই শিখেছে তারাই ইংরেজকে ভালোবেসেছে। কিন্তু বর্ণবৈষম্য যেই দেখেছে অমনি ইংরেজকে ঘৃণা করেছে। প্রত্যেকটি সার্ভিসেই বর্ণবৈষম্য। আপনিও ভুক্ত-ভোগী, আমিও তাই। আপনার কথা আমি বলতে পারব না, কিন্তু আমার বয়স হয়েছে, প্রেম বা ঘৃণা কোনোটাই আমার হৃদয়ে এখন আর তেমন প্রবল



নয়। যেমন ছিল ত্রিশ বছর আগে। ইংরেজের জন্তে আমি প্রাণ দিতে পারতুম। বাঙালী পলটনে যোগ দেবার জন্তে বাড়ী থেকে পালিয়েছি। পরে ধরা পড়ে ফিরেছি। বাবার চেয়ে মায়ের বেশী অমত। একই পরিস্থিতি দেখা দিয়েছে আমার মেয়ে বরনার বেলা। সেও কি বাড়ী থেকে পালিয়ে যাবে, পরে ধরা পড়ে ফিরবে? কী জানি! আমার তো ভালো মালুম হচ্ছে না।’ ডাক্তারের মুখ আঁধার হয়ে আসে।

মানস অভয় দেয়! “না, না, মেয়েরা একা পালিয়ে যায় না। গেলে আর কারো সঙ্গে যায়। বরনার সঙ্গে আর কেউ থাকলে তো!”

“আপনি আমার মনে সন্দেহ ঢুকিয়ে দিলেন, মল্লিক সাহেব। আমি ভাবছি আর কে হতে পারে!” ঘটক বিদায় নেন।

ক্লাবটা শুধুমাত্র টেনিস খেলার জন্তে। সঙ্গে একটা লাইব্রেরী আছে, সেটা খুব মূল্যবান। সেখানে পাওয়া যায় এমন সব পুরানো ইংরেজী বই যা অগুচ্ছ তুলে ভাঙে। যেমন গ্যেটের আত্মচরিত। টলস্টয়পত্রীর দিনলিপি। মানস নিবিষ্ট হয়ে পড়ে। টেনিসের পরে লাইব্রেরীতে বসে বইপত্র নাড়াচাড়া করতে করতে ডাক্তার সাহেবের সঙ্গে কথাবাতা। সেদিন আর কেউ উপস্থিত ছিলেন না।

“আজ এত দেরি হলো যে?” যুথিকা কৈফিয়ৎ চায়।

“সিভিল সার্জনের মেয়ে বরনা ওয়াকি হতে চায়। মা শয্যাশায়ী। বাপ চিন্তিত। এই নিয়ে কথাবাতা হচ্ছে।” মানস জবাবদিহি করে।

সমস্ত স্তনে যুথিকা বলে, “বরনা হচ্ছে এদেশের নিউ উওম্যান। শীলা তা নয়। শীলাকে আমি ভালোবাসি, কিন্তু বরনাকে শ্রদ্ধা করি। হাজার টাকার নীলামদর ও যদি দিয়ে থাকে তবে এটা ভালো বিয়ের জন্তে নয়, বিয়ে আদৌ নয়ের জন্তে। সোজা কথা মনের মাহুষ না পেলে ও বিয়ে করবে না। আর মনের মাহুষ তো চাইলেই মেলে না। অকস্মাৎ মিলে যেতেও পারে, যেমন মিলির বেলা। নয়তো ঋনকাল প্রতীক্ষা করতে হয় শবরীর মতো।”

মিলির প্রসঙ্গ ওঠে। “দত্তবিশ্বাস কি মিলির মনের মাহুষ? হা হা হা!” মানস হেসে উড়িয়ে দেয়। “এসেছিল জুলিকে বিয়ে করতে। জুলি প্রত্যাখ্যান করে। তখন মিলিকে হাতের কাছে পেয়ে প্রস্তাব জানায়। মিলি সম্মতি দেয়।”

“কে জানে, বরনার জীবনেও ঘটনাচক্রের ঘটকালি ঘটতে পারে। আর

না ঘটলেই বা কী ? যুদ্ধক্ষেত্রে যাবার সুযোগ পায় ক'জন মেয়ে ! তেমন একটা সুযোগ যদি আমার জীবনে আসত আমিও কি যেতে চাইতুম না ? বিয়ে করেছি, মা হয়েছি, এখন আমার হাত পা বাঁধা।” আফসোস করে যুথিকা।

“সেই হোমারের যুগ থেকেই যুদ্ধক্ষেত্রে যাবার সুযোগ পাচ্ছে মেয়েরা।” মানস গম্ভীরভাবে বলে, “কিন্তু ইলিয়াড মহাকাব্যের শুরুতেই দেখতে পাবে অ্যাকিলিসের সঙ্গে আগামেমননের নারীঘটিত বিবাদ। মেয়েরা ছিল যুদ্ধের প্রাইজ। একালের ওয়্যাকিদের নিয়েও যে এক অফিসারের সঙ্গে আরেক অফিসারের বিবাদ বাধবে না তা নয়। বরনাকে নিয়েও কাড়াকাড়ি পড়তে পারে। এতদিন তো জানতুম গণিকাদের যুদ্ধক্ষেত্রে নিয়ে যাওয়া হতো। এখন ওয়্যাকিদের কেন ?”

যুথিকা ফিক করে হেসে বলে, “সোভিয়েট রাশিয়ায় শুনছি প্রমীলা বাহিনী আছে। প্রমীলারা যুদ্ধক্ষেত্রে গিয়ে নাংসী যুদ্ধবন্দীদের যুদ্ধের প্রাইজ বলে বিবাদ বাধাবেন না তো ?”

“বলা যায় না। ওরাও তো নিউ উগ্ম্যান। তবে স্টালিন শুনলে রক্ষে থাকবে না। সঙ্গে সঙ্গে কোতল। সম্রাজ্ঞী ক্যাথারিন হলে অল্প কথা ছিল। তিনি নিজেই হয়তো প্রমীলাদের প্রাইজ কেড়ে নিয়ে নিজের শোবার ঘর সাজাতেন।” মানস রুশদেশের ইতিহাস থেকে সম্রাজ্ঞীর প্রকৃতি বর্ণনা করে।

“রাশিয়া দেখছি সব ব্যাপারে এগিয়ে রয়েছে। স্টালিনের পরে একদিন হয়তো ডিকটের হবেন তেমনি জাঁদরেল এক মহিলা। পৃথিবীতে স্বর্ণযুগ আসবে। কিন্তু তার আগে যুদ্ধে জেতা চাই। লঙ্কার ওই প্রমীলা বাহিনী কি কিলিক্যার বানরবাহিনাকে পরাস্ত করতে পারবে ? আচমকা নাংসী আক্রমণের পর থেকে ভাবছি সোভিয়েট সেনা কি ধাক্কা সামলাতে সক্ষম হবে ?” যুথিকা গালে হাত দেয়।

“সেই আশঙ্কায়ই তো ইংরেজরা ছুটে গেছে রাশিয়ানদের মদত দিতে। এখনকার মতো ওরা শত্রু নয়, मित्र।” মানস বোঝাতে চায়।

“ইংরেজের মতো লাকি জাত কি আর আছে ? সেই যে একটা প্রবাদ আছে, ইংরেজরা লড়ে শেষ ফরাসীটি পর্যন্ত। এবার লড়বে শেষ রাশিয়ানটি পর্যন্ত। এতদিন লড়া হয়েছে শেষ ভারতীয়টি পর্যন্ত।” যুথিকা পরিহাস করে।

“হাসির কথা নয়। কংগ্রেসের সঙ্গে ইংরেজের মিটমাট হলে ভারতীয় সৈন্যরাও ছুটে যেত রাশিয়ানদের সঙ্গে কাঁধে কাঁধ মিলিয়ে লড়তে। মওলানা আজাদ তো বলে রেখেছেন তিনি দরকার দেখলে কনসক্রিপশন করবেন। মানবভাণ্ডার নির্ভর করছে রুশজার্মান যুদ্ধের ফলাফলের উপরে। নাৎসীরা যদি জেতে তবে সভ্যতার ঘড়ির কাঁটা পেছন দিকে ঘুরিয়ে দেবে।” মানস এ নিয়ে গভীরভাবে চিন্তিত।

“কংগ্রেসের সঙ্গে মিটমাট হলে এমন ঘটতে পারে যে ক্যাপটেন ক্রুফকলি ঘটক তাঁর উইমেন্স অক্জিলিয়ারি কোর নিয়ে ক্রুফসাগর পারে অবতীর্ণ হবেন। সব লাল হো জায়েগা নয়, সব কালো হো জায়েগা।” যুথিকা রক্ত করে।

“কিন্তু কংগ্রেসের সঙ্গে সরাসরি মিটমাট কোনোদিন হবার নয়, জুঁই। সবাই এটা এতদিনে সমঝে গেছে। মাঝে রয়েছে মুসলিম লীগ। তাকে ডিঙিয়ে মিটমাট করতে গেলে সে খাস বিলেতের টোরি পার্টির সব চেয়ে রক্ষণশীল সদস্যদের কাছে দরবার করবে। ওঁরা সায় না দিলে এই অচল অবস্থার অবসান হবার নয়। ওঁরা সায় দেবেনও না, যদি না মুসলিম লীগ সায় দেয়। আর মুসলিম লীগের যা শর্ত তাতে কংগ্রেস কোনোদিন রাজী হবে না।” মানস খেদোক্তি করে।

“তা হলে ক্যাপটেন ক্রুফকলি ঘটকের ওয়াকির ক্রুফসাগরপারে যাচ্ছেন না। কোথায় যাচ্ছেন বলতে পারো? পদ্মার ওপারে দেখেছি চট্টগ্রাম বা আরাকান অভিমুখে সৈন্য চালনা। ক্যাপটেন লাহা তো সিঙ্গাপুরের কথাও বলেছিলেন। ওয়াকির কি তা হলে বঙ্গোপসাগর পার হবে? সেটা এমন কিছু দূর নয় সিঙ্গাপুরে বিস্তার বাঙালী আছে। বরনার খবর আমরা তাঁদের কাছ থেকে পাব। প্রাণের ভয় নেই। ভয় যেটা সেটা ওই আকিলিসের সঙ্গে আগামেমেননের কাড়াকাড়ির। শুভ নিশ্চিন্তে মিলে তিলোত্তমাকে ওরা হুঁটুকরো না কবে। তবে সান্ত্বনা এই যে তিলোত্তমা এক্ষেত্রে একজন নয়, একদল।” যুথিকা হাসি চাপে।

“একবার মিসেস ঘটকের সঙ্গে দেখা করলে হতো না?” মানস বলে।

“নিশ্চয়। কিন্তু বরনার পক্ষ নেব।” যুথিকা উত্তর দেয়।

বরনা আর ওর মা দু’জনেরই ধর্মভাজ পণ। বরনা ওয়াকি হবে, নয়তো গৃহত্যাগ করবে। ওর মা ওকে ওয়াকি হতে দেবেন না। হলে দেহত্যাগ করবেন। ওয়াকিদের সম্বন্ধে যুথিকার ধারণা স্পষ্ট নয়। ওরা কি অফিসার-

দের মন জোগাতে গিয়ে খারাপ হয়ে যাবেই, ভালো থাকতে পারবে না ? তাই যদি হয়ে থাকে তবে তো মিসেস ঘটকের আপত্তির কারণ আছে। কী কবে সে আপত্তি খণ্ডন করা যায় ? অথচ বরনাকেও আগে থেকে সন্দেহ করা অসুচিত। সে গম্ভীর প্রকৃতির মেয়ে। বেশী কথা বলে না। লাইব্রেরী থেকে বই আনিয়ে নিয়ে পড়ে। সৌরিয়্যাস বিষয়ের বই। মাঝে মাঝে টেনিস খেলতে আসে। কব্জির জোর আছে। ওর রাজনৈতিক মতামত কাউকেই জানতে দেয় না। যুদ্ধক্ষেত্রে যেতে চায়, এর থেকে ধরে নেওয়া যায় না যে সে সাম্রাজ্যবাদী। বাঙালীদের একটা পুরানো নালিশ তাদের সৈন্যদলে নেওয়া হয় না, অসামরিক জাতি বলে অবজ্ঞা করা হয়। সেই অপবাদ কালনের জন্মেও বহু যুবক সৈন্যদলে ভর্তি হয়েছে। তাই বলে কি তারা সাম্রাজ্যবাদী ? মেয়েরা তখন ছেলেরদের সঙ্গে সমান অধিকার দাবী করেছে তখন ওয়াকি দলে ভর্তি হওয়াও তো সমান অধিকারের পর্যায়েই পড়ে।

“মাসিমা,” যুথিকা ডাক্তার গৃহিণীকে আত্মীয়তার স্বত্রে বাঁধে, “আপনি শয্যাশায়ী শুনে উদ্ভিগ্ন হয়ে দেখতে এসেছি।”

“তোমরা সবাই ভালো আছো তো, মা ?” তিনি উঠে বলেন।

“আপনার আলীর্বাদে ও ডাক্তার সাহেবের সৌজন্যে।” যুথিকা ভদ্রতার খাতিরেই বলে। কল দেবার সময় দেয় দাশরথিবাবুকে। এই স্টেশনে আগে য়েবার এসেছিল তখন থেকেই চেনাশোনা।

“আমি এখন মহাবিপদে পড়েছি। সবই আমার নিজের কর্মফল। আমার ছোট মেয়েকে আমি বোল বছর বয়সেই পরের ঘরে দিতে পারতুম। পাত্র-পক্ষই বোলাবুলি করছিল। আমি তখন অন্ধ। বরনা আমার কোলের মেয়ে। ও যদি পরের ঘরে যায় আমার কোল খালি হবে। তখন কি জানতুম যে দুধ কলা দিয়ে কালসাপ পুষছি ! যে আমাকেই দংশন করবে। আমার সর্বাঙ্গ এখন বিয়ের আলোয় জ্বলছে। কে আমাকে বাঁচাবে। কেউ পারবে না। তুমিও না। এই শয্যাই আমার শেষ শয্যা। ডাক্তারের ডাক্তারি বাইরে। ঘরে কি ঔর কমতা আছে ? কমতা থাকলে ওই সোমন্ত মেয়ের বিয়ে দিতেন না ? ধারকর্জ করে প্রোভিডেন্ট ফাণ্ডের টাকা ভূলে ও মেয়েকে যেমন করে হোক পাত্রস্থ করা চাই। মেয়েমানুষের প্রকৃত স্থান বাপের বাড়ী, স্বস্তরবাড়ী, ছেলের বাড়ী। তা তো নয়, যুদ্ধক্ষেত্রে যাবে। বলি, যুদ্ধক্ষেত্রে কি কেউ চিরকাল থাকে ? বছর দু’তিন বাদে ফিরে আসতে হবে না ? তখন কে ওকে

বিয়ে করবে ? চাকরিই বা জোগাবে কে ? সরকার কি তেমন কোনো ভরসা দিচ্ছে ? আর এরা যদি যুদ্ধে হেরে যায় তা হলে এদের দেওয়া ভরসার কি মূল্য আছে !” শেষের কথাগুলি তিনি ফিস ফিস করে বলেন ।

ভদ্রমহিলা সত্যিই বিপন্ন । তবে শয্যাশায়ী বলে অনাহারে জীর্ণশীর্ণ নন । দিব্য হুট পুট বলিষ্ঠ । শুয়ে শুয়েই তিনি ঘরসংসার চালান । তাঁর হাঁক ডাক শুনে বি চাকর ছুটে আসে । ফরমাস খাটে । মুখিকার জন্তে সন্দেশ ও সরবৎ এসে হাজির ।

“নিজের সম্ভানকে আপনি কালসাপ বলছেন, শুনে দুঃখ পেলুম, মাসিমা । এ সন্দেশ কি আমার গলা দিয়ে নামবে ? আপনি এত অসহিষ্ণু কেন ? আরো কত মেয়ে ওয়াকি হচ্ছে । যুদ্ধক্ষেত্রে যাওয়া মানে প্রাণ দিতে যাওয়া নয় । মেয়েদের যথেষ্ট নিরাপদ দূরত্বে রাখা হবে । যেমন ডাক্তার ও নাস দৈর । আর একালের মেয়েদের প্রকৃত স্থান কি কেবল রান্নাঘর আর আঁতুড়ঘর আর ঠাকুরঘর ? দিনকাল বদলে গেছে । মেয়েরা এখন জেলে যাচ্ছে, মন্ত্রী হচ্ছে, আপিস করছে, মোটর চালাচ্ছে ।” মুখিকা তর্ক করে ।

মিসেস ষটক চুপ করে থেকে বলেন, “আমারই নিজের কর্মফল । দুটি মেয়ে হওয়ার পর আমি আশা করেছিলুম তার পরেরটি হবে ছেলে । হলো আবার মেয়ে । তখন সেই মেয়েকেই ছেলের মতো করে ব্রাহ্মণ করি । হাফ প্যান্ট পরে ইস্কুলে যায়, দোড়কাঁপ করে । খেলাধুলায় চ্যাম্পিয়ন । যেখানেই বদলী হন ওয় বাবা ওকে টেনিস খেলার জন্য ক্লাবে নিয়ে যান । টেনিসে ওকে হারিয়ে দেয় কার সাধ্য ? তোমাদের এখানে আসার আগে একজন অ্যাসিস্ট্যান্ট ম্যাজিস্ট্রেট এসে এক বছর ছিল । রোজ টেনিস খেলতে খেলতে ওদের দু’জনের মধ্যে এমন ভাব হয় যে আমরা তো ধরে নিই এইবার আসছে বিবাহের প্রস্তাব । ওমা, কোথার প্রস্তাব ! ও ছেলে ধরাছোঁয়া দেবার নাম করে না । বিলেতে বছকাল কাটিয়েছে । কত মেয়ের সঙ্গে টেনিস খেলেছে । ঝরনা নাকি ওয় শেইরকম এক গাল’ ফ্রেণ্ড । শুনে আমার সর্বাঙ্গ শরীর রাগে রি রি করে । গাল’ ফ্রেণ্ড কী ! ছেলেতে মেয়েতে ফ্রেণ্ডশিপ হতে পারে কখনো ! তোমার বিলেতে কী হয় তা কি আমরা জানিনে ? খবরদার ! আমি বলি, খবরদার, বুদ্ধ, খবরদার, তুই ওই বাকদের সঙ্গে মিশিসনে । বাকদের গলার মুক্তার হার ! সেই থেকে মেয়ের আমার মুখ ভার । ভালো করে কথা বলে না । পালিয়ে পালিয়ে বেড়ায় । টেনিসও যে নিষিদ্ধ খেলতে

ষায় তা নয়। কালেকটর সাহেবের ঘের ওকে বার বার ডেকে পাঠান।  
উনিও টেনিসের ভক্ত। কিন্তু ষাবে না। উনি তো ওর বয়স ফ্রেও মনোজ  
বাগচী নন।”

“টেনিসে আমারও অহরাগ ছিল, মাসিমা। কিন্তু কাচাবাচ্চাদের সঙ্গে  
দেওয়া তার চেয়েও জরুরি। আমরা নিজেকেই কুঠিতেই ব্যাডমিন্টন খেলি।  
আমরা মানে আমি আর আমার প্রতিবেশিনীরা। বরনাকেও নিয়ন্ত্রণ করেছি।  
ও একদিন কি দু’দিন গিয়ে আর ওমুখো হয়নি। ওর সয়কক্ষ থাকলে তো  
যাবে। এখন বুঝতে পারছি ও চায় পুরুষ প্রতিপক্ষ। কিংবা পুরুষ পার্টনার।  
আমরা তো পুরুষদের খেলতে ডাকিনে। আমার স্বামীকেও না। এখন  
বোঝা যাচ্ছে বরনা কেন ধরাছোঁয়া দেয়নি। সত্যি, আপনাদের ভাবনার  
কারণ আছে। তা বলে অমন করে মেয়েটাকে পর করে দেবেন না। বিয়ের  
পরে তো এমনিতেই পর হয়ে যাবেই। যে দু’দিন বাপের বাড়ীতে আছে মা  
বাপের সঙ্গে মনের স্মৃতি থাকুক। আপনি ওর সঙ্গে মিটমাট করে ফেলুন,  
মাসিমা। ইচ্ছে থাকলে উপায় থাকে। ওয়াকি সম্বন্ধে আমি ওয়াকিবহাল  
নই, ইয়া কি না কোনোটাই বলব না। কিন্তু যুদ্ধের হিড়িকে কতরকম চাকরি  
শ্রুতি হচ্ছে। একটা না একটা জুটে যেতে পারে। তবেতার জন্তে কলকাতায় যি  
দিল্লীতে যেতে হবে। মেয়েকে আপনারা গোঁথে গোঁথে রাখতে পারবেন না।  
সে কার সঙ্গে মিশবে? মিশলে তা আপনাদের এলাকার বাইরে। শান্ত্রেই  
তো লিখেছে বিবাহের বয়স হলে পিতা যদি কন্তার বিবাহ দিতে না পারেন  
তবে কন্তা নিজেই নিজের পতি বরণ করবে।” যুথিকা পথনির্দেশ করে। যুদ্ধ  
ফুটে বলে না যে সে আপনি তার দৃষ্টান্ত দেখিয়েছে।

“ওসব বিলিভী প্রথা এদেশে চলবে না, মা যুথিকা। আমরা জাতকুল  
গণগোত্র মানি। মনোজ বাগচীর বেলা সামান্য ব্যতিক্রম হতো। ওরা  
বারেস্ত্র, আমরা রাঢ়ী। বরনা যদি আমাদের মুখ হাসায় আমরা ওকে ভ্যাক্স  
কন্তা করবো।” ডাক্তার গুহিণী কঠোর কণ্ঠে বলেন।

যুথিকা মর্মে ব্যথা পায়। ভ্যাক্স কন্তা সে নিজেও তো হয়েছে। কিন্তু  
সেকথা জানান্ন না। বেচারি বরনার ভবিষ্যৎ ভেবে ব্যাকুল হয়।

পরের দিন ব্যাডমিন্টন র‍্যাকেট হাতে বরনাকে আসতে দেখা গেল  
যুথিকাদের কুঠির লন্-এ। অনেকদিন বাদে দেখা।

“কী ভাই? কেমন আছো?” যুথিকার প্রশ্ন।

“শারীরিক ভালো। মানসিক ভালো নয়। শখ্ করে যদি কেউ ইনড্যালিড হয় তবে তার জন্তে চব্বিশ ঘণ্টা ঘরে আটকা থাকা কি খুব সুখের ?” বরনার উত্তর।

“তা হলে তুমি আজ ছাড়া গেলে কী করে ?” যুথিকা আশ্চর্য হয়।

“আপনার স্বাদে। আপনি কাল মাকে কী বলেছেন জানিনে। ফলে তাঁর হ্রস্ব অনেকটা নরম হয়েছে। আমাদের উনি ওয়াকি হতে দেবেন না, কিন্তু কলকাতা গিয়ে অন্য কোনো চাকরির জন্তে চেষ্টা করতে দেবেন। যুদ্ধক্ষেত্রে যেতে দেবেন না, কিন্তু কর্মক্ষেত্রে যেতে দেবেন। শুনেছি যুদ্ধের প্রয়োজনে কলকাতাকে কেন্দ্র করে রকমারি অসামরিক বিভাগ খোলা হচ্ছে। ফ্রন্টে যেতে হবে না। ফ্রন্টের সঙ্গে যোগাযোগ রাখতে হবে। মিসেস গোস্বামী আমাকে সুপারিশ করে কয়েকজনের নামে চিঠি দিচ্ছেন। আপনিও কি—” বরনা ইতস্তত করে।

“আলবৎ। তোমাকে সুপারিশ করব না তো কাকে করব ? এ শহরে তোমার মতো যোগ্য আর কে আছে ? তোমার অক্ষমতা তো এই যে তুমি পুরুষ নও, নারী। কিন্তু দিনকাল বদলে গেছে। নারীও পুরুষের সঙ্গে সমান। তোমাকে আমি মিলিটারি ইউনিফর্ম দেখলেও অবাক হতুম না। তা সিভিল ইউনিফর্মই ভালো। মা বাপের মনে কষ্ট যদি দিতেই হয় তবে এখন এই ইচ্ছাতে নয়। পরে আর কোনো ইচ্ছাতে।” যুথিকা ছুটু মিষ্টি হাসি হাসে।

“ত এমন কোনো ইচ্ছার সম্ভাবনা নেই, যুথিকাদি।” বরনা রঙিন হয়ে বলে, “বাঙালীর ছেলেরা দারুণ সেয়ানা। অবশ্য মানসদা বাদে।”

যুথিকা ওর পিঠ চাপড়ে দিয়ে বলে, “মানসদার মতো বোকাসোকা ছেলে আরো অনেক আছে। তোমাকে ছাড়তে হবে শুধু জাতের অহংকার, কুলের গরব। কেন, বাঙালী ছাড়া কি আর বর হয় না ? যে তোমাকে ভালো-বাসবে, যাকে তুমি ভালোবাসবে সেই তোমার বর। সীতার মতো তোমার চারদিকে গণ্ডী আকার অধিকার কোন্ লক্ষণের আছে ? সেই গণ্ডীর ভিতরেই জীবনলক্ষী বরণ করতে হবে, তাও করে দেবেন গুরুজন, এর বিকল্পে বিদ্রোহ করাও একপ্রকার যুদ্ধ। এই ইচ্ছাতে আপস করতে নেই। বাপ মা ত্যাগ্য কত্যা করলেও না।” যুথিকার হাসি মিলিয়ে যায়।

ওয়াকির প্রস্তাবটা এসেছিল মিস্টার গোস্বামীর কাছ থেকে। এখানকার জেলা ম্যাজিস্ট্রেট ও কালেকটর। সরকারী কাগজপত্র তাঁর দফতরে

পৌছেছিল। দিল্লী থেকে কলকাতা হয়ে। ভারত সরকার ভারতে যুবক-যুবতীদের জন্তে এক এক করে সব ক'টা দরজা খুলে দিচ্ছেন। সাড়াও পাচ্ছেন সব ক'টা প্রদেশ থেকে। ওয়াকিতে অ্যাংলো ইণ্ডিয়ানদেরই সাড়া বেশী। ক্রণ্টে যেতে ওদের ভয়ডর নেই। না প্রাণের ভয়, না চরিত্রের ভয়। শত শত ইণ্ডিয়ান অফিসার ক্রণ্টে যাচ্ছে, তারা যদি ইণ্ডিয়ান মহিলাদের সাহচর্য না পায় তবে অ্যাংলো-ইণ্ডিয়ান মহিলাদের সাহচর্য পাবে। কেউ কেউ বিয়েও করবে।

শহরের গণ্যমান্তরা প্রাচীনপন্থী। সিভিল সার্জনের মেয়ে যে পুরুষদের সঙ্গে টেনিস খেলতে যায় এটাও তাঁরা স্বনজরে দেখেন না। কিন্তু আগে থেকে এর নজির আছে। মিসেস গোস্বামীও তো মাঝে মাঝে খেলতে আসেন। স্বাস্থ্যের জন্তেই টেনিস খেলা। আমোদের জন্তে নয়। পাষণ প্রতিমার মতো মুখ। কথা বলেন খুব কম। হাসি পেলে হাসি চেপে রাখেন। ঝরনারও সেই ধরণধারণ। প্রাচীনপন্থীদের এটা গা সওয়া হয়ে গেছে। কিন্তু ওয়াকি ! সর্বনাশ !

## ॥ পাঁচ ॥

কথা ছিল মিলি লগুনে গিয়ে বেডফোর্ড কলেজে জুলির জায়গায় ভর্তি হবে। কিন্তু কলেজের কর্তৃপক্ষ তাতে রাজী নন। বলেন নতুন করে দরখাস্ত করতে ও একবছর অপেক্ষা করতে। একবছর পরে ব্রিটেনের উপর আকাশ-যুদ্ধ। প্রাণ বাঁচাবে না পড়াশুনায় মন দেবে ? প্রাণ বাঁচানো বলতে কেবল নিজেরটি বোঝায় না। মিলি স্বতঃপ্রণোদিত হয়ে জাণকার্বে যোগ দেয়। দেশে থাকতে ওর সেবাকর্মের অভিজ্ঞতা ছিল। সহজেই নাম করে। এমনিতেই ও মেয়ে অসমসাহসী। সাইরেন শুনে ও শেনটারে ঢোকে না। যেখান থেকে ডাক আসে সেখানে ছুটে যায়। জখমীদের নিয়ে যায় হাসপাতালে।

হুকুমার গা বাঁচিয়ে চলে। ওর স্বপ্নের ক্রীজ নষ্ট হবে এটাই ওর কাছে উষ্মণের বিষয়। তবে ও নীরব দর্শক নয়। বি. বি. সি'র ইণ্ডিয়ান লাভিসে



ওর কর্তৃত্ব শোনা যায়। প্রত্যেক ভারতীয় নাগরিকের কর্তব্য এই যুদ্ধে মিত্র-পক্ষের জয় কামনা করা। তুল, তুল, অত্যন্ত তুল এই ধারণা যে ইংলণ্ডের দুর্বোগ হচ্ছে ভারতের সুযোগ। কে বাঁচবে, যদি ইংলণ্ড মরে? কে মরবে, যদি ইংলণ্ড বাঁচে?

ওর আকস্মিক মিলি ওর ব্রডকাস্ট শোনে না। বলে, “ব্রিটিশ প্রোপাগান্ডা আমি শুনতে চাইনে। জিতবে ওরা ঠিকই, কিন্তু জয়ের ভাগ ভারতকে দেবে না। তা বলে আমরা ওদের দুর্বোগের সুযোগ নিতে চাইনে। সেটা অধর্ম হবে। ওরা প্রাণের দায়ে লড়ছে। তা তো আমি স্বচক্ষেই দেখতে পাচ্ছি। হিটলারের পায়ে আত্মসমর্পণ করলে বেঁচে যেত। কিন্তু তেমন বাঁচা কি মরার চেয়েও খারাপ নয়? চার্চিল তাঁর দেশবাসীর অপরাধের আত্মা। ধন্য তাঁর নেতৃত্ব! কিন্তু এটাও আমি জানি যে আমরা যদি তাঁর মামার দেশের মতো স্বাধীনতার জন্তে লড়তে না পারি তো অল্প কোনো উপায়ে স্বাধীন হতে পারব না। আমেরিকার স্বাধীনতার যুদ্ধই অত্যাচ্ছ উপনিবেশের স্বাধীনতার যুদ্ধের আদর্শ। দেশ এর জন্তে তৈরি নয়।”

সুকুমার লেবার পার্টির সর্দারদের সঙ্গে মেলামেশা করে তাঁদের ভজায় যে ভারত তার সমস্ত শক্তি নিয়ে যুদ্ধে বাঁপ দিতে মুখিয়ে রয়েছে, যদি কংগ্রেস নেতাদের অগোণে জেল থেকে ছেড়ে দেওয়া হয়। আর বড়লাটের শাসন-পরিষদকে ব্রিটেনের মতো ওয়ার ক্যাবিনেটে পরিণত করা হয়। স্বাধীনতা এই মুহূর্তে কেউ চাইছেন না। সেটা সবুর করতে পারে। সুকুমারের বিশ্বাস লেবার পার্টির চাপে চার্চিল ভারতীয় নেতাদের সঙ্গে আলাপ আলোচনার জন্তে দূত পাঠাবেন।

মিলি ওর কথায় কান দেয় না। বলে, “অমন একটা পাপেট গভর্নমেন্ট যদি কংগ্রেসের নেতারা গঠন করেন তো দেশের লোক ছি ছি করবে।”

আকাশযুদ্ধে নাৎসীরা জয়ী হয় না। হিটলার উপলব্ধি করেন যে আকাশ পথে ব্রিটেন আক্রমণ করা নিষ্ফল। করতে হবে সমুদ্রপথে আক্রমণ। কিন্তু নৌযুদ্ধে কি ব্রিটেনকে পরাস্ত করা সম্ভব, যতদিন না জার্মানীর জাহাজের লংখ্যা ও শক্তি বাড়ে? তার জন্তে অপেক্ষা করতে গেলে যুদ্ধের মোমেন্টাম নষ্ট হবে। মোমেন্টাম বজায় রাখতে হলে অবিলম্বে বাঁপিয়ে পড়তে হবে রাশিয়ার উপরে। এক ডিলে ছুই পাখী মারা হবে। একটার নাম তো সোভিয়েট ইউনিয়ন। অন্যটার নাম বোলশেভিক বিপ্লব। দশ বছরের

অনাক্রমণ চুক্তি মাফ করতে জার্মানী স্বেচ্ছায় বাধ্য। কিন্তু দশ বছর সময় পেলে যে বিপ্লব চিরস্থায়ী হবে, সে এক দারুণ ভুল।

জার্মানরা রাশিয়া আক্রমণ করার পর যুদ্ধের মোড় ঘুরে যায়। মিলির বিশেষ কিছু করবার থাকে না। সকলেই বলাবলি করে যে এ যাত্রা ফাঁড়া কেটে গেছে। যা শত্রু পরে পরে! হিটলার আর এ মুখে হবে না। হলে নেপোলিয়নের মতো ওয়াটারলু। আপাতত রাশিয়াকে মদত দেওয়াই সুবুদ্ধি। ইংরেজের হয়ে ওই লড়বে।

যুধিকাকে লেখা মধুমালতীর চিঠিতে এসব কথা তো ছিলই, ছিল আরো অনেক কথা। ওয়াটারলুর আগে ইংরেজরা তাদের যুদ্ধপ্রস্তুতিতে টিলে দ্বেবে না। উৎপাদন জোর কদমে চলেছে। কেউ বেকার নয়। ধর্মঘট স্বপ্নের অতীত। কেউ কারো চেয়ে বেশী খেতে পায় না, এমনি কঠোর রেশন প্রথা। যা রেশনে দেয় তাতে পেট না ভরলে তুমি যে শিকার করে পেট ভরাবে তারও জো নেই। এক মন্ত্রী চাকরি গেল একটা না ছুটো থন্নগোস শিকার করতে গিয়ে। পোশাক সম্বন্ধেও কড়াকড়ি। পোশাকেই তো উচ্চনীচ ভেদ বোঝা যেত। সেটা যাতে না বোঝা যায় সে ব্যবস্থাও হচ্ছে। লিখিতভাবে না হলেও অলিখিতভাবে এটাও একপ্রকার সাম্যবাদ। বোলশেভিকদের মদত দিতে যাওয়াও তো একহিসাবে সাম্যবাদকে স্বীকৃতি দেওয়া। শ্রেণীবৈষম্য ক্রমেই লোকচক্ষুর অন্তরালে চলে যাচ্ছে। ধনীদের অবস্থা খারাপ হচ্ছে বলা চলে না, কিন্তু গরিবদের অবস্থা আগের চেয়ে ভালো হচ্ছে। বর-বাড়ীর অভাব, এটাই ওদের সব চেয়ে জোরালো অভিযোগ।

চিঠির বয়ান শুনে মানস চমৎকৃত হয়। কিন্তু ওর যা স্বভাব। সমালোচনা করবেই। ‘মিলিকে চিঠি লিখলে জিজ্ঞাসা করবে, “মদটা কি কেউ কম খাচ্ছে?”

“যুদ্ধের অমুরোধে মানুষ সব পারে। ওটাই বা না পারবে কেন?” যুধিকার প্রশ্ন।

“ইতরভদ্র সকলের মধ্যেই ওর ব্যাপক প্রচলন। এমন লাভজনক ইগাণ্ডি আর নেই। যদি না অস্ত্রশস্ত্রের নির্মাণকে তার মধ্যে ধরো।” মামস কণী হাসে। “তবে আছেন ওদের মটগোমরির মতো সেমাপতি। যিনি স্ত্রা স্পর্শ করেন না।”

“হিটলারও স্ত্রা স্পর্শ করেন না, শুনেছি।” যুধিকা বলে।

“লোকটার গুণ আছে। শুনেছি একান্ত ভদ্র। সম্পূর্ণ সৎ। কতকগুলো নৈতিক গুণ না থাকলে মানুষ জ্ঞান করবে কেন? তা বলে গৌয়ারতুমিটা তো উড়িয়ে দেওয়া যায় না। দুই ফ্রন্টে লড়াই করতে বিসমার্কপৰ্বন্ত বারণ করে গেছেন। দুই ফ্রন্টে লড়াই করতে গিয়ে কাইজারের হার হলো। হিটলার কি বিসমার্কের চেয়েও বুদ্ধিমান? বলতে পারো পশ্চিমমুখে আর এগোনোর উপায় ছিল না।” মানস স্বীকার করে।

যুদ্ধটা নতুন এক মোড় নেওয়ায় বন্ধুবান্ধবদের মধ্যে জল্পনাকল্পনার সীমা ছিল না। কে জিতবে? জার্মানী না রাশিয়া? জার্মানীর পক্ষেও বেশ কয়েকজন ছিলেন। তাঁরা একটু চাপা গলায় বলেন, “মস্কো দূর অন্ত নয়। ইংরেজের সাধ্য নেই যে মস্কোতে গিয়ে যুদ্ধ করে।” তার সঙ্গে জুড়ে দেয় “আর মস্কোই তো রাশিয়ার মাথা। মাথা কাটা গেলে কি ধড়টা বাঁচতে পারে?”

ভাবনার কথা বইকি। মানস রোজ রাতে তার কুঠির চারদিকের প্রশস্ত বারান্দায় পায়চারি করতে করতে পাক খায়। তার পরে প্রশস্ত লনের এক প্রান্তে ডেকচেয়ার পেতে আকাশের দিকে চেয়ে চিন্তা করে। টলস্টয়ের ‘ওয়ার অ্যাণ্ড পীস’ মনে পড়ে। রুশরা আবার মস্কোর ঘরবাড়ী দোকানপাট পুড়িয়ে থাক করে দিয়ে শহর খালি করে দিয়ে যাবে। নাৎসীরা একফোঁটা জলও খেতে পাবে না। একটি মানুষও সহযোগিতা করবে না। রুশদের এই ‘পোড়া মাটি’ নীতি অপূর্ব ও অনন্ত। জার্মানরা দখল করতে পারে, কিন্তু ভোগ করতে পারবে না। নিজেরাই নাকাল হবে।

কিন্তু মজার কথা, রুশ কমিউনিস্টরা এই বিপদে মার্কস এঙ্গেলসের শরণ নিচ্ছেন না, স্বরণ করছেন অষ্টাদশ শতাব্দীর ঘোর প্রতিক্রিয়াশীল সেনাপতি কাউন্ট সুভোরোভকে। সম্রাজ্ঞী ক্যাথারিনের প্রিয়পাত্র। বিপ্লবী ফরাসী সৈন্তের বিরুদ্ধে লড়তে পাঠানো হয়েছিল ঠাকে ইটালীতে তিনিই কিনা হবেন বিপ্লবী রুশ সৈন্তের পর্দশুরী। করতে হবে তাঁরই পদাঙ্ক অনুসরণ। সাম্যবাদ নয়, জাতীয়তাবাদই এখন যুদ্ধের প্রেরণা।

কখন কোন্ তালখানা খেলতে হয় স্টালিন সেটা জানেন। তাই জাতীয়তাবাদের তালখানা খেলছেন। কলে স্বদেশের বুর্জোয়াদের সহযোগিতা পাচ্ছেন। আর বিদেশী জাতীয়তাবাদীদেরও। রুশ জাতীয়তাবাদের সঙ্গে ব্রিটিশ জাতীয়তাবাদের মিতালি গভবাদের মহাযুদ্ধেও বিজয়মান ছিল।

জাতীয়তাবাদী হিসাবেই রুশরা কম বিপজ্জনক, সাম্যবাদী হিসাবে বেশী। নইলে চার্চিল কেন সাহায্য পাঠাবেন? ক্রিপ্স তো মস্কোতেই বসে আছেন। স্টালিনকে তিনিই সতর্ক করে দেন যে হিটলারের ফোজ আক্রমণ করতে উদ্ভূত। স্টালিন তো প্রথমটা বিশ্বাসই করতে চাননি। পরে ইংরেজদের সঙ্গে মৈত্রীর বন্ধনে আবদ্ধ হন। ওরা নাই বা হলো কমিউনিষ্ট। ফাউস্ট তো শয়তানের সঙ্গেও হাত মিলিয়েছিলেন।

স্বপনদা গ্যেটের ‘ফাউস্ট’র মতো একখানা ক্লাসিক লিখতে ইচ্ছা করেছেন। তাঁর হাতে সেটা হয়তো নেবে উপন্যাসের রূপ। হবে শুধু যুগোপযোগী নয়, দেশোপযোগী। এর জন্যে তাঁকে খুব ভাবতে হচ্ছে। ছোটখাটো একটা গ্রুপের পত্তন করেছেন। মানস যদি মাঝে মাঝে কলকাতা গিয়ে গ্রুপের আন্ডায় যোগ দেয় তো খুশি হবেন। ঔর ওখানেই উঠবে।

স্বপনদা লিখেছেন, “যুদ্ধ তো ক্রমেই বিশ্বযুদ্ধের আকার ধারণ করছে হে! তুমি যেখানেই থাক না কেন, সেখানেই যুদ্ধক্ষেত্র। তোমাকে প্রত্যক্ষদর্শনের জন্যে দূর দেশে যেতে হবে না। জানো তো, আমি ফেটারলিষ্ট। কপালে যদি মরণ লেখা থাকে তো ঘরে বসেই মরব। পালিয়ে বাঁচব না। আর পালাবই বা কোথায়? ওদিক থেকে তেড়ে আসছে নাংসীরা। রাশিয়ানরা যদি কুখে না দাঁড়ায়, শহরকে শহর ছেড়ে দেয় তবে জার্মানরা ককেশাস পেরিয়ে ইরানে ঢুকবে। তার পর ভারতে। এদিকে যদি জাপানীরা এসে হানা দেয় তবে ইংরেজরা কেমন করে দুই দিক সামলাবে? ইতিমধ্যে বিস্তারিত ব্রিটিশ সৈন্য আমদানী হয়েছে, কিন্তু কাদের সঙ্গে লড়াই এসেছে তারা? বিদ্রোহী ভারতীয়দের সঙ্গে নয় তো? যাক, আমি বাপু, এর মধ্যে নেই। কংগ্রেস নেতারা যুদ্ধে যোগ দিলেও আমি রণছোড়। ল্যাণ্ডর যা বলেছেন আমিও তাই বলি, একটুখানি বদলে দিয়ে—

‘I strove with none ; for none was worth my strife.

Woman I loved and, next to Woman, Art.’

আজকের দিনে কিছুই নিশ্চিত নয়। জীবনও নয়, সম্পত্তিও নয়, সভ্যতাও নয়, সংস্কৃতিও নয়। নিশ্চিত বলতে সত্যি যদি কিছু থাকে তবে সেটা হলো ধর্ম। গীতা উপনিষদ, বাইবেল কোরান, বৌদ্ধ ও জৈন ধর্মগ্ধ, পার্শীদের আবেশ। কিন্তু আমরা যারা আর্টিস্ট বা ইনটেলেকচুয়াল তাদের মন মেজাজ সংশয়বাদীর। তাই আমাদেরই এত মাথাব্যথা। চাবী বা মজুর হলে বলতুম,

গোল্লায় যাক সভ্যতা, ধ্বংস হোক সংস্কৃতি, মা কালী তো থাকবেন, আর শিবলিঙ্গ। এঁদের কি বিনাশ আছে? না, এঁরা আদিম যুগ থেকে রয়েছেন, অন্তিম যুগ পর্যন্ত থাকবেন। তবে যুদ্ধ করতে করতে মানুষ জাতিটাই যদি বিলুপ্ত হয়ে যায় তবে এঁদেরও বিলোপ ঘটবে। ধর্ম এক্ষেত্রে অসহায়। মানুষ জাতির অন্তর্ধানে ধর্মেরও অন্তর্ধান।”

স্বপনদা ও দীপিকা বোদি স্থির করেছেন যে এই অনিশ্চয়তার মধ্যে একটি নিরীহ মানবশিশুকে এ জগতে আনবেন না। যুদ্ধ শেষ হলে পরে ওকথা ভাবা যাবে। এই সিদ্ধান্ত নিতে তাঁদের কম কষ্ট হয়নি। কিন্তু আরো কষ্ট হতো যদি যুদ্ধের বিভীষিকার মাঝখানে এত বড়ো একটা দায়িত্ব নিয়ে হিমশিম খেতেন।

স্বপনদার চিঠির শেষের দিকে ছিল আগল কথা। “তার পর, শোন, শুনে হেসো না। আমরা যদিও টুলী স্ট্রিটের তিন দাঁড়ি তবু আমাদেরও একটা ম্যানিফেস্টো চাই। মার্কস এঙ্গেলস যখন কমিউনিস্ট ম্যানিফেস্টো রচনা করেন তখন তাঁরা ক’জন ছিলেন? সেদিনকার সেই ক্ষুদ্রতম বীজ আজ এক বিশাল বটবুক্ষ। মাঝখানে এক শতাব্দী ব্যবধান। আমাদেরও দিন আসবে। এ শতাব্দীতে নয়, একবিংশ শতাব্দীতে। অবশ্য মানবজাতি যদি আত্মঘাতী না হয়। আমরা যা ঘোষণা করতে চাই তা সংক্ষেপে এই যে, একজন মানুষ কেবল বাঙালী নয়, সে ভারতীয়। সে কেবল ভারতীয় নয়, সে মানুষ। মানুষহিসাবে সে সমগ্র মানবজাতির উত্তরাধিকারী। সমগ্র বিশ্ববিজ্ঞান, বিশ্ব দর্শন, বিশ্ব সাহিত্য, বিশ্বসংস্কৃতিই তার উত্তরাধিকার। তাকে তার এই উত্তরাধিকার সযত্নে সংরক্ষণ করতে হবে। তার সঙ্গে নিজেরও কিছু যোগ করতে হবে। যোগফল দিয়ে যেতে হবে উত্তরপুরুষের হাতে। এটা প্রাচ্য ওটা পাশ্চাত্য এ গণনার দিন গেছে। এটা ভারতীয় ওটা অভ্যন্তরীণ এ গণনাও অবাস্তব। এখনকার গণনা হচ্ছে কোন্টা মানবিক, কোন্টা অতি-মানবিক, কোন্টা অমানবিক। আমরা মানবিকবাদী। বন্ধুরা তার পূর্বে একটা বিশেষণ জুড়ে দিতে চান। উদার মানবিকবাদী। লিবারল হিউ-মানিস্ট। পার্থক্য সূচনা করতে আর একটি গোষ্ঠীর সঙ্গে। তাঁরা ন্যাডিকাল হিউম্যানিস্ট।”

স্থিকা জিজ্ঞাসা করে, “টুলী স্ট্রিটের তিন দাঁড়ি মানে কী?”

মানস হেসে বলে, “কোনো এক অধ্যাত শহরের অধ্যাত রাত্তার তিনজন

অখ্যাত দর্জি এক ইশতাহার জারি করেছিল। তাতে ছিল উই গ্ল পীপল অন্ড্ ইংল্যান্ড।”

“কিন্তু স্বপনদা তো অখ্যাত শহরের অখ্যাত রাস্তার অখ্যাত দর্জি নন। ঠুঁর নাম একালের বাঙালী পাঠকরা সবাই জানে।” যুথিকা তাঁর পক্ষ নেয়।

রাত অনেক হয়েছে। মানস তার অভ্যাসমতো তার কুঠির চারিদিকে প্রশস্ত বারান্দায় পায়চারি করার পর বাইরের প্রশস্ত লনে মুক্ত আকাশের তলে ডেক চেয়ারে গা এলিয়ে দিয়েছে। দৈনন্দিন কাজকর্ম চুকিয়ে দিয়ে এই সময়টায় সে উর্ধ্বতর ভাবনাচিন্তায় বিভোর হয়। খুব দেরি দেখলে যুথিকা তাকে ডাকতে আসে।

“ত্যাখ জুঁই, স্বপনদা আর আমি এক পথের পথিক হলেও পুরোপুরি একমত নই। ঈশ্বর যদি না থাকেন, অমরত্ব যদি না থাকে তবে বাকী থাকে প্রকৃতি আর মানবজাতির পাখিব ভবিষ্যৎ। কিন্তু প্রকৃতির উপর মানুষ কতটুকু নির্ভর করতে পারে? ভূমিকম্প বা মহাপ্লাবন বা তুষারপ্রবাহ বা সৌরজগতের দূরবর্তী ঘটনা যে-কোনোদিন মানুষকে নিশ্চিহ্ন করে দিতে পারে। তা ছাড়া এটাও তো সম্ভব যে পৃথিবী ক্রমে ক্রমে উষ্ণতা হারাবে। তখন প্রাণধারণ করাই কষ্টকর হবে। হিউমানিস্টরা ধরে নিয়েছেন যে প্রকৃতি চিরকাল প্রাণের অহুকূল থাকবে ও মানবজাতির বিকাশ সর্বতোমুখী হবে। এই দুটি ধারণার উপর স্বপনদারা আর একটি ধারণা স্থাপন করতে যান। সেটা ‘লিবারল’ জীবনদর্শন। কারো সঙ্গে দ্বন্দ্ব থাকবে না। না ধনিকদের সঙ্গে, না শ্রমিকদের সঙ্গে। না জমিদারদের সঙ্গে, না চাষীদের সঙ্গে। হিংসা দূরের কথা, অহিংসাও সংগ্রামের উপায় হবে না। আইনসঙ্গত উপায়ে যতদূর হবার ততদূর হবে। কী করে ঠুঁর সঙ্গে একমত হই, বলো?” মানস চিন্তাশ্রিত।

“ঈশ্বর আর অমরত্ব, এ দুটি কি আরো গোড়ার জিনিস?” যুথিকা স্বধায়।

“হ্যাঁ, জুঁই। সেই উপনিষদের যুগ থেকেই মানুষ এ দুটিকে মূলগত প্রশ্ন বলে উত্তরের অন্বেষণ করে এসেছে। এই অনিশ্চিত বিশ্বে এই দুটি নিশ্চিতি যদি না থাকে তবে জীবন অর্থহীন।” মানস কাভরকণ্ঠে বলে।

যুথিকা তার স্বামীর হাতে হাত রেখে মিষ্টি স্বরে বলে, “তা তুমি রোজ রাজে আকাশের তারাদের দিকে চেয়ে কিসের উত্তর খুঁজে পাবে, মানস? একটি কবিতা মনে পড়ছে। শোন। ক্রালিস টমসনের লেখা।”

এই বলে সে ধীরে ধীরে আবৃত্তি করে -

O world invisible, we view thee,  
O world intangible, we touch thee,  
O world unknowable, we know thee,  
Inapprehensible, we clutch thee,  
Does the fish soar to find the ocean,  
The eagle plunge to find the air—  
That we ask of the stars in motion  
If they have rumour of thee there ?”

মানস নীরবে শুনে যায়। এটি তার নিজেরও একটি প্রিয় কবিতা।  
জানত না যুথিকার কণ্ঠে।

“এইরকম একটি ভাব কবিরের দোহাতেও মেলে। ‘পানীমে মীন পিয়াসী।  
চারদিকে জল, মাছ তবু জলের জন্তে তৃষিত। আমরা ঈশ্বরের দ্বারা পরিবৃত্ত  
হয়ে বেঁচে আছি। তবু বিশ্বাস হচ্ছে না যে তিনি আছেন ও তিনি আছেন  
বলেই আমরা আছি।’ যুথিকা বলে যায়, “তোমার যা হয়েছে তার নাম  
বিশ্বাসের সঙ্কট। তুমি বিশ্বাস হারিয়ে ফেলেছ।”

“আর অমরত্ব ?” মানস তার দ্বিতীয় প্রশ্নটার উত্তর শুনে চায়।

“আত্মা অমর, দেহ অমর নয়। দেহও যদি অমর হতো দেহীদের ভার  
পৃথিবী বহন করতে পারত না। স্বভূত বদ্ধ হলে জন্মও বদ্ধ হতো। জন্ম বদ্ধ  
হলে নরনারীর মিলনও নিষ্প্রয়োজন হতো। নরনারী বলে দুটি ভাগও থাকত  
না। আত্মার তো স্ত্রীপুরুষ ভেদ নেই। দেহেরই আছে। দেহের অস্তিত্ব  
মেনে নিলে জন্ম স্বভূতর ভারসাম্যও মেনে নিতে হয়। যতগুলি জন্ম ততগুলি  
স্বভূত। স্বভূত আছে বলে দুঃখ নেই, দুঃখ শুধু এই যে মায়ের কোল খালি করে  
নিরীহ নিষ্পাপ শিশু অকালে চলে যায়। জানি সে অন্তরের সন্তান, তার  
আত্মা অমর। তবু তার জন্তে প্রাণ ব্যাকুল। সেও কি মাকে ছেড়ে থাকতে  
পারে ?” যুথিকার স্বর ক্রম্ব হয়ে আসে।

“প্রকৃতির কোল থেকে যে গেছে ঈশ্বরের কোলে সে আছে। এখানেও  
যে প্রেম সেখানেও সেই প্রেম। বিশ্বাস করতে ইচ্ছা করে, কিন্তু বিশ্বাসের  
জোর খুঁজে পাচ্ছিনে। বেশী রকম ইনটেলেকচুয়াল হওয়ার এই পরিণাম।”  
আক্ষেপ করে মানস।

“সারাজীবন আকাশের তারাদের দিকে চেয়ে চেয়ে রাত কাটালেও তুমি বিশ্বাসের জোর পাবে না। ওপার থেকে কেউ কোনোদিন ফিরে আসেনি, আসবেও না, যাকে দেখে তোমার বিশ্বাস হবে যে সে অমর। ইঞ্জিয়গ্রাহ্য প্রমাণ কি সব ক্ষেত্রে সম্ভব? অন্তরে উপলব্ধি করতে হয়। আমার অন্তরের উপলব্ধি আমাকে অভয় দিচ্ছে যে আমার দেহ চলে গেলেও আমার অস্তিত্ব চলে যাবে না, আমার অস্তিত্বই আমার অমরত্ব। দেহের সঙ্গে সঙ্গে পরিচয়ও যাবে, আমাকেও কেউ চিনতে পারবে না, আমিও কাউকে চিনতে পারব না, তা লক্ষ্যেও আমি থাকব। তোমার ভালোবাসা আমার কাছে পৌঁছবে। আমার ভালোবাসা তোমার কাছে। ভালোবাসাই মৃত্যুকে জয় করতে পারে। তাই ভালোবাসার জন্তে মানুষ অকাতরে প্রাণ বিসর্জন করতে পারে। দেশপ্রেমও এর মধ্যে পড়ে।” যুথিকা নিঃসংশয়।

রাতের বেলা মুক্ত আকাশের তলে যে শান্তি তেমন শান্তি মানস আর কোথাও পায় না। তাই রোজ একবার শান্তির সন্ধানে আসে।

“বাইবেলে পড়েছি ভগবান মানুষকে নিজের আদলে বানিয়েছেন।” মানস বলে, “কিন্তু বাস্তবে দেখছি মানুষই ভগবানকে আপনার আদলে বানিয়েছে। আর মানববৃষ্ট ভগবানের কাছে ইচ্ছাপূরণ প্রত্যাশা করেছে। হতাশ হলে ভাবছে ভগবানই নেই। ভগবান যদি থাকেন তবে এত অন্বেষণ কেন, এত অত্যাচার কেন? এত দুঃখ, এত ব্যর্থতা কেন? কিন্তু ভগবান না থাকলেও এসব থাকত। প্রতিকারের জন্তে মানুষ কার কাছে যেত? যার কাছে যেত তার চেহারা তো সর্বশক্তিমানের মতো নয়। তার হৃদয় তো সর্ব জনের প্রতি প্রেম ও করুণায় পরিপূর্ণ নয়। মানুষের মধ্যে শ্রেষ্ঠ যারা তাঁরা যদি শক্তিমান হয়ে থাকেন তো প্রেমময় বা করুণাময় নন। যদি প্রেমময় বা করুণাময় হয়ে থাকেন তো শক্তিমান নন। ব্যক্তিকে ছেড়ে যারা সমাজের দিকে তাকাচ্ছে তারা কি দেখতে পাচ্ছে এমন এক সমাজ যে একাধারে শক্তিমান ও প্রেমময় বা করুণাময়? কই, সোভিয়েট রাশিয়ার দিকে তাকালে তেমন লক্ষণ তো দেখতে পাইনে। শক্তির সঙ্গে জ্ঞান মিশ খেতে পারে, কিন্তু প্রেম বা করুণা কি মিশ খায়? ইতিহাসে এর একটি কি দুটি দৃষ্টান্ত আছে। একটি তো আমাদের সম্রাট অশোক। হাজার বছরে হয়তো তেমন একজন ব্যক্তি জন্মাবেন। কিন্তু সমাজ বা সমষ্টি কি তাঁর অঙ্কুর হবে?”

“না বোধহয়। তবু সেই আদর্শের দিকেই অগ্রসর হবে।” যুথিকা



মানসকে ভরসা দেয়। “ভাবীকালের মানবসমাজ কেবল শক্তিমান ও জ্ঞানবান হবে না, প্রেমময় ও করুণাময়ও হবে। কিন্তু তা বলে ভগবানের স্থান নিতে পারবে না। ভগবান ভগবান। মানুষ মানুষ। পরমাত্মা পরমাত্মা। জীবাত্মা জীবাত্মা। পরমাত্মাকে বাদ দিয়ে জীবাত্মা নয়। আর সৃষ্টিকে বাদ দিলে স্রষ্টাই বা কাকে নিয়ে থাকবেন? তাই জীবাত্মাও অমর। কিন্তু জীবদেহ অমর নয়।”

“সেইখানেই তো দুঃখ। যাকে ভালোবাসি তাকে হারাতে কে চায়? তবু হারাতেই হয়। আজ না হোক কাল, কাল না হোক পরে একদিন। নিজেকেও তো একদিন এই মর্ত্তভূমি থেকে বিদায় নিতে হবে। এর পরে কোথায় আবার গতি হবে কেউ জানে না, জানতে পায় না, যে যা খুশি কল্পনা করে। কেউ পরজন্ম, কেউ পরলোক। কেউ নির্বাণ, কেউ মোক্ষ, কেউ ভক্তের সঙ্গে ভগবানের যুগল মিলন।” মানস উদাস কণ্ঠে বলে যায়।

“আজ বাদে কাল কী হবে তাও মানুষকে জানতে দেওয়া হয়নি। ইহ-কালের পর কী গতি হবে বা চিহ্নলোকের পর কোথায় গতি হবে সে তো আরো দূরের কথা। এসব ভাবনা বুধা ভাবনা। এসব নিজে না ভেবে তাঁকেই ভাবতে দাঁও যিনি তোমাকে ইহলোকে পাঠিয়েছেন। তুমি তো নিজের ইচ্ছায় জন্মাওনি।” যুথিকা মানসকে স্ততে নিয়ে যায়।

ঘরে পা দিয়ে মানস বলে, “গৃহ থাকলে গৃহী থাকে, গৃহী থাকলে গৃহ থাকে। জগৎ থাকলে ব্রহ্ম থাকে, ব্রহ্ম থাকলে জগৎ থাকে। ব্রহ্ম সত্য জগৎ মায়া যেমন অসঙ্গত তেমনি অসঙ্গত জগৎ সত্য ব্রহ্ম মায়া। আমরা ইনটেলেক-চুয়ালরা জগৎ সত্য মানি, ব্রহ্মের বেলা সন্দ্বিহান। কেউ কেউ তো সোজাসুজি নাস্তিক। অপর পক্ষে মানবসৃষ্ট ভগবান আর মানসে পারা যাচ্ছে না। মানুষের আদলে ভগবান নয়, মানুষ যত বড়োই হোক। মানুষের মাপে তাঁকে মাপা যায় না, সেটা বুধা।”

রায় বাহাদুর মাঝে মাঝে আলাপ করতে আসেন। তিনিও তো একদা জজ ছিলেন, অবসর নিলেও আইন আদালত সবসঙ্গে খোঁজ খবর রাখেন। হাইকোর্টের রিপোর্ট তাঁর নিত্য পাঠ্য। কিন্তু তাঁর অধিকাংশ সময় কেটে যায় শাস্ত্রচর্চায়। শাস্ত্র বলতে কেবল হিন্দুদের নয়, বৌদ্ধ, জৈন, খ্রীষ্টান, মুসলমান, পার্শীদের শাস্ত্রও। সরান জ্ঞান ও জিজ্ঞাসা নিয়ে। মানস তাঁর

সঙ্গে আলাপ করতে তাঁর বাড়ীতেও যায়। ধর্মের প্রশ্নে তাঁর বক্তব্য শোনে। নিজের সমস্তা শোনায়।

“দেখুন, মল্লিক সাহেব,” রায় বাহাদুর বলেন, “মানুষ সাধনা করলে দেবতার স্তরে পৌঁছতে পারে, বুদ্ধ হতে পারে, খ্রীষ্ট হতে পারে, কিন্তু ওই ছুটি রহস্য ভেদ করা তার সাধ্যাতীত। মৃত্যুর পর কী হয় তা সে মৃত্যুর ওপারে না গেলে জানতে পাবে না, এপার থেকে জানা অসম্ভব। মৃত্যু থেকে অমৃত্যে যাবার আকাজ্জা স্বাভাবিক। এইটুকু পৃথিবীর এইটুকু জীবনই যে একমাত্র জীবন তা মেনে নিতে মন বিমূখ। একপ্রকার না একপ্রকার পরকাল এক-ভাবে না আরেকভাবে ধর্মপ্রাণদের সকলেরই স্বীকৃত। ওপারে যে কিছুই নেই এটা এপার থেকে কেউ দেখবেই বা কী করে? আছে, এই প্রত্যয় মানুষকে ধর্মে মতি দেয়। এটা আপনি নিশ্চয়ই লক্ষ করেছেন যে হিন্দু মুসলমান শিখ খ্রীষ্টান কেউ কারো চেয়ে কম ধর্মপ্রাণ নয়। যে যার পথে চলে পরকালের পাথেয় সংগ্রহ করছে। সে পাথেয় তার চাইই।”

“কিন্তু যেখানে যাবার জন্তে পাথেয় সংগ্রহ সে যদি শূন্য হয়ে থাকে তবে তো পাথেয় সংগ্রহ বৃথা। যা আমাকে অমৃত করবে না তা নিয়ে আমি কী করব? মৈত্রেয়ীর মতো এই প্রশ্ন আমারও প্রশ্ন।” মানসকে এ ভাবনা জর্জর করে।

“এখানে অমৃত হচ্ছে এমন এক উপলব্ধি যার পরে আর কোনো উপলব্ধির প্রয়োজন থাকে না। বলা যেতে পারে পূর্ণত্বের উপলব্ধি। এই জীবনেই সেটা সম্ভব। সম্ভবের জীবনে সে রকম ঘটে বলে শুনেছি। কিন্তু সবাই তো আর সম্ভব নয়, হতেও পারে না। সাধারণ মানুষ আমরা, আমাদের কর্তব্য দিবা জীবনের দিকে এক পা এগিয়ে থাকা। কালক্রমে মানুষ জাতটাই দেবতার স্তরে উন্নীত হবে, যেমন হয়েছে পশুপাখীর থেকে মানুষের স্তরে। তার জন্তে হয়তো হাজার হাজার বছর লাগবে। লাখ লাখ বছরও লাগতে পারে। বিবর্তনের ইতিহাসে লাখ লাখ বছরও তো খুব বেশী সময় নয়। আসল কথাটা হলো মানবজাতির লক্ষ্য কী। সব মানুষই যদি একই সঙ্গে নির্বাণ লাভ করে তা হলে মানবজাতি বলে কারো অস্তিত্ব থাকবে না। আর সবাই যদি শেষ-বিচারের দিন স্বর্গে বা নরকে যায় তা হলেও মানবজাতির অস্তিত্বলোপ। সমগ্র মানবজাতির দিক থেকে যদি ভাবি তবে ক্রমবিকাশের পথে এগোতে এগোতে দেবজাতিতে পরিণত হওয়াই লক্ষ্য। পশু থেকে মানুষ যদি সম্ভব হয়ে থাকে

তবে মানুষ থেকে দেবতাও সম্ভব নয় কেন ? ততদিন আমরা অপেক্ষা করতে পারব না, এই যা হুঃখ !” রায় বাহাদুর হাসেন।

“কিন্তু আপনার সেই দেবজাতিও মরণশীল।” মানস ভোলে না। “আর বিবর্তন সেইখানেও থামবে না। তার পরেও থাকবে উচ্চতর স্তর। দেবতার চেয়েও উচ্চ। কিন্তু তা সম্বন্ধে মৃত্যুর অধীন। পরমাত্ম দীর্ঘায়িত করেও একদিন বিদায় নিতে হবে। দেবতা বলে যম ছাড় দেবে না। স্বর্গের দেবতা তো নয়। মর্ত্যের দেবতা।”

“শ্রী অরবিন্দ যে অতিমানবের স্বপ্ন দেখেছেন সেই অতিমানবকেও তার সাধের ভুলোক ত্যাগ করতে হবে। ভুলোক চিরদিনই মর্ত্যলোক। তা সম্বন্ধে সে সাধনার মূল্য আছে। তাতে মানুষের উচ্চতা বেড়ে যায়। ব্যক্তির বেলা তো নিশ্চয়ই। জাতির বেলাও কি না যথাকালে দ্রষ্টব্য।” রায় বাহাদুর বিধাষিত।

“ব্যক্তি নিয়েই তো জাতি। জাতির উচ্চতাও বাড়বে ক্রমে ক্রমে। হয়তো কয়েক শতাব্দী লাগবে। কিন্তু দেহত্যাগ করার সঙ্গে সঙ্গেই অতিমানবত্ব শেষ। তার পরে আর বিকাশ নেই, বৃদ্ধি নেই। তখনো সেই প্রগতি উঠবে, যা আমাকে অমৃত করবে না তা নিয়ে আমি কী করব ?” মানস ভোলে না। নিশ্চিতি চায়।

“ওই যে বলেছি। অমৃতত্ব মানে পূর্ণতার উপলব্ধি। কতক মানুষের বেলা এটা সত্য হয়েছে, অনেক মানুষের বেলাও সত্য হবে, এই লাইনে যদি প্রগতি হয় তো অধিকাংশ মানুষের বেলাও সত্য হবে। সব মানুষের বেলাই বা নয় কেন ? যদিও সাধারণ লোকের তাতে আগ্রহ আছে মনে হয় না। ওরা চায় এপারের সুখস্বাচ্ছন্দ্যকে ওপারে টেনে নিয়ে যেতে। ওদের কামনা স্বর্গ। ওদের ভীতি নরক। ধর্মও ওদের সেই শিক্ষা দিচ্ছে। উচ্চকোটির লাভকরী অবশ্য স্বর্গনরকের চেয়ে আরো উচ্চ লোক আকাজক্ষা করেন। এপারে না হোক ওপারে তাঁরাই উচ্চতায় উপনীত হন। তাঁদের লক্ষ্য পরমাত্মার সঙ্গে সায়ুজ্য। পরমাত্মা সম্বন্ধে ধারা নীরব তাঁরা সর্ববিধ বাসনা কামনার নির্বাণকেই পরমাত্মার সঙ্গে সায়ুজ্যের সমান মূল্য দেন। ইতি ইতি করে লাভক যেখানে পৌঁছন নেতি নেতি করেও সেইখানে পৌঁছতে পারেন। উপনিষদের ‘পূর্ণ’ আর বৌদ্ধশাস্ত্রের ‘শূন্য’ একই সত্য বলে মনে হয়। তা নইলে বৌদ্ধধর্ম ঈশ্বরবাদী না হয়েও এত মহান হতো না। ধর্মমাত্রই ঈশ্বরবাদী

নয়। আবার সোজাশুজি নিরীশ্বরবাদীও নয়। ঈশ্বরকে বাদ দেওয়া মানে ঈশ্বরকে অস্বীকার করা নয়। অস্বীকার যারা করেছে তারা কোনোরকম ধর্ম প্রতিষ্ঠা করে যেতে পারেনি। একালের মার্কসবাদীরাও পারবে না।” রায় বাহাদুর রায় দেন।

হঠাৎ মার্কসের নাম শুনে চমকে ওঠে মানস। বলে, “মার্কসও তো একজন প্রোফেট। ইতিমধ্যেই তাঁর প্রোফেসী ফলে গেছে দুনিয়ার স্ববৃহৎ একটি ভূখণ্ডে। ঈশ্বরকে বাদ দিয়েও যদি ধর্ম হয় তবে মার্কসবাদও একপ্রকার ধর্ম। বৌদ্ধদের যেমন বুদ্ধ শরণং গচ্ছামি ধর্ম শরণং গচ্ছামি সজ্জ শরণং গচ্ছামি মার্কসবাদীদেরও তেমনি মার্কস শরণং গচ্ছামি মার্কসবাদ শরণং গচ্ছামি পাটিং শরণং গচ্ছামি। সর্বহারার প্রতি ন্যায়ধর্মই ওদের ধর্ম। ঈশ্বরকে যদি একজন ব্যক্তি বলে না ভাবি, একটি স্পিরিট বলে ভাবি, তবে সে স্পিরিট মার্কস, লেনিন প্রমুখ প্রোফেটদের মাধ্যমেও কাজ করছে। তাঁদের পশ্চাতে যে প্রেরণা সে প্রেরণাও স্পিরিচুয়াল। তা না হলে কোটি কোটি লোক প্রাণ দিতে ছুটে যায় কেন? তা কি শুধু খেতে পরতে পাবার জন্যে? ঈশ্বরকে যদি একটি নৈর্ব্যক্তিক বিধান বলে ভাবি তবে সে বিধান সামাজিক ন্যায়ের পশ্চাতেও সক্রিয়। সামাজিক ন্যায়ের স্বপ্ন বুদ্ধ যীশু মহম্মদেরও ছিল। তাঁদের প্রবর্তিত ধর্মের বিশ্বব্যাপী প্রসারের মূলেও সেই নৈতিক বিধান। কিন্তু কালক্রমে তাঁদের অনুগামীদের মধ্যেও সামাজিক অন্যায় এসে পড়েছে। তাই পরম খ্রীষ্টভক্ত রুশ দেশের জনগণও খ্রীষ্টকে ছেড়ে মার্কসকে ধরেছে।”

“Man does not live by bread alone. সমাজব্যবস্থা নিখুঁত হলেও মানুষ তাই নিয়ে পরিতৃপ্ত হবে না। এই দেখছেন না আমার কিসের অভাব? কেন তবে আমি ক্ষুধিত ও তৃষিতের মতো ধর্মশাস্ত্র মন্বন করে সার সত্য গ্রাস করি? কারণ আমি অনুভব করি যে এই বিশ্বপ্রপঞ্চ আপনাতে আপনি সম্পূর্ণ নয়। এর আড়ালে আছেন একজন ঋর নাম নিয়ে রূপ নিয়ে হাজারও মতভেদ, কিন্তু ঋর অস্তিত্ব আমার অস্তিত্বের সঙ্গে ওতপ্রোতভাবে জড়িত। দুই অস্তিত্বই একই অস্তিত্বের ভিতর বাহির। জীবনের সার্থকতা ধনসম্পদে বা পরাক্রমে বা জ্ঞানবুদ্ধিতে নয়, ভগবানকে ও তার সৃষ্টিকে আপনায় করে। কবির কথায়, দেবতারে প্রিয় করি প্রিয়রে দেবতা। আমার ব্যক্তিগত সাধনাও এই বৃগল প্রেমের সাধনা। এই সাধনায় এ জন্মে যদি এগিয়ে থাকি তবে পরজন্মের কথা পরজন্মে হবে।” রায় বাহাদুর শেষ করেন।

## ॥ ছয় ॥

আরেক দিন কথাপ্রসঙ্গে রায় বাহাদুর মানসকে একটা চমক দেন।

বলেন, “এই যে যুদ্ধ এটাও লীলাময়ের লীলা। যুদ্ধক্ষেত্র তাঁর লীলাভূমি। বৃন্দাবনেও যিনি কুরুক্ষেত্রেও তিনি। শ্রামের বাঁশি শুনে যারা রাসলীলায় মেতেছিল তারাই মেতেছে রক্তরাঙা হোলিখেলায়। তাদের কাছে ‘মরণ রে, তুচ্ছ’ মম শ্রাম সমান’ মল্লিক সাহেব, মরণেরও একটা আনন্দ আছে। প্রেমিকের সঙ্গে মিলনের আনন্দ। তা নইলে পতঙ্গেরা কেন স্বেচ্ছায় আগুনে কাঁপ দেয়? সেই আগুনই তাদের কাছে শ্রাম সমান। পারেন কি আপনি পতঙ্গদের নিবৃত্ত করতে? গোপীদের নিবৃত্ত করতে? তা হলে পারবেন কেন সৈনিকদের নিবৃত্ত করতে?”

মানস বলে, “এমন আজব কথা কখনো আমি শুনিনি। যিনি বৃন্দাবনের কৃষ্ণ তিনি কুরুক্ষেত্রের কৃষ্ণ কি না এ বিষয়ে পণ্ডিতদের মধ্যে বিমত আছে। সেটা না হয় মেনে নেওয়া গেল। কিন্তু কুরুক্ষেত্র কেমন করে বৃন্দাবনের মতো লীলাভূমি হতে পারে? সৈনিকরা কেমন করে গোপী হতে পারে? মরণমারণ কেমন করে হোলিখেলা হতে পারে? শ্মশান কেমন করে কুঞ্জবন হতে পারে?”

“যেখানেই তিনি সেখানেই তাঁর লীলা, সেখানেই তাঁর লীলাসহচর সহচরী। যুদ্ধক্ষেত্রই বা ব্যতিক্রম হবে কেন? আপনাকে আরো গভীরে প্রবেশ করতে হবে, মিস্টার মল্লিক। আমি যুদ্ধবিগ্রহের পক্ষপাতী নই, সাত্ত্বিক মানুষ। কিন্তু কিলের আকর্ষণে পতঙ্গের মতো শত সহস্র লোক লড়াই করতে ছুটে যাচ্ছে প্রাণের মায়া না রেখে? তা জার্মানরাই হোক আর রাশিয়ানরাই হোক আর ইংরেজরাই হোক আর ভারতীয়রাই হোক। আপনাদের ওই রাজনৈতিক বা অর্থনৈতিক ব্যাখ্যাই সব কথা নয়। মতবাদভিত্তিক ব্যাখ্যাতেও মন মানে না। খুঁজতে হবে আধ্যাত্মিক ব্যাখ্যা। গীতা পড়ে আমি এর একটা মানে পাই। কিন্তু গীতার সঙ্গে ভাগবতকেও মিলিয়ে পড়ি। কুরুক্ষেত্র আর বৃন্দাবন একই লীলাময়ের দুই লীলাভূমি।” রায় বাহাদুর তাঁর এই ধারণায় অটল।

“কিন্তু, রায় বাহাদুর,” মানস নিবেদন করে, “সেকালে সৈনিকরাই কেবল যুদ্ধে য়েত। যুদ্ধক্ষেত্রে বলে একটা স্থানও নির্দিষ্ট থাকত। এখন তো যে-কোনো মাহুষের উপর যে কোনো জায়গায় বোমা বর্ষণ হতে পারে। মরবার আগে সে বলতেও সময় পাবে না যে, ‘মরণ রে তুহঁ মম শ্রামসমান’। সেকালে উভয়পক্ষের হাতে অস্ত্র থাকত। একালে আপনার বা আমার হাতে অস্ত্র নেই, তবু অতর্কিতে আমরাও আক্রান্ত হতে পারি। লীলাময়ের এ কেমন তরো লীলা। গীতায় বা ভাগবতে বা অল্প কোনো শাস্ত্রে এর ব্যাখ্যা খুঁজে পাওয়া যাবে না। অর্জুনের হাতে অস্ত্র ছিল, কাজেই তাঁকে বলতে পারা যেত, হে অর্জুন, যুদ্ধ করো। নিমিত্তমাত্রো ভব সবাসাচী। কিন্তু যাদের হাতে অস্ত্র নেই, যারা যাক্ষা নয়, সাধারণ নাগরিক, তাদের প্রতি সে রকম অহুজ্জা কি পরিহাস নয়? যুদ্ধক্ষেত্রে যেতে আমিও একপ্রকার ব্যাকুলতা অহুভব করি। মরণের সঙ্গে মিলনের জন্মে নয়, অন্মায়ের প্রতিরোধের জন্মে। অশুভ শক্তির সঙ্গে শুভ শক্তির বিরোধ আদিকাল থেকে চলে আসছে। প্রাচীনেরা তাকে বলতেন দেবাহুরের বন্দ। ফাসিস্টরাই আজকের দিনে অশুভ শক্তির প্রতিক্রপ। ভারতের উপরেও যে ওদের নজর নেই তা নয়। রাশিয়া যদি হেরে যায় ওরা স্থলপথে ভারতে এসে হাজির হবে। তখন তো লড়তেই হবে। না আবার আমরা পরাধীনতা বরণ করব? লীলাময়ের লীলা বলে নিশ্চিত থাকা যায় না, রায় বাহাদুর। আমি গভীরভাবে চিন্তিত।”

“আপনি অকারণে চিন্তা করছেন, মিস্টার মল্লিক।” রায় বাহাদুর আশ্বাস দেন। “ইংরেজ এখনো শক্তিমান। তাকে হারাতে পারে এমন শক্তি কার আছে?”

প্রসঙ্গটা রাজনীতির দিকে মোড় নেয়। মানস বলে, “যুদ্ধকালে সবকিছুই তো অনিশ্চিত। ইংরেজ যে হারবে না এ বিষয়ে নিশ্চিত হওয়া যায় কী করে? সেদিন ডানকার্কে ইংরেজের কী দশা দেখা গেল?”

“ওটা পরাজয় নয়, পশ্চাদ্ অপসরণ। যুদ্ধকালে অমন কতবার হয়, কতবার হবে। পুলিশ সাহেব রবিন্স সেদিন আমাকে বলছিলেন, “আমরা প্রতিটি যুদ্ধে হারব, কিন্তু শেষ যুদ্ধে জিতব। অলস্ ওয়েল ছাট এণ্ড্ ওয়েল।” এই হলো ওদের জাতীয় দর্শন। রবার্ট ক্রসও তো বার বার লড়েছিলেন, বার বার হেরেছিলেন, আখেরে জিতেছিলেন। ওটা স্বচদেরও জাতীয় দর্শন। ব্রিটিশ

বলতে স্বচও বোঝায়। আপনি নিশ্চিত বলে ধরে নিতে পারেন যে ওরা অবশেষে জয়ী হবে।” রায় বাহাদুর নিঃসংশয়।

“স্বটল্যাণ্ডের লোকদের স্বচ বললে ওরা অপমান বোধ করে, রায় বাহাদুর।” মানস শুধরে দিয়ে বলে, “স্বচ নয়, স্বচ্টস।” যেমন আসামী নয়, অসমীয়া। উড়ে নয়, ওড়িয়া।”

‘ও: তাই নাকি?’ রায় বাহাদুর জিব কেটে বলেন, “তা হলে তো ম্যাকফারসনকে আমি না জেনে অপমান করেজিলুম। ঢাকায় যখন উনি জেলা জজ তখন আমি সাব-জজ। অমন অমায়িক ভদ্রলোক আমি দেখিনি। হিন্দু আইন নিয়ে খটকা বাধলে আমার চেয়ারে ছুটে আসতেন। জুডিসিয়াল সেক্রেটারি হয়েই আমাকে ডেকে পাঠান। বলেন, আমার অধীনে অ্যাসিস্ট্যান্ট সেক্রেটারি হতে আপনার আপত্তি আছে? শুধুন কথা। ত্যাড়াকে বলছেন, ত্যাড়া, পরমাম খাবি? ত্যাড়া বলছে, আঁচাব কোথায়? সাহেবের আগ্রহ দেখে আমি দর হাঁকি, আমার নিচে ষাঁদের স্থান তাঁরা প্রমোশন পেয়ে অ্যাডিশনাল ডিসট্রিক্ট জজ হবেন, আর আমিই কিনা সময়ে সুযোগ পাব না। একেই কি বলে ব্রিটিশ জাস্টিস? সাহেব মুচকি হেসে বলেন, আমি থাকতে আপনাকে সুপারসীড করে কার সাধ্য! এর মানে তখন বুঝতে পারিনি, মিস্টার মল্লিক। ম্যাকফারসন কিছুদিন বাদে হাইকোর্টের জজ হয়ে যান। তখন আমি গিয়ে অভিনন্দন জানাই। তখন কী বলেন, শুনবেন? বলেন, আপনার জন্তে আমি যা করার করেছি। ওয়েট অ্যাণ্ড সী। সত্যি, অমন ভালো মানুষ আর দেখা যায় না। অ্যাডিশনাল না হয়ে সরাসরি ডিসট্রিক্ট জজ। বছর না ঘুরতেই রায় বাহাদুর। সাহেবই প্রথম অভিনন্দন জানান। লেখেন, হিন্দু আইন তো আমি আপনার সৌজন্মেই শিখেছি। শুধুন কথা। আমি নিজে কতটুকু বা জানি! হিন্দু আইন যে অনন্ত পারাবার।” রায় বাহাদুর থামেন।

“আমাকেও দেখছি আপনার কাছে পাঠ নিতে হবে, রায় বাহাদুর। যদি আপনার অবসর থাকে।” মানস সবিনয়ে বলে।

“ঢালা নিমজ্ঞ রইল। যখন খুশি শুভাগমন করবেন। তবে আইনচর্চায় আজকাল আমার মন নেই। এখন আমার ইহলোকের পাট গুটিয়ে নেবার সময়। যেদিন ডাক আসবে সেদিন যেন বকেয়া পাট কিছু না থাকে। দারাসুত কেউ আমার সঙ্গে যাবে না। স্বপ্নের মতো মিলিয়ে যাবে এই

সংসার। মনে হবে এতক্ষণ যেন একটা স্বপ্ন দেখছিলুম। মা বলতেন এটা মায়ার সংসার। কেউ কারো নয়। সেই কথাই মনে পড়ছে আজকাল। মা অনেকদিন আগে চলে গেছেন। কোথায় আছেন জানিনে। কে জানে হয়তো পরলোকে আবার তাঁর সঙ্গে দেখা হবে। কিংবা পরজন্মে আবার তাঁর কোলে জন্মাব। বুঝতে পারছি এটাও একপ্রকার মায়ার বন্ধন। কে কার মা, কে কার ছেলে! শঙ্করাচার্য বলে গেছেন কা তব কাস্তা কস্তে পুত্রঃ। আগে তাঁকে মায়াবাদী বলে আমল দিইনি। এখন মনে হচ্ছে তিনি সেটা উপলব্ধি করেছিলেন। আমিও একটু একটু কবে উপলব্ধি করছি।” রায় বাহাদুর বিমনা বন।

মানস নীরব হয়ে ভাবে। তার পরে বলে, “আপনি আমি থাকি না থাকি মানব জাতি থাকবেই। মানবজাতি থাক না থাক প্রাণীলোক থাকবেই। প্রাণীলোক থাক না থাক নক্ষত্রলোক থাকবেই। নক্ষত্রলোক থাক না থাক স্পেস টাইম থাকবেই। স্পেস টাইম যদি থাকে বিবর্তন বন্ধ থাকবে না। জড় থেকে আবার বিবর্তিত হবে জীব, জীব থেকে মানুষ বা মানুষের মতো বা মানুষের চেয়ে শ্রেষ্ঠ কোনো সত্তা। এইপর্যন্ত আমি বুঝি। এইপর্যন্ত আমি নিশ্চিত। কিন্তু মৃত্যুর পরে যদি স্পেস টাইমের বাইরে চলে যাই তা হলে আমি আদৌ থাকব কি না, থাকলে আবার স্পেস টাইমের ভিতরে ফিরে আসব কি না এর উত্তর আমি জানিনে। এক্ষেত্রে যুক্তির নয়, বিশ্বাসের আশ্রয় নিতে হয়। আর সে বিশ্বাসও ভিত্তিহীন নয়। ইনটুইশনের উপর প্রতিষ্ঠিত। আমার ইনটুইশন আমাকে বলছে যে আমি স্পেস টাইমের ভিতরেও যেমন আছি বাইরেও তেমনি আছি। আছি এই মুহূর্তেই। থাকব পরের মুহূর্তেও। মাঝখানে ছেদ পড়বে না, পড়তে পারে না। মৃত্যুও ছেদ ঘটাবে না, ঘটতে পারে না। কিন্তু মৃত্যুর পরে কী, কোথায়, কোন্ রূপে, কোন্ নামে, কোন্ লোকে এসব প্রশ্নের উত্তর এখনো পাইনি, যারা পেয়েছেন ও লিপিবদ্ধ করে গেছেন তাঁদের কথার উপর নির্ভর করতে হচ্ছে। তাঁরাই যে শেষ কথা বলে গেছেন তা নয়। সামনে রয়েছে আরো শত শত বৎসর, সহস্র সহস্র বৎসর। মানুষ জাতটাই যদি আত্মঘাতী না হয় তবে আরো কত মুনি ঋষি সাধু সন্ত বুদ্ধ জিন প্রোফেট জন্মাবেন। তাঁদের বাণীও লিপিবদ্ধ হয়ে মানুষের এইসব প্রশ্নের উত্তর জোগাবে।”

“কিন্তু আমার সামনে তো শত শত বৎসর নেই, সহস্র সহস্র বৎসর তো



দূরের কথা। বড়ো জোর দশ বছর। মানুষের পরমায়ুর বাইবেল নির্দিষ্ট সীমা। অনাগতদের অজানা উত্তর শোনার বা পড়ার সৌভাগ্য আমার হবে না। সামনের পাঁচ দশ বছরে নতুন আর কী শুনব বা পড়ব ! আপনারা মানবিকবাদী, মানুষের কাছে আপনাদের অফুরন্ত প্রত্যাশা। বিজ্ঞানের দিক থেকে, রাজনীতির দিক থেকে, অর্থনীতির দিক থেকে, সমাজনীতির দিক থেকে সে প্রত্যাশা সত্যিই অপরিসীম। কিন্তু আধ্যাত্মিকতার দিক থেকে মানুষ আর একটি পা-ও এগোতে পারবে বলে মনে হয় না। পরবর্তীকালে যেসব মহাপুরুষ জন্মাবেন তাঁরা পূর্ববর্তীদের উত্তরবর্তী। পূর্বতনের যে অংশটা পুরাতন সেটাকে তাঁরা নতুন রূপ দেবেন, কিন্তু যে অংশটা চিরন্তন বা সনাতন সেটার হেরফের কী করে সম্ভব ? ইটারনাল ভেরিটি তিন হাজার বছর আগে যেমন ইটারনাল ছিল আজও তেমনি ইটারনাল, তিন হাজার বছর পরেও তেমনি ইটারনাল থাকবে। সত্য আর অহিংসা, প্রেম আর সৌন্দর্য, ক্ষমা আর করুণা, মোহ আর নির্বাণ, শৈলশিখরে যীশুকথিত beatitude, এসব হলো চিরন্তন বা চিরন্তন। পরে যারাই আসবেন তাঁরাই এইসব কথা বলবেন। নতুন করে বলবেন। আধ্যাত্মিকতার ক্ষেত্রে সত্যিকার নতুনত্ব আমি প্রত্যাশা করিনে, মিষ্টার মল্লিক, তবে চিরন্তনত্ব নব নব উন্মেষ লাভ করতে পারে।’ রায় বাহাদুর বিশ্বাস করেন।

পুরাতন আর নতুন ছাড়া আরো একটি ‘তন’ আছে। চিরন্তন। মানসও এটা জানত ও মানত। তাই তর্ক করে না। শুধু যোগ করে, নৈতিকতার দিক থেকে প্রগতির প্রয়োজন আছে, রায় বাহাদুর। সামাজিক ত্রায় রুশদেশে বিপ্লব ডেকে এনেছে। বিপ্লবের ভয়ে জার্মানরা যুদ্ধ বাধিয়ে বসেছে। গত শতাব্দীতে আমেরিকার গৃহযুদ্ধ ক্রীতদাসদের প্রতি সামাজিক ত্রায়ের প্রয়োজনেই হয়েছিল। ভারতের ঘরেও সামাজিক অত্যাচার প্রতিকারের জন্যে কাঁদছে। একদিন গৃহযুদ্ধের রূপ নিতে পারে। আমি কি নিশ্চিত হয়ে অধ্যাত্মচর্চা করতে পারি ? স্বথের বিষয় মহাত্মা গান্ধী এ বিষয়ে সজাগ ও সক্রিয়। নিছক রাজনৈতিক মুক্তি তাঁর অধিষ্ট নয়।”

“একথা মানতেই হবে যে আমরা হিন্দুরা আধ্যাত্মিকতাকে যত উচ্চে স্থান দিয়েছি নৈতিকতাকে তত উচ্চে নয়। মহাত্মা গান্ধীকে সেইজন্মেই আমি বুদ্ধ ও যীশুর সঙ্গে তুলনা করি। কিন্তু সমাজের বাইরে সজ্ঞ বা চার্চ গঠন করা এক জিনিস আর সমাজব্যবস্থাকে ত্রায়সঙ্গত রূপ দেওয়া আরেক জিনিস।

যাদের হাতে শস্ত্র, যাদের হাতে শাস্ত্র আর যাদের হাতে উৎপাদনের উপায় তারাই দেশে দেশে যুগে যুগে সমাজের ব্যবস্থাপনা করেছে। নীতিবিদদের কথায় কান দেয়নি। তাঁরা তাঁদের মঠবাড়ীতে বসে জপতপ করেছেন ও তাঁদের গৃহীশিষ্যদের দৃষ্টি ইহলোকের থেকে পরলোকের দিকে ফিরিয়ে দিয়েছেন, আর ইহকালের থেকে পরকালের দিকে। কার্ল মার্কস এসে ভরসা দেন যে জ্বালের প্রতিষ্ঠা এই জগতেই ও এই জন্মেই সম্ভব। কিন্তু তাঁর শিষ্যরাও দেখছি শস্ত্রব্রত ও শাস্ত্রব্রত, ক্ষত্রিয় আর ব্রাহ্মণ। তফাতের মধ্যে এই যে তাঁদের সমাজে বৈশ্য নেই, উৎপাদনের উপায় বৈশ্যদের হাতে নেই। ব্রাহ্মণ ক্ষত্রিয় যদি অন্ন নামে থেকে যান তবে শূদ্রদের মাথায় কাঁঠাল ভেঙে থাকেন।” রায় বাহাদুর সন্দেহ করেন।

“কিন্তু গান্ধীজী তো শস্ত্র বা শাস্ত্রের উপর নির্ভর করছেন না। সজ্ব গঠনেও তাঁর অনিচ্ছা। গান্ধী সেবাসজ্ব নিজের হাতেই একরকম ভেঙে দিয়েছেন। কংগ্রেসকেও তিনি স্বাধীনতা অর্জনের বাহন হিসাবে দেখেছেন, সামাজিক জ্বায় সংস্থাপনের বাহন হিসাবে নয়। তা হলে তাঁর শস্ত্র ঘাঁটি কোথায়? ওই সেবাগ্রামের আশ্রম?” মানস ভেবে পায় না।

রায় বাহাদুর এর উত্তরে বলেন, “কেন? বিড়লা আর বাজাজ? ভারতের শ্রেষ্ঠী সম্প্রদায়? এঁরা ষোপঞ্জিত ধনের ট্রাস্টী হবেন। তা হলে রাশিয়ার মতো এঁদের নিকেশ করতে হবে না। দেখুন, মিস্টার মল্লিক, গান্ধীজীর মতবাদ যত মহৎ হোক না কেন তিনি ডাইনীর হাতে তাঁর শিশুকে সঁপে দিয়ে যাচ্ছেন। ধনিকরা কখনো ট্রাস্টী হতে পারে না। দেবোত্তর, ব্রহ্মোত্তর, পীরোত্তর, ওয়াকফ সব কিছুই আমি দেখেছি। সেসবও তো ট্রাস্টীদের হাতে সঁপে দেওয়া সম্পত্তি। যে যার নিজের বংশের কোলে ঝোল টানে। আদালত না থাকলে কারো কাছে জবাবদিহির দায় থাকত না। গান্ধীজী তো আবার আদালত পছন্দ করেন না, পুলিশ পছন্দ করেন না, জেল পছন্দ করেন না। শুধুমাত্র ব্যক্তির মহত্বের উপর ছেড়ে দেওয়া ও মাঝে মাঝে তার শোষণের বিরুদ্ধে সত্যগ্রহণ করা এভাবে কি নতুন ব্যবস্থা গড়ে উঠতে পারে? রাশিয়ায় দেখছি নিউ সোশিয়াল অর্ডার হয়েছে, কিন্তু সেটা নিউ মরাল অর্ডার নয়। নিউ মরাল অর্ডার না হলে ওর নৈতিক ভিত্তি দুর্বল। স্বাধীনতার পরে আমাদের নেতারাও যেটা গড়বেন সেটা যদি ধনিকদের মহত্বনির্ভর হয় তো সেটাকেও আমি মরাল অর্ডার বলতে পারব না। ব্রিটিশ সরকারও তো দাবী করেন

যে তাঁরা ভারতীয় প্রজাদের ট্রাষ্টী। তাঁদের সেই হাতীর খোরাক জোগাতে গিয়ে ভারতের জনগণ নিঃশ্ব। আর সেটার প্রতিকার করতেই তো গান্ধীজীর অভিযান। বিদেশী ট্রাষ্টীরা থাকবে না, কিন্তু স্বদেশী ট্রাষ্টীরা তো থাকবেন। তাঁরা থাকতে সেটা নিউ সোশিয়াল অর্ডার হতে পারে কি? মহাত্মার কাছে এই হবে আমার প্রশ্ন। না, এই মুহূর্তে নয়। স্বরাজের পরে। যদি স্বরাজের পর তিনি ও আমি বৈচে থাকি।” রায় বাহাদুর অতটা নিশ্চিত নন।

“থাকবেন, থাকবেন, বৈচে থাকবেন।” মানস আশ্বাস দেয়। সে বিলেত থেকে দত্তবিশ্বাসের চিঠি পেয়ে জানতে পেরেছে চার্চিলের মন্ত্রীমণ্ডলীর কয়েকজন বিশিষ্ট সদস্য এখন ভারতের স্বায়ত্তশাসনের জন্তে তাঁর উপর চাপ দিচ্ছেন। বাশিয়ার জন্তে লড়তে হলে ভারতের সঙ্গে মিটমাট শ্রেয়। নইলে ভারতীয় জাতীয়তাবাদীদের সঙ্গেও লড়তে হবে। তার মানে আরো একটা ফ্রন্টে।

বিলেত থেকে চিঠিপত্র আসা বন্ধ হয়ে যায়নি, বিলম্বিত হয়েছে। দত্তবিশ্বাস কালে ভদ্রে লেখে। লেখে মানসকে। আর মিলিও যে সম্পূর্ণ নীবব তা নয়। যুথিকাকে নিজের ঘবসংসাবের খবব জানায় ও তার ছেলে-মেয়ের কুশল জানতে চায়।

দত্তবিশ্বাস আজকাল ভারত থেকে বইয়ের অর্ডার পাওয় না বলে দোকানটা বিক্রী করে দিয়েছে। যুদ্ধের মরসুমে ব্রিটিশ ব্রডকাস্টিং করপোরেশনে একটা গণ্যমান্য পদ তত্ত্বিরের জোরে জোগাড় করে নিয়েছে। পোশাক তো তার বরাবরই নিখুঁত ছিল, চোদ্দ বছর বিলেতে বাস করে সে তার ইংরেজী উচ্চারণটাকেও সাহেবদের মতো করেছে। বি. বি. সি. ওটার উপরেই বেশী গুরুত্ব আরোপ করে। কর্মসূত্রে বহু পদস্থ ইংরেজের সঙ্গে তার মেলামেশা। সাধারণত মদের গেলাসের উপরে। এ ছাড়া লেবার পার্টির পার্লামেন্ট সদস্যদের সঙ্গেও তাব বনিষ্ঠ যোগাযোগ। কৃষ্ণ মেননের সঙ্গেও তার দীর্ঘকালের বন্ধুতা।

“মাই ডিয়ার মালিক,” ইংরেজীতে লিখেছে দত্তবিশ্বাস, “বেশীর ভাগ ইংরেজই এখন ভারতীয়দের সঙ্গে মিটমাট করতে ব্যগ্র। কিন্তু স্বাধীনতা মানে কি দায়িত্বহীনতা? যে দেশ স্বাধীনতা পাবে সে কি তার সব দায়দায়িত্ব অস্বীকার করবে? যুদ্ধ যতদিন না শেষ হচ্ছে ততদিন যুদ্ধের দায়িত্বও স্বীকার করতে হবে। যেমন ব্রিটেনকে তেমনি ভারতকে। ক্রান্তির মতো বেইমানী

করলে চলবে না। ফরাসীরা তাদের আধখানা দেশ জার্মানদের ছেড়ে দিয়েছে। বাকী আধখানায় তাঁবেদার সরকার গঠন করেছে। ভারতীয়রা যদি তেমন কিছু করে তো সর্বনাশ। ইণ্ডিয়া অফিস সন্দেহ করছে যে কংগ্রেস নেতাদের একভাগ শত্রুর সঙ্গে সন্ধি করবার স্বাধীনতা হাতে রাখতে চান। গান্ধীজীর ঝোঁকটাও শাস্তির জন্তে সন্ধির দিকে। যুদ্ধের ফলাফল অনিশ্চিত বলে তিনি যুদ্ধের দায়িত্ব নিতে নারাজ। তাঁর যেমন অসামান্য প্রভাব তিনি সরে দাঁড়ালে নেহরুও সরে দাঁড়াবেন। ভিতরে ভিতরে অনেকেই যুদ্ধের দায়িত্ব নিতে রাজী। কিন্তু গান্ধী যদি বলেন, ‘না’, তা হলে সকলেই বলবেন, ‘না’। একজন কি ছ’জন বাদে। কংগ্রেসের সঙ্গে যদি মিটমাট না হয় তো লীগের সঙ্গেই বা মিটমাট হবে কী করে? মেজরিটিকে বাদ দিয়ে মাইনরিটির সঙ্গে মিটমাট হয় না। কিন্তু মেজরিটির সঙ্গে মিটমাট যেদিন হবে সেদিন মাইনরিটির সঙ্গেও মিটমাট হওয়া চাই। মাইনরিটিকে বাদ দিয়ে মেজরিটির সঙ্গেও মিটমাট হয় না। বিশেষ করে সে মাইনরিটি যখন ইণ্ডিয়ান আর্মির শতকরা চল্লিশ জন। আমি মুসলমানদের কথাই বলছি। শিখদের জড়ালে শতকরা পঞ্চাশ ছাড়িয়ে যায়। ওরা সবাই লড়তে উদ্গ্রীব, কিন্তু ওদের স্বার্থ বলি দিলে ওরা লড়বে কেন? আর ওরা যদি না লড়ে তবে আফ্রিকায় আর পশ্চিম এশিয়ায় শত্রুপক্ষই জিতবে। এর পরে জাপান যদি যুদ্ধে নামে তা হলে দক্ষিণপূর্ব এশিয়াতেও শত্রুপক্ষের জিৎ। অঙ্ক গান্ধীভক্তদের এসব বোঝায় কে?’

এর উত্তরে মানস লেখে স্বকুমারকে, “বোঝাবেন তিনিই যিনি রাশিয়ায় গিয়ে স্টালিনকে বুঝিয়েছেন। তার মানে সার স্টাফোর্ড ক্রিপ্‌স। ক্রিপ্‌স যদি ভারতকেও রাশিয়ার সঙ্গে সমান গুরুত্ব দেন তা হলে তাঁকে একবার এদেশে পদার্পণ করতে হয়। তার আগে গান্ধীজীর সহকর্মীদের জেল থেকে খালাস হওয়া চাই। নইলে তিনি তাঁদের সঙ্গে পরামর্শ করবেন কী করে? হাজার হোক, গান্ধীজী একজন গণতান্ত্রিক নেতা। যুদ্ধকালে চার্চিল যেদিকে যান সকলেই সেদিকে যান। তেমনি সত্যগ্রহকালে গান্ধীজী যেদিকে যান সকলেই সেদিকে যান। সত্যগ্রহও তো একপ্রকার যুদ্ধ। কংগ্রেস নেতারা সত্যগ্রহ করতে চাননি। গান্ধীজীও তাঁদের বতর্দিন সম্ভব নিরস্ত করেছেন। যুদ্ধকালে মিটমাট হবে না সন্দেহই ওরা সিভিল লিবার্টির দাবীতে সত্যগ্রহে নেমেছেন। মিটমাট যদি যুদ্ধকালে না হয় তো কোনো কালেই হবে না।

যুদ্ধের পর ব্রিটিশ শক্তি আরো নিরঙ্কুশ হবে। এটাই কংগ্রেস মহলের ধারণা। যুদ্ধবিগ্রহ কি কেবল সৈনিকদের নিয়েই হয়? সারা ভারতে, অসামরিক জনগণকে অনাহারে রেখে, অর্ধনগ্ন রেখে, যুদ্ধ জয় করতে গেলে যা হয় তা গত মহাযুদ্ধের সময় জার-শাসিত রাশিয়ায় দেখা গেছে। তার নাম বিপ্লব। ভারতের অসামরিক জনগণকে বিপ্লবের মুখে ঠেলে দেওয়াটা অঙ্ক চাচিল ভক্তদের অদূরদর্শিতা। বিপ্লব একবার আরম্ভ হয়ে গেলে গান্ধীজীরও আর কোনো ভূমিকা থাকবে না। কংগ্রেসেরও না। স্বতরাং সময় থাকতে তাঁদের ভূমিকা তাঁরা সেরে রাখছেন। মাইনরিটির ধূয়ো তুলে ব্রিটেনের রক্ষণশীলরা যত বেশী কালহরণ করবেন তত বেশী অল্পতাপ করবেন। তখন তাঁদের সরাসরি মুখোমুখি হতে হবে সহিংস বিপ্লবীদের। মাঝখানে গান্ধী ও তাঁর সহকর্মীরা থাকবেন না। জিন্মা ও মুসলিম লীগ থাকতে পারে, কিন্তু বিপ্লবের তোড়ে তাদেরও ভেসে যেতে কতক্ষণ!”

মানস জানত যে চাচিলকে কেউ এসব কথা বোঝাতে পারবে না। তিনি ভারতীয় জনমতকে গ্রাহ্যই করেন না। সৈন্য সামন্ত পেতে অস্ববিধে না হলেই তিনি নিশ্চিন্ত। তবু ইংলণ্ডের জনমতের উপরে তার ভরসা ছিল। সেদেশের জনমত অনড় অচল নয়। তার প্রমাণ গান্ধী-আরউইন প্যাক্ট। সেই নজীবে একদিন গান্ধী-লিনলিথগো প্যাক্টও সম্ভবপর। মানস আশাবাদী।

ওদিকে যুথিকাকে লিখেছিল মধুমালতী, “গত শরৎকালের ব্যাটল অভ ব্রিটেনে ইংরেজ জাতির সাহস, শৃঙ্খলা ও মনোবল প্রত্যক্ষ করে আমি উপলব্ধি করেছি যে ওরা অপরাধেই! এ যুদ্ধের ফলাফল আর যাই হোক ব্রিটেনের পতন নয়। ফ্রান্সের সঙ্গে এইখানেই এদের তফাৎ। বিপ্লবের দেশ ফ্রান্স। এ কাঁ তার পরিণাম। তা হলে আমাদের দেশের বিপ্লবীদের কী আশা! যাক, যুদ্ধটা তো আগে শেষ হোক, তার পর দেশে ফিরে গিয়ে ভাষা যাবে। ইতিমধ্যে আমি পড়ে গেছি একটু মুশকিলে। আমার ধারণা ছিল এদেশে কেউ আমাকে চেনে না। আমি অপরিচিত। কিন্তু আমাদের সেই সার জন অ্যাওয়ারসন এখন এখানকার হোম সেক্রেটারি। সবাই জেনে গেছে তাঁর আমলে আমি ছিলুম বেঙ্গল টেরিস্ট। ভারতক্ষেত্রী ইংরেজ সাহেব মেমরা আমাকে ও আমার কর্তাকে নিমন্ত্রণ করে দেশী বিলিতি খানা খাওয়ান। আর একান্তে নিয়ে গিয়ে প্রশ্ন করেন, ‘হোয়াঁর ইজ চঞ্জ বোস?’ আমি তেঁা প্রথমটা ধরতেই পারিনি যে চঞ্জ বোস হচ্ছেন স্বভাবচঞ্জ বোস। আমার কর্তা

আমাকে বুঝিয়ে দেন যে ইংরেজদের কাছে বিতীয় নামটাই প্রথমটার চেয়ে প্রধান। ওদের নিজেদের বেলা ওরা তাই করে। এখন এ প্রশ্নের উত্তর আমি দিই কী করে? আমি কি সবজান্তা? ‘জানিনে’ বললে ওরা বিশ্বাস করবে না। ওদের ধারণা বোস এখন জার্মানীতে। আমি বলি, সেটা কেমন করে সম্ভব? যুদ্ধকালে কি কেউ ভারত থেকে বাইরে কোথাও যেতে পারে? চারদিকে কড়া পাহারা। জলপথে অসম্ভব, আকাশপথে অসম্ভব। স্থলপথ বলতে তো খাইবার পাস। পাঠান ছাড়া সে পথে কেউ যাওয়া আসা করতে পারে না। চন্দ্র বোস কি পাঠানের মতো দেখতে? তাঁর কোথায় দাড়ি, কোথায় গোফ? কোথায় পাঠানের মতো পোশাক? গুপ্তচরদের চোখে ধূলো দিয়ে খাইবার পাস ভেদ করা শিবের অসাধ্য। তা সত্ত্বেও আমাকে বাড়ী বয়ে এসে জিজ্ঞাসাবাদ করা হচ্ছে, হোয়ারার ইজ চন্দ্র বোস? আমি বলি, জানিনে। জানলেও আমি বলতুম না। তোমরা যেমন তোমাদের দেশকে ভালোবাস আমরাও তেমনি আমাদের দেশকে ভালোবাসি। চন্দ্র বোস যদি জার্মানীতে গিয়েই থাকেন তবে জার্মানদের স্বার্থে নয়, পরাধীন স্বদেশবাসীদের স্বার্থে। আমিও পালটা সুধাই, জেনারেল গু গল কী করতে এদেশে এসেছেন? পরাধীন ফ্রান্সকে মুক্ত করতে। বেঞ্জামিন ফ্রান্সলিন কী করতে ফ্রান্সে গেছিলেন? পরাধীন উপনিবেশকে স্বাধীন করতে। অল ইজ ফেয়ার ইন লাভ অ্যাণ্ড ওয়ার। ওদের মুখ চুণ। তবে আমি সত্যি জানিনে সুভাষদা এখন কোথায়? শুনছি নিকৃদ্দেশ।”

যুথিকাও জানে না। জানলেও লিখত না। কে জানে কার হাতে পড়ত! মানসকে জিজ্ঞাসা করে, “হোয়ারার ইজ চন্দ্র বোস?”

মানস বলে, “হিমালয়ের কোনো এক দুর্গম গুহায় অজ্ঞাতবাস করছেন। পুলিশ তাঁকে খুঁজতে খুঁজতে হৃদয় হয়ে গেছে। কড়া সেনসরশিপ। যারা জানে তারাও প্রকাশ করে না। ওটা এখন একটা মিলিটারি সীক্রেট।”

ও চিঠি ছিল হিটলারের রুশ অভিযানের আগেকার। এর পর মিলি লেখে, “বৌদি, অলৌকিক ঘটনার যুগ যায়নি। অবটন আজো ঘটে। ন্যাং-সীরা যে কমিউনিস্টদের নিজের রাজ্যে হানা দেবে এটা তেমন চমক লাগাবার মতো ঘটনা নয়, অসময়ে ঘটেছে এই যা আশ্চর্য। কিন্তু কেউ কি ভাবতে পেরেছিল যে রুশ বিপ্লবকে যিনি আঁতুড়ে গলা টিপে মারতে অবাস্থর, বকাস্থর প্রভৃতি প্রতিবিপ্লবীদের পাঠিয়েছিলেন তিনিই এখন তাকে রক্ষা করার জন্তে

মিতালি পাতিয়েছেন তাঁর পরম বৈরী স্টালিনের সঙ্গে? হ্যাঁ, বৌদি, সেই চার্চিলই আজ এই চার্চিল। আমরা সবাই হকচকিয়ে গেছি। আমার কতটা তো কতরকম ভবিষ্যদ্বাণী করেছিলেন। কিন্তু একবারও বলেননি যে ইংলণ্ডের রক্ষণশীলরা রাশিয়ার বিপ্লবীদের জিতিয়ে দেবে। নাটের শুরু হবেন কিনা চার্চিল স্বয়ং। কোথায় শ্রেণীসংগ্রাম! শ্রেণীশত্রুই এখন শ্রেণীমিত্র! মার্কসবাদীদের মুখ চূণ। কনসারভেটিভরাও এখন সোভিয়েটদেরদী। রাজনীতি চিরদিনই রাজনীতি। ওর মধ্যে নীতির সন্ধান যেন অন্ধকার ঘরে কালো বেড়ালের সন্ধান, যে বেড়াল সেখানে নেই। আমি তাজ্জব বনে গেছি। অহিংসাবাদী না হলেও আমি ছিলুম নীতিনিষ্ঠ মানুষ। সাম্রাজ্যবাদের সহযোগিতায় মার্কসবাদ হয়তো জয়ী হবে, কিন্তু সাম্রাজ্যবাদের সঙ্গে প্রতিদ্বন্দ্বিতার দিনও তো আসবে। তখন দেখবে নিজেই সাম্রাজ্যবাদী সেজে বসে আছে।”

মিলি আরো লিখেছে “সাধারণ ইংরেজ এখন স্বস্তির নিঃশ্বাস ফেলছে। হিটলার যদি স্টালিনকে হারিয়ে দেনও তবুও ত বেশী বলক্ষয় করবেন যে তার পরে আর ইংরেজের সঙ্গে বলপরীক্ষায় নামবেন না। ততদিনে ইংরেজের বিমানশক্তি তার নৌশক্তির মতো দুর্বীর হয়ে থাকবে। আকাশ থেকে বোমাবর্ষণ করে জার্মানীর সব ক’টা শহরকে ধ্বংসস্থাপ বানিয়ে ছাড়বে। ওদের এয়ারফোর্সে এখন বাঙালী যুবকদেরও নিচ্ছে। যারা এদেশে পড়াশুনা করেছে তাদের কয়েকজন এয়াব ফোর্সে যোগ দিয়ে সমান ব্যবহার পাচ্ছে। ওদের যোগ্যতার জোরে ওদের যদি পদোন্নতি হয় তা হলে ওরা হবে ওদের অধীনস্থ ইংরেজ ক্যাডেটদের উপরওয়াল। আর কেউ বলতে পারবে না যে বাঙালীরা অসামরিক জাতি। সেই অপমানের প্রতিবাদেই না সন্ত্রাসবাদী আন্দোলন। তবে কাজটা ভীষণ বিপজ্জনক। এর মধ্যেই একটি সোনার চাঁদ ছেলে প্রাণ হারিয়েছে। ওর মা শুকে বারো বছর বয়স থেকে বিলেতে এনে মানুষ করেছিলেন। একমাত্র সন্তান। শুকে সাহসনা দেবার ভাষা নেই। দিনরাত ঠাকুরঘরে বলে প্রার্থনা করছেন। কঁাদতে কঁাদতে চোখের জল ফুরিয়ে গেছে। সরকার থেকে একটা মেডেল পাঠিয়ে দিয়েছে। যুদ্ধের ডেসপাচে স্বর্ণ হাজারার বীরত্বের সম্মানসূচক উল্লেখ আছে। বঁচে থাকলে স্বর্ণ একদিন এয়ার মার্শল হয়ে বাঙালীর মুখ উজ্জ্বল করত। বাঙালীর কেন বলছি, ভারতীয়ের। এদেশে আমরা সবাই ইণ্ডিয়ান।”

এ চিঠি পড়ে যুথিকা কঁদে আকুল। বিদেশে বিভূঁইয়ে অপঘাতে মারা

গেল ছেলেটি। আহা রে! ওর মা বাবা কেমন করে প্রাণ ধরে সফ্র করবেন!

“ছেলেটিকে আমি দেখেছি।” মানস বলে, “আমার বোডিং হাউসেই ঠুঁরা তিনজনে এসে ওঠেন। বাবা আই. এম. এস. অফিসার। ছুটির শেষে দেশে ফেরেন। ছেলে ভর্তি হয় এক নামকরা প্রাইভেট স্কুলে। মা কাছাকাছি বাসা নেন। আমিও বাসাবদল করি। দিব্যি সপ্রতিভ ছেলে। ওই বয়সেই বন্দুক চালাতে শিখেছে। কী করা যায়, বলো! যুদ্ধ মানেই প্রাণ নিয়ে জুয়াখেলা। দেশ যখন স্বাধীন হবে তখন দেখবে তোমার ছেলেকেও দরকার হলে কন্সক্রিট করবে। স্বাধীনতা আর দায়িত্ব একই মূদ্রার এপিঠ ওপিঠ। একটা স্বাধীন জাতিকে কী পরিমাণ মূল্য দিতে হয় তা তো ইউরোপে গিয়ে দেখেছি। অক্সফোর্ড কেমব্রিজের প্রত্যেকটি কলেজে উৎকীর্ণ রয়েছে সেইসব সোনার চাঁদ ছেলের নাম যারা যুদ্ধে গিয়ে ফিরে আসেনি। দেশের জন্তে প্রাণ দিয়েছে। তাদের জন্তে যারা অপেক্ষা করছিল সেইসব মেয়েদের আর বর জোটেনি। জুটবেও না। তারা চিরকুমারী হয়ে নিঃসঙ্গ জীবন কাটাবে। আলাপও হলো তেমন কয়েকজনের সঙ্গে। একদিক থেকে যেমন ওদের ক্ষতি হলো তেমনি আরেকদিক থেকে লাভ। মেয়েদের জন্তে অনেকগুলি বন্ধ দরজা খুলে গেছে। অফিসে আদালতে কলকারখানায় স্কুল কলেজে সর্বত্র ওদের দেখতে পাওয়া যায়। পাল’মেটেও। ক্যাবিনেটেও। তবে আমি নেভী এয়ার ফোর্সে ওদের প্রবেশ নিষেধ। সিভিল সাভিসের উচ্চতম পর্ষায়ও তাই। অক্সফোর্ড কেমব্রিজে মেয়েদের জন্তে আলাদা কলেজ। সাধারণ কলেজে ঢুকতে দেয় না। কারণ কলেজমাত্রই রেসিডেনশিয়াল। দ্বিতীয় মহাযুদ্ধের পর সেখানেও মেয়েরা চড়াও হবে।” মানস মুচকি হাসে।

যুথিকা শিউরে ওঠে। “না, না, অত বেশী অবাধ স্বাধীনতা ভালো নয়। ছেলেদের হস্টেলে মেয়ে! মেয়েদের হস্টেলে ছেলে! ভাবতে পারা যায় এর জের কতদূর গড়াবে? এর ফল কী হবে?”

মানস কৌতুক করে বলে, “ফল কিছুই হবে না। বার্ষ কন্ট্রোল আজকাল কারো অজানা নয়। আর ফল হলেই বা কী? ওদেশের সমাজ আগের চেয়ে উদার হয়েছে। এর পর আরো উদার হবে। তুমি কি জানতে যে র‍্যামজে ম্যাকডোনাল্ড ছিলেন কুস্তিপত্র? তাতে তাঁর রাজ্যলাভ আটকায়নি। তাঁর জীভাগ্যও ছিল ঈর্ষার বিষয়। তাঁর সহধর্মিণী ছিলেন গ‍্যাজেন্টোন বংশের কন্যা।”



যুথিকা উদার হলেও অত বেশী উদার হতে অনিচ্ছুক। তার মধ্যে মাতৃ-মাতামহীর সংস্কার যথেষ্ট সক্রিয়। বলে, “ছেলেদের সাত খুন মাফ বলে মেয়েদেরও সাত খুন মাফ, এটা ওদেশের সমাজ মেনে নিলেও এদেশের সমাজ মেনে নেবে না। ছেলেদের কী? মেয়েরাই পশতাবে। সব দরজা খুলে যাচ্ছে, যাক। খুলে যাওয়াই উচিত। কিন্তু তুমিই তো বলেছ, স্বাধীনতা আর দায়িত্ব একই মুদ্রার এপিঠ ওপিঠ। যারা স্বাধীন হবে তারা দায়িত্বশীল হবেন। সন্তানের দায়িত্ব নেবে না, এমন কথা যদি কোনো মেয়ে ভাবে তবে সে কোনোদিন মা হবার আনন্দ পাবে না। সে হয়তো এবেলা আফিস করবে, ওবেলা পার্টিতে যাবে, যখন খুশি দেশে বিদেশে ঘুরবে। কিন্তু তার কোল শূন্য। তার দোলনা শূন্য। তার নাসারি শূন্য। তার জীবন অপূর্ণ।”

মানসের মনে পড়ে স্বপনদা একবার চার্লস ল্যাথের ‘ড্রিম চিলড্রেন’ থেকে উদ্ধৃতি দিয়েছিলেন। “The children of Alice call Rertram their father.”

“স্বপনদার জীবনটাও চার্লস ল্যাথের মতো অপূর্ণ থেকে যেতে পারে।” মানস আক্ষেপ করে।

“কেন? কেন?” যুথিকা জানতে উৎসুক হয়।

“কারণ ওকে বাবা বলবার মতো কেউ নেই।” মানস উত্তর দেয়।

## ॥ সাত ॥

পূজার ছুটিতে মানস কলকাতায় যায় ও স্বপনদার অতিথি হয়। এবার আলাপ হয় দীপিকা বোদির সঙ্গে। ল্যাজ নাড়তে নাড়তে আরো একজন আলাপ করতে আগুয়ান হয়। “এল্ফ” নাম শুনে মানসের মনে পড়ে যায় ছেলেবেলার ইংরেজী প্রাইমারের প্রথম পৃষ্ঠার প্রথম ছবি। একটি কুকুর। তার মুখে একটা ছাতা।

“এ নাম আপনি কোথায় পেলেন, বোদি?” মানস জানতে চায়।

“আপনার মুখ দেখে মনে হচ্ছে এ নামটা আপনার চেনা। আগে তো শুনি আপনি কোথায় চিনলেন।” বোদি ধরাছোঁয়া দেন না।

“আমার চেনা এলফের মুখে ছিল একটা ছাতা। নামে মিলছে। জাতে মিলছে না। না, জ্যাস্ত কুকুর নয়, ছবির কুকুর,। বইখানার নাম বোধহয় রয়াল রীডার। স্পষ্ট মনে আছে ওকে। কিন্তু এ কুকুর সে কুকুর নয়।” মানস ঘাড় নাড়ে।

বৌদি হাসি চেপে বলেন, “সে কুকুর কি এতকাল বেঁচে থাকতে পারে! তবে আপনি ঠিকই ধরেছেন। ও বই আমিও পড়েছি। ও নাম আমার মনে ছিল। তাই ওই নামই এই বাচ্চারও রাখি। ওটা ছিল বোধহয় টেরিয়ার। ফক্স টেরিয়ার। এটা হলো পোমেরানিয়ান। কিন্তু একে আমি ছাতা ধরাতে পারিনি। বিষম অবাধ্য।”

তা শুনে এলফ ঘেউ ঘেউ করে প্রতিবাদ ঘোষণা করে।

“তাপ, মাহু, তোমার সঙ্গে আমার অনেক কথা ছিল। এখন কুকুরকে ছেড়ে একটু মাহুঘের দিকে নজর দাও দেখি। তোমার শ্বুতিশক্তি কত প্রখর তার পরীক্ষা তুমি দিয়েছ। বোঝা যাচ্ছে তোমার বৌদি আর তুমি সমবয়সী।”

“তাই তো মনে হচ্ছে। তবে আমি এক বছর অসুখে ভুগে পেছিয়ে পড়েছিলুম। হয়তো সেই কারণে আমিই বয়সে বড়ো। যদিও সম্পর্কে তিনিই বড়ো। তা ছাড়া আমার স্কুলে ভর্তি হতেও বছরখানেক দেরি হয়েছিল।” মানস বিবৃত করে।

“এখন আমার কথাটা মন দিয়ে শোন দেখি।” স্বপনদা বিষয়াস্তরে যান।

“বলো, কী বলতে চাও।” মানস উৎকর্ষ!

“ক্যারামেলকে জেলখানায় দেখে এসেছি। ও মেয়ে কিছুতেই বাড়ী আসবে না। বলে, জেল থেকে মুক্তি অর্থহীন উক্তি। গোটা দেশটাই তো ইংরেজের জেল। ওরা একটা মশা কি মাছিকেও ভারতের বাইরে যেতে দেয় না। এমন কড়া পাহারা! শুনছি একমাত্র সুভাষদাই ওদের ছোট বড়ো দু’রকম জেল থেকে মুক্ত হতে পেরেছেন। তা আমি তো ওঁর মতো সন্ন্যাসিনী সেজে মহাপ্রস্থানের পথে নির্খোজ হতে পারব না! ওঁকে নাকি শেষ দেখা গেছে বদরীনাথে। যত সব কক অ্যাণ্ড বুল টোরি। সুভাষ আমার সহপাঠী। ওকে আমি ভালো করেই চিনি। যদিও ইদানীং যোগাযোগ ছিল না। ও এখন পুরোপুরি রাজনীতির লোক। ছাত্রবয়সে একবার সন্ন্যাসী হবার জন্তে বাড়ী থেকে পালিয়েছিল শুনেছি। তা বলে ও সন্ন্যাসী নয়। দেশ যতদিন

না স্বাধীন হয়েছে ততদিন ব্রহ্মচর্যব্রতধারী। তার মানে আরো পনেরো বছর। যখন পলাশীর দ্বিশতবার্ষিকী ও সিপাইবিদ্রোহের শতবার্ষিকী অমুষ্ঠিত হবে। তার আগে ইংরেজকে নড়ানো যাবে না। যদি না ইউরোপে ওরা ঘোরতর-ভাবে জড়িয়ে পড়ে। ঘটনাক্রমে যদি না ঘোরালো হয়।” স্বপনদা যতদূর বোঝেন।

মানস দুঃখিত হয় জুলির জন্তে। স্বামী নেই, সংসার নেই, দায়দায়িত্ব নেই। কিসের আকর্ষণে জেলের বাইরে আসতে চাইবে? আজকাল জেলটাও তো একটা ক্লাব। ভদ্রঘরের মহিলারাও সে ক্লাবের মেম্বর। তবু ওটা জেল, ওর চারদিকে বেটনী।

“তুমি যদি ওর সঙ্গে দেখা করতে চাও তো ব্যবস্থা করতে পারি। কিন্তু বুঝা চেষ্টা। ও মেয়ে এই এলফের মতোই অবাধ্য।” স্বপনদা আফসোস করেন।

এলফ ততক্ষণে মানসের পায়ের কাছে গা এলিয়ে দিয়েছে। এবার শুধু ল্যাজ নেড়ে বৃহৎ প্রতিবাদ জানায়। মানস তার পিঠে হাত বুলিয়ে দেয়। কী নরম লোম!

“আমার জেলা হলে আমি পদাধিকার বলে যেতুম। এখানে আমি পদাধিকারী নই। কোন্ সুবাদে যাব? তুমি যেতে পারো আসামীপক্ষের কৌশলী পরিচয়ে। তা ছাড়া আরো কয়েকটা মাস সব্ব করলে তো ওরা সবাই ছাড়া পেয়ে বেরিয়ে আসবে।” মানস দত্তবিশ্বাসের উপর বিশ্বাস রেখে আভাস দেয়।

“কই, এমন কথা তো খবরের কাগজে লিখছে না?” স্বপনদা বিস্মিত হন।

“লিখছে আমার নিজস্ব সংবাদদাতা। লণ্ডন থেকে। ওখানকার নেতারা এখানকার নেতাদের সঙ্গে একটা আঁতাত করদিয়াল কামনা করেন। কথা-বার্তা চালাতে হলে তাঁদের জেল থেকে খালাস দিতে হবে। সঙ্গে সঙ্গে তাঁদের অহুচরদের। সেই হুজ্রে আমাদের জুলিকেও। যার নাম রেখেছ ক্যারামেল।” মানস খোলসা করে।

“তা হলে তো আনন্দের বিষয়। কিন্তু আজকাল আমি রাজনৈতিক ব্যাপারে সীনিক বনে গেছি। যেই গুনব ওদেশের নেতাদের সঙ্গে এদেশের নেতাদের আঁতাত করদিয়াল হয়েছে অমনি গুনব আণ্ডারগ্রাউণ্ড থেকে আন্ডা-

প্রকাশ করেছেন বামপন্থী মহানায়ক হুভারচন্দ্র। আবার তিনি কংগ্রেস প্রেসিডেন্ট পদের জন্যে দাঁড়াবেন। বাধা দিলে আর কাউকে দাঁড় করাবেন। আপসবিরোধী সংগ্রাম চালাবেন। বামপন্থীরা দক্ষিণপন্থীদের খেদিয়ে কংগ্রেস কাপচার করবে। তখন কোথায় থাকবে তোমার আঁতাত করদিয়াল? তখন তো কংগ্রেস ভেঙে ছ'ভাগ হবে। একভাগ সরকারের পক্ষে, আরেকভাগ সরকারের বিপক্ষে। গান্ধীজী কি কংগ্রেসকে ভেঙে ছ'ভাগ হতে দেবেন। দক্ষিণপন্থীদের বলবেন পদত্যাগ করে জেলে ফিরে যেতে। তখন বামপন্থীরাও ফিরে যাবেন আগারগ্রাউণ্ডে।” স্বপনদা ভবিষ্যদ্বাণী করেন।

“তা হলে জুলি বেচারির কী আশা।” দীপিকাদি মুখ খোলেন।

“কিছুমাত্র না। ওর কপালে জেল কিংবা আগারগ্রাউণ্ড। ও তারজন্ত প্রস্তুত। ওর চেয়ে ঢের বেশী প্র্যাকটিকাল বাবলী। যার নাম দিয়েছি চকোলেট। ও ভালো করেই বোঝে যে যুদ্ধ শেষ না হলে স্বাধীনতা হবে না। হতে পারে কেন্দ্রে রদবদল। সেটা স্বাধীনতা নয়। সেটার জন্যে জেলে যাওয়া নিরর্থক। আগারগ্রাউণ্ড তো আরো বিপজ্জনক। চকোলেট এখন ওর কমরেডদের নিয়ে কমিউন গঠনের কাজ হাতে নিয়েছে। ওরা কেউ বাড়ীতে থাকে না। থাকে ভাড়াটে বাসায়। বাইরে তার নাম সজ্জ। ভিতরে তার নাম কমিউন। পুলিশ জানে। কিন্তু হতুক্ষেপ করে না। ওরা তো শত্রুপক্ষের চর নয়, মিত্রপক্ষের লোক। চকোলেট মাঝে মাঝে আসে। তোমার বৌদির সঙ্গে ঠঁর খুব ভাব। এলুফকে আদর করে। চুমু খায়। বৌদি ওর হাতে একটা একশো টাকার নোট গুঁজে দেন। চকোলেট কিনে খেতে। কথাবার্তা চোখে চোখে হয়।” স্বপনদা হাসেন।

“এসব গোপন কথা তুমি ফাঁস করছ কোন্ আঙুলে? তোমার বন্ধু ঠাওরাবেন আমিও একজন কমিউনিস্ট। আমার কুকুরকে যে ভালোবাসে আমি তাকে ভালোবাসি। তোমাকে বলেছি, লাভ্ মী, লাভ্ মাই ডগ। বাবলীকে বলেছি লাভ্ মাই ডগ, লাভ্ মী। ওটা ভালোবাসার পুরস্কার।” দীপিকাদিও হাসেন।

মানস তা শুনে এলুফের কপালে একবার মুখ ছুঁইয়ে দেয়। সঙ্গে সঙ্গে ক্রমাল দিয়ে মুখ মোছে। তিনজনেই হেসে ওঠে। আর এলুফ ঘন ঘন ল্যাজ আঙে।

স্বপনদা বলেন, “জানো তো, চকোলেটের সঙ্গে ক্যারামেলের ছাড়াছাড়ি

হয়ে গেছে। ক্যারামেল চকোলেটকে বলে স্টালিনের স্পাই। চকোলেট ক্যারামেলকে বলে হিটলারের স্পাই।”

মানস গভীর বেদনা বোধ করে। বলে, “এর চেয়ে দুঃখের বিষয় আর কী হতে পারে! কোথায় হিটলার আর স্টালিন! কোথায় বাবলী আর জুলি! ওরা লড়াই করে মরছে বলে এরাও লড়াই করে মরবে!”

“না, না, মরবে না।” স্বপনদা অভয় দেন। “আমার কাছে আসবে। চকোলেট আর ক্যারামেল থাকে। ক্যারামেল কখনো হিটলারের চর হতে পারে না। সে তার স্বদেশকে ভালোবাসে। চকোলেটও কখনো স্টালিনের চর হতে পারে না। সে তো দেশের জন্যে সাহেব মেরে ফাঁসী যেতে তৈরি হয়েছিল। মুশকিল হয়েছে এই যে বামপন্থীদের দুই গোষ্ঠীর দুই বিপরীত পলিসি। এক গোষ্ঠী দেশের স্বাধীনতার জন্যে সাম্রাজ্যবাদী যুদ্ধে অসহযোগ করবে। আরেক গোষ্ঠী রুশের স্বাধীনতার জন্যে ফাসিস্টবিরোধী যুদ্ধে সহযোগিতা করবে। দেশের স্বাধীনতা আগে না রুশের স্বাধীনতা আগে? এই নিয়ে আড়াআড়ি।”

“আড়াআড়ি থেকে ছাড়াছাড়ি। ছাড়াছাড়ি থেকে মারামারি।” মানস ভয় দেখায়। “ক্ষমতা হাতে পেলে একপক্ষ অপরপক্ষকে অংশ দেবে না। বিরোধিতা করলে জেলে পুরবে। শস্র বিরোধিতা করলে প্রাণে মারবে।”

স্বপনদার মনে পড়ে যায় বাবলী ওঁকে জানিয়েছিল জুলি নাকি ওঁকে শাসিয়েছে যে বিশ্বাসপাতকতার অপবাধে তাকে ফ্যারিং স্কোয়াডের গুলীতে মারা হবে।

“ওটা নিছক তামাশা করে বলা। সীরিয়াস ভাবে নিতে নেই। চকোলেটকে আমি বুঝিয়ে হুঝিয়ে ঠাণ্ডা করেছি। ক্যারামেলকেও ঠাণ্ডা করব।” স্বপনদা কথা দেন।

“কিন্তু ওদের গোষ্ঠীদের তুমি কী করে বোঝাবে? এ তো আরো একটা কুরুক্ষেত্রের সূচীমুখ। ইংরেজদের বিদায়ের পরে ফাল হয়ে বেরাবে। তখন তুমি জুলিকে বাঁচাতে পারবে না, বাবলীকেও না।” মানস শিউরে ওঠে।

“আরো একটা কুরুক্ষেত্র?” স্বপনদা জেরা করেন। “কোন্টার কথা ভেবে একথা বলছ, মাহু?”

“কেন? হিন্দু মুসলমানের শরিকী হনু? কে না জানে সেটা চরমে উঠবে, যেদিন ইংরেজ বিদায় নেবে? যদি না ইতিমধ্যে একটা মিটমাট হয়। কিংবা সঙ্গে সঙ্গে।” মানস ব্যাখ্যা করে।

“সেইজন্মেই তো আমি সহসা ইংরেজবিদ্যায় পক্ষপাতী নই। আগে সব দিক সামলাও। তারপর ওদের বিদ্যায় দাও। ওরা তো এতদিন সব দিক সামলেছে। কুরুক্ষেত্র বাধতে দেয়নি। যতদিন থাকবে, দেবেও না।” স্বপনদার দৃঢ় বিশ্বাস।

“সহসা ইংরেজবিদ্যায় আমিও কি চাই?” মানস বলে, “কিন্তু সব দিক সামলানো পনেরো বছর পরেও হুগম হবে না, স্বপনদা। পলাশীর ষ্টিশত-বার্ষিকীর দিন যদি ওরা বিদ্যায় হয় তো সেইদিনই বাধবে শরিকী যুদ্ধ থেকে কুরুক্ষেত্রের যুদ্ধ। যদি না ইতিমধ্যে একটা সর্বসম্মত সমাধান খুঁজে পাওয়া যায়।”

“তা হলে সেটাই আমাদের নিয়তি। বছর পনেরোর মধ্যে যদি সমাধান না মেলে তবে কোনোদিনই মিলবে না। পনেরো বছরের পর একটা দিনও আমি অপেক্ষা করব না। কুরুক্ষেত্রের যুদ্ধি নেব।” স্বপনদার ধৈর্যেরও সীমা আছে।

“তোমার মতো কুর্ম অবতার আমি নই।” দীপিকাদি উদ্দীপ্ত হয়ে বলেন। “যুদ্ধের স্বযোগ নিতে যদি না চাও তো যুদ্ধের পরেই বিদ্যায়ের নোটিশ দিয়ে। যুদ্ধ সারা হতে কি পনেরো বছর লাগবে?”

“ঐতিহাসিক নিয়তি বলে যদি কিছু থাকে তবে শতাব্দীর ছাপান সাতার সালই ভারতবর্ষের নিয়তিনির্ধারণক। পলাশীর যুদ্ধের একশো বছর আগে শাহজাহানের প্রুদ্রদের শরিকী যুদ্ধ। তার একশো বছর আগে দ্বিতীয় পাণিপথের যুদ্ধ।” স্বপনদা বিবরণ দেন। তার পরে যোগ করেন, “তেমনি পলাশীর একশো বছর পরে সিপাইবিদ্রোহ। তার একশো বছর বাদে ব্রিটেন থেকে রোমান অপসরণের মতো ভারতবর্ষ থেকে ব্রিটিশ অপসরণ।”

“তোমার ও খীসিসটি চমৎকার। তার জন্মে তোমাকে ডক্টোরেট দেওয়া উচিত।” উপহাস করেন দীপিকাদি। “কিন্তু তোমার ওই হিস্টোরিক্যাল ডিটারমিনিজম যুক্তিনির্ভর নয়। এমনও হতে পারে যে এই যুদ্ধে রাশিয়ানদের হারিয়ে দিয়ে জার্মানরা ইরানের পথে ভারতে ঢুকবে। কিংবা জার্মানদের হারিয়ে দিয়ে রাশিয়ানরা ইংরেজদের সঙ্গে ঝগড়া করে আফগানিস্থান দিয়ে ভারতে ঢুকবে। সেটাও হবে ভারতের প্রাচীন ও মধ্যযুগের ঐতিহাসিক আক্রমণগুলোর মতো বহিঃশত্রুর আক্রমণ। তখন ইংরেজরা ভারতীয়দের হাতে ক্ষমতা সঁপে দিয়ে ভারতরক্ষার দায় এড়াতে পারে। নয়তো তখন

ভারতীয়রাই ক্ষমতা কেড়ে নিয়ে ভারতরক্ষার দায় বহন করতে পারে। এর জন্তে পনেরো বছর অপেক্ষা করতে হবে কেন? যা হবার তা সাত আট বছরের মধ্যেই হয়ে যাবে।”

স্বপনদা কোণঠাসা হয়ে মানসের দিকে তাকান। মানস বলে, “রাশিয়া ভারত আক্রমণ করবে না। তার দৃষ্টি পশ্চিমমুখী। পশ্চিমে রয়েছে আমেরিকা। আর জার্মানী? সে যখন ভারতের পথে তুরস্ক বা ইরানে পদার্পণ করবে তখন দেখবে ইংরেজরা ও ভারতীয়রা সেখানে গিয়ে বসে আছে। যেমন জাপানের পথরোধ করতে সিঙ্গাপুরে ও মালয়ে গিয়ে বসে আছে। ওরা চলে ডালে ডালে তো এরা চলে পাতায় পাতায়। এদের সামনে খোলা রয়েছে কেবল ভারতের মানচিত্র নয় গোটা পৃথিবীর মানচিত্র। দাবাখেলার ছকের উপরে যে যার ঘুঁটি সাজিয়ে বসেছে। একপক্ষ চাল দিলে অপরপক্ষ পালটা চাল দিচ্ছে। আমরা সবটা দেখতে পাচ্ছি। কারণ আমরা কেবল স্বদেশের মানচিত্রই দেখছি। আর আমাদের দাবা খেলার ছক যুদ্ধের নয়, সত্যগ্রহের।”

“বাঁচা গেল। বহিঃশত্রুর আক্রমণ সুদূরপর্যন্ত। তা হলে দীপিকার খীলিসটা কেঁচে যায়। ওকে কেউ ডক্টরেট দেবে না।” স্বপনদা পরিহাস করেন।

“তা বলে ইংরেজ রাজত্ব আরো পনেরো বছর! গান্ধী, জিন্না, বল্লভআই, রাজেন্দ্রপ্রসাদ ততদিন বেঁচে থাকবেন!” দীপিকাদি অধারতা প্রকাশ করেন।

“একটা নেশনের জীবনে পনেরো বছর এমন কিছু বেশী সময় নয়। গান্ধী, জিন্না, বল্লভআই বেঁচে না থাকতে পারেন, নেহরু, বোস, আজাদ বেঁচে থাকবেন। দেখতে হবে শাহ্ জাহানের পুত্রদের মতো শরিকী যুদ্ধ যাতে না বাধে। তা ছাড়া দু’শো বছরের একটা সাম্রাজ্য গুটিয়ে নিতে যদি পনেরো বছর সময় লেগে যায় সেটা কি খুব বেশী সময়? তার কমে বিশ্বজ্বলার আশঙ্কা স্বাভাবিক। দক্ষিণ বামের অন্তর্ভাবনাও উপর থেকে তল পর্যন্ত ফাটল ধরিয়ে দিতে পারে। কংগ্রেসের কি আর সেই সংহতি আছে? ধারা একজোট হয়ে একটা পাটি চালাতে পারেন না তাঁরা একজোট হয়ে একটা মহাদেশ চালাবেন! রাশিয়াকে বাদ দিলে ইউরোপ যত বড়ো একা ভারতবর্ষ তত বড়ো আর তত বিচিত্র। পনেরো বছরের মধ্যে যদি এই অন্তর্ভাবনা দূর না হয় তো হিন্দু মুসলিম গৃহযুদ্ধের মতো বাম দক্ষিণ গৃহযুদ্ধও অরাজকতা ডেকে

আনবে। পরাধীনতার পরিবর্তে অরাজকতা, স্বরাজ বলতে কি এই বোঝায় ? বুঝলে, রাষ্ট্র, স্বথের চেয়ে সোয়াস্তি ভালো। ইংরেজ থাকতে সোয়াস্তি আছে। এখনো ওরা একটা বড়ো মাপের দুর্ভিক্ষ হতে দেয়নি। একটা বড়ো গোছের দাখাখাকামা বাধতে দেয়নি। মাথা তুলতে দেয়নি দেশীয় রাজাদের। নাক গলাতে দেয়নি বাইরের শত্রুদের। ওদের ত্যক্ত সিংহাসনে ঝাঁরা বসবেন তাঁরা কি এসব কর্তব্য পালন করতে পারবেন ? বিক্রমাদিত্যের সিংহাসন ভোজ-রাজের জন্তে নয়।” স্বপনদা স্মরণ করেন।

পরের দিন স্বপনদা মানসকে একান্তে ডেকে নিয়ে গিয়ে বলেন, ‘আচ্ছা, তুমিও কি কথায় কথায় বল না, স্বথের চেয়ে সোয়াস্তি ভালো ? তোমার বৌ কি সেটা গায়ে পেতে নেয়, রাগ করে, খোঁটা দেয়, রাতে জাগিয়ে রাখে, সকাল না হতেই কুকুরকে বেড়াতে নিয়ে যায় ? তা হলে শোন, বলি। তোমার বৌদির ধারণা তিনি আমাকে স্বথী করেননি, শুধু সোয়াস্তি দিয়েছেন। তাঁর অপরাধ তিনি তো বাঁশরি নন। আমি ঠুকে কী করে বোঝাই যে ঠুর ধারণাটা ভুল। বাঁশরির সঙ্গে বিয়ে হলেও আমি স্বথী হতুম না, যদি আমাকে বিলেত যেতে না দেওয়া হতো, জার্মানিতে ও ক্রান্ত থাকতে না দেওয়া হতো, ব্যারিস্টার হতে না দিয়ে ফিরিয়ে আনা হতো। আমি কি তেমনি মাহুষ যে বৌ আর বাচ্চা নিয়েই স্বথী হতে পারি ? আমি সব চেয়ে স্বথী হই যখন সৃষ্টিকর্তার মতো সৃষ্টি করি। অথচ সে স্বথ যেন দশমাস গর্ভধারণের পর প্রসবযন্ত্রণা থেকে মুক্তির স্বথ। আমার লুখলুখের নিরিখই আলাদা। তুমি তো তখন এখানে ছিলে না, থাকলে দেখতে আমি দরজা জানলা বন্ধ করে চব্বিশ ঘণ্টা কেবল কেঁদেছি। জল ছাড়া আর কিছু খাইনি।”

মানস চমকে ওঠে। “কেন ? কী ব্যাপার ? দাম্পত্য কলহ ?”

“আরে, না, না। তোমার বৌদি তখন কোথায় ? বিয়ের আগের ঘটনা। প্যারিসের পতন। মনে আছে ক্রান্সোপ্রাশিয়ান ওয়ারের সময় ফরাসীরা চারমাস কাল প্রাশিয়ানদের ঠেকিয়ে রাখে। শহরে ঢুকতে দেয় না। গত মহাযুদ্ধে তো জার্মানদের প্যারিসের ধারে কাছেও ঘেঁষতে দেয়নি। শহর থেকে বহুদূরে জবর লড়েছে। এবার কোথায় লড়াই ? কোথায় কী ? রাজধানীটা বিনা যুদ্ধেই ছেড়ে দিল। ছাড়িল যদি তো রাশিয়ানদের মতো পুড়িয়ে দিয়ে গেল না কেন ? মনে আছে রাশিয়ানরা নেপোলিয়নের সৈন্যদের বেলা কী করেছিল ? ওদের মস্কো দখল করতে দিল তা ঠিক, কিন্তু ওদের



সঙ্গে একজনও সহযোগিতা করল না। সে এক গৌরবময় দিন। এবারেও রাশিয়ার লোক হিটলারের সৈন্যদের মঞ্চো ছেড়ে দিতে পারে, কিন্তু তার আগে পুড়িয়ে দিয়ে যাবে। একজনও সহযোগিতা করবে না। ফরাসীরা প্যারিস ছেড়ে দিয়েছে, পুড়িয়ে দেয়নি, নাৎসীদের সঙ্গে সহযোগিতা করেছে। এ দুঃখ আমার যাবে না। আমি যে মনে প্রাণে ওদের একজন হতে চেয়েছি।” বলতে বলতে স্বপনদার গলা ধরে আসে। তিনি ক্রমাল বার করে চোখের উপর রাখেন।

মানস তাঁকে সববেদনা জানায়। “ফরাসীরা এবার তৈরি ছিল না। হঠাৎ বেকায়দায় পড়ে যায়। লক্ষ লক্ষ শরণার্থীর শ্রোত সৈন্য চলাচলে বাধা দেয়। তবে এটাও ঠিক যে ওরা প্রাণ ধরে প্যারিসকে পুড়তে দিত না। আগুন নেভাতে প্রাণ দিত। প্যারিস যে ওদের প্রাণকেন্দ্র। মঞ্চো সেই অর্থে রাশিয়ানদের প্রাণকেন্দ্র নয়। তবে এটাও ঠিক যে রাশিয়ানরা তখনো সহযোগিতা করেনি, এখনো করবে না। ওরা হাজার মাইল হটে যেতে পারে, কিন্তু সহযোগিতা কিছুতেই না।”

‘আর শুনেছ? রম্যা রল’। এতকাল নাৎসীদের বিরুদ্ধে মসীযুদ্ধ করে অবশেষে ফিরে গেছেন নাৎসী অধিকৃত এলাকায় স্বগ্রামে? বের্টোভেনই তাঁর শেষ অবলম্বন। যেমন ছিল আদি অবলম্বন। নাৎসীরা কেন বাদ সাধবে? বের্টোভেন তো জার্মানদেরই। বড়ো দুঃখ হয় তাঁর কথা ভেবে। প্রথম মহাযুদ্ধে ‘above the battle’। দ্বিতীয় মহাযুদ্ধেও যুদ্ধের উর্ধ্ব নন, ফান্সিস্টবিরোধী। কিন্তু ফ্রান্সের পরাজয়ের পর নিবিরোধী।”

“তুমিও তো তাই।” মানস রলার পক্ষ নেয়।

“এই যুদ্ধে আমিও above the battle, যুদ্ধের উর্ধ্ব। তা বলে কি ফান্সিস্টদের কাছে আত্মসমর্পণ ফরাসীদের উচিত হয়েছে?”

“তবে প্রতিরোধের সংবাদও আসছে ফ্রান্সের সারস্বত মহল থেকে।” মানস বলে।

“তুমি কি বুঝতে পারছ না, মাহু, যে গোটা প্যারিস শহরটাই এখন নাৎসীদের হাতে হস্তেজ? ওদের গায়ে আঁচড়টি লাগলে সারা শহরটাকেই ওরা পুড়িয়ে দেবে। ফরাসীরা যমকেও মৃত ভয় করে না, যত ভয় করে নৃশংসের স্বভিলোপকে। প্যারিসের প্রত্যেকটি পাথরের একটা ইতিহাস আছে। প্রতিরোধ করতে গিয়ে যে প্রতিশোধটা ভেবে আনা হবে তার ভয়ে

সংস্কৃতিসচেতন মানুষমাজেই কাতর। নাংশীদের বর্বরতা সেকালের সেই পথদের পথ ধরেছে। সেবার ঘটে রোমের পতন। এবার ঘটেছে প্যারিসের পতন। আমার কাছে এটি একটি প্রতীকী ঘটনা। একালের রোম তো লণ্ডন বা ওয়াশিংটন নয়, প্যারিস। সামরিক অর্থে নয়, সাংস্কৃতিক অর্থে। প্যারিস আজ যা ভাবে, আজ যা আঁকে, আজ যে ফ্যাশন ডিজাইন করে অবশিষ্ট পৃথিবী কাল তা ভাবে, কাল তা আঁকে, কাল তা অনুকরণ করে। কমিউনিস্ট রাশিয়াও বাদ যায় না। তা যদি হয় তবে প্যারিসের পতন হচ্ছে আধুনিক ইউরোপীয় সভ্যতার পতন। আর সেটাই তো একমাত্র আধুনিক সভ্যতা। প্রাচ্য সভ্যতামাজেই প্রাচীন। আমরা একটি প্রাচীন সভ্যতার উত্তরাধিকারী। সন্দেহ নেই, কিন্তু আধুনিক হতে চাইলে আমাদের মুখ ফেরাতে হয় পশ্চিম দিকেই। রামমোহন বলো কেশবচন্দ্র বলো, বিবেকানন্দ বলো, অরবিন্দ বলো, গান্ধী বলো, রবীন্দ্রনাথ বলো, প্রাচ্য সভ্যতার কোন্ প্রতিনিধি পাশ্চাত্য অভিমুখে যাত্রা করেননি ও আধুনিকতার আলোকে প্রাচীনের পুনর্বিচার করেননি? কিন্তু প্যারিসের পতনের পর প্রতিক্রিয়ার সূচনা হতে পারে। রিভাইভালিজম মাথা চাড়া দিতে পারে। ভারতবর্ষ স্বাধীনতা পেয়ে সতীদাহ ফিরিয়ে আনতে পারে।” বলতে বলতে আঁতকে ওঠেন স্বপনদা।

“না, না, স্বপনদা, গান্ধী থাকতে, নেহেরু থাকতে সেটা সম্ভব হবে না। নারীশক্তিও কুণ্ডলিনীশক্তির মতো জাগ্রত।” মানস রসিকতা করে।

“সেটা শুধু স্বামীদেব জাগিয়ে রাখার জন্তে।” স্বপনদাও রসিকতা করেন। গম্ভীর হয়ে বলেন, “গান্ধী, নেহেরু কি আরো পনেরো বছর বেঁচে থাকবেন।”

“তুমি দেখছি ধরে নিয়েছ যে ছাপান কি সাতার সালের আগে ভারতের মুক্তি নেই। এটা কিন্তু আধুনিক মনের যুক্তিসিদ্ধ বিশ্বাস নয়, এটাও এক-প্রকার দৈববাদ। গণশক্তি জাগ্রত হলে আরো আগে ভারত স্বাধীন হতে পারে। বিনা প্রেমসে না মিলে নন্দলালা, বিনা ত্যাগসে স্বরাজ। গণসত্যাগ্রহ হচ্ছে ত্যাগশক্তির পরীক্ষা। দেশের লোক ত্যাগশক্তির পরীক্ষা একটার পর একটা দিয়ে এসেছে, এখনো একটা কি দুটো বাকী। ইংরেজরা কি চূড়ান্ত শক্তি পরীক্ষা না দেখে যাবে?” মানস বিষম বোধ করে।

দীপিকা দি বাড়ী ফেরেন। এলুফ পথ দেখিয়ে নিয়ে আসে।

“তোমরা দু’জনে মিলে নতুন কী ম্যানিফেস্টো রচনা করতে যাচ্ছ, মার্কস আর এঙ্গেলস?” দীপিকা দি সন্দেহ করেন।

“ভানো কথা, মাহু, তুমি কি লিবারল হিউমানিস্ট ম্যানিফেস্টো সম্বন্ধে কিছু ভেবেছ? খুব মনে করিয়ে দিয়েছ মাহু।” স্বপনদার মনে ছিল না এতক্ষণ।

“ভাবা কঠিন, লেখা তার চেয়ে কঠিন, কাজে পরিণত করা তার চেয়েও কঠিন। আমাদের আশু আশু এগোতে হবে।” মানস উত্তর দেয়। “বৌদি, আমরা এখন যা নিয়ে আলোচনা করছি তা ম্যানিফেস্টো নয়, তা দেশের স্বাধীনতা আর কতকাল পরে বা আগে।”

“ওঃ সেই হিস্টরিকাল ডিটারমিনিজম।” দীপিকাদি বিক্রপ করেন।

স্বপনদা উত্তপ্ত হয়ে বলেন, “ইংরেজের পরেই প্রাবন। চতুর্দশ লুই যেমন বলেছিলেন নিজের সম্বন্ধে।”

“অর্থাৎ প্রাবনকে তুমি আরো পনেরো বছর ঠেকিয়ে রাখতে চাও। তুমি স্বাধীন দত্তের ‘উটপাখী’। তোমাকে লক্ষ করেই কবি বলেছেন ‘অন্ধ হলে কি প্রলয় বন্ধ থাকে!’ তোমার ধারণা ঘটনার শ্রোত আরো পনেরো বছর অপেক্ষা করবে।” দীপিকাদি যেন চ্যালেঞ্জ করেন। আর মানসের দিকে তাকান।

‘না, প্রলয় বন্ধ থাকবে কেন? প্রলয়ই যদি আমাদের নিয়তি হয়ে থাকে প্রলয় ঘটবে। আমার ভূমিকা দর্শকের ভূমিকা। আমি বালিতে মাথা গুঁজে থাকব না, একটু নিরাপদ দূরত্ব খুঁজে নিয়ে নাটকটা দেখব। ট্রাজেডী ছাড়া ওটা আর কী হতে পারে! স্বাধীন হলেই যদি ট্রাজেডী এড়ানো যেত তা হলে প্যারিসের পতন হতো না, ফ্রান্স দ্বিখণ্ড হতো না। একখণ্ড জার্মান অধিকৃত হতো না। দেখে শুনে আমি সীনিক বনে গেছি। কত বড়ো আদর্শবাদ নিয়ে ইউরোপে গেছলুম! ফিরে যখন আসি তখন অর্ধেক আদর্শবাদ। বাকীটাকে প্রাণপণে আঁকড়ে আছি। সেটা কিন্তু ইংরেজদের মুখ চেয়ে। স্বদেশকে ওরা রক্ষা করতে পেরেছে, সহযোগিতার হাত বাড়িয়ে দিয়েছে সোভিয়েট রাশিয়ার দিকে, ওরাও যদি হেরে যায় তো সভ্যতার সঙ্কট আরো গভীর হবে। আমেরিকার উপরেই বর্তাবে উদ্ধারের দায়। ভারতের উপর নয়। ভারত বলতে ভারতের মুসলমানও বোঝায়। আমার প্রতিবেশী ওরা। ওদের সঙ্গে কথাবাতা বলে সহুস্তর পাইনে, পাওয়ার ভ্যাকুয়াম হলে সেটা পূরণ করবে কে? কংগ্রেসকে ওদের মজ্জাগত অবিশ্বাস। কংগ্রেস নাকি বর্ণচোরা হিন্দু। হিন্দু রাজত্বে ওরা বাস করবে না, ওদের জন্মে চাই মুসলিম

রাজহ। ষার এসাকা পাকিস্তান। আমিও তার মধ্যে পড়ি।” স্বপনদা করুণ স্বরে বলেন।

মানস তাঁকে অভয় দেয়। “ক্ষমতা যখন আসবে তখন দায়িত্ববোধও আসবে। কোনো দায়িত্বশীল মুসলমান কখনো পাকিস্তানের দাবী তুলে গৃহযুদ্ধ বাধাতে চাইবে না। তবে মাইনরিটির একটা স্বাভাবিক শক্তি আছে। ভোটের জোরে মেজরিটি একাই শাসন করবে এইখানেই শক্তির বীজ। হিন্দুরা যেখানে মাইনরিটি সেখানে তারাও শক্তিত। আন্তরিক প্রয়াস পেতে হবে স্বাভাবিক শক্তি দূর করতে। এটা তোমাব আমার মতো লিবারল হিউমানিস্টদেরই কাজ। তাই দর্শকের ভূমিকা আমাদের নয়। প্রলয় নিবারণে আমাদেরও অংশ আছে।”

স্বপনদা স্বীকার করেন না। “না, ভাই, আমার কোনো অংশ নেই। আমার টাকা আমি বিলিতি ব্যাঙ্কে রাখি। সময় থাকতে আমার অ্যাকাউন্ট আমি বিলেতে ট্রান্সফার করে দেব। তার পরে বিলেতে গিয়ে প্র্যাকটিস করব। তোমার বৌদিকে নিয়েই দোটানা। উনি বয়ঃ দেহত্যাগ করবেন তবু দেশত্যাগ করবেন না। আমি কিন্তু অন্ধকার দেখছি। আলো যা এসেছিল ইংরেজদের সঙ্গে সঙ্গেই এসেছিল। ওরা যেদিন চলে যাবে সেদিন ওদের সঙ্গে সঙ্গেই চলে যাবে। হাইকোর্টের তখন এ মহিমা থাকবে না। ব্যারিস্টারেরও এ মর্যাদা থাকবে না। হিন্দী বা উর্দুতে সওয়াল করা আমার কর্ম নয়। বাংলাকে কি কেউ আমল দেবে ভেবেছ? সব ক’টা পাটিঙ তো অল ইণ্ডিয়া পাটি। পাটির উর্দ্ধতম ত্তরে কোনো মেম্বর কি বাংলায় কথা বলেন? তুমি তো জানো আমি ছেলেবেলায় ছিলুম বাঙালী জাতীয়তাবাদী। আমার সেক্সিমেন্ট বাংলাদেশকে ঘিরে, ভারতকে ঘিরে নয়। ভারত একটা মহাদেশ। যেমন ইউরোপ। ইংরেজ ফরাসীরা যেমন ইউরোপীয় আমিও সেইরকম ভারতীয়। আর ওরা যেমন ইংরেজ ফরাসী আমিও তেমন বাঙালী। আত্ম-শ্রদ্ধা স্বাধীন বাংলার কথা কেউ বলেন না। আমিও মনে করি সেটা ধোপে টিকবে না। কাবণ আমরা বাংলাদেশের চারদিকের সীমান্ত রক্ষা করতে পারব না। ফরাসীরাও কি পারল? তাদের তবু সৈন্তাবল ছিল। আমাদের সৈন্তাবল কই? এবারকার যুদ্ধে বেঙ্গলী রেজিমেন্ট নেই, লক্ষ করেছে? বাঙালীদের দিক থেকে দাবীও নেই।”

মানস ব্রেকফাস্ট খেতে খেতে বলে, “কথাটা ঠিক। এবার বেঙ্গলী

রেজিমেন্ট অদৃশ্য। তা বলে বাঙালী রিক্রুটমেন্ট বন্ধ থাকছে না। বিস্তর লোক যুদ্ধে যোগ দিচ্ছে। মোল্লারা গ্রামে গ্রামে গিয়ে মসজিদে মসজিদে মীটিং করে মুসলমানদের দলে দলে আমিতে ভর্তি করে পশ্চিম এশিয়ায় ও উত্তর আফ্রিকায় পাঠাতে সাহায্য করছে। ফিরে এসে ওরা পাকিস্তানের জন্তে লড়বে।”

“কই, এসব কথা তো কাগজে লেখে না?” বৌদি অবাক হন।

“বাহা নাহি কাগজে তাহা নাহি বাস্তবে।” মানস মশ্কর করে। “কিন্তু, বৌদি, বাঙালী আর রণবিমুখ নয়। যদি মুসলমানদের বাঙালী বলে গণ্য করেন। আর নয়তো ওরা একদিন পাকিস্তানী বলে গণ্য হতে বাধ্য হবে। ওদেরও তো একটা সেক্টিমেন্ট আছে। তার খবর রাখে ক’জন হিন্দু?”

“পরিচয়ের বিষয়, মানছি।” বৌদি বলেন, “ওরা যদি ভারতবিমুখ হয় আমি ওদের দোষ দেব না, কারণ ভারত সত্যিই হিন্দুপ্রধান দেশ, হিন্দু-প্রধানই থাকবে। কিন্তু বাংলাদেশ সম্পর্কে তো সেকথা বলা চলে না। এ প্রদেশ মুসলিমপ্রধান। মুসলিমপ্রধানই থাকবে। বাঙালী মুসলমানের পক্ষে বাঙালী জাতীয়তাবাদই স্বাভাবিক। এতদিন ছিলও তাই। ইদানীং কেমন যেন মনে হচ্ছে যে ওরা আর বাঙালী বলে পরিচয় দিতে ইচ্ছুক নয়। বুহত্তর মুসলিম সমাজে আসন পেতে হলে বাঙালী বলে পরিচয় দেওয়া যেন হিন্দু বলে পরিচয় দেওয়া। যেন বাংলাভাষাটাও হিন্দুর ভাষা। উর্দু টাই মুসলমানের নিজস্ব। আমাদের প্রতিবেশীরাও বাংলায় কথা বলতে কেমন যেন সঙ্কোচ বোধ করেন। তবে মীর সাহেবের কথা আলাদা। উনি প্রথমেই বাঙালী। ওঁর সম্প্রদায়েয় সজে ওঁর বনিবনা হয় না। ওঁরা প্রথমেই মুসলমান।”

মীর সাহেবের মতো বাংলাপ্রেমিক মুসলমান কোনোদিনই পাকিস্তানী হবেন না। মানস স্থানান্তিত। “কিন্তু ওঁটার আপন সম্প্রদায়ে তিনি মাইন-রিটিতে। এককালে যারা দলে দলে মুসলমান হয়ে যায় এখন যদি তারা দলে দলে পাকিস্তানী বনে যায় তো আমরা নিরুপায়। এ সমস্যা আমাদের ভাবিয়ে তুলেছে।”

“আমার কথা যদি বল আমি বাঙালী মুসলিম রাজত্বে বাস করতে রাজী আছি, কিন্তু পাকিস্তানী মুসলিম রাজত্বে বাস করতে নারাজ।” স্বপনদা বলেন। “আশা করি সে রকম পরিস্থিতি কোনোদিন উদয় হবে না।”

“তা হলে ইংরেজকে পনেরো বছর কেন, আরো একশো বছর মাথায় করে রাখতে হয়। আমি তাতে নারাজ।” বৌদি লাফ কথা শুনিয়ে দেন।

“স্বাধীনতা বলতে পাকিস্তানী স্বাধীনতাও বোঝায়, রাহু। দশ কোটি মানুষ যদি আলাদা হবার স্বাধীনতা চায় তবে তাদের সে স্বাধীনতা কি অস্বীকার করা যায়? স্বাধীনতা বলতে যেমন বিবাহের স্বাধীনতা বোঝায় তেমন বিবাহবিচ্ছেদের স্বাধীনতাও কি বোঝায় না? কিন্তু প্রশ্ন হচ্ছে কেন ওরা এত অবুঝ হবে যে বিচ্ছেদ শ্রেয় মনে করবে? ধর্মের টানই কি সব? নাড়ীর টান কি তারই মতো একটা টান নয়? বাংলাদেশ, বাংলাভাষা, বাঙালী জাতি—এসব কি কেবল হিন্দুদেরই টানে? মুসলমানদেরও টানে না? মায়ের দুই ছেলে সমান নয়, একজন বড়ো, একজন ছোট। কিন্তু মা তো দু’জনেরই মা? মাকে শুদ্ধ অস্বীকার করার প্রবণতা এল কোন্‌খান থেকে?” স্বপনদা স্থান।

“এল পাঞ্জাব থেকে! পাঞ্জাবী মুসলমানরাই এর উদ্গাতা। বিশেষ করে মহাকবি ইকবাল। আইডিয়াটা তাঁর, নামকরণটা রহমৎ আলী বলে একটি ছাত্রের। ইংরেজী বর্ণমালা থেকে প্রদেশের আশু অক্ষর নিয়ে একত্র গেঁথে হয়েছে পাকি, তার সঙ্গে জুড়ে দেওয়া হয়েছে স্থান। কিন্তু বাংলার ‘ব’ অক্ষর বঞ্চিত।” মানস উত্তর দেয়।

## ॥ আট ॥

ব্রেকফাস্টের পর স্বপনদা বলেন, “চল, আমরাও একটু বেড়িয়ে আসি। মীর আবদুল লতিফ সাহেবকে তো চেনো।”

মানস বলে, “একটা সভায় আলাপ হয়েছিল। চিঠিপত্রে সে আলাপও হস্ততায় পরিণত হয়েছে। উনিও সাহিত্যিক, আমিও সাহিত্যিক। আমার লেখার উনি পাঠক। ওঁর লেখার আমি। বয়সে প্রবীণ, অভিজ্ঞতায়ও বহুদর্শী।”

“কিন্তু ওঁর প্র্যাকটিস তেমন জমল না। তাই পাটটাইম চাকরি নিতে হয়েছে। ল কলেজে পড়ান। আমরাও তো সেই দশা।” স্বপনদা আক্ষেপ করেন।

মীর সাহেব তাঁর বৈঠকখানায় বসে তাঁর এক সম্পাদক বন্ধুর সঙ্গে গল্প করছিলেন। বেল শুনে বেরিয়ে এসে একগাল হেসে বলেন, “আইয়ে হজরৎ, তশরীফ লাইয়ে।”

স্বপনদা অবাক হয়ে স্বধান, “হঠাৎ উদ্ কেন?”

“আরে, সেইটেই তো আজকের দিনের জলন্ত প্রশ্ন। তাই নিয়েই তো আমার সম্পাদক বন্ধু কামালউদ্দীন আহমদের সঙ্গে আলোচনা হচ্ছিল। কী খাবেন, বলুন?” মীর সাহেব তাঁর খানশামাকে ডাক দেন।

“ধাক, আমরা এইমাত্র ব্রেকফাস্ট খেয়ে এসেছি।” স্বপনদা আপত্তি করেন।

মীর সাহেব নাছোড়বান্ধা। বাড়ীর তৈরি মোরব্বা খেতে হবে।

‘পড়েছি মোগলের হাতে খানা খেতে হবে সাথে।’ স্বপনদা হাসেন।

কামালউদ্দীন সাহেব বলেন, “কথাটা মিথ্যে নয়। খানা খাইয়ে সায়েস্তা খান্ আমার পূর্বপুরুষকে ব্রাহ্মণ থেকে যবন করেন। হিন্দুরা তখনকার দিনে আমাদের যবনই বলত। মুসলমান বলে চিহ্নিত করা হয় ইংরেজ আমলেই।”

মীর সাহেব বলেন, “ওরা আমাদের যবন করেছে, কিন্তু জবান তো কেড়ে নেয়নি। আমরা চিরকাল বাংলায় কথা বলে এসেছি, বড়জোর হুঁচরটে আরবী ফরাসী কথা ব্যবহার করেছি। জনকে ‘পানী’ তো হিন্দু পানী-পাড়েয়াও বলে। বিহারে গেলেই শোনা যায়। ‘জী’ বলে জবাব দেওয়া তো বিহারী হিন্দুদেরও অভ্যাস। আমরা যদি নবীজী বলি তো সেটা রামজী, গুরুজীর অহুসরণে। ধর্ম্মে আমরা মুসলমান, ভাষায় বাঙালী। কিন্তু কলকাতার মুসলমান সমাজে দেখছি আমরা বাঙালী বলে পরিচয় দিলে যাকে বলে কল্কে পাইনে। উদ্‌তে বাৎচিং করে প্রমাণ করতে হবে যে আমরা ষথার্থই মুসলমান। নয়তো কাফের। বাংলা নাকি কাফেরদের জবান।”

স্বপনদা কামালউদ্দীন সাহেবের মুখের দিকে অবাক হয়ে তাকান।

“মীর সাহেব বলতে সঙ্কোচ বোধ করবেন, তাই আমিই বলি, শুনুন। তাঁর পূর্বপুরুষ স্থলতানা আমলের রইস। পাবনা জেলার একটি খানদানী বংশ। নারা উত্তরবঙ্গে সবাই ওঁদের এক ডাকে চেনে। কিন্তু ব্যারিস্টার হয়ে কলকাতায় বসার পর থেকে তাঁকে কলকাতার মুসলমান সমাজে ব্যারিস্টার হিসাবে পরিচয় দিতে হয়েছে। বংশ পরিচয় কেউ জানেও না, জানতেও চায় না। এখন এই ব্যারিস্টার সাহেবের ডাক্তার ছেলে কলকাতার অভিজাত

পরিবারেই বিয়ে করবে বলে বন্ধপরিষ্কর। তা করাকা মীর সাহেব ও তাঁর বেগম সায় দিলেন। বিয়ের পর দেখা গেল বৌমা শশুরশাশুড়ীর সঙ্গে উদ্‌ভেদ কথা বলবেন, বাংলায় বললে তাঁর মানহানি হয়। কলকাতায় দু'পুরুষ বসবাস করে ওরা উদ্‌ভাষী বনে গেছে। নইলে ওদের আদিনিবাস তো নদীয়া মেহেরপুরে। কলকাতার বাঙালী মুসলমান এখন বাঙালী বলে পরিচয় দিতে নারাজ। তা হলে সে কী? বিহারী? পাঞ্জাবী? না, সে শুধু মুসলমান। মুসলমান কি একটা জাতির নাম? জিজ্ঞাসা করলে বলে, মুসলমানরা একটা জাতি, একটা নেশন। যেমন হিন্দুরা একটা জাতি, একটা নেশন। তা হলে বাঙালী কোথায় দাঁড়ায়? এর উত্তরে বলবে, বঙ্গালী তো হিন্দু। ও লোক হিন্দু হয়। আমরা এখন দোটানায় পড়েছি, গুপ্ত সাহেব। শ্রাম রাখি না কুল রাখি? ধর্ম রাখি না ভাষা রাখি? ধর্ম রাখতে হলে ভাষা ছাড়তে হবে। মীর সাহেব অবশ্য উদ্‌ভালো জানেন, কিন্তু তাঁর বেগম তো এত বয়সে উদ্‌ শিখতে পারবেন না। তাঁর টুটি ফুটি উদ্‌ শুনে বৌমা তো হেসে খুন। শাশুড়ীর হাড় জালিয়ে বৌমা সেই যে বাপের বাড়ী গেছে, আর ফেরার নাম নেই। ছেলেটা বিষম অসুখী। না পারে মাকে উদ্‌ শেখাতে, না পারে বৌকে বাংলা ধরাতে। শেখাতে হবে না ওকে। ও বাংলা ভালোই জানে। কিন্তু বলবে না। পাছে কেউ ভাবে ও বাঙালী হিন্দু কাকের। আমাদের এখন কর্তব্য কী? ছেলের আবার বিয়ে দেওয়া? এবার আর কলকাতায় নয়। উত্তরবঙ্গের অভিজাত মুসলিম সমাজে?" কামালউদ্দীন সাহেব স্থান।

“আরে, না, ও কথা ভাবা যায় না।” মীর সাহেব শিউরে ওঠেন। “আমি বহুবিবাহে বিশ্বাস করিনে। আর দ্বিতীয় বিবির জন্তে প্রথম বিবিকে তালাক দেওয়াও আমার মতে অধর্ম। তালাক কোনো কোনো ক্ষেত্রে অপরিহার্য। কিন্তু এক্ষেত্রে তা নয়। ছেলের জন্তে আমি অন্য বাসার বন্দোবস্ত করছি। বৌ নিয়ে ও আলাদা থাকবে। ওদের বাসায় ওরা কোন ভাষায় কথা বলবে ওরাই ঠিক করুক। তবে ছেলেও তার মায়ের মুখ রক্ষা করতে এক তৃতীয় পক্ষ উদ্‌ভাবন করেছে। সে বাংলাতেও না, উদ্‌তেও না, ইংরেজীতে কথা বলবে। তার বৌ অবশ্য ইংরেজীশিক্ষিতা। ইচ্ছা করলে ইংরেজীতে কথা বলতে পারবে। কিন্তু পাকিস্তান যদি একদিন হাসিল হয় তবে উদ্‌ জবান ফরজ হবে। ইংরেজী হবে হারাম। তখন কী উপায়?”



এবার মানস মুখ খোলে। পাকিস্তান যদি হাসিল হয় তাতে বাংলার মুসলমানদের কী? পাকিস্তানের ডেফিনিশনে তো বাংলাদেশের উল্লেখ নেই। ওটা মুসলমানদের হোমল্যাণ্ড হতে পারে, কিন্তু স্বতন্ত্র এক হোমল্যাণ্ড। সেখানকার ভাষা বাংলা না হয়ে উর্দু হবে কোন যুক্তির জোরে?”

“যুক্তিটা হচ্ছে এই যে, মুসলমানরা যেখানেই থাকুক না কেন তারা এক নেশন। স্বতরাং একভাষী। বাঙালী বিহারী বলে কোনো ভেদ নেই, বাংলাভাষী উর্দুভাষী বলে ভেদ থাকবে কেন? আমার জন্ম চাষী পরিবারে। আমি চাষীদের স্বার্থ রক্ষার জন্য কৃষক প্রজা পাটিতে যোগ দিয়েছি। তাদের স্বার্থ রক্ষার জন্যে একটি পত্রিকাও সম্পাদনা করি। আমার কাছে হিন্দু চাষী আর মুসলিম চাষী বলে দুই পৃথক শ্রেণী নেই। কিন্তু মুসলিম জাতীয়তাবাদীদের মতে মুসলমানদের মধ্যে চাষী ও জমিদার বলে দুই পৃথক ভাগ নেই। সবাই ভাই ভাই। সকলেরই এক স্বার্থ। সেটা মুসলিম স্বার্থ। তার বিপরীত স্বার্থ হিন্দু স্বার্থ। অতএব দেশভাগ করতেই হবে। পাকিস্তানই মুসলমানদের নিজস্ব বাসভূমি। এখন আমার কাগজ চালানো দায়। যদি বলি এটা ঠিক নয় তা হলে কাগজ চলবে না। দলেও ভাঙন ধরেছে। ইতিমধ্যেই অনেকে মুসলিম লীগে নাম লিখিয়েছে। পাকিস্তান চাই বললে ভোট পাবার সম্ভাবনা বেশী। চাইনে বললে সম্ভাবনা কম। পাকিস্তানের ডেফিনিশনে বাংলাদেশের উল্লেখ নেই, সেটা একটা স্বতন্ত্র হোমল্যাণ্ড, এটাই লাহোর প্রস্তাবের মর্ম। কিন্তু ইতিমধ্যে মুসলিম লীগের বোলচাল বদলে গেছে। স্বতন্ত্র বঙ্গ বললে যত লোক ভোট দেবে স্বতন্ত্র পাকিস্তান বললে তার চেয়ে ঢের বেশী লোক ভোট দেবে। কেন্দ্রীয় আইনসভায় যারা মুসলিম লীগ টিকিটে নির্বাচিত হবেন তাঁরা জিন্না সাহেবের নেতৃত্বে পাকিস্তান পসন্দ দল হিসাবেই কাজ করবেন।” কামালউদ্দীন উত্তর দেন।

মোরক্বা গেঁতে থেতে স্বপনদা বলেন, “হুঃস্বপ্ন! হুঃস্বপ্ন! পাকিস্তান একটা হুঃস্বপ্ন! ইকবাল দেখতে চেয়েছিলেন। দেখতে পেলেন না। কিন্তু নজরুল যেন না দেখেন।”

“নজরুল এখন প্রকৃতিস্থ নয়। বেচারার বড়ো হুঁদীন যাচ্ছিল। সংসার-চিন্তাই ওকে পাগল করে দিয়েছে। এর উপর যদি আসে পাকিস্তানের চিন্তা তা হলে ওর পাগলামি আর সারবে না।” মীর সাহেব বলেন উদ্বেগভরে।

“ওর নিজের বাড়ীতেই তো দুই নেশন।” মানস কটাক্ষ করে।

“ওর মতো বাঙালী জাতীয়তাবাদী আর কে? বাঙালী জাতিটাই আজকাল অপ্রকৃতিস্থ। বাঙালী হিন্দুরা যখন বাঙালীর গৌরবে আত্মহারা হন তখন বাঙালী মুসলমানদের অস্তিত্ব ভুলে যান। যেন ওরা বাঙালীই নয়। ব্যতিক্রম একমাত্র নজরুল। কিন্তু খোঁজ করলে দেখবেন আরো ব্যতিক্রম আছেন। তাঁরা বাঙালী হিন্দুদের চোখে মুসলমান, আর বাঙালী মুসলমানদের চোখে হিন্দু। তাঁদের মধ্যে এমন লোকও আছেন যারা মাছমাংসই খান না, গোমাংস তো দূরের কথা। আর হিন্দুত্বের সংজ্ঞাও আজকাল এমন হয়েছে যে যারা দেবদেবী মানে না তারা হিন্দুই নয়। আমার ব্রাহ্ম বন্ধুদের অবস্থাও আমারই মতো। না ঘরকা না ঘাটকা।” আফসোস করেন মীর সাহেব।

“মানসের ও আমারও তো একই অবস্থা।” স্বপনদা বিলাপ করেন।

“দেখুন, গুপ্ত সাহেব, তলে তলে এক প্রকার পোলারাইজেশন হয়ে যাচ্ছে। একদিকে তথাকথিত ভারতীয় জাতীয়তাবাদী বাঙালী হিন্দু। আরেক দিকে বাঙালী বলে পরিচয় দিতে কুণ্ঠিত তথাকথিত মুসলিম জাতীয়তাবাদী বাঙালী মুসলমান। বাংলার বাইরে বাঙালামাত্রেরই প্রভাব প্রতিপত্তি ত্রিশ বছর আগে ভুঙ্গে উঠেছিল। কবিগুরু যখন নোবেল প্রাইজ পান। তার পর গান্ধীজীর স্বর্ঘ যখন পশ্চিমে উদয় হয় তখন বাঙালীর স্বর্ঘ পূর্বদিকে হেলে। এই সেদিন অস্তাচলে গেল। কবিগুরুর ভগ্নে আমরা কি কম অশ্রুপাত করেছি? তাকেই আমরা ভালোবাসি, ইকবালকে নয়। কিন্তু হঠাৎ দেখছি ইকবালই হয়েছেন মুসলমানদের ‘জাতীয়’ কবি। রবীন্দ্রনাথ নাকি প্রচ্ছন্ন পৌত্তলিক।” মীর সাহেব মুগ্ধে পড়েন।

“আমার তো মনে হয় এটা একটা সাময়িক আত্মবিশ্বাস। যেমন হিন্দুর পক্ষে, তেমনি মুসলমানের পক্ষে। নইলে ‘পলাশীর যুদ্ধ’ পড়ে সিরাজের জগ্নে কাঁদেনি কোন্ বাঙালী হিন্দু? কেউ কি চেয়েছিল পলাশীতে নবাবের হার হয়? তখন তো কারো আপত্তি ছিল না মুসলিম নবাবের অধীনে বাস করতে। মুসলিম বাদশাকে আহুগত্য জানাতে। রাজপুতরা বিদ্রোহ করেছিল, মরাঠারা বিদ্রোহ করেছিল, কিন্তু বাঙালী হিন্দুরা বিদ্রোহ করেননি। অর্থনীতি তো তাদের নিয়ন্ত্রণেই ছিল। আর পশ্চিমা জৈন শেঠদের। রাজ্যহারা হয়ে মুসলমানদের যদি দুর্গতি হয়ে থাকে অর্থহারা হয়ে হিন্দুদেরও তেমনি দুর্গতি। ইংরেজ আমলে কেউ বা কয়েকটা চাকরি বেশী পেয়েছে, কেউ বা কয়েকটা কম। কিন্তু তাদের সংখ্যা লক্ষ লক্ষ নয়। সব ক’টা চাকরি হারাতেও

আমাদের আপত্তি থাকত না, যদি আমরা বাণিজ্যে অপ্রতিদ্বন্দ্বী হতুম। তার পর কৃষিকর্মে। বগড়াটা তো হচ্ছে চাকরি বাকরির ইস্যুতে। সেটাকেই ঢাকা দেওয়া হচ্ছে পাকিস্তানের ইস্যু দিয়ে। যেমন শাক দিয়ে মাছ ঢাকা।” মানস বিশ্লেষণ করে বলে।

“সেইরকমই ছিল দশ বছর আগে। কিন্তু ইতিমধ্যে সাম্প্রদায়িক রোয়েদাদ এসে হিন্দুদের মনে দারুণ আঘাত হেনেছে। এর জন্তে ওরা ইংরেজকে তো ক্ষমা করেইনি, মুসলমানকেও দায়ী করেছে। ‘আমরা একা লড়ে মরেছি আর তোমরা কিনা আমাদের লড়াইয়ের ফল ভোগ করছ।’ হিন্দুদের ধারণা দাঁড়িয়ে গেছে যে রাজার শত্রু বলে ওদের শান্তি দেওয়া হয়েছে, আর রাজার মিত্র বলে মুসলমানদের পুরস্কার দেওয়া হয়েছে। প্রাদেশিক স্বায়ত্তশাসনে ওদের প্রকৃত প্রতিনিধিদের স্থান বিরোধীদের আসনে। সরকারগঠনে নয়।” মীর সাহেব হুঁশিত।

“আমার ছেলবেলায় আমি ছিলাম বাঙালী জাতীয়তাবাদী। সেটা ছিল স্বদেশী আন্দোলনের যুগ। বড়ো হয়ে হই ভারতীয় জাতীয়তাবাদী। সেটা ছিল অসহযোগ আন্দোলনের যুগ। আরো বড়ো হয়ে ইউরোপে বাস করে আমি হই উদার মানবিকবাদী। আমার পক্ষে এখন পেছন ফিরে যাওয়া সম্ভব নয়, মীর সাহেব। বাঙালী জাতীয়তাবাদীরা যদি হিন্দু মুসলমানের মিলিত বাসভূমি চায় তো তাকে পাকিস্তান বলে আখ্যায়িত করলেও সে গোলাপের মতো তেমনি সুগন্ধ বিতরণ করবে, কিন্তু তার যদি স্বতন্ত্র একটা কেন্দ্র হয়, সে কেন্দ্র যদি হয় বাংলাদেশের বাইরে কোনো এক শহরে, তার ভাষা যদি হয় উর্দু আর কতারা হন পাঞ্জাবী ও গুজরাটী মুসলমান, তবে সেই সাম্প্রদায়িক রোয়েদাদের মতো এটাও হবে আরেক সাম্প্রদায়িক রোয়েদাদ। কেমন করে এর আমি সমর্থন করি, বলুন? তা হলে কি আমি এর বিরোধিতা করব? না, সেটাও আমার স্বভাবে নেই। আমি নিবিরোধী। আমি ঘরবাড়ী বেচে দিয়ে বিলেত চলে যাব। সেখানেই প্র্যাকটিস করব। ভাবনা কেবল আমার ঘরগীকে নিয়ে। ঘর ফেলে যেতে পারি ঘরগীকে তো ফেলে যেতে পারিনে। আমি যদি তাঁকে টেনে নিয়ে যেতে না পারি তবে তিনিই আমাকে টেনে রাখবেন এখানে। এই কলকাতা শহরে। কিন্তু পাকিস্তান তিনি মেনে নেবেন না। ইংরেজরা যাকে ইচ্ছে তাকে পুরস্কার দিক, কিন্তু তাঁর অধিকারে যা লাগলে তিনিও যা দেবেন। হিন্দুর জন্মভূমিতে হিন্দুর কোনো অধিকার নেই, একমাত্র অধিকারী মুসলমান,

এটা রাজনীতি হতে পারে, স্থনীতি নয়। নৈতিক সমর্থন জোর করে আদায় করা যায় না। জোর করে আদায় করা যায় বশত। তার আগে যুদ্ধে জিততে হবে। গৃহযুদ্ধে। যেটা এই সাতশো বছরে ঘটেনি। কী আকসোস।” স্বপনদা কফিতে চুমুক দেন।

“আপনার সঙ্গে আমি একমত, গুপ্ত সাহেব। পাকিস্তানকে আমি বলি গোরস্থান। জিন্নাকে বলি জিন। বাঙালী মুসলমান যদি স্বতন্ত্র একটা নেশন হিসাবে স্বতন্ত্র একটা বাসভূমি চায়, যেটা পাঞ্জাবের সঙ্গে একস্থত্রে গাঁথা আব যেটার রাজভাষা উর্দু, তা হলে আমিও প্রতিবাদ করব। কিন্তু ঘরবাড়ী ছেড়ে বিলেত যাওয়া আমার পক্ষে সম্ভব নয়। দেশে আমার গবিবথানা আছে। কলকাতা শহরেও ছোট একথানা এমারত কিনেছি। আর আমার বেগম সাহেবা তো বাংলা ভিন্ন আর কোনো ভাষা বোঝেন না। গৃহত্যাগ না গৃহিণী-ত্যাগ আমার সমস্যা নয়। আমি পাকিস্তানেই থেকে যাব ও হুদিনের অপেক্ষা করব। একদিন না একদিন বাঙালী মুসলমান তার ভুল বুঝতে পারবে। আপনি সব মানুষকে কিছুদিনের জন্তে বোকা বানাতে পাবেন কিছু মানুষকে সব দিনের জন্তে বোকা বানাতে পারেন, কিন্তু সব মানুষকে সব দিনের জন্তে বোকা বানাতে পারেন না, জিন্না সাহেব। আর ওই ইংরেজের কুশায় পাকিস্তান! ওটা যেন গোরু মেরে জুতো দান। পলাশীতে যাদের মার খেয়েছি তাদের হাত থেকে মীর জাফরের ইনাম!” মীর সাহেব খেদোস্তি করেন।

কামালউদ্দীন নীরবে শুনছিলেন। বলেন, “গাছে কাঁঠাল গোঁফে তেল। ইংরেজ কি রাজত্বের মায়া কাটিয়ে ফকিরিা নিচ্ছে? যুদ্ধে জিতলে আরো গ্যাট হয়ে বসবে। যুদ্ধে হারলে জার্মানদের হাতে সঁপে দেবে। আসলে এটা নির্বাচনে মুসলিম লীগকে জিতিয়ে দেবার ফন্দি। কেবল বাংলাদেশে নয়, আর সব প্রদেশে। পাকিস্তানের মোহে সবাই চোখ বুজে ভোট দেবে। পাকিস্তানের ডেফিনিশন এখনো গোলা রয়েছে। ওর মধ্যে আসামও পড়তে পারে। দিল্লিও। কিন্তু লীগওয়ালারা ধরে নিয়েছেন যে শিখেরা রণজিৎ সিংহের রাজ্য বিনা যুদ্ধে পাকিস্তানের বাদশাদের চরণে সমর্পণ করবে। শিখদের সম্মতি না নিয়ে মুসলমানদের পুরস্কার দিতে গেলে আবার এক সিপাই-বিত্রোহ।”

“সেকথা ঠিক। ইংরেজরা কেন সে বুঁকি নেবে?” মানস মন্তব্য করে।

স্বপনদা বলেন, “শিখদের পুরস্কার দিতে হবে। তাদের মতো রাজভক্ত

কারা? সিপাইবিদ্রোহেও তারা অংশ নেয়নি। তাদের চটালে নির্ধাত সিপাইবিদ্রোহ।”

“আমাদের এক পাঞ্জাবী সহকর্মী পাঞ্জাব থেকে ফিরে এসে বলেছেন সেখানে নাকি এক টুকরো লোহা কিনতে পাওয়া যাচ্ছে না। হিন্দু মুসলমান শিখ সবাই কিনে নিয়ে গোপনে হাতিয়ার বানাচ্ছে। প্রত্যেকেরই দাবী গোটা পাঞ্জাব। ইতিহাসের যতগুলো বড়ো বড়ো যুদ্ধ সব ক’টাই তো পাঞ্জাবেই ঘটেছিল।” মানস বলে।

“সে সব যুদ্ধ সৈনিকে সৈনিকে। জনতায় জনতায় নয়। শশস্ত্র জনতার সঙ্গে শশস্ত্র জনতার যুদ্ধ একটামাত্র যুদ্ধক্ষেত্রে নিবদ্ধ থাকবে না। যেমন পানিপথে বা তরাইনে। সারা প্রদেশ জুড়েই হানাহানি কাটাকাটি লুটপাট ঘর জালানি চলবে। নারী হরণও বাদ যাবে না। এর নজীর জার্মানীর সপ্তদশ শতাব্দীর ত্রিশবছরের যুদ্ধ। যে যুদ্ধে তিন ভাগের এক ভাগ মানুষ মারা যায়। দেশ ছারখার হয়। খোপে খোপে বিভক্ত হয়। যদিও উপরে একজন সম্রাট তবু তাঁর ক্ষমতা সীমাবদ্ধ।” স্বপনদা ইতিহাস স্মরণ করেন।

“বাংলাদেশেও তো সেরকম ঘটতে পারে।” মানস আর্তস্বরে বসে।

“না, বাঙালীরা পাঞ্জাবীদের মতো ধর্মান্ধ নয়।” মীর সাহেব আশ্বাস দেন। “পাঞ্জাবে শিখদের উপর যে রকম উৎপীড়ন হয়েছিল বাংলাদেশে তার কোনো তুলনা নেই। ফলে শিখরা হয়ে ওঠে সম্প্রদায়কে সম্প্রদায় কুপাণধারী। ডাক দিলে সকলেই ঝাঁপ দিয়ে পড়ে সংগ্রামে। বাংলাদেশের ঐতিহ্য অসামরিক। আমরা বাঙালীরা অসামরিক জাতি। আপনারা নিশ্চিন্ত থাকুন। আমরা ভাইয়ে ভাইয়ে লড়ব না। আপস করব।”

কামালউদ্দীন সাহেব বলেন, “ধর্মান্ধতা না থাকলেও এখানে ধর্মের নামে রাজনীতি আছে। কৃষক প্রজার যে জায়সত্ত্ব অভিযোগ তা সে মুসলমান বলে নয় বা হিন্দু বলে নয়, সে শোষিত ও বঞ্চিত বলে। কিন্তু ভোটের দালালরা তাদের বোঝাচ্ছে তারা মুসলমান বলেই হিন্দু জমিদার ও মহাজন কুলের হাতে এই ছুঁতোগ। যেন মুসলিম জমিদার ও কাবুলী মহাজনকুল তাদের খাজনা ও হুদ মাক করে। খাজনা বাকী পড়লে জমি খাস করে না, হুদ বাকী পড়লে লাঠিপেটা করে না। আরেক দল ভোটের দালাল এখন হিন্দুদের বোঝাচ্ছে হিন্দুর ধন মান প্রাণ বিপন্ন। কংগ্রেস তাকে রক্ষা করবে না। সে তো কেবল মুসলমানদের তোয়াজ করতেই জানে। গান্ধী তো

মুসলমানদেরই আপন জন। হিন্দুকে বাঁচাবেন একমাত্র বীর সাভারকর। এই যে ধর্মের নামে রাজনীতির খেলা এর উদ্দেশ্য যদিও ক্ষমতার রাজনীতি, তবু ভোটভূটির মধ্যেই এটা নিবন্ধ থাকবে না। তার পরের পর্যায় লাঠালাঠি। যার জমি নেই সে জমি কেড়ে নেবে, যার আছে সে হিন্দুধর্মের দোহাই দেবে। অমনি করে বেধে যাবে ধর্মীয় সংঘর্ষ। গরিব হিন্দুকে মারবে গরিব মুসলমান। দুর্বল মুসলমানকে মারবে দুর্বল হিন্দু। বৃথা শোক দিয়ে ভুলিয়ে রাখছেন মীর সাহেব। ধর্মের থেকে রাজনীতিকে পৃথক করতে না শিখলে হিন্দু বা মুসলমান কোনো পক্ষই নিরাপদ নয়। ধর্মও ভালো, রাজনীতিও ভালো, কিন্তু ধর্মের ভেতর পরে রাজনীতি ভালো নয়। আমাদের পরীক্ষার দিন আসছে।”

“তা বলে ধর্মবর্জিত রাজনীতিও কি ভালো?” মীর সাহেব প্রশ্ন করেন। ‘ধর্মবর্জিত মার্কসবাদ আর তার প্রতিবাদী ধর্মবর্জিত ফাসিবাদ ও নাৎসীবাদ আজ সারা ইউরোপকে যুদ্ধক্ষেত্রে পরিণত করেছে। জাপান যদি যোগ দেয় তো সারা বিশ্বকেও। ধর্মের প্রভাব থেকে মুক্ত হলে রাজনীতি একটা অভি-শাপ হয়ে উঠতে পারে, কামাল সাহেব। রাজনীতি থেকে মহাত্মা গান্ধী বা মওলানা আজাদকে বিদায় দিলে লাভ যতটুকু হবে ক্ষতি হবে তার চেয়ে বেশী।”

“মীর সাহেব,” মানস বলে, “অষ্টাদশ শতাব্দীতে বার্ক বলেছিলেন, শিভাল্লার যুগ শেষ হয়ে গেছে। এই শতাব্দীতে আমিও তেমনি বলতে পারি, ধর্মমিশ্রিত রাজনীতির যুগ শেষ হয়ে গেছে। গান্ধীজীর পেছনে যেটা আছে সেটা ধর্মের জোর নয়, নীতির জোর। তিনি নিজেই একটা মরাল কোর্স। যেদিকে তিনি সেদিকেই জয়। তাঁর সহকর্মীরা ঈশ্বর না মানলেও তিনি কিছু মনে করেন না, কিন্তু সত্য মানতে হবে, অহিংসা মানতে হবে, ত্যাগ মানতে হবে, সংযম মানতে হবে। আগে তিনি বলতেন, ঈশ্বরই সত্য। এখন বলেন, সত্যই ঈশ্বর। যারা সত্যগ্রহী তারা ঈশ্বরবিশ্বাসী না হলেও ঈশ্বরবিশ্বাসীর সমান। ধর্মবর্জিত রাজনীতি ভালো না হতে পারে, কিন্তু নীতিবর্জিত রাজনীতি নিশ্চয়ই মন্দ। এই পার্থক্যটা সহজে লোকের চোখে পড়ে না বলে ধর্মকেও নীতির খাপ হিসাবে ব্যবহার করতে হয়। স্ত্রুতরাং সবাইকে বলা হচ্ছে ভালো হিন্দু বা ভালো মুসলমান বা ভালো খ্রীষ্টান বা ভালো শিখ হতে। অর্থাৎ ভালো মাহুষ হতে। গান্ধীজীও একজন মানবিকবাদী। একজন হিউমানিস্ট।”

মানসের সিদ্ধান্ত।

“হিউমানিস্ট আজকাল কে নয় ?” স্বপনদা বলেন, “মার্কসও হিউমানিস্ট। লেনিনও হিউমানিস্ট। সেইজন্মে তার সামনে একটা বিশেষণ বসাতে হয়। কী রকম হিউমানিস্ট ? লিবারল হিউমানিস্ট, না র্যাডিকাল হিউমানিস্ট, না সোশিয়াল ডেমোক্রাটিক হিউমানিস্ট, না রেভোলিউশনারি হিউমানিস্ট, না ক্রাশনালিস্ট হিউমানিস্ট ? হিটলার মুসোলিনিও হিউমানিস্ট বলে দাবী করছেন। যদিও আমার মতে ওঁরা হিউমানিস্টই নন, ওঁরা রিভাইভালিস্ট। মুসোলিনি চান রোমান এম্পায়ারের পুনরাবৃত্তি। নিজেই হবেন সীজার। আর হিটলার চান হোলি রোমান এম্পায়ারের পুনরাবৃত্তি। নিজেই হবেন সম্রাট অটো ছােট। ইটালীও আসবে ওঁর পদতলে। পোপও হবেন ওঁর আজ্ঞাধীন। যে যার খুশিমতো পাটি গঠন করেছেন। তার সঙ্গে যুক্ত হয়েছে একপ্রকার না একপ্রকার মতবাদ। মতবাদীদের বলা হয় ফাসিস্ট বা ন্যাৎসী। হিউমানিজমের বিকৃত রূপ। তার প্রায় সবটাই অন্ধ বিশ্বাস ও বিষেষ। সেই সঙ্গে কিছু সদর্থকও আছে। সেটা জার্মানীর ও ইটালীর নব নির্মাণ। বেকার বলে কেউ নেই। অভুক্ত বলে কেউ নেই। জনতা যা পেয়ে তুষ্ট—ব্রেড আর মার্কাস। রোমানদের মতো।”

“একই রকম খোয়াব দেখছেন আমাদের লীগপন্থী বন্ধুরাও।” কামাল সাহেব বলেন। “ওঁরা বিশ্বে হোলি খেলাফৎ এম্পায়ার ফিরিয়ে আনবেন। পাকিস্তান তার শেষ নয়, তার শুরু। হিটলার, মুসোলিনির মতো জিন্নার পেছনেও গডলিকাপ্রবাহ। তফাৎ শুধু এই যে হিটলার, মুসোলিনির রাজনীতি ধর্মবর্জিত। ধর্মের স্থান নিয়েছে ন্যাৎসী ও ফাসিস্ট মতবাদ। তাদেরও শাস্ত্র আছে। শাস্ত্রী আছেন। শুধুমাত্র শস্ত্র নয়, শস্ত্রধারী নয়। লীগপন্থীরাও একদল উলেমাকে তাঁদের পক্ষে পেয়েছেন। একদল ইনটেলেকচুয়ালকেও। জমিদার, তালুকদার, ধনিক, বণিকরা তো তাঁদের পক্ষে আছেনই। আছেন ইংরেজ মুকব্বিররাও। আমাদের সাধ্য কী যে আমরা তাঁদের প্রোপাগান্ডার মুখে দাঁড়াতে পারি ! প্রোপাগান্ডাই তো অর্ধেক মুদ্ধ। আমার কাগজ উঠে যাবে। মীর সাহেবের লেখাও আর কোথাও বেরোবে না। উণ্টো ফল হবে যদি হিন্দুদের প্রতিকায় বেরোয়। উনি জাতীয়তাবাদী মুসলমান আর আমি কৃষক প্রজাদারদী মুসলমান। আমাদের স্বার্থ পরস্পরবিরোধী নয়। আমরা একনোকায় এতদিন ভেসেছি। কিন্তু হোলি খেলাফৎ এম্পায়ার যদি ফিরে আসে আমরা একনোকায় ডুবব।”

“না, না, ইংরেজ থাকতে ওটা কখনো সম্ভব নয়। আর ইংরেজ কি বিনা পরাভয়ে যাবে?” মীর সাহেব এককথায় উড়িয়ে দেন।

স্বপনদা কথাবার্তকে মোড় ফিরিয়ে দেন। ‘আজ আমরা একটা উদ্দেশ্য নিয়ে এসেছিলুম, মীর সাহেব। আমার ছোটখাটো একটা গ্রুপ আছে। আমরা তার নাম রেখেছি ‘লিবারল হিউমানিস্ট গ্রুপ’। বারো জনের বেশী মেম্বর থাকবেন না। তাঁদের মধ্যে অন্তত দু’জন মুসলমান। আপনাকে তো অবশ্যই, আপনার বন্ধুকেও আমাদের সঙ্গে পেলে প্রীত হই।”

“কিন্তু আমার কথাবার্তা শুনে কি মনে হয় আমি লিবারল হিউমানিস্ট? তা যদি হয় তো আমি সানন্দে সম্মত।” মীর সাহেব বলেন।

“আমারও সেই কথা।” কামালউদ্দিন সাহেব যদি’র উপরে জোর দেন। “মীর সাহেব আপনাদের মতোই বুজোয়া। আমি সমাজের পুনর্বিচারে বিশ্বাসী।”

স্বপনদা ভেবে বলেন, “সমাজের পুনর্বিচার নিবিরোধেও হতে পারে। আপনি আসুন, এসে আমাদের কন্ভার্ট করুন। ইসলামে নয়, পাকিস্তানী আত্মীয়তাবাদেও নয়, সব মানুষ যে সমান এই স্বতঃসিদ্ধ বিশ্বাসে।”

মীর সাহেব জানতে চান গ্রুপের মূল বক্তব্য কী।

“আপনাকে আমাদের সঙ্গে বসে একটা ম্যানিফেস্টোর খসড়া মুসাবিদা করতে হবে, মীর সাহেব। আপনাকেও কামাল সাহেব। আমরা সেটাকে বলব লিবারল হিউমানিস্ট ম্যানিফেস্টো।” স্বপনদা বলেন। “আমাদের প্রথম কথা ‘সবার উপরে মানুষ সত্য, তাহার উপরে নাই’। সে নারী না পুরুষ, হিন্দু না মুসলমান, ইউরোপীয় না ভারতীয়, বাংলাভাষী না উর্দুভাষী, জমিদার না চাষী, ধনিক না শ্রমিক, আর্য না অনার্য এসব হলো। মানুষ নামক সত্যের উপরে নয়, নিচে। দ্বিতীয়ত, মানুষের স্বধর্ম মনুষ্যত্ব, যেমন সিংহের সিংহত্ব, অশ্বের অশ্বত্ব, ময়ূরের ময়ূরত্ব, সর্পের সর্পত্ব। মনুষ্যত্ব যদি আমার থাকে তবে দেবত্ব নেই বলে আমি ছোট হয়ে যাব না। মানব হিসাবেই আমার বিচার, দেব হিসাবে নয়। আমার কাছে পারফেকশন প্রত্যাশা করা অস্বাভাবিক। মানুষকে প্রকৃতি পারফেক্ট না করেই বানিয়েছে। সে হয়তো একদিন সাধনা করতে করতে অপেক্ষাকৃত পারফেক্ট হবে। তখন হয়তো দেখবে যে অনবচ্ছিন্ন পারফেকশন আরো হৃদয়। পরিপূর্ণ মনুষ্যত্বই আমাদের অধিষ্ট। কিন্তু পরিমিত পরমাণুর মধ্যে তা কি কারো পক্ষে সম্ভব? প্রকৃতি অমুকুল না হলে, সমাজ



অনুকূল না হলে পরিপূর্ণ মহুশ্য করো আয়ত্তগম্য নয়। তা হলেও সাধনা চালিয়ে যেতে হবে। তৃতীয়ত, শাদা আর কালো এই দুটি ছাড়া আরো অনেকগুলি রং আছে, আকাশের দিকে তাকালেই আমরা তা দেখতে পাই। মাহুশের চরিত্রেও তেমনি অশেষ বৈচিত্র্য। ভালো আর মন্দ এই দুটি ভাগে তাকে বিভক্ত করা চলে না। ভালো মাহুশেরও মন্দ দিক আছে, মন্দ মাহুশেরও ভালো দিক আছে, কেউ নিপুট ভালো নয়, কেউ নিছক মন্দ নয়। মাহুশ এক জটিল সত্তা, তাকে সরল করতে গেলে সত্যতাহানি হয়। দেবত্ব ও দানবত্ব আরোপ করে রামের ও রাবণের সত্যতা হানি ঘটালে রামায়ণ আর মহাকাব্য থাকে না। হয়ে যায় ধর্মগ্রন্থ। রামও মাহুশ, রাবণও মাহুশ। দেবত্ব ও দানবত্ব হচ্ছে কাল্পনিক।”

মীর সাহেব শ্রিত হেসে বলেন, “বুঝেছি। এর জন্তে লাঠির বাড়ি খেতে হবে। কে কে রাজী আছেন সেটা আগে জেনে নিয়ে তার পরে ম্যানিফেস্টো বার করা যাবে।”

‘লাঠির বাড়ি’ শুনে স্বপনদার, মুখ দিয়ে বেরিয়ে যায়, “ও গড !”

“ভগবানকে ডাকছেন যে !” মীর সাহেব সশব্দে হেসে ওঠেন, “হিন্দুরা তত নির্দয় নয়। আপনি লাঠির বাড়ি খাবেন না। কিন্তু আমাকে খেতে হয়েছে। আবার খেতে হবে। মুসলমানদের হাতে। কেন আমাদের বিপদের মুখে ঠেলে দিতে চান, গুপ্ত সাহেব ?”

মাহুশের ব্যাপারে ভগবানকে টেনে এনে স্বপনদা অবিরোধী কাজ করে-ছিলেন। সামলে নিয়ে বলেন, “কেউ কারো চেরে কম নির্দয় নয়, মীর সাহেব। হিন্দুরা তাদের ছেলেদের ভ্রাতাপুত্র করে, বাড়ীতে এলে তাদের খেতে দেয় উঠোনে চাকরদের সঙ্গে ! বিদ্যাসাগর মহাশয় তাঁর স্বগ্রামে গিয়ে দান খয়রাত করে ফেরার সময় গাঁয়ের লোক তাঁর পাল্কীর গায়ে ঢিল ছোঁড়ে আর বিধবারাই তাঁকে শাপাস্ত করে, ‘তোরা বৌ বিধবা হোক।’ জোরসে পাল্কী চালিয়ে না দিলে হয়তো সেইদিনই শাপ ফলে যেত। তাঁর স্ত্রী বিধবা হতেন। হিন্দু নির্দয়তার কি তুলনা আছে ! সতীদাহ তো ওরা হাজার হাজার বছর ধরে চালিয়ে গেছে। সিপাইবিদ্রোহের অন্ততম কারণ হলো ফিরিঙ্গীরা কেন সতীদাহ বন্ধ করে দিয়েছে।”

মীর সাহেব হিন্দুদের পক্ষ নিয়ে কিছুক্ষণ ওকালতী করেন ও স্বপনদা মুসলমানদের পক্ষ নিয়ে ব্যারিস্টারি। তার পরে দু’জনে মানসের রায় মেনে

নেন। সে বলে, “হু’পক্ষেরই ব্যাধি হলো পরাধীনতা ও তার আনুযায়িক অজ্ঞতা। ব্যাধির প্রতিকার স্বাধীনতা ও তার আনুযায়িক চিন্তাপ্রকর্ষ।”

স্বপনদা খেই হারিয়ে ফেলেছিলেন। খেই হাতে নিয়ে বলেন, “আমার বক্তব্য এখনো শেষ হয়নি, মীর সাহেব ও কামাল সাহেব। ফরাসী বিপ্লবের যুগ থেকে বিশ্বমানব শুনে আসছে একটি নতুন মন্ত্র। সাম্য, মৈত্রী, স্বাধীনতা। স্বাধীনতা বা লিবার্টিই সকলের আগে। তার পরে ইকুয়ালিটি বা সাম্য। তার পরে ফ্র্যাটারনিটি বা মৈত্রী। সেই আদিকাল থেকে মানুষ মানুষকে দাস করে রেখেছিল, ধর্মও তার উচ্ছেদ ঘটাতে পারেনি। কিন্তু লিবার্টি যেই মানবজীবনের মূলমন্ত্রের অন্ততম হলো অমনি ক্রীতদাসপ্রথার মূলে আঘাতের পর আঘাত পড়ল। আমেরিকার গৃহযুদ্ধে তার পরিসমাপ্তি। এখানে ওখানে তার শিকড় এখনো থেকে গেছে। বিশেষত আফ্রিকার বৃকে। স্নেভারি যদি যায় তো ওয়েজ স্নেভারি কেন থাকবে? বগুড লেবার কেন থাকবে? শ্রমিকের গতিবিধির উপর অন্তায় বিধিনিষেধ কেন থাকবে? ক্রমে ক্রমে এসবও উঠে যাচ্ছে। একটি দেশের দ্বারা আর একটি দেশের লিবার্টি কেন রাজগ্রস্ত হয়ে থাকবে? তাই একটির পর একটি দেশ স্বাধীনতার সংগ্রাম চালিয়ে গেছে ও সফল হয়েছে। বিবাহিত জীবনে নারী কেন পুরুষের সেবাদাসী হয়ে থাকবে? এর বিরুদ্ধেও বিদ্রোহের সূচনা হয় লিবার্টির দাবীতে। সে বিদ্রোহ এখন এদেশেরও ঘরে ঘরে। মুসলিম নারীসমাজও পেছিয়ে থাকবে না দেখবেন।”

“এ জলন্তরঙ্গ রোধিবে কে ” মীর সাহেব অটুহাস্ত করেন।

“লিবার্টির জল অনেকদূর গড়িয়েছে। তারপর ইকুয়ালিটির জোয়ার। কালো মানুষ চায় সাদা মানুষের সঙ্গে সাম্য। ভারতীয় চায় ইউরোপীয়ের সঙ্গে সাম্য, মুসলমান চায় হিন্দুর সঙ্গে সাম্য, শ্রমিক চায় ধনিকের সঙ্গে সাম্য, নারী চায় পুরুষের সঙ্গে সাম্য। সাবালকমাত্রেরই ভোটদানের অধিকার এখন প্রায় সব দেশেই মেনে নেওয়া হচ্ছে। এদেশেও হবে। তার তাৎপর্য সব নাগরিকই সমান। নাগরিকাও বাদ যায় না। এই যে সাম্যের জোয়ার একে বাধা দিতে গেলেই সমাজবিপ্লব। সময় থাকতে যতদূর সম্ভব স্বীকার করাই সুবুদ্ধি। সে সুবুদ্ধি ব্রিটেনের উচ্চতর শ্রেণীর আছে। সেইজন্তেই আমার বিশ্বাস ব্রিটিশ কর্তারা শেষপর্যন্ত ভারতীয় নেতাদের সঙ্গে মিটমাটে হবেন। তবে যুদ্ধের মাঝখানে নয়। তা হলেও আমি পনেরো বছর

সময় হাতে রেখেছি। ইতিমধ্যে গৃহযুদ্ধের কারণগুলো দূর করতে হবে। নইলে শরিকে শরিকে লড়াই।’ স্বপনদা ভবিষ্যদ্বাণী করেন। তাঁর মুখ অন্ধকার।

“তা হলে সেটা হবে গোরস্থানের ইকুয়ালিটি।”, মীর সাহেব মন্তব্য করেন।

## ॥ নম্র ॥

বিজ্ঞান বর্ধন মানসের প্রথমে প্রতিযোগী, তার পরে সহযাত্রী ও সতীর্থ। বিলেত থেকে ফিরে ওরা একসঙ্গে একবছর একবাসায় কাটায়। বিজ্ঞানের কনে দেখায় মানসেরও একটু ভূমিকা ছিল। আর মানসের বিয়েতে না হোক বিয়ের পরে বিজ্ঞানের একটু ভূমিকা। মানস ও যুথিকার হানিমুনের সে নীরব দর্শক। কথা ছিল সে সেটলমেন্ট ট্রেনিং শেষ করে তার পরে বিয়ে করবে, কিন্তু নীরব দর্শকের ভূমিকায় ক্লান্ত হয়ে সে অকস্মাৎ মত পরিবর্তন করে। ক্যাম্পে যাবার আগেই তাব শুভকর্ম সারা হয়। ফলে বিজ্ঞানের বধু উদ্ভিতা মানসের প্রতি কৃতজ্ঞ। যুথিকাব সঙ্গেও তার প্রীতির সম্পর্ক। কলকাতায় ওরা একসঙ্গে এলে বিজ্ঞানদের অতিথি হয়।

স্বপনদার কাছ থেকে ১টি নিয়ে মানস বিজ্ঞানের ওখানে হাজিরা দেয়। উদ্ভিতা ওকে রিসিভ করে। অফিস কামরা থেকে বেরিয়ে আসে বিজ্ঞান। ছুটির দিনেও ওর ছুটি নেই। সেক্রেটারিয়াটের সে একজন হোমরা চোমরা আমলা। পদভার তাকে ভারি কবেছে। অর্থনীতি বিশারদ বলে সরকার তাকে সমীহ করেন। কিন্তু উপরওয়ালারা তো ওর পরামর্শে চালিত হবার পাত্র নন। তাই বিরোধ বাধে।

“মানস, আমি চোখে আঁধার দেখছি।” বিজ্ঞান কথাপ্রসঙ্গে বলে।

“কেন, ভাই বিজ্ঞান? মুসলিম মন্ত্রীরা কি খুব বেশী কমিউনাল?” গভর্নর কি ঠোটো জগন্নাথ?” মানস জেরা করে।

“না, না, ওঁদের বিরুদ্ধে আমার ব্যক্তিগত অভিযোগ নেই। সমস্তাটা সাম্প্রদায়িক নয়, অর্থনৈতিক। যুদ্ধকালে খাদ্য বস্ত্র ঔষধপত্র দুর্মূল্য ও দুস্প্রাপ্য হয়, এটাই তো মানব অভিজ্ঞতা। ইংলণ্ডে ওরা সময় থাকতে র্যাশনিং

প্রবর্তন করেছে। আর সেই র্যাশনিং দস্তরমতো কড়া। এক মন্ত্রীর চাকরি চলে গেল তিনি নিজের পরিবারের জন্তে গোটা দুই থরগোশ শিকার করে এনেছিলেন বলে। যাকে যা র্যাশনি দেওয়া হবে তাই খেয়েই তাকে বাঁচতে হবে। তার বাইরে এক আউলও নয়। হোর্ডিং একটা দণ্ডযোগ্য অপরাধ। যারা হোর্ড করে তারা মোটা মুনাফা করে। এটাও মানব অভিজ্ঞতা। নিজের ব্যবহারের জন্তেও হোর্ড করা বারণ। লগুন থেকে কাগজপত্র আনিয়ে আমি একটা নোট পেশ করে বলি অবিলম্বে কলকাতা শহরে পুরো র্যাশনিং প্রবর্তন করা হোক। আর যফঃস্বলে আংশিক র্যাশনিং। বলা অন্ডায় করেছি ?” বিজন তার মোটা চশমার কাঁচ দিয়ে মিট মিট করে তাকায়।

“না, অন্ডায় নয়। ঠিকই তো করেছে।” মানস সমর্থন জানায়।

“কে শোনে কার কথা ! আমার বস্ মিস্টার বেনেট আমার নোটের উপর লেখেন, ক্যালকাটা ইজ নট লগুন, বেঙ্গল ইজ নট ব্রিটেন। দেয়ার উইল বি নো ইনভেসন, নো শর্টেজ, নো হোর্ডিং, নো ব্ল্যাক মার্কেটিং। র্যাশনিং উইল বি ইমপসিবল টু এনফোর্স। তিনি আমাকে দয়া করে ডেকে পাঠান। বলেন, ইউ মে বি আ গ্রেট স্কলার। বাট আই আম আ প্র্যাকটিকাল ম্যান। কেমব্রিজের ছাত্ররা বিদ্বান হয়, অক্সফোর্ডের ছাত্ররা চৌকব। তবে অক্সফোর্ডের পড়াশুনা শেষ করার আগেই আমাকে যুদ্ধে যেতে হয়। যুদ্ধশেষে আমাকে নমিনেট করে বেঙ্গলে পাঠিয়ে দেয়। তখন থেকেই আমি হাতে কলমে শাসনকার্য শিখে চুল পাকিয়েছি। আর আপনি তো সেদিনকার ছেলে। আমরা যদি এখন র্যাশনিং প্রবর্তন করি বাজারে প্যানিক সৃষ্টি হবে। স্টক মার্কেটে শেয়ার ফল করবে। ক্লাইভ স্ট্রীট আমাদের পেছনে লাগবে। আর মাড়োয়ারীরা একধার থেকে হোর্ড করবে। ডোন্ট টেক ইট টু হার্ট, ইয়াং বার্ডান। আমি মুখ বুজে শুনে যাই।” বিজন মাথায় হাত দিয়ে বসে।

মানস মিস্টার বেনেটের অধীনে মহকুমা হাকিম হিসাবে কাজ করেছে। তিনি একজন সং ও সুদক্ষ শাসক ! তিনি যদি র্যাশনিং প্রবর্তনের প্রয়োজন না দেখেন তো সেটা বোধহয় সত্যিই নিষ্প্রয়োজন। কই, কেউ তো সে রকম প্রস্তাব কোথাও তুলছেন না। না খবরের কাগজে, না জনসভায়।

“কী এমন ক্ষতি হবে, যদি অবিলম্বে র্যাশনিং প্রবর্তন না করা হয় ?” মানস বিজনকে সংশয়ের সঙ্গে জিজ্ঞাসা করে।

“আজ থেকে কাজ শুরু করলে একবছর লাগবে স্কীমটাকে ঠিকমতো চালু

করতে। তা যদি না করি তবে পরে যুদ্ধের মাঝখানে খুব বেশী দেয়ি হয়ে গিয়ে থাকবে। খেতে না পেয়ে হাজার হাজার মানুষ মরবে, লাখে লাখেও মরতে পারে। আবার সেই ছিয়াত্তরে মনস্তর। সে সময়ও তো প্র্যাকটিকাল ম্যানের অভাব ছিল না। যেটার অভাব ছিল সেটা অর্থনীতির বৈজ্ঞানিক প্রয়োগ। আমাদের সামনে আছে এক ভয়ঙ্কর আকাল। একটা ডিজাস্টার।” বিজন ব্লান মুখে বলে।

মানসের বিশ্বাস হয় না। সে বলে, “যুদ্ধ কোথায় যে লোকে যুদ্ধের ভয়ে র্যাশনিংএ রাজী হবে? যুদ্ধক্ষেত্র বহুদূরে। জাপান যুদ্ধে নামবে বলে তৈরি হচ্ছে। কিন্তু সে তো আর আমাদের এদিকে আসছে না।”

বিজন উত্তর দেয় না। কী যেন চিন্তা পরে। তার বদলে উদ্ভিতা কথাবার্তা চালায়। চা এসে পড়ে। চায়ের সঙ্গে কেক।

“আমার এক বোন সবিতা এখন ওয়াকি হয়েছে। তার চিঠি মাঝে মাঝে পাই। তার সাথীদের একজনের নাম বারনা ঘটক। তার বাবা আমাদের সিভিল সার্জন ছিলেন পাবনা শহরে। সেইসঙ্গে মেয়েটিকে আমরা চিনি। মাসকয়েক আগে ডাক্তার ঘটক হঠাৎ আমার কাছে এসে জিজ্ঞাসাবাদ করেন, বারনা বাড়ী থেকে পালিয়ে এসেছে। সে এখন কোথায়? জানতুম না যে পালিয়ে এসেছে, দুঃখিত হই। কিন্তু কেমন কবে বলব সে এখন কোথায়। বলি, যেখানেই থাক সবিতার সঙ্গে আছে। সবিতার চিঠিতে শিবিরের ঠিকানা থাকে না। শুধু থাকে পোস্ট অফিস আর্মি বেস্। ওকে চিঠি লিখলে আর্মি বেস্ পোস্ট অফিসের ঠিকানায় লিখি। যতদূর বুঝতে পারি ওরা এখন আরাকানে। নাম করে না। বর্ণনা করে। বর্ণনাটা আরাকানের সঙ্গে মিলে যায়। আকিয়াবে আমার এক মামা থাকতেন। তাঁর মুখে বর্ণনা শুনেছি। ছবিও তাঁর আলবামে দেখেছি।” উদ্ভিতা বলে যায় অশাচিতভাবে।

মানস তো শুনেছিল যে বারনাকে তার মাসী না পিসী কলকাতায় নিজের কাছে রেখেছেন, তার বিয়ের চেষ্টা চলছে। তার পিতামাতা তার সম্বন্ধে বিশ্বয়কররূপে নীরব। সে তা হলে সত্যি সত্যি ওয়াকি হয়ে কোথায় যেন চলে গেছে। সম্ভবত আরাকানে। ঘটকরা কি একথা জানেন?

“না, আমরা তো জানাইনি। বারনা যদি জানিয়ে থাকে। জানালেও মিলিটারি সীক্রেট ফাঁস করবে না। অবস্থানটার নাম করবে না। ঘটকরা যদি আকিয়াব না ভেবে চটগ্রাম ভেবে থাকেন তা হলেও আশ্চর্য হবার কিছু

নেই। আর আমিও যে স্থানান্তরিত তাও তো নয়। রেজুনেও হতে পারে।”  
উদ্ভিতা চাপা দেয়।

“আচ্ছা, ওদের আসল কাজটা কী?” মানস বেফাঁস প্রশ্ন করে।

“ওয়াকিদের?” উদ্ভিতা ফিক করে হেসে বলেন, “না, যা শুনেছেন তা নয়।  
বিলেতের মেয়েদের যুদ্ধের কাজে অংশগ্রহণের জন্তেই উইমেন্স অগ্জিলিয়ারি  
কোর গঠন করা হয়। তার সঙ্গে ইণ্ডিয়া জুড়ে দিলে যা হয় তারই সংক্ষিপ্ত  
নাম ওয়াকি। বিলেতের ফ্রন্ট অনেক ছোট। ভারতের ফ্রন্ট অনেক বড়ো।  
ওয়াকিদের ভারতের বাইরেও কাছাকাছি কোথাও পাঠানো হয়। তবে প্রধান  
কাজ শত্রুপক্ষের বেতার বাতী আড়ি পেতে শোনা ও শুনে নোট করা। তার  
জন্তে শত্রুপক্ষের ভাষাও শিখতে হয়। সেটাকে ইংরেজীতে তর্জমা করার  
মতো বিদ্যেও চাই। সবিতাকেও তালিম দেওয়া হয়েছে। ঝরনাকেও। ওরা  
অফিসার না হলেও যা পায় তা লোভনীয়। আমি হেডকোয়ার্টার্স থেকে  
প্রতি মাসে মোটা অঙ্কের চেক আসে সবিতার তরফ থেকে। তার নির্দেশ  
অনুসারে। সে টাকা জমা হচ্ছে আলাদা একটা অ্যাকাউন্টে ওর বিয়ের খরচ-  
বাবদ। ঘটকরাও কি পাচ্ছেন না ও রকম একটা চেক? মেয়ের জন্তে  
দুশ্চিন্তা থাকবেই। থাকা স্বাভাবিক। বিশেষত সে যখন শত্রুর আক্রমণের  
সম্মুখীন। ধরা পড়লে কি আর রক্ষে আছে?” উদ্ভিতা দু’হাতে মুখ  
ঢাকেন।

মানসেরও কারা পায়। সে আর কথা বাড়ায় না। শুধু বলে “মেয়েরাও  
যদি ইকুয়ালিটি চায় তবে ইকুয়াল রিস্ক নিতে হবে।”

“না, না, ইকুয়াল রিস্ক নয়। নারীর পক্ষে ওটা মৃত্যুর চেয়েও ভীষণ।  
অযোধ্যার লোক সীতার মতো মহীয়সীকেও বিশ্বাস করেনি। ঠাঁর মহান  
স্বামীও না। সবিতার জন্তে আমি রোজ রাতে প্রার্থনা করি। ওকে তো  
আপনি দেখেছেন। কী ডানপিটে মেয়ে! ওর হাতে রিভলভার থাকলে ও  
আত্মরক্ষা করবে। আর নয়তো আত্মহত্যা। হ্যাঁ, ওদের রিভলভার রাখতে  
দেওয়া হয়।” উদ্ভিতা বলে।

কলকাতা থেকে ফিরে ঝরনা সম্বন্ধে এসব খবর মানস যুথিকাকে শোনায়।  
সে স্তম্ভিত হয়। তার চোখে জল এসে পড়ে।

“কিন্তু খবরদার!” মানস ওকে সাবধান করে দেয়। “ঘটকেরা যেন  
জানতে না পান যে আমরা এর বিন্দুবিসর্গ জানি। আর শহরের লোকের

স্বভাব তো সেই অযোধ্যার লোকেরই মতো। ওরা যেন ঘুণাক্ষরেও টের না পায়।”

“ত্যাখ, ওরকম একটা কানাবুয়া নতুন নয়! ছ’মাস কেটে গেল। মেয়ে একবারও মা বাবাকে দেখতে আসে না। মা যদিও অস্থূল। এটা যত বড়ো সীক্রেট মনে করেছ তত বড়ো নয়। তা ছাড়া আমি বেঙ্গ পোস্ট অফিস থেকে ডাক্তার সাহেবের নামে চিঠি আসে এটাও কি কারো নজরে পড়েনি? দুই আর দুই মিলে চার হয়। তবে আমি অতটা ভেবে দেখিনি।” যুথিকা হাসি চাপে।

দু’জনেই স্থির করে যে ডাক্তার দম্পতীর সঙ্গে দেখাসাক্ষাৎ হলে বরনার প্রসঙ্গ ওরা এড়িয়ে যাবে। ওঁরা যদি আপনা থেকে কিছু বলেন সেকথা আলাদা।

মাসকয়েক বাদে একদিন ডাক্তার সাহেব হস্তদস্ত হয়ে ছুটে আসেন। বলেন, “শুনেছেন নিশ্চয়ই? উল্লাসের এত কী আছে? মনে হচ্ছে সারা শহর উখাল পাখাল। বেশীর ভাগ লোকই জাপানের বীরত্বের প্রশংসা করছে। আরে, এটা কি একটা বীরত্বের নমুনা হলো? যুদ্ধঘোষণা না করেই অতর্কিতে পাল’ হারবারে হানা দিয়ে সব ক’টা জাহাজকে ডুবিয়ে দেওয়া কি একটা বাহাদুরি না ট্রোয়ারি?”

মানসের রেডিও ছিল না। চাকরি ছেড়ে দেবে বলে সে আর বিলাসিতা বাড়ায়নি। খবরের কাগজ কলকাতা থেকে দেয়িতে আসে। পাল’ হারবারের খবরটাও তার দেয়িতে পাবার কথা। সে চমকে উঠে বলে, “এ যে সাংবাদিক খবর! জাপান কি বুঝতে পারছে না যে আমেরিকাও একদিন চূড়ান্ত প্রতিশোধ নেবে? যুদ্ধ শুরু করে দিতে যে কোন দেশ পারে। কিন্তু যুদ্ধ শেষ করা তার হাতে নয়।”

ডাক্তার সাহেব এর পরে আসল কথাটা পাড়েন। “আপনার কি মনে হয় ওরা অমনি অতর্কিতে বার্মায় ঈংরেজদের ঘাঁটিতে হানা দেবে?”

“দিতে পারে। কিন্তু অমনি অতর্কিতে নয়। সিঙ্গাপুর গেলে তো বার্মার পালা। সিঙ্গাপুর যাবে না। মালয় যাবে না। বার্মাও দুর্ভেদ্য।” মানস অভয় দেয়। সে বুঝতে পারে যে বরনা কোথায় আছে সেটা তার বাপের অজানা নয়।

সেদিন ডাক্তার ঘটক ভেঙে বলেন না যে তাঁর কন্ঠার জন্তেই তিনি চিন্তিত,

বার্মার জন্তে নয়। মানস তাঁকে আভাস দেয় না যে বরনা সম্ভবত বার্মায়।  
 মাস দুই বাদে তিনি আবার ছুটে আসেন। রাগতভাবে বলেন, “আপনি,  
 মশায়, একজন ফল্গু প্রোফেট। সিঙ্গাপুরে জাপানীরা মালয়ের জঙ্গল ভেদ  
 করে চুকেছে। এটা কারো মাথায় আসেনি। মিলিটারি ইন্টেলিজেন্স হচ্ছে  
 নো ইন্টেলিজেন্স। আগে থেকে জানলে ঝানকার্কের মতো অপসরণ করতে  
 পারা যেত। জাহাজের তো অভাব ছিল না। শুনেছেন তো চৌষটি হাজার  
 সৈনিক আগ্রসমর্পণ করেছে। তাদের মধ্যে সতেরো হাজার ব্রিটিশ, পনেরো  
 হাজার অস্ট্রেলিয়ান, বত্রিশ হাজার ভারতীয়। হলদে মাছের কাছে শাদা  
 মাছের মাথা হেঁট হয়েছে বলে শহরের অধিকাংশ লোক আনন্দে আত্মহারা।  
 এদিকে যে কালো মাছেরও মাথা নতুন করে হেঁট হলো—এবার হলদে  
 মাছের কাছে—তার জন্তে বেদনাবোধ নেই। আমার অবস্থাটা এখন চোরের  
 মায়ের মতো। ডাক ছেড়ে কাঁদতেও পারিনে। আমি কি পাগল হয়ে  
 যাব?”

“কেন? কেন?” মানস আতকে ওঠে।

“এতদিন কাউকেই জানতে দিইনি যে আমার মেয়ে বরনা আমার অমতে  
 ওয়াকিতে যোগ দিয়েছে। সব চেয়ে খারাপটাই তো লোকে ভাবে। কী  
 করে ওদের বোঝাব যে কলকাতার সম্ভ্রান্ত পরিবারের কন্ঠাও দেশের বিপদে  
 লাড়া দিয়েছে? দেশের বিপদ নয় তো কার বিপদ? ইংলণ্ডের বিপদ? এই  
 যে সিঙ্গাপুর গেল এটা কি ভারতের পূর্বদিকের গেটওয়ে নয়? কত বড়ো  
 একটা মহৎ ব্রত উদ্‌যাপন করতে মা আমার বার্মায় উপস্থিত হয়। মালয়  
 গেছে, এরপরে বার্মাও যাবে। আহা! মল্লিক সাহেব, আমি আর সহিতে  
 পারছি নে। নারীর প্রাণের বাড়া তার মান ইজ্জত।” ডাক্তার সাহেব চোখে  
 ক্রমাল দেন।

“আপনি কেমন করে জানলেন যে বরনা এখন বার্মায়?” মানস স্তব্ধ।

“ওর শেষের দিকের চিঠিগুলোতে তার ইঙ্গিত ছিল।” তিনি উত্তর  
 দেন।

জাহাজ ডুবছে দেখলে সকলের আগে মহিলাদের ও শিশুদের লাইফবোট  
 চাপিয়ে চালান দেওয়া হয়। এ নিয়ম যুদ্ধক্ষেত্রেও কি পালন করা হবে না?  
 মানস ধরে নেয় যে সময় থাকতে ওয়াকিদেরও জাহাজে করে জাপানীদের  
 নাগালের বাইরে চালান করে দেওয়া হয়েছে। ডাক্তার সাহেবকে অভয় দিয়ে



বাড়ী পৌছে দিতে যায়। শুনতে পায় ভিতর থেকে কান্নার আওয়াজ।  
ঝরনার মা কাঁদছেন।

কান্নার আওয়াজ থেকেই শহরময় রাষ্ট্র হয়ে যায় যে ইংরেজদের পরাজয়ের  
সঙ্গে ডাক্তার পরিবার জড়িত। দুই আর দুই মিলে চার হয়। ঝরনা ঘটক  
ওয়াকিদের একজন। ভদ্রলোক সঙ্গে সঙ্গে ছুটি নিয়ে কলকাতা রওনা হন।  
ফিরে আসেন না। শোনা যায় তাঁকে অন্ত্র বদলী করা হয়েছে। আরো  
বড়ো জেলায়।

মুখিকা বলে, “জানতে ইচ্ছে করে ঝরনার কী হলো।”

“জানতে পাবে যুদ্ধের পরে। মাঝখানে নয়। মিলিটারি সীক্রেট।  
লোকে অবশ্য যতরকম উড়ো গুজব রটাবে।” মানস গুজবে কান দেয় না।

এর পরে শোনা গেল জাপানীরা মালয় থেকে বার্মায় চুকেছে। এক এক  
করে শহর দখল করছে। ইংরেজরা তৈরি ছিল না। হটে আসছে আর  
হটবার সময় ঘরবাড়ী, জলের কল, পথঘাট, নদীর পুল, কলকারখানা, তেলের  
খনি, চালের গুদাম ধ্বংস করে দিয়ে আসছে। যাতে জাপানীদের ভোগে না  
লাগে। এর নাম ডিনায়াল পলিসি। গুজব শোনা যাচ্ছে খনি ধ্বংস করার  
সময় খনির ভিতরে যারা কাজ করছিল তাদেরও ধ্বংস করা হয়েছে। এর ফলে  
ইংরেজবিরোধী মনোভাব বৃদ্ধি পাচ্ছে। বার্মা থেকে শরণার্থীরা পালিয়ে  
আসছে, কেউ জলপথে, কেউ স্থলপথে। বার্মা সরকার নিজেই শরণার্থী।

বার্মা থেকে পলাতক এক ভদ্রলোকের মুখে শোনা গেল জাপানীরা নাকি  
বার্মার লোকদের বলছে, “আমরা এদেশে সাম্রাজ্য স্থাপন করতে আসিনি,  
এসেছি তোমাদের স্বৈরাচারীদের হাত থেকে মুক্তি দিতে। তোমরা তোমাদের  
নিজস্ব সরকার গঠন করো। সে সরকার হবে আমাদের মিত্রপক্ষ।” সে রকম  
সরকার নাকি গঠন করা হয়ে গেছে। পাওয়ার ভ্যাকুয়াম ঘটেছিল মাত্র  
দু’দিন কি তিনদিনের জন্তে। সেই ক’টা দিন এক বিভীষিকা। চোর  
ডাকাতদের অবাধ স্বাধীনতা। জেল থেকে বেরিয়ে এসে ওরা অবাধে খুন করেছে।  
জাপানী সৈনিকরাও যা করেনি। তেমনি এক বিভীষিকা আসামে ও বাংলা-  
দেশে ঘটতে পারে। আর যেটা ঘটবার কথা সেটা জাপানীদের নয়, ইংরেজদের  
পোড়ামাটি নীতির প্রয়োগ। জাপানীদের বঞ্চিত করতে গিয়ে ওরা ভারতীয়-  
দেরই বঞ্চিত করবে। জামশেদপুরকে ওরা জাপানীদের কাছে লাগাতে দেবে  
না। হাওড়া ব্রিজকেও না। বালী ব্রিজকেও না।

জাপানীরা যে কোন্ পথ দিয়ে ঢুকবে, কোথায় হানা দেবে, কারো জানা নেই। ইংরেজদেরও না। কোথায় বার্মা আর কোথায় মাদ্রাজ। মাদ্রাজের ব্রিটিশ গভর্নর সদলবলে শহর ছেড়ে মফঃস্বলে আশ্রয় নেন। কোথায় বার্মা আর কোথায় মেদিনীপুরের উপকূল। মেদিনীপুর থেকে রেকর্ড সরানো হয় বাঁকুড়ায়। কোথায় বার্মা আর কোথায় কলকাতা! কলকাতা থেকে অফিস সরানো হয় কৃষ্ণনগরে। ওদিকে নোয়াখালী চট্টগ্রামের নৌকা আর শাম্পান আগে ভাগে ডুবিয়ে দেওয়া হয়। পাছে জাপানীরা নদী পারাপার করে। চালের বস্তাও নাকি জলে ফেলে দেওয়া হয়, পাছে জাপানীরা খেতে পায়। সকলেই ভাবতে শুরু করে যে ইংরেজরা আসাম ও বাংলাদেশ ছেড়ে দিয়ে চলে যাবে। যেমন ছেড়ে দিয়ে চলে এসেছে সিদ্ধাপুর, মালয় ও বার্মা থেকে। সৈন্তেরা অভাবে নয়, বেকায়দায় পড়ে। লওনে কেন্দ্রীভূত মিলিটারি হাই কমান্ড পৃথিবীময় ছড়ানো সাম্রাজ্য রক্ষা করতে অক্ষম। বিকেন্দ্রীকরণ চাই! কিন্তু সেটা কি তারা প্রাণ ধরে করবে? ভারতীয়দের উপর ভার দিলে ফল অতরূপ হতে পারত।

“একেই বলে. ডগ ইন দ্য মেন্‌জার! তোমরাও লড়বে না, আমাদেরও লড়তে দেবে না।” আক্ষেপ করেন কলকাতা থেকে পলাতক এক জমিদার, স্বরেশ রায় চৌধুরী। এঁরা বাসা নিয়েছেন জঙ্গ কুঠির উল্টো দিকে। এঁদের ছেলেমেয়েরা মানসের ছেলেমেয়েদের সঙ্গে খেলা করতে আসে। কিন্তু এঁরাই বা কদিন এখানে তিষ্ঠতে পারবেন, যদি জাপানীরা এ জেলায় এসে হাজির হয়?

মানসের সঙ্গে দু’জন মিলিটারি অফিসারের আলাপ হয়। দু’জনেই ইংরেজ। মানস জিজ্ঞাসা করে, “আপনারা হটতে হটতে আর কতদূর পেছোবেন? কোথায় লাইন টানবেন?”

“আমরা একটার পর একটা লাইন টানছি, কিন্তু আসল লাইনটা হচ্ছে রাঁচীর আশে পাশে। ডিফেন্সের দিক থেকে ওটাই আমাদের পক্ষে অমূল্য।” তারা উত্তর দেন।

মানসের রাগ হয়। কিন্তু বাগড়া করতে পারে না। যার কর্ম তাকে সাজে। ওঁরা মিলিটারি অফিসার। ওঁরা জানেন কোন্ লাইনটা ডিফেন্সের যোগ্য। কোন্টা নয়। জাপানীদের বিহার পর্যন্ত এগোতে গিয়ে যথেষ্ট বলক্ষয় হয়ে থাকবে। ওঁরা তার আগে কোথাও এক জায়গায় দাঁড়ি টানবেন।

একদিন সরকারের কাছ থেকে এক গোপন সারকুলার আসে মানসের

নামে। তাতে একটা স্বীয় দেওয়া হয়েছে আপৎকালে ইভাকুয়েশনের। প্রধান অফিসারগণ যে যার কাজের ভার পরবর্তী উচ্চতর কর্মচারীদের হাতে সঁপে দিয়ে শৃঙ্খলাবদ্ধভাবে ব্রিটিশ শাসিত এলাকায় প্রস্থান করবেন। সব শেষে যাবেন জেলা ম্যাজিস্ট্রেট, জাপানী কমান্ডারের হাতে চার্জ দিয়ে। কমান্ডার অহরোধ করলে তিনি থেকে যাবেন।

মানসের মনে খেদ ছিল যে তাকে জেলা ম্যাজিস্ট্রেটের পদ থেকে সরিয়ে জেলা জজ করা হয়েছে। স্তোক দেওয়া হয়েছে, “দেশ শাসন করতে হলে ভালো জজও তো চাই।” এখন ওই সারকুলারখানা পড়ে ওর বিশ্বাস হয় যে ভগবান যা করেন তা মঙ্গলের জন্তে। ভাগ্যিস ওকে যুদ্ধকালে জেলা ম্যাজিস্ট্রেট করা হয়নি। জাপানীরা যদি আসে তাকে শেষ মুহূর্ত পর্যন্ত আটক থাকতে হবে না, কমান্ডারের হাতে চার্জ বুঝিয়ে দিতে হবে না, তিনি অহরোধ করলে তাঁর অধীনে কাজ করতে হবে না। অহরোধ তো নয়, আদেশ। একেই বলে চেঞ্জ অব্‌ মাস্টার্স। প্রভুবদল। জাপানীরা একটা দেশী সরকার গড়তে বলবে। কিন্তু তা বলে তারা মুক্তিদাতা নয়। মাঞ্চুরিয়া বা মাঞ্চুকুও তার নমুনা। জাপানীরা এলে মানসকে বিহারে গিয়ে আশ্রয় নিতে হবে সপরিবারে।

ওর এক বন্ধু বিহার সরকারে কাজ করে। সেও একটি গোপন সারকুলার পায়। তাতে ছিল ইভাকুয়েশন স্বীকারের বিপরীত অংশ। আপৎকালে টেলিগ্রাম যাবে, “বেঙ্গল কামিং।” সঙ্গে সঙ্গে ব্যবস্থা করতে হবে শরণার্থী বাংলাদেশ সরকারের দফতর ও বাসস্থানের। শরণার্থী অফিসারদের উপযুক্ত পদের ও গৃহের। অবশ্য বাংলাদেশ থেকে বিহারে যাওয়া একটা সমস্যাই নয়। এককালে তো বাংলা, বিহার, ওড়িশা একটাই প্রদেশ ছিল। তখন বদলী না হতো কে? কিন্তু পরিবর্তিত অবস্থায় বাংলাদেশ থেকে যাঁরা শরণার্থী হয়ে যাবেন তাঁদের মানসম্মান থাকবে না। তাঁরা হবেন অতিথি অফিসার। কিছুদিন পরে অবাস্তিত অতিথি।

“ছুটিই নিতে হবে, দেখছি। পুরো বেতনের ছুটি যথেষ্ট না হলে আধা বেতনের ছুটি। যদি সত্যিই জাপানীরা আসে।” মানস বলে যুথিকাকে।

“ওদের আসতে দেওয়া হবে না। ইংরেজরা যদি আসতে দেয় তবে ইংরেজদেরই বিদায় করতে হবে। জাপানীরা ওদের বিদায় করার আগে দেশের লোকই ওদের বিদায় করবে। বার্মার পুনরাবুত্তি বাংলাদেশে নয়।” যুথিকার চোখে আগুনের আভা।

“তুমি কী বলতে চাও, জুঁই ? বিপ্লব না বিদ্রোহ ?” মানস চমকে ওঠে ।

—“কমিউনিস্টরা করলে বিপ্লব । শ্রাশনালিস্টরা করলে বিদ্রোহ । দেখা যাক কে কার আগে করে । করবেই, কেউ না কেউ করবেই । এটা সিদ্ধাপুরও নয়, মালয়ও নয়, বার্মাও নয় । এটা বাংলাদেশ । কী আশ্পর্ক ইংরেজের ! বলে কিনা ওদের পিছু পিছু বিহারে গিয়ে আশ্রয় নিতে ! ছুটি নিতে চাও, নাও । কিন্তু বাংলার বাইরে যেয়ো না । তুমি বাঙালী সাহিত্যিক । স্বখে দুঃখে বাঙালীর সঙ্গেই থাকবে । ছুটির বেতন না পেলেও সংসার চলবে । পলায়ন যদি করো তবে কিন্তু ইংরেজের সঙ্গে সঙ্গে তোমারও প্রেক্ষিজ যাবে । ইংরেজদের উচিত ছিল পালিয়ে না এসে প্রাণপণে লড়া । জাপানীদের কাছে আত্মসমর্পণের মানি কি কোনোদিন মুছবে ? মাঝখান থেকে বরনাটাকে বিসর্জন দিয়ে থাকবে । বেচারি এখন কোন জাপানীর কবলে পড়েছে কে জানে !” মুখিকার চোখ দিয়ে আগুন ছোটো, জলও ঝরে ।

“না, না, বরনার কিছু হবে না ।” মানস আশা করে ।

“হবে গো হবে । এর নাম যুদ্ধ । এতে সব কিছু হয় । জাপানীদের আমি একরত্তি বিশ্বাস করিনে । বাংলাদেশকে কিছুতেই ওদের কবলে পড়তে দেওয়া চলবে না । ইংরেজদেরই তার আগে হটাতে হবে ।” মুখিকার প্রতিজ্ঞা ।

“জানিনে সৌম্যদা কী ভাবছে । ওর সঙ্গে অনেকদিন দেখা হয়নি । ও যদি একবার এদিকে আসত ।” মানস স্মরণ করে ।

“ওরই তো বিপদ সকলের আগে । জাপানীরা আর এক পা এগোলেই ওর অঞ্চল ।” মুখিকা মনে করিয়ে দেয় ।

জাপান যেদিন পাল হারবারে হানা দেয় তার দিনকয়েক আগে চাচিল সরকার স্থির করেন যে ভারতীয় সত্যাগ্রহীদের বিনা শর্তে মুক্তি দেবেন । বিশেষ করে নেহরু ও আজাদকে । কারণ মিটমাটের কথাবার্তা প্রধানত এঁদের সঙ্গেই চলবে । এঁরা যদি যুদ্ধে সহযোগিতায় রাজী হন কংগ্রেসও রাজী হবে । গান্ধীজী তো যুদ্ধমাত্রেয়ই বিরোধী । কেউ যদি তাঁকে রাজী করতে পারেন তো নেহরু ও আজাদ ।

তা ছাড়া গান্ধীজীর সঙ্গে কথাবার্তার প্রচ্ছন্ন শর্ত এই যে মিটার জিন্মাকেও তাঁর সঙ্গে বন্ধনীভুক্ত করতে হবে । ভারতের প্রতিনিধিত্ব করার একচ্ছত্র অধিকার গান্ধীজীর নেই, কারণ কংগ্রেসই ভারতীয় প্রিন্স তথা পীপলদের একমাত্র প্রতিনিধি প্রতিষ্ঠান নয় । ই্যা, “পীপলদের” । একবচন নয় বহুবচন ।

মুসলমানদের প্রতিনিধিত্ব করবে মুসলিম লীগ। লীগের তরফে জিন্না সাহেব। এটা অপ্রমাণ করবার জন্তে কংগ্রেস তার প্রেসিডেন্ট পদে নির্বাচন করেছে মোলানা আজাদকে। কথাবার্তা বলতে হলে কংগ্রেসের পক্ষে আজাদই বলবেন, লীগের পক্ষে জিন্না। গান্ধীজী কংগ্রেসের হয়ে কথা বলবেন না, কারণ যতবারই কথা বলতে গেছেন ততবারই জিন্নার সঙ্গে বন্ধনীভুক্ত হয়েছেন। জিন্না যদি মুসলিম সম্প্রদায়ের একমাত্র প্রতিনিধি হন তবে গান্ধীও হয়ে যান কেবলমাত্র হিন্দু সম্প্রদায়ের বা অমুসলমান সম্প্রদায়গুলির প্রতিনিধি। তাতে তাঁর বন্ধমূল আপত্তি। কারণ তিনি সমগ্র ভারতের সর্বসাধারণের স্বাধীনতার জন্তে সংগ্রামরত। বড়লাট যদি এটা স্বীকার না করেন তো বড়লাটের সঙ্গে তিনি কথাবার্তায় যোগ দেবেন না। কংগ্রেসকে ডাকলে কংগ্রেসের হয়ে আজাদ সাড়া দিতে পারেন। কিন্তু তাতে আবার উণ্টো ফ্যাসাদ। আজাদ সাড়া দিলে জিন্না সাড়া দেবেন না। জিন্না সাড়া না দিলে ব্রিটিশ সরকার ফাঁপরে পড়বেন। কেবলমাত্র কংগ্রেসের সঙ্গে মিটমাট তাঁদের মূলনীতি নয়। মিটমাট হলে একই কালে লীগের সঙ্গেও হবে। নয়তো কারো সঙ্গে নয়। বড়লাট তাই হাল ছেড়ে দিয়েছেন। ইতিমধ্যে তিনি তাঁর শাসন পরিষদ সম্প্রসারিত করে কংগ্রেস তথা লীগের জন্তে দরজা বন্ধ করে দিয়েছেন। দরজা খুলবেন যুদ্ধের পরে। নির্দলীয় সদস্যরাও জাঁকিয়ে বসেছেন।

সত্যাগ্রহীদের মুক্তি দিলেও মাসের পর মাস যায়, জাপান এক এক করে সিকাপুর নেয়, মালয় নেয়, বার্মা নেয়। এর পরে আসাম নেবে, বাংলাদেশ নেবে। বড়লাটের টনক নড়লেও হাত পা বাঁধা। গান্ধীজীকে তিনি ডাকবেন না। এঁদের বাদ দিয়ে জিন্নাকেও না। তা ছাড়া তাঁর নিজের ক্ষমতা খর্ব হোক এটাও তিনি চান না। প্রদেশগুলিতে কংগ্রেসের মন্ত্রীরা গিয়ে গভর্নরদের ক্ষমতা খর্ব করেছেন। কেন্দ্রেও কি তাই হবে না? লিনলিথগো নাকি চার্চিলকে জানিয়ে দেন যে তিনি এতে নারাজ। তিনি বরং পদত্যাগ করবেন।

গড়িমসি করতে করতে রেজুনের পতন হয়। তখন চার্চিল সরকার বড়লাটের মারকং কথাবার্তা চালানো নিষ্ফল বুঝতে পেরে সার স্টাফোর্ড ক্রিপসকে পাঠান। সমাজতন্ত্রী বলে জবাবহরলালের সঙ্গে তাঁর হস্ততা ছিল। উভয়েই ফাসিস্ট বিরোধী। বড়লাটের মতো তাঁর হাতপা বাঁধা নয়। তিনি নেহেরুকে তো আমন্ত্রণ করলেনই, আজাদকেও করলেন। নইলে নেহরু

কংগ্রেসকে রাজী করাতে পারতেন না। ক্রিপস প্রস্তাবে তাঁরা হয়তো রাজী হয়ে যেতেন, কিন্তু গান্ধীজী সরাসরি জানিয়ে দেন তিনি ওতে নারাজ।

ক্রিপস প্রস্তাবকে তিনি বলেন, “A post-dated cheque on a crashing bank.” ফেল করতে যাওয়া ব্যাঙ্কের উপরে আগাম তারিখ দেওয়া চেক।

প্রস্তাবের সারমর্ম মহাযুদ্ধের পর ভারতীয় ইউনিয়ন যদি ইচ্ছা করে ব্রিটিশ সাম্রাজ্য থেকে পৃথক হতে পারবে। কোনো একটি প্রদেশ বা দেশীয় রাজ্য যদি ইচ্ছা করে সেও ভারতীয় ইউনিয়ন থেকে আলাদা হতে পারবে। যে যার ঈচ্ছামতো সংবিধান রচনা করতে পারবে। আপাতত যুদ্ধের মাঝখানে কংগ্রেস, মুসলিম লীগ প্রভৃতির নেতাদের নিয়ে কেন্দ্রীয় সরকার পুনর্গঠন করা হবে, সামরিক ব্যতীত যাবতীয় অসামরিক বিষয় তাঁদের হাতে অর্পণ করা হবে। তাঁরাও জাপানকে প্রতিহত করার জন্যে সর্বপ্রকার উত্তোগ গ্রহণ করবেন। সামরিক তথা নৈতিক তথা বৈষয়িক।

কংগ্রেস নেতারা বলেন, “যুদ্ধের দায়দায়িত্ব যদি ভারতীয় সদস্যদের হয় তবে সামরিক দফতরটাও তাঁদের একজনকে দেওয়া উচিত। ইংরেজ সেনাপতি যথারীতি কাজ করবেন। কিন্তু শাসনপরিষদের সদস্য হতে পারবেন না।”

ক্রিপস বলেন, “ইণ্ডিয়ান আর্মি আসলে ব্রিটিশ আর্মিরই একটা অঙ্গ। ব্রিটিশ আর্মির কন্ট্রোল ব্রিটিশ মিলিটারি হাই কমান্ডের হাতে। যুদ্ধের মাঝখানে হাত বদল করা বিপজ্জনক। ব্রিটিশ সরকার কিছুতেই সে কন্ট্রোল হাতছাড়া করতে রাজী হবেন না।”

কংগ্রেস নেতাদের সঙ্গে কথাবার্তার স্বত্র ছিল হয় এই ইস্যুতেই। কিন্তু এহো বাহ। শুধু সামরিক নয়, অসামরিক ক্ষমতা হস্তান্তর করতেও ভারতে অবস্থিত ব্রিটিশ এস্টাব্লিশমেন্টের আন্তরিক আপত্তি ছিল। ব্রিটিশ সৈনিকরা তো নয়ই, ব্রিটিশ সিনিভিলিয়ানরাও ভারতীয় কর্তাদের অধীনে চাকরি করতে অনিচ্ছুক ছিলেন। জাপান আসছে তো কী হয়েছে? জাপানকে কয়েকটা প্রদেশ ছেড়ে দিয়েও তো অবশিষ্ট ভারতের উপর প্রভুত্ব করা যায়। পরে জাপানের কবল থেকে ফেরৎ পাওয়া যায়। জাপানীরা তো দিল্লী সিমলা পর্যন্ত পৌঁছেছে না। কেন্দ্রীয় সরকারকে তো হানচ্যুত করেছে না। হানচ্যুত হলে হবে আসাম সরকার তথা বাংলা সরকার।

ক্রিপসের প্রস্থানের পর রায় বাহাদুর বলেন, “শ্রোতের মাঝখানে কেউ বোড়া বদল করে ? ইংরেজরা যে করবে না এটা আমি জানতুম। গান্ধীজীও জানতেন। বেনিয়াকে বেনিয়াই চেনে। ইংরেজও বেনিয়া। গান্ধীও বেনিয়া। আর তা যদি বলেন, জিন্নাও বেনিয়া। সত্যিকার ক্ষমতা কংগ্রেসকে হস্তান্তর করলে মুসলিম লীগ অসহযোগ করত। মুসলিম রেজিমেন্টগুলো বিগড়ে যেত। তা ছাড়া ক্রিপস প্রস্তাব মেনে নিলে এটাও তো মেনে নেওয়া হতো যে মহাযুদ্ধের পরে মুসলিমপ্রধান প্রদেশগুলিকেও ভারতীয় ইউনিয়ন থেকে বেরিয়ে যাবার স্বাধীনতা দেওয়া হবে। শিথেরা শালিয়ে রেখেছে ওরা মারামারি করবে। আমাদের রক্ত অত গরম নয়, তা বলে আমরাও কি বাংলার মুসলমানদের সঙ্গে ভারতীয় ইউনিয়ন থেকে বেরিয়ে যেতে সহজে রাজী হব ? ক্রিপস সাহেব প্রকারান্তরে মুসলমানদের উস্কে দিয়ে গেলেন, মিস্টার মল্লিক। বলে গেলেন, ওরা যদি ব্রিটিশ সাম্রাজ্য থেকে বেরিয়ে যায় তোমরাও ভারতীয় ইউনিয়ন থেকে বেরিয়ে যেয়ো। কংগ্রেসকেও নোটস দেওয়া হলো, সাবধান ! আমাদের সঙ্গে ঝগড়া করলে ফল হবে হিতে বিপরীত !”

মানস বড়ো আশা করেছিল যে কেন্দ্রে একটা বড়োরকম রদবদল হবে। ইংরেজ ও ভারতীয়, হিন্দু ও মুসলমান একসঙ্গে মিলে মিশে জাপানীদের সঙ্গে লড়বে। নেতৃত্ব নেবেন নেহরু। স্টালিন যদি মার্শল স্টালিন হতে পারেন নেহরু কেন হবেন না মার্শল নেহরু ? নেহরু যেমন করে দেশকে জাগাতে পারেন তেমন আর কে ? যুদ্ধের জ্ঞান অবশ্য। শিরের সংক্রান্তি। জাপান যে-কোনদিন আসাম নেবে, পূর্ববঙ্গ নেবে। হিন্দুও বিপন্ন, মুসলমানও বিপন্ন। এটা কি হিন্দু মুসলিম বিবাদের সময় ? ইংরেজ বিপন্ন, ভারতীয়ও বিপন্ন। এটা কি ইঙ্গ ভারতীয় বিরোধের সময় ?

। দশ ।

রক্তমঞ্চে হতে যাচ্ছে ‘হামলেটে’র অভিনয়। থাকছেন না তাতে ডেনমার্কের সুব্রাজ। হতে যাচ্ছে ভারতের বুকের উপর দিয়ে যুদ্ধ। থাকছেন না তাতে জবাহরলাল নেহরু। ব্যাপারটা এমন অদ্ভুত যে আমেরিকার প্রেসিডেন্ট

রুজভেন্ট তথা চীনদেশের সর্বাধিনায়ক চিয়াং কাইশেকগণস্ব বিচলিত। জাপানকে আরো বাড়তে দিলে তাঁদেরও তো বিপদ। ব্রিটেনের প্রধানমন্ত্রী চার্চিলকে রুজভেন্ট স্বয়ং চিঠি লেখেন। অল্পরোধ করেন ভারতকে স্বায়ত্তশাসন দিয়ে তার নেতাদের যুদ্ধের অংশীদার করতে। কিন্তু ভদ্রলোকের এক কথা। যুদ্ধের মাঝখানে ব্রিটিশ পলিসির হেরফের হবে না। যুদ্ধের দাবিও সম্পূর্ণভাবে ব্রিটিশ সরকারের। সুতরাং ক্ষমতাও সম্পূর্ণভাবে ব্রিটিশ কর্তৃপক্ষেরই।

ভারত যুদ্ধক্ষেত্রে পরিণত হতে চলেছে। হাজার হাজার ব্রিটিশ সৈন্য মার্কিন সৈন্য প্রতিদিন আমদানী হচ্ছে। তাদের বাসস্থান জোগাবার জন্যে কলকাতার নাগরিকদের ঘরবাড়ী দখল করা হচ্ছে। তাদের যাতায়াতের সুবিধার জন্যে গ্রামের চাষীদের জায়গাজমি কেড়ে নিয়ে বিমানবন্দর তৈরী করা হচ্ছে। তাদের জন্যে বিকল্প ব্যবহার নামগন্ধ নেই। ক্ষতিপূরণ দেওয়া হবে পরে একসময়। কাগজের টাকায়।

এই নাট্যাভিনয়ে গান্ধী, নেহরু, আজাদ প্রভৃতি নেতাদের ভূমিকা কি নীরব দর্শকের? গঠনকার্যে মন দিতে বললে কেউ মন দেন না। একদল প্রাদেশিক মন্ত্রীমণ্ডলীতে ও আইনসভায় ফিরে যাবার জন্যে ব্যাকুল। আরেকদল জাপানীদের সহযোগিতায় ইংরেজদের খেদিয়ে নিয়ে যেতে উদ্গ্রীব। এমন কথাও কেউ কেউ বলছেন যে ইংবেজরা যে অঞ্চল থেকে অপসরণ করবে সে অঞ্চলে জাপানীদের সঙ্গে তাদের যোগসূত্র ছিন্ন করে নো ম্যান্স ল্যান্ড বা মুক্তাঞ্চল ঘোষণা করতে হবে। সেখানে স্থাপিত হবে জাতীয় সরকার। সেখানে উড়বে জাতীয় পতাকা। জাপানকে সেখানে পাদপরিমাণ ভূমি দেওয়া হবে না। আর ব্রিটেনকে প্রত্যাবর্তনের ছল।

যারা রাজনীতির ধার ধারে না, ছাঁ-পোষা লোক, তারা মনে মনে প্রস্তুত হচ্ছে জাপান রাজকে স্বাগত জানাবার জন্যে। যুগে যুগে এই কাজটি তারা করেছে। যে রাজা হবে তাকে তারা খাজনা দেবে। রাজভক্তি নিবেদন করবে। তাদের মতে—

“এক রাজা যাবে আর অন্য রাজা হবে

বাক্সালার সিংহাসন শূন্য নাহি রবে।”

দেশের স্বাধীনতার মর্ম তারা বোঝে না। গণতন্ত্রও তাদের কাছে অর্থহীন। তারা শাস্তিতে থাকতে চায়। যুদ্ধে যোগ দেওয়া না দেওয়া তাদের কাছে একটা প্রশ্নই নয়। পেশাদার সৈনিক যারা তারাই যুদ্ধ করবে। সে



রকম লোক আর ক'জন! রাজায় রাজায় যুদ্ধ হয়, উলুখড়ের প্রাণ যায়। তার। সেই উলুখড়। তবে প্রাণ যাবার আগে তারা একবার পালিয়ে বাঁচতে চেষ্টা করবে। ইতিমধ্যেই কলকাতা থেকে পালিয়ে এসেছে বিস্তর লোক। বোমার ভয়ে। তাঁদের মধ্যে জ্ঞানীগুণীও আছেন।

একদিন আগাম খবর না দিয়ে সৌম্য এসে হাজির। দু'বছর বাদে দুই বন্ধুতে দেখা। মানস জিজ্ঞাসা করে, “তুমিও কি পলাতক?”

সৌম্য হেসে বলে, “কোথায় পলাব, বল তো? যেখানেই পলাই জাপানীরা তো সেখানেও ধাওয়া করবে। তোমার ইংরেজ সেনাই তো দৌড় দেবে। আপাতত যেখানেই ইংরেজ সেখানেই নিরাপত্তা। কিন্তু আখেরে?”

“কিন্তু ওরা এক জায়গায় না এক জায়গায় দাঁড়াবেই, সৌম্যদা। আমি জানি ওরা রাঁচীতে লাইন টানবে স্থির করেছে।” মানস জানায়।

“হা হা! জাপানীরা রাঁচী বাইপাস করে সরাসরি দিল্লীর দিকে যাবে। সেখানে গিয়ে দিল্লীর শেষ মুঘল বাদশাহ বাহাদুর শাহ জাফরের বংশধরদের একজনকে সিংহাসনে বসাবে। মাঞ্চুরিয়ান যা করেছে তারই অনুকরণে। বার্মাতেও একটা তাঁবেদার সরকার তৈরি করেছে। সর্বঘণ্টে বার্মার লোককে বসিয়েছে, কিন্তু প্রত্যেকের উপদেষ্টা হয়েছে একজন জাপানী।” সৌম্য সংবাদ দেয়।

“তা হলে তোমাদের ভূমিকাটা কী? তোমরা দাঁড়িয়ে দাঁড়িয়ে দেখবে ইংরেজদের অপসারণ, জাপানীদের অধিগ্রহণ, দিল্লীর সিংহাসনে বাদশাহের অভিষেক। তোমাদের ভূমিকা তা হলে নীরব দর্শকের।” মানস কাতরস্বরে বলে।

“কী করি, বলো? আমাদের তো ঢাল নেই, তলোয়ার নেই। আশা করেছিলুম জাপানীরা আসছে শুনে ব্রিটিশ প্রধানমন্ত্রী চার্চিল আমাদের নেতাদের হাতে ঢাল তলোয়ার দেবেন। কিন্তু তাঁর দূত সার স্টাফোর্ড ক্রিপস স্পষ্ট জানিয়ে দিলেন যে মিলিটারির উপর খবরদারি হাঁদের হাতে আছে তাঁদের হাতেই থাকবে। তার মানে বড়লাটের সভাসদ হয়েও নেতারা হবেন নীরব দর্শক বা সাক্ষীগোপাল। ইংরেজ যদি পূর্ববঙ্গ থেকে হটে আসে নেতারাও হটে আসবেন, ঢাল তলোয়ার হাতে নিয়ে এপোতে পারবেন না। আমরাও কি সঙ্গে সঙ্গে হটে আসব? তা হলে জনসাধারণের পাশে দাঁড়াতে পারা ?

আমরা হটে এলে জনগণও কি প্রাণের দারে হটে আসবে না? কিংবা বরবাড়ীর মায়ার জাপানীদের কাছে আত্মসমর্পণ করবে না? পরে হয়তো ইংরেজরা যুদ্ধজাহাজ থেকে চটুগ্রামে ল্যাণ্ড করবে ও পার্শ্ব আক্রমণ করবে। তখন দেশ হবে যুদ্ধক্ষেত্র। আর আমি যদি সেখানে থাকি আমি হব দুই আঙনের মাঝখানে কাসাবিয়াক্স।”

যুথিকা তা শুনে বলে, “ওমা! তুমি কেন কাসাবিয়াক্সার মতো ঠায় দাঁড়িয়ে থেকে পুড়ে মরবে ও তলিয়ে যাবে?”

এই বলে সে আবৃত্তি করে ছেলেবেলায় পড়া ইংরেজী কবিতা—

“The boy stood on the burning deck,  
Whence all but he had fled...”

মানস বলে, “ছেলেটির বাবা ওকে ওইখানে দাঁড়িয়ে থাকতে আদেশ করে-ছিলেন। বেঁচে থাকলে তাকে সরে যেতে বলতেন। কিন্তু তিনি শত্রুর গোলায় মারা যান। ছেলেটি তা জানে না। বার বার বাবাকে ডাকে। সাড়া পায় না। কী শোচনীয় পরিণতি! তা তুমি কেন কাসাবিয়াক্স হতে যাবে? কার আদেশে?”

“আমরাও তো একজন বাবা আছেন। যার নাম বাপু। বাপুর আদেশ ও ছাড়া আর কী হতে পারে! আমার আশ্রয়ই হচ্ছে সেই ডেক যেখানে আমাকে খাড়া থাকতে হবে। তাঁর হুকুম না পেলে আমি সেখান থেকে নড়তে পারব না। ইংরেজ বা জাপানী কেউ না কেউ পোড়ামাটি নীতি মেনে শহরটাকে পোড়াবে। আশ্রয়ও পুড়বে। আমিও পুড়ব। এর থেকে নিষ্কৃতির একমাত্র উপায় দেশটাকে যুদ্ধক্ষেত্র হতে না দেওয়া। ভারতকে বার্মা হতে না দেওয়া। সেটা হয়তো সম্ভব হতো চার্চিল যদি আমাদের নেতাদের বিশ্বাস করে মিলিটারি পাওয়ার দিতেন। কিন্তু তাঁর মনে একটা সন্দেহ কাজ করছে।” সৌম্যর অহুমান।

“কী সন্দেহ?” মানস কৌতুহলী হয়।

“অহিংসাবাদী গান্ধীর পরামর্শে যদি ওঁরা জাপানের সঙ্গে স্বতন্ত্র সন্ধি করে যুদ্ধ থামিয়ে দেন সেটা হবে ব্রিটেনের দিক থেকে আরো বড়ো ক্ষতি। তার মনোবল ভেঙে পড়বে। গান্ধী না থাকলে কংগ্রেসকে পোষ মানানো তত কঠিন হতো না। ওই ক্রিপস প্রস্তাবেই সে রাজী হয়ে যেত। বত দোব নন্দ বোম ওই গান্ধী। কংগ্রেস নেতাদেরও কারো কারো ধারণা তিনি থাকতে

কোনোদিন তাঁরা কমতার আসনে বসতে পারবেন না, ধারা আসন ছেড়েছেন তাঁরা কিয়তে পারবেন না। গান্ধীজী সেটা জানেন। দেখে এলুম তিনি আরো বেশী নিঃসঙ্গ।” সৌম্য হৃৎপ্রকাশ করে।

পূর্ববঙ্গের পরিস্থিতি সম্বন্ধে গুয়াকিবহাল হবার জন্তে গান্ধীজী যাদের ডেকে পাঠিয়েছিলেন সৌম্যও তাদের অন্যতম। আপাতত তিনি নীরব শ্রোতা। তাঁর একমাত্র উপদেশ যে যেখানে আছে সে সেখানে থাকবে। সবাইকে স্বস্থানে থাকতে বলবে। যুদ্ধবিরোধী প্রচার চালিয়ে কারাবরণ আর নয়। সে অধ্যায় সমাপ্ত হয়েছে। নতুন অধ্যায় কী হবে তা কেউ জানে না। তিনিও চিন্তামগ্ন। সেগাঁও ইতিমধ্যে সেবাগ্রাম হয়েছে।

“অনেকদিন তোমাদের সঙ্গে দেখা হয়নি। আবার কবে হবে তা কে বলতে পারে? যদি কাসাবিয়াস্কা হতে হয় তো এই শেষ দেখা। তাই সেবাগ্রাম থেকে ফেরবার পথে ট্রেন বদল করে দেখা করতে এলুম।” সৌম্য যেন শেষ বিদায় নিতে চায়।

“শুনব না, শুনব না তোমার ওকথা।” যুথিকা রাগ করে। “ফের যদি এমন কথা মুখে আনো আমি অনশন করব, সৌম্যদা। এমন কিছু করতে হবে যাতে জাপানীরা আদৌ আমাদের দেশে না আসে। যদি আসে তবে এমন কিছু করতে হবে যাতে ইংরেজরা তার আগে আমাদের নেতাদের হাতে সামরিক ক্ষমতা ছেড়ে দেয়। দাঁড়িয়ে দাঁড়িয়ে দেখা একটা কাজের কথা নয়। জুলি এ বিষয়ে কী ভাবছে?”

জুলির নাম শুনে সৌম্য মিষ্টি হাসে। “জুলি? ও কি কোনোদিন কিছু ভেবেছে যে আজ ভাববে? ওর যখন যেটা খেয়াল তখন সেই অহুসারে কাজ। জেল থেকে ছাড়া পেয়ে গান্ধীজীর শ্রদ্ধ করে বেড়াচ্ছে। ও কী বলে শুনবে? ও বলে, জোয়ার যখন এসেছিল তখন তোমরা তরী ভাসাওনি। তীরে দাঁড়িয়ে লগ্ন বইয়ে দিলে। পরে একটা লোক-দেখানো আন্দোলন করলে। ব্যক্তি সত্যাগ্রহ। কেন, গণ সত্যাগ্রহ নয় কেন? তার বেলা ভয়ে পেছিয়ে গেলে। জনতাকে ভয়। পাছে ওরা সেই স্বযোগে বিপ্লব বাধিয়ে বসে। নেতৃত্ব কেড়ে নেয়। এখন হাজার মাথা ঝুঁড়লেও সেই জোয়ার আর ফিরবে না। নতুন জোয়ারের জন্তে প্রতীক্ষা করতে গেলে দল ভেঙে চৌচির হবে। রাজাজী তো প্রকাশে বঁকে বলেছেন। ভিতরে ভিতরে আরো অনেক। তিন মাস পরে

দেখবে মন্ত্রীরা যে যার পদে ফিরে গেছেন। কেন্দ্রেও পণ্ডিতজী যোগ দিয়ে-  
ছেন জাপানের ভয়ে। তোমরা হেরে গেছ, সোমাদা। আমি নিরুত্তর।”

যুথিকা বিস্মিত হয়ে বলে, “পণ্ডিতজীর উপর জুলি এমন বিরূপ কেন?”

সোম্য হেসে বলে, “জুলির বিপ্লবী গোষ্ঠীর মতে পণ্ডিতজী হচ্ছেন এদেশের  
কেরেনস্কি। তিনি সাম্রাজ্যবাদীদের স্বার্থে যুদ্ধ চালিয়ে যাবেন।”

“তা হলে এদেশের লেনিন কে?” যুথিকা স্বধায়।

“লেনিন হচ্ছেন স্ভাষচন্দ্র। তিনি বিপ্লবের স্বার্থে যুদ্ধ থামিয়ে দেবেন।  
এখন তিনি লেনিনেরই মতো কোথায় যেন আত্মগোপন করেছেন।” সোম্য  
উত্তর দেয়।

“বা! জুলির গোষ্ঠী যদি হয় এদেশের বোলশেভিক গোষ্ঠী তবে বাবলীর  
গোষ্ঠী কী?” যুথিকা প্রশ্ন করে।

“বোন, আমাকে জেরা করে কী হবে? আমি কী করে বলব বিপ্লবীদের  
কে কোন্ ধারা অনুসরণ করে? সব ক’টাই তো বিদেশী ধারা। পুঁথি থেকে  
পাওয়া। পুঁথির সঙ্গে মিলিয়ে বিপ্লব কবে কোন্ দেশে হয়েছে? বাবলীর  
কথা যখন উঠল তখন বলি বাবলীর সঙ্গে জুলির এখন গলাগলি বন্ধুতা নয়।  
চুলোচুলি শত্রুতা। এই মারে তো ওই মারে।” সোম্য দুঃখিত।

“বিবাদটা কি মতবাদ থেকে? না আরো গভীর কারণ আছে? ব্যক্তিগত  
ঈর্ষাষেয নয় তো!” মানস উদ্বিগ্ন।

“না। দু’জনেই তার উদ্দেশ্য। জুলির মতে স্বাধীনতা পেতে হলে এই  
তার মওকা। স্তরার আগে ভারত, তার পরে রাশিয়া। বাবলীর মতে  
বিপ্লব যদি রাশিয়ায় ব্যর্থ হয় তবে ভারতেও ব্যর্থ হবে। স্তরার আগে রাশিয়া,  
তার পরে ভারত। ওটা মতবাদের ধন্দ।” সোম্য আশ্বাস দেয়।

“অথচ মজা এই যে দু’জনেই ওরা বিপ্লববাদী, দু’জনেরই মহাগুরু লেনিন।  
আমি মনে করি ওটাও একপ্রকার ধর্মাত্মতা। ফ্যানাটিসিজম।” মানস  
আক্ষেপ করে।

“মজা! তোমার কেবল সবতাতেই মজা। ওই যে দুটো মেয়ে চুলো-  
চুলি করছে ওটা তোমার কাছে মজার বিষয়!” যুথিকা বহুনি দেয়।

“না, না, ঠিক চুলোচুলি নয়।” সোম্য শুধরে দিয়ে বলে, “চিন্নাচিন্দি।  
স্বপনদা ওদের থামাতে পারেন না।”

“স্বপনদা! স্বপনদার সঙ্গে এর কী সম্পর্ক!” যুথিকা অবাক হয়।

“স্বপনদা ওদের ছ’জনকেই ডিনারে ডেকেছিলেন, যেমন আগেও ডাক-  
তেন। ঘটনাক্রমে আমি সেদিন জুলিদের বাড়ীতে অতিথি। জুলি আমাকেও  
ডিনারে নিয়ে যায়। টেবিলে আরো কয়েকজন ছিলেন। গুনলুম ওঁরা  
লিবারল হিউমানিস্ট। আলাপ আলোচনা রাজনীতিবর্জিত। কিন্তু কখন  
একসময় যুদ্ধের প্রসঙ্গ ওঠে। তার থেকে ইংরেজ বনাম জাপানী। অমনি  
বাবলী বলে ওঠে, জাপানকে রুখতে হবে। রাইফেল চাই। সঙ্গে সঙ্গে জুলি  
টেঁচিয়ে ওঠে। রাইফেল দিয়ে কাকে মারবি? ইংরেজকে না জাপানীকে?  
বাবলী বলে, ইংরেজকে নয়, সে এখন রাশিয়ার জন্তে লড়ছে। আর যায়  
কোথা? বেধে যায় তর্কাতর্কি। গালাগালি। চিৎতাচিৎতি। স্বপনদা থামাতে  
পারেন না। আমার দিকে তাকান। আমি জুলিকে ঠাণ্ডা করি। তখন  
বাবলীকে ঠাণ্ডা করেন দীপিকা বোদি। এর পর স্বপনদা বাবলীকে জেরা  
করেন। স্টালিনের মুখে স্ত্রভোরভের নাম কেন? স্ত্রভোরভ তো অষ্টাদশ  
শতাব্দীর জার আমলের সেনাপতি। ফিউডাল সামন্ত। ভূমিদাসদের হুমম।  
বাবলী নির্বাক। তখন স্বপনদা বলেন, ওটা হচ্ছে রুশজাতির অতীত  
গৌরবের প্রতি আবেদন। সেক্ষেত্রে শ্রেণীতে শ্রেণীতে ভেদবুদ্ধি নেই।  
মতবাদে মতবাদে সংঘর্ষ নেই। আগে দেশ, তার পরে অস্ত্র কথা। তা শুনে  
জুলির কী উল্লাস! ওপাশে বাবলীর মুখখানা শুকিয়ে যায় দেখে স্বপনদা সেই  
সঙ্গে জুড়ে দেন, সব দেশই মাদ্রাসের দেশ। ফ্রান্স যদি আমার আপনার হয়ে  
থাকে জার্মানী কি আমার পর? না, জার্মানীও পর নয়। জার্মানী যদি পর  
না হয় তবে রাশিয়া কি আমার পর? না, রাশিয়াও আমার পর নয়।  
রাশিয়ার জন্তেও আমার দরদ। তা শুনে বাবলী গলে যায়। কিন্তু জুলির  
চোখে তিরস্কার।” সৌম্য বিবরণ শোনায়।

“স্বপনদার ভবিষ্যতে সতর্ক হওয়া উচিত। একজনকে ডাকলে আরেক-  
জনকে ডাকতে নেই। ওরা এখন আর মানিকজোড় নয়।” মানস মন্তব্য করে।

যুথিকা হাফ ছেড়ে বলে, “বীচা গেল। ওদের ঠাণ্ডা না করলে ওরা হয়তো  
ছুরি কাঁটা নিয়ে খুনোখুনি করত।”

“না, না, অতদূর যেত না।” সৌম্য হেসে বলে, “ডিনারের পর দেখা গেল  
ওরা দিবি খোশগল্প জুড়ে দিয়েছে। স্বপনদাও খরিয়ে দিয়েছেন একজনের  
হাতে চকোলেট। আরেকজনের হাতে ক্যান্ডেল। বলছেন, নারীর শক্ত  
আর কেউ নয়, টাইম। একদিন দেখবে বোবন চলে গেছে। রূপ বয়ে গেছে।

কেউ তোমাদের ধারে কাছেও আসছে না। তোমরাও ঝগড়াঝাটি করে কাউকেই কাছে টানতে পারছ না। রাইফেল, রিডলভার, জেল, আগার-গ্রাউণ্ড তোমাদের জন্তে নয়। তোমাদের জন্তে পরিবার, সমাজ, সংস্কৃতি। যুদ্ধ বা বিপ্লবের পরেও এসব থেকে যায়। ধরে রাখে মেয়েরাই। যাও, বয়স থাকতে বিয়ে থা করো, মা হও। গান গাও, বাজনা বাজাও, নাচন নাচো, ছেলেছোকরাদের নাচাও। বাবলী আর জুলি খিলখিল করে হাসে। কে বিশ্বাস করবে যে একটু আগে এরাই দুই বিল্লীর মতো চিল্লাচিল্লি করছিল? জুলিকে সঙ্গে নিয়ে আমি ওদের বাড়ী ফিরি।”

“স্বপনদা হৃদয়বান পুরুষ, তবু পুরুষ তো! নারীকে তিনি তার নিজের জায়গায় রাখতে চান। যেমন ইংরেজরা ভারতীয়দের। তিনি ভাবতেই পারেন না বিপ্লবেও নারীর স্থান আছে, যেমন রোজা লুকসেমবুর্গেব। যুদ্ধেও কি নারীর স্থান নেই, যেমন জোন অভ আর্কের? বিপ্লবকে, যুদ্ধকে এঁরা উচ্চতর মৰ্যাদা দিয়েছেন। তাই যদি হয় তবে বাবলীকে বা জুলিকে বয়স থাকতে বিয়ে থা করতে, মা হতে বলা কেন? বিয়ে করতে চাইলেই কি বর পাওয়া যায়? এই যেমন জুলির বর। বানপ্রস্থের বয়স না হলে কিছুতেই কি তিনি বিয়ে করতে রাজী হবেন? বাবলীর ইতিহাস আমার জানা নেই। কিন্তু এদেশে ক’জন যুবকের এমন বৃকের পাটা যে বাপ মার অমতে ওর মতো একটি খুন করতে উত্তম মেয়েকে বিয়ে করবে! ই্যা, একজন জোয়ানের মতো জোয়ান বটে স্কুমার দত্তবিশ্বাস। মিলির অমন অপরাধের রেকর্ড আর অস্ব্থের রেকর্ড শুনেও পেছিয়ে গেল না। এক কথায় বিয়ে করে বিলেত নিয়ে গেল। ভালো কথা, দাদা, মুস্তাফীদের খবর কী? জাপানীরা এলে তাঁরা কী করবেন?” যুথিকা চিন্তাকুল।

“তাঁরা সেবাপ্রতিষ্ঠান ফেলে কোথাও যাবেন না, যদিও কলকাতায় তাঁদের নিজস্ব বাড়ী রয়েছে। জিজ্ঞাসা করলে বলেন, কলকাতার বিপদ আরো বেশী। তার চেয়ে গ্রামে গিয়ে লুকিয়ে থাকা নিরাপদ। জাপানীদেরও তো ডাক্তারের দরকার হবে, ওষুধপত্রের দরকার হবে। ভালো কথা, শুনেছ বোধহয় তাঁদের একটি নাতি হয়েছে। ই্যা, মিলিরই ছেলে।” সৌম্য সানন্দে শোনায়।

“ওমা, কবে?” উৎফুল্ল হয় যুথিকা। “চিঠিপত্রে আভাসটুকুও দেখনি। কেমন আছে ওরা? মা আর ছেলে?”

“ভালোই।” সৌম্য যতদূর জানে।

“লগনে বোমাবর্ষণ থেমেছে। না, মানস? আমি ভাবছি ওরা কি সেখানে নিরাপদ?” যুথিকার কণ্ঠস্বরে উষেগ।

“কলকাতার চেয়েও নিরাপদ। হিটলার এখন আর ওমুখে হবে না। এখন হবে তখন নেপোলিয়নের মতো রাশিয়া থেকে বিতাড়িত হয়ে। তার পর আর একটা ওয়াটারলু।” মানস অতীতের সঙ্গে মিলিয়ে ভবিষ্যৎবাণী করে।

যুথিকা ভোজের আয়োজন করতে যায়। মিলি ও তার বাচ্চার সম্মানে। নিজের বাচ্চাদের সন্ধানেও লোক পাঠায়। ওরা গেছে পাড়ায় খেলা করতে।

“আচ্ছা, সৌম্যদা, সেবাগ্রামে যাবার পথে তুমি তো কলকাতায় দিন-কয়েক কাটালে। কেমন দেখলে জুলির মনোভাব? ও কি বাবলীর মতো জাপানকে রুখবে? না জাপানীদের সঙ্গে হাত মিলিয়ে ইংরেজকে তাড়াবে?” মানস স্তব্ধ।

“না, জুলি বাবলীর মতো জাপানকে রুখবে না। ও বলে, দুই শতাব্দীর ব্রিটিশ রাজত্বের মূলোৎপাটন করতে হলে জাপানের মতো বহিঃশক্তির কাঁধে ভর দিয়ে লড়তে হবে। আমেরিকানরাও লড়েছিল ফ্রান্সের কাঁধে ভর দিয়ে। ইতিহাসে আরো নজীর রয়েছে। জাপানীরা যদি জাঁকিয়ে বসতে চায় তাদের বিদায় করা তত কঠিন হবে না। জাপান যে এতদূর এসেছে সেটা আকস্মিক ঘটনা নয়, দৈবপ্রেরিত স্বেযোগ। আমরা যদি ওদের রুখতে যাই আমাদেরই ক্ষতি। বাবলীরা যদি রুখতে চায় ইংরেজদের কাঁধে ভর দিয়ে লড়বে। কিন্তু তাতে লাভ হবে সাম্রাজ্যবাদীদেরই। কমিউনিস্টদের কী! এসব যুক্তি অবশ্য জুলির নিজের নয়। ওর দাদাদের। তেমনি বাবলীর যুক্তি-শুলোও ওর নিজের নয়। ওর কয়ারেডদের। দেশের জনগণের সঙ্গে ওদের কোনো পক্ষেরই নাড়ীর যোগ নেই। জনগণ যদি জাগে তবে তাদের আত্ম-শক্তিই যুগেট। জাপানীদের বা ইংরেজদের কাঁধে ভর দেওয়া নিষ্প্রয়োজন।” সৌম্যর বিশ্বাস।

মানস চিন্তাশ্রিত হয়। “তুমি কি সত্যি বিশ্বাস কর, সৌম্যদা, যে ভারতের জনগণ দুই হাতে দুই ক্রণ্টে লড়তে পারবে? এক হাতে জাপানীদের সঙ্গে, আরেক হাতে ইংরেজদের সঙ্গে? এই ধরো, পূর্ববঙ্গ যদি ইংরেজরা ছেড়ে দেয় আর জাপানীরা কেড়ে নেয় তবে সেখানকার লোকজন জাপানীদের সঙ্গে

লড়তে গেলে শুনবে তারা ইংরেজদের পঞ্চম বাহিনী। ধরা পড়লে কোতল হবে। পশ্চিমবঙ্গের লোকজন লড়বে ইংরেজদের সঙ্গে। তখন শুনবে এরা জাপানীদের পঞ্চম বাহিনী। এরা হয়তো কোতল হবে না, কিন্তু এদের পাঠিয়ে দেওয়া হবে বেলুচীস্থানে বা সিন্ধে বা আজমীরে। আত্মীয়স্বজনের কাছ থেকে বহুদূরে ও তাদের অজ্ঞাতসারে। সেটাও একপ্রকার জীবন্ত সমাধি। জুলিদের যুক্তি বুঝতে পারি, যদিও সমর্থন করিনে। বাবলীদের যুক্তিও বোধগম্য। যদিও সমর্থন করা শক্ত। সমর্থন করলে শোড়ামাটিও সমর্থন করতে হয়। জাপানীদের বঞ্চিত করার নামে ওরা জামশেদপুরের ইম্পাতের কারখানাও ধ্বংস করতে পারে। কমিউনিষ্ট দোস্তরা বারণ করলে কি মিলিটারি হাই কমান্ড গ্রাহ্য করবে? যাতে গ্রাহ্য করতে বাধ্য হয় সেই-জন্মেই তো কংগ্রেস নেতারা মিলিটারির উপর কণ্ট্রোল দাবী করেছিলেন। ভারতের স্বার্থ ওই কারখানাটাকে অক্ষত রাখা। জাপানীদের বঞ্চিত করতে গিয়ে ভারতীয়দের বঞ্চিত করা কি উচিত? এটা অসম্ভব নয় যে জাপানীরা জামশেদপুর পর্যন্ত ধাওয়া করে আসবে ও টাটার কারখানাটা নিজেদের কাছে লাগাবে। কিন্তু তার দ্বারা জয়পরাজয় নির্ধারিত হবে না। জয়পরাজয় নির্ভর করবে প্রশান্ত মহাসাগরের জলযুদ্ধের উপর। ভারত ভূখণ্ডের স্থলযুদ্ধের উপর নয়। পাল হারবারের জাহাজগুলো জাপান ডুবিয়ে দিয়েছে বলে সব ক'টা জাহাজ ডুবিয়েছে তা নয়। জার্মানরা কাবু হলে আমেরিকার আটলান্টিক নৌবহর প্যাসিফিকে চলে আসবে। তার সঙ্গে যোগ দেবে ব্রিটেনের নৌবহর। হিটলারের বরাতে যেমন আরেকটা ওয়াটারলু তোজোর কপালে তেমনি আর একটা ট্রাফলগার। জাপানের সঙ্গে ভারতের ভাগ্য জড়িত করে আমরা জয়গৌরবের ভাগী হব না, সোম্যাদা। জুলিকে এটা বুঝিয়ে দিয়ো তুমি। পরাজয়ের গ্লানির ভাগ নিয়ে আমাদের লাভ কী হবে? আর বাবলীকে বোঝানো কারো সাধ্য নয়। ওর কমরেডদের কাছে নির্দেশ আসছে মস্কো থেকে লওন হয়ে। ওর আক্কেল হবে যখন দেখবে ধনিকদের পৌষ্যমাস শ্রমিক-কৃষকদের সর্বনাশ। সেই সর্বনাশ থেকে বিপ্লব গজালে বিপ্লবের ফলভাগী হবে কংগ্রেসের বামপন্থী দল। কমিউনিষ্ট দল নয়। তখন দ্বিতীয় বিপ্লবের জন্মে দিন শুনতে হবে। কে জানে কতকাল! ওরা যদি রাশিয়ার জয় নিয়েই সন্তুষ্ট হতে চায় তো ওদের সাথ মিটবে। কিন্তু ভারতের জনগণ স্বাধীনতার স্বাদ পাবে না। ভারতের স্বাধীনতা তাদের কাছে জীবনমরণ প্রশ্ন তাদের



দৃষ্টি এখন গান্ধীজীর উপরে। দেখা যাক তিনি কী সিদ্ধান্ত গ্রহণ করেন। যেটাই হোক সেটা অবিলম্বে গ্রহণ করা চাই। জাপানের পরবর্তী পদক্ষেপের পূর্বেই। নইলে তোমাকে হতে হবে কাসাবিয়াস্কা। কী ভয়ানক কথা!”

সোম্য স্বভাবত শান্ত ও স্থিতধী পুরুষ। কিন্তু কাসাবিয়াস্কা হবার সম্ভাবনা তাকেও ভিতরে ভিতরে দোলা দিয়েছে। সে তার আধ্যাত্মিক সম্বন্ধ থেকে শক্তি সংগ্রহ করছে। সে পালাবে না, মাথা হেঁট করবে না, জাতীয় পতাকা নামাবে না, আত্মসমর্পণ করবে না। জাপানীরা যদি তাকে বন্দী করে তবে বন্দী হবে, যদি গুলী করে তবে প্রাণ দেবে। সহযোগিতা নৈব নৈব চ। তথাকথিত স্বাধীনতার বিনিবয়েও নয়। সে যুদ্ধবিরোধী। সর্বপ্রকার যুদ্ধ-বিরোধী। তার মধ্যে পড়ে সাম্রাজ্যবাদী যুদ্ধও। সাম্রাজ্যবাদী যুদ্ধ বলতে কেবল ব্রিটেনের নয়, জাপানেরটাও বোঝায়। তার স্থান দুই আঙুলের মাঝখানেই।

“তাঁখ, মানস, আমাদের যুদ্ধকালীন পলিসি আমরা পুরো একবছর ধরে ভেবে চিন্তে দেড়বছর আগে স্থির করেছি। সেই অল্পসারে ব্যক্তিসত্যাগ্রহ আরম্ভ করে দিয়েছি। সেটা কি আমরা প্রত্যাহার করছি? না, সেটা বহাল রয়েছে। যুদ্ধের বিরুদ্ধে একটি কথা মুখ ফুটে বললে আগে আমাদের গ্রেপ্তার করে জেলে পোরা হতো। এখন দশটি কথা বললেও কেউ আমাদের গায়ে হাত দেয় না। এটাও একপ্রকার স্বাধীনতা। এমন স্বাধীনতা কি আর কোনো দেশের নাগরিকদের আছে? আমরা কি এ স্বাধীনতা স্বেচ্ছায় ত্যাগ করতে পারি? তার আগে ওজন করে দেখতে হবে কী আমরা পাচ্ছি। তুমিই বিচার করে বলো, ভারতের অপরিমেয় লোকবল থাকতে রোজ শত শত ইন্ড-মাকিন সৈন্ত আমদানী করা হচ্ছে কিসের প্রয়োজনে? যুদ্ধজয়ের, না বিদ্রোহদমনের? তাদের থাকবার জায়গা জোগানোর জন্তে কলকাতা প্রভৃতি শহরের শত শত ঘরবাড়ী চব্বিশ ঘণ্টা নোটিসে দখল করা হচ্ছে কেন? তারা কি তাঁবুতে থাকতে পারত না? দেশে কি তাঁবুর আকাল? বাইরে থেকে আনিয়ে নেওয়া যেত না? তাদের ভোগের জন্তে একহাতে গোমাংস ও আরেক হাতে নারীমাংস খরিদ করা চলেছে। আমরা ভারতীয়রা টাকার জোড়ে বিক্রী করছি। সে টাকাও আমাদেরই রক্তনিঃস্রাবের টাকা। চব্বিশ ঘণ্টার নোটিসে বহুলোকের চাবের জমিও দখল করা হচ্ছে। সেখানে নাকি বিমান বন্দর হবে। চাবের জমি গেলে ফসল ফলবে কোথায়? ভারতের

অভাব হবে না? লোকে খাবে কী? চট্টগ্রাম নোয়াখালীর নৌকা আর শাম্পান জোর করে ডুবিয়ে দেওয়া হয়েছে। পাছে জাপানীরা ব্যবহার করে। এদিকে ইংরেজের প্রজারাও যে ব্যবহার করতে পারছে না। তাঁদের মাল চলাচল বন্ধ। নিত্য প্রয়োজনীয় তেল হুন লকড়ির অভাব হবে না? প্রতিবাদ করতে গেলে কড়া সেনসরশিপ। সব ক'টা কাগজই এখন কর্তা-ভজা। এক গান্ধীজীর 'হরিজন' বাদে। সেটা তো এতদিন বন্ধই ছিল। কংগ্রেসের সঙ্গে কথাবার্তা চলছে বলে খুলেছে। কথাবার্তা বন্ধ হলেই আবার বন্ধ হবে। দেশের কোথায় কী ঘটছে তা জানবার কি জো আছে? রাতের বেলা যেমন বোমার ভয়ে ব্ল্যাক আউট দৈনিক পত্রিকায় তেমনি দিনের বেলা ব্ল্যাক আউট। সত্য হয়েছে প্রথম ক্যাম্পাটি। কংগ্রেস নেতারা যদি সরকারে যোগ দেন এ ক্যাম্পাট রোধ করা তাঁদেরও সাধ্য নয়। এই ইস্যুতেই বাপুকে কারাবরণ করতে হবে। এর থেকে তাঁকে টলানো যাবে না। সত্য আগে। আর-সব পরে। এমন কী, অহিংসাও। বাপুকে দেখে এলুম। তিনি ইম্পাতের মতো শক্ত। সত্য বলতে হবে, পূর্ণ সত্য বলতে হবে, কোনো কথা গোপন করা চলবে না। যেমন তোমার আদালতের শপথ। আমাদের হাতে আর কোনো অস্ত্র নেই। সত্যই আমাদের অস্ত্র। যুদ্ধকালে সত্যই ব্রহ্মাস্ত্র। নেহরু বা আজাদ কারো মুখ চেয়ে এ অস্ত্র আমরা ত্যাগ করব না। শর্তে যদি বনে জাতীয় সরকার হোক। আমরা বাদ সাধব না। কিন্তু আমাদের সত্যের মুখে বল্গা পরানো চলবে না। নেহাৎ যেগুলো মিলিটারি সীক্রেট সেগুলো আমরা ফাঁস করব না। কিন্তু এখন তো সব কিছুই যুদ্ধের নামে নিষিদ্ধ। সরকার পক্ষের প্রচারকার্য বাদে। সেটা তো মিথ্যার বেসাতি।" সৌম্য কিছুক্ষণ দম নেয়।

“কী করা যায়! যুদ্ধের প্রয়োজনে মিথ্যা তো সেই যুদ্ধিষ্ট্রের আমল থেকেই ছুনিয়ার নিয়ম। বোধহয় আরো আগে থেকে। গান্ধীজী যদি এ নিয়ম মেনে নিতে না চান তাঁকে কারাগারেই পাঠাতে হবে। কংগ্রেস নেতারা যদি এতে নারাজ হন তবে ক্ষমতার মাপকাটাতে হবে। যুদ্ধ যতদিন সুদূর ছিল ততদিন আমি যুদ্ধবিরোধী সত্য্যগ্রহের মহিমা উপলব্ধি করেছি। যুদ্ধ এখন দেশের দোরগোড়ায়। এটা কি সত্য্যগ্রহের সময়?” মানস মাথা নাড়ে।

“তা হলে সিভিল লিবার্টির অর্থ কী? কেন তবে ইংরেজ ফরাসী আমেরিকানরা সিভিল লিবার্টির এত বড়াই করেন? কোন্ মুখে তাঁরা জার্মান

ও রাশিয়ানদের নিন্দা করেন? এদেশে যারা শাস্তিবাদী তারা শাস্তির জন্তে কাজ করলে যদি তাদের কারাগারে পাঠাতে চাও তো পাঠাও। কিন্তু তখন হয়তো দেখবে জনগণ তাদের কারামুক্ত দেখতে চায়। গান্ধীজীকে কারাগারে রেখে কংগ্রেস এদেশ শাসন করতে পারবে না। তা ছাড়া আরো কথা আছে। যে-কোনো দেশের পক্ষে সব চেয়ে গুরুত্বপূর্ণ সিদ্ধান্ত হলো যুদ্ধ ও শাস্তির সিদ্ধান্ত। যুদ্ধের সিদ্ধান্তটা ভারতের উপর ছেড়ে না দিয়ে ইংলও নিজেই নিয়ে বসে আছে। তার লীগাল রাইট থাকতে পারে, কিন্তু মরাল রাইট আছে কি? গান্ধীজীর আপত্তি সেইখানে। এখন জাপানের বিরুদ্ধে যুদ্ধ করার সিদ্ধান্ত যদি নিতে হয় নবগঠিত ভারত সরকারই নেবার মালিক। ভারতের জনমত এখনো জাপানের বিরুদ্ধে যুদ্ধঘোষণা করেনি। জাপান বলছে না যে সে ভারতের শত্রু। সরকারী মহল যা খুশি বলুক, ভারতের জনগণ জাপানের সঙ্গে লড়াইতে জড়িয়ে পড়তে রাজী নয়। জাপান যদি গায়ে পড়ে আক্রমণ করে সেকথা আলাদা, কিন্তু তাকে খুঁচিয়ে শত্রু করে তোলাও উচিত নয়। প্রথম সূযোগে যুদ্ধ থামিয়ে দেওয়াই বিজ্ঞতা। বাপু তো বলেছেন এই বুড়ো বয়সেও তিনি জাপানে যেতে রাজী। প্রাণপণে চেষ্টা করবেন যাতে যুদ্ধ থামানো যায়। এর মানে কি ইংরেজের বা মার্কিনের পরাজয়? না, এতে কোন পক্ষেরই পরাজয় নয়, উভয় পক্ষেই সম্মানজনক সন্ধি। স্বাধীন ভারত যুদ্ধের মতো এক গুরুত্বপূর্ণ সিদ্ধান্ত ব্রিটেনের উপর ছেড়ে দিলেও দিতে পারে, কিন্তু শাস্তির মতো আরেক গুরুত্বপূর্ণ সিদ্ধান্ত কিছুতেই হাতছাড়া করতে পারে না। যদি সেটা সম্মানজনক হয়। এই মহাযুদ্ধে শাস্তিবাদীরা নিষ্ক্রিয় থাকতে পারে না। দেশ যদি স্বাধীন হয় তবে তাকে শাস্তির অভিমুখে পরিচালনার দায় মহাত্মার মতো শাস্তিবাদীর। তিনি বেঁচে থাকতে দেশকে তিনি যুদ্ধক্ষেত্রে পরিণত হতে দেবেন না। কারাগারেই অনশনে স্বত্যাৱরণ করবেন। এবার তাঁর সংকল্প কেবল কারাবরণ নয়, অনিবার্য হলে অনশনে স্বত্যাৱরণও।” সৌম্য আবার দম নেয়।

“শোন, সৌম্যদা, বিশ্ব রাজনীতি সম্বন্ধে তোমার যথেষ্ট জ্ঞান আছে। তোমাকে জ্ঞান দেওয়া আমার উদ্দেশ্য নয়। কিন্তু তোমাকে বলে রাখি বিশ্ব-যুদ্ধের দিন একতরফা সন্ধি স্বাপনের অধিকার কোনো যুদ্ধরত দেশেরই নেই। না ইংলণ্ডের, না আমেরিকার, না রাশিয়ার, না ভারতের, ভারত যদি মার্কখানে স্বাধীন হয়। গত মহাযুদ্ধে লেনিনই সে অসাধ্য সাধন করেছিলেন, সেটা সম্ভব

হয়েছিল দ্বিতীয় বিপ্লবের ফলে। ততদিনে রুশ সৈন্যরা রণরাস্তা হয়েছিল। আর জনগণও শাস্তির জন্তে অধীর। এবারকার মহাযুদ্ধের মাঝখানে যদি বিপ্লবের সম্ভাবনা থাকে, তাও শুধু প্রথম বিপ্লবের নয়, দ্বিতীয় বিপ্লবেরও, তা হলে হয়তো একতরফা সন্ধি স্থাপন সম্ভব হবে। নয়তো নয়। দ্বিতীয় বিপ্লব দূরের কথা, প্রথম বিপ্লবও দূর অস্ত্। এটা রাশিয়া নয় ভারত।” মানস মনে করিয়ে দেয়।

“তুমি যাই বলো, ভাই, সংগ্রাম যখন আরম্ভ করে দিয়েছি তার মোমেন্টাম আমরা হাতছাড়া করব না। চার্চিল তাঁর শেষকথা বলে দিয়েছেন। রুজভেন্টও হাল ছেড়ে দিয়েছেন। সংগ্রাম এখন তার আপন মোমেন্টামে চলবে। জাপানের আসা না আসা অবাস্তব। জাপান যদি আসে জাপান অধিকৃত অঞ্চলেও আমরা শাস্তির জন্তে লড়ব। স্বাধীনতা ও শাস্তি একসঙ্গেই অবতীর্ণ হবে। যদি বেঁচে থাকি বাঁচা সার্থক হবে। যদি মারা যাই মরা সার্থক হবে।” সৌম্যর শেষ কথা।

এমন সময় মণিকা এসে ওর কোলে ঝাঁপিয়ে পড়ে আর দীপক এসে ওর গলা জড়িয়ে ধরে। পেছনে ওদের মা।

## ॥ এগার ॥

সৌম্য এবার দীপকের জন্তে এনেছে একখানা অটোগ্রাফের বই। তাতে মহাত্মা প্রমুখ নেতাদের স্বাক্ষর। আর মণিকার জন্তে একখানা আলবাম। তাতে তাঁদের ফোটোগ্রাফ। বলে, “তোমরা এখন থেকে দেশের জন্তে একটু একটু ভাবতে শেখো। আমাদের তো যাবার সময় হলো।”

যুধিকা বিষম রাগ করে। “অমন অলঙ্ঘণে কথা মুখে আনতে নেই। তুমি আরো অনেকদিন বাঁচবে। দেশকে স্বাধীন করবে। তার পর জুলিকে বিয়ে করে গৃহস্থ হবে। জুলিরও একটি খোকা হবে। যেমন মিলির হয়েছে।”

সৌম্য হেসে বলে, “তার পর একটি খুকি হবে না? যেমন তোমার?”

“হবে, হবে। তার জন্তেও বেঁচে থাকতে হবে।” যুধিকার আবদার।

“বৈঁচে থাকা না থাকাটা আমার হাতে নয়, বোন। আমার সামনে এক অগ্নিপন্নীক্ষা। সীমান্তে বাস করছি। যে-কোনোদিন কামানের মুখে পড়তে পারি। আমাদের মানসমোহন যে ফ্রন্টে যাবার স্বপ্ন দেখছিলেন সেই ফ্রন্ট এখন হাতের নাগালে পৌঁছেছে। তবে জার্মান নয়, জাপানী, এই যা তফাত। তাঁর ভাগ্য ভালো, তিনি এখন নিরাপদ দূরত্বে। কিন্তু কে জানে, সরকার যদি তাঁকে আবার ম্যাজিস্ট্রেট করে সীমান্তে পাঠিয়ে দেয়! জজিয়তী ঠুর ভালো লাগে না। এবার সামলাবেন ঠেলা জাপানী অভিযানের। রেঙ্গুনে কী হয়েছিল, শুনবে? ম্যাজিস্ট্রেটকে চার্জে রেখে আর সকলে চম্পট। মায় পুলিশ অফিসার, জেল অফিসার। কয়েদীরা ছাড়া পেয়ে বেরিয়ে আসে। বেপরোয়া ভাবে লুট করে, ধর্ষণ করে, খুন করে, ঘরে আগুন দেয়। সাক্ষীদের উপর প্রতিশোধ নেয়। ম্যাজিস্ট্রেট কী করতে পারেন? সৈন্য নেই, সামন্ত নেই, ইংরেজরা আগেভাগে সরিয়েছে। পাছে ধরা পড়ে বন্দী হয়। শেষে জাপানী কামাণ্ডারের হাতে চার্জ সঁপে দিয়ে তাঁর অল্পমতি নিয়ে রেঙ্গুন থেকে বিদায়। তিনি তাঁকে আটকে রাখতেও পারতেন। শাসন চালানোর জন্তে। তা হলে তো আরো মুশকিলে পড়তে হতো। জাপানীরা জারি করে মার্শাল ল। ম্যাজিস্ট্রেট হন সাক্ষীগোপাল। মানস যাকে বলে নীরব সাক্ষী। সে রকম নীরব সাক্ষী হবার চেয়ে নিষ্ক্রমণই শ্রেয়। কিন্তু আমার কি সেই দৌভাগ্য হবে? ‘চাচা, আপনা বাঁচা’ হাকিমদের নাতি হতে পারে, সেবকদের নীতি নয়। আমরা লোকসেবক, আমরা লোকের সঙ্গে বাঁচব, লোকের সঙ্গে মরব। ওদের পেছনে ফেলে পালাব না।” সৌম্য মন খুলে বলে।

“তুমি যে আমাকে ভয় পাইয়ে দিলে, সৌম্যদা। সরকার যদি আমাকে আবার ওই জেলায় বদলী করে, এবার ম্যাজিস্ট্রেট পদে, তা হলেই গেছি। আমি যে অ্যাটকানিস্ট। কেউ না কেউ সে কথাটা ওদের কানে তুলবে। আমি এ যুদ্ধে নিরপেক্ষ নই। সত্যের সঙ্গে আমি আপস করতে পারব না। যা থাকে কপানে। তবে আমাকে যদি বদলী করে জুঁইকে আর বাচ্চাদের সঙ্গে নেব না। বিহারে বন্ধুর বাড়ী পাঠিয়ে দেব। না, ছুটি চাইব না। সেটা কাপুরুষতা। ফ্রন্টে যেতে চেয়েছিলুম, ফ্রন্টেই যাব, নীরব সাক্ষী হব না। তবে জাপানীরা যদি সত্যি সত্যি আসে, আমাকে আটকে রাখে, মার্শাল ল জারি করে, তা হলে কিন্তু আমি নাচার। মহাত্মা নই যে অনশনে প্রাণ দেব।” মানসও বলে প্রাণ খুলে।

যুধিকা উত্তেজিত হয়ে বলে, “তুমি কি ভেবেছ তোমাকে আমি একলা যেতে দেব ? অত বড়ো বিপদের মুখে ? বাচ্চাদের আমি সঙ্গে নিয়ে যাব। ওদের ছেড়ে থাকতে পারব না। এ রকম হবে জানলে তোমাকে বলতুম, চাকরি ছেড়ে দাও। এক বছর আগে চাকরি ছাড়লে কেউ বলত না যে বিপদ এড়ানোর জন্তে চাকরি ছেড়েছ। এখন ছাড়লে সকলেই ছি ছি করবে। কেউ বিশ্বাস করবে না যে দেশের জন্তে ছেড়েছ। হ্যাঁ, এটা একটা অগ্নি-পরীক্ষাই বটে। যেমন সৌম্যদার তেমনি তোমার, তেমনি আমার। রাখে হরি মারে কে ? মারে হরি রাখে কে ?”

“আমার মনে একটুও খেদ থাকত না, সৌম্যদা, আমার বদলীটা যদি জাতীয় সরকারের নির্দেশে হতো। জানো তো ইংরেজীতে একটা কথা আছে, যুদ্ধ ব্যাপারটা এতই গুরুতর যে সেনাপতিদের উপর ছেড়ে দেওয়া যায় না। মন্ত্রীদেরই পার্লামেন্টের কাছে জবাবদিহির দায়। ভুলচুক হলে মন্ত্রীরাই লোকের আস্থা হারাবেন। সরকার পদত্যাগ করবে। একটা যদি ব্রিটেনের বেলা খাটে তবে ভারতের বেলাও খাটবে না কেন ? যুদ্ধটা তো ব্রিটেনের দোরগোড়ায় নয়, ভারতেরই দোরগোড়ায়। সেনাপতিদের উপর চোখ বুজে ছেড়ে দিয়ে নিশ্চিন্ত হবে কে ? যাদের দেশ তারা নয়, যারা সাত সমুদ্রপারের বিদেশী রাজমন্ত্রী। এই মুহূর্তেই ভারতীয় জনগণের আস্থাভাজন নেতাদের ডেকে নিয়ে সিভিল তথা মিলিটারি উভয়প্রকার ক্ষমতার ভার ছেড়ে দেওয়া উচিত। তারা যদি যুদ্ধের দায়িত্ব নেন তাঁদেরই উপর বর্তাবে জবাবদিহির দায়। অবশ্য সেনাপতিদেরও যথেষ্ট স্বাধীনতা দিতে হবে। কিন্তু সম্পূর্ণ স্বাধীনতা নয়। কংগ্রেস যেটা দাবী করছে সেটা অসম্ভব নয়। এমন কথা কি কংগ্রেস বলছে যে যুদ্ধ দফতরের ভার কংগ্রেসের একজনকে দিতে হবে ? লীগের একজনকে দিলে তিনিও দেশের স্বার্থ দেখবেন। রেঙ্গুনের পুনরারুতি চট্টগ্রামে নাও হতে পারে। মণিপুরে নাও হতে পারে। আমি শাস্তিবাদী নই, কংগ্রেসও শাস্তিবাদী নয়, লীগও নয় শাস্তিবাদী। জাপানকে ঝুঁতেই হবে। ঝুঁতে হবে সীমান্তেই। নইলে সে কলকাতা বাইপাস ধরে স্টান দিল্লীতে গিয়ে হাজির হবে। তখন তো সরকার বদল হবেই। তার আগে নয় কেন ?” মানস উত্তেজিত।

“আমারও সেই প্রশ্ন। তার আগে নয় কেন ? কংগ্রেস, লীগ যেই যুদ্ধ দফতরের ভার নিক না কেন সেটা ভারতের স্বার্থে। সেক্ষেত্রে গান্ধীজী সরে

দাঁড়াবেন। তবে তাঁর যুদ্ধবিরোধী মতবাদ শিকেয় তুলে রাখবেন না। সেটা তাঁর অন্তরাঙ্গার আদেশ। তাঁকে সে স্বাধীনতা দিতে হবে। নয়তো জেলে পুরতে হবে। তিনিও নেতাদের যুদ্ধে যোগ দেবার স্বাধীনতা দেবেন। সেটা যদি হয় তাঁদের অন্তরাঙ্গার নির্দেশ। এই সঙ্কল্পে আমরা কেউ কাউকে বাধা দেব না, বাধ্য করব না। তোমার পথ তোমার, আমার পথ আমার। তুমি অ্যাটকিসিস্ট। আমি অ্যাটিওয়ার। অ্যাটিওয়ার বললে অ্যাটকিসিস্টও বোঝায়। কিন্তু সামরিক অর্থে নয়। আমরা সত্য্যাগ্রহ করব। যেমন ব্রিটিশ অকুপেশনের বিরুদ্ধে তেমনি জাপানী অকুপেশনের বিরুদ্ধে। কিন্তু অসময়ে নয়। যথাকালে। কেউ যেন না ভাবে আমরা ইংরেজদের শত্রু, আর জাপানীদের मित्र। শান্তিবাদীরা সকলেরই मित्र। কারো শত্রু নয়। আরো একটা কথা, মানস। জাপানীরা যেদিন বার্মার মতো আসাম কিংবা বাংলা দখল করবে সেদিন সারা ভারত বিদ্রোহ করবে। সেটা হবে স্বতঃস্ফূর্ত গণ অভ্যুত্থান। দিল্লীর সরকারের পতন অবধারিত। সে সরকার যদি কংগ্রেস-লীগ সরকার হয়ে থাকে তবে সে সরকারেরও পতন অবশ্যজ্ঞাবী। অপসরণ ও পোড়ামাটি এই যদি হয় পলিসি তবে সরকার বদল বুখা।” সৌম্য হুঁশিয়ারি দেয়।

“সেইজন্তেই তো সেনাপতিদের হাতে সব কিছু ছেড়ে দিতে নেই।” মানস বলে।

“আমিও সেটা মানি। কিন্তু আমাদের যে আরো একজন সর্বাধিনায়ক। তিনি গান্ধীজী। আমাদের যে আরো একপ্রকার যুদ্ধ। গণসত্য্যাগ্রহ। যুদ্ধের সেটা নৈতিক বিকল্প। আমরা সেটা জোর করে কংগ্রেসের ঝাড়ে চাপাব না। শুধু এইটুকু চাইব যে উপযুক্ত লগ্ন উপস্থিত হলে আমরা যেন সেটা প্রয়োগ করার স্বাধীনতা পাই। যুদ্ধ এ পৃথিবীতে অনেকবার হয়েছে, অনেকবার হবে। যুদ্ধকালে গণসত্য্যাগ্রহ একবারও হয়নি। তার জন্তে সর্বাধিনায়কও মেলেননি। ইতিহাস কি আমাদের একবারও সুযোগ দেবে না? এবার যদি সুযোগ না পাই কবে আবার পাব? গান্ধীজী কি চিরজীবী? আমরাও কি চিরায়ু?” সৌম্যর কণ্ঠস্বরে আকুলতা।

মানসের মনে পড়ে কোথায় যেন পড়েছিল ইংরেজদের অপসরণের আর জাপানীদের অকুপেশনের মধ্যবর্তী ব্যবধানে মুক্তাঞ্চল প্রতিষ্ঠার কল্পনা। জিজ্ঞাসা করে, তার কি কোনো সম্ভবনা আছে?

“আছে বইকি। সেটা কিন্তু স্বতঃস্ফূর্ত হওয়া চাই। সোভিয়েটের মতো পঞ্চায়েৎও আপনা আপনি গজিয়ে উঠবে। যদি টেকে আপন প্রাণশক্তির জোরেই টিকবে। আমরা গিয়ে সাহায্য করতে পারি, কিন্তু উত্তোগটা স্থানীয় লোকদের। মুশকিল হচ্ছে স্থানীয় লোকেরা যেখানে প্রধানত মুসলমান সেখানে ইউনিয়ন জ্যাকের পরিবর্তে জাতীয় পতাকা ওড়াতে গেলে আগুতি উঠবে। ওরা হয়তো লীগ নিশান ওড়াবে। এই নিয়ে মতাস্তর থেকে মনাস্তরও ঘটতে পারে। পাশাপাশি দুটি গ্রাম হয়তো হিন্দুস্থান ও পাকিস্তান। সে কী রকম মুক্তাঞ্চল! আমার আশ্রমের শাখা প্রশাখা বিভিন্ন গ্রামে। আমি কি পাকিস্তানী মুক্তাচলে বিদেশী বলে গণ্য হব? কাজেই সাবধান হতে হবে।” সৌম্য মনে মনে বামপন্থীদের হুশিয়ারি দেয়।

নৈশভোজনের সময় যুথিকা স্বধায়, “দাদা, তুমি কি আজকেই ফিরে যাবে? রাতের ট্রেনে কষ্ট হবে না?”

“কলকাতায় কাল সকালে আমার একটা কাজ আছে।” সৌম্য উত্তর দেয়।

“জুলির সঙ্গে দেখা হবে তো?” যুথিকা জানতে চায়।

“হবে সন্ধ্যার দিকে, যদি ওদের ওখানে যাই।” সৌম্য জানায়।

“তা হলে ওকে বোলো, বাঘের পিঠে চড়লে নামবার জো নেই। পিঠ থেকে নামলে পেটে যাবে। জাপানীদের কাঁধে চড়ারও একই পরিণাম। ওদের দেওয়া স্বাধীনতা আরেকরকম পরাধীনতা।” যুথিকাও হুঁশিয়ারি দিতে ছাড়ে না।

“সেটা আমারও মত, বোন। কিন্তু ও কি শুনবে?” সৌম্য হাসে।

“ইংরেজীতে একটা কথা আছে, আমার শত্রুর যে শত্রু সে আমার मित्र। জুলির শত্রু কে? না ইংরেজ। ইংরেজের শত্রু কে? না জাপানী। তা হলে জুলির मित्र কে? না জাপানী।” মানসও হাসে।

“জুলি ভুল করছে। এটা কিছুতেই সত্য হতে পারে না যে জাপান ভারতের मित्र। চীন তার কী ক্ষতি করেছিল? চীনকে আক্রমণ করতে গেল কেন? কোরিয়ার কী অপরাধ? দস্তুর সহিতে জিহ্বার পীরিতি স্বযোগ পাইলে কাটে। জাপান একদিন ভারতকেও তাঁবেদার বানাবে।” যুথিকা ভয় দেখায়।

“তুমি নিশ্চিত থেকো, বোন, গান্ধীজী এ বিষয়ে সতর্ক রয়েছেন। মার্শল



চিয়াং কাইশেক এসে তাঁকে বুঝিয়ে দিয়ে গেছেন। চীনকে সাহায্য করাই স্বাধীন ভারতের নীতি হবে। কিন্তু আপনি নিরপেক্ষ থেকে। এইখানে ইংরেজদের নীতির সঙ্গে আমাদের নীতির প্রভেদ।” সোম্য ব্যাখ্যা করে।

“কই, কংগ্রেস তো নিরপেক্ষতায় বিশ্বাস করে না!” মানস খোঁচায়।

“সেইখানেই তো কংগ্রেসের সঙ্গে আমাদের মতভেদ।” সোম্য কাটান দেয়।

মানস তা শুনে বলে, “একপক্ষ যদি হয় আক্রমণকারী ও অপর পক্ষ আক্রান্ত তবে নিরপেক্ষ থাকার অর্থ কি অত্যায়ে প্রাণ দেওয়া নয়?”

“না, তা কেন হবে? আমরা আক্রান্তকে আমাদের সহানুভূতি জানাব, সে একবারে নির্দোষ জানলে তাকে আমাদের নৈতিক সমর্থন জোগাব। প্রয়োজন হলে ডাক্তার পাঠাব, নার্স পাঠাব, ওষুধপত্র পাঠাব। কিন্তু তার পক্ষে অস্ত্রধারণ করব না। করলে এর পরে মধ্যস্থতা করতে পারব না। শাস্তি স্থাপন করতে পারব না। আমাদের মুখে নিরস্ত্রীকরণের বুলি কঁাকা শোনাবে। কেউ বিশ্বাস করবে না যে আমরা অহিংসাবাদী। তা হলে এতদিন ধরে যে অহিংসার সাধনা করলুম সেটা হবে তাসের ঘর রচনা। একটি ফুঁয়ে ধ্বংস পড়বে। না, মানস, অস্ত্রত একজনকে এ সাধনা চালিয়ে যেতে হবে। তাঁর দিক থেকে বিবেচনা করলে নিরপেক্ষতাই শ্রেয়। তবে সমগ্র দেশকে তো তিনি এখনো তাঁর সঙ্গে পাননি। সমগ্র কংগ্রেসকেও না। তাই মতভেদের উল্লেখ করেছি। দেশ যদি ইচ্ছা করে ইংরেজদের বা জাপানীদের পক্ষ নিয়ে যুদ্ধে জড়িয়ে পড়তে পারে। শুধু এইটুকু হ’ল রাখলেই হলো যে গান্ধী তার মধ্যে নেই। তাঁর যে সাধনা সেই সাধনায় তাঁকে অটল থাকতেই হবে। আমরা যারা তাঁর সঙ্গে আছি তারা তাঁকে ছাড়ব না। নিঃসঙ্গ হতে দেব না। একলা চলতে দেব না। আমরা আর ক’জন! আমাদের সামনে বিশ্বাসের অগ্নিপরীক্ষা। উত্তীর্ণ হব কি না কে জানে! আমাদের দৃষ্টি সরকারের উপর নয়, সরকার বদলের উপর নয়! আমাদের দৃষ্টি জনগণের উপর। তাদের আত্ম-শক্তির উপর। ভাঙি জাগরণের উপর। ওরা যদি হিংসায় উন্মত্ত হয় তবে আমরা জানব যে আমরা ব্যর্থ হয়েছি, কিন্তু এটা কি সত্য নয় যে ব্যর্থতাই সিদ্ধির সোপান? যদি হাল ছেড়ে না দিই, হার মেনে না নিই। আমরা বিশ্বাস করি যে ইংরেজদেরও একদিন অন্তঃপরিবর্তন হবে। ওদের যদি হয় তবে জাপানীদেরও হবে। জার্মানদেরও হবে। সর্ব মানবের হবে। হিংসায় যুগ শেষ হয়ে যাবে। নতুন যুগ আরম্ভ হবে।” সোম্য ভবিষ্যদ্বাণী করে।

মানস ও যুথিকা শুক হয়ে শোনে। তারা জানে যে এসব মুখের কথা নয়।  
প্রাণের কথা। অন্তরাত্মার কথা।

“ভূমি তা হলে স্বস্থানে ফিরে যাচ্ছে? মানস স্তব্ধ।

“হ্যাঁ, ভাই। কে জানত যে সেটাই হবে যুদ্ধের ফ্রন্ট? আমাকে তো  
পাঠানো হয়েছিল হিন্দু মুসলমানের সম্প্রীতির জন্তে। এখন দেখছি নতুন  
দায়িত্ব। এ দায়িত্ব আরো জটিল। এবার হিন্দু বনাম মুসলিম নয়। ইংরেজ  
বনাম জাপানী। ইংরেজ বনাম ভারতীয়। জাপানী বনাম ভারতীয়। ভার-  
তীয়দের একদল ইংরেজের পক্ষে। আরেক দল জাপানীর পক্ষে। কোথায়  
তলিয়ে গেছে হিন্দু মুসলিম সমস্তা! কিন্তু তলিয়ে গেলেও তলে তলে  
সক্রিয়। জনগণ বিভ্রান্ত। রাজায় রাজায় যুদ্ধ হবে, তারা কি উলুখড়ের  
মতো প্রাণে মরবে? সেও তবু ভালো, কিন্তু এক রাজা যদি আরেক রাজার  
হাতে তাদের নিগ্রো ক্রীতদাসের মতো বেচে দিয়ে যায় তা হলে তার চেয়ে  
খারাপ আর কী হতে পারে? যেমন বার্মায় ঘটেছে। আমার রক্ত গরম হয়ে  
ওঠে। মাছের রক্ত তো নয়। মাছের রক্ত। অহিংসার বাঁধ ভেঙে যেতে  
চায়। প্রাণপণে আত্মসংবরণ করি। বাপুকে একথা জানিয়েছি। তিনি  
জানেন।” সৌম্য তার বন্ধু ও বন্ধুপত্নীকেও জানায়।

“বিষম জট পাকাতে যাচ্ছে। এ জট খুলতে না পারলে একে কাটতে  
হবে। তা বলে তোমাকে কেন কাসাবিয়াক্স হতে হবে?” মানস পছন্দ  
করে না।

“সেটাই এই নাটকে আমার ভূমিকা। অল্প ভূমিকা যদি থাকে বাপু আমাকে  
জানাবেন।” সৌম্য এইখানে দাঁড়ি টানে।

বন্ধুকে বিদায় দেবার সময় মানস কাঁপা গলায় বলে, “এ দেখা শেষ দেখা  
নয়। আবার দেখা হবে।”

যুথিকা তার সঙ্গে যোগ করে, “জুলির ভবিষ্যৎ নির্ভর করছে তোমার  
উপর। মনে রেখো সেটাও তোমার একটা দায়িত্ব।”

সৌম্য অভিভূত হয়। বলে, “সত্যগ্রহীরা অকারণে বা তুচ্ছ কারণে প্রাণ  
দেয় না। প্রাণের জন্তে কঠিন মূল্য নেয়। যদি কোনোদিন শোন যে আমি  
নেই তা হলে জেনো আমি স্বাধীনতাকে একচুল এগিয়ে দিয়ে গেছি।  
অহিংসাকেও।”

এর পরে মানস বলে তার জীবনসঙ্গিনীকে, “ওর কী ভূমিকা তা ও জানে।

সে ভূমিকা যত ক্ষুদ্র হোক না কেন। কিন্তু আমার ভূমিকা আমার অজানা। আমি দিনের পর দিন, মাসের পর মাস, বছরের পর বছর ড্রিফ্ট করে চলেছি। কোথাও আমার স্থিতি নেই। আজ এ জেলা, কাল ও জেলা, কোথাও শিকড় গাড়তে পারছি নে। চাকরি ছেড়ে দিতে চাই, কিন্তু এখন যদি ছেড়ে দিই পরে একদিন পশতাব। ছাড়ব সেইদিনই যেদিন মনে হবে এখন না ছাড়লে পরে পশতাবে হবে।”

যুথিকা লায় দেয়। “যে কাজ করলে অনুশোচনা জন্মায় সে কাজ না করাই ভালো। আপাতত ছেলেমেয়েরা আর একটু বড়ো হোক। সৌম্যদার সঙ্গে তোমার তুলনা হয় না। ও তো বিয়ে করেনি, ছেলেমেয়ের বাপ হয়নি। আর ওর পেছনে আছেন স্বয়ং গান্ধীজী। তোমার পেছনে কে আছে?”

“আমার পেছনে আছে গভর্নমেন্ট।” মানসকে স্বীকার করতেই হয়।

“তা হলে সেই গভর্নমেন্টের চাকরিতেই তোমার স্থিতি। আজ এ জেলা, কাল ও জেলা তো তোমার সার্ভিসের সকলেরই বেলা। স্থিতিশীল তো একজনও নন। অন্তত তোমার বয়সে। গতিশীল না হলে দেশকে চিনতে কী করে? স্বপনদার মতো কলকাতায় বসে? শান্তিনিকেতনে বাস করলেও তুমি দেশকে চিনতে না। তবে একটাই শিকড় গাড়তে পারতে, সেটা ঠিক। কিন্তু সেই শিকড়ের তলায় কতটুকু মাটি আছে?” যুথিকার মনে সংশয়।

“যাক, স্থিতির সিদ্ধান্ত পরে নিলেও চলবে। ভূমিকার চিন্তাটাই আগে। দেশ এখন যুদ্ধক্ষেত্র হতে চলেছে। আর দু’দিন বাদে জাপানীরা এসে পড়বে। তখন আমার ভূমিকা কী হবে? আদালতে বসে মামলার বিচার করতে থাকব? সেটাও একটা দরকারী কাজ। কত লোক মামলা করতে বা মামলা দেখতে আসে। সেটাও তো একপ্রকার নাটক। প্রত্যেকের মনে একটা কী হয়, কী হয় ভাব। আমি নিজেও জানিনে কোন্ মামলার পরিণাম কী হবে। বিয়োগান্ত না মিলনান্ত। সাজা পাবে না ছাড়া পাবে। হেরে যাবে না জিতে যাবে। উকীলরা এক একজন ভীষ্ম দ্রোণ কর্ণ অর্জুন। তেমনি দুর্ব্ব যোদ্ধা। আদালতও একটা যুদ্ধক্ষেত্র। সেখানে আমি নীরব সাক্ষী নই। আমারও একটা ভূমিকা আছে। আমার সিদ্ধান্তই ভাগ্যান্য়ায়ক। হাতে কাজ না থাকলে বিলিভী মামলার বিবরণ পড়ি। কোথায় লাগে ডিটেকটিভ নভেল।

কিন্তু এর নীট ফল হচ্ছে মানুষ জাতটার উপরেই বেয়া ধরে যাওয়া। কী কুৎসিত সব কেস! মাঝে মাঝে স্বপ্ন দেখি যে আমিও খুন করে লাশ লুকিয়ে রেখেছি। আমিও একজন আসামী। আমার মনের স্বাস্থ্যের জন্তে আমি পরিবর্তন চাই। চাইলে গভর্নমেন্ট বলে, পাবলিক ইন্টারেস্ট আগে। পার্সোনাল প্রেফারেন্স পরে।” মানস আক্ষেপ করে।

এর কিছুদিন পরে কমিশনার সাহেব আসেন জেলা পরিদর্শনে। বাঙালী সিভিলিয়ান। বয়োজ্যেষ্ঠ। সারকিট হাউসে মিষ্টার কিরণময় মজুমদারের সঙ্গে আলাপ করতে যায় মানস। কথাপ্রসঙ্গে বলে জজিয়তী ওর ধাতে সয় না।

মজুমদার সাহেব একটু হেসে বলেন, “আমিও তো এককালে তাই ভাবতুম। জজের জীবন নেহাৎ একঘেয়ে। কারই বা ভালো লাগে! কিন্তু একটা কথা মনে রাখবেন। আত্মসম্মানের দিক থেকে, স্বাধীনতার দিক থেকে জজের মতো পদ আর নেই। ম্যাজিস্ট্রেটদের তো উপরওয়াদের মুখ চেয়ে কাজ করতে হয়। শেষপর্যন্ত কমিশনার পদের উপরে উঠতে দেয় না। দিলে ইংরেজদেরই দেয়। তাও আজকাল প্রোভিন্সিয়াল অটোনমি হয়ে অবধি গভর্নরের একজিকিউটিভ কাউন্সিলার পদ উঠে গেছে। উঠে না গেলে আমাদের সার্ভিসের ইউরোপীয়ান মেম্বাররাই পেতেন। আমরা নয়। আমাদের কমিশনার পদেই পাকা করবে কি না সন্দেহ। আমার দৌড় ওই তিন হাজার টাকা অবধি। জজ হয়ে আপনি ভুল করেননি। আপনি যদি মন দিয়ে কাজ করেন শেষপর্যন্ত হবেন হাই কোর্ট জজ। আপনার বেতন হবে চার হাজার টাকা। যাতে আখেরে লাভ সেইটেই তো ভালো। কেন তবে আপনি মন্ত্রীদেব খিদমদগার হতে যাবেন? বলা যেতে পারে আগেকার দিনে ঝারা কমিশনার হতেন তাঁরা ছিলেন তিনহাজারী মনসবদার। সে যুগ তো আর নেই। ইউরোপীয়ান অফিসারদেরও আর সে প্রেস্টিজ নেই। ম্যাজিস্ট্রেট বলুন, কমিশনার বলুন, সেক্রেটারি বলুন সকলেরই ক্ষমতা ও সম্মান কমে গেছে। সেই সঙ্গে কমে গেছে টাকার দাম। এই তিন হাজার টাকা কি সেই তিন হাজার টাকা? ইউরোপীয়ান অফিসাররাও হালে পানী পাচ্ছেন না। সে জার্কজমক আর নেই। এই যুদ্ধ আমাদের পথে বসাবে, যদি বেশী দিন গড়ায়।”

“আপনি তবে জজের পদ ছেড়ে ম্যাজিস্ট্রেট হতে গেলেন কেন? আখেরে যখন হাইকোর্ট জজ হতে পায়তেন।” মানস কৌতূহলী হয়।

এর উত্তরে তিনি তাঁর জীবনের কথা বলেন। “জানেন তো, জজকে প্রয়োজন হলে প্রাণদণ্ড দিতে হয়। চরম দণ্ড দেবার আগে জজেরা যতই সাবধান হোন না কেন, এক আধটা কেসে বিচারের ভুল হয়ে থাকেই। হাইকোর্টে সেটার সংশোধন হতে পারে, সাধারণত হয়ও। কিন্তু এমন একটি কেসের কথা জানি যেখানে তা হয়নি। ছেলেটা আপীলই করেনি। করতে দেয়নি। সে মরতেই চেয়েছিল, যদিও মারেনি। তার বাপকে খুন করেছে তার সংমায়ের প্রেমিক। তার সংমা তাকে জড়িয়েছে। তার বাপও অন্ধকারে চিনতে না পেরে তার নাম করেছে। সে মার্সি পিটিশন পেশ করলে প্রাণদণ্ডের জায়গায় স্বীপান্তর হতো। সেটাও সে করেনি। আমার কোর্টের কেস নয়, নইলে সে আমাকে চিরদিনের জন্যে বিবেক দণ্ড দিয়ে যেত। ওটা আমার আগে যিনি ছিলেন তাঁর কেস। বিভিন্ন হুজুে যা শুনি তাতে আমি হকচকিয়ে যাই। সন্ত সাবালক ওই ছেলেটিকে আমি জেলখানায় দেখতে যাই। কিছুতেই সে মার্সি পিটিশন পেশ করবে না। করলে অপরাধটা মেনে নেওয়া হবে। এমন কাজ তো সে করেনি। অপরাধ স্বীকার করে মার্সি পিটিশন পেশ করলে ছোকরা বেঁচে যেত। আর আমিও জজের পদে থেকে যেতুম। কে জানে কখন ভুল করে একজন নিরীহ মানুষকে ফাঁসির হুকুম দিই এই ভয় আমার মনে হানা দেয়। যতই জপ করি না কেন নিমিত্তমাত্রো ভব সবাসাচী, ভগবানের সেই উপদেশ আমাদের শাস্তি দেয় না। ভুল করে একজন নিরীহ মানুষকে ফাঁসীতে ঝুলিয়ে গীতার দোহাই দেওয়া আশ্রয়প্রতারণা। ছুটি নিয়ে গভর্নরের সঙ্গে সাক্ষাৎ করি ও সব কথা খুলে বলি। তিনি আমাকে জুডিসিয়াল থেকে একজিকিউটিভে বদলীর আদেশ দেন। বিবেকের দায় থেকে আমি বর্তে যাই। কিন্তু এখন মনে হচ্ছে এমন করে হাইকোর্ট হারানোর সত্যি কোনো দরকার ছিল না। এ লাইনে এসে কি আমার বিবেককে নির্মল রাখতে পেরেছি? কত ছেলেকে বিনা বিচারে ডিটেন করতে হয়েছে। পুলিশ যা বলবে তাই চূড়ান্ত। পুলিশের উপর এতখানি নির্ভরতা আগেকার দিনে ছিল না। টেররিস্টদের প্রাদুর্ভাব ইউরোপীয় অফিসারদের আর কোনো আশ্রয় রাখেনি।”

মানস তাঁর পরামর্শ চায়। “তা হলে আপনি আমাকে কী করতে বলেন, মিস্টার মজুমদার। আমাকে তো ওঁরা সাফ জানিয়ে দিয়েছেন যে আমার বেলা পুনর্বিবেচনার আশা নেই। একজিকিউটিভও তো আর লোভনীয়

নয়। টেররিজম গেছে, তার জায়গায় এসেছে কমিউনিজম। বিনা বিচারে ডিটেন করা বন্ধ হয়নি। যদিও এই মুহূর্তে কম। ইংরেজরা রাশিয়াকে যুদ্ধে মদত দিচ্ছে। অতএব কমিউনিস্টরাও গভর্নমেন্টকে যুদ্ধকালে শাস্তি দিচ্ছে। যুদ্ধের পর আবার ধরপাকড় শুরু হবে। তার চেয়েও অপ্রিয় কর্তব্য সাম্প্রদায়িক গোলমাল থামানো। থামালেও মুশকিল, না থামালেও মুশকিল। একপক্ষ বলবে, লোকটা হিন্দুদরদী ও মুসলিমবিষেবী। অপরপক্ষ বলবে, মুসলিমদরদী ও হিন্দুবিষেবী। মুসলমানদের দাবী, হয় মুসলিম অফিসার পাঠাও, নয় ইউরোপীয়ান অফিসার পাঠাও। বড়ো বড়ো জেলাগুলো তো প্রায়ই পূর্ববঙ্গে। সেখানে মুসলমানরাই সংখ্যাগুরু। সেসব জেলায় হিন্দু অফিসারদের স্থান নেই। আর আমাদের ‘হিন্দু’ বলে চিহ্নিত করা হবেই না কেন? আমি ইণ্ডিয়ান সিভিল সার্ভিসের লোক। আমি ইণ্ডিয়ান বলেই পরিচিত হতে চাই। যে-কোনো ইণ্ডিয়ানের যে-কোনো জেলায় কাজ করার অধিকার আছে। অকালে অবসর নিলে আমাকে পেনসন দেবে না। নয়তো অকালেই অবসর নিতে চাই, মিস্টার মজুমদার।”

“না, না, ওটা হবে নেহাৎ ছেলেমানুষী।” কমিশনার সাহেব বলেন। “ইংরেজরা একটা ব্যালান্স রাখার চেষ্টা করছে। একতরফা মনোভাব ওদের মধ্যে নেই। ওরা মুসলিমদরদী ও হিন্দুবিষেবী নয়। তবে এটাও তো মানতে হবে যে টেররিষ্টরা ছিল সকলেই হিন্দু আর কমিউনিস্টরাও প্রায় সকলেই তাই। আর গান্ধী, নেহরু, সুভাষ প্রভৃতি ক্রাশনালিস্টরাও একধার থেকে হিন্দু। কাজেই হিন্দুদের উপর ব্রিটিশ মনোভাব একটু কঠোর। আর মুসলিমরা সাধারণত সহযোগিতা করেছে বলে তাদের উপর একটু নরম। ব্যালান্স সব সময় ঠিক সমান থাকছে না। যোগ্যের চেয়ে অযোগ্যের কদর বেশী। সব চেয়ে অবিচার দেখা যায় মহকুমাগুলোতে। মন্ত্রীদের ইচ্ছা তো লাটসাহেব প্রত্যেকটি ক্ষেত্রে অগ্রাহ্য করতে পারেন না। তা হলে আর প্রাদেশিক স্বায়ত্তশাসন কী করে বলা যাবে? না, অকালে অবসর নেওয়া এর প্রতিকার নয়। সেটা একপ্রকার পলায়নী বৃত্তি। এস্কেপিজম। আপনি জজ হয়ে ঠিকই করেছেন। কলেকটর হলেই ভুল করতেন। নিমিত্তমাত্রো ভব সব্যসাচী।”

কমিশনার সাহেব পরিদর্শন করে স্বস্থানে ফিরে যান। মাসখানেক বাদে মানস তার কুঠিতে বসে কাজ করছে, চাপরাশি এসে খবর দেয় কমিশনার

সাহেবের মেম সাহেব গাড়ী থেকে নামছেন। মানস তাঁকে অভিবাদন জানিয়ে বলে, “মিসেস মল্লিক বাড়ী নেই। আপনি কি একটু অপেক্ষা করবেন?”

“না, আমি তাঁর সঙ্গে দেখা করতে আসিনি। আপনার সঙ্গেই আমার কাজ। সেটা গোপনীয়।” তিনি আসন নিয়ে বলেন।

মানস বুঝতে পারে না কী এমন কাজ। বলে, “আচ্ছা, শুনব।”

“দেখুন, আপনার কাছে কি ইণ্ডিয়ান ডাইভোর্স অ্যাক্ট আছে? নেই। তা হোক, আইনটা নিশ্চয়ই আপনার জানা আছে?” তিনি জিজ্ঞাসু দৃষ্টিতে তাকান।

“আমার কোর্টে এখনপর্যন্ত তেমন কোনো কেস আসেনি। তবে একটা আইডিয়া আছে।” মানস বিস্মিত হয়ে বলে।

“আপনি আমার ছোট ভাইয়ের মতো। আমার ছোট ভাইয়ের কাছে আপনার কথা অনেক শুনেছি। সেও তো আপনার সার্ভিসের লোক। কাউকে বলবেন না, আমি আপনার পরামর্শ নিতে এসেছি। আমি আর সহ্য করতে পারছি নে। আমি আমার স্বামীর কাছ থেকে ডাইভোর্স চাই।” তিনি উত্তেজনার সঙ্গে বলেন।

“সে কী! আপনার স্বামী আমার শ্রদ্ধাভাজন সিনিয়র। তাঁর বিরুদ্ধে কখনো কোনো অভিযোগ শুনি নি। মদ কে না খায়? বাজী কে না রাখে? তার জন্তে তো ডাইভোর্স করা চলে না?” মানস অভিমত দেয়।

“না, না, তা নয়। উনি একজন প্রচ্ছন্ন মুসলমান। তাঁর কাছে মুসলমানদের সাত খুন মাফ। উনি যেসব রিপোর্ট দেন সেসব মুসলমানদের পক্ষে। তা না হলে ওরা কমিশনার পদে পাকা করবে কেন? মুসলমানদের তোয়াজ করতে গিয়ে যে সর্বনাশটি উনি করছেন আমি একদিন তা ফাঁস করে দেব। আপিস ঘরে গিয়ে ফাইলগুলো আমি স্বচক্ষে দেখেছি।” তিনি চুপি চুপি বলেন।

মানস আঁতকে ওঠে। “ভয়ানক অত্যাচার করেছেন। সরকারী ফাইল পড়া একেবারে বারণ। সরকার জানতে পেলো আপনার স্বামীরই সাক্ষাৎ হবে। সেটা কি ভালো কাজ?” মানস তাঁকে বোঝায়।

“কিন্তু এটাও কি ভালো কাজ হচ্ছে? এইভাবে মুসলমানদের আত্মকারণ দিয়ে মাথায় তোলা? এর জন্তে কি ডাইভোর্স দাবী করতে পারিনে? আইন কী বলে? আমি আর সহ্য করতে পারছি নে।” ভয়হিলার চোখে মুখে রোষ।

“না, এর জন্তে ডাইভোর্স দাবী করা যায় না। ইচ্ছা করলে আপনি জুডিসিয়াল সেপারেশন চাইতে পারেন। কিন্তু খবরদার, প্রমাণ হিসাবে ফাইল দাখিল করবেন না। কিংবা তার নকল।” মানস শাসিয়ে দেয়। তার পর বলে, “আমি যতদূর জানি উনি হিন্দু মুসলমানের মধ্যে একটা ব্যালান্স চান। মুসলমানদেরকে তাদের বখরা দিতে হবে। নয়তো মুসলমানরাও তালাক দাবী করবে। তার জন্তে লড়বে। ফলে দেশ ভাগ হয়ে যেতে পারে।”

“কী জানি, ভাই! আমি অত শত বুঝিনে। না, সেপারেশন নিয়ে আমি কী করব? ওতে কী ঠাঁর শিক্ষা হবে? যাক, ও প্রসঙ্গ যাক। মিসেস মল্লিক কখন ফিরবেন? আমার যে, অগ্র এনগেজমেন্ট আছে। আজ তা হলে উঠি। কথাটা গোপন রাখবেন কিন্তু। দু’জনকেই নমস্কার!” ভক্ত-মহিলা বিদায় নেন।

মানস তাঁকে তাঁর গাড়ীতে তুলে দেবার সময় বলে, “দিদি, মনে রাখবেন, স্বামীটি আপনার, কিন্তু আপিসটি আপনার নয়। ফাইলগুলি পরকীয়।”

## ॥ বারো ॥

ইতিমধ্যে গোস্বামীর জায়গায় জেলা ম্যাজিস্ট্রেট পদে বদলী হয়ে এসেছেন মানসের বন্ধু আলী হায়দার। তাঁর পরিবার কিন্তু তাঁর সঙ্গে আসেননি। কবে আসবেন তার কোনো স্থিরতা না থাকায় মহিলা সমিতির সদস্যরা এক-বাক্যে জঙ্গ গৃহিণী যুথিকাকেই তাঁদের সভানেত্রী পদে বরণ করেছেন। তার ফলে ওকে ছপুরবেলাটা মহিলা সমিতি আর নারীমঞ্চল সজ্জের কাজকর্ম নিয়ে ব্যাপৃত থাকতে হয়। মহিলারা যুদ্ধযাত্রী সৈনিকদের জন্তে পশমের প্লেডার, মাফলার, দস্তানা, মোজা ইত্যাদি বাড়ীতে বসে বোনেন ও সমিতির মারফৎ যথাস্থানে দান করেন। আর নারীমঞ্চল কর্মীরা ঘরে ঘরে চরকা বিতরণ করে আসেন, স্নুতো কাটা হলে শাড়ী খুঁতি গামছা প্রভৃতি বুনিয়ে নিয়ে সজ্জের মারফৎ বিক্রী করেন ও লাভের টাকা ঘরে ঘরে পৌঁছে দেন। কর্মীরা অধিকাংশস্থলে পুরুষ। সচিব একজন বঙ্গান্ত্র মাড়োয়ারী। সভানেত্রী যুথিকা।



সেও চরকা কাটে, পুলোভার বোনে। ছেলেমেয়ের উপর নজর রাখার জন্তে বাসভবনেই সন্মিতির ও সজ্জের আফিস বসায়।

“দু’বছর বাদে আবার আমাদের দেখা। এবার পশ্চিমবঙ্গে। কেমন আছেন আপনারা?” একদিন কল করতে এসে আলী হায়দার স্বধান।

“শারীরিক অর্থে ভালোই, মানসিক অর্থে নয়। চোখের সামনে এ দুনিয়ায় কত কী ঘটে যাচ্ছে। আমি শুধু নীরব দর্শক!” মানস দুঃখ করে।

“নীরব দর্শক! আপনার ওই এক কথা। ফ্রুটে যাবার জন্তে ছুটফট করছিলেন। ভাগ্যিস যাননি। গেলে তো আপনারও পরিণাম হতো আমাদের সেই ক্যাপটেন—না, না, মেজর—ল’র মতো।” হায়দার বিষন্ন স্বরে বলেন।

“আমাদের সেই সিভিল সার্জন? কী হয়েছে তাঁর?” মানস উৎসাহ হয়।

“বঁচে আছেন। কিন্তু বন্দীশালায়। সিঙ্গাপুরে। জাপানীরা তাঁর সঙ্গে ভালো ব্যবহারই করেছে। বাড়ীতে চিঠি লিখতেত দিয়েছে। বাড়ীর লোক কলকাতা থেকে সে চিঠির নকল আমাকে পাঠিয়েছেন। আমার কাছে তাঁর আসবাবপত্র গচ্ছিত ছিল। তাঁর কথামতো আমি সেসব বিক্রী করে তাঁর বাজার দেনা ও ক্লাবের বিল শোধ করেছি। উদ্ধৃত যা ছিল তা ক্যাপটেন মুস্তাফীর সেবাপ্রতিষ্ঠানে খয়রাত করেছি। ল আপনারদের সবাইকে শ্রদ্ধা জানাতে বলেছেন। মুস্তাফীও।” হায়দার বলে যান।

‘তার পর আর কী খবর? জাপানীরা তো পূর্ব বাংলার দৌরগোড়ায়। কবে ভিতরে পদার্পণ করবে? তবু ভালো যে আপনাকে ওদের অভিযান করতে হবে না। হয়তো আটকই করত।’ মানস সহানুভূতির স্বরে বলে।

“আমি অকুতোভয়। খোদা ভিন্ন কাউকে ভরাইনে। জাপানী তো জাপানী সাক্ষাৎ শয়তান এলেও আমি ভয় পেতুম না।” হায়দার বুক ফুলিয়ে বলেন। “আমাকে চার্জ নিতে বললে আমি চার্জ নিতুম। সেইভাবে মুসলমানদের মনের জোর জোগাতুম। শহর ছেড়ে, গ্রাম ছেড়ে পালিয়ে আসত না ওরা কেউ। তবে হিন্দুদের কথা আলাদা। ওদের আতঙ্ক জাপানীদের নিয়ে ততটা নয়, যতটা সমাজবিরোধীদের নিয়ে। রেজুনের মতো লুটপাট, নারীধর্ষণ, খুনজখমের আতঙ্ক ওদেরি যেন বেশী। আমি থাকতে ওদের মধ্যেও প্যানিক ছিল না। দোকানবাজার স্বয়ংক্রিয়। কিন্তু ধানচালের আড়ত

আমরা দখল করে নিয়েছি। যাতে জাপানীদের হাতে না পড়ে। দেশের লোক বরং না খেয়ে মরবে, তবু জাপানীকে খেতে দেওয়া হবে না। এর নাম হলো ডিনায়াল পলিসি। কী করা যায়, বলুন? আমরা নাচারা!”

“এইখানেই তো গান্ধীজীর আপত্তি। ডিনায়াল পলিসির শিকার জাপানীরা নয়, বাঙালীরা। আপনারা কি নোকোগুলোও আটক করেছেন? শুনেছি কোথাও কোথাও নাকি ডুবিয়ে দিয়েছেন। নদনদীর দেশ। লোকে চলাফেরা করবে কী করে? কত লোকের রুজি রোজগার যাবে!” মানস চিন্তিত।

“সেকথা ঠিক। পাবলিক থেকে প্রতিবাদ করা হয়েছে। আমরাও পাবলিকের পক্ষে। কিন্তু মিলিটারি অফিসাররা কোনোরকম ঝুঁকি নেবেন না। ডিনায়াল পলিসি তো ওঁদেরই পলিসি। সিভিলিয়ান সরকারের নয়। লোকে ভুল বোঝে। যুদ্ধকালে বড়লাটের সিদ্ধান্তের উপরে জঙ্গীলাটের সিদ্ধান্ত। কী করা যায়, বলুন। এর কি কোনো প্রতিকার আছে?” হায়দার দিশাহারা।

“সেই প্রশ্নেই তো ক্রিপস প্রস্তাব ভেঙে গেল। সেনানায়কদের সিদ্ধান্তের উপরে সিভিলিয়ান ক্যাবিনেটের সিদ্ধান্ত। এটাই তো খোদ ব্রিটেনের রীতি। এ রীতি ভারতে পয়োগ করা হবে না কেন? নাংসীরা যখন ব্রিটেন আক্রমণ করতে উদ্যত হবে তখন পলিনিবর্তিত গুরুতব সিদ্ধান্ত নেবার দায়িত্ব কি সিভিলিয়ান ক্যাবিনেটের না মিলিটারি হাই কমান্ডের? কংগ্রেস নিজের জগ্গে এ দায়িত্ব দাবী করছে না। করছে মুসলিম লীগেব জগ্গেও। জিন্না সাহেব জঙ্গীলাটের উপরওয়াল হয়ে ওই ডিনায়াল পলিসি রদবদল করতে পারতেন। হিন্দু মুসলমান সকলেই ওর ভুক্তভোগী।” মানস যুক্তি দেখায়।

“আপনার যুক্তিতে কোনো ভুল নেই, ভাই মল্লিক।” হায়দার দীর্ঘশ্বাস ফেলেন। “কিন্তু কোথায় বাধছে, বলব? আট আটটি প্রদেশের মন্ত্রীমণ্ডল দখল করার পর থেকে কংগ্রেস নেতাদের মাথা ঘুরে গেছে। তাঁরা মন্ত্রীমণ্ডল গঠন করার আগে জিন্না সাহেবের সঙ্গে পরামর্শ করেননি। মন্ত্রিত্ব ত্যাগ করার আগেও তাঁর সঙ্গে পরামর্শ করেননি। নিজেদের খুশিমতো জেলে গেছেন। উদ্দেশ্য কেন্দ্রীয় সরকার দখল। এখন দেখছেন সেটা তাঁদের একার মাঝে কুলোবে না। অথচ জিন্নাকেও তাঁর পাওনা দেবেন না। ওই আটটি প্রদেশে কি তাঁর কোনো পাওনা নেই? সেটা কি তিনি আগে বুঝে না নিয়ে কেন্দ্রীয়

সরকারে যোগ দিতে যাবেন ? কেন্দ্রে তাঁর দল অন্যতম শালকদল হবে, অথচ বিহারে ও যুক্তপ্রদেশে হবে বিরোধী দল। তাঁর নিজের প্রদেশ বম্বেতেই হবে বিরোধী দল। অল্প পাঁচটা প্রদেশের কথা নাই বা উল্লেখ করলুম। লীগ সদস্যদের কাউনসিলে তিনি মুখ দেখাবেন কী করে ? কংগ্রেসের সঙ্গে মিলে চাপ দিলে স্বফল কতটুকু হবে, জানিনে। জঙ্গীলাট রাগ করে ইস্তফা দিতে পারেন। জিন্না তখন কার উপর হুকুম জারি করবেন ? তা ছাড়া তাঁর আসল লক্ষ্যটা তো শাসনপরিষদের ভারতীয়করণ নয়।” হায়দার বাকীটা হাতে রাখেন।

“কী সেটা ?” মানস কৌতুহল হয়।

“সেটা হচ্ছে বৈরাজ্য অথবা স্বতন্ত্র রাজ্য। কংগ্রেস ও লীগ যদি একই মনসদে বসে তবে বড়ভাই ছোটভাই হিসাবে নয়, সমান শরিক হিসাবে। প্রদেশগুলোতে তিনি প্যারিটি দাবী করবেন না, সেখানকার দাবী ওয়েটেজ। কিন্তু কেন্দ্রে তাঁর পলিসি হচ্ছে ব্যালান্স অভ পাওয়ার।” হায়দার বাকীটা দেখান।

“কিন্তু সেটা তো ইংরেজদেরই পলিসি।” মানস শক্ পাায়।

“সেটা নাচার হয়ে জিন্না সাহেবেরও পলিসি। দেশীয় রাজত্বরা যদি ফেডারেশনে যোগ দিতেন, যদি ফেডারল আইন সভায় তাঁদের মনোনীত প্রতিনিধিদের পাঠাতেন তা হলে কংগ্রেস কখনো একক মেজরিটি পেতো না। বাধ্য হয়ে লীগের স্বায়ত্ত্ব হতো। তখন লীগ দর হাঁকত। ফেডারেশন কেঁচে গেছে। কংগ্রেসের একক মেজরিটি জিন্নাসাহেব কিছুতেই মেনে নেবেন না। তার চেয়ে বরং দেশভাগ ভালো। আপনারা বলবেন লোকটার দেশপ্রেম নেই, লোকটা সাম্প্রদায়িক বাতিকগ্রস্ত। কিন্তু চিরকাল একটি সম্প্রদায় তার মেজরিটির জোরে শাসন করবে, আরেকটি সম্প্রদায় শাসিত হবে, এটাই বা কেমনভর নিয়তি! কংগ্রেসনেতারা মুখে যাই বলুন না কেন তাঁদের জোর আসলে হিন্দু সম্প্রদায়ের ভোটের জোর। মুসলিম ভোটটা বাছল্য।” হায়দার অভিমানের স্বরে বলেন।

“কেন ? ঐক্যিয়ারের পাঠানরা কি মুসলমান নয় ?” মানস তর্ক করে।

হায়দার এর জবাব না দিয়ে বলেন, “তারপর এটা কেমনভর ডেমোক্রাসী দেখানে চেক নেই, ব্যালান্স নেই, মেজরিটি একেবারে নিরক্ষুশ ! ইংরেজ জাটসাহেবরা থাকতেই এই ! গুঁরা চলে গেলে তো বঙ্গাধীন স্বৈরাচার।

জবাহরলাল তো শাসিয়ে রেখেছেন যে জমিদার ও তালুকদারদের উচ্ছেদ করবেন, ক্ষতিপূরণ দেবেন না। ধনিকদের ধনাগমের উপায় কেড়ে নেবেন। কারখানা রাষ্ট্রস্বয়ং করবেন। বিদেশী কোম্পানীদের তল্লিতল্লা গুটোতে হবে। রাজত্বদের রাজ্য থেকে মহাপ্রস্থান। কংগ্রেস যে বামপন্থীদের কবলে পড়বে না তেমন নিশ্চয়তা কোথায়? গান্ধীজী আর কদ্দিন! তাঁর পরেই তো তাঁর উত্তরাধিকারী হবেন নেহরু। এক টিলে অনেকগুলি পাখী মরবে। তাদের মধ্যে আমরা যুক্তপ্রদেশের সম্ভ্রান্ত মুসলমানরাও। আমাদের মধ্যে ধারা দীর্ঘকাল কংগ্রেসে ছিলেন তাঁরা কংগ্রেস থেকে নাম কাটিয়ে মুসলিম লীগে ভিড়ে গেছেন। তার মানে কি তাঁরা কমিউনালিস্ট? না, জিন্নাও তেমনি কমিউনালিস্ট নন। তিনি চান চেক আর ব্যালান্স। যাতে নিরঙ্কুশ বামপন্থীদেরও আইনের শিকল পরানো যায়। মুসলিম লীগের পার্টি ফাণ্ডে হিন্দু জমিদার তালুকদাররাও টাকা দিয়েছেন। লীগ যদি কোয়ালিশনে যোগ দেয় তাঁদের স্বার্থ রক্ষা করবে। যদি অপোজিশনে থাকে তা হলেও তাঁদের স্বার্থে লড়বে। তবে পাকিস্তানের আওয়াজ তোলার পর থেকে হিন্দু সাহায্য কমে গেছে। তেমনি মুসলিম সাহায্য বেড়ে গেছে। পদ্মার ওপাবে দেখে এলুম গরিব মুসলমানরাও কৃষক প্রজা দল ছেড়ে মুসলিম লীগে জোট বাঁধছে। কংগ্রেস থেকে অবশ্য আরো আগে থেকে বিদায় নিয়েছিল। কায়দে আজমের এমনি ছুঁবার আকর্ষণ ”

মানস ক্ষুব্ধ হয়ে মন্তব্য কবে, “জিন্না দেখছি সব মানুষের কাছে সব জিনিস। যুক্তপ্রদেশে জমিদারদের রক্ষক। বাংলাদেশে জমিদারদের ভক্ষক। কংগ্রেসীদের ভূমিকাটা ঠিক বিপরীত। যুক্তপ্রদেশে ভক্ষক। বাংলাদেশে রক্ষক।”

“তা হলে বুঝতে পারছেন তো কেন কংগ্রেস লীগের কোয়ালিশন হবার নয়। কোয়ালিশন না হলে পার্টিশন ছাড়া আর কী হতে পারে? তারই অন্ত নাম পাকিস্তান। নামের মহিমায় অসংখ্য লোকের ভোট মেলে। তবে ওটার একটা কমিউনাল গন্ধ আছে, তা মানতেই হবে, মল্লিক। আমি খুব খুশি নই। এতকাল একসঙ্গে থেকে আমরা ভাই ভাই ঠাঁই ঠাঁই হয়ে যাব! আমি তো খোন্দকার জাফর হোসেন নই, আমার বাড়ী তো বেঙ্গলে নয়, আমার কী লাভ! তা বলে কংগ্রেসকে কেন্দ্রে নিরঙ্কুশ হতে দেওয়া যায় না। কংগ্রেস মূলত হিন্দু। এমনি এক পরিস্থিতি হয়েছিল আয়ারল্যান্ডের। স্বাধীনতার জন্তে একসঙ্গে সংগ্রাম চালাবার পর উত্তরের প্রটেস্ট্যান্টরা স্বতন্ত্র

রাজ্য চায়। তারা সমগ্র দেশের ক্যাথলিক মেজরিটির আধিপত্য যেনে নেবে না। বরং ব্রিটেনের সঙ্গে গাঁটছড়া বাঁধবে। আয়ারল্যান্ড দু'ভাগ হয়ে যায়। ওটা ঠিক ইংরেজদের কারসাজি নয়। মেজরিটির উপর মাইনরিটির অনাস্থা। তার চেয়ে বরং তৃতীয় পক্ষের উপর আস্থা। সেবার আয়ারল্যান্ডের পালা। এবার ইণ্ডিয়ার পালা। কংগ্রেস লীগ একমত হলে অথগুতা। না হলে বিখণ্ডতা।” হায়দার বলেন।

“কংগ্রেস লীগ একমত হলে অথগুতা, একথা ঠিক। কিন্তু না হলে বিখণ্ডতা কেন? বিখণ্ডতা কেন নয়? শিখেরা কি লাহোর অমৃতসর বিনা যুদ্ধে ছেড়ে দেবে? আর এদিকেও তো বাঙালী হিন্দুরা আছে। তারা যে এতদিন ধরে ইংরেজের সঙ্গে সংগ্রাম করে এল সেটা কি বাংলার মসনদে মুসলিম লীগকে বসাতে? ইংরেজরা থাকে কি না সন্দেহ। যাবার আগে তারা যদি দেশটাকে আন্ত রেখে যায় হিন্দু মুসলমান শিখ সবাই মিলে তাকে জাপানীদের হাত থেকে রক্ষা করতে পারে। নয়তো জাপানীরা সেকালের মগ ফিরিজীর মতো বাংলাদেশে হানা দেবে ও তার কতক অংশ দখল করে নেবে। মুসলিম লীগ কি ওদের হটাতে পারবে? যদি পারে তো সেসব অংশ পাকিস্তানে যাক। কিন্তু কলকাতা আমরা যেমন করে পারি রক্ষা করবই। জাপানীদের হাত থেকেও, ইংরেজদের হাত থেকেও, পাকিস্তানের হাত থেকেও। লাহোরে বইবে রক্তসিঁদু, কলকাতায় রক্তগঙ্গা। দিল্লীতে রক্তযমুনা বইতে পারে, যদি পাকিস্তানীরা দিল্লী দাবী করে। অথগুতা থাকবে না এটা এখন কংগ্রেস নেতারাও বুঝতে পারছেন। কয়েকটি প্রদেশ তাঁরা আলাদা হয়ে যেতে দেবেন, কিন্তু তার আগে সীমানা কাটছাঁট করতে হবে। পৃথক হয়ে যাবার পর ওরা একত্র হয়ে পাকিস্তান গঠন করতে পারবে। কেউ বাধা দেবে না। কিন্তু নেতারা চান আজ এখনি কেন্দ্রে পুরোপুরি বদল। জাপানী আক্রমণকে প্রতিহত করতে হলে এটা অপরিহার্য। জিন্না সাহেব যদি ব্যালাল অভ পাওয়ার চান সেটাও আপসে পেতে পারেন। কিন্তু কেবল কেন্দ্রে প্রদেশে নয়। আগে তো কেন্দ্রে সদ্ভাব প্রতিষ্ঠিত হোক। পরে প্রদেশেও হবে। তখন কোয়ালিশন অবধারিত।” মানস আশাবাদী।

“হ্যাঁ, কিন্তু একটা আরগায় গোল বাধতে পারে, মল্লিক।” হায়দার ইতস্তত করে বলেন, “গান্ধীজীর যেমন ধারণা কংগ্রেস ভারতীয়দের সকলের

একমাত্র প্রতিনিধি আর তিনি কংগ্রেসের, তেমনি জিন্না সাহেবেরও ধারণা মুসলিম লীগ ভারতের মুসলমানদের একমাত্র প্রতিনিধি ও তিনি মুসলিম লীগের। বড়লাটের শাসন পরিষদে মুসলমানদের জন্মে যেসব আসন নির্দিষ্ট হবে তার সব ক'টি লীগপন্থী মুসলমানদের দিতে হবে। একটিও কংগ্রেসপন্থী মুসলিমকে না। কংগ্রেস কি এতে রাজী হবে? না হলে তো এই প্রদ্বৈত কেন্দ্রীয় সরকার গঠন প্রস্তাব ভেঙে যাবে।”

“যথার্থ। সেটা হৃদয়ঙ্গম করে গান্ধীজী বলতে শুরু করেছেন যে ইংরেজরা যদি অবিলম্বে ক্ষমতাত্যাগ না করে তবে তারা ভারত ত্যাগ করুক। সৈন্যদল সরাতে হবে না, বেসরকারী ইংরেজদের সরাতে হবে না, কিন্তু সরকারী ইংরেজদের সরাতে হলে। ইচ্ছে করলে ওঁরা কংগ্রেসের হাতে ক্ষমতা সঁপে দিতে পারেন, ইচ্ছে করলে লীগের হাতে, ইচ্ছে করলে ভগবানের হাতে বা অরাজকতার হাতে। কিন্তু আগে তো একটা শৃঙ্খতা স্থিতি হোক। তার পরে শৃঙ্খতাপূর্ণের পালা আসবে। যেভাবেই হোক শৃঙ্খতা পূরণ হবেই। মুসলিম লীগ ইচ্ছে করলে পাকিস্তান জ্বরদখল করতে পারে, কমিউনিস্টরা ইচ্ছে করলে চীনেব মতো মুক্তাঞ্চল কায়েম করতে পারে। কংগ্রেস হয়তো আটটা প্রদেশ জিতে নেবে। এসব কথা অবশ্য তাঁর একার। কংগ্রেসের নয়।” মানস বুঝিয়ে বলে।

“তা হলে তিনি আর প্রতিনিধি হলেন কী করে?” হায়দার হাল ছেড়ে দেন।

“তাকে এখন তিন তিনটি ফ্রন্ট লড়তে হবে। একটি তো আগেকার মতো ব্রিটিশ ফ্রন্ট, আরেকটি হবে জাপানী ফ্রন্ট। জিন্নাসাহেব যদি পাকিস্তানের জিগীর তুলে লড়াইতে নামেন তবে আরো একটি, মুসলিম ফ্রন্ট। এখন সঙ্কট তাঁর জীবনে আর কখনো আসেনি। তাঁর প্রাণসংশয়। অনশনের কথাও তিনি ভাবছেন।” মানস তাঁর লেখা পড়েছে।

হায়দার হেসে বলেন, “জিন্না কবে লড়াইতে নেমেছেন যে এখন নামবেন? যখন জাপান আসি আসি করছে ও ইংরেজ যাই যাই করছে। তবে, হ্যাঁ, যেদিন দেখবেন যে ইংরেজরা যাবার সময় ভারতের ভার কংগ্রেসের হাতে সঁপে দিয়ে যাচ্ছে, মুসলিম লীগকে বখরা দিচ্ছে না, আর কংগ্রেসও ইংরেজদের সঙ্গে বন্দোবস্ত করছে, লীগের সঙ্গে নয়, সেদিন তিনিও একটা জেহাদের ডাক দেবেন। ওস্তাদের মার শেষ রাতে। জিন্না সবুজ করবেন। ইতিমধ্যে

কংগ্রেস আরেক দফা জেলযাত্রা করতে চায়, কল্লক না ? মুসলমানরা কংগ্রেসের পক্ষেও থাকবে না, বিপক্ষেও থাকবে না। ইঙ্গ-কঙ্গ সংঘর্ষে ওরা নিরপেক্ষ। কিন্তু ইঙ্গ-কঙ্গ সন্ধির দিন ওদের মার যুঁতি।”

মানস বেদনা বোধ করে। অল্প প্রসঙ্গ পাড়ে। রায় বাহাদুর বাহুদেব হালদার কেমন আছেন ? মোহিনীমোহন ধর কেমন আছেন ?

“হু’জনেই বাড়ীর মেয়েছেলেদের কলকাতায় পাঠিয়ে দিয়েছেন। তাঁদের ধারণা ইংরেজরা কখনো কলকাতা ছেড়ে যাবে না। বোমা ভূটো একটা পড়বে, কিন্তু আক্রমণ তত সহজ নয়। জাপানীদের সঙ্ক্ষে হু’জনের হু’রকম মত। রায় বাহাদুর মনে করেন ওরা বাঙালীর শত্রু নয়, ইংরেজের শত্রু। বাঙালীর সঙ্গে গায়ে পড়ে শত্রুতা করবে না। বরঞ্চ মিত্রতা করবে। আর মোহিনীবাবু মনে করেন ওরা ফিরে যাবার আগে সর্বশ্ব লুট করে নিয়ে যাবে। ধনসম্পদ, শিল্পদ্রব্য, প্রাচীন নিদর্শন। জোর করে জাপানী মাল গছিয়ে দিয়ে যাবে। তা তুমি কিনতে চাও আর নাই চাও। ওরাও সাম্রাজ্যবাদী বলে ওদের লোভ আরো বেশী। ওদের চেয়ে ইংরেজ ছিল ভালো। উনি এই সময় ইংরেজবিরোধী আন্দোলনের পক্ষপাতী নন। কংগ্রেস নেতাদের কাছে আবেদন নিবেদন করছেন ইংরেজদের সঙ্গে ঝগড়া না করতে। এ বিষয়ে রায় বাহাদুরও তাঁর সঙ্গে একমত।” হায়দার বলেন।

“কেউ কি বলছে না দেশকে স্বাধীন করার এই হচ্ছে স্বেচ্ছা ?” মানস স্তব্ধ।

“বলছে বইকি। তেমন আরেক দল বলছে পাকিস্তান হাসিল করার এই তো মওকা। এরা যদি বলে, ভারত ছাড়ো, ওরা বলে, ভাগ করো আর ছাড়ো। গান্ধী ও জিন্নার ধ্বনিও প্রতিধ্বনি।” হায়দার মুচকি হাসেন।

“যুদ্ধবিরোধী প্রচারকার্যের জন্তে কাউকে গ্রেপ্তার করতে হচ্ছে না ?” মানস সৌম্যদার মতো কর্মীদের সঙ্ক্ষে পরোক্ষে প্রশ্ন করে।

“নাঃ! যত সব ক্র্যাক্স! সৌম্য চৌধুরী বলে একজন নামকরা গান্ধীবাদী আছেন। তাঁকে কিছুদিনের জন্তে আটক করা হয়েছিল। না করলেও চলত। কারণ তাঁর কথায় কেউ কান দেয় না। বহু লোক যুদ্ধের ঠিকাদারি নিয়ে রাতারাতি ফেঁপে উঠেছে। বহু লোক হাতিয়ার নাড়াচাড়া করার জন্তে স্বেচ্ছায় রিজুট হয়েছে। মেয়েরাও চায় ওয়াকি হতে। কিন্তু আমরা তাদের প্রশ্রয় দিইনি। দুটি একটিকে কলকাতা পাঠিয়েছি। গুনছি ওয়াকি-

দের বার্মা থেকে মাদ্রাজে পাঠানো হয়েছে সমুদ্রপথে, যাতে ধরা না পড়ে। যুদ্ধ ব্যাপারটা এমন ট্রেচারাস। যাদের জয় করার কথা তারাই কিনা পরাজিত। কেউ কখনো ভাবতে পেরেছে যে ইংরেজ অফিসাররা সারেগার করবেন জাপানী অফিসারদের কাছে? হলদে চামড়ার কাছে শাদা চামড়ার ইজ্জৎ রইল কোথায়! সিপাহী বিদ্রোহের সময়কার সে অপমানের জ্বালা আমরা ভুলিনি।” হায়দার তলে তলে ইংরেজবিশেষী।

“মানুষ শাদাই হোক আর কালোই হোক তার সে অপমান আমারও অপমান, আপনারও অপমান। মানুষমাত্রেরই অপমান।” মানস দুঃখ প্রকাশ করে।

এমন সময় যুদ্ধিকার প্রবেশ। খাবার - সে নিজের হাতে তৈরি করেছে। বলে, “সালাম আলায়কুম, হায়দার ভাই। আপনারাও এখানে বদলী হয়ে এসেছেন জেনে দারুণ খুশি হয়েছি। কই, আমার ছোট বোনটি কোথায়?”

“আলায়কুম সালাম, ভাবীজী। আপনার ছোট বোনটি ছেলেমেয়েদের নিয়ে এখন জোনপুরে আমাদের গরিবখানায়। জাপানীরা ফিরে না গেলে ওরা ফিরবেন না। তবে আমি পশ্চিমবঙ্গে বদলী হয়েছি শুনে ফিরে আসতে পারেন।” হায়দার কুণ্ঠিত ভাবে বলেন।

“একটু আগে শুনছিলুম আপনি নাকি অকুতোভয়।” মানস চেপে ধরে।

“আমি অকুতোভয় বলে কি আমার বিবিও তাই? যেখানে ইংরেজ ফৌজ পর্যন্ত দৌড় দেয় সেখানে নারী কী করে নিরাপদ বোধ করবে? আর পূর্ববঙ্গে নদীনালায় সংখ্যা এত বেশী যে যুদ্ধকালে সেটা একটা মরণফাঁদ। মানুষ পালাতে চাইলে পালাবে কোন পথে? স্টীমার যদি না চলে, নৌকো যদি সরকারের হুকুমে ডুবিয়ে দেওয়া হয়? সঁাতার আমরা কেউ শিখিনি। শিখেছি ঘোড়ায় চড়তে। আমার বিবিও ঘোড়ায় চড়তে জানেন। যদিও চড়েননি বড়ো হয়ে অবধি। কিন্তু সঁাতার? কখনো কি ভেবেছি যে আমাকে বেঙ্গলে চাকরি করতে হবে? তাও পূর্ববঙ্গে? স্থখেই তো। ছিলুম। খাওয়াদাওয়ার এত স্থখ আর কোনখানে? স্বর্গ যদি থাকে তো সে এইখানে, সে এইখানে, সে এইখানে। কিন্তু কথা নেই, বার্তা নেই, জাপানী এসে সীমাস্তরের ওপারে চড়াও। কী করে জানব যে জাপানীদের দৌড় এতদূর! আগে থেকে বদলী না হয়ে থাকলে আপনাদেরও একই দশা হতো, মল্লিক।”

“আমার বিবি যে আমাকে একলা ছেড়ে আসতেন না, হায়দার! ওর



আদর্শ একসঙ্গে বাঁচা ও একসঙ্গে মরা। শুধু বাচ্চা দুটির জন্তেই যা ভাবনা। যাক, এখানে আপাতত তেমন কোনো ভয়ের কারণ নেই। আশা করি মিসেস হায়দারকে আমরা আবার দেখতে পাব।” মানস নিরাপত্তার ভরসা দেয়।

যুথিকা সকৌতুকে বলে, “আপনি তো একজন পাকিস্তানপ্রেমিক। কিন্তু জাপানীরা যদি পাকিস্তান আক্রমণ করে আপনার পরিবারের আশ্রয়স্থল হবে হিন্দুস্থান।”

“ভাবীজী, আমরা হুলতানী আমল থেকেই জোনপুরের বাসিন্দা। আমাদের প্রজারা হিন্দু। বন্ধুবান্ধবদের অর্ধেক হিন্দু। আমরা কি কখনো ভাবতে পেরেছি যে একদিন আমাদের হিন্দুস্থান ছাড়তে হবে? গান্ধী জিন্মা একমত হলে আমরা যেখানকার লোক সেখানেই হবে আমাদের হোমল্যাণ্ড। নয়তো আমরা কলকাতায় কি লাহোরে ভাগ্য অন্বেষণ করতে বাধ্য হব।” হায়দার খোলাখুলি বলেন।

“কলকাতায়!” চমকে ওঠে যুথিকা। ‘কলকাতা কি পাকিস্তানের সামিল হবে? ওমা, কোথায় যাব!’

‘হবে না? বেঙ্গল কি মুসলিম মেজরিটি প্রদেশ নয়? কলকাতা কি বেঙ্গলের রাজধানী নয়?’ হায়দারও বিস্মিত হন।

‘না, না, হায়দার ভাই। তা কখনো হতে পারে না। আমরা মুসলমানদের ভালোবাসি। তাদের জন্তে অনেক কিছু ছাড়তে রাজী আছি। কিন্তু কলকাতা কিছুতেই নয়। কলকাতা যে বাঙালী হিন্দুর মক্কা।” যুথিকার কণ্ঠে দৃঢ়তা।

“বাঙালী মুসলমানও তো কলকাতা বলতে পাগল। ওটা ওদের দ্বিতীয় মক্কা। আগে তো জাপানকে ঠেকানো যাক। নয়তো ওরাই কোর্ট উইলিয়ামে জঁকিয়ে বসবে। তাতে হিন্দুর কী আর মুসলমানের কী?” হায়দার বিমর্ষ।

“তাই যদি হয় তবে দেশভাগের দাবী তুলে ভারতের প্রতিরক্ষা ব্যবস্থাকে বানচাল করতে যাওয়া কেন? বাংলাদেশ পাকিস্তান হবে জানলে কোন্ বাঙালী হিন্দু তার জন্তে জাপানীদের সঙ্গে লড়তে রাজী হবে? যেখানে খোদ ইংরেজ সেনা দৌড় দিচ্ছে সেখানে কি মুসলিম সেনা একা ওদের রুখতে পারবে? যুদ্ধকালে যদি হিন্দু মুসলমানের এককাতা হবার প্রয়োজন থাকে

তবে শাস্তিকালেই বা সে প্রয়োজন থাকবে না কেন ? যুদ্ধ কি আর কখনো বাধতে পারে না ? সারা দেশের প্রতিরক্ষা ব্যবস্থাকে অক্ষুন্ন রেখে যদি দেশ ভাগ করতে হয় তো করা যাবে, কিন্তু এখন থেকে কেউ কথা দিতে রাজী নয়। না ইংরেজ, না কংগ্রেস। আমাদের মুসলিম বন্ধুরা আমাদের যেন ভুল না বোঝেন।” মানস ব্যথা বোধ করে।

“দেখুন, ভাই মল্লিক, আমরা এখন এমন এক যুগসঙ্কিতে পৌঁছেছি যখন আমাদের ইংরেজবর্জিত ভারতবর্ষের কথা চিন্তা করতে হবে। জাপান এদেশে খুঁটি গাড়তে পারবে না, যদিও গ্রাস করবে কতক অংশ। সেটা সাময়িক। কিন্তু ইংরেজ গেলে যে শূন্যতাটা হবে সেটা সাময়িক নয়, সেটা চিরস্থায়ী। সেইজন্তে চাই একটা চিরস্থায়ী বন্দোবস্ত। কংগ্রেস চিরস্থায়ী নয়, লীগ চিরস্থায়ী নয়, কিন্তু হিন্দু চিরস্থায়ী, মুসলমান চিরস্থায়ী। মেজরিটি চিরস্থায়ী, মাইনরিটি চিরস্থায়ী। চিরস্থায়ী মেজরিটির সঙ্গে চিরস্থায়ী মাইনরিটির এমন কী বন্দোবস্ত হতে পারে যা চিরস্থায়ী ? কেন্দ্র যদি একটাই হয় তবে আমাদের সিকিভাগ দিলে নেব না, দিতে হবে অর্ধেক ভাগ। হিন্দু মুসলমান সমান সমান। হিন্দী উর্দু সমান সমান। শাসনক্ষমতা সমান সমান। চাকরিবাকরি সমান সমান। পেট্রেনেজ সমান সমান। কিন্তু আমরা জানি যে দাঁড়িপাল্লা সমান রাখা সম্ভবপর হবে না। কার্যকালে উনিশ বিশ হবেই। তা নিয়ে ঝগড়াঝাটি বাধবেই। সেইজন্তে আমাদের মতে ইংরেজ থাকতেই দেশ ভাগাভাগি হয়ে যাওয়া ভালো। হিন্দুর ভাগে পড়বে হিন্দু-মেজরিটি প্রদেশপুঞ্জ। মুসলমানদের ভাগে মুসলিম-মেজরিটি প্রদেশগুচ্ছ। হিন্দুরাই পাবে সিংহের ভাগ। তা হলে তাদের আপত্তির কী কারণ থাকতে পারে ? শিখরা যদি আপত্তি করে তাদের সঙ্গে বোঝাপড়া মুসলমানরাই করবে সেটা হবে পাকিস্তানের ঘরোয়া সমতা। তাদের তো কোনোখানেই মেজরিটি নেই। নয়তো তাদের জন্তে আলাদা একটা শিখিহান তৈরী করে দেওয়া যেত।” হাস্যদার দুই কাঁধ তুলে অসহায়তা জানান।

“ইংরেজ থাকতেই ?” মানস পরিহাস করে। “কোথায় থাকতেই ? কে জানে এ যুদ্ধের পরিণতি কী হবে ! ইংরেজ একটা কিছু করে দিলেই যে সেটা ধোপে টিকবে তা নয়। যাদের দেশ ভাগ হবে তাদের সম্মতি থাকা চাই। নেতারা বাদরকে দিয়ে পিঠে ভাগ করিয়ে নিতে পারেন, কিন্তু যার ভাগে কম পড়বে সে কি চুপ করে সহ্য করবে ? ততদিন বাদর হয়তো জাহাজে

উঠে বলে আছে। তাকে দায়ী করতে পারা যাবে না। গান্ধীজী আগে থেকেই বলে রেখেছেন যে তিনি এর মধ্যে নেই। তিনি ক্ষমতা চান না। তিনি পিঠে খাবেন না। কংগ্রেস অবশ্য জোর করে কোনো প্রদেশকে ভারতীয় যুক্তরাষ্ট্রে আটকে রাখবে না, কিন্তু উত্তরপশ্চিম সীমান্ত প্রদেশ যদি লীগের চেয়ে কংগ্রেসকেই পছন্দ করে তাকে জোর করে লীগের কোলে তুলে দেবে না। রাজাজী কার্টাট করার কথাও বলেছেন। কংগ্রেসনেতারা বেঙ্গল থেকে কতক অংশ কেটে রাখতেও পারেন যেমন কলকাতা। যেটা হিন্দুপ্রধান। তা ছাড়া এসব সিদ্ধান্ত তো কনস্টিটিউয়েন্ট অ্যাসেম্বলিতে নেওয়া হবে, যেখানে ব্রিটিশ প্রতিনিধিরা কেউ থাকবেন না। ভারতীয় প্রতিনিধিরাই নিজেদের মধ্যে দেওয়া নেওয়া করবেন। পাকিস্তান সম্ভব হতে পারে, কিন্তু ব্রিটিশ অ্যাওয়ার্ড হিসাবে সম্ভব নয়।”

“আচ্ছা, ব্রাদার। ইংরেজ যদি না থাকে কনস্টিটিউয়েন্ট অ্যাসেম্বলি আহ্বান করবে কে? ইংরেজরা কারো উপর শাসনভার দিয়ে না গেলে গান্ধীজীর বিশ্বাস কিছুদিন অরাজকতার পর একটা প্রোভিজনাল গভর্নমেন্ট গড়ে উঠবে। কিন্তু একটা কেন? তিনটে কেন নয়? দিল্লীতে যেটা গড়ে উঠবে সেটাকে বেঙ্গল মেনে নেবে কেন? পাঞ্জাব মেনে নেবে কেন? এরাও নিজের নিজের প্রোভিজনাল গভর্নমেন্ট গড়ে তুলবে। তা হলে কনস্টিটিউয়েন্ট অ্যাসেম্বলিও একটা নয়, তিনটে। জবাবহরলাল কি মনে করেন তাঁর পরিকল্পনা অনুসারেই একটিন্না কনস্টিটিউশন তৈরি হবে? জিন্নার পরিকল্পনা অনুসারে আরো একটা নয়? কংগ্রেস কি লীগকে গায়ের জোরে হারিয়ে দিয়েছে? গান্ধীজী কি মুসলমানদের প্রেমের জোরে জয় করেছেন? বাকী থাকে ভোটের জোর। সেই ভোটও তো স্বতন্ত্র ইলেকটোরেটে বিভক্ত। কংগ্রেসের ভোটের জোরে কনস্টিটিউশন হলে সবাই সেটাকে মান্য করবে কেন? একটার জায়গায় যদি তিনটে কনস্টিটিউশন হয় তবে দুটো তো মুসলমানদের ভোটের জোরেই হবে। সে দুটো হবে পাকিস্তানী কনস্টিটিউশন।” হায়দার ধরে নেন।

“তা কেমন করে মানব?” মানস বলে, “বাঙালী হিন্দু মুসলমান যদি তৃতীয়পক্ষের প্রভাব থেকে মুক্ত হয় তবে নিজেদের বাগড়া নিজেরাই মিটিয়ে নেবে। তখন যেটা গড়ে তুলবে সেটা পাকিস্তান নয়; বাংলাদেশ।”

“তাই যদি হয় তবে বুঝ ওরা সাক্ষা মুসলমান নয়। একেই তো ওরা

উদ্ বলতে পারে না। মুসলমানদের পক্ষে কত বড়ো একটা গুনাহ।” হায়দার আফসোস করেন।

“আপনার জিন্নাও তো উদ্ নবীশ নন।” যুথিকা ফোড়ন কাটে।

“হ্যাঁ, ভাবোজী। কথাটা ঠিক। জিন্না কিসের মুসলমান? কিন্তু আর কোনো নেতাও তো নেই আমাদের।” হায়দার করুণ স্বরে বলেন।

দু'চার কথার পর হায়দার তদুগতভাবে স্মৃতিচারণ করেন। তাঁর পিতামহ ছিলেন স্বধর্মনিষ্ঠ মুসলমান, সর্বজনশ্রদ্ধেয়। হিন্দুরাও তাঁকে পীরের মতো মানতেন। একদিন তিনি বাড়ীর সবাইকে ডেকে কিছুক্ষণ প্রার্থনা করেন। তারপর খাটের উপর শুয়ে পড়ে একটা চাদর টেনে নিয়ে বলেন, ‘সারাজীবন যদি আমি পুণ্য কর্ম করে থাকি, যদি কখনো কারো অনিষ্ট না করে থাকি, যদি বান্দার মতো আল্লার আদেশ পালন করে থাকি তবে আজ এখনি তিনি এ প্রাণ গ্রহণ করুন।’ এই বলে চাদর মুড়ি দেন। মুখ থেকে চাদর সরিয়ে নিতেই দেখা গেল তাঁর দেহ পড়ে আছে, তিনি নেই।

আবেগে হায়দারের কণ্ঠ রোধ হয়ে আসে। তিনি বলেন, “হিন্দু মুসলমান সকলেই তাঁর জন্তে শোক করে। সত্যিকার ধার্মিক যে তার আত্মপর ভেদ নেই। ধার্মিক হিন্দুও তো আমি দেখেছি। তাঁদেরও আত্মপর ভেদ নেই। আমি কি বুঝিনে যে হিন্দুস্থান ছাড়লে আমার পূর্বপুরুষদের কবরকেও ছাড়তে হবে, কীর্তিকেও ছাড়তে হবে? এক কথায় অতীতকেও ছাড়তে হবে। কিসের গর্ব করবে আমার পুত্রকন্যা? অপর পক্ষে, পাকিস্তান না হলে তাদের কোনো ভবিষ্যৎ থাকবে না। কিসের স্বপ্ন দেখবে আমার পুত্রকন্যা? হিন্দুদের সঙ্গে প্রতিযোগিতায় হটে যাবে, তলিয়ে যাবে, মাথা তুলতে পারবে না! ইংরেজরা আমাদের রাজ্য কেড়ে নিলেও আমাদের কিছু সুযোগ সুবিধাও দিয়েছিল। উদ্ এখনো আদালতের ভাষা। ওরা চলে গেলে তো উদ্ও উঠে যাবে। পাকিস্তান পেলে সেখানে আমরা উদ্কেই রাজভাষা করব। নইলে উদ্র কী ভবিষ্যৎ?”

যুথিকা এর উত্তরে বলে, “তা হলের বাংলার কী ভবিষ্যৎ? আমাদেরও পুত্রকন্যা আছে, তাদের কী ভবিষ্যৎ?”

হায়দার উঠে দাঁড়ান। “বিবি এলে পরে আপনারা আসবেন একদিন।”

পাল হারবার যাদের উল্লসিত করেছিল, সিঙ্গাপুর যাদের উৎফুল্ল করেছিল, রেঙ্গুন তাদের মুখ হাসায়। তবে কি জাপানীদের লক্ষ্য বার্মার পর ভারত? না, না, ওরা চীনকেই ঘেরাও করতে চায়, তাদের লক্ষ্য চীনের দিকে। ভারতের দিকে নয়। কিন্তু একথা যারা বলে তারাও চুপি চুপি বলে যে জাপানীরা আসছে ভারত থেকে ইংরেজদের খেদিয়ে নিয়ে গিয়ে ভারত মহাসাগরের জলে ভাসিয়ে দিতে। তার পর ভারতের সিংহাসনে ভারতীয়কে বসিয়ে পূর্ব মুখে গ্রহান করতে।

জুলি তার মাকে বোঝায় জাপানীরা হচ্ছে বিজ্ঞানে যাকে বলে ক্যাটালিস্ট। সীমান্তের ওপারে ওদের উপস্থিতিটাই যথেষ্ট। ওদের সীমান্ত পার হতে হবে না। জুজুর ভয়ে এর মধ্যেই কলকাতায় ব্রাক আউট। মিভিল ডিফেন্সের ধুম পড়ে গেছে। রাস্তার ধারে শেলটার খোঁড়া হচ্ছে। এসব লক্ষণ যদি স্বাধীনতা সংগ্রামীদের কর্মতৎপর করে তবে ইংরেজদের জাপানীরা খেদিয়ে নিয়ে যাবে কেন, জুলিরাই খেদিয়ে নিয়ে যাবে। সিংহাসনে কে বসবে না বসবে শেষ পরে স্থির করলেও চলবে। এখন থেকে করতে গেলে অনাবশ্যক মতভেদ। জবাহরলালকে জুলি দেখতে পারে না। তিনি নাকি ভারতের করেনস্কি। কিন্তু ভারতের লেনিনটি যে কোন্‌খানে আত্মগোপন করেছেন তা তিনিই জানেন। কবে আসছেন সেটাও অজানা। বাবলীরা অবশ্য তাঁকে স্বীকার করতে চায় না। কমিউনিস্টদের মতে তিনি ফাসিস্ট। এ নিয়ে দুই কল্লিতে মুখ দেখাদেখি বন্ধ। বাবলীরা জাপানকে ঝুঁকবে। কারণ জাপানীরাও ফাসিস্ট। জুলিরা ঝুঁকবে না, তবে ওদের আসার আগেই কল্লা দখল করবে। ভাবনা কেবল এই যে ওরা বোকার মতো কলকাতায় বোমাবর্ষণ করে সাধারণ মানুষকে উদ্ভাস্ত করে তুলবে। উদ্ভাস্ত হলে কি মানুষ জাপানকে ক্ষমা করবে, না জুলিদের স্বাগত জানাবে?

“জাপানের পলিসি কি তোদের কন্ট্রোলে?” জুলির মা বিনীতা সিংহা উপহাস করেন। “ওদের নকশা কি ওরা তোদের দেখতে দিয়েছে? লড়াইটা তো হচ্ছে জাপানী হাই কমান্ডের সঙ্গে ব্রিটিশ হাই কমান্ডের। দক্ষিণ এশিয়া জুড়ে দাবাখেলার ছক। জাপানীরা আপাতত এগোচ্ছে তা ঠিক, কিন্তু ইংরেজরাও যে ক্রমাগতই পেছোবে তা নয়। বোমাবর্ষণের পরে যারা ভয় পেয়ে কলকাতা ছেড়ে দিল্লী, সিমলা, কাশী পালিয়েছিল তারা একে একে

ফিরছে। আরো খেতাজ সৈন্ত আসার পর থেকে হাওয়া একটু একটু করে বদলাচ্ছে। জাপানীরা হয়তো উপকূল অঞ্চলে হানা দেবে বা হামলা করবে। কিন্তু উপকূল থেকে বেশীদূর ঢুকতে ওদের সাহস হবে না। দেশটা তো মালয়ের মতো সংকীর্ণ নয়। বার্মার মতো বনজঙ্গলে ভরা নয়।”

“আমিও কি বলছি যে জাপানীরা বেশীদূর এগোবে? আমরাই বা দেব কেন এগোতে? ওদের ভূমিকা হলো পরিস্থিতিটাকে পার্কিয়ে তোলার। যেটা আমাদের একার সাধ্য নয়। পরিস্থিতিটা যেই পরিপক্ব হবে অমনি সুযোগ বুঝে আমরা পাকা আমটি পেড়ে খাব। ছেলেবেলায় পেড়েছি না— অজগর আসছে তেড়ে। আমটি আমি খাব পেড়ে। অজগর হচ্ছে জাপানী। আমটি হচ্ছে বিপ্লব।”

মিসেস্‌ সিন্‌হা মেয়ের বুদ্ধির তারিফ করে বলেন, “ইঁদুরছানা ভয়ে মরে। ঈগল পাখী পাছে ধরে। ইঁদুরছানা হচ্ছে ভীতু বাঙালী। ঈগলপাখী হচ্ছে দক্ষিণ কলকাতাভর্তি ইংরেজ ও মার্কিন সৈন্য।”

জুলি জেল থেকে ফেরার পর আরো উদ্ধাম হয়েছে। ইংরেজরা যে তাকে জেল থেকে বিনা শর্তে খালাস করে দিয়েছে এটা কংগ্রেসের সঙ্গে আলাপ আলোচনার আবহাওয়া তৈরি করার উদ্দেশ্যে নয়। দক্ষিণপন্থীরা তাই বলছে বটে, কিন্তু আসলে সেটা বন্দীদের অবাধ্যতার দরুন। সিঙ্গাপুরে পতনের পর থেকেই তারা বেপরোয়া। সরকার দুর্বল না হলে তাদের উৎপাত সহ্য করবে কেন?

সরকার কিন্তু সবাইকে মুক্তি দেয়নি। দাদাদের কেউ কেউ এখনো বন্দী। সব চেয়ে ঘাঁদের উপর সন্দেহ তাঁরা সব চেয়ে দূরে ও নির্জনে। লাহোরে বা মুলতানে। যেখানে ইংরেজ রাজের সিংহাসন অটল। জাপানীরা কি ততদূর ধাওয়া করতে পারবে? না পারলে ইংরেজ তো থেকেই গেল ভারতের এক কোণে। ইংরেজকে পেছনে রেখে জাপানী কি কোনোদিন পিছু হটবে? পান্টা আক্রমণে নাজেহাল হবে না? দাদাদের উভয়সঙ্কট। জাপানীরা ঘরে না ঢুকলে ইংরেজরা ঘর থেকে বেরোবে না। তা হলে কি জাপানীরা আদৌ ঢুকবে না? অথবা একবার ঢুকলে সমস্ত ঘরটাই জুড়ে বসবে? তখন যদি ওরা আপনা থেকে সরে না যায় ওদের সরাবে কে? মিজ বলে কি তারা নিঃস্বার্থ যিদ্ধ? জুলি যদিও সরলবিশ্বাসী তবু জাপানীদের নিঃস্বার্থ অপসরণে সন্দিহান। ইংরেজদের সঙ্গে সংঘর্ষ তো এক জায়গায় না এক জায়গায় ঘটবেই। সম্ভবত

দ্বিজীর কাছাকাছি। যেখানে ভারতভাগ্য বার বার নির্ধারিত হয়েছে। সেই কুরুক্ষেত্রে আপানীদেরও তো লোকক্ষয় হবে। ক্ষতিপূরণ আদায় না করেই কি তারা ভারত ত্যাগ করবে? না সেটা আদায় না হওয়া পর্যন্ত তাদের অকুপেশন বজায় রাখবে? কারো কাছে জুলি যুক্তিপূর্ণ উত্তর পায় না।

গণ সত্যাগ্রহের উপর থেকে তার বিশ্বাস টলেছিল। কই, জনগণ তো সাড়া দিল না? আবার কি দেবে? জোয়ার কোথায় যে দেশ উথাল পাথাল হবে? গান্ধীজীর দোড় দেখা গেছে। হাজার পচিশ লোক কারাবরণ করেছে। চল্লিশ কোটির মধ্যে হাজার পচিশ তো নশ্টি। সব ক'টা জেলও তো তিনি ভর্তি করতে পারলেন না। অবশ্য ইংরেজরা তাতেও দমত না। জেলের বাইরে বন্দীশিবির বানাত। গণ জাগরণে জুলির বিশ্বাস একদা ছিল। কিন্তু সে বিশ্বাস আর নেই। তার স্থান অধিকার করেছে সশস্ত্র বিদ্রোহ। কিন্তু সেটা তো আর প্রকাশ্যে প্রচার করা যায় না। পুলিশ তো এখনো রাজভক্ত। সৈন্যদলও তাই। ওদের কথা হলো ওরা যার নিমক খাচ্ছে তার সঙ্গে নিমক-হারামী করবে না। যত সব মাঙ্কাতার আমলের অন্ধসংস্কার! রাজভক্তির চেয়ে দেশভক্তি বড়ো কবে ওরা এটা বুঝবে? যে বোঝাতে যাবে তাকে ধরে নিয়ে গিয়ে রাজদ্রোহের দায়ে ঝুলিয়ে দেবে। যুদ্ধকালে তো সাধারণ আদালতে নয়, সামরিক আদালতে নিয়ে গিয়ে গুলী করে মারবে।

পূর্ণঘোবনা দামাল মেয়েকে নিয়ে তার মা পড়েছেন ঘোর বিপাকে। তবে জুলির একটা গুণ সে মার কাছে কিছু লুকোয় না। রাতে মার সঙ্গেই শোয়। ছেলেবেলার মতো মাকে জড়িয়ে ধরে। তার সেই 'বেবী' নামটা এখনো ঘোচেনি। সেই নামেই তিনি তাকে ডাকেন। ওকে আলাদা ঘরে শুতে দেবার পরিণাম হয়েছিল ওর বালিশের তলা থেকে রিভলভার উদ্ধার। উচ্চপর্ষায়ে তর্জনের দৌলতে আদালতে মৌপদ করা হলো না। কিন্তু বিনা বিচারে এন্দী করে রাখা হলো যতদিন না লেডী হারিটন হস্তক্ষেপ করেছেন। সেটা অবশ্য স্বকৃত্যার দত্তবিশ্বাসের উত্তোগে। তখন থেকে মেয়ে হয়েছে নজরবন্দী।

পাখী যেমন দিনভর আকাশে উড়ে বেড়ায়, সন্ধ্যায় নীড়ে ফিরে আসে, জুলিও তেমনি ব্রেকফাস্টের পর সারাদিন বাইরে ঘোরাফেরা করে রাত ন'টা নাগাদ বাড়ী ফিরে আসে। মা ততক্ষণ ওর জন্মে খাবার নিয়ে বসে থাকেন। যদি না বাইরে নিমন্ত্রণ থাকে। তার বা ওঁর বা ছ'জনের। ব্ল্যাকআউট হওয়ার পর

থেকে জুলি আরো সকাল সকাল বাড়ী ফেরে। একটু ভয়ডরও ঢুকেছে ওর মনে। ব্ল্যাক আউট তো সরকার অকারণে করছে না। না করলেই বরং অন্ডায় হতো। আর সিভিল ডিফেন্সও অহেতুক নয়। জুলিরও ইচ্ছে করে সিভিল ডিফেন্সের তালিমী নিতে। তাতে যোগ দিতে। কত মেয়ে-তালিমী নিচ্ছে, যোগ দিচ্ছে। কিন্তু তা হলে তো প্রকারান্তরে যুদ্ধে যোগ দেওয়া হয়। যেটার বিরুদ্ধে আন্দোলনে নেমে ও জেল খেটে এসেছে। “না একো জওয়ান না একো রুপেয়া” এই যার স্লোগান সে হঠাৎ ভোল বদলায় কী করে? ইংরেজ কী স্বাধীনতা দিয়েছে? নেতারা কি স্বাধীনভাবে যুদ্ধের সিদ্ধান্ত নিয়েছেন?

মা বলেন, “তুই যেমন বেবী ছিলি তেমনি বেবী রয়ে গেছিস। তিরিশ বছর বয়সেও তোর ছেলেমানুষী গেল না। ছশো বছর ধরে আমরা পর্বতের আড়ালে আছি। নাদির শাহর পর আর কেউ এদেশ আক্রমণ করেনি। এই প্রথম আমরা আক্রমণের আশঙ্কা করছি। এই যে পর্বত যার আড়ালে আমাদের সাত পুরুষ কেটেছে সে যদি সত্যি সত্যি অদৃশ্য হয়ে যায় তা হলে কী ভয়ঙ্কর কাণ্ড হবে ভেবে দেখেছিস? হিমালয় যদি হঠাৎ মৈনাকের মতো উড়ে যায় তা হলে উত্তর থেকে ঝড়ঝাঝা এসে দেশের আবহাওয়াটাকেই বদলে দেবে। দক্ষিণ থেকে মোসুমী বাতাস এসে উত্তরে চলে যাবে। বর্ষাকালে বর্ষণ হবে না। ধানগাছ শুকিয়ে মরবে। ছুঁড়ি দেখা দেবে। তেমনি ব্রিটিশ রাজ হচ্ছে আমাদের হিমালয় পর্বত। একটা পাকাপোক্ত বন্দোবস্ত না করে ইংরেজরা যদি উধাও হয় তো আমাদের কপালে আছে আবার সেই বর্গীর হান্দামা, পিণ্ডারী ও ঠগীর উপদ্রব। আবার সেই মোগল রাজপুত যুদ্ধ। মোগল শিখ যুদ্ধ। মোগল মারাঠা যুদ্ধ। হিন্দুতে হিন্দুতে যুদ্ধ। মুসলমানে মুসলমানে যুদ্ধ। সাধারণ মানুষ জেরবার হয়ে বলবে, ইংরেজ, তুমি ফিরে এস। ইংরেজ বোধহয় ফিরবে না। অতখানি প্রেঙ্টিজহানির পর কেউ ফেরে? ওই জাপানাই মোগল, শিখ, মারাঠা, রাজপুতকে একে একে হারিয়ে দিয়ে সমাগরা ভারতের অধীশ্বর হবে। জোর যার মূলুক তার। তোদের কোথায় জোর? তোরা তো এখনো, এই বিপত্তির দিনেও, একজোট হতে পারলিনে। হিন্দু মুসলমান শিখ কেউ কাউকে দেখতে পারে না। হিন্দুসমাজও ছোট ছোট গণ্ডীতে বিভক্ত। কেউ কারো হাতে জল খাবে না। অসবর্ণ বিবাহ করবে না। মুখে বলবে আমরা এক নেশন, কিন্তু কাজ দেখলে মনে হবে একশোটা নেশন কি



তার চেয়েও বেশী। নেশনবোধ তো জাগিয়েছে ওরাই। ওই ইংরেজরাই। ওরা চলে গেলে কি নেশনবোধ থাকবে? মুসলিম লীগ তো এর মধ্যেই দুই নেশনের ধুয়ো ধরেছে। খুব একটা মিথ্যে নয়। কংগ্রেসের এক নেশনটাও কি খুব একটা সত্যি? আমি বলি, পর্বতকে এখন টলাতে যেয়ো না! তোমরা যদি সহযোগিতা করতে না চাও, কোরো না। বিনা সহযোগিতায় ওরা কতদূর যেতে পারে দেখা যাক। যখন দেখবে সহযোগিতা না পেলে ওদেরই সর্বনাশ তখন ওরাই সহযোগিতার জন্তে সাধবে। তখন তোমরা একমত হয়ে স্বাধীনতা চাইবে। যদি একমত না হতে পারে তা হলে সর্বনাশটা ওদের নয়, তোমাদেরই। ওদের একটা নিজস্ব দেশ আছে, ওরা পালিয়ে বাঁচবে। তোমরা পালাবে কোথায়? হয় অরাজকতা, নয় দাঙ্গাহাঙ্গামা, নয় নতুন করে পরাধীনতা। এ ছাড়া আর কী আছে তোমাদের কপালে? শুধুমাত্র পরজাতিবিদ্বেষ নিয়ে একটা স্বাধীন রাষ্ট্র গড়ে উঠতে পারে না। কোথায় সেই স্বজাতিপ্রেম?”

একেই বলে কার্টেন লেকচার। জুলির বাবা বেঁচে থাকতে জুলির মা তাঁকে এমনি কার্টেন লেকচার শোনাতেন। তিনি তো নেই, তাঁর ছোট মেয়ের কানে এই কথাস্বতবর্ষণ। জুলি শুনতে শুনতে ঘুমিয়ে পড়ে। অর্ধেক কথা ওর কানে পশে না। কানের ভিতর দিয়ে মরমে পশা তো দূরের কথা।

“তোমার বন্ধু বাবলী আজকাল আসে না কেন রে?” মা একদিন জানতে চান।

“ওরা এখন ব্রিটিশ সাম্রাজ্যবাদীদের ছোট তরফ। কোথায় গেল বিপ্লব-চিন্তা। মওকা তো ওদের হাতের মুঠোর মধ্যে। তবু ওদের হুঁশ নেই। দেশের শ্রমিক কৃষক ওদের কাছে নেতৃত্ব আশা করে, সেটা ওরা ভুলে গেছে। ওদের কেবল একমাত্র ধ্যান রাশিয়া কেমন করে জার্মানদের ঝুঁকবে। বিদেশের ওই যুদ্ধটাই নাকি এদেশের জনযুদ্ধ। এটা কি ডাহা মিথ্যা নয়?” জুলি জিজ্ঞাসা করে।

“আমি তো শুনেছি ওরা এই সুযোগে জনগণের হাতে রাইফেল ধরিয়ে দিতে চায়। তাই যদি হয় তবে এটা জনযুদ্ধ নয় তো কী? জনযুদ্ধটা কাদের বিরুদ্ধে সেটা কিন্তু বোঝা যাচ্ছে না। জাপানীরা তো এ তল্লাটে নেই। এলে কতক লোক তো রাইফেল নিয়ে জাপানীদের দলেও ভিড়ে যেতে পারে। যাদের রাজভক্তির বালাই নেই, দেশভক্তির বালাই নেই, তাদের আছে যে-কোনো একটা যুদ্ধই জনযুদ্ধ। ধর্মের নামেও সেটা হতে পারে। অর্থের জন্তেও

হতে পারে। যে যুদ্ধ সেনাপতিদের দ্বারা নিয়ন্ত্রিত নয়, যা অপর একটি সৈন্য-দলের সঙ্গে নয়, তা তো নিরস্ত্র নাগরিকদের উপর সশস্ত্র ব্যাণ্ডিটদের হাঙ্গামাও হতে পারে। যেমন মগদের হাঙ্গামা।” মা উত্তর দেন।

“তা হলে বুঝতে পারছ আমরা কেন এখন এক পথের পথিক নই। আমি তো মনে করি বাবলী তুল পথে চলেছে। সেটাকেই বিপ্লববাদ বলে চালাচ্ছে। যেন রাইফেল হাতে পেলেই বিপ্লব হয়, রাইফেলের লক্ষ্য কে তার ঠিকানা না জানলেও চলে। আমাদের লক্ষ্য ব্রিটিশ রাজ। যার ঠিকানা দিল্লী, কলকাতা, সব বড়ো বড়ো শহর। সব বড়ো বড়ো রেল জংশন। সব বড়ো বড়ো বন্দর। ওদের লক্ষ্য যদি জাপানী আমি হয়ে থাকে তবে ওদের ফ্রন্টে যেতে হবে। জাপানীদের সঙ্গে লড়াইতে হবে। মরতে হবে। গোটাকতক জমিদার কি মহাজন মারার জন্যে অতগুলো রাইফেলের কী দরকার? আর জমিদার মহাজনরাও তো রাইফেল পেতে পারে। ওরা যুদ্ধে অর্থসাহায্য করছে না? অফিসার ক্লাস তো ওদের পুত্ররাই। ওদের সম্পত্তিতে হাত পড়লে ওদের রাইফেলের লক্ষ্য কি জাপানীরা হবে? না ওরা জাপানীদের সঙ্গে ভিড়ে গিয়ে ওদের শ্রেণীস্বার্থ রক্ষা করবে? বাবলীর সঙ্গে আমার মিল ছিল যখন আমাদের লক্ষ্য ছিল এক। এখন লক্ষ্য ভিন্ন। তাই পথও ভিন্ন। বাবলী আমাকে ভজাতে পারেনি, আমিও ওকে ভজাতে পারিনি। ও আমার প্রাণের বন্ধু, আমিও ওর। কিন্তু রুশগ্রেম আর দেশগ্রেম আজকের অবস্থায় মেলানো যায় না। বিচ্ছেদ অনিবার্ণ।” জুলি দুঃখের সঙ্গে বলে।

“দেখিস্ বিচ্ছেদ থেকে যেন বিরোধ না আসে!” মা সতর্ক করে দেন।

“আমরাও কি বিরোধ চাই? ইংরেজের সঙ্গে বিরোধই আমাদের পক্ষে যথেষ্ট বিরোধ। রাশিয়ার সঙ্গে বিরোধ আমাদের কাম্য নয়। স্বাধীন হলে আমরাও রাশিয়াকে সাহায্য করব। কিন্তু তার আগে স্বাধীন হওয়া চাই। যে নিজে পরাধীন সে পরকে সাহায্য করবে কোন্ মুখে? ওরা যে রাইফেল চাইছে সে রাইফেল নিয়ে কি ওরা সাগর পারে গিয়ে জার্মানদের সঙ্গে লড়াইতে রাজী আছে?” হেসে উড়িয়ে দেয় জুলি।

“ব্রিটিশ রাজের সঙ্গে সশস্ত্র লড়াই করতে হলে ব্রিটিশ রাজের কাছ থেকেই অস্ত্র সংগ্রহ করতে হবে। তা চুরি করেই হোক আর লুট করেই হোক আর জাপানের বিরুদ্ধে যুদ্ধের নাম করেই হোক। ওদের পথে ওরা ঠিকই আছে, বেবী। সেটা ব্রিটিশ রাজও জানেন। তাই ঝাঁকি দিয়ে রাইফেল পাওয়া

ওদের বরাতে নেই। কিন্তু তোরাই বা কী করে আশা করছি। যে জার্মানী থেকে বা জাপান থেকে শত্রু এসে তোদের হাতে পৌঁছবে? এক যদি সিপাহীরা বিদ্রোহ করে তা হলে ইংরেজের দেওয়া শত্রু ইংরেজদের বিরুদ্ধে বাগিয়ে ধরতে পারে। কিন্তু এই স্টেন গান, ব্রেন গানের যুগে রাইফেল ওদের কতটুকু কাজে লগেবে? কামানের গোলাকে কি ওরা ভয় করে না? ট্যাঙ্ক থেকে গোলা বর্ষণ হলে ওরা কতক্ষণ ঝুঁতে পারবে? আর প্লেন থেকে বোমাবর্ষণ হলে ওরা কি ছত্রভঙ্গ হবে না? যেটা সিপাহী বিদ্রোহের প্রথম শর্ত সেটা হচ্ছে সিপাহীতে সিপাহীতে একতা। হিন্দু মুসলমান শিখ সিপাহী যদি একজোট হতো তা হলে তাদের দমন করা দুঃসাধ্য হতো। কিন্তু তার যেটুকু সম্ভাবনা একশো বছর আগে ছিল সেটুকুও এখন আর নেই। সিপাহীরাও এখন হিন্দুস্থান, পাকিস্তান, শিখিস্থানের স্বপ্ন দেখছে, যদি ইংরেজ সত্যি সত্যি ভারত ছেড়ে যায়। জোড়াতালি দিয়ে একটা কাশনাল 'আমি' খাড়া করা যায়। কিন্তু পরস্পরের বিরুদ্ধে ওদের উস্কে দেওয়াও শক্ত নয়। তখন ওরাই পরস্পরকে মেরে সাবাড় করবে। বাবলীদের খীসিস যেমন অবাস্তব তোদের খীসিসও তেমনি। তোরা হু'জনেই আলেয়ার পেছনে ছুটেছিল। হু'টো হুরকম আলেয়া।" মিসেস সিন্ধা আবার এক লেকচার শোনান।

"তা বলে তো চূপ করে বসে থাকা যায় না। একটা কিছু করতে তো হবে। নয়তো তোমার ওই পর্বত আরো হু'শো বছর আমাদের বৃকের উপর জগদল পাথরের মতো চেপে বসে থাকবে। তুমি মডারেট গরের মেয়ে। ব্রিটিশ রাজের সঙ্গে তোমার লাভ-রিলেশনশিপ। আর আমি এক্সট্রিমিস্ট বাপের মেয়ে। ব্রিটিশ সাম্রাজ্যের সঙ্গে আমার হেট রিলেশনশিপ। তবে ইংরেজ জাতির সঙ্গে তা নয়। লেডী হারিংটন আমার জন্মে যা করেছেন তা কি আমি ভুলতে পারি?" জুলি আবেগের সঙ্গে বলে।

"তা হলে তোর ওটা লাভ-হেট রিলেশনশিপ।" মা স্নেহে বলেন।

"তোমার কাছে গোপন করব না, মা। ইংরেজকে মারতে আমার হাত উঠবে না। রাইফেল হাতে পেলোও না। রিভলভার হাতে পেলোও না। তবে আমি জোনু অভু, আর্কের মতো সৈনিকদের উদ্দীপনা দেব। প্রেরণা জোগাব। যদি কোনোদিন স্বযোগ মেলে। পর্বতের আড়ালে বাস করে আমি তোমার মতো শান্তিতে ঘুমোতে পারব না। অমন শান্তি যেন কবরের শান্তি।" জুলি বলতে বলতে ঘুমিয়ে পড়ে।

একদিন সৌম্য আসে দেখা করতে। এবার সে সোদপুরে উঠেছে। সেখানেই রাত কাটাবে। জুলির মা ওকে নৈশভোজনের আমন্ত্রণ জানান। তার জন্তে সে তৈরি হয়েই এসেছে। জুলিকে তো অল্প সময় পাওয়া যাবে না।

“বাবা সৌম্য, তুমি তো আমাদের পর নও। তোমার যখন খুশি তুমি এ বাড়ীতে আসবে। এখানেই উঠবে। আমরা থাকতে সোদপুর কেন? তোমাকে দেখে আমি মনে ভরসা পাই যে আমার অবর্তমানে তুমিই জুলিকে স্থপথে রাখবে। এতদিন আমি ওকে চোখে চোখে রেখেছি। আর ক’দিন পারব? এই যুদ্ধে আমার কপালে কী আছে কে আমাকে বলবে? বোমাবর্ষণ যে-কোনোদিন হতে পারে! সেই ভয়েই না ব্লাক আউট।” মিসেস সিন্‌হা অন্তরঙ্গভাবে বলেন। “অথচ কলকাতা থেকে পালাবারও জো নেই। জুলি এখান থেকে নড়বে না। অন্ধকারেই ওর আনন্দ।”

“আপনারা থাকতে সোদপুরে কেন? মাফ করবেন, মাসিমা। আমরা আশ্রমিক মানুষ, একহিসাবে শ্রমিকও বলতে পারা যায়। আমাদের অগ্রগম বা ব্রেড লেবার হলো চরকা কাটা। একসঙ্গে বসে করি, তাতে একটা কমিউনিয়নের ভাব আসে। বিশজন পচিশজন মিলে একসঙ্গে সূত্রযন্ত্র অল্পস্টান এরও একটা আধ্যাত্মিক মূল্য আছে। যদিও আমরা সবাই ঈশ্বরবিশ্বাসী নই, আমাদের মধ্যে অজ্ঞেয়বাদী ও নাস্তিকও আছেন। সত্যিকার আধ্যাত্মিকতা ঈশ্বরবিশ্বাসনির্ভর নয়। সত্যে মতি থাকলে একজন নাস্তিকও আধ্যাত্মিকতা-সম্পন্ন হতে পারেন। গান্ধীজী দশবছর আগে নাস্তিকদের অপাণ্ডিত্যেয় করতেন। এখন তাঁদের স্বাগত করেন। আগেকার দিনে বলতেন, ঈশ্বরই সত্য। ইদানীং বলছেন, সত্যই ঈশ্বর। সূত্রযন্ত্রে সকলেরই অধিকার আছে। সেই সূত্রে আমাদের সকলের কমিউনিয়ন হয়। তবে উপাসনার সময় সকলের যোগদান আবশ্যিক নয়। যাদের বিশ্বাস নেই তাঁরা সরে থাকেন। কেউ কিছু মনে করেন না। সেটাও একপ্রকার কমিউনিয়ন। পাড়ার লোকরাও এসে যোগ দেয়। যারা গান্ধীপন্থী নয় তারাও। তাঁ হলে বুঝতে পারছেন, মাসিমা, কেন আমি সোদপুর আশ্রমে উঠি। গতবারে তো আপনাদের এখানেই উঠেছিলুম।” সৌম্য সবিস্তারে বোঝায়।

“দেখছি তোমরাও একজাতের কমিউনিষ্ট।” মাসিমা পরিহাস করেন।

“কমিউনিষ্টও বলতে পারেন। শোশিয়ালিষ্টও বলতে পারেন। তবে সেই সঙ্গে একটি বিশেষণ জুড়ে দেবেন। ননভায়োলেন্ট। ওঁদের মতো আমরাও

চাই শোষণশূল সমাজ, শ্রেণীশূল সমাজ। কিন্তু রক্তশোভের ভিতর দিয়ে নয়। আমরা মানুষের প্রাণকে সব চেয়ে মূল্যবান মনে করি। প্রাণ নিয়ে নয়, প্রেম দিয়ে আমরা সামাজিক অত্যাচার দূর করতে চাই। পারব কি না জানিনে। হয়তো পারব না। সেটা আমাদের দোষ। আমাদের নীতির দোষ নয়। স্বয়ং গান্ধীজীও নিখুঁত নন।” সৌম্য স্বীকার করে।

হুড়মুড় করে জুলি এসে ঘরে ঢোকে। কথা কেড়ে নিয়ে বলে, “নিখুঁত নন তো নেতার আসন জুড়ে বসে আছেন কী করতে? ওই জাঁকালো বুদ্ধ মনুষ্যটি আরব্য উপন্যাসের সেই বুদ্ধটির মতো সিদ্ধবাদ নাবিকের পিঠে লেপটে আছেন কেন? আমরা না পারি তাঁকে সরাতে, না পারি তাঁকে বইতে। বলেন বটে কংগ্রেস থেকে নাম কাটিয়ে নিয়েছেন, চার আনা চাঁদাও দেন না। কিন্তু লোকে তো জানে, যে গান্ধী সেই কংগ্রেস, যে কংগ্রেস সেই গান্ধী। কিছুতেই যদি সিদ্ধবাদকে বুদ্ধের বাহুপাশ থেকে ছাড়াতে পারা যেত!”

ওর মা রাগ করে বলেন, “এটা কিন্তু বাড়াবাড়ি। ভুলভ্রান্তির নিন্দা করতে চাস্তো কর। দেখিয়ে দে কোন্‌খানটা ভুল। বুঝিয়ে দে কেন ভুল। তা নইলে লোকে শিখবে কী করে? তা না করে এই পার্সনাল অ্যাটাক কেন? পার্সনাল অ্যাটাকই যদি রাজনীতি হয় তবে কোন্‌ পার্সন তেমন অ্যাটাকের হাত থেকে নিরাপদ? ইংরেজ হলে বলত, এটা ক্রিকেট নয়।”

জুলি বকুনি খেয়ে সৌম্যর দিকে তাকায়। “তুমি কী বল?”

“তোমাদের মনের কথাটা তো এই যে কংগ্রেসের সঙ্গে গান্ধীজীর ছাড়াছাড়ি হয়ে যাক। সেটা ব্রিটিশ শাসকদেরও মনের কথা। গান্ধী না থাকলে কংগ্রেসের দক্ষিণপন্থীদের তাঁরা এতদিনে ভুলিয়ে নিয়ে গিয়ে থাকতেন। বামপন্থীরা দুর্বল হয়ে পড়তেন। ক্রিপসের দৌত্যের উদ্দেশ্যই ছিল নেহরুকে ও আজাদকে গান্ধীজীর হাত থেকে ছিনিয়ে নেওয়া। তাঁকে একঘরে করা।” সৌম্য উত্তর দেয়।

মিসেস সিংহা হেসে বলেন, “তার মানে কংগ্রেস নেতাদের নিয়ে ব্রিটিশ শাসকদের সঙ্গে গান্ধীজীর একটা টাগ অন্ড ওয়ার চলেছে। একবার শাসকরা চেষ্টা করেন ওঁদের কাছে টেনে নিতে। একবার গান্ধীজী চেষ্টা করেন তাঁর কাছে টেনে রাখতে। তাঁদেরও দোনোমনো যায় না। একবার যুদ্ধে যোগ দিতে লাকান। একবার সত্যাগ্রহে ঝাঁপ দেন। কখনো হিংসাবাদী,

কখনো অহিংসাবাদী। যখন যেমন তখন তেমন। গান্ধীজীকে দোষ দেওয়া বৃথা।”

“গান্ধীজী কায়মনোবাক্যে যুদ্ধবিরোধী। কংগ্রেস তা নয়। কংগ্রেসকেও দোষ দেওয়া বৃথা। সম্মানজনক শর্ত পেলো কংগ্রেস যুদ্ধে সহযোগিতা করবে। গান্ধীজীও নেতাদের সেইকথাই বলেছেন। এ জগতে কে কাকে টেনে রাখতে পারে? মাসিমা, আপনিও কি জুলিকে টেনে রাখতে পারলেন?” সৌম্যও হাসে।

“যা বলেছ। আমার এখন একমাত্র আশা ওর বর ওকে টেনে রাখতে পারবে। ও যদি কাউকে বরণ করে।” মা আড়চোখে তাকান।

জুলি রাগের ভান করে বলে, “দিস্ ইজ নট ক্রিকেট।”

ওর মা শাস্তিজল ছিটিয়ে দিয়ে বলেন, “সৌম্যকে মাত্র কয়েক ঘণ্টার জন্তে পাওয়া গেছে। বাগড়া করে যেন সময় বইয়ে না দেওয়া হয়!”

“কেন? কয়েক ঘণ্টা কেন? কয়েক দিন কেন নয়?” জুলি কৈফিয়ৎ চায়।

“ওই জাঁকালো বুদ্ধ মন্তব্যটি সিদ্ধবাদ নাবিককে যথেষ্ট সময় দিয়েছেন। আর দেবেন না বলে বন্ধপরিষ্কার। এবার তিনি নিজেই জেলে যাবেন বলে নোটিস দিয়েছেন। ওই বুদ্ধ যদি জেলে যান আমাকেও অবিলম্বে প্রাপ্ত হতে হবে। ওই বুদ্ধ পিঠ থেকে নেমে গেলে সিদ্ধবাদ মুক্ত। সিদ্ধবাদকে কেউ জেলে যেতে বলছে না। সে জেলে যাবে কেন, সে যাবে প্রাদেশিক মন্ত্রিসভায়, লার্টসাহেবদের সঙ্গে দহরম মহরম করবে। বড়লাটও তাকে তাঁর পারিষদসভায় আসন দিতে উন্মুখ। তবে তার রুচিমতো নয়। বড়লাটের তো আরো কয়েকজন পারিষদ আছেন। তাঁদের তো তিনি পথে বসাবেন না। তাঁরা আরো নির্ভরযোগ্য। তিনি হিন্দু মুসলমানে একটা ব্যালালসও রাখবেন। তাঁর হাতে দাঁড়িপাল্লা। সিদ্ধবাদ নাবিক আর সমুদ্রে ফিরে যেতে চায় না, বুদ্ধের পাল্লায় পড়ে ঢের হয়েছে। ছেড়ে দে, বুড়ো, কেঁদে বাঁচি। কিন্তু বুড়োই যে নিজের থেকে ছেড়ে দিয়ে বরাবরের মতো চলে যাচ্ছেন অকূল সাগরে। ফিরবেন কি না সন্দেহ। খেতে না পেয়ে মরে যেতেও পারেন। গুঁর আবার এক বাতিক আছে। খেতে দিলেও যাবেন না। আর এই পোড়া দেশের মন পড়ে থাকবে কারাগারে যেখানে বুড়ো দিন দিন শুকিয়ে মরছেন। সিদ্ধবাদ দেখবে তার পায়ের তলা থেকে মাটি সরে যাচ্ছে। জনগণ তার দিকে ফিরেও

তাকাচ্ছে না। জনগণের নজরে পড়ার জন্যে তাকেও বুদ্ধের অহুসরণে কারাবরণ করতে হবে। খালি পেটে তবু ছ'চারদিন থাকতে পারা যায়, কিন্তু খালি পিঠে একদিনও নয়। সিদ্ধবাদকে ঐ বুদ্ধের বোঝা পিঠে তুলে নিতেই হবে। বুদ্ধ তাকে মুক্তি দিলেও সে বুদ্ধকে মুক্তি দেবে না। যদি না বড়লাট তাকে টেনে নিয়ে মাথায় করে রাখেন ও তারই কথায় রাজত্ব চালান। বুদ্ধের হাত থেকে সিদ্ধবাদ নয়, সিদ্ধবাদের হাত থেকে বুদ্ধই চান মুক্তি। মুক্ত হয়ে তিনি একাই চালিয়ে যাবেন বুদ্ধের বিরুদ্ধে যুদ্ধ। স্বাধীনতা বলতে যুদ্ধ না করার স্বাধীনতাও বোঝায়। এইখানেই সিদ্ধবাদের সঙ্গে বুদ্ধের মতভেদ। সেটা পথভেদও বটে, কারণ একবার অহিংসা মেনে নিলে পরে আর আবালবৃদ্ধ বনিতার উপর নির্বিশেষে বোমাবর্ষণ চলে না। যেটা সিদ্ধবাদও যুদ্ধে গেলে করবে।” সৌম্য একনিঃশ্বাসে বলে যায়।

জুলির ভাবান্তর দেখা যায়। সে বলে, “তুমি কি আবার জেলে যাবার জন্যে তৈরি হচ্ছে?”

“না, আমার উপর অন্য নির্দেশ। সেবারেও অন্য নির্দেশ ছিল, কিন্তু আমার কেবলি মনে হতে লাগল জুলি জেলে গেছে, আমি বাইরে আছি, এতে আমাদের দু'জনের সম্পর্কে চিড় ধরবে। এবার বাপু আমাকে বলেছেন জেলে যাওয়াটা খুব নরম কাজ। ওর চেয়ে কঠিন কিছু করতে হবে। দুই আগুনের মাঝখানে দাঁড়াতে হবে। একদিকে জাপানী, আরেক দিকে ইংরেজ, মাঝখানে আমি ও আমার সহকর্মীরা। আমরা পালাব না, বিপদের মুখোমুখি হব। বাপু'র পণ তিন এদেশকে যুদ্ধক্ষেত্র হতে দেবেন না। কিন্তু ইংরেজ আর জাপানী মিলে যদি তা করে তবে দুই আগুনের মাঝখানে দাঁড়ানোই তৃতীয় পন্থা। আমরা দাঁড়িয়ে দাঁড়িয়েই গুলীগোলা খাব। সেই ত্যাগ ব্যর্থ যাবে না। তার থেকেই আসবে স্বাধীনতা।” সৌম্য ব্যাখ্যা করে।

জুলি একবার সৌম্যর দিকে তাকায়। একবার মায়ের দিকে। কাতর-কণ্ঠে বলে, “ও যদি আমার জন্যে জেলে গিয়ে থাকে তবে আমাকেও তো ওর জন্যে গুলীগোলা'র সামনে দাঁড়াতে হয়, মা।”

“তা কী করে হয়?” মা তো হতভম্ব।

“কেন হবে না, মা? তুমি কি জানো না আমাদের দু'জনের কী সম্পর্ক? বিয়েটা অবশ্য হতে পারছে না, যতদিন না দেশ স্বাধীন হয়।” জুলি সৌম্যর দিকে কক্ষ চক্ষে তাকায়।

“তার তো এখনো ঢের দেরি। ইংরেজকে ‘ভারত ছাড়ো’ বললেই কি সে অমনি ভারত ছাড়ছে? এটা কি একটা কথা হলো যে ঈশ্বরের হাতে বা অরাজকতার হাতে সঁপে দিয়ে যাবে। ঈশ্বর এ দায়িত্ব নিতে রাজী হবেন কেন? আর অরাজকতা তো দায়িত্বজ্ঞানবর্জিত। বাঁকা ভাষায়, সম্রাটকে বলা হয়েছে আবডিকেট করতে। সম্রাট আবডিকেট করলে তাঁর পুত্র তাঁর সিংহাসনে বসেন। এক্ষেত্রে কংগ্রেসই হবে সেই পুত্র। কিন্তু বেঙ্গল তা মানবে কেন? পাঞ্জাব তা মানবে কেন? এরাও এক এক শরিককে মসনদে বসাবে। গান্ধী মহারাজ এক একটা আপ্তবাক্য উচ্চারণ করেন আর আমরা সাধারণ মানুষ হকচকিয়ে যাই। ওদিকে জিন্নাহসহেবও প্রতিধ্বনি করেছেন, ভাগ করো আর ভাগো।” মা কোনোটাতেই কান দেন না।

“মার ধারণা তিনি পর্বতের আড়ালে আছেন ও থাকবেন। বুঝলে, সৌম্যদা, এই ধারণাও পর্বতের মতো অটল অনড়। এক জাপানীরা যদি না একে টলায় বা নড়ায়। কংগ্রেস কি পারবে? বাংলাদেশে কোথায় কংগ্রেস? তার পেছনে কি জনগণ রয়েছে? কোথায় সেই জনগণ? তুমি যদি মরতে যেতে চাও তো আমাকেও তোমার সঙ্গে সহমরণে যেতে হবে। বিয়ের জন্তে অপেক্ষা না করে।” জুলির কণ্ঠে বিষাদ।

“জাপানীদের আশা ছেড়ে দাও, জুলি। ওটা আশা নয়, আশঙ্কা। ওদের আসার আগেই পর্বতকে টলাতে হবে। যেটা হবে সেটা সারা দেশ জুড়েই হবে। যদি দেশের লোক সাড়া দেয়। কিন্তু আমাকে প্রস্তুত হতে হবে আচমকা আক্রমণের ধাক্কা সামলাতে। কারণ আমার বাস সীমান্তে। যুদ্ধ যদি বাধে আমি যেন কালাবিয়াক্কা। তুমি আমার সঙ্গে থেকে কী করবে? যদি জোন অভ্ আর্ক হতে চাও তো তোমার কর্মক্ষেত্র ওখানে নয়, যেখানে তোমার অল্পগত সৈন্তসামন্ত সেখানে। বৈচে থাকলে বিয়ের লগ্ন আসবে। আগে তো মুক্তির লগ্ন আসুক।” সৌম্য কথা দেয়।

এটাই ওদের বাগদান। মায়ের মৌন আশীর্বাদ।



## ॥ চৌদ্দ ॥

ওদের দু'জনকে কথাবার্তার নিরিবিলা দিতে জুলির মা অগ্র ঘরে যান। সেটা শোভনা দিদির ঘর।

তখন জুলি বলে, “এখানে থাকতে আমার একটুও ভালো লাগছে না, সোম্য। তুমি যদি আমাকে হরণ করে নিয়ে যেতে তা হলেই আমি স্থখী হতুম। কিন্তু জানি তোমার সে স্বাধীনতা নেই। দেশের স্বাধীনতা আগে, তোমার স্বাধীনতা পরে। কী করি? আমার কপাল।”

“কেন? তুমিও তো বিপ্লবী নায়িকা। ঘর গেরস্তালির জন্তে তোমার অবসর কোথায়? আশ্রমে থেকে কুচ্ছসাধন কারাজীবনের বিকল্প। ওখানেই বা তোমার ভালো লাগবে কেন?” সোম্য বিচলিত হয়।

“না, ঘর গেরস্তালির কথা ভাবছি। সঙ্গস্থলের কথাই ভাবছি। কিন্তু আমি জানি দেশের এই পরিস্থিতিতে সেটা সঙ্গত নয়। আমি শুধু বলতে চেয়েছি যে যাঁদের সঙ্গে একবাড়ীতে বাস করা আমার পক্ষে কষ্টকর। তাঁর বন্ধমূল ধারণা তিনি পর্বতের আড়ালে আছেন। যার নাম ব্রিটিশ রাজত্ব। ইংরেজবর্জিত ভারত যেন হিমালয়বর্জিত ভারত। অথচ আমার প্রতিদিনের ধ্যান হলো এই পর্বতকে ডাইনামাইট দিয়ে ওড়ানো। জানি তুমি এর মধ্যে ভায়োলেটের গন্ধ পাচ্ছ। কিন্তু অসতোর গন্ধ নিশ্চয়ই নয়। গান্ধীজীর সঙ্গে আমার কলহ তো এই নিয়ে। তিনি সাধুসন্তদের একজন। যেমন নানক, কবির, চৈতন্য। হয়তো বুদ্ধ খ্রীস্টের সঙ্গে একসারিতে বসবেন। কিন্তু রাজনীতিতে নামলে অমন নীতিবাগীশ হওয়া চলে না। ফল কী হয়েছে? উনি নিষ্ক্রিয়।” জুলি নালিশ করে।

“একবার যদি মেনে নাও যে নৈতিক শক্তি বলে আরো একটা শক্তি আছে আর সে শক্তি দিয়েও পর্বতকে টলানো যায় তা হলে দেখবে ডাইনামাইট ছাড়াও ডাইনামিক অ্যাকশন হয়। তার আগে তোমাকে একটা গল্প বলি। সত্যবটনামূলক। একজন আই এম. এস. ডাক্তারের মুখে শোনা। বাঙালী। তিনি তখন বিলেতে পড়াশুনা করছেন। লণ্ডনের একটি ঘরোয়া বৈঠকে দক্ষিণ

আফ্রিকা থেকে আগত গান্ধীর সঙ্গে প্রবাসী বিপ্লবী সাভারকরের বিতর্ক হয়। সেখানে আর যারা উপস্থিত ছিলেন তাঁদের একজন পরবর্তীকালের কর্নেল নাগ। সাভারকর বলেন, গান্ধী, মনে করো তোমার দিকে একটা বিষধর সাপ তেড়ে আসছে আর তোমার হাতে আছে একগাছা লাঠি। তুমি কি মারবে, না মারবে না? গান্ধী উত্তর দেন, লাঠিখানা আমি হাত থেকে ছুঁড়ে ফেলে দেব, পাছে মারতে প্রলুব্ধ হই। তা শুনে সাভারকর বলেন, গান্ধী, ধর্ম্যে তুমি আমার গুরু হতে পারো, কিন্তু রাজনীতিতে গুরু নও।” সৌম্য সেই ঐতিহাসিক কথোপকথনের মর্ম শোনায়।

“সাপকে মারব না, লাঠি হাতে থাকলে ছুঁড়ে ফেলে দেব, এতখানি ঝুঁকি নিতে আমিও তো পারব না। ব্রিটিশ সাম্রাজ্যবাদ একটা বিষধর সাপ ছাড়া কী? ভারতবাসীর হাতে লাঠি নেই, এই যা আফসোস। তা বলে কি সাপের কামড়েই মরব? অহিংসা মন্ত্রে সাপকে বশ করার ক্ষমতা কার আছে?” জুলি বিশ্বাস করে না।

“উপমাটাই ভুল। মাছ সাপ নয়। শক্তিমদে মত্ত হতে পারে। অহিংসা-মন্ত্র দিয়ে নয়, অহিংস আচরণ দিয়ে তাকে সংযত করা যায়। প্রকৃতিস্থ করা যায় বইকি। আর সেই অহিংস আচরণ নির্বৈর হলেও নির্বীৰ্য নয়। অভূতপূর্ব জনজাগরণ ঘটেছে। সহস্র সহস্র লোক কারাবরণ করেছে, শত শত লোক লাঠির বাড়ির সামনে বুক পেতে দিয়েছে। ফলে আটটি প্রদেশে আংশিক স্বরাজ সম্ভব হয়েছে। একদিন পূর্ণ স্বরাজও সম্ভব হবে। ইতিমধ্যে আরো বড়ো ত্যাগের আত্মদান আসবে।” সৌম্য স্থানান্তরিত।

“আরো বড়ো ত্যাগের আত্মদান বলতে কী বোঝায়, সৌম্য? গান্ধীজী কি তার কোনো আভাস দিয়েছেন?” জুলি জিজ্ঞাসা করে।

“যুদ্ধের মাঝখানে গণসত্যাগ্রহ মানে রাজশক্তির বিরুদ্ধে প্রজাশক্তির বিদ্রোহ। বিদ্রোহীরা যেন বলতে চায় এটা রাজ্য রাজ্য যুদ্ধ। সেই যে একটা কথা আছে রাজ্য রাজ্য যুদ্ধ হয় উলুখড়ের প্রাণ যায়। এককাল উলুখড়েরা কেউ প্রতিবাদ করেনি, অকারণে প্রাণ দিয়েছে, প্রাণদানের বিনিময়ে কিছু লাভ করেনি। এবার ওরা আর উলুখড় হতে রাজী নয়। ওরা দুই রাজ্যের মাঝখানে দাঁড়িয়ে যুদ্ধ বাধা দেবে। যুদ্ধ থামিয়ে দেবে। রাজশক্তি যদি মিটমাট চায় তো ওরাও রাজী। যদি মিটমাটই শ্রেয় হয় তবে সে রাত্তা সব সময়ই খোলা থাকবে। আর যদি মিটমাটের বদলে মারধরই রাজকীয় নীতি

হয় তবে ওরা বন্দকের সামনে বুক পেতে দেবে, বুকে গুলী খাবে, পিঠে গুলী খাবে না। কারাবরণ নয়, মৃত্যুবরণই এবারকার বৈশিষ্ট্য। এবারকার ধ্বনি ‘করেঙ্গে ইয়া মরেঙ্গে’। করব, নয়তো মরব। ফলাফল বিধাতার হাতে। রাজ-শক্তি মিটমাট করতেও পারে, না করতেও পারে, বিদ্রোহীরা যুদ্ধ থামিয়ে দিতেও পারে, না দিতেও পারে। কিন্তু স্বাধীনতার দিকে দেশকে এগিয়ে দিয়ে যাবে। তাদের ত্যাগ ব্যর্থ যাবে না। তাদের মৃত্যু তাদের অমর করবে।” সৌম্য উচ্ছ্বসিত হয়ে বলে।

জুলি ধৈর্য ধরতে নারাজ। “স্বাধীনতা আমরা অবিলম্বে চাই। তার জন্যে যদি গুলীর বদলে গুলী চালাতে হয় তাও মই। পড়ে পড়ে মার খাব কেন? আমরাও মারব।”

সৌম্য তাকে শাস্ত করার জন্যে বলে, “গান্ধীজীও অবিলম্বে স্বাধীনতা চান। তিনি তো নিজেকে দস্তুরমতো ঘৃণা করেন।”

“কেন? ঘৃণা করেন কেন?” জুলি আশ্চর্য হয়।

“দেশকে স্বাধীন করতে বেরিয়েছেন বাইশ বছর আগে। এখনো সিদ্ধিলাভ করেননি। দোষটা তিনি নিজের গায়েই টেনে নিচ্ছেন। তাঁর মতো অধীর আর কে? তাঁর মতো প্যাশন আর কার?” সৌম্যও তাঁর মতো।

“বাব্বা! বাইশ বছর! বাইশ বছরে আমিও তো বড়ী হতে চললুম। গান্ধীজীর জানা উচিত যে এই তাঁর শেষ চান্স। হয় করতে হবে, নয় মরতে হবে। এবার ব্যর্থ হলে আর বেঁচে থাকা বৃথা। নেতৃত্ব হাত থেকে কেড়ে নেওয়া হবে। এক অকৃতকার্য, অথর্ব বৃদ্ধকে দেশ আর সহ্য করবে না।” জুলি চরমপত্র দেয়।

সৌম্য আহত হয়ে বলে, “নেতৃত্ব কি তিনি কারো হাত থেকে কেড়ে নিয়েছেন যে আর কেউ তাঁর হাত থেকে কেড়ে নেবে? তোমরা নেতৃত্বের উপর জোর না দিয়ে নীতির উপর জোর দাও। তা হলে দেখবে ভারতবর্ষের মতো বিশাল দেশে—যাকে মহাদেশ বললেও চলে—জনগণকে জাগানোই হলো স্বাধীনতা সংগ্রামের প্রথম পদক্ষেপ। জনগণ যদি উদাসীন থাকে তবে সিপাহী বিদ্রোহও নিষ্ফল। যেখানে সিপাহীরাও উদাসীন বা বিদেশীর অহুগত সেখানে কয়েকটি সশস্ত্র গোষ্ঠীর গেরিলা লড়াই বিভীষিকা উৎপাদন করতে পারে, কিন্তু দিল্লীর সিংহাসন দখল করতে পারে না। কলকাতার মসনদও না। আর এলোমেলো সন্ত্রাসবাদ তো কেবল শহীদ সৃষ্টি করতে পারে, তাও সারা দেশে

সহস্রাধিক নয়। শেষ পর্যন্ত জনগণের যুগ্ম শক্তির দ্বারস্থ হতে হবেই। সেই শক্তি যখন সমগ্রভাবে জাগ্রত হবে তখন তার পরিচালনার ভার একমাত্র গান্ধীজীই নিতে পারেন, আর কেউ নয়। আর তাঁর সংগ্রামের দ্বারা অহিংসই হবে, আর কিছু নয়।”

জুলি উত্তেজিত হয়ে বলে, “মোহ! মোহ! মোহনদাসের মোহ। কোটি কোটি লোক যদি কোনোদিন জাগে তবে অহিংসার বাণী শুনবে না, যার হাতে যা আছে তাই নিয়ে ছুটে আসবে। দা, কাটারি, কুড়ুল, কাশে, কোদাল, শাবল, গাঁইতি, দুরমুস, লাঠি, সডকি, বল্লম, তীর ধনুক, ছুরি, ছোরা, খাঁড়া। মশাল হাতে যারা আসবে তারা আপিসে আদালতে আশুন ধরাবে। গাঁইতি হাতে যারা আসবে তারা রেল লাইন ওপড়াবে। বাগানের কাঁচি হাতে যারা আসবে তারা টেলিগ্রাফের তার কাটবে। কোথায় এত পুলিশ, কোথায় এত সিপাহী যে সব জায়গায় হাজির হবে, সবাইকে ঠেঁকাবে? ওদেরও তো দেশপ্রেম আছে। সটুকুও কি এতদিনে জন্মায়নি? জনগণকে যদি ডাক দাও অহিংসার মন্ত্র আওড়াতে যেয়ো না। অহিংসা পরমো ধর্ম কে না জানে। তিন হাজার বছর ধরে শুনে এসেছে। মানেও খুব। গোমাতার বেলা। অনেক আবার মাছমাংসের বেলাও। কিন্তু যুদ্ধবিগ্রহের বেলা নয়। বিদ্রোহের বেলা নয়।”

“গান্ধাজী কি তাঁর দেশের লোককে চেনেন না?” সোম্য নরম স্বরে বলে। “তাঁর চেয়ে বেশী চেনে কে? তিনি যে কেবল আদর্শবাদী তা নয়। তিনি বাস্তববাদীও। অসামরিক হিংসা খড়ের আগুনের মতো দপ করে জলে উঠে দপ করে নিবে যায়। তার পেছনে না থাকে শৃঙ্খলা, না থাকে তালিম। একটা গ্রামে মেশিন গান চললে দশখানা গ্রামের লোক উধাও হয়। কেন সরকারকে মেশিন গান চালানোর প্ররোচনা দেওয়া? তোমাদের বড়ো জোর কয়েকটা হাত বোমা আছে, রিভলবার আছে, রাইফেল আছে। কিন্তু ওদের আছে আকাশ থেকে বর্ষণ করবার মতো বোমা। কামান থেকে নিক্ষেপ করবার মতো গোলা। বোড়ার উপর চড়ে চড়াও হওয়ার জন্তে বেয়োনেট। এসব কথা চিন্তা করেই তিনি নির্দেশ দিয়েছেন অহিংসার। যেটা তিনি প্রয়োগও করেছেন হাতে কলমে। সাধারণ লোকদের নিয়ে। প্রথমে দক্ষিণ আফ্রিকায়, পরে ভারতের বিভিন্ন স্থানে। এটা দপ করে জলে উঠে দপ করে নিবে যায় না। তুষের আগুনের মতো দীর্ঘকাল জলতে থাকে। একে কেউ

জোর করে নিবিয়ে দিতে পারে না। অধিকাংশের বেলা একটু একটু করে নিবে যায়। কিন্তু সকলের বেলা নয়। সত্যিকারের গান্ধীশিগ্গরা তাঁদের অন্তরের আগুন আহিতাগ্নির মতো সযত্নে রক্ষা করেন। তাঁদের কাছে দশ বিশ বছর কিছু নয়। তাঁরা যেন বীজধান। যা ভবিষ্যতের জন্মে তোলা থাকে। প্রয়োজনের সময় বোনা হয়। মার্ক্সবাদের মতো গান্ধীবাদও একটা তত্ত্ব। তত্ত্ব বিনা বিপ্লব হয় না, সেটা সহিংসই হোক আর অহিংসই হোক। তাত্ত্বিক ভিত্তি পাকা না করে যারা বিপ্লবের আসরে নামে তারা নাটক করতে পারে, কিন্তু ইতিহাসটা তো নাটক নয়। তারা অ্যাডভেঞ্চার করতে পারে, কিন্তু রেভোলিউশন তো অ্যাডভেঞ্চার নয়। তুমি তোমার জনতাকে নিয়ে যেটা করতে চাইছ সেটা একপ্রকার জাকেরি। সেটারও মূল্য আছে। কিন্তু ফরাসী বিপ্লবের পরিণাম দেখে মার্ক্সবাদীদের শিক্ষা হয়েছে যে জাকেরি দিয়ে বিপ্লবের ফল পাওয়া যায় না। তোমাদেরও সেই শিক্ষা হবে, জুলি, যদি তোমরা ফরাসী বিপ্লবের পথ ধরো। আমরা কিন্তু আমাদের তাত্ত্বিক ভিত্তি ত্যাগ করতে পারিনে। জনগণকেও জাগাতে হবে, অহিংসাকেও কাজে লাগাতে হবে। এটা একপ্রকার ক্ষুরধার পন্থা। এ পথে ফরাসীরা বা রাশিয়ানরা চলেনি। চলেননি আমাদের পূর্বপুরুষরাও। আমরাই দুর্ভেদ্য অরণ্যে পথ কেটে চলেছি। তুমি কি সঙ্গী হবে আমাদের ?”

“তোমাদের নয়, তোমার। শুধু তোমারই। এর জন্মে আমি কতকাল থেকে অপেক্ষা করে আছি বলো তো ? তুমি যদি আমাকে আজ এখনি তোমার সঙ্গিনী হতে ডাকো আমি আজ এখনি সাড়া দিতে রাজী। তা কি তুমি করবে ? তোমার সেই ব্রতে বাধবে।” জুলি সতৃষ্ণভাবে তাকায়।

“আমাদের আশ্রমে তোমাকে মানাবে না, জুলি। আর আমাদের জেলার উপর জাপানী আক্রমণের খাঁড়া ঝুলছে। তোমাকে আমি বাঁচাব কী করে ? তোমার প্রাণ আর মান দুই বাঁচাতে হবে। বিশিষ্ট নাগরিকরা তাঁদের স্ত্রীকন্যাদের পদ্মার এপারে পাঠাচ্ছেন। তোমাকে আমি অথবা সে রকম বিপদের সন্মুখীন হতে দেব না। এটা সংসারধর্মের সময় নয়। বোরতর সংঘর্ষের সময়। যতদূর দেখতে পাচ্ছি সংঘর্ষটা ত্রিকোণ। জাপানীদের সঙ্গে ইংরেজদের, ইংরেজদের সঙ্গে ভারতীয়দের, ভারতীয়দের সঙ্গে জাপানীদের। গান্ধীজী চেষ্টা করছেন এটাকে এককোণ করতে। জাপানীদের আক্রমণের পূর্বেই ইংরেজদের সঙ্গে ভারতীয়দের সংঘর্ষ শুরু ও শেষ হয়ে যাবে। জাপানী-

দের সঙ্গে ভারতীয়দের সংঘর্ষ যাতে না বাধে তার জন্তে তিনি প্রাণপণ করবেন। যদি ইংরেজরা আগে থেকে বাধিয়ে না থাকে। বুঝতে পারছি তো, ভারতের ইতিহাসে এমন এক সন্ধিক্ষণ আর কখনো আসেনি। আমরা ইতিহাস রচনা করতে চাই। জীবন্ত ইতিহাস। হ্যাঁ, তুমিও করবে আমার সঙ্গে। কিন্তু আপাতত পৃথক থেকে। আগে তো এ পালা সাক্ষ হোক। পালাবদলের পর মালাবদল। কী বলো, লক্ষ্মিটি? পারবে না সবুর করতে?” সৌম্য জুলির হাতে হাত মেলায়।

“পারব, যদি তোমরা এই পালা এই বছরেই সাক্ষ করো। হঠাৎ একটা ঝড় তুলতে হবে। তিন চার মাস ধরে ঝড় বয়ে যাবে। ফরাসী বিপ্লবের দিন থাকে জাকেরি (Jacquerie) বলা হতো তা ছাড়া আর কী হতে পারে এদেশে এখন? হতে পারত রুশ বিপ্লবের দিন যা হয়েছিল, যদি বাবলীরা আমাদের সঙ্গে থাকত। কিন্তু ওরা তো জনযুদ্ধের নেশায় মেতেছে। যার মধ্যে না আছে জন, না আছে যুদ্ধ। আছে শুধু প্রোপাগান্ডা। যে দায় আমাদের উপর বর্তেছে ওরা তার দায়িত্ব নেবে না। ওদের মতে এটা নাকি বিপ্লবের উপযুক্ত পরিস্থিতি নয়। আমরা নাকি ভ্রান্ত। ওরাই অভ্রান্ত।” জুলি উপহাস করে।

“ওদের দিক থেকে ওরা অভ্রান্ত বইকি। রাশিয়া যদি হেরে যায় বিপ্লবের উপর প্রতিবিপ্লব জয়ী হবে। বাবলীরা বাঁচবে কিসের আশায়? ওরা যে ইংরেজের পেছনে দাঁড়িয়েছে এর কারণ ইংরেজরা রাশিয়ার পেছনে দাঁড়িয়েছে। তোমার মনে লাগছে, কারণ বাবলীও একজন বিপ্লবী নাগিকা। আমি কিন্তু ওদের কাছে কৃতজ্ঞ। ওরা যদি আমাদের সংগ্রামে যোগ দিত তবে এটাকে ওরা শ্রেণীসংগ্রামে রূপান্তরিত করত। আমরাই বোকা বনে যেতুম। আমরা তোমাদের জাকেরি সহ্য করতে পারি। নিন্দুকরা বলবে আমরা অহিংসক হয়ে হিংসার প্রশ্রয় দিচ্ছি। সে নিন্দা আমরা বহন করতে পারব। তাতে তো আমাদের সংগ্রাম লক্ষ্যভ্রষ্ট হবে না। তার জাতীয়তাবাদী চরিত্রও অক্ষুন্ন থাকবে। তবে তোমরা যদি বোমা, রিভলভার নিয়ে সংগ্রামে নামো আমরা তৎক্ষণাৎ সংগ্রাম বন্ধ করে দেব। যে ভায়োলেন্স স্বতঃস্ফূর্ত ও অসংগঠিত সে ভায়োলেন্স আমরা ক্ষমা করতে পারি। কিন্তু যে ভায়োলেন্স পূর্বকল্পিত, যেটা সুসংগঠিত সে ভায়োলেন্স আমরা সহ্য করব না। সেটাই যদি তোমাদের পছন্দ হয় তবে তোমাদের আলাদা হয়ে যেতেই হবে, জুলি।” সৌম্য কঠোর স্বরে বলে।

“তা হলে তুমি আমাকে জোন অভ্ আর্ক হতে দেবে না? আমার ছেলেবেলার সাধ কোনোকালেই মিটবে না?” জুলি অভিমানে ঠোট উলটিয়ে বলে, “এখন বুঝতে পারছি কেন জোন বিয়ে করেননি। বিয়ে করলে তো ওর স্বামী ওকে সেনাবাহিনীর সঙ্গে মিশতে দিতেন না। কিন্তু তোমাকে আমি নোটস দিয়ে রাখছি, সোম্য, বিয়ের আগে আমি দরকার দেখলে গেরিলা বাহিনী গঠন করব। ঢাল নেই, তরোয়াল নেই তো কী হয়েছে? ডেভিডের হাতে কী ছিল? গোলিয়াথকে সে মারল কী দিয়ে? গুলতি দিয়ে! তুমি ভাবছ গুলীর সঙ্গে গুলতি পেরে উঠবে কেন? ওদের আমরা গুলী চালাতে বাধ্য করব। এইখানেই আমাদের জিং। কাগজে লিখবে, গুলতি বনাম গুলী। দারুণ লড়াই। তুমি হাসছ যে! আমার গেরিলা বাহিনী ছত্রভঙ্গ হবে? আমি ধরা পড়ব, ধৰিতা হব? তা শুনে তুমি আমাকে বিয়ে করবে না? হা অদৃষ্ট!”

“যাক, ওসব বিল্ট্রী কথা মুখে আনতে নেই। মনে যদি সে রকম শঙ্কা থাকে তবে ও পথে যেয়ো না। জোন অভ্ আর্ককে তো ডাইনী বলে পুড়িয়ে মারা হয়েছিল। বীরান্ননা বলে স্বীকার করতে কয়েক শতাব্দী লেগে গেল। সন্ত বলে সম্মান করতে আরো কয়েক শতাব্দী। তোমার যদি সন্ত জুলি হবার সাধ থাকে তবে তুমি ও পথে যেতে পারো, কিন্তু তোমার গেরিলা বাহিনীর জওয়ানদের তুমি কী সাঙ্ঘনা দেবে? তারাও কি বীরপুরুষ বলে স্বীকৃতি পাবে? গেরিলা নামটার একটা মহিমা আছে। কিন্তু অবোধ দেশবাসী ওদের গেরিলা ঠাওরাবে। ওরাও যে চাঁদা তুলতে গিয়ে জোর জবরদস্তি করবে না তা নয়। ডাকাতিও করতে পারে। রোজকার খোরাকটি না জুটলে কোনো বাহিনীই যুদ্ধে নামে না। খোরাক ফুরিয়ে গেলে স্বেচ্ছায় ধরা দেয়। তখন ওরা যুদ্ধ-বন্দী বলে খোরাক আশা করতে পারে। তোমার গেরিলা বাহিনীও পেটের জালায় আত্মসমর্পণ করতে পারে। তারপরে বন্দীশিবিরে গিয়ে খোরাক পাবে। কিন্তু খোরাকের বিনিময়ে খাটুনি জোগাতে হবে। খাটুনি থেকে তুমিও যে রেহাই পাবে তা নয়। অন্টাগবার পেয়েছ। সেটা তোমার বাবা সিভিল সার্জন ছিলেন বলে। আর তাঁর প্রথম মহাযুদ্ধের রেকর্ড প্রশংসনীয় ছিল বলে। কিন্তু রাজার বিরুদ্ধে যুদ্ধ করতে গেলে সে স্ববিধাটুকু তুমি হারাবে। আরো ভয়ের কথা তোমার গেরিলা বাহিনীকে জাপানের পঞ্চম বাহিনী বলে চিহ্নিত করা হবে। মিলিটারি ট্রাইবিউনালে তোমাদের

বিচার হবে। সাজা কেমন হবে তা কি তুমি করনা করতে পারো না ? এক যদি ইংরেজরা জাপানীদের কাছে হেরে যায় তবেই তোমাদের রক্ষে। কিন্তু কয়েকটা প্রদেশ থেকে সরে যাওয়াটাই তো আখেরে হেরে যাওয়া নয়। ওরাও তো পাণ্টা আক্রমণ করতে পারে। ওদের কাছে জাপানীরা হেরে যেতেও তো পারে। তোমার পক্ষে সব চেয়ে যেটা খারাপ সেটাই ভেবে নিয়ে তোমাকে সংগ্রামে ঝাঁপ দিতে হবে। ঝাঁপ যদি না দিলেই নয়। আমাকে ঝাঁপ দিতে হবে। এটা আমার পক্ষে আড়ভেকর নয়। আমার তত্ত্বের প্রয়োগ। আমি অহিংসাবাদী। লোকে যাকে বলে গান্ধীবাদী। তোমার বেলা সে যুক্তি খাটে না। তুমি গান্ধীবাদীও নও, মার্কসবাদীও নও। দেশকে ভালোবাসো, সেই ভালোবাসাই তোমাকে জোনের মতো হতে প্রেরণা দিচ্ছে। তোমার তাত্ত্বিক ভিত্তি দুর্বল। নোমান নাগর্চনিক শক্তিও অপরাধিত। অর্থবল না থাকলে তুমি দেবী চৌপুরানীর মতো দস্যুরানীও হতে পারো।” বলতে বলতে সৌম্যর কণ্ঠরোধ হয়।

“বিয়ে করে আমি চৌপুরানী হতে পারি, তা বলে দেবী চৌপুরানী হতে যাব কোন ভুখে ? নহি দেবী, নহি আমি সামান্য মানবী। আমি মঞ্জুলিকা, আমি স্বামীনা রমণী। খুনখারাপি করব না, চুরিডাকাতি করব না, কিন্তু যদি বিয়ে কবো তবে তোমাকে আমি সারাগ্রাবন জালাব। তুমি হবে শিবতুল্য পুরুষ আর আমি হবে শ্যামাতুল্য নারী। নৃত্যপরার গরঙ্গিণী। পতি যার চরণতলে। সীতা সাবিত্রীর মতো ওটাও কি সনাতন ভারতীয় আদর্শ নয় ? উমানাথ শঙ্কর কেন, শ্যামানাথ শঙ্কর কেন নয় ?” জুলি সকৌতুকে হুধা।

সৌম্য হো হো করে হেসে ওঠে। “নটরাজ শিব কি শুয়ে শুয়ে তাণ্ডব নাচ নাচেন ? শ্যামা তাঁর তাণ্ডব সহচারী হতে পারেন। সেই অর্থে তিনি শ্যামানাথ শঙ্কর। কিন্তু সেটা বোধহয় তোমার স্বপ্নের সঙ্গে মেলে না। তুমি চাও শিবতুল্য নয়, শবতুল্য পুরুষ।”

জুলির জানা ছিল, কিন্তু খেয়াল ছিল না যে নটরাজও শিবের অণু এক রূপ। তাঁর তাণ্ডব নৃত্যের কাছে আর কার নৃত্য লাগে ! কিন্তু সৌম্য হবে নটরাজ শিব ! ভাবা যায় !

“তোমার নটরাজ মূর্তি দেখলে তো আমি ধন্য হই, সৌম্য। সামনে যা আসছে তা প্রলয়ের দিন। যুদ্ধ আর বিদ্রোহ আর বিপ্লব যেন তিন মহানদীর



মতো ছুটে আসছে ত্রিবেণীতে একাকার হতে। এমন দুৰ্যোগও আর আসবে না, এমন সুযোগও আর মিলবে না। তোমরা যদি নটরাজ শিবের মতো আত্মহারা হয়ে তাণ্ডব নাচ নাচো তা হলে আমরাও তোমাদের সঙ্গে কাল-ভৈরবের মতো তাল রেখে নাচব।” জুলি অঙ্গীকার করে।

“না, না, তোমাকে লক্ষ্মী মেয়ের মতো আত্মসংবরণ করতে হবে। আমাদের আসন্ন সংগ্রামে মেয়েদেরও একটা ভূমিকা থাকবে, কিন্তু আমরা চাইনে যে তোমরা নিহত বা ধ্বংস বা লাহিত হও। তেমন কিছু হলে আমাদের মনের জোর কমে যাবে। শত্রুপক্ষ আমাদের মনের জোর ভাঙবার হাতল পাবে। তবে ইংরেজরা সাধারণত মেয়েদের গায়ে হাত দিতে সঙ্কোচ বোধ করে। ওদের শিভালরিতে বাধে। তোমরা ওদের শিভালরির উপর নির্ভর করতে যাবে কেন? তা হলে তো ওদের মহত্বই জয়ী হবে। ওদের মধ্যে দুর্জনও তো আছে। ওরা যদি তাদের সংঘত করতে না পারে তবে অযথা একটা জাতিবৈর সৃষ্টি হবে! ওদের প্রলোভনে ফেলা আমাদের সংগ্রামের অঙ্গ নয়। আর ওদের সৈন্যদলে যেসব ভারতীয় আছে তাদের কাছে যে তোমরা মা বোনের মর্যাদা পাবে সে বিষয়ে কি তোমরা নিশ্চিত? গণ সত্যগ্রহে নারীদেরও যোগদানের অধিকার আছে। না জাগিলে সব ভারত ললনা এ ভারত আর জাগে না জাগে না। তবু যেখানে নারীর মর্যাদার প্রশ্ন সেখানে সতর্কতারও প্রয়োজন। আমি তো কোনো মেয়েকে বলতে পারব না যে সঙ্গে পটাসিয়াম সাইনাইড রাখবে। দুঃশাসনের কবলে পড়লে অমনি মুখে পুরবে। আমি বলব তেমন পরিস্থিতি এড়াতে।” সৌম্য গম্ভীরভাবে বলে।

জুলি ক্ষেপে যায়। “এই তোমাদের অহিংসা! তোমরা নরহত্যা করতে বারণ করবে, কিন্তু নারীকে বলবে আত্মহত্যা করতে! সেটা কি নারীহত্যা নয়? জওহর ব্রত করে রাজপুত নারীরা আগুনে কাঁপ দিলে তোমরা তাদের বন্দনা গাইবে। আমাদের ভুলিয়ে দেবে যে সেটাও নারীহত্যা। সহমরণ যে নারীহত্যা সেটা বোধহয় রাজা রামমোহনের আগে কারো ঘটে উদয় হয়নি। পণখৌতুক জোগাতে না পেরে কত মেয়ে যে আত্মহত্যা করেছে সেও কি আরেক রকম নারীহত্যা নয়? নারীকে আত্মহত্যার পরামর্শ দেওয়াও আইনের চোখে অপরাধ। এই একটা ভালো আইন করেছে ওরা, ওই ইংরেজরা। সত্যি, এদেশের নারীদের জন্তে ওরা যা করেছে তা আর কে কবে করেছে?

ওরা যদি সহায় না হতো রাজা রামমোহন বা বিজ্ঞানাগর বা কেশবচন্দ্র একা কী করতে পারতেন? মা যখন আমাকে একথা বোঝান তখন আমি বিনা বাক্যে মেনে নিই। আমার কথা যদি বলো আমি বরং সঙ্গে ছুরি রাখব, তা দিয়ে ধর্মকের চোখ বিঁধব, তবু পটাসিয়াম সায়ানাইড খাব না। হবে তো কারাদণ্ড। প্রাণদণ্ড তো নয়। ইজ্জৎ বজায় রেখে জেল খাটতে আমি রাজী। নরহত্যায় আপত্তি আছে, বেশ! নরহত্যা নাই বা করলুম। কিন্তু নারী-হত্যা বা নিজের হাতে নিজে করব কেন? অহিংসা বলতে কি আত্মহিংসাও বোঝায়?”

এ এক দারুণ প্রশ্ন। সৌম্য জুলির চোখে চোখ রেখে বলে, “নহ তুমি সামান্য মানবা। একদিন মহাস্বার সামনে তোমাকে নিয়ে যাব, তুমি সেকালের গার্গী মৈত্রেয়ার মতো ছরুহ সব প্রশ্ন করে তাঁকে বিষম সঙ্কটে ফেলবে। তোমাকে আমি তোমার নিজের শুভবুদ্ধির উপর ছেড়ে দেব, জুলি। স্বামীগিরি ফলাব না। তুমিও আমাকে আমার শুভবুদ্ধির উপর ছেড়ে দিয়ে। না, আমি কোনো অবস্থাতেই নরহত্যা করব না। করলে আমার সমস্ত খাঁসিসটাই কঁচো যাবে। আমি কি কেবল ব্রিটিশ সাম্রাজ্যবাদের সঙ্গেই লড়াই? আমার লড়াই সব দেশের মিলিটারি ইণ্ডাস্ট্রিয়াল কমপ্লেক্সের সঙ্গে। স্বাধীন ভারতও যদি সেই ব্যাধিতে ভোগে তার সঙ্গেও আমি লড়ব। বেঁচে থাকলে এইসব লড়াইতেই আমার জীবন কেটে যাবে। আমার কি নির্বিরোধে ধরসংসার করার জো আছে? তুমি আমাকে ঘর দিতে পারো, সম্ভান দিতে পারো, আমার বংশে বাতি জালাতে পারো, কিন্তু আমার বিবেককে শাস্তি দেবে কী করে, আমি যদি একটার পর একটা লড়াইতে জড়িয়ে না পড়ি? আমার প্রাত্যহিক জপ হচ্ছে, শান্ দাও আপনার আত্মায়, শান্ দাও, শান্ দাও অবিরাম। দেশের স্বাধীনতাই আমার জীবনের শেষ লক্ষ্য নয়, যদিও এই লক্ষ্য ভেদ করতে গিয়েই আমার জীবন শেষ হতে পারে। তুমি যার সন্ধিনী হতে যাচ্ছ সে কি তোমাকে সুখী করতে পারবে? তুমি তাকে সারাজীবন জালাবে, যা সেই তোমাকে সারাজীবন জালাবে? কে যে কার চরণতলে লুটিয়ে থাকবে তা এক হাস্যকর প্রহেলিকা। তবে আমি তোমাকে লক্ষ্মী দেখতেই ভালোবাসি, কালী দেখতে নয়। এটা বোধহয় পুরুষমাত্রেরই স্বভাব। কস্তুরবা রণরঙ্গিনী হলে গান্ধীজী কি মহাসত্যগ্রহী হতে পারতেন? কিন্তু তোমাকে আমি কস্তুরবা হতে বলব না। তুমি তুমি।”

জুলি অভিভূত হয়ে বলে, “তুমি তুমি। তুমি নরোত্তম।” সহসা সৌম্যর ধরে থাকা হাতখানি তুলে নিয়ে মুখে ছোঁয়ায়।

তখন সৌম্যকেও জুলির ধরে থাকা হাতখানি তুলে নিয়ে একই মুদ্রায় প্রতিদান দিতে হয়। সে স্বদ সমেত শোধ করে। আরেকখানি হাতে আরেকটি চুষন।

জুলি হেসে ওঠে। “তা হলে আমিও তোমার অনুসরণ করি।”

তারপর চোখের জল মুছে বলে, “শুধু আজ নয় সারাজীবন।”

নেপথ্যে জুলির মা নড়র রেখোছিলেন। তাঁর নীতি হলো, ‘দাস্ ফার অ্যাণ্ড নো ফাবদার।’ এইপর্যন্ত, এর পর আর নয়। খানাকামরায় একটা ঘণ্টা ছিল। সেটা বাজলে বুঝতে হয় যে খানা তৈরি। সেটা বেজে ওঠে।

খাবার টেবিলে বসে মা বলেন মোলায়েমভাবে, “এখন তো আমি তোমাদের দু’জনের মা। আমার কথা মন দিয়ে শোন।”

শোনবার জন্তে দু’জনেই উৎকর্ষ। আবার এক কাটেন লেকচার।

“আমি রাজনীতি বুঝিনে। তবে বয়স তো হয়েছে। তোমাদের মতো ছেলেমানুষ তো নই। ইংরেজকে তোমরা যত তুচ্ছ মনে করো সে তত তুচ্ছ নয়। আর জাপানীকে তোমরা যত উচ্চ মনে করো সেও তত উচ্চ নয়। জাপানকে তো আরো একটা ফ্রণ্টে লড়তে হচ্ছে। সেটা আমেরিকান ফ্রণ্ট বা প্যাসিফিক ফ্রণ্ট। তার এত বল কোথায় যে সে ইংরেজের হাত থেকে ভারতকে কেড়ে নেবে? আর ওদের দু’পক্ষের কাডাকাড়ির মাঝখানে ঝাঁপ দিয়ে তোমরাই বা ঘোলা জলে মাছ ধরতে যাচ্ছ কোন্ হিসাবে? ওদের যেটা দুর্ধোগ তোমাদের সেটা সুযোগ। এটা কি একটা গুয়ুক্তি, না একটা দুর্বুদ্ধি? সেই যে বলে, চাষী, এইবেলা নে ঘর ছেয়ে!” মা সেটা মনে করিয়ে দেন।

সৌম্য নীরবে শুনে যায়। জুলিই উত্তর দেয়। “চাষী, এইবেলা নে ঘর ছেয়ে, একথা হ’ল বলে, তারাই আবার একথাও বলে যে, রাজায় রাজায় যুদ্ধ হয় উলুখড়ের প্রাণ যায়। লড়াই করবে ইংরেজ আর জাপানী, প্রাণ যাবে বাঙালীর! কেউ মরবে বিমানের বোমায়, কেউ মরবে কামানের গোলায়, কেউ মরবে খোরাকের বিনাশে, কেউ মরবে ঘরবাড়ীর ধ্বংসে। এতে লাভটা হবে কার? যুদ্ধে জিতে ইংরেজ তো আরো দু’শো বছর খুঁটি গেড়ে বসবে। কী করে তুমি হটাৎ ওদের? না তুমি চাও ওরা হিমালয়ের মতো অটল হয়ে

বিরাজ করুক অনন্তকাল ? আমার জন্মের আগে থেকেই আমাদের দেশের নেতারা দাবী করেছেন যে স্বরাজ আমাদের জন্মস্বত্ব। আমরা তো নতুন কোনো দাবী করছি নে। ইংরেজরা যদি এটা সময় থাকতে মেনে নিত তা হলে তো কেউ বলত না, চাষী, এইবেলা নে বর ছেয়ে। জাপানীরা যে বার্মা দখল করেছে এটা কি ইংরেজের দোষে না আমাদের দোষে ? ওরা যদি এর পর পূব বাংলা দখল করে নেয় সেটাও কি ইংরেজের দোষে না আমাদের দোষে ? আমরা যদি উলুখড়ের মতো মরতে না চাই, সময় থাকতে ঝাঁপ দিয়ে পড়ি, করি না হয় মরি, সেটা কি ইংরেজের দুর্যোগের অত্যাচার স্বযোগ নেওয়া, না আমাদের দুর্যোগের অত্যাচার প্রতিবিধান করা ? ওরা বলবে এটা পলিটিকাল অপরাধনিজম। আমরা বলব তোমরা মালয়ীদের মতো, বর্মীদের মতো, আমাদেরকেও নেকড়ের মুখে ফেলে দৌড় দেবে, সেটাও কি মিলিটারি অপরাধনিজম নয় ? চাচা, আপনা বাঁচা এই যাদের যুদ্ধের নীতি তারা কোন্ মুখে আমাদের দোষ ধরবে ? না, মা, আমরা স্ববিধাবাদী নই। আমরা সংগ্রামে নামব না, যদি মিটমাট হয়ে যায়।”

## ॥ পনেরো ॥

একদিন ‘স্টেটসম্যান’ পত্রিকার জন্ম মৃত্যু বিবাহের কলমে এনগেজমেন্টের নিচে চৌধুরী ও সিন্হা দেখে মানস কোতুহলী হয়। তার পর চেয়ার থেকে লাফ দিয়ে উঠে সহর্ষে চিৎকার করে, “জুঁই ! জুঁই ! অসম্ভব ! অলৌকিক ! এ কখনো সত্য হতে পারে না। আমি বিশ্বাস করিনে। তুমি করো ? করো তো এছুনি মিষ্টির অর্ডার দাও।”

মৃথিকা কাগজখানা কেড়ে নিয়ে চোখ বুলিয়ে বলে, “ওমা, আমি কোথায় যাব ! সৌম্য চৌধুরী আর মঞ্জুলিকা সিন্হা। এ রকম মানিক-জোড় কি ছুনিয়ার আর একটি আছে ? ওরাই। ওরাই। আমার মন বলছে ওরাই। হি হি হি হি ! কী আনন্দ ! কী আনন্দ ! মিষ্টি পরে হবে খন। এই মুহূর্তেই একটা গ্রীটিংস টেলিগ্রাম পাঠিয়ে দাও।”

“একটা নয়, দুটো। দুই ঠিকানায়। সৌম্যদা কি এতদিন কলকাতায় বসে আছে? নিজের আশ্রমে ফিরে গিয়ে সংগ্রামের জন্তে-তৈরি হচ্ছে। ওর সামনে আরো একটা এনগেজমেন্ট। সেটা স্বত্বের সঙ্গে। করেছে ইয়া মরেন্কে।” মানস গম্ভীরভাবে বলে।

তার মনে পড়ে যায় যে এই পদটি সে তার ছেলেবেলার এক পুরস্কার সভায় উচ্চারণ করেছিল। তার উপর বরাত দেওয়া হয়েছিল টেনিসনের ‘চার্জ অফ লাইট ব্রিগেড’ আবৃত্তি করে শোনানোর।

“Theirs not to reason why,  
Theirs but to do or die”.

তা শুনে যুথিকা বলে, “গান্ধীজী দেখছি টেনিসনের কাছ থেকে ওটা পেয়েছেন। তা হলে ভারতের স্বাধীনতা সংগ্রামে টেনিসনের দান আছে। কিন্তু ভাবতেই পারা যায় না যে লাইট ব্রিগেডের মতো সৌম্যদার দল যুদ্ধক্ষেত্র থেকে ফিরে আসবে না। বেচারি জুলি পথ চেয়ে বসে থাকবে।”

“জুলিও তো একই পথের পথিক। যদিও অহিংসা মানে না। সেও করবে না হয় মরবে। বেঁচে থাকলে তো বিয়ে হবে! ভাবতে গেলে মনটা উদাস হয়ে যায়। আমাদের প্রত্যেকেরই কিছু না কিছু করা উচিত, কিন্তু না করলে মরা উচিত নয়। লাইট ব্রিগেডের যা কত’ব্য আর-সব সৈনিকেরও কি তাই কত’ব্য? লাইট ব্রিগেডে তো পাঁচশো না ছ’শো জন মাত্র সৈনিক ছিল। গান্ধীজী বলেছেন সরকারী কর্মচারীদের চাকরি ছাড়তে হবে না। স্বাধীনভাবে যে যার কত’ব্য সম্পাদন করবে, যেমন করতেন মহামতি রাণাডে। তিনিও বিচারপতি ছিলেন। নির্ভীক, স্বাধীনচেতা।” মানসেরও সেই আদর্শ।

“তোমার কাছে গান্ধীজী সেইটেই প্রত্যাশা করেন। একা একা পদত্যাগ নয়। কিন্তু তোমার যা স্বভাব। তুমি যুদ্ধের বোড়া। যুদ্ধ হচ্ছে শুনলে স্থির থাকতে পারবে না। গণ সত্যগ্রহণ তো একপ্রকার যুদ্ধ। যুদ্ধের মাঝখানে যুদ্ধ। এবার পোলাণ্ডে নয়, ফ্রান্সেও নয়, ভারতের পূর্বপ্রান্তে নয়, সব জায়গায়! কী করে, তুমি আপনাকে সামলাবে? আর আমিই বা তোমাকে সামলাতে পারব কী করে? সারা রাত জেগে বারান্দায় পায়চারি করবে। বাইরের লনেও। যুদ্ধের বোড়াকে আঙাঝলে বেঁধে রাখলে যা হয়।” যুথিকাও মানসের দশা দেখে মনে কষ্ট পায়।

মানস আত্মস্থ হয়ে বলে, “যুদ্ধের ঘোড়ার প্রাণের মায়া থাকে না। যার থাকে সে ঘোড়দৌড়ের ঘোড়া বা ঘোড়ার গাড়ীর ঘোড়া বা ঘোড়সওয়ারের ঘোরাফেরার ঘোড়া বা সওদাগরের মালবাহী ঘোড়া বা পশ্চিম দেশের চাবীর লাঙল টানা ঘোড়া। আমার প্রাণের ভয় আছে। আমার মতো লোকের জন্তে টেনিসনের ‘ডু অর ডাই’ বা মহাত্মার ‘করেঙ্গে ইয়া মরেঙ্গে’ নয়। যাদের জন্তে তারা ওই সৌম্যদা আর জুলি। সৌম্যদা তো বিশ বছর ধরে তালিম নিয়েছে। মাঝে মাঝে জেলে গিয়ে তার পরের ধাপটার জন্তে মনটাকে তৈরি করেছে। ওকেই বরং বলকে পারো যুদ্ধের ঘোড়া।”

“আর জুলি?” যুথিকার চোখে শঙ্কা।

“জুলির স্বামী বেঁচে থাকলে ও তোমারই মতো ঘরসংসার করত। মরণের মুখে পতঙ্গের মতো ছুটে যেত না। কিন্তু এ সংসারে কে আছে ওর, যার জন্তে ও বাঁচতে চাইবে? ওই সৌম্যদাই ওর একমাত্র স্বজন। সৌম্যদার যদি মরণ হয় জুলিরও সহমরণ হবে। ভগবান না করুন।” মানস তাড়াতাড়ি জুড়ে দেয়।

“ভগবান না করুন।” যুথিকার চোখ ছলছল করে।

“তবে ওদের এন্‌গেজমেন্টটা আশাপ্রদ! মরেন্দের আগে ওরা দু’বার ভাববে। করেন্দের বেলা ওরাও ভেবে চিন্তে করবে, যাতে মরেন্দের অনিবার্য না হয়। সৌম্যদা কখনও মাহুষ মারবে না, এটা আমি লিখে দিতে পারি। কিন্তু জুলি যদি গুলী চালায় আমি আশ্চর্য হব না। ওর দাদারা সশস্ত্র বিদ্রোহে বিশ্বাসী। জওয়ানদের সঙ্গে ওদের যোগাযোগ আছে। সেইসূত্রে অস্ত্র সংগ্রহ করা অসম্ভব নয়। জাপানীরাও অস্ত্র জোগাবে। এতদিনে কি আকিয়াব থেকে কক্স বাজারে হাতিয়ার এসে পৌঁছয়নি? অস্ত্রের জন্তে আজ আর জার্মানীতে বা জাপানে যেতে হয় না। অস্ত্রাগার লুণ্ঠনের প্রয়োজন হয় না। জাপানীরা যদি সত্যি সত্যি চট্টগ্রাম অধিকার করে তো গোটা অস্ত্রাগারটাই জুলির দাদাদের। যদি না জাপানীরা বিরূপ হয়।” মানস সংশয় প্রকাশ করে।

“কেন? বিরূপ হবে কেন?” যুথিকা বিস্মিত হয়।

কারণ জাপানীরা তো ফিলানথ্রোপিস্ট নয়। যে ভুলটা দাদারা করেছেন। যে হাতিয়ার একদিন ওদের বিরুদ্ধে ব্যবহার করতে পারা যাবে সে হাতিয়ার ওরা কি সহজে হাতছাড়া করবে? তার আগে ভালো করে বাজিয়ে

নেবে কে আন্তরিকভাবে জাপানের শিবিরে, কে তা নয়। ওরাও হাড়ে হাড়ে সাম্রাজ্যবাদী। তাঁবেদার ছাড়া আর কাউকে ওরা অস্ত্র জোগাবে না। নিরঙ্কুশ স্বাধীনতা জাপানের সৌজন্তে হবার নয়।” মানস নিঃসংশয়।

যুথিকা আশ্চর্য হয়। “জুলিরা কি সেটা বোঝে না?”

“ওদের থীসিস হলো অস্ত্র বিনা স্বাধীনতা হয় না। আর অস্ত্রের জন্তে যদি শয়তানের কাছে যেতে হয় তো তাও সহি। শয়তানের কাছ থেকে কিছু পেতে হলে তাকেও কিছু দিতে হবে। শয়তান একদিন চেয়ে বসবে আমদানী রফতানীর অবাধ অধিকার। যেটা ইস্ট ইণ্ডিয়া কোম্পানী চেয়েছিল মীর জাফরের কাছে। তেমনি জাপানও আসবে বণিকের মানদণ্ড হাতে। দাদারা কি এটা বোঝেন না? বোঝেন ঠিকই। কিন্তু কী করবেন? ওদের থীসিস তো ওঁরা পান্টাবেন না। পান্টালে গান্ধীর নেতৃত্ব মেনে নিতে হয়।” মানস একটু খেমে বলে, “আমি যতদূর বুঝি ওঁরা বসে আছেন জাপানীরা কবে আসবে তারই অপেক্ষায়। কিন্তু তিন মাস কেটে গেল জাপানীদের সাড়া শব্দ নেই। জাপানীরা কবে আসবে, আদৌ আসবে কি না কেউ জানে না, কেউ বলতে পারে না। সুতরাং দাদারা আপাতত নিষ্কর্মা। করিংকর্মা তা হলে কে? ওই অহিংসাবাদী গান্ধী বুড়োই। উদ্যোগ যা নেবার উনিই নেবেন। ইনিশিয়েটিভ এখন ওঁরই হাতে। কংগ্রেসের জন্তে সবুর না করে উনি একাই এগিয়ে যাবেন। ইতিমধ্যে নেহরুকেও ডেকে নিয়ে বুঝিয়েছেন যে রুজভেন্টের মুখের দিকে তাকিয়ে থেকে কোনো ফল নেই। চার্চিলের স্বমতি হবে না। নেহরুও এখন একমত। এর পরে কংগ্রেসের অত্যান্ত নেতারাও একমত হবেন। পিছুটান ধাঁদের আছে তাঁরা তো নেতৃত্ব দিতে পারবেন না। তাঁরা পেছনে পড়ে থাকবেন। চুংথ হয় রাজাজীর জন্তে। তিনি যে জেলকে ভয় করেন তা নয়। কিন্তু তাঁর বিশ্বাস মুসলমানদের যদি পাকিস্তানের আশ্বাস দেওয়া হয় তবে তারা হিন্দুদের সঙ্গে মিলে ইংরেজদের উপর চাপ দেবে আর তাদের সেই মিলিত চাপের কাছে চার্চিল মাথা নত করবেন। তার মানে একদল যেমন জাপানীদের অপেক্ষায় নিষ্কর্মা হয়ে থাকবেন আরেকদল তেমনি মুসলমানদের অপেক্ষায়। পাকিস্তানের আশ্বাস পেলেই যে মুসলীম লীগ কংগ্রেসের সঙ্গে হাত মিলিয়ে ইংরেজের উপর চাপ দেবে তেমন কোনো পূর্বলক্ষণ দেখা যাচ্ছে না। ইংরেজরাও বলে রেখেছে যে কংগ্রেস লীগ একসঙ্গে চাইলেও তারা যুদ্ধকালে ক্ষমতার হস্তান্তর করবে না। যেখানে ক্ষমতা

হস্তান্তরের বিন্দুযাত্র সম্ভাবনা নেই সেখানে পাকিস্তান মেনে নিয়ে লাভটা কী হবে ? লীগপন্থীরা কি গণ সত্যাগ্রহে যোগ দেবে ? চাপ আর কী ভাবে দিতে পারা যাবে ? মাঝখান থেকে লীগপন্থী মুসলমানদেরকে কংগ্রেসপন্থী মুসলমানদের উপর জিতিয়ে দেওয়া হবে। কংগ্রেস তার স্থপরীক্ষিত মিত্রদের হারাতে। গণ সত্যাগ্রহে একটিও মুসলমান সহযোগী হবে না। গান্ধীজীর পক্ষে কত বড়ো ব্যর্থতা ! কংগ্রেসের পক্ষে কত বড়ো দুর্বলতা !”

যুথিক। সব শুনে বলে, “জুলি যদি শশস্ত্র বিদ্রোহের অপেক্ষায় বসে থাকে তবে তাকেও নিকর্ম্য হয়ে বসে থাকতে হবে। বাবলীর সঙ্গে ওর কোনো তফাৎ থাকবে না। এখন দেখা যাক জাপানীরা কী করে। যদি গান্ধীজীর আন্দোলন শুরু হওয়ার আগে জাপানীদের আক্রমণ শুরু হয়ে যায় তবে কিন্তু জুলিই সক্রমক, যদিও অহিংসক নয়। জাপানীদের সাড়াশব্দ নেই বলে কি নিবিকার থাকতে পারি ? কলকাতা থেকে পলাতকের যাত্রা এখনো থামেনি। লোকে পা দিয়ে সরকারের বিপক্ষে ভোট দিচ্ছে। স্বয়ং লাটসাহেব হস্তদস্ত হয়ে জেলায় জেলায় প্রচারকার্য চালিয়ে বেড়াচ্ছেন। এই তো সেদিন আমাদের এখানেও সভা করে সবাইকে অভয় দিয়ে গেলেন। বলে গেলেন মিস্টার হিটলার উইল বি সাউণ্ডলি ডিফিটেড। ওদিকে চাটিলও বলছেন হিটলার ফার্স্ট। তার মানে হিটলার হেরে গেলে জাপানও হেরে যেতে বাধ্য। তখন বার্মা, মালয় ইত্যাদি ফিরে পাওয়া যাবে। ইতিমধ্যে ভারতের একাংশ যদি বেদখল হয়ে থাকে তবে সে অংশও। কথা শুনে গা জলে যায়। ভারতের একাংশ বেদখল হলে তোমরা তো পালিয়ে বাঁচবে, আমরা বাঁচব কী করে ? সৌম্যদা তো কাশাবিন্যাস্তার মতো মৃত্যুবরণ করবেই। যদি না এক হাতে জাপানীদের ঠেকায়, আরেক হাতে ইংরেজদের। জুলি যদি কলকাতায় বসে না থেকে সৌম্যদার সঙ্গে ওর কর্মস্থানে যেত তা হলেই জানতুম যে ও সত্যিকার সহধর্মিণী। কিন্তু তার জন্যে চাই শুধু এন্‌গেজমেন্ট নয়, বিয়ে। সেটা তো হচ্ছে না। এই যা দুঃখ।”

ইতিমধ্যে তিনজন মিলিটারি অফিসারও এখানে এসে সভা করে গেছেন। নেভীর প্রতিনিধিটি পশ্চিমা মুসলমান, আর্মিরটি শিখ, এয়ার ফোর্সেরটি পাঞ্জাবী হিন্দু। তাঁর মা বাঙালী। ছেলেমানুষ। তাঁকে দেখে যুথিকা বলে ওঠে, “বাছা রে !” কিন্তু সঙ্গে সঙ্গে গর্বও বোধ করে। ‘বাঙালী নহে খর্ব।’ তিন মূর্তিও অভয় দিয়ে গেলেন যে ভারত এখন লড়তে প্রস্তুত। বার্মার মতো



অশ্রুত নয়। যুদ্ধক্ষেত্রে হিন্দু মুসলমান শিখ ভেদ নেই। অসামরিক জনগণ যেন পেছনে দাঁড়ান। হোম ফ্রন্ট মজবুত রাখেন।

ডিফেন্স বলতে এতকাল বুঝিয়েছে মিলিটারি ডিফেন্স। ইদানীং সিভিল ডিফেন্সেরও নাম শোনা যাচ্ছে। বিমান থেকে যখন বোমা পড়বে তখন সাধারণ পথচারীর জন্তে চাই নিরাপদ আশ্রয়। মাটি খুঁড়ে আশ্রয় বানাতে হবে। লণ্ডনের মতো শহরে আগারগ্রাউণ্ড রেলওয়ে আছে। বহু লোক তার প্ল্যাটফর্মে গিয়ে আশ্রয় নিতে পারে। কলকাতায় তেমন কিছু নেই। সেখানে অগ্নি ব্যবস্থা। সাইরেন বাজলেই গর্তে ঢুকতে হবে। সাইরেন থামলে গর্ত থেকে বেরোনো চলবে। ইতিমধ্যেই কলকাতায় এয়ার রেডস প্রিকশনস বিভাগ সংগঠিত হয়েছে। সিভিল ডিফেন্স বলতে আরো কিছু বোঝা। চোর ডাকাতের উৎপাত বড়ে যেতে পাবে। পথ ঘাট যখন অন্ধকার। ঘরে ঘরে নিশ্চিন্দা। উৎপাত রোধ করাব জন্তে পুলিশই যথেষ্ট নয়। হোম গার্ডস দরকার। কলকাতায় তার ব্যবস্থা হয়েছে। কলকাতার বাইরে বোমা বর্ষণের আশঙ্কা ক্ষাণ। তবু বলা তো যায় না। যুদ্ধ বেধে গেলে আতঙ্ক ছড়িয়ে পড়বে। প্যানিক থেকেও নাগরিকদের রক্ষা করা চাই। সিভিক গার্ডস দরকার।

পুলিশ থেকে জঙ্গ সাহেবের কাছে অন্তরোধ আসে। তিনি যেন সিভিল ডিফেন্সের জন্তে সভার সভাপতিত্ব করেন। মানস ভাবনায় পড়ে। নাগরিক হিসাবে এটা তারও কর্তব্য। সরাসরি ‘না’ বলতে পারে না। কিন্তু দেশের নেতারা যখন দেশের লোককে বলছেন সিভিল ডিস্‌বিয়োল্‌সের জন্তে তৈরি হতে তখন সরকার থেকে বলা হচ্ছে সিভিল ডিফেন্সের জন্তে তৎপর হতে। লোকে কার কথা শুনবে?

“উল্খড়কে আত্মরক্ষা করতে বলবে এক বন্ধু। জাপানীদের হাত থেকে। আর উল্খড়কে আত্মসম্মান রক্ষা করতে বলবে আরেক বন্ধু। ইংরেজদের বিরুদ্ধে মাথা তুলে। দুই বন্ধুর মধ্যে মনোমালিঙ্গ দেখা দেবে না তো?” মানস-স্বধায় যুথিকাকে।

“আমি তো তার কোনো কারণ দেখছি। এটাও সিভিল ওটাও সিভিল। যারা আত্মরক্ষা করতে শিখবে তারাও একহিসাবে সৈনিক হতে শিখবে। শহর ছেড়ে পালিয়ে যাবে না। গর্তে ঢুকলেও কয়েক মিনিট পরে গর্ত থেকে বেরিয়েও আসবে। আর যারা সত্যাপ্রহ করবে তারা তো

অহিংসাবাদী সৈনিক ছাড়া আর কিছু নয়। তোমাদের দুই বন্ধুর কাজ পরস্পরবিরোধী হলে তো মনোমালিন্য দেখা দেবে। “যুথিকা আশ্বাস দেয়।

সভায় বেশ লোকসমাগম হয়েছিল। শোনা গেল সিভিল ডিফেন্সের জন্তে সময় দিতে পারেন এমন একদল নির্ভাবান কর্মীর প্রয়োজন। আগুন লাগলে তাঁরা আগুন নেবাবেন, মাছুষ জখম হলে বা মারা গেলে তাঁরা স্ট্রেচারে করে হাসপাতালে নিয়ে যাবেন, আত্মীয় স্বজনদের খবর দেবেন, এমনি অনেক রকম কর্মের ভার তাঁদের উপর বর্তাবে। যারা কর্মী হতে পারবেন না তাঁরা সর্বতোভাবে সহযোগিতা করবেন। নিশ্চিন্দীপের সময় একটি ঘরেও যেন আলো না জলে।

মানসও সভার উদ্যোক্তাদের সঙ্গে তার কর্তৃত্ব মেলায়। পালিয়ে গিয়ে ক’জন এত বড়ো একটা শহরকে খালি করে দিতে পারবে? বেশীর ভাগই তো নানা জীবিকায় নিযুক্ত। যারা পালিয়ে যাবে তাদের বাড়ীতেও কি আগুন লাগবে না? কে সে আগুন নেবাবে? তাদের সম্পত্তিও কি লুট হবে না? কে তাদের সম্পত্তি আগলাবে? এমনিতেই পুলিশের যথেষ্ট কাজকর্ম। পুলিশের উপর সিভিল ডিফেন্সের ভার চাপালে ওরা ওদের স্বাভাবিক কাজকর্ম করবে কখন? পুলিশের থেকে আলাদা করে একটা সংগঠন থাকা উচিত। সেটা পাবলিকের আয়ত্তাধীন হলেই ভালো হয়।

পুলিশ সাহেব তো এতক্ষণ আকারে ইজিতে তারিফ জানিয়েই যাচ্ছিলেন। কিন্তু শেষের উক্তিটির বেলা তাঁর মুখভাবে আপত্তি ব্যঞ্জিত হয়। মানস তা অহুমান করে ভাষণ সংক্ষেপ করে। সভাভঙ্গের পর পুলিশ সাহেব এসে তার ভাষণের তারিফ করে বলেন, “পাবলিকের আয়ত্তাধীন মানে তো পলিটিসিয়ান-দের আয়ত্তাধীন। আর পলিটিসিয়ান মানে তো কংগ্রেসম্যান। ওদের যা মেজাজ ওরা আমাদের ভারতছাড়া করবে। আমাদের জায়গায় যখন জাপানীরা এসে বসবে তখন নিজেরা কুকুরতাড়া হবে। ওদের ধারণা ওরা নাকি এক নেশন। হা হা হা হা! পেশাওয়ারের পাঠান আর তামিল ব্রাহ্মণ এক আসনে বসে একই রকম খাদ্য খাবে! হো হো হো হো।”

পুলিশ সাহেব গান্ধীজীর মহত্ব মানেন। “তাঁর সব ক’টা আইডিয়াই সঠিক কিন্তু তিনি দু’শো বছর আগে জন্মেছেন। তাই শেষপর্যন্ত ব্যর্থ হবেন। এ দেশটা তাঁর দেশ হতে পারে, এ যুগটা তাঁর যুগ নয়। এমন মানুষকে নিয়ে কী করা যায়, বলুন তো? ঠুকে জেলে পুরলে উনি অনশনে প্রাণত্যাগ

করবেন। ঠুকে বাইরে রাখলে উনি বিদ্রোহের ডাক দেবেন। আপসের চেষ্টা কি কম হয়েছে? কিন্তু উনি চান পূর্ণ স্বাধীনতা। তাও আজ এফুনি। জাপান ওদিকে ছেঁ। মেয়ে কেড়ে নেবার জন্তে ওং পেতে বসে আছে। তখন কোথায় ইণ্ডিয়ান নেশন, কোথায় তার প্রতিনিধিদের কংগ্রেস।”

মানস নীরবে শুনে যায়। বিদায়কালে জানায়, “আপসের চেষ্টা আরো একবার করতে হবে। আপনাদের আক্ষরিক অর্থে ভারত ছাড়তে কেউ বলছেন না। শুধু ছাড়তে বলছেন রাজস্বমত। বড়লাট যেমন আছেন তেমনি থাকবেন, কিন্তু ব্রিটেনের রাজার মতো তিনি হবেন কন্সটিটিশউনাল হেড। যেমন কানাডায় বা অস্ট্রেলিয়ায়। এটা কি বেনজীর দাবী? জঙ্গীলটিকেও কেউ সরে যেতে বলছেন না, কিন্তু তাঁকে ব্রিটেনের মতো সিভিলিয়ান কন্ট্রোল মেনে নিতে হবে। কারণ জয়পরাজয়ের জন্তে জবাবদিহির দায় তো সিভিলিয়ান মন্ত্রীমণ্ডলের। তিনি যদি তাঁর বুদ্ধির ভুলে পরাজয় ডেকে আনেন সিভিলিয়ান মন্ত্রীদেরই তো দায়ী করা হবে। মনোনীত কাউন্সিলারদের কোনো রাজনৈতিক দায়দায়িত্ব নেই। কিন্তু নির্বাচিত মন্ত্রীদের তো আছে। মনোনীতদের বদলে নির্বাচিতদের নিয়ে সরকার চালাতে হবে। কংগ্রেসের দাবী বলতে এই। এর চেয়ে বেশী নয়, কমও নয়। ঠুঁরা যুদ্ধে সহযোগিতা করতে হাত বাড়িয়ে রয়েছেন। জাপানীদের মোকাবিলা করতে ঠুঁরা সম্পূর্ণ রাজী। আপস করতে হলে আর কালবিলম্ব করা সমীচীন নয়। বিলম্ব দেখলে গান্ধীজী তাঁর শেষ চালটি চালবেন।”

পুলিশ সাহেব বলেন, “যুদ্ধকালে ব্রিটেন ক্ষমতা হস্তান্তর করবে না। করলে হেরে যেতে পারে। বৃথা আশা! বৃথা আন্দোলন! বৃথা ত্যাগস্বীকার! গান্ধী কি দেশটাকে জাপানের হাতে তুলে দেবেন বলে মনঃস্থ করেছেন? মিছিমিছি কতকগুলো মানুষকে জেলে পুরতে হবে। আমি হুঃখিত।”

“যদি কিছু না মনে করেন, দেশটাকে জাপানের হাতে তুলে দিচ্ছে কে? গান্ধী না ব্রিটিশ সরকার? বার্মায় কী দেখা গেল? জাপানীরা যদি আসে চট্টগ্রামে কী দেখা যাবে? মণিপুরে কী দেখা যাবে? আসামে কী দেখা যাবে? বার্মায় যেমন ক্ষমতার হস্তান্তর হলো ব্রিটিশেতে জাপানীতে, ভারতেও তেমনি ক্ষমতার হস্তান্তর হবে ব্রিটিশেতে জাপানীতে। তারপরে হয়তো পান্টা আক্রমণ। হয়তো ক্ষমতার আবার হাতবদল, জাপানীতে ব্রিটিশেতে। লম্বলম্বা ভায়ে ভায়ে লোকের মাথার উপর দিয়ে। সে যা হুঃখ তার তুলনায়

জেলখানার ছুঃখ তো বিলাসিতা। সে যা ত্যাগস্বীকার তার তুলনায় এ ত্যাগস্বীকার তো যৎসামান্য। গান্ধীজী যদি নিশ্চিতভাবে জানতেন যে আপনারা জাপানকে ভারতের এক ইঞ্চি জমিও ছেড়ে দেবেন না, ভারতীয়দের একজনকেও জাপানীদের হাতে সঁপে দেবেন না তা হলে তিনি কখনো আপনাদের যুদ্ধকালে বিব্রত করতেন না। শুধু সহযোগিতায় বিরত থাকতেন। সেটা তাঁর যুদ্ধকালীন নীতি। জাপানের সঙ্গে তার কোনো সম্পর্ক নেই। ভারতের প্রতিনিধিদের সঙ্গে পরামর্শ না করে ভারতকে বিশ্বযুদ্ধে জড়িত করার প্রতিক্রিয়া যুদ্ধে অসহযোগ। ওটুকু তাঁর বিবেকের অল্পশাসন।” মানস ব্যাখ্যা করে।

পুলিশ সাহেব আমতা আমতা করে বলেন, “যুদ্ধে অমন কত হাতবদল ঘটে। কোথাও কেউ প্রত্যেকটি ইঞ্চি রক্ষা করতে পারে না। যুদ্ধ জিনিসটাই ওই রকম। এর জন্তে ব্রিটিশকে দায়ী করছেন যারা তাঁরা নিজেরাও দায়ী হতেন, যদি ক্ষমতার আসনে থাকতেন। তাঁরা যে নেই তার জন্তে আমি দুঃখিত। তবে আপনাকে আশ্বাস দিতে পারি যে যুদ্ধের পর তাঁরা ক্ষমতার আসনে বসবেনই। আমরা নিজেরাই অনুভব করছি যে তাঁদের বাদ দিয়ে ভারত শাসন চলতে পারে না। প্রদেশে প্রদেশে স্বায়ত্তশাসন হয়েছে। কেন্দ্রেও হবে। সেটাই তো লজিকসম্মত পরিণতি। তার জন্তে আমরাও মনে মনে প্রস্তুত হচ্ছি।”

মানসও বলতে সাহস পায় না যে, যুদ্ধের ফলাফল অনিশ্চিত। কে জিতবে, কে হারবে তা নেতারাও জানেন না, মানুষ জানবে কী করে? অনিশ্চিতের উপর ভরসা রেখে নিষ্ক্রিয় থাকা যায় না। এটাই গান্ধীজীর আসল যুক্তি। কিন্তু এটা কি মুখ ফুটে বলতে আছে? ইংরেজমাত্রেরই দৃঢ় বিশ্বাস যে আখেরে তার দেশ জিতবেই। মিস্টার হিটলার উইল বি সাউণ্ডলি ডিফিটেড। হিটলার ফাস্ট। তারপরে মুসোলিনি ও তোজো। ইতিহাসে বরাবর যা হয়েছে এবারেও তাই হবে। ইংরেজরা ভাগ্যলক্ষীর বরপুত্র। ঠাট্টা করে বলা হয় “দে উইল ফাইট টু দ লাস্ট ফ্রেন্ডম্যান।” টু দ লাস্ট ইণ্ডিয়ান। মানস মনে মনে জুড়ে দেয়।

পাবলিকের উপর আস্থা না থাকলে পাবলিকেরই বা আস্থা থাকবে কেন? মিডিল ডিক্লেস সাধারণের সহযোগিতা পায় না। উমাশঙ্কর সামন্ত বলে এক সম্ভ্রান্ত নাগরিক বাস করেন। তিনি একাধারে রায় বাহাদুর তথা বিদ্যা-বিনোদ। “মহাভারতে দ্রোণদীর ভূমিকা” বলে তাঁর এক সম্ভর্ষ তিনি

মানসকে উপহার দিয়ে গেছেন। তাঁকেই করা হয় সিভিল ডিফেন্সের কমান্ডার। থাকি ইউনিফর্ম পরে তিনি প্যারেড গ্রাউণ্ডে গিয়ে কুচকাওয়াজ করেন। বয়স যদিও ষাটের উপরে।

পুলিশ সাহেব তো হেসেই উড়িয়ে দিলেন যে ভারতীয়রা এক নেশন। অথচ ওদিকে গ্রাশনাল ওয়ার ফ্রন্ট গঠনের তোড়জোড় চলেছে। নেশন কি তবে ভারতীয় নেশন নয়? তা হলে ভারতব্যাপী তার প্রসার কেন? হিন্দু মুসলমান শিখ প্রভৃতি সবাইকে তার আহ্বান কেন? পেশাওয়ারের পাঠান আর তামিল ব্রাহ্মণ একই ফ্রন্টের সদস্য হয়ে জাপানীদের বিরুদ্ধে সমবেত হয় কেন?

একদিন গ্রাশনাল ওয়ার ফ্রন্টের শাখা সংগঠন করতে কলকাতা থেকে সফরে আসেন মানসের সতীর্থ হিতেশচন্দ্র ভৌমিক। বুদ্ধিজীবীদের সঙ্গে সাক্ষাৎ করে তিনি তাঁদের দেশরক্ষার ব্রতে ব্রতী করতে চান। যুদ্ধক্ষেত্রে যেতে হবে না। ইউনিফর্ম পরতে হবে না। মাঝে মাঝে প্রচার অভিযানে যোগ দিতে হবে। নৃত্য গীতে চিত্রে নাট্যে ভাষণে নানা ভাবে দেশবাসীকে যুদ্ধোন্মুখ করতে হবে। দেশবাসীর মনের জোর বজায় রাখতে হবে। যুদ্ধকালে সিভিলিয়ান মরাল মিলিটারি মরালের মতোই গুরুত্বপূর্ণ।

“ইম্পিরিয়ালিস্ট ওয়ার ফ্রন্ট নয়, গ্রাশনাল ওয়ার ফ্রন্ট।” ভৌমিক লক্ষ করতে বলেন। “এটা ইংরেজদের ব্যাপার নয়, আমাদেরই ব্যাপার। আমি আমার নেশনের কাজই করছি। আমি জাতীয়তাবাদী। সরকার এটা জানেন। জানেন বলেই আমাকে এ দায়িত্ব দিয়েছেন। এটা জাতীয়তাবাদীদেরই সংগঠন। কিন্তু সাবধানে কাজ করতে হয়। পাছে লীগপন্থী মুসলমানরা বয়কট করে।”

“সাবধানে কাজ করা বলতে কী বোঝায়, ভৌমিক?” মানস প্রশ্ন করে।

“বন্ধিমচন্দ্রের ‘বন্দে মাতরম্’ নৈব নৈব চ। একটি পঙ্ক্তিও না। একটি পদও না। জনমার্কের যুবরাজকে বাদ দিয়ে হামলেট অভিনয়। জাতীয়তাবাদ থেকে বন্ধিম বাদ। রবীন্দ্রনাথ নিয়েও যথেষ্ট বিধা। ‘জনগণমন অধিনায়ক’ চলবে না। তাতে পাঞ্জাব সিদ্ধ বদ্ধ থাকলে কী হবে, পাকিস্তান তো নেই। বিজেতলালের ‘ভারত আমার’ একই কারণে অচল। ভারত শব্দটাই যেন ঝাড়ের সামনে লাল জ্বাকড়া। অতুলপ্রসাদের সেই বিখ্যাত বাণী ‘ভারত আবার জগৎসভায় শ্রেষ্ঠ আসন লবে’, তাতেও আপত্তি। ভারতের স্বাধীনতাও ওদের

অস্থিষ্ট নয়। যদি না তার সঙ্গে থাকে পাকিস্তানের স্বীকৃতি। অগত্যা দ্বিজেন্দ্র-  
লালের ‘ধনধাত্তে পুষ্পে ভরা’ আর কাজী নজরুলের ‘দুর্গম গিরি কান্তার মরু’  
দিয়েই সভার কাজ চালাতে হয়। আমাদের নিজস্ব সঙ্গীতও কিছ আছে।  
নিজ্জের লোকের রচনা। শুনলে রক্ত গরম হয়ে ওঠে নাৎসী ও জাপানী  
ফাসিস্টদের বিরুদ্ধে। তবে সেগুলো জাতীয়তাবাদী না আন্তর্জাতিকতাবাদী  
তা বলা শক্ত। ইয়া, গ্রাশনাল ওয়ার ফ্রন্টে কমিউনিস্টরাও ভিড়ে গেছেন।  
প্ল্যাটফর্মটা তো যুদ্ধে সহযোগিতা। শয়তানও যদি সহযোগিতা করে তাকেও  
আমরা সঙ্গে নেব। যুদ্ধজয়ের পর ছাড়াছাড়ি হবে। আপাতত কোলাকুলি।”  
ভৌমিক উত্তর দেন।

ছাত্রহিসাবে ভৌমিক একদা আদর্শবাদী ছিলেন। কিন্তু চাকুরে হিসাবে  
উন্নতি করতে হলে কতাদের মন বুঝে মত বদলাতে হয়। তাই তিনি বোলেও  
আছেন, বোলেও আছেন, অথলেও আছেন। মুসলিম মন্ত্রীরাও তাঁকে পছন্দ  
করেন। হিন্দু মন্ত্রীরা তো তাঁর স্বপক্ষে। ইউরোপীয় উপরওয়ালারাও তাঁকে  
বিশ্বাস করেন। বাল বোল অথল বলতে এই তিনকেই বোঝায়। সব চেয়ে  
আশ্চর্যের কথা কমিউনিস্ট মহলেও তিনি অপ্রিয় নন। কখনো যদি বিপ্লব  
ঘটে তাঁর চাকরি যাবে না। চচ্চড়িতেও থাকবেন।

ভৌমিক খুব সহজেই ভাব জমিয়ে নিতে পারেন। দীপক আর মণিকা  
দু’জনেই ওঁর চিরকালের চেনা হয়ে যায়। ‘কাকু’ যেন সত্যিকারের কাকু।  
এতদিন যেন বিদেশে ছিলেন। সবে ফিরেছেন। স্টকেস থেকে বার করেন  
আরবদেশের বীচিবিহীন খেজুর আর হুইটজারল্যাণ্ডের চকোলেট। যা  
আজকের বাজারে অদৃশ্য।

সারাদিন সরকারী গাড়ী নিয়ে ঘরে ঘরে ঘুরে তিনি সন্ধ্যাবেলা ক্লাস্ত হস্তে  
ফেরেন। বিশ্বামের পর যখন আহায়ে বসেন তখন তাঁর পরণে ধূতী পাঞ্জাবী।  
বলেন, “আমি দেশী রান্নাই ভালোবাসি। কাঁচা লঙ্কা যেন আমার পাতের এক  
কোণে থাকে। অবশ্য আপনাদের যদি অস্ববিধে না হয়।”

মানস জানতে চায় গ্রাশনাল ওয়ার ফ্রন্টের ডাকে সাড়া পাওয়া গেল  
কতখানি। এখানকার কর্মকর্তা কারা।

“রায় উমাশঙ্কর সামন্ত বাহাদুর আর তাঁর বন্ধুবান্ধব। খনির মালিক,  
কলওয়াল, আড়তদার, ঠিকাদার। যুদ্ধের বাজারে ওঁদেরি তো পৌষমাস।  
যোটা চাঁদাও উঠেছে। এখানকার শাখা স্বনির্ভর। কলকাতা থেকে আমরা

সিনেমা ফিল্ম পাঠাব। ওঁরা সিনেমা দেখাবেন। গানের দল পাঠাব। ওঁর জলসা করবেন। একজন দেশবরেণ্য পুরুষকে সম্বর্ধনা দেবার সংকল্পও আছে। তিনি রাজনীতির উদ্দেশ্যে। তা দেখে রাজনীতিকদের সমালোচনা বন্ধ হবে। আমরা সংস্কৃতি অলঙ্ঘন করেই আমাদের কাজ করি। রাজনীতি অবলম্বন নয়। তা হলে অধ্যাপক শ্রেণীর ব্যক্তির ধরাছোঁয়া দেন না কেন?” ভৌমিক জিজ্ঞাসা করেন।

“কারণ যুদ্ধের বাজারে তাঁদের পৌষমাস নয়। তাঁদের সর্বনাশ না হোক সর্বনাশের ভয়। মুদ্রাস্ফীতির জলতরঙ্গ রোধ করবে কে? সঞ্চয়ের মূল্য কী থাকবে? এখানে কমিউনিস্টদের তেমন প্রভাব নেই। বৈশীরা ভাগই কংগ্রেসের সমর্থক। তবে তাও প্রকাশ্যে নয়। পুলিশের ভয়ে নীরব।” মানস যতদূর জানে।

“মল্লিক,” ভৌমিক স্থান, “বুদ্ধিজীবীদের আকর্ষণ করার উপায় কী, বলতে পারেন?”

“খাস বিলেতেরই যুদ্ধকালীন মূলনীতি হচ্ছে ইকুয়াল স্যাক্রিফাইস। সমান ত্যাগস্বীকার। সেইভাবে একপ্রকার শ্রেণীসাম্য বিবর্তিত হচ্ছে। সকলেরই একই রকম খোরাক, সকলেরই একই রকম পোশাক। অবশ্য ধনীরা ধনীই থেকে যাচ্ছেন, তবে তাদের মূনাফা বল্গাহীন নয়। আর দরিদ্ররা সকলেই কাজ পেয়ে যাচ্ছে, রোজগারও মন্দ নয়। সমাজতন্ত্রের অভিমুখে এটা একটা আবশ্যিক পদক্ষেপ। টোরিদের সরকার যুদ্ধকালে অচল। লেবার এসে টোরিদের সরকারকে কোয়ালিশন সরকার করেছে। তাই এই পরিবর্তন। এদেশেও কেন্দ্রীয় সরকারে গুণগত পরিবর্তন চাই। ইকুয়াল স্যাক্রিফাইস হবে ন্যাশনাল গভর্নমেন্টের যুদ্ধকালীন মূলনীতি। সমান ত্যাগস্বীকারের দৃষ্টান্ত দেখলে বুদ্ধিজীবীরাও এগিয়ে আসবেন।” মানস তার অভিমত জানায়।

ভৌমিক হাল ছেড়ে দিয়ে বলেন, “মোজার দোড় মসজিদ অবধি। আমার দোড় নাচ গান নাটক অবধি। মাঝে মাঝে গুণীজন সম্বর্ধনা। এখানে একজন জ্ঞানতপস্বী আছেন শুনেছি। তিনি রাজী হবেন তো?”

“না। তিনি সভাসমিতিতে বা দরবারে যান না। তপস্শায় যথ।” মানস তাঁর সঙ্গে মাঝে মাঝে দেখা করে।

## ॥ যোল ॥

গজদন্তের মিনার না হলেও কিছুত এক ইমারতে বাস করেন আচার্য নরনারাণ শিকদার। সেটাকে যন্তর মন্তর বলা চলে। তাঁর নিজস্ব ডিজাইন। ত্রিশ বছর সরকারী কলেজে অধ্যাপনার পর প্রায় ত্রিশ বছর ধরে অবসর ভোগী এই জ্ঞানতপস্বী রাত জেগে আকাশের গ্রহনক্ষত্র পর্যবেক্ষণ ও দিনভর নানা বিষয়ে গবেষণা করে আসছেন। কোথাও তিনি যান না। কেউ তাঁর কাছে আসে না। তবে ষাঁরা শ্রদ্ধাবান জিজ্ঞাসু তাঁদের তিনি মাঝে মাঝে দর্শন দেন। তার জন্তে আগে থেকে তাঁর অল্পমতি নিতে হয়। এই শহরে তাঁর মতো জন-অপ্রিয় ব্যক্তি দ্বিতীয় নেই। সরকার তাঁকে রায় বাহাদুর খেতাব দিয়েছেন, কিন্তু সরকারী অফিসে তিনি অদৃশ্য। পণ্ডিতসমাজ তাঁকে দেশিকাচার্য উপাধি দিয়েছেন, কিন্তু তিনি পণ্ডিত সমাবেশেও অহুপস্থিত। বুদ্ধিজীবী মহলে তাঁর ছন্দাম তিনি গজদন্ত মিনার অধিবাসী।

মানস যেবার তাঁর সঙ্গে প্রথম আলাপ করতে যায় তিনি বলেন, “যুদ্ধ আবার বেধেছে শুনছি। বাধিয়েছে কে? কায়জার?”

মানস তো অবাক। বলে, “কাইজার নয়, হিটলার।”

“হিটলার?” তিনিও অবাক। “কই, অমন কোনো শব্দ তো ল্যাটিন ভাষায় নেই। সীজার, কায়জার, জার তিনটাই ল্যাটিন নামের রকমফের। হিটলারও কি সীজারের প্রতিশব্দ? ওর ব্যুৎপত্তি কী? ওটা কি হিটাইট ভাষার শব্দ? অনেকের মতে হিটাইট ভাষাও আর্য ভাষা।”

মানস এসব ব্যাপারে পরম অজ্ঞ। বিত্তে জাহির না করে অজ্ঞতা কবুল করে। “হিটলার যেমন আধামির জাঁক করছে তা শুনে মনে হতে পারে ওর পূর্বপুরুষ হিটাইট। তবে চার পাঁচ হাজার বছর পরে কেউ নিশ্চিত হতে পারে না। যেটা সবাই জানে সেটা এই যে লোকটা রাজবংশীয় নয়, রাজমিস্ত্রি, ঘরের দেয়াল জানালা রং করত। এখন সারা জার্মানীর মাথায় চড়ে বসেছে। কায়জার নয়, ফুয়েরার।”

“ফুয়েরার?” আচার্য বার বার উচ্চারণ করেন। “গ্রীক নয়, ল্যাটিন নয়, টিউটনের মতো লাগছে। ব্যুৎপত্তি কী ওর?”



“বৃৎপত্তি জানিনে। অর্থ, মহান নেতা।” মানস যতদূর জানে।

এ ছেন পণ্ডিতের সঙ্গে আলাপ করতে হলে কিঞ্চিৎ পাণ্ডিত্য থাকা চাই।  
নইলে আলাপ জমবে কেন? সে ভৌমিককে হুঁশিয়ার করে দেয়।

ভৌমিক ঘুরে এসে বলেন, “না, যতটা ভয়ঙ্কর ভেবেছিলুম ততটা নয়।  
সামুরাইদের সহজে প্রশ্রয় করেন, পরীক্ষায় পাশ করি। কিন্তু জেন বৌদ্ধধর্ম  
আর জৈনধর্মের পার্থক্য বলতে পারিনে। তিনিই আমাকে বোঝান।  
অসাধারণ জ্ঞানী, কিন্তু রাজনীতির ধার ধারেন না। খবরের কাগজ পড়েন না।  
জাপান যে শিয়রে বসে আছে তা শুনে চমকে ওঠেন। সামলে নিয়ে বলেন,  
ওরা তো আমাদের শত্রু নয়। আমাদের ধর্মভ্রাতা। একই বৌদ্ধধর্ম ওদের  
আর আমাদের ধর্ম। ওরা এলে লুণ্ঠিনী, কপিলবাস্তু, সারনাথ, শ্রাবস্তী,  
বৈশালী, বুদ্ধগয়া, সাঁচী আবার জেগে উঠবে। হিন্দু রিভাইভাল তো ঢের  
দেখলুম। এবার দেখতে পাব বৌদ্ধ রিভাইভাল। এসব কথা আমি রিপোর্ট  
করব না, মল্লিক। করলে ভদ্রলোকের রায় বাহাদুরি কেড়ে নেওয়া হবে।  
পেনসনও বন্ধ হতে পারে। তবে ইংরেজ রাজত্ব থাকলে তো?”

“তুমিও সন্দেহ করো, থাকবে কি থাকবে না? তা হলে অত্রে পরে কা  
কথা!” মানস রক্ত করে।

ভৌমিক ফিস ফিস করে বলেন, “পলাশীর পর অত বড়ো যুদ্ধ বাংলাদেশের  
মাটিতে ঘটেনি। দু’শো বছর আমরা বাঙালীরা বর্গীর হান্ধামার চেয়ে ভীষণ  
কিছু দেখিনি। আর পলাশীর যুদ্ধও কি একটা যুদ্ধ নাকি? এই প্রথমবার  
আমরা যুদ্ধের সঙ্গে মুখোমুখি হতে যাচ্ছি। সবাই তো নার্তাস হবেই। আমি  
কি বাঙালী নই, ইংরেজ? আর ইংরেজও যে আদৌ নার্তাস নয় তাই বা  
কেমন করে মানি? ওরা বহু যুদ্ধ দেখেছে, ওরা ততটা নার্তাস নয়। তবে  
জাপানীদের হাতে বন্দী হতে ও বন্দীশিবিরে বাস করতে কি ওরা প্রস্তুত? না  
বোধহয়। সিঙ্গাপুরে যা হাল হয়েছে ওদের! অভাবনী! ”

“সিঙ্গাপুর থেকে পালাবার পথ থাকলে কি ওরা জাপানীদের হাতে বন্দী  
হতো? এদেশে পালাবার অসংখ্য পথ। বন্দী হওয়ার ভয় নেই। তবে  
আমরা যারা চাকুরে তাদের চাকরি হারানোর ভয় আছে। জাপানের অধীনে  
কাজ করলে ইংরেজ তাড়াবে। ইংরেজের অধীনে কাজ করলে জাপান  
খেদাবে। উকীল ব্যারিস্টার ডাক্তার কবিরাজদের কিসের ভয়?” মানস  
একান্তে বলে।

“সরকারী চাকরির ওই তো বিপদ। ইংরেজরা যদি বার্মার মতো বাংলাদেশ থেকে পশ্চাদ্ অপসরণ করে আমাদেরও তাদের অহুগমন করতে হবে, মল্লিক। এই অনিশ্চিত অবস্থায় ওরাও মন দিয়ে শাসন কর্ম চালাতে পারছে না। রেশন ব্যবস্থা এখনো শুরু হলো না। সময় থাকতে যদি না হয় অনটন দেখা দিতে পারে। খেতে না পেলে যেমন জওয়ানরা লড়তে জোর পায় না তেমনি সাধারণ নাগরিকদেরও মনের জোর চলে যায়। গ্রাশনাল ওয়ার ফ্রন্ট ওদের কী করে প্রেরণা জোগাবে? কিন্তু ওটা তো আমার এক্সারে নয়।” ভৌমিক অসহায়।

গণ সত্যাগ্রহের প্রসঙ্গ ওঠে। জাপানীরা এর সুবিধে নেবে না তো? ওদের যারা পক্ষপাতী তারাও কি সুবিধে নেবে না? মানস উদ্বিগ্ন।

“অসম্ভব নয়। জনমত এখন দুই ভাগ বিভক্ত। একভাগের ধারণা ইংরেজ তো যাচ্ছেই, ওদের থাকতে সাহায্য করে কী লাভ? তার চেয়ে নবাগতকে অভ্যর্থনা করাই বুদ্ধিমানের কাজ। আরেকভাগের বিশ্বাস জাপানীরা ইংরেজদের হারিয়ে দিলে কী হবে, মার্কিনদের কাছে হেরে যাবেই। তা হলে জাপানীদের অভ্যর্থনা করে কেন ইংরেজদের বিঘনজরে পড়া? বুদ্ধিমানের কাজ যে আখেরে জিতবে তাকেই খুশি রাখা। বেশীর ভাগ লোকই বিঘনজর এড়াতে চায়।” ভৌমিকের অহুমান।

“কিন্তু গণ সত্যাগ্রহের কী হবে? ওটা কি ব্যর্থ হবে?” মানসের প্রশ্ন।

“অত্যাগত প্রদেশের কথা বলতে পারব না। বাংলাদেশের বিভিন্ন জেলায় ঘুরে দেখছি তার জন্তে খুব কম লোকই প্রস্তুত। মুসলমানরা তো একেবারেই নয়। ওরা জানতে চায় ব্রিটিশ রাজ চলে গেলে রাজা হবে কে? কংগ্রেস রাজ হিন্দু রাজ ও তো আরো খারাপ। তার জন্তে ওরা লড়তে যাবে কেন? হিন্দুরাও সতর্ক। কায়িক নিরাপত্তার কথাই তো মানুষের প্রধান ভাবনা। জাপান কি তেমন কোনো অঙ্গীকার দিয়েছে? দিলে এত লোক পা দিয়ে ভোট দিত না। একদা যারা কন্যাকুজ থেকে এসেছিলেন তাঁদের সম্ভতি এখন কতকাজেই ফিরে চললেন। সিংলিকাল সত্যাগ্রহ সব সময়েই করা যায়। দশ বিশ হাজার সত্যাগ্রহী পাওয়া শক্ত নয়। কিন্তু গান্ধীজীর এবারকার উদ্দেশ্য সিংলিকাল সত্যাগ্রহ নয়। করেছে ইয়া মরেন্দে বলতে জেলখাতা বোঝায় না। বোঝায় যুদ্ধযাত্রা। তার জন্তে আরেক রকম গ্রাশনাল ওয়ার ফ্রন্ট চাই। কোথাও কি তার অস্তিত্ব আছে? গড়ে তোলার সময়ই বা কোথায়?” ভৌমিক ঠাণ্ডা মাথায় উত্তর দেন।

এর পরে ওঠে সঘর্ষনার প্রসঙ্গ। মানস জানতে চায় আচার্য রাজী কি না।

“ক্ষেপেছেন ? উনি কী বলতে গিয়ে কী বলবেন, তার পর আমার মাথা কাটা যাবে। ‘এস হে আর্থ, এস অনার্থ’ দিয়ে আরম্ভ করবেন, বলতে বলতে বলে বসবেন, ‘এস হে বুদ্ধ, এস নিগ্নন’। ঠর কি কালজ্ঞান আছে ? উনি বাস করছেন ত্রিশ বছর আগেকার যুগে। জিজ্ঞেস করছিলেন উড়ো উইলসন কি মিকডোর বিরুদ্ধে যুদ্ধ ঘোষণা করেছেন ? তা কী করে হবে ? ঠরা যে পরস্পরের মিতা। না, ভাই, আমার সঘর্ষনায় কাজ নেই। উনি রাজী হলেও আমি নারাজ। কথাটা আমি পাড়তে যাবার আগেই তাঁর মনোভাব লক্ষ করে মত পরিবর্তন করেছি। বলেন কিনা মুসলমানদের যেমন তুরস্ক পারস্য হিন্দুদের তেমনি চীন জাপান। ওদের যোগসূত্র যেমন ইসলাম আমাদের যোগসূত্র তেমনি বৌদ্ধ ধর্ম। হিন্দু মুসলমানের যুদ্ধ তো একদিন হবে, না হবে না ? সেদিন মুসলমানের পক্ষে যদি তুরস্ক দাঁড়ায় তো হিন্দুর পক্ষে জাপান দাঁড়াবে। মুসলমানের খলিফা আছেন, হিন্দুর কে আছে ? হিন্দুকে হিন্দু না রাখিলে কে রাখিবে ? ওই জাপান সম্রাট। উনিও বৃহত্তর অর্থে হিন্দু। সম্রাট অশোক যে অর্থে হিন্দু ছিলেন। খেলাফৎ আন্দোলনের মতো আমাদেরও একটা আন্দোলন চাই। মাঞ্চু সাম্রাজ্য ফিরিয়ে আনার জন্তে।” ভৌমিক তাজ্জব বনে গেছেন।

মানস হো হো করে হেসে ওঠে। ওর হাসি আর খামতে চায় না। বলে, “জাপান তো সেই কর্মই করেছে। মাঞ্চুকুও তার প্রথম ধাপ। শেষের ধাপটি বোধহয় পালযুগের গোড়ভূমি। ধর্মপালের দিগ্বিজয়। সাত সমুদ্র তেরো নদীতে ময়ূরপঙ্খী নাও।”

“কী মধুর স্বপ্ন ! এই স্বপ্নবিলাসী জাতিটাকে রুঢ় বাস্তবের আঘাতে জাগতে হবে একদিন। জাপানীরা বৌদ্ধ নয়, জাপানী। চীনারা বৌদ্ধ নয়, চীনা। তুর্করা মুসলমান নয়, তুর্ক। ইরানীরা মুসলমান নয়, ইরানী। আজকের জগতে ধর্মকে মূখ্য স্থান দেওয়া আর চোখে ঠুলি পরে রাস্তায় চলা একই জিনিস। হিন্দু মুসলমানকে কী করে এটা বোঝাই, বলুন তো ? জাশনাল ওয়ার ক্রস্ট কিন্তু এই প্রস্নটাতে মুসলমানকে এড়িয়ে যাচ্ছে। আমরা জোর গলায় ঘোষণা করতে পারছিনে যে আগে জাতীয়তা, পরে ধর্ম। ইংরেজরাও খ্রীস্টান, জার্মানরাও খ্রীস্টান, কিন্তু তার চেয়ে বড়ো কথা তারা

ইংরেজ, তারা জার্মান। তাই যদি হয়ে থাকে পশ্চিমের বেলা সত্য তবে প্রাচ্যের বেলাও সত্য হবে না কেন? প্রাচ্য মানেই কি প্রাচীন? কিন্তু কী করব? আমার হাত পা বাঁধা। আমাকে এমনভাবে কাজ করতে হয় যাতে হিন্দু মুসলমান ইউরোপীয়ান সবাই তুষ্ট হন। ‘যে পথ দিয়া চলিয়া যাব সবারে যাব তুষি।’ এই আমার জীবনদর্শন।” ভৌমিক অকপটে ব্যক্ত করেন।

“তা হলে তুমি হয়তো একদিন জাপানীদেরও তুষ্ট করবে। যদি তারা গোড়ভূমিতে পাল যুগ ফিরিয়ে আনে। পাল রাজাদের বংশধর কি খোঁজ করলে মিলবেন না? সাকসেসফুল মিভিল মার্ভাট তাঁরাই যারা মেরীকেও মানেন, মনসাকেও মানেন, ওলাবিবিকেও মানেন। জাপানীদের কাল্পনকে মানতেও সময় লাগবে না। আসলে তিনি অবলোকিতেশ্বর বোধিসত্ত্ব। বোধিসত্ত্বরা না-স্ত্রী, না-পুরুষ। এঞ্জেলদের মতো। কিন্তু জাপানে গিয়ে অবলোকিতেশ্বর স্ত্রী হয়ে গেছেন। আর মঞ্জুশ্রী হয়েছেন পুরুষ। মহাত্মা গান্ধীও তো বোধিসত্ত্ব বা এঞ্জেলদের মতো না-স্ত্রী না-পুরুষ হতে সাধনা করছেন। অতি কঠোর সাধনা।” মানস প্রসঙ্গান্তরে চলে যায়।

শুনে ভৌমিক তো হতবাক। “ওটা শুধু কঠোর নয়, নিষ্ফল সাধনা। অমন সাধনার পার্টনার হতে রাজী হবেন কোন্ নারী? রাজী হলে তিনিও তো হবেন না-স্ত্রী, না-পুরুষ। তাঁকে মা বলে ডাকবার জন্মে কেউ জন্মাবে না। কই, কোথাও তো পড়িনি এঞ্জেল বা বোধিসত্ত্বদের কোনো পার্টনার ছিলেন। তবে কি গান্ধীজী এমন এক স্বর্গের কল্পনা করছেন যেখানে সকলেই নিঃসঙ্গ, সকলেই নিঃসন্তান? ভারতকে সেই স্বর্গে করো উপন্যাস, এটাই কি তাঁর প্রার্থনা?”

“আমার মনে হয় এর একটা সূক্ষ্ম কারণ আছে। এ যুগের সব চেয়ে গুরুত্বপূর্ণ দুটি সমস্যা হচ্ছে শ্রমের জাগরণ তথা নারীর জাগরণ। গান্ধীজী শ্রমের সঙ্গে অর্থাৎ শোষিত শ্রমজীবী শ্রেণীর সঙ্গে একাত্ম হবার জন্মে স্বেচ্ছায় কায়িক শ্রম বরণ করে নিয়েছেন। আদালতে তাঁকে প্রমাণ করা হয়, আপনার বৃত্তি কী? তিনি উত্তর দেন, আমি একজন চাষী ও তাঁতী। উচ্চশ্রেণীর লোক যদি নিম্ন শ্রেণীর লোকের সঙ্গে অভিন্ন হয় তা হলে সমসমাজ প্রতিষ্ঠিত হয়। শ্রেণীসংগ্রামের প্রয়োজন হয় না। গান্ধীই হন শ্রমজাগরণের হোতা। তাঁর গণজাগরণও মূলত শ্রম জাগরণ। অধিকাংশ সত্যগ্রহীই তো শ্রম বর্ণ থেকে উদ্গত। সত্যগ্রহ সফল হলে ওরা কি আর ব্রাহ্মণ প্রাধান্য, ক্ষত্রিয়

প্রাধান্য, বৈজ্ঞ প্রাধান্য সহ করবে ? একটা সমস্তার সমাধান তো ওই ভাবেই হবে। বাকী থাকবে আর-একটা। নেতার পক্ষে শূদ্র হওয়া যদি-বা সম্ভব হয় নারী হওয়া তো সম্ভব নয়। তা হলে নারীর সঙ্গে তিনি একাত্ম হবেন কী করে ? নবম্বীপের ললিতা দাসীর মতো নারীবেশ ধারণ করে ? অবিকল নারীর মতো সাঙ্গ। নাকে নখ। নারীর মতো হাবভাব। ছলাকলা। কিন্তু মঠের কর্তাগিরির সময় তিনি প্রবলপ্রতাপ পুরুষ। গান্ধীজী চাবীর বেশ ধরেছেন, নারীর বেশ ধরেননি। কিন্তু নারীর সঙ্গে একাত্ম হবার জন্তে তাঁর আত্মা ব্যাকুল। নারী হওয়া যাবে না, কিন্তু নারীর সব চেয়ে কাছাকাছি আসা যাবে, যদি এঙ্গেল বা বোধিসত্ত্বদের একজন হওয়া যায়। তাঁদের মতো সেক্সলেস। আক্ষরিক বা কায়িক অর্থে নয়। ভাবার্থে। তাঁর আন্দোলনে যত নারী সাড়া দিয়েছে তত আর কারো আন্দোলনে নয়। গণ সত্যাগ্রহে লক্ষ লক্ষ নারী কাঁপ দেবে বলে আশা করা যায়। এরা যখন ঘরে ফিরে যাবে তখন আর বিনা বাক্যে সমাজশাসন মেনে নেবে না। সমাজশাসন মানে তো পুরুষশাসন। পুরুষশাসনেরও অন্ত হবে, যেমন ব্রিটিশ শাসনের। অমনি করে আর-একটা সমস্তারও সমাধান হবে। নেতৃত্ব করতে হবে তাঁকেই। তার জন্তে এই দুশ্চর সাধনা। স্বর্গলাভের জন্তে নয়। ইন্দ্রত্বের উপর তাঁর লোভ নেই। তিনি রাজনীতির জগতে এসেছেন ন্যায়নীতির অহুসরণে। সত্যাগ্রহের জয় হলেই তিনি বিদায় নেবেন। যদি না সত্যাগ্রহকালেই তাঁর দেহান্ত হয়। সামনেই অগ্নিপরীক্ষা।” মানস উৎকণ্ঠার সঙ্গে বলে।

“কে না চায় তার স্বদেশের স্বাধীনতা ? লাটসাহেব পর্যন্ত স্বীকার করেন যে ভারতের স্বাধীনতা অবশ্যসম্ভাবী। কিন্তু জাপানকে হটিয়ে না দিলে নয়। আপাতত কংগ্রেসের উচিত বড়লাটের শর্তে রাজী হয়ে যাওয়া। বড়লাটকে সাক্ষীগোপালে পরিণত না করা। কংগ্রেস রাজী হলে মুসলিম লীগও রাজী হবে। না হলে নিজেই কোণঠাসা হবে। আমরাও ভিতর থেকে দেশের স্বাধীনতা স্বরাধিত করার জন্তে সচেষ্ট। ব্রিটিশ রাজত্ব কায়েম করার জন্তে নয়।” ভৌমিক আন্তরিকভাবে বলেন।

“তা হলে আপনারা ভিতর থেকে চেষ্টা চালিয়ে যান, যেন গণ সত্যাগ্রহের আগেই মিটমাট হয়।” মানসের সনির্বন্ধ অহরোধ।

কলকাতা থেকে জাপানী বোম্বার ভয়ে ধারা স্বানান্তরিত হয়েছেন তাঁদের মধ্যে আছেন প্রথিতযশা সম্পাদক ভবতোষ আচার্য। মানস একদা তাঁর

পত্রিকায় লিখত। তাঁরই পদাঙ্ক অনুসরণ করে সম্পাদক হবার স্বপ্ন দেখত। পরে অন্য পথে যায়, অন্য পত্রিকায় লেখে। যোগাযোগ ছিন্ন হয়। সম্প্রতি আবার সেই সম্পর্ক জোড়া লেগেছে। তিনিও মানসের আবাসে এসে বইপত্র ধার করে নিয়ে যান ও দিয়ে যান, মানসও তাঁর নিবাসে গিয়ে তাঁর খবরাখবর নেয়। ঢেঁকি স্বর্গে গেলেও ধান ভানে। তিনি মফঃস্বলে এসেও ছুনিয়ার হালচাল রাখেন। কলকাতা থেকে নিয়মিত দেশের বিভিন্ন এলাকার খবরের কাগজ পান, সম্পাদকীয় প্রবন্ধ শিখে সময়মতো কলকাতার আপিসে পাঠান, যাতে নির্দিষ্ট দিনে প্রকাশিত হয়। বিলম্ব তিনি একেবারেই সহ্য করতে পারেন না। তাই শরীর হাজার অস্থির থাকলেও তিনি তাঁর লেখার টেবিলে গিয়ে বসেন। দিনের বেলা কেউ তাঁকে বিরক্ত করে না। সন্ধ্যার দিকে তিনি সকলের সঙ্গে সাক্ষাৎ করেন। গল্প করেন। জমিয়ে রাখেন। একাধারে রাশভারী ও রসিক এই বর্ষীয়ান ঋষিকল্প ভদ্রলোক এখানে অরণ্যবাস করছেন। পরিবারের আর সবাই কলকাতায়।

ভৌমিককে নিয়ে মানস তাঁকে শ্রদ্ধা নিবেদন করতে যায়। বন্ধুর পরিচয় দিয়ে বলে, “ইনি গ্র্যাশনাল ওয়ার ফ্রন্ট গঠন করে বেড়াচ্ছেন।”

তিনি রসিকতা করে বলেন, “ইংরেজরা সিঙ্গাপুরে, মালয়ে, বার্মায় ব্যাক দেখিয়ে এসেছে। ফ্রন্ট দেখাবে কোথায়? না ওকাজটা আমাদের উপরেই ছেড়ে দিতে চায়? আমরাই লড়ে মরব?”

বৈঠকখানায় আরো কয়েকজন দর্শনার্থী ছিলেন। হাসাহাসি করেন।

ভৌমিক বলেন, “ওরা পালিয়ে বাঁচতে পারে, আমরা তো পালিয়ে বাঁচতে পারব না। পালাব কত দূরে আর কোন্ বিদেশে? কাজেই আমরা জাপানীদের কনফ্রন্ট করব। করব এক নেশন হয়ে।”

“তা হলে শুধু একটা ছড়া বলি।” সম্পাদক মজা করে আওড়ান।

“শিব ঠাকুরের বিয়ে হলো তিন কন্তে দান

এক কন্তে রাঁধেন বাড়েন এক কন্তে খান।

এক কন্তে গোসা করে বাপের বাড়ী যান।”

তার পর টিপ্পনী কাটেন। “একালের শিব ঠাকুর হচ্ছেন ব্রিটিশ রাজ। আর তিন কন্তে হচ্ছেন কংগ্রেস, মুসলিম লীগ আর রাজন্যমণ্ডলী। কংগ্রেস রাঁধবে বাড়বে, অর্থাৎ সর্বপ্রকার ত্যাগ স্বীকার করবে। মুসলিম লীগ খাবে, অর্থাৎ অন্যের অর্জিত ক্ষমতা ভোগ করবে। আর রাজন্যমণ্ডলী প্রস্তাবিত

ফেডারেশনের সামিল না হয়ে রাগ করে বাইরে থাকবেন। অর্থাৎ একরাশ বলকান রাষ্ট্র সৃষ্টি করবেন। এটাই হলো প্যাটান'। এর কন্সলি কালে রদবদল হবে না। জাপানকে রুখতে হলে ওই কংগ্রেসই রুখবে, কংগ্রেস না রুখলে আর কে রুখবে? ইংরেজ তো পিছু হটবে। মুসলিম লীগ তো তার পিছু নেবে। রাজগুরা তো প্রথম স্বযোগেই বস্ত্রতা স্বীকার করবেন। কংগ্রেসের এখনো কিছু মোহ অবশিষ্ট আছে। কিন্তু গান্ধীজীর সম্পূর্ণ মোহভঙ্গ হয়েছে। তিনি স্থির করেছেন শিব ঠাকুরের সঙ্গে সম্পর্কই রাখবেন না। শিব ঠাকুরকে বিদায় দেবেন। তার পরে তিন কন্টার মধ্যে একটা সমঝোতা হলেও হতে পারে, কিন্তু শিব ঠাকুর থাকতে হবার নয়। তাই তিনি বলছেন, ভারত ছাড়ো। খুশরবাড়ী ছাড়ো।”

ভৌমিক আর সকলের সঙ্গে হাসিতে যোগ দেন, কিন্তু সবিনয়ে অমুযোগ করেন, “স্বাঃ, আপনি কি সত্যি বিশ্বাস করেন যে শিবঠাকুরের সঙ্গে সম্পর্ক কেটে গেলেই তিন কন্টার মধ্যে সমঝোতা সম্ভব হবে? এক কন্টা না হয় সম্পর্কচ্ছেদ করলেন, বাকী দুই কন্টা তো একভাবে না একভাবে সম্পর্ক রাখতে পারেন। তার বেলা কী উপায়? এ দেশ কি তা হলে অর্ধ-স্বাধীন ও অর্ধ-পরাদীন হবে?”

দাড়িতে হাত বুলোতে বুলোতে সম্পাদক বলেন, “সেই কথাই তো আজ আমি আমার সম্পাদকীয় প্রবন্ধে লিখে ডাকে দিয়েছি। কপি রাখিনি, তাই দেখাতে পারছি নে। কংগ্রেস যদি স্বাধীনতা পায় তো আধখানা ভারতেই পাবে। বাকী আধখানার ভাগ্য নির্ধারিত হবে গৃহযুদ্ধে। সেটা তো আর অহিংসভাবে হবে না। সুতরাং গান্ধীজীর ভূমিকা শেষ। দেশটা যদি দু'তিন ভাগে বিভক্ত হয়ে যায় তো ভারতীয় জাতীয়তাবাদের মৃত্যু ঘটবে। তা যদি হয় কী নিয়ে আমি বাঁচব? আমারও যে মরতে ইচ্ছে করবে। ট্র্যাঙ্কেডী! ট্র্যাঙ্কেডী! ট্র্যাঙ্কেডী!”

ঠাঁর মুখে হাসি নেই, কণ্ঠস্বরে কান্নার আমেজ। আর সকলেরও তাই।

মানসের মনে পড়ে লিঙ্কনের প্রসিদ্ধ উক্তি “দিস্ নেশন ক্যান নট লিভ হাফ স্লেভ অ্যাণ্ড হাফ ফ্রী।” সে সম্পাদক মহাশয়কে স্মরণ করিয়ে দেয়।

“এ দেশটা আমেরিকা নয়, মানসমোহন। এখানকার শতকরা বাইশজন নাগরিক মুসলমান। আর্মিতে মুসলমানের অল্পপাত শতকরা চল্লিশ। বোধহয় এই যুদ্ধে পঞ্চাশ। এদের সহযোগিতা না পেলে, এদের বিরোধিতা পেলে

লিঙ্কনের ভূমিকায় অভিনয় করা অসম্ভব। আর তেমন ব্যক্তিত্বই বা কোথায়। তাঁর পেছনে রিপাবলিকান পার্টির মতো একটি রাজনৈতিক দলই বা কোথায়! শুধুমাত্র সৈন্তবলে বলীয়ান হয়ে তিনি গৃহযুদ্ধে জয়ী হতে পারতেন না। গান্ধীজী যে ব্রিটিশরাজের সঙ্গে লড়াইতে যাচ্ছেন সেটা কংগ্রেসের মতো এক বৃহৎ পাটি তাঁর পেছনে আছে বলেই।” ভবতোষবাবু যুক্তি দেখান।

মানস শুক্ক হয়ে শোনে। তার পর বলে, “তা হলে কি ইংরেজকে ভারত ছাড়তে আলটিমেটাম দেওয়া ভুল?”

“আলটিমেটাম না দিলে ওরা জাপানের সঙ্গে কোমর বেঁধে লড়াই না। আলটিমেটাম মানে আর কিছু নয়, হয় তোমরা জাপানের সঙ্গে প্রাণপণে লড়াই, নয় আমরা তোমাদের সঙ্গে প্রাণপণে লড়াই। হয় তোমরা জাপানের সামনা-সামনি হয়ে বল, করেক্ষে ইয়া মরেক্সে, নয় আমরা তোমাদের সামনাসামনি হয়ে বলি, করেক্ষে ইয়া মরেক্সে। ভারতের ইতিহাসে এমন সঙ্কট আর কখনো দেখা দেয়নি। এই যে অভূতপূর্ব সঙ্কট এ সঙ্কটে ইংরেজ, কংগ্রেস, মুসলিম লীগ, রাজগুরুগণী সকলেরই কর্তব্য একজোট হয়ে জাপানের সম্মুখীন হওয়া। তার জন্তে চাই একটি গ্রাশনাল গভর্নমেন্ট। গ্রাশনাল ওয়ার ফ্রন্ট তার বিকল্প নয়। তার অল্পযত্ন। আপনি যে কাজ করছেন সে কাজও একটা করবার মতো কাজ, হিতৈশচন্দ্র। কিন্তু গ্রাশনাল গভর্নমেন্ট না হলে সেটা যেন শিবহীন যজ্ঞ।” ভবতোষবাবু ভৌমিকের দিকে তাকান।

এবার সাহসে বুক ঠুঁকে সম্বর্ধনার প্রস্তাব তোলেন ভৌমিক।

“বলেন কী! সম্বর্ধনা! কাকে। বোমার ভয়ে পলাতককে! আমি যে মানিতে মরে যাচ্ছি। স্ত্রী নেই, কিন্তু ছেলেমেয়ে নাতি নাতনি তো আছে। কলকাতায় তাদের বোমার মুখে কেলে রেখে আমি যে পালিয়ে এসেছি এটা কি সম্বর্ধনার যোগ্য কীর্তি? আমি আসতে চাইনি, কিন্তু ওরা আমাকে মোটরে চাপিয়ে জোর করে চালান করে দিয়েছে। বুদ্ধবয়সে আমি অসহায়।” তিনি সহাস্তে বলেন।

এর পরে তিনি গম্ভীর হয়ে স্মৃতিচারণ করেন। “তরুণ বয়সে আমি প্রতিজ্ঞা করেছিলাম যে জীবনে কখনো সরকারী চাকরি করব না। তাই সরকারী চাকরির সুযোগ পেয়েও সুযোগ নিইনি। বেসরকারী চাকরিও চাকরি। তাই হাতের লম্বা পায়ে ঠেলেছি। স্বাধীনভাবে সম্পাদকতা করেছি। অল্পে সন্তুষ্ট থেকেছি। সরকারের কাছে কোনোদিন কিছু চাইনি বা পাইনি। আজ



শেষ বয়সে সম্বৰ্ণনা গ্রহণ করি কোন্ স্ববাদে ? সরকারেরই বা এই স্মৃতি কেন ? এতে করে কি দেশবাসীর হৃদয় স্পর্শ করা যাবে ? আমি আজীবন স্বরাজের জন্তে একজন সম্পাদকের পক্ষে যা করবার তা করেছি। স্বরাজের কয়েকটা ধাপ পার হয়ে আসা গেছে। শেষেরটা বাকী আছে। ইংরেজদের কাছ থেকেই আমি সেটা চাই। জাপানীদের কাছ থেকে নয়। ইংরেজরা দক্ষিণ আফ্রিকাকে স্বরাজ দিয়েছে। আয়ারল্যান্ডকেও। জাপানীরা কবে কাকে স্বরাজ দিয়েছে ? তাদের কাছে স্বরাজ প্রত্যাশা করা মূঢ়তা। স্বরাজ কখনো পূর্ব দিক থেকে আসবে না। একদিন না একদিন পশ্চিম দিক থেকেই আসবে। তার জন্তে গান্ধীজী যা করেছেন তা আমি সব সময় সমর্থন না করলেও মোটের উপর অমুমোদন করেছি। এবারেও আমার মনে কিছু বিধা আছে। আমার বিশ্বাস বর্তমান পরিস্থিতিতে ভারতীয় সৈন্যদের পক্ষে একাকী দেশরক্ষা করা সম্ভব নয়। ব্রিটিশ সৈন্যদের উপস্থিতি অপরিহার্য। কে জানে জাপানীদের মনে কী আছে ? অকস্মাৎ একদিন একটা পাল হারবার ঘটিয়ে বসবে। ইংরেজদের আমি যতটুকু বিশ্বাস করি জাপানীদের ততটুকুও করিনে। লক্ষ করেছেন কি না জানিনে, ইংরেজরা জার্মানীর বিরুদ্ধে যুদ্ধ ঘোষণা করেছে, সেটাই আন্তর্জাতিক প্রথা। কিন্তু জাপানীরা চীনের বিরুদ্ধে তা করেনি। ব্রিটেনের বিরুদ্ধেও না। একটা আজব তত্ত্ব শুনিছি। জাপানীদের উদ্দেশ্য নাকি ব্রিটিশবিতাড়ন, ভারত অধিকার নয়। তাই ব্রিটিশ বিতাড়নের কাজটা ভারতীয় জনগণকেই আগে ভাগে করে রাখতে হবে। তা হলে আর জাপানীরা ভারত অধিকার করতে পা বাড়াবে না। এটা কি জাপানী মনস্তত্ত্বের উপর প্রতিষ্ঠিত ? না মহাত্মার মহত্বের উপর ? ভারতের ঘরে ক্ষমতার শূন্যতা দেখলে বাইরে থেকে কেউ না কেউ ছুটে আসবেই। জাপানীরা সব চেয়ে নিকটে। সুতরাং জাপানীদের দ্বারাই ক্ষমতার শূন্যতার পূরণ হবে। আমাদের কর্তব্য আমি যতটুকু বুঝি পাওয়ার ভ্যাকুয়াম্ আদৌ ঘটতে না দেওয়া। পাওয়ার ভ্যাকুয়াম্ ঘটলে কংগ্রেস একাকী তা পূরণ করতে পারবে না। সঙ্গে নিতে হবে মুসলিম লীগ তথা অন্যান্য শরিকদের। কিন্তু তারা যদি দেশের উপরে সম্প্রদায়ের স্বার্থকেই উচ্চতর স্থান দেয় তবে তো মিলে মিশে শূন্যতা পূরণ করা চলেবে না। আমাকে বাধ্য হয়ে স্বীকার করতে হচ্ছে যে সীমান্তের ওপারে জাপান থাকতে এপারে পাওয়ার ভ্যাকুয়াম্ সৃষ্টি করা সমীচীন নয়। স্বরাজের আরো দেরি হয় হোক। 'কুইট ইণ্ডিয়া টু গড অর অ্যানাকি' শুনে

আমি চমকে উঠি। ওটা হলো বিশ্বাসীর উক্তি, যুক্তিবাদীর নয়। ইংরেজদের অস্তিত্বই জাপানীদের ডেকে এনেছে কি-না তর্কসাপেক্ষ। কিন্তু সীমান্তের ওপারে যতদিন জাপানীদের অস্তিত্ব ততদিন আমাদের আশঙ্কার কারণ রয়েছে। ইংরেজরা ততদিন থাকলে আশঙ্কাটা কমে। তবে তাদের নিরঙ্কুশ হতে দেওয়া নিরাপদ নয়। পোড়ামাটি নীতি অবলম্বন করে কে জানে কী ধ্বংস করবে! সেইজন্তাই তো গোটা ডিফেন্স পোর্টফোলিওটা একজন ভারতীয় পারিষদের হাতে দেওয়া চাই। কংগ্রেসের দাবী অযথা নয়।”

মানস তাঁর সঙ্গে একমত হয়। তবে চার্চিলকে বোঝায় কার সাধ্য!

তা শুনে ভৌমিক বলেন, “লাটসাংহেবের সঙ্গে এ নিয়ে কথা হয়েছিল। তাঁর বক্তব্য, মিস্টার চার্চিল ইজ নট ইংল্যান্ড।”

“কিন্তু এবারকার মহাযুদ্ধে চার্চিলই তো ইংল্যান্ডের ভরসা। সেবার যেমন অ্যাসকুইথকে সরিয়ে দিয়ে লয়েড জর্জ প্রধানমন্ত্রী হন এবার তেমন কেউ নেই যে চার্চিলকে সরিয়ে দিয়ে প্রধানমন্ত্রী হবেন।” মানস যতদূর জানে।

“তবে চার্চিলও একেবারে কাণ্ট আয়রন নন। দেখছেন না তাঁর পরম শত্রু স্টালিনের সঙ্গেও কোলাকুলি করছেন?” ভৌমিক তর্ক করেন।

সম্পাদক মহাশয়ও তর্কে যোগ দেন। “ইংরেজদের মস্ত বড়ো গুণ ওরা সময় বুঝে ওদের পলিসি বদলায়। চার্চিলও একজন ইংরেজ। তিনি পরিষ্কার বুঝতে পারছেন যে হিটলারকে হারিয়ে দিতে হলে স্টালিনকে মদত দেওয়া চাই। যদি তা সত্ত্বেও স্টালিন হেরে যান তবে কমিউনিজমও হেরে যাবে। রক্ষণশীলদের হাড় জুড়াবে। সে রকম একটা পরিস্থিতি ভারতেও দেখা দিতে পারে, যদি বামপন্থীরা ভারতীর জওয়ানদের ভাঙিয়ে নিয়ে বিপ্লব ঘটায়। তখন চার্চিল বাবাজীর টনক নড়বে। তিনি গান্ধীজীর সঙ্গে তাঁর চির বিরোধ ভুলে যাবেন। তবে মহাত্মা বোম্বেয় তাঁর সাহায্য নেবেন না। তিনি বরাবর আত্মনির্ভর।”

“কিন্তু বামপন্থীরা তো এখন পরস্পরবিরোধী।” মানস সবিনয়ে বলে। “একদল খুঁকেছে ইংরেজদের পক্ষে, যেহেতু ইংরেজ রাশিয়ার পক্ষে। আরেকদল ইংরেজের বিপক্ষে, যেহেতু ইংরেজ স্বাধীনতার বিপক্ষে। বিপ্লবটা মাঠে মারা যাবে, যদি বামপন্থীরা পরস্পরকে মেরে সাবাড় করে। জওয়ানরাও যে নিজেদের মধ্যে মারামারি বাধাবে না তা নয়। হিন্দুরা হাঁকবে ‘দুর্গা মায়াকী জয়’ আর মুসলমানরা হাঁকবে ‘আল্লা হো আকবর।’ আর শিখেরা

হাঁকবে 'সং শ্রী অকাল'! একজনও হাঁকবে না 'ভারতমাতাকী জয়' বা 'হিন্দুস্থান জিন্দাবাদ'। আর বিপ্লব? যেখানে ঘটবার বিপ্লব ঘটেছে কেবল রাজশক্তির বিরুদ্ধে নয় পুরোহিততন্ত্রের বিরুদ্ধেও ঘটেছে। পুরোহিততন্ত্রের জোর যেখানে এত বেশী সেখানে রাজদ্রোহ হতে পারে, বিপ্লব হতে পারে না। রাজদ্রোহকেই আমাদের বামপন্থীরা বিপ্লব বলে ভ্রম করেন। পুরোহিততন্ত্রের সঙ্গে লড়বার মতো সাহস তাঁদের নেই। ঠাকুর দেখলেই গড় করেন। বিবাহের বা শ্রাদ্ধের অহুষ্ঠানে বামুন ঠাকুরকেও তাঁদের চাই।”

সম্পাদক মহাশয় খুশি হয়ে বলেন, “তা হলে ভেবে দেখুন আমাদের যোরনে পৌত্তলিকতা বর্জন ও উপবীত ত্যাগ কতখানি বৈপ্লবিক ছিল। আমাকে আমার পিতৃকুল, মাতৃকুল ও স্বশুরকুলের সঙ্গে কী পরিমাণ সংগ্রাম করতে হয়েছিল। সংগ্রাম বলতে কি কেবল কারাবরণ বা সাহেব নিধন বোঝায়? বিপ্লব হচ্ছে আমূল পরিবর্তন। জীবনের সর্ব ক্ষেত্রে। আমরা সর্ব ক্ষেত্রে হাত দিতে পারিনি। জনবল আমাদের ছিল না। তা ছাড়া ইংরেজকে আমরা কেবল বিদেশী বা সাম্রাজ্যবাদী শত্রু ভাবিনি। মিত্রও ভেবেছি তাদের আধুনিকতার জন্তে, প্রগতিশীলতার জন্তে। জুডিসিয়াল সীস্টেমের জন্তে, পাল'মেন্টারি সীস্টেমের জন্তে। এত বেশী ব্যক্তিগত স্বাধীনতা আর কোন্ রাজত্বে ছিল? ইণ্ডিয়ান বলুন, গ্রামিনাল বলুন, কংগ্রেস বলুন তিনটিই তো ওদেরই নৃষ্টি। সম্পর্কটা পরে তিতিয়ে যায়।”

## ॥ সতেরো ॥

ভবতোষবাবুর মফঃস্বলবাস সীতার বনবাস নয়। কলকাতা থেকে তাঁর পুজেরা মাঝে মাঝে এসে দেখা করে যান। দূর সম্পর্কের আত্মীয়রা এই শহরেই বাস করেন। তত্ত্বাবধানের অভাব হয় না। তবু তাঁর মন উড়ু উড়ু। কবে ফিরে যাবেন এই তাঁর ধ্যান।

একদিন তাঁর বড়ো ছেলে পরিতোষ মানসের সঙ্গে আলাপ করতে আসেন। “আপনারা এখানে না থাকলে বাবা এখানে থাকতে চাইতেন না। মিসেস মল্লিকেরও উনি ভূয়সী প্রশংসা করেন। আমরা আপনাদের ছ'জনের কাছে কৃতজ্ঞ।”

তখন যুথিকাকেও তাঁর সঙ্গে আলাপ করিয়ে দেওয়া হয়। সে চায়ের আয়োজন করে। বলে, “কলকাতার অবস্থা জানতে ইচ্ছে করে।”

পরিতোষবাবু বলেন, “আশু আশু স্বাভাবিক হয়ে আসছে। মানুষ এমন জীব যে সব রকম অবস্থার সঙ্গে মানিয়ে নেয়। তা সে যুদ্ধই হোক আর দুর্ভিক্ষই হোক আর ভূমিকম্পই হোক আর মহামারীই হোক। ব্ল্যাক আউট, তবু থিয়েটার সিনেমা একরাতিও বন্ধ নেই। ফটকা, জুয়া, ঘোড়দৌড়, ভাগ্যগণনা সমানে চলেছে। মন্দির, মসজিদ, গির্জা তো জনশূন্য হতে পারে না। পলাতকরা দলে দলে ফিরে আসছে। মাথার উপর বাজ পড়লেও তারা আর পলাবে না। এই নগরেই কর্ম আমার এই নগরেই মরি।”

“তা হলে তো আপনার বাবাকেও ফিরিয়ে নিয়ে যেতে হয়। কেন তিনি এমন পাণ্ডবের মতো অজ্ঞাতবাস করবেন? অত বড়ো প্রসিদ্ধ জ্ঞানীকে এখানে চিনবে কে? তাঁর রেফারেন্সের বই জোগাবে কে? আমাদের সামান্য সংগ্রহ থেকে বই ধার করতে আসেন। আমরা ধৃত বোধ করি। আপনি এসে ঠিক সময়ে ফিরিয়ে দিয়ে যান। আর কেউ তো ফেরৎ দেবার কথা মনে রাখে না।” যুথিকা বলে।

“সত্যি, দরকারী রেফারেন্সের বই হাতের কাছে না পেলে বাবার মতো সবজ্ঞানতা সম্পাদকের চলে না। আমাকে লিখলে আমি নিয়ে আসতে পারতুম, কিন্তু সেটুকু দেরিও তাঁর সহিত না। খাবারের মতো খবরও গরম গরম পরিবেশন করতে হয়। তেমনি খবরের উপর মন্তব্যও। তাঁর সময়োচিত মন্তব্য পড়ে গভর্নমেন্টেরও পলিসি বদলে যেতে দেখেছি। আর গান্ধীজীও সম্প্রতি বলতে আরম্ভ করেছেন যে ব্রিটিশ সৈন্য ভারতের মাটিতে মোতায়ন থাকতে পারে, যদিও ব্রিটিশ শাসনকে অপসরণ করতে হবে। অবিকল বাবার বক্তব্য।” পরিতোষবাবু দাবী করেন।

“আমিও একমত।” মানস সমর্থন করে।

“আমি কিন্তু একমত নই।” পরিতোষবাবু একটা চমক দেন।

“সে. কী! আপনার বাবার সঙ্গে আপনার মতের মিল নেই। কী তা হলে আপনার মত?” মানস জানতে উৎসুক।

“দেখুন, মিষ্টার মল্লিক, গান্ধীজী আর বাবা প্রায় একবয়সী। তাঁদের চিন্তাধারা ষোঁটাহুটি একই খাতে বয়। যদিও মতভেদও মাঝে মাঝে ঘটে। আমি হচ্ছি কিনা জবাহর আর সুভাষের সমবয়সী। আমাদের চিন্তাধারা

আরো একেলে। এর নাম জেনারেশন গ্যাপ। আরো খোলসা করে বলি, ব্রিটিশ সৈন্য এদেশের মাটি আঁকড়ে থাকতে এ মাটির সম্ভাবনা কখনো স্বাধীনতার স্বাদ পেতে পারে না। পূর্ণ ক্ষমতার স্বাদ পেয়ে নেতারা পুনরুজ্জীবিত হতে পারেন, কিন্তু আমরা তো নেতা নই। সাধারণ নাগরিক। আমরা তো ক্ষমতার স্বাদ পেতে পারিনে, স্বাধীনতার স্বাদই পেতে পারি। অরাজকতাকে আমরা ভয় করিনে। তাতেও মেলে স্বাধীনতার স্বাদ। গান্ধীজী গোড়ায় যা বলেছিলেন সেটাই ছিল আমাদের মনের কথা। পরে যেটা বলতে শুরু করে- ছেন সেটা বাবার মতো দরদী সমালোচকদের মুখ বন্ধ করার জন্যে গোঁজামিল। কেন, ব্রিটিশ সৈন্য থাকবে কেন? ভারতরক্ষার জন্যে ভারতীয় সৈন্যই কি যথেষ্ট নয়? দরকার দেখলে আমরা আরো রিক্রুট করব। জাপানী সৈন্যরা এখন সমগ্র পূর্ব এশিয়া জুড়ে ছড়িয়ে পড়েছে। ভারত অভিযানের জন্যে ওরা বড়ো জোর হাজার ত্রিশেক সৈন্য বরাদ্দ করতে পারে। ত্রিশ হাজারকে রুখতে তার দু'গুণ সৈন্য তৈরি। তফাৎটা শুধু এই যে জাপানীরা স্বাধীন দেশের সৈনিক, আর ভারতীয়রা পরাধীন দেশের। স্বাধীনের সঙ্গে পরাধীনের সংঘর্ষে পরাধীনের মনের জোর কম। গান্ধীজী বলেন এখন থেকে আমাদের স্বাধীন বলে ভাবতে হবে, পরাধীন বলে নয়। সৈনিকরা যেদিন অহুভব করবে যে তারাও স্বাধীন সেদিন নতুন প্রেরণায় উদ্দীপ্ত হয়ে জাপানী সৈনিকদের সঙ্গে লড়বে। এইজন্মে ই না আমরা চাই ব্রিটিশ সৈন্যের অপসারণ। হয় হবে অরাজকতা। নিতে হবে তার ঝুঁকি। নো রিস্ক, নো গেন। বাবাকে এ ভদ্র বোঝানো শক্ত।” পরিতোষবাবু চায়ে চুমুক দেন।

“তা এই যদি হয় আপনার চিন্তাধারা তবে তা আপনাদের নিজেদের পত্রিকায় প্রকাশ করেন না কেন?” মানস জিজ্ঞাসা করে।

“সর্বনাশ! যুদ্ধকালে কড়া সেন্সরশিপ। সম্পাদককে পুলিশে ধরে নিয়ে যাবে। কাগজ বন্ধ করে দেবে। আমরা তখন দাঁড়াব কোথায়?” পরিতোষবাবু কাতর দৃষ্টিতে তাকান।

“তা হলে লিখে কাজ নেই। কিন্তু আমার মনে হয় অরাজকতা সম্বন্ধে আপনার চেয়ে আমার ধারণা আরো পরিষ্কার। আইন অহুসারে ক্ষমতার হস্তান্তর না করে ব্রিটিশ রাজ যদি হঠাৎ উধাও হয় তবে জঙ্গ হিসাবে আমার বিচারের অধিকার থাকবে না, জেলা ম্যাজিস্ট্রেটের শাসনের অধিকার থাকবে না, পুলিশ সুপারিন্টেন্ডেন্টের গ্রেপ্তারের অধিকার থাকবে না, জেলারের বন্দী

আটক করার অধিকার থাকবে না, ট্রেজারি অফিসারের বেতন দেবার অধিকার থাকবে না। চোখের সামনে ট্রেজারি লুট হয়ে যেতেও পারে। লুটেরাদের ধরবে ক' ? বাঁধবে কে ? সাজা দেবে কে ? সাজা বলবৎ করবে কে ? যে যার খুশিমতো একটা প্রোভিজনাল গভর্নমেন্ট খাড়া করতে পারে, কিন্তু সে গভর্নমেন্টের প্রতি আত্মগত্যা স্বতঃসিদ্ধ নয়। নিযুক্তিপত্র আসা চাই, সে নিযুক্তি পত্র সকলের দ্বারা স্বীকৃত হওয়া চাই। নইলে আমরা হব গাঁয়ে মানে না আপনি মোড়ল। আজকের এই প্রেস্টিজ আর থাকবে না। গান্ধীজী বলেছেন অরাজকতা হয়তো দিন পনেরো স্থায়ী হবে। কিন্তু দিন পনেরোর ব্রেকও তো একটা ব্রেক। সেই পনেরো দিনের জন্তে আমাদের প্রত্যেকের চাকরিতে ব্রেক হবে। আমরা মাইনে পাব না। পরে হয়তো নতুন শর্তে চাকরি করতে হবে। মিলিটারিতে যারা কাজ করছে তাদের খোলাতেও একথা খাটে। পনেরো দিন যদি তারা বেকার বসে থাকে তো যুদ্ধ করবে কোন অধিকারে ? সেই যুদ্ধবিরতির ফাঁকে জাপানীরা এগিয়ে এসে জেলার পর জেলা দখল করতে পারে। সেসব জেলার লোক কি স্বাধীনতার স্বাদ পাবে, না দ্বিতীয় পরাধীনতার স্বাদ ? কেউ না কেউ গান্ধীজীকে এসব কথা বুঝিয়েছে। তাই তিনি 'কুইট ইণ্ডিয়া' বহাল রাখলেও 'টু গড অর অ্যানাকি' বাদ দিয়েছেন।" মানস অঙ্গুলিনির্দেশ করে।

পরিতোষবাবু জানতেন না যে ব্রিটিশ বিদায়ের সঙ্গে সঙ্গেই অফিসার-মাজেরই চাকরি খতম হবে। তাঁর আপিস লুট হয়ে গেলেও থানার অফিসার-ইন-চার্জ তাঁর ডাকে সাড়া দেবেন না, কারণ তিনি আর অফিসার-ইন-চার্জ নন। তিনি কেউ নন। পরিতোষবাবুদের বাড়ী পুড়ে গেলেও দমকল বাহিনী তাঁর ডাকে সাড়া দেবে না। কারণ সে বাহিনীর কার্যকাল ফুরিয়েছে। তিনি যে রেলস্টেশনে গিয়ে ট্রেনে উঠতে পারবেন সেটাই বা কেমন করে সম্ভব হবে ? যদি ড্রাইভার, গার্ড, লাইনসম্যান কেউ কাজে যোগ না দেয়। তা হলে তিনি তাঁর বাবাকে দেখতে আসবেন কী করে ? মোটরে করে ? পথে ডাকাত পড়ে মোটরটাই ছিনিয়ে নেবে।

“না, পনেরো দিনের অরাজকতার কথা আমি সমর্থন করিনে। অরাজকতা যদি হয় একদিন কি দু'দিনের জন্তে হবে।” পরিতোষবাবু নেমে আসেন।

“আহা, সেইটেই তো হয়েছিল রেঙ্গুনে। দিন তিনেকের জন্তে। সে ক'টা দিনের বিভীষিকার বৃত্তান্ত কি আপনারা রেঙ্গুনফোর্টাদের মুখে শোনেননি ?

জেলখানা আর পাগলা গারদ খালি পেয়ে ধারা বেরিয়ে আসে তাদের আবার জেলখানায় আর পাগলা গারদে পোরার আগে বিষয় কাণ্ড ঘটে যায়। বিপ্লবের দিনেও রাশিয়ায় অরাজকতা হয়নি। সঙ্গে সঙ্গে প্রোভিজনাল গভর্নমেন্ট গঠিত হয়। পরিবর্তনটা অধিকাংশ অফিসার মেনে নেন। মানেন না ধারা তাঁদের শৃঙ্খলান সঙ্কে সঙ্গে পূর্ণ হয়। আসলে অরাজকতার কথাটা গান্ধীজীর মাথায় আসে এটজেন্টেই যে ব্রিটিশ রাজ কাউকেই তাঁদের স্বাভিষিক্ত করতে রাজী নন। কংগ্রেসকে তো নয়ই, মুসলিম লীগকেও তাঁরা ক্ষমতার আসনে বসিয়ে বিদায় নেবেন না। তা হলে তাঁরা কাউকে আসন ছেড়ে না দিয়েই বিদায় হোন। ঘটুক একটা সাময়িক শৃঙ্খতা। পূরণ করবে হয় কংগ্রেস, নয় লীগ, নয় উভয়ে, নয় আর কেউ। কিন্তু তা যদি হয় তবে তো সেটা সেই রেজুনের মতো পরিস্থিতি। অমন এক অনিশ্চয়তার মুখে সবাইকে ফেলে দিয়ে ইংরেজরা চম্পট দিলে স্বাধীনতার স্বাদ বিশ্বাদ লাগবে মিস্টার আচার্য। ওয়ার অভ সাকসেসন বেধে যেতে পারে। কংগ্রেসে ও লীগে। হিন্দুতে ও মুসলমানে। বিশেষ করে পাঞ্জাবে ও বাংলাদেশে। দেশ খণ্ড খণ্ড হয়ে যেতে পারে। ভারতীয় জাতীয়তাবাদ নামক তত্ত্ব মুসলমানদের ক'জন মানে? জোর করে চাপাতে গেলে উন্টো বিপত্তি হবে। ওরা ইংরেজকেই আঁকড়ে ধরবে। ইংরেজও ওদের হাতে হাতিয়ার ধরিয়ে দেবে।” মানস শিউরে ওঠে।

পরিতোষবাবু অনেকটা শান্ত হয়ে বলেন, “আমরা ইংরেজদের উপর এতদূর ক্ষেপে রয়েছি যে মুসলমানদের দিকে নজর দিতে হেলা করছি। ইংরেজদের সঙ্গে আমাদের একটা অলিখিত চুক্তি ছিল যে ওরা আমাদের বহিঃশত্রুর আক্রমণ থেকে রক্ষা করবে। সে কাজ ওরা দু'শো বছর ধরে কবেছেও। কিন্তু এখন আর পারছে না। সিদ্ধাপুর, মালয় আর বার্মা হলো ভারতের তিন তিনটি গেটওয়ে বা দেউড়ি। তিনটিই ওরা ছেড়ে দিয়ে পালিয়ে এসেছে। তার ফলে চুক্তির খেলাপ হয়েছে। তেমনি আরো একটা অলিখিত চুক্তি ছিল ওরা হিন্দুরও পক্ষ নেবে না, মুসলমানেরও পক্ষ নেবে না, হবে নিরপেক্ষ। কিন্তু কার্জনী আমল থেকে আমরা দেখে আসছি ওরা নিরপেক্ষ নয়, ওদের পক্ষপাতটা স্বয়োরানীর উপরে। ব্যামফীল্ড ফুলার তো প্রকাশে বলেছিলেন মুসলিম সম্প্রদায়ই ওর ফেভারিট ওয়াইফ। স্বয়োরানীর দাবী স্বতন্ত্র নির্বাচকমণ্ডলী থেকে শুরু করে স্বতন্ত্র বাসভূমি অবধি গড়িয়েছে। প্রথম দাবীর মতো চরম দাবীও একদিন মেনে নেওয়া হবে। তার মানে আরো এক

চুক্তিভঙ্গ। কেন তবে আমরা ঘটনার শ্রোতাকে ততদূর গড়াতে দিই? কেন তার আগে তৃতীয় পক্ষকে বিদায় না করি? তৃতীয় পক্ষ চলে গেলেই বরং দুই পক্ষে সমঝোতা হতে পারে। 'তৃতীয় পক্ষ ঘরে থাকতে নয়।'

"সমঝোতা হবে, না গৃহযুদ্ধ হবে, কেমন করে জানলেন? কাগজ খুললেই তো দেখি গালিগালাজ। গালগালি থেকেই একদিন আসবে মারামারি। ক্রম ওয়ার্ডস দে মে কাম টু রোজ।" মানস আশঙ্কা করে।

"সেটাও তৃতীয় পক্ষ আছে বলেই। ওরাই তলে তলে উদ্বেগ দিচ্ছে। ওরা সরে গেলেই দুই পক্ষে মিটমাট হবে। ঝগড়া তো চিরকাল চলতে পারে না। কিন্তু ওরা যদি দেশটাকে ছুঁটুকরো করে দিয়ে যায় তবে দুই সমান্তরাল রেখা আর কোনোদিন জোড়া লাগবে না। যেমন লাগেনি আয়ারল্যান্ডে। আইরিশদের উচিত ছিল বিগত মহাযুদ্ধের মাঝখানেই ইংরেজদের আয়ারল্যান্ড ছাড়তে বাধ্য করা। ডি ভালেরা সেই চেষ্টাই করেছিলেন, কিন্তু আইরিশদের অধিকাংশই ছিল জার্মানদের বিপক্ষে ও ইংরেজদের পক্ষে। যেমন ছিল ভারতীয়দেরও অধিকাংশ। সেই ভুলটা আমরা এদেশে করব না এই যুদ্ধে। নইলে যা হবে তা আয়ারল্যান্ডের পার্টিশনের পুনরাবৃত্তি। আমরা আগে খেদাব ইংরেজকে, তার পরে জাপানীকে। এইখানেই আমাদের গুরুজনদের সঙ্গে আমাদের মতভেদ। তাঁরা চান আগে জাপানীদের খেদাতে, তারপরে ইংরেজদের।" পরিতোষবাবু খোলসা করেন।

তর্কটাকে থামিয়ে দেয় যুক্তি। "আমরা আপনার চেয়ে কমবয়সী। আমাদের কতটুকু অভিজ্ঞতা! কতটুকু জ্ঞান! কে যে কাকে খেদাবে, কাকে আগে আর কাকে পরে, এসব আমাদের জ্ঞানবুদ্ধির বাইরে। আমরা শুধু এইটুকু চাই যে আমাদের যেন বিহারের দিকে খেদিয়ে নিয়ে যাওয়া না হয়।"

পরিতোষবাবু প্রথমটা ঠাहर করতে পারেন না। মানস তাকে বুঝিয়ে দেয় যে জাপানীরা এতদূর এলে তাকে বিহারে প্রব্রজ্যা করতে হবে, যদি না সে জাপানী সৈন্যদের তোয়াজ করতে রাজী হয়।

"আরে, না, না! আপনি কেন করবেন তোয়াজ? তবে তার আগেই যা ঘটবার ঘটবে, মিস্টার মল্লিক। একটি ছোট পাখী আমার কানে ফিসফিস করে বলেছে যে বিহারীরা এখন থেকেই তৈরি হচ্ছে আন্দোলনে ঝাঁপিয়ে পড়তে। শুধু গান্ধীজীর কাছ থেকে সিগনালের অপেক্ষা। ওরা ট্রেন চলাচল বন্ধ করে দেবে। মোটর চলাচলও বাধা পাবে। তখন কোথায় থাকবে



ইংরেজদের পালাবার পথ ! তখন বাধ্য হয়ে কংগ্রেসের সঙ্গে মিটমাট করতে হবে। ওদের আমরা ভারত ছাড়াতে চাইনে, গদী ছাড়াতে চাই। হাতীর হাওদার গদীতে বসে আমরাই জাপানীদের তাড়াব ! জাপানী এতদূর আসবে না, মিসেস মল্লিক।” অভয় দেন পরিতোষবাবু।

‘ওমা, তাই নাকি।’ চেঁচিয়ে ওঠে যুথিকা।

“চুপ ! চুপ !” পরিতোষবাবু ঠোটে আঙুল ঠেকান।

মানস বলে, “কিন্তু ওটা তো গণ সত্যাগ্রহ নয়। যুদ্ধকালে ওর নাম সাবোটাশ।”

পরিতোষবাবু চটে যান। “আরে মশায়, রাখুন আপনার জজিয়তী ! কেবল চুলচেরা বিচার। একটা নেশনের লাইফ অ্যাণ্ড ডেথ স্ট্রাগল কতরকম রূপ নিতে পারে। ওটাও একটা রূপ ! যারা পারবে তারা সত্যাগ্রহ করবে। যারা পারবে না তারা সাবোটাশ করবে। যদি নরহত্যা না করে তবে সেটাই হবে যথেষ্ট অহিংসা। দয়া করে বাবার কানে এসব তুলবেন না। তিনি আশা করছেন যে শেষ মুহূর্তে একটা আপস হবে। আরেকটা গান্ধী-বড়লাট চুক্তি।”

বিহারের মতো যুক্তপ্রদেশেও রেল লাইন বন্ধ করার তোড়জোড় চলছে এ রকম একটা গুজবও শোনা গেল জেলা ম্যাজিস্ট্রেটের বাড়ীতে বেগম হায়দারের মুখে। তিনি আরো মাস খানেক দেরি করতেন, কিন্তু ট্রেন চলাচল অনিশ্চিত হতে পারে, এই গুজব শুনে ছুটে এসেছেন। যারটে তা কিছু কিছু বটে।

আলী হায়দার মানসকে ও তাঁর বেগম যুথিকাকে নিয়ে আলাদা আলাদা ঘরে গিয়ে বসেন। যাতে প্রাণ খুলে কথা বলা সহজ হয়।

“আপনাকে তো গ্রামে গল্পে টুরে যেতে হয় না। আমাকে যেতে হয়। আগে তো সবাই জেলা ম্যাজিস্ট্রেটকে যমের মতো ডরাত। কিন্তু ইদানীং কী এক হাওয়া উঠেছে। যেখানেই যাই এণ্ডা বাচ্চা ছেলে ছোকরা এসে চিল্লায়, ‘কুইট ইণ্ডিয়া। ইচ্ছে করলে ওদের আমি গ্রেপ্তার করতে পারতুম, কিন্তু করিনে। যুদ্ধে ওদের সহযোগিতা আমাদের দরকার। প্রচারকার্য করতে বেরিয়ে গ্রেপ্তারকার্য করতে পারিনে। করলে প্রচারকার্য বুখা যাবে। সহ্য করতে হয়। হাসিমুখে বলতে হয়, আমি তো ইংরেজ নই। আমি ভারত ছেড়ে যাব কোন্ দেশে ? পাকিস্তানে ? অমনি ওদের মুখ চুপ। মল্লিক, গান্ধীজীর এই স্লোগান জিহ্বা সাহেবকেই সাহায্য করছে। তিনিও বলছেন, ‘ডিভাইড অ্যাণ্ড কুইট’। ইংরেজরা কুইট করলে শাসনব্যয় ভেঙে পড়বেই।

ইণ্ডিয়ান মিডিল মার্ভিস, ইণ্ডিয়ান পুলিশ, ইণ্ডিয়ান আর্মি—কোনোটাই আশ্রয় থাকবে না। উচ্ছৃঙ্খল জনতাকে কন্ট্রোল করবে কারা? কেমন করে ধ্বংস করতে হয় এ বিজ্ঞা ধারা ওদের শেখাচ্ছেন তাঁরা?” হায়দার হেসে উড়িয়ে দেন। রাজনীতিকদের উপর ঠর বিশ্বাস নেই।

মানস দুঃখ প্রকাশ করে। “আপনি রাজপ্রতিনিধি বলেই আপনাকে ওরা ‘কুইট ইণ্ডিয়া’ বলছে। আপনি যদি পদত্যাগ করেন তা হলে আর অমন কথা বলবে না। তেমনি, বড়লাট যদি পদত্যাগ করেন তবে তাঁকেও না। আক্ষরিক বা কায়িক অর্থে একটি ব্যক্তিকেও ভারত ছাড়তে হবে না। ভারতত্যাগ মানে পদত্যাগ। ‘ভাগ করো আর ত্যাগ করো’ বলতে যা বোঝায় তা কিন্তু শুধুমাত্র পদত্যাগ নয়। গান্ধীজীর সঙ্গে জিন্না সাহেবের তফাৎ এইখানেই। জিন্না সাহেব ইংরেজকে দিয়ে কেন্দ্রীয় সরকার ভাগ করিয়ে নেবেন। যে ইংরেজ এমনিতাই রাজ্যস্ব করতেন অসমর্থ। যার নাকের ডগায় যুক্তপ্রদেশের ও বিহারের জনতা রেল লাইন রোধ করার সাহস পাচ্ছে। যে জাপানীদের রুখতে পারছেন না সে জনতাকে রুখবে কিসের জোরে? শেষপর্যন্ত দেখা যাবে জনতাই জাপানীদের রুখছে। একই উপায়ে।”

“তার পর সেই উন্নত জনতার উপর অস্থূণ প্রয়োগ করবে কে? না সে নিরস্থূণ হয়ে লুটপাট খুনখারাপি ঘর জ্বালানো চালিয়ে যেতে থাকবে? অবশেষে বহুভাগ হয়ে গিয়ে এক অপরের উপর ঝাঁপিয়ে পড়বে? ইংরেজদের কিসের দায়? ওরা তো পালিয়ে বাঁচবে। জাপানীদেরই বা দায় কিসের? ওরাও ফিরে যাবে। দায় তো আমাদেরই। আমরা যদি যে যার পদে থাকি। না আমরাও পদত্যাগ করে প্রাণে বাঁচব? অরাজকতার দিনে আমাদের কর্তব্য কি ‘চাচা, আপনা বাঁচা’? আমি তো মনে করি তার বিপরীত।” হায়দার শব্দ হয়ে বলেন।

“গান্ধীজীও আমাদের পদত্যাগ করতে বলছেন না। যে যার পদে অধিষ্ঠিত থেকে যে যার কর্তব্য সম্পাদন করে যেতেই বলছেন।” মানস জানায়।

“গান্ধীজী তো সেইসঙ্গে ক্ষমতার বিকেন্দ্রীকরণের কথাও বলছেন। গ্রামে গ্রামে আশনাল গভর্নমেন্ট বা রেপাবলিক গঠনের নির্দেশও দিয়েছেন। এর মানে কী, মল্লিক? জেলা ম্যাজিস্ট্রেটের ক্ষমতা কি গ্রামে গ্রামে পঞ্চায়েতের মধ্যে বিলিয়ে দেওয়া যায়? জেলা জজের ক্ষমতা কি গ্রাম্য মোড়লের হাতে তুলে দেওয়া যায়? পুলিশ সুপারিন্টেন্ডেন্টের ক্ষমতা কি মহল্লার সর্দারের

উপর ত্যাগ করা যায়? ক্ষমতা আর দায়িত্ব একই মূল্যের এপিঠ ওপিঠ। দায়িত্ব পালন করতে কি এরা সক্ষম? কোনোদিন কি হবে? ভোটের অধিকার সবাইকে দেওয়া যেতে পারে, কিন্তু শাসনের অধিকার, ত্যাগবিচারের অধিকার, গ্রেপ্তারের অধিকারও কি সবাইকে দেওয়া যায়? ইংরেজদের জায়গায় ভারতীয়দের বসানো যায়, কিন্তু জজ, ম্যাজিস্ট্রেট ও পুলিশ সাহেবের জায়গায় যাকে তাকে বসানো স্বরাজও নয়, স্বরাজও নয়, চরম অব্যবস্থা। ভারতীয়করণ ভালো। কিন্তু বিকেন্দ্রীকরণ বলতে যদি এই বোঝায় তবে এটা ভালো নয়। আংশিক ক্ষমতা তো ইতিমধ্যেই ছেড়ে দেওয়া হয়েছে ইউনিয়ন বোর্ডের মেম্বারদের উপরে। আরো কিছু কথা ভাবা যাবে, কিন্তু আপাতত নয়।” হায়দার অভিমত দেন।

মানস চিন্তা করে বলে, “কয়েকটি অফিসারের সর্বময় কর্তৃত্ব স্বশাসন হতে পারে, স্বশাসন নয়। স্বশাসনের নিম্নতম স্তর থেকে উচ্চতম স্তর পর্যন্ত ক্ষমতার তথা দায়িত্বের পুনর্বিভাগ করতে হবে। এইপর্যন্ত আমি বুঝি। কিন্তু খুঁটিনাটি বুঝিনে। ব্রিটিশ আমলে ক্ষমতা নেমেছে উপরের দিক থেকে নিচের দিকে। স্বাধীন আমলে ক্ষমতা উঠবে নিচের থেকে উপরে। নিচের স্তরের নাগরিকরা যদি হৃদয়ঙ্গম করে যে জজ, ম্যাজিস্ট্রেট বা পুলিশ সাহেবের দায়িত্ব তারা পালন করতে অক্ষম তা হলে সেসব ক্ষমতা তারা জেলা স্তরে অর্পণ করবে। গান্ধীজীর স্বপ্ন এমন এক রাষ্ট্র যার চতুরঙ্গ নয় আমি, পুলিশ, কোর্ট ও জেল। এ স্বপ্ন স্বরাজের পরেও স্বপ্নই থেকে যাবে। তিনিও আপাতত ততদূর যেতে বলছেন না। দেশ তার জন্যে প্রস্তুত নয়।”

ওদিকে বেগম হায়দার বলছিলেন মুখিকাকে, “বর্তমানিয়ার সঙ্গে জাপানের লড়াই তো থমকে রয়েছে। ওরাও আসছে না, এরাও যাচ্ছে না। ভাবাছিলুম আরো কিছুদিন দেখি না কী হয়। বেঙ্গল যখন নিরাপদ হবে তখন ওঁর সঙ্গে মিলিত হব। কিন্তু শুনলুম সরকারের সঙ্গে কংগ্রেসের লড়াই শুরু হয়ে গেলে ট্রেন চলাচল বন্ধ হয়ে যাবে। কে জানে কতকাল আটকা পড়তে হবে। কংগ্রেসীরা নাকি বলছে এবার ওরা জেলে যাবে না। উন্টে ওরাই জেলে পাঠাবে। কী ভয়ঙ্কর কথা! তা হলে তো মিস্টার মল্লিকও নিরাপদ নন, মিস্টার হায়দারও না। জানিনে এখানে কংগ্রেসের জোর কত। ওখানে বড়ো কম নয়। সামনে একটা এস্পার কি ওস্পার। ওখানেও ভয় এখানেও ভয়। ভেবে দেখলুম আমার হাম আমার সাহেবের পাশেই। তাই আর দেখি না করে চলেই এলুম।”

“ভালোই করেছেন। তবে আমি তো ভয়ের ভেতন কোনো আভাস পাচ্ছি নে। না জাপানের দিক থেকে, না কংগ্রেসের দিক থেকে। যাই ঘটুক না কেন আমি আমার কর্তাকে ফেলে আর কোথাও যাব না। তবে বলতে পারছি নে সরকার তাঁকে আর কোথাও বদলী করবে কি না, আর কোনো পদে নিযুক্ত করবে কি না। ফ্রন্টে পাঠাতেও পারে। পাঠালে উনি যাবার জন্তে লাফাবেন। আজকের জগতে উনি নীরব দর্শক থাকতে চান না। ভয়ের কারণ আছে বইকি। ভয়কে জয় করতে হবে।” মুখিকা সাহস দেয়।

“আমিও কি আমার সাহেবকে বেশীদিন ছেড়ে থাকতে চাই? ঠুঁকে একলা ছেড়ে দিতে চাই? কিন্তু ঠুর স্বপ্ন যদি কখনো সফল হয়, পাকিস্তান সম্ভব হয়, তবে আমাদের মধ্যে ছাড়াছাড়ি হয়ে যাবে। পাঞ্জাবীদের শিকড় পাকিস্তানেই, তাদের তো শিকড়স্বল্প উপড়ে নিয়ে নতুন করে মাটিতে পুঁততে হবে না। তাদের অতীতের সঙ্গে ভবিষ্যতের বিচ্ছেদ ঘটবে। তারা পাকিস্তান চাইতেও পারে, পেতেও পারে। কিন্তু ওদের বেলা যেটা সুখের আমাদের বেলা সেটা দুঃখের। পরম দুঃখের। সাতশো বছরের একটা বটগাছকে তার ঝুরিসমেত শিকড়স্বল্প উপড়ে নিয়ে গিয়ে আরেক জায়গায় পুঁততে পারো, কিন্তু তাঁকে বাঁচাতে পারবে না। আমাদের বংশ যুক্তপ্রদেশের সঙ্গে ওতপ্রোত-ভাবে জড়িত। ঘরবাড়ী জমিজমা মসজিদ গোরস্থান মন্দির মাদ্রাসা স্কুল কলেজ ইউনিভার্সিটি সব কিছু ফেলে চলে যাব? শহরে গ্রামে আমাদের নাম গাঁথা। রাস্তায় ঘাটে আমাদের পরিচয় আঁকা। ভাষায় সাহিত্যে সঙ্গীতে নৃত্যে আমাদের ছাপ, আমাদের প্রভাব। সব মুছে যাবে? সাতশো বছরের কালচার বিলকুল সাফ? আর পাঞ্জাবীদের কি কালচার বলে কোনো পদার্থ আছে? কালচার বলতে ওরা বোঝে এগ্রিকালচার। আর মিলিটারি সার্ভিস। মনের দিক থেকে আমরা নিঃস্ব হয়ে যাব, যদি পাকিস্তানে গিয়ে বসবাস করি। ঠুর কাছে যেটা হোমল্যান্ড আমার কাছে সেটা ওয়েস্টল্যান্ড।” দীর্ঘশ্বাস ফেলেন বেগম হায়দার। তাঁর গলা ভারী হয়ে আসে।

“ওরা তো বাংলাদেশকেও পাকিস্তানের সামিল করতে চান। সেটা সম্ভব হলে কলকাতায় এসে নতুন করে শিকড় গাড়বেন। তা যদি হয় তবে কালচারের অভাব হবে না। আপনি নিশ্চয় মানবেন যে বাঙালীদের কালচার আছে। বাংলার কবি এখন বিশ্বকবি।” মুখিকা লগবে বলে।

“হ্যাঁ, বাঙালীদের কালচার আছে তা ঠিক। কিন্তু সেটাতে মুসলমানের

দান কতটুকু? আমরা যদি আলি আমরা কি ওতে আমাদের দান মিশিয়ে দিতে পারব? যেমন গঙ্গার সঙ্গে যমুনার স্রোত? বাংলার মুসলমান তো আমাদের বাঙালী না বানিয়ে ছাড়বে না। আর আমরা যদি ওদের হিন্দুহানী—না, না, পাকিস্তানী—বানাতে যাই তবে আমাদের মেরে তাড়াবে। বাংলাদেশ সম্বন্ধে আলমগীর বাদশা কী বলে গেছেন, জানেন? ওটা একটা নরক, যেখানে সবরকম স্বখাত্ত পাওয়া যায়।” বেগম সহাস্তে বলেন।

“তা হলে এই নরকটাকে পাকিস্তানের সামিল করে স্বর্গে পরিণত করা যাবে না। অমন একটা বিদ্যুটে প্রস্তাব প্রত্যাহার করাই ভালো। আপনারা আসুন, থাকুন, দান করতে চান করুন। আমরা স্বাগত জানাব। কিন্তু এটা যদি আপনারা হোমল্যাণ্ড হয় তো আমাদের কী হবে? করেন ল্যাণ্ড? না আমাদের শিকড়স্বত্ব তুলে নিয়ে গিয়ে যুক্তপ্রদেশের মাটিতে নতুন করে পোতা হবে? বাঙালীকে বানাতে হবে হিন্দুহানী? হিন্দুহানী আমরা উত্তরাধিকার-স্বত্ব পেয়েছি। হিন্দীভাষা তো পাইনি। আমরাই বা হিন্দীতে কী দান করতে পারি? হিন্দীতে লিখে কি আমাদের একজন নোবেল প্রাইজ পেতে পারবেন? বাংলাদেশ আমরা ছাড়ব না, কলকাতা তো নয়ই, তার আগে মারব ও মরব।” যুথিকা গভীরভাবে শুনিয়ে দেয়।

“আপনার সেক্টিমেন্ট আমারও সেক্টিমেন্ট। শিকড় তুলে নিতেও কষ্ট, শিকড় নতুন করে পুঁতেও কষ্ট। অকারণ এই কষ্ট।” বেগম হাতে হাত মেলান।

ওদিকে আলী হায়দার বলছিলেন মানসকে, “ইয়ে ক্রান্তিকারী জমানা ছায়।” জবাহরলালের হিন্দী উদূ মেশানো ভাষায়। “এ জমানায় সব কিংই সম্ভব। ইংরেজদের হাত থেকে স্বাধীনতা, হিন্দুদের হাত থেকে পাকিস্তান, বর্জোয়াদের হাত থেকে বিপ্লবী রাষ্ট্র। কিন্তু তার আগে জাপানকে রুখতে হবে, হটাতে হবে, হারিয়ে দিতে হবে। তাকে কোনোরকম প্রত্নয় দেওয়া উচিত নয়। অথচ সেই জিনিষটিই প্রকারান্তরে হতে যাচ্ছে। গণ লত্যাগ্রহ যদি যুদ্ধকালে না হয়ে শান্তিকালে হতো আমার তাকে আপত্তি থাকত না। কিন্তু যুদ্ধকালে গণ লত্যাগ্রহ আছে জাপানকে প্রত্নয়দান। জাপান এই ক্রান্তিকারী জার্মানার স্বযোগ নিয়ে আরো এক কদম এগিয়ে আসবে। পাকীজী অবশ্য বলে রেখেছেন যে তিনি ডেমন কিছু বটতে দেখেছেন গণ লত্যাগ্রহ বন্ধ করে দেবেন। কিন্তু বোতলে বন্দী দৈত্যকে একবার বোতল থেকে মুক্তি দেওয়া যত সহজ আবার

যোতলে বন্দী করা তত সহজ নয়। গান্ধীজী ডাক দিলে যত লোক সংগ্রামে  
কাঁপ দেবে পরে তিনি তত লোককে নিবৃত্ত করতে পারবেন না। তারা তখন  
উন্মাদ। তখন তাদের উপর গুলী চালাতে হবে। সেই অপ্রিয় কর্তব্যটা  
আমার। কিংবা তাদের কাঁসী দিতে হবে। সেই অপ্রিয় কর্তব্যটা আপনার।  
গান্ধীজী তো নিজেই স্বীকার করছেন যে জনগণ এখন অহিংসার জন্তে প্রস্তুত  
নয়। তাই যদি হয়ে থাকে তবে কংগ্রেসের আন্দোলন অহিংস থাকতে পারে  
না। দিকে দিকে চৌরী চৌরার পুনরাবৃত্তি হবে। তিনি থামতে বললে কেউ  
থামবে না। সংগ্রামমাত্রেরই একটা মোমেন্টাম আছে। সেই মোমেন্টাম  
কারো হকুমে থামবে না। রাজা ক্যানিউটের মতো অবস্থা হবে গান্ধীজীর।  
সমুদ্রকে তিনি হকুম দিয়েছিলেন, এইপর্যন্ত। এর বেশী নয়। সমুদ্র তাঁর সে  
হকুম মানেনি। তাঁকে তাঁর চেয়ারস্থান ভালিয়ে নিয়ে গেছে। এখান্দা  
গান্ধীজীর প্রাণসংশয়।” হায়দার করুণস্বরে বলেন।

মানস অনেকক্ষণ চুপ করে থাকে। সে ভালো করেই জানে যে বামপন্থীরা  
ওং পেতে বসে আছে। গান্ধীজী যেই সংগ্রামের সঙ্কেত দেবেন অমনি ওরাও  
সেই সংগ্রামের আড়ালে গা ঢাকা দিয়ে তাদের সহিংস কার্যকলাপ শুরু করে  
দেবে। জেলে যাওয়া ওদের মতলব নয়। জেলে গেলে ওরা জেলকেই  
ভাঙবে। জেল কর্মচারীদের ভাঙিয়ে নেবে। পুলিশ কর্মচারীদেরও। জও-  
য়ানদেরও। দক্ষিণপন্থীরা ভালোমাহুষের মতো জেলে গিয়ে দায়িত্ব এড়াবেন।  
গান্ধীজীকে অনশন করতে হবেই। তার আভাসও তিনি দিয়ে রেখেছেন।  
তাঁর পক্ষে জীবন মরণ সমগ্র। তাঁকে বারণ করতে পারেন একমাত্র বড়লাট  
লিনলিথগো। তাঁর বন্ধুপ্রতিম। কিন্তু বারণ করার সঙ্গে সঙ্গে আরো কিছু  
করাও দরকার। সেটা তাঁর সঙ্গে সমঝোতা। সমঝোতা যদি না হয় তো  
সংগ্রাম অনিবার্য। জাপান তার সুযোগ নিতেও পারে, না নিতেও পারে।  
ইংরেজকে বিভাড়ন করা যদি তাদের উদ্দেশ্য হয়ে থাকে তবে তো কংগ্রেসই সে  
কাজ করে তাদের উদ্দেশ্য সিদ্ধ করতে পারে। জাপানী সৈন্যকে মরতে পাঠিয়ে  
কেন তারা অনর্থক বলক্ষয় করবে?

“আমি গভীরভাবে চিন্তিত।” মানস মৌনভঙ্গ করে। “হামলেটের  
মতো আমার জিজ্ঞাসা, টু বি অর নট টু বি। জুই দিকেই যথেষ্ট যুক্তি আছে।  
জোরালো যুক্তি। জুই দিকের পালা যেখানে সমান সেখানে যুক্তির চেয়ে বলবান  
হয় বিশ্বাস। অন্ধবিশ্বাসও বলতে পারেন। গান্ধীজী একজন মান্য অভ্যর্থক।”

“আমিও গভীরভাবে উদ্বিগ্ন। যুক্তপ্রদেশে আমার আত্মীয়স্বজনের দশা ভেবে। আমার দশা তো দেখছেনই।” হায়দার বিলাপ করেন।

## ॥ আঠারো ॥

রায় বাহাদুর মাঝে মাঝে সন্ধ্যাবেলা আসেন, সকালবেলা কখনো নয়। জানেন যে তখন মানস ব্যস্ত থাকে। সেদিন সকাল সাড়ে আটটায় তাঁকে আসতে দেখে মানস সসন্ত্রমে আসন ছেড়ে ওঠে।

“শুনেছেন? খবরটা শুনেছেন?” রায় বাহাদুর ক্যাকাশি মুখে বলেন।

“খবর। কী খবর!” মানস চমকে ওঠে।

“বোম্বাইয়ের খবর। মহাত্মা গান্ধী গ্রেপ্তার। কংগ্রেস ওয়াকিং কমিটির সদস্যরা গ্রেপ্তার। অল ইণ্ডিয়া কংগ্রেস কমিটির বেশীর ভাগ সদস্য গ্রেপ্তার, অস্ত্রেরা ফেরার। সারা ভারত জুড়ে ধরপাকড়। কংগ্রেস বেআইনী প্রতিষ্ঠান। গান্ধীজীকে আরম্ভই করতে দেওয়া হলো না। আরম্ভের পূর্বেই ইতি। উদয়ের পূর্বেই অস্ত। বড়লাট গান্ধীজীর অস্ত্র কেড়ে নিয়েছেন।” রায় বাহাদুর বিচলিত।

মানস তো শুনে থা। তার বাক্‌স্মৃতি হয় না। আবেগে তার কণ্ঠরোধ হয়।

রায় বাহাদুর বলে যান, “গণ সত্যাগ্রহণ তো একপ্রকার যুদ্ধ। একটা যুদ্ধের মাঝখানে তো আরেকটা যুদ্ধ বাধাতে দেওয়া যায় না। গণ সত্যাগ্রহণ চলতে থাকলে যুদ্ধের কী হাল হতো? জওয়ানরা একাগ্র হয়ে লড়ত কী করে? যুদ্ধে হার হোক কোন্ ইংরেজ এটা চায়? ক’জন ভারতীয় একটা চায়? কাজেই বড়লাটকে আমি দোষ দিতে পারছিলাম।”

মানস ততক্ষণে সামলে নিয়েছে। “আপনি কি বুঝতে পারছেন না যিনি স্বেচ্ছায় সাক্ষাৎপ্রার্থী হতে যাচ্ছিলেন তাঁকে তাঁর বক্তব্য বলতে না দিয়ে তাঁর স্বাধীনতা হরণ করা কত বড়ো স্বেচ্ছাচারিতা? কে জানে শেষমুহুর্তে একটা লম্বোতাও হয়ে যেতে পারত। তা হলে আর গণ সত্যাগ্রহণের প্রয়োজন হতো না।”

“আপনি, মশায়, ভিতরের লোক হয়েও ভিতরের খবর রাখেন না। পুলিশ সাহেবের মুখে শুনেছি গান্ধীজীকে মিস্টার চাটিল উগাওয়া চালান করতে চেয়েছিলেন। সেখানে না হলে এড়েনে। বড়লাটই তাঁকে নিবৃত্ত করেন। জল ইতিমধ্যে অনেকদূর গড়িয়েছে, মিস্টার মল্লিক। বোম্বাই থেকে কোন্-খানে নিয়ে যাওয়া হয়েছে জানিনে, কিন্তু যেখানেই হোক এদেশেই তিনি থাকছেন। তাঁকে সমুদ্রযাত্রা করতে হবে না। বড়লাট তাঁর বন্ধু। বন্ধুকে বন্ধু ভারত ছাড়তে দিলেন না। যদিও নিজে ভারত ছাড়ার নোটিশ পেয়েছিলেন।” রায় বাহাদুর কটাক্ষ করেন।

“আহা, সেটা তো আক্ষরিক অর্থে নয়।” মানস বুঝাতে চেষ্টা করে। তার প্রাণে অসহ্য বেদনা। বুক শেল বিঁধেছে।

“দেখুন মল্লিক সাহেব, যারা বার্মা ছাড়তে বাধ্য হয়েছে তারা বাধ্য হলে ভারতও ছাড়তে পারে। বাধ্য করলে জাপান করবে, গান্ধীজী নয়। তার আগে ওরা গান্ধীকেই ভারতছাড়া করবে। খাঁচাছাড়াও করতে পারে, যদি গণ সত্যগ্রহ হয় গণ হত্যাগ্রহ।” রায় বাহাদুর হুঁশিয়ারি দেন।

“সেটা কার দোষে? ওঁরা যদি অহিংসাবাদীর অহিংস অস্ত্র কেড়ে নেন তবে হিংসাবাদীর সহিংস অস্ত্রই তার একমাত্র বিকল্প। অহিংসাকে দুর্বল হতে দিলে হিংসাই প্রবল হয়।” মানস যুক্তি দেখায়।

“মল্লিক সাহেব, আপনিও বোঝেন, আমিও বুঝি, এটা হচ্ছে ইচ্ছাশক্তির সঙ্গে ইচ্ছাশক্তির দ্বন্দ্ব। গান্ধীজীর ইচ্ছা বনাম বড়লাটের ইচ্ছা। সংঘাত অবশ্যম্ভাবী। সমঝোতা অসম্ভব।” রায় বাহাদুর উড়িয়ে দেন।

তিনি বসতে আসেননি। দাঁড়িয়ে দাঁড়িয়েই কথা বলেন ও বিদায়ের জন্তে পা বাড়ান। মানস তাঁকে এগিয়ে দেয়।

“আপনি আমাকে আলটিমেটাম দেবেন আর আমি আপনাকে বন্ধুভাবে রিসিভ করব! তা হয় না, মিস্টার মল্লিক। আমি রাজপ্রতিনিধি। রাজা-স্থানীয়। আমারও তো প্রেসিডেন্সের প্রশ্ন আছে। আলটিমেটামটা অহিংসার মোড়কে মোড়া হলেও ওটা রাজশক্তিকে কুইট নোটস। আপনি আমাকে কুইট নোটস দিলে আমি কি আমার দরজা বন্ধ করতে পারিনে? গান্ধীজীকে সদলবলে গ্রেপ্তার করে বড়লাট যা করেছেন তাকে ইংরেজীতে বলে টেবিল ওলটানো। বড়লাট গান্ধীজীর উপর টেবিল উলটিয়েছেন। খুব ধারাপ লাগছে ভাবতে। মনে করবেন না যে আমি একটুও খুশি। গান্ধীজীর একটা



কেন্স আছে। গত মহাযুদ্ধে ইংরেজকে তিনি জয়ী হতে সাহায্য করেছিলেন। স্বয়ং বড়লাট চেমসফোর্ড সভাঘরে নিজের প্রস্তাব সমর্থনের জন্যে আর কাউকে না ডেকে গান্ধীজীকেই ডেকেছিলেন। সেটা সমর্থন করার মতো শিভালরি গান্ধীজীর ছিল। তিনি স্বরাজের শর্তে নয়, বিনা শর্তে যুদ্ধকালে সহযোগিতার হাত বাড়িয়ে দিয়েছিলেন। সৈন্ত সংগ্রহ করতে গ্রামে গ্রামে ঘুরেছিলেন। কাজের বেলা কাজী, কাজ ফুরোলেই পাজী। কোথায় স্বরাজ ! তার বদলে রাউলার্ট অ্যাক্ট। সেই যে বেইমানী গান্ধীজী সেটা ভোলেননি। তাই এবারকার যুদ্ধে সহযোগিতা করছেন না। জানেন যে ইংরেজ এর পরিবর্তে স্বরাজ দেবে না। কাজ ফুরোলে পাজী বলবে। এবারকার ফরমুলা ‘আগে তো তুমি স্বরাজ দাও, তার পর আমি তোমাকে আমার দেশের মাটিতে দাঁড়িয়ে তোমার সৈন্তদল নিয়ে লড়াই করতে দেব। কিন্তু আমার সৈন্তদের লড়তে ‘দেব না।’ আমার মতে গান্ধীজীর এটা বাড়াবাড়ি। আমাদের জওয়ানরা অহিংস নয়। তারা বলে, মারেজে অণ্ডর মরেজে। তাদেরকে লড়তে না দিলেই বরং তারা অস্থখী হবে। লড়তে দিলে ওদের কেউ কেউ ভিক্টোরিয়া ক্রসপর্বস্তু অর্জন করবে। কতরকম মেডেল তো পাবেই। র‍্যাঙ্কও উচ্চতর হবে। এবার বহু ভারতীয়কে কমিশন দেওয়া হয়েছে। কিংস কমিশন। ভাইসরয় কমিশন। মিলিটারি অফিসাররাও আমার সঙ্গে দেখা করতে আসেন। পুলিশ সাহেব পাঠিয়ে দেন। যুদ্ধটা একটা গোলিং কনসান। তুমি যদি ক্ষমতাসীন হও তোমাকেও এই গোলিং কনসানকে গোলিং রাখতে হবে। যতদিন না একপক্ষ জেতে, অপরপক্ষ হারে বা খেলায় দুই পক্ষের ড্র হয়। আমার মনে হয় গান্ধীজীর ইচ্ছা নয় যে ভারতীয় সৈন্তরা জাপানী সৈন্তদের সঙ্গে মারামারি করে।” রায় বাহাদুর দুই পক্ষের কেন্স বিশ্লেষণ করে রায় দেন। যেন তিনিই এ মামলার বিচারক :

মানস তাঁকে বিদায় দেয়। বলে, “আমার তো রেডিও নেই। আপনার কাছেই তরতাজা খবর জানতে চাইব। আমিই আসব।”

কিন্তু খবর কোথায় যে কেউ জানবে বা জানাবে ? ‘স্টেটসম্যান’ ভিন্ন আর সব কাগজ বন্ধ। রেডিওতে সামান্তই বলে। মোটের উপর নিউজ র‍্যাঙ্ক আউট। কংগ্রেস কী করছে, জাপান কী করছে কেউ জানতে চাইলে দেখে চারদিক অন্ধকার। মানসের মনে দারুণ উবেগ। গান্ধীজী বৈচে আছেন কি না কে জানে। তাঁকে ও তাঁর সহকর্মীদের কোর্ট মার্শাল করা হচ্ছে, না

নাধারণ আদালতে হাজির করা হচ্ছে ? না আদৌ বিচারের সুযোগ দেওয়া হচ্ছে না ? তাঁরা বিনা বিচারে বন্দী ? বিদেশের কাগজে ও রেডিওতে তাঁদের বিরুদ্ধে জোর অপপ্রচার চলেছে। যেন তাঁরা আপানের পক্ষম বাহিনী। অপ-বাদের বিরুদ্ধে তিনি অনশন করছেন না তো ?

সংবাদের সন্ধানে মানস ও যুথিকা যায় সাংবাদিক শিরোমণি ভবতোষ বাবুর সকাশে। তিনি বিমর্ষভাবে বলেন, “আমিও অন্ধকারে। এমনতর নিউজ ব্র্যাক-আউট আমি জীবনে দেখিনি। লিখব কী, যদি লেখার মালমশলা না থাকে ? ভাবনায় পড়েছি। পুরোনো কথা মনে পড়ছে। ভাবছি তারই উল্লেখ করব। আপনি ইণ্ডিয়ান সিভিল সার্ভিস থেকে অকালে বিদায় নেবার চিন্তা করছেন, আপনার পূর্বসূরী অ্যালান অক্টেভিয়ান হিউম ইণ্ডিয়ান সিভিল সার্ভিস থেকে অকালে অবসর নিয়ে ইণ্ডিয়ান ন্যাশনাল কংগ্রেস পতন করেছিলেন। প্রেসিডেন্ট হন সেকালের যত নামকরা ব্যারিস্টার বা অধ্যাপক বা অবসরপ্রাপ্ত সিভিলিয়ান বা জজ, ভারতভক্ত ইউরোপীয়, দেশভক্ত মুসলমান বা পার্শী। হিউম স্বয়ং ছিলেন স্বাধীনকাল কংগ্রেসের জেনারেল সেক্রেটারি। তখনকার দিনে কংগ্রেসের সদস্যসংখ্যা ছিল কম। তাঁদের সবাইকে তিনি ১৮৯২ সালে একখানি চিঠি লেখেন। সে চিঠির বয়ান এখনো আমার স্মরণ আছে। কারণ তার বিষয়বস্তু অবিস্মরণীয়। এখন দেখছি হিউম সাহেবের ভবিষ্যদ্বাণী অক্ষরে অক্ষরে ফলে যাচ্ছে।”

মানস কৌতূহল প্রকাশ করে। যুথিকাও। হুঁজনেই উৎকর্ষ।

“তাঁরই ভাষার তর্জমা করে যতটা মনে আছে বলছি। সদস্যদের সম্বোধন করে তিনি লেখেন, আপনারা বিশেষত ধার্মা ধনী ও অবস্থাপন্ন, তাঁরা বুঝতে পারছেন যে বর্তমান শাসনব্যবস্থা কেবল যে দেশের চাহিদা পূরণের অল্পপযোগী তাই নয়, এ ব্যবস্থা অনিবার্ণভাবে তৈরি করেছে পৃথিবীর ইতিহাসে এক ভয়াবহ বিপর্যয়। এদেশের মানুষ খুবই ধৈর্যশীল, খুবই শাস্তশিষ্ট। কিন্তু ক্রান্তির মানুষও তো তাই ছিল ক্রান্তের রাজা ও অভিজাতদের নিপাত করার মাত্র বিশ বছর—না, মাত্র দশ বছর—পূর্বেও। বুতুকা ও দারিদ্র্য শেষপর্যন্ত সেই ভেড়ার পালকে প্রায় রাতারাতি পরিণত করে একহল নেকড়েবাঘে। মনে করবেন না সরকার সেদিন আপনাদের অথবা নিজেকে বাঁচাতে পারবে। যুদ্ধক্ষেত্রে সম্মুখীন হবার মতো হয়তো কোনো শত্রু পাওয়া যাবে না। কিন্তু রেলপথে বা লড়কে যাতায়াত অসম্ভব হবে, টেলিগ্রাফ থাকবে না, গাঁকো চুরমার হবে,

সরবরাহ বন্ধ হবে। হাজার হাজার দুঃস্থকারী হয়তো মারা যাবে, কিন্তু তাতে কী লাভ হবে? আর নেতা? সময় হলে কি নেতার অভাব হবে?’ এসব কথা আমার নয়, তাঁর।” সম্পাদকপ্রবর স্বরণ করেন।

মানস যুথিকার দিকে চেয়ে বলে, “পঞ্চাশ বছর পরে প্রায় সবটাই মিলে যাচ্ছে। কী অসাধারণ দূরদৃষ্টি!”

ভবতোষবাবু বিষয় মুখে বলেন, “সেইসঙ্গে মনে পড়ছে মহামতি রাণাডের একটি উক্তি। এদেশে আমরা কোনো কাজই করতে পারব না, আমাদের কোনো প্রচেষ্টাই সফল হবে না, যদি না হিন্দু মুসলমান পরস্পরের সঙ্গে হাত মেলায়। আজকের পরিস্থিতিতে হিন্দুর পাশে মুসলমান কোথায়? হয়তো হুঁচকার জায়গায় আছে। সেটা ব্যতিক্রম। কাজেই ফরাসী বিপ্লবের সঙ্গে এই বিপ্লবের বিসমিল্লায় গরমিল। এ যেন চোখে আঙুল দিয়ে দেখিয়ে দিচ্ছে যে কংগ্রেস সেইসব অংশই পাবে, যেসব অংশে সে প্রবল। বাকীটা যাবে পাকিস্তানে। ইংরেজরা যদি যায়। সব চেয়ে দুঃখের বিষয় কংগ্রেস তার নেতাকে মানেনি, অহিংস থাকেনি। তার আন্দোলন হিংসার দিকে বাঁক নিয়েছে। ইংরেজরা জানে কেমন করে হিংসার সঙ্গে মোকাবিলা করতে হয়। জানে না শুধু অহিংসার সঙ্গে মোকাবিলার উপায়।”

এর পরে যুদ্ধের কথা। চাচিলের মতিগতি থেকে মালুম হয় তিনি বরং জাপানীকে ভারতে ঢুকতে দেবেন, তবু ভারতীয়দের হাতে ভারতকে ছেড়ে দেবেন না। জাপানীরা নিলে তাদের হাত থেকে পরে ফেরৎ পাওয়া যাবে। কিন্তু ভারতীয়দের হাতে সম্প্রদান করলে আর ফিরে পাওয়া যাবে না।

“কথাটা মিথ্যা নয়। কিন্তু আরো একটা কথা আছে, সেটা না ইংরেজ না কংগ্রেস কেউ গণনার মধ্যে আনছেন না।” ভবতোষবাবু তাঁর দাড়িতে হাত বুলোতে বুলোতে বলেন, “চটগ্রামে বা মণিপুরে জাপানী কৌজের সামনে দাঁড়াতে না পারলে ইংরেজ সৈন্য আরেকটা ডানকার্ক করতে পারে, কিন্তু ভারতীয় জওয়ানদের আরো একটা অপশন আছে। তারা তাদের মাতৃভূমির রক্ষক। অন্তত তাদের অফিসারদের মধ্যে এ চেতনা জেগেছে। ভারতীয় কৌজ জাপানীদের সঙ্গে সমানে লড়ে যাবে ও সফল হলে ইংরেজদের সঙ্গেও। মিউটিনির জন্মে আরো পনেরো বছর অপেক্ষা করতে হবে না। তখন কোথায় তোমার ইংরেজ আর কোথায় তোমার কংগ্রেস! ভারতীয় কৌজের যিনি অধিনায়ক তিনিই হবেন দেশের সর্বময় কর্তা।”

মানস কখনো এ লাইনে চিন্তা করেনি। এ তো সাংঘাতিক কথা। ইংরেজও থাকবে না, কংগ্রেসও থাকবে না, গান্ধীজীও থাকবেন না, কর্তা হয়ে বসবেন অচেনা অজানা এক সামরিক নেতা। দেশ শাসন করবে তাঁর মিলিটারি জাণ্টা। অবশ্য ইংরেজ যদি আরেকটা ডানকার্ক করে ও যেখানে খুশি পোড়ামাটি করে দেশের লোকের হাড় জ্বালায়।

“ঊ ব্যাটল অভ ইণ্ডিয়া উইল বি ফট অ্যাট চিটাং অর মণিপুর।” সে ইংরেজীতে বলে। “কিন্তু ভারতীয়রা যদি বীরত্ব না দেখায় তবে ভারতরক্ষা তাদের কর্ম নয়। দেশ শাসনও তাদের অধিনায়কের সাধ্য নয়। সুতরাং আমাদের সেকেণ্ড লাইন অভ ডিফেন্স হবে গ্রামে গ্রামে গ্রাম্য প্রজাতন্ত্র বা ভিলেজ রেপাবলিক। অঞ্চলে অঞ্চলে জাতীয় সরকার। যার নির্দেশ গান্ধীজী দিয়ে গেছেন। প্রত্যেক নাগরিককেই ভাবতে হবে যে সে স্বাধীন। সে পরাধীনতামুক্ত। কোথায় ক’টা ট্রেন অচল করে দেওয়া গেল সেটা তার স্বাধীনতার পরিমাপক নয়। কোথায় ক’টা পঞ্চায়েৎ গড়ে উঠল আর সচল হলো সেটাই পরিমাপক। স্বায়ত্তশাসনের যোগ্যতা খুন জখম দিয়ে প্রমাণ করা যায় না। করতে হয় গড়ার কাজ দিয়ে।”

“শুনছি তমলুকে না কোথায় যেন জাতীয় সরকার গঠিত হয়েছে। কিন্তু কাজ কেমন করছে জানিনে।” ভবতোষবাবু বলেন, “বাঙালীর যা স্বভাব। দু’দিন পরেই শুরু হবে দলাদলি। ক্ষমতার লড়াই। নিয়তম থেকে উচ্চতম পর্যায় পর্যন্ত এই আমাদের জাতীয় প্রকৃতি। ইংরেজ গেলেই বা জাপানী না এলেই যে আমরা দলাদলি বা ক্ষমতার লড়াই ছেড়ে মিলে মিশে কাজ করব আমি তো মনে করি এটা একটা স্মৃৎস্বপ্ন। তবে একজন ডিকটেটর যদি মাথায় চড়ে বসেন সেকথা আলাদা। সেটা জাতীয় স্বাধীনতা হতে পারে, ব্যক্তিস্বাধীনতা নয়। তেমন রাজত্ব বাস করতে আমার রুচি হবে না। যে পরিমাণ ব্যক্তিস্বাধীনতা আমরা ইংরেজ আমলে পেয়েছি তার নজীর ভারতের ইতিহাসে নেই, বাংলার ইতিহাসেও না। সেটা যদি হারিয়ে যায় তো জাতীয় স্বাধীনতাও সে ক্ষতি পূরণ করতে পারবে না। চেয়ে দেখুন ইটালীর দিকে। ইটালীও পরাধীন দেশ ছিল। আমাদের যৌবনে আমরা মাংসিনি, গারিবাল্-দ্রিয় ভক্ত ছিলাম। ইটালী তখন সচ স্বাধীন। কত আশা ছিল তার উপরে! সেই দেশ কিনা দেখতে দেখতে উপনিবেশের জন্তে পরের দেশ আক্রমণ করে। শেষে ফাসিস্ট বনে যায়। কে জানে কী আছে ভারতের কপালে।”

কলকাতা থেকে আসেন ভবতোষবাবুর সঙ্গে সাথে সাথে দেখা করতে তাঁর পুত্র পরিতোষবাবু। সঙ্গে একরাশ পত্র পত্রিকা। ভারতের বিভিন্ন প্রদেশের তথা বিদেশের। কিরে যাবার সময় নিয়ে যান পিতার সম্পাদকীয় রচনা। পরিতোষ যাবার অয়ং আসতে পারেন না সেবার তাঁর স্ত্রীকে পাঠান। আরতি দেবীকে।

একদিন পরিতোষবাবু ও আরতি দেবী দু'জনেই এসে হাজির হন মানসের কুঠিতে। মানস একটু আশ্চর্য হয়ে বলে, “এবার দেখছি আপনারা জোড়ে এসেছেন। ব্যাপার কী?”

“আমরা ঠুকে বুঝিয়ে সুঝিয়ে কলকাতা নিয়ে যেতে চাই। জাপানী বোমার ভয় কেটে গেছে। জাপানীরা এখন ভারতীয়দের মিত্ররূপে পেতে চায়। মিত্র কে? যে আমার শত্রুর শত্রু। শত্রু কে? ইংরেজ। শত্রুর শত্রু কারা, যারা রেল লাইন উড়িয়ে দিয়েছে। পুলিশ স্টেশন দখল করেছে বা করতে গিয়ে গুলী খেয়েছে। যেখানে পেরেছে সেখানে প্যারারেল গভর্নমেন্ট স্থাপন করেছে। না, মিস্টার মল্লিক, কলকাতার উপর জাপানী বোমা আর পড়বে না। তা হলে বাবার এখানে পড়ে থাকার কী দরকার? আমরাই বা কতবার তাঁকে দেখতে আসব?” পরিতোষবাবু উত্তর দেন।

মানস শুনে হুঃখিত হয় যে ভাবতোষবাবুর সঙ্গে থেকে সে অচিরে বঞ্চিত হবে। “আপনার বাবা কি যেতে রাজী হয়েছেন?”

“না, মিস্টার মল্লিক। তাঁর একটা চেঞ্জের দরকার ছিল। এই শহরে আগেকার দিনে কলকাতার লোক চেঞ্জ আসত। আজকাল আর আসে না। তিনি স্বজনবৎসল ও স্বজ্জলাভক্ত। বাড়ীটাও পৈত্রিক সম্পত্তি। এখানে এসে তিনি তাঁর বাল্যকালে ফিরে গেছেন। খোলামেলায় চেঞ্জ হচ্ছে। তা ছাড়া তিনি বিশ্বাস করেন না যে এই আন্দোলন বেশীদিন চলবে। এটা থেমে গেলে জাপান আবার বোমা ফেলবে। অতএব সাবধানের মার নেই।” পরিতোষবাবু হাসেন।

“আমরা তো এখনো অন্ধকারে রয়েছি। দেশের কোথায় কী হচ্ছে তা জানবার একমাত্র মাধ্যম সরকারী রেডিও। কিংবা ইংরেজদের ‘স্টেটসম্যান’। আপনারা কী করে অতটা নির্ভর হলেন যে জাপানী বোমা আর কখনো পড়বে না? কলকাতা যখন গোরা সৈনিকে ভরে গেছে।” মানস প্রশ্ন করে।

পরিতোষবাবু একটু খাটো গলায় জবাব দেন, “অন্ধকারের ভিতর দিয়েও

আমরা অনেকদূর দেখতে পাচ্ছি। বিহারে এখন গর্তনর বলতে কেউ নেই। যিনি আছেন তাঁর রাজস্ব পাটনা দানাপুরের বাইরে নয়। মেদিনীপুরের অভ্যন্তরেও ব্রিটিশ রাজস্ব বলে কিছু আছে নাকি? রামনগর থানায় এখন কংগ্রেস রাজস্ব। জাপানীরা কি এসব খবর রাখে না? ওদের সঙ্গে যোগাযোগ রক্ষা করার জন্যে যথেষ্ট ভারতীয় আছে। ওদের বিশ্বাস দেশকে স্বাধীন করতে হলে বিদেশীদের সাহায্য চাই! কংগ্রেসের একার সাধ্য নয়। কিন্তু কংগ্রেস আর কারো সাহায্য না নিয়ে একাকী যা করেছে তা সারা দুনিয়াকে নাড়া দিয়েছে। গত মহাযুদ্ধের মাঝখানে বোলশেভিকরা যা করেছিল তা নিয়ে বই লেখা হয়েছে ‘টেন ডেইজ ছাট শুক ছ ওয়ার্ল্ড’। এই মহাযুদ্ধের মাঝখানে কংগ্রেস যা করেছে তা নিয়েও পরে হয়তো বই লেখা হবে, ‘টোয়েন্টি ডেইজ ছাট শুক ছ ওয়ার্ল্ড’। আমাদের আক্ষেপ কেবল এই যে বড়লাট গান্ধীজীকে আরো তিন সপ্তাহ সময় দিলেন না। সেই তিন সপ্তাহে কংগ্রেসের প্রস্তুতি তিনগুণ ব্যাপক হতো। মহকুমাকে মহকুমা, জেলাকে জেলা জনতার দখলে আসত। বড়লাট সেটা ঠাচ করতে পেরেছিলেন। তাই আর একটা দিনও সময় দিলেন না। ব্রিটিশ সাম্রাজ্য এযাত্রা বর্তে গেল।”

“তা এখনো তো আন্দোলন থানেনি।” মানস যতদূর জানে।

“খামবেও না। যতদিন না লোকে দেখতে পায় যে রাশিয়া থেকে জার্মানরা হটছে, বার্মা থেকে জাপানীরা হটছে, রাশিয়ানরা এগোচ্ছে, ইংরেজরা এগোচ্ছে। তবে এই আন্দোলনের গতিবেগ কমে আসছে। যেমন বাড়ের গতিবেগ। সেটা তো মানুষের হাতে নয়। তেমনি এটাও। গান্ধীজী নিমিত্তমাত্র। ইতিহাসের ইজিতে তিনি একটা স্টার্ট দিলেন। মহাদেব দেশাই হঠাৎ বন্দিশালায় যান। না গেলে গান্ধীজী বোধ হয় অনশন করতেন। তাতে আন্দোলনটা হয়তো তাঁর শাসন মানত। কিন্তু তাঁকে অহুমতি না দিলে তিনি সারথির মতো চালিয়ে যেতেন কী করে?” পরিতোষবাবু স্থান।

“অনশনের আমি পক্ষপাতী নই। কিন্তু তিনি যেমন মানুষ বিবেকের তাড়নায় তাঁকে অনশন করতেই হতো। যাতে কেউ না বলে যে তিনি ছিংসার লম্বর্ধন করেন। এই আন্দোলনকে অহিংস বলা শক্ত।” মানস কুণ্ঠিত।

“আরে, যেখে দিন আপমার অহিংসা! স্বাধীনতা আগে না অহিংসা

আগে ? এতকাল পরে অহিংসার মোহ ভেঙেছে। আমার আফসোস কেবল এই যে আরো তিন সপ্তাহ সময় পাওয়া যায়নি। নইলে দেখিয়ে দেওয়া যেত বিদেশী সরকার তার সৈন্যসামন্ত নিয়ে জনশক্তিকে কেমন করে দাবিয়ে রাখে। শেকসপীয়ারের নাটকের রাজা হেনরির মতো আমারও ডাক ছেড়ে বলতে ইচ্ছে করছে, ‘আ হস্ ! আ হস্ ! মাই কিংডম ফর আ হস্ !’ একটি অশ্ব ! একটি অশ্ব ! আমার রাজ্যের পরিবর্তে একটি অশ্ব। যুদ্ধক্ষেত্রে অশ্ব মারা না গেলেই তিনি যুদ্ধ জয় করতেন। তেমনি, তিনটি হস্তা। তিনটি হস্তা। আগস্ট মাসে আরো তিনটি হস্তা সময় পেলেই আমরা সংগ্রামে জয়ী হতে পারতুম। সংগ্রাম অবশ্য বন্ধ হবে না। এতে জয় না হোক পরাজয়ও হবে না। যেটা হবে সেটা যেন ফুটবল খেলার ড্র।” পরিতোষবাবু মনে করেন।

“তাই যদি হয় তবে স্বাধীনতার জন্তে অহিংসা গেল, অথচ স্বাধীনতাও এল না। জগৎকে ভারত নতুন পথ দেখাতে পারল না। শান্তিপূর্ণ সংগ্রামের পথ। তবে এটা গণ সত্যাগ্রহ নয়। মহাত্মাজী এটার সিগনাল দেননি। এটা জনতার রোষের অভিব্যক্তি। নেতাদের ধরপাকড়ে রোষ।” মানস বিশ্বাস করে।

“কিন্তু এটাও তো মিথ্যা নয় যে আগে থেকে প্রস্তুতি চলছিল। সেটা গণ সত্যাগ্রহের না হোক, গণ সংগ্রামের।” পরিতোষবাবু তর্ক করেন।

আরতি দেবী এইবার মুখ খোলেন। “গণ সত্যাগ্রহের উপযুক্ত মানসিকতা ছিল না। গণ সংগ্রামের ছিল। সেটা যে সহিংস হবে কে না জানত ? গান্ধীজী অবশ্য চিরকালই বলে এসেছেন যে একজন সত্যাগ্রহীই যথেষ্ট। তিনি স্বয়ং অহিংস। এটা সহিংস ও অহিংস মিশ্র সংগ্রাম। প্রকাশ্য বিদ্রোহ।”

মানস তাঁর সঙ্গে একমত হয়। বলে, “এটা তাঁর দু’বছর আগেকার ব্যক্তি-সত্যাগ্রহ আন্দোলনের স্বল্পকালীন বিরতির পর সমষ্টিগত আকারে পূর্বাহ্নবৃত্তি। একই মোমেন্টামের ক্রমাগত। শুধু এর অহিংস অংশটার জন্তেই তাঁকে দায়ী করা যায়, সাহিংস অংশটার জন্তে নয়। সেটা যে কোনো গণ অভ্যুত্থানের অপরিহার্য পরিণতি।”

যুথিকা এতক্ষণ চুপ করে শুনছিল। আরতি দেবীকে মুখ খুলতে দেখে সেও মুখ খোলে। “আচ্ছা, দিদি, আপনি কি বিনীতা সিন্ধার নাম শুনেছেন ? ষাট স্বামী ছিলেন সিভিল সার্জন। যুদ্ধক্ষেত্রে।”

আরতি দেবী টিপে টিপে হাসেন। “তার চেয়ে বলো না কেন, আপনি কি আপনার মামাতো ভাইয়ের খুড়শ্বরের মেয়ের নাম শুনেছেন? বিনীতা সিন্ধা! হবার আগে থেকেই তিনি আমার বিহু মাসী। আহা, বেচারির কী হুঃখ! জামাইটি মারা গেল বিলেতে পড়তে গিয়ে। মেয়েটা তখন থেকেই দিশেহারা। অমন অস্থিরপ্রকৃতির মেয়েকে নিয়ে বিহু মাসী নাজেহাল। সেদিন আমাদের বাড়ী এসে জিজ্ঞাসা করেন, জুলি এখানে আছে? আমি তো আকাশ থেকে পড়ি। জুলি তো বছরে একবারও আমার খোঁজ নেয় না। হঠাৎ জুলি কেন আসবে ও থাকবে? তারপর থেকে যা শুনছি তা ভয়াবহ ব্যাপার। ওদের নাকি একটা গুপ্ত প্রেস আছে। যারা পাজি ছাপে তাদের প্রেস নয়। সেই চোরা প্রেস থেকে চোরা বুলেটিন ছেপে বা সাইক্লোস্টাইল করে ওরা সাহেবপাড়ার জমাদারদের দিয়ে ঘরে ঘরে বিলি করায়। তাতে গোরা সৈন্যদের উদ্দেশ্য করে লেখা : কুইট ইণ্ডিয়া। গো হোম অ্যাণ্ড ডিফেন্ড ইয়োর ওন পীপল। তোমাদের লজ্জা করে না? পারলে তোমরা বেলজিয়ামকে রক্ষা করতে? ফ্রান্সকে বাঁচাতে? সিঙ্গাপুরে, মালয়ে, বার্মায় তোমাদের ভূমিকাটা কী? কেন তোমরা আমাদের অগ্নে ভাগ বসাতে এসেছ? আমরা কি না খেয়ে মরব? তোমরাই এর জন্তে দায়ী হবে।—এমনি কত কথা।”

যুথিকা ভয় পেয়ে বলে, ‘ধরা পড়লে আর রক্ষে আছে! সরাসরি কোর্ট মার্শাল। যুদ্ধকালে আইন আদালত হুঁটো জগন্নাথ।”

মানসের মনে লাগে। সে বলে, “হেবীয়াস কর্পাস এখনো উঠে যায়নি। তবে যুদ্ধকালে মিলিটারির গায়ে হাত দেওয়া অসম্ভব।”

আরতিদি যুথিকাকে বলেন, “বেচারি বিহু মাসী! মেয়ে তাঁকে ধরাছোঁয়া দেয় না। রোজ ঠিকানা বদল করে। পুলিশের চোখে ধুলো দেবার জন্তে দিনের বেলা বোরকা পরে বেরোয়। উদূঁতে বাতচিৎ করে। যত সব এঁদো গলিতে বা বড়লোকের অন্তরমহলে ওদের আশ্রয়। রাতের বেলা তো র‍্যাক আউট। তখন ওরা নির্ভয়ে ফর ফর করে ঘুরে বেড়ায়। অঙ্গে বিভিন্ন সাজ। মুখে বিভিন্ন বুলি। বহুরূপী আর হরবোলা। সিনেমায় ঢুকে প্রচারপত্র কেলে আসে। জওয়ানদের উদ্দেশ্য করে লেখা, হিন্দীতে বা উদূঁতে : তোমাদের দেশ এখন একটা আগ্নেয়গিরি। লাভাবর্ষণ আসন্ন। জাপানীদের বোমাবর্ষণও এর কাছে কিছু নয়। ওদের গোলাবর্ষণও এর কাছে তুচ্ছ। তোমাদের লয়ালটি



রাজার প্রতি নয়, জন্মভূমির প্রতি। জননী আর জন্মভূমি স্বর্গের চেরেও পরীক্ষণী।—এসব প্রচারপত্র যদিও বেনামী তবু পুলিশ জানে কারা এসব ইশ্য করেছে। জুলির সন্ধানে ঘুরছে। যে-কোনো দিন গ্রেপ্তার করে কোথায় চালান হবে কে জানে!”

মুখিকা শিউরে ওঠে। “কী সর্বনাশ।”

গান্ধীজীর ‘প্রকাশ বিদ্রোহ’ এখন কোন্ মাটির তলায় ঢুকেছে জানলে তিনি নিশ্চয়ত অনশন করতেন। কিন্তু তাঁকে তো কোনো কিছুই পড়তে দেওয়া হচ্ছে না। শুনেও দেওয়া হচ্ছে না। স্বদেশবাসীর থেকে তিনি সম্পূর্ণ বিচ্ছিন্ন। উগাওয়া বা এডেনে থাকলে আরো বেশী খবর পেতেন। আপা খান প্রাসাদ এক অন্ধকূপ।

খবরের কাগজ পনেরো ঘোল দিন বন্ধ থাকার পর আবার খুলেছে। কিন্তু কড়া সেনসরশিপ। অধিকাংশ খবরই ধামা চাপা। সেইজন্তে কারা সব একটা গুপ্ত নিউজ সাভিস সৃষ্টি করেছে। ক্রী ইণ্ডিয়া নিউজ সাভিস। গুপ্ত সংবাদপত্র প্রতি সপ্তাহেই বোয়ার। সাইক্লোস্টাইল করা। তাতে অনেক গোপনীয় সংবাদ থাকে। সত্য মিথ্যা যাচাই করার উপায় নেই। কয়েক লংখ্যা মানসের নামেও পাঠিয়েছে। চিঠির খামের ভিতরে। বাংলা ভাষার লেখা।

মৈদিনীপুরের এক থানার জাতীয় পতাকা ওড়াতে গিয়ে মাতঙ্গিনী হাজরা বলে এক মহিলা পুলিশের গুলীতে নিহত হয়েছেন। মরেছেন, তবু পতাকা ছাড়েননি। গ্রেপ্তার করলেই চলত। গুলী করার কী দরকার ছিল? মানস মনে মনে প্রশ্ন করে। তার নিজের জেলায় তেমন কোনো ঘটনা ঘটেনি। এই বা সাধনা।

“আমরা যথেষ্ট প্রিকশনন্ নিয়েছি, মজিক।” আলী হায়দার বলেন। “সেয়েদের উপর যত্নে কিছুতেই কোনো অত্যাচার না হয়। পতাকা ওড়াতে চায় ওড়াক। আমরাই পরে নামিয়ে দেব। থানা দখল করে থানার কাজ চালানো কি মুখের কথা? পারবে ওরা দাগী অপরাধীদের চুরি ডাকাতি বন্ধ করতে? খুনের একাধার লিখে নিতে। অকুহলে সুরতহাল করতে, লাশ বর্গে পাঠাতে? পুলিশ যদি লাভবান অসহযোগ করে তো বাবু! নিজেরাই আমার কাছে এসে নালিশ করবেন যে তাঁদের স্বার্থসর্বস্ব লুট হয়ে গেছে। মায় বয়ের বোঝি!”

“রেজুনে যেমন হয়েছিল।” মানস মন্তব্য করে।

“কাগজওয়ালারা সে খবরটা চেপে যায়। লোকে ভাবে লড়াই একটা তামাশা। তার সঙ্গে লুটপাট নারীধর্ষণ ইত্যাদির কোনো সম্পর্ক নেই। তেমনি গণসংগ্রাম একটা তামাশা। তার সঙ্গে সমাজবিরোধী ক্রিমিনালদের কোনো সম্পর্ক নেই। জেল ভাঙার খবর শুনেছেন? আমাদের জেলায় নয়, যুক্ত প্রদেশের বলীয়া জেলায়। ট্রেজারি লুটের খবর শুনেছেন? সেটাও বলীয়া জেলায়। আমরা যদি প্রিকশনস্ না নিই সরকারী ট্রেজারি খালি হয়ে যাবে, মাসের শেষে আমরা কেউ মাইনে পাব না। জেল খালি হয়ে যাবে। ফেরারী কয়েদীরা ঘরে ঘরে হানা দেবে। পুলিশ যদি গুলী না চালায় তো নিরীহ নাগরিকের সর্বস্ব যাবে। যদি চালায় তো কেউ না কেউ মরবে। তখন স্বত দোষ আমার।” আলী হায়দার দুই কাঁধ তুলে বিমূঢ়াব প্রকাশ করেন।

মানসের জেলায় হিংসাত্মক ঘটনা বড়ো একটা ঘটে না। আইন অমান্য করে মিছিল বেরোয়। তাতে মেয়েদেরই প্রাধান্য। “ভারত ছাড়ো” ইত্যাদি স্লোগানও দেওয়া হয়। পুলিশ তফাতে থাকে। ইংরেজ পুলিশ সাহেব ইচ্ছে করেই অদৃশ্য হন। নইলে জনতা হয়তো মারমুখে হবে। ফলে পুলিশও মারমুখে।

রায় উমাশঙ্কর সামন্ত বাহাদুর কিছুদিনের জন্যে পর্দার আড়ালে যান। শহরের ছেলেরা রাজভক্তদের বাড়ী বাড়ী গিয়ে তাঁদের গতিবিধি লক্ষ করে। তিনিই পরে পুলিশ সাহেবের সঙ্গে দেখা করে বলেন, “ভয় নেই, আমরাই আপনাকে প্রোটেকশন দেব।”

সাহেব অট্টহাস্ত করেন। বলেন, “আমরা যদি ভারত ছাড়ি তো আপনাদের প্রোটেকশন দেবে কে? উত্তরাধিকারী রেখে না গেলে সারা দেশ জুড়ে ওয়ার অভ্যাস সাকসেসন। দিল্লীর মসনদ নিয়ে আবার এক পানিপথের যুদ্ধ।”

## ॥ উলিখ ॥

জার্মান সেনা অত্যন্ত তিনদিক থেকে আক্রমণ করে রূশদেশের বহু অঞ্চল অধিকার করলেও মস্কো এখনো দূর অস্ত। লেনিনগ্রাড হাভের নাপালে এসেও নাপালের বাইরে। আর স্টালিনগ্রাডের লড়াই এই বাধে কি ওই।

বাধে। ভল্গা নদীর তীরেই দু'পক্ষের ভাগ্য নির্ধারণ হতে যাচ্ছে। স্টালিন-গ্রাডের পতন প্রকারান্তরে স্টালিনেরই পতন। স্টালিনগ্রাডের হার প্রকারান্তরে হিটলারেরই হার। এ খেলা চড়া স্টেক রেখে খেলা। সারা দুনিয়া উৎসুক বা উত্তেজিত হয়ে চেয়ে আছে ভল্গাতটের বলপরীক্ষার দিকে।

বাবলীর তো রাজ্যে ঘুম নেই। সে স্বপনদার কাছে গিয়ে একটুখানি আশ্বাস আশা করে। “কী হবে, দাদা? আমরা কি হেরে যাব?”

স্বপনদা তাঁর হাতের কাজ তুলে রেখে বলেন, “আমরা হেরে যাব মানে? ও বুঝি। ‘আমরা কমিউনিস্টরা’। কিন্তু খোদ স্টালিনই তো তাঁর দেশের সর্বজনের কাছে আবেদন করে জানিয়েছেন যে এটা পেট্রিয়টিক ওয়ার। জার আমলের মহাবীর স্ত্রভোরোভকে মার্কসের উপরে বসিয়েছেন। তবে এটাও ঠিক যে রাশিয়া হেরে গেলে তোমরাও হেরে যাবে।”

“সেইজন্মেই তো ভেবে আকুল ছিছি। তোমার কী মনে হয়? তুমি তো অনেক পড়াশুনা করেছ। টুর্গেনিভের মতো দয়দী।” বাবলী শুনতে উন্মুখ।

“রাশিয়া হারবে না। রাশিয়া হারতে পারে না। যুদ্ধ তো কেবল বাহুবলের পরীক্ষা নয়। সেইসঙ্গে আত্মিক শক্তিরও। রাশিয়াকে শক্তি জোগাচ্ছেন পুশকিন, লারমণ্টোভ, টুর্গেনিভ, ডস্টয়েভস্কি, চেকভ, গোর্কি। সাহিত্যের মতো সঙ্গীতও অন্তরকে অল্পপ্রাণিত করে। রাশিয়াকে প্রাণ জোগাচ্ছেন চাইকোভস্কি, রিমস্কি-কোরসাকোভ, মুসোর্গস্কি, বোরোডিন, স্ক্রিাব। এঁরা সবাই ছিলেন পেট্রিয়ট। পেট্রিয়টিক ওয়ার যদি লড়তে হয় তো এরাই লড়তে সাহায্য করবেন। এঁরা অমর। তোমাকে আজ আমি ‘ভল্গা বোটম্যান’ বাজিয়ে শোনাব। লোকসঙ্গীত। গেয়েছেন কে, জানো? শালিয়াপিন। আমি স্বকর্ণে শুনেছি।” স্বপনদা উদ্দীপনা বোধ করেন। যেন কানে লেগে আছে তার রেশ।

“ভল্গা বোটম্যান? সত্যি?” বাবলীও উদ্দীপ্ত হয়। “শুনব। নিশ্চয় শুনব। ভল্গার তীরে স্টালিনগ্রাড। কী বিচিত্র যোগাযোগ! কিন্তু একটা কথা আমাদের বুঝিয়ে দাও, দাদা। জার্মানিতেও তো কত মহান সাহিত্যিক, মহান সঙ্গীতকার জন্মেছেন। তাঁদের প্রেরণা কি জার্মানদের জিতিয়ে দিতে পারবে না? গ্যেটে, শিলার, বাখ, বেঠোভেন?”

“আরো দশজনের নাম করতে পারতে। কিন্তু নাৎসীরা কি তাঁদের কারো মহিমা বোঝে? হাইনের মতো প্রেসের কবি বিশ্বসাহিত্যে ক’জন আছেন?”

তিনি জাতে ইহুদী। তাই নাৎসীদের কাছে অপাঙ্ক্লেয়। যীশুখ্রীষ্ট আর তাঁর ষাটশ শিষ্যও তো জাতে ইহুদী ছিলেন। তাঁরাও বাতিল। গোটা ইহুদী খ্রীষ্টান ধারাটাই বাদ। তা হলে কি গ্রীক রোমান ধারা ওদের গ্রহণীয়? না, আর্থ হলেও গ্রীক রোমানরাও বিজাতীয়। বাকী থাকে টিউটন ঐতিহ্য। সে ধারা কবে থেকে লুপ্ত। ভাগনার তাকে উদ্ধার করেছেন। সেটাই ওদের সর্বস্ব। সেইটুকু প্রেরণা পেয়ে রাশিয়ানদের বা ইংরেজদের হারিয়ে দেওয়া যায় না। নাৎসীরা ওদের আদিম ধারাকেই সার করেছে। কিন্তু ইতিহাসের প্রবাহ তো সেইখানেই থেমে থাকেনি। রাইন নদ দিয়ে অনেক জল গড়িয়ে গেছে। ডানিউব নদ দিয়েও। ‘ব্লু ডানিউব ওয়ালটজ’ কি ওই বেরসিকরা শুনবে? স্টাউস যে ইহুদী। শুনলে তোমার রক্ত চঞ্চল হয়ে উঠবে। তুমি নাচতে চাইবে। আমি যে তোমার সঙ্গে নাচতে পারব না, বোন চকোলেট।” স্বপনদা আফসোস করেন।

বাবলীর মুখ রাজা হয়ে ওঠে। সে বলে, “ওটা বৌদির জন্তে তুলে রেখো। আমার জন্তে ‘ভল্গা বোটম্যান’।”

বৌদির নাম করতে না করতেই বৌদি এসে হাজির। তাঁর আগে আগে তাঁর আদরের এল্ফ। সে ল্যাজ নাড়তে নাড়তে বাবলীর দিকে এগোয়। তার কোলে হঠাৎ লাফ দিয়ে ওঠে।

“এই যে, বাবলী! কখন এলে? তোমাদের কমিউনের কী খবর?” দীপিকা বৌদি খোঁজ নেন।

“খবর খুব মুখরোচক নয়। কমিউনে ভাঙন ধরেছে। একটি কমরেডের বিয়ে হয়ে গেছে। সে আমাদের ছেড়ে তার বরের সঙ্গে ঘর করেছে। এমন করে যদি কমিউন খালি হয়ে যায় তো কমিউনিজমের ভবিষ্যৎ কী?” বাবলী হাসে।

“তোমরা কি মনে করেছ তোমরাই কমিউনগঠনের পথিকৃৎ? সেই বৌদ্ধযুগ থেকেই ভারতে তার পরীক্ষা নিরীক্ষা চলে এসেছে। ইহুদীদের দেশে যীশুখ্রীষ্টেরও আগে এসেনীদের কমিউন ছিল। খ্রীষ্টানরা তাদের কাছ থেকে শেখে। দেখা গেল সারাজীবনের মতো সন্ন্যাসব্রত না নিলে কমিউন গঠন করা বুঝা। মার্ক্স মূনির শিষ্যরা তো সন্ন্যাসে বিশ্বাস করেন না। তা হলে তাঁদের কমিউন টিকবে কী করে? শ্রী অরবিন্দ এর একটা সমাধান বার করেছেন। ঔর আশ্রমে বিবাহিত দম্পতীরাও বাস করছেন। কিন্তু কারো

কোনো সম্পত্তি নেই। সব সম্পত্তি আশ্রমের। দেখা যাক কত দিন টেকে। কেউ কেউ এর মধ্যেই পালিয়ে এসেছেন। পালিয়ে এসে বিষয় সম্পত্তি অর্জন করছেন। মেয়ের বিয়ের যাতে একটা কিনারা হয়। ছেলের পেশার ভাবনাও ভাবতে হবে। আশ্রমের অধিষ্ঠাত্রী মাদার কি এসব জানেন না? তাঁকেই বার করতে হবে এর সমাধান। শ্রী অরবিন্দ এখন বহু উদ্বেগে।” দীপিকা বোদি মনে করেন।

“শ্রী অরবিন্দের কথা যখন উঠল তখন শোন,” স্বপনদা বলেন, “পণ্ডিচেরী থেকে আমার বন্ধু মুকুল লিখেছে শ্রী অরবিন্দ প্রতিদিন রেডিও থেকে যুদ্ধের খবর শোনেন। বাহুবল ও মনোবলের মতো আরো একটা বল আছে, সেটা যোগবল। শ্রী অরবিন্দ তাঁর যোগবল প্রয়োগ করছেন রাশিয়া যাতে জয়ী হয়। এ যুদ্ধ অশুভ শক্তির সঙ্গে শুভশক্তির যুদ্ধ। রাশিয়া যদিও কমিউনিস্ট তবু সেও ইংরেজ ফরাসীর মতো শুভশক্তির মিত্র। সুতরাং শুভশক্তির শরিক।”

“দাদা, তুমিও কি যোগবলে বিশ্বাস কর?” বাবলী বিস্মিত হয়ে স্নধ্যায়।

“না, বোন। মুকুলকে আমি লিখি, চারিটি বিগিনস অ্যাট হোম। তুমি পণ্ডিচেরীতে বাস কর। পণ্ডিচেরী ফ্রান্সের অধীন। যোগবল প্রয়োগ করে শ্রী অরবিন্দ কেন ফ্রান্সকে ত্যাগ করলেন না? সে কেন নাসীদেবীর অধীন হলো? ফলে পণ্ডিচেরী এখন অধীনের অধীন।” স্বপনদা সংশয় প্রকাশ করেন।

“সত্যিই তো!” দীপিকা বোদি সায় দেন।

‘ভল্গা বোটম্যান’ বাজিয়ে শোনার পর স্বপনদা লক্ষ করেন চকোলেটের চোখে জল। সে বার বার চোখের জল মোছে আর হাসির ভান করে। বলে, “আরেকবার বাজাও।

তিনবার বাজানোর পর স্বপনদা জিজ্ঞাসা করেন, “বল, তোমার চোখে জল কেন? কী তোমার দুঃখ?”

“আমার হৃদয় এখন ভল্গা নদীর তীরে স্টালিনগ্রাডে। নেকড়েবাবের দলকে আমরা ‘ক রুখতে পারব? আমিও আমার সোল ফোর্স খাটাচ্ছি। যদিও ওটা গান্ধীবাদীর মতো কাজ। ওতে কোনো ফল হয় কি না সন্দেহ। কিন্তু ও ছাড়া আর কী আছে আমার? এত দূরে রয়েছি যে বোমা রিভলভার কোনো কাজে লাগবে না। তবে কি কেবল মাঠে মাঠে স্লোগান দিয়ে বেড়াব? আমরাও একহিসাবে নিষ্ক্রিয় দর্শক। যা হবার তা যুদ্ধক্ষেত্রেই হবে। জয় কিংবা পরাজয়। পরাজয় অত্যাচারী। রাশিয়ার আত্মা অপরাধের। চাই

শুধু আত্মার বিশ্বাস। সেটা কি আমাদের আছে?” বাবলী আত্মগত হয়ে বলে।

“তবে নেই, কিন্তু সত্যে আছে।” স্বপনদা রহস্য করেন। “বাড়ীতে কেউ মরণাপন্ন হলে ডাক্তারকে ডাকা হয়, মা কালীকেও। রাশিয়ানরাও নিশ্চয়ই মা মেরাকেও ডাকে। এটা তো রেভোলিউশনারি ওয়ার নয়, এটা পেট্রিয়টিক ওয়ার। এতে ননকমিউনিস্টরাও আছে। ওরা গির্জায় গির্জায় প্রার্থনা করছে নিশ্চয়।”

“কী জানি, দাদা!” বাবলী শোকোলায় চুমুক দিয়ে বলে, “আমার হৃদয় এখন পড়ে আছে ভল্গা নদীর তীরে। পাখী হয়ে থাকলে উড়ে যেতে পারতুম। মাহুস হয়ে শুধু রেডিওর খবর শুনছি।” শোকোলা হচ্ছে ফরাসীদের তরল চকোলেট।

দীপিকা এতক্ষণ চুপ করে বসেছিলেন। এবার মুখ খোলেন, “ওটা তো দূরের খবর। কাছের খবর কিছু শুনেছ?”

“কোন খবর, বৌদি?” বাবলী শশব্যস্ত হয়ে স্তব্ধ।

“তোমার বান্ধবী জুলির খবর কী?” বৌদি জানতে চান।

“শুনেছি স্টেটসম্যান পত্রিকায় নাকি ছাপা হয়েছে সৌম্য চৌধুরীর সঙ্গে ওর বিয়ের এনগেজমেন্ট। সে তো অতি আনন্দের কথা। কিন্তু মেয়ে নাকি মায়ের উপর গোসা করে বাড়ী ছেড়ে হাওয়া হয়ে গেছে। কে ওঁকে ফাঁস করতে বলেছিল? ছাপতে দিলেন যদি তো সাহেবদের কাগজে কেন? জানেন না ওরা এ দেশের শত্রু? বামপন্থীদের কাছে ও মুখ দেখাবে কী করে? তাই কোথায় উধাও হয়ে গেছে। ওর মা একদিন আমাদের কমিউনে এসে খানাতল্লাসী করেন। ওঁর ধারণা আমিই আমার সখীকে লুকিয়ে রেখেছি। আমি ওঁর পায়ে পড়ে বলি, মাসিমা, আপনি কি জানেন না ওর সঙ্গে আমার ছাড়াছাড়ি হয়ে গেছে? আমি এখন ওর চোখে দুশমন। আমি নাকি ইংরেজের গুপ্তচর। আমার অপরাধ আমি বলেছি, আগে তো জাপানীদের তাড়াও, তার পরে ইংরেজদের তাড়াবে। তোজো ফাস্ট’। ও বলেছে, না, আগে ইংরেজদের তাড়াতে হবে, তার পরে জাপানীদের। চাচিল ফাস্ট’। তোজো ফাস্ট’, চাচিল ফাস্ট’, তোজো ফাস্ট’, চাচিল ফাস্ট’, বিশ একুশবার এইরকম কথাকাটিকাটির পর ও আমার চুলের মৃষ্টি ধরে, আমিও ওর চুলের মৃষ্টি ধরি। এরপরে কি আমাদের মুখ দেখাদেখি হতে পারে? ও কেন আমাদের

কমিউনে আসবে? অন্য কোথাও গেছে। হয়তো ওর ভাবী বরের কাছে।  
 উনি বলেন, সোম্যাকে উনি টেলিগ্রাম করে জবাব পেয়েছেন সোম্যও নিখোঁজ।  
 তা হলে গেল কোথায়? একে একে প্রত্যেকটি বন্ধুর বাড়ী গিয়ে খোঁজ  
 করেছেন। আমি তোমাদের এখানেও খোঁজ নিতে বলেছি। উনি কি  
 এসেছিলেন?”

“এসেছিলেন বইকি। কিন্তু আমরাও তো অন্ধকারে। তা না হলে  
 তোমাকে জিজ্ঞাসা করতুম কেন? মিসেস সিন্হা বুঝতে পারছেন না স্টেটস-  
 ম্যানে নোটিশ ছাপিয়ে তিনি এমন কী অপকর্ম করেছেন যার নজীর নেই?  
 ওঁদের বাড়ীর যাবতীয় ক্রিয়াকর্মের নোটিশ তো ওই কাগজেই ছাপা হয়ে  
 থাকে। জুলির আগের বারের বিয়ের নোটিশও তো ছাপা হয়েছিল ওই  
 কাগজেই। ওর বাবার মৃত্যুর নোটিশও। তাঁর জামাই তাঁকে পরামর্শ দিয়ে-  
 ছেন পুলিশে একটা ডায়েরি করিয়ে রাখতে। যদি কোনো অঘটন ঘটে থাকে।  
 পুলিশ অফিসার নাকি মুচকি হেসে বলেছেন, অঘটনটা আর কিছু নয়। সামনে  
 আসছে গান্ধীজীর গণ সভ্যাগ্রহ। কংগ্রেস ওয়ার্কিং কমিটি তাঁকে গ্রীন সিগনাল  
 দিয়েছে। এবার দেবে অল ইণ্ডিয়া কংগ্রেস কমিটি। ওঁরা বসেতে মীটিং  
 ডেকেছেন। কে জানে জুলি হয়তো বসেতে গিয়ে ওর বামপন্থী গোষ্ঠীর সঙ্গে  
 মিলে মিশে প্রোগ্রাম ছকছে। নোটিশের জন্তে গোসা করে মাকে ধোঁকা  
 দিয়েছে। উনি বসেতেও ওঁর চেনাজানা সবাইকে চিঠি লিখেছেন। উত্তর  
 আসার সময় হয়নি। আমরাও দারুণ চিন্তিত।” বোদির মুখে উদ্বেগ।

অপনদা হেসে উড়িয়ে দেন। বলেন, “ক্যারামেল ওর মাকে ধোঁকা দিতে  
 পারে কখনো? ও কি তেমনি মেয়ে? ও এই কলকাতা শহরেই আছে।  
 পুলিশও যে না জানে তা নয়। অন্তত পুলিশের একটা লেকশন। ওঁদের  
 এখন হ্যামলেটের মতো দোটানা। ধরবে কি ধরবে না? বাঁধবে কি বাঁধবে  
 না? কে জানে যদি গণেশ ওলটায়। তখন ওই জুলিরাই তো মালিক হবে?  
 চাকরি রাখতে হলে জুলিদেরই তোয়াজ করতে হবে। পুলিশের লোক ধরতে  
 এলে পুলিশের লোকই আগে ভাগে হাঁশিয়ার করে দেবে। পাখী উড়ে যাবে।  
 না, ভল্গা নদীর তীরে নয়। ভারতের ভাগ্য সেখানে নির্ধারিত হচ্ছে না।  
 হচ্ছে গঙ্গানদীর তীরে, পঞ্চনদের তীরে, কাবেরী নদীর তীরে। আমি দুই  
 নাটকেরই নীরব দর্শক। আমার সহানুভূতি আমার দুই বোনেরই দিকে।  
 চকোলেটেরও দিকে, ক্যারামেলেরও দিকে। ওরা পরস্পরের প্রতিপক্ষ নয়।

ওটা ওদের ভুল বোঝাবুঝির ফল। আমি তো ওদের মেলাবার চেষ্টাই করেছি। সুযোগ পেলে আবার করব।”

বাবলী সভয়ে বলে, “দাদা, এটা কি কখনো সম্ভব যে ক্ষমতা কিছুদিন বাদে জুলিদের হাতে পড়বে?”

“আজকের এই অনিশ্চিত পরিস্থিতিতে এটাও সম্ভব, সেটাও সম্ভব, ওটাও সম্ভব। কোনোটাই অসম্ভব নয়। এই কথাই গান্ধীজী তাঁর প্রবন্ধে লিখেছেন। তবে যেটা সম্ভবপর সেটা হচ্ছে তৃতীয়পক্ষ বিদায় হলে হিন্দু মুসলমানের মিতালি, কংগ্রেস লীগ কোয়ালিশন। আমার মতে এর কম একটা সম্ভাবনা আছে, কিন্তু সম্ভাবনার উপর নির্ভর করে হাত গুটিয়ে বসে থাকা উচিত নয়। সমস্তক্ষণ মিতালির প্রয়াস চালিয়ে যেতে হবে। সেই বুনিয়েদের উপরেই গড়ে উঠতে পারে কংগ্রেস লীগ কোয়ালিশন। নইলে সেটাও হবে একটা তাগের কেজা। ব্রিটিশরাজের পতনের পর হিন্দু মুসলিম রাজেরও পতন হবে। ভারতবর্ষ ইউরোপের মতো খণ্ড খণ্ড হয়ে যাবে। এটাও তো একটা মহাদেশ। প্রাদেশিকতাই আমাদের পক্ষে স্বাদেশিকতা।” স্বপনদা রায় দেন।

বৌদি এবার দাদার দিকে ফিরে বলেন, “তোমার সোনার বাংলা তো এখন একটা হার্টব্রেক হাউস। এটা কি একটা সুখী পরিবার। ইংরেজ আছে বলেই ঠাট্টা বজায় আছে। সে যেদিন যাবে সেদিন হিন্দু মুসলমানে কোলাকুলি নয়, ওই বাবলী জুলির মতো চুলোচুলি। পারবে কি তুমি ওদের চকোলেট আর ক্যারামেল দিয়ে ভাব করাতে? আমার হৃদয় ভেঙে গেছে। তা বলে আমি বলব না যে ইংরেজ আরো পনেরো বছর রাজত্ব করুক। বা জাপানীরা এসে চামর ধরুক। যা আজও হলো না তা পনেরো বছর বাদেও হবে না। কারণ বাঙালী হিন্দু মুসলমানের হৃদয় এক নয়। ওদের সম্পর্কটা হচ্ছে একই কালে প্রেমের আর ঘৃণার। ইংরেজীতে যাকে বলে লাভ-হেট রিলেশনশিপ। তুমি আমি হাজার চেষ্টা করেও এটাকে বিশুদ্ধ প্রেমের সম্পর্কে পরিণত করতে পারব না। আমাদের প্রিয় বন্ধু মীর সাহেবও না। পনেরো বছরের চেষ্টাও যথেষ্ট নয়। আমাদের জীবন যত দীর্ঘ হোক না কেন আমাদের জীবনেও নয়। ইংরেজরা ভেদবুদ্ধির বীজ বুনেছে বলে তাদের ষাড়ে দোষ চাপানো বুধা। বিষবৃক্ষ ছেদ করার সাধ্য আমাদেরও নেই। গোড়ায় আমাদেরও হাত ছিল। হিন্দু কলেজ প্রতিষ্ঠার সময় রামমোহনকে কেউ আমল দেন নি। তিনি নাকি



যবন পরিবৃত্ত হয়ে থাকতেন। হিন্দু কলেজে কোনো মুসলমান ছাত্রকে ঢুকতে দেওয়া হয়নি। হিন্দুকলেজ যখন প্রেসিডেন্সী কলেজে রূপান্তরিত হয় তখন ইংরেজদের সে প্রস্তাবে হিন্দু প্রতিষ্ঠাতাদের কয়েকজন প্রতিনিধি বাধা দেন। তবে সকলে নয়। তার থেকে প্রমাণ হয় প্রেমও সক্রিয় ছিল। গোটা ঊনবিংশ শতাব্দী ধরে হিন্দু আশনালিজম মুসলমানদের দূরে ঠেলেছে আর ইণ্ডিয়ান আশনালিজম তাদের কাছে টেনেছে। তার জের এখনো চলেছে। মাঝখানে উদ্ভব হয়েছে যার, তার নাম বেঙ্গলী আশনালিজম। ইংরেজ এতে বাদ সেধেছে। ইংরেজকে এরা হাতে মেরেছে, ভাতে মেরেছে। কিন্তু ইংরেজও এর মাজা ভেঙে দিয়েছে কলকাতা থেকে দিল্লীতে রাজধানী সরিয়ে নিয়ে। সেদিন যে সর্বনাশটা হলো সেটা বাঙালীমাত্রেয়ই। শুধু হিন্দুর বা শুধু মুসলমানের নয়। তখনি বোঝা গেল বাঙালীর যে বাড়বাড়ন্ত হয়েছিল তার কারণ সারা ভারতের রাজস্ব এসে কলকাতায় কেন্দ্রীভূত হয়েছিল। ভারতের ইতিহাসে ভারতের রাজধানী আর কখনো পূর্ব প্রান্তে অবস্থিত হয়নি। হবেও না। ইতিহাসে ওটি একটি অধিতীয় অধ্যায়। বাঙালীর যদি দূরদৃষ্টি থাকত তা হলে বঙ্গভঙ্গ রদ করার জন্তে সে আন্দোলনে নামত না। বেঙ্গলী আশনালিজমই দ্বিধাবিভক্ত প্রদেশের মেলবন্ধন করত। কিন্তু যা হবার তা হয়ে গেছে। আমরা ভারতের রাজধানী হারিয়েছি। তা বলে আমরা প্রাদেশিকতাকেই স্বাদেশিকতা ভাবব কোন্ বুদ্ধিতে? এটা সেদিনের সেই স্বদেশী আমলের রোমন্থন। সে আমল আর কখনো ফিরবে না। ইংরেজ বিদায় হলেও না। এখনকার ভাবনা হলো ভারতীয় স্বাদেশিকতাকে ভারতীয় মুসলমানের গ্রহণযোগ্য করা! বাঙালী মুসলমানকে ভারতীয় মুসলমানের আওতার মধ্যে রাখা। পাকিস্তানের বীজ বুন মুসলিম লীগ যা করেছে তা ব্রিটিশ সাম্রাজ্যবাদ যা করেছিল তার চেয়ে কম ক্ষতিকর নয়। এর থেকে যে বিষবৃক্ষ গজাবে তা মুসলমানদেরও কম ক্ষতি করবে না। ওরা এখন স্বপ্ন দেখছে কলকাতা হবে পাকিস্তানের সামিল। এই নিয়ে একটা গৃহযুদ্ধ না বাধে।”

স্বপনদা অভয় দিয়ে বলেন, “গৃহযুদ্ধ পাঞ্জাবে বাধতে পারে। কিন্তু বাংলা-দেশে কখনো নয়। এখানে স্বপ্নার চেয়ে প্রেমই প্রবল।”

বৌদি কী বলতে যাচ্ছিলেন এমন সময় বেল বেজে ওঠে। বাবলীর কোল থেকে তড়াক করে লাফ দিয়ে তর তর করে সিঁড়ি বেয়ে নিচে নেমে যায় এলফ। যেউ যেউ যেউ যেউ। যত বড়ো কুকুর নয় তত বড়ো গলা।

“আমি চাহু লাহিড়ী। বাবলী সেন কি এ বাড়ীতে এসেছে ? ওকে একটা জরুরি খবর দিতে চাই।” আগন্তুক দীপিকা বৌদিকে জানায়।

“চলুন, ভিতরে চলুন। বাবলী এই বাড়ীতেই আছে।” বৌদি ওকে দোতালায় নিয়ে যান।

“ও কে, চাহু ? কী ব্যাপার ? ‘ভল্গা বোটম্যান’ শুনতে শুনতে আমার একটু দেরি হয়ে গেছে।” বাবলী ওর বন্ধুর পরিচয় দেয়।

“তোমাকে আমি কোথায় না খুঁজেছি ? শোন, লগুন থেকে ট্রান্সকল এসেছে, স্টালিনগ্রাড—” বলতে বলতে চাহু ভেঙে পড়ে।

“বল, বল, বাকীটুকু বল। ঝুলিয়ে রেখো না।” বাবলী উৎকণ্ঠিত।

“ইনভেডেড।” চাহু দুই হাতে মুখ ঢাকে।

স্বস্তির নিঃশ্বাস ফেলে বাবলী। “তাই বল। তার চেয়ে বেশী কিছু নয়। নাৎসীদের আমরা ফিরে যেতে দেব না। ওখানেই কবর দেব। যে পথ দিয়ে মোগল এসেছিল সে পথ দিয়ে ফিরল নাকো আর।”

“মোগল তো নয়, হায়েনা। যাক, আজ আমাদের জরুরি বৈঠক বসছে। তোমার থাকা দরকার। গান শোনবার সময় এটা নয়। কর্তব্য স্থির করার সময়। ওরা ওদিকে প্রাণ দিচ্ছে, আর আমরা এদিকে গান শুনছি !” চাহু টিটকারী দেয়।

স্বপনদা যা খেতে ও খাওয়াতে ভালোবাসেন তা তৈরি হয়ে আসে। গরম গরম বেগুনী, ফুলুরী, পেঁয়াজী। তার সঙ্গে জিলিপী। বাবলীর ক্ষিদে পেয়েছিল। সে বিনা বাক্যে খায়। চাহুকে অহরোধ উপরোধ করতে হয়।

“তা একটু দেরি হয়ে গেলে ‘ডাস কাপিটাল’ অশুদ্ধ হবে না, কমরেড ? লাহিড়ী। খান আর খেতে দিন। লিভ অ্যাণ্ড লেট লিভ।” স্বপনদা বলেন।

“ওদিকে ওরা লড়ে মরছে আর এদিকে আমরা খেয়ে বাঁচছি। এর পরে কে আমাদের আন্তরিকতা বিশ্বাস করবে ?” চাহু খেতে খেতে বলে। আর বলতে বলতে খায়।

“ওরা বলছ কেন ? বল আমরা।” বাবলী শুধরে দেয়। “আমরাই লড়ছি স্টালিনগ্রাডে হায়েনাদের সঙ্গে। ওরা বলতে বোঝায় নাৎসীরা।”

থিয়োরিটিসিয়ান চাহু অপ্রতিভ হয়। কিন্তু ও বেচারী সত্যি ঘাবড়ে গেছে। ওর ধারণা ছিল নাৎসীরা অতদূর এগোতে পারবে না, মাঝপথে আটকা পড়বে। স্টালিনগ্রাড ! এ যে প্রেক্ষিজের ইস্যু। এখানে হার হলে স্টালিনের প্রেক্ষিজ !

কোথায় থাকবে ? কিন্তু তার বদলে জয়ের জন্যে প্রস্তুতি কোথায় ? যুদ্ধবিগ্রহ তো থিয়োরি অনুসারে চলে না। ইতিমধ্যেই ক্লাস ওয়ারকে পীপলস ওয়ার করতে হয়েছে। বুর্জোয়ারাও এখন পীপলের সামিল। তার উপর এটা পেট্রিয়টিক ওয়ার। রাশিয়ানদের পক্ষে। কিন্তু ভারতীয়দের পক্ষে এটাকে পেট্রিয়টিক ওয়ার বলে চালানো যায় কী করে ?” এ নিয়ে চাহু চিন্তাশ্রিত।

স্বপনদা গম্ভীরভাবে বলেন, “চকোলেট আর চাহু, তোমাদের বেদনা আমারও বেদনা। হাজার হাজার যুবা ঘরবাড়ী ছেড়ে, বাপ মা ভাই বোন বোঁ বা বান্ধবী ছেড়ে যুদ্ধক্ষেত্রে সমবেত হয়ে মর্তভূমি ছেড়ে কোন্ মহাশূন্তে বিলীন হতে যাচ্ছে ভাবতে গেলে নিজেকে ধিক্কার দিতে ইচ্ছে হয়। মুখে খাবার রোচে না। আবার এমনি অবিরোধ যে ওরা যদি জ্ঞান বাঁচানোর বা শহর বাঁচানোর জন্যে রণছোড় হয় তা হলেও খাবার বিশ্বাস লাগে। ওদের ধিক্কার দিতে ইচ্ছে হয়। যুদ্ধবিগ্রহ ভালো জিনিস নয়, আবার ‘চাচা, আপনা বাঁচাও ভালো জিনিস নয়। তবে আমার নীতি হচ্ছে সৃষ্টির জন্যে আপনাকে বাঁচিয়ে রাখা। যেমন চাষী আপনাকে বাঁচিয়ে রাখে সবাইকে খাদ্য জোগানোর জন্যে। সে যেমন কাপুরুষ নয় আমিও তেমন কাপুরুষ নই।”

‘আমরা কি বলেছি আপনি কাপুরুষ ?’ চাহু প্রতিবাদ করে।

“না, না, তোমরা বলনি। কিন্তু কথাটা উঠেছে। তাই আমি সাফাই দিয়ে রাখছি। তারপর শোন। তোমরা যাদের নেকড়ে বা হায়েনা বলছ তারাও তোমাদের মতো মানুষ। তাদেরও মা আছে বোন আছে বান্ধবী আছে। তাদের দিকটাও আমাদের দেখতে হয়। আমি একদেশদর্শী নই। বহুদেশদর্শী। জার্মানিতে আমি আমার যৌবনের দুটি বছর কাটিয়েছি। জার্মানদের সঙ্গে ঘনিষ্ঠভাবে মিশেছি। ওদের সবাই কিছু নাংসী নয়। অনেকেই কমিউনিস্ট। আরো অনেকে সোশিয়াল ডেমোক্রাট। হিটলারের দাপটে ওদেশের চাহু আর বাবলীরাও আত্মরক্ষার জন্যে হয় পাণ্ডিত্যবোধ, নয় ভোল বদল করেছে। এখানেও তাই হবে, যদি জাপানীরা কর্তা হয়ে বলে তোমরা হয়তো পালাবে, কিন্তু থেকেও যাবে তোমাদের বিত্তর সাথী, তারা কোর্তা বদলাবে। নয়তো মরবে। সেটা ক’জন পছন্দ করবে, বল ? তা বলে কি তারা কাপুরুষ ? না, কাপুরুষ নয়। সাহস ফিরে পেলে তারাও প্রতিরোধের পন্থা খুঁজবে। যেমন ফ্রান্সে এখন কতক লোক রেজিস্ট্রান্স গড়ে তুলছে।” স্বপনদা তব্বয় হয়ে বলে যান।

“শুনেছি, দাদা।” বাবলী সমর্থন করে।

“চিনি আমি ওদের হুঁচারজনকে। কেউ কমিউনিস্ট, কেউ-বা তা নয়। দেশ যেখানে পরাধীন সেখানে দেশপ্রেমও মানুষকে প্রতিরোধে উত্ত্বুদ্ধ করে। হোক না সে উচ্চ মধ্যবিত্ত। এই যেমন আমাদের গান্ধী, জবাহরলাল। এঁরাও প্রতিরোধ করতে যাচ্ছেন। আপাতত ব্রিটিশ অকুপেশন গভর্নমেন্টের বিরুদ্ধে। অতঃপর প্রয়োজন হলে জাপানীজ কুইজলিং গভর্নমেন্টের বিরুদ্ধে। এঁদের দিক্‌টাও আমি দেখি। তবে আপনাকে সন্নিবেশ রাখি, যাতে বাইরে থেকে ভালো দেখতে পাই। জড়িয়ে পড়লে তো সেটা সম্ভব হবে না। তোমরা এখন রুশ জার্মান যুদ্ধে জড়িয়ে পড়েছ, নইলে দেখতে জার্মান পক্ষেও কমিউনিস্ট ও সোশিয়াল ডেমোক্র্যাটরাও লড়ছে, লড়তে বাধ্য হচ্ছে। হিটলার সবাইকে কমসক্রিপ্ট করেছে। যারা নারাজ তাদের গুলী করে মেরেছে। আইন আদালতের তোয়াক্কা রাখেনি। জার্মান শিবিরেও তোমরা আছো। তোমাদের কমরেডরা আছে। তাদের জন্তেও চোখের জল ফেলতে ভুলো না। তারা নেকড়েও নয়, হায়েনাও নয়, তারা অবস্থাচক্রে বিপরীত শিবিরে অবস্থিত। তাদের জন্তে আমিও সমবেদনা অনুভব করি। তবে এটাও জানি যে তারা জিতবে না। এ যুদ্ধে হিটলারের হার হবে। রুশদেশ আক্রমণ করে নেপোলিয়নও পার পাননি। হিটলার তো কোন্‌ ছার! রাশিয়া এমন এক দেশ যা মহাদেশতুল্য। পিছু হটে যাওয়াটা হেরে যাওয়া নয়। রুশ ফৌজ বার বার পিছু হটেবে, কিন্তু কখনো কোণঠাসা হবে না। পান্টা আক্রমণ করবে ও জয়ী হবে।’ স্বপনদা ভবিষ্যদ্বাণী করেন।

বাবলী তা শুনে বেজায় খুশি। “এক কথায় স্পেস আমাদের পক্ষে, টাইম আমাদের পক্ষে। ওদের বিপক্ষে।”

“তার উপর ব্রিটেন তোমাদের পক্ষে, আমেরিকা তোমাদের পক্ষে। কিন্তু একটা ফঁ্যাঁকড়া আছে। তোমরা কারা? তোমরা কি রাশিয়ান না ইণ্ডিয়ান? কাল যদি ট্রান্সকাল আসে ‘চিটাং ইনভেডেড’ তোমরা কোন্‌ পক্ষে কাঁপ দেবে? ব্রিটিশ পক্ষে, তার মানে ইণ্ডিয়ান পক্ষে, না জাপানী পক্ষে?” স্বপনদা সুধান।

বাবলী ধাঁ করে জবাব দেয়, “অবশ্যই ইণ্ডিয়ান পক্ষে।”

“এইবার পথে এস।” স্বপনদা হেসে বলেন, “জাপান তো রাশিয়ার বিপক্ষে লড়ছে না, রাশিয়াও লড়ছে না জাপানের বিপক্ষে। কিন্তু তোমরা

কমিউনিস্টার যদি জাপানের বিপক্ষে রাইফেল হাতে নিয়ে চাটগাঁ যাও আর জাপানী বধ কর তা হলে জাপান কি তোমাদের কমিউনিস্ট বলে চিনতে পারবে না? তোমাদের বিরুদ্ধে রাশিয়ার কাছে নালিশ করবে না? তার ফলে তোমরা কি মস্কো থেকে লগুন হয়ে নির্দেশ পাবে না, রাইফেল নামাও, কোলাহুলি করো? নয়তো জাপান প্রতিশোধ নেবে ভ্লাডিভস্টক আক্রমণ করে। ট্রান্সকল আসবে, ভ্লাডিভস্টক ইনভেডেড। তখন তোমাদের ইণ্ডিয়ান মুখোশটি খসে পড়বে, রাশিয়ান স্বরূপটি বেরিয়ে পড়বে। বুঝলে, চকোলেট, ব্যাপারটা অত সরল নয়। তোমার মতো সরলা অবলার রাইফেল না ধরাই ভালো। কমিউন ছাড়া, বিয়ে করো।”

বাবলী চাহুর দিকে কাতর দৃষ্টিতে তাকায়। তখন চাহু তাকে একটা দাবড়ি দিয়ে বলে, “তুমি তো থিয়োরেটিয়ান নও, তুমি এসব কুটিল প্রশ্নের জবাব দিতে যাও কেন? তোমার বলা উচিত ছিল, পার্টির সঙ্গে পরামর্শ করে জবাব দেব। আর পার্টি পরামর্শ করত লগুনের পার্টির সঙ্গে, লগুনের পার্টি মস্কোর পার্টির সঙ্গে। শেষপর্যন্ত কী নির্দেশ আসত জানিনে। তবে আমার ব্যক্তিগত অভিন্ন সোভিয়েট ইউনিয়নকে একই কালে স্টালিনগ্রাদ আর ভ্লাডিভস্টক দুই জায়গায় লড়তে বাধ্য না করা। জাপানকে ভ্লাডিভস্টকে প্রতিশোধ নিতে প্ররোচনা না দেওয়া। অতএব চটুগ্রাম থেকে শত কোশ দূরে থাকা।”

“চমৎকার!” বৌদি বলে ওঠেন, “এ ছেলে অনেকদূর যাবে, অনেক উচ্ছে উঠবে। এর হাতে গভর্নমেন্ট পড়লে আর একটা ব্রেস্ট-লিটোভ্‌স্ক। এবার আধখানা বাংলাদেশ ছেড়ে দিয়ে।”

“কেন, আপনাদের শাস্ত্রেই তো লিখেছে অর্ধ ত্যাজ্যি পণ্ডিতঃ। লেনিনের অপরাধ কী? পরে তো তিনি ছেড়ে দেওয়া জায়গা ফেরৎ পেয়েছিলেন। জার্মানীর পরাজয়ের পরে। জাপান কি আথেরে হারবে না, বৌদি? স্বপনদা কী বলেন?” চাহু বাবলীর মতো ‘দাদা’ ও ‘বৌদি’ পাতায়।

বৌদি গলে গিয়ে ওদের ডিনারের নিমন্ত্রণ জানান। সেইদিনই। কিন্তু ওদের তাড়া ছিল। পার্টি অফিসে জরুরি বৈঠক। ডিনার আরেকদিন হবে। আগে তো ভালো খবর আশুক। তারপরে ভালো খাবার।

“জুলির জন্তে মনটা কেমন করছে, বৌদি।” বাবলী বলে তাঁর হাতে হাত রেখে। “যেখানেই থাকুক সে বেঁচে থাকলেই আমি নিশ্চিন্ত হব।

করেছে ইয়া ময়েছে শুনে বুকটা ছাঁৎ করে ওঠে। ময়েছে তো বিয়ের এনগেজমেন্ট করে লাভ কী হলো? গান্ধীজী যে আগুন জ্বালাতে যাচ্ছেন তাতে বাঁপ দিলে করেছের চেয়ে ময়েছের সম্ভাবনাই বেশী।”

স্বপনদা ফোড়ন কাটেন, “শাদী করেছের সম্ভাবনাও কম নয়।”

## ॥ বিশ ॥

স্টালিনগ্রাডে তখন বোরতর সংগ্রাম চলেছে। হ্যাণ্ড টু হ্যাণ্ড ফাইট। রাস্তায় রাস্তায়। কে জিতবে, কে হারবে তা কেউ জোর করে বলতে পারে না। মুকুলদা পণ্ডিচেরী থেকে স্বপনদাকে জানিয়েছেন যে শ্রী অরবিন্দ দু’বেলা রেডিও খুলে খবর শুনছেন। যুদ্ধের ধারাবিবরণী।

স্বপনদার মনে পড়ে যায় একটা ইংরেজী ছড়া। দীপিকাদিকে শোনান।

“See-saw,

Margery Daw !”

দীপিকাদি স্থান, “হঠাৎ তোমার তত্তা খেলার শখ হলো কেন? আমি কি মার্জরি ড? আমি একবার উঠব, একবার নামব। তুমি একবার নামবে, একবার উঠবে? তেমন খেলার কি শেষ আছে?”

“আরে, সেই কথাই তো আমি বোঝাতে চাইছি। একবার জার্মানরা ঠেলে নিয়ে যাচ্ছে রাশিয়ানদের, একবার রাশিয়ানরা ঠেলে নিয়ে যাচ্ছে জার্মানদের। এ খেলার শেষ কোথায়? আমার চিন্তাও তেমনি দোলনায় চেপে ছলছে। রাশিয়ানরা সমাজে একটা অভূতপূর্ব পরিবর্তন এনেছে, তারা হেরে যাক এটা আমার কাম্য নয়। আবার জার্মানরা কত দিক দিয়ে অসামান্য। ওরা হেরে গেলেও আমি দুঃখ পাব। তা হলে কি ওরা দুই পক্ষই জিতবে? তা কী করে সম্ভব? এমন কোনো সমাধান কি হয় না যাতে দু’পক্ষেরই মান রক্ষা হয়, প্রাণ রক্ষা হয়, স্বার্থ রক্ষা হয়? মাঝখানে দাঁড়িয়ে মিটমাট করতে পারে এমন কি কেউ নেই? ভারত যদি স্বাধীন হয়ে থাকত গান্ধীজীই হয়তো সেটা পারতেন।” স্বপনদা মনে করেন।

“আগে তো ভারতের স্বাধীনতার সংগ্রামে জয় হোক। আপনি খেতে

পায় না শঙ্করাকে ডাকে। বাইরের জগতে কে মানে গান্ধীজীকে? নিজের দেশেই তাঁর ডাক শুনে সাড়া দিচ্ছে ক'জন? আর-সব প্রদেশের খবর রাখিনে, এই বাংলাদেশে মেদিনীপুর ছাড়া আর কোন্ জেলা সাড়া দিয়েছে? সাড়া বলতে আমি বুঝি জনগণের সাড়া।” দীপিকাদি কেমন যেন নিরাশ।

এমন সময় এল্ফ লাক দিয়ে ছুটে গিয়ে ঘেউ ঘেউ করে। তারপর চুপ করে ফিরে আসে। পেছনে বাবলী।

“এই যে, চকোলেট।” স্বপনদা আদর করে পাশে বসান। “তারপর কী খবর? কাগজে আর কতটুকু লেখে, রেডিওতে কতটুকু শোনায়?”

বাবলী কাতর কণ্ঠে বলে, “জুলিরা আমার পিঠে ছোরা মেরেছে, দাদা, বৌদি। স্টালিনগ্রাডে আমরা জিতব কী করে?”

“ও: সেইজন্মে তুমি এতদিন দর্শন দাওনি। হাসপাতালে ছিলে। তা একটা খবর দিতে হয়। গিয়ে দেখে আসতুম।” স্বপনদা রক্ত করেন।

“না, না, তামাশা নয়, দাদা। বিষম শীর্ণিয়াস ব্যাপার। কংগ্রেস যদি সত্যি সত্যি ইংরেজকে ভারতছাড়া করে তবে সে কি রাশিয়ার এই দারুণ দুর্দিনে মদত দিতে পারবে? মদত না পেলো রাশিয়া কি একহাতে লড়ে হারানো এলাকা উদ্ধার করতে পারবে? আবার সেই ব্রেস্ট-লিটভস্ক! না, না, আমাদের জায়গা আমরা হাতছাড়া করব না। করলে আমাদের বিপ্লব ব্যর্থ হবে। ওখানে ব্যর্থ হওয়া মানে এখানেও ব্যর্থ হওয়া। কংগ্রেসই এর জন্মে দায়ী হবে, যদি এই আন্দোলন সফল হয়।” বাবলী নালিশ করে।

“কী আশ্চর্য সাদৃশ্য! ইংরেজরা বলছে কংগ্রেসওয়ালারা ওদের পিঠে ছোরা মেরেছে। তোমরাও বলছ ওরা তোমাদের পিঠে ছোরা মেরেছে। ওরা যদি সফল হয় তা হলে শুধু যে ইংরেজরা ভারতছাড়া হবে তা নয়, তোমরাও দেশছাড়া হবে। যদি দেশটা তোমাদের হয়ে থাকে। তোমাদের কথাবার্তা থেকে মনে হতে পারে তোমরা মস্কো থেকে এসেছ, যেমন মুসলিম লীগপন্থীরা মস্কো থেকে এসেছেন। এ দেশের মুক্তি কি তোমাদের কাম্য নয়? এই পরিস্থিতিতে অসুচিত হতে পারে, কিন্তু মুক্তির জন্মে সংগ্রাম কি তাই বলে একটা অপরাধ?” স্বপনদা জিজ্ঞাসা করেন।

“কাকে তুমি শোনাচ্ছ একথা?” বাবলী জলে ওঠে। “যে দেশের জন্মে জীবনপণ করেছিল। আর একটু হলে ফাঁসীকাঠে ঝুলত। সাহেবটা বেঁচে যায়, সেও বেঁচে যায়। দীর্ঘকাল জেলখানায় বসে সে আরো পড়াশুনা

করেছে। তাই বুঝতে পেরেছে যে ভারতের স্বাধীনতা হচ্ছে উপরতলার দশ-ভাগের নয়, নিচের তলার নব্বইভাগের স্বাধীনতা। সেটা কংগ্রেসের লক্ষ্য নয়। কংগ্রেসনেতারা চান নিজেদের শ্রেণীর আধিপত্য। একদল গোয়া ইংরেজকে তাড়িয়ে একদল কালা ইংরেজ সব ক্ষমতা ও সব ধন আত্মসাৎ করবে। যাদের মাথায় কাঁঠাল ভেঙে খাবে তারা যেমন শোষিত ছিল তেমনি শোষিত থাকবে। গান্ধীজীর মূল স্বরাজ কল্পনা তো ভালোই ছিল। কিন্তু জমিদার, মহাজন ও পুঁজিপতিদের টাকায় কংগ্রেস চালাতে গিয়ে তিনি পড়ে গেছেন তাদেরই শ্রেণীস্বার্থের ফাঁদে। সফল যদি হন তবে সে সাফল্য উপর-তলার দশভাগের লভ্য ডিভিডেণ্ড। নিচের তলার নব্বইভাগের প্রাপ্য মজুরি নয়। এর জন্তে কেন আমি জীবনপণ করব? কেনই বা করব, মরেছেই বা কেন? আমার রেকর্ড কি তোমার অজানা? তুমি হাইকোর্টের পেপারবুক যদি পড়ে না থাকো তবে ল রিপোর্ট নিশ্চয়ই পড়েছ। আমাকে দেশছাড়া করবে এত বড়ো স্পর্ধা কার। সময় যখন আসবে তখন আমিই তাদের লিকুইডেট করব। তোমার এই ব্রিটিশ আইন তাদের বাঁচাতে পারবে না।”

‘যদিও এই ব্রিটিশ আইনই তোমাকে বাঁচিয়েছে।’ স্বপনদা হাসেন। ‘আখ, চকোলেট, ইংরেজরা চিরকাল সাম্রাজ্যবাদী ছিল না। ধনতন্ত্রবাদীও ছিল না। এমন কি বুর্জোয়াও ছিল না। তাদের আইনের সূত্রপাত অতি মহৎ উদ্দেশ্য নিয়েই হয়েছিল। প্রচণ্ড সংগ্রামের ভিতর দিয়ে সে আইন প্রজা-শক্তিকে রাজশক্তির চেয়ে শ্রেষ্ঠতর করেছে, সিভিল পাওয়ারকে মিলিটারি পাওয়ারের থেকে উচ্চতর করেছে, আইনের শাসনকে মাংস্রাত্ম্যের উর্ধ্বতর করেছে। ওদের দেশের অভিজাতরা বা ধনপতিরাও আইনের উর্ধ্ব নন। বিপ্লব যদি হয় লেনিন স্টালিনকেও বিচারপতিদের রায় মানতে হবে। লিকুই-ডেট করতে হলে তার আগে আইন পাশ করিয়ে নিতে হবে। দীনতম ও হীনতম ইংরেজও এর মূল্য বোঝে। কোর্টের উপর তাদের অগাধ শ্রদ্ধা, কোর্টও তাদের রক্ষক। সরকারটাতে যে উপরতলার লোকের মৌরসী পাটা তা নয়। লেবার পার্টিও গদীতে বসতে পারে, বার দুয়েক বসেওছে। সেই-জন্তেই তো ওরা ফাসিস্টদের বিরুদ্ধে অস্ত্র ধরেছে। ফাসিস্টরা যাতে জিতে না যায়, জিতে গিয়ে তাদের অধিকার কেড়ে না নেয়, সেইজন্তে সোভিয়েট ইউনিয়নের কমিউনিস্ট বিপ্লবীদের অস্ত্র জোগাচ্ছে। ইংরেজ যাক, কিন্তু তার দেওয়া আইন আদালত, আইনসভা, গণতান্ত্রিক নির্বাচন, গণতান্ত্রিক মন্ত্রি



থাকুক। কংগ্রেস যা চায় তা কেন্দ্রীয় স্তরে তার সম্প্রসারণ। ওই কাঠামোটা পরে তোমাদেরও কাজে লাগবে, যদি জনগণের ভোট পাও।”

দীপিকাদি এবার কণ্ঠক্ষেপ করেন। “তোমার ওসব কথা কংগ্রেসের বাম-পন্থীরা স্বীকার করবেন না। ওঁরা চান ইংরেজকে ঝাড়েমূলে উচ্ছেদ করতে। ইংরেজশাসনের ভালোমন্দ সব একসঙ্গে মুছে ফেলবেন। বাথ টাবে ময়লা জলের সঙ্গে সঙ্গে বাচ্চাটিকেও নর্দমায় ফেলে দেওয়া হবে। বাবলীদের সঙ্গে জুলিদের ফারাক খুব বেশী নয়। ওরা এক পালকের পাখী। তবে প্রোলিটারিয়ান একাধিপত্য জুলিরা কিছুতেই বরদাও করবে না। প্রাইভেট প্রপার্টি ওদের কাছে বিশেষ মূল্যবান। ওরা বামপন্থী হলেও মার্কসবাদী নয়। সুতরাং বাবলীদের সঙ্গে গোড়ায় অমিল। সাম্রাজ্যবাদের বিরুদ্ধে জোট বাঁধা এক জিনিস। তার অন্তর্ধানের পরে তার পরবর্তী মতবাদ নিয়ে একমত হওয়া অন্য জিনিস। বিপ্লবেরও দুই দলের কাছে দুই অর্থ ও দুই রূপ। একদল হয়তো আরেক দলকে উৎখাত করবে।”

বাবলী একটু ইতস্তত করে বলে, “কিন্তু ওরা যে আমাদের মুখের গ্রাস কেড়ে নিচ্ছে, বৌদি। ওরাই যদি আমাদের আগে বিপ্লব ঘটায় তো আমরা ঘটাব কী? প্রতিবিপ্লব না অতিবিপ্লব? ওরা যদি সফল হয় তবে আমাদের আর মাথা তুলতে দেবে না। ব্রিটিশ আইন তো তখন থাকবে না। আমাদের ধরে ধরে ঝুলিয়ে দিলে আমরা কোন্ আদালতের দ্বারস্থ হব? আমাদের একমাত্র ভরসা স্টালিনের হস্তক্ষেপ, যদি তাঁর জয় হয়। জয় পরাজয় নির্ধারিত হবে স্টালিনগ্রাদের যুদ্ধে। আমরা এখন মহা উদ্ভিগ্ন অবস্থায় দিন গুনছি, প্রহর গুনছি, ঘণ্টা গুনছি। তার জন্তে যদি শয়তানের সাহায্য নিতে হয় তো তাও নেব। সাম্রাজ্যবাদী ও ধনতন্ত্রবাদীরা সাক্ষাৎ শয়তান। তবু তাদের সাহায্য আমাদের নিতেই হবে। সেইজন্তেই তো কংগ্রেসের এই আন্দোলন আমাদের পিঠে ছুরি। নইলে জুলির সঙ্গে তো আমার ভালোবাসার সম্পর্ক। তার অমঙ্গল কে চায়! মেয়েটা কোথায় যে অদৃশ্য হয়ে গেল কেউ জানে না। তার মা পর্যন্ত না। ও যে কী করে বেড়াচ্ছে, তাই বা কে জানে? যদি মারাত্মক কিছু করে থাকে তবে মিলিটারি টাইবিউনালে নির্দোষ প্রাণদণ্ড। তার চেয়েও ভয়ানক কথা—”

“থাক, মুখে আনতে হবে না।” বৌদি ধমক দেন।

স্বপনদা অহুমান করেন। “না, না, ইংরেজরা তত ধারাপ নয়।”

বৌদি আবার ধমক দেন ! “তুমি তো সব জানো। ওরা এককালে কীই বা না করেছে ! আজকাল সহজেই টি টি পড়ে যায় বলে সাবধান হয়েছে। তুমি কি জালিয়ানওয়ালাবাগের ভিতরের কারণ জানো ?”

“তুমি জানো ?” স্বপনদা কোতহলী হন।

‘মিউটিনির পর থেকে ইংরেজদের সর্বক্ষণ আতঙ্ক কখন না জানি ওদের মেমসাহেবরা ধর্ষিতা হন। অমৃতসরে একজন মেমসাহেবের উপর উপদ্রব হয়, সেটা ধর্ষণ না হলেও সব চেয়ে খারাপটাই ওদের মাথায় আসে। নেটিভদের নিবৃত্ত করার অভিপ্রায়ে জেনারল ডায়ারের অত্যন্ত গুলীবর্ষণ। যারা নিরপরাধ তাদেরই প্রাণদণ্ড হলো। ওটার জন্তে ভালো ইংরাজরা সকলেই লজ্জিত। অথচ প্রাণ খুলে ডায়ারকে অভিশাপ দিতেও পরাঙ্মুখ। তিনি নাকি ইংরেজ মহিলামাত্রেরই মানরক্ষা করার মহৎ উদ্দেশ্য নিয়েই জালিয়ানওয়ালাবাগ মাসাকার করেছিলেন। এসব কথা তুমি ইতিহাসে পাবে না। এটা অলিখিত এক অধ্যায়। আমিও লিখব না। ইংরেজরা ভয় পেরেছিল ও তার সঙ্গত কারণ ছিল এটা সত্য।” বৌদি একথা মানেন।

“ওরা সাক্ষাৎ শয়তান। তবু আমাদের দুর্দিনের মিতা।” বাবলী বলে।

“নারী ! নারী !” স্বপনদা গম্ভীরভাবে মাথা নাড়েন। “নারীর জন্তেই নস্কাকাণ্ড। নারীর জন্তেই কুরুক্ষেত্র। নারীর জন্তেই ট্রয়ের যুদ্ধ। নারীর জন্তেই জালিয়ানওয়ালা বাগ মাসাকার। তার থেকে অসহযোগ আন্দোলন। যার চরম পরিণতি এই ‘ভারত ছাড়ে’ অভ্যুত্থান। এখন ক্যারামেলের গায়ে যেন কেউ হাত না দেয়। দিলে এ রাজস্ব ধ্বংস হয়ে যাবে। তাই নিয়ে পরে এক মহাকাব্য বা মহা উপন্যাস লেখা হবে। ক্যারামেল হবে তার নায়িকা।”

“তুমিও যেমন !” বৌদি পরিহাস করেন। “কেউ জানতে পেলো তো ধ্বংসলীলা শুরু করবে ? যা কড়া সেন্সরশিপ ! কাগজে কতটুকু বেরোয় ! তুমি কি জানো যে জুলির সঙ্গে যার বিয়ে হবে সেই সৌম্য চৌধুরীর মাথার দাম পাঁচ হাজার টাকা ? যে ধরিয়ে দেবে সে পাবে।”

“ও কী ! সৌম্য তো কট্টর অহিংসাবাদী। ও কোথায় কবে কী করেছে যে ওর মাথার দাম হবে পাঁচ হাজার টাকা ?” স্বপনদা হকচকিরে যান।

“তা তো জানিনে। খবরটা আমার কানে এসেছে চুষক আকারে। বোধ হয় পুলিশ গেজেটে বেরিয়েছে।” বৌদি ষড়দূর জানেন।

“তা হলে জুলির বরও নিখোঁজ।” বাবলী চুঃখিত হয়ে বলে।

স্বপনদা সংশোধন করেন, “ভাবী বর।”

“বেচারি জুলি! কবে যে ওর বিয়ের ফুল ফুটবে তা কে বলতে পারে? করেছে ইয়া মরেকে ব্রত নিয়ে বেঁচে থাকাই দায়। আমার ভয়ানক মন কেমন করছে ওর জন্তে। ঝগড়া করেছি বলে কি আমি ওকে কম ভালোবাসি? মেয়েটা গেল কোথায়? ও তো স্ত্রীষ বোসের ভক্ত। স্ত্রীষ বোস যেমন নিরুদ্দেশ জুলিও তেমন নিরুদ্দেশ। দেশের বাইরে চলে গেছে কি না কে জানে! না যাওয়াই সম্ভব। বরের টানে দেশে থেকে যেতেও পারে।” বাবলী গবেষণা করে।

“বরটাও যদি দেশান্তরী হয়ে থাকে? পাঁচ হাজার টাকা যার মাথার দাম সে নিশ্চয়ই সাংঘাতিক কিছু করেছে। নইলে ফেরার হবে কেন! নেপাল। নেপাল! আমার মনে হয় নেপালে গিয়ে ওখান থেকে বিহারে বিদ্রোহ পরিচালনা করেছে। শুনেছি বিহারেই ওর আসল বাড়ী।” স্বপনদার ভাঙ্গ।

“যত সব বাজে ভাবনা।” বৌদি এককথায় খারিজ করেন। আত্মগোপন করার পক্ষে কলকাতার মতো জায়গা আর নেই। এমন সব গলি খুঁজি আছে যেখানে সূর্যের আলো পৌঁছয় না। দিনের বেলাও ব্ল্যাক আউট। এক বাড়ীর ছাদ থেকে আরেক বাড়ীর ছাদে লাফ দেওয়া যায়। পাঁচ হাজার টাকার লোভে পুলিশ কি নিজের শ্রাণ বিপন্ন করবে? যদি ওদের হাতে রিভলভার থাকে! এই যুদ্ধের মরুত্বে বিস্তার রিভলভার আমদানী হয়েছে, কালো বাজারে কেনা যায়। জুলির তাতে কোনো অনীহা নেই। ওর ভাবী বরের কথা আলাদা। গান্ধীবাদী বলে শুনেছি। গান্ধীবাদীরা তো আত্মগোপন করে না। এ রহস্য ভেদ করা কঠিন।” বৌদি নিশ্চিত নন।

“পুলিশও মাজকাল তেমন তৎপর নয়। ওরাও বোঝে ক্ষমতা একদিন কংগ্রেসের হাতেই পড়বে। আর নয়তো বার্মার মতো জাপান পসন্দ দলের হাতে। যুদ্ধের যতদিন না একটা এস্পার কি ওস্পার হচ্ছে ওদের ধরা পড়ার সম্ভাবনা খুবই কম। যদি না দলের লোকেরা কেউ ধরিয়ে দেয়। এই পোড়া দেশে সেটার সম্ভাবনাই বেশী। বক্খামিকের মতো বক্খদেশীতে দেশ ভরে গেছে। খদ্দেরের ভেক পরে ঘুরে বেড়ায়।” স্বপনদা সীনিকের মতো বলেন।

বৌদি প্রতিবাদ করেন। “বক্খদেশী তুমি কাদের বলছ? ওরা যে

মহাত্মা গান্ধীর পদাতিক সেনা। খাদি ওদের ইউনিফর্ম। লক্ষ লক্ষ বিধবা চরকায় সূতো কেটে ছোটো পয়সা পাচ্ছে, হাজার হাজার তাঁতী কাপড় বুনে হুঁমুঠো ভাত পাচ্ছে। লোকে কম টাকায় মিলের ধুতী শাড়া না কিনে খাদির ধুতী শাড়ী কিনছে। সেইভাবে দেশের জন্তে যে যেটুকু পারে ত্যাগস্বীকার করছে। বিনা প্রেমসে না মিলে নন্দলালা। বিনা ত্যাগসে না মিলে স্বরাজ। এত অধিকসংখ্যক ভারতবাসী এত বেশী ত্যাগস্বীকার কি এর আগে কখনো করেছে? স্ববিধাবাদী আর বিশ্বাসঘাতক কোন্ সৈন্যদলে নেই? তা বলে ওদের দিয়ে দেশ ভরে গেছে এটা তোমার অত্যাক্তি।”

স্বপনদা বলেন, “সোভিয়েট ইউনিয়নের কমিউনিস্ট পার্টি একটা মস্ত বড়ো গুণ হচ্ছে ওরা নির্মমভাবে পার্জ করে। পার্জ করতে গিয়ে এমন কড়া পার্গেটিভ দেয় যে ময়লার সঙ্গে সঙ্গে প্রাণও বেরিয়ে যায়। সেটা অবশ্য মস্ত বড়ো একটা দোষ। আর আমাদের এখানে কংগ্রেসের রীতি হচ্ছে আদৌ পার্জ না করা। পাছে ঠগ বাছতে গাঁ উজাড় হয়।”

বৌদি মেনে নিতে পারেন না। “তুমি যাকে পার্জ বলছ তার নামে মধ্যযুগে ছিল ইনকুইজিশন আর উইচ হাণ্ট। সেইসব জিনিস অন্য নামে ফিরে এসেছে। কমিউনিস্ট পার্টি রোমান ক্যাথলিক চার্চের মতোই অসহিষ্ণু। কংগ্রেসও যদি তাই হয় তবে এদেশেও ইনকুইজিশন ও উইচ হাণ্ট শুরু হবে। এরা অবশ্য মানুষকে পুড়িয়ে মারবে না বা ফায়ারিং স্কোয়াডের সাহায্যে হত্যা করবে না। কিন্তু তার ধোপানাপিত বন্ধ করবে, দানাপানি রোধ করবে। সে গ্রামে টিকতে পারবে না। শহরে পালিয়ে আসবে। সেখানেও আশ্রয় পাবে না। দেশান্তরী হবে। কংগ্রেসকে টোটালিটারিয়ান পার্টি না করে ডেমোক্রেটিক পার্টি হিসাবে বাঁচিয়ে রাখতে হবে। থাক না কিছু দলাদলি। ক্ষমতা নিয়ে কাড়াকাড়ি। সিদ্ধান্ত যেটা হবে সেটা মেজরিটি ভোটেই হবে। কিন্তু মাইনরিটিও থাকবে। তাকেও সুরোগ দিতে হবে মেজরিটি হয়ে ওঠার। পার্জ করবে কে কাকে? কার সে অধিকার আছে? গায়ের জোরে পার্জ করলে সেটা হবে ত্রায় নয়, অত্রায়। যারা সামাজিক ত্রায়ের জন্তে বিপ্লব ঘটিয়েছে তারা কী করে বলবে যে এটা অত্রায় নয়, ত্রায়?”

“শোন, বৌদি,” বাবলী এর উত্তর দেয়, “তোমার যুক্তি নিতুল। কিন্তু যাদের ঘরে শত্রু, বাইরে শত্রু, যাদের রাষ্ট্র এখনো মজবুত হয়নি, তারা যদি টের পায় যে তাদের পার্টির ভিতরেই শত্রু, তা হলে তারা প্রতিবিপ্লবের বা অতি-

বিপ্লবের ভয়ে কাঁটা বেছে ফেলবেই। যাতে নিষ্কটক হতে পারে। সোভিয়েট কমিউনিস্ট পার্টির পক্ষে যথেষ্ট যুক্তি আছে। মহান স্টালিন একান্ত সহনশীল। কিন্তু তাঁর সহনশীলতারও সীমা আছে। হত্যার আদেশ যখন তিনি অমুহোদন করেন তখনকার ফোটো দেখেছ? কী করুণাঘন মুখ! ওটা আপনাকে নিষ্কটক করার জন্তে নয়, পার্টিকে নিষ্কটক করার জন্তে, সেইস্বত্রে বিপ্লবকে নিষ্কটক করার জন্তে, শ্রমিকশ্রেণীর একমাত্র রাষ্ট্রকে নিষ্কটক করার জন্তে, আমাদের পিতৃভূমিকে নিষ্কটক করার জন্তে। হাসছ যে!”

“তোমাদের পিতৃভূমি শুনে।” বৌদি উপহাস করেন।

“আক্ষরিক অর্থে নয়। প্রতীকী অর্থে।” বাবলী ব্যাখ্যা করে।

“তারপর তোমাদের জনযুদ্ধ কতদূর?” স্বপনদা প্রশ্ন করেন।

“রাইফেল হাতে না পেলে জনযুদ্ধ চলবে কী করে? যোদ্ধারা প্রস্তুত, কিন্তু অস্ত্র কোথায়? ইংরেজদের ধারণা হাতিয়ার হাতে পেলে আমরা জাপানের সঙ্গে না লড়ে ওদের সঙ্গেই লড়ব।” বাবলী আক্ষেপ করে।

“সে ধারণা নেহাৎ ভুল নয়, চকোলেট। তোমরা প্রায় সবাই পুরাতন সন্ত্রাসবাদী। ইংরেজরা তোমাদের বিশ্বাস করবে কেন? আর জাপান তো রাশিয়ার শত্রু নয়। তার বিরুদ্ধে তো লড়ছে না। তোমরাই বা জাপানের সঙ্গে লড়বে কার স্বার্থে? তোমাদের পিতৃভূমির স্বার্থে নিশ্চয়ই নয়। তা হলে কি রাশিয়ার মিতা ইংলণ্ডের স্বার্থে? না, তাও তো নয়। যদি বলো মাতৃভূমির স্বার্থে তবে কেউ বিশ্বাস করবে না। দোড়া হাসবে।” স্বপনদা কৌতুক করেন।

“কিন্তু জাপানীরা যে ফাসিস্ট এটা তো সত্য। হিটলার, মুসোলিনী, তোজো এই তিন ফাসিস্ট ডিক্টেটরই আমাদের দুশমন। হিটলার ফার্স্ট। হিটলারকে টিট করার পর তোজোর পালা আসবে। ইতিমধ্যে আমাদেরও সক্রিয় হতে হবে। আমরা প্রোপাগান্ডা যুদ্ধ চালিয়ে যাচ্ছি। অ্যাণ্টিফাসিস্ট প্র্যাটফর্ম থেকে। প্রত্যেকটি শহরে, প্রত্যেকটি গ্রামে আমরা ছড়িয়ে পড়েছি। সাম্যবাদী স্ফুর্মাচার প্রচার করছি। পুঁথিপত্র বিতরণ করছি। মিশনারিদের মতো নামমাত্র দাম নিই। শান্তির সময় হলে ইংরেজ সরকার আমাদের কর্মীদের জেলে পুরত, পুঁথিপত্র বাজেয়াপ্ত করত। যুদ্ধকালে আমরা নিরঙ্কুশ। তুমি যদি চাও তো বলো, তোমাকে একসেট মার্কসীয় সাহিত্য এনে দেব। মার্কস, এঙ্গেলস, প্লেখানভ, লেনিন, স্টালিন সকলের বই পাবে। কিন্তু ঊটস্কির নয়, বুখারিনের নয়।” বাবলী মাথা নাড়ে।

“কেন, ঠাৱা কি মাৰ্কসবাদী ছিলেন না ?” স্বপনদা জেৱা কৰেন।

“ছিলেন, কিন্তু পাৰ্টি লাইন মেনে চলেননি। লাইনচ্যুত হয়েছেন। মাৰ্কসবাদ ইণ্টাৰগ্ৰেট কৰবার একমাত্র অধিকাৰী হচ্ছে সোভিয়েট কমিউনিষ্ট পাৰ্টি। য়াৰ ফাৰ্ষ্ট সেক্ৰেটাৰি কমরেড ষ্টালিন।” বাবলী জবাব দেয়।

বোদি টিল্লনী কাটেন, “যেমন গ্ৰীক অৰ্থোডক্স চাৰ্চ, য়াৰ প্যাট্ৰিয়াক বাস কৰতেন মস্কোতে। অভ্ৰান্ত শাস্ত্ৰ, অভ্ৰান্ত চাৰ্চ, অভ্ৰান্ত প্যাট্ৰিয়াক। সব ঘূৰে ফিৰে এসেছে। মানতেই হবে। না মানলে কোতল।”

“আমি হিউমানিষ্ট। সব ৰকম মানবিক ব্যাপাৰে আমাৰ আগ্ৰহ। মাৰ্কসবাদী চিন্তাধাৰাও মানবিক। ৰোজা লুকসেমবুৰ্গেৰ বই তোমাৰ কাছে থাকলে দিয়ো। জাৰ্মানীতে তাঁৰ সেই বিপ্লব সফল হলে সেখানকাৰ পাৰ্টি লাইন অন্তৰকম হতো।” স্বপনদা মনে কৰেন।

“যেমন মাৰ্টি'ন লুখাৰেৰ গ্ৰেটেস্টাণ্ট চাৰ্চেৰ সাম্প্ৰদায়িক বিধান।” বোদি তুলনা দেন। তাঁৰ মুখে বাঁকা হাসি।

“ৰোজা লুকসেমবুৰ্গকে আমি অশেষ শ্ৰদ্ধা কৰি। ওঁৰ বই তো এদেশে নিষিদ্ধ। আমৰা যেসব বই আনাই সেসব তো ৰাশিয়া থেকে। ৰোজাৰ বই ৰাশিয়া পাঠাবে না।” বাবলী অক্ষমতা জানায়।

“তাৰ মানে মাৰ্কসবাদীৰাও বিভিন্ন সম্প্ৰদায়ে বিভক্ত। খ্ৰীষ্টান ও মুসল-মানদেৰ মতো। বৌদ্ধ ও জৈনদেৰ মতো। আমৰা লিবাৰল হিউমানিষ্টৰা গোঁড়া নহি। সব সম্প্ৰদায়েৰেই বক্তব্য প্ৰণিধান কৰি।” স্বপনদা বলেন।

“ভালো কথা, তোমাদেৰ লিবাৰল হিউমানিষ্ট ম্যানিফেস্টোৰ কী হলো ? মিটিং তো বসল কয়েকবাৰ।” বোদি জানতে চান।

“মিটিং মানে তো ইটিং। নানা মুনিৰ নানা মত। লিবাৰলদেৰ যত মত তত পথ। প্ৰত্যেকেই ব্যক্তিস্বাতন্ত্ৰ্যবাদী। যেখানে এত বেশী ব্যক্তিস্বাতন্ত্ৰ্য সেখানে একমত হওয়া অসম্ভব। কমিউনিষ্টৰা গুৰুবাদী। মাৰ্কস তাঁদেৰ গুৰু। স্যাদিকাল হিউমানিষ্টৰাও গুৰুবাদী। মানবেন্দ্ৰনাথ ৰায় তাঁদেৰ গুৰু। আমাদেৰ তেমন কোনো গুৰু নেই। আমৰা গুৰুবাদী নহি। তৰ্কাতৰ্কি কৰেই আমৰা একমত হতে চেষ্টা কৰি। কোনো কোনো পয়েণ্টে একমত হইও। কিন্তু মোটেৰ উপৰ নয়।” স্বপনদা জানান।

এবাৰ বাবলী প্ৰতিবাদ কৰে। “ওই যে বললে কমিউনিষ্টৰা গুৰুবাদী ওটা তোমাৰ ভুল ধাৰণা, দাৰ্শন্য। ফৰাসী বিপ্লবেৰ ব্যৰ্থতাৰ কাৰণ অহুধাবন

করে মার্কস এমন একটি পন্থার নিশানা দিয়ে গেলেন যা অমূল্য করে রুশ-দেশের কমিউনিস্টরা প্রমাণ করলেন যে মার্কসবাদী বিপ্লব অব্যর্থ। এর মধ্যে গুরুবাদ কোথায়? এ তো কলঙ্কের আমেরিকা আবিষ্কারের মতো যুগান্তকারী পর্যায়। আমেরিকা পাঁচশো বছর পরে যে স্তরে উপনীত হয়েছে রাশিয়া পঁচিশ বছরের মধ্যেই সেই স্তরের কাছাকাছি পৌঁছেছে। মার্কস স্বয়ং এতটা প্রত্যাশা করেননি। মার্কসকে যদি গুরু বলতে চাও তো লেনিন হচ্ছেন তাঁর গুরুমারা চেনা। আর স্টালিন লেনিনের চেয়েও এক কাটি সরেশ।”

বৌদি হেসে ফেলেন। “তা তো হবেনই। শতমারী ভবেৎ বৈজঃ। স্টালিন তো শত সহস্রমারী। তিনি ধনস্তুরি।”

“করাসী বিপ্লবের ও তার পরবর্তী নেপোলিয়নী আমলের হিসাব নিকাশ করলে দেখবে যে শত সহস্রকেও ছাড়িয়ে যায়। নীট ফল ব্যর্থতা। অপর পক্ষে নীট ফল সার্থকতা। অন্তত এখনপর্যন্ত তাই। রোমানভরা আর কখনো ফিরে আসবেন না, অভিজাতরাও না। বুর্জোয়ারা ফিরে এলে কৃষক শ্রমিকদের দাবিয়ে রাখতে পারবেন না। গণতন্ত্র প্রবর্তন করলে দেখবেন ওদেরই ভোটের জোর বেশী। ফাসিজম প্রবর্তন করলে গৃহযুদ্ধে বিনষ্ট হবেন। পৃথিবীর অন্তত একটা অংশে চিরকালের মতো বুর্জোয়াদের যুগ অন্ত গেল। সেখানে এখন নব্যযুগের সূর্যোদয়। এক এক করে অত্যাগত অংশেও সূর্যোদয় হবে। চীনদেশে তার পূর্বাভাস দেখতে পাওয়া যাচ্ছে। মহান লেনিন ভবিষ্যৎবাণী করে গেছেন বিপ্লব যাবে পিকিং আর কলকাতার পথ দিয়ে প্যারিসে। পিকিং পর্ব সারা হলেই কলকাতা পর্ব। আমরা তার জন্তে কোদাল দিয়ে মাটি কাটছি।” সবিনয়ে নিবেদন করে বাবলী।

স্বপনদা ব্যথিত হয়ে বলেন, “দৈশ্বর ওদের ক্ষমা করুন। ওরা জানে না ওরা কী করছে। যে যুগটাকে ওরা শেষ করে দিচ্ছে সেটা লিবারল হিউমানিজমের যুগ। এখনো সে যুগের কয়েকজন শিল্পী ও সাহিত্যিক দেশান্তরে গিয়ে বেঁচে আছেন ও সৃষ্টি করে চলেছেন। রাশিয়াতে বনস্পতি বলতে কেউ নেই, থাকলেও নীরব। সেখানে এরও হয়েছে ক্ষম। লেনিনের তবু শিল্পবোধ সাহিত্যবোধ ছিল। স্টালিন ভো সে রসে বঞ্চিত। বিশ্ব সাহিত্য ও বিশ্ব শিল্প থেকে রাশিয়ার নাম মুছে গেল। টলস্টয় ডস্টয়েভস্কি টুর্গেনিভ চেকভের উত্তরসূরী রইল না। তোমরা যদি এদেশে সফল হও তবে আমরাই হবে লাস্ট জেনারেশন। তা হলে এখন থেকেই সোয়ান সং লিখতে হয়।”

“সোয়ান সং মানে কী, বোদি ?” বাবলী জিজ্ঞাসা করে ;

“ওদেশে একটা প্রবাদ আছে, রাজহংসের মরণ আসন্ন হলে সে তার অস্তিম গীতি শুনিয়ে দিয়ে মরে। সোয়ান সং মানে বিদায় সঙ্গীত। বড়োই করুণ !” বোদি বুঝিয়ে দেন।

“না, দাদা, তোমাকে আমরা মরতে দেব না, বাঁচিয়ে রাখব। তবে ওই বুর্জোয়াপনন্দ উপন্যাস লেখা আর চলবে না। শ্রমিকপনন্দ কৃষকপনন্দ লিখতে হবে। তাতে তোমার লাভও হবে বিস্তর।” বাবলী অভয় দেয়।

“যাদের জীবনের সঙ্গে আমার নিবিড় পরিচয় নেই, যাদের ভাষাও আমি শিখিনি তাদের মনের মতো উপন্যাস লেখা কি আমার কর্ম ? যার কর্ম তারে লাজে, অন্য লোকে লাঠি বাজে। পাঠকরা আমাকে লাঠিপেটা করবে। মরতে আমাকে হবেই, আক্ষরিক অর্থে না হোক সাহিত্যিক অর্থে। স্বীপাঠ্য বা শিশুপাঠ্য কাহিনীর মতো শ্রমিকপাঠ্য বা কৃষকপাঠ্য কাহিনী লিখে আমি হয়তো জনপ্রিয় হব, পুরস্কৃতও হতে পারি, কিন্তু সেটা ছ’দিনেই বাসি হয়ে যাবে। তোমরাই মুখ ফিরিয়ে নেবে। তার চেয়ে মানে মানে অপসরণই ভালো। তুমি আমাকে ভাবিয়ে দিলে, বোন ! মস্কোর পরে পিকিং তার পরে কলকাতা, তার পরে প্যারিস। তা হলে এখন থেকেই লণ্ডন যাত্রা নয় কেন ? আরো কিছু দিন সময় পাওয়া যাবে।” স্বপনদা দীপিকাদির দিকে তাকান।

“তুমি তো ওদেশে যাবার জন্তে পা বাড়িয়েই রয়েছ। ইংরেজদের সঙ্গে সঙ্গে তুমিও প্রস্থান করবে, সে আমি জানি। কিন্তু আমি আমার এল্ফকে নিয়ে এই দেশেই থেকে যাব।” বোদি এল্ফকে কাছে টেনে নেন।

সেও ল্যাজ নেড়ে সন্মতি জানায়। বাবলীর কোল ছাড়ে।

বাবলী অপ্রতিভ হয়ে বলে, “তোমাদের সুখের সংসার ভেঙে দিতে আমি আসিনি, বোদি। এদেশে বিপ্লব কি এখনি হচ্ছে ? আগে তো চীনদেশে হোক। তার পূর্ব লক্ষণ দেখা যাচ্ছে মাওত্সে-তুংয়ের নেতৃত্বে। পিকিং এখনো দূর অস্ত্। দাদা, তুমি যা লিখতে চাও লিখে যাও। আমরা বাধাও দেব না, ফরমায়েসও করব না। তবে আশা করব যে তোমার মতো শক্তিশালী লেখক বুর্জোয়াদের অবক্ষয়ী সমাজের বর্ণনার বদলে মহৎ কিছু লিখবেন, যেটা সমাজের প্রগতিশীল শ্রেণী সানন্দে গ্রহণ করবে। টুর্গেনিভকে তো আমরা খারিজ করিনি। টলস্টয়কে তো নয়ই। বাতিল করেছি ডস্টয়েভ্‌স্কিকে।



শাক্তা প্রতিক্রিয়াশীল। আর চেকভকে। তাঁর হৃদয় ছিল, সেটার অপাঙ্গে অপচয় করেছেন।”

“তুই চেকভের বই আজকাল আবার ছাপা হচ্ছে। সকলের জন্মেই ছিল তাঁর দরদ। মানুষমাত্রেরই জন্মে।” স্বপনদা আবেগের সঙ্গে বলেন।

“হ্যাঁ, চেকভের নতুন করে মূল্যায়ন হচ্ছে। তিনি তো জাত বুজোয়া ছিলেন না। তবে ডস্টয়েভ্‌স্কি বরাবরের মতো বাতিল।” বাবলী যতদূর জানে।

“তা যদি হয় তবে বিশ্বের শ্রেষ্ঠ উপন্যাস পাঠ থেকে তাঁর স্বদেশবাসী বঞ্চিত হবে। আমি ‘ত্রাদারস কারামাজভে’র কথা ভেবে বলছি। তুমি যদি না পড়ে থাক তোমার শিক্ষা অসমাপ্ত রয়ে গেছে। কোনো সাহিত্যিককে লেবেল দিয়ে চিহ্নিত করা যায় না। এর পরে ডস্টয়েভ্‌স্কির দিনও আসবে।” স্বপনদা ভবিষ্যদ্বাণী করেন।

বাবলী এলফকে একটু আদর করে বলে, “যুদ্ধে যদি জিতি পমেরানিয়া আমরাই দখল করব।”

## ॥ একুশ ॥

পূজার বন্ধে কলকাতা গিয়ে মানস বিজন বর্ষনের অতিথি হয়। বিজনের গৃহিণী উদ্ভিতা জানতে চায় যুথিকা কোথায়। সে আসেনি কেন।

“যুথিকা এখন মহিলা সমিতির ভার নিয়ে হরেক রকম ধান্দায় জড়িয়ে পড়েছে। স্নাতো কাটা, তাঁত বোনা থেকে শুরু করে হাসপাতালে গিয়ে রোগিণীদের সেবাশুশ্রূষার স্বেচ্ছা করা। বাচ্চাদের জন্মে দুধও নিয়ে যায়। তার উপর আছে নিজের বাচ্চাদের শিক্ষাদীক্ষার ভার। আমরা ওদের ইস্কুলে দিইনি। গভর্নমেন্ট রাখারও ক্ষমতা নেই। তা ছাড়া শিক্ষা সম্বন্ধেও যুথিকার নিজস্ব ধারণা আছে। আধুনিকতম পদ্ধতিতে শেখায়।”

উদ্ভিতা তা শুনে খুব খুশি হয়। সে নিজে এখন মহিলাদের নিয়ে যুদ্ধের কাজে সহায়তা করছে। শীতকালের জন্মে পশমের মোজা গেঞ্জি পুলোভার ও কবল বানিয়ে নিয়ে সীমাস্ত্রে পাঠাচ্ছে। ছেলেকে দিয়েছে পাহাড়ের মিশনারী ইস্কুলে। সংসারের ভার হালকা।

বিজন আরো ভারি ক্লিষ্ট হয়েছে। আফিসের কাজের মধ্যে দিনরাত ডুবে থাকে। বাজে বই পড়ে না। বাজে কথা বলে না। পোশাক আসাকের শখ নেই। বাড়ীতে সেই বিলেতের ছাত্রজীবনের মতো গ্রে ফ্র্যান্সেল ট্রাউজার্স আর ব্লু ব্লেজার কোট পরে থাকে। কী শীত, কী গ্রীষ্ম। বন্ধুরা হাসলে বলে, “আমি এখনো ছাত্র।”

কথায় কথায় স্ট্যাটিস্টিকস উদ্ধৃত করে। মজুত খাতের হিসাব দিয়ে বলে, “ফসল ভালো হলেও লোকের খোরাকে টান পড়বে। বিদেশী সৈন্য আমদানী চলেছে, অথচ বার্মা থেকে চাল আমদানী বন্ধ। ঘাটতি পূরণ হবে কী করে? র‍্যাশনিং ছাড়া আর কোন উপায় আছে?”

মানসকে মানতে হয় যে সেটাই একমাত্র উপায়।

আরো একটা ফ্যাক্টর কাজ করছে। সেটা আরো বেশী ভাবনার বিষয়। দেশে ইণ্ডাস্ট্রিয়াল রেভোলিউশন শুরু হয়ে গেছে। জাহাজের অভাবে বিলেত থেকে যা আমদানী হচ্ছে না তা এদেশেই তৈরি করে নিতে হচ্ছে। কতক মাল জাহাজ থাকলেও বিলেত থেকে সরবরাহ করতে পারা যেত না। ওদেশের কলকারখানাগুলো এখন যুদ্ধের উপকরণ নির্মাণে ব্যস্ত। এদেশের পক্ষে এটা একটা মণ্ডকা। মাড়োয়ারীরীরা এতকাল কেনাবেচা করেই ক্ষান্ত ছিল। মণ্ডকা পেয়ে এখন ইণ্ডাস্ট্রিয়ালিস্ট হয়ে উঠছে। ইউরোপীয়দের পার্টনার হচ্ছে। শ্রমিকরাও যে এর স্বযোগ নিচ্ছে না তা নয়। ওদেরও মজুরি বেড়ে যাচ্ছে। ধর্মঘট করবে কোন্‌ ভূখে? তবে, ইয়া, টাকা দিয়ে যদি খাত কিনতে না পায় তবে পেটের দায়ে ধর্মঘট করবেই। তখন চড়া দামে চাল কিনে মালিকরা ওদের খাওয়াবেন। গরিবরা না খেয়ে মরবে। ইণ্ডাস্ট্রিয়াল রেভোলিউশন যেদেশেই হয়েছে সেদেশেই খাতো টান পড়েছে। যদি না কৃষির জন্তে যথেষ্ট জমি থাকে, সার থাকে, পশু থাকে, পশুখাত থাকে, মুনিষ থাকে, মুনিষখাত থাকে। ল্যাণ্ড রিফর্মসও চাই। আর নয়তো উপনিবেশ থেকে সম্ভাব্য খাদ্য আমদানি, উপনিবেশে মানুষ রক্ষতানী।”

মানস এতটা চিন্তা করেনি। “তা হলে তুমি কী করতে বোলে? যুদ্ধের আত্মরক্ষিক যে সম্ভবত সোশিয়াল রেভোলিউশন এইপর্যন্ত আমি জানতুম। ইণ্ডাস্ট্রিয়াল রেভোলিউশনও কি আত্মরক্ষিক?”

“গত মহাযুদ্ধেও এর লক্ষণ দেখা দিয়েছিল। নইলে টাটা উৎসাহ পেতেন কী করে? এবার বিড়লাও পাচ্ছেন। আরো অনেকে পাচ্ছেন। এইমুহুর্তে

যে ধনিকহুল মাথা তুলছে এরাই ভাবী শাসককুলের পলিসি নির্দেশ করবে।”  
বিজ্ঞান বৃহৎ হাসে।

“ভাবী শাসককুল মানে কি কংগ্রেস ?” মানস প্রশ্ন করে।

“বাংলাদেশে তো নয়। এখানে মুসলিম লীগ ঘাঁটি গেড়ে বসছে। তাকে বিনা যুদ্ধে হটানো যাবে না। সার নাজিমউদ্দীনের ঘরে গেলে দেখবে, সন্মুখেতে প্রসারিত তব বাজালার মানচিত্র। একটার পর একটা মহকুমায় মুসলিম মহকুমা অফিসার পাঠানো হচ্ছে আর মানচিত্রে সেই মহকুমার উপর সবুজ নিশান পিন দিয়ে ঘাঁটি হচ্ছে। এমনি করে মুসলিমপ্রধান মহকুমা-গুলোর বেশীর ভাগই সবুজ হয়ে গেছে। এর পরে আসছে জেলার পাল। সেটা অত সহজ হবে না। ডিস্ট্রিক্ট আসলে রেভিনিউ ডিস্ট্রিক্ট। রেভিনিউ না হলে রাজস্ব চলে না। এটা আকবর বাদশাও বুঝতেন। ইংরেজ লাট-সাহেবরাও বোঝেন। রাজস্বের ব্যাপারে হিন্দুরই যোগ্যতা বেশী। সার নাজিমের ইচ্ছার চেয়ে লাটসাহেবের ইচ্ছাই প্রবল। তা ছাড়া জেলার দায়িত্ব নেবার মতো মুসলিম সিভিলিয়ানই বা ক’জন ? প্রোভিসিয়াল ম্যাজিস্ট্রেট থেকে প্রমোশন দেবার সময় জাতধর্মের সঙ্গে সঙ্গে যোগ্যতারও বিচার করতে হয়। প্রমোশনের বেলা সাম্প্রদায়িক অহুপাত খাটে না। ব্রিটিশ রাজ তেমন কোনো প্রতিশ্রুতি দেননি। দিলে হিন্দু কর্মচারীদের আত্মগত্য হারাবেন। কেন আমি ভূতের মতো খেঁটে মরব বা মরে ভূত হয়ে যাব, যদি জানি যে আমার উপরওয়ালা হবে আমারই এক অধস্তন অফিসার ? এরই নাম ব্রিটিশ জাস্টিস, যার জন্তে ইংরেজরা গবিত ? আর আমরা কৃতজ্ঞ ? যা বলছিলুম, বাংলাদেশে মুসলিম লীগ ঘাঁটি গাড়ছে। ইংরেজরা একটা স্তর পর্যন্ত গাড়তে দিচ্ছে। সেটা মহকুমা স্তর। সাধারণ নির্বাচনের ফলাফল তো সেই স্তরেই নির্ধারিত হবে। সাধারণ মানুষের সঙ্গে মহকুমা হাকিমের নিত্য যোগাযোগ। থানা আর ইউনিয়নগুলো তাঁরই তদারখে। সার নাজিমের দলটাই জিতবে। জিতে মন্ত্রীমণ্ডল গঠন করবে। কংগ্রেসওয়ালাদের মন্ত্রী হতে কেনই বা ডাকবে, যদি একক সংখ্যাগরিষ্ঠতা থাকে ? তবে বাংলাদেশের আইনসভায় ইউরোপীয় রকের ভোট না পেলে একক সংখ্যাগরিষ্ঠতা কোনো পক্ষেরই নয়। অথচ ওয়া যদি নিরপেক্ষ থাকে মুসলিম মন্ত্রীদের উপরেই বায়বার শাসনভার বর্তাবে। মুসলিম লীগ চেষ্টা করবে সব ক’জনকে দলে টানতে। কংগ্রেস মুসলিম বলতে একজনও নেই। থাকলেই বা কী ? কংগ্রেসের

এখানে কতটুকু চাল ? খালি গোলমাল বাধালেই হলো ?” বিজন আশাবাদী নয়।

এরপর গোলমালের প্রসঙ্গ ওঠে। মানস চায় তথ্য জানতে।

“মেদিনীপুর জেলায় কংগ্রেস ও ইংরেজ দুই পক্ষই গাছের ডালে ঝুলিয়ে ফাঁসী দিয়েছে। আইনের ধার ধারেনি। একপক্ষ আইন অমান্য করলে অপর পক্ষও আইন অমান্য করে। এটা বোধহয় গান্ধীজী জানতেন না।”

মানস তো অবাক। “তুই পক্ষ বলছ কেন ? কংগ্রেস তো জেলে। আর ইংরেজ নিশ্চয়ই ইংরেজ সিভিলিয়ান নয়।”

“না। এ পক্ষের ‘জাতীয় সরকার’ আর ও পক্ষের মিলিটারি অফিসার।’ মানছি এর জগে কংগ্রেস দায়ী নয়। গভর্নমেন্টকেও দায়ী করা যায় না। যুদ্ধকালে মিলিটারি নিরঙ্কুশ। ওরা সর্বত্র জাপানের পঞ্চম বাহিনী দেখছে। এই বা কী ! বিহারে, যুক্তপ্রদেশে ও অন্ত কোনো কোনো প্রদেশে যা ষটেছে তা আরো ভয়ঙ্কর। দেড়শোটার বেশী পুলিশ স্টেশন ও অন্তান্ত সরকারী ইমারত আক্রমণ করা হয়েছে। ত্রিশজনের উপর পুলিশ কর্মচারীকে হত্যা করা হয়েছে। তা ছাড়া আরো কয়েকজন সরকারী কর্মচারী ও সৈনিককেও। অপর পক্ষও চূড়ান্ত প্রতিশোধ নিয়েছে। গ্রামকে গ্রাম জালিয়ে দিয়েছে। গ্রামের লোকদের বস্ত্র পশুর মতো মৃগয়া করেছে। আকাশ থেকে প্লেন নেমে এসে উপর থেকে মেশিন গান চালিয়ে জনতাকে ছত্রভঙ্গ করেছে। চাবুক মারা তো শত শত ক্ষেত্রে হয়েছেই, পাইকারী জরিমানাও আদায় করা হয়েছে কোটি খানেক টাকার। আন্দোলন এখনো থামেনি। রেল লাইন এখনো তুলে ফেলা চলেছে, টেলিগ্রাফের তার কাটাও। রাস্তা অবরোধ, কালভার্ট ধ্বংস এসব কর্মও। এটা হলো ইজ্জতের লড়াই। ভারত ব্রিটেনের চেয়ে খাটো নয়। ব্রিটেনও খাটো হবে না।” বিজন খুলে বলে না সে কোন্ দিকে।

“কী দরকার ছিল এই লড়াইয়ের ? যখন জাপান এসে দোরগোড়ায় দাঁড়িয়ে। গান্ধীজীকে আচমকা না গ্রেপ্তার করলে কি এত কাণ্ড হতো ? তোমার সহানুভূতি কার প্রতি জানিনে। আমার সহানুভূতি গান্ধীজীর প্রতি।” মানস ব্যক্ত করে।

“গান্ধীজীকে গ্রেপ্তার না করে তাঁর সঙ্গে কথাবার্তা চালানো উচিত ছিল, একথা অনেকেই বলছেন। রামস্বামী আয়ার তো বড়লাটের শাসনপরিষদ থেকে পদত্যাগই করলেন। কিন্তু আসল ব্যাপারটা হলো এই যে গান্ধীজী

গণসভ্যাগ্রহ করবেন বলে মনঃস্থির করেই বড়লাটের সঙ্গে দেখা করতে যেতেন। তিনি ভালো করেই জানতেন যে বড়লাট তাঁকে গণসভ্যাগ্রহ পরিচালনার অহুমতি দিতেন না। কিংবা তাঁকে খুশি করার জন্তে ক্ষমতা হস্তান্তর করতেন না। শোভের মাঝখানে কেউ ঘোড়া বদল করে? যুদ্ধকালে ক্ষমতার হস্তান্তর করে? গান্ধীজীও কি তাঁর যুদ্ধবিরোধী নীতি পরিত্যাগ করতেন? কংগ্রেস ক্ষমতার আসনে বসলেও তিনি তাঁর যুদ্ধবিরোধী নীতি অহুমসরণ করে যেতেন। ফলে কংগ্রেসও তাই করত। যতদিন না কংগ্রেসের সঙ্গে তাঁর বিচ্ছেদ ঘটছে ততদিন গান্ধীই কংগ্রেস আর কংগ্রেসই গান্ধী। বড়লাট এটা মর্মে মর্মে বোঝেন। বুঝা সময় বাইরে দিয়ে বামপন্থীদের আশঙ্কা দিলে পরিস্থিতি আয়ত্তের বাইরে চলে যেত, বড়লাটের যেমন গান্ধীজীরও তেমন। বামপন্থীদের একভাগ আবার জাপানভক্ত। যেন জাপানীরা ভারতমিত্র। আর ইংরেজরা ভারতবৈরী। এ ধারণা সম্পূর্ণ একপেশে। নিজেদের এই দুদিনে ইংরেজরা কেউ ভারতীয়দের শত্রু করতে চায় না। ভারতীয়রাও কেউ বিশ্বাস করে না যে জাপানী আক্রমণ ভারতের জওয়ানরা ব্রিটিশ অফিসারদের সহায়তা বিনা ক্রম্বতে পারবে।” বিজন যতদূর বোঝে।

“এই ট্রাজেডীর একটা অঙ্ক এখনো বাকী। গান্ধীজীর অনশনে দেহত্যাগ। ফলে ব্রিটেনের সঙ্গে ভারতের চিরবিচ্ছেদ। চিরশত্রুতা।” মানস কাতরস্বরে বলে।

“জোন অভ্ আর্ককে পুড়িয়ে মারার দরুন ফরাসীরা ইংরেজদের কোনো দিন ক্ষমা করেনি। করবেও না। অথচ জার্মানদের সঙ্গে যুদ্ধের বেলা ওরা পরস্পরের মিত্র। গরজ বড়ো বালাই। তেমন গরজ আজকের দিনে যেমন ইংরেজদের তেমন ভারতীয়দেরও। কে জানে আবার এ রকম হতে পারে।” বিজন বাস্তববাদী।

“ভাবীকালেব্ মুখ চেয়ে দুই পক্ষেরই কর্তব্য এ ট্রাজেডী নিবারণ করা। এখনো সময় আছে। কিন্তু বেগীদিন নয়।” মানস আশঙ্কা করে।

“সেটা তোমার আমার সাধ্য নয়। আমি অর্থনীতি বুঝি, রাজনীতি বুঝিনে। আর তুমি তো সাহিত্যিক, রাজনীতির কী বোঝ? চড়া স্টেক রেখে ব্রিঙ্ক খেলা চলেছে। ইংরেজে কংগ্রেসে।” বিজন শেষ কথা শুনিয়ে দেয়।

যুধিকা মানসকে বলে দিয়েছিল উদ্ভিতাকে জিজ্ঞাসা করতে ঝরনার খবর

কী। যদি তার জানা থাকে। তা শুনে উদ্ভিতা বলে, “আমার বোন সবিতার খবর জানিনে। বরনার খবর জানব কী করে? তবে খারাপ খবর হলে সরকার থেকেই জানিয়ে দিত। বাড়ীতে টাকা আসা বন্ধ হয়ে যেত।”

“কথায় বলে, নো নিউজ ইজ গুড নিউজ। তা হলেও আত্মীয় স্বজনের বন্ধুবান্ধবের মন মানে না। কতরকম বিপত্তি আছে মাহুঘের জীবনে। বিশেষ করে মেয়েমাহুঘের জীবনে। কেন যে ওরা ওয়াকি হতে গেল! তখন কি জানত যে জাপানীদের কবলে পড়বে?” মানস উত্তেজিত প্রশ্ন করে।

“আমাদের সবিতার জন্তে আমরাও কি কম ভাবছি? কিন্তু ভেবে এর কোনো কুলকিনারা নেই। যুদ্ধ যতদিন না শেষ হচ্ছে ততদিন প্রকৃত সত্য কেউ জানতেও পাবে না, জানাতেও পারবে না। রেড ক্রসও নাচার। সেই যে একটা কথা আছে, টুথ ইজ দ্য ফার্স্ট ক্যাজুয়ালটি ইন ওয়ার। সবিতাকে আমরা ভগবানের হাতে সঁপে দিয়েছি। সবাই ওকে ওয়ার্মিং দিয়েছিল। ও নাছোড়বান্দা। আমার অহুমান বরনারও তেমনি জেদ।” উদ্ভিতা চোখ ফিরিয়ে নিয়ে চোখের জল মোছে।

পরের দিন মানস স্বপনদার ওখানে হাজিরা দেয়। উনি মহাবিরক্ত হন সে ঠর ওখানে ওঠেনি বলে।

“ভ্যাকেশন জঙ্গ হয়ে এসেছি। বিজনের ওখানে টেনিসকোর্ট আছে, র্যাকেট আছে। কাজে লাগবে। তা ছাড়া ওর সঙ্গে আমার আগে থেকে এনগেজমেন্ট ছিল। আমাদের সতীর্থদের সঙ্গে আমরা একসঙ্গে বসব ও কর্তব্য স্থির করব। ইংরেজরা যদি সত্যি সত্যি ভারত ছাড়ে আমাদের কর্তব্য কী হবে।” মানস কৈফিয়ৎ দেয়।

“সেটা ভাববার সময় এসেছে। কংগ্রেসের চোখে তোমরাও দুশমন। কত লোককে জেলে দিয়েছ। শুনতে পাই মারধোরও করেছ। আর মুসলিম লীগ তো মুসলিম না হলে চাকরিতে রাখবে না। তবে ইংরেজ তোমাদের বিসর্জন দিয়ে যাবে না। সঙ্গে নিয়ে যাবে। যেমন বার্মা থেকে তোমাদের বেরাদরদের সঙ্গে নিয়ে এসেছে।” স্বপনদা আশ্বাস দেন।

“সেটা কিন্তু আমার পছন্দ নয়। আমার সাহিত্যের কাজের ক্ষতি হবে। যাকে রাখো সেই রাখে। সাহিত্যকে যদি রাখি সাহিত্যই আমাকে রাখবে। তবু জানতে চাই অন্তেরা কী ভাবছে।” মানস উৎসুক।

বৌদি এসে যুথিকার কথা জিজ্ঞাসা করেন। ওর সঙ্গে তো তাঁর দেখাই হলো না। কবে হবে?

“সবই অনিশ্চিত। ইংরেজরা যদি বাংলাদেশ থেকে আরো পশ্চিমে যান আমাদেরও পশ্চিমমুখে হতে হবে। পূর্বমুখে হবার সম্ভাবনা কম। নইলে বলতুম বদলীর সময় দেখা হবে।” মানস উত্তর দেয়।

“আমার মনে হয় জাপানীরা ভারতে আসবে না। ওরা বার্মা দখল করেই দাঁড়ি টানবে। লাইন অফ কমিউনিকেশনস বাড়িয়ে ওরা মুশকিলে পড়বে। না পারবে বজায় রাখতে, না পিছু হটতে। ওই বার্মা পর্যন্তই ওদের দৌড়। তবে বোমাবর্ষণের আশঙ্কা রয়েছে।” স্বপনদা দরজা জানালার কাঁচ কালো করে দিয়েছেন। পেছনের বাগানে গর্তও খুঁড়েছেন। ওটা হবে তার শেলটার।

“তুমি যা বলছ সেটাই যুক্তিসঙ্গত। সীমান্ত থেকে কেউ যদি আসত তার সঙ্গে কথা বলে নিশ্চিত হতুম।” মানসের কলকাতা আসার সেটাও একটা উদ্দেশ্য।

স্বপনদা হঠাৎ প্রশ্ন করেন, “আচ্ছা, তোমার বন্ধু সোম্য চৌধুরী এমন কী করেছে যে ওর মাথার দাম নাকি পাঁচ হাজার টাকা?”

মানস তা শুনে হতবাক। সে বৌদির দিকে তাকায়। তিনি বলেন, “কে জানে কতদূর সত্য? বাবলীও তো শোনা কথা শুনিয়েছে।”

“কী ভয়ঙ্কর কথা। সোম্যদার মতো অহিংসাবাদীর মাথার দাম এত! আমার তো বিশ্বাস হয় না। আর কোনো সোম্য চৌধুরী হবে। বাবলী কি ঠিক জানে কোন সোম্য চৌধুরী?” মানস জেরা করে।

“নোটিফিকেশনে ওর আশ্রমের নামও ছিল। শহরের নামও ছিল। এমন একজন মার্কামারা যুদ্ধবিরোধীকে ওরা সহজে রেহাই দেবে না। গান্ধীকে যদি বন্দী করতে পারে তো ওকেই বা করতে চাইবে না কেন? ধরা না দিলে ধরতে না চাইবেই বা কেন? তা বলে পাঁচ হাজার টাকা। টাকাটা খুব বেশী দেখেই সন্দেহ হচ্ছে।” স্বপনদা মুখ ফুটে বলেন না কিসের জন্তে সন্দেহ।

“বিজ্ঞানের ওখানে ফিরে যাবার পর মানস লোদপুরে টেলিফোন করে জানতে চায় সোম্য চৌধুরী এখন কোথায়।

“জানি, কিন্তু বলব না।” যিনি বলেন তিনি হেরাথ মৈত্রের মতো লত্যাভাবী। ‘প্রিয়তম জনকেও বলা বারণ। দয়া করে ক্ষমা করবেন।’

মানস বুঝতে পারে এই সোম্য চৌধুরী সেই সোম্য চৌধুরী। কিন্তু কেন তার মাথার দাম পাঁচ হাজার টাকা। এ প্রশ্ন কাকেই বা করবে? কেই বা উত্তর দেবে? সোদপুরের দ্বিতীয় হেরস্বেচ্ছ কখনো নয়।

সেই ভঙ্গলোকই বোধহয় মানসের কলকাতায় অবস্থানের খবরটা যথাস্থানে পৌঁছে দেন। মানসের নামে একটা চিরকুট আসে। “সন্ধ্যার পর বাড়ীর বাইরে রাস্তার অন্ধকারে দেখা হবে।” স্বাক্ষর নেই। কিন্তু হাতের লেখা থেকে মালুম হয় কে লিখেছে।

ব্ল্যাক আউট। রাস্তায় আলো নেই। মাথার উপরে চাঁদের আলোও না। কৃষ্ণ পক্ষ। লোক চলাচল খুবই কম। মুখ দেখে চেনা যায় না মানুষটা কে। টর্চ জ্বালাবার স্বাধীনতা নেই। রাম বলে যাকে আন্দাজ করলে সে হয়তো যত্ন। মোটর দুটো একটা আসাযাওয়া করছে, তাদের হেড লাইট কালিমাখা। গতি মন্দ্র।

বাড়ীর বাইরে ফুটপাথের উপর পায়চারি করছিল মানস। অন্ধকারে পিঠের উপর কে হাত রাখে। পেছন ফিরে মানস দেখে আলখাল্লা পরা এক বাউল কি ফকির। “কে আপনি? কী চান?” এই বলে পকেট থেকে টাকা বার করে। তার মাথায় আসে না যে ওটা ছদ্মবেশ।

“বাবুশায়, আমরা ভিক্ষা নিইনে। গান শুনিয়ে পুরস্কার নিই। অধমের নাম ভজহরি দাস।” বলে বাউল তার একতারায় টুং টাং করে।

কণ্ঠস্বর থেকে মানস চিনতে পারে। সুধায়, “সোম্যদা?”

“চুপ! চুপ! কেউ শুনতে পেলে ধরিয়ে দিয়ে পাঁচ হাজার টাকা ইনাম পাবে। তাতে আমার কাজের ক্ষতি হবে।” সোম্য বলে।

“কিন্তু তুমি এমন কী করেছ যে তোমার মাথার দাম পাঁচ হাজার টাকা? তুমি তো সম্মানবাদী নও।” মানস আশ্চর্য হয়।

“অত জোরে নয়। চুপি চুপি কথা বলো। আমি সম্মানবাদী নই বলে কি একেবারে ক্লীব? ইংরেজরা বলে, ইভ'ন আ ওয়ার্ম টান'স। এমন কি একটা পোকাও ঘুরে দাঁড়ায়। আমরা কি পোকারও অধম? বাঙালীরা বলে, রাজায় রাজায় বৃদ্ধ হয়, উলুখড়ের প্রাণ যায়। আমরা অহিংসাবাদী বলে উলুখড়ের মতো প্রাণে মরতে চাইনে। কিংবা প্রাণ নিয়ে পালাতেও চাইনে। দুটোই খারাপ। আমরা বাস্তবিক অহিংসাবাদী। ইভিলের সঙ্গে আমাদের বন্দ।”

“কিন্তু এই তো তুমি নিজের পালিয়ে বেড়াচ্ছ।” মানস মন্তব্য করে।



“আগে তো সবটা শোন। আমরা উলুখড় হব না বলে স্থির করেছি যে রাজায় রাজায় যুদ্ধ বাধতেই দেব না। ইংরেজরা যদি জাপানীদের দিকে এগিয়ে আসে তা হলেই তো সংঘর্ষ বাধবে। আমরা ওদের মাঝখানকার পথঘাট ধ্বংস করব। রেল লাইন উপড়ে ফেলব, সড়কের পুল উড়িয়ে দেব, গাছের গুঁড়ি কেটে রাস্তার উপর পাতব। যোগাযোগের উপায় রাখব না। টেলিগ্রাফের তার কাটব। মাঝখানকার অঞ্চলটা হবে নিরপেক্ষ অঞ্চল। কেউ বলতে পারবে না যে আমরা জাপানের পক্ষে বা ইংরেজের বিপক্ষে। দেশটা আমাদের, ওদের কারো নয়। ইংরেজদের কে ডাকছে দেশরক্ষা করতে? জাপানীদের কে ডাকছে দেশকে মুক্ত করতে? উলুখড়ই আপনি আপনাকে রক্ষা করবে, মুক্ত করবে। ভারত থেকে হাত সরান। হ্যাণ্ডস অফ ইণ্ডিয়া।” বাউলের মুখে ইংরেজী।

মানস হতচকিত হয়। “এই কি তোমার অহিংসা?”

“কেন? আমি কি একটিও প্রাণীর গায়ে হাত দিচ্ছি? রেল লাইন নির্জীব। নদীর পুলও নির্জীব। পরে আমরা ওসব যেমনকে তেমন করে দেব। লোকসান যা হবে তা ভারতের। ব্রিটেনের বা জাপানের নয়। নেপোলিয়নের আক্রমণের সময় মস্কোর লোক শহর পুড়িয়ে দিয়েছিল। ক্ষতি যা হলো তা রাশিয়ার। ফ্রান্সের নয়। আমরাও বাধ্য হলে স্বর্চড আর্থ পলিসি অনুসরণ করব। সেটাও হিংসাত্মক নয়। কোনোরকম প্রতিরোধ না করে পলায়ন করা অহিংসা নয়। কাপুরুষতার চেয়ে হিংসাও শ্রেয়। ভারতের ইতিহাসে এই প্রথমবার দেখা যাবে যে ভারতের জনগণ উলুখড় নয়। তাদেরও পৌরুষ আছে। আমার কাজ হচ্ছে তাদের সুপথে চালিত করা। সেটা করতে গিয়ে আমি কতাদের বিষ নজরে পড়ি। আমায় নামে পরোয়ানা ও হলিয়া বেরোয়। এবার আমাদের পলিসি নয় কারাবরণ। তাই আমাকে কলকাতায় চলে আসতে হয়। এইখান থেকেই আমি আমার সহকর্মীদের নির্দেশ দিই। তারাও আসে নির্দেশ নিতে। আপাতত আমি আসাম প্রান্তের ভার পেয়েছি। আসামে আমাদের কার্যকলাপ চলেছে। কলকাতা থেকেই সুবিধের। কলকাতাই পূর্ব ভারতের প্রাণকেন্দ্র। তবে মাঝে মাঝে সশরীরে আসামেও যেতে হবে। ছদ্মবেশে ও ছদ্মনামে। অসমীয়া ভাষা শিখছি। অ’মোর আপোনার দেশ! অ’মোর চিকুনি দেশ!” এই বলে বাউল গান ধরে।

“জুলিও কি এইসব করছে ? সে এখন কোথায় ?” মানস স্বধায়।

“কলকাতাতেই। কিন্তু তার ঠিকানা প্রতি দিন বদলায়। কোথাও স্থিরাবাস করে না। ওর সঙ্গে আমার যোগাযোগ নেই। এদের প্রোগাম আলাদা। কালেভদ্রে দেখা হয়। ওর সঙ্গিনীদের নিয়ে ও আজকাল বোরখা পরে বেড়ায়। ওরও ছদ্মবেশ ও ছদ্মনাম। ওর কার্যকলাপ সম্বন্ধে তোমাকে কিছু বলতে পারব না। আমি নিজেও জানিনে।” সৌম্য এইবার অদৃশ হয়ে যায়।

যুথিকা পই পই করে বলে দিয়েছিল যেমন করে হোক জুলির নিরাপত্তার খবর আনতে। সৌম্যদার উত্তরে সন্তুষ্ট না হয়ে সে যায় জুলির মায়ের সঙ্গে দেখা করতে। বলে, “জুলির জন্তে যুথী উদ্বিগ্ন। আপনার মেয়ে ভালো আছে তো ?”

“আমার মেয়ে ? আমার মেয়ে কাকে বলছ, মানস ?” তিনি অভিমানে ফেটে পড়েন। “আমার সঙ্গে ওর কতটুকু সম্পর্ক ? বাড়ী আসে না, চিঠি লেখে বা, টেলিফোন করে না, কারো হাতে খবর পাঠায় না। টোটাল ব্ল্যাক আউট। ও যে কাদের সঙ্গে মেশে, কোথায় থাকে, কী সব কাণ্ড করে এসব প্রশ্নের উত্তর জানতে হলে ইলিসিয়াম রো’তে গিয়ে গোয়েন্দা অফিসারের সঙ্গে গোপনে সাক্ষাৎ করতে হয়। জুলি ভাবছে ডুবে ডুবে জল খেলে শিবের বাবাও টের পাবে না। কিন্তু বাবার ও বাবা আছে। গোয়েন্দা দফতর সব খবর রাখে। ওদেরও মহিলা গুপ্তচর আছে। তারাও বোরখা পরে ঘুরে বেড়ায়। কিন্তু জুলিকে গ্রেপ্তার করা ওদের পলিসি নয়। ওর ভগ্নীপতি স্ট্যাণ্ডিং কাউন্সেল, জানো নিশ্চয়। পুলিশ কতাদের সঙ্গে তাঁর দহরম মহরম। ওদের কৌশল হচ্ছে জুলিকে না ধরে ওর দলের সবাইকে ধরে আটক করা। তা হলে জুলি একেবারে একলা হয়ে পড়বে। এ বাবা ব্রিটিশ সরকার। ছল, বল, কৌশল তিনটে পদ্ধতিতে দুরন্ত। তার উপর আরো এক পদ্ধতিতে ওস্তাদ। ভোজের বা নাচের নিমন্ত্রণ। লাটভবন থেকে আমার নামে চিঠি আসবে, গাড়ী আসবে, পদস্থ কর্মচারী আসবেন। স্বয়ং লাটগৃহিণী আমাকে অহুরোধ করবেন আমার অবস্থা মেয়েকে বোঝাতে যে ইংরেজ ও মাকিন দৈন্ত যারা এসেছে তারা বিভিন্ন পেশায় নিযুক্ত ছিল, যে যার নিজের পেশায় ফিরে যাবে। কেউ এদেশে থাকবে না। আর দেশীয় সৈনিকদের পদোন্নতির ঢালাও ব্যবস্থা হয়েছে, বর্ণবৈষম্য দূর হয়েছে, স্বযোগ সুবিধে সকলের সমান। কেনই বা তারা

ইংরেজদের বিপক্ষে যাবে? জাপান যদি না জেতে তো একূল ওকূল হুঁকূল গেল। আর ইংরেজরা যদি কোনোরকম বন্দোবস্ত না করেই ভারত ছাড়ে তা হলে পরে যাঁরা সরকার গঠন করবেন তাঁরা যে এত লোককে চাকরিতে রাখবেন বা এতরকম সুযোগ সুবিধে দেবেন তার গ্যারান্টি কি কেউ দিচ্ছেন? সরকারের নিমক খেয়ে দলে দলে জওয়ান নিমকহারামী করবে এটা একটা ভ্রান্ত ধারণা। দেশের স্বাধীনতার জন্তে বিদ্রোহ করবে অতখানি স্বদেশপ্রেম ওদের নেই। ওরা রাজাকেই মানে, রাজার উপরেই ওদের আত্মগত্য, রাজার নামেই শপথ। রাজার পরিবর্তে প্রেসিডেন্ট ওদের সকলের আত্মগত্য পাবেন না। হিন্দু হয়ে থাকলে মুসলমানের। মুসলমান হয়ে থাকলে হিন্দুর। তৃতীয়পক্ষ এখনো এদেশে ছুই পক্ষের আস্থাভাজন। তোমার কী মনে হয়, মানস? জুলিকে বোঝালে বুঝবে? ও তো একটা কল্লজগতে বাস করে। ওর বিশ্বাস সব ইংরেজই শত্রু, সব জাপানীই মিত্র, সব ভারতীয়ই দেশের স্বাধীনতার জন্তে অধীর। ওর ডাকনাম বেবী। ও সত্যি একটা বেবী।” ওর মা স্নেহে বলেন।

“কিন্তু ওর সঙ্গে আপনার যোগাযোগ হচ্ছে কোথায় যে আপনি ওকে বোঝাবেন? আপনি কি ওর ঠিকানা জানেন, মানসিমা?” মানস সুধায়।

“সীক্রেট এজেন্টরা জানে। মুসলমানী সেজে কলকাতা শহরের সর্বত্র আত্মগোপন করা যায় না। এটা হিন্দুপ্রধান শহর। মুসলিম মহল্লাগুলো চিহ্ননি দিয়ে আঁচড়িয়ে ওকে আবিষ্কার করা শক্ত নয়। ও পড়বেই ধরা একদিন। কিন্তু ওর দলের আর সকলের আগে নয়। ওটাই সরকারী পলিসি। হয়তো তার দরকারই হবে না। ও নিজেই হৃদয়ঙ্গম করবে যে ইংরেজকে যুদ্ধকালে নড়ানো যাবে না। বাবলী বলে ওর এক বান্ধবী আছে, সে কমিউনিষ্ট। এই নিয়ে বাবলীর সঙ্গে জুলির আড়ি হয়ে গেছে। আমি তো মনে করি বাবলীর থীসিসটাই ঠিক, জুলিরটা ভুল। জুলি যেদিন নিজের ভুল বুঝতে পারবে সেদিন ওর এই অজ্ঞাতবাস সমাপ্ত হবে।” ওর মা ততদিন ধৈর্য ধরবেন।

“আপনি আর উদ্বিগ্ন নন তো?” মানস বাজিয়ে দেখে।

“হব না? কোথায় রাত কাটাচ্ছে, কাদের সঙ্গে মিশছে, সুস্থ আছে না অসুস্থ হয়েছে এসব ভাবনা কি আমাকে একটি মুহূর্তও ছেড়েছে? ও মেয়েটা হয়েছে আমার গের্টে বাত। গের্টে বাত কেমন কষ্ট দেয়, জানো তো? তবে

আমি একটা বিষয়ে নিশ্চিত। পুলিশ ওকে ধাঁটাবে না। পুলিশেরও তো ভয়ডর আছে। গুপ্তচরের কথা বিশ্বাস করে যদি জুলি বলে অন্য কোনো মুসলিম মহিলাকে গ্রেপ্তার করে তা হলে সার নাজিমউদ্দীন ওদের চাকরি খাবেন। আব সার নাজিম যদি ওদেব চাকরি না খান তো তাঁর নিজের দলের লোক তাঁর উজিরী খাবে। বোরখার একটা মন্ত বড়ো হুবিধে কেউ গায়ে হাত দিতে সাহস পাবে না। বোরখাব আড়ালে ছুরি ছোরাও থাকতে পারে। জুলির হাতে রিভলভার থাকে। সে যদি গুলী করে মারে তার সাফাই হবে তাকে ধর্ষণ করতে উত্তত হয়েছিল সেই পুরুষ, যাকে সে গুলী করেছে। জুলির ভয়ডর নেই, কোনোদিনই ছিল না। ও যে রিভলভার গায়েব করে ডিটেন হয়েছিল সে ইতিহাস নিশ্চয়ই শুনেছ। সাফাই দিয়েছিল যে রিভলভারটা আর কেউ ওর ঘরে ঢুকে লুকিয়ে রেখেছিল। ওর দলের ছেলেরা ওর হাতে রিভলভার দিবে বলেছে আত্মরক্ষার জন্মে দরকার হলে পুলিশকে গুলী করতে, আর নয়তো নিজেকে গুলী করতে। ওই জিনিসটাকে আমি ভয় করি। হাজার হোক, এবারী তো। ওর কি পরিণামচিন্তা আছে ? যা বলছিলাম, পুরুষ পুলিশ ওর কাছে ধেঁষতে সাহস পাবে না। মহিলা পুলিশ কোথায় যে ওকে পাকড়াবে ? বাইরে থেকে আনাতে হবে। যদি সে গুলী খেতে সাহস পায়। কিন্তু জুলিকে পাকড়াতে গিয়ে আয়েষাকে বা ফতেমাকে পাকড়ালে মুসলিম জনতার হাতে নিজেই পিটুনি খেয়ে মরবে।” মিসেস সিন্‌হা খুব একচোট হাসেন।

মানস অতটা আশাবাদী নয়। ফাঁদ পেতে গ্রেপ্তার করার ঘটনা সে তার কর্মজীবনে টের শুনেছে। পুলিশ তাতে সন্দেহন্ত। জুলি একদিন ফাঁদে পড়বেই। আর ওর মায়ের ওটা একটা দিবাস্বপ্ন যে লাটভবন থেকে তাঁকে নিমন্ত্রণ জানাতে চিঠি আসবে, নিয়ে যেতে গাড়ী আসবে, পদস্থ অফিসার আসবেন। দিবাস্বপ্ন যদি তাঁকে শাস্তি দেয় তো স্বপ্নভঙ্গ করতে যাওয়া কেন ? সে আশ্বাস দিয়ে বলে, “এই আন্দোলনটা জোর কদমে বেশীদিন চলবে না, চলতে পারে না। জাপানোরা না এলে তো জুলির উৎসাহ জল হয়ে যাবে। বামপন্থীরা স্বতন্ত্রভাবে লড়বার মতো শক্তিম্যান নয়। ওরা লড়ে যখন কংগ্রেস লড়ে। কংগ্রেস ইতিমধ্যে চূড়ান্ত করেছে, তা সত্ত্বেও সরকারকে হটাতে পারেনি। আন্দোলনটা আবার জন্মে পারে যদি জাপান সত্যি সত্যি আক্রমণ করে। কিন্তু আর কবে করবে ! এর মধ্যে ইংরেজরাও তৈরি হয়েছে। ওই

বার্মাবিজয়ই জাপানের দিক থেকে চূড়ান্ত। জুলি একদিন বাড়ী ফিরে আসবে, মাসিমা। সেটার খুব বেশী দেরি নেই। তবে এখানের তার ধরা পড়ার সম্ভাবনা রয়েছে। চেষ্টা করবেন যাতে ওর বিচার মিলিটারি ট্রাইবিউনালে না হয়ে আমাদের কারো কোর্টে হয়।”

## ॥ বাইশ ॥

স্বপনদা চায়ের নিমন্ত্রণ করেছিলেন। মানস গিয়ে দেখে সেটি রীতিমতো একটা চা চক্র। মীর সাহেব ছিলেন আর ছিলেন সুবিনয় তালুকদার, ইঞ্জিনিয়ারাহা, আদিত্য বর্মণ। মহিলারা অল্প ঘরে। এলফ এ ঘর ও ঘর করছিল। যেখানে যা পাবে সেখানে তা খাবে।

“আপনারা পাঁচজনে মিলে কিসের চক্রান্ত করছেন?” মানস মীর সাহেবের দিকে তাকিয়ে জিজ্ঞাসা করে।

“চক্রান্ত কি কেউ জজ ম্যাজিস্ট্রেটের কাছে ফাঁস করে দেয়? ফাঁসী হয়ে যাবে না?” মীর সাহেবও রঙ্গ করেন।

“উকীল ব্যারিস্টাররা আছেন কী করতে? তাঁরা বাঁচিয়ে দেবেন না? নির্ভয়ে বলুন।” মানস অভয় দেয়।

স্বপনদা খেই ধরেন, আমিই বলছিলুম, “এঁরা শুনছিলেন। বিশ্বের মানচিত্র-খানা তোমার সামনেই রয়েছে। একবার চোখ বুলিয়ে নাও। লিবারল বলে গোরব করতে পারে এমন একটিও দেশ কি আছে? হয়তো সুইডেন কি সুইটজারল্যান্ড। এই যুদ্ধ কাউকে লিবারল হতে দিচ্ছে না। মুখে লিবারল হলে কী হবে, কাজে স্বৈরাচারী। যুদ্ধ জিততে হবে, তাই যুদ্ধের প্রয়োজনে কর্তার ইচ্ছায় কর্ম করতে হবে। তফাৎটা এই যে কতটা অর্ধেকটা সত্য হাতে রেখে বাকী অর্ধেক প্রকাশ করেন তাঁর দেশের পাল’মেণ্টের বা কংগ্রেসের কাছে। নিজের মন্ত্রীদেবর কাছেও যে ভেঙে বলেন তাও নয়। এদেশের ব্যাপারও তেমনি। বড়লাট যা জানেন জঙ্গীলাট ভিন্ন আর কেউ তা জানেন না। এমনও হতে পারে যে জঙ্গীলাটই জানেন, বড়লাট জানেন না। দু’জনেই হিঙ্গ এক্সপেলেন্সী। একজনের হাতে সিভিল পাওয়ার, অপরজনের হাতে

মিলিটারি পাওয়ার। সরাসরি লগনের সঙ্গে কারবার। এই ব্যবস্থা দীর্ঘকাল ধরে কাজ দিয়েছে। তবে মাঝে মাঝে খিটিখিটি বেধেছে। কিচেনার কার্জনকে মানবেন না। উপরওয়ালারা কিচেনারের পক্ষে। কার্জন পদত্যাগ করে দেশে ফিরে যান। তবু তো সে যুগটা লিবারল ছিল। যুগের প্রভাব স্বৈরতন্ত্রী জার্মানীর উপরে, রাশিয়ার উপরেও পড়েছিল। কাইজারের পতনের পরে জার্মানী গণতন্ত্রী হলো বটে, কিন্তু রাশিয়া তা হলো না। আর জার্মানীও নাৎসীদের পাল্লায় পড়ে দ্বিগুণ স্বৈরতন্ত্রী বনে গেল। দুঃখের সঙ্গে লক্ষ করছি এবারকার মহাযুদ্ধে গুরুতর সিদ্ধান্তগুলো একা একা নিচ্ছেন চার্চিল আর রুজভেল্ট। আর সকলে একের পিঠে শূন্য। অপোজিশন বলতে বিশেষ কিছু নেই। ব্যক্তিগতভাবে লিবারল অবশ্যই কতক লোক আছেন, কিন্তু সমষ্টিগতভাবে দেশকে দেশ নির্বিচারে ও নির্বিবেকে একচ্ছত্রাধীন। আমার তো মনে হয় লিবারল যুগটাই অস্তাচলে গেছে। ‘ফিরিবে না, ফিরিবে না সে গোরবশশী। অস্তাচলবাসিনী উর্বশী।’ স্বপনদার কণ্ঠস্বর ক্ষীণ হয়ে আসে। তিনি দীর্ঘশ্বাস ফেলেন।

“তা হলে আমাদের লিবারল হিউমানিজমের সার্থকতা কী? ভবিষ্যৎ কী? কাদের জন্তে আমরা ম্যানিফেস্টো রচনা করব?” মীর সাহেব প্রশ্ন।

“নাৎসীরা যদি হারে তা হলে আশা আছে বইকি। কিন্তু নাৎসীরা যদি হারে কমিউনিস্টরাও তো জিতবে। গোটা জার্মানী লাল হয়ে যাবে। তারপর গোটা ইউরোপ। সব লাল হো জায়েগা।” তালুকদার বলেন।

“সেইজন্তেই তো আমি কোনো পক্ষের হার চাইনে। নাৎসীরা ফিরে যাক জার্মানীতে। কমিউনিস্টরা তাদের নিজেদের এলাকার বাইরে গিয়ে বিপ্লব না ঘটাক।” স্বপনদা ফতোয়া দেন।

“সেটা যদি সম্ভব হতো এ যুদ্ধ আদৌ বাধত না। মূল কারণটা এই যে উভয় পক্ষই সম্প্রসারণ চায়। তার জন্তে একপক্ষ যাবে পূর্ব মুখে, অপরপক্ষ পশ্চিম মুখে। সংঘর্ষ অনিবার্য। নাৎসীরা যদি পূর্ব থেকে হটে গিয়ে পশ্চিমে চড়াও হয় আর ফ্রান্সের কাছ থেকে আলসাস লোরেন কেড়ে নেয় তা হলেও সংঘাত অনিবার্য। সম্প্রসারণই ওদের ধর্ম। বৃহত্তর জার্মানীই ওদের স্বপ্ন। ওদের হারিয়ে না দিলে ওদের প্রতিবেশীরা সবাই একে একে হারবে। সেইজন্তে চার্চিলে স্টালিনে কোলাকুলি হচ্ছে। যেটা ছিল কল্পনার অতীত। এটা কিন্তু ক্যাপিটালিস্টের সঙ্গে কমিউনিস্টের কোলাকুলি নয়। থীসিস আর

অ্যাক্টিবীসিস মিলে সীম্বেসিস নয়। তার অনেক দেরি।” রাহা স্বরণ করিয়ে দেন।

স্বপনদা স্বীকার করেন যে এটা প্রেমের আলিঙ্গন নয়। তা বলে এ কী প্রলয় কাণ্ড চলেছে স্টালিনগ্রাডে! মানুষ মরছে লাখে লাখে। অত বড়ো যুদ্ধ কী আর কোথাও কখনো হয়েছে? কুরুক্ষেত্র তো ঐতিহাসিক নয়।

“আমি কিন্তু মনে করি কুরুক্ষেত্র নিছক পৌরাণিক নয়। কুরু পাণ্ডালের যুদ্ধই কুরু পাণ্ডবের বলে বণিত হয়েছে। বর্ণনাটা অক্ষরে অক্ষরে সত্য না হলেও পুরোপুরি কবিকল্পনা নয়। মহাভারতের চরিত্রগুলি আশ্চর্য রকম বাস্তবায়ন। কেউ আদর্শ পুরুষ বা আদর্শ রমণী নয়। স্বয়ং শ্রীকৃষ্ণও নন। পরবর্তীকালের ভক্তিবাদীরা তাঁকে অবতারে পরিণত করেছেন। শুধু অবতার নন, তিনিই ভগবান। আমাদের কাজ হবে মহাভারতের একটা যুক্তিবাদী সংস্করণ বার করা। রামায়ণেরও। রামায়ণের যুদ্ধ আৰ্য সস্ত্রসারণবাদীদের সঙ্গে দ্রাবিড় প্রতিপক্ষের আত্মরক্ষার যুদ্ধ। বাকীটা কবিকল্পনা। কবিরাম চারণকবি। চারণদের মুখে মুখে পল্লবিত হতে হতে যে আকার ধারণ করে সেটাকেই মহাকাব্যের রূপ দেন বাস্তবিক ও তাঁর যারা উত্তরসূরী। ততদিনে মূল ঘটনাটার পর হাজার বছর কেটে গেছে। রামও একজন অবতার হয়ে গেছেন। তার থেকে স্বয়ং ভগবান। ভক্তিবাদ মহাকাব্যকে পরিণত করেছে ধর্মগ্রন্থে। একমাত্র ভারতবর্ষেই এটা সম্ভব।” আদিত্য বর্মণের মতে।

বর্মণের এই ব্যাখ্যা মেনে নিলে বলতে হয় রামচন্দ্রও ছিলেন আৰ্য সস্ত্রসারণবাদের অধিনায়ক। সেকালের নাৎসীদের হিটলার। বিভীষণ ছিলেন সেকালের কুইসলিং। মুসোলিনিকে সেকালের স্ত্রীীব বললে কি ভুল হবে? এখন প্রশ্ন হচ্ছে হুসমানটি কে!” রঙ্গ করেন স্বপনদা।

“ধারা প্যারিস ছেড়ে দিয়ে নাৎসীদের অভ্যর্থনা করলেন তাঁদেরই একজন। আমার মতে মার্শাল পঁত্যো। প্রধান মন্ত্রী হয়ে তিনিই যুদ্ধবিরতির অগ্রণী হন। তার পর দক্ষিণে চলে যান। তাঁর বিশ্বাসঘাতকতা ফ্রান্সের ইনটেলেকচুয়ালরা ক্ষমা করেননি। ওদেশের রেজিস্ট্রারের খবর নানা দেশ ঘুরে কানে আসছে।” রাহা প্রবেশ করেন।

স্বপনদা আহত হয়ে বলেন, “তথাকথিত বিশ্বাসঘাতকতা এক্ষেত্রে ব্যক্তির স্বার্থে নয়। জাতির স্বার্থে, দেশের স্বার্থে। মাজিনো লাইনের উপরে অন্ধ নির্ভরতার দরুন দেশরক্ষার জন্তে ফরাসীরা বিকল্প ব্যবস্থা করেনি। পরাজয় আসন্ন।

বাধা দিলে প্যারিস ধ্বংস হতো। একটা অপ্রিয় সিদ্ধান্তের আবশ্যকতা ছিল। ভাটুনের জ্ঞানকর্তা ভিন্ন আর কে পারতেন সে সিদ্ধান্ত নিতে? তাই সিদ্ধান্তটা মার্শল পেত্য়ার উপর ছেড়ে দেওয়া হয়। তিনি কলঙ্ক মাথায় নিয়ে জার্মান কর্তৃপক্ষের সঙ্গে যুদ্ধবিরতির চুক্তি করেন। সর্বশেষ সমুৎপাদে অর্থ ত্যাগ্ৰতি পণ্ডিতঃ। আধখানা ফ্রান্স জার্মানদের দখলে আসে। প্যারিস তার মধ্যে পড়ে। প্যারিসের কাছে ঠিক সেই জায়গাটিতেই সেই রেলগাড়ীর কামরায় আবার চুক্তিপত্র স্বাক্ষরিত হয় যেখানে হয়েছিল গত মহাযুদ্ধের শেষে। সেবার নতিস্বীকার করেছিল জার্মানী। এবার সেটা করল ফ্রান্স। স্বয়ং হিটলার উপস্থিত থেকে মনের জালা মেটালেন। নিয়তি! নিয়তি ছাড়া আর কী বলব একে? অকারণ রক্তক্ষয়ে কী লাভ হতো ফ্রান্সের?”

“কিন্তু ব্যাপারটা সেবারকার মতো শেষ হয়ে গেল না, স্বপনদা।” মানস কণ্ঠক্ষেপ করে। “নাৎসীরা সহযোগিতা দাবী করবে, পাবেও। ফ্রান্সের একাংশ এখন শিবির বদল করেছে। সেটা তার মিত্রদের প্রতি বিশ্বাসঘাতকতা। দ্য গল ব্রিটেনে গিয়ে নতুন এক সৈন্যদল গঠন করে মিত্রপক্ষের পাশে দাঁড়িয়েছেন। প্রমাণ করেছেন যে ফরাসীদের প্রতিরোধের আগুন অনিবার্ণ। তা ছাড়া ইনটেলেকচুয়ালরাও তো অসি ধরেছেন। সেইভাবে দেশের মান রক্ষা করেছেন। কিন্তু ইতিহাস জানতে চাইবে নেপোলিয়নের আক্রমণের মুখে মস্কোর জনগণ যেমন নগরে আগুন ধরিয়ে দিয়ে ফরাসী আক্রমণকারীদের জয়ের পুরস্কার থেকে বঞ্চিত করেছিল হিটলারের আক্রমণের মুখে প্যারিসের জনগণও সেই দৃষ্টান্ত অম্মসরণ করল না কেন। তা না করে তারা শত্রুর সঙ্গে সহযোগিতা করেছে কেন। পঞ্চাশ বছর বাদে কেউ কি ফরাসী ভাষায় এই মহাযুদ্ধ নিয়ে আরেকখানা ‘ওয়ার অ্যাণ্ড পীস’ লিখবেন? গর্ব করার মতো কী আছে একালের ফরাসীদের? ফরাসী বিপ্লব আর নেপোলিয়ন নিয়ে আর কতকাল গৌরব বোধ করা চলবে? এপিক উপন্যাসের উপাদানটা কোথায়? জনগণ যোগ না দিলে এপিক উপন্যাস হয় না। ইনটেলেকচুয়ালরা তো জনগণ নন। সবটা দোষ পেত্য়ার ঘাড়ে চাপানো যায় না। যথা প্রজা তথা রাজা। একথা জার্মানদের বেলাও খাটে। জার্মানীর জনগণও হিটলারের অপকর্মের জন্তে দায়ী। জার্মান সাহিত্যের এটা একটা কুৎসিত অধ্যায়।”

স্বপনদার মুখখানা দেখে মীর সাহেবের মায়া হয়। “ও প্রসঙ্গ থাক। আমরা আজ মিলিত হয়েছি লিবারল হিউমানিজমের ভবিষ্যৎ ভাবতে। লিবারল



বিশেষণটা আজকের জগতে অর্থহীন। এখন বিচার করা যাক হিউমানিজম বিশেষ্যটা কতদূর অর্থবহ। আমি তো দেখছি ইংলিশম্যানরা ম্যান নয়, ইংলিশম্যান। জার্মানরা ম্যান নয়, জার্মান। মুসলমানরা ম্যান নয়, মুসলমান। ব্রাহ্মণরা ম্যান নয়, ব্রাহ্মণ। যে যার বৈশিষ্ট্য নিয়েই গণিত, সাধারণ মনুষ্যত্ব নিয়ে নয়। কবিগুরু যেমন বলেছেন, রেখেছ বাঙালী করে, মানুষ করনি। এই উক্তি কি ওদের বেলাও খাটে না? এই মহাযুদ্ধে যেসব ভয়ানক মারণাস্ত্র ব্যবহার করা হচ্ছে ও পরে ব্যবহারের জন্তে তৈরি হচ্ছে সেসব কি হিউমান না ইনহিউমান? এ বলে, আমায় দাখ। ও বলে আমায় দাখ। নির্বিচারে আবাল বৃদ্ধ বনিতার উপর বোমা বর্ষণ করা হচ্ছে। সেটা এই শতাব্দীর পূর্বে কখনো ঘটেনি। এরা রাক্ষসেরও অধম।”

খাবারের প্লেট মীর সাহেবের হাতে ধরিয়ে দিয়ে স্বপনদা বলেন, “হিউমানিজম মানুষকে সর্বশক্তিমান ও সর্বজ্ঞ হবার প্রেরণা দিতে পারে, কিন্তু মানুষ যদি সেই শক্তি ও সেই জ্ঞান সর্বনাশের কাজে লাগায় তা হলে তার প্রতিরোধ বা প্রতিকার হিউমানিস্টরা জানেন না। শুনছি আইনস্টাইন নাকি রুজভেল্টকে চিঠি লিখে জানিয়েছেন যে পরমাণুর বিভাজন এখন সম্ভব। ফলে পরমাণবিক বোমা নির্মাণ করা যায়। তার মানে কী পাড়ায়? নাৎসীদের বিনাশ করতে গিয়ে জার্মান জাতিকেও সাবাড় করা হবে। নাৎসীরা যদি মরণ কামড় দিয়ে ইহুদী জাতিকেও উজাড় করে এর শোধ নেয় তবে ওদের রক্ষা করার কী উপায়!”

মীর সাহেব চার দিকে চেয়ে দেখেন খাবারের প্লেট সকলের হাতে দেওয়া হয়েছে কি না। হয়েছে দেখে আশস্ত হন। বলেন, “মানুষের যদি ধর্মবুদ্ধি না থাকে, সে যদি খ্রিস্টের প্রেমের দৃষ্টান্ত ভুলে যায় তবে সর্বশক্তিমান হয়ে সে শক্তির অপব্যবহার করবে। সর্বজ্ঞ হয়ে করবে জ্ঞানের অপব্যবহার। অপব্যবহার যে করে সে তার নিজেরই অহিত করে! জগতের অস্তুনিহিত নৈতিক বিধান তার শক্তি খর্ব করে, তার জ্ঞান তাকে বাঁচাতে পারে না। হিউমানিজম মানুষের হৃদয়কে প্রেমে ভরে দেয়নি। করুণার বিগলিত করেনি। তবে চার্চের নিগড় থেকে মুক্তি দিয়েছে। সাহিত্যে ও শিল্পে নব জাগরণ এনেছে। মানুষকে নতুন করে অহুসন্ধান করতে, চিন্তা করতে শিখিয়েছে। কিন্তু মনুষ্যশক্তির বদলে যন্ত্রশক্তিকে মহামূল্য ভাবে প্রবৃত্ত হয়েছে। সেই সঙ্গে এসেছে তন্ত্রশক্তি। গণতন্ত্র, ধনতন্ত্র, সমাজতন্ত্র ইত্যাদি হরেক রকম তন্ত্র। মানুষ তান্ত্রিক বনে গেছে।

তাজিকরা কোনো কালেই নিঃস্বার্থ ছিল না। ব্যক্তির পক্ষে স্বার্থপরতা যেমন জাতির পক্ষে স্বার্থপরতাও তেমনি।”

মানস জিজ্ঞাসা করে, “আপনার কথাবার্তা শুনে মনে হয় যে আপনি লিবারলও নন, হিউমানিস্টও নন, আপনি আর কিছু। সেই আর কিছুটা কী, মীর সাহেব? মানবোত্তর স্তরে উপনীত হতে চান? একা নয়, সবাইকে নিয়ে? আমরাও আপনার মতো এক একজন অতিমানব হব।”

“আরে না, না।” মীর সাহেব হেসে বলেন, “আমার বক্তব্য শুধু এই যে আধুনিক যুগের হিউমানিজম মধ্যযুগের খ্রীস্টধর্ম বা ইসলামের চেয়ে কম রণোন্মাদ বা কম মানববিশেষ্য নয়। এই দুই মহাযুদ্ধকে যদি একই মহাযুদ্ধের দুই অঙ্গ বলে ধরে নেওয়া যায় তবে এটাও একটা ক্রুসেড। এবার খ্রীস্টান বনাম মুসলমান নয়, জার্মান বনাম ইংরেজ, ফরাসী, রাশিয়ান, আমেরিকান। এটাও একটা খাটি ইয়ার্স ওয়ার। এবার ক্যাথলিক বনাম প্রটেস্ট্যান্ট নয়, ফাসিস্ট বনাম অ্যান্টিফাসিস্ট। হিউমানিস্ট তো এরা সবাই। খ্রীস্টান কি কেউ আছে? ইউরোপে ধর্মের যুগ কবে শেষ হয়ে গেছে। গির্জাগুলো খালি। কিন্তু হিউমানিজমের যুগও তো সারা হয়ে আসছে। মহাযুদ্ধের তৃতীয় অঙ্কে হিউমানিজমেরও যবনিকা পতন। অতিমানব। আমার সে যোগ্যতা নেই। এ জীবনে হবেও না। সত্যিকার মানব হতে চাই। মানবরূপী দানব নয়। মনে হচ্ছে মানব হবে মানবাস্থর। আরেক জাতের ডাইনোসর। তারই মতো নির্বংশ হবে। পরস্পরের সঙ্গে লড়তে লড়তে।”

“নাৎসীদেরও কি আপনি হিউমানিস্ট বলবেন?” মানস বিস্মিত হয়।

“দর্শনে বিজ্ঞানে জার্মানদের স্থান সকলের উপরে। সঙ্গীতে ওরা অধিতীয়। তা হলে ওরা হিউমানিস্ট নয় কেন?” মীর সাহেব স্তম্ভান।

“সেকথা আমিও স্বীকার করি। কিন্তু জার্মান হলেই কি ফাসিস্ট হয়? নাৎসীরা ক্ষমতা দখল না করলে যারা হিউমানিস্ট বলে গণ্য হতেন তাঁরা যদি পালাবার পথ না পেয়ে আপস করে থাকেন তবে কি বলতে হবে যে তাঁরাও ফাসিস্ট! ফাসিস্ট বলে পরিচয় দিলেও তলে তলে তাঁরা হিউমানিস্ট। রোমান ক্যাথলিক চার্চের কাছে নতি স্বীকার করেও যেমন ছিলেন গালিলেও। সবাই কি ক্রোনা হবার সাহস রাখেন? আঙনে পুড়ে মরার সাহস। ইনহুইজিশনের যুগ আবার ফিরে এসেছে।” মানস বিষন্ন কর্ণে বলে।

“নাৎসীদের হুকুমে যারা নাৎসীদের মতো আচরণ করছেন তাঁরা একদা

হিউমানিস্ট বলে গণ্য হলেও এখন স্বধর্মভ্রষ্ট মানবানুসার। আত্মরিক উপায়ে শত্রু ধ্বংস করার নিত্য নতুন বলকৌশল বার করে হিটলারকে উপহার দিচ্ছেন। ওদিকে রুশ হিউমানিস্টেরও স্বধর্মভ্রষ্ট হয়ে তাই করছেন। অন্যত্রও তাই দেখা যাচ্ছে। রাষ্ট্র হয়তো প্রাণে মারবে না, ভাতে মারবে। মল্লিক সাহেব, এটাও এক প্রকার ইনকুইজিশন। ক্রনো হবার সাহস ক'জনের আছে? গালিলেও হবেন প্রায় সকলেই। এবার চার্চের হুকুমে নয়, স্টেটের হুকুমে। কে ভেবেছিল যে স্টেটও সমান নির্মম হবে?” মীর সাহেব খেদোক্তি করেন।

“ওটা শুধু যুদ্ধকালে।” তালুকদার বলেন।

“যুদ্ধ পাঁচবছর চলবে বলে কি মানুষ খাওয়া দাওয়া বন্ধ করতে রাজী হবে? মরে যাবে না?” মীর সাহেব পাণ্টা প্রশ্ন করে নিজেই তার উত্তর দেন। “মুসলমান তার নামাজ বন্ধ রাখবে? হিন্দু তার দোল দুর্গোৎসব বন্ধ রাখবে? হিউমানিজম যাদের কাছে ধর্মের মতো ক্ষুধার অন্ন, তৃষ্ণার জল তাঁরাও তেমনি তাঁদের স্বষ্টিকর্ম, গবেষণাকর্ম, দার্শনিক চিন্তা, বৈজ্ঞানিক চিন্তা বন্ধ রাখতে পারেন না। সেসব লিপিবদ্ধ করতে হবে, প্রকাশ করতে হবে। যাতে আর সকলে আলোচনা করতে পারে, সমালোচনা করতে পারে। মানবদেহের রক্ত চলাচলের মতো মানবমনেরও ভাব বিনিময় চাই। নইলে মন কখনো স্থস্থ থাকতে পারে না। মানুষ মানসিক অন্তর্ভুক্ত ভোগে। এই যে আমরা অবাধে আলাপ আলোচনা করতে পারছি এটা সোভিয়েট রাশিয়া হলে অসম্ভব হতো। নাৎসী জার্মানী হলেও অসম্ভব হতো। অত্যাচার দেশেও ক্রমে অসম্ভব হবে, যদি যুদ্ধের ফলাফল দেশের বিপক্ষে যায়। লেখনার মুখ তো আমাদের দেশেও বন্ধ হয়ে গেছেই। কথা বলার মুখও বন্ধ হবে, যদি না সত্য গোপন করি বা অসত্য প্রচার করি। মানবিকবাদ যাদের কাছে ধর্মের মতো জীবন্ত তাঁরা যুদ্ধকালেও জীবন্ত হতে সাহস পাবেন না। তার চেয়ে বলা ভালো আমি ধর্মের কোনো প্রাণ দিতে পারি, কিন্তু মানবিকবাদের জন্তে প্রাণ দিতে ডরাই। আপনারাও ভেবে দেখবেন, হিউমানিজম কি আপনাদের কাছে ভাইটাল? ধার্মিক যিনি তিনি বলেন, আমি সারা দুনিয়া পেলেও কী করব, যদি নিজের আত্মাকেই হারিয়ে ফেলি? মানবিকবাদী যিনি তিনিও কি তাই বলতে পারেন? যদি না পারেন তো অমন কোন মতবাদের দায় মাথায় না নিয়ে যেটুকু স্বাধীনতা পাচ্ছি তার সদ্ব্যবহার করাই শ্রেয়।”

“অর্থাৎ চাচা, আপনা বাঁচা।” আদিত্য বর্মণ বিদ্রূপ করেন।

সবাই হেসে ওঠেন। কিন্তু কেউ প্রতিবাদ করেন না।

মীর সাহেব হাসতে হাসতে বলেন, “আমরা প্রত্যেকেই মনে প্রাণে যা বিশ্বাস করি সেটাকে যত হাস্যকর ভাবছেন তত হাস্যকর নয়। আপনাদের বরাত ভালো যে এই গভর্নমেন্ট এদেশের কনস্ক্রিপশন জারি করছে না। সত্যগ্রহের ভয়ে করবেও না। নইলে আপনাদের সবাইকে ধরে নিয়ে যেত ও যুদ্ধক্ষেত্রে পাঠিয়ে দিত। তখন আপনারা কোন্‌ ইষ্টমন্ড জপ করতেন? চাচা, আপনা বাঁচা?”

এবার কারো মুখে হাসি ফোটে না। রাহা আমতা আমতা করে বলেন, “মীর সাহেব, আমরা কি তবে কনস্ক্রিপশনের জন্যে প্রস্তুত থাকব, যদি পরিস্থিতি আরো খারাপ হয়?”

“আমি তো প্রথম বোমাবর্ষণের দিন মোটা অঙ্কের লাইফ ইনশিওরান্স করে রেখেছি। লাইফ ইনশিওরান্স বলে বটে, আসলে কিছু ওয়াইফ ইনশিওরান্স। তাঁকে তো সান্ত্বনা দেবার কিছু থাকবে না, যদি পটল তুলি। ওই মোটা অঙ্কটাই সান্ত্বনা। যুদ্ধে যদি মরতেই হয় তবে ঘরে বসে বোমা খেয়ে মরা যা যুদ্ধক্ষেত্রে গিয়ে গোলা খেয়ে মরাও তাই। তবে আমাকে ধরে নিয়ে না গেলে আমি যাচ্চিনে। যেতুম, যদি স্বাধীনতা স্থানশিঁত হতো। বলা যায় না দু’মাস পরে কী ঘটবে। জাপানীরা যদি গোটা দুই প্রদেশ কেড়ে নেয় ইংরেজকে বাধ্য হয়ে কনস্ক্রিপশন জারি করতে হবে। সেটা তারা করিয়ে নেবে কংগ্রেসকে দিয়ে। মোলানা আজাদ তো প্রতিজ্ঞা করে বসে আছেন যে ন্যাশনাল গভর্নমেন্ট হলে ও সামরিক ক্ষমতা হাতে পেলে তিনি কনস্ক্রিপশন করবেন। তা যদি হয় তবে আগে থেকে প্রস্তুত হয়ে থাকাই সুবুদ্ধি। কংগ্রেস যদি গদৌতে বসে গান্ধীজীর সত্যগ্রহ আপনি খেমে যাবে। আর জিন্না সাহেবের পাকিস্তানও জাপান অধিকৃত বাংলার মাঠে মারা যাবে।” মীর সাহেব জবাব দেন।

“জাপানীরা বাংলা কেড়ে নেবে এটা যে আমি ভাবতেই পারিনে, মীর সাহেব। এটা কি সম্ভবপর?” বর্মণ প্রশ্ন করেন।

“পলাশীর যুদ্ধের পূর্বে আমাদের পূর্বপুরুষরাও ভাবতে পারতেন না যে ইংরেজ বাংলা, বিহার, ওড়িশা কেড়ে নেবে। যারা অপ্রস্তুত তাঁরা ইতিহাসের কাছেও অপ্রস্তুত হন। ওঁরা বাস করতেন মুখের স্বর্গে। ওঁদের ধারণা ছিল দিল্লীর বাদশা থাকতে ভাবনা কিসের? তিনিই রক্ষা করবেন। মালুম ছিল না যে বাদশাহী ফৌজও দুর্বল হয়ে পড়েছিল। সেকালের মতো একালের বাদশাহী

ফৌজও দুর্বল হয়ে পড়ে। নইলে সিদ্ধাপুর, মালয়, বার্ম' রাথতে পারে না কেন? জাপানীরা একটু জিরিয়ে নিচ্ছে। পরে একদিন বিপুল বেগে আক্রমণ করবে। ও তোমার পাঞ্জাবী সেনার কর্ম নয়। ওদের জারিজুরি ধরা পড়ে গেছে। আর ইংরেজ তো এখন ঘরমুখো। তার মন পড়ে আছে নিজের দেশে। যে দেশ এখনো বিপদমুক্ত হয়নি। যে কোনো দিন আক্রান্ত হতে পারে। বাড়ালীকে বাড়ালী না বাঁচালে কে বাঁচাবে?' মীর সাহেব পাণ্টা প্রশ্ন করেন।

“ওটা লাখ কথার এক কথা।” স্বপনদা উত্তর দেন। “কিন্তু বাড়ালী যে পরিমাণে ধর্মসচেতন সে পরিমাণে জাতিসচেতন নয়। জাতি বলতে সে বোঝে ধর্মভিত্তিক জাতি। হিন্দু বা মুসলিম। দ্বিজাতিতত্ত্ব তার মজাগত। তারা যে পরস্পরের শ্রেষ্ঠ বন্ধু এটা কোনো পক্ষই অন্তর থেকে মানে না। সুতরাং আমাদের প্রথম কাজ হবে দু'পক্ষকেই হিউমানিস্ট করা আর ধর্মের মোহ থেকে মুক্ত করা।”

“গুপ্ত সাহেব, আপনি চান প্রাচ্য পাশ্চাত্যের সীম্বেসিস। সে সাধনায় আপনি নিষ্ঠার সঙ্গে নিযুক্ত রয়েছেন। হিউমানিজমকে আপনি অত্যাশঙ্ক মনে করেন। কিন্তু একালের হিউমানিস্টদের একভাগ ডিভাইনকে অগ্রাহ করেছেন। যেন হিউমান আর ডিভাইন পরস্পরবিরোধী। হিউমানকে তাঁরা জন্মমৃত্যুর গভীর ভিতর পুরে তার অমরত্ব অস্বীকার করেছেন। এতটুকু সময়ের মধ্যে একজন মানুষ কীই বা জানতে পারে, বুঝতে পারে, উপলব্ধি করতে পারে, সৃষ্টি করতে পারে, দিয়ে যেতে পারে, রেখে যেতে পারে! তা হলে ব্যক্তিকে ছেড়ে বংশপরম্পরার কথা ভাবতে হয়। আমরা যা পারলুম না আমাদের বংশধররা তা পারবে। একালে যা সম্ভব হলো না ভাবীকালে তা সম্ভব হবে। এযুগে যার উপর অবিচার হলো আগামী যুগে তার উপর সুবিচার হবে। কিন্তু ভাবীকাল বা ভাবী যুগের স্বপ্ন দুঃস্বপ্নেও পরিণত হতে পারে। যেমন হয়েছে জার্মানীতে ও ইটালীতে। হিউমানিস্টদের আরেকদল ডিভাইনকে বাদ দেননি। অস্বপ্নে বিশ্বাস হারাননি। দুই ভাগের মধ্যে মতভেদ তীব্র ও গভীর। এই দ্বন্দ্ব ভারতেও এসে উপস্থিত হয়েছে বা হবে। আমি এর মধ্যে জড়িয়ে পড়ি কেন? আমিও একটা সাধনায় নিযুক্ত রয়েছি। সেটা হিন্দু মুসলমানের সীম্বেসিস। ভারতবর্ষকে এর জন্তে বেছে নেওয়া হয়েছে। বেছে নিয়েছে বিশ্বের ইতিহাস। মুসলিম বিজেতারা এককালে ভেবেছিলেন তাঁরা ইরানের মতো ভারতবর্ষকেও পুরোপুরি ইসলামের দেশ বানাবেন।

তঁারা ব্যর্থ হয়েছেন। তঁাদেরি একভাগ হিন্দুদের সঙ্গে ভাব বিনিময় করেন, তাদের আদর অভ্যর্থনা করেন। রামায়ণ মহাভারতের অমুবাদ করিয়ে নেন। দারা শিকোহ্, করেন উপনিষদের অমুবাদ। আকবর তঁার রাজপুত পত্নীর মহালে হিন্দু দেবদেবীর পূজা আচার আয়োজন করেন। হিন্দু রাজত্বদের অস্তঃপুরে মুসলিম খোজারাই হন রানীদের রক্ষক। হিন্দু আচার ব্যবহার মুসলিম পরিবারে ঢোকে। মুসলিম পোশাক আসাক হিন্দুদের গায়ে ওঠে। নানক কবীর আরো গভীরে গিয়ে সীহ্বেসিসের সূত্রপাত করেন। নানক তো মকায় গেছিলেন বলে শোনা যায়। গ্রন্থসাহেবের কতক অংশ ইসলাম থেকে নেওয়া হয়েছে। আওরংজেবের রাজত্বে একটা সেট-ব্যাক হয়। ফলে সীহ্বেসিস ব্যাহত হয়। সীহ্বেসিস কার সঙ্গে কার হয়? খীসিসের সঙ্গে অ্যান্টিখীসিসের। দেখা গেল শিবাজী হয়েছেন খীসিস, আওরংজেব তঁার অ্যান্টিখীসিস। মরাঠা মোগলের স্বন্ধে ভারতের স্বাধীনতা নিহত হয়। উড়ে এসে জুড়ে বসে ইংরেজ। সিপাহী বিদ্রোহের সময় হিন্দু মুসলমানে একটা আঁতাত হয়। সেটা গভীরতর স্তরে নয়। শিবাজী-আওরংজেবের স্পিরিট এখনো প্রবল। গান্ধীজী তঁার মুসলিম সহকর্মীদের নিয়ে দেশকে আবার স্বাধীন করতে বন্ধপরিকর। কিন্তু তঁার একদিকে শিবাজী, আরেকদিকে আওরংজেব। ইংরেজ ভারত ছাড়লে সিভিল ওয়ার। কেউ কাউকে হারাতে সেকালেও পারেননি, একালেও পারবেন না। নীট ফল দেশভাগ। আমি কিন্তু যতদিন বাঁচি সীহ্বেসিসের সাধনা করে যাব। আমি দারা শিকোহ্‌র অসমাপ্ত ব্রত উদ্ঘাপন করছি। সমাপ্ত করে যেতে পারব না, জানি। তবে লোকে একদিন এর প্রয়োজন হৃদয়ঙ্গম করবে।” মীর সাহেব আশাবাদী।

মানস বলে, “আমিও আমার সাধ্যমতো আপনার সহায়তা করব। তবে আমার প্রবণতাটা প্রাচ্য পাশ্চাত্য সীহ্বেসিসের দিকে। এটা রাজনীতির চেয়ে গভীরতর স্তরের ব্যাপার। স্বপনদার সঙ্গে আমিও আছি। এটাও ভারতবর্ষের ইতিহাসবিধাতার নির্বন্ধ। ইংরেজ চলে গেলেও এর প্রয়োজন থাকবে।”

“প্রাচ্য পাশ্চাত্য সীহ্বেসিস এখন অথই জলে।” তালুকদার মন্তব্য করেন। “দেশের অধিকাংশ লোক এখন ইংরেজবিরোধী, সেইজন্তে আমেরিকা-বিরোধী তথা পাশ্চাত্যবিরোধী। ইংরেজ যদি সত্যি সত্যি চলে যায় আবার সতীদাহ ফিরে আসবে। হিন্দুরা ফিরে যাবে গুপ্ত সম্রাটদের যুগে আর

মুসলমানরা খলিফাদের যুগে। রেনেসাঁস মিলিয়ে যাবে হাওয়ার সঙ্গে।  
 রিভাইভালিজম হবে হিউমানিজমের যম। বৈচে 'খাকলে হতাশ হব আমরা।  
 মীর সাহেব একটা লস্ট কাজ নিয়ে লডছেন। হিন্দু মুসলমানের সম্পর্ক দিন  
 দিন তিক্ততর হচ্ছে। সীহ্বেসিসের সম্ভাবনা স্বদূরপর্যন্ত। ভারতবর্ষ  
 গ্রীকদের হজম করেছে, শক ছন কুশানদের হজম করেছে, কিন্তু মোগল  
 পাঠানদের হজম করেনি। উন্টে ওরাই হিন্দু সমাজের একাংশকে হজম  
 করেছে। পারলে পূর্ণ গ্রাস করত। হিন্দুরা এতকাল ডিফেন্ডিভ ছিল।  
 এখন অফেন্সিভ নিচ্ছে। ওদের নিবৃত্ত করতে গেলে মার খেতে হবে।  
 আমরা কেউ সে বুঁকি নিতে রাজী হব না। অন্তত আমি তো নয়ই।”

এই অপ্রিয় প্রসঙ্গের উপর যবনিকা পড়ে যখন মহিলারা প্রবেশ করেন।  
 তখন মীর সাহেব বিদায় নেন। তাঁর কাজ আছে। মানসও কিছুক্ষণ পরে  
 বর্ধনের ওখানে ডিনার বলে মাক চায়।

মানস ড্রয়িং রুমে ঢুকতেই পাকড়াশি ওকে পাকড়ায়। “এই যে, স্বামী  
 মানসানন্দ। তোমার কেন এমন দুর্মতি হলো? কেউটে সাপের গর্ভে হাত  
 দিতে গেলে? জানতে না স্থলতান খান্ কেমন লোক? মেদিনীপুরের  
 রাজদ্রোহীদের জন্ম করার জন্মে সাইক্লোন রিলিফ বন্ধ রেখেছেন। যাক না  
 ওরা ওদের জাতীয় সরকারের দরবারে। দেখা যাবে কার সাধ্য দেয়।”

বর্ধন জানতে চান কী ব্যাপার। মানস বলে, “সমুদ্রের জল এসে দশ মাইল  
 কি বিশ মাইল দূরের গ্রাম ভাসিয়ে নিয়ে গেছে। গ্রামের লোক নিরাশ্রয়।  
 একজন ডাক্তারি ছাত্রের অহুরোধে যুথিক। একটি মেডিকাল রিলিফ টীম  
 পাঠিয়েছে। আমি স্থলতানকে একখানা চিঠি লিখে অহুমতি দিতে বলেছি।  
 পর পর আরো কয়েকটি টীম যাবে। ওষুধ পথ্য নিয়ে।”

“তুমি নও, তোমার মাতাজী?” পাকড়াশী হাসে। “তিনি কি জানতেন  
 না যে ওদের কর্তব্য রিলিফের জন্মে ব্রিটিশ সরকারের পায়ে ধরে সাধা?  
 দেখছেন না কি বে অভ্বেজল পর্যন্ত ব্রিটিশ সরকারের মিত্রপক্ষে। নইলে  
 এমন সময় সাইক্লোন হবে কেন? সমুদ্রের জল এসে রাজদ্রোহীদের ঘরবাড়ী  
 গোন্ধবাহুর ভাসিয়ে নিয়ে যাবে কেন? ক্ষেতখামার ডুবিয়ে দিয়ে যাবে কেন?  
 যেমন কর্ম তেমন ফল। মাতাজীকে সতর্ক করে দিয়ে। নইলে নোয়াখালী।”

নোয়াখালী বদলীকে সবাই ডরায়। ইংরেজরাও। গত শতাব্দীতে  
 ইংরেজ সিভিলিয়ান পেনেলকে বজ্রকরপুরের জেলা ম্যাজিস্ট্রেট পদ থেকে

নোয়াখালীর জেলা জজ করে পাঠানো হয়েছিল। পেনেল তার প্রতিশোধ নেন ইংরেজ পুলিশ সাহেবকে পরোয়ানা দিয়ে কাঠগড়ায় দাঁড় করিয়ে, তার রায়ে মুসলিম জেলা ম্যাজিস্ট্রেটের কড়া সমালোচনা করে আর বেঙ্গল গভর্ন-মেন্টকে এক হাত নিয়ে। জজ তাঁর রায়ে কী লিখবেন তা নিয়ে শান্তিবিধানের কোনো রাস্তা নেই। বরখাস্ত করা যায় না। বদলী করলে কোথায়ই বা করা হবে? রায়টা কাগজে কাগজে ছাপা হয়ে যায়। সরকার ফাঁপরে পড়েন। ছুটি না চাইলে ছুটি নিতে বাধ্য করাও যায় না। শেষে গেলেন তিনি বিলেত। নির্বাচন জিতে হলেন পাল-মেন্টের মেম্বর। সরকারের শ্রদ্ধ করলেন।”

## ॥ তেইশ ॥

মানসের টেনিস খেলার সাথী এক প্রতিবেশী কিছুদিনের জন্তে বাইরে যাবার সময় তাঁর রেডিওটা মানসের কাছে রেখে যান। ওটা নাড়াচাড়া করতে করতে সে একদিন হঠাৎ শুনতে পায়, “আমি স্বভাষ, বালিন থেকে বলছি।”

শুনে চমকে ওঠে। বিশ্বাস হয় না। কিন্তু আরেকটু শোনার পর বিশ্বাস না করে উপায় থাকে না। “আমি ইংরেজের চোখে ধুলো দিয়ে যেমন করে চলে এসেছি তেমনি করেই একদিন ফিরে যাব।”

“জুঁই! জুঁই! শীগগির! শীগগির!” কিন্তু মানসের ডাক শুনে জুঁই ছুটে আসার আগেই কণ্ঠস্বর নীরব হয়ে যায়।

“স্বভাষচন্দ্র ছাড়া আর কেউ নয়। তেজোদ্দীপ্ত ভাষণ। কৌতুকমিশ্রিত। একটা বেপরোয়া ক্ষুতির ভাব। যেন জীবনমরণ পায়ের ভৃত্য চিন্তা ভাবনাহীন।” মানস আবেগের সঙ্গে বলে।

“তারুণ্যের প্রতিযুক্তি!” হতচকিত ভাবটা কেটে গেলে যুথিকা বলে।

“যুতিমান বিদ্রোহ! কিন্তু কথা হচ্ছে উনি এ দেশ থেকে পালাবার পথ পেলেন কী করে? আমি তো ভেবে পাইনে কোন্ পথে আর কোন্ যানে। পালিয়ে যদি বা গেলেন ফিরে আসবেন কোন্ পথে আর কোন্ যানে? কোনো গতিকে বার্মায় যদি পৌছতে পারেন তা হলে অবশ্য সম্পাদনে করে আকিয়াব থেকে চট্টগ্রামে আসা যায়।” মানস স্বীকার করে।



“আলনস্করের স্বপ্ন!” যুথিকা হেসে উড়িয়ে দেয়। “ওঁকে না চেনে এমন লোক ভারতে নেই। কেউ না কেউ চিনতে পেরে ধরিয়ে দেবে। তখন সর্বনাশ! মিলিটারি ট্রাইবিউনাল। বিচারের প্রহসন। ফার্মারিং স্কোয়াড। চিতাভস্ম ঠর আত্মীয়দের হাতে সমর্পণ। খবরের কাগজে ঘৃণাকরেও বেরোবে না। তা সত্ত্বেও যদি জানাজানি হয়ে যায় নিষ্ফল আন্দোলন। বড়ো জোর আর কিছু ভাঙচুর হবে। আরো কিছু আগুন লাগানো। তাতে কি মানুষটাকে ফিরে পাওয়া যাবে? সুভাষচন্দ্র যেখানে আছেন সেইখানেই থাকুন। এখন আমার এই বার্তা আমি তাঁর কাছে পাঠাই কেমন করে?” যুথিকা প্রশ্ন করে।

“কোনো উপায় নেই। কেউ তাঁর ঠিকানা জানে না। সে খুঁকি তিনি নেবেন কেন? তা নয়। তিনি বোধহয় অস্বশস্ত নিয়ে সদলবলে আসবেন। দু’পক্ষেই গুলী চলবে। আর একটা পলাশীর যুদ্ধ। এবার ক্লাইভের হার। সিরাজের জিৎ। সিরাজের পদেই সুভাষ। দেশশুদ্ধ ভেঙে পড়বে তাঁকে অভ্যর্থনা করতে। ইংরেজই পালাবার পথ পাবে না। কেন, তোমার বিশ্বাস হচ্ছে না? তুমি ভাবছ এটা আমার কবিকল্পনা! আমি তো মনে করি সুভাষচন্দ্রের জন্ম পলাশীর কলঙ্ক মোচন করতে। ওই যে হলওয়েল মহামেণ্ট অপসারণ ওটা সেইদিকেই প্রথম পদক্ষেপ। দেখবে মুসলমানরা তাঁর পেছনে দাঁড়িয়ে যাবে কাতারে কাতারে। পাকিস্তানের আকাশকুসুম আকাশে মিলিয়ে যাবে।” মানস স্বপ্ন দেখে।

“তুমিই একালের আলনস্কর!” যুথিকা হেসে কুটি কুটি হয়।

রেডিওটা যথাকালে যথাস্থানে ফেরৎ যায়। কথাটা চাপা থাকে।

এর পরে একদিন লগুন থেকে দত্তবিশ্বাসের চিঠি আসে। মানসের নামে। তার খামের ভিতর এক টুকরো চিরকূট। সেটা মিলির লেখা। যুথিকার নামে। সুকুমার লিখেছে, “এখানে গান্ধীজীর নাম এখন কাদা। জনমত তাঁর উপর বিষম ক্ষুণ্ণ। অমন বিশ্বাসঘাতকের প্রাণদণ্ড হওয়া উচিত। কেউ বা বলে, ‘পরম ভগু মহা যগু জপে হরির মালা।’ কেউ বা বলে, ‘বাটা সাধুবেশে পাকা চোর অতিশয়।’ ধারা অতটা উগ্র নন তাঁদের মতে গান্ধী লোকটা শতকরা পনেরো ভাগ সন্ত, পনেরো ভাগ বুজরুক, সত্তর ভাগ তুখোড় রাজনীতিক। কংগ্রেস নেতারা তো পথে আসছিলেনই, ওঁদের বিপথগামী করেছে কে? ওই তথাকথিত মহাত্মা। ধারা আদৌ উগ্র নন তাঁরা মনে

করেন গত মহাযুদ্ধে লেনিনের যে ভূমিকা ছিল এই মহাযুদ্ধে গান্ধীরও সেই ভূমিকা। তিনি ক্ষমতা হাতে পেলে জাপানের সঙ্গে স্বতন্ত্র সন্ধি করবেন। তিনি ভারতের জন্তে চান শান্তি। এদেশে একদল প্যাসিফিস্টও আছেন। তাঁরা বলেন, শুধু ভারতের জন্তে শান্তি কেন? বিশ্বের জন্তে শান্তি। যুদ্ধের মতো শান্তিও অবিভাজ্য। ভারতে শান্তি প্রতিষ্ঠিত হলে বাকী পৃথিবীতেও শান্তি প্রসারিত হবে; তবে এঁরা মুষ্টিমেয়। কেই বা শোনে এঁদের কথা! খবরের কাগজগুলো একধার থেকে যুদ্ধবাদী। ব্যতিক্রম যে দুটি একটি তারা এই যুদ্ধের গর্ভ থেকে সমাজবিপ্লব ভূমিষ্ঠ হবে বলে এর সমর্থক। ইউরোপের অন্যান্য দেশে তো বটেই। এমন কী, শিব ঠাকুরের আপন দেশেও বিপ্লব না হোক বৈপ্লবিক পরিবর্তন হবে। রক্ষণশীলরা ভোটে হারবে। শ্রমিকরা জিতবে। আমার কিস্তি বিশ্বাস হয় না, মল্লিক। চার্চিলের প্রেস্টিজ ডিউক অভ মাল'বরার চেয়ে কম কিসে? একই বংশ, একই রক্ত। চার্চিল অবশ্য কমন্স সভার সদস্যপদ ছাড়বেন না। নইলে তাঁকে ডিউক করতে রাজ্য সহজেই রাজ্যী হতেন। আজকাল লর্ডস সভার সদস্যকে প্রধানমন্ত্রী হতে দেওয়া হয় না। নইলে তিনি ডিউক অভ ওয়েলিংটনের মতো ডিউকও হতেন, প্রধানমন্ত্রীও হতেন। এক শতাব্দীর মধ্যে চার্চিলের মতো প্রতাপশালী তথা জনপ্রিয় প্রধানমন্ত্রী আর হননি। যুদ্ধোত্তর সাধারণ নির্বাচনে তিনিই তাঁর দলটিকে জিতিয়ে দ্বেবেন, নিজেও জিতবেন, তার পর আবার প্রধানমন্ত্রী হবেন। তা হলে ভারতের কী আশা? আমি শুধু নই, ভারতপ্রেমিক ইংরেজরাও সবাই হতাশ। স্বাধীনতা নৈব নৈব চ। তবে মুসলিম লীগ তথা রাজন্যবর্গ যদি সম্মত হন তা হলে কেন্দ্রীয় সরকারেও স্বায়ত্তশাসন প্রবর্তিত হবে। স্বায়ত্ত-শাসন, স্বাধীনতা নয়। ইংরেজরা শব্দের উপর অশেষ গুরুত্ব দেয়।”

মিলি তার সংসারের সমাচার ও পুত্রের বর্ণনা দিয়েছে। আর লিখেছে, “জানো, চন্দ্র বোসের সন্ধান পাওয়া গেছে। তিনি এখন বালিনে। বেতারে তাঁর ভাষণ মনিটর করা গেছে। কর্তারা আগে থেকে টের পেলে জ্যাম করতেন। ওটা কোনো নাম করা স্টেশন থেকে নয়। সুভাষচন্দ্রের ঘোষণা থেকে মনে হয় তিনি বেশাদিন সবুঁর করবেন না। গান্ধী, নেহরু প্রভৃতির অহুপস্থিতির দরুন ভারতের রাজনীতিক্ষেত্রে যে শূন্যতার সৃষ্টি হয়েছে সেটা পূরণ করতে ছুটে যাবেন। সঙ্গে সশস্ত্র সৈন্যদল। রাজনীতি একদম নয়া মোড় নেবে। এবার আসছে নয়া জর্জ ওয়াশিংটনের সেনাপতিত্বে সাম্রাজ্যের বিরুদ্ধে অস্ত্রশস্ত্র

নিয়ে যুদ্ধ। যেটা হওয়া উচিত ছিল অষ্টাদশ শতাব্দীতে। আমেরিকানরা যদি ফরাসীদের সাহায্য নিয়ে থাকে তো ভারতীয়রাই বা জাপানীদের সাহায্য নেবে না কেন? প্রকরাস্তরে ইংরেজরা কি রাশিয়ানদের মদত নিচ্ছে না জার্মানদের বিরুদ্ধে আজকের এই যুদ্ধে? স্টালিন কমিউনিস্ট বলে যদি মহা বাইবেল অন্তর্ভুক্ত না হয় তবে তোজো ফার্সিট বলে কেন মহাভারত অন্তর্ভুক্ত হবে?”

চিঠিখানা পড়তে দেওয়া হয় ভবতোষবাবুকে। ইতিমধ্যেই তিনি যুথিকাকে দিয়ে লিখিয়েছেন ও সে লেখা ছাপিয়েছেন। সেটা তার হাতে খড়ি। আর মানসের বইয়ের পাণ্ডুলিপি পড়ে অগ্রিম সমালোচনা করেছেন। ওরা মাঝে মাঝে তাঁর ওখানে গিয়ে তাঁর স্বাস্থ্য সম্বন্ধে তত্ত্ব নেয়।

চিঠিখানা পড়ে তিনি ভেবে চিন্তে মত দেন। “গান্ধীজীর নৈতিক জয় সম্বন্ধে আমি নিঃসন্দেহ। বিবেকচালিত আপত্তিকারীরা নানা দেশে স্বেচ্ছায় কারাবরণ করলেও গান্ধী নেতৃত্বে ভারতের মতো আর কোনো দেশে হাজারে হাজারে ও কাতারে কাতারে নয়। এটা একটা বিশ্ব রেকর্ড। সারা বিশ্বের সব মানুষ এর জন্তে গর্ব অনুভব করতে পারে। ভারতীয় হিসাবে আমারও উচ্চতা এক ইঞ্চি বেড়ে গেছে। নিরস্ত্র পরাধীন দেশ এর চেয়ে উচ্চ হতে পারত না, সেদিক থেকে এটা একটা কীর্তি। কিন্তু আমার মনে কোথায় খটকা বাধছে, বলব? কংগ্রেসকর্মীদের বেশ কয়েকজন স্বেচ্ছায় কারাবরণ করেননি, রেল লাইন ভাঙতে, টেলিগ্রাফের তার কাটতে, সাঁকো উড়িয়ে দিতে, থানা চড়াও হতে জনতাকে শিক্ষা দিয়েছেন। জনতাও উত্তেজনার জোয়ারে ভেসে গিয়ে খুন খারাপি করেছে। রেল স্টেশন পুড়িয়ে দিয়েছে। অস্ত্র শস্ত্র লুট করেছে। এতে অহিংসার মহিমা রাজগ্রস্ত হয়েছে। হিংসার সম্মোহন দূরার হয়েছে। আবার সেই এগুস জাষ্টিফাই মীন্স। উদ্দেশ্য-সিদ্ধির জন্তে সাত খুন মাফ। সেদিক থেকে আমরা গান্ধীপূর্ব যুগে ফিরে গেলুম। এটা একটা স্বলক্ষণ নয়। একদিন হয়তো এরাই গৃহযুদ্ধ লড়বে আপনার লোকের সঙ্গে অহিংস উপায়ে নয়, সহিংস উপায়ে। কে শুনবে গান্ধীজীর বাণী, অনুসরণ করবে মহাত্মার আদর্শ? জিন্না এখন পর্যন্ত আসরে নামেননি। অপেক্ষা করছেন। তিনি ভায়োলেটও নন ননভায়োলেটও নন। তিনি কনজিটিউশন সম্মত উপায়ে বিশ্বাসী। তিনি যদি একদিন হতাশ হয়ে উদ্বেগসিদ্ধির জন্তে বিপরীত উপায় অবলম্বন করেন তবে তাঁর অনুগামীরা উত্তেজনার জোয়ারে ভেসে গিয়ে হিংসায় উন্মত্ত হতে পারে।

ইংরেজ না থামালে কে তাদের থামাবে ? ইংরেজই বা থামাতে যাবে কেন, তাদের যদি ভারত ছাড়তে হয় ? আর তাদের যদি ভারতে থাকতে অহুরোধ করা হয় সেটা রাজনৈতিক পরাজয়। আজকের দিনে আমরা যা করছি তার দ্বারা কালকের দিনের ইতিহাস নির্ধারিত হয়ে যাচ্ছে।”

মানস ও যুথিকা স্তব্ধ হয়ে শোনে। তাদের মুখ দেখে সম্পাদক মহাশয় আরো দু’ চার কথা বলেন। “আমি ডিটারমিনিজমে বিশ্বাস করিনে। ইতিহাস আপনা হতে কিছু করে দেয় না। পারিপার্শ্বিক অবস্থা আপনা হতে সামাজিক পরিবর্তন ঘটায় না। প্রকৃতির থেকে আলাদা করে মানুষের জগতের কথা ভাবলে এই সিদ্ধান্তে পৌঁছতে হয় যে মানুষই তার অতীত কর্মের ফল ভোগ করে, বর্তমান কর্মের ফলও ভোগ করবে। তা সে ভালো মন্দ যাই হোক। ভোগ বলতে দুঃখভোগও বোঝায়। স্বরাজ হাতে পেলেই স্বর্গ হাতে পাওয়া গেল এটা ভ্রম। নরকও হাতে পাওয়া যেতে পারে। ভুলের মাশুল দিতে হবেই। কেউ কেউ মনে করেন ক্রিপস প্রস্তাব স্বর্গ এনে না দিলেও নরক ডেকে আনত না। তাদের মতে সেটা প্রত্যাখ্যান করা ভুলই হয়েছে। আমি এ বিষয়ে ‘হ্যাঁ’ কি ‘না’ বলিনি। আজকেও বলতে পারব না। আরো কিছুকাল অপেক্ষা করতে হবে।”

এর পর অল্প প্রশঙ্গ ওঠে। তাঁর কলকাতা প্রত্যাবর্তনের প্রশঙ্গ।

যুথিকা বিস্মিত হয়ে বলে, “সে কী ! আপনি আমাদের ছেড়ে চলে যাবেন কোথায় ? যেখানে সন্ধ্যা হলেই বাঘের ভয়। সেই ভয়ে চারদিক অন্ধকার। কে জানে কোন্‌দিন হানা দেবে ? শেয়ালের মতো গতে ঢুকতে হবে।”

তিনি সহাস্ত্রে বলেন, “একটা কি দুটো বোমা তো কলকাতার মতো মহানগরীর সব ক’টা বাড়ীর উপর পড়বে না। আমার বাড়ীর উপর না-ও পড়তে পারে। শেয়ালের মতো গতে ঢুকতে গেলে দেখব সেখানে শেয়ালের ভিড়। এক একটা গতে যেন এক একটা অন্ধকূপ। সেই অন্ধকূপ হত্যার মতো ব্যাপার হবে। তার চেয়ে ঘরে বসে মরাই ভালো। বয়স তো হলো বড়ো কম নয়। আমার সহধর্মিণী আমার পূর্বেই স্বর্গে চলে গেছেন। আমিই বা আর কদিন ? আমিও স্বর্গের জন্তে ওয়েটিং রুমে অপেক্ষা করছি।”

“এটাও তো আপনার নিজের বাড়ী। এখানে এমন কী অসুবিধে ? আর এখানে এমন কী সুবিধে ?” মানস প্রশ্ন করে।

“আমাকে তো এই বয়সেও মাথার ঘাম পায়ে ফেলে ট্রেনজকার রকি অর্জন

করতে হয়। আমি তো পেনশন পাইনে। কলকাতায় আমি কেবল সম্পাদকীয় লিখিনে। সহকারীদের কাজকর্মও দেখি। স্বত্বাধিকারী তো আমিই। ম্যানেজমেন্টও দেখাশুনা করতে হয়। নইলে কাগজ কবে উঠে যেত। তা ছাড়া আমার স্ত্রী না থাকলেও পরিবার আছে। রোজ আমার নাতি নাতনির সঙ্গে খেলা করি। সেটাই আমার একমাত্র বিনোদন। সেটা এখানে কোথায়? বড়ো বোমা কত ধ্বংস করে আমার জন্তে রোজ কিছু না কিছু রাখেন। তা ছাড়া আমার পারিবারিক ডাক্তার তো এখানে থাকেন না। এখানকার এঁরাও সূচিক্রিয়াকর্মী। কিন্তু আমার শরীরটাকে তো চেনেন না। চিনলে অন্য রকম প্রেসক্রিপশন দিতেন। তারপর আমি একজন সামাজিক মানুষ। সপ্তাহে একদিন সমাজের মন্দিরে গিয়ে উপাসনায় যোগ দিই। মাঝে মাঝে আচার্যের স্থান পূরণ করি। বিবাহসভায় বা শ্রাদ্ধসভায়ও আমার ডাক পড়ে আচার্য হতে। আমি সাড়া না দিয়ে পারিনে। ওটাও আমার আর এক কর্তব্য। এখানে আমি আমার সেইসব কর্তব্য সম্পাদন করতে পারিনে। তেমন উপলক্ষও জোটে না।” তিনি উত্তর দেন।

“কিন্তু সাহিত্যিক কর্তব্যের উপলক্ষও তো জোটে। সাহিত্যসভায় তো ডাক পড়ে। এখানে আপনাকে কে না চায়? পায় না এই যা দুঃখ।” মানস বলে।

“কলকাতার মতো নয়। সেখানে বড়ো বড়ো সাহিত্যিকরা বাস করেন। তাঁদের সঙ্গে সাহিত্যলাপ হয়। এখানে আমি সভাপতিত্বই করতে যাই, আলাপ করতে নয়। কার সঙ্গে আলাপ করব? মাফ করবেন। আপনাকে বাদ দিয়েই বলছি। দু’জন কি একজন আছেন পুরাতন সাহিত্যিক। তাঁরা সভায় যান না। আমিই তাঁদের বাড়ী যাই। তারা আধুনিক সাহিত্যের হালচাল জানেন না। প্রাচীন সাহিত্যে আমারও তেমন জ্ঞান নেই। প্রবন্ধ পেলে ছাপি। কলকাতায় একটা আধুনিকতার হাওয়া আছে। এখানে তা নেই। দু’দিনে চাঁফ ধরে যায়। আমাকে কলকাতায় ফিরে যেতেই হবে। তবে এখনো দিনরূপ স্থির হয়নি। হলে আগুনাদের খবর দেব। বাড়ী গিয়ে বিদায় নেব।” তিনি প্রতিশ্রুতি দেন।

“আপনি একদিন আমাদের সঙ্গে শাকভাত খাবেন। নিয়ন্ত্রণ রইল। আমি নিজে রান্না করে খাওয়াব।” মুখিকা আমন্ত্রণ করে।

“আচ্ছা, আমি খুশি হয়ে খাব।” তিনি কথা দেন। “আমি কিন্তু মাছমাংস খাইনে। জীবিয়োগের পর থেকে খাইনি।”

... নৈশভোজনের জন্তে নির্দিষ্ট দিনের একদিন আগে মানসের ওখানে উপস্থিত হন ভবতোষবাবুর পুত্র পরিতোষবাবু। কুশলপ্রশ্ন বিনিময়ের পর বলেন, “এসেছি বাবার হয়ে ক্ষমা চাইতে। কালকের মধ্যেই তাঁকে কলকাতা ফিরে যাওয়ার জন্তে তৈরি হতে হবে, কারণ পরশু সকালেই তাঁর ট্রেন। নিমন্ত্রণরক্ষার জন্তে সময় কোথায়? তবে আপনারা যদি দয়া করে তাঁর সঙ্গে দেখা করতে আনেন তিনি দু’চার কথা বলার জন্তে সময় করে নেবেন।”

মুখিকা মানসের মুখের দিকে চেয়ে রাজী হয়ে যায়। এরপর পরিতোষবাবুর আপ্যায়ন ও সেইসঙ্গে মানসের সঙ্গে কথোপকথন।

“আপনারা কি মনে করেন কলকাতা এখন নিরাপদ? জাপানীরা আর বোমা বর্ষণ করবে না? ইংরেজরা ওদের খোঁচাবে না?” মানস জ্বাষায়।

“কার মনে কী আছে কেমন করে বলব? তবে যতদূর অহুমান করতে পারছি ওদের লক্ষ্য ভারত নয়, চীন। চীনকে ওরা ভারত থেকে সাহায্য পাঠাতে দেবে না বলেই বার্মা দল করেছে। বার্মা ভিন্ন আর তো কোনো স্বলবধ নেই। তাই যদি হয়ে থাকে তবে বার্মা রোড পাহারা দেওয়াই তাদের লক্ষ্যভেদের সহায়ক। ভারত আক্রমণ করে লক্ষ্যভ্রষ্ট হতে যাবে কেন? তা ছাড়া কংগ্রেসই যখন ইংরেজের সঙ্গে দ্বন্দ্ব্বরত তখন ভারত আক্রমণ করে কংগ্রেসকে ইংরেজের কোলে ঠেলে দেওয়া কেন? ই্যা, ইংরেজে কংগ্রেসে কোলাহুলি হতে পারে। ক্রিপস প্রস্তাব যদি সংশোধিত হয়। যদি দেশরক্ষার দায়িত্ব ভারতীয়দের উপর ছেড়ে দেওয়া হয়। যে কোনো একজন ভারতীয় নাগরিককে যুদ্ধ দফতর পরিচালনার ভার দিলেই চলবে। কংগ্রেস নিজের জন্তে সেটা চাইবে না। জিন্না সাহেবকে যদি দেওয়া হয় তা হলেও কংগ্রেস সহযোগিতা করবে। কংগ্রেস জাপানের সঙ্গে লড়াতে প্রস্তুত ছিল। ইংরেজের সঙ্গে নয়। কিন্তু চাচিলের অনড় মনোভাবের জন্তেই তো মোড় ঘুরে গেল। অপ্রস্তুত অবস্থায় কংগ্রেসকে ইংরেজের সঙ্গে লড়াতে হলো। আর একটা মাস। আর একটা মাস সময় পেলেই রাজশক্তিকে দেখিয়ে দিত ভারতের প্রজাশক্তি কেমন দুর্জয়। এরোপ্লেন থেকে মেশিনগানের গুলী বর্ষণ করে ভারতীয়দের মেরেছে কারা? জাপানী না ইংরেজ? কংগ্রেস পক্ষের নিরক্ষর জনতা যদি বাড়াবাড়ি করেই থাকে তবু মোটের উপর তারা নিরস্ত্র। তোমরা সশস্ত্র। তোমরাও কি বাড়াবাড়ি করলে না? ফলে কংগ্রেসের দক্ষিণপন্থীরা আপস করতে আরো পেছপাও হবে। নয়তো বামপন্থীরা কংগ্রেস থেকে তাদের

হটাবে। তাদের মেজরিটি থাকবে না। স্বয়ং গান্ধীজীও তাদের জিতিয়ে দিতে পারবেন না। তেমন করতে গেলে তাঁর নিজের জনপ্রিয়তা হারাবেন। তাঁর এতকালের নেতৃত্ব চলে যাবে। বড়ো আপসোলার কথা স্তূভাষচন্দ্র এখন আমাদের মধ্যে নেই। থাকলে বিকল্প নেতৃত্বের জন্মে ভাবতে হতো না। হয়তো তিনিই আবার কংগ্রেসে মেজরিটি পেতেন। ‘হয়তো’ বলছি এইজন্যেই যে সেবারকার মতো এবার বামপন্থীরা সবাই একজোট নন। তাঁদের মধ্যে ঝাঝা কমিউনিস্ট তাঁদের কাছে আগে রাশিয়া, তারপরে ভারত। আগে রাশিয়া নাংসীমুক্ত হবে, তারপরে ভারত ব্রিটিশমুক্ত হবে। এটা মেনে নেওয়া অসম্ভব বামপন্থীদের পক্ষে অসম্ভব। এদের কাছে আগে ভারতের স্বাধীনতা, তারপরে রাশিয়ার বিপ্লবের সহায়তা। বিপ্লবের প্রতি তাদের অমুরাগ কারো চেয়ে কম নয়। তারাও বিপ্লবী। কিন্তু যেদেশ স্বাধীন নয় সেদেশে বিপ্লব হয় না।” পরিতোষবাবু চা খেতে খেতে বলেন।

“সমাজবিপ্লব হয় না।” মানস সংশোধন করে। “কিন্তু অল্পরকম বিপ্লব তো হতে পারে। আমেরিকার স্বাধীনতাসংগ্রামকেও আমেরিকান রেভোলিউশন বলা হয়। ওদেশে একটি সংস্থা আছে, তার নাম ‘ডটার্জ অফ দ্য রেভোলিউশন’। নাম শুনেছেন নিশ্চয়।”

“শুনেছি বইকি। ওর মতো প্রতিক্রিয়াশীল সংস্থা ওদেশে আর নেই। ধনতন্ত্রের একটি স্তম্ভ।” পরিতোষবাবুর মতে।

“এদেশের স্বাধীনতাসংগ্রাম সফল হলে এদেশেও সেইরকম একটি সংস্থার উদ্ভব হতে পারে। আমাদের জুলিও হতে পারে তার একজন পাণ্ডা।” মানস হাসে।

“জুলিটি কে?” কোতুহলী হন পরিতোষবাবু।

“কেন, সেদিন তো আরতিদি বলে গেলেন জুলি তাঁর বিহু মাসীর মেয়ে। আন্দোলনে বাঁপিয়ে পড়ে আগুয়গ্রাউণ্ডে থাকে। শুনছি ধরা পড়ে জেলে গেছে। আপনার কাছেই তো আশা করছি সঠিক খবর।” মানসও কোতুহলী।

“আমি অত খোঁজখবর রাখিনে। রাখলে আপনাকে জানাতুম। তবে, হ্যাঁ, ওঁরা ধনতন্ত্রের সম্মর্থক। জুলি নিজে কি না, বলতে পারবে না। ওর কমিউনিস্ট কমরেডদের সঙ্গে ওর বিচ্ছেদ ঘটে গেছে। জুলি এখন স্বাধীনতার

জন্তে লড়ছে। অরুণা আসফ আলীর মতো। উনিও এখন কলকাতায়। ইয়া আণ্ডারগ্রাউণ্ডে। পুলিশ ঠেকে কিছুতেই ধরতে পারছে না। আণ্ডারগ্রাউণ্ডে থেকেই উনি যা আণ্ডন ছড়িয়ে চলেছেন তা নেবানো দমকলের অসাধ্য। এ. আর. পি'র অসাধ্য। কে জানে জুলির সঙ্গে হয়তো ঠর যোগাযোগ আছে। স্বাধীনতার পর এঁরা কে কোন্ পথে যাবেন এখন থেকে ভবিষ্যৎবাণী করা সম্ভব নয়। কিন্তু স্বাধীনতা হচ্ছে কী করে, বুঝতে পারছি নে। বামপন্থীরা দলে ভারী ছিল কমিউনিষ্টরাও দলের সামিল ছিল বলেই না। নইলে স্বভাষচন্দ্র কি ভোটে জিততেন? এখন তো সেই জোটবল নেই, সেই ভোটবল নেই। দক্ষিণপন্থীরা আপস করলে তাদের ভোটের জোরে হারাবে কে? আপস করে যদি আন্দোলন থামিয়ে দেন একে চালিয়ে নেবার সামর্থ্য কি জয়প্রকাশের কি অরুণার আছে? এই সাড়ে চার মাসের মধ্যেই আন্দোলনের মোমেন্টাম ক্ষীণ হয়ে এসেছে। কেউ কেউ নেপালে পালিয়ে গেছেন। কিন্তু সেখান থেকে আন্দোলন চালানো আরো কঠিন হবে। তার চেয়ে জেলের ভিতর থেকে চালানো তত কঠিন নয়। জেলের ভিতর থেকে চিঠি চালাচালি অনবরত চলেছে। ওয়ার্ডারদের যোগসাজশে। ব্যতিক্রম অবশ্য গান্ধাজী যেখানে বন্দী আর কংগ্রেস ওয়ার্কিং কমিটির সদস্যরা যেখানে বন্দী বা নির্বাসিত বা ভারতের বাইরে প্রেরিত।” পরিতোষবাবু বলেন।

“এখন ওরা কোথায়?” মানস বোকার মত প্রশ্ন করে।

‘ছাট ইজ মোর চান আই ক্যান টেল ইউ।’ তিনি ইংরেজীতে উত্তর দেন। তারপর বলেন, “প্রত্যেকটি কাগজের উপর নির্দেশ ফাঁস করেছ কি মরেছ। কোনো পত্রিকারই সাহস নেই। না নিউজ এজেন্সীর। নইলে আমেরিকানরা এতদিনে প্রকাশ করে দিত। ইয়া, আমরা আমেরিকা থেকেও পত্রিকা পাই। বিলেত থেকে তো বটেই। ত্রিশ বছর হলো পেয়ে আসছি। আমরাও পত্রিকা পাঠাই। এমন গোপনীয়তা কোনো ব্যারেই দেখা যায়নি। ঠুঁদের কুংসা প্রচার সমানে চলেছে, অথচ ঠুঁদের আত্মপক্ষ সমর্থন করতে দেওয়া হচ্ছে না। অপরাধ যদি করে থাকেন তো আদালতে বিচার হোক। এমন কি, মিলিটারি ট্রাইবিউনালে। এটা কি রকম ব্রিটিশ জাষ্টিস, বলুন তো জজ সাহেব?” পরিতোষবাবু পরিহাস করেন।

মানস লজ্জিত হয়ে বলে, “না, এটা ক্রিকেট নয়।”

“ইংরেজরা কত নিচে নেমে গেছে, দেখুন। ওরা বরং ঠুঁদের চিরশত্রু



স্টালিনের সঙ্গে ভাব করবে, তবু ওদেরই একজন যিনি, তাঁর সঙ্গে নয়। আমি কার কথা বলছি বুঝতে পেরেছেন?” তিনি রসিকতা করেন।

“নেহরুর কথা। এটা সহজেই বোঝা যায়। হ্যাঁরো আর কেমব্রিজ। কত ভালো ইংরেজী লেখেন। পড়ে স্ব্থ আছে।” মানস প্রশংসা করেন।

“গান্ধীজী আবার ঠেকেই ঠর উত্তরাধিকারী বলে ঘোষণা করেছেন। বেচারী উত্তরাধিকারীর একেবারেই ইংরেজের সঙ্গে লড়তে ইচ্ছে ছিল না। তার মহাশত্রু হিটলার মুসোলিনি প্রভৃতি ফাসিস্ট। ঠেকে শুধু ইংরেজ নয়, মার্কসিস্টও বলা যায়। ক্ষমতা হাতে পেলে ঠর প্রথম কাজই হতো চার্চিলের সাথী হয়ে স্টালিনের সঙ্গে সাক্ষাৎ করতে যাওয়া। দ্বিতীয় কাজ হতো চীনদেশে গিয়ে চিয়াং কাই-শেকের সঙ্গে মাও তসে-তুঙ্গের মিলন ঘটানো। আন্তর্জাতিক ক্ষেত্রে ঠর মতো যোগ্যতা আর কার কাছে? বড়লাট তবু পররাষ্ট্র দফতর কিছুতেই ঠকে দেবেন না। ক্রিপস প্রস্তাব বানচাল করার পেছনে বড়লাটেরও হাত ছিল।” আপমোস করেন পরিতোষবাবু।

মানসও জানত যে জবাবহরলাল একান্ত অনিচ্ছুক সত্যগ্রহী। তিনি আপ্রাণ চেষ্টা করেছেন মিত্র হিসাবে যুদ্ধে নামতে, তাঁবেদার হিসাবে নয়। কিন্তু এমনি ইংরেজদের জেদ যে ওরা দাবী করেছে ব্রিটিশ সাবজেক্ট হিসাবে লয়ালাট, স্বাধীন দেশের নাগরিক হিসাবে মিত্রতা নয়। স্ত্রতরাং একজন অনারেবল ম্যানের কর্তব্য অসহযোগ করা। আমিও ব্রিটেনে থেকেছি, গত মহাযুদ্ধের সময় ছাত্রহিসাবে। আমিও তখন সাহায্য করেছি। আমিও এই যুদ্ধে ওদের পক্ষে। কিন্তু দেশের স্বাধীনতার বিনিময়ে নয়। ওদেশের পীপলের বিরুদ্ধে আমার কোনো অভিযোগ বা অভিমান নেই। ওরা সত্যিই ভালো। যত দোষ ওদের সাম্রাজ্যবাদী শাসক ও শোষকদের। ওরাই তো এদেশে ডিভাইড খ্যাণ্ড ক্লস পলিসি চালিয়ে হিন্দু মুসলমানের মনে এমন বিষ ঢুকিয়েছে যে ওদের গুরুমারা চেলারা শেষে হাঁকে কিনা ‘ডিভাইড অ্যাণ্ড কুইট’। লক্ষ করেছেন এই আন্দোলনে মুসলমানরা আগের মতো যোগ দেয়নি। ব্যতিক্রম উত্তর-পশ্চিম সীমান্ত প্রদেশের পাঠান। আন্দোলনের ফলাফল যাই হোক একটা জিনিস বেশ স্পষ্ট হয়েছে। কংগ্রেস আটটা প্রদেশে আগের মতোই প্রভাবশালী। অধিকন্তু পশ্চিম বঙ্গে ও পূর্ব পাকিস্তানে। বাকী অংশে কংগ্রেস অত্যন্ত দুর্বল। মুসলিম জনতার দুর্বলতার

পূর্ণ সুযোগ নিলে আশ্চর্য হব না। ইংরেজরা করতেও পারে ভাগ আর ত্যাগ।”  
পরিতোষবাবু শক্তিত।

“সেটা তো যুদ্ধ শেষ হওয়ার আগে নয়। তার এখনো ঢের দেয়ি। যুদ্ধে জয় পরাজয় সমান অনিশ্চিত। কত কী ঘটতে পারে! স্বভাষ বোসকে কেউ গণনার মধ্যে ধরছে না। গান্ধীজীর দম ফুরিয়ে আসছে, স্বভাষের দম ফুরায়নি। সিপাহী বিদ্রোহের সম্ভাবনা কি উড়িয়ে দেওয়া যায়?” মানস তর্ক করে।

“সে রকম কানাঘুসাও শোনা যাচ্ছে। আমি ওটাকে সীরিয়াস মনে করিনে। সিপাহীদের রেজিমেন্টগুলো সাম্প্রদায়িক নামে নামাঙ্কিত। অসাম্প্রদায়িক রেজিমেন্ট একটাও নেই। ওরা কি ইংরেজদের বিরুদ্ধে লড়বে না পরস্পরের বিরুদ্ধে? ইংরেজরা দ্বিতীয় সিপাহী বিদ্রোহের সম্ভাবনাকে গর্ভের ভিতরেই বিনাশ করে রেখেছে। ওকে ওরা ভূমিষ্ঠ হতে দেবে না। ওটা স্বাধীনতা সংগ্রামকে বিপথগামী করবে। তেমনি বিপথগামী করবে জার্মান বা জাপানীদের সঙ্গে জোট বঁধা।” পরিতোষবাবুর বিচারে।

পরের দিন মানস ও যুথিকা ভবতোষবাবুকে বিদায় দিতে যায়। তিনি দুঃখ প্রকাশ করেন। “নিমন্ত্রণ গ্রহণ করে নিমন্ত্রণ রক্ষা না করা একটা সামাজিক অপরাধ। কিন্তু কাল সকালে কলকাতার ট্রেন ধরতে হলে আজ সন্ধ্যাবেলা কোথাও যাওয়া চলে না। অনেকেই আসছেন দেখা করতে।”

যুথিকা কলকাতায় তাঁর নিরাপত্তার জন্তে উব্বিগ্ন। “এই যে আপনি জাপানী বোমাকে উপেক্ষা করে ফিরে যাচ্ছেন এটা কি ঠিক হচ্ছে?”

তিনি স্নিগ্ধ হেসে বলেন, “আমার তো এমনিতেই যাবার বয়স হলো। মানে পরপারে। দু’দিন আগে গেলে এমন কী তফাৎ? লোকের ধারণা আমি জাপানী বোমার ভয়ে পালিয়ে এসেছি। সেটা অর্ধ-সত্য। বাকী আধখানা হচ্ছে আমি সেই অজুহাতে কিছুদিন নিভুতে বাস করতে চেয়েছি। আমি সাময়িকপত্র সম্পাদন করি, সাময়িককে নিয়েই আমার কারবার। কিন্তু সাময়িকতার উদ্দেশ্যে উঠতে না পারলে মানব অস্তিত্বের অর্থ খুঁজে পাওয়া যায় না। ওই যে এত লক্ষ মানুষ দেশের নামে যুদ্ধ করতে বেরিয়েছে এরা কি স্বত্বের পরেও জার্মান বা জাপানী বা ইংরেজ বা মার্কিন বলে পরিচয় দিতে পারবে? ওপারে কি কেউ চিনতে পায়বেন এরা কোন্ দেশের মানুষ? মানুষ বলেই চিনবে কিনা সেটাও প্রশ্নসাপেক্ষ। স্বত্বের পূর্বে তুমি জার্মান,

যুত্মর পরে তুমি কেউ নও। তুমি যা তোমার শত্রু রাশিয়ানও তাই। আমি চেষ্টা করছি দার্শনিকের চোখে দেখতে। আমার চোখে হারজিং দুই সমান। জার্মান ইটালিয়ান জাপানী শিবির জিতলে যে মানবজাতির সর্বনাশ হবে আর ইহু মার্কিন রুশ শিবির জিতলে যে সর্বলাভ তা আমার বিশ্বাস হয় না। সব যুদ্ধে জয় পরাজয় আছে। এই যুদ্ধেও কোনো এক পক্ষ জিতবে ও কোনো এক পক্ষ হারবে। তাতে সমগ্র মানবজাতির কি এল গেল? একজন ভারতীয় হিসাবে নয়, একজন মানুষ হিসাবে এই আমার জিজ্ঞাসা। সেই যে একটা কথা ছিল পশু যেমন বিবর্তনের সোপান বেয়ে ক্রমে ক্রমে মানুষ হয়ে উঠেছে তেমনি মানুষও ক্রমে ক্রমে দেবতা হয়ে উঠবে, সেই কথাটা কি সত্য? আপনাদের কি মনে হয় একটার পর একটা মহাযুদ্ধে মারতে মারতে ও মরতে মরতে মানুষ ক্রমে ক্রমে দেবতা হয়ে উঠেছে? না অস্ত্র হয়ে উঠেছে? না নেমে গিয়ে আবার পশু হচ্ছে? শেষে কি ভাইনোসরের মতো নির্বংশ হবে?”

মানস যুথিকার দিকে তাকাতাই সে ফিক করে হাসে। “দেবতা হয়ে উঠছে না তো কী? চার্চিল, রুজভেল্ট, স্টালিন কি ব্রহ্মা, বিষ্ণু, শিব নন?”

ভবতোষবাবুর মতো গম্ভীর মানুষও হেসে ওঠেন। মানসের দিকে তাকান।

“তা যদি বলা তবে ওডিন, থর, ফ্রিগ এঁরাও তো দেবতা। ফ্রিগ হলেন ওডিনজায়া। টিউটনদের এই তিন দেবতার নাম এখনো বহন করছে ওয়েনসডে, থার্সডে, ফ্রাইডে। হস্তার পর হস্তা আমরাও এঁদের নাম করি। ইদানীং জার্মানীতে এঁদের যুগ ফিরে আসছে। নাস্তারীরা প্রাচীন গোরব ফিরিয়ে আনছে।” মানস বলে।

ভবতোষবাবু চমকে ওঠেন। “তার মানে কি জার্মানী থেকে খ্রীষ্টধর্ম উঠে যাবে? হিটলারের জয় বলতে কি এত বড়ো বিপর্যয় বোঝায়?”

“স্টালিনের জয় হলে জার্মানী থেকে ক্রিস্টবিশ্বাসই উঠে যাবে। যেমন উঠে গেছে রাশিয়া থেকে। যুদ্ধ ব্যাপারটা শুধু মানুষের মরণ বাঁচনের প্রশ্ন নয়। ধর্মেরও, মতবাদেরও, গভীরতম বিশ্বাসেরও ভাগ্যবিপর্যয়ের প্রশ্ন।” মানস উত্তর দেয়।

ভবতোষবাবু স্বীকার করেন যে যুদ্ধে হার জিং মানব জাতির ভাগ্য নির্ধারণ করতে পারে।

## ॥ চব্বিশ ॥

এর পরে একদিন সাত সকালে রায় বাহাদুর এসে উপস্থিত। “আপনাকে এত সকালে বেয়োতে দেখিনি। ব্যাপার কী, রায়বাহাদুর?”

“কী খাওয়াবেন, বলুন।” রায় বাহাদুর আসন নিয়ে বলেন, “বি. বি. সি’র খবর। স্টালিনগ্রাডে জার্মান সেনা আত্মসমর্পণ করেছে। বন্দী হয়েছে সেনাপতি সমেত একানব্বই হাজার সৈনিক।”

“কী আনন্দ। কী আনন্দ!” মানস যুথিকাকে ডেকে শোনায়।

“আপনার তো আনন্দ। আমার যে নিরানন্দ। কালকেই জামাই এসে হানা দেবে। আমার মেয়েকে ধরে নিয়ে যাবে। নাতি নাতনী সমেত। স্টালিনগ্রাডের পরাজয়ের পর জার্মানীর মিতা জাপান আর এদিকে পা বাড়াবে না। কলকাতা নিরাপদ। কী জানি, বাপু!” তাঁর প্রত্যয় হয় না।

“এই তো সেদিন ভবতোষবাবু কলকাতা ফিরে গেলেন। নিরাপদ না হলে কি যেতেন? তবে কেউ জোর করে বলতে পারবে না যে আর কখনো বোমা পড়বে না। ব্র্যাক আউট বহাল থাকবে।” মানস যতদূর আনন্ড করতে পারে।

যুথিকা চা করে এনেছিল। মানস বলে, “আম্ন, একটু মেলিব্রেট করা যাক।”

“কেন, আপনি কি প্রচ্ছন্ন কমিউনিস্ট?” রায় বাহাদুর রসিকতা করেন।

“রুজভেন্ট, চার্চিল কি কমিউনিস্ট? অত বাছবিচার করলে কি যুদ্ধ জেতা যায়? স্টালিনগ্রাডে হিটলারের পরাজয় তাঁদেরও জয় সূচনা করেছে। তাঁরা এবার দ্বিতীয় ফ্রন্ট খোলার তোড়জোড় করবেন। স্টালিনগ্রাড একটা টানিং পয়েন্ট। এই প্রথমবার হিটলারকে হার মানতে হলো। না, আমি প্রচ্ছন্ন কমিউনিস্ট নই। আমি নন-কন্ফর্মিস্ট। যেমন ধর্ম, তেমন সমাজে, তেমন সাহিত্যে, তেমন রাজনীতিতে, তেমন মতবাদে। তবে সরকারী চাকরিতে কন্ফর্ম করতেই হয়। নয়তো চাকরি ছাড়তে হয়। সেইজন্মেই পালাতে চাই।” মানস কৈফিয়ৎ দেয়।

‘তা হলে আপনার বিয়ে না করাই উচিত ছিল। পুত্রকন্ঠার পিতা হওয়া তো একেবারেই অসুচিত।’ তিনি সহাস্তে বলেন।

মানসও হাসতে হাসতে বলে, “নারীই হচ্ছে পুরুষের শক্তি। শিবের শক্তি যেমন পার্বতী, নারায়ণের শক্তি যেমন লক্ষ্মী, রামের শক্তি যেমন সীতা, কৃষ্ণের শক্তি যেমন রাধা, মানসের শক্তি তেমনি যুথিকা।”

“শিবপার্বতীর যেমন কান্তিক গণেশ” বলতে যাচ্ছিল, কিন্তু হঠাৎ কণ্ঠরোধ হয়। কথাটা ঘুরিয়ে নিয়ে বলে, “কালিদাস একটা মহাকাব্যই লিখে ফেলেন কুমারকে সম্ভব করতে গিয়ে। নইলে সেকালের স্টালিনগ্রাডে সেকালের নাৎসীদের বিরুদ্ধে যুদ্ধ পরিচালনা করতেন সেকালের রুশদেশের কোন সেনাপতি?”

“রুশদেশকে আপনি দেখছি মর্ত্যের স্বর্গ বলে কল্পনা করছেন। আমি কিন্তু ভাবছি এক নেপোলিয়নকে হারিয়ে দিয়ে আপনারা আরেক নেপোলিয়নকে জিতিয়ে দিলেন। হিটলারের মতো স্টালিনেরও বাড় বেড়ে যাবে। হিটলারের শ্রাদ্ধ অনেক দূর গড়াবে। তখন আবার ‘সামাল’ ‘সামাল’ রব উঠবে।” রায় বাহাদুর বলেন।

“দেখুন, রায় বাহাদুর, অগ্রিয় হলেও কথাটা সত্য। স্টালিন না থাকলে হিটলারকে কেউ রুখতে পারতেন না। আর চার্চিল, রুজভেল্ট সাহায্য না করলে স্টালিনও কি পারতেন? এক কথায় বলতে পারা যায় কমিউনিস্ট ও ক্যাপিটালিস্ট মিলে ফাসিস্টকে রুখেছেন।” মানস বিচারকের রায় শোনায়। ষাঁকে শোনায় তিনিও একজন বিচারক ছিলেন।

“তা যদি বলেন, চার্চিলকে সাহায্য করেছেন অ্যাটলী, লেবার পার্টির নেতা। ক্যাপিটালকে সাহায্য করেছে লেবার। রুজভেল্টের পেছনেও তাঁর দেশের শ্রমিক নেতারা দাঁড়িয়েছেন। নাৎসীদের কেউ দেখতে পারে না। ওরা কি এতই খারাপ! ওরা যে বেকার সমস্যার সমাধান করে এতদিন সকলের প্রশংসা কুড়িয়ে এসেছে, এটাও কি সত্য নয়?” রায় বাহাদুর আশ্চর্য হন।

“কিছু মাত্র কৃতিত্ব যে ওদের নেই এমন কথা আমি বলব না। স্টালিনগ্রাডে শুনছি আড়াই লাখ জার্মান প্রাণ দিয়েছে। দেশের জন্তে প্রাণ দেওয়াও একটা কৃতিত্ব। কিন্তু এই বিংশ শতাব্দীতে ওরা ওদের টিউটন পূর্বপুরুষদের যুগে ফিরে গেছে। খ্রীষ্টীয় মূল্যবোধের ধার ধারে না। গ্রীক রোমান

ঐতিহ্যের উত্তরাধিকার স্বীকার করে না। রেনেসাঁস, এনলাইটেনমেন্ট, লিব্রাল ডেমোক্রাসীর ধারা প্রবহমান রাখতে চায় না। আর কারো সঙ্গে ওদের মিলবে কেন? আবার সেই উইচ হাণ্ট ফিরিয়ে এনেছে। উইচ হয়েছে ইহুদী মাছেই। জিগসী মাছেই। কৃষ্ণাঙ্গ মাছেই। আর্থ আর অনার্থ এ ভেদবুদ্ধি ওদের মজ্জাগত। অনার্থকে বাঁচতে দেবে না। স্তবরাং প্রাণের দায়ে সবাইকে একজোট হতে হচ্ছে। নেপোলিয়নও এত রকম মানুষকে শত্রু করেননি। তিনি ছিলেন প্রগতিশীল। এরা প্রতিক্রিয়াশীল।” আবার রায় দেয় মানস।

রায় বাহাদুর ওঠেন। বলেন, “স্টালিনগ্রাদের খণ্ডযুদ্ধই তো সম্পূর্ণ যুদ্ধ নয়। আরো অনেক জায়গায় লড়াই হবে। এখন থেকেই সেলিব্রেট করা বিজয় জনের কাজ নয়। আপনি এখনো ছেলেমানুষ রয়েছেন।”

তাঁর প্রশ্নানের পর যুথিকা মুখ খোলে। “চার্লিস আজ হাসছেন না কাঁদছেন তা আমি বাজি রেখে বলতে পারব না। স্টালিনই এখন থেকে সিনিয়র পার্টনার। ‘মার্শাল স্টালিন’, ‘মার্শাল স্টালিন’ বলে খোনামোদ শুরু হয়ে যাবে। লোকটা আগাগোড়া ইম্পাত দিয়ে তৈরি। শুভ স্মৃতি নিন্দা কুংসা কিছুই ঠুকে টলাতে পারবে না। ইউরোপের ভাগ্য উনিই নিয়ন্ত্রণ করবেন। এর পরে আর কোনো শক্তি রাশিয়া আয়ত্ব করবে স’হস পাবে না। ঢুকলে বেরোবার পথ পাবে না। ঘেরাও হয়ে আত্মসমর্পণ করবে। গোটা রাশিয়াটাই হবে বৃহত্তর স্টালিনগ্রাদ। চার্লিস মশায় হাত পা কামড়াবেন। মতলবটা তো জার্মানী দখল করে রাশিয়ার দিকে হাত পা বাড়ানো। শক্তির ভক্ত, নরমের যম। যত হাঙ্গি তত্বি গান্ধীজীর বেলা। সর্বসহা বহুমতী আর কতদিন এই দাস্তিক জাতিকে সহ্য করবেন? কবে এর নেতাকে দিয়ে বলিয়ে নেবেন ‘মহাত্মা গান্ধী’ ‘মহাত্মা গান্ধী’? কবে এমন সুদিন হবে যেদিন চার্লিস উড়ে আসবেন সেবাগ্রামে তাঁর নৈতিক সমর্থন প্রার্থনা করতে? পৃথিবীতে নৈতিক শক্তি বলে কি কিছু নেই? তবে এত মানুষ যীশু খ্রীস্টের অহুগামী হতে যায় কেন? খ্রীস্টের অহুশাসনকে কাজে না হোক, মনে মনে অবলম্বন করে কেন?”

মানস এর উত্তরে বলে, “মনে মনে মানছেই বা ক’জন মানুষ! গির্জাগুলো জনবিরল বা জনশূন্য। খ্রীষ্টানদের মধ্যে খাঁটি খ্রীষ্টানরা সংখ্যালঘু। টলস্টয়ের কথা যদি শুনত রুশদেশের চার্চ আত্মসংশোধন করত। তা না করে তাঁকেই করে বহিষ্কার। ফলে জারও গেছেন, প্যাট্রিয়ার্কও গেছেন, চার্চও গেছে। সব

সাক করে দিয়েছেন লেনিন ও তাঁর বিপ্লবী দল। তাঁরাও গড়ে তুলেছেন নতুন এক চার্চ। কমিউনিস্ট পার্টি। নতুন এক রাষ্ট্র, প্রোলিটারিয়ান রাষ্ট্র। তাঁদেরও একপ্রকার নৈতিক শক্তি আছে। আরো এক প্রহ্ন নৈতিক অহুশাসন। তাঁদের রাষ্ট্রে বেষ্ট্রাবৃত্তি নেই, বৈশ্ববৃত্তি নেই, প্রফিট মোটিভ নেই। আদি খ্রীষ্টানদের সঙ্গে মিলে যায়। তবে তলোয়ারের উপর অগাধ বিশ্বাস। অনেকটা আদি মুসলমানদের মতো। যারা তাঁদের মতবাদে বিশ্বাস করে না তারা ইনফাইডেল। তাদের কোতল করা হয়। প্রাণে বাঁচাবার জন্যে সবাইকে কমিউনিস্ট দীক্ষা নিতে হয়েছে। খাটি কমিউনিস্টরা সংখ্যালঘু। তাঁদের মধ্যেও বাড়াই বাছাই চলেছে। আদি কমিউনিস্টরাও প্রায় সকলেই নিপাত গেছেন। তাঁরা নাকি প্রতিবিপ্লবী, অতিবিপ্লবী। স্টালিন এখন কেবল পার্টির পোপ নন, রাষ্ট্রেরও সম্রাট, এখন আবার সৈন্তদলের মহাসেনাপতি, ফীল্ড মার্শাল। সর্বপ্রকার রাক্ষ তো বিপ্লবের সঙ্গে সঙ্গেই উঠিয়ে দেওয়া হয়েছিল। এখন আবার ফিরিয়ে আনা হয়েছে।”

“কিন্তু বিপ্লবটা আদৌ হলো কেন বলতে পারো? অধিকাংশ রাশিয়ানই তো ছিল ধর্মভীরু ও রাজভক্ত?” যুথিকা জিজ্ঞাসা করে।

‘প্রধানত অর্থনৈতিক কারণে। যুদ্ধের সময় সব দেশেই ইনফ্লেশন হয়ে থাকে কিন্তু তাকে অতি যত্নে আয়ত্তের মধ্যে রাখতে হয়। সেটা প্রথম মহাযুদ্ধের সময় জারের শাসনকালে হয়নি। ফেক্তারি বিপ্লব আপনা থেকে ঘটে যায়। জার সিংহাসন ত্যাগ করেন। লেনিন তখন দেশে ছিলেন না। কেরেনস্ক ও তাঁর মেনশেভিকরা বিপ্লবের সুযোগ নিয়ে গভর্নমেন্ট গঠন করেন। কিন্তু একই ভুল তাঁরাও করেন। যুদ্ধ চালিয়ে যান, যুদ্ধের খরচ ইনফ্লেশন দিয়ে মেটান। একই পরিণাম। আবার বিপ্লব। এটা আপনা থেকে ঘটে না। যোপ বুঝে কোপ দেন লেনিন ও তাঁর বোলশেভিক দল। এঁরা যুদ্ধ থামিয়ে দেন। রণক্লান্ত সৈনিকরা এঁদের পক্ষ নেয়। শ্রমিকরা তো নেয়ই, কৃষকরাও জমির স্বত্ব পেয়ে এঁদের পেছনে দাঁড়ায়। ইনফ্লেশনের পরিমাণ কমিয়ে আনা হয়। অবশ্য প্রতিবিপ্লবীদের সঙ্গে লড়তে গিয়ে আবার পরিমাণ বাড়াতে হয়েছিল, তার সুযোগ নিতে চেয়েছিল অতিবিপ্লবীরা কিন্তু লেনিন ছিলেন বহুদর্শী ও প্রাজ্ঞ। সুতরাং তাঁর বিপ্লব আশাতীতভাবে সফল হয়। যদিও বিনা রক্তপাতে নয়। তবে ফরাসী বিপ্লবের মতো সম্রাসের রাজত্ব তাঁর আমলে হয়নি। তিনি ছিলেন জায়নিষ্ঠ। জায়নিষ্ঠাও মাহুযকে মাহুযের প্রতি অত্যাচার থেকে নিবৃত্ত

করে। নইলে ক্লশবিপ্লবও ফরাসীবিপ্লবের মতো ব্যর্থ হতো। মহৎ উদ্দেশ্য সিদ্ধির জন্তে মন্দ উপায়ও সার্থক এমনতরো নীতিরও একটা মাত্রাবোধ আছে। গান্ধীজীর বৈশিষ্ট্য হলো তিনি উপায়কে উদ্দেশ্যের চেয়ে আরো বেশী গুরুত্ব দেন।’ মানস ব্যাখ্যা করে।

“আচ্ছা, এখানেও তো ইনফ্লেশন থেকে বিপ্লব হতে পারে। ইনফ্লেশনের উপরে কি গভর্নমেন্টের কন্ট্রোল আছে?” যুথিকা স্তব্ধ।

“এখন পর্যন্ত আছে। এ যুদ্ধ আরো তিন বছর গড়ালে ইনফ্লেশনের তথ্য বিপ্লবের সম্ভাবনা থাকবে। গান্ধীজী ততদিন অপেক্ষা করলে তাঁর আন্দোলনই বৈপ্লবিক আকার নিত। অসময়ে গণ আন্দোলন করতে গিয়ে তেমন বেশী সাড়া মেলেনি। শ্রমিকরা ও সৈনিকরা সরকার পক্ষে, মুসলমানরা উদাসীন।” মানস বলে।

দিন কয়েক পরে রায় বাহাদুরের পুনরাগমন। এবার রাত ন’টার পরে।

“শুনেছেন? মহাত্মা গান্ধীজীর অনশন আরম্ভ হয়ে গেছে। একুশ দিনের মেয়াদ। সরকার তাঁকে সেই একুশ দিন মুক্ত থাকতে দিতেন। তা হলে কিন্তু তিনি অনশন করতেন না। কাজেই তাঁকে বন্দী অবস্থায় অনশন করতে দেওয়া হয়েছে। সঙ্গে তাঁর নিজের ডাক্তার থাকবেন। নিকট আত্মীয়রাও থাকবেন। ফলাফলের জন্তে সরকার দায়ী নন। বড়লাটের সঙ্গে তাঁর যে পত্রবিনিময় হয় তা প্রকাশ করা হয়েছে। কালকের কাগজে দেখবেন।” রায় বাহাদুর হাঁপাতে হাঁপাতে বলেন।

যুথিকা বজ্রাহত। মানস যদিও জানত গান্ধীজী অনশন করতে পারেন, তবু ঠিক এই মুহূর্তে প্রত্যাশা করেনি। সেও হতবাক।

“চূড়ান্তর বছর বয়সে একুশদিন অনশন মানে কী, বোঝেন? নির্বাণ। কেউ যদি তাঁকে নিবৃত্ত না করে। সরকার পাষণ্ডের মতো অবিচল। সব চেয়ে খারাপটার জন্যেও প্রস্তুত। দেশবাসীরও তার জন্তে প্রস্তুত হতে হবে।” তিনি কাতরভাবে বলেন।

মানস তাঁকে এগিয়ে দিয়ে আসে। তিনি কেবলি আঙুড়াতে থাকেন, “অসতো মা সদগময়। তমসো মা জ্যোতির্গময়। স্তুতো মা অমৃতং গময়।”

এক কাকে মানস তাঁকে জিজ্ঞাসা করে, “আপনি অতবার স্তূত্যর কথা বলছেন কেন? আপনার কি মনে হয় মহাত্মা আর বাঁচবেন না?”

“ওই শরীর দিয়ে এই বয়সে কেউ বাঁচে না। বাঁচলে বাঁচবেন আত্মার



দ্বোরে আর ভগবানের কুপায়। সোল ফোর্স আর ডিভাইন গ্রেস। সেইজন্মেই তো এতবার জপ করছি, অমৃতং গময়।” তিনি উত্তর দেন।

মানস ফিরে এসে যুথিকাকে শোনায। সে ইতিমধ্যে স্থির করে ফেলেছে যে সেও অনশন করবে। সেটা তার অন্তরাঙ্গার নির্দেশ।

“সে কী! তুমি কেন করতে যাবে! করে কী লাভ হবে? তুমিও কি আমাদের ছেড়ে চলে যেতে চাও?” মানস ব্যাকুল হয়ে বলে।

“পাগল! আরি ছেড়ে যাব কোন্‌ দুঃখে! আত্মার সঙ্গে আত্মার একটা অদৃশ্য যোগস্থ আছে। আমার আত্মার প্রার্থনা তাঁর আত্মাকে শক্তি জোগাতে পারে। অনশনও একপ্রকার অব্যক্ত প্রার্থনা। অস্থস্থ সন্তানের আরোগ্যের জন্মে উপবাস কি কোনো মা কখনো করে না? বাপুও তো আমার একটি ছেলে। ছেলের মুখে ভাত নেই, আমার মুখে ভাত রুচবে?” যুথিকা আবেগের সঙ্গে বলে।

“একুশ দিন তুমি পারবে কেন? শরীরেরও তো একটা দাবী আছে। মাহুয়ের সমস্তটাই কি আত্মা?” মানস যুক্তির আশ্রয় নেয়।

“না, একুশ দিন নয়। দিন সাতেক।” যুথিকা জানায়।

পরের দিন যুথিকা অনশন শুরু করলে মানসও তাই করে। চা পর্যন্ত ছোঁয় না। পরিজ পড়ে থাকে।

“ও কী! তুমি অনশন করবে! তোমাকে আদালতে যেতে হবে, মামলা গুনতে হবে। পেটে কিছু না পড়লে কাজের ক্ষতি হবে না?” যুথিকা স্বধায়।

“বাপুর জন্মে আমারও কিছু করা উচিত। অদৃশ্য একটা ভালোবাসার ডোর যখন আছে। তাঁর সঙ্গে তাঁর প্রত্যেকটি দেশবাসীর। কেউ মানে না, কেউ মানে। আমি তো মানি। রায় বাহাদুরের মতো আমারও আশঙ্কা এযাত্রা তাঁর প্রাণসংশয়। তিনদিন পর্যন্ত আমার দোড়। এই তিনদিন আমি আদালতে গিয়ে শক্তিক্ষয় করব না। বাড়ীতে বসেই যা করতে পারি তা করব। অস্থখবিস্থ করলে জজেরা তাই করেন ও হাইকোর্টকে জানিয়ে দিয়ে অহুমতি নেন। এ সপ্তাহে আমার কোর্টে দায়রার মামলা নেই। সিভিল ও ক্রিমিনাল আপীল তিনদিন সবুর করতে পারে। মামুলী ফাইল বাড়ীতে বসেও ডিস্পোজ করা চলে। ক্লার্করা এসে দেখিয়ে নিয়ে যাবেন।” মানস তার সিদ্ধান্ত জানায়।

সেরেস্তাদারকে ডেকে পাঠানো হয়। তিনি বলেন তিনদিন কোনো মতে চালিয়ে দিতে পারা যাবে। তবে অনশনের কথাটা গোপন রাখতে হবে। বাইরে রটে গেলে কলকাতার কাগজে বেরিয়ে যাবে। সরকার চেপে ধরবে। অস্থিতো সকলের করে। অস্থিতাই হবে প্রকাশ্য কারণ।

“না। আমি মিথ্যা কথা বলব না, লিখব না। তা যদি করি আমার অনশন বুঝা হবে। এটা একটা রিচুয়াল নয়। গান্ধীজী সত্যের উপর জোর দেন। আমিও তাই করব। যদি হাইকোর্ট জানতে চায়। কিন্তু আপাতত কোনো কারণ দর্শাতে হবে না। কার্খবিধিতে তেমন কোনো বাধ্যবাধকতা নেই। নিজের অস্থিত না করলেও স্ত্রীর অস্থিত তো করতে পারে।” মানস দৃঢ়তার সঙ্গে বলে।

“তা হলে মিথ্যা কথাটা আমিই মুখে আনব, সার। মেমসাহেব অস্থিত, সাহেব ব্যতিব্যস্ত। এই চারটি শব্দই যথেষ্ট।” তিনি সাহস করে বলেন।

“তা হলে আবার সহায়ত্ব জ্ঞানতে উকীল বাবুৱা ছুটে আসবেন। কী দরকার কোনো কৈফিয়ৎ দেবার? আমি একথানা চিঠি লিখে দিচ্ছি সাব-জজ সাহেবের নামে। পরে হাইকোর্টের রেজিস্ট্রার সাহেবকে লিখব। কারণ কাউকেই জানাব না। সেটা প্রাইভেট।” মানস শেষ করে।

“কারণটা প্রাইভেট। বাস, এই যথেষ্ট।” তিনি বিদায় নেন।

মানস জীবনে একটিবার উপবাস করেছিল। একাদশীর উপবাস। তার মা সেদিন দু’তিন ঘণ্টা অন্তর অন্তর অহরোধ উপরোধ করে এটা সেটা ওটা খাইয়ে হাস্তস্পর্শ করেছিলেন। তার স্ত্রীও যে তাই করবেন এটা তার অপ্রত্যাশিত ছিল না। কিন্তু সে সত্যি সত্যিই চক্ৰিশ ঘণ্টা অনশনে কাটিয়ে দেয়। মাঝে মাঝে পান করে লেবুর সরবত।

পরের দিন খুব বেশী পীড়াপীড়ি করতে হয় না। এক পেয়লা চা দিয়েই অনশন শুরু করে। কিন্তু সারাদিন লেবুর সরবত ছাড়া আর কিছু মুখে দেয় না। রাত্রে শোবার আগে আবার এক পেয়লা দুধ। এই তার দ্বিতীয় দিনের রেকর্ড। তৃতীয় দিন সকালে চা ও রাত্রে দুধ আর মাঝে মাঝে লেবুর সরবত। বিকেলে আরো কিছু পেটে পড়ে। একটা আশু কমলালেবু। যুথিকা কিন্তু তার পরেও আরো দু’দিন অনশন চালিয়ে যায়। লেবুর সরবত ছাড়া আর কিছু মুখে দেয় না। তারপরে সেও স্বীকার করে যে আর পারছে না। অক্ষরে অক্ষরে সাতদিন অনশন করলে শরীর সহ্য করবে না।

ইতিমধ্যে ওরা ছ'জনেই অন্তরে অহুভব করে যে মহাত্মা এষাত্রা রক্ষা পাবেন। হয় বিশ্বের জনমত সরকারকে বাধ্য করবে তাঁকে একুশদিনের আগে মুক্তি দিতে, আর নয় তো তিনি অক্ষরে অক্ষরে একুশদিন পার করতে সমর্থ হবেন।

মানস বলে, “মলিকান্দায় তাঁকে দর্শন করতে গিয়ে আমি লক্ষ করেছি তাঁর ভিতরে একটা শক্তির রিজার্ভ। সে রিজার্ভ তাঁকে একুশদিন পার করিয়ে দেবে। আমাদের আর অনশন করতে হবে না। তবে প্রার্থনা সমানে চলবে।”

হাইকোর্টের রেজিস্টার পত্রপাঠ জবাব দেন। লেখেন, “আপনি তো কারণ দর্শাননি। মহামাতা হাইকোর্ট কারণ জানতে চান।”

তখন মানস উত্তর দেয়, “আমার একজন প্রিয়জনকে অনশন করতে দেখে আমিও অনশন করি। বাড়ীতে বসেই দরকারী কাজ করি। অহুমতি না দিলে ক্যাজুয়াল লীভ দেওয়া হোক।”

রেজিস্টার জানিয়ে দেন অহুমতি বা ক্যাজুয়াল লীভ কোনোটাই মিলবে না। রেগুলার লীভের জন্তে সরকারের কাছে দরখাস্ত করতে হবে।

রায় বাহাদুরকে খুলে বলতে হয়। তিনি শিউরে ওঠেন, “এই সেরেছে। সরকার সব খবর রাখে। ছুটির দরখাস্ত না-মঞ্জুর তো হবেই, তিনদিনের মাইনে তো কাটা যাবেই, চাকরিতে ব্রেক হয়ে যাবে। সে এক গুরুতর ব্যাপার। এতকাল যে চাকরি করলেন পেনসনের সময় এই কার্যকালটা বেঁচে যাবে। আমার সঙ্গে পরামর্শ করলেন না কেন? লিখলেই পারতেন প্রিয়জন মানে সহধর্মিণী। মিসেস মঞ্জিকের অনশন দেখে আপনিও অনশন করেন তাঁর অনশন ভাঙতে।”

“অস্বখামা হতো ইতি গজঃ। প্রিয়জন বলতে আমি কিন্তু বলতে চেয়েছি বাপু। বাপুর অনশনে ব্যথিত হয়ে আমরা ছ'জনেই অনশন করি। কেন মিথ্যা কথা লিখব? তিনি আমার কাছে সত্যভাষণের সাহস প্রত্যাশা করেন। নইলে অনশনের কী মানে? পেনসনের সময় কী হবে না হবে তার জন্তে আমি অপেক্ষা করব নাকি? তার অনেক আগেই চাকরি ছাড়ব। রাশি রাশি জবানবন্দী আর রায় লিখে লিখে যে সময়টা নষ্ট করছি সেটা আমারই আয়ু আর ঘোবন। টাকা দিয়ে আর সব কেনা যায়, আয়ু আর ঘোবন কেনা যায় না। আমাকে কাঁপ দিতেই হবে। সরস্বতীর কৃপা থাকলে তাঁর সেবককে তিনি

সপরিবারে অভুক্ত রাখবেন না। আমিও যে অনশন করতে পারি এটা আবিষ্কার করে আমি ভিতরে জোর পাচ্ছি।” মানস সবিনয়ে বলে।

“ছেলেমানুষ আর কাকে বলে। ছেলের লেখাপড়া বাকী, মেয়ের বিয়ে থা বাকী। স্ত্রীরও তো জামাকাপড়ের প্রয়োজন হবে। তিনি অনশন করতে পারেন, কিন্তু নিরাবরণ থাকতে পারবেন না। যাক, সরকার আপনাকে লম্বু পাপে গুরুদণ্ড দেবেন না। ইংরেজরা একটা মহৎ জাতি। সভ্যভাষণের মর্যাদা মানে। খুব সম্ভব আপনার কনফিডেনশিয়াল সার্ভিস রেকর্ডে একটা বিরূপ মন্তব্য থাকবে। আপনাকে লীগাল রিমেমরান্সার করবে না, সিলেকশন গ্রেড দেবে না, হাইকোর্টের জজ করবে না। আপনার নিচে ষাঁদের পোজিশন তাঁরাই প্রমোশন পাবেন, আপনি সারা জীবন জেলা জজ হয়েই কাটাবেন। তবে গঙ্গার ডুব দিলে সব পাপের ক্ষলন আছে। পুলিশকে যদি খুশি করে দেন তবে আপনার প্রমোশন আটকায় কে?” রায় বাহাদুর রক্ত করেন।

“পুলিশকে খুশি করলে আমাকে তো জজ না করে ম্যাজিস্ট্রেট করা হতো, রায় বাহাদুর।” মানস তার কাছ থেকে বিদায় নেয়।

গান্ধীজীর অনশন খারাপের দিকে যাচ্ছে, অবস্থা উদ্বেগজনক। বিশ্বের নানা দিক থেকে অহরোধ আসছে। বড়লাট কর্ণপাত করছেন না। তবে তাঁকে শেষবারের মতো দর্শন করতে তাঁর ভক্তদের জন্তে দ্বার খুলে দেওয়া হয়েছে। যুথিকার ইচ্ছা ছিল, উপায় ছিল না। সে বসেতে তার এক বান্ধবীকে চিঠি লেখে বাপুকে দর্শন করে শুভকামনা জানাতে।

জেলা ম্যাজিস্ট্রেট আলী হায়দার জেলা জজকে আধা-সরকারী ভাবে জানিয়ে রাখেন যে মিস্টার গান্ধীজীর স্বাস্থ্যের দ্রুত অবনতি হচ্ছে। সরকার সব কিছুর জন্তে প্রস্তুত। হাকামার সম্ভাবনা অল্পরেই বিনাশ করতে হবে। শান্তিভঙ্গ ঘটলে দৃঢ় হস্তে দমন করতে হবে।

যুথিকা মানসের মুখে শুনে কাঁদতে বসে। বলে, “মহৎ জাতি না শাদা হাতী! শয়তানের জাতি! ওদের অন্তঃপরিবর্তন কি কোনদিন হবে না? ইংলণ্ডে কি মানুষ নেই? সব বনমানুষ?”

ইতিমধ্যে হোমি মোদী, নলিনীরঞ্জন সরকার ও মাধবরাও অণে বড়লাটের শাসন পরিষদ থেকে ইস্তফা দিয়েছেন। তাতেও বড়লাটের মন গলেনি।

দিনকয়েক পরে যুথিকার বান্ধবী শিরীন বিলিমোরিয়া লেখেন, “বাপু আমাকে দেখে চিনতে পারেন। শুভকামনার জন্তে ধন্যবাদ দিয়ে অতি কষ্টে

বলেন, ‘তৃষ্ণার্তকে এক চামচ জল দিলে কি তার তৃষ্ণা মেটে ?’ মনে হলো তিনি বোঝাতে চেয়েছেন এত কম সাড়া কেন ? দেশ কি আবার ঘুমিয়ে পড়েছে ? আমিও তাই ভাবি। আগস্ট মাসের আগুন ফেত্রয়্যারিতে জল হয়ে গেছে ?”

যুথিকা রাগ করে বলে, “আমরাও মহৎ জাতি না কালো হাতী ! কৃন্ত-কর্ণের জ্ঞাতি ! ছ’মাসের জন্তে জাগি, দশ বছরের জন্তে ঘুমোই।”

গান্ধীজীর অন্ত্যেষ্টিক্রিয় জন্তে সরকার নাকি যথেষ্ট চন্দনকাঠ জড়ো করে রেখেছিলেন। কিন্তু মরিয়ে না মরে রাম এ কেমন বৈরী ! একুশদিন পরেও দেখা গেল তিনি বেঁচে বর্তে আছেন। কস্তুরবার হাত থেকে কমলালেবুর রস নিয়ে উপবাস ভঙ্গ করেন।

ডাক্তার বিধানচন্দ্র রায় পনেরো দিনের উপর গান্ধীজীকে চোখে চোখে রেখেছিলেন। গুঁর মতে তিনি মৃত্যুর খুব কাছাকাছি এসে পড়েছিলেন। “মহাত্মাজী আমাদের সবাইকে বোকা বানিয়েছেন।” বলেন ডাক্তার রায়।

প্রবল ইচ্ছাশক্তির প্রয়োগে গান্ধীজী বেঁচে রইলেন আরেকদিন লড়বার জন্তে। মানস ও যুথিকা স্বস্তির নিঃশ্বাস ফেলে বাঁচল।

এর পরে তাদের ভাবনা সৌম্যদা আর জুলির জন্তে। ওদের কে যে কোন্ কারাগারে, কবে মুক্তি পাবে কেউ জানে না। মিসেস সিন্‌হাও অন্ধকারে। আগের বারের চেয়ে সরকার এবার আরো কড়া হয়েছেন। জেলখানা এখন আর বৈঠকখানা নয়। ওয়ার্ডাররা জেনে গেছে স্বদেশীওয়ালাদের দৌড় কতদূর। তাদের চাকরি কেউ কেড়ে নিতে পারবে না। লোকেও বুঝে গেছে জাপানীদের দৌড় কতদূর। ইংরেজকে হটায় কার সাধ্য !

মানসের দুর্ভাবনা ছিল সরকার হয়তো তার ছুটির দরখাস্ত না-মঞ্জুর করে তাকে জব্দ করবেন। তিনদিনের মাইনে তো কাটা যাবেই, তার মাথা কাটা যাবে। সে চারদিকে অন্ধকার দেখছে, এমন সময় চিঠি আসে ছুটি মঞ্জুর। সরকার থেকে জবাবদিহি চাওয়া হয়নি। সেও দরখাস্ত পেশ করার সময় জবাবদিহি করেনি।

যুথিকা বলে, “একটা ঝাঁড়া কেটে গেল। তুমিও পদচ্যুতির খুব কাছাকাছি এসে পড়েছিলে।”

একদিন পুলিশ সাহেবের সঙ্গে দেখা। “একটা বেড়ালের ন’টা জীবন। একজন মহাত্মার ক’টা জীবন ? এই নিয়ে ক’বার প্রাণরক্ষা হলো ? ফের ক’বার হবে ?”

মানস বলে, “আপনারা তো তাঁকে পোড়াবার জন্যে চন্দনকাঠও আনিবে রেখেছিলেন বন্দিশালায়। এখন হতাশ।”

“আপনি ভুল বুঝেছেন। এটুকু জ্ঞান আমাদের আছে যে গ্যাণ্ডী ডেড ইজ মোর ডেঞ্জারাস ছান গ্যাণ্ডী লিভিং। তিনি মারা গেলে নতুন করে টেররিজমের ঢেউ আসত। কয়েকটা জেলা থেকে, কয়েকটা প্রদেশ থেকে আমরা ভেসে যেতুম, হয়তো বা মুছে যেতুম। এবারকার টেররিজম মুষ্টিমেয় মধ্যবিত্তের মধ্যে নিবন্ধ পাকত না, উন্নত জনতার সঙ্গে মোকাবিলা করতে হতো। তার জন্যে আমরা কেউ প্রস্তুত ছিলাম না। আমরা মিডিল অফিসাররা ভারতময় ছড়িয়ে ছিটিয়ে রয়েছি। একজোটা হবার সময় পেতুম কখন? ইচ্ছে থাকলেও উপায় থাকত না। রেলপথ বিপর্যস্ত। মোটরের রাস্তায় অবরোধ। প্লেন থাকলেও ল্যান্ডিং গ্রাউণ্ড কোথায়? যাক, এবারকার মতো ফাঁড়া কেটে গেছে। পরের বারের জন্যে সময় থাকতে প্রস্তুত হতে হবে। গ্যাণ্ডী লোকটা বিলকুল নাছোড়বান্দা। কিন্তু ওর দাবী মেটাতে গেলে তো সত্যি সত্যি আমাদের ভারত ছাড়তে হয়! তখন চাকরি পাব কোথায়? পেনসন দেবে কে? দেশে ফিরে গিয়ে কি না খেয়ে মরব? তার চেয়ে লড়তে লড়তে মরাই ভালো।” পুলিশ সাহেব উচ্চস্বরে চিন্তা করেন।

মহাত্মার নিধন হলে যে গতিবেগ সঞ্চারিত হতো তাঁর প্রাণরক্ষার ফলে সেটা আর হয় না। আগস্ট মাসে যে স্বতঃস্ফূর্ত জন জাগরণের জোয়ার এসেছিল মার্চ মাসের মধ্যেই তাতে ভাঁটা পড়ে যায়। সরকারকে আর ধরপাকড় করতে বা গুলী গোলা চালাতে হয় না। গান্ধী মৃত নন, আন্দোলনটাই মৃত।

আশানাল ওয়ার ফ্রন্টের পরিদর্শন উপলক্ষে হিতেশ ভৌমিক আবার একদিন আসেন। এবারেও মানসের অতিথি হন। বলেন, “উত্তর, দক্ষিণ, পূর্ব, পশ্চিম সারা বাংলাই আমি চষে বেড়াচ্ছি। কোথাও একটুকু প্রাণের স্পন্দন নেই। কেউ লড়তে চায় না। না জাপানীদের সঙ্গে, না ইংরেজদের সঙ্গে। ওয়ার ফ্রন্ট এখন নাচ গান প্রোপাগান্ডার জায়গা। কবিদেরও আমরা যথেষ্ট সম্মান মর্যাদা দিই। তাঁদের কবিতা শুনি। ‘কবিদল চিংকারিছে জাগাইয়া ভীতি।’ সকলেই বোর ফাসিস্টবিরোধী। কংগ্রেসওয়ালারা জেলে যাওয়ায় তাঁদের কণ্ঠস্বর আর শোনা যাচ্ছে না। বারা আওয়ারগ্রাউণ্ডে গা ঢাকা দিয়েছেন। তাঁদের সাইক্লোস্টাইলে লেখা ইস্তাহার মাঝে মাঝে চোখে পড়ে। সরকার গ্রাহ্যই করেন না! তাতে তাঁদের যুদ্ধোত্তোপের লেশমাত্র ইতরবিশেষ

হয় না। যুদ্ধ মানেই বিগ বিজনেস। সে বিজনেসে স্বদেশী বিদেশী সকলেই নিযুক্ত। মুনাফা যা হচ্ছে তা আকাশছোঁয়া। এমনি করেই এদেশে ক্যাপিটাল কর্মেশন হচ্ছে। ক্যাপিটালিজমের বুনিয়াদ আরো শক্ত হচ্ছে। স্বাধীনতা দিতে ইংরেজদের আপত্তি কমে আসছে, কারণ স্বাধীন ভারত হবে ক্যাপিটালিস্ট ভারত। তাতে মাড়োয়ারী, ভাটিয়া, পার্শী, বোহরা ও খোজাদের সঙ্গে ইংরেজদেরও পার্টনারশিপ থাকবে। রতনে রতন চেনে। আমি ক্যালকাটা ক্লাবে থাকি। ওইখানেই আমার ডেরা। ইংরেজ, বাঙালী, মাড়োয়ারী, সিঙ্ঘী সকলেরই লীলাখেলা দেখি। যোগ দিতে পারিনে। সঙ্গে বৌ নেই যে। না, আমি তেমন লোক নই যে জীবিয়োগের পর সহধর্মিণীর প্রতি অবিশ্বাসের কাজ করব।” বলতে বলতে তাঁর কণ্ঠরোধ হয়।

মানস খাপ্পা হয়ে বলে, “ওদিকে বাপু অনশনে মারা যাচ্ছেন, এদিকে এরা মুনাফা লুট আর মজা লুট করছে! বৌ থাকলে আপনিও যোগ দিতেন।”

“দূর। ঠাট্টাও বোঝেন না! বৌ থাকলে আমি ক্লাবেই থাকতুম না। আর সেও ছিল তেমনি পিউরিটান।” ভৌমিক নিজেও মদ খান না।

## ॥ পঁচিশ ॥

মহাত্মার মরদেহের জন্তে সরকার চন্দনকাঠ মজুত করেছেন এই গুজবটা সারা ভারতে রটে যায়। সৌম্য ভাণ্ডনে স্থির থাকতে পারে না। সব কাজ ফেলে পুণা ছুটে যায়। পথে ধরা পড়তে পারত, কিন্তু কেউ তাকে চিনতে পারেনি। ধরা পড়লে তার কী দশা হবে ভাববার মতো মনের অবস্থা ছিল না। বাপু যদি প্রতি সত্যি চলে যান তবে শেষবারের জন্তে তাঁকে দর্শন করে বিদায় দিতেও নিতে হবে।

আগা খান প্রাসাদের সদর দরজা খোলা পেয়ে দলে দলে মাহুব আসাবাওয়া করছিল। কাউকেই দাঁড়াতে দেওয়া হচ্ছিল না। গান্ধী পরিক্রমা করে ফেরবার সময় হঠাৎ সোনাটির সঙ্গে মুখোমুখি। তিনি ছিলেন সেবিকাদের একজন। লেবাগ্রাম থেকে গিয়ে সরকারের অহুমতি নিয়ে কল্লরবার সহায়িকা হওঁলীভুক্ত।

“বাইরে গিয়ে অপেক্ষা করো। আমি আসছি।” বলেন সোনাদি। বাঁর ভালো নায় শোভিনী দেব রায়, বিবাহহুত্রে কেশবন।

এই রে ! চিনতে পেরেছে ! সৌম্য ধরা পড়ে গেছে। কী আর করবে ? কাঠ হাসি হাসে। মাথা নেড়ে সায় দেয়।

কিছুক্ষণ পরে সোনাদি এসে তাকে একটু দূরে ডেকে নিয়ে যান। বলেন, “এটু, ক্রটে ? তুমিও, ক্রটাস !”

সৌম্য ভড়কে যায়। “ও কী বলছেন, সোনাদি ? কবে আমি কাকে ছোঁরা মারলুম ? আমি যদি ক্রটাস হই তো সীজারটি কে ?”

“বাপু। ভগবান না করুন, তিনি যদি সত্যি সত্যি এখান্দ্রা আমাদের ছেড়ে যান তা হলে তুমিও এর জন্তে দায়ী হবে, ভাই। তাঁর অনশন এই কথা জগৎকে জানাতে যে, এটা তাঁর পরিচালিত আন্দোলন নয়। তোমাদের বলা হয়েছিল গণসত্যাগ্রহ চালাতে। তোমরা যা চালিয়েছ তার মধ্যে অহিংসার ভাগ কতটুকু ? আর সতাই বা তার মধ্যে কোথায় ? এই যে তুমি বাড়ল সেজে মহাত্মাকে দর্শন করে এলে এটাও তো তোমার অসত্য পরিচয়। তবে ও বুড়োকে ধাক্কা দেওয়া অত সহজ নয়। টের পেয়েছেন ঠিকই। যাও, কাল আবার এসো। নিজ বেশে। মাফ চেয়ো। কলকাতা ফিরে গিয়ে গঙ্গার ছুব দিয়ে লালবাজারে ধরা দিয়ে। তোমরাই ধরিজীর লবণ। তোমরাই যদি লবণত্ব হারাও তবে তোমাদের লবণাক্ত করবে কে ? বাপু এবার বাঁলেও নতুন কোনো আন্দোলনে নেতৃত্ব করবেন না, যদি না জনগণকে তোমরা অসত্য ও হিংসার চোরাগলি থেকে সত্য ও অহিংসার রাজপথে ফিরে আসতে শেখাও।” এই বলে সোনাদি চলে যান।

সৌম্য জবাবদিহি করার সুযোগ পায় না। সোনাদির সঙ্গে তার আলাপ বছর বারো তেরো আগে লবণ সত্যাগ্রহ উপলক্ষে। পরে তিনি সেবাগ্রামে গিয়ে গান্ধীজীর সহকর্মীদের একজনকে বিয়ে করেন। দক্ষিণ ভারতীয়। সেবাগ্রামে গেলে সৌম্য তাঁদের কুটিরে অতিথি হয়।

কেশবন স্মরসিক পুরুষ। বলতেন, “বাপু আমাকে দারিদ্র্য দূরীকরণের উপায় বার করার ভার দিয়েছেন। আমি যখন বলি, বাপু, পপুলেশন না কমালে পড়াটি কমবে না তিনি বলেন, পপুলেশন কমালে ম্যান পাওয়ার কমে যাবে, ম্যান পাওয়ার কমে গেলে প্রোডাকশন পড়ে যাবে। আমি যখন অঙ্ক কবে দেখিয়ে দিই যে যত লোক খায় তত লোক কাজ করে না, এত জমিই



নেই, জমির অল্পপাতে লোকসংখ্যা বাড়তি তিনি তৎক্ষণাৎ উত্তর দেন, 'ব্রহ্মচর্য'। হা হা হা হা!"

কেশবন্ ও বাপুকে দর্শন করতে পুণা এসেছিলেন। তাঁর আস্তানায় গিয়ে সৌম্য বেশ বদল করে। কিন্তু ধুতী পায় না। দক্ষিণী লুঙ্গী পরে।

"আমার তো মনে হয় বাপু এ যাত্রা বেঁচে যাবেন।" কেশবন্ বলেন। "তবু আরো দু'একদিন দেখে যাওয়াই ভালো। সোল ফোর্স। সোল ফোর্স ছাড়া এর আর কোনো ব্যাখ্যা নেই; সোল ফোর্স ই তাঁকে এতদূর নিয়ে এসেছে। এত বড়ো দেশকেও। কিন্তু ক্রমেই ধরা পড়ে যাচ্ছে এর লিমিটেশন। সারা দেশে ওই একজনমাত্র সত্যাগ্রহী। আগেকার দিনে বলতে পারা যেত 'ওয়ান সত্যাগ্রহী ইজ ইনাক।' এখন কিন্তু ও কথা বলা যায় না। আমরা পরিষ্কার দেখতে পাচ্ছি ওয়ান সত্যাগ্রহী ইজ নট ইনাক। জেলে যেতে রাজী হলেই সত্যাগ্রহী হওয়া যায় না। জেল তো আজকাল মামাবাড়ী। সেখানে কিসের অভাব? হা হা হা! শুধু শয্যাসজিনীর। সেদিক থেকে বিচার করলে ব্রহ্মচর্য একান্ত আবশ্যক। কিন্তু যুদ্ধ কিংবা বিপ্লব কিংবা বিদ্রোহের দিনে অন্তত শত খানেক সত্যাগ্রহী থাকা চাই যারা গান্ধীজীর মতো শহীদ হতে প্রস্তুত। শতখানেক তো দূরের কথা দশজনও আছেন কিনা সন্দেহ। যারা বার বার জেলে যেতে রাজী তাঁরা একবারও গুলী খেতে বা ফাঁসী যেতে রাজী নন। সাধারণ লোক সম্ভ্রাসবাদীদেরই বাঁর বলে পূজা করে। আর এঁদের করে ন্যাগী বলে শ্রদ্ধা। সম্ভ্রাসবাদীদেরও আর মেজলুস নেই। তাঁদেরও ভরসা সিপাহীদের উপরে। সিপাহীরা স্বার্থত্যাগীও নয়, দেশপ্রেমিকও নয়। যার নিমক খায় তার ভুলে লড়ে। জর্জ ওয়াশিংটনের বা গারিবাল্ডির ফোজ এদেশে নেই। ডি'ভালেরার ফোজই বা কোথায়? হুশুন্ডল সৈন্য যেখানে নেই সেখানে উচ্ছৃঙ্খল জনতা তার শূন্যতা পূরণ করতে পারে না।"

সৌম্য প্রতিবাদ করে না। নীববে শুনে যায়। তার মনের ভিতর একটা মন্বন চলেছে। সে কি সত্যি ভুল করেছে?

কেশবন্ বলে যান, "ভগবান'না করুন, মহাত্মাজী যদি চলে যান তবে তাঁর সঙ্গে রাজনীতিক্রমে থেকে সত্য আর অহিংসাও চলে যাবে। নেতার অভাব হবে না, নীতির অভাব হবে। মরাল লীডারশিপই গান্ধীবাদীদের বৈশিষ্ট্য। সদলবলে জেলযাত্রা নয়। এইবারই শেষবার। পরে আর এর পুনরাবৃত্তি

জমবে না। জেলবাজ সত্যগ্রহী নয়, জানবাজ সত্যগ্রহীই চাই। কিন্তু কোথায় তাঁরা? তোমাদের এখন কঠোর আত্মপরীক্ষার সময়। আন্দোলন তো আপনা থেকেই থেমে এসেছে। তোমরা ক'জনা মিলে তো জগন্নাথের রথকে চালিয়ে নিয়ে যেতে পারবে না। যদি রথের রশি টানবার জন্যে লক্ষ লক্ষ উৎসাহী ভক্ত না থাকে। তুমি ফিরে গিয়ে কী করবে, জানিনে। সেবা-গ্রামে বাস করতে চাও তো আমাদের ওখানে স্বাগত।”

সৌম্য তাঁকে ধন্যবাদ দিয়ে বলে, “আপনাকে জানাতে বাধ্য হচ্ছি যে আমার মাথার দাম এখন পাঁচ হাজার টাকা। ছদ্মবেশ পরে এতদিন পুলিশের চোখে ধুলো দিয়েছি। নিজ বেশ ধারণ করলে যেখানেই হোক ধরা পড়বই। সোনাদি বলেছেন লালবাজারে গিয়ে ধরা দিতে। সেই কথাই ভাবছি। স্বীপাস্তুর তো নিশ্চয়ই, ফাঁসীও অসম্ভব নয়।”

“কী সর্বনাশ! খুন করেছ নাকি?” তিনি আঁতকে ওঠেন।

“না, খুন করিওনি, করাইওনি। কিন্তু রাজার বিরুদ্ধে যুদ্ধ তো প্রাণদণ্ডের যোগ্য অপরাধ। সেটা যে আমি করেছি তা কি অস্বীকার করতে পারি? আমি যা করেছি তা অহিংস না হতে পারে, কিন্তু অসত্য নয়। এক হাতে ইংরেজদের, আরেক হাতে জাপানীদের ঠেকিয়ে রাখার জন্যেই রেল লাইন ওপড়ানোর, ব্রিজ কালভার্ট ওড়ানোর, টেলিগ্রাফের তার কাটার হুকুম দিয়েছি। দেশ যে যুদ্ধক্ষেত্রে পরিণত হয়নি এটা তো সত্য। উপায়টা অবগত অন্তত। ভুল যদি বলেন তো ভুল। আমি দুঃখিত।” সৌম্য শান্তভাবে জানায়।

“কী সর্বনাশ!” অধ্যাপক আঁতকে ওঠেন। “লালবাজারে গিয়ে পুলিশের কাছে তুমি এইসব কবুল করবে নাকি? তা হলেই হয়েছে। তোমাকে ওরা অ্যাথ্রভার করে বাঁচিয়ে দেবে, কিন্তু তোমার সহকর্মীদের ফাঁসীকাঠে ঝোলাবে। তোমার সোনাদি কি চান যে তোমার সহকর্মীরা বুলুক? তুমি আমার পরামর্শ শোন। শহীদ হয়ে তোমার কাজ নেই। তুমি আপাতত বাংলাদেশে ফিরে যেয়ো না। আমরা তোমাকে দক্ষিণে পাঠিয়ে দিব। আমাদের কোনো একটি আশ্রমে গা ঢাকা দিয়ে গঠনের কাজ করবে। তোমার একটা দক্ষিণী নামকরণ হবে। লালবাজারে তুমি যেতে চাও তো বছর তিনেক পরে যেয়ো। ততদিনে যুদ্ধ শেষ হয়ে থাকবে। কংগ্রেসের সঙ্গে মিটমাট করতে ইংরেজদের দিক থেকে আগ্রহ দেখা দেবে। যদি ওরা যুদ্ধে জেতে। আমার কী মনে হয়, জানো? যুদ্ধে ওরা জিতবেই। রাশিয়া ওদের সাথী। আমেরিকা

ওদের আত্মীয়। গায়ের জোরেও জার্মানী, ইটালী আর জাপান ওই তিন ঐতিপক্ষের চেয়ে জোরদার নয়! ন্যায়ের জোরে তো নয়ট। যুদ্ধজয়ের লক্ষণও কি স্পষ্ট নয়? স্টালিনগ্রাডে কে জিতেছে? রাশিয়া না জার্মানী? ফলে ইংরেজদের মনের জোরও বেড়ে গেছে। ওরা এবার জার্মানীর উপর কাঁপিয়ে পড়বে। আর বার্মার উপরেও। জাপানীরা হটে যাবেই। হেরে যেতেও পারে। তখন কথা উঠবে তোমরা জাপানের সাহায্য নিতে চেয়েছিলে। ব্রিটেনকে বিব্রত করতে চেয়েছিলে। চাপ দিয়ে স্বাধীনতা পেতে চেয়েছিলে। তুমি তো হিংসাত্মক কাঞ্চকলাপও করেছ—”

“হিংসাত্মক নয়, কেশবন্দা। ধ্বংসাত্মক।” সৌম্য শুধরে দেয়।

“হো হো!” কেশবন্ হেসে বলেন, “সেটা তিন বছর পরে আদালতে গিয়ে বোলো। লালবাজারে গিয়ে নয়। লালবাজারে যদি যাও তবে শুধু এইটুকুই বলবে যে, আমি স্বেচ্ছায় ধরা দিচ্ছি। আমার যা বক্তব্য তা আমি আদালতে পেশ করব। খবরদার, সৌম্য, যুদ্ধকালে ওসব কবুল কোরো না। তোমাকে ওরা যদি মিলিটারি ট্রাইবিউনালে পাঠায় তো আদালতের এক্সার থাকবে না। আদালতের রায় মোটের উপর নির্ভরযোগ্য। তোমার প্রাণদণ্ড নাও হতে পারে। না, না, তোমাকে আমরা শহীদ দেখতে চাইনে।”

সন্ধ্যাবেলার প্রার্থনার পর সোনাদি আগা খান প্রাসাদ থেকে ফেরেন। রাতে ঠেকে সেখানে থাকতে দেবে না। জেল কোড তো রদ হয়নি। তা ছাড়া কস্তুরবাকে সাহায্য করতে মারা বেহন তো রয়েছেন।

“ভনেছ সৌম্যর কাণ্ড।” কেশবন্ বলেন, “ওসব কাণ্ড হয়তো অবস্থা অহুসারে ব্যবস্থা, ইতিহাসে নজীর আছে। নেপালিয়নের আক্রমণের মুখে মন্ডোর নাগরিকরা নিজেদের শহরে নিজরাই আগুন ধরিয়ে দিয়েছিল। তা বলে ওসব ব্যাপার কি গান্ধাজীর অহিংস নীতিসম্মত? সৌম্য যদি গান্ধীবাদী না হতো তবে ওর দিক থেকে ও ঠিক কাজই করেছে। গান্ধীবাদী হয়ে ওসব কাজ করা চলে না। কয়েই থাকে যদি তো কবুল করে সবাক্ষে ফাঁসীতে ঝুলতে এত তাড়া কিসের? শহীদ হওয়া কি এতই জরুরি? বছর তিনেক সবুর করলে এমন কী কতি? অবশ্য মিলিটারি ট্রাইবিউনালের সরাসরি বিচারের হাত থেকে তো বাঁচুক। পরে আদালতের বিচারে যা হয় হবে। তোমার ডাইকে তুমি লালবাজারে গিয়ে ধরা দিতে বলেছ। আমি বলেছি দক্ষিণে গিয়ে গা ঢাকা দিয়ে গঠনের কাজ করতে। আচ্ছা, স্বন্দরম নামটা কেমন?”

সোনাদি ভেবে চিন্তে বলেন, “স্বন্দর নাম নিয়ে অস্বন্দর কাজ করা কি ভালো? গা ঢাকা দেওয়াটা অস্বন্দর কাজ। লালবাজারে গিয়ে ধরা দিক তো আগে। তার পরিণাম কী তা দেখা যাবে পরে। বিলেতে আমাদেরও বন্ধুজন আছেন। তুমি চিঠি লিখবে হরেন্স আলেকজান্ডারকে। আমি লিখব ম্যুরিয়েল লেস্টারকে। সোম্যাকে যদি চিঠি লিখতে দেয় সেও লিখবে তার প্যাসিফিস্ট বন্ধুদের। আচ্ছা, সোম্য, পাল আমেটে তোমার চেনাশোনা কেউ আছেন?”

“আমার নেই, আমার বন্ধু স্বকুমার দত্তবিশ্বাসের আছেন।” সোম্য উত্তর দেয়। “কিন্তু কাউকেই আমি চিঠি লিখব না, সোনাদি। আমার কৃতকর্মের ফল আমি ভোগ করতে চাই। ফাঁসী হয় তো ফাঁসী, স্বীপাস্তর হয় তো স্বীপাস্তর, কারাদণ্ড হয় তো কারাদণ্ড। দেশের স্বাধীনতা সেই পরিমাণেই মূল্যবান যে পবিমাণে কষ্টাজিত। স্কলভে যা পাওয়া যায় তা আসল মুক্তা নয়, নকল মুক্তা। সেটা তো আমরা প্রত্যাখ্যান করেছি। তারপরে আবার দত্তবিশ্বাসের মারফৎ সার স্টারফোর্ড ক্রিপসের কাছে দরবার। কিসের জন্তে? না আমার প্রাণরক্ষার জন্তে। দেশের জন্তে লড়ব, অথচ বিদেশের কাছে কপা চাইব। আমার ধারা ও কাজ হবে না, দিদি। তবে এটাও ঠিক নয় যে আমি পুলিশের কাছে ধরা দিতে গিয়ে আমার সহকর্মীদেরও ধরিয়ে দেব। যদি ওদের নামধাম আমি ফাঁস করি তো ওদের ফাঁসীর জন্তে আমিই দায়ী হব। কিন্তু মায়েব চোটে ফাঁস করে ফেলা অসম্ভব নয়। টরচার লজ্জা করার মতো তপোবল এখনো আমার উপজায়নি। যদিও ব্রহ্মচর্যের ক্রটি নেই। বাপুকে জিজ্ঞাসা করতে ইচ্ছে করে, এই অবস্থায় আমার কর্তব্য কী? কিন্তু তাঁর বর্তমান অবস্থায় তাঁকে শান্তিতে বাঁচতে বা শান্তিতে মরতে দেওয়াই প্রেয়।”

“না, বাপুকে বিরক্ত করা চলবে না। তাঁকে বাঁচতে দিতে হবে। তোমার মনে বিশ্বাস থাকে তো লালবাজারে যেয়ো না। তার আগে তোমার সহকর্মীদের অভিযত জানতে চেষ্টা করো।” সোনাদি বলেন।

মহাত্মার মহাপ্রয়াণের আশঙ্কায় নানা দিগ্দেশ থেকে দর্শন করতে শত শত যাত্রী এসেছেন। বন্দিশালার দ্বার মুক্ত করে দেওয়া হয়েছে, কিন্তু বন্দীকে মুক্তি দেওয়া হয়নি। তাঁর কানে কুলুপ, মুখে কুলুপ। চারদিকে গুপ্তচর গিজগিজ করছে। সোম্য বুঝতে পারে ও দর্শন করেছেই দ্বন্দ্ব থাকে। প্রতিদিনই একবার করে আগা খান প্রাসাদে যায়, খোঁজ নেয় তিনি কেমন

আছেন। তাঁর অনশনভঙ্গের সময় সেও উপস্থিত থাকে। সেও জয়ধ্বনি দেয়। চন্দ্রের রাহুমুক্তির পর বিশ্বাসী হিন্দুদের মতো।

ইতিমধ্যেই সে মনঃস্থির করেছিল যে নিজের আশ্রমেই ফিরে গিয়ে নিয়মিত গঠনকর্ম শুরু করে দেবে। ছেড়ে দেবে যুদ্ধবিরোধী ক্রিয়াকলাপ। তা সত্ত্বেও যদি তাকে ধরতে আসে সে সানন্দে ধবা দেবে। কিন্তু এমন কিছু বলবে না যাতে আব কেউ বিপন্ন হয়। টরচার করলে সঙ্গে সঙ্গে নির্জলা একাদশী। সেটা সে প্রত্যেক মাসেই দু'দিন পালন করে থাকে। এবার না হয় পুণিমা অমাবস্তা অবধি জের টানবে। তবে পুরোপুরি নির্জলা নয়। গান্ধাজীর অনশনের সময় কিন্তু সে একদিনও অনশন করেনি। ওটা হাতে রেখেছে।

সোনাদিকে বলে, “ওখানে আমাকে কে না চেনে? কী পুলিশ, কী ম্যাজিস্ট্রেট, কী জজ, কী পাবলিক প্রোসিকিউটর। সরকারী বেসরকারী ডাক্তারঘাও আমার চেনা। আমাকে ডাক দিচ্ছে আমার নিজের আশ্রম। ধরতে এলে সেইখানেই ধরা দেব। সহকর্মীদের ধরিয়ে দেব না। কিন্তু চার তো ওরাও ধরা দেবে। এবার হবে আমাদের ত্যাগশক্তির অগ্নিপরীক্ষা।”

জুলির সঙ্গে পথে দেখা করে যায়। কলকাতায়। আন্দোলনে ভাঁটা পড়তে দেখে সেও ভাবছে মাটির তলা থেকে উপরে উঠবে। ধরা পড়ে তো পড়বে। ওর মনে দুঃখ কেবল এই যে বাবলীটা জিতে গেল। স্টালিনগ্রাডে রাশিয়ার জিং মানে কলকাতায় বাবলীদের জিং। রেডিওতে নাকি সুভাষচন্দ্রের কণ্ঠস্বর শোনা গেছে। তিনি ফিরবেন। কিন্তু কবে ফিরবেন, কোন্ পথে ফিরবেন, জলপথে না স্থলপথে না আকাশপথে, কেউ তা জানে না। জুলি মনঃস্থির করতে পারছে না। এই ইঙ্গদ্বীপের পঙ্গপালগুলো যেন চিরস্থায়ী বন্দোবস্ত করেছে। ডেকে নিয়ে এসেছে মার্কিনী সাক্ষোপাঙ্গদের। এদের দাপট দিন দিন বেড়ে যাচ্ছে। গান্ধী তো বার্থ। নেহরু তো অপদার্থ। কংগ্রেস তো আপসের ধ্যানে মগ্ন। জুলিরা একা কী করতে পারে?

“তুমি তা হলে ফাঁসী বা স্বীপাস্ত্রের খুঁকি নিতে যাচ্ছ?” জুলির গলা কাঁপে।

“সেও ভালো, কিন্তু এই ছদ্মবেশে ও ছদ্মনামে গা ঢাকা দিয়ে ঘুরে বেড়ানো ভালো নয়। যখন হাতে বিশেষ কোনো কাজ নেই। আমাদের আন্দোলন, তো তার গতিবেগ হারিয়ে ফেলেছে। মহাত্মার অনশনও গতিবেগ সঞ্চার করতে পারেনি। লোকের মনে কেমন একটা হতাশ ভাব। বেন কিছুতেই

কিছু হবার নয়। ইংরেজরা হেরে না গেলে ভারত ছাড়বে না। তাদের হারাবে কে ? ভারতীয়রা তো নয়ই।” সোম্য উত্তর দেয়।

সব চেয়ে খারাপটা ধরে নিয়েই সে স্বস্থানে ফিরে যায়। সেখানে দেখে তার আশ্রম সরকারের দফত্রে। তার খাদিভাণ্ডারও শীলবদ্ধ। কর্মীরা কে কোথায় ছিটকে পড়েছে। কাকে নিয়ে সে কী কাজ করবে ? কোথায়ই বা উঠবে ? পুরনো বন্ধুবান্ধবদের সঙ্গে সাক্ষাৎ করতে যায়।

ক্যাপটেন মুস্তাফী তাকে বৃকে জড়িয়ে ধরেন। “যতদিন খুশি আমার এখানে থাকতে পারো। তুমি নিজের থেকে ধরা না দিলে কেউ তোমাকে ধরতে আসবে না। ইউরোপীয়ান অফিসার একজনও নেই। সব উধাও। এখন সবাই তোমার স্বদেশী। হয় হিন্দু, নয় মুসলমান। তুমি দেখবে পুলিশের লোকই এসে তোমাকে বলে যাবে ওরা তোমাকে ধরতে চায় না। তুমি যদি নতুন কিছু না কর তবে তুমি যতদিন খুশি আমার এখানে থাকতে পারো। তুমি ধরা দিলেও ওরা বাট করে তোমার বিরুদ্ধে চার্জশীট দেবে না। এক বছর ধরে তদন্ত চালাবে। চার্জশীট দিলেও গুরুতর অভিযোগ আনবে না। তোমার ফাঁসী বা স্বীপান্তর ওরা চায় না। তুমি তো দেশকে মুক্ত করতেই যা কিছু করেছে। দেশের মুক্তি ওদেরও অন্তরের কামনা। পরের গোলামী অসহ্য হয়েছে। সবাই তোমার পক্ষে। তবে তলে তলে হিন্দু মুসলমানের পরস্পরবিষেব চায়ের কেটলীর মতো ফুঁসছে। কখন যে ঢাকনা খুলে বেরিয়ে আসবে কে জানে।”

মুস্তাফী কি জানতেন না যে সোম্য একজন ঘোষিত অপরাধী, যার মাথার দাম পাঁচ হাজার টাকা ? তাকে আশ্রয় দেওয়াটাও একটা অপরাধ। এর জন্যে তার আশ্রয়দাতারও হাতে হাতকড়া পড়তে পারে। সে সবিনয়ে বলে, “আপনি যে নির্ভীক তা আমি ভালো করেই জানি। কিন্তু আমার সমস্যাটা আশ্রয়দাতার নয়। আশ্রয়দাতার। আশ্রয় যদি বাজেয়াপ্ত থাকে, ভাণ্ডার যদি বন্ধ থাকে, তবে আমার মুক্ত থাকারটা নিরর্থক। ছুভিক্ষের পদধ্বনি শুনে পাচ্ছি, কিন্তু কাউকে একমুঠো চালও জোগাতে পারছি নে, এমন মুক্তি কি একটা আশীর্বাদ, না একটা অভিশাপ ? আমার মুক্তি জেলখানায়, আমার মুক্তি স্বীপান্তরে, আমার মুক্তি ফাঁসীকাঠে। আপনার পেন্সেন্টদের মধ্যে এমন গরিব কি কেউ নেই, যার জীবন নির্ভর করছে পাঁচহাজার টাকা দামের স্বপ্নপাতির উপর ? তাকে আমার কাছে পাঠিয়ে দিন। সে আমাকে ধরিয়ে দিক।”

মৃত্যুকী ‘তোবা’ ‘তোবা’ করে ওঠেন। “বলো কী হে, সৌম্য ? আমার পেসেন্ট কি জুড়াস যে ত্রিশটা রোপ্যমুদ্রার জন্তে যীশুকে ধরিয়ে দেবে ? না, বাবা, তেমন অপকর্ম কেউ করবে না। আমিই বা তার নিমিত্ত হতে যাই কেন ? আমার কি পাঁচহাজার টাকা খয়রাত করার সামর্থ্য নেই ? যাও, যাও, তুমি যেখানে খুশি যাও। মনে রেখো, গরিব হলেই কেউ অমারু হইয় না। তোমারই এটা জানা উচিত, কারণ তুমি গান্ধীবাদী। আর গান্ধী তো গরিবের বন্ধু।”

সৌম্য মাফ চায়। “কথাটা আমি না ভেবে চিন্তে বলেছি। আমার বলার উদ্দেশ্য টাকাটা যেন কোনো একজনের জীবনদায়ী হয়। অহিংসাবাদীর ধর্মই হচ্ছে মারুকে প্রাণ দেওয়া, তার প্রাণ নেওয়া নয়। দুর্ভিক্ষের দিন ও টাকা জ্ঞানকার্ণেও লাগতে পারে, যদি রামকৃষ্ণ মিশনে দেওয়া হয়। তেমন প্রস্তাব কি নতুন পুলিশ সাহেব শুনবেন ? জাফর হোসেন তো নেই।”

“দূর, পাগল ! রামকৃষ্ণ মিশন কি তোমাকে ধরিয়ে দিচ্ছে যে রামকৃষ্ণ মিশন ও টাকা পাবে ? ওটা কোনো কাজের কথা নয়। পুলিশ সাহেব গোলাম নবী আমার পেসেন্ট। যাচ্ছি ওঁর চিকিৎসাস্থলে। তোমার সমস্তাটার কথা খুলে বলব। দেখা যাক তিনি কী করতে পারেন।” মৃত্যুকী আশ্বাস দেন।

পুলিশ সাহেব ইতিমধ্যেই খবর পেয়েছিলেন যে সৌম্য চৌধুরী ক্যাপটেন মৃত্যুকীর আশ্রয়ে। তিনি চুপি চুপি বলেন, “আপনি কি জানেন না যে এখানে কেন্দ্রীয় সরকারের ইনটেলিজেন্স অফিসার আছেন ? তিনি সরাসরি দিল্লীতে খবর পাঠান। সৌম্যবাবুর খবর কি এতক্ষণে দিল্লীতে পৌঁছয়নি ? কেস্টা যদি মিলিটারির নজরে পড়ে তবে ওদের হাতেই তাঁর জীবনমরণ। ও ব্যাটারা সবাই গোরা। কংগ্রেস যে যুদ্ধকালে যুদ্ধ দফতর চেয়েছিল সেটা অব্থা নয়। তবে কেস্টা শুরু করতে ওদের সম্মত লাগবে। তার আগেই যদি সৌম্যবাবু ম্যাজিস্ট্রেট সাহেবের কাছে আত্মসমর্পণ করেন ও সাহেব তাঁর কেস্টাকে নিজের কোর্টে রাখেন তা হলে মিলিটারি হস্তক্ষেপ করতে পারবে না। তার আগেই বিচারপর্ব লমাপ্ত হয়ে যাবে। সাজা অবশ্য হবেই, কিন্তু সেটা দারুণ কিছু নয়। তার পরে সরকার হয়তো হাইকোর্টে আপীল করবেন, কিন্তু হাইকোর্ট আরো বেশী উদারতার সঙ্গে বিবেচনা করবেন। ততদিনে যুদ্ধও থতম হইয় থাকবে।”

নতুন ম্যাজিস্ট্রেট ছিলেন মীরচন্দ্রানী। সিদ্ধী। মৃত্যুকী সৌম্যকে নিয়ে

হাজির করে দেন তাঁর আপিসঘরে। পরিচয় দেন, বৃত্তান্ত বলেন। সৌম্য একটা লিখিত বিবৃতি পেশ করে। সাহেব বলেন, “আচ্ছা, চৌধুরীজী, আপনি ইচ্ছে করলে আরো দু’তিন বছর আত্মগোপন করতে পারতেন। ভারত দেশটা তো ছোট নয়। কে আপনাকে ধরতে বাচ্ছিল? কাগজে তো কোটোও ছাপা হয়নি। যুদ্ধ শেষ হয়ে গেলে কেউ এ নিয়ে মাথা ঘামাত না। আপনি বলছেন আপনার মনে গভীর অহুতাপ জন্মেছে। আপনি ভেবেছিলেন ধ্বংসাত্মক কাজ হিংসাত্মক কাজ নয়। এখন বুঝতে পেরেছেন যে ধ্বংসাত্মক কাজও হিংসাত্মক কাজ। হোয়াট ননসেন্স। আবে মশায়, করেছেন তো করেছেন। তাতে হয়েছেটা কী? ওসব ব্রিজ কালভার্ট এর মধ্যেই সারানো হয়েছে। টেলিগ্রাফের তারও জোড়া লেগেছে। আপনি যদি জাপানী এক্সেট হতেন তা হলে নিশ্চয়ই মিলিটারি ট্রাইবিউনালের পাল্লায় পড়তেন। তখন কোনো রিপোর্ট আপনার বিরুদ্ধে নেই। রেকর্ড তো আপনার বরাবর ভালোই। এটা আপনার বুদ্ধিভ্রম। আপনার সাজা হবে বইকি। কোন্ ধারায় সাজা, কী রকম সাজা, এসব আমি পাবলিক প্রোসিকিউটরের সঙ্গে পরামর্শ করে স্থির করব। আপাতত আপনাকে জেলখানায় বিচারাধীন বন্দীহিসাবে থাকতে হবে। প্রথম শ্রেণীতেই স্থান পাবেন। তারিখ পড়ছে দুই সপ্তাহ পরে।”

সৌম্য কী বলে ধনুবাদ দেবে ভেবে পায় না। শুধু বলে, “চরম দণ্ডের জন্তেও আমি প্রস্তুত। বার্মায় যেমনটি ঘটেছে বাংলায়ও তেমনটি ঘটত, ইংরেজরা আমাদের জাপানীদের হাতে সঁপে দিয়ে যেত, তা কি কখনো সম্ভব করা যায়, সার? অসামরিক জাতি বলে আমাদের অপবাদ আছে। সে অপবাদ আমি খণ্ডাতে চেয়েছি। তবু তো কারো প্রাণ নিইনি। নিলে এমন কী অত্যাচার হতো? যদি সেটা দেশরক্ষার জন্তে হতো। আমাদের দেশরক্ষা আমাদেরই দায়। সাত সমুদ্র তেবো নদীর ওপার থেকে আসা ইংরেজের নয়। পেরেছে কি ওরা বার্মা রক্ষা করতে? পারত কি ওরা পূব বাংলা রক্ষা করতে, আসাম রক্ষা করতে? ছিল তো ওরা পালাবার তালে। পালাত আর পোড়ামাটি করত। আমাদের নৌকা ডোবাত, ধানচাল পোড়াত, বন্দর ভাঙত, রেল লাইন ওড়াত, ব্রিজ কালভার্ট ধ্বংস করত। ওরা করলে এসব হতো মিলিটারি নেসেসিটি! আমরা করলে লাবোটাশ! যাক্. জাপান আসছে না। আনন্দের কথা। কিন্তু ইতিহাস যখন লেখা হবে তখন কোনো কোনো ঐতিহাসিক আমাদের সাধুবাদ দেবেন। লিখবেন জাপানীরা যে এল না তার কারণ ভার।



বুঝতে পেরেছিল যে আমরা তাদের হাতের পুতুল না হয়ে পায়ের কুড়ুল হতুম। ইংরেজের শ্রুততা পূরণ করতুম আমরাই। জাপানীরা নয়। এখন ইংরেজরা বাহবা নিচ্ছে নিক। আমরা বাহবার জন্তে দেশের সম্পত্তি ধ্বংস করিনি, আমাদের ওটা অ্যাডভেঞ্চারও নয়। বুদ্ধিভ্রম কেন বলছেন, সার ? আমরা কি কম বুদ্ধি এঁটেছি ? আমাদেরও একটা ইন্টেলিজেন্স বিভাগ ছিল। কিন্তু থাক ওসব কথা। আমি কারো নাম ফাঁস করব না বলে প্রতিজ্ঞাবদ্ধ। আমাদের হাতে ক্ষমতা যেদিন আসবে—যদি কখনো আসে—তা হলে ওঁদের সোনার পদক দিতে বলব। তবে এটাও আমি হৃদয়ঙ্গম করেছি যে আমরা যেটা অহুসরণ করেছি সেটা গাঙ্গাপন্থা নয়। বাপুর্ নামে কলঙ্ক রটেছে বলে আমি নিরতিশয় দুঃখিত। তাঁর অনশনের জন্তে আমিও দায়ী। আমাকে প্রায়শ্চিত্ত করতেই হবে। একভাবে না একভাবে। আপনি আমাকে ছেড়ে দিলেও আমি নিজেকে ছাড়ব না। ক্রমফাল্‌ড সাহেবকে গাঙ্গাজী যা বলেছিলেন আপনাওও আমি তাই বলছি। দিন আমাকে আপনার ক্ষমতায় যেটা কঠোরতম শাস্তি। কিন্তু আমার সাথীদের যেন রেহাই দেন।”

মীরচন্দ্রানী শুনে অভিভূত হন। বলেন, আপনার কর্তব্য আপনি করেছেন। আমার কর্তব্য আমি করব।” এর পর মুস্তাফীর দিকে ফিরে বলেন, “এবার আপনার পালা। ওই পাঁচহাজার টাকা পুরস্কারটা আপনারই পাওনা, ক্যাপটেন মুস্তাফী।”

“আরে, না, না। আমি ও টাকা স্পর্শ করতে পারিনে। লোকে বলবে অত বড়ো দেশপ্রেমিককে ধরিয়ে দিয়েছি আমি, দেশদ্রোহী অর্থপিষাচ। না, না, ও টাকা হারাম। ও টাকা আপনারা দুর্ভিক্ষপীড়িতদের ত্রাণ তহবিলে দিন। যারা খেতে পাচ্ছে না তারা খেতে পাবে।” মুস্তাফী মিনতি করেন।

“দুর্ভিক্ষ ! কোথায় দুর্ভিক্ষ ! ওটা সরকারের বিরুদ্ধে অপপ্রচার। চাল কম পড়েছে। আমরা চাল আনিয়ে নিয়ে বাজারে ডাম্প করব। বাজার ভালিয়ে দেব। খেতে না পেয়ে একটিও মানুষ মরবে না।” মীরচন্দ্রানী দুর্ভিক্ষের পদধ্বনি শুনে পান না।

যথাকালে সৌম্যর তিন বছর সশ্রম কারাদণ্ড হয়। প্রথম শ্রেণীতে ওর আপত্তি এত তীব্র যে ওটাকে দ্বিতীয় শ্রেণীতে পরিণত করা হয়। তাতেও ওর আপত্তি। কিন্তু ম্যাজিস্ট্রেট বলেন, “একজন বিলেতফের্তা বাঙালী ভদ্রলোককে তৃতীয় শ্রেণীভুক্ত করতে আমার হাত উঠবে না।”

খবরটা কলকাতার কাগজে বেরিয়ে যায়। জুলি তা পড়ে কঁদে ফেলে। তারপরে সামলে নিয়ে বলে, “ভারী তো তিন বছর! দেখতে দেখতে কেটে যাবে।”

একদিন ইলিসিয়াম রো থেকে এক বাঙালী পুলিশ অফিসার আসেন মিসেস সিন্‌হার সঙ্গে সাক্ষাৎ করতে। “আইচ আমার নাম। শুনে দুঃখিত হবেন যে আপনাদের মেয়ে মজু আমাদের ওখানে গিয়ে যেচ্ছায় সারেগার করেছে। আমরাও দুঃখিত। ওর হাতে বোমা নেই, রিভলভার নেই, কিন্তু যা আছে তা আরো মারাত্মক। কলম! ইংরেজ সৈনিকদের সম্বোধন করে ও লিখেছে, ‘তোমাদের মাতৃভূমি বিপন্ন, মাতৃজাতি বিপন্ন, এদেশে এসেছ তোমরা কী করতে? আমাদের মাতৃভূমিকে ও মাতৃজাতিকে বিপন্ন করতে? তোমরা এসেছ বলেই জাপানীরা আসছে, তোমাদের তাড়াতে। তার আগেই তোমরাও মরে পড়ো না কেন? কুইট ইণ্ডিয়া।’ আমেরিকান সৈনিকদের সম্বোধন করে লিখেছে, ‘ওয়াশিংটন ও লিংকনের বংশধর! লিবার্টি মূর্তির উপাসক! তোমরাও শেষকালে কনস্ক্রিপ্ট হলে! কোন্ মহান আদর্শ সাধন করতে? ভারতের মাটিতে জাপানীদের সঙ্গে লড়তে? ভেবেছ আমরা উলুখড়? দুই আঙুলের মাঝখানে পড়ে প্রাণ হারাতে? শাদা মানুষের সঙ্গে হলুদে মানুষের যুদ্ধে কালো মানুষের টান কার দিকে তা অনুমান করতে পারো। নিগ্রোদের সঙ্গে ব্যবহারটা যদি একটু ভালো করতে তা হলে না হয় আমাদের সহানুভূতি আশা করতে। তবে আমরা কেউ জাপানীদের অগ্রগতি চাইনে। তার আগেই তোমাদের পশ্চাদ্গতি চাই।’ ভারতীয় সৈনিকদের সম্বোধন করে লিখেছে, ‘তোমাদের দেশরক্ষার জন্তে তোমরাই তো যথেষ্ট। তোমাদের কেন পাঠানো হচ্ছে ইউরোপে, আফ্রিকায়, পশ্চিম এশিয়ায়? ইজ-মার্কিনদের কেন ডেকে আনা হচ্ছে তোমাদের জায়গায়? ওদের জন্তে কত গোমাংস আর কত নারীমাংস রোজ সরবরাহ করতে হচ্ছে, জানো? হয় চাকরি ছেড়ে দাও, নয় ওদের ওসব খোরাক বন্ধ করো। যে যার নিজের দেশ থেকে আনিয়ে নিক ওসব খোরাক।’ দেখুন, মিসেস সিন্‌হা, এ সমস্তই আমাদের প্রাণের কথা। ওকে আমরা প্রাণ ধরে মিলিটারি ট্রাইবিউনালের খপ্পরে ঠেলে দেব না। কিন্তু বেকসুর ছেড়ে দিই বা কী করে? বড়ো সাহেবকে বুঝিয়েছি যে ওর ভয়াপতি স্ট্যাণ্ডিং কাউন্সেল। তাঁর মানরক্ষা করতে হবে। হোম ইন্টার্ন করাই শ্রেয়। আপনি যদি ঠুকে রাজী করাতে পারেন তা হলে আমরাও মনস্তাপ থেকে বেঁচে যাই।”

জুলিয় সজে কথা বলে ওর মা মিস্টার রবার্টসনকে বলেন, “ওর ফিল্মসে সোম্য চৌধুরীর তিন বছর সশ্রম করা দণ্ড ও দ্বিতীয় শ্রেণীর কয়েদীদের মধ্যে স্থান হয়েছে। সমতা রক্ষার জন্তে ওকেও দিতে হবে তিন বছর সশ্রম কারাদণ্ড ও দ্বিতীয় শ্রেণীর কয়েদীদের মধ্যে স্থান। অবুঝ, একগুঁয়ে মেয়ে। আমার কষ্টোলের বাইরে। আমার মেজ্জা মাতার সঙ্গে পরামর্শ করে আপনারাই যা করবার করবেন। আমি তাতেই রাজী।”

তাই হলো। পর পর দু’দুটো খারাপ খবর পড়ে যুথিকার মন খারাপ বলে খারাপ। মানস তাকে সান্ত্বনা দিতে বলে, “যারা চড়া স্টেকে খেলতে যায় তারা চড়া স্টেকে জেতে বা চড়া স্টেকে হারে। আর একটু হলে ওরাই তো জিতত। প্রোভিজনাল গভর্নমেন্ট ঘোষণা করে দেশের একাংশের স্বাধীনতা ঘোষণা করত। হয়তো বেশীদিনের জন্তে নয়, তবু ইতিহাসের একটা পৃষ্ঠা লাল অঙ্করে ছাপা হতো। মহাত্মার একুশ দিনের অনশনও চড়া স্টেকের খেলা। শিরদার তো সরদার। মরতে মরতে বেঁচে গেলেন।”


গান্ধীজীর অনশন সারা হতে না হতে তাঁর দেশবাসীর অনশন শুরু হয়। মানস ও যুথিকার মন আরো খারাপ। ছুটি নিয়ে মানসসরোবর অভিমুখে যাত্রা করে মানস ও তার হংসবলাকা। থামে আলমোড়ায়। অত দূর থেকে শুনতে পায় না বাংলাদেশের রাজধানীর রাজপথে কারা সব কৈদে বলছে, “একটু ক্যান দাও, মা। একমুঠো ভাত দাও, বাবা।” বিপ্লবীরা কর্ণপাত করে না। বিপ্লবের লগ্ন বয়ে যায়।

॥ দ্বিতীয় পর্ব সমাপ্ত ॥

# ব্রাহ্মদর্শী

তৃতীয় পর্ব

স্বদেশীয় শ্রমের জন্য



ডি. এম. লাইব্রেরী / কলকাতা-৭০০০৬

প্রকাশক :

শ্রীঅমূল্যগোপাল মজুমদার

ডি. এম. লাইব্রেরী

৪২, বিধান সরণি

কলকাতা-৬

কপিরাইট : শ্রীমতী লীলা রায়

প্রচ্ছদপট : প্রণবেশ মাইতি

প্রথম প্রকাশ : আশ্বিন ১৩৬৬

মূল্য : ৩০ টাকা

মুদ্রাকর :

শ্রীশ্রামলকান্তি বন্দ্যোপাধ্যায়

কমা প্রিন্টার্স

৬৩এ/৩, হরিশোষ ষ্ট্রিট

কলকাতা-৬

শ୍ରী অরুণকুমାର দত্ত

কল্পকমলেশু



## ভূমিকা

আমাদের জাতীয় জীবনের সবচেয়ে লজ্জাকর অধ্যায় ১৯৪৬ সালের দাঙ্গাহাঙ্গামা। প্রথমে কলকাতায়, তারপরে নোয়াখালীতে, তারপরে বিহারে। পরের বছর এর জের চলে পাঞ্জাবে। সেইখানেই চরম সীমা।

সেই লজ্জাকর অধ্যায় বাদ দিলে আমার এই উপন্যাসের সত্যতাহানি হবে। আমি কিছুতেই বোঝাতে পারব না ভাবীকালের পাঠকদের কেন দেশভাগ প্রদেশভাগ হলো। অথচ এর বিশদ বিবরণ লিখতে গেলে আমার স্বাস্থ্যহানি হবে। এতই নির্ভর সে অধ্যায়। আটত্রিশ বছর পরেও আমরা প্রকৃতিস্থ হতে পেরেছি কি-না সন্দেহ।

বাংলার তৎকালীন গভর্নর তৎকালীন সেক্রেটারি অফ্‌ স্টেট ফর ইণ্ডিয়াকে কলকাতার দাঙ্গার যে বিবরণ দিয়েছিলেন তাতে তিনি লিখেছিলেন যে প্রথম মহাযুদ্ধের সময় *Somme*-এর যুদ্ধে তিনি যে বীভৎসতা দেখেছিলেন কলকাতার দাঙ্গার বীভৎসতা তারই সঙ্গে তুলনীয়। তাঁর চোখের সামনেই একটা লোক খুন হয়ে যায়। রাস্তায় রাস্তায় গলিত শব্দ। কেউ সংকার করছে না। যেথররাও ছোঁবে না। সৈনিকদের দিয়ে সংকার করাতে হয়। এমনি অনেক কথা।

গভর্নরের রিপোর্টের মতো আরো কয়েকজন বিশিষ্ট প্রত্যক্ষদর্শীর পত্রও প্রকাশিত হয়েছে। কয়েকটি বড়লাটকে লেখা। বড়লাট আসতে চেয়েছিলেন। গভর্নর তাঁকে বারণ করেন। সময় অল্পযোগী। বড়লাট বিচালিত হয়ে গান্ধীজীকে ও জবাহরলালজীকে অস্ত্ররোধ করেন মুসলিম লীগকে কিছু কনসেন্স দিতে। তা না হলে লীগপন্থীরা ইন্টারিম গভর্নমেন্টে যোগ দেবেন না। ইন্টারিম গভর্নমেন্ট অঙ্গহীন হবে। তেমন একটা গভর্নমেন্ট গঠন করা সম্ভব হতে না। নেতারা বলেন, তা হলে আমাদের আমন্ত্রণ করার প্রয়োজন কী ছিল? কনসেন্স আমরা যা দিয়েছি তার বেশী দেওয়া আমাদের সাধ্য নয়। দাঙ্গা বাধিয়ে কনসেন্স আদায় করা তো ব্র্যাকমেল।

গান্ধী ও নেহরু ব্রিটিশ প্রধানমন্ত্রী অ্যাটলীকে চিঠি লিখে আভিযোগ জানান। তখন অ্যাটলী ওয়েভেলকে নির্দেশ দেন যারা ইচ্ছুক তাঁদের নিয়ে ইন্টারিম গভর্নমেন্ট গঠন করতে। যারা অনিচ্ছুক তাঁরা আপাতত বাইরে



থাকুন। ওয়েভেল অনিচ্ছাসত্ত্বেও তাই করেন। লীগপন্থীরা বিনা কননেনসেনেই পরে যোগ দেন। কিন্তু একটা নতুন খেলা খেলেন। একজন তফশীলি হিন্দুকেও মুসলিম লীগের ভাগ থেকে একটা আসন দিয়ে কংগ্রেসের উপর টেকা দেন।

আমার উপস্থানের এই পর্বটিতে ১৯৪৬ সালের শেষপর্যন্ত কাহিনীর গতি এগিয়েছে। কিন্তু কেউ যেন না মনে করেন যে আমি উপস্থানের ছলে ইতিহাস লিখতে বসেছি। ইতিহাস আরো বেশী জায়গার দাবী রাখে। ব্রিটিশ সরকার তাঁদের ‘ট্রান্সফার অন্ড্ পাওয়ার’ নামক বারো খণ্ডে সমাপ্ত গ্রন্থে এই পর্বটিকে দুই খণ্ড দিয়েছেন। প্রত্যেকটির পৃষ্ঠাসংখ্যা বড়ো মাপের হাজারের মতো। বিষয়বস্তু অত্যন্ত গোপনীয়। পঞ্চাশ বছরের আগে প্রকাশ করতে মানা। তবে ভারতের ক্ষেত্রে ব্যতিক্রম করা হয়েছে। ত্রিশবছর পরে প্রকাশ শুরু হয়েছে। নেতারা কে কী বলেছেন, কে কী চেয়েছেন এসব তো আছেই, সরকারপক্ষে কে কী বলেছেন বা লিখেছেন তাও আছে।

এই দুই খণ্ডের দাম দেড় হাজার টাকার মতো। এর পরের চার খণ্ডের দাম পাঁচ হাজার টাকার মতো। আমার সামর্থ্য কী আমি এত হাজার টাকা খরচ করি? আমার বন্ধু বিশিষ্ট অ্যাডভোকেট শ্রীঅরুণকুমার দত্ত পুরো বারো খণ্ডের সেট কিনেছেন। তাঁরই সৌজন্মে আমি মাথাখানকার চার খণ্ড পড়ার সুযোগ পেয়েছি। এর পরে আরো দু’খণ্ড বাকী। কী করে তাঁকে আমি আমার অন্তরের কৃতজ্ঞতা জানাব? এই বইগুলি না পড়লে আমার চোখ ফুটত না। আমি একতরফা বিচার করতুম।

জিন্না সাহেবের দিক থেকেও যথেষ্ট বলবার আছে। লর্ড ওয়েভেলের দিক থেকেও। বিচার যিনি করবেন তাঁকে সব দিক বিবেচনা করতে হবে। সুহর্যাবদাঁও শয়তান ছিলেন না। আমাকে আমার অনেক ধারণা সংশোধন করতে হয়েছে। বাংলার লটি বারোজ সাহেবকে আমি ভুল বুঝেছিলুম। বড়লাট লর্ড ওয়েভেলকেও। বারোজ বাংলার পার্টিশন সমর্থন করেননি। ওয়েভেল বাংলার একাংশ হিন্দুদের দিয়ে যাবার কল্পনা করেছিলেন। সেটা তিনি করতেন আলাপ আলোচনা বার্থ্য হলে, অপসরণকালে। আশ্চর্যের ব্যাপার সর্দার বল্লভভাই মেটার প্রস্তাব করেছিলেন ১৯৪৬ সালেই। ওয়েভেল তখন রাজী হননি।

যেসব তথ্য ত্রিশ বছর আগে কেউ জানত না সেসব আমার উপস্থানের

পাত্রপাত্রীরা জানত কী করে ? আর সকলের মতো তারাও ভুল ধারণার দ্বারা চালিত হয়েছিল। ভুল ধারণা থেকে কত কী ঘটে ! ঔপন্যাসিক কী করে তাকে অঘটিত করবে ? যদুদ্যুত তল্লিখিতং। ঔপন্যাসিক তার যুগকে অতিক্রম করতে পারে না।

ওয়েভেল নিজেই জানতেন না ব্রিটিশ সরকার শেষ পর্যন্ত কী সিদ্ধান্ত নেবেন। আরো পনেরো বছর ভারত শাসন করবেন না আরো আঠারো মাসের মধ্যে শাসন গুটিয়ে নেবেন ? ইউরোপীয় অফিসারদের অধিকাংশই ধরমুখো। তাঁরা ক্ষতিপূরণ আশা করেন। পেলে ভালো, না পেলেও তাঁরা যাবেনই। বেসরকারী ইউরোপীয়রা ব্যবসাবাণিজ্য ফেলে চলে যেতে উদগ্রীব নন, কিন্তু তাঁদের পরিবারদের দেশে পাঠিয়ে দিচ্ছেন। সরকারও দিতে বলছেন। জিন্না যদি জেহাদ ঘোষণা করেন তা হলে শ্বেতাঙ্গরাও রক্ষা পাবেন না। আর জয়প্রকাশ নাসি শ্বেতাঙ্গবধের হুমকি দিয়ে রেখেছিলেন। বলা বাহুল্য শ্বেতাঙ্গরাও অপেক্ষাকৃত নিরাপদ স্থানে জড়ো হয়ে আত্মরক্ষা করতেন। তারপর বদলা নিতেন।

ইন্টারিম গভর্নমেন্ট মচল হলেও কনস্টিটুয়েন্ট অ্যাসেম্বলী অচল হয়েছিল। মাইনরিটি যদি যোগ না দেয় তবে মেজরিটি কি তার হয়ে সিদ্ধান্ত নিতে পারে ? এই প্রশ্নের উত্তরে অ্যাটলা জানিয়ে দেন যে মেজরিটির তৈরি শাসনতন্ত্র তাঁর সরকার অনিচ্ছুক অংশগুলির উপর চাপিয়ে দেবেন না। ফলে ভারত ভাগ হয়ে যাবে। আমরা ডিসেম্বর শেষ করি ভারতভাগের সম্ভাবনা নিয়, যদি মুসলিম লীগ কনস্টিটুয়েন্ট অ্যাসেম্বলীতে না যায়। তাকে কিছু কনসেনসন যদি দাও তা হলেই সে যাবে। কংগ্রেস তাতে নারাজ। এসব কথা পরের পর্বের জন্মে হাতে রাখছি। মেটাই শেষ পর্ব।

অলদাশঙ্কর রায়



କ୍ରାନ୍ତଦର୍ଶୀ  
( ତୃତୀୟ ପର୍ବ )



## ॥ এক ॥

প্যারিসের পতনের খবর শুনে স্বপনদা পুরো চব্বিশ ঘণ্টা কেঁদেছিলেন। তখন তাঁকে নিরস্ত করার জন্তে কেউ ছিলেন না। দীপিকাদির সঙ্গে বিয়ে হয়নি। পাঁচ বছর বাদে বালিনের পতনের সংবাদ পেয়ে তিনি সেই যে কঁাদতে শুরু করলেন চব্বিশ ঘণ্টা পরেও তার বিরাম নেই। বোদি তো জেরবার।

“তুমি যে একজন প্রচ্ছন্ন নাৎসী তা যদি আমি জানতুম তা হলে তোমাকে বিয়ে করতুম না। হিটলার মরেছে, তাতে তোমার কী? কামরূপেতে কাক মরেছে, কানীধামে হাহাকার!” বোদি ব্যঙ্গ করেন।

‘না, না, আমার এ শোক হিটলারের জন্তে নয়। জার্মান জাতির জন্তে। ওরা পরাজিত, পরাধীন, দ্বিধাবিভক্ত। বিসমার্কের ঐক্যসাধনা সমাপ্ত করতে এসে হিটলার সেটাকে ধ্বংস করে গেলেন। বুদ্ধিমান হলে তিনি জানতেন কোথায় থামতে হয়। থামা উচিত ছিল মিউনিক চুক্তির পর। চেকোস্লোভাকিয়ার জার্মানভাষী অঞ্চলটা গ্রাস করে দাঁড়ি টানা উচিত ছিল। ইতিমধ্যে অস্ট্রিয়া গ্রাস করা হয়ে গেছে। তা হলে জার্মান জাতির ঐক্য সাধনার আর কী বাকী থাকতে পারে! তা নয়। মাথায় ঘুরছিল সাতশো বছরের স্বপ্নসাধ। ‘ড্রাঙ্ক নাথ অস্টেন।’ পূর্ব মুখে অভিযান। পূর্ব দিকে দিগ্বিজয়। টিউটনিক অর্ডারের সন্ন্যাসীরা যা আরম্ভ করেছিলেন তাঁদেরই উত্তরসূরী এক ব্রহ্মচারী তাই শেষ করবেন। হিটলার শুধু বিসমার্কের অসমাপ্ত কাজ সমাপ্ত করতে আসেননি, এসেছিলেন টিউটনিক অর্ডারের অসমাপ্ত কর্ম সমাধা করতে। বলটিক থেকে বলকান পর্যন্ত বিস্তারিত ভূখণ্ড টিউটনদের জন্তে চাই। স্লাভদের ভূমি কেড়ে নিতে হবে। স্লাভরা হবে স্লেভ। এই সাতশো বছরে দুই জাতিগোষ্ঠীর মধ্যে সংঘর্ষ বড়ো কম হয়নি। স্লাভরা এবার পশ্চিম মুখে অভিযান চালিয়ে বালিনসম্মত পূর্ব জার্মানী গ্রাস করেছে। ওদের রাহগ্রাসের সঙ্গে পাল্লা দিয়েছে ইঙ্গ-মার্কিনদেরও রাহগ্রাস। এরা গ্রাস করেছে পশ্চিম জার্মানী। গোটা জার্মানীর এবার পূর্ণ গ্রাস। এমন এক রক্তি জায়গা নেই যেখানে জার্মানরা স্বাধীন ও সার্বভৌম। জার্মান রাষ্ট্রই নেই। জার্মান

সরকারই নেই। তবে সন্ধি হবে কার সঙ্গে কার? সন্ধি না হলে শান্তি হবে কী করে? শান্তি বৈঠক বসবে কী করতে? আমি তো চোখে আঁধার দেখছি, রাহু। ছেড়ে দাও গো, কেঁদে বাঁচি।” স্বপনদা কাতর কণ্ঠে বলেন।

“বিসমার্ক পই পই করে বারণ করেছিলেন দুই ফ্রন্টে লড়াতে। কাইজার কর্ণপাত করেনি। হিটলারও না। মস্কো, লেনিনগ্রাড, স্টালিনগ্রাড কেড়ে নিতে গেলে বালিন, লাইপৎসিগ, ভাইমার হারাতে হয়। জার্মানরা মাতশো বছর ধরে স্নাভদের জালিয়েছে। এবার দু’শো বছর ধরে স্নাভদের ধারা জালাতন হোক। সন্ধি! কিসের সন্ধি! সন্ধির মর্যাদা কি জার্মানরা মানে? কাইজার বলেছিলেন, জ্যাপ অফ পেপার। হিটলার তো ততটুকুও স্বীকার করেনি। এই তো জার্মান ঐতিহ্য! সন্ধি করলে সন্ধির খেলাপ হবেই। বিজয়ীরা নিজেদের মধ্যে জার্মানী ভাগাভাগি করে নিয়েছে। যতদিন না নিজেদের মধ্যে লড়াই বাধে ততদিন শান্তি অবধারিত।” বোদি আশ্বাস দেন।

স্বপনদা বিলাপের স্বরে বলেন, “কেন বুখা স্তোক দিচ্ছ, রাহু? বাধে গোকতে দুদিনের সময় একঘাটে জল খায় বলে কি সব সময় একঘাটে জল খায়? পরে একদিন বাঘ ঝাঁপিয়ে পড়ে গোকর ঘাড়ে। গোকর যদি মোঘ হয়ে থাকে তবে সেও তার শিং দিয়ে বাঘকে জব্দ করে। বাঘে মহিষে লড়াইয়ের অনেক কাহিনী আমি শুনেছি। সেইরকম একটা লড়াই একদিন বেধে যাখে দুই প্রতিবেশী শিবিরে। যদি না ইতিমধ্যে একটা বাফার স্টেট খাড়া হয় আর দুই শিবিরের সৈন্যদল জার্মানী পরিত্যাগ করে। বাফার স্টেটই এর সমাধান।”

বোদি তর্ক করেন। “ওটা যে ভবিষ্যতে বাফার থাকবে এ গ্যারান্টি দেবে কে? একটা পার্টি যাবে, আরেকটা পার্টি আসবে, পার্টির বড়ো কর্তা নয়। নাৎসী বিটলার। তিনিও ছদ্মনামে এক সৈন্যদল গড়ে তুলবেন। অন্য নামে অস্ত্র তৈরি করবেন। তুমি কি মনে কর প্রত্যেকবারেই রুশ মার্কিন একজোট কবে? বিটলার একদিকেই বেশী করে ঝুঁকবেন। ফ্রান্সের সঙ্গে ম থামাখি করবেন। ব্রিটেনের সঙ্গে কোলাকুলি করবেন। মার্কিনের সঙ্গে গলাগলি করবেন। পশ্চের বার দুই ফ্রন্টে লড়াই নয়। কেবল পূব মুখে অভিযান। রাশিয়া কেন তেমন ঝুঁকি নেবে? আধখানা জার্মানী হাতে রাখাই ওর বিচারে।

নিরাপত্তার গ্যারাণ্টি। বলা বাহুল্য সেটা হবে কমিউনিষ্ট শাসিত অংশ। হয়তো অত বেশী লালচে নয়।”

“তুমি দেখছি ক্রিপ্টো-কমিউনিষ্ট। তা নইলে সোভিয়েটের দিকে টেনে বলতে না। স্টালিনের উচিত ছিল নিজের জায়গা ফেরৎ পেয়ে সেইখানে দাঁড়ি টানা। বড়ো জোর পোলাও অধিকার করে তাকে বাফার স্টেট করা। কিন্তু ওরও মাথায় ঘুরছে বিপ্লবকে জার্মানীতে রফতানী করা। জার্মান কমিউনিষ্টদের মদত দেওয়া। তা নইলে বালিন পর্যন্ত ধাওয়া করার কী সার্থকতা থাকতে পারে? রাশিয়ানরা ধাওয়া না করলে ইঙ্গ-মার্কিনরাও ধাওয়া করত না। জার্মানীর খানিকটা স্বাধীন ও সার্বভৌম থেকে যেত।” স্বপনদার ধারণা।

“ওটা তোমার ভুল। দুই শিবিরই একবাক্যে দাবী করেছিল বিনা শর্তে আত্মসমর্পণ। সেটা মেনে নিলে স্বাধীন ও সার্বভৌম জার্মানী বলে কিছু থাকে না। তার ধড়টা আস্ত থাকতে পারত, কিন্তু তার হাড়-গোড় ভেঙে দেওয়া হতো। মিলিটারি ও আধা মিলিটারি হচ্ছে হাড়গোড়। দুই শিবিরই পরস্পরের সঙ্গে ভাগাভাগি করে দখলদার ফোজ মোতায়েন করত। জার্মানরা ভাঙবে, তবু মচকাবে না। পরাজিত হবে, তবু বিনা শর্তে আত্মসমর্পণ করবে না। যা হবার তা হয়েছে। এতে শোক করবার কী আছে? সুখী হবারই বা কী আছে? আমি কাঁদবও না, হাসবও না। এই নরমেধযজ্ঞ যে শেষ হয়ে এসেছে এই আমার কাছে যথেষ্ট। এখন দেখা যাক জাপান আর কতদিন খাড়া থাকে। ইটালী তো ইতিমধ্যেই কাৎ হয়েছে। মুসোলিনি নিপাত।” বোদি বলেন।

নিচের তলায় একটা সোরগোল শোনা গেল। এল্ফ কাকে যেন ঢুকতে দিচ্ছে না, বেউ ঘেউ করছে। বাবলী বলছে, “এল্ফ, লক্ষ্মীটি, ওকে পথ ছেড়ে দে। ও খাবার নিয়ে এসেছে।” বোদি নেমে গিয়ে দেখেন ঘোড়ার গাড়ী থেকে নামানো হয়েছে মিষ্টির ভাঁড় খার মাছের ঝাঁক। বিরাট কাতলা মাছ। বাবলীদের ভেড়ীর মুটে বয়ে নিয়ে উপরে যেতে চায়, এল্ফ তাকে আগলে রাখছে।

“বোদি, তুমি এল্ফকে বুঝিয়ে বলো দেখি পমেরানিয়া এখন আমাদের দখলে। কাজেই এল্ফ এখন আমাদের কুকুর।” বাবলীর লজিক।

“ব্যাপার কী, বাবলী?” বোদি আশ্চর্য হন। এসব কেন?”

“কেন? তুমি কি জানো না যে আমরাই জিতেছি? এটা আমাদের



ভিকট্রি সেলিব্রেশন। বালিন যার জার্মানী তার। তবে সবটা নয়, এই যা আফসোস। বর্বর, বনমানুষ, পাষণ্ড, পাপিষ্ঠ, পিশাচ, রাক্ষস, শয়তান হিটলার নরকে গেছে। কিন্তু যাবার আগে আমাদের সঙ্গে শঠতা করে ইঙ্গ-মার্কিন সেনাকে ডেকে এনে আধখানা জার্মানী ধরিয়ে দিয়ে গেছে। ওরাও জয়ের অংশীদার। কী অত্যাশ্চর্য!”

বৌদি কোনো মতে হাসি চেপে তাঁকে উপরে নিয়ে যান। তার সঙ্গে লোকটিকে নিচের তলায় দিয়ে যান চাকরদের জিম্মা। তাদেরই একজন উপরে নিয়ে যায় মিষ্টি আর মাছ।

উপহার দেখে তো স্বপনদা হতবাক। ইঙ্গিতে প্রশ্ন করেন, কেন?

“আজ আমরা জিদ হায়া। আজ আমাদের বিজয়া দশমী। আমরা মহিষাসুরকে পরাস্ত করেছি। মহিষাসুর শুধু পরাস্ত নয়, নিহত। শূন্যে নিহত, কিন্তু সেটা বোধহয় মার্কিন অপপ্রচার। সত্য বোধহয় এই যে সোভিয়েট বোমারু ওর গুহা তাক করে বোমা বর্ষণ করেছিল। অব্যর্থ লক্ষ্য। তবে ওর লাশ দাখিল করে প্রমাণ করতে পারা যাচ্ছে না যে বোমার ঘায়েই মৃত। ও তো কম ফন্দিবাজ নয়। ইতিহাসের জন্তে একটা ধাঁধা রেখে দিয়ে গেছে। জীবিত না মৃত। মৃত হলে কার হাতে নিহত।” বাবলী বকবক করে যায়।

স্বপনদা ধরা গলায় বলেন, “ছাথ, চকোলেট, কেউ মারা গেলে তার সম্বন্ধে দুটো ভালো কথা বলতে হয়, আপাতত মন্দ কথা বলতে নেই। এটাই সভ্য সমাজের রীতি। হিটলার এখন সব নিন্দাপ্রশংসার উদ্দেশ্যে। তিনি তাঁর ভূমিকায় অভিনয় করে গেছেন, সেটা একটা ঐতিহাসিক নাটকের অঙ্গ। ভাবীকালের উপরে ছেড়ে দাও সেই ভূমিকার বিচারভার। আমি আজ বিচার করব না, শুধু বলব হিটলার জার্মানীকে প্রথম মহাযুদ্ধের পরাজয়ের গ্লানি থেকে মুক্ত করে জার্মানদের হৃদয় জয় করেছিলেন। কমিউনিস্ট বিপ্লবের ভয় থেকেও ত্রাণ করেছিলেন তিনি। এর জন্তেও জার্মানরা তাঁর কাছে কৃতজ্ঞ। বাস, এইপর্যন্ত। এর পরের অধ্যায়টা সম্বন্ধে আমি মৌন।”

“কথাটা তুমি ঠিকই বলেছ, তবে আরো ঠিক হতো যদি বলতে যে কমিউনিস্ট বিপ্লবের ভয় থেকে বুর্জোয়াদের ত্রাণ করেছিল সে। কিন্তু নীট ফল কী হলো? আধখানা জার্মানী তো কমিউনিস্ট বিপ্লবীদের হাতে পড়ল। জার্মান বাসিন্দারা উদ্ধ্বাসে পালাচ্ছে। খালি পূর্ব জার্মানী থেকে নয়,

সোভিয়েট অধিকৃত পোলাও থেকেও, বলটিক থেকেও। তাদের সবাই যে বুর্জোয়া তা নয়। শ্রমিক কৃষকরাও আতঙ্কিত। কারণটা শ্রেণীগত নয়, জাতিগত। এক জাতি অপর এক জাতির দাস হতে থাকতে রাজী নয়। হিটলার দেখিয়ে দিয়েছে কেমন করে অন্য জাতিকে দাস করতে হয়। শুধু কি তাই? কেমন করে জেনোসাইড করতে হয়। স্লাভরা যদি এর বদলা নেয় তা হলেই হয়েছে!” বোদি শিক্ষা প্রকাশ করেন।

“ওটা তোমার ভ্রম, বোদি। আমরা শ্রেণীশত্রুকে খতম করতে পারি, কিন্তু জাতিকে জাতি নিকাশ করতে পারিনে। জার্মানরা যা করেছে তার প্রতিফলের ভয়ে পালাচ্ছে। আমরা তাদের তাড়িয়ে দিচ্ছি। ওরা থাকুক, মার্ক্সবাদের কলমা পড়ুক। তাতে আমাদেরি বল বাড়বে।” বাবলী অভয় দেয়।

স্বপনদা মৌনভঙ্গ করেন। “কিন্তু মার্শাল স্টালিন তাঁর জীবনের সব চেয়ে বড় ভুলটা করবেন যদি চার্লিস ও ট্রুম্যানকে বার্লিনের আধখানা ছেড়ে দেন। শুনছি সেইরকম চিন্তি হয়েছে। চুক্তির খেলাপ করলেই লড়াই। না করলেও বাগড়াবাটি। ভাবা যায় না বার্লিন কী করে ভাগ হবে। লাইন টানা হবে কোথায়। আমার তো ভাবতে গিয়ে কান্না পাচ্ছে।” স্বপনদা চোখে ক্রমাল দেন।

“শ্রাকামি রাখো। মালপোয়াতে ভাগ বসো। নয়তো সব আমরা দুই বান্ধবীতেই সেবা করব। বৈষ্ণবদের ভাষায়। ই্যা, ভাই, তোমাদের গৃহদেবতা কি রাধাগোবিন্দ?” বাবলীকে শুধান বোদি।

“ক্ষীরচোরা গোপীনাথ। সঙ্গে রাধা আছেন বইকি। তিনিই তো প্রধানা গোপী। ঠাকুরদরের ধারে কাছে মাছ মাংস চলে না। ওটা আমরা শতহস্ত দূরে বসে খাই। নিরামিষ হৈসেল থেকে আমিষ হৈসেলও ত্রমনি দূরে। পুরনো বাড়ী, পুরনো প্রথা। জীবিকাটাও তো পুরোনো। আমি হচ্ছি দৈত্যকুলের প্রহ্লাদ। না, না, প্রহ্লাদকুলের দৈত্য।” বাবলী হেসে ওঠে।

“তা তোমাকে দৈত্যের মতো দেখতে হলে তো? এত নরম মেয়ে কী করে এত ভয়ঙ্কর কর্ম করে তার মর্ম আমি আজও বুঝতে পারিনে। ক্ষীরের ছুরি বলে একটা কথা আছে। তুমি কি সেই ক্ষীরের ছুরি? সন্ত্রাসবাদী দলে ভিড়লে কেমন করে?” বোদি কৌতুহলী হন।

“সে অনেক কথা, বৌদি।” বাবলী অশ্রুমনস্ক হয়ে যায়। “আচ্ছা, একটুখানি বলি। আমি রোমাণ্টিক প্রেমে পড়েছিলুম। প্রেমটা দেশপ্রেমের আকার নিয়েছিল। পাগলিনী কী না করতে পারে! সে পাগলামি এতদিনে সেরে গেছে। তিনি বিয়ে-থা করে সংসারী হয়েছেন। বুর্জোয়া সংসার। দেখে শিউরে উঠি। ভাগ্যিস, বিয়ে করিনি। এ সমাজে বিয়ে করলে আর কিছু করা যায় না। আমাকে বিয়ে করবেই বা কে!” বাবলী দৈতো হাসি হাসে।

“কেন, তোমার কমরেডদের মধ্যে তেমন কেউ কি নেই? সবাই কি চিরকুমার থাকতে প্রতিজ্ঞাবদ্ধ?” বৌদি প্রশ্ন করেন।

“না, সবাই নন। তাই যদি হতো আমাদের কমিউন্স ভেঙে যেত না। গেল যত না সরকারী নেকনজরে তার চেয়ে বেশী নিজেদেরই ঘরসংসার করার বাসনায়। মেয়েদের দুর্বলতা কোথায়, জানো তো? ওরা বয়স থাকতে মা হতে চায়। এ সমাজে বিয়ে না করে মা হওয়া যায় না। দেশশুদ্ধ লোক কমিউনিস্ট হলেও এ সংসার কাটিয়ে উঠবে বলে মনে হয় না। কমিউনিস্ট কন্সার্নাও বিয়ের জন্তে আপস করবে। বরপণ দিয়ে বিয়ে করবে। যদি না এক সর্বশক্তিমান ডিক্টেটর চরম দণ্ড দিয়ে ওসব বন্ধ করেন। আর, সব শিশুকে বৈধ বলে গণ্য করেন। আমাদের হবু ডিক্টেটররা বোনের বা মেয়ের বিয়ের সময় সমাজের কাছে কৈচো। তবে বলা যায় না, বিপ্লবের পরে নতুন হাওয়া বইতেও পারে। আগে তো মেয়েদের প্রত্যেককে জীবিকায় সুপ্রতিষ্ঠিত করি। এমনভাবে সুপ্রতিষ্ঠিত যে বিয়ে না করে মা হলে কারো জীবিকা যাবে না। সন্তানের জন্তেও সুব্যবস্থা হবে। তখন ছেলেরাই ছুটবে কন্সার্না দিয়ে বিয়ে করতে।” বাবলী স্বপ্ন দেখে।

“এ নহে কাহিনী, এ নহে স্বপ্ন, আসিবে সেদিন আসিবে।” বৌদি ভরসা দেন। “তখন তোমাকেও আমরা পাত্রস্থ করব, বাবলী।”

‘ততদিনে আমার মা হবার বয়স পেরিয়ে গিয়ে থাকবে, বৌদি।’ বাবলী বলে।

স্বপ্নদা ও প্রসঙ্গ থামিয়ে দিয়ে বলেন, “মরার আগে হিটলার তাঁর দুই মহাশত্রুকেও মরণের মুখে ঠেলে দিয়ে গেছেন। কান ধরাধরি করে বসে থাকুন ওরা ইউরোপের মধ্যখানে যতদিন পারেন। কিন্তু একচুল এদিক ওদিক হলেই বেধে যাবে মহামারী। এটা একটা আন্স্টেবল ইকুইলিব্রিয়াম। ইতিহাসে

আর কখনো এমনটি দেখা যায়নি। এর থেকে বোঝা যায় হিটলার লোকটা কত বড়ো চালবাজ। এটা কার জিং? হিটলারের না স্টালিন, চার্চিল, টুম্যানের? এর উত্তর তোমরা এই মুহূর্তে পাবে না। পাবে ত্রিশ চল্লিশ কি পঞ্চাশ বছর বাদে। যখন দেখবে তোমরা ওখানে বসে আছো স্বেচ্ছায় নয়, হিটলারের ইচ্ছায়। হিটলার নেই, তাঁর ভূত আছে। সে ভূত পেছন থেকে ভবিষ্যৎ নিয়ন্ত্রণ করছে। তোমাদের ফ্রা উইল একটা মায়া। তোমাদের প্রত্যেকটি পলিসি আগে থেকে ডিটারমিন্ড। তখন বুঝবে যে গায়ের জোরে জেতাটাই জিং নয়। সত্যিকার জিং হচ্ছে যুদ্ধজয়ের পর শান্তি জয়। ভিক্টরি সেলিব্রেশনের দিন আসবে সেইদিনই যেদিন শান্তি স্থাপিত হবে। সে শান্তি মার্কান সৈন্যদের ফেরৎ পাঠাবে আমেরিকায়, রুশ সৈন্যদের রাশিয়ায়। ব্রিটিশ সৈন্যদের ব্রিটেনে। ইউরোপের সব ক’টা রাষ্ট্রকে সংযুক্ত করে ইউনাইটেড স্টেটস অফ ইউরোপ পত্তন করবে। রাশিয়া বাদে। তার আলাদা একটা ইউনিয়ন। সংযুক্ত ইউরোপ ধনতন্ত্র ও সমাজতন্ত্র উভয়ের একটা সমন্বয় খুঁজে বার করবে। গণতন্ত্রই হবে মূলভিত্তি। চিন্তা নামকা ওয়াস্তে গণতন্ত্র নয়। বিশের দশকে আমরা যারা ইউরোপে বাস করছি এই স্বপ্নই ছিল তাদের জীবনের স্বপ্ন। ত্রিশের দশকে ঘোরতর স্বপ্নভঙ্গ। চল্লিশের দশকে সেই ভাঙা স্বপ্ন জোড়া লাগবে বলে মনে হয় না। তবে একটা স্নসন্ধান দেখা যাচ্ছে। ইউনাইটেড নেশনস বলে একটা সংস্থা গড়ে উঠছে। লীগ অফ নেশনস আমাদের বড়ো আশা দিয়েছিল। পরে হতাশ করে। ইউনাইটেড নেশনস যদি তাবই অনুসরণ করে তবে আশা না রাখাই ভালো।”

বৌদি বাবলীর দিকে চেয়ে রঙ্গ করেন। “বিয়ে করলে বরের কাছে এইরকম লোকচার শুনতে হবে। শুনতে শুনতে একরকম ইমিউনিটি জন্মাবে। এক কান দিয়ে ঢুকে আরেক কান দিয়ে বেরিয়ে যাবে। উনি এইখানে বসেই ইউরোপের ভাগ্য নির্ণয় করছেন। সে মহাদেশে আমিও কিছুদিন বাস করেছি। একদা ওদের মিলনের সূত্র ছিল এক খ্রীস্ট, এক খ্রীস্টধর্ম, এক খ্রীষ্টীয় সঙ্ঘ। রাষ্ট্র অনুসরণ করবে সঙ্ঘকে। সম্রাট অনুসরণ করবেন সঙ্ঘগুরুকে। কিন্তু স্বপ্নের সঙ্গে বাস্তবের হাজারো গরমিল। ইউরোপ খণ্ড খণ্ড হয়ে যায় প্রথমে ধর্মের নামে, পরে ভাষার নামে। এখন হতে যাচ্ছে মতবাদের নামে বা সমাজবিচারের নামে। সংযুক্ত ইউরোপ একটা কথার কথা। রোমান এম্পায়ার, হোলি রোমান এম্পায়ার, নেপোলিয়নের এম্পায়ার, হিটলারের

বর্ণচোরা এম্পায়ার, কোনোটাই টেকেনি। স্টালিনের যদি তেমন কোনো পরিকল্পনা থাকে সেটাও বার্থ হবে। রাশিয়া ঠিক ইউরোপ নয়। ইউরেশিয়া—’

বাবলী বাধা দিয়ে বলে, ‘আমরা আর জায়গা বাড়াতে চাইনে। আমরা পশ্চিম জার্মানীর বা পশ্চিম ইউরোপের মাটি মাড়াব না। আমেরিকার ছায়া মাড়াব না। মহামতি স্টালিন প্রত্যেকটি চুক্তি মান্য করবেন। আমাদের জপমন্ত্র ওঁ শাস্তি: শাস্তি: শাস্তি:।’ শুনে সবাই হেসে খুন। এল্ফ পর্যন্ত।

এর পরে ওঠে জুলির প্রশ্ন। স্বপনদা বলেন, ‘শুনছি ক্যারামেল নাকি ছাড়া পেয়েছে। কই, আসে না তো?’

‘আসবে কী করে? ওর মা যে ওকে নজরবন্দী করে রেখেছেন। সেই শর্তেই ওকে ছাড়া দেওয়া হয়েছে। ছাড়া দেবার প্রধান কারণ ওর মাথার একটা ইজুপ টিলে হয়েছে।’ বাবলী যতদূর জানে।

‘বলো কী! মাথা খারাপ হয়েছে!’ স্বপনদা শিউরে ওঠেন।

‘মাথা ওর কবে ভালো ছিল? তবে খারাপও ছিল না। এরপর যেতে হবে ওকে দেখতে। না সেটাও নিষেধ?’ বৌদি সুধান।

‘না, না, সেটা নিষেধ নয়। আমি একদিন দেখা করে এসেছি। বলেছি, যা হবার তা হয়ে গেছে। মাফ করিস্, ভাই। জুলি তা শুনে খুশি হয়েছে। আমাকে ডড়িয়ে ধরে বলেছে, জানিস্ না বোধ হয়, আমি এখন এন্গেজড। যার সঙ্গে এন্গেজড সে এখন জেলে। আমি ওকে বলেছি যে বুদ্ধ শেষ হয়ে আসছে, সরকার এবার কংগ্রেসওয়ালাদের ছেড়ে দিয়ে মিটমাটের কথাবার্তা চালাবে। তা শুনে জুলির সে কী রাগ! তখনি টের পাই যে ওর মাথার ইজুপ আলগা। বলে নিজের মা যদি শত্রু হয় তবে মাহুষ কী করতে পারে! বেশ তো ছিলুম আমি জেলে। সবাই আমাকে তোয়াজ করত। সাহেবরা পর্যন্ত! গান্ধীজীর ‘ভারত ছাড়ো’ আন্দোলন ব্যর্থ হওয়ার পরে ওদের মধ্যে একটা পিছুটান এসেছিল, কিন্তু আজাদ হিন্দ ফৌজ গঠন করে নেতাজী সুভাষ আসছেন শুনে ওদের চাপা উল্লাস। আমাকে দিনে দশবার প্রশ্ন করে, আর কত দেরি? আমি কেমন করে বলব কত দেরি? মনটা খারাপ হয়ে গেল শুনে যে ইম্ফল অবধি এসে ওঁরা ফিরে যান। কিন্তু ফিরে যাওয়া মানে তো বরাবরের জন্তে ফিরে যাওয়া নয়। আরো ভালো করে তৈরি হয়ে আবার এগিয়ে আসতেও তো পারেন। আমি ঠিক জানতুম যে নেতাজী রবার্ট ব্রুসের মতো

বার বার ট্রাই করবেন শেষে একদিন সফল হবেন। সেটা হবে দেশব্যাপী বিপ্লবের সিগনাল। বিপ্লবী জনতা এসে ইংরেজদের তৈরি এই বাস্তিল দুর্গ ভেঙে আমাকে উদ্ধার করবে। আমি হাঁক দেব, ইনকিলাব জিন্দাবাদ। অমনি ওরাও প্রতিধ্বনি করবে, ইনকিলাব জিন্দাবাদ। আহা, সে কী উন্মাদনা! সে কী উদ্দীপনা! সে কী গৌরব! সে কী গর্ব! আমি বাংলাদেশের জোন অভ্ আর্ক। আমার নিজের মা আমাকে অসময়ে জেল থেকে বার করে এনে এই সৌভাগ্য থেকে বঞ্চিত করেছে। সরকার থেকে নাকি জানিয়েছিল যে আমার মাথার ঠিক নেই। কী করে ঠিক থাকবে শুনি? ইম্ফল থেকে নেতাজী ফিরে গেলে কি মাথার ঠিক থাকে? লেনিন যদি পেট্রোগ্রাড থেকে ফিনল্যাণ্ডে ফিরে যেতেন তোর মাথার ঠিক থাকত? অবশ্য তুই তখন শিশু। আমার মা আমাকে চোখে চোখে রেখেছে। বেরোতে দিচ্ছে না। তবে বেশী দিন নয়। বিপ্লবী জনতা একদিন বাস্তিল ভাঙার পর এ বাড়ীর সদর দরজাও ভাঙবে। আমাকে নিয়ে মিছিলে বেরোবে। ইনকিলাব জিন্দাবাদ। ইনকিলাব জিন্দাবাদ। জুলির মুখে এইসব শুনে আমি তো একেবারে থ! ৩ যে কোন্ মুখের স্বর্গে বাস করছে তা ও নিজেই জানে না।” বাবলী দুঃখ করে।

“কাঁদিয়ে ছাড়লে। আমাকে কাঁদিয়ে ছাড়লে!” স্বপনদা আবার চোখে ক্রমাল দেন। এবার ক্যারামেলের জন্তে কান্না।

“সত্যি, কান্না পাবার মতো ব্যাপার।” বৌদিরও দৃষ্টি সজল।

“বিবাহ!” স্বপনদা বিধান দেন, “এই ব্যাধির একমাত্র ভেষজ বিবাহ। ক্যারামেলের বরকে জেল থেকে ছাড়িয়ে আনতে হবে। হিটলার হেরেছে, মুসোলিনি হেরেছে, তোজো আর কদ্দিন? বাধছে তো ওই বিনা শর্তে আত্মসমর্পণ নিয়ে। সেইজন্তে যুদ্ধশেষের বিলম্ব হচ্ছে। তার আগে কি ওরা কংগ্রেসওয়ালাদের ছাড়বে? অসম্ভব নয়। জাপানী আক্রমণের সম্ভাবনা নেই। আজাদ হিন্দ ফৌজের দম ফুরিয়ে গেছে। একবার জাপানীদের সঙ্গে লড়ে ও একবার ইংরেজদের অমুগত জওয়ানদের সঙ্গে লড়ে ওরা ক্লান্ত। যুদ্ধক্ষেত্রে বীরত্বই যথেষ্ট নয়। দম। দম যদি না থাকে তবে খেল খতম। আমার মনে হয় কংগ্রেস নেতাদের কারামুক্তি আসন্ন। ওঁরা বেরিয়ে এলে ওঁদের দলবলকেও বার করে আনবেন।”

সত্যিই জাপানের পরাজয়ের ভণ্ডে অপেক্ষা না করে সরকার কংগ্রেস

নেতাদের মুক্তি দেন। কথাবার্তা যাতে সুগম হয় তার জন্যে কংগ্রেস কর্মীদেরও দফায় দফায় খালাস করা হয়। সৌম্যকে যেদিন ছাড়ে তার আগে জাপানে পরমাণু বোমা পড়েছে ও জাপান বিনা শর্তে আত্মসমর্পণ করেছে।

জুলি তো হাতে স্বর্গ পায়। তার মন খারাপ থেকেই মাথা খারাপ। মন এখন ভালো, তাই মাথা এখন ভালো। তবু আর আক্ষেপ, “কোথায় সেই জনতা যে আমাকে বাস্তব ভেঙে উদ্ধার করত আর আওয়াজ তুলত, ইনকিলাব জিন্দাবাদ? ওরা বোধহয় অপেক্ষা করেছে কবে বাবলীরা ডাক দেবে। আমরা গ্যাসনালিস্টরা শ্রান্ত ক্লান্ত। ওরা কমিউনিস্টরা তরতাজা। জোয়ার এলে ওরাই তার সুযোগ নেবে।”

সৌম্য তাকে সাহুনা দেয়। “আমাদের পক্ষে যা করা সম্ভব আমরা তা করেছি। ফাঁকি দিইনি। ফলাফল আমাদের হাতে নয়। ভগবানের হাতে। ভগবান না মানলে ইতিহাসের হাতে। জনগণ যদি আমাদেরকেই বেশী বিশ্বাস করে তো আমাদের আগে আর কেউ কিছু করতে পারবে না। যদি ওদেরকেই বেশী বিশ্বাস করে তবে ওরাই আমাদের আগে স্বাধীনতা আনবে, বিপ্লব ঘটাবে। এতে আফসোসের কী আছে? দেশের মুক্তি, দেশের জনগণের মুক্তিই তো আসল। আমরা নিমিত্তমাত্র। ওরাও তাই। মুক্তি যতদিন না আসে ততদিন আমাদের কর্তব্য আমরা করে যাব। যার যেমন নীতি। আমি নীতি পরিবর্তন করব না। সত্য আর অহিংসাতেই অবিচল থাকব। বছর তিনেক আগে যেসব ভুলভ্রান্তি ঘটেছে তার সংশোধন করতে হবে। এই দুই বছর আমি তাই নিয়ে খুব ভেবেছি। বাপুকে আমরা পুরোপুরি মাগ করিনি। সরকারকে অমাগ করতে গিয়ে তাঁকেও কতকটা অমাগ করেছি। এই ডবল অমাগ কখনো ফলপ্রসূ হতে পারে না। তা হলেও আমাদের সাক্ষাৎ আমরা নিষ্ক্রিয় বসে থাকিনি। দেখা যাক দেশ কোন্টো বেশী পছন্দ করে। আমাদের সক্রিয়তা না বাবলীদের নিষ্ক্রিয়তা।”

দেশের মুক্তি, দেশের জনগণের মুক্তি অপেক্ষা করতে পারে, কিন্তু নারীর রূপযৌবন অপেক্ষা করতে পারে না। একদা মহাত্মার আশ্রয়স্থান ছিল “এডুকেশন ক্যান ওয়েট, স্বরাজ ক্যান নট।” সৌম্য কি সেটা মাগ করবে না অমাগ করবে? জুলির মা প্রশ্নটা পাড়লে সে বলে, “একবার বাপুর সঙ্গে কথা বলে আসি। দেখি তিনি কী বলেন। ইতিমধ্যে একবার আশ্রমেও ঘুরে

আসতে হবে। দেখি সেটা কী অবস্থায় আছে। জুলি কি পারবে সেখানে তিষ্ঠতে? আশ্রম ছেড়ে আমিই বা যাই কোথায়? বিহারের গওগ্রামে? জুলি কি পালিয়ে আসবে না?”

জুলি মুখ খুলতে যাচ্ছিল, ওর মা কথা কেড়ে নেন। “তা জুলিও তো সফ্ট নয়। কতরকম ছঃখকষ্টের ভিতর দিয়ে সীজনু। তোমার ছুস্টর তপস্শায় ও তোমার সাথী হবে।”

এই স্থির হলো যে গান্ধীজী অনুমতি দিলে বিয়ে একটি শুভদিন দেখে হবে। তা সে হিন্দু, ব্রাহ্ম, সিভিল যে মতেই হোক। জুলি তা শুনে কাঁদতে বসে। আনন্দের কান্না। ওর মা সৌম্যকে আঁড়ালে নিয়ে গিয়ে বলেন, “জুলি তোমার গলগ্রহ হবে না। ওর বাবা ওর জন্তে যথেষ্ট রেখে গেছেন। ওর মাও তো কিছু দেবে। তবে, হ্যাঁ, ওর শ্বশুর ওর মাসোহারা বন্ধ করবেন। বিয়ের পর তো জুলি ঠর ছেলের বৌ থাকবে না। মাসোহারার টাকা জুলি নিজের জন্তে খরচ করত না। ওটা ওর রাজনৈতিক কার্যকলাপে লাগত। ওটা বন্ধ হলে ওর রাজনৈতিক কার্যকলাপও বন্ধ হবে। আপদ যাবে। ও মেয়ে রাজনীতির জন্তে নয়। ঘরসংসারের জন্তে। তুমি দেখবে ওর ভোল ফিরে যাবে।”

“এই তো আমি চাই। ওর ভোল ফিরলেই আমি খুশি হব। রাজনীতি ওর স্বভাববিরুদ্ধ। সঙ্গদোষে ও সন্ত্রাসবাদী হয়েছিল। পবে হয়েছে বিপ্লবী নায়িকা। এটা ওর সত্যিকারের ভূমিকা নয়! কিন্তু, মাসিমা, বিয়ে করলেও যে আমরা গৃহী হতে পারব তা নয়। সুদিনের জন্তে সর্ব্ব করতে হবে। কে জানে, আমাকে হয়তো শহাদ হতে হবে।” সৌম্য ভাবী শান্তুড়ীকে একটা চমক দেয়।

“না, না। ওটা ভাবা যায় না। না, না। ওটা মুখে আনা যায় না। জুলিকে কখনো জানতে দিয়ে না। ও মারা যাবে। আমিও।” তিনি কম্পমান।

স্বপনদা ও বৌদি আসেন দেখা করতে। বিয়ের কথাবার্তা চলছে শুনে স্বপনদা বলেন, “শুভশ্র শীঘ্রম্। মহাত্মার অনুমতির কী দরকার? নিজের ছেলের বিয়ের বেলা তো অমন কোনো শর্ত নির্দেশ করেননি যে আগে স্বরাজ তারপরে বিয়ে। দেবদাস যা পারে সৌম্যও তা পারে।”

বৌদি বলেন, “এটা হলো ব্যারিস্টারের যুক্তি। কিন্তু গান্ধীজী আইন



অমান্ত করতে করতে আইন কানুন সব ভুলে গেছেন। ওঁর কাছে ব্রতটাই বড়ো। দেবদাসের বোধ হয় তেমন কোনো ব্রত ছিল না। যেমন সৌম্যর।”

এর পরে কথাবার্তার মোড় ঘোরে। স্বপনদা বলেন, “তোমাদের যুদ্ধবিরোধী আন্দোলন সম্পূর্ণ ব্যর্থ হয়েছে, সৌম্য। যুদ্ধ থেমেছে তোমাদের আন্দোলনের ফলে নয়, পরমাণু বোমা ব্যবহারের ফলে। আমি তো নিন্দাবাদের ভাষা খুঁজে পাইনে। ছি ছি! এ যে চূড়ান্ত অমানবিকতা। হিউমানিজমের যুগ যে শেষ হয়ে গেল। এ কোন্ যুগে আমরা পৌঁছলুম! অহিংসার নাম তো কেউ মুখেও আনতে চায় না। যেমন বিদেশে তেমন এদেশে। একে তো পরমাণুর আঘাতে আমি শয্যাশায়ী, তার উপর এ কী অবিশ্বাস্ত সংবাদ! এটা কি সত্যি!”

“কোন সংবাদের কথা বলছেন, স্বপনদা?” সৌম্য হকচকিয়ে যায়।

“আমার সহপাঠী স্ত্রীভাষ নাকি প্লেন অ্যাকসিডেন্টে মারা গেছে। তাইপে জায়গাটা কোথায়? গেলই বা কেন সেখানে?” স্বপনদার কণ্ঠরোধ হয়।

জুলি চিৎকার করে ওঠে, “সব বুট হায়! ব্রিটিশ প্রোপাগান্ডা!”

ওর মা ওকে টেনে নিয়ে যান শোবার ঘরে। সেখানে ও পাগলের মতো টেচামেচি করে। বৌদিও পিছু পিছু যান ওকে শাস্ত করতে।

সৌম্য দারুণত্বের মতো নির্বাক। স্বপনদা ওর হাতে হাত রাখেন। চাপ দেন।

## ॥ দুই ॥

স্বপনদা ও দীপিকাদি জুলির খোঁজ নিতেই এসেছেন। জুলির সঙ্গেই গল্প করতে চান, তাই ওর মা ওকে ঠাণ্ডা করে ফিরিয়ে আনেন। তাঁর ভাবী জামাতাকে অল্প ঘরে ডেকে নিয়ে গিয়ে বলেন, “শুনলে তো ওর কথা? কেউ যদি বলে পাগল তা হলে কি ভুল বলবে? গভর্নমেন্ট ওর দায়িত্ব নিতে নারাজ। আমার ঘাড়ে চাপিয়েছে। আমি ওকে দিনরাত পাহারা দিচ্ছি। পাছে ওর রাজনৈতিক গোষ্ঠীর পাল্লায় পড়ে। তুমি এসেছ। খুব ভালো হয়েছে। পৃথিবীতে একটিমাত্র পুরুষ আছে যে ওকে স্থখী করতে পারে।

স্বাধীন হলেই ওর পাগলামি সেরে যাবে। আশ্রমে বা সেবাগ্রামে না গিয়ে তুমি এখানেই কিছুদিন থেকে যাও। রোজ ওকে নিয়ে বেড়াতে বেরোবে। কখনো স্ট্রীমারে করে। কখনো মোটরে করে। কখনো ট্রেনে করে! সারাদিন বাইরে কাটিয়ে সন্ধ্যাবেলা বাড়ী ফিরবে। ছুপুরের খাবার টিফিন ক্যারিয়ারে সাজিয়ে দেব। আমার তো মনে হয় তোমার সঙ্গ পেয়েই ওর মতিগতি বদলাবে। তুমি যেদিন বলবে আমি সেইদিন ওর বিয়ে দেব। যে মতে বলবে সেই মতে। ইতিমধ্যে যদি মহাত্মার অহুমতি নিতে হয় তো চিঠি লিখতে পারো। শশরীরে সেবাগ্রামে যেতে হবে কেন?”

সৌম্য এর উত্তরে বলে, “বিয়ে করলে আমার মন পড়ে থাকবে স্ত্রীর কাছে, পরে ছেলেমেয়ের কাছে। অন্তত আধখানা মন তো পড়ে থাকবেই। সংগ্রামের সময় এগিয়ে যাব কা করে? সত্যগ্রাহীর পক্ষে এটা একটা গুরুতর সিদ্ধান্ত। যিনি সত্যগ্রাহীদের সেনাপতি তিনি যদি নিকট ভবিষ্যতে সত্যগ্রাহের জন্তে আমাকে চান তা হলে বিয়ে পেছিয়ে দিতেই হবে। যদি তার দেরি থাকে তা হলে হয়তো ঠাণ্ডা তাঁর অমত হবে না। বিয়ে আমি করবই। কথা যখন দিয়েছি তখন কথার নড়চড় হবে না। জুলি যদি রাজী হয় তো ওকেও আমি বাপুর কাছে নিয়ে যেতে পারি। তাতে সফল হতে পারে।”

“কোথায় উঠবে ওখানে?” মিসেস সিন্‌হা জানতে চান।

“আমি যেখানে উঠি। সোনাতির কুটীরে। কেশবন্ তার স্বামী। ছ’জনেই বিলেতফেরং। গান্ধীজীর গঠনকর্মে যোগ দিয়েছেন। স্বরাজের রূপরেখা তৈরি করেছেন। আমাকে বিশেষ স্নেহ করেন।’ সৌম্য জানায়।

“আচ্ছা, ভেবে দেখি। আমাকে ছ’তিন সপ্তাহ ভাবতে দাও। ইতিমধ্যে তোমার সঙ্গগুণে জুলির অবস্থার রূপান্তর দেখি। ও মেয়ে যদি অপ্রকৃত স্ব অবস্থায় গান্ধীজীর সঙ্গে দেখা করতে যায় তা হলে তাঁর মুখের উপর কী যে বলে বসবে কে জানে! হয়তো বলবে, আপনার নেতৃত্বে পূর্ণ স্বাধীনতা পাঁচ বছর পরেও হবে না। কেন আমি পাঁচ বছর অপেক্ষা করব?” জুলির মা আন্দাজে বলেন।

“ঠিকই বলেছেন, মাসিমা। পূর্ণ স্বাধীনতা পাঁচ বছর পরেও হয় কি না সন্দেহ। আমাদের বিচারে পূর্ণ স্বাধীনতা হচ্ছে যুদ্ধে জড়িয়ে না পড়ার স্বাধীনতা। তৃতীয় মহাযুদ্ধ কবে বাধবে, জানিনে। কিন্তু যদি বাধে তবে আমরা ওর মধ্যে নেই। আমরা নিরপেক্ষ। ব্রিটেন কি আমাদের এই

স্বাধীনতা দেবে? এর চেয়ে কম নিয়ে আমরা কী করব? ব্রিটেনের জুনিয়র পার্টনার হব? গান্ধী থাকতে তা সম্ভব নয়। আমি থাকতেও সম্ভব নয়। আমাদের শহীদ হতেই হবে। জুলির যখন শোনবার মতো অবস্থা হবে তখন একথা ওকে আমি বলব। ওর যদি আপত্তি থাকে আমাদের বিয়ে না করাই ভালো। বাগ্‌দানের বাধ্যবাধকতা থেকে ওকে আমি রেহাই দেব। ও হয়তো আর কাউকে বিয়ে করে স্থায়ী হবে।” সৌম্য বলে দুঃখের সঙ্গে।

“তুমিও দেখছি আরেক পাগল। আবার এক মহাযুদ্ধ? আবার ভারতকে জড়ানো! আবার তার বিরুদ্ধে সত্যাগ্রহ! কিন্তু, বাছা, সেটা তো পঁচিশ বছরের আগে নয়। ততদিনে তোমার বয়স হয়ে থাকবে আটবড়ি, জুলির ষাট। বিয়ে করে থাকলে তোমাদের ছেলেমেয়ে হয়ে থাকবে। তারা বিয়ে করে থাকলে তাদেরও ছেলেমেয়ে। সত্তর বছর বয়সে যদি কেউ শহীদ হয়—না হলেই ভালো—তবে এখন থেকেই ভয় পাইয়ে দেবার মতো কিছু নয়। জুলি আপত্তি করবে সেটা ঠিক, কিন্তু তাই বলে তোমাকে ছেড়ে অন্য একজনকে বরণ করবে না। এখন থেকে এসব সম্ভাবনার কথা তুলে বিয়েটাকে কেঁচে যেতে দিয়ে না। তা হলে ও মেয়ে আর কোনোদিন প্রকৃতিস্থ হবে না। ফরাসী বিপ্লব আর রুশ বিপ্লবের সঙ্গে সিপাই বিদ্রোহের ঘোঁট পাকিয়ে কী এক আজব তত্ত্ব বানিয়েছে ওর রাজনৈতিক গোষ্ঠী। আমি তো তার মাথা মুণ্ড বুঝিনে। জুলির যে মাথা খারাপ হবে এর আশ্চর্য কী? তুমি যদি ওকে সেবাগ্রামে নিয়ে গিয়ে তোমার সোনারির কাছে শিক্ষাবীশ করতে পারতে তা হলে আমার আপত্তি কী ছিল? কিন্তু আমার একমাত্র শর্ত বিয়েটা তার আগে হওয়া চাই। মেয়েদের জীবনে বিয়ে একটা আমূল পরিবর্তন আনে। মাতৃত্ব আনে আরো গভীর পরিবর্তন। এসব অভিজ্ঞতার পরে তুমি ওকে যা করতে বলবে ও তাই করবে। স্বেচ্ছায় ও সানন্দে তোমার কস্তুরবা হবে। আমার মেয়েকে আমি ভালো করেই চিনি। তুমি আর গড়িমসি না করে ওকে একটা চান্স দাও। তোমাকে তো ও বেঁধে রাখছে না। তুমি যদি নিজেকে দায়গ্রস্ত মনে করো তা হলে ওকে আমার কাছে থাকতে দিয়ে। আমি ওকে রাজনীতি করতে দেব না। সেবাকর্ম করতে দেব। আমার নার্সারি স্কুলের ছেলেমেয়েদের নিয়ে থাকবে। যতদিন না ওর নিজের ছেলেমেয়ে হয়।” জুলির মা প্রাণ খুলে বলেন।

“ও নিজেই সেটা পছন্দ করবে না, মালিমা। ও আমার সঙ্গেই থাকতে

চায়। স্বখে দুঃখে আমার সাথী হতে চায়। মনে করুন আমি একজন সরকারী কর্মচারী। পূর্ববঙ্গই আমার কর্মস্থল। আমার স্ত্রী আমার কর্মস্থলেই বাস করবে। সেবাকর্ম যদি করতে চায় সেইখানেই করবে। যেমন করছে আমার বন্ধু মানসের বৌ যুথিকা। জুলির বন্ধু মিলিকে আপনার মনে আছে নিশ্চয়। মিলি চলে গেছে ওর বরের সঙ্গে বিলেতে। ইংরেজদের সঙ্গে ব্যক্তিগত জীবনে ওর বেশ বনিবনা। জাতিগত জীবনে সংঘর্ষ। স্বকুমারের সঙ্গে বিয়ে হলে জুলিরও একই বরাত হতো। আমার সঙ্গে বিয়ে হলে আরেক রকম বরাত হবে। বেশ স্বাধীন হলেও আমার কাজ ফুরিয়ে যাবে না। নিচের থেকে ধাপে ধাপে অথরিটি গড়ে তুলতে হবে। উপরে উপরে ক্ষমতা হস্তান্তর আমার আদর্শ নয়। উপরে উপরে ক্ষমতা ক্যাপচার তো আমার আদর্শ নয়ই। জুলির সঙ্গে আমার আদর্শের অমিল আগেও ছিল, পরেও থাকবে। যেমন স্বকুমারের সঙ্গে মিলির অমিল। স্বকুমার লিখেছে লেবার পার্টি নির্বাচনে জিতে নিরঙ্কুশ হয়েছে। ইণ্ডিয়াকে ওরা কানাডার মতো ডোমিনিয়ন স্টেটাস দিতে প্রস্তুত, শুধু ভারতীয় নেতাদের একমত হতে হবে। ওরা খুব শীগগির দেশে ফিরছে। স্বকুমার আর মিলি। ইংলণ্ডের সঙ্গে সেতুবন্ধনের চেষ্টা করবে। মিলি ততটা না, স্বকুমার যতটা। কংগ্রেস নেতাদের হাত করতে বড়লাট ওয়েভেল সক্রিয়। তবে গান্ধীজীকে ভোলানো অত সহজ নয়। ভবী ভোলে না।” সৌম্য হাসে।

‘মিঞা বিবি রাজী, কী করবে কাজী? ইজ কঙ্গ রাজী, কী করবে গান্ধী? লেবার পার্টি হাত বাড়িয়ে দিচ্ছে, কংগ্রেস পার্টিও হাত বাড়িয়ে দেন; তারপরে দু’পক্ষের হাওশেক। অ্যামিকেবল সেটলমেন্ট। জেলযাত্রা চের হয়েছে। আর নয়। মাহুঘের ত্যাগশক্তিরও একটা সীমা আছে। সবাই তো আর মহাত্মা নয়। বল্লভভাই, রাজেন্দ্রপ্রসাদ, জবাহরলাল, এঁরা পঁচিশ বছর ধরে জেলে যাচ্ছেন আর আসছেন। এঁরা আর কদিন বাঁচবেন? মিটমাটের এই তো সময়। গান্ধীজী যদি এঁদের উপর দরদরির ভার ছেড়ে দেন এঁরা দেশকে বিকিয়ে দেবেন না। অন্তত এইটুকু বিশ্বাস এঁদের উপর থাকা উচিত। অত্যাচার দেশের পলিটিসিয়ানদের সঙ্গে তুলনায় এঁরা কেউ নিরেন্দ্র নন। এঁরাও সমান যান। হিংসা অহিংসার প্রশ্ন এখন না তোলাই ভালো। গভর্নমেন্ট চালাতে গেলে কিছুটা ভায়োলেঞ্চ তো দরকার হবেই। সেই ভয়ে যদি কংগ্রেস গভর্নমেন্টের দায়িত্ব না নেয় তো ইংরেজই থেকে যাবে। কংগ্রেসকে

বাস্তববাদী হতে হবে। আদর্শবাদ নিয়ে গান্ধী থাকতে চান থাকুন। তুমিও তাঁর সঙ্গে। জুলিও তোমার সঙ্গে। আমি বাস্তববাদী। তাই হুকুমারের প্রচেষ্টার সমর্থন করি। কবে আসছে ওরা?” তিনি জিজ্ঞাসা করেন।

“জাহাজ পেলেন নভেম্বরে। ওরা সমুদ্রপথেই আসতে চায়। সেটাই সম্ভাব্য। আরাম তাতেই দেখি। বাচ্চা আছে সঙ্গে।” সৌম্য মনে করিয়ে দেয়।

জুলির মা ড্রয়িং রুমে ফিরে যেতেই স্বপনদা বলে ওঠেন, “শুভস্ম শীঘ্রম্। আপনি আর দেরি না করে শীঘ্র বাজিয়ে দিন। ওসব গান্ধী টান্ধী বাজে ওজর। উনি কি পোপ আর সৌম্য কি রোমান ক্যাথলিক? জানেন তো, বিয়ের সময় রোমান ক্যাথলিকদের পোপের অনুমতি নিতে হয়। ওটা অবশ্য একটা ফর্মালিটি। বিশপরাই পোপের হয়ে অনুমতি দেন। পোপের এত সময় কোথায় যে কোটি কোটি ক্যাথলিকের বিয়ের কাগজপত্র দেখবেন? আমরা হিউমানিস্টরা পোপ-টোপ মানিনে। গান্ধীজীর আশীর্বাদ অবশ্যই চাই। কিন্তু অনুমতি? যদি না দেন? সৌম্য বাপের স্বপুত্রের মতো আজীবন হবে। কিন্তু কার্যামেল কেন সে অপমান সহ্য করবে?”

“কিন্তু বাপুকে যে ও বাপের মতো মানে।” জুলির মা বলেন।

“পোপ কথাটার মানেও বাপু। তাঁকে বাপের মতো মানতে মানতে ক্যাথলিকরা বিবাহের মতো প্রাইভেট ব্যাপারে তাদের লিবার্টি হারিয়েছে। গান্ধীভক্ত ভারতীয় জনগণেরও সেই দশা হবে না তো? আমি বলি, সৌম্য, তুমি চোখ বুজে ঝুলে পড়ো। আমি বাপুর কাছে আপীল করে অনুমতি আনিয়ে নেব।” স্বপনদা হাসেন ও হাসান।

সৌম্য বুঝিয়ে বলে, “ক্যাথলিকদের সঙ্গে তুলনা ঠিক নয়। গান্ধীজীর কাছে সবাই আশীর্বাদ চায়। অনুমতি চায় কেবল তারাই যারা কথা দিয়েছে যে দেশ মুক্ত না হলে বিয়ে করবে না। তখন তো জানা ছিল না যে দেশের স্বাধীনতার এত দেরি হবে। জানলে কথা দিতুম না। দিয়েছি যখন তখন তাঁর সঙ্গে দেখা করে স্বধাব আমার অঙ্গীকার থেকে আমি খালাস পেতে পারি কিনা। জুলি যদি আমার সহকর্মী হতে রাজী হয় বাপু খালাস দিতে রাজী হতে পারেন।”

“তার মানে কার্যামেলকে তার স্বাভাব্য বিসর্জন দিতে হবে। তুমি কি তাতে রাজী হবে, কার্যামেল?” স্বপনদা প্রশ্ন করেন।

“ও যদি আমাকে গ্রহণ করে ওর জন্তে আমি সব কিছু বিসর্জন দিতে রাজী। স্বাভাব্য আবার কী?” জুলি আবেগের সঙ্গে বলে।

স্বপনদা তারিফ করে বলেন, “মহাত্মা চৌধুরী, এই কথা একদিন তোমার কঙ্করবা হবে। আমি দিব্যদৃষ্টিতে দেখতে পাচ্ছি তোমাদের দু’জনেরই পায়ের ধূলো নেবার জন্তে গ্রাম গঞ্জ থেকে বুলক পেনে করে হাজার হাজার মানুষ আসবে। ক্যারামেল তোমার জন্তে সব কিছু বিসর্জন দিয়ে সীতা সাবিত্রীর পদাঙ্ক অহুসরণ করতে রাজী। আর ওর বৌদিকে দেখছ তৌ? বিয়ের পরেও সমানে চাকরি করে যাচ্ছেন। কিছুতেই ছাড়বেন না।”

বৌদি এটা প্রত্যাশা করেননি। শাক দিয়ে মাছ ঢাকার মতো হাসি দিয়ে রাগ চাপেন। বলেন, “এই প্রচ্ছন্ন হিটলারটির বন্ধমূল ধারণা নারীজাতির প্রকৃত স্থান হচ্ছে রান্নাঘর, আতুড়ঘর আর ঠাকুরঘর। হাইকোর্টে আজকাল মহিলা ব্যারিস্টাররাও প্র্যাকটিসে নেমেছেন। তা দেখে এঁর যা আতঙ্ক। আমি অক্সফোর্ডের ফাস্ট ক্লাস অনার্স পেয়ে নিজ গুণে চাকরি পেয়েছি। নিজ গুণেই চাকরি করে যাচ্ছি। এটা পতির পুণ্যে সতীর পুণ্য নয়। তাই এঁর যত আকোশ। নারীকে ইনি স্বনাম্নী হতে দেবেন না। কিন্তু ইংলণ্ডে আজকাল পুরুষরাই স্ত্রীর পদবী ধারণ করে যুক্তনাম। নতুন সেক্রেটারী অভ স্টেট ফর ইণ্ডিয়া লর্ড পেথিক-লরেন্স বিয়ের আগে ছিলেন পেথিক। মিস লরেন্সের সঙ্গে বিয়ের পর থেকে হলেন পেথিক-লরেন্স।”

মিসেস সিন্ধা স্বপনদার পক্ষ নিয়ে তর্ক করেন। “বিয়ের পরে যদি স্বামী স্ত্রী দু’জনেই চাকরি বা প্র্যাকটিস করে ঘরসংসারে শ্রী থাকে না, ছেলেমেয়েরা আদর যত্ন পায় না, চাকরবাকর লুটে পুটে যায়। স্বামীও স্ত্রীর জন্তে ত্যাগস্বীকার করছে, মাখার ঘাম পায়ে ফেলে রোজগার করে আসছে। ত্যাগটা একতরফা নয়। কিন্তু একালের মেয়েদের দোষ দেওয়া যায় না। বেশী লেখাপড়া শেখালে বড়ো চাকরির উচ্চাভিলাষ জাগবেই। যে মেয়ে ডক্টরেট পেয়েছে সে মেয়ে বিয়ের পরে ঘরে বসে কাঁথা সেলাই করবে না, স্নজ্জুনী রাঁধবে না। সেইজন্তেই তৌ আমি জুলিকে বেশী লেখাপড়া শেখাইনি। বিয়ে দিই স্কুল শেষ করার আগেই। তার ফল হয়েছে শোচনীয়।”

স্বপনদার মাখায় ঘুরছিল হিটলার। খাপছাড়া ভাবে বলেন, “হিটলারকে খাটো করার চেষ্টা বুখা। তিনি ছিলেন জিতেন্দ্রিয় পুরুষ। ব্রহ্মচারী।”


তা শুনে হাসাহাসি পড়ে যায়। দীপিকা বৌদি এবার তাঁর কত’র

বক্তব্য বিশদ করেন। “বার্জিনের পতন আর হিটলারের নিধন সংবাদ শুনে উনি কান্নায় ভেঙে পড়েন। বলেন, হেক্টরের নিধন। উয়ের পতন। সেই যে উনি শয্যা নেন তার পরে চব্বিশ ঘণ্টা দরজা বন্ধ। মস্কো রেডিও, বি. বি. সি., ভয়েস অভ্ আমেরিকা আমি একাই শুনি। হিটলারের স্বতদেহকে কবর দেওয়া হয়নি, দাহ করা হয়েছে। সেইসঙ্গে দাহ করা হয়েছে তার সঙ্গিনী এফা ব্রাউনের স্বতদেহকেও। হিটলারের অন্ত্যেষ্টিক্রিয়ার পূর্বে নাকি এফার সঙ্গে আইন অনুসারে বিবাহ। তা হলে আর ব্রহ্মচর্য রইল কোথায়? কান্নাও পায়, হাসিও পায়। ঠুকে বলিলে। পাছে শক্ পান। কিন্তু বেশীদিন না বলেও থাকা যায় না। শুনে বলেন, যে মানুষ মাছ খায় না, মাংস খায় না, মদ খায় না, তামাক খায় না, টাকা খায় না সে মানুষ বামাচারী হতে পারে না। ওটা প্রেটোনিক সম্পর্ক। ব্রতসিদ্ধির পর ওদের যথারীতি বিবাহ হতো। পতির সঙ্গে সতী একই চিতায় আরোহণ করেছেন। ব্রতসিদ্ধি হবার নয়। জয়ের আশা নিমূল। পরাজয়ের গ্লানি অসহ্য। নাটক হিসাবে বিস্তৃত ড্র্যাডেডী। রাজকিনী প্রেম নিকষিত হেম কামগন্ধ নাহি তায়।”

সৌম্য এতক্ষণ চুপ করে শুনছিল। বলে, “আমার মনে আছে এক মুসলমান ফকিরনীর কণ্ঠে শুনেছি ‘চণ্ডিদাস আর রাজকিনী তারাই প্রেমের শিরোমণি, এক মরণে দু’জন মলো রে প্রেমপূর্ণ প্রাণে।’ হাজার বছর পরে হিটলার আর এফা ব্রাউন সম্বন্ধেও ওদেশের লোকসঙ্গীতে অমুরূপ পদ শোনা যাবে।”

স্বপনদা খুশি হয়ে বলেন, “লোকসঙ্গীতের ধারা ওদেশে এখনো শুকিয়ে যায়নি। ব্যালাড সিদ্ধার এখনো নানা জায়গায় ঘুরে বেড়ায় আর বেহালা বা ম্যাণ্ডোলিন বাজিয়ে ব্যালাড শোনায়। জার্মানদের মধ্যে অশেষ বৈচিত্র্য। তবে এমন দুর্ভাগা জাতি আর নেই। অনেকটা আমাদেরই মতো। এবার তো ওরাও পরাধীন। আমরাও পরাধীন। আমরা একদিন ইংরেজের হাত থেকে মুক্ত হলেও হতে পারি, কিন্তু রুশের হাত থেকে ও মার্কিনের হাত থেকে জার্মানদের মুক্তি আমার দূরদৃষ্টির বাইরে। সৌম্য, তুমিও তো জার্মানী দেখে এসেছ। তোমার কী মনে হয়?”

সৌম্য একটু ভেবে নিয়ে বলে, “ভারত যদি গান্ধীজীর সত্যগ্রহের শক্তিতে শক্তিমান হয়ে মুক্ত হয় তবে জার্মানীও ভারতের দৃষ্টান্ত অনুসরণ করে



সত্যগ্রহের শক্তিতে শক্তিমান হয়ে মুক্ত হবে। সত্যগ্রহই হচ্ছে যুদ্ধবিগ্রহের নৈতিক বিকল্প। বিদ্রোহ বিপ্লবেরও। এটা যদি ভারতের বেলা উপযোগী হয়ে থাকে তো জার্মানীর বেলাও উপযোগী। আমরা যারা ভারতের মুক্তি-সংগ্রামে গান্ধীপন্থা অনুসরণ করে চলেছি তারা সারা বিশ্বের জন্তে পায়ের চিহ্ন রেখে যাচ্ছি।”

“দূর পাগলা।” স্বপনদা ফুৎকারে উড়িয়ে দেন। “যারা এতকালের খ্রীস্টকে ছেড়েছে তারা একালের গান্ধীকে ধরবে? কেন ওরা নতুন করে পেগান হতে গেল এ নিয়ে কখনো ভেবে দেখেছ? আমি তো অন্ধকারে আলো খুঁজে পাচ্ছি। রাজনীতি অর্থনীতির ভিতরে এর উত্তর নেই; সমাজনীতির ভিতরেও না। দর্শনের ভিতর থাকলেও থাকতে পারে।”

প্রসঙ্গটা ঘুরিয়ে দিয়ে দীপিকাদি বলেন, “কই, সোম্য, তুমি তো বললে না জুলির জন্তে তুমি কী বিসর্জন দেবে? না, বিসর্জনটা একতরফা হবে? যেমন তোমার স্বপনদার ধারণা।”

সোম্য এর উত্তরে বলে, “আমার যা কিছু ছিল সব কিছু আমি দেশের জন্তে বিসর্জন দিয়েছি। তার মানে ট্রাস্টীদের হাতে দিয়েছি। জুলির খাতিরে ওদের একজন সরে যাবে। জুলিও একজন ট্রাস্টী হবে। গ্রামে গিয়ে বসলে খাওয়া পরার কষ্ট হবে না। পরিশ্রম করলে স্বচ্ছন্দেও থাকা যায়। কিন্তু শহরের মায়া কাটাতে হবে। গ্রামের ধন শহরে এনে খরচ করা চলবে না।”

স্বপনদা দীপিকাদিকে মুখ খুলতে দেন না। বলেন, “আমার প্রশ্ন হলো হিটলার যদি পেগানই হবেন তা হলে মৃত মাংস বর্জন করবেন কেন? পেগানরা তো আস্ত শুয়োর পুড়িয়ে খেত। এখনো ইংরেজ অভিজাতরা তাই করে। আমার মতে হিটলার ছিলেন প্রচ্ছন্ন হিন্দু। হিন্দুদের মতো তাঁর আয়সংস্কার হলো। হিন্দুদের মতোই তাঁর বিবাহিতা পত্নী সতী হলেন।”

বৌদি হাসতে হাসতে বলেন, “তুমি দেখছি ডেভিলস্ আডভোকেট। আমি কিন্তু জানিয়ে রাখছি আমি সহমরণে গিয়ে সতী হব না। যদি তুমি আগে যাও। পুরুষের মতো নারীও একটি ব্যক্তি। তার জীবন তার, মরণও তার।

সেদিন আলাপ আলোচনার পর এই স্থির হয় যে সোম্য যাবে সেবাগ্রামে মহাত্মার অনুমতি প্রার্থনা করতে। আগে অনুমতিলাভ। তারপরে আর সব। কবে বিয়ে, কোন্ মতে। বিয়ের পর জুলি কোথায় থাকবে। আশ্রমে



না স্বপ্নবাবীতে না মায়ের কাছে। অহুমতি না পেলে কিন্তু অচল অবস্থা। তখন কর্তব্য স্থির করার জন্যে আবার বৈঠক বসবে। স্বপনদা ও দীপিকাদি আসবেন।

এমন সময় সৌম্য এক ফ্যাসাদ বাধায়। “আমার তো বাবা নেই, বাপুই আমার বাবা। বাপের কাছে ছেলে মুখ ফুটে বলে না, বাবা, আমি বিয়ে করতে চাই। এদেশের রেওয়াজ কন্যাপক্ষের একজন মুক্‌বি গিয়ে বরকর্তার কাছে প্রস্তাবটা পাড়বেন। বর এমন ভাব দেখাবে যেন ভিজ়ে বেড়ালটি। কিছুই জ্ঞানে না। এক্ষেত্রে মুক্‌বি হতে হয় কনের মাকেই। কিন্তু তাঁকে সেবাগ্রামে টেনে নিয়ে যাওয়া এক প্রকার অত্যাচার। যদিও বাপু খুব খুশি হয়ে রাজী হতেন। তাঁর দিদি তো অস্থস্থ মানুষ। জুলির মুক্‌বি বলতে আমি একজনকেই দেখতে পাচ্ছি। তিনি স্বপনদা।”

স্বপনদা কৌস করে ওঠেন। “আমি যাব পোপের সঙ্গে অভিয়েন্স যাচ্ঞা করতে রোমে! পোপ যদি অহুমতি না দেন আমার মুখ থাকবে?”

“তা হলে, চল, সৌম্য, আমিই তোমার মুক্‌বি হয়ে যাই। আমার আজ্ঞা শুনে তোমার বাপু কিছুতেই ‘না’ বলতে পারবেন না। বললে আমি ধর্না দেব। জুলি যদি আমার সঙ্গে যেতে রাজী থাকে তো আরো ভালো। ওর মুখ দেখলে পাষণ্ড গলে যায়। সারা জীবন কেবলি একটার পর একটা ধাক্কা খেয়ে আসছে। শেষ ধাক্কা নেতাজীর আকস্মিক হৃৎটনায় প্রাণত্যাগ।” বৌদি সমবেদনার সঙ্গে বলেন।

“বিলকুল বুট হায়!” জুলি জলে ওঠে। “ওটা আত্মগোপনের ছলনা। মার্কিনদের চোখে ধুলো দিয়ে রুশ দখলী অঞ্চলে চলে গেছেন।”

বৌদি তা শুনে বলেন, “তা হলে জুলির না যাওয়াই ভালো। আমি ওসব বিতর্কিত প্রশ্ন এড়িয়ে যাব।”

স্বপনদা ঘোরতর আপত্তি করেন। “গৃহকর্তাকে একলা ফেলে গৃহিণী কখনো ফেরার হন? আমি ফেরারি পরোয়ানা জারি করব না? ধর্না! ধর্না দেবে তুমি! আমার মাথা কাটা যাবে না। কাগজে কাগজে টি টি পড়ে যাবে না?”

জুলির মা হেসে বলেন, “স্বপন ওর বৌকে কত ভালবাসে দেখছ তো। দেখে শেখ। একটা দিনও চোখের আড় করবে না।”

“না, মাসিমা, এর একটা প্র্যাকটিক্যাল কারণ আছে। রাহু না থাকলে

ওর কুকুর এল্ফকে আমি সামলাতে পারব না। তা হলে কুকুরকেও সেবাগ্রামে টেনে নিয়ে যেতে হয়। সে বেচারার উপর অত্যাচার।”

তখন এই স্থির হয় সেবাগ্রামে গিয়ে সৌম্য সোনাদিকে অহরোধ করবে কন্যাপঙ্কের মুরুবি হতে। সোনাদি সহায় হলে অহুমতি সহজলভ্য।

জুলি বায়না ধরে সেও সৌম্যর সঙ্গে সেবাগ্রামে যাবে। সোনাদিদের অতিথি হবে। ওর মা সেটা এককথায় খারিজ করেন। “কনের দিক থেকে বোলাঝুলি লজ্জাকর ব্যাপার। আমাদেরও তো মানসম্মত আছে।”

আসল কারণ পুলিশকে তিনি কথা দিয়েছেন যে জুলিকে চোখে চোখে রাখবেন। যদিও তার আর দরকার নেই, জেলগুলো খালি হয়ে গেছে। গোলমাল যা তা ওই আজাদ হিন্দ ফৌজের তিন প্রধানের বিচার নিয়ে। এর মধ্যে রেকর্ড বেরিয়ে গেছে, “কদম কদম বঢ়ায়ে যা।” সরকারী কর্মচারীদের বাড়ীর ছেলেমেয়েরাও সে রেকর্ড বাজিয়ে কুচকাওয়াজ করছে।

সোনাদিকে সৌম্য চিঠি লেখে। যতদিন না তাঁর উত্তর আসে ততদিন সে কলকাতায় থাকবে। সোদপুর আশ্রমের কাজ সেরে নিয়ে বেড়াতে বেরোবে। ভাবী বরবধু নিজেদের মধ্যে একটা বোঝাপড়ায় আসবে। যদিও তাদের পরিচয় পনেরো ষোল বছরের তবু প্রাণ খুলে কথা বলার সুযোগ কেউ কোনোদিন পায়নি। প্রেম নিবেদন তো দূরের কথা। স্বরাজের জ্ঞান মূলতুবি রেখে দিয়েছে। এখন মনে হচ্ছে স্বরাজের খুব বেশী দেরি নেই। ইংরেজদের সঙ্গে কংগ্রেস নেতাদের কথাবার্তা শুরু হয়ে গেছে। এখন মুসলিম লীগকে নিয়েই ভাবনা।

একদিন গঙ্গা পার হওয়ার সময় জাহাজে তাঁর সঙ্গে দেখা। “চিনতে পারছেন? সেই পুরনো পাপী। আপনাদের সিভিল সার্জন। ক্যাপটেন ল। পরে মেজর ল। শেষ সাক্ষাৎ সিঙ্গাপুর যাত্রার আগে। তার পরে প্রায় ছ’ বছর কেটে গেছে। এ কন্যাটি কে? মঞ্জুলিকা সিন্হা? সিভিল সার্জন ক্যাপটেন সিন্হার মেয়ে? ক্যাপটেন মুস্তাফীর মেয়ে মধুমালতীর বান্ধবী?”

সৌম্য চিনতে পারে। জুলি পারে না। ভদ্রলোক তাঁর সহযাত্রীণীর সঙ্গে আলাপ করিয়ে দেন। “সিভিল সার্জন ডাক্তার ঘটকের কন্যা কৃষ্ণকলি। বারনা বলে জানে সকল লোক। বাপ মায়ের অমতে ওয়াকি হয়ে যুদ্ধে যায়। যুদ্ধের শেষে দেশে ফিরে নিজের ঘরেই ঠুঁটে পাচ্ছে না। ওয়াকি বলে সমাজেও একঘরে। এখন থাকে ওর বান্ধবী সবিতার ওখানে। সেও ছিল ওয়াকি।

ওরা ইজবদ। তাই এমন গোড়া নয়। যুদ্ধকালে ইংরেজের মেয়ে যদি ওদেশে ওয়াকি হতে পারে বাঙালীর মেয়ে হবে না কেন ? এরা বীরাজনা। তাই বীরপুরুষকে দেখে এক আঁচড়ে চিনতে পারে। সিঙ্গাপুরে নেতাজী আমাকে জাপানীদের বন্দিশালা থেকে উদ্ধার করে আজাদ হিন্দ ফৌজের চিকিৎসাবার দেন। মেজরকে বানিয়ে দেন ব্রিগেডিয়ার। ফৌজের সঙ্গে আমিও ক্রুটে গেছি। অ্যাকশন দেখেছি। জয় করে এগিয়ে এলে নেতাজী আমাকে মেজর জেনারেল বানাতেন। দুর্ভাগ্য ! তাঁর ইচ্ছা ছিল আমরা আবার চেষ্টা করব। ট্রায়, ট্রায় এগেন। তিনি বলতেন, ডিফিট ইজ আ ওয়ার্ড নট ফাউণ্ড ইন মাই ডিক্সনারী। জাপানীরা যে আচমকা আত্মসমর্পণ করবে এর জন্মে তিনি প্রস্তুত ছিলেন না। কোথায় যে অন্তর্হিত হলেন কেউ সঠিক বলতে পারে না। মাঝখান থেকে আমি পড়ে যাই ফাঁপরে। ব্রিটিশ কর্তৃপক্ষের চোখে আমি একজন ট্রেটর। চেনা জানা সাহেবরা সাটিফিকেট দেন যে চিকিৎসায় আমার হাতযশ আছে বলে বিদ্রোহী ফৌজ আমাকে বন্দিশালা থেকে ধরে নিয়ে যায়। ডাক্তারের কর্তব্য হলো চিকিৎসা, তা সে শত্রুরই হোক আর মিত্রেরই হোক। কাউকে তো আমি মারিনি, বরং কতকগুলি লোককে বাঁচিয়েছি। তারা দুই পক্ষের লোক। কোট মার্শাল থেকে রক্ষা পেয়েছি, কিন্তু চাকরিটি গেছে। র‍্যাঙ্ক কেড়ে নেওয়া হয়েছে। এখন আমি কাগজে কলমে ক্যাপটেনও নই। চাকরি গেছে তার জন্মে দুঃখ নেই, লাহা পরিবার গরিব নয়। কিন্তু র‍্যাঙ্ক কেড়ে নিয়েছে। কী অন্যায়। আমি যাচ্ছি বিলেতে আপীল করতে। মাতাল ফিলিপের কাছ থেকে অপ্রমত্ত ফিলিপের কাছ : ব্রিটিশ জাস্টিসের উপর আমার আস্থা আছে।”

জুলি লাল হয়ে বলে, “মাফ করবেন, ব্রিটিশ জাস্টিস না ব্রিটিশ ইনজাস্টিস ? আমার বাবা প্রথম মহাযুদ্ধে টার্কদের হাতে বন্দী হয়েছিলেন। যুদ্ধের ডেপুটিতে তাঁর নাম উল্লেখ করা হয়েছিল। কিন্তু ক্যাপটেনের উপরে তাঁকে উঠতেই দেওয়া হয় না। কী অপরাধে জানেন ? জালিয়ানওয়ালা বাগ তিনি বরদাস্ত করেননি। হজুর বাহাদুরদের দু’কথা শুনিয়ে দিয়েছিলেন। আপনি বিলেত যাচ্ছেন, যান। কিন্তু দেশ স্বাধীন হলে আপনাকে আমরা নেতাজীর বিখ্যাত চিকিৎসক হিসাবে সম্মানের পদ দেব না। সার্জন জেনারল তো নয়ই, ইনস্পেক্টর জেনারল ও প্রিজন্স পদও আপনার কপালে নেই। ক্ষমা চেয়ে আবার সেই সিভিল সার্জন।”

“তা বলে কি আমার জীবনের এই সাধটা অপূর্ণ থেকে যাবে? মরার আগে একবার বিলেত দেখতে পাব না? আর এই যে বীরাক্ষনা এর কি এদেশে কোনো ভবিষ্যৎ আছে? তোমাদের হাতে ক্ষমতা এসে তোমরা কি একে ছেই ছেই করবে না? এ মেয়ে ওয়াকি হলেও নেতাজীর পরম ভক্ত। আমি তাঁর বিশ্বস্ত সহযোগী বলে আমাকেও এ মেয়ে বীরপুরুষ বলে পূজা করে। আমার সম্বন্ধনা সভা যখন যেখানে হয় তখন সেখানে হাজির হয়। সভা তো লেগেই রয়েছে। লোকে নেতাজী আর আজাদ হিন্দ ফৌজের খবর শুনতে পাগল। আমি ছিলুম তাঁর কাছের মানুষ। হাঁড়ির খবর জানতুম। তা বলে তো হাটে হাঁড়ি ভাঙা যায় না। তাঁর অমুমতি নিতে হবে আগে। প্রথমে জানতে হবে তিনি এখন কোথায় আত্মগোপন করে রয়েছেন। ওট য়ে রটেছে প্লেন দুর্ঘটনা ওটা ডাঙা মিথো। কিন্তু যা বলছিলুম এই যে বীর তরুণী এর কী জানি কেন আমার মতো এক বুদ্ধকে ভালো লেগেছে। এককালে আমার স্বপ্ন ছিল বিলেত যাব, আই. এম. এস. হব মেম বিয়ে করব, তার কোনো সম্ভাবনা দেখছি। তাই বুদ্ধশ্র তরুণী ভার্যার কথা ভাবছি। ওব মা কিছুতেই রাজী নন। দোনার বেনের সঙ্গে বামুনের মেয়ের শিয়ে! ওর বাবা আমাকে কানে কানে বলেছেন, ওয়াকিকে কেউ বিয়ে করবে না। ও মেয়ে ওল্ড মেড হবে। আমরা মারা গেলে ওকে দেখবে কে? ওর বান্ধবী সবিতাই বা কদিন আশ্রয় দেবে? শুনছি সবিতারও পাত্র জুটেছে। আমরা যদি বারনাকে তোমার হাতে সম্প্রদান করি আত্মীয়রা কেউ আসবে না। কিন্তু তুমি যদি ওকে নিয়ে পালিয়ে গিয়ে বিয়ে কর তা হলে আমরা দু’দিন গালমন্দ করে পরে ঠাণ্ডা হবে। তুমি যুদ্ধক্ষেত্র থেকে ফিরেছ, তুমি ক্ষত্রিয়। বারনাও যুদ্ধের আনুষ্ঠানিক কাজ করেছে, সেও ক্ষত্রিয়ানী! তোমাদের বিবাহ অসম্বর্ণ নয়। পালিয়ে যাওয়ার আইডিয়াটা তিনিই আমার মাথায় ঢুকিয়ে দেন। আমি সেটাকে একটু পল্লবিত করি। কলকাতা থেকে জাহাজে চড়ে সোজা লণ্ডন। সঙ্গে বারনা। বিয়ে তো জাহাজেও হতে পারে। তবে বারনা যদি চায় জাহাজে ওঠার আগেই সেরে নিতে পারি। কী বলো, ডারলিং।” লাহা ওর দিকে লাহুরাগে তাকান।

“বিশ্রী কালো মেয়ে, তিরিশের উপর বয়স, ওয়াকি বলে অপবাদে পাত্রী, গুরুজন আমাকে পাত্র হ করার আশা ছেড়ে দিয়েছেন। আমিও বিলেত যেতে চাই। কোয়ালিফিকেশন আরো বাড়াব। বিয়ের কথা তার পরে ভাবা

যাবে। যদি ততদিন আপনার মেম বৌ না মিলে থাকেন। জাহাজে আমি আপনার সঙ্গিনী হব। জীবনসঙ্গিনী হব কি না সেটা পরের কথা।” বারনা দৃঢ়তার সঙ্গে বলে। ইস্পাতের ফলার মতো ঝঞ্ঝু দীঘল গড়ন। ঠেং পুরুবালি চেহারা। টেনিস চ্যাম্পিয়ন।

লাহা ওর হাত ধরে বলেন, “সৌম্য সাক্ষী, জুলি সাক্ষী, গঙ্গা সাক্ষী, অন্তরীক্ষ সাক্ষী, তোমার সঙ্গে আজ থেকে আমি এগেজড। যার কাছে আমি হীরো সেই আমার কাছে হীরোইন। গায়ের রং নিয়ে আমি কী করব? মনের বৃত্তিই আসল। ইউ আর আ লাভলী গার্ল। তিরিশ নয়, উনিশ।”

## ॥ তিন ॥

স্বপনদার জন্মে আরো প্রচণ্ড শক অপেক্ষা করছিল। এটা তাঁকে একেবারে কাৎ করে দেয়। নাৎসীদের কনসেনট্রেশন ক্যাম্পে বিনা বিচারে আবদ্ধ ইহুদী, পোল ও জিপসীদের গ্যাস চেম্বারে পুরে গণহত্যা। সর্বমোট ষাট লক্ষের মতো। যুদ্ধকালে এসব গোপন ছিল। পরে ক্রমে ক্রমে উদ্ঘাটিত হয়েছে। সভ্য জগৎ শিউরে উঠছে। যারা ঘটিয়েছে, যাদের উপর ঘটানো হয়েছে তারা দুই পক্ষই সভ্য। এ কেমনতরো সভ্যতা? মানবিক না দানবিক?

হিটলার সম্বন্ধে তাঁকে নতুন করে ভাবতে হয়। বোমার মুখে যারা পড়ে তারা নারীও হতে পারে, শিশুও হতে পারে, তাদের মৃত্যু ইচ্ছাকৃত খুন নয়। কিন্তু গ্যাস চেম্বারে পুরে যাদের মৃত্যু ঘটানো হয়েছে তারা বিভিন্ন দেশের বিভিন্ন শহরে, বিভিন্ন গ্রামে বাস করত। তাদের বাড়ী থেকে একে একে ধরে বেঁধে বা ভুলিয়ে ভালিয়ে নিয়ে আসা হয়েছে বলিদানের জন্তেই। লক্ষ লক্ষ বাল বৃদ্ধ বনিতা, তাদের আর কোনো দোষ নেই, তারা ইহুদী বা পোল বা জিপসী। যুদ্ধের সুযোগ নিয়ে এক একটা জাতির বংশলোপের অভিযান। যেমন মশককুল বিনাশের জন্তে ডি ডি. টি. প্রয়োগ।

“ব্রহ্মচারী নয়, ব্রহ্মদৈত্য।” স্বপনদা অক্ষুট স্বরে বলেন।

তা শুনে বৌদি মন্তব্য করেন, “চোখ একটু একটু করে ফুটেছে। আরো ফুটবে। তবে হিটলারকে তুমি হিন্দু ঐতিহ্যের মধ্যে পাবে না। পেতে পারো বরং খ্রীষ্টীয় ঐতিহ্যে। হিটলারই সেই অ্যান্টিক্রাইস্ট যার আসার কথা খ্রীস্টের পুনরাগমনের পূর্বে।”

স্বপনদা খ্রীষ্টীয় থিয়োলজি পড়েননি। পড়তে আগ্রহ বোধ করেন না। তাঁর অধ্যয়নের সীমা ইউরোপীয় সাহিত্য, দর্শন, ইতিহাস ও শিল্প অবধি। সাহিত্যের ভিতর দিয়ে যেটুকু থিয়োলজি পান সেইটুকুই তিনি জানেন। যেমন দাস্তের ডিভাইন কমেডির ভিতর দিয়ে। কিংবা মিলটনের ‘প্যারা ইজ লস্টে’র।

নেপথ্যে রিহার্সলের পর বিশ্বরঙ্গক্ষেত্রে প্রকাশ্যে অভিনীত এক মহানাটক হচ্ছে মহাযুদ্ধ। হিটলার, মুসোলিনি, তোজো, চাচিল, রুজভেল্ট, স্টালিন, পেত্যা, গুল, স্ত্রীভাষ প্রভৃতি তার কুশীলব। প্রেক্ষাগৃহে বসে পাঁচ ঘণ্টা ধরে উপভোগ করা যায়। আর সব নাটকের মতো, উপন্যাসের মতো, আটের মতো এটাও হচ্ছে মায়া। মহাযুদ্ধ যখন, তখন মহামায়ার মায়া।

হিন্দুদের ছুটি মহাতত্ত্ব আছে যা দিয়ে বিশ্বপ্রপঞ্চের অর্থ বোঝানো হয়। লীলাময়ের লীলা। মহামায়ার মায়া। যে নাটকে প্রেমের দৃশ্য নেই লীলাময়ের লীলা বলে তার ব্যাখ্যা করা চলে না। মহামায়ার মায়া বলে ব্যাখ্যা করলে তবু কতকটা বোধগম্য হয়।

স্বপনদার মুখে ‘মহামায়ার মায়া’ শুনে বৌদি জিজ্ঞাসা করেন, “কবে থেকে তুমি মায়াবাদী হলে?”

“কেন? আমি কি বলেছি ব্রহ্ম সত্য, জগৎ মায়া?” দাদা জবাব দেন, “আর্ট মাত্রই মায়া। আর এটা তো মহানাটকের বিষয়—এই মহাযুদ্ধ, যা সম্প্রতি শেষ হয়েছে। মায়া! মায়া! মহামায়ার মায়া! এ ছাড়া আর কোনো অর্থ হয় না। অর্থ এর রাজনীতিতে নেই, অর্থনীতিতে নেই, সমাজ-নীতিতে নেই, ধর্মনীতিতেও নেই। ওসব যেন আধার ঘরে কালো বেডাল খোঁজা, যে বেডাল সেখানে নেই।”

বৌদি সহানুভূতির সঙ্গে বলেন, “বুঝতে পারছি তুমি খুব কষ্ট পাচ্ছ। কিন্তু তা বলে তুমি তোমার স্বধর্মভ্রষ্ট হবে কেন? তুমি হিউমানিস্ট। তোমার ধর্ম হিউমানিজম। মহামায়ার মায়া তোমার মুখে মানায় না। তোমার পক্ষে ওটা একটা পরাজয়। তুমি কেন ডিফিটিস্ট হবে?”

“জাথ, রাহু, যে কোনো একটা হত্যাকাণ্ডের বিবরণ পড়েই আমি মর্মে আঘাত পাই। আর এ তো কোটি কোটি হত্যাকাণ্ড! তার মধ্যে লক্ষ লক্ষ নিরীহ নারী ও শিশুর নিধন। একদিকে পরমাণু বোমা, আরেক দিকে গ্যাস চেম্বার। বৈজ্ঞানিক প্রতিভার ব্যভিচার। আসল খুনী সৈনিকরা নয়, বৈজ্ঞানিক আর রাজনীতিকরাই। মানুষকে এরা সুখ স্বাচ্ছন্দ্য কিছু দিয়েছে বইকি। কিন্তু কত দামে? পঁচিশ বছর অন্তর অন্তর মহামারী। তাও বেছে বেছে ঠগ উজাড় নয়, ঠগ বাছতে গাঁ উজাড়। গত শতাব্দীর বৈজ্ঞানিকরা বলতেন, যোগ্যতমের উত্তরন। সারভাইভাল অভ্যুৎকৃষ্ট। কিন্তু এই শতাব্দীতে দেখা গেল যোগ্য অযোগ্য সবাই এক নোকায় ডুবেছে। আবার যদি মহাযুদ্ধ বাধে গোটা পৃথিবীটাই টাইটানিক জাহাজের মতো সবাইকে নিয়ে ডুবেবে। যোগ্যতমের উত্তরন একটা ফ্যালাসী।” স্বপনদা অভিযোগ করেন।

“বেশ তো, তোমরা সাহিত্যিকরা সে ফ্যালাসী শুধরে দাও। নাটক লেখ, উপন্যাস লেখ, গল্প লেখ। তুমি তো কেবলি ভাবছ আর ভাবছ। রদ্যার ভাবকের মতো। কলম ধরে লিখছ না কেন? বৈজ্ঞানিক আর রাজনীতিকরা যে অনিষ্টটা করছেন তোমরা সাহিত্যিকরা সেটাকে ইষ্ট দিয়ে ভাসিয়ে দিতে পারো। ইভিল যত প্রবল হোক না কেন গুড তার চেয়েও প্রবল হতে পারে। শয়তান যত শক্তিশালী হোক না কেন ভগবান তার চেয়েও শক্তিশালী। যদি ভগবানকে বাদ দিয়ে ভাবতে চাও তো শয়তানকেও বাদ দিয়ে ভাবো। কোথাও যদি ভগবানের হাত দেখতে না পাও তো শয়তানের হাতই বা দেখতে যাও কেন? আজকের ছুনিয়ায় যেসব ফোর্স কাজ করছে হিটলার, স্টালিন, চার্চিল, রুজভেল্ট হচ্ছেন তাদের হাতের যন্ত্র। ওঁরা কেউ ব্যক্তিগত খামখেয়ালির দ্বারা চালিত হয়ে মারাত্মক সব সিদ্ধান্ত নেননি। নৈর্ব্যক্তিক চাপ তাঁদের বাধ্য করেছে। প্রাইভেট লাইফে কেউ হয়তো খারাপ লোক নন। পাবলিক লাইফে প্রত্যেকেই কম বেশী খারাপ। বৈজ্ঞানিকরাও তাই, যদি রাষ্ট্রের অর্থ গ্রহণ করেন। তুমি স্বাধীন ব্যারিস্টার। তোমার মতো স্বাধীনতা কার? তুমি তোমার স্বাধীনতার সদ্ব্যবহার করো। অন্তর ব্যভিচার নিয়ে ওল্ড মেডদের মতো যত কুটকচালি করতে যাও কেন?”

“আমি ওল্ড মেড!” স্বপনদা কল্পণ কণ্ঠে বলেন।

“ওল্ড মেড বলিনি। বলেছি ওল্ড মেডদের মতো। বয়স গড়িয়ে যাচ্ছে, সেদিকে খেয়াল আছে? কবে লিখবে তোমার ক্লাসিক উপন্যাস? কবে থেকে শুনে আসছি তুমি এই লিখবে, ওই লিখবে, কিন্তু লিখতে তো হাত ওঠে না। মাদাম বোভারীর ব্যাভিচারের মতো ব্যাভিচারই তোমার প্রিয় বিষয় মনে হচ্ছে। লেখ না কেন একটা মুখরোচক কেচ্ছা। তোমাদের ব্যারিস্টার মহলে তো পরকায়ী প্রেমের অভাব নেই। পরকীয়াকে পরে স্বকীয়ীও করা হচ্ছে। স্বকীয়ীকে পরকীয়ী।” বৌদি রসিয়ে রসিয়ে বলেন।

“লিখি আর তারপরে লাইবেলের মামলায় জড়িয়ে পড়ি। এদেশে ‘মাদাম বোভারী’ লেখার মতো বাকমারি আর নেই।” স্বপনদা সহাস্তে বলেন।

“চিরন্তন জিভুজ না হলে কি চিরায়ত সাহিত্য হয়? পশ্চিমের আদি কবি হোমারের ‘ইলিয়াড’ কি এর সেরা দৃষ্টান্ত নয়?” বৌদি পরিহাস করেন।

“তা যদি বলে ভারতের আদি কবি বাল্মীকির রামায়ণও তাই। হেলেন, পারিস, মেনেলাউস। রাম, রাবণ, সীতা। রাবণ সীতার সতীত্বহানি করেনি, এই যা তফাৎ। তবে অযোধ্যার লোক সেটা বিশ্বাস করল না। তাই শেষ পর্যন্ত ট্র্যাজেডী।” স্বপনদা দরদের সঙ্গে বলেন।

“মধ্যযুগেও তো একই খীম। এদিকে বিদ্যাপতি, চণ্ডিদাস। ওদিকে দাস্তে, পেত্রার্ক। পরকীয়ী না হলে চিরায়ত সাহিত্যই হয় না। তার মানেই চিরন্তন জিভুজ। এ সমস্তা তিন হাজার বছর আগেও ছিল, তিন হাজার বছর পরেও থাকবে। তুমি সমসাময়িক সমস্তা নিয়ে দিনরাত ভাবছ, কিন্তু এক আধ শতাব্দী পরে এসব সমস্তা বাসী হয়ে যাবে। হিটলাবের আমলের কোনো চিহ্নই থাকবে না। চার্চিলকেও লোকে ভুলে যাবে। স্টালিনের ডিকটেক্টরশিপ রাশিয়ানদের অসহ্য হবে। রুজভেল্টের নিউ ডীল তাঁর সঙ্গে সঙ্গেই লোপ পাবে। জাপান আবার মাথা তুলে দাঁড়াবে। কিন্তু তার এটুকু শিক্ষা হয়েছে যে পাল হারবারে বোমা ফেললে হিরোশিমায় বুঝে যাওয়া হয়। ওটা জার্মানদেরও শিক্ষার সূত্র। স্কুল কলেজ ইউনিভার্সিটিতে পড়ে এ শিক্ষা হতো না। পরকে মেরে তার হাতে মরাও একপ্রকার পরোক্ষ আত্মহত্যা। তৃতীয় মহাযুদ্ধে এটা আরো পরিষ্কার হবে।” বৌদির বিশ্বাস।

“তৃতীয় মহাযুদ্ধ কি সত্যি বাধবে?” স্বপনদার সন্দেহ।

“বাধলে আশ্চর্য হব না। না বাধলে আনন্দিত হব। মানবজাতির উপরে তোমার যতখানি ভরসা আমার ততখানি নেই। তুমি ধরে নিয়েছ এ জাতি



দিন দিন আরো বিজ্ঞ হবে। আমি কিন্তু দেখছি যতবার নতুন কোনো যন্ত্র বা নতুন কোনো অস্ত্র উদ্ভাবন করেছে ততবার ধরাশয়ি হয়ে গেছে। ফলে প্রগতিটাই হয়েছে দুর্গতির সঙ্গে একাত্ম। এর যদি কোনো প্রতিকার খুঁজে বার করতে পারো তো সমসাময়িক বিষয় নিয়ে লেখ। নয়তো মন দাও চিরন্তন বিষয় নিয়ে চিরায়ত কাব্য নাটক উপন্যাস রচনায়। যদি সে ক্ষমতা থাকে।” বৌদি গুরুজনের মতো উপদেশ দেন।

“একেই বলে কাস্টাসমিটি।” স্বপনদা হাসেন। “তুমি ছাড়া আর কে আমার উপর মাস্টারি করবে? কিন্তু সমসাময়িক ঘটনাগুলো আমাকে এমনভাবে নাড়া দেয় যে আমি অথও মনোযোগ দিয়ে পাঁচ দশ পৃষ্ঠার বেশী লিখতে পারিনে। অসমাপ্ত পাণ্ডুলিপিতে দেয়াজ ভরে গেছে। একদিন না একদিন সমাপ্ত করব বলে সংরক্ষণ করছি। কিন্তু মনের মতো মূড পাচ্ছি। ডসটয়েভ্‌স্কির মতো যদি অস্বাভাব থাকত তা হলে পেটের জালায় সমাপ্ত করতুম আর প্রকাশকের হাতে দিয়ে প্রাণরক্ষা করতুম। বাবা যা রেখে গেছেন তা তোমার আমার পক্ষে ঢের। আর একজন কি দু'জন এলে অবশ্য গতর খাটরে রোজগার করতে হবে। তার জন্মেই তো ব্যারিস্টার হয়েছি। বই লেখার চাড়া নেই। ডসটয়েভ্‌স্কির পদ্ধতি অনুসরণ করে অফুরন্ত সৃষ্টি করতে পারছি। যার অস্বাভাব নেই তার থাকে রবি ঠাকুরের মতো ড্রাইভিং ফোর্স। যে ফোর্স ইঞ্জিনকে ঠেলে নিয়ে যায় হাওড়া থেকে দিল্লী, বোম্বাই, মাদ্রাজ। বন্ধিমের ভিতরেও সে ফোর্স ছিল। কিন্তু ছিল না মাইকেলের ভিতরে। হয়তো থাকত ব্যারিস্টার না হলে।”

ইতিমধ্যে সৌম্যর চিঠি পেয়ে সোনা দিল্লীতে গিয়েছেন, “তোমরা বিয়ে করতে চাও শুনে পরম আনন্দিত হয়েছি। বাপু আজকাল কারো বিয়েতে বাধা দেন না। বিধবা বিবাহ সম্বন্ধে তিনি বিজ্ঞানাগরের চেয়েও উদার। অসবর্ণ বিবাহ সম্বন্ধে কেশবচন্দ্রের চেয়েও উৎসাহী। তিনি এত জোরে জোরে হাঁটছেন যে আমরা কেউ তাঁর সঙ্গে পাল্লা দিতে পারছি। যেমন কায়িক অর্থে তেমনি মানসিক অর্থে। আগে ছিলেন কটর বর্ণপ্রেমী। এখন কাস্টলেস সোসাইটির প্রবক্তা। অসবর্ণ বিবাহ ভিন্ন অন্য কোনো বিবাহে তিনি আশীর্বাদ করেন না। তাঁর সব চেয়ে পছন্দ ব্রাহ্মণ হরিজন বিবাহ। হরিজনকে পুরোহিত করাও তাঁর আর একটি নীতি। এতে ব্রাহ্মণদের মনোপলিতে হাত পড়ে। গৌড়া ব্রাহ্মণদের ঘাটি পুণা। সেখান থেকে প্রায়ই হত্যার হুমকি আসে।

বাপুকে সাবধান করে দিলেও তিনি গা করেন না। বলেন, মরতে তো একদিন হবেই। স্বধর্মে নিধনই শ্রেয়। আমার ধর্ম সত্য আর অহিংসা।”

এর পর আসল কথা। “তোমাদের বিয়েতে বাপু সানন্দে অনুমতি দিয়েছেন। তবে তুমি যদি দেশের মুক্তির জন্তে আবার লড়তে চাও তবে তোমাকে ব্রহ্মচর্য রক্ষা করতে হবে। নয়তো দুজনে মিলে গঠনকার্যে আত্ম-নিয়োগ করো।”

আকেল গুডুম। চিঠিখানা সোম্য জুলিকে দেখায় না। তার মাকেও না। সটান চলে যায় স্বপনদার কাছে।”

“জ্যা!” স্বপনদা চমকে ওঠেন। ছুটে আসেন বৌদি। চিঠি পড়ে তিনিও ঝাতকে ওঠেন। “জ্যা!”

“ওল্ড ম্যান গান্ধীর ওই এক অবসেসন। ব্রহ্মচর্য! এক বছরেই স্বরাজ হবে এই প্রতিশ্রুতিতে বিশ্বাস করে অনেকেই ব্রহ্মচর্যে পালন করার প্রতিশ্রুতি দিয়েছিল। কোথায় এক বছর। কেটে গেছে পঁচিশ বছর। ব্রহ্মচর্যে অটল রয়েছে এমন সত্যপ্রহীর সংখ্যা ক’জন! তুমি যদি তাদের একজন হতে চাও তা হলে বিয়ের জন্তে বাগ্‌দান করে ভুল করেছ। ইংরেজ কোন্‌ দুঃখে ভারত ছাড়বে! এখন সে আপদমুক্ত। আবার লড়তে হবে। তবে অহিংসভাবে কি না সম্ভব। গান্ধীর দিন গেছে। সুভাষের দিন এখনো যায়নি। তবে সুভাষ যদি না ফেরে কমিউনিষ্টরাই সহিংসভাবে লড়বে। তুমি গঠনের কাজ নিয়েই ব্যাপৃত থেকো। তা হলে একটি অনিচ্ছুক বধূর উপরে ব্রহ্মচর্য চাপিয়ে দিতে হবে না। ওর সম্মতি থাকলে অবশ্য অজ্ঞ কথা। কিন্তু আমার বিশ্বাস হয় না যে ও সম্মতি দেবে। মিলনবাসনার সঙ্গে রয়েছে মাতৃত্বের বাসনা। এসব বাসনা চরিতার্থ না হলে যা হয় তা ফ্রেড পড়লে জানতে পারবে। মানসিক অস্থিরতার প্রধান কারণ রিপ্রেসন। এটা মেয়েদের বেলাই বেশী। পুরুষরা তো এদিক ওদিক চরে বেড়াতে পারে। মেয়েদের সে স্বাধীনতা নেই। জুলির মা গোপন করতে চাইলে কী হবে? জুলি এখন অর্ধ পাগল। আন্ত পাগল হবে তুমি যদি বিয়ের পরে ওর উপর ব্রহ্মচর্য চাপাতে যাও। হিটলারের মতো ব্রহ্মচারী আর কে? কিন্তু তিনিও এফা ব্রাউনের উপর ব্রহ্মচর্য চাপাননি।” স্বপনদা অগ্নানমুখে বলে যান।

বৌদি ফিক করে হাসেন। “তুমি কী করে জানলে? তুমি কি ওদের বেড চেম্বারে আড়ি পেতেছিলে।”

“স্বত্বের পূর্বক্ষেণে হিটলার যে একাকৈ বিয়ে করেন এটা কৃতকর্মকে সামাজিক স্বীকৃতি দেবার জন্তেই। নেপোলিয়নের আক্রমণের সময় স্বত্ব আসন্ন ভেবে গ্যেটেও তাই করেছিলেন। অসাধারণদের সঙ্গে সাধারণদের তফাৎটা এইখানে যে সাধারণরা আগে বিয়ে করে, তারপরে সহবাস করে।” স্বপনদা উত্তর দেন।

“আমি কেবল ভাবছি আমার দেশোদ্ধারের প্রতিজ্ঞার কী হবে। ওটা কি তবে ভীষ্মের প্রতিজ্ঞা নয়? অত্যাণ্ড সত্যাগ্রহীরা জেলে যাবে, জরিমানা দেবে, জায়গা জমি হারাবে, কেউ কেউ প্রাণও হারাবে। আর আমি কিনা বিয়ে করে বৌ নিয়ে নিরাপদে ঘরসংসার করব? আশ্রমে বাস করে ঘরসংসার করা বিসদৃশ দেখাবে। আশ্রমের বাইরেই থাকতে হবে। বাইরে থেকে আশ্রম চালানো যেন বাড়ী থেকে আপিস আদালত চালানো। আশ্রম ওভাবে চালানো উচিত নয়। আশ্রমেই বাস করতে হবে জুলিকে আর আমাকে। আলাদা একখানা কুঁড়ে ঘরে। কিন্তু আশ্রমের নিয়মই হচ্ছে ব্রহ্মচর্য পালন। বিবাহিত কর্মীদের তাই করতে বলা হয়। যারা পারে না তারা যাইরে বান্য নেয়। তারা কেউ আশ্রমের পরিচালক নয়। আমাকে পরিচালকের দায়িত্ব ছাড়তে হবে দেখছি। কিন্তু সে দায়িত্ব নেবে কে? মুক্তিযুদ্ধেও থাকব না, আশ্রম পরিচালনাতেও থাকব না, এতদিন যে অভিজ্ঞতা অর্জন করলুম সেটা কি তবে বুখা যাবে? দেশ লাভবান হবে না?” সৌম্য উচ্চস্বরে চিন্তা করে।

স্বপনদা গম্ভীরভাবে বলেন, “সত্যাগ্রহ বিগিন্স অ্যাট হোম। সত্যটা এক্ষেত্রে কী? সত্যটা এই যে তুমি একটি মেয়েকে বিবাহ করবে বলে বাগদত্ত হয়েছ। দেশের স্বাধীনতা যদি আজ আসে তবে কাল তাকে তুমি বিয়ে করবে। তার পরে যথারীতি ফুলশয্যা। ব্রহ্মচর্যের প্রসঙ্গ উঠবে না। কিন্তু দেশের স্বাধীনতা কবে হবে কেউ জানে না। দু'বছর পরেও হতে পারে, দশবছর পরেও হতে পারে। আরো একবার সংগ্রামের প্রয়োজন যদি হয় তবে সেটা যে গান্ধীজীর নেতৃত্বেই হবে এটা তোমার কাছে স্বতঃসিদ্ধ। আমার কাছে নয়। জবাহরলাল তো ব্যারিস্টারের গাউন এঁটে আজাদ হিন্দ ফৌজের তিন সর্দারের মামলায় আসামী পক্ষের কৌশলী হয়েছেন। অমনি করে আশু ফোজটাকেই তিনি আপনার করবেন। দরকার হলে ওদের নিয়ে লড়াইয়ে নামবেন। তখন কোথায় গান্ধী আর কোথায় তুমি। সত্যাগ্রহই বা কোথায়।

তুমি যাও, মহাত্মাকে বুঝিয়ে বলো যে বিয়ের পরে ব্রহ্মচর্য স্বীকার সম্মতি ছাড়া সম্ভব নয়। রাস্কিন তো তাঁর অত্যন্ত গুরু। রাস্কিনের বেলা কী হয়েছিল তিনি কি তা জানেন না ?”

“কী হয়েছিল ?” বৌদি কণ্ঠক্ষেপ করেন।

“সে কী ! তুমি জানো না ?” স্বপনদা আশ্চর্য হন। “কিন্তু রাতের পর রাত যায়, মাসের পর মাস যায়, বছরের পর বছর যায়, পাঁচ বছরেও বিয়ের জল পড়ে না। রাস্কিনের বিশ্বাস ওতে নরনারীর দেহমনের পবিত্রতা নষ্ট হয়। বেচারি এফি অতিষ্ঠ হয়ে বিখ্যাত চিত্রকর মিলেসের সঙ্গে ইলোপ করেন। তার পরে কিছু হয় সেই প্রসিদ্ধ মামলা। পাঁচ বছরেও কনসামেশন হয়নি। রাস্কিন নাপুংসক। বিবাহ বাতিল। মিলেসের সঙ্গে এফির বিবাহ ফলপ্রসূ হয়। সাবধান. সোম্য ! অশরীরী প্রেম সারা জীবন স্থায়ী হতে পারে, কিন্তু অশরীরী বিবাহ যে কোনো দিন আদালতের বিচারে বাতিল হবার যোগ্য। ক্যারামেল পরের হবে না, কিন্তু সেও একদিন গৃহত্যাগ করতে পারে। সেই যে একটা কথা আছে, অতি ধরন্তী না পায় ঘর। তেমনি, অতি আদর্শবাদী না পায় ঘরগী। তোমাকে ধরগীহীন হয়ে ধরগী ত্যাগ করতে হবে।”

সোম্য এত কথা জানত না, শুনে তাজ্জব বনে।

স্বপনদা সোম্যর মুখ দেখে সদয় হয়ে বলেন, “সব মেয়ে এফি নয়। বানার্ভ শ’র সঙ্গে যখন শালটের বিয়ে ঠিক হয় তখন শালটই জেদ ধরেন বিয়ের পরে তাঁর বন্ধু যেন তাঁর গায়ে হাত না দেন। অর্থাৎ বিয়ের পরেও তাঁরা বন্ধু ও বন্ধুণী। সখা ও সখী। সম্ভব, সম্ভব, এই সম্পর্কটাও সম্ভব। লোকে কী মনে করবে, তাই একসঙ্গে থাকতে হলে বিবাহ বলে একটা অঙ্কণ করত হয়। একসঙ্গে থাকাটাই আসল, বিয়েটা লোক দেখানো। তা তোমরা ইচ্ছে করলে বিবাহিত বন্ধু ও বন্ধুণী হতে পারো। যদি ক্যারামেল সম্মতি দেয়। বলা যায় না, দিতেও পারে। কিন্তু সেটা হয়তো মন থেকে নয়, শুধু বিয়ে করে একসঙ্গে থাকার আগ্রহে। ইউরোপে এর নাম কম্পানিয়নেট ম্যারেজ। এদেশেও এর নজীর আছে। কিন্তু ক্যারামেল যে রকম মেয়ে তার সম্মতিটা পরে অসম্মতিতে দাঁড়াতে পারে। ও কি মা না হয়ে স্থখী হবে ভেবেছ ?”

সোম্য সামলে নিয়ে বলে, “ওর অসম্মতির আভাস পেলে বাপুকে জানিয়ে তাঁর অহুমতি চাইব। কিন্তু এই মুহুর্তে ওকে সোনাতির চিঠিখানা দেখাতে সাহস হচ্ছে না। ক্ষেপে গিয়ে বিদ্রোহ করতে পারে। তখন হয়তো আশ্রমে বাস

করতে নারাজ হবে। গঠনের কাজে সহযোগিতা করবে না। সবচেয়ে ভালো হতো ইংরেজরা যদি আজকেই ভারত ছাড়ত।”

“আহা! সেইখানেই তো গোল। সব চেয়ে যেটা ভালো সেটা কি কোথাও কখনো হয়েছে না হবে? মানুষকে অবস্থার সঙ্গে মানিয়ে নিতে হয়। অবস্থা অনুসারে ব্যবস্থা। ভগবানকে ধন্যবাদ দাও যে তুমি ও ক্যারামেল দু’জনে দু’জনকে ভালোবাসো। এ ভালোবাসা দীর্ঘকালের পরীক্ষায় উত্তীর্ণ। আণ্ডারগ্রাউণ্ড আর জেল এর ব্যাঘাত ঘটায়নি। এ ভালোবাসার জয় হবেই। দেশের স্বাধীনতা ইত্যাদির প্রশ্ন তুলে একে অযথা ঘোরালো করার মানে হয় না। তোমার কোমার্ব ভঙ্গ হবে, অথচ ব্রহ্মচর্য ভঙ্গ হবে না এটা একটা অবাস্তব অন্তশাসন। তুমি এর বিরুদ্ধেই সত্যাগ্রহ করো। পোপ কি অভ্রান্ত? পোপের অমনতরো দাবীর বিরুদ্ধে প্রোটেষ্ট করতে গিয়েই প্রটেস্ট্যান্ট সম্প্রদায়ের উৎপত্তি। এদেশেও তাই হবে। গান্ধীজীর সংজ্ঞাও। তুমিই ভারতের মার্টিন লুথার হতে পারো। তিনি ক্যাথলিক সন্ন্যাসী থাকতে অনিচ্ছুক ছিলেন। প্রটেস্ট্যান্ট হয়ে বিবাহ করেন। তখন থেকেই প্রটেস্ট্যান্ট পাদ্রীরা বিবাহ করে আসছেন।” স্বপনদা সৌম্যকে উসকে দেন।

তা লক্ষ করে বৌদি বলেন, “সৌম্য যদি স্বাধীনতা সংগ্রামের সংশ্রব ছেড়ে দিয়ে গঠনের কাজ নিয়ে থাকে তবে গান্ধীজী কোমার্বভঙ্গের সঙ্গে সঙ্গে ব্রহ্মচর্যভঙ্গেরও অনুমতি দেবেন। ইচ্ছা করলে সে আর কারো নেতৃত্বে সংগ্রাম করতেও পারে, আর কেউ ব্রহ্মচর্যের উপর এতখানি জোর দেবেন না। তবে আমি যতদূর বুঝি বিবাহিত ব্রহ্মচারী একটা নতুন কনসেপ্ট। ক্যাথলিক বা প্রটেস্ট্যান্ট কোনো সম্প্রদায়েই এ কনসেপ্ট নেই। থিওসফিস্টদের মধ্যেই এর চল দেখতে পাওয়া যায়। তাদেরই সমসাময়িক সম্ভাব্য গোষ্ঠীদের মধ্যেও। পণ্ডিচেরী ও চন্দননগরেও এর পরীক্ষানিরীক্ষা চলছে। এ সাধনা সর্বসাধারণের জন্তে নয়। বাছা বাছা স্ত্রীপুরুষের জন্তে। সৌম্য আর জুলি যদি তাদের পর্যায়ে পড়ে তো সভ্যতাকে এক ধাপ এগিয়ে দেবে।”

দরদী শ্রোতা পেয়ে সৌম্য বলে, “আমার যে কী সঙ্কট তা কেমন করে বোঝাব, দাদা, বৌদি! আমি ছিলাম দেশের কাছে সত্যাবদ্ধ, তার পরে হলুম নারীর কাছে সত্যাবদ্ধ। এক সত্যের সঙ্গে আরেক সত্যকে মেলাই কী করে? বিয়াল্লিশ সালে আমার দৃঢ় বিশ্বাস ছিল যে ইংরেজরা সেই বছরই ভারত ছাড়বে, তার মানে ভারত সরকার গদী ছাড়বে। জন রীডের ‘টেন-ডেজ

‘ছাট শুক ছ ওয়াল’ড’ পড়েছেন নিশ্চয়। আমার মাথায় তেমনি ঘুরছিল খাটি’ ডেজ ছাট শুক ছ ওয়াল’ড। সেই ধারণার বশে আমি জুলিকে বাগ্‌দান করি। তখন তো খেয়াল ছিল না যে জাপানীরা ভারতের দিকে পা বাড়াবে না, বার্মায় তটস্থ থাকবে। এখন আমি কথা রাখতে গিয়ে সঙ্কটে পড়ে গেছি। আমার উদ্ধারের উপায় কী? বাপুর্ বিরুদ্ধে সত্যগ্রহ? কেন, তিনি এমন কী নতুন কথা বলেছেন? রামকৃষ্ণদেব আর সারদামণি দেবী এঁরাও তো ছিলেন বিবাহিত ব্রহ্মচারী ও ব্রহ্মচারিণী। জুলি যদি রাজী হতো আমার তাতে আপত্তি থাকত না। তবে সেটা সারাজীবনের জন্তে নয়। আমারও ইচ্ছা করে ঘরসংসার পাতে, সন্তানের পিতা হতে। আমার আদর্শ ব্রহ্মনিষ্ঠ গৃহস্থ। ব্রহ্মচর্যব্রতধারী সন্ন্যাসী নয়। কিন্তু যার দেশ পরাধীন তাকে স্বাধীনতার জন্তে লড়তে হবে। লড়াই যতদিন না শেষ হচ্ছে ততদিন আরামে ঘরসংসার করা চলবে না। তাই বলে কি একটি মেয়ে তার জন্তে শবরীর মতো প্রতীক্ষা করবে? যৌবন বয়ে যেতে দেবে? জরাগ্রস্ত হবে? সন্তানের জননী হবে না? স্বাভাবিক জীবন যাপন করবে না? অ্যাবনমাল হবে? আমি বড়ো আশা করেছিলুম যে জুলি স্কুয়ার দত্তবিশ্বাসকে বিয়ে করে সুখী হবে। তা তো হলো না। জুলির আমাকেই পছন্দ। কোনোদিন ওকে আমি ভোলাবার চেষ্টা করিনি। বরং দাড়িগোঁফ রেখে হৌদলকুংকুতের মতো চেহারা করে ভয় পাইয়ে দিয়েছি। আমি যা খাই তা কি ও কোনোদিন খাবে? আঁকাড়া চালের ভাত, অড়হরের ডাল, কাঁচা আনাজ, সিদ্ধ তরকারির ঘোঁট। জুলিকে নিবৃত্ত করতেই চেয়েছি। কিন্তু কমলী নেহি ছোড়তি। বিয়ে ওকে করতেই হবে। বিয়ের পর বিয়ের সুখ দিতেই হবে। দুঃখও যে দিতে হবে না তা নয়। বিরহের দুঃখ। ওর যা মতিগতি ও কখনো গ্রামে বা আশ্রমে থাকবে না। কিছুদিন পরে পালিয়ে আসবে কলকাতা শহরে। ওর মায়ের কাছে। ওকে সুখী করার জন্তে আমিও আমার কর্মস্থল ছেড়ে চলে আসব নাকি? তা হয় না। পুরুষের কাছে তার কর্মক্ষেত্রই যথাস্থান। শেষপর্যন্ত হয়তো দেখা যাবে দু’জনের দুই কর্মক্ষেত্র। ‘সেটা মেনে নিয়েই বিবাহিত জীবন। তাতেও আমি রাজী। তবে আপাতত আমরা একসঙ্গে থাকার কথাই ভাবছি। জুলি আপাতত আমার আশ্রমেই বা তার আশেপাশেই থাকবে। সোনাদি যেমন আছেন সেবাগ্রামে। তার আগেই বিয়েটা যেন চুকে যায়। কিন্তু আরো আগে আমাকে একবার আশ্রমে গিয়ে সব ঠিকঠাক করতে হবে।”

বৌদি সহানুভূতির স্বরে বলেন, “ভেবো না, সৌম্য। সব আপনি ঠিক হয়ে যাবে। ঠিক করে দেবে প্রকৃতি। সে তোমার বাপুর চেয়েও বলবান। তার কাছে কত ঋষি মুনি হার মেনেছেন। তাঁদের আশ্রমে কী না হতো! প্রকৃতির সঙ্গে মালুমকে আপস করতে হয়। তোমাদেরও করতে হবে। বাপুকে মান্য করতে গিয়ে প্রকৃতিকে অমান্য করলে তার ফল হবে মানসিক বিকার। এর মধ্যে আমি কোনো নৈতিক স্থান দেখিনি। হিন্দুদের গৃহস্থ আশ্রমে পতিপত্নীর সহবাসই স্থনীতি।”

স্বপনদা জুড়ে দেন, “রাজনীতি ছেড়ে দিলে বাপুও তোমাদের গৃহস্থের মতো আচরণ করতে বলবেন। তবে সংগ্রামের বেলা ডাকবেন না। কী আসে যায়?”

সৌম্য দীর্ঘশ্বাস ফেলে। “ভারতের শেষ স্বাধীনতা সংগ্রামে আমার অংশ থাকবে না! তপস্যা ব্যর্থ যাবে!”

স্বপনদা তাকে সাহুনা দেন। “ভারতের শেষ স্বাধীনতা সংগ্রাম এত বেশী ভায়োলেন্ট হবে যে তাতে তোমার অংশ থাকতেই পারে না। যদি না তুমি স্বভাবের মতো জঙ্গী নেতা হও। তা যদি হও তবে তোমার বাপুর সঙ্গে তোমার বিচ্ছেদ অনিবার্য।”

“না, না। আমি কখনো আমার মূলনীতি থেকে বিচ্যুত হব না। উদ্দেশ্য যেমন মহৎ হবে উপায়ও তেমনি বিস্তৃত হবে। মিলিটারিজমের সাহায্য নিলে পরে তার সঙ্গে লড়তে পারা যাবে না। স্বাধীন ভারত মিলিটারিস্ট হলে সেটা কি আমার সহ্য হবে? আবার আমি জেলে যাব। বাপুর সঙ্গে আমার বিচ্ছেদ অসম্ভব। সত্য আর অহিংসা তো আমি বিসর্জন দিচ্চিনে। সেখানে স্থির থাকছি। অস্থিরতা কেবল ব্রহ্মচর্যের বেলা। আরো কিছুদিন লাগবে মনঃস্থির করতে। দেশকে ভালোবাসা আর নারীকে ভালোবাসার মধ্যে কোনো বিরোধ নেই। বাপুর সঙ্গে একদিন এ নিয়ে আমার বোঝাপড়া হবে। কিন্তু এখন নয়। এখন তিনি সিমলা বৈঠকের ব্যর্থতার পর বোম্বাইতে নিখিল ভারত কংগ্রেস কমিটির পলিসি নির্ধারণ নিয়ে ব্যস্ত। বড়ো বড়ো নেতাদেরই সময় দিতে পারছেন না। আমাকে দিলে কতটুকু সময় দেবেন? বাপুর সঙ্গে বোঝাপড়া ধীরে হচ্ছে হবে। আপাতত জুলির সঙ্গে বোঝাপড়া তো হোক। আমি বেশ বুঝতে পারছি যে আমি যদি ওর হাত না ধরি ও সমুদ্রের অন্তঃপ্রান্তের টানে তলিয়ে যাবে।” সৌম্য উদ্বেগের সঙ্গে বলে।

“ঠিক বলেছ। সাবান।” বৌদি তারিফ করেন। “এবার আমার একটা পরামর্শ শোন দেখি। তুমি জঙ্গী নেতা হবে না। কিন্তু তার বদলে হবে জঙ্গী নেতা। দাড়ি গোঁফের জঙ্গলে তোমার মুখ চোখ ঢেকে যাবে। সেটা কোন্ বৌ পছন্দ করবে? বিয়ের আগে হেয়ার কাটিং সেলুনে গিয়ে জঙ্গল সাফ করে এসো। তখন তোমাকে রাজপুত্রের মতো দেখাবে।”

সোম্য হো হো করে হাসে।

স্বপনদা হাসি থামিয়ে বলেন, “দেশমাতার চল্লিশ কোটি সন্তান। তুমিই একমাত্র নও। কিন্তু ক্যারামেলের তুমিই একমাত্র বর। তুমি না থাকলেও সংগ্রাম দিব্যি চলবে, ফলাফলের এমন কিছু ইতরবিশেষ হবে না। কিন্তু তুমি না থাকলে ওই মেয়েটির ভবিষ্যৎ অন্ধকার। তা হলে বুঝতে পারছ তোমার উপস্থিতি কর্তব্য ওর পাশে দাঁড়ানো। ওকে স্বাভাবিক জীবনে প্রতিষ্ঠিত করা। কোথায় থাকবে, কী খাবে, এসব প্রশ্ন গুরুতর নয়। তুমি দেখবে ও তোমার সঙ্গেই আশ্রমে বা গ্রামে থাকবে। আঁকাঁড়া চালের ভাত আর অড়হরের ডাল খাবে। তবে হজম করতে পারবে কি না সন্দেহ। প্রেমে পড়লে বা প্রেমে পড়ে বিনে কবলে মেয়েরা সব দুঃখ সহিতে পারে। সহিতে পারে না কেবল স্বামীর ভালোবাসার শরিক। সেদিক থেকে তুমি ঠিক থাকলেই হলো। অন্য কোনো নারী তোমার দিকে ফিরেও তাকাবে না। তোমার ওই জঙ্গলটিই ওদের ভয় পাইয়ে দেবে। খবরদার, ওটি সাফ করতে যেয়ো না। রাজপুত্র হলেই তুমি গেছ। তোমাকে নিয়ে অশান্তি সৃষ্টি হবে। তবে ক্যারামেল যদি তোমাকে সভ্য ভব্য করতে চায় সেকথা আলাদা। বৌরা নিজেরাই কাঁচি ধরে শিল্পকর্ম করে, জানো তো। তুমিও হয়তো একদিন একটি শিল্পকর্মে পরিণত হবে।” এই বলে স্বপনদা শাসান ও হাসান।

## ॥ চার ॥

শিয়ালদা স্টেশন। চিটাগং মেল। সোম্যকে তুলে দিতে এসেছে জুলি, সঙ্গে বাড়ীর গাড়ীর ড্রাইভার। ট্রেন ছাড়তেই জুলি রুমাল নেড়ে বিদায় দেয়। সোম্য কিছুক্ষণ বাইরে মাথা বাড়িয়ে তাকায়। তারপর সত্ত্ব কেনা সংবাদপত্রে মুখ ঢাকে।



একটু দূরে বসেছিলেন এক পরিচিত সহযাত্রী, সন্তোষ সাধুখাঁ। কুশল প্রশ্নের পর তিনি কথাবার্তা জুড়ে দেন। “গান্ধী মহারাজের ওটা কি সত্যিকার অসুখ, না ডিপ্লোম্যাটিক অসুখ? অল-ইণ্ডিয়া কংগ্রেস কমিটির মিটিংএ হাজির না থাকার অজুহাত? আছেন বোম্বাইতে, যোগ দিয়েছেন ওয়ার্কিং কমিটির বৈঠকে, অথচ এ. আই. সি. সি’র বেলা অসুস্থ!”

সৌম্য জুলির কথা ভাবছিল। ভাবনায় ছেদ পড়ায় মনে মনে বিরক্ত হয়। বলে, “আজকাল তিনি কথায় কথায় গুরুদেবের গানের একটি পঙ্ক্তি আওড়ান। ‘যদি তোর ডাক শুনে কেউ না আসে তবে তুই একলা চল রে।’ ঠর ছেলেরা এখন সাবালক হয়েছে। বাপের কথায় ওঠে না, বসে না। মানে মানে সরে থাকাই বুড়ো বাপের পক্ষে শ্রেয়। সিদ্ধান্ত যা নেবার তা ওরাই নিজেদের বিবেচনায় নেবে। ফলাফলের জগ্গে নিজেরাই দায়ী হবে। আপংকালে কংগ্রেস একটা সৈন্যদল। অচ্চ সময় একটা গণতান্ত্রিক প্রতিষ্ঠান। একজনের নির্দেশে নয়, অধিকাংশের মতে কাজ করবে। আজকের পরিস্থিতিতে কংগ্রেস নেতারা সাবালক পুত্রের মতোই ব্যবহার করবেন। তাঁদের মধ্যেও সে রকম একটা ভাব লক্ষ করা যাচ্ছে। বিশেষ করে জবাহরলালের মধ্যে। মনে হচ্ছে তিনিই বাপের বড় ছেলে। যদিও বয়সে বল্লভভাই ও রাজেন্দ্রপ্রসাদের চেয়ে ছোট। বাপু তো অনেক আগে থেকেই ঘোষণা করে বসে আছেন যে জবাহরলালই তাঁর উত্তরাধিকারী।”

সন্তোষবাবু তা শুনে বলেন, “জবাহরলালের নেতৃত্ব কি কংগ্রেসসুদ্ধ সবাই মেনে নেবে? দেশসুদ্ধ তো দূরের কথা।”

“তা যদি বলেন দেশসুদ্ধ লোক কি গান্ধীজীকেই মানে? তাঁকে ভক্তি করে সবাই, কিন্তু কেউ তাঁর একটি কথাও মানে না। উপায় হিসাবে অহিংসার উপরে কারো বিশ্বাস নেই। গত মহাযুদ্ধে জার্মান পক্ষে দু’কোটি আর রুশ পক্ষে দু’কোটি লোক মারা গেছে। এ ছাড়া ইঙ্গ-মার্কিন পক্ষেও বহু লোক মরেছে। কিন্তু কোথাও কি হিংসার প্রেঙ্টিজ কমেছে? আমাদের এ দেশেও না। বাপু এখন রাশ ছেড়ে দিচ্ছেন। কংগ্রেস যদি স্বেচ্ছায় অচ্চ পথ নিতে চায় নিতে পারে। তবে দেখে শুনে মনে হচ্ছে কংগ্রেস নির্বাচনে নামবে। যদি জেতে আবার মন্ত্রিত্ব করার আহ্বান পেলে আবার মন্ত্রিত্ব করবে। অবশ্য জিন্না সাহেব যদি বাগড়া না দেন। তিনি পাঁচবছর আগে থেকে শাসিয়ে রেখেছেন যে তুলকালাম কাও করবেন।” সৌম্য স্মরণ করে।

“বাপ রে, বাপ। জিন্না সাহেব! গান্ধীজী সতেরো বার তাঁর দরবারে হাজির হয়েছেন। তিনি একবারও রিটার্ন দেননি। দ্বিতীয় এক বড়লাট আর কী! বড়লাটকেও কি তিনি তোয়াক্কা করেন। সিমলা বৈঠকটা তো তাঁর জেদের জন্তেই ভেঙে গেল। ওয়েডেল চেয়েছিলেন লীগের বাইরে থেকে একজন ইউনিয়নিষ্ট মুসলমান। তাঁরা যুদ্ধে সাহায্য করেছেন। জিন্না বাদ সাধলেন। লীগপন্থী ভিন্ন আর কেউ মুসলিম প্রতিনিধি হতে পারে না। খার অনমনীয় জেদের কাছে রাজপ্রতিনিধি পর্যন্ত নতজাহ্নু। তিনি তুলকালাম কাণ্ড করলে কংগ্রেস নাচার।” সন্তোষবাবু বলেন।

তৃতীয় শ্রেণীর কামরা। সৌম্যর মাথায় গান্ধী টুপী দেখে জনতার ভিতর থেকে একজন মোলবী বলে ওঠেন, “দাদাজী, এমন দিন ছিল যখন জিন্না সাহেবই মহাত্মাজীকে বাঁচাবার জন্তে বোম্বাই থেকে বারডোলী ছুটে যান। তাঁর দৌরার জন্তেই তো সেবার গণ সত্যাগ্রহ শুরু হবার আগেই বন্ধ হলো। অসময়ের বন্ধুই তো আসল বন্ধু। তাঁর সঙ্গে পরামর্শ না করে, তাঁর দলের লোকদের বাদ দিয়ে সাত আটটা প্রদেশে মন্ত্রীমণ্ডল গঠন করলে তাঁর মান থাকে কোথায়? আরো আগে সাধারণ নির্বাচনের সময় মুসলমানদের জন্তে নির্দিষ্ট আসনগুলিতে লীগ প্রার্থী মুসলমানদের বিরুদ্ধে কংগ্রেস প্রার্থী মুসলমানদের খাড়া করা হয়েছিল। মুসলমানে মুসলমানে লড়াই বাবিয়ে দেওয়াটা কি ইংরেজ শাসকদের মতো হিন্দু শাসনপ্রত্যাশীদের ডিভাইড অ্যান্ড রুল নয়? গান্ধী মহাত্মাকে চেপে ধরলে তিনি বলবেন তিনি কংগ্রেসের সদস্যও নন। কায়দে আজমের সঙ্গে কথাবাতার সময় তাঁর ওই একই কৈফিয়ৎ। তিনি কংগ্রেসের হয়ে কথা বলবার অধিকারী নন। আবার সাধারণ নির্বাচনের দিন আসছে। আবার তেমনি ভাইয়ে ভাইয়ে লড়াই হতে যাচ্ছে। দাদাজী, আপনি কি সেটা ভালো মনে করেন? যদি না মনে করেন তো গান্ধী মহাত্মার দৃষ্টি আকর্ষণ করুন। মুসলিম লীগ যদি কংগ্রেসের সঙ্গে আপসে আসন ভাগ করে নেয় তা হলে তার স্বর বদলে যাবে। সে আর পাকিস্তানের ধুয়ো ধরে নির্বাচনের কেল্লা ফতে করতে চাইবে না। আমরা মুসলমানরাও বুঝি যে পার্টিশন আমাদের পক্ষেও ভালো নয়। কিন্তু কংগ্রেসী মুসলমানদের কাছে হার মানতেও আমরা নারাজ। ওঁরা দেশের জন্তে জেলে গেছেন, অনেক ত্যাগ স্বীকার করেছেন, তা ঠিক। কিন্তু হিন্দুস্থানের মুসলিম সম্প্রদায়ের ভবিষ্যতের দিক থেকে চিন্তা করলে কায়দে আজমের মনোনীত ব্যক্তিদের বিরুদ্ধে দাঁড়ানো

উচিত নয়। আমিও তো এক কালে কংগ্রেসে ছিলাম। জেলেও যে যাইনি তা নয়। কিন্তু এখন আমার বিচারে কায়দে আজমের হাত শক্ত করাই সব মুসলমানের কর্তব্য।”

সোম্য হতবাক্। জাপানীদের আক্রমণের মুখে যাদের বাঁচাতে সে চূড়ান্ত ঝুঁকি নিয়েছিল তারাই এত সহজে ভুলে গেল কংগ্রেসের কী ভূমিকা আর লীগেরই বা ভূমিকাটা কী। মহাত্মার কথা ইতিমধ্যেই ভুলে গেছে। যাক গে !

“দেখুন, মিঞা ভাই, আপনি নিজেই তো একদিন কংগ্রেসে ছিলেন। আপনার নিজেরও একটা দাবী আছে কংগ্রেস থেকে দাঁড়াবার। দলে ভারী হলে মন্ত্রী হবার। উত্তরপশ্চিম সীমান্ত প্রদেশের পার্ঠানদের মতো নির্ধাতন সহ করেছে কে ? খান আবদুল গফ্ফার খান নির্বাচনে বিশ্বাস করেন না, মন্ত্রিত্বে বিশ্বাস করেন না। তিনিও গান্ধীজীর মতো নিঃস্পৃহ সত্যাগ্রহী। আমিও তাঁদের অনুগামী। কংগ্রেস যদি নির্বাচনে না লড়ত, মন্ত্রিত্ব না চাইত তা হলে সত্যাগ্রহ আরো ভালো জমত। দেশের স্বাধীনতা আরো গৌরবময় হতো। কিন্তু পলিসি স্থির করতে হয় পাটি’র নাড়ী টিপে। নির্বাচনে নামতে না দিলে কংগ্রেস ভেঙে দু’খানা হতো। মন্ত্রিত্ব করতে না দিলেও তাই। ফলে যা হবার তা হয়েছে। গান্ধীজীর রুদয়ে মুসলমানদের প্রতি এককোঁটাও বিরাগ বা বিদ্বেষ নেই। কংগ্রেস মুসলমানদেরও পাটি’। যারা পাকিস্তান চান না তেমন মুসলমানের সংখ্যাও বড়ো কম নয়। মুসলমানরা একবাক্যে পাকিস্তান চাইলে তাঁদের গায়ের জোরে বাধা দেওয়া কংগ্রেস নীতি নয়। আপসও নয় কংগ্রেসের নীতি। কংগ্রেসের নীতি অহিংস অসহযোগ। মুসলিম লীগকে সিংহাসন ছেড়ে দিয়ে কংগ্রেস যাবে বনবাসে।”

মোলবী সাহেব উচ্ছ্বসিত স্বরে বলেন, “অহিংস অসহযোগের বংশীধ্বনি শুনে আমিও তো কুলত্যাগ করেছিলাম, দাদাজী। কুলত্যাগ বুঝলেন না ? কুলত্যাগ। মদের দোকান পিকেট করতে গিয়ে মাস ছয়েক বন্দীও ছিলাম। সেসব দিন কি ভোলা যায় ? তার পরে এল উটোরথের দিম। প্রায় সবাই হুড়হুড় করে জ্বলে কলেজে ফিরে যায়। আমিও। অহিংস অসহযোগের উপর বিশ্বাস টলে যায়। নেতাদের অনেকেই কাউন্সিলে গিয়ে সরকারের সঙ্গে লড়বার নতুন কায়দা শেখান। মনে হলো সেইটেই ঠিক পথ। দেশবন্ধু চিত্তরঞ্জনের উপর আমার অগাধ আস্থা। হিন্দু মুসলমানকে একজোট করতে

হলে চাই নির্বাচিত সদস্যদের দু'পক্ষের একটা চুক্তি। তার নাম বেঙ্গল প্যাক্ট। মুসলমান সদস্যদের কথা হলো শতকরা পঞ্চাশটি চাকরি তো মুসলমানদের এমনিতেই পাওনা। তার উপর আরও পঁচিশটা দিতে হবে, যাতে তারা এগিয়ে থাকা হিন্দুদের ধরে ফেলতে পারে। তা হলে দাঁড়ায় শতকরা আশি। অবশ্য সাময়িকভাবে। দেশবন্ধুর দরাজ দিল। তিনি এককথায় রাজী। কিন্তু মুশকিল বাধায় হিন্দু জনমত। আশি দূরের কথা, পঞ্চাশতেও হিন্দুদের আপত্তি। তার মানে হিন্দুরা বরাবর এগিয়ে থাকবে, মুসলমানরা কোনো দিন তাদের ধরতে পারবে না। কংগ্রেস লীগের লখনউ চুক্তি অনুসারে বাংলাদেশের হিন্দুদের সংখ্যাহুপাত কম বলে তারাই পাবে ওয়েটেজ। শতকরা পঞ্চাশের বেশী। তারা কম করে পঞ্চাশে রাজী হতে পারে। তার কমে নয়। বি. সি. চ্যাটার্জির ফরমুলা হলো ফিফটি ফিফটি। মুসলিম প্রতিনিধিরা নারাজ। অমনি করে বেঙ্গল প্যাক্ট ফেঁসে যায়। হিন্দু মুসলিম একজোট হয় না। দেশবন্ধু কাউন্সিলের ভিতরে গিয়েও ভোটের জোরে সরকারকে হারাতে পারেন না। তাঁর পলিসি ব্যর্থ হয়। তিনি মনের দুঃখে মারা যান। তখন থেকেই কংগ্রেসের উপর আমাদের অনাস্থা শুরু। ব্রিটিশ প্রধানমন্ত্রী ব্যামজে ম্যাকডোনাল্ডের রোয়েদাদের পর কংগ্রেসের মুখোস খুলে গেছে। তা বলে সব মুসলমান লীগপন্থী বনে গেছে তা নয়। কিন্তু পাকিস্তানের প্রতিশ্রুতি আর কোনো দল দিচ্ছে না। যে দল দিচ্ছে তারই ভোটে জেতার সম্ভাবনা বেশী। পাকিস্তান যদি হয় ভোটের জোরেই হবে। গায়ের জোরে নয়। সারা ভারতে মুসলমানদের ভোটের জোর হিন্দুদের তুলনায় কম, সারা ভারত পেলে মুসলিম লীগ ভোটের জোরে শাসন করতে পারবে না। তাই ভারতের একটা অংশই চায়। সমস্তটা নয়। আপনারা তো দুই-তৃতীয়াংশই পাবেন, তবে অহিংস অসহযোগ করতে যাবেন কোন্ দুঃখে?”

“বাঙালী হিন্দু, পাঞ্জাবী হিন্দু-শিখ, উত্তরপশ্চিমের পাঠান, এদের ইচ্ছার বিরুদ্ধে পাকিস্তান চাপিয়ে দিলে এরা তো বিদ্রোহ করবেই। করবে আসামের হিন্দু ও খ্রীষ্টান সংখ্যাগরিষ্ঠ জনগণও। যদি আসামকে পাকিস্তানের সামিল করা হয়। বিদ্রোহ যাতে গৃহযুদ্ধের আকার না নেয় সেইজন্মেই তো আমাদের অহিংস অসহযোগ। আমাদের মানে গান্ধীজীর অনুগামীদের। কংগ্রেসের হয়ে আমি কথা বলতে পারব না। তিনি নিজেও পারবেন না। সেকালের যারা নো-চেঞ্জার একালে তাঁরাও হয়েছেন প্রো-চেঞ্জার। কাকে নিয়ে কাজ

করবেন গান্ধীজী ? জিন্না সাহেব কি বুঝতে পারছেন না যে গান্ধীর সঙ্গে কথাবার্তার চেয়ে জবাহরলাল, বল্লভভাই ও আবুল কালাম আজাদের সঙ্গে কথাবার্তা আরো বেশী গুরুত্বপূর্ণ ? পাকিস্তান আপসে পেতে হলে এঁদের সঙ্গেই আপস করতে হবে। গান্ধীজী আপস করবেন না। দরকার হলে অহিংস অসহযোগ করবেন।”

“আপস কে না চায়, দাদা ?” মোলবী সাহেব একান্ত আন্তরিকভাবে বলেন, “কিন্তু তার একটা পদ্ধতি আছে। চাই আর একটা কংগ্রেস লীগ প্যাক্ট। যেমনটি হয়েছিল লখনউতে ১৯১৬ সালে। উত্তোক্ত হয়েছিলেন টিলক মহারাজ আর জিন্না সাহেব। আহা, টিলক মহারাজ যদি থাকতেন তা হলে কি জিন্না সাহেব পাকিস্তানের নাম উচ্চারণ করতেন ! তেমনি চাই আবার এক বেঙ্গল প্যাক্ট। দেশবন্ধু যদি অকালে চলে না যেতেন তা হলে কি বাংলাদেশের হিন্দু মুসলমানের আজকের এই হাল হতো ? কাগজ খুললেই খিন্তি খেউড় ! মুসলমানমাত্রেই রাবণ, হিন্দু মাত্রেই রাম। কিংবা হিন্দুমাত্রেই শয়তান, মুসলমানমাত্রেই ফেরেস্তা। কই, আপনাকে তো শয়তানের মতো দেখায় না, আর আপনিই বলুন, আমিও কি রাবণের মতো দেখতে ?”

সন্তোষ সাধুর্থা বলে ওঠেন, “আরে না, না, ভুভাই সাহেব। আপনাকে বরঞ্চ পীর সাহেবদের মতো দেখতে। আমরা হিন্দুরা পীরদের খুব মানি। আপনিই মিটিয়ে দিন না আজকের এই বৃথা কলহ। হিন্দু কি মুসলমানকে ছেড়ে বাঁচতে পারে, না মুসলমান হিন্দুকে ছেড়ে ? পাকিস্তানের প্রস্তাবটা তো পরস্পরকে এলিয়েন করার পরিকল্পনা। মুসলমানের রাজ্যে হিন্দু থাকবে না, থাকলে এলিয়েন হিসাবে থাকবে। আর হিন্দুর রাজ্যে মুসলমান থাকবে না, থাকলে সে হবে এলিয়েন। হিন্দু মুসলমানের অতীতের সম্পর্ক এক ছিল এলিয়েনের সঙ্গে এলিয়েনের সম্পর্ক ? সিরাজের জন্তে হিন্দুরা যত কৈঁদেছে আর কে তত কৈঁদেছে ? এই বিভেদ নবাবী আমলে ছিল না। এটা ইংরেজেরই সৃষ্টি। ইংরেজ বিদায় নিলেই এর বিলোপ ঘটবে। আপনি ঋার সঙ্গে কথা বলছেন তিনি কে জানেন ? তিনি প্রথম সারির গান্ধীবাদী কর্মী মোম্বা চৌধুরী। সম্প্রতি দু'বছর জেল খেটে ফিরছেন। ইংরেজকে ভারত ছাড়তে গিয়ে এই চুক্তিগো।”

“গোস্তাকী মাফ করবেন, দাদা।” মোলবী সাহেব সশ্রদ্ধ হয়ে বলেন, “ছোট ভাইয়ের নাম গোলাম রহমান। আপনি বাইরে এসেছেন, ভালোই

হয়েছে। বাইরে না এলে বুঝতে পারতেন না পদ্মানদীর জল কতদূর গড়িয়েছে। আপনাকে বাইরেই থাকতে হবে, আবার জেলে গেলে চলবে না। জেলে গেলে খেই হারিয়ে ফেলবেন। গান্ধী মহারাজও খেই হারিয়ে ফেলেছেন। সমস্তাটা শুধু ইংরেজদের থাকা না থাকা নিয়ে নয়। হিন্দুদেরও থাকা না থাকা নিয়ে। মুসলমানদেরও থাকা না থাকা নিয়ে। সিরাজের আমল থেকে আমরা সবাই এখন বহু দূরে সরে এসেছি। পরস্পরের উপর বিশ্বাস চলে গেছে। ইংরেজদেরকে যেমন কংগ্রেসওয়ালারা ভারত থেকে সরতে বলছেন তেমনি কংগ্রেসওয়ালাদেরও লীগওয়ালারা বলছেন পাকিস্তান থেকে সরতে। ইংরেজরা ভারত ছাড়লে হিন্দুরাই সমগ্র ভারত পাবে, তাই মুসলমানরা চায় ভারতের একাংশ। মুসলিম ভারত বা পাকিস্তান। এই ভাগাভাগির থেকে পরিত্রাণের একমাত্র উপায় হচ্ছে কংগ্রেস লীগ প্যাক্ট আর বেঙ্গল প্যাক্ট। জিন্না সাহেবের সঙ্গে দরাদরি করতে হবে মহাত্মা গান্ধীকে। হক্, নাজিম, সুহরাবদীর্ সঙ্গে দরাদরি করতে হবে শরৎচন্দ্র, কিরণশঙ্কর, শ্রীমাদ্রসাদকে।”

সৌম্য অন্তমনস্কভাবে বলে, “আমি আপনার সঙ্গে একমত। কিন্তু একটি শর্তে। আগে ইংরেজরা ভারত ছাড়বে, তারপরে নেতাদের মধ্যে দরাদরি বা ভাগাভাগি হবে। যাবার বেলা ওরা লীগনেতাদের হাতেই সারা ভারত সঁপে দিয়ে যাক।”

এবার আরো কয়েকজন তর্কে যোগ দেন। তর্ক করতে করতে সবাই যখন অন্তমনস্ক তখন ট্রেন এসে দাঁড়ায় রানাদাট স্টেশনে। বহু যাত্রী নেমে যায়; বহু যাত্রী ওঠে। হঠাৎ এক কী! এক কে! জুলি।

“কেমন আছো, সৌম্য? কষ্ট হচ্ছে না তো? যা ভিড়।” জুলি বলে।

“তুমি এলে কোথেকে?” সৌম্য হকচকিয়ে যায়।

“মেয়েদের কামরা থেকে। তোমার কাছ থেকে বিদায় নিয়ে আমি এক মিনিটের মধ্যেই মনঃস্থির করি যে তোমার সঙ্গেই যাব। নইলে তোমার জন্যে দিনরাত ভেবে মরব। ড্রাইভারকে বলি মাকে জানাতে। আর চেকারকে বলি প্র্যাটফর্ম টিকিট নিয়ে সেকেন্ড ক্লাস টিকিট দিতে। এখানে ট্রেন কতক্ষণ দাঁড়ায়? একটা টেলিগ্রাম করতে হবে মুস্তাফী মেসোমশায়কে যে, তোমার সঙ্গে আমিও আসছি।” জুলি এক নিঃশ্বাসে বলে যায়।

“কী কাণ্ড! লোকে ভাববে তোমাকে নিয়ে আমি ইলোপ করছি।”

প্ল্যাটফর্মে নেমে টেলিগ্রাফ অফিসের খোঁজে যেতে যেতে বলে সৌম্য। আর কেউ শুনতে পায় কি না কে জানে !

“সেটা ভুল। আমিই তোমার সঙ্গে ইলোপ করছি।” জুলি হাসে।

গাড়ী ছেড়ে দিচ্ছে দেখে হড়মুড় করে ওরা দু’জনেই সৌম্যর কামরায় উঠে পড়ে।

জুলিকে উঠতে দেখে তিন চারজন পুরুষ জায়গা ছেড়ে দিতে উত্তত হন। সে হাত জোড় করে মাফ চায় ও ধন্যবাদ দেয়। আসন করে নেয় সৌম্যর পাশাপাশি। বলে, “পরের স্টেশনেই আমি নেমে যাব।”

পরের স্টেশনে গাড়ী অলক্ষণ খামে। সেখানে নামা নিরাপদ নয়। এর পরে পোড়াদা জংশন। রিফ্রেশমেন্ট রুমে গিয়ে ওরা উপবাস ভঙ্গ করে। তারপর যে যার কামরায় যায়।

গোয়ালন্দে নেমে ওরা চাঁদপুরের স্টীমারে ওঠে। এবার আর ঠাই ঠাই নয়। একসঙ্গেই মধ্যাহ্নভোজন। একসঙ্গেই ডেকের রেলিং ধরে দাঁড়িয়ে দাঁড়িয়ে পদ্মা নদীর রূপ অবলোকন। গল্পগুজব। নানা কথা।

“রাইন ট্রিপ মনে পড়ে যায়। কিন্তু তুমি আমার সঙ্গে ছিলে না। ছিল স্বকুমার।” জুলি বলে সসঙ্কোচে।

“আমারও মনে পড়ে। আমিও নিঃসঙ্গ ছিলাম না। ছিলেন আমার এক বিদেশিনী বান্ধবী।” সৌম্য বলে অসঙ্কোচে।

“তা হলে তুমি ঠেকেই বিয়ে করলে পারতে ?” জুলির অভিমান।

“ক্ষেপেছ ! তাঁর সঙ্গে আমার তেমন সম্পর্ক নয়। বিয়ে করলে করতুম অলকাকে। কিন্তু তা হলে আমাকে ব্যারিস্টার হয়ে ফিরতে হতো। আমার জীবনের ধারাভঙ্গ হতো। অলকার ভালো বিয়ে হয়েছে। ও সুখেই আছে।” সৌম্য তাকে ভোলেনি।

“অলকাকে নিয়ে রাইন ট্রিপ করলে না কেন তাই ভাবছি। তোমার মতো স্বদেশী মাহুষের কেন বিদেশিনী বান্ধবী ?” জুলি কটাক্ষ করে।

“উনিও ভারতভক্ত আর শান্তিবাদী। আমাদের শাস্ত্রেই বলেছে বহুধৈব কুটুমকম। আমি তো লঘুচেতা নই যে একে আপন ওকে পর ভাবব। স্বাধীনতার জন্যে লড়েছি, আবার লড়ব, কিন্তু শত্রুভাবে নয়, বন্ধু ভাবেই।” সৌম্য বলে।

“সেইখানেই তো তোমার সঙ্গে আমার মতভেদ ও পথভেদ। তোমার

বিশ্বাস ইংরেজদের অন্তঃপরিবর্তন হবে। যেন প্রত্যেকেই এক একটি আণ্ড্রুজ সাহেব বা মীরা বেন। গান্ধীজীর ওই এক ধারণা। অন্তঃপরিবর্তন অবশ্যস্তাবী। তার জন্যে কষ্ট যা সহ্য করার তা আমাদেরই সহ্যেতে হবে। ওদের নয়। কেন, ওদের নয় কেন? সত্যি, ভগবানের কী অবিচার। রাশিয়া আর জার্মানী ধ্বংস হয়ে গেল, ইংলণ্ডের গায়ে আঁচড়টি লাগল না। যেটুকু লাগল সেটুকু ধর্তব্যই নয়। কী ভাগ্যবান ওরা। জিতে গেল শঠতার জোরে। কমিউনিস্ট রাশিয়া, তার সঙ্গে ক্যাপিটালিস্ট ব্রিটেনের আঁতাত। অবিকল প্রথম মহাযুদ্ধের মতো। যেন বিপ্লবটা মায়া। দেখে শুনে গা জালা করে। বাবলীটা জিতে গেল।” জুলির ক্ষোভ।

“ওসব হলো উচ্চ রাজনীতি। কার সাধ্য বোঝে! সবাই তো ধরে নিয়েছিল চেম্বারলেন প্রধানমন্ত্রী থাকবেন। জার্মানীকে লড়তে দেবেন রাশিয়ার সঙ্গে। রাশিয়াকে জার্মানীর সঙ্গে। ব্রিটেন দাঁড়িয়ে দাঁড়িয়ে মজা দেখবে। সিস্টু চার্চিল হলেন প্রধানমন্ত্রী। তাঁর নতুন শত্রু হিটলারকে টিট করতে পুরনো শত্রু স্টালিনের সঙ্গে হাত মেলালেন। মান অপমান তুচ্ছ করে ছুটে গেলেন মস্কোতে, খোঁসামোদ করলেন, ‘মার্শাল স্টালিন!’ ‘মার্শাল স্টালিন!’ যেন কতকালের ইয়ার। খানাপিনার বহর কত! চার্চিলের পেট টাইটধূর। একটা আন্তঃজায়ের ছানাকে রোস্ট করে এনে চার্চিলের সামনে রাখা হয়। পেটে তিল ধারণের ঠাই নেই। খেলে গোটা খেতে হতো। কেটে নিলে চলত না। চার্চিল মাফ চান। তখন স্টালিন সেটাকে নিজের পাতে টেনে নিয়ে অগ্নানবদনে গলাধঃকরণ করেন। চার্চিল তো হাঁ! ওদিকে হিটলার হলেন পরম নিরামিষাণী। সসেজটুকুও মুখে তুলবেন না। যেটা শশার মতো সব জার্মান কামড়ে কামড়ে খায়।” সৌম্য নিজে নিরামিষভোজী।

“ভগবানের কী অবিচার! নিরামিষ খায় যে হাতী তারই হয় হার। আমিষ খায় যে সিংহ তারই হয় জিং। তুমি ভাবছ গান্ধী জিতবেন। সরকার হারবে। ছুরাশা! সেটা তোমাদের ছুরাশা!” জুলি সহানুভূতির স্বরে বলে।

“গান্ধী জিতবেন কেন বলছ? সত্যগ্রহ জিতবে। সত্য আর অহিংসা মিলে যে অস্ত্র তার নাম সত্যগ্রহ। এ অস্ত্র রাজ্য জানে না ও মানে না। তবে এর জয় যুদ্ধক্ষেত্রে জয় নয়, যা সকলের চোখ ধাঁধিয়ে দেয়। এর জয় প্রতিপক্ষের হৃদয়কন্দরে। প্রতিপক্ষ হাত বাড়িয়ে দিয়ে বলে, হাত মেলাও।



আর ঝগড়া নয়। এখন থেকে সদ্ভাব। গান্ধী আরউইন চুক্তি। তেমনি একটা চুক্তি হতে পারত লিনলিথগোর সঙ্গে। হলো না। হতে পারে ওয়েভেলের সঙ্গে। হচ্ছে না। হতে পারে তাঁর পরে যিনি আসবেন তাঁর সঙ্গে। এখন থেকে আশা ছাড়বেন কেন? বাপু চিরকাল আশাবাদী।” সৌম্যও তাই।

“গান্ধী-বড়লাট চুক্তি ওই একবারই হয়েছিল। আর হয়নি, হবেও না। ওটা ব্রিটিশ পলিসি নয়। ওরা জিম্মাকেও গান্ধীর সঙ্গে বন্ধনীভুক্ত করতে বন্ধপরিকর। জিন্না সেটা জানেন বলেই গোঁ ধরে বসে আছেন তাঁর পাকিস্তান চাই। তাতে গান্ধীর জয় নয়, পরাজয়। আমি তো আশাবাদের লেশমাত্র কারণ দেখছি। লড়তে আবার হবেই। আর সেটা অহিংসমতে নয়। কিন্তু আমি আর লড়তে চাইনে। বিয়ে করে ঘরসংসার পাততে পারলেই ধন্য হব।” জুলি আন্তরিকতার সঙ্গে বলে।

“তোমাকে আমি আর লড়তে বলব না। কিন্তু আমি লড়তে চাইলে তুমি যেন বাধা না দাও।” সৌম্যর আকুল মিনতি।

“বাধা দেওয়া দূরে থাক আমি তোমার সঙ্গে কাঁধে কাঁধ মিলিয়ে লড়ব। যদি না খোঁকাখুরা বাধা দেয়।” জুলি শ্মিত হেসে বলে।

“তার মানে কি দুটি?” সৌম্য কৌতুক করে।

“দুটি না হলে ভাইবোনের জুটি হয় না। সেটাই তো কাম্য। তবে কে বলতে পারে কী হবে না হবে?” জুলি গম্ভীর হয়ে যায়।

“আমি চাইনে যে আমার ছেলেমেয়েরা ব্রিটিশ প্রজা হয়। তোমারও চাওয়া উচিত নয়। সবুর করতে হবে।” সৌম্য দৃঢ়তার সঙ্গে বলে।

“সবুর করতে করতে মা হবার বয়স পার হয়ে যাবে। যারা জন্মাতে চায় তারা জন্মাতে পারবে না। এ কী রকম অহিংসা! আমি তো মনে করি ব্রহ্মচর্যও একপ্রকার হিংসা।” জুলি বেপরোয়া ভাবে বলে।

সৌম্য চমকে ওঠে। “কই, একথা তো কোনদিন শুনিনি। তোমার মুখেই প্রথম শুনেছি। কোথায় পড়েছ? কে লিখেছে?” সৌম্য জানতে চায়।

“কোথাও পড়িনি। কেউ লেখেনি। এটা আমার মৌলিক চিন্তার ফল। আবার বলছি, ব্রহ্মচর্যও একপ্রকার হিংসা। যারা জন্মাতে চায়, জন্মাতে পারত, তাদের প্রতি হিংসা।” জুলিও দৃঢ়তার সঙ্গে বলে।

“যাদের অস্তিত্ব নেই তারা জন্মাতে চাইবে কী করে? ওটা তোমার সম্ভান-কামনার কল্পরূপ।” সৌম্য হেসে উড়িয়ে দেয়।

“তুমি কি ধলতে চাও যে জন্মের আগে তোমার অস্তিত্ব ছিল না? আমার অস্তিত্ব ছিল না? বলতে পারো সাকার অস্তিত্ব ছিল না, কিন্তু নিরাকার অস্তিত্ব? যেমন পরমাত্মার।” জুলি চেপে ধরে।

সৌম্য স্বীকার করতে বাধ্য হয় যে আত্মা থাকলে তার অস্তিত্বও থাকে। সাকার ভাবেই হোক আর নিরাকার ভাবেই হোক।

“আত্মার অস্তিত্ব যদি থাকে তবে নিরাকার আত্মা সাকার হতে চাইবে, তোমার আমার কল্যাণে সাকার হবে, এতে আশ্চর্য হবার কী আছে? আমি তো স্পষ্ট অনুভব করি যে অজাত শিশুরা জন্মানোর অপেক্ষায় আছে। কী করবে, বেচারিরা অসহায়! একটি মা থাকাই যথেষ্ট নয়, একটি বাপও থাকা চাই। বাপ না থাকলে মা-ও অসহায়। পৃথিবীতে কত রকম দুঃখ আছে। এটাও এক রকম দুঃখ।” জুলি করুণ-ক্ষণে বলে।

“তুমি আমাকে ভাবিয়ে দিলে, জুলি। তোমাকে যারা পাগলী বলে তারাই পাগল। তোমার যুক্তি খণ্ডন করতে পারা কঠিন। তোমার মতো বুদ্ধিমতী নারী ওই একজনই ছিলেন। সাবিত্রী। যমকেও তর্কে হারিয়ে দিলেন। তুমি কি পূর্ব জন্মে সাবিত্রী ছিলে?” সৌম্য সবিস্ময়ে ও সকৌতুকে স্থায়।

“সব মেয়েই সাবিত্রী। কেউ কম, কেউ বেশী। সবাই তো আর শতপুত্র চায় না। কারো কারো একটিই যথেষ্ট।” জুলি উত্তর দেয়।

সৌম্য হেসে বলে, “হিসেব করে দেখছি ক’বার যমজ, ক’বার ত্রয়ী, ক’বার চতুষ্টয় জন্মালে পঞ্চাশ বছর বয়সের মধ্যে শতপুত্র হয়। সাবিত্রীদের শুধু দীর্ঘজীবী নয়, দীর্ঘযৌবনা হতে হবে।”

“পোড়া কপাল। মেয়েরা কি কুকুর বেড়াল যে একসঙ্গে এতগুলির জন্ম দেবে? পয়োধর তো মোটে দুটি।” জুলিও হাসে।

বিবাহিত জীবনের স্বপ্ন দেখতে দেখতে ওরা চাঁদপুরে পৌছে যায়। ততক্ষণে অন্ধকার নেমেছে। নদীর জলে লক্ষ তারা।

বাকীটুকু রেলপথে আবার। ট্রেনে ওঠার আগে দু’জনে মিলে ভোজনাগারে নৈশ আহার সেরে নিতে যায়।

“টেলিগ্রাম ওঁরা পেয়েছেন কি না কে জানে! তোমার জন্মে তৈরি

থাকবেন, হয়তো আমার জন্তে নয়। কেন তাঁদের বিব্রত করা? তার চেয়ে কিছু খেয়ে নেওয়া ভালো। কী বলো, সৌম্য?” জুলিই অর্ডার দেয়।

“এমনিতে পৌছতে দেরি হবে। সময়ে আহার বিধেয়। কিন্তু বেশী নয়। তাঁদের ওখানে না খেলে তাঁরা ক্ষুধা হবেন।” সৌম্য অহুমান করে।

ট্রেনে ওঠার সময় চেকার বলেন, “আপনার তো সেকেন্ড ক্লাস টিকিট। আপনি থার্ড ক্লাসে কেন?”

“পড়েছি মোগলের হাতে, থানা খেতে হবে সাথে। তেমনি, পড়তে যাচ্ছি গান্ধীবাদীর হাতে, থার্ড ক্লাসে যেতে হবে সাথে। তবে এতে যদি কোনো থার্ড ক্লাস যাত্রীর জায়গায় টান পড়ে তবে আমাকে স্বহানে যেতে হবে।” এই বলে জুলি আসন ছেড়ে দাঁড়ায়।

“না, না, আপনি বসুন। এমন অভূত কথা কখনো শুনিনি, ম্যাডাম। এঁকে তো আমরা বহুবার দেখেছি। ইনি কোথায় এতদিন ছিলেন! বেশ কয়েক বছর দেখিনি মনে হয়।” চেকার জিজ্ঞাসু হন।

“দেখবেন কী করে?” সৌম্য উত্তর দেয়। “গান্ধীজী থাকবেন জেলে আর আমরা থাকব বাইরে, এটা কি ভালো দেখায়? ইনিও জেলখানায় আটক ছিলেন।” সৌম্য জুলির দিকে থাকায়।

“আমার কী সৌভাগ্য!” চেকারের উক্তি প্রতি কণ্ঠে প্রতিধ্বনিত হয়।

“অমন করলে আমি কিন্তু সেকেন্ড ক্লাসেই পালাব।” জুলি শাসায়।

“না, না, আপনারা আরাম করে বসুন। আপনারা এঁদের আরো একটুখানি জায়গা ছেড়ে দিন।” সহযাত্রীদের বলে চেকার নেমে যান।

গল্প করতে করতে সময় কেটে যায়। লোকের যা স্বভাব, অচেনার সঙ্গে ও চির চেনার মতো আলাপ জমায়।

স্টেশনে সৌম্যকে ও জুলিকে অভ্যর্থনা করতে এসেছিলেন স্বয়ং ক্যাপটেন মুস্তাফী। সঙ্গে ও কে? ও যে মিলি!

“মিলি? সত্যি তুই?” জুলি ওকে চুমুতে চুমুতে অস্থির করে তোলে। “কই, বেবী কই? কী যেন ওর নাম?”

“রণ। যুদ্ধের সময় জন্ম। ইংরেজদের মুখেও উচ্চারণ করা সহজ। রণকে ঘুম পাড়িয়ে এসেছি। ঠিক সময়ে খায়, ঠিক সময়ে শোয়। আমি এসব বিষয়ে ইংরেজদের মতোই কড়া।” মিলি জুলিকে জড়িয়ে ধরে।

“ভায়পর, সোম্যা, কবে শুভকর্ম সম্পন্ন হবে ? আর কোনখানে ? আমরা সপরিবারে যোগ দেব।” মুস্তাকী বলেন।

“চাল নেই, চুলো নেই, বিয়ে ! যেন চাল নেই, তলোয়ার নেই, লড়াই। গান্ধীবাদীরা একটা করে, আরেকটা করে না। যতদিন না দেশ মুক্ত হচ্ছে। কিন্তু জুলির মা অপেক্ষা করতে চান না। আমার বাপুও অল্পমতি দিয়েছেন। এখন একটা আস্তানার জন্তেই আটকাচ্ছে।” সোম্যা জানায়।

“আচ্ছা, সে ভার আমার উপর ছেড়ে দাও।” তিনি আশ্বাস দেন।

“না, হুকুমার আসেনি। পরে আসবে। আমি প্লেন ধরে পালিয়ে এসেছি।” মিলি বলে জুলির জিজ্ঞাসার উত্তরে।

## ॥ পাঁচ ॥

মহাযুদ্ধ শেষ হয়েছে। তার হিসাবনিকাশ করতে বসে মানস দেখছে বাংলাদেশ যদিও যুদ্ধক্ষেত্রে পরিণত হয়নি তবু এখানে ত্রিশ লক্ষের মতো মানুষ মারা গেছে। এত মানুষ ইংলণ্ড বা ফ্রান্স বা আমেরিকায় মারা যায়নি। এমন কী, ভারতীয় সৈনিকদের মৃত্যুসংখ্যাও এত বেশী নয়। আর সবাই মারা গেছে যুদ্ধবিগ্রহে, বাঙালীরা মারা গেছে দুর্ভিক্ষে। ওদের তবু সাহসনা আছে, ওরা ফাসিস্ট অসুরদের পরাস্ত বা নিপাত করেছে। বিশ্বকে করেছে তাদের হাত থেকে উদ্ধার। ওদের প্রাণদান সার্থক। কিন্তু এদের কী সাহসনা !

এই ত্রিশ লাখ লোক তো দেশের মুক্তির জন্তে সংগ্রামে নেমে প্রাণ দিতে পারত। তা হলে অন্তত একটা প্রদেশ তো স্বাধীন হতে পারত। এদের প্রাণদান সার্থক হতো। এদের গৌরব গাথা গান করতেন গায়করা, গ্রথিত করতেন কবিরা। চিত্রকররা আঁকতেন এদের বীরত্বের ছবি। ভাস্কররা গড়তেন এদের বীরোচিত মূর্তি। এদের নিয়ে লেখা হতো নাটক ও যাত্রা। কিন্তু এদের মৃত্যুর জন্তে কোথায় সেই গৌরববোধ ? হুঃখ, শোক, কল্লণা, বিবেকের দংশন ও অসহায়তার জন্তে লজ্জা, এছাড়া যদি আর কিছু থাকে সেটা সরকারের অব্যবহার উপরে অভিলাপ। এ সরকার খুনী সরকার। শয়তান সরকার। স্তাটানিক গভর্নমেন্ট। কথাটা হামিদের।

বছর দুই আগে কলকাতার রাস্তায় হামিদের সঙ্গে দেখা। তিনি তাঁর এক সঙ্গীকে নিয়ে ট্রাম থেকে নামেন। বলেন, “কোথায় যাচ্ছেন? চলুন, আপনার সঙ্গে যাই। অনেকদিন পরে দেখা। কিছু বলতে চাই।”

হ্যাঁ, তিনবছর বাদে দেখা। হামিদ ও তার সঙ্গীর পরণে খাকসারদের মতো খাকি পোশাক। হাতে বেলচা নেই। এই যা তফাৎ।

“এইমাত্র ইন্তুফাপত্র পেশ করে আসছি।” হামিদ মানসকে চমকে দেন। “চীফ সেক্রেটারি নিতে চান না। আমি বলি নিতেই হবে। এ সরকারের হুকুম আমি তামিল করতে পারিনে।”

মানস জানতে উদ্গ্রীব। “ব্যাপার কী, হামিদ!”

“আমার মহকুমায় কেউ না খেয়ে মারা যায়নি। আমি যেমন করে পারি তাদের বাঁচিয়ে রেখেছি ও রাখতুম। সরকারের এতে এক পয়সা খরচ হয়নি ও হতো না। কিন্তু আমার ব্যবস্থাটা ওঁদের পছন্দ নয়। যাতে ব্যাপারীদের মুনাকা সেটাই ওঁদের পছন্দ। মাহুঘের প্রাণ ওঁদের কাছে তুচ্ছ। আমার উপরে রাগ আমি ব্যাপারীদের কড়া হাতে নিয়ন্ত্রণ করেছি। লোকে আমার উপর খুশি, সরকার অখুশি।” হামিদ একনিঃশ্বাসে বলে যান।

“তা বলে আপনি ইন্তুফাপত্র দিতে গেলেন কেন? ছুটি চাইতে পারতেন। কিংবা অন্য কোনো পদে বদলী।” মানস তাঁর মঙ্গলের জন্তেই বলে।

“না, জজ। তা হয় না। দুর্ভিক্ষের জন্তে সরকারী কর্মচারী মাজেই দায়ী। আপনিও। প্রত্যক্ষভাবে না হোক, পরোক্ষভাবে। আপনারও উচিত ইন্তুফাপত্র দেওয়া। ছুটি নিয়ে বিবেককে এড়ানো যায় না।” হামিদ চলতে চলতে বলেন।

ট্রামে করে ওঁরা তিনজনে মিলে মানসের বন্ধু স্বপনদার ওখানে যায়। এই খাকসার চা থেরে এক আনা করে চায়ের পিরিচে রেখে দেন। ওঁরা বিনামূল্যে কিছু নেন না। বন্ধুত্বের খাতিরেও না।

মানস দুঃখ করে বলে, “আমার বন্ধু ব্যথা পাবেন।”

কিন্তু ওঁরা অবুঝ। ওঁদের নিয়ম ওঁদের মানতে হবে।

হামিদকে জেরা করে মানস জানতে পেরেছিল যে তাঁর বিরোধটা ঠাঁর সঙ্গে তিনি খাওয়াদারী শহীদ স্মরণাবলী। কিন্তু দোষটা পুরোপুরি মঙ্গীরও নয়। বর্ধনের কাছে মানস শুনেছিল যে মার্চ মাসের শেষের দিক কলকাতার বাজারে ধানচাল মজুত ছিল মাত্র দশদিনের উপযোগী। অগত্যা নিয়ন্ত্রণ তুলে দিতে

হয়, মফঃস্বল থেকে অবোধে ধান চাল কলকাতায় আসে। মফঃস্বলের অফিসারদের নির্দেশ দেওয়া হয় ধানচালের চলাচলে বাধা না দিতে। বাধা দিতে গেলে শাস্তি। মফঃস্বলে টান পড়লে সরকার থেকে ধান চাল ‘ডাম্প’ করা হবে। ধান চালের বান বইয়ে দেওয়া হবে। ব্যাপারীদের ভয় দেখানো হয়, মজুত করেছ কি আঙুল পুড়িয়েছ। কে কার কথা শোনে! ওরা যে-কোনো দামে কেনে। যে-কোনো দামে বেচে। দাম আরো বাড়বে বলে ধরে রাখে, লুকিয়ে রাখে। গোপন মজুতদার কে নয়? যে নিজের বাড়ীর জন্তে ছ’মাসের খোরাক কিনে রাখে সেও দোষী। ওদিকে আরেকজন ছ’দিনের খোরাক কিনতে পাচ্ছে না। যাদের ক্রয়শক্তি কম, যারা একসঙ্গে বেশীদিনের খাত কিনতে পারে না তাদের সংখ্যাই তো বেশী। সরকার তাদের জন্তে রেশন ব্যবস্থা করেননি। সেটাই হলো গোড়ায় গলদ।

বাংলাদেশের অবস্থা দেখে সাবধান হন যুক্তপ্রদেশের সরকার। গভর্নর হাালেট তখন সর্বেসর্বা। মন্ত্রীরা জেলে। তিনি একটা ইকনমিক বোর্ড গঠন করেন। তার সেক্রেটারি করেন বিশিষ্ট অর্থনীতিবিদ ডক্টর রুদ্রকে, রুদ্র তাঁর বিশ্ববিদ্যালয়ের কাজ ছেড়ে বোর্ডের কাজ নিয়েই থাকেন। আর হাালেট স্বয়ং বোর্ডের সাপ্তাহিক অধিবেশনে সভাপতিত্ব করেন। বোর্ড গম চালের গতিবিধির খুঁটিনাটি খবর রাখে। বাছা বাছা আই. সি. এস. অফিসারদের জেলার শাসনকার্য থেকে সরিয়ে এনে খাতনিয়ন্ত্রণের কাজে লাগিয়ে দেওয়া হয়। তাঁরা বুলডগের মতো পাহারা দেন। ব্যাপারীরা চোরাবাজারি বা মজুত করতে গেলে থ্যাক করে কামড় দেন। গম চাল সবাই সব সময় কিনতে পারে, মজুত করার দরকার হয় না! মানস যে সময় ছুটিতে ছিল সে সময় যুক্তপ্রদেশেও অন্নভাবের আশঙ্কা দেখা দিয়েছিল; কিন্তু সরকার সতর্ক থাকায় ব্যাপারীদের পৌষমাস আর সাধারণ ক্রেতাদের সর্বনাশ হয়নি।

ছুটি থেকে ফিরে হামিদের মুখে তার অভিজ্ঞতার বৃত্তান্ত শুনে ও লক্ষ লক্ষ মানুষের প্রাণ নিয়ে ছিনিমিনি খেলা দেখে মানসও বিবেকের জালায় দগ্ধ হয়। কিন্তু চাকরি ছেড়ে দিলেই কি এর প্রতিকার হবে? একটি মানুষও কি প্রাণে বাঁচবে? হামিদকে একথা বোঝায়, নিবৃত্ত হতে বলে। ইস্তফাপত্র ফেরৎ নিতে পরামর্শ দেয়। হামিদ বলেন, “না, জজ। এরা নরঘাতক, এরা মহাপাপী। আমি কেন পাপের ভাগী হব?”

উচ্চতর পদগুলিতে তখন মুসলিম অফিসারদের প্রভূত চাহিদা। দু'দিন বাদে পদোন্নতি। হামিদকে ছাড়তে চায় কে? কিন্তু তিনি কেবল নিয়মনিষ্ঠ নন, নীতিনিষ্ঠ মুসলমান। তিনি শয়তানী সরকারের সঙ্গে আপস করেন না। চাকরি ছেড়ে দিয়ে চলে যান আলীগড়ে। সেখানে তালা তৈরি করেন। বেকার সমস্তার সমাধান করতে তাঁর যেটুকু সাধ্য। হিংসা অহিংসা ব্যতীত আর সব বিষয়ে গান্ধীবাদীদের সঙ্গে তাঁর মিল। মানসকে তিনি একজন গান্ধীবাদী মনে করেন বলেই তার সঙ্গে এমন সাযুজ্য। কিন্তু অহিংসায় তাঁর অবিশ্বাস।

শতমারী ভবেং বৈজ্ঞ, শত সহস্রমারী ভবেং ধ্বস্তরি। রেশন প্রথা প্রবর্তিত হওয়ার সঙ্গে সঙ্গে অবস্থার উন্নতি হয়। তার জন্তে দরকার হয় প্রোকিয়োরমেন্ট ব্যবস্থার। যুদ্ধ শেষ হরে যাবার পরেও এ দুটি রহিত হয়নি, হবেও না কলকাতার ক্ষুধা আর কলকাতার লোকের ক্রয়শক্তি অব্যাহত থাকতে। মানস চিন্তা করে কলকাতার বিকেন্দ্রীকরণের। আবার যদি মন্বন্তর হয় গ্রামের লোক এসে কলকাতা লুট করবে। বিপ্লব ডেকে আনবে কলকাতার অপরিমিত ভোগ।

ত্রিশ লক্ষ মানুষের অপমৃত্যুর অভিশাপ মানসকে দু'বছর কাল বিষাদগ্রস্ত করে রেখেছে। অর্থনৈতিক পরিকল্পনার অভাবে যে দুর্ভিক্ষ পড়তে হয়েছে তার পুনরাবৃত্তি প্রতিহত করতে হলে চাই অর্থনৈতিক পরিকল্পনা। ইতিমধ্যে হাতে এসেছিল টাটা বিড়লার পরিকল্পনা। তার কিছুদিন পরে গান্ধীজীর পরিকল্পনা। সেও তার নিজস্ব পরিকল্পনা নিয়ে মেতে ওঠে। যেন কত বড়ো অর্থনীতিবিদ! স্বরাজই যথেষ্ট নয়। চাই নিউ অর্ডার। নতুন শৃঙ্খলা। নতুন করে বাঁচা।

ত্রিশ লক্ষ মানুষের শোচনীয় মৃত্যু বৃথা হবে না, যদি তাদের দেশের লোক নতুন করে বাঁচতে পারে। অর্থনীতির সঙ্গে রাজনীতি জড়িয়ে আছে, রাজনীতির সঙ্গে সমাজনীতি, সমাজনীতির সঙ্গে নীতিধর্ম। নিছক অর্থনৈতিক পরিকল্পনা থেকে মানস আরো গভীরে যায়, তার থেকে আরো গভীরে। তার প্রতীতি দৃঢ় হয় যে আধুনিকতম অস্ত্রশস্ত্রের খাতে যে ব্যয়টা হবে সেটা বন্ধ না হলে বা খুব কম না হলে সাধারণ মানুষের অন্তে বস্ত্রে শিক্ষায় চিকিৎসায় বাসস্থানে টান পড়বেই। রাষ্ট্রকে বন্দুক আর মাখন এ দুটোর মধ্যে একটাকে বেছে নিতে হবেই। বন্দুক বেছে নিলে মাখনের অভাব হবেই। মাখন

দূরের কথা, ক্রটিও পর্যাপ্তভাবে মিলবে না। মানুষ আধপেটা খেয়ে তিলে তিলে মরবে।

কিন্তু বন্দুক বেছে না নিলে দেশরক্ষার বেলা সৈনিকরা কি খালি হাতে লড়বে? সৈনিকরা হেরে গেলে নাগরিকরা কি অসহযোগ ও গণসত্যাগ্রহের জোরে আত্মরক্ষা করতে পারবে? স্বাধীন ভারতকে এই প্রশ্নগুলির উত্তর দিতে হবে। উত্তরগুলি যদি গতানুগতিক হয় তবে দরিদ্রতম দেশবাসীর ভাগ্যে আবার ক্রয়শক্তির অভাব ও তার থেকে অন্নভাব আছে।

মানস গান্ধীবাদীদের সঙ্গে একমত হয় যে ভারতের গ্রামগুলিকে অন্ন বস্ত্রে স্বাবলম্বী করতে হবে। যাতে তাদের ওসব কিনতে না হয়। আলো হাওয়া জল তো কেউ কেনে না। তেমনি, মোটা চাল আর মোটা কাপড়ও কেউ কিনবে না। নিজেদের শ্রম দিয়ে নিজেরাই উৎপাদন করবে ও নিজের প্রয়োজনের উদ্ভূত হলেই বিক্রী করবে। ফাঁপা টাকার লোভে বিক্রী করলে পরে পশতাতে হবে। মদ্যস্তর থেকে যদি লোকে এইটুকু শিখে না থাকে তবে লোকশিক্ষার জন্তে আবার মদ্যস্তর অবতীর্ণ হবে। যুদ্ধও তো সেইরকম এক লোকশিক্ষা। গত দুই মহাযুদ্ধ থেকে দুনিয়ার লোক যদি নিরস্ত্রীকরণের আবশ্যকতা শিখে না থাকে তবে তাদের শিক্ষার জন্তে যুদ্ধও আবার অবতীর্ণ হবে। ভারতের লোক দীর্ঘকাল যুদ্ধবিগ্রহ দেখেনি। না দেখলে শিখবে কী করে?

তিনবছর আগেকার যুদ্ধবিরোধিতা ছিল স্বকৃগভীর। কংগ্রেসনেতারা যদি বড়লাটের পরিষদে যেতেন ও যুদ্ধ চালাবার ভার নিতেন যুদ্ধবিরোধিতার রূপান্তরিত হতো যুদ্ধোন্মাদনায়। সেটা জাপানের বিরুদ্ধে। কিন্তু ওদিক থেকে নেতাজী সুভাষচন্দ্র যদি আজাদ হিন্দ ফৌজ নিয়ে ভারতের অভ্যন্তরে প্রবেশ করতেন তা হলে যুদ্ধোন্মাদনার মোড় ঘুরে গিয়ে হতো ব্রিটিশবিরোধী। কোথায় অহিংসা আর কোথায় তার প্রেস্টিজ? জনমানসে তার ঠিকড় কোথায়?

জনগণকে যদি অসামরিক প্রতিরোধের জন্তে প্রস্তুত না রাখা হয়, যুদ্ধের দিন তাদের ক্ষুধার অন্ন ও পরিধানের বস্ত্র না জোটে তা হলে তারা কি দেশের স্বাধীনতা রক্ষার জন্তে বহিঃশত্রুর বিরুদ্ধে সংগ্রামে সহযোগিতা করবে, না স্বদেশী সরকারের হাত থেকে ক্ষমতা ছিনিয়ে নেবার জন্তে বিদ্রোহ বা বিপ্লব করবে? আগস্ট অভ্যুত্থান ইংরেজদের হটাতে ব্যর্থ হলেও ভবিষ্যতের জন্তে পথ দেখিয়ে দিয়ে গেছে। ইংরেজ সরকার না হয়ে কংগ্রেস সরকার যদি যুদ্ধে নামে



আর লক্ষ লক্ষ নাগরিককে অভুক্ত রেখে পরলোকে পাঠায় তা হলে করেনন্দি সরকারের মতো সে সরকারেরও পতন হবে। ক্ষমতার হস্তান্তর বলতে যদি বোঝায় অক্ষমতারও হস্তান্তর তা হলে দেশের লোক যেমন ইংরেজকে ক্ষমা করেছে না তেমনি কংগ্রেসকেও ক্ষমা করবে না।

তবে দোষটা পুরোপুরি ইংরেজদের নয়। কলকাতার নাগরিকদেরও। তাদের ক্রয়শক্তি দিয়ে তারা গ্রামবাসীদের মুখের গ্রাস কিনে নিয়েছে। বোকার মতো ওরা কাঁচের বদলে কাঞ্চন বেচে দিয়েছে। টাকা নিয়ে মাহুষ করবে কী, সে টাকা দিয়ে যদি জ্বাষ্য দামে খাবার কিনতে না পাওয়া যায়। যদি খাবার কিনতে গিয়ে সর্বস্বান্ত হতে হয়? শহর ও গ্রামের মধ্যে এটা স্বাভাবিক সম্পর্ক নয়, এটা শোষণক শোষিত সম্পর্ক। এর জন্তে ইংরেজকে দায়ী করা আত্মপ্রবঞ্চনা। যদি স্বাধীনতার পরেও শোষণক শোষিতের সম্পর্ক থাকে তা হলে শোষিতরা একদিন দলবদ্ধ হয়ে শোষণকদের বিরুদ্ধে বিদ্রোহ বা বিপ্লব বাধাবেই। সেটা অহিংসার থেকে হিংসার মোড় নিতে পারে।

ইংরেজরা তো একদিন না একদিন যাবেই, তার আভাসও পাওয়া যাচ্ছে, কিন্তু কলকাতার যদি বিকেন্দ্রীকরণ না হয় তবে বিপত্তি অনিবার্য। শরীরের সমস্ত অঙ্গ প্রত্যঙ্গের রক্ত যদি মাথায় গুঠে তবে মরণ অবশ্যস্বাবী। তেমনি, সারা বাংলাদেশের বিভব যদি কলকাতায় কেন্দ্রীভূত হয় তবে গ্রামগুলো মরবে, গ্রামবাসী জনগণ মরার আগে মারবে। সমস্তটা যুদ্ধকালেই সঙ্গীন হয়, শান্তিকালে নয়। তাই শান্তিকালে সবাই নাকে সরষের তেল দিয়ে ঘুময়। সময়ে সাবধান হলে এই মনস্তত্ত্ব নিশ্চয়ই এড়ানো যেত। যে পরিকল্পনা এটা এড়াতে শেখায় সেই পরিকল্পনাই শ্রেয়।

মনস্তত্ত্বের সময় দেশী ক্যাপিটালিস্টদের মতিগতি দেখে মানসের মোহভঙ্গ হয়েছিল। বিদেশী ক্যাপিটালিস্টদের মতোই তাঁরা মুনাফা উপাসক। সং অসং যে কোনো উপায়ে তাঁরা মুনাফা লুটবেনই। অমনি করে ক্যাপিটাল বাড়াবেন। রাজনৈতিক ক্ষমতা যদি কংগ্রেসের হাতে হস্তান্তরিত হয় তবে অর্থনৈতিক ক্ষমতা হবে দেশীয় ধনপতিদের হাতে হস্তান্তরিত। গান্ধীজী বলছেন বটে ধনপতিদের স্বৈচ্ছায় ট্রাস্টী হবার কথা, কিন্তু কেউ যদি স্বৈচ্ছায় না হন তবে তাঁর উপর জোর করে ট্রাস্টীশিপ চাপিয়ে দেওয়া যাবে না। একপ্রকার না একপ্রকার রাষ্ট্রীয় নিয়ন্ত্রণ প্রয়োজন হবে। নইলে সোশিয়াল জার্স্টিস বা সামাজিক জায় প্রতিষ্ঠা হবে না। কংগ্রেসকে বুর্জোয়া অপবাদ বহন করতেই

হবে। বিদেশী আমলাতন্ত্রের জায়গা নেবে বুর্জোয়া গণতন্ত্র। মানস এর পক্ষেও নয়, বিপক্ষেও নয়। পক্ষে নয় এইজন্তেই যে এতে ধনসম্পদ বিকেন্দ্রীকৃত হবে না, গরিবের পেট ভরবে না। বিপক্ষে নয় এইজন্তেই যে সত্ত্ব স্বাধীন দেশের জীবনের প্রাথমিক কর্তব্য হচ্ছে গণতন্ত্র প্রবর্তন, তা না করে একলক্ষ্যে সমাজতন্ত্রে উত্তীর্ণ হতে গেলে ডিক্টেটরদের কবলে পড়তে হবে। তারা সিভিলও হতে পারে, মিলিটারিও হতে পারে।

স্বাধীনতার পর যা হবার হবে, আগে তো দেশ স্বাধীন হোক। দুই শতকের বিদেশী শাসন তো অপসৃত হোক। বিদেশী সৈন্যদেরও যেতে হবে, নইলে বিদেশী শাসন প্রকায়ান্তরে থেকেই যায়। গান্ধীজীর প্রথম শর্তই হলো বিদেশী সৈন্যদের বিদায় নিতেই হবে। আর দ্বিতীয় শর্ত বিদেশীদের সৃষ্ট দেশীয় সৈন্যদলকেও ভেঙে দিতে হবে। এ কাজটা কিন্তু ক্ষমতা হস্তান্তরের পর্যায়ে পড়ে না। যাদের হস্তান্তর করা হবে তাদের অস্তিত্ব অক্ষুণ্ণ রাখতে হবে। এটা যেমন সিভিল সার্ভিসের বেলা তেমনি আর্মি নেভী এয়ার ফোর্সেরও বেলা। ব্রিটেন যদি ক্ষমতা হস্তান্তর না করেই ভারত ত্যাগ করে তা হলে যারা সিংহাসন অধিকার করবে তারা বিদেশীদের সৃষ্ট সিভিল সার্ভিস তথা আর্মি নেভী এয়ার ফোর্স বিলোপ করতে পারে। ক্ষমতার হস্তান্তর বলতে বোঝায় এক মালিকের হাত থেকে অপর এক মালিকের হাতে তুলে লওয়া। আর ক্ষমতার হস্তান্তর না করে সিংহাসন ত্যাগ করা বলতে বোঝায় ব্রিটিশ সরকারের দ্বারা নিযুক্ত সামরিক ও অসামরিক যাবতীয় কর্মচারীর চাকরি খতম। তাদের মধ্যে যারা বিদেশী তারা বিদেশে গিয়ে ক্ষতিপূরণ ও পেনসন দাবী করবে। যারা ভারতীয় হলেও ব্রিটিশ সরকারের সঙ্গে চুক্তিবদ্ধ তারাও ব্রিটেনে গিয়ে ক্ষতিপূরণ ও পেনসন দাবী করতে পারে। কিন্তু ক্ষমতার হস্তান্তর হলে তাঁদের চাকরি খতম হবে না। পূর্ব শর্ত সংরক্ষিত হলে চাকরির ভ্রম চলবে।

কলকাতা থেকে সিভিলিয়ান বন্ধু প্রমোদকুমার পুরকায়স্থ তাঁর বিভাগীয় কাজে মানসের স্টেশনে এসেছিলেন। তাঁর কাছে শোনা গেল যে ইংরেজ অফিসাররা সদলবলে স্বদেশে প্রত্যাবর্তনের কথাই ভাবছেন। কিন্তু তার আগে তাঁদের দিতে হবে ক্ষতিপূরণ ও আত্মপাতিক পেনসন। পেনসনের হার গণনা করা কঠিন নয়, সেটা একটা আইনে গণনা করে রাখা হয়েছে। সেটা এতদিন ইংরেজদের বেলাই খাটত, এবার ভারতীয়দের বেলাও খাটবে। মানস চাইলে যখন খুশি আত্মপাতিক পেনসন নিয়ে সুরে পড়তে পারবে। কিন্তু

ইংরেজ সরকার যদি ক্ষমতার হস্তান্তর না করে ভারত ত্যাগ করে তবে মানসকেও বিলেতে গিয়ে আত্মপাতিক পেনসন আদায় করতে হবে। আর যদি ক্ষমতার হস্তান্তর করে যায় তবে স্বদেশে থেকেই নতুন সরকারের কাছ থেকে আত্মপাতিক পেনসন পাবে।

মানস বলে, “খাসা খবর। কিন্তু ক্ষতিপূরণের কী হবে?”

পুরকায়স্থ বলেন, “প্রথম মহাযুদ্ধের পর ইংরেজ অফিসাররা যখন ঈজিপ্ট থেকে বিদায় হন তখন যে হারে ক্ষতিপূরণ পেয়েছিলেন সেই হারে ক্ষতিপূরণ চাইবেন কি না তা নিয়ে নিজেদের মধ্যে আলাপ আলোচনা করছেন। ইনক্লেশনের দরুন বর্ধিত হারে চাইতে পারেন। কিন্তু লাগে টাকা দেবে কোন্ সেনা? ব্রিটিশ সরকার না ভারত সরকার? চুক্তি অনুসারে দিতে বাধ্য ব্রিটিশ সরকার। কিন্তু সেই বাধ্যতাকেও ব্রিটিশ সরকার হস্তান্তরিত করতে পারেন, যদি বন্ধুত্বপূর্ণ ভাবে ক্ষমতার হস্তান্তর হয়। বন্ধুত্বপূর্ণ হস্তান্তরের প্রত্যাশায় ইংরেজরা এখন কংগ্রেসের সঙ্গে আর বাগড়াঝাটি করতে চান না। তাড়াতাড়ি ইংলণ্ডে ফিরে গেলে আজকাল নতুন চাকরি পাওয়া যায়। যুদ্ধের পর অনেক পদ খালি আছে। দেরি করলে সেসব পদ ভর্তি হয়ে যাবে। তাড়াতাড়ি ইংরেজ অফিসারদেরই। ওঁরা হৃদয়ঙ্গম করছেন যে ভারতে ওঁদের রাজত্ব গায়ের জোরে টিকিয়ে রাখা যাবে না। ভেদনীতির সাহায্যেও না। মুসলমানরাও অধীর। হিন্দুদের তো কথাই নেই।”

পুরকায়স্থ এর পরে যা বলেন তা শুনে মানস তো হাঁ। বাংলাদেশ নাকি দু'ভাগ হবে। কলকাতা, চব্বিশপরগণা আর বর্ধমান বিভাগ মিশে যাবে বিহারের সঙ্গে। বাদবাকী সামিল হবে পাকিস্তানের।

‘দূর! বাজে কথা! এটাও কি ইংরেজদের মুখে শোনা?’ মানস স্বধায়।

“না, এটা ওঁদের মুখে নয়। একজন কংগ্রেস নেতার মুখে। তিনি মুসলিম লীগ নেতাদের সঙ্গে কথাবার্তা চালিয়ে একটা আপসের সূত্র খুঁজে বার করতে চেষ্টা করছেন। ইংরেজ কখনো কংগ্রেসের হাতে সারা ভারত সমর্পণ করবে না। মুসলিম লীগকেও তো কিছু দেবে। কিন্তু সারা বাংলা, সারা পাঞ্জাব, সারা আসাম দিলে কংগ্রেস বাকীটা নেবে না। আবার গণ আন্দোলন করবে। আবার জেলে যাবে। ইংরেজ অফিসারদের ভারতে আটকে রাখবে। ওঁরা যদি থাকতে না চান তো আপস করবেন। এক হাতে কংগ্রেসের

সঙ্গে, আরেক হাতে লীগের সঙ্গে। তার মানেই হলো পাটিশন। সব দিক রক্ষা করতে গেলে বাংলাদেশে পাটিশন চাই। যেমন হয়েছিল আমাদের ছেলেবেলায়। চাকা ঘুরতে ঘুরতে আবার সেই বিন্দুতে এসেছে। যাকে বলে পূর্ণ বৃত্ত। তবে সেবার পূর্ববঙ্গ ভারতেই ছিল। এবার যাবে পাকিস্তানে। ফলে বাকী দেশটার নাম হবে হিন্দুস্তান।” পুরকায়স্থ যতদূর জানেন।

“না, না, তা কিছূতেই হতে পারে না।” মানস চেষ্টা করে ওঠে।

তা শুনে যুথিকা ছুটে আসে। তার চোখে মুখে জিজ্ঞাসা।

“মানসের উত্তর শুনে সে হেসে কুটি কুটি। “কালনেমির লঙ্কাভাগ। কারা এঁরা? কে এঁদের পৌছে? গায়ে মানে না আপনি মোড়ল। বাংলাদেশ কখনো ভাগ হতে পারে? অসম্ভব! অবাস্তব! গাঁজা!”

মানস উত্তেজিত হয়ে বলে, “শুধু তাই নয়, বিহারের সঙ্গে মার্জার!”

পুরকায়স্থ ওদের ঠাণ্ডা করে বলেন, “বিহারে যতরকম খনিজ আছে আর কোথাও তত নেই। সেসব খুঁড়ে বার করলে আরো চার পাঁচটা জামশেদপুর গড়ে উঠবে। মার্জার হলে বাঙালীরই লাভ। পূর্ববঙ্গে আছে কী? চা, পাট, মাছ। ওর থেকে আর কতটুকু লাভ হবে?”

মানস মেনে নিতে পারে না। “পূর্ববঙ্গে আছে পদ্মা, যমুনা, মেঘনা, তিস্তা, মহানন্দা, গোরাই, মধুমতী, ইছামতী। পূর্ববঙ্গে আছে বাংলাদেশের প্রাণ। বাংলাদেশের হাটল্যাণ্ড। ‘কলকাতা’, ‘কলকাতা’ করে তোমরা পাগল। কলকাতার মায়ায় মুগ্ধ হয়ে তোমরা পূর্ববঙ্গ বিকিয়ে দেবে। কলকাতায় আছে কী? আকিস, আদালত, সওদাগরী কোম্পানীর হাউস। সবই তো ইংরেজের কীর্তি। তোমাদের গর্ব করবার মতো কী আছে? ওটা একটা ব্যাড বার্গেন। ওতে রাজী হওয়া মানে মুসলিম লীগের কাছে যুদ্ধে হার মানা। ওরা যেন যুদ্ধে জিতে কংগ্রেসওয়ালাদের উপর পাটিশন চাপিয়ে দিচ্ছে। কংগ্রেস কি হেরে গেছে? লীগ কি জিতে গেছে? হোক না গৃহযুদ্ধ। দেখা যাক না কে হারে কে জেতে। জিতলে সমস্তটাই কংগ্রেস পাবে। সমস্ত ভারত, সমস্ত বঙ্গ। হারলে সমস্ত ভারত, সমস্ত বঙ্গ। আর নয়তো দেশ ও প্রদেশ ভাগ হয়ে যাবে তলোয়ারের ধারে।

যুথিকা উৎসাহ দিয়ে বলে, ‘বিনা যুদ্ধে নাহি দিব স্বচাগ্র মেদিনী। এটা কিন্তু কৌরব পক্ষের কথা নয়, পাণ্ডব পক্ষের কথা। যারা দেশের স্বাধীনতার জন্তে লড়ল না তারা কোন্ স্ববাদে দেশের এক ভাগ চায়?’

পুরকায়স্থ হাসেন। “তুনেছিলুম আপনারা দু’জনে অহিংসাবাদী, গান্ধীশিষ্য। কিন্তু আপনারদের জঙ্গী চেহারা দেখে মনে হচ্ছে ঢাল তরোয়াল পেলে আপনারাও লড়াইয়ে নেমে পড়বেন, ইংরেজকে তাড়াতে নয়, মুসলমানকে হারাতে।”

“ওমা, মুসলমানকে হারাতে কে বলেছে?” যুথিকা অহুযোগ করে। “আমরা মুসলমানদের পর ভাবিনে, ওরাও আমাদের আপন। কথা হচ্ছিল পাকিস্তানপন্থীদের নিয়ে। যারা পাকিস্তানপন্থী নয় তাদের নিয়ে নয়।”

“আজকের পরিস্থিতিতে দুই অভিন্ন হয়ে উঠছে, মিশে মিল্লিক। অশিক্ষিতদের কথা বলতে পারব না, কিন্তু শিক্ষিতরা প্রায় সকলেই পাকিস্তানপন্থী। যারা নন তাঁরা ব্যতিক্রম। প্রত্যেকটি আফিসেই এক একটি পাকিস্তান ব্লক। এ এক অদ্ভুত মেন্টালিটি। এঁদের সঙ্গে যুক্তি বুঝা, তর্ক বুঝা। এঁদের ইনস্টিংট এঁদের বলেছে যে ইংরেজ আর বেশীদিন থাকবে না, তখন কংগ্রেসই রাজা হবে। দিল্লীতে কংগ্রেস রাজা হলে বাংলার গভর্নরও হবেন কংগ্রেসের আজ্ঞাবহ। মুসলিম লীগ মন্ত্রীরাও তাঁর বশব্দ হবেন। স্বযোগ স্ববিধা হিন্দুরাই বেশী পাবে। কারণ কংগ্রেস কার্যত হিন্দুদেরই প্রতিষ্ঠান। দু’চারজন মুসলমান আছেন বলে কি কংগ্রেস অসম্প্রদায়িক প্রতিষ্ঠান? তার কাছে অপক্ষপাত প্রত্যাশা করা যায় না। তা ছাড়া মুসলমানদের প্রতি পক্ষপাতই যে দরকার। ওরা বহুকাল থেকে পশ্চাৎপদ। কী করে এগোবে যদি প্রত্যেকটি ক্ষেত্রে হিন্দুদের পেছনেই থাকে? চাকরির প্রতিযোগিতায় হিন্দুরাই জিতবে। প্রমোশন হিন্দুরাই পাবে। যে প্রদেশে মুসলমানরাই সংখ্যাগুরু সে প্রদেশে চাকরিবার্করিতে তারা হবে সংখ্যালঘু। ইংরেজ চলে গেলে হিন্দুর পাদোন্নতি হবে, মুসলমানের তাতে কী? পাকিস্তান বানিয়ে দাও, দেখবে মুসলমানেরও পদোন্নতি হবে। এই যাদের মেন্টালিটি তাদের সঙ্গে মারামারি করে কী হবে? ভাগাভাগি করাই শ্রেয়। একভাবে না একভাবে করতেই হবে ভাগাভাগি। দেশ ভাগ না করলে ক্ষমতা ভাগ। ক্ষমতা ভাগ না করলে দেশ ভাগ। দেশ ভাগ করলে প্রদেশ ভাগ। আমি তো রাজী হব না পাকিস্তানে চাকরি করতে। মল্লিকের কথা আলাদা। উনি তো চাকরিই করবেন না।”

“না, আমি চাকরিই করব না। আমার জীবনে অন্য কাজ আছে। কিন্তু আমাকে অবাক করছে এই ভাগাভাগির জল্পনা কল্পনা। কেন, মিলে মিশে

কাজ করতে পারা যাবে না কেন ? কোয়ালিশন মন্ত্রীমণ্ডল কেন সম্ভব হবে না ? দিল্লীতে সম্ভব হলে কলকাতায়ও হবে। কলকাতায় হলে দিল্লীতেও হবে। গভর্নর হবেন নিরপেক্ষ সুযোগ্য ব্যক্তি। কোনো একটি দলের আত্মবাহন নন। তিনি একজন পার্শী বা খ্রীষ্টানও হতে পারেন। আমাদের আদর্শ হিন্দু মুসলমান শিখ খ্রীষ্টান পার্শীর সমন্বয়। মহামানবের সাগরতীরে। ভারত মহাসাগরকে যেমন ভাগ করা যায় না ভারতবর্ষকেও তেমনি ভাগ করা যায় না। বঙ্গোপসাগরকে যেমন ভাগ করা যায় না বাংলাদেশকেও তেমনি ভাগ করা যায় না। মুসলিম লীগের পার্টিশন প্রস্তাব আমি যেনে নিতে পারিনে। কিন্তু মুসলিম অফিসার ক্লাস যদি একবাক্যে পাকিস্থান দাবী করেন তা হলে তো আমি বন্দুক নিয়ে তাঁদের সঙ্গে লড়তে পারব না। হিন্দু অফিসার ক্লাস যদি রণবিমুখ হন তা হলে তো আফিসে আফিসে গৃহযুদ্ধের কথাই ওঠে না। তার আগে আমি চাকরিই ছাড়ব।” এই বলে মানস দীর্ঘনিঃশ্বাস ছাড়ে।

যুথিকা রাগ করে বলে, “তুমি ডিফিটিস্ট। মুসলিম অফিসার ক্লাস সমগ্র মুসলিম সম্প্রদায় নয়। দেশভাগ চাকুরীদের স্বার্থ হতে পারে, চাষীদের স্বার্থ নয়, মজুরদের স্বার্থ নয়। সকলের বৃহত্তর স্বার্থেই দেশের ঐক্য রক্ষা করতে হবে। যুদ্ধ করতে হবে।”

“দেশের বৃহত্তর স্বার্থে দেশের ঐক্য রক্ষা করতে হবে, এইপর্যন্ত আপনার সঙ্গে আমি একমত, দিদি। কিন্তু তার জগ্রে যুদ্ধ করতে হবে, এতদূর যেতে আমি নারাজ। ইউরোপের দিকে চেয়ে দেখুন যুদ্ধের কী পরিণাম। কোথায় জার্মানীর ঐক্য ! প্রোলিটারিয়ানরা গ্রাস করেছে আধখানা জার্মানী। ওদের হাত থেকে কেড়ে নিতে যদি আবার যুদ্ধ বাধে তবে হয়তো ওরাই ফে:ড নেবে বাকী আধখানা। মুসলমানদের অধিকাংশই প্রোলিটারিয়ান। ওরা যদি একধার থেকে কমিউনিস্ট বনে যায় ভারতের একভাগ তো জয় করে নেবেই, বাংলাদেশের বেশীর ভাগই ওদের দখলে যাবে। যুদ্ধ না করে সন্ধি করে মুসলিম লীগকে দিলে ক্ষতি কী ? আমি তো মনে করি মুসলিম লীগই লেসার ইভিল।” পুরকায়স্থ বলেন।

“একমত হতে পারছেন।” মানস কণ্ঠক্ষেপ করে। “মুসলিম লীগ হচ্ছে ঘোরতর প্রতিক্রিয়াশীল। আর কমিউনিস্ট পার্টি গণতন্ত্র না মানলেও সামাজিক ন্যায় মানে, সুতরাং একদিক থেকে প্রগতিশীল। সুতরাং লেসার ইভিল।”

“আপনি কি জানেন যে মুসলিম লীগের সঙ্গে কমিউনিস্ট পার্টির সেয়ানো সেয়ানো কোলাহুলি হচ্ছে ? কমিউনিস্টরা পাকিস্তানের পক্ষে। ওদের লক্ষ্য জমিদারি উচ্ছেদ, ফসলের তেভাগা ইত্যাদি। পাকিস্তানে সেসব স্বগম হবে।” পুরকায়স্থ শুনেছেন।

“মুসলিম লীগ কারে। বন্ধু নয়। কমিউনিস্টদেরও একদিন সায়েস্তা করবে। একবার ইসলাম বিপন্ন বলে শোর তুললেই মুসলিম চাষীরাই হিন্দু কমিউনিস্টদের কাস্তে নিয়ে কোপাবে আর মুসলিম মজুররাই হাতুড়ি দিয়ে পেটাবে। মুসলিম কমিউনিস্টরাও পার পাবে না, নাস্তিক বলে কান্দাকাঠে ঝুলবে। মুসলিম শাসনে নাস্তিকের ক্ষমা নেই। পৌত্তলিকের থাকলেও থাকতে পারে।” মানস বলে।

যুথিকা রাগ করে বলে, “ইভিল তো ইভিল, তার আবার লেশার কী ? গ্রেটার কী ? তার সঙ্গে সন্ধি কিসের ? মাহুষ তোমরা নও তো, মেঘ ! তোমাদের কেউ সম্মান করবে না।”

এই বলে রান্নাঘরে যায়। অতিথির জন্মে রাঁধতে। দুই বন্ধুতে অল্প প্রসঙ্গে কথাবার্তা বলে। সরকারী বদলী ও প্রমোশন।

“ইংরেজরা কেউ যুদ্ধের সময় হোমে যায়নি। অনেকেই সাত আট বছর হলো হোম থেকে নির্বাসিত। জানেন তো ওরা হোম বলতে অজ্ঞান। আমাকে জিজ্ঞাসা করেছিল হোম আমার কেমন লাগল। হা হা ! ইংলণ্ড কি আমার হোম ? এখন যুদ্ধ শেষ হয়েছে। ওরা সবাই এখন ঘরমুখে। কিন্তু ছুটি দিচ্ছে কে ? একসঙ্গে পাঁচশো কি ছ’শো অফিসারকে ছুটি দিলে শাসন চলবে ঠিকই, কিন্তু সেটা ব্রিটিশ শাসন হবে না। তা বলে সবাইকে জোর করে আটকে রাখাও যায় না। ছুটি নিয়ে বহু ইংরেজ যাচ্ছে। তাদের জায়গায় বহু পদ খালি হচ্ছে। এই তো বর্ধন প্রমোশন পেয়ে দিল্লী চলল। ‘দিল্লী চলো’ স্লোগানটা এখন আমাদের মুখে মুখে। আমি ভাবছি দিল্লীকা লাড্ডু পাইলেই খাইব। আপনি ?” পুরকায়স্থ স্বধান।

“না, ভাই। আমার দাঁত ভেঙে যাবে। পেটে সহিবে না। আমি বাংলায় লিখি। যেখানে লেখক, পাঠক ও প্রকাশক সেখানেই আমার স্থান। যেখানে বাংলাদেশের মাটি, জল, মানুষ সেখানেই আমার স্থিতি। ‘দিল্লী চলো’ নয়, ‘পল্লী চলো’ এই আমার স্লোগান। ঘাক, বর্ধনের জন্মে আমি আনন্দিত।” মানস যুথিকাকে খবরটা দেয়।

॥ ছয় ॥

অনেকদিন বাদে সৌম্যদার চিঠি। সে আশ্রমে ফিরে গিয়ে জীর্ণসংস্কার করছে, সেই সঙ্গে তৈরি করছে একটি কুটির। সেখানে জুলির সঙ্গে সংসার পাতবে। বাপু অনুমতি দিয়েছেন। তবে একটা শর্ত আছে, সেটা মুখে বলবে। ভাবনায় পড়েছে। আপাতত বিবাহ স্থির। স্বরাজের জন্তে অপেক্ষা করতে পারে না। জুলির মা আর ওকে সামলাতে পারছেন না। তাঁরও তো বয়স হয়েছে।

“আপাতত আমরা মুস্তাফীদের অতিথি। জুলি মিলিকে ও তার বাচ্চাকে সঙ্গে দেয়। আমি বেশীর ভাগ সময় আশ্রমে ও ভাণ্ডারে কাটাই, মাঝে মাঝে পরিদর্শনে যাই। বিয়েটা কোনো একটা আশ্রমে হবে। সেবাগ্রামে তো যেতে পারছি, তার বদলে সোদপুরে ষাবার কথা ভাবছি। এতে জুলির মায়ের ভার হালকা হবে। তা ছাড়া যে মেয়ের বিয়ে তারা ঘটা করে একবার দিচ্ছেন সেই মেয়ের আবার বিয়ে দেওয়া তাঁদের কর্তব্য নয়। যাকে একবার সম্প্রদান করা হয়েছে তাকে দ্বিতীয়বার সম্প্রদানের প্রশ্ন ওঠে না। জুলি এখন স্বাধীনা নারী। আমরা মিভিস ম্যারেজের আগে কোয়েকারদের প্রথা অনুসরণ করব। ওদের সোলাইটিতে একটা ঘর থাকে। সেই ঘরে গিয়ে ওরা বিবাহের বইতে নাম সই করে। আমরাও তাই করব। তবে আশ্রমের কর্মীদের মিষ্টিমুখ করাব। ধর্মীয় অনুষ্ঠান হবে না। কিন্তু জুলির ইচ্ছায় রবীন্দ্রসঙ্গীত আর আমার ইচ্ছায় লালনগীতি হবে। তার উপর যদি আরেকটি গান যোগ করতে হয় তো বাপুর প্রিয় গান “লীড কাইগুলি লাইট”। ও গান আমাকেও বিচলিত করে। আমি মনে মনে জপ করি ‘ওয়ান স্টেপ ইনাক ফর মী।’

জুলির মা বলেছেন তিনি তাঁর বাড়ীতে একটা পাটি দেবেন। তাঁর আত্মীয় স্বজনদের সঙ্গে আমাদের পরিচয় করিয়ে দেবার জন্তে। আমি বলেছি বর সাজতে পারব না। আমি যা পরি তাই পরব। গায়ে খন্ডরের পাঞ্জাবী পায়জামা জুওহর কোট। মাথায় গান্ধী টুপী। পায়ে বিছাসাগরী চটি বা



কোলহাপুরী চপ্পল। কী বলো? খুব খারাপ দেখাবে? হংসো মধ্যে বকো যথা। ইন্ডবক্স ব্যারিস্টার ডাক্তার অধ্যাপকের সভায় ইতর জন। যাক, জীবনে একবার তো? জুলিকে খুশি করার জন্তে আমি রাজী হয়েছি।

এখন এক আজব সমস্তা দেখা দিয়েছে। আমরা জানতুম না যে মিলি স্কুমারকে ফেলে তার ছেলেকে নিয়ে আগে ভাগে আসবে। মা বাবাকে দেখবার জন্তে আর তাঁদের নাতি তাঁদের দেখবার জন্তে সে প্লেনে জায়গা পাওয়া মাত্রই চলে আসে। স্কুমার ছুটির অপেক্ষায় আর সেইসঙ্গে জাহাজের অপেক্ষায় লওনে থেকে যায়। মন্দ কী? অমন তো কত হয়। কিন্তু মিলি তো জুলিকে এখানে প্রত্যাশা করেনি। জুলির উপস্থিতি প্রথম দিকে ও আনন্দের সঙ্গেই গ্রহণ করেছিল। কিন্তু যতই দিন যাচ্ছে ততই ওর ব্যবহারে একটা শীতলতা লক্ষ করা যাচ্ছে। সেটা জুলির বেলা। আমার বেলা নয়। আমার বেলা উষ্ণতা। আমি তোমার মতো মনস্তত্ত্ববিদ নই। নারীচিত্ত আমার কাছে রহস্যময়। আমার মনে হয় মিলির বিশ্বাস জুলি এখনো স্কুমারকে ভালেবাসে। আর জুলির বিশ্বাস মিলি এখনো আমাকে। এদের সম্পর্কটা অহেতুক দাঁটার। একদিন একটা বিস্ফোরণ ঘটবে, তার আগে সরে পড়াই শ্রেয়। আতিথেয়ও একটা অলিখিত মেয়াদ আছে। কিন্তু আমাদের কুটির এখনো বাসযোগ্য হয়নি, হলেও আমরা বিয়ের আগে সেখানে থাকতে পারিনে। বিয়ে তো সেই অগ্রহায়ণে। জুলির মা ইন্ডবক্স হলেও পাঁজি মানেন।

এখানে আমায় বন্ধুর অভাব নেই। তাঁদের দরজা খোলা। কিন্তু এক বাড়ীতে দু'জনের জন্তে দুটো ঘর কোথায়? তা হলে আমাদের ঠাই ঠাই হতে হয়। তাতে জুলির বিষম আপত্তি। জুলিকে আমি কলকাতা ফিরে যেতে বলি। কিন্তু আমাকে সে একলা ফেলে যাবে না। এখন থেকেই সম্পত্তির মতো দখল নিচ্ছে। বিয়ে না হতেই এই। বিয়ের পরে আমাকে বোধহয় সিন্দুকে পুরবে ও সিন্দুক পাহারা দেবে। কিন্তু একদিন বাগ্‌দান করার পর আর পেছিয়ে যাওয়া চলে না। এগিয়েই যেতে হবে, যা থাক কপালে। বাপু আমাকে দিয়েছেন গঠনের কাজ। তিন বছর অবহেলা করেছি রাজনীতির ঝড়ঝাপটার খর্পরে পড়ে। জনগণের সেবা করা হয়নি। তাদের দুর্দশাও বেড়ে গেছে। জনসেবাও এক দীর্ঘপরায়ণ নারী। রাজনীতি তার সপত্নী। তারপর জুলির মা দিয়েছেন জুলির ভার। তাকে রাজনীতির

মত্ততা থেকে সামলাতে হবে। রাজনীতিও ক্রমশ হিংসাপরায়ণ হয়ে উঠছে। একদল হাতিয়ার শানাচ্ছে ইংরেজকে ভারতছাড়া করতে। আরেক দল হাতিয়ার শানাচ্ছে হিন্দুকে ভিটেছাড়া করতে। একদলের লক্ষ্য স্বাধীনতা। আরেক দলের লক্ষ্য পাকিস্তান। এ রাজনীতি জুলির জন্তে নয়। আমার জন্তে তো নয়ই।

বিয়ের পর জুলিকে নিয়ে যেতে চাই তার খশুরবাড়ী। সেখানে ওরা যদি ওকে বধূরূপে বরণ করে তা হলে গ্রামশুদ্ধ সবাইকে নিমন্ত্রণ করে বৌভাত হবে। সবাইকে বসিয়ে দেওয়া হবে পঙ্ক্তিভোজনে। হিন্দু মুসলমান ব্রাহ্মণ হরিজন ভেদ মানা হবে না। যারা মানে তারা বাদ পড়বে। তাদের কিছু চালকলা দিয়ে বিদ্যায় করে দেওয়া হবে। জুলি রান্নার কাজে পটু নয়। তবু গোটা দু'তিন পদ রাখবে। যদি দেখি সরষের ভিতরেই ভূত, পরিবারের ভিতরেই আপত্তি, তা হলে বৌভাতের আয়োজন করব না, গ্রামের পাঠশালার জন্তে কিছু টাকা ধরে দিয়ে চলে আসব। পরে যদি কখনো আগ্রহ দেখি তখন যাব। তখন হবে বিলম্বিত বৌভাত। সমাজ সংস্কার তড়িৎগতিতে হবার নয়। মহাত্মা গান্ধীও এক্ষেত্রে অসহায়। তবু তিনি যা করেছেন তা অবিশ্বাস্য। ব্রাহ্মণ হরিজন বিবাহ। অপরের বিবাহে হরিজনের পৌরোহিত্য। মহারাষ্ট্রের মতো রক্ষণশীলদের দুর্গে।

জুলির ও আমার আশা যুথিকা ও তুমি আমাদের শুভকর্মে যোগ দেবে। কিন্তু এই সামান্য কারণে ছুটি নিতে যেয়ো না। তারিখটা কবে পড়বে ঠিক হয়নি। সে সময় ছুটি থাকলে এসো। গ্রামের বাড়ীতে যদি যাই তা হলে ফেরবার সময় তোমাদের ওখানে ঘুরে আসতে পারি। তোমাদের অস্থিবিধে না হলে দু'একদিন থেকে যেতেও পারি। দীপক আর মণিকাকে দেখতে খুব ইচ্ছে করে।”

যুথিকা চিঠিখানা কেড়ে নিয়ে পড়ে। হাসতে হাসতে বলে, “যেমন মিলি তেমনি জুলি। বিপ্লববাদীই হোক, আর রাজবন্দীই হোক, মেয়েলি ঈর্ষা যাবে কোথায়! এ তো ভারী মজার কথা। দোম্যদাকে নিয়ে জিভুজ! জুলিকে ও বাড়ী থেকে সরাতেই হবে। আর কোথাও যদি জায়গা না থাকে আমাদের এখানে আছে। গভন মেন্ট কি আমাদের সন্দেহ করবে? তোমার কোনো ক্ষতি হবে না তো? বিয়ে তো এখানেও হতে পারে। এখানেও গান্ধীবাদীদের আশ্রম আছে।”

“কিন্তু সৌম্যদা যদি তার স্বস্থান ত্যাগ করে গঠনের কাজে আরো একবার অবহেলা হবে। গঠনের কাছ হচ্ছে সংগঠনেরও কাজ। অহিংসভাবে সংগঠনের। আবার যদি সংগ্রামে নামতে হয় তবে অহিংসাত্মক সংগঠনের প্রয়োজন হবে। মস্তিষ্ক করতে গিয়ে কংগ্রেস গঠনের কাজে মন দেয়নি, মস্তিষ্ক ত্যাগের পরেও আঁপিসের ভাবনাই ভেবেছে, আর নয়তো সংগ্রামের ভাবনা। যখন সত্যি সত্যি পালে বাঘ পড়ল, গণ সত্যাগ্রহের ডাক এল, তখন দেখা গেল সংগঠন বলতে বিশেষ কিছু নেই। যে যেমনভাবে পারে লড়েছে। সংহতভাবে একটা সৈন্যদল যেমনভাবে লড়ে তেমন ভাবে নয়। এটাকে মরাল ইকুইভালেন্ট অভ্যুত্থান বলা শক্ত। বাপু বন্দিশালা থেকে মুক্তি পেয়ে এটার দায়িত্ব অস্বীকার করেছেন। সৌম্যদাও বোঝে রেল লাইন ভেঙে, টেলিগ্রাফের তার কেটে যা হয় তা একপ্রকার বিদ্রোহ, তা অত্যাচারের যুদ্ধ নয়। লোকের মন এখন যুদ্ধের নৈতিক বিকল্পের দিকে নয়, আসল যুদ্ধের দিকে ঝুঁকছে। আজাদ হিন্দ ফৌজের মতো প্রেসিডেন্ট ‘ভারত ছাড়ো’ আন্দোলনের বিদ্রোহী জনতারও নেই। ওই যে শাহনওয়াজ, সাইগল আর খিলন ওদের সম্মান এখন সর্বভারতীয় বাদ দিলে প্রাদেশিক কংগ্রেস নেতাদের চেয়েও বেশ। একমুখী জাতীয়তাবাদী যদি ইংরেজদের ভারতছাড়া করার জন্তে হাতিয়ারে শান দেয় তবে আশ্চর্য হবার কী আছে? কিন্তু অবাক হচ্ছি শুনে যে আরেকদল হাতিয়ারে শান দিচ্ছে হিন্দুদের ভিটেছাড়া করে পাকিস্তান হাসিল করতে।” মানস উদ্বেগের সঙ্গে বলে।

“বেশ তো, পলাশী আর পাণিপথ দুটোই পর পর হয়ে যাক। দেখা যাক কে জেতে কে হারে।” যুথিকা পরিহাস করে।

“এসব হলো দারুণ সৌরিয়ান ব্যাপার। ঠাট্টা তামাশার বিষয় নয়। কত মানুষ মরবে, কত মানুষ ঘরছাড়া হবে, কত মানুষ সম্বল সম্পত্তি হারাতে গেলো মাথা ঘুরে যায়। এ তো শুধু রাজায় রাজায় যুদ্ধ নয়, প্রজায় প্রজায় যুদ্ধ।” মানস প্রমাদ গণে।

“তোমার মতো স্বপ্নদ্রষ্টাদের কপালে স্বপ্নভঙ্গ আছে। তুমি কি বুঝতে পারছ না যে ইংরেজদের সঙ্গে লড়াই সারা হলে মুসলমানদের সঙ্গে লড়াই শুরু হবে। সেটা হবে পাণিপথের কাছাকাছি কোনোখানে। যেখানে আফগানরা মারাঠাদের হারিয়ে দিয়েছিল। কংগ্রেস যদি হেরে যায় দিল্লী আগ্রা হারাবে। পাঞ্জাব সিন্ধু তো হারাবেই! বাংলাদেশেও একটা বলপূরীক্ষা হবে। কোথায় কবে বলতে

পারব না। এইটুকু বলতে পারি যে ইংরেজদের যারা সশস্ত্র সংগ্রামে হারাবে তারা সশস্ত্র মুসলমানদের কাছে হার মানবে না। যুদ্ধ হলে তাতে দুই পক্ষেরই বহু মাহুষ মরে, ঘরছাড়া হয়, বহু মাহুষ সম্বল সম্পত্তি হারায়। ইহাই নিয়ম। দেশের লোক যদি অহিংসার চেয়ে হিংসা পছন্দ করে তো তার লজিকসম্মত পরিণামের জ্ঞেও প্রস্তুত থাকতে হবে। দু'শো বছর পরাবীনতার পরেও মুসলমান প্রধানদের মানসিক পরিবর্তন হয়নি। আবার সেই মুসলিম রাজত্ব ফিরিয়ে আনতে চান। একটা দিনও সবু করবেন না। ইংরেজরা যাবার আগেই তাঁদের মসনদে বসিয়ে দেবেন। আর হিন্দুয়াও যে মারাঠা রাজত্ব ফিরিয়ে আনতে চান না তা নয়। এবার অন্য নামে। এইটুকু যা পরিবর্তন হয়েছে।”

মানস খেই হাতে নিগে বলে, “বিষ্ফোরণ তো আমাদের জীবনে একবার ঘটেছিল। বাশা না পেয়ে আমরা তখন বোস দম্পতীর অতিথি। কী একটা তুচ্ছ কারণে খাবার টেবিলে মিসেস বোসের সঙ্গে তোমার বচসা বেধে যায়। মিসেস বোসের সঙ্গে মিটমাট হলো না। পরের দিন ওদের বাড়ী থেকে বিদায়। বিদায়কালেও মুখ দেখা দেখি বন্ধ। তুচ্ছ কারণের পেছনে ছিল একটা গুপ্ত কারণ। মিসেস বোসের সন্দেহ বোস তোমাকে পূজা করেন। বোসের অতীতটি তাঁর স্বীর মনে সন্দেহ জাগাবার পক্ষে যথেষ্ট ছিল। ওর কম ঘটনা জুলি মিলির বেলাও ঘটতে পারে। মৌমাদার যাবার জায়গা আছে, সে সেখানে গিয়ে থাকতে পারে। জুলির সঙ্গে একবাড়ীতে থাকতেই হবে এমন কী কথা আছে? ওটা বিলেতের বোর্ডিং হাউস নয়। জুলি কলকাতায় ওর মায়ের কাছে ফিরে যাক, বিয়ের নোটস দিক, শাড়ী শাখা আংটি কিছুক। মৌমাদা নিজের আশ্রমে গিয়ে কুটির নির্মাণ শেষ করুক। বিয়ের তারিখ জানতে পেলো আমরা ভেবে দেখব যোগ দিতে যাব কি না। কিন্তু বর্ধন যদি দিল্লী চলে গিয়ে থাকে ওর ওখানে ওঠা হবে না। উঠতে হবে স্বপনদার ওখানে, যদি বোদি রাজী হন। তোমার সঙ্গে ওঁর এখনো দেখা হয়নি। তা ছাড়া আমরা গেলে দীপক আর মণিকেও তো নিয়ে যেতে হবে। অতিথিসেবার ভার বেড়ে যাবে। বিলেতফেরা অধ্যাপিকার উপর এত বেশী ভার চাপানো কি ঠিক হবে? উদিতার কথা আলাদা। ওর বিয়েতে আমার একটু হাত ছিল। সেটা ও ভোলেনি।”

মুখিকা সেই পুরাতন বিষ্ফোরণের কথা ভাবছিল। তাঁর খেয়াল হয়নি যে

ওর মূলে ছিল মেয়েলি ঈর্ষা। লজ্জায় রাঙা হয়ে বলে, “আমারই বোঝা উচিত ছিল যে মিসেস বোসের পক্ষে ওটা স্বাভাবিক। বোসের পুরনো ডায়েরি উনি পড়েছিলেন। তাতে বহু বান্ধবীর উল্লেখ। না, বিস্ফোরণের ঝুঁকি নেওয়া উচিত নয়। কেন ওরা ও বাড়ীতে এতদিন আছে? একসঙ্গে থাকার আনন্দ তো সারাজীবন ধরে পাবে। সৌম্যদাকে একটু ঘুরিয়ে ফিরিয়ে লেখ যে বিয়ের আয়োজন করার জন্তে জুলির উচিত কলকাতায় এসে মায়ের কাছে থাকা। কিংবা আমাদের কাছে। এখানেও আশ্রম আছে, ম্যারেজ রেজিস্ট্রার আছেন। তা হলে আমাদের আর কোথাও গিয়ে আর কারো অতিথি হতে হবে না। তুমি হবে বরের বেস্ট ম্যান, আমি হব কনের ব্রাইডস্মেড। কী মজা! ওরা শান্তিনিকেতনে গিয়ে মধুমাশ কাটাবে। যাকে ইংরেজীতে বলে হানিমুন। মুন মানে এখানে চাঁদ নয়। মাস। মধুচন্দ্র হচ্ছে ভুল অনুবাদ।”

“বাঃ। কলকাতার মায়ের ওখানে ওয়েডিং পার্টি। সেটা হবে না?” মানস মনে করিয়ে দেয়।

“যা বলেছ। আমাদের বেলা সেটা হয়নি। পনেরো বছর কেটে গেছে। কী কঠিন প্রাণ!” যুথিকার চোখে জল আসে।

“ও প্রসঙ্গ থাক।” মানস ওটা ধামাচাপা দেয়। ওর শ্বশুর শান্তিভূমি এখনো ভুলতে পারেননি যে তাঁরা বারেন্দ্র ব্রাহ্মণ। রানী ভবানীর কী যেন হন। ওদিকে প্রচণ্ড সাহেব। খানাপিনা মাজপোশাক চালচলন বিলকুল সাহেবী।

যুথিকা তার বাপ মায়ের একমাত্র মেয়ে। একান্ত আদরের ধন। ছেলেবেলা থেকে মনে মনে স্থির করে রেখেছে মীতা, সাবিত্রী, দময়ন্তী, সুষমার মতো সেও স্বয়ংবরা হবে, নিজের পতি নিজে নির্বাচন করবে। বাপ মা এতে রাজী হবেন কেন? তাঁরা মেয়ের বিয়ের জন্তে যথারীতি উদ্যোগী হন। মেয়ের ষোল বছর বয়স থেকেই শুরু হয়ে যায় পাঁচ অধেষণ। যতদিন না বিয়ে হচ্ছে ততদিন বাড়ীতে বসে না থেকে সে কলেজে পড়ুক। দিল্লীতে তাকে মিরান্দা হাউসে দেওয়া হয়। সঙ্গদোষে বা সঙ্গগুণে সেও হয়ে ওঠে একজন ফেমিনিষ্ট। আইনসভায় প্রতিনিধি নির্বাচনের মতো বিতর্কে পতিনির্বাচনের অধিকারও নারীর সহজাত অধিকার। এর জন্তেও দরকার হলে লড়তে হবে। লড়াইটা নিজের

গুরুজনের সঙ্গে। দেশের স্বাধীনতার জন্তে যারা লড়বে তারা কি জীবনসঙ্গী মনোনয়নের স্বাধীনতার জন্তে লড়বে না? জীবনটা কার? তাদের না তাদের মা বাপের? মেয়ে ভুল করবে। অসম্ভব নয়। কিন্তু বাপ মাও কি ভুল করেন না? তাঁদের ভুলের জন্তে কত মেয়ের জীবন নষ্ট হচ্ছে।

ধনশক্তি রায়চৌধুরী কড়া মেজাজের লোক। তাঁর স্ত্রী শৈলবালায় মেজাজও চড়া। তাঁরা মেয়ের মতামতকে এক কড়াও দাম দেন না। তাঁদের চোখে মেয়ের সেই গৌরীদান কি রোহিণীদানের বয়স। আট কি নয় বছর। ও যেন কলেজের মেয়ে নয়, পাঠশালার মেয়ে। চাকরবাকরদের মতো সেও যোহুকুম। তাঁরা তাঁদের ফরমাস মতো পাত্রের অঘেষণে ঘটক লাগান। তার পেছনে পাঁচ হাজার টাকা খরচ করেন। ফরমাস মতো পাত্র হবে বারেন্দ্র ব্রাহ্মণদের মধ্যেও কুলীন। বনেদী জমিদারবংশীয়, যদিও জমিদারি বলতে এখন গুঁড়ামাত্র আছে। বিলেতফেরং ব্যারিস্টার বা সিভিলিয়ান, নিদেনপক্ষে ইঞ্জিনিয়ার। সাহেবদের মতো ধবধবে ফরসা, ইংরেজী বলবে সাহেবী টানে। পর্দার আড়ালে থাকাতে বাঙালী বলে চিনতে পারা যাবে না। লাস্ট, বাট নট লাস্ট, কাকিতকের মতো রূপবান। এক এক করে অনেকগুলি পাত্রকে খারিজ করে শেষপর্যন্ত থাকে পছন্দ হয় তিনি কলকাতা হাইকোর্টের উঠতি ব্যারিস্টার, কলকাতায় তাঁদের নিজস্ব বাড়ী আছে, নাটোর মহকুমায় পৈত্রিক ভদ্রাসন। কিন্তু তাঁদেরও কলঙ্ক আছে। তাঁরও আছে পানদোষ, জুয়ার আসক্তি, মাঝে মাঝে তিনি অগ্নিত্র রাত কাটান। তাঁর বোঁতা সহ করতে না পেরে বাপের বাড়ী ফিরে গেছেন। আর আসবেন না। গুঁরাও বড়লোক।

যুথিকা ঘণার সঙ্গে এ সম্বন্ধ খারিজ করে। এমন স্বামীর সঙ্গে জীবন কাটানো যেন একটা দুঃস্বপ্নের ব্যাধি নিয়ে বেঁচে থাকা। মা রাগ করেন, বাবা বকেন। অভিমানী মেয়ে খাওয়াদাওয়া বন্ধ করে। তখন গুঁরা বলেন, “আচ্ছা, তুই নিজেই কাকে বিয়ে করবি স্থির কর। কিন্তু মনে রাখতে হবে বারেন্দ্র ব্রাহ্মণদের মধ্যে কুলীন, বনেদী জমিদার বংশীয়, জমিদারি লাটে উঠলেও চলে, বিলেতফেরং ব্যারিস্টার বা সিভিলিয়ান বা আর কিছু, সাহেবদের মতো ধবধবে ফরসা, উচ্চারণ সাহেবদের মতো, পর্দার আড়াল থেকে কথা শুনে বাঙালী বলে চিনতে পারা যাবে না, সব শেষে কাকিতকের মতো রূপবান।” যুথিকা জবাব দেয়, “রাজকন্যারা রাজপুত্র খুঁজে বেড়ায় না। রাজপুত্ররাই রাজকন্যার খোঁজে সাত সমুদ্র তেরো নদী পার হয়। আমি তার জন্তে

অপেক্ষা করব।” বি. এ. পরীক্ষা দেবার ঠিক আগে তাজমহল দেখতে গিয়ে মানসের সঙ্গে পরিচয়। প্রথম দর্শনেই প্রেম। ষ্টিপেন্ডি। পালিয়ে গিয়ে বাব্বীর বাড়ীতে গোপনে বিবাহ।

ধনপতিবাবুরা তখন সিমলায়। যুথিকা তার বরকে নিয়ে তাঁদের প্রণাম করতে যায়। শৈলবালা দেবী পা সরিয়ে নিয়ে বলেন, “আমি এইমাত্র স্নান করে উঠেছি। শুদ্ধূরটা আমার পা ছুঁয়ে দিল।” ধনপতিবাবু সাহেবী কেতায় হাওশেক করে বলেন, “মিস্টার মালিক, ইউ মে রাইজ টু বি আ কমিশনার সাম ডে। অর আ হাইকোর্ট জজ পরহাপস। আই উইশ ইউ লাক। বাট ইউ আর নো ম্যাচ ফর মাই হাই-বন’ ডটার।” মানস তো হাঁ। তাকে প্রকারান্তরে বলা হলো লো-বর্ণ। ক্রোধে তার সর্বশরীর জলে যায়। সে থর থর করে কাঁপে। তার পরে তোংলাতে তোংলাতে দেয় মুখের মতো জবাব। “আমি ইংরেজীতে কথা বলি ইংরেজের সঙ্গেই। বাঙালীর সঙ্গে নয়। আপনি যা বলেছেন তা ফিরিয়ে নিন।” তিনি ক্ষেপে গিয়ে বলেন, “আই কল আ স্পেড আ স্পেড। অ্যান আপস্টাট অ্যান আপস্টাট।”

যুথিকার মুখ তখন রক্ত রাঙা। শিবকে এই কথা বলেছিলেন দক্ষ। সে কি সতীর মতো দেহত্যাগ করবে? মানসের দিকে বিহ্বলভাবে তাকায়। মানস আপনাকে সামলে নিয়ে বলে, “আমরা তিনশো বছর ধরে বাদশাহী তালুক ভোগ করে এসেছি। মোগল সরকারকে এক পয়সা খাজনা দিইনি। ব্রিটিশ সরকারকেও না। বংশমর্যাদায় আমরা কারো চেয়ে খাটো নই। আপনি যদি মনে করে থাকেন যে আমি জাতে উঠতে চাই বা আপনার একমাত্র কন্যাকে বিবাহ করে অর্ধেক রাজত্ব পেতে চাই তা হলে সেটা আপনার ভুল। আমাদের বংশে কেউ কখনো পণ যৌতুক নেয়নি। আমিও নেব না।”

ধনপতিবাবু বলেন, “বাট ইউ ক্যান নট বি আ’ ব্রাহ্মিন। ইয়োর সন উইল বি আ চণ্ডাল।” তারপর যুথিকার দিকে ফিরে গম্ভীরভাবে বলেন, “চুজ বিটুইন ইয়োর ফাদার অ্যাণ্ড ইয়োর সো-কলড হাজব্যাপু।”

যুথিকাও তেমনি তেজী মেয়ে। বলে, “চুজ বিটুইন ইয়োর ডটার অ্যাণ্ড ইয়োর সো-কলড হাই স্টান্ট।”

ওরা যেমন হাত ধরাধরি করে এসেছিল তেমনি হাত ধরাধরি করে বেরিয়ে যায়। মা টেঁচিয়ে বলেন, “চলে-যাবার আগে গয়নাগুলো ফিরিয়ে দিয়ে যা।”

যুথিকা এক এক করে সব খুলে দেয়, আংটি ছাড়া। সেটা মানসের দেওয়া। একটা দৃশ্য হয়ে যায়। বাড়ীর চাকরবাকর 'হাঁ' 'হাঁ' করে ছুটে আসে। কোন পক্ষ নত হয় না। ধনপতিবাবুকে বিমর্ষ দেখায়। এতটা তিনি চাননি। কিন্তু তাঁরও তো মান আছে। তিনিও নত হন না। কিন্তু মানসকে ডেকে নিয়ে শাসন, “আমি কোর্টে গিয়ে মামলা করব যে আপনি আমার নাবালিকা কন্যাকে বলপূর্বক অপহরণ করে তার ইচ্ছার বিরুদ্ধে বিয়ে করেছেন। সে বিয়ে বাতিল হবার যোগ্য। আমি তার গার্জেন। বাতিলের প্রার্থনা করছি।”

মানস আশ্চর্য হয়ে বলে, “সে কী। যুথিকা তো বিয়ের সময় ডিক্লেয়ার করেছে তার বয়স বিশ বছর।”

“সেটা চাপে পড়ে। ম্যাট্রিক সাটিফিকেটে মেয়েদের বয়স লেখা থাকে না। আমার মেয়ে আমারই মতো জিনিয়াস। ও তেরো বছর বয়সে ম্যাট্রিক পাস করে। এখন ওর বয়স সতেরো। আমি হোরোস্কোপ দেখাতে পারি।” ধনপতিবাবু বলেন।

“তা হলে আদালতেই আপনার সঙ্গে মোকাবিলা হবে।” মানস পাণ্টা দেয়।

এবার যুথিকা ভেঙে পড়ে। ‘বাবা, তুমি আমাকে ত্যাগ করতে চাও ত্যাগ করে। তোমার সম্পত্তি আমি চাইনে। কিন্তু আমার বিয়েটা বাতিল কবতে যেয়ো না। একবার বিয়ে হয়েছিল শুনলে আর কেউ আমাকে বিয়ে করবে না। তোমার সেই ব্যারিস্টার সুপাত্র মিষ্টার সান্তালও না। মানসের কী। সে পুরুষ মানুষ। সে হয়তো আরো ভালো বোঁ পাবে। আমি কি ওকে এত সহজে কেড়ে দিতে পারি? কড়ি দিয়ে কিনিনি, কিন্তু দড়ি দিয়ে বেঁধেছি। আদালতে দাঁড়িয়ে বলব যে আমিই অগ্রণী হয়ে বিয়ের নোটিস দিয়েছি। আর আমার দেওয়া বয়সের অঙ্ক যদি মিথ্যা হ’লে থাকে আমাবই তো সাজা হবে। এ বিবাহ তোমাদের ইচ্ছার বিরুদ্ধে, কিন্তু আমার ইচ্ছার বিরুদ্ধে নয়। আর দু’দিন বাদে যে গ্রাজুয়েট হবে তার নিজের ইচ্ছার কি কোনো মূল্য নেই?’

‘আশুন হয়ে বাপ বারে বারে দিলেন অভিশাপ।’

তারপর থেকে দেখা সাক্ষাৎ চিঠিপত্র বন্ধ। যেমন দেবা তেমনি দেবী। নাতি হয়েছে খবরের কাগজে দেখেও তাঁর মন নরম হয়নি। ও যদি ছুঁয়ে দেয় তা হলে তো তাঁকে দিনে দশবার স্নান করতে হবে। নাতনি হয়েছে সেটাও খবরের কাগজে দেখে থাকবেন। কিন্তু সম্পূর্ণ উদাসীন।



ওঁরা সিমলা থেকে অবসর নিয়ে কলকাতায় বাড়ী কিনেছেন। ছেলেরা বিলেতে পড়াশুনা করে লায়েক হয়েছে। একজন তো মেম বিয়ে করেছে। তাতে জ্ঞাত যায়নি। সে যে ছেলে। দুঃখের বিষয় ওঁরাও বোনের খোঁজ নেয় না। যুথিকাও গায়ে পড়ে স্বামীর জন্তে অপমান ডেকে আনতে চায় না। শিবের জন্তে সতীর মতো সে দেহত্যাগ করেনি, পার্বতীর মতো পুত্রকণা নিয়ে ঘর সংসার করেছে। পুরনো প্রসঙ্গ উঠলে মানসকে মনে করিয়ে দেয়, “তোমাকে আমি ছাড়িনি। ছাড়ব না। বাপ মা কেও কি ছেড়েছি? না, তাঁরাই আমাকে ছেড়েছেন।”

এসব দেখে শুনে মানসের বিশ্বাস হয় না যে বিপ্লব কখনো এমন দেশে হবে যেখানে মানুষ এই বিংশ শতাব্দীতেও বর্ণাশ্রম। বিপ্লব যদি হয় তবে সেটা শ্রেণীযুদ্ধ নয়, বর্ণযুদ্ধ। হাই-বর্ণ বনাম লো-বর্ণ। হাই-বর্ণকে সম্পূর্ণরূপে নতশির করতে হবে, আর লো-বর্ণকে আত্মসম্মানে উচ্চশির। জন্মগত কারণে কেউ উপরে নয়, কেউ নিচে নয়। একটি বিশেষ জাতে জন্মেছে বলে কতক লোক চিরকাল উপরে, কতক লোক চিরকাল নিচে এর ওলট পালটই বিপ্লব। এটা ঘটবে যখন লোকে বুঝতে পারবে যে কেউ পূর্বজন্মের স্মৃতির ফলে ব্রাহ্মণ হয়ে জন্মায় না, কেউ পূর্বজন্মের দুষ্কৃতির ফলে শূদ্র হয়ে জন্মায় না। প্রচলিত সমাজব্যবস্থাকে সনাতন বলে চালাবার জন্তে কর্মবাদ বা জন্মান্তরবাদকে ব্যবহার করা অসুচিত। বর্ণাশ্রমীরাই এটা করেছে, বৌদ্ধরা এটা করেনি।

আহত হয়ে মানস বলেছিল যুথিকাকে, ‘জুঁই, তুমি ধীবরকণা সত্যবতী হলেও আমি তোমাকে বিয়ে করতুম। তোমার পরিচয় তুমি।’

“তা হলে আমি ত্যাজ্য কণা না হয়ে তুমি ত্যাজ্যপুত্র হতে। আমি কি তাতে স্তুখী হতুম?” যুথিকা দরদর সঙ্গে বলে।

মানস স্বীকার করে হিন্দু সমাজের ধাপের পর ধাপ। উচ্চতর নিম্নতর অসংখ্য পইঠা। ওর বাবা একসময় শক্তি হয়ে সৃষ্টিয়েছিলেন, “তুই নাকি গয়লানী বিয়ে করতে যাচ্ছিস?” না, সে চেয়েছিল চাষানী বিয়ে করতে। বলে না।

মানসের মা নেই, বাবা তাঁর বোমাকে সাদরে গ্রহণ করেন। তাতে কিন্তু প্রমাণ হলো না যে যুথিকা যদি গোপী হতো তিনি তেমনি উদার হতেন। মানস মনে প্রাণে ব্রাহ্ম, কিন্তু হিন্দু সমাজভুক্ত। সমাজকে সে ভিতর থেকেই সংস্কার করতে চায়। জাতের বিচার একদিনে দূর করতে পারা যাবে না,

কিন্তু অসবর্ণ বিবাহ ব্যাপক হলে তার থেকে হুল চলে যাবে। শ্বশুর শাশুড়ির কাছে তাকে হেনস্তা হতে হবে না।

তার বিবাহ যেমন প্রতিলোম বিবাহ সৌম্যদার বিবাহও তেমনি অমূল্য বিবাহ। ওর আত্মীয়রা কি জুলিকে সাদরে গ্রহণ করবে? হয়তো মানসের মতো অবমাননা হবে বেচারির। এই পনেরো বছরে সমাজ অনেকটা বদলেছে। তবে শহর অঞ্চলেই।

সৌম্যদার বিয়েতে মানস যোগ দিতে পারে না। দায়রার মামলায় আর্টকে পড়েছিল। তা ছাড়া স্বপনদাকে লিখতে তার মনে দ্বিধা ছিল। টেলিগ্রাম করে ক্ষমা চায় ও অভিনন্দন জানায়। আশা করে অমূল্যের স্বেচ্ছাক্রমে সম্পন্ন হবে।

সৌম্যর পরিকল্পিত বিবাহ পদ্ধতি জুলির অমূল্যদান পায় না। অমূল্যদান আশ্রমেই হয়, কিন্তু সংক্ষেপিত হিন্দু মতে। শালগ্রাম বাদ, কিন্তু সংস্কৃত মন্ত্র বাদ নয়। স্ত্রী আচার বাদ, কিন্তু হোম বাদ নয়। স্প্রদান বাদ, কিন্তু পরস্পরকে বরণ বাদ নয়। সাত পাক বাদ, কিন্তু সপ্তপদী বাদ নয়। সঙ্গীত বাদ, কিন্তু শঙ্খধ্বনি বাদ নয়। দর্শকদের সকলের মিষ্টিমুখের প্রয়োজন ছিল। জুলিই জনে জনে মিষ্টান্ন বিতরণ করে। এর পরে ওরা রেজিষ্ট্রি অফিসে যায়।

জুলির মা বাড়ীতে পার্টি না দিয়ে হোটেলের ডিনার দেন। জুলির কথায় নিমন্ত্রিতদের সংখ্যা সংক্ষেপিত করেন। স্বপনদা, দীপিকাদি, বাবলীও নিমন্ত্রিত। স্বপনদা বাবলীকে বলেন, “চকোলেট, এর পর তোমার পালা।” বাবলী হেসে উড়িয়ে দেয়। “বিয়ে একটা বুজোয়া ব্যাপার!”

সৌম্য তার কাকার কাছে থেকে যে চিঠি পেয়েছিল তা একজন বাস্তববাদীর লেখা। “রাষ্ট্রে তোমরা যেসব পরিবর্তন ঘটাতে চাও সেসব লোকে সমর্থন করতে রাজী, কিন্তু সমাজের বেলা তারা ঘোর রক্ষণশীল। জাত ভেঙে বিয়ে করলে সমাজও ভেঙে যায়। বিধবার বিয়ে তো পাপ। তোমরা আপাতত বাইরেই থাকো, আমি এখানকার জনমত পরিবর্তনের জন্তে চেষ্টা করি। সাধারণ নির্বাচনে আমাদের দল যদি জেতে আর মন্ত্রিত্ব গ্রহণ করে তা হলে আমি একজন মন্ত্রীকেই এখানে ধরে নিয়ে আসব আর তিনিই তোমাদের অভ্যর্থনা করবেন।”

দেশের বাড়ীতে যাওয়া হয় না। শান্তিনিকেতনে দিন তিনেক থাকার ব্যবস্থা করা হয়। সেখানে মানসও সপরিবারে গিয়ে রবিবারটা কাটায়।

জুলি কি আর সেই জুলি ? লজ্জানম্র লক্ষ্মী বো। ঠিক যেন একটি পল্লীবধু।  
উড়নচণ্ডী বিপ্লবী নায়িকা নয়। জোন অভ আর্ক নয়। সিঁথিতে সিঁদুর।  
কপালে জলজলে টিপ। বদনে আনন্দের উদ্ভাস। বিয়ের জল পড়ে স্নিগ্ধ।

সৌম্যকেও আগের মতো শুষ্ক কাষ্ঠ মনে হয় না। তারও পরিবর্তন  
হয়েছে। অহুমান করা কঠিন নয় যে রসের আত্মদান পেয়েছে।

যুথিকা মানসের কানে কানে বলে, “জুলি এখন বিজয়িনী। সৌম্যদা  
বিজিত। শিব আর পার্বতী।”

## ॥ সাত ॥

যুথিকা ও জুলি ছেলেমেয়েদের নিয়ে বেড়াতে যায়। সৌম্যর সঙ্গে গল্প  
করে মানস। বিবাহের প্রসঙ্গ যেন দূরোতে চায় না।

“দেশ যতদিন না মুক্ত হয়েছে ততদিন আমাকে ভীষ্মের মতো প্রতিজ্ঞা  
পালন করতে হবে। এ ছাড়া আমি আর কোনো কথা ভাবিনি, মানস।  
কিন্তু দেখলুম বিয়াল্লিশ সালের সংগ্রামে আমাদের জিৎ হলো না। আরো  
একবার লড়তে হবে। কবে, কতদিন পরে কেউ বলতে পারে না। বাপু  
বেঁচে আছেন আরো একবার লড়বেন বলে। একশো বছর বয়স পর্যন্ত বাঁচার  
কথাও বলছেন। তার মানে পরের বারের সংগ্রামের জন্তে আরো পঁচিশ বছর  
সময় নিচ্ছেন। তা বলে আমিও কি বিবাহের জন্তে আরও পঁচিশ বছর  
সময় নিতে পারি ? জুলির হতাশা আমাকে ভাবিয়ে তোলে। তার আশা  
ছিল গান্ধীজী যা পারলেন না নেতাজী তা পারবেন। কিন্তু ইন্ফলে তাঁর  
আজাদ হিন্দ ফৌজের জিৎ হয়নি। ইংরেজকে তা হলে তাড়াবে কারা ?  
কমিউনিস্টরা ? এ চিন্তা ওকে পাগল করে তোলে। ও বিপ্লব বলতে বোঝে  
রাষ্ট্র বিপ্লব, সমাজ বিপ্লব নয়। এখন ওর সব আশা ভরসা নির্মূল। ওর মা  
আমাকে ওর ভার নিতে বলেন। মা না বললেও আমি ওর অবস্থা বিবেচনা  
করে আপনা থেকে নিতুম। এদেশে বিয়ে না করে একসঙ্গে থাকা যায় না।  
ওদেশে অবশ্য সেরকম নজীর আছে। সেটা তোমাদের সাহিত্যিক ও শিল্পীদের  
মধ্যে। ভালো করেই বুঝতে পারি যে জুলিকে বিয়ে না করলে ওর অবস্থা  
আরো খারাপ হবে। নোনাদিকে লিখি, তিনি বাপু'র সঙ্গে কথা বলে তাঁর  
অনুমতি গ্রহণ করেন। কিন্তু—”

মানস সোমার মুখে দুট্ট হাসি দেখে বলে, “কিন্তু কী ?”

“কিন্তু শর্ত আছে।” সোম্য সবটা একনিঃশ্বাসে বলেন না।

“শর্ত। কী শর্ত।” মানস কৌতূহল দমন করতে পারে না।

“তোমার মাথায় ঢুকবে না। সাধারণ মানুষের মাথায় ঢুকবে না। আমিও কি ভাবতে পেরেছি ?” সোম্যার চোখে মুখে হাসি।

“আরে বলোই না। অত ধানাই পানাই কেন ?” মানস অর্ধৈর্ষ্য হয়।

“বিবাহের শর্ত ব্রহ্মচর্য।” সোম্য গম্ভীরভাবে বলে।

মানস আর সহিতে পারে না। “গান্ধীজী একটা কিল্-জয়।”

সোম্য গান্ধীজীর পক্ষ নেয়। “আমরা গান্ধী পরিচালিত সত্যগ্রহীরাও একটা ফোজ। ফোজে থাকতে হলে কতকগুলো কাহুন মানতে হয়। এটাও সেইসব কাহুনের একটা। যদি গঠনের কাজ নিয়ে থাকি, সত্যগ্রহে যোগ না দিই, তা হলে বিবাহের পর ব্রহ্মচর্যের বাধ্যবাধকতা নেই। গঠনের কাজও দেশের কাজ। গঠন থেকেই সংগঠন গড়ে উঠবে। সংগঠন ছাড়া গণ সত্যগ্রহ সম্ভব নয়। এবার সেটা আমরা হাড়ে হাড়ে বুঝছি। অসংগঠিত জনতা যা করেছে তা গণ সত্যগ্রহ নয়। তার ব্যর্থতা গণ সত্যগ্রহের ব্যর্থতা নয়। গান্ধীজীর ব্যর্থতা তো নয়ই। আমি আপাতত গঠনকর্মেই আত্মনিয়োগ করছি। তাই বিবাহের পর ব্রহ্মচর্য পালন করছি। কিন্তু সত্যগ্রহের সময় যখন আসবে তখন ?”

“আবার ব্রহ্মচর্য অবলম্বন করবে।” মানস উপহাস করে।

“তুমি কি মনে করেছ আমি পারব না ?” সোম্য কঠোরভাবে বলে।

“এটা কি তুমি বুঝতে পারছ না যে তুমি ব্রহ্মচারী হলে তোমার স্ত্রীও ব্রহ্মচারিণী হতে বাধ্য হয় ? কেন ওকে তুমি বাধ্য করবে ? কী অধিকার আছে তোমার ? তুমি ওর অহুমতি চাইতে পারো, কিন্তু ও যদি অহুমতি না দেয় ? অবশ্য সেও যদি সত্যগ্রহে যোগ দিতে চায় সে কথা আলাদা স্বামী-স্ত্রীর সম্পর্ক জোর জবরদস্তির সম্পর্ক নয়। একজন আরেকজনের উপর ব্রহ্মচর্য বা সত্যগ্রহ চাপিয়ে দিতে পারে না। ভুলে যেয়ো না যে নারীরও ক্ষুধা তৃষ্ণা আছে। তাকে ক্ষুধিত তৃষিত রাখলে সে কষ্ট পায়। তোমার অন্তরে পাশন নেই, তা আমি জানি। কিন্তু কম্পাসন তো আছে। কী করে তুমি একটি নারীকে ক্ষুধিত তৃষিত রাখবে ? কষ্ট দেবে ?” মানস জিজ্ঞাসা করে।

সৌম্য খপ করে কথা কেড়ে নিয়ে বলে, “কী করে তুমি জানলে আমার অন্তরে প্যাশন নেই, শুধু কম্পাসন আছে ? আমার প্যাশন আমি সাবলিমেট করেছি। দেশের মুক্তির জন্তেই সে প্যাশন। নারীর মধুর রসের জন্তে নয়। গান্ধী, জবাহরলাল, সুভাষ এঁদের অন্তরেও প্যাশন আছে। সে প্যাশন দেশের মুক্তির জন্তে। নারীর সঙ্গে মিলনমাধুরী তাকে লক্ষ্যভ্রষ্ট করেনি। আমার আশঙ্কা আমি লক্ষ্যভ্রষ্ট হব।”

মানস তাকে আশ্বাস দেয় যে সবাই ব্রহ্মচারী না হলেও দেশ স্বাধীন হবে। আমেরিকা হয়েছে, ইটালী হয়েছে, আয়ারল্যান্ড হয়েছে। কোথাও ব্রহ্মচর্যের এমন মাহাত্ম্য নেই। সংগ্রামের নেতারা কেউ মহাত্মা নন। শুধু ভারতের বেলাই প্রত্যাশা করা হচ্ছে যে সংগ্রামের নেতাদের মহাত্মা হতে হবে। আর মহাত্মা হতে হলে ব্রহ্মচারী হতে হবে। এ দেশের জনগণ ব্রাহ্মণ বলতেই অজ্ঞান, সন্ন্যাসী বলতেই মস্তমুগ্ধ। নেতারাও হয় ব্রাহ্মণ, নয় সন্ন্যাসী। সেইজন্তেই তাঁদের এত প্রেঙ্টিজ। তবে মুসলমান বা শিখদের মধ্যে এ কুসংস্কার নেই। তাঁদের মধ্যে যে কেউ বীরপুরুষ হয়নি তা নয়। বীরপুরুষরা বরং বহুভোগী। দেশকে মুক্ত করা বীরপুরুষ ও বীরাজনাদের কাজ। তাঁদের নিয়েই মহাকাব্য বা নাটক রচিত হয়।”

“সে কথা ঠিক।” সৌম্য স্বীকার করে। “জুলিকেও আমি ব্রহ্মচারিণী হতে বলিনে। কিন্তু আমি যদি ব্রহ্মচারী হই, ও যদি ব্রহ্মচারিণী হতে না চায়, তবে সে এক মহা অশান্তির ব্যাপার হবে। বাপু কলকাতা আসবেন শুনেছি। তাঁকে একলা পেলে জিজ্ঞাসা করব এহেন সমস্যার সমাধান কী।”

“নারীকেই আত্মবলি দিতে হবে, এ ছাড়া আর কী ? কস্তুরবাকে তিনি আত্মবলি দিতে প্রণোদিত করেছেন। জুলিকেও কস্তুরবা হতে বলবেন। কিন্তু ও কেন শুনবে ? তুমি কি বিয়ের আগে ওকে গান্ধীজীর শর্তের কথা জানিয়েছ ?” মানস সৌম্যকে বেকায়দায় ফেলে।

“না, ভাই ! জানালে ও হয়তো মারতে আসত। ওর প্রথম বিবাহে ফুলশয্যা হয়নি। ও ব্রহ্মচারিণী থেকে গেছে। দ্বিতীয় বিবাহেও তাই হলে ও কি ক্ষমা করবে ? দেশের নেতারা ওকে নিরাশ করেছেন। আমি ওর স্বামী হয়ে যদি ওকে নিরাশ করি ও কি মারমুখী হবে না ?” সৌম্য কৈফিয়ৎ দেয়।

এর পর মানস চিন্তা করে বলে, “গান্ধীজীর উচ্চাভিলাষ তিনি সেক্সলেস

হতে চান। তার মানে একজন বোধিসত্ত্ব। অবলোকিতেশ্বর কি মঞ্জুশ্রী। তাঁর পাশ্চাত্য পড়ে তুমিও আরেকজন বোধিসত্ত্ব। ক্ষিতিগর্ভ কি সামন্তভদ্র। তোমার পাশ্চাত্য পড়ে বেচারি জুলি যে কী হবে তাই ভাবছি।” মানস রহস্য করে।

সৌম্য হেসে ওঠে। “আমার পাশ্চাত্য পড়ে ও মা হতে চায়। একটি ছেলের ও একটি মেয়ের। এর পরে তো ওর কোনো চাহিদা থাকার কথা নয়। সেক্স ব্যাপারটা তো সন্তানার্থে। মানুষ তার উপর আরো কিছু আরোপ করতে পারে, কিন্তু প্রকৃতির উদ্দেশ্য তো প্রজনন। সমাজেরও অভিপ্রায় পৌর্বাপর্য রক্ষা। যাকে বলে পিতৃঋণ শোধ। ঋণমুক্ত হবার পর আমাদের উভয়েরই কর্তব্য মিলনকামনাকে কায়িক স্তর থেকে আত্মিক স্তরে উন্নীত করা। যৌবন তো ফুরিয়ে আসছে। আর কয়েক বছর পরে আমার হবে বানপ্রস্থের বয়স। আর জুলির চেঞ্জ অভ লাইফ। এমনতেই দাঁড়ি টানতে হবে।”

“বিরতি হয়তো একদিন আপনি আসবে। কিন্তু জোর করা বিরতির পরিণাম ভয়াবহ। যে প্রকৃতির দোহাই তুমি দিয়েছ সেই প্রকৃতিই কামনাপূরণের প্রবর্তনা দেয়, সন্তান থাকা সম্বন্ধে। স্ত্রী নারাজ হলে স্বামী অকৃত্রিম যোগ, স্বামী নারাজ হলে স্ত্রী অশান্ত হয়। সব চেয়ে ভালো হচ্ছে দু’জনের পায়ে পা মিলিয়ে চলা। শয্যা সংক্রান্ত ব্যাপারে একতরফা সিদ্ধান্ত নেওয়া মহা অনর্থকর। একবার বিয়ে করলে তারপর থেকে তুমি আর ফ্রী নও। তোমার ফ্রীডম আসবে জুলি বেদিন স্বেচ্ছায় ও স্বতঃস্ফূর্তভাবে তোমাকে বলবে, আর চাইনে। কামনার কোনো বয়সসীমা নেই। সন্তানধারণের বয়স পার হয়ে গেলেও নারী পুরুষকে আকর্ষণও করতে পারে, তার দ্বারা আকৃষ্টও হতে পারে। তখন আর অন্তঃসত্ত্বা হবার ভয় ওর থাকে না। স্ত্রী নিশ্চিন্ত হয়ে আরো অনেকদিন ভোগস্বাদ চাইতে পারে। যদি না রোগে শোকে জর্জর হয়।” মানস যতদূর জানে।

সৌম্য কী যেন ভাবছিল। বলে, “বেদ উপনিষদে ব্রহ্মকে বলা হয়েছে ন স্ত্রী, ন পুমান্। ব্রহ্ম শব্দটি ক্লীবলিঙ্গ। তোমরা ব্রাহ্মরা তাঁকে বানিয়েছ পুংলিঙ্গ। যিনি পুরুষও নন, নারীও নন তাঁর সঙ্গে মিলিত হতে হলে ন স্ত্রী ন পুমান্ হতে হবে। এটাই তো লজিক। এদিক থেকে বাপুই লজিকাল। তিনি আগে বলতেন ভগবানই সত্য। আজকাল বলেন সত্যই ভগবান। সত্য শব্দটি ব্রহ্ম শব্দটির মতো ক্লীবলিঙ্গ। ক্লীবলিঙ্গের সঙ্গে একাত্ম হতে হলে

ক্লীবলিঙ্গই হতে হয়। সেটাই এখন তাঁর কাছে আধ্যাত্মিক সাধনা। সত্য আর অহিংসা আর ব্রহ্মচর্য তিনটিই তাঁর কাছে এক, একটিই তিন। আমার কাছে এখনো হয়নি, কবে হবে তা নির্ভর করছে দীর্ঘজীবনের উপরে। পরের বারের সংগ্রামে যদি যোগ দিই তবে জেলে যেতে হবে না, সেটা সকলে পারে। বুলেটের সামনে বুক পেতে দিতে হবে কিংবা পেছন থেকে ছোরা খেতে হবে। সত্যগ্রহ মানে জেলযাত্রা নয়। আগারপ্রাউণ্ডে বাওয়া নয়। বাপু আমাকে গঠনের কাজে নিযুক্ত রেখে বাঁচিয়ে দিতে চান, কিন্তু আমার ভিতরে একজন সৈনিক আছে, সে তোমার মতো নীরব সাক্ষী হতে নারাজ। সে কাঁপিয়ে পড়বে, সম্ভবত মার খেয়ে মরবে।”

“গড ফরবিড।” মানস বলে ওঠে। “তুমি এখন বিবাহিত গৃহস্থ, তুমি আর স্বাধীন নও। জুলির অলুমতি না নিয়ে তুমি প্রাণ দিতে পারবে না। ওকে বিধবা করার কী অধিকার আছে তোমার? ও ক’বার বিধবা হবে? যদি ছেলেমেয়ের মা হয় তবে বিধবা হয়ে আরো কষ্ট পাবে। তোমাকে বাপু গঠনের কাজে একনিষ্ঠ হতে বলেছেন। তোমাকে তাঁর নির্দেশ মানতে হবে।”

এর পর ওঠে মিলির প্রসঙ্গ। একান্ত কুণ্ডা আর সঙ্কোচের সঙ্গে দোম্য মানসকে বিশ্বাস করে বলে, “একচক্ষু হরিণের মতো আমি একটা দিকই দেখেছি, আরেকটা দিক দেখিনি। জুলির দিকটা দেখেছি, মিলির দিকটা দেখিনি। এখন ব্রাভে পারছি একই বাড়ীতে দুই নারী থাকতে পারে না। এমন কী, একই শহরেও না। মিলির বিলেত ফিরে যাবার অপেক্ষায় আছি, কিন্তু মিলি নাকি স্থির করেছে যে ওর ছেলেকে স্বদেশেই মালুম করবে, বিদেশে নয়। ওদিকে সুকুমার লণ্ডনের শহরতলী ব্রেষ্টে সন্ধ্যা পেয়ে বাড়ী কিনেছে, সেইখানেই সেটল করবে। ছেলেকে বিলেতের ভালো প্রাইভেট স্কুলে পড়াবে! তার পর অক্সফোর্ড বা কেমব্রিজে। ছেলে যখন দেশে ফিরবে তখন সে একজন কেট বিষ্ট হয়ে ফিরবে। যেমন শ্রীঅরবিন্দ। সুকুমারের মতো হচ্ছে বেস্ট এডুকেশন, নট স্বদেশী এডুকেশন। মিলির মতো ঠিক বিপরীত। ছেলে দেশের পড়া সাজ করে বিদেশে যাবে। যেমন নেতাজী সুভাষচন্দ্র। মিলি তার ছেলের মঙ্গলের জন্তে দেশে থেকে যেতে চায়, স্বামীর মঙ্গলের জন্তে বিলেতে বসবাস করতে নারাজ। এই নিয়ে ওদের মধ্যে মনোমালিগ দেখা দিয়েছে। সুকুমার দেশে ফিরে কী করবে? ভেরেণ্ডা ভাজবে? তবে ও তুখোড় লোক। কৃষ্ণমেননের সঙ্গে যোগাযোগ রক্ষা করে চলেছে। আর

কৃষ্ণ মেনন তো জবাহরলালের ভক্ত। লেবার পার্টিতে ঠাঁর যথেষ্ট প্রভাব। এখন তো লেবার পার্টি ক্ষমতায় এসেছে। কংগ্রেসের সঙ্গে মিটমাটের সম্ভাবনা নিকটবর্তী। জবাহরলাল ইচ্ছে করলে মেননকে আর মেনন ইচ্ছে করলে সুকুমারকে দেশে ফিরিয়ে এনে সুপ্রতিষ্ঠিত করতে পারেন। মিলি কিন্তু ভুড়ি মেরে উড়িয়ে দেয়। চার্চিল এখন গভর্নমেন্টে নেই, তবু অপোজিশনে তো আছেন। ভারতসংক্রান্ত প্রশ্নে ব্রিটিশ জনমত চার্চিলের মুখের দিকে তাকিয়ে, অ্যাটলীর মুখের দিকে নয়। চার্চিলের পার্টির সঙ্গে জিন্নার পার্টির সম্পর্ক তেমনি নিবিড় যেমন লেবার পার্টির সঙ্গে নেহেরুর পার্টির। কংগ্রেস যদি লীগের সঙ্গে মিটমাট না করে ব্রিটিশ গভর্নমেন্ট কংগ্রেসের সঙ্গে মিটমাট করবে না। কংগ্রেস কী করে পার্টিশনের ভিত্তিতে দেশকে স্বাধীন করবে? পাকিস্তান তো ব্রিটেনের তাঁবেদার হবে। বোম্বা রিভলভারের দিন আবার আসছে। স্টেন গান, গ্রেনেড ইত্যাদিও জোগাড় করতে হবে। মিলিকেও আবার আসরে নামতে হবে। সুকুমারের সঙ্গে রাজনৈতিক প্রশ্নেও তার বিরোধ! ঈশ্বরজ্ঞারা আর সব বিষয়ে ভালো, কিন্তু হাড়ে হাড়ে সাম্রাজ্যবাদী। সাম্রাজ্য ওরা কিছুতেই ছাড়বে না। ছাড়লেও মুসলিম লীগের বকলমে ভারতের মাটিতে এক পা রাখবে। তার নাম কি স্বাধীনতা? কখনো নয়। প্রকৃত স্বাধীনতা হচ্ছে আমেরিকার স্বাধীনতা। তার জন্তে সিপাইদের নিয়ে লড়তে হবে। দশ বছর দেরি হবে? হোক না দশ বছর দেরি? নেতারা ততদিন বাঁচবেন না। নাই বা বাঁচলেন? নতুন নেতার উদয় হবে।”

মানস অবাক হয়ে শোনে। জিন্না চার্চিল অ্যাকসিস আর নেহেরু লেবার অ্যাকসিস দুটোই সত্য। কী করে এদের মধ্যে মিটমাট হবে ভগবান জানেন। গান্ধীজী অবশ্য চুপ করে থাকবেন না, হয় জেলে ফিরে যাবেন, নয় মরণপণ অনশন করে স্বর্গে চলে যাবেন। সৌম্য যদি গান্ধীর নিয়তির নিজের নিয়তির সঙ্গে সংযুক্ত করে তবে তার ভবিষ্যৎ অনিশ্চিত। জুলি কি তার সঙ্গে পা মিলিয়ে নিতে পারবে? আর ওই যে মিলি ওই বা কেন আসমান থেকে নেমে এসেছে ঠিক এই মুহূর্তে? সৌম্যকে কেন মুশকিলে ফেলেছে? দুই নারীর মাঝখানে পড়ে বেচারী কি ও শহরে তিষ্ঠতে পারবে? ওর হাতে গড়া আশ্রম ওকে ছাড়তে হবে।

যুথিকা ও জুলি দীপক ও মণিকাকে নিয়ে ফিরে আসে। জুলি উচ্ছ্বসিত



হয়ে বলে, “আহা, এমন না হলে আশ্রম! কী নেই এখানে। নাচ, গান, বাজনা, চিত্র, ভাস্কর্য, স্থাপত্য। নাচের ক্লাস চলছিল, অহুমতি নিয়ে আমিও একটু নাচলুম। ওঁরা বলেছেন আমি যদি এখানে থাকি আমাকেও নাচের ক্লাসে ভর্তি করে নেবেন। কে একজন দক্ষিণী মন্তব্য করেন, ইউ আর আ বর্ন ডান্সার। এই আশ্রম আর ওই আশ্রম! কার সঙ্গে কার তুলনা! এই, তুমি কেন ওখান থেকে এখানে চলে এস না? আলাদা একটা বাড়ী করে তোমার কাজ তুমি করবে, আমার কাজ আমি করব। নাচ, গান, ছবি আঁকা এইসব আমার কাজ। আফসোস হচ্ছে আগে কেন এখানে আসিনি, নাচ গান ছবি আঁকা শিখিনি। বিবাহিতা ছাত্রীও দেখলুম। কারো কারো বয়স আমারই মতো। এই, তুমি কেন আমাকে এখানে ভর্তি করে দাও না। উত্তরাংশে গিয়ে রথীন্দ্রা ও বোঠানের সঙ্গে আলাপ করে এসেছি। ওঁরা আমাকে পেলে খুব খুশি হবেন। থিয়েটারে একটা পার্ট দেবেন। আহা, থিয়েটার! কী চমৎকার! বললেন আমাকে যা মানাবে। কার পার্টে, জানো? ‘রক্তকরবী’র নন্দিনীর পার্টে। ই্যা, আশ্রমে যদি থাকতে হয় তো এই হচ্ছে সেই আশ্রম। মহর্ষি ও মহাকবির স্বপ্ন।”

“জুলি যা বলছে তা ভেবে দেখবার মতো। এটাও আশ্রম। এখানে এলে বা এর কাছাকাছি নতুন একটা আশ্রম প্রতিষ্ঠা করলে তোমার কোনো ক্ষতি হবে না, ওর সর্বাঙ্গীন বিকাশ হবে। তুমি বাণুকে চিঠি লিখে ওঁর অহুমতি নাও। জুলিকে যদি রাজনীতি ভুলিয়ে দিতে চাও এই সেই পরিবেশ।” মানসের পরামর্শ।

সৌম্য গম্ভীরভাবে বলে, “জুলিকে নয়, মিলিকে। ওর ছেলের পড়াশুনার পক্ষে এই পরিবেশই আদর্শ। জুলির যদি ছেলেমেয়ে হয় ওরাও একটু বড়ো হলে এখানে আসবে। তখন জুলিও আসবে তাদের নিয়ে থাকতে। কিন্তু আমায় কি সে স্বাধীনতা আছে? ওখানে আমি হাজার জন কাটুনীকে দিয়ে স্নতো কাটাই, তাদের পেছনে আমার বছরে খরচ হয় সাড়ে তিন লাখ টাকা। তারপর স্থানীয় তাঁতীদের দিয়ে কাপড় বুনিয়ে নিই। তাতেও খরচ হয় লাখ দেড়েক টাকা। ছুতোর, কামার, রংরেজদের পেছনেও অনেক টাকা খরচ হয়। তা ছাড়া আশ্রমের কর্মীরা আছেন। ভাণ্ডার চালাতেও খরচ হয়। এখানে যদি আসি আবার গোড়া থেকে শুরু করতে হবে। আবার সেই চলি চলি পা পা। কতকাল লাগবে তত বড়ো আকার দিতে। সেই সময়টা

ওখানে দিলে ওখানকার আশ্রম দ্বিগুণ বড়ো হতে পারে। আমাদের ওখানে পাঠানো হয়েছে পূর্ববঙ্গের হিন্দু মুসলমানের মধ্যে সদ্ভাব রক্ষা করতে। গঠনকর্মের মাধ্যমে। আমি যে খরচটা করি তার সিংহের ভাগ পায় মুসলমানরা, তারাই স্থানীয় সংখ্যাগুরু। ব্যয়ের চেয়ে আয় অনেক কম। ফী বছর লোকসান দিতে হয়। খাদি এখনো আত্মনির্ভর হয়নি। সজ্ব থেকে ভতুঁকি দেয়। এই উপলক্ষে হিন্দু মুসলমানের যে ঐক্য গড়ে তুলেছি সেটা মুসলিম লীগ তথা হিন্দু মহাসভা উভয়েরই চক্ষুশূল। পালিয়ে এলে চলবে না, লেগে থাকতে হবে। আমাদের বিরুদ্ধে কী রকম প্রোপাগান্ডা হচ্ছে, জানো? বাবুরা দেশের জন্তে জেল খাটছেন, তাঁরা দেশকে ভালোবাসেন। কিন্তু দেশকে ভালোবাসলে কী হবে, দেশের মানুষকে যে ভালোবাসেন না। মুসলমানকে তাঁরা ক্ষমতার অংশ দেবেন না। ইংরেজকে তাড়াবার সঙ্গে সঙ্গে মুসলমানকেও তাড়াবেন। ইংরেজও বিদেশী, মুসলমানও বিদেশী। ইংরেজও বিধর্মী, মুসলমানও বিধর্মী। ইংরেজও বিজেতা, মুসলমানও বিজেতা। এক টিলে দুই পাখী মারবেন। পাকিস্তানই একমাত্র রক্ষাকবচ।”

মানস গভীরভাবে বিচলিত হয়। বলে, “তোমাকে কাসাবিয়াঙ্কার মতো ওই জাহাজের ডেকেই দাঁড়িয়ে থাকতে হবে, সৌম্যদা। চারদিকে আগুন ধরে গেলেও। পলায়ন বুদ্ধিমানের কাজ, কিন্তু সত্যাপ্রহীর কাজ নয়।”

জুলি ক্ষেপে গিয়ে বলে, “তা হলে তুমিই বা কেন ওখানে বদলী হয়ে যাও না? তুমিও তো হিন্দু মুসলমানের ঐক্য চাও।”

মানস এর জন্তে প্রস্তুত ছিল না। বলে, “আমি তো চাকরি থেকে অকালে অবসর নিতে যাচ্ছি।”

“তার মানে তুমি এস্কেপিষ্ট। ছি ছি, মানসদা।” জুলি ঠিকারি দেয়।

এবার যুথিকা তার স্বামীর পক্ষ নেয়। “ওর এই সিদ্ধান্তটা পাঁচবছর আগে নেওয়া হয়ে গেছে। শুধু যুদ্ধশেষের অপেক্ষা। আর আহুপাতিক পেনসনের।”

“সে কী, মানসদা, তুমি আমাদের বিষম বিপদের মুখে ফেলে নিজে নিরাপদ হতে চাও। যদিও তোমরা আমাদের শত্রুপক্ষের লোক তবুও তোমরা থাকলে আমরা নিরাপদ বোধ করি।” জুলি অন্তর থেকে বলে।

“এতকাল তো দেশপ্রেমিকদের কাছ থেকে ইটপাটকেল খেয়ে এসেছি,

আজ হঠাৎ ফুলের তোড়া কেন ? কবে থেকে আমাদের কদর বেড়ে গেল ?”  
মানস স্থায়।

“হিন্দু অফিসার একটি কয়লে হিন্দুর রক্ষকও একটি কমে। দেখছ না পরিস্থিতি কেমন ঘোরালো হয়ে আসছে ? ইংরেজকে তাড়াতে গিয়ে শুনছি মুসলমানকেও তাড়াতে যাচ্ছি। যা স্বপ্নেও ভাবিনি। মুসলমান হচ্ছে ফ্রেশ অভ্ মাই ফ্রেশ, ব্লাড অভ মাই ব্লাড। কিন্তু এখন ওদের শেখানো হয়েছে যে ওরা আলাদা একটা নেশন, ওদের জন্তে আলাদা একটা দেশ চাই, যে তাতে নারাজ হবে সেই তার শত্রু। আমরা কি নারাজ না হয়ে পারি ? গোটা বাংলাদেশটাই নাকি ওদের পাওনা। না দিলে ইংরেজকে ছেড়ে আমাদেরকেই ওরা তাড়াবে। আর নয়তো সুলতানী আমল ও নবাবী আমলের মতো পদানত করে রাখবে। আমরা কি ইংরেজকে বিদায় দিতে যাচ্ছি মুসলমানের প্রজা হতে ?” জুলির মোক্ষম প্রশ্ন।

“কিন্তু তোমার ওটা ভুল যে আমি একজন হিন্দু অফিসার। না, আমাকে ধর্ম দেখে চাকরিতে নেওয়া হয়নি। যোগ্যতা দেখে নেওয়া হয়েছে। ধর্ম দেখে যাদের নেওয়া হয়েছে তারা মুসলমান। তাদের তুমি মুসলিম অফিসার বলতে পারো। কিন্তু আমরা ইণ্ডিয়ান অফিসার। আমরা ইণ্ডিয়ানদের সবাইকার রক্ষক। হিন্দু মুসলমান ভেদ বিচার করব না। অপরাধ নির্বিণেষে দণ্ড দেব। মুসলিম লীগ আমাদের খুব বেকায়দায় ফেলেছে সন্দেহ নেই, কিন্তু বৃহত্তর মুসলিম সমাজ এখনো আমাদের বিশ্বাস করে। আমি কি তাদের জন্তে কম ভেবেছি, কম করেছি ? সৌম্যদাও ওদের জন্তে কম ভাবেনি, কম করেনি। তুমিও কম ভাববে না, কম করবে না। বৃহত্তর মুসলিম সমাজের সঙ্গে সম্পর্ক যেমন প্রীতিপূর্ণ ছিল তেমনি প্রীতিপূর্ণ থাকবে। বৃহত্তর মুসলিম সমাজই পূর্ববঙ্গবাসী সংখ্যালঘু হিন্দুর রক্ষক।” মানস উত্তর দেয়।

“পশ্চিমবঙ্গে বসে তুমি তো ওকথা বলবেই। যেতে যদি পূর্ববঙ্গে আর দেখতে যদি কী অবস্থা তবে তোমার মত বদলে যেত। তা তো নয়, তুমি চাকরি ছেড়ে পালাবাব তালে আছো।” জুলি আবার টিটকারি দেয়।

এবার সৌম্য মুখ খোলে। “সপ্তপদী আমি চাইনি, জুলিই চেয়েছিল। বেচারিকে এখন আমার সঙ্গে পা মিলিয়ে পূর্ববঙ্গে ফিরে যেতে হবে। বিপদের ভয়ে আমি কি পেছপা হতে পারি ? আমি যে গান্ধীজীর সৈনিক। বিপদের সঙ্গে আত্মার জোরে লড়াই। জুলি থাকবে আমার পাশে। জুলিই আমার শক্তি।”

“আচ্ছা, সোম্যদা,” যুথিকা স্বধায়, “সপ্তপদী হয়েছে বলে কি স্ত্রীকেই স্বামীর সঙ্গে পা মিলিয়ে নিতে হবে, স্বামীকে স্ত্রীর সঙ্গে নয়, কস্তুরবাকেই গান্ধীজীর অহুসরণ করতে হবে, গান্ধীজীকে কস্তুরবার নয়? আমাদের বিয়েতে সপ্তপদী হরনি। তার জন্যে আমার মনে খেদ ছিল। কিন্তু এখন দেখছি সপ্তপদী না হয়ে ভালোই হয়েছে। আমি জুলির চেয়ে স্বাধীন। ও বেচারিকে তোমার মতো সৈনিকের সঙ্গে যুদ্ধক্ষেত্রে যেতে হবে।”

“ও না হলে আমাকে শক্তি জোগাবে কে?” সোম্য মহাশ্বে পাণ্টা স্বধায়।

“কেন? এতদিন কে জুগিয়েছিল?” যুথিকা জেরা করে।

সোম্য এর উত্তরে বলে, “ভারতমাতা। বন্দে মাতরম্।”

“তা হলে ভারতমাতাই আবার জোগাবেন। জুলিকে তুমি শান্তিনিকেতনে থাকতে দাও। পরে ওর সঙ্গে পা মিলিয়ে নেবে।” যুথিকা বাজিয়ে দেখে।

“তবে তাই হোক। আপাতত আমার আশ্রম আমাকে টানছে। আমাকে যেতেই হবে। জুলি, তুমি কালকেই নাচের ক্লাসে ভর্তি হয়ে পড়ো।” সোম্য গম্ভীরভাবে বলে।

জুলির মুখ শুকিয়ে যায়। “রাগ করলে নাকি? আমি কি তোমাকে ছেড়ে থাকতে পারি? তুমি যেখানে যাবে আমি সেখানে যাব।”

মানস হেসে বলে, “রাশিয়াতে একটা প্রবাদ আছে, ছুঁচ যেদিকে যায় স্ততো সেইদিকে যায়। স্বামীস্ত্রীর সম্পর্ক যেন ছুঁচ স্ততোর সম্পর্ক। ছুঁচ না হলে স্ততো অকেজো। স্ততো না হলে ছুঁচ অকেজো। তবে ছুঁচই আগে আগে যায়। স্ততো অহুসরণ করে।”

তা শুনে যুথিকা ফোড়ন কাটে। “শোন, শোন। এই ছুঁচটির শিঁছু পিঁছু এই স্ততোটিকেও বাংলাদেশের কাঁথাখানা একোড় একোড় করতে হয়েছে। কোথাও কি দুটো বছর থাকতে দিয়েছে? একবার বাদে। জুলি, তোমার ভাগ্যে বদলী নেই। তুমি ভাগ্যবতী।”

“সে তো আরো ভাবনার কথা। সারাজীবন ওখানেই কাটাতে হবে নাকি? যাবজ্জীবন দীপাস্তুর!” জুলি আঁতকে ওঠে।

“কেন ইংরেজ মিশনারিরা কি সারাজীবন ভারতে কাটান না? গান্ধীবাদী গঠনকর্মীরাও আরেক রকম মিশনারি। কোথাও একটা স্কুল, কোথাও একটা হাসপাতাল, কোথাও একটা কুষ্ঠসেবাশ্রম নিয়ে মিশনারিরা বসে যান। তোমরাও তেমনি বসে যাবে। তা হলেই তো লোকের উপর তোমাদের

নৈতিক প্রভাব পড়বে। খাদির কাজ একটা বিজনেস নয়। লোকে যদি সেটাকে টাকা পয়সার নিরিখে বিচার করে তবে মূল উদ্দেশ্যই ব্যর্থ হয়। মূল উদ্দেশ্য হচ্ছে শোষণহীন সমাজ সংস্থাপন। নইলে আর্থিক লোকসান দিতে দিতে তোমরা একদিন দেউলে হবে। তখন আশ্রম গুটিয়ে নিয়ে অগ্রা যাবে।” মানস যেমন অনুমান করে।

“নেহাং ভুল বলেনি মানস।” সৌম্য স্বীকার করে। “আমরা এখনো লোকের মনের মধ্যে গভীর ভাবে শিকড় গাড়াতে পারিনি। গভর্নমেন্ট সব তত্বন চলে দিয়েছে। লোকে ‘হাঁ, হাঁ’ করে ছুটে আসেনি। পুলিশের সামনে ভয়ে পড়েনি। যেসব কর্মী আন্দোলনে বাঁপ দিয়েছিল তাদের বাদ দিয়েও আরো কয়েকজন কর্মী ছিল গঠনকর্মে রত। তারা নিঃশব্দে মরে পড়ে। কথো দাড়াই না।”

“মানসদা,” জুলি নিবেদন করে, “আমি কিন্তু গান্ধীবাদীও নই, মিশনারিও নই। মতবাদের দিক থেকে সৌম্য যেমন স্বাধীন আমিও তেমনই স্বাধীন। তবে কার্যকলাপের বেলা আমাকে সতর্ক হতে হবে, যেন গঠনকর্ম বা মত্যাগ্রহ বাধা না পায়। আপাতত আমি রাজনীতি থেকে সরে দাঁড়াচ্ছি। এ রাজনীতি আমাকে স্বস্তি দিচ্ছে না। আমি চাই বৈপ্লবিক রাজনীতি, অথচ কমিউনিস্ট পার্টির ডিক্টেটরশিপ নয়। রাশিয়ায় ওরা ধনিকদের মালিকানা রাষ্ট্রস্বত্ব করেছে, কিন্তু শ্রমিকদের মালিকানা বা মালিকানার অংশ দেয়নি। তারা শ্রম দেয়, পারিশ্রমিক পায়, যেমন বাড়ীর চাকর। চাকরে মালিকে অনেক তফাৎ! রাষ্ট্রের চাকুর বলে পরিচয় দেওয়াটা কি খুব গৌরবের? সরকারী চাকুরে হিসাবে তুমি, মানসদা, কি খুব একটা গৌরব বোধ করো? কংগ্রেস ক্ষমতায় এলেও কি তোমার গৌরব বৃদ্ধি পাবে? শ্রমিকরা যেদিন জানবে যে তাদের কারখানার তারাই মালিক, প্রত্যেকেই মালিকানার অংশীদার, সেইদিনই সত্যিকার সমাজতন্ত্র। তার জন্তে যদি আমার ডাক পড়ে আমি আবার রাজনীতিতে যোগ দেব। কিন্তু স্বামীস্বর সম্মতি নিয়ে।”

যুগিকার রঙ্গ করে। “সন্তানের সম্মতি নেবে না? না তুমি সন্তান এড়াতে চাও? না তুমি ওদেরকে বাপের ঘাড়ে চাপাতে চাও?”

“কী যে বলো, যুগীদি! আমি কি কখনো মা না হয়ে পারি? আশা করি ওরা ততদিনে বড়ো হয়ে থাকবে। কোথায় বিপ্লব! তার কোনো লক্ষণই আমার চোখে পড়ছে না। বিশ্ব পরিস্থিতি তার অনুকূল ছিল তিন

বছর আগে। যুদ্ধের মাঝখানে। আশার কবে যুদ্ধ বাধবে, তার জন্তে অপেক্ষা করতে হবে। এলোপাখাড়ি নরহত্যায় কোনো ফল হবে না। ভায়োলেন্স ফর ভায়োলেন্স' সেক আমার মটো নয়। সমষ্টি যেখানে ঘুমিয়ে রয়েছে গোষ্ঠী সেখানে সফল হতে পারে না। তা দিয়ে হয়তো কতক লোককে কতক সময়ের জন্তে জাগানো যায়। কিন্তু তারা আবার ঘুমিয়ে পড়ে। সৌম্য আমাকে অহিংসায় দীক্ষা দেয়নি। তবে আমি নিজেই উপলব্ধি করছি যে এদেশে সম্ভবতঃ হিংসা সম্ভব নয়, যদি না আমি তাকে তার মধ্যে ধরি। অথচ আমি যে ক্ষমতা হাতে পেয়ে হাতছাড়া করবে এটা বিশ্বাস করা শক্ত।”

মানস বলে, “সৌম্যদা, জুলি তোমার মতো পজিটিভ গান্ধীবাদী না হলেও নেগেটিভ গান্ধীবাদী। হাশুকের শোনায়, কিন্তু আমরা অনেকেই তাই। যারা ছ'বেলা ‘অহিংসা’ ‘অহিংসা’ করে তারাই যে গান্ধীবাদী তা নয়। যারা ছ'বেলা হিংসাকে এড়িয়ে চলে তারাও গান্ধীবাদী। আর, বোন জুলি, তোমাকেও একটা কথা বলি। চরকা প্রভৃতি ক্ষুদ্র যন্ত্রের মালিক আর শ্রমিক একই লোক। কেউ শোষকও নয়, কেউ শোষিতও নয়। যে ক্যাপিটাল জোগায় সে শ্রমও জোগায়। এই হলো থিয়োরি। প্র্যাকটিসে কিছু অদল বদল ঘটতে পারে। যে দেশে কোটি কোটি মানুষ বেকার বা অর্ধ বেকার সে দেশে চরকা প্রভৃতি ক্ষুদ্র যন্ত্রের সাহায্যে উৎপাদনের পরিমাণ বিপুল হতে পারে। তবে ভারী শিল্পের বেলা এ ব্যবস্থা খাটবে না। চাই প্রচুর মূলধন, সুদক্ষ শ্রমিক, অভিজ্ঞ ইঞ্জিনিয়ার করিৎকর্মী মানোজার, দূরদর্শী ডাইরেক্টর। রেল, জাহাজ, প্লেন সমস্তই আমাদের দেশে বানাতে হবে। প্রকৃতিদত্ত খনিজের সদ্যাবহার করতে হবে। নিয়ন্ত্রণ রাষ্ট্রের হাতেই থাকুক, কিন্তু মালিকানা যতদূর সম্ভব ছড়িয়ে দেওয়া যাক। শ্রমিকরাও শেয়ার হোল্ডার হোক। যেই শ্রমিক সেই আংশিকভাবে মালিক। গান্ধীজীকে বুঝিয়ে রাজী করাতে হবে।”

## ॥ আট ॥

ওদিকে দুই বন্ধুতে তর্ক করতে করতে পৌছে যায় পরমাণু বোমার বিস্ফোরণে। মানস বলে, “তীর ধনুকের যুগ কবে শেষ হয়েছে। এবার কামান বন্দুকের যুগও গেল। শুরু হলো পারমাণবিক অস্ত্রের যুগ। এখনও তোমরা অহিংসার স্বপ্ন দেখবে, সৌম্যদা? বাস্তবের দিকে তাকাবে না।”

“পরমাণু অস্ত্র নতুন। অহিংসা চিরন্তন। ইটানাল ভেরিটির অন্ততম। এর পরীক্ষা নিরীক্ষা আমরা যা করেছি তাই শেষ নয়, ভবিষ্যতে আরো কত পরীক্ষা নিরীক্ষা হবে। কেবল ভারতে নয়, আমেরিকায়, রাশিয়ায়, জার্মানিতে, জাপানে, ইংলণ্ডে, আফ্রিকায়। মহাত্মা থাকবেন না, আরো কত সাধক জন্মাবেন। মিলিটারিস্টরা মঞ্চ জুড়ে থাকবে, এ কখনো হতে পারে না। নিজেরাই মারামারি করে নিপাত যাবে। এরা যদি বাঁচে তো অহিংসার কল্যাণেই বাঁচবে। অহিংসার ভবিষ্যৎ পারমাণবিক অস্ত্রের চেয়ে সুদূরপ্রসারী। আমরা বার বার ব্যর্থ হব, কিন্তু সেই ব্যর্থতাও সিদ্ধির সোপান।” সৌম্য নিশ্চিতরূপে জানে।

“হ্যাঁ, কিন্তু পারমাণবিক অস্ত্রের সঙ্গে তোমরা মোকাবিলা করবে কেমন করে?” মানস জানতে চায়।

“দেশকে সম্পূর্ণরূপে নিরস্ত্র করে। যার হাতে যে অস্ত্র আছে সে দূরে ছুঁড়ে ফেলে দেবে। মরতে যদি হয় তো নৈতিক প্রতিরোধ করতে গিয়ে নিহত হবে। টলস্টয় হলে বলতেন অপ্রতিরোধ। গান্ধী কিন্তু অপ্রতিরোধের নয়, আত্মিক প্রতিরোধের শিক্ষাই দিয়ে যাচ্ছেন। নৈতিক প্রতিরোধ আর আত্মিক প্রতিরোধ একই কথা। পরমাণবিক অস্ত্র যার হাতে আছে তার কি শুধু হাতই আছে? হৃদয় নেই, বিবেক নেই, আত্মা নেই? বোমা ফেলবার আগে সে দশবার ভাববে। নেহাৎ পাষণ্ড হয়ে থাকলে ফেলতেও পারে। তার জন্তে আমরা তৈরি। আমরা মরে গিয়ে তাকে সারাজীবন অসুতাপের আগুনে জালিয়ে রেখে যাব। তার নিজের আত্মীয় স্বজনরাই তার নিন্দা করবে। তার দেশের লোক তার জন্তে লজ্জিত হবে। তার দেশের সরকার তার নামটা পর্যন্ত চাপা দেবে। সে নিজেও যে চিরদিন বাঁচবে তা নয়। সেও একদিন মরবে। তার সে মৃত্যু আমাদের মৃত্যুর মতো গৌরবের হবে না। এক টিলে এক লক্ষ পাখী মারার যে বাহাদুরি সেই বাহাদুরি নিয়ে সে কতক লোকের কাছে বীরপুরুষ বলে গণ্য হবে। রাষ্ট্রও তাকে ভিক্টোরিয়া ক্রস বা সেই জাতীয় পদক দিয়ে সম্মানিত করবে। কিন্তু মানুষ হিসাবে সে ঠিক সেই পরিমাণে নেমে যাবে। রাষ্ট্রের সঙ্গে তার কোনো তফাৎ থাকবে না।” সৌম্য উত্তর দেয়।

“হ্যাঁ, কিন্তু তোমাদের হাতেও যদি পরমাণবিক অস্ত্র থাকত তোমরা কি এত সহজে ছুঁড়ে ফেলে দিতে রাজী হতে? না তোমরাও পান্টা আঘাত

করতে ? ওদের দেশের এক লক্ষ পাখী মেরে ওদের ছুরতু করতে ? থাকত যদি জাপানীদের হাতেও ও রকম একটা পরমাণবিক বোমা তা হলে হিরোশিমা ও নাগাসাকির প্রতিফল মার্কিনরাও পেতো। হয়তো প্রতিফলের আশঙ্কায় হিরোশিমা ও নাগাসাকিতে বোমাবর্ষণই করত না। এইবার দেখবে দেশে দেশে পরমাণবিক বোমা তৈরির হিড়িক পড়ে যাবে। যেমন প্রথম মহাযুদ্ধের পর ট্যাক্স তৈরির হিড়িক পড়ে যায়। স্বাধীন ভারত অস্ত্রশস্ত্র নির্মাণ করতে লেগে যাবে। ইণ্ডাস্ট্রিয়ালিস্টরা সেই লাভজনক ব্যবসায় মূলধন খাটাবেন।” মানস অহুমান করে।

সেইয়া তার দাড়িতে হাত বুলোতে বুলোতে বলে, “মিলিটারিজমের সঙ্গে সঙ্গে ইণ্ডাস্ট্রিয়ালিজমও এদেশে খুঁটি গাড়বে। যে মূদ্রার এপিঠ মিলিটারিজম সেই মূদ্রারই ওপিঠ ইণ্ডাস্ট্রিয়ালিজম। স্বাধীন ভারতের মতিগতি হবে স্বাধীন ইংলণ্ডের মতোই। গান্ধীজীর মিশন শুধু দেশকে স্বাধীন করা নয়, দেশকে একটা পৃথক পথ দেখানো। সেটা যুদ্ধবিরোধিতা, স্মৃতির মিলিটারিস্টদের বিরোধিতা। সঙ্গে সঙ্গে ইণ্ডাস্ট্রিয়ালিস্টদের বিরোধিতা। কিন্তু স্বাধীনতা যতই নিকটবর্তী হয়ে আসছে মিলিটারির উপর নির্ভরতা ততই বেড়ে যাচ্ছে। আর মিলিটারিকে যুদ্ধোপকরণ সরবরাহ করার জন্যে কলকারখানার উপর নির্ভরতাও সেই পরিমাণে বেড়ে চলেছে। আমাকে একদিন আমার নিজের দেশের মিলিটারি-ইণ্ডাস্ট্রিয়াল কমপেক্‌সের বিরুদ্ধে সত্যাগ্রহ করতে হবে। সেদিন আমি জুলিকে ও সঙ্গে পাব কি-না কে জানে। ও আমাকে ভালোবাসে বলে আমার ব্রতকেও ভালোবাসে এমন কথা বলতে পারব না। আমরা কুউ কারো মতবাদে হস্তক্ষেপ করতে চাইনে।”

ছেলেমেয়েদের তাদের সমবয়সীদের সঙ্গে খেলা করতে ছেড়ে দিয়ে দুই শাস্ত্রবীতে বাক্যালাপ চলছিল অন্য এক ঘরে। শেষের কথাগুলো জুলির কানে যায় না।

“ওকে আমি একলা ছাড়তে পারিনে, যুথীদি। ওখানে গেলে ও মিলির পাল্লায় পড়বে। মিলি দেখতে আরো টকটকে হয়েছে।” জুলি বিশ্বাস করে বলে।

“কিন্তু সৌম্যদা তো তোমাকেই বেছে নিয়েছে। মিলির দিকে ও ফিরে তাকাবে কেন ? তোমার কি সন্দেহ—” যুথিকা কী যেন বলতে চায়।

“আরে, না, না। ও রকম কিছু নয়।” জুলি তাড়াতাড়ি থামায়।



“সৌম্যকে মুক্ত করতে পারে এমন অপরা ভূভারতে নেই। থাকলে অনেকদিন আগেই ওর তপোভঙ্গ হতো। কিন্তু মিলি যে ওকে ভালোবাসে এটা তো নির্জলা সত্য। আমার কাছে অপ্রিয় সত্য। মিলি আর বিলেত ফিরে যেতে চায় না। ও কী বলে, শুনবে ?” জুলি গলা খাটো করে।

“কী বলে ? প্রাণেশ্বর ? হৃদয়বল্লভ ?” যুথিকা জুলিকে ক্ষ্যাপায়।

“দূর !” জুলি ক্ষেপে যায়। “সুকুমারদা নাকি স্বপ্নে বলে ওঠে, ‘জুলি ! জুলি !’ তাও একদিন কি ছ’দিন নয়। পাঁচবছরে পঁচিশ দিন। কোন্ বোঁ এতটা সহ্য করবে ? মিলি আমাকে খোঁটা দেয়। আমার নাকি ওকেই বিয়ে করা উচিত ছিল। তা হলে মিলি বিয়ে করতে পারত সৌম্যদাকে। আমি নাকি ওকে বঞ্চিত করেছি। আমার এমন রাগ হয় !”

“রাগ করতে নেই। এর একটা মোক্ষম দাওয়াই আছে।” যুথিকা হাসতে হাসতে বলে, “সুকুমার আবার যখন স্বপ্নে বলে উঠবে, ‘জুলি ! জুলি !’ তখন মিলিও স্বপ্নে বলে উঠবে, ‘সৌম্য ! সৌম্য !’ এমন স্বরে বলবে যাতে ওর স্বপ্ন ছুটে যায়। ও স্পষ্ট শুনতে পায়। বুনো ওলের ওয়ূধ বাধা তেঁতুল। দেখবে ও আর স্বপ্নে মিলির নাম মুখে আনবে না।

“যাঃ ! তোমার সবভাতেই ঠাট্টা ! মিলিকে আমি বলতে যাব আমার বরের নাম মুখে ধরতে ! স্বপ্নে মহড়া দিতে দিতে বাস্তুবেও ধরবে। ও যদি আর বিলেতে ফিরে না যায় সুকুমারদা স্বপ্নে কার নাম বলে ওঠে তা আর শুনতে হবে না। সেপারেশন আপনি হয়ে যাবে। বেচারী সুকুমারদার জন্তে আমার দুঃখ হয়। ও একজনকে হারিয়েছে। আরেকজনকেও হারালে ওর বুক ফেটে যাবে। মিলির উচিত ওর কাছে ফিরে যাওয়া।”

“কান টানলে মাথা আসে। মিলি ফিরে না গেলে সুকুমারও ফিরে আসে। চেষ্টা করলে চাকরি বাকরি এদেশেও মিলবে। শুনছি ইংরেজদের এদেশ থেকে মন উঠে গেছে। মানসের এক বন্ধুকে তাঁর ইংরেজ বন্ধু নাকি বলেছেন, বিশ্বাস করুন, এদেশে আমরা আর একদণ্ডও থাকতে চাইনে, কিন্তু থাকতে বাধ্য হচ্ছি। মাইনরিটিদের প্রতি আমাদের একটা বাধ্যবাধকতা আছে। আমার মনে হয় সুকুমারও এদেশে থেকে যাবে। সেপারেশন হবে না। তোমাকেও যতদূর আবেল ত্রাবোল বকতে হবে না।” যুথিকা একটু কড়া হয়।

“আমি কিন্তু আমার মাহুষটিকে একলা ছেড়ে দেব না।” জুলি আবার বলে।

“কক্ষনো ছেড়ে দিয়ে না। চোখে চোখে রেখো। আমি যা পনেরো বছর ধরে করে এসেছি। ছুঁচ যেখানে যাবে স্ত্রীতো সেখানে যাবে। আশ্রম উঠে আসবে কেন? আশ্রম যেখানে আছে সেখানে থাকবে। সৌম্যদা ওখানে গিয়ে থাকবে। তুমিও আশ্রমের সংলগ্ন কুটিরে গিয়ে থাকবে। শিকড় না গাড়লে কোনো স্থায়ী কাজ হয় না। আমাদের দেখছ তো? কোথাও শিকড় গাড়বার জো নেই। প্রত্যেকটি জায়গায় নতুন করে শুরু করতে হয়। কাজের মাঝখানে বদলীর হুকুম। এই হলো সরকারী চাকরির অভিশাপ। এতে সব চেয়ে কষ্ট ছেলেমেয়েদের। ওরা ওদের সতপাতী আর খেলার সাথীদের কাছ থেকে বার বার বিচ্ছিন্ন হয়। ছাড়াছাড়ির বেদনা ভুলতে পারে না। আর বাগান? বাগান করেছে কি বদলাই হয়েছে। ইংরেজ অফিসার মহলে একটা পরিহাস আছে, বাগান শুরু করো, আর বদলাই হয়ে যাও। কী যন্ত্রণা বলো দেখি? তোমাদের এ যন্ত্রণা পোহাতে হবে না। ইয়া, তোমাদের ছেলেমেয়ে হলে ওদের ওইখানেই মালুষ করবে। বেড়ালছানার মতো ঠাইবদল করবে না। এসব কথা মনে রেখো।” মুখিকা উপদেশ দেয়।

ওদিকে মানস বলছে সৌম্যকে, “তুমি যেমন নাতিগতভাবে শাস্ত্রবিরোধী আমিও তেমনি শাস্ত্রবিরোধী। শাস্ত্রের দাপট সহ্য করতে না পেরে কত হিন্দু মুসলমান হয়ে গেছে! হতে হতে সংখ্যাগরিষ্ঠ হয়েছে। এখন সংখ্যাগরিষ্ঠতার জোরে দাবী করছে পাকিস্তান। বাকী আছে বারা তারাগু ক্রমে ক্রমে কমিউনিষ্ট হয়ে যাবে। এ যুগের চাঁদ হলো কাস্তে’। মার্কসবাদই এ যুগের ইসলাম।”

সৌম্য হেসে বলে, “মুসলমানদেরও শাস্ত্র আছে, তারও দাপট আছে। আর কমিউনিষ্টদেরও কি শাস্ত্র নেই? তারও কি দাপট নেই? মালুষ এক শাস্ত্রের খর্পর থেকে বাঁচতে গিয়ে আরেক শাস্ত্রের খর্পরে পড়েছে। আমরা গান্ধীশিখারা নতুন কোনো শাস্ত্র প্রচার করিনে। পুরনো শাস্ত্রেরই নতুন ব্যাখ্যা দিই। এই যে হরিজন আন্দোলন চলেছে সেটাও নতুন ব্যাখ্যা দিয়ে। ওরা অস্পৃশ্য নয়, কারণ ওরা হরিজন। যেমন বৈষ্ণবজন। বৈষ্ণবজনের আবার জাত বিজাত কী? সমাজ মালুষকে নানা ভাগে বিভক্ত করে। ভগবান তা করেন না। ব্রাহ্মণ নামে শাস্ত্র যা চালিয়েছে তা যদি প্রক্ষিপ্ত না হয়ে থাকে তো ব্রাহ্মণদেরই বানানো। ব্রাহ্মণরা মাথাও নয়, ক্ষত্রিয়রা বাহুও নয়, বৈশ্যরা উরুও নয়, শূদ্ররা পা-ও নয়। তাতেও অস্পৃশ্যতার ব্যাখ্যা হয় না। পা থেকে

যদি কায়স্থরা হয়ে থাকে, নবশাখরা হয়ে থাকে, কই, তারা তো কেউ অস্পৃশ্য নয়? অস্পৃশ্যরা তা হলে এল কোথা থেকে? যুদ্ধে পরাজয় বা সেইরকম কোনো ছুঁবিপাক থেকে। দক্ষিণ আফ্রিকায় ভারতীয়রাও শ্বেতাঙ্গদের কাছে অস্পৃশ্য।”

“তোমরা শাস্ত্রকে বর্জন করবে না, সে সাহস তোমাদের নেই। শাস্ত্রের বিরুদ্ধতা করবে না, সে সাহসও তোমাদের নেই। শাস্ত্রের বাক্য অক্ষুণ্ণ রেখে অর্থ পরিবর্তন করবে, এইপর্যন্ত তোমাদের দৌড়। তোমরাও সনাতন হিন্দু, তবে সনাতন ঠিক পুরাতন নয়। অতীতের সঙ্গে বিচ্ছেদ আমিও চাইনে, তার সঙ্গে অন্য রক্ষা করতে আমিও চাই, কিন্তু এ যা হচ্ছে তা পুরনো এয়ারতের এখানে ওখানে একটুআধটু মেরামত করে বাইরের চুনকাম ফেরানো। হরিজন বা বৈষ্ণবজন তো সকলেই, তুমিও, আমিও। ভগবান যদি মানি তো আমরা সবাই ভগবানের লোক। তা হলে শুধু ওই কয়েকটি জাতের মানুষকে হরিজন বলে চিহ্নিত করা কেন? বর্ণগণিতরা একভাবে যাদের চিহ্নিত করেছে তোমরাও তাদের অল্পভাবে চিহ্নিত করছ শুধু নামট। আরো মোলায়েম শোনাচ্ছে। পেশা যেমনকে তেমন থাকবে, স্টেটাস যেমনকে তেমন থাকবে, শুধু ছোঁওয়াছুঁইর বালাই থাকবে না। চণ্ডাল ব্রাহ্মণের পা ছুঁতে পারবে।” মানস ঠেস দিয়ে বলে।

“সেবাগ্রামের আশ্রমে তো আজকাল ব্রাহ্মণীর সঙ্গে হরিজনের বিবাহও দেওয়া হচ্ছে। বিবাহের পর হরিজন ব্রাহ্মণীর গা ছুঁতেও পারবে। এটা কি একটা বৈপ্লবিক পরিবর্তন নয়?” সৌম্য জিজ্ঞাসা করে।

“কিন্তু ব্রাহ্মণ হরিজন ভেদ তো গেল না।” মানস উত্তর দেয়।

“যাবে। বাপুর্ন আদর্শ কান্টলেস সোসাইটি। জাতিভেদশূন্য সমাজ। সেই আদর্শের দিকেই তিনি ধীরে ধীরে চলেছেন। এত ধীরে যে তোমরা টের পাচ্ছ না। এটাও একপ্রকার সমাজবিপ্লব। শাস্ত্রে অহুলামোম বিবাহের অহুলামোম আছে। প্রতিলোমের নেই। তবে দুটো একটা নজির পাওয়া যায়। আমরা প্রতিলোমটাকে জলচল করে দিচ্ছি। অহুলামোমও উৎসাহ দিচ্ছি। তুমি কি মনে কর মনুসংহিতাকে প্রকাশে খারিজ করলে ফল এর চেয়ে ভালো হবে? না সবাইকে ব্রাহ্ম দীক্ষা দিতে হবে?” সৌম্য চেপে ধরে।

“আরে, না, না। ব্রাহ্ম দীক্ষা আমিও নিইনি। আমরা কেউ কারো

ধর্মবিশ্বাস বদলাইনি বা ছাড়িনি। কিন্তু আমরাও জানিনে ছেলেমেয়েরা কী বলে পরিচয় দেবে। শুধুমাত্র হিন্দু, না কায়স্থ বা ব্রাহ্মণ। এর চেয়ে ব্রাহ্ম অনেক সোজা। ব্রাহ্মণ হরিজন বিবাহের সন্তানদের বেলা পরিচয় দেওয়া আরো শক্ত হবে। এই সমস্যার সমাধান করতে গিয়ে বোষ্টম বলে একটি জাতের প্রবর্তন হয়েছে। ধর্ম সম্প্রদায় থেকে জাত। গান্ধীজীও হয়তো তেমনি একটি জাত প্রবর্তন করে যাচ্ছেন না তো ?” মানস সংশয়াস্থিত।

“না, না। নতুন একটা জাত তাঁর অস্বিষ্ট নয়। বিয়ে যারা করছে তারা কেউ কারো জাতের পরিচয় দিচ্ছে না। তাদের সন্তানরাও দেবে না। তারা হিন্দু, তারা ভারতীয়। তারা মানুষ। এ ভাবেও পবিচয় দেওয়া যায়। মুসলমান বা খ্রীষ্টানদের তো তার চেয়ে বেশী কিছু বলতে হয় না। হরিজনদেরও আমরা শেখাব হরিজন বলে পরিচয় না দিতে। নয়তো একটা হীনশ্রমতা থেকে যাবে। কিন্তু মুশকিল হচ্ছে, পেশা বদল করা সহজ নয়। মুসলমান হয়েও, খ্রীষ্টান হয়েও যারা পেশা বদল করেনি তারা চিহ্নিত হয়ে রয়েছে। মুসলমানদের মধ্যেও তাঁতীরা মোমিন নাম নিয়েছে। জেলেরা ধাওয়া বলে পরিচয় দেয়। দক্ষিণ ভারতে ব্রাহ্মণ খ্রীষ্টান ও অব্রাহ্মণ খ্রীষ্টানে দুষ্টর ভেদ। সকলের এক পেশা সম্ভব নয়। আমরা চিন্তিত।” সৌম্য স্বীকার করে।

ওদিকে যুথিকা বলছে জুলিকে, “আশ্রমের জীবন যে রসকণ বর্জিত হবে এমন কী কথা আছে। কই, রবীন্দ্রনাথের আশ্রম তো তেমন নয়। পণ্ডিচেরীতে দিলীপকুমার তো গানের ধারা অব্যাহত রেখেছেন। তুমিও গাইবে, বাজাবে। বোলপুরে আজকাল গ্রামোফোনের রেকর্ড পাওয়া যাচ্ছে। চল, তোমাকে একসেট নৃত্যনাট্যের রেকর্ড কিনে দিই। আমার উপহার।”

জুলিকে ইতিমধ্যে শাড়ী উপহার দেওয়া হয়েছিল। তাই সে বেকর্ড নিতে কুঠা বোধ করে। যুথিকা ওর আপত্তি কানে তোলে না। ওকে বোলপুরে নিয়ে যায়। ‘চিত্রাঙ্গদা’, ‘শ্রুমা’, ‘তাসের দেশ’ ও ‘চণ্ডালিকা’ এই ক’টার সেট মজুত ছিল। আরো কয়েকখানা খুচরো রেকর্ডও জুলির জন্তে কেনা হয়। নিজের জন্তেও খান কতক। জুলি টাকা বার করতে গেলে যুথিকা ওর হাত চেপে ধরে। হেসে বলে, “মণির বিয়ের সময় দিয়ে।”

“খুব মনে করিয়ে দিয়েছ। মণির জন্তেও দু’একখানা রেকর্ড কিনতে হবে।” জুলি খুঁজে বার করে রবীন্দ্রনাথের ও কাজী নজরুলের দু’খানা রেকর্ড। তার একখানা দীপকের জন্তে, একখানা মণিকার জন্তে।

“কাজী নজরুলের রেকর্ড তুমি নিজের জন্মেও কিনতে পারতে, জুলি। তোমার আশ্রমে মুসলমানদের আকর্ষণ করতে হলে নজরুল গীতিকার মতো আর কী আছে? আব্বাসউদ্দীন? হ্যাঁ আব্বাসউদ্দীনেরও খানকয়েক রেকর্ড নিয়ে যেয়ো।” যুথিকা পরামর্শ দেয়। জুলি বেছে বেছে কেনে।

কেনাকাটা সেরে ওরা যখন ফেরে তখন মানস বলে, “কোথায় হারিয়ে গেছিলে তোমরা? আমরা তো দিশেহারা।

“জুলির আশ্রমবাসকে সরস করার জন্যে রেকর্ডের সন্ধানে অভিযান। নইলে আশ্রমে ওর মন টিকবে না। সৌম্যদা কি ওকে বেঁধে রাখতে পারবে? নিজে তো শুকনো কাঠ। কঠোপনিষদ্ আওড়াবে।” যুথিকা তার ও জুলির কেনা রেকর্ডগুলো দেখায়।

“এর পরে জুলি চাইবে নাচের রেকর্ড। দেশী নাচের রেকর্ড হয় না। বিলিভী কিনতে হবে। সেকলে ওয়ান্টজ না একলে জ্যাজ? বিলিভী নাচ তো পাটনার না হলে হয় না। পাটনার হবে কে?” সৌম্য সকৌতুকে স্বধায়।

“কেন? তুমি হবে না?” যুথিকা সৌম্যকে খোঁচায়।

“আমি! আমি ওর লাইফ পাটনার হয়েছি, ডান্স পাটনার হইনি। এ বয়সে আর মানাবে না, বোন।” সৌম্য আফসোস জানায়।

“তোমার ওই নকল দাড়িগোঁফ খুলে ফেললে দিব্যি মানাবে। তোমার বয়সও দশ বছর কমে যাবে।” যুথিকা আশ্বাস দেয়।

“সৌম্যদা, তোমাকে হাশিয়ার করে দিচ্ছি। ঘুম থেকে জেগে একদিন আবিষ্কার করবে যে তোমার গোঁফ দাড়ি নিমূল। জানো তো, জুলি অহিংসা মানে না। অসিধারণের তার আপত্তি নেই। কাঁচি ধারণ বা ক্ষুর ধারণ তো তার কাছে ছেলেখেলা।” মানস ভয় দেখায়।

“তুমি তো আমাকে বিলেতে দেখেছ। তখন কি আমার গোঁফ দাড়ি ছিল? যশ্বিন্ দেশে যদাচারঃ। মুসলমানদের সঙ্গে তাদেরই একজন হয়ে মিথতে হলে এ ছাড়া আর কী উপায় আছে? যেখানে জনগণ বলতে বোঝায় সাধারণত মুসলমান সেখানে তাদের জাগাতে হলে নান্য পন্থাঃ।” সৌম্যর চোখে হাসি।

জুলি এতক্ষণ চুপটি করে শুনছিল। এবার ফিক করে হেসে বলে, “আমার ছেলেবেলায় বেলুচিস্থানে অমন অনেক মুসলমান দেখেছি। কিন্তু যেখানে যাচ্ছি সেখানে কি কেবল মুসলমানই আছে? হিন্দুও নেই?”

“ওটাই তো আজকের দিনের সব চেয়ে বড়ো ধাঁধা। বাংলাদেশটাকে যারা বেলুচিস্থানের সঙ্গে জুড়তে চায় তারা কি জানে না যে এখানে হিন্দুও বাস করে? তা হলে কেন বলে পাকিস্তান?” মানস আশ্চর্য হয়।

“তুখা, সৌম্যদা”, যুথিকা যোগ দেয়, “মুসলমানকে বাঙালী বানিয়েছে যে দেশ তাকেই ওরা বানাতে চাইছে দ্বিতীয় এক বেলুচিস্থান। এর পরে ওরা ভাত ছেড়ে লুচি ধরবে।”

“না, না, লুচি নয়। ওই যে বলেছে বেলুচি। ছেলেবেলায় ওখানে তোমরা কী খেতে, জুলি?” মানস জেরা করে।

“অত কি আমার মনে আছে? নান রুটি বোধ হয়। ভাত খেয়েছি কি-না মনে পড়ে না। বাবা যখন বাংলাদেশে বদলী হয়ে আসেন তখন সাহেবিয়ানা ছেড়ে বাঙালিয়ানা ধরেন। তবে ভাত খুব বেশী খেতেন না। একবেলা কয়েক চামচ। রাত্রে চাপাটি। আশ্রমে সেই অভ্যাস বজায় রাখব। সৌম্যও আমাকে আপ রুটি খানার স্বাধীনতা দিয়েছে। আমিও ওকে খানাপিনার স্বাধীনতা দিয়েছি। ওর দাড়ি গোঁফও আমার চক্ষুশূল নয়। কেনই বা হবে? রবীন্দ্রনাথেরও তো দাড়ি গোঁফ ছিল। না থাকলে কি ঋষির মতো দেখাত? আমার কাছে সৌম্য একজন ঋষি কি মুনি। মুসলমানদের কাছে যদি পীর কি ফকির হয় তবে মন্দ কী?” জুলি সগর্বে বলে।

সৌম্যই এ বিতর্ক মিটিয়ে দেয়। “পশ্চিমবঙ্গে থাকলেও আমি দাড়ি রাখতুম। কারণ দেশী ক্ষুরকে আমি ভয় করি। দাড়ি কামাতে বললে হয়তো ছাল উতরে নেবে। আর বিলিভী ক্ষুর তো আমরা বয়কট করেছি। নিরাপদ স্বদেশী ক্ষুর যেদিন বাজারে বেরোবে সেদিন আমি গোঁফ দাড়ি হুড়িয়ে মানসের মতো চিরতরুণ হব।”

যুথিকা ওটাকে গায়ে পেতে নিয়ে বলে, “ঋষিবাক্য কি সত্য না হয়ে যায়? দশবছর বাদে মানসকে দেখে লোকে ভাববে তরুণ আর আমাকে দেখে তরুণস্থ বৃদ্ধা ভাব্য। আর নিরাপদ স্বদেশী ক্ষুর যদি তখনো না বেরোয় তবে সৌম্যদাকে দেখে লোকে ভাববে বৃদ্ধ আর জুলি যদি নৃত্য গীতের অলুশীলন করে তবে তাকে দেখে বলবে বৃদ্ধস্যা তরুণী ভাব্য।”

জুলি তার গালে একটি থাপ্পড় বসিয়ে দিয়ে সঙ্গে সঙ্গে চুমো খায়। “এ মেয়েটা এত মিথ্যে বকতে পারে! দশবছর বাদেও আমি থাকব তরুণী। আমার খুব ততদিনে মণির মতো বড়ো হয়ে থাকবে।”

মণি কোথায় ছিল, ছুটে এসে বলে, “মা, বাড়ী চল। রেকর্ড বাজিয়ে শুনব।” সারাদিন হৈ হৈ করে ক্লাস্ত।

“হ্যাঁ, এইবার বিদায় নিতে ও দিতে হবে, জুলি আর সৌম্যদা। আবার কবে দেখা হবে কে জানে। তবে বেলুচিস্তানে আমরা আর কোনোদিন যাচ্ছি নে। মানে পূর্ববঙ্গে। দিল্লীতে পড়াশুনা করে উর্দু যেটুকু শিখেছিলুম বাংলাদেশে বাস করে সব বিলকুল ভুলে গেছি। আবার নতুন করে শিখতে এ বুড়ো বয়সে তকলিফ হবে।” যুথিকা ভারাক্রান্ত স্বরে বলে।

গুরুদেবের খাতিরে শান্তিনিকেতনের উপরে মানস ও যুথিকার একটা মায়া ছিল। অবসর নিয়ে সেখানে এসে শিকড় গাড়বার আশায় এক টুকরো জমি কিনে রেখেছিল। সেটা এক বন্ধুপুত্রের নির্বন্ধে। সে বেচারি অকালে মারা যায়, অল্প দিক থেকেও বাধা আসে। তাই ওরা আপাতত-ওমুখো হতে চায় না।

জুলি বলে, “কই, তোমাদের কোথায় কী আছে দেখাতে নিয়ে গেলে না যে? কে জানে আমরাও হয়তো একদিন বেলুচিস্তান থেকে এসে জুটব। কিনতে চাইব তোমাদের কাছাকাছি এক রত্তি জমি।”

হিরণ্যদাকে খবর দিতেই তিনি বাড়ীর ভিতর থেকে বেরিয়ে আসেন। “আরে, আপনারা! আসছেন শুনে আমি আপনাদের জন্যে রতন কুঠিতে ব্যবস্থা করতুম। উঠেছেন কোথায়? পাকা হবে কদিন? একদিন এখানে শাকার ভোজন করতে আপত্তি আছে?”

“না, হিরণ্যদা। সেটা সম্ভব হবে না। এঁরা আমাদের বন্ধু ও বান্ধবী। সৌম্য ও মঞ্জু চৌধুরী। সম্প্রতি বিয়ে করে এখানে মধুমাস কাটাতে এসেছেন। কিন্তু একমাস থাকবেন না, এঁদের নিজেদের আশ্রমে ফিরে যাবেন। সে আশ্রম চলে গান্ধীজীর ধারায়। সেটাকে গুরুদেবের আশ্রমের সঙ্গে মিলিয়ে নেওয়া যায় কি-না এঁরা ভেবে দেখছেন। অনেকদিন সাক্ষাৎ হয়নি, তাই আমরাও এসেছি এঁদের সঙ্গে একটা দিন কাটাতে। সৌম্যদার গান্ধীবাদী বন্ধু সুধীর নন্দীর দোতারাটা খালি পড়ে আছে। সেখানেই এঁরা উঠেছেন। আহারাদি যখন যেখানে সুবিধে। আর আমরা তো সকালে খেয়ে বেরিয়েছি, সন্ধ্যায় বাড়ী ফিরে খাব। দুপুরের টিফিন সঙ্গে করে এনেছিলুম। আপনাকে খবর দিলে আপনারা সাড়ম্বরে জুরিভোজন করাতেন। তার চেয়ে বড়ো কথা আপনার অফিস কামাই হতো। রবিবার আমার ছুটি, আপনার তা নয়।” মানস কৈফিয়ৎ দেয়।

“ছি ছি! আপনি আমাকে এত পর ভাবেন, মানসবাবু। আমার ছেলে-মেয়েরা যে আপনাকে কাকাবাবু বলে ডাকে। চলুন, ভিতরে চলুন। যুথিকা দেবী, আপনিই আগে। আর আপনারা, সোম্যাবাবু ও মঞ্জু দেবী, আপনারা যে কারা তা আমার জানতে থাকী নেই। এখানে গা ঢাকা দিয়ে আছেন। ছাত্ররা টের পেলে আপনাদের রক্ষা নেই। ধরে নিয়ে গিয়ে সম্বর্ধনা দেবে। গভর্নমেন্টকে ওরা ভয় করে না। কর্তাদেরও না। গান্ধীজী কিছুদিন পরে এখানে আসছেন, জানেন নিশ্চয়।”

“আমি তো ওটা গোপনই রেখেছিলুম। আপনি কী করে জানলেন?” সোম্য অবাক হয়। জুলিও।

“সেবাগ্রামে সোনা থাকে না? আমি যে ওর একটি দাড়া। মাঝে মাঝে চিঠি লেখে।” হিরণ্যাবাবু বলেন।

জমি দেখা ছেড়ে গল্পশুল্লিই সময় কেটে যায়। হিরণ্যাবাবু একটি গল্পের বুদ্ধি। যেমন গুরুদেব সম্বন্ধে তেমনি গান্ধীজী সম্বন্ধে তিনি না জানেন এমন কাহিনী নেই। স্ভাষচন্দ্রের কাছে গান্ধীজীর টেলিগ্রাম শান্তিনিকেতনে যখন পৌছয় তিনি ছিলেন স্ভাষের সঙ্গে। স্ভাষ কী উত্তর দেন তাও তিনি দেখেছিলেন। টেলিগ্রামেই উত্তর।

চা জলখাবার না রীতিমতো নৈশভোজ? বিরজা দেবীর স্বপাক।

“কাকিমা”, নোটন জানতে চায় “আপনারা কবে বাড়ী করছেন?”

“তোমার কাকাবাবুকে জিজ্ঞাসা করো।” যুথিকা উত্তর দেয়।

মানস বলে, “এই জেলায় আমার দেড় বছর হয়েছে। আরো দেড় বছর তো এ জেলায় আছি। এর মধ্যে মনঃস্থির করলে চলবে। ভাবছি বদলীর হুকুম পেলে আর কোথাও যাব না, পূর্ববঙ্গে তো নয়ই। অকালে অবসরের দরখাস্ত করে দেব। শুনছি আল্পপাতিক পেনসন মিলবে। ইউরোপীয়ানরা যদি ক্ষতিপূরণ পায় আমরাই বা পাব না কেন? অবশ্য যদি ক্ষমতার হস্তান্তর হয়। ক্ষতিপূরণ না পেলে প্রোভিডেন্ট ফাণ্ডের টাকায় বাড়ী করা বুদ্ধিমানের কাজ হবে না। না, আমার যে অল্প কোনো সঞ্চয় নেই। গোটা কতক লাইফ ইনশিওরান্স পলিসি বাদে। সেগুলোর ম্যাচিয়োর হতে অনেক দেরি।”

“দিল্লী দূর অন্ত।” মস্তব্য করেন হিরণ্যদা।

“তার মানে কী হলো, বাবা।” নোটন ভেবে পায় না।

“কংগ্রেস কবে দিল্লী পৌছবে, ইংরেজ কবে দিল্লী হেড়ে যাবে, আই. সি. এস.



অফিসা দেয় ভাগ্যে কবে ক্ষতিপূরণের শিকে ছিঁড়বে, তার পর বাড়ী তৈরি হবে। ইতিমধ্যে নির্মাণের খরচ দিন দিন বেড়ে যাচ্ছে।” হিরণ্যদা হুঃখিত। মুখফোড় বলে তাঁর হৃদয় ছিল। কিন্তু কথাটা তো সত্যি।

এমনি করে রাজনীতি এসে পড়ে। সৌম্য বলে, “গান্ধীজীর মনোভাব যতটুকু জানি তিনি শর্তাধীন স্বাধীনতা গ্রহণ করবেন না। তোমাদের পেনসন ও ক্ষতিপূরণ দেওয়া তো একটা শর্ত। এদেশের গরিব করদাতারা তোমাদের হাতীর খোরাক জোগাবে কেন? সেটা যদি জোগাতে হয় ওদেশের করদাতারা ই জোগাবে। কংগ্রেস যদি গান্ধীজীর কথা শোনে দিল্লী থেকে দূরেই থাকবে। যতদিন না ইংরেজ বিনা শর্তে স্বাধীনতা দিতে উত্তোষী হয়। উত্তোষটা ওদেরই গরজ। ওদেরই তো দায়িত্ব। শুধু যে নির্মাণের খরচ দিন দিন বেড়ে যাচ্ছে তাই নয়, সব কিছুর খরচ বেড়ে যাচ্ছে। এর দরুন আপনি ঘটবে এক বিক্ষোৰণ। একটা মিউটিনি কি জেনারল স্টাইক।”

জুলি খেতে খেতে বলে “একটা রেভোলিউশন।”

হিরণ্যদা টিপ্পনী কাটেন, “তার পরের দিন হিন্দু মুসলমানের দাঙ্গা।”

জুলির মুখে কথা জোগায় না। সৌম্যও মূক। মানস বলে, “ওয়ার্ড অব্ সাকসেসন। সিংহাসনের উত্তরাধিকার নিয়ে দ্বন্দ্ব।”

বিদায়কালে জুলি একটা বেখাপ্পা প্রশ্ন করে! “হিরণ্যবাবু, বললেন না তো সেই দুটি টেলিগ্রামের বয়ান কী ছিল।”

হিরণ্যবাবু স্মরণ করে বলেন, “মহাত্মার টেলিগ্রামের মর্ম ছিল, স্বভাষ, তুমি কংগ্রেস সভাপতি পদের জন্যে নির্বাচনে দাড়িয়ে না। আর স্বভাষবাবুর টেলিগ্রামের মর্ম ছিল, মহাত্মাজী, আশীর্বাদ করুন আমি যেন নির্বাচনে জয়ী হই। এসব হলো ১৯৩৯ সালের গোড়ার দিকের কথা।”

পুরনো কাহুল্লি ঘেঁটে কার কী লাভ! জুলি কী যেন বলতে যাচ্ছিল, সৌম্য তাকে থামিয়ে দেয়। মোটরে করে ওদের নন্দীদের বাড়ীতে নার্মিয়ে দিয়ে মানস সপরিবারে স্বস্থানে ফিরে যায়। পথে যেতে যেতে মণি স্বধায়, “মাসিমা কেমন করে জ্যাঠাইমা হলেন।” আর দীপক জবাব দেয় “জ্যাঠামশায়েরই মেসোমশায় হওয়া উচিত ছিল।”

## ॥ নয় ॥

যেখানে বাঘের ভয় সেখানেই সজ্জা হয়। একমাস যেতে না যেতে সরকারী চিঠি আসে। বদলীর ছুটিম। আবার পূর্ববঙ্গে। বালোগ পদোন্নতি হয়েছে। তিনি আর অপেক্ষা করতে পারছেন না। মানস যেন পত্রপাঠ তাকে রিলিভ করে।

“আবার পূর্ববঙ্গে!” যুথিকার মাথায় বাজ পড়ে। “আমার সেই জেলায়! সৌম্যদা আর জুলি যেখানে।” মুখে হাসির আমেজ।

‘না, এবার ওর চেয়ে বড়ো জেলা। ওর চেয়ে বড়ো পদ। ওর চেয়ে বেশী দায়িত্ব। খুব সানিয়র না হলে কাউকে ওখানে পাঠানো হয় না। বোধহয় লোকের অভাব, তা না হলে আমাকে পাঠানো হতো না। ইংরেজরা এখন একে একে সরে যাচ্ছে।’ মানসের আন্দাজ।

“কিন্তু তুমি যে বলছিলে এখান থেকে বদলী করলে অবসরের দরখাস্ত করবে।” যুথিকা মনে করিয়ে দেয়।

‘কিন্তু এখন নয়, আরো দেড় বছর কি দু’বছর বাদে। ক্ষতিপূরণের প্রশ্ন এখন শিকেষ বুল রয়েছে। ইউরোপীয়ানরা না পেলে তো আমরা পেতে পারিনে। ওরা পেলে আমাদের একটা ক্রেম হয়, তবে সে ক্রেম গ্রাহ হবে কি না কে বলতে পারে! জিন্না সাহেব বাগড়া না দিলে এতদিনে কিন্তু দিল্লীতে বডলাটের শাসন পরিষদের আয়ুর্ পরিবর্তন হতো। এবার তাতে একজনও ইংরেজ থাকতেন না। ডিফেন্সও হস্তান্তরিত হতো। ক্ষতিপূরণের প্রশ্ণটারও একটা কিনারা হতো। আমি তো অসময়ে আঁধারে কাঁপ দিতে পারিনে। যারা দু’তিন বছর অপেক্ষা করবে তারা ক্ষতিপূরণ পাবে, আর আমি আগে ভাগে গেছি বলে পাব না, এমন কী তাড়া আছে আমার?’ মানস ঝঞ্জে পায় না।

“তা হলে তুমি আবার পদ্মা পার হচ্ছ?” যুথিকা খুশি নয়।

“তুমি যদি পদ্মা পার হতে না চাও তোমাকে এ পারেই রেখে যাব। এবার কিন্তু আমাকে তিন বছরের আগে বদলী করবে না। যদি না ইতিমধ্যে ইংরেজ রাজত্ব শেষ হয়ে যায়।” মানস অতটা নিশ্চিত নয়।

“পাগল! তোমাকে আমি একলা ছেড়ে দিতে পারি? তুমি যেখানে আমি সেখানে। ছুঁচ আর সূতো।” যুথিকা ছায়ার মত অহুগতা।

ভাবনা ছেলেমেয়েদের পড়াশুনা নিয়ে। কিন্তু সরকারী চাকরির দাবী যে

তাদের দাবীর চেয়ে বড়ো। যাদের পক্ষে সম্ভব তারা তাদের ছেলেমেয়েদের দার্জিলিং-এর মিশনারি স্কুলে পাঠায়। কিংবা কলকাতার হস্টেলে রেখে পড়ায়। মানস ও যুথিকা তাদের সন্তানদের কাছে রাখতে চায়। যতদিন না তাদের কলেজে যাবার বয়স হয়।

গভর্নমেন্টকে লিখে আরো কিছুদিন সময় চেয়ে নেয় মানস। এরই মধ্যে একদিন শান্তিনিকেতনে গিয়ে গান্ধীজীর সঙ্গে সাক্ষাৎ করে। তাঁকে অল্প কথায় বোঝায় যে মধ্যস্তরের জ্ঞাত প্রধানত দায়ী কলকাতার ক্ষুধা ও ক্রয়শক্তি। তিনি বলেন আরো কেউ কেউ একথা তাঁকে জানিয়েছে। তিনি আরো খুঁটিনাটি জানতে চান। মানস যদি তাঁর সঙ্গে কলকাতায় দেখা করে তা হলে তিনি আরো সময় দিতে পারবেন।

কলকাতা মানসের পথে পড়ে। গান্ধীজীর একান্ত সচিব প্যারেলালের সঙ্গে কথা বলে দিন স্থির হলো, কিন্তু ক্ষণ স্থির হলো না। কলকাতায় গিয়ে টেলিফোনে জানা গেল ক্ষণ নির্দিষ্ট হয়েছে গান্ধীজীর প্রার্ত্তনমণের সময়। বালীগঞ্জ থেকে সোদপুবে গিয়ে শীতকালের ভোর ছাঁটার সময় তাঁর সঙ্গে পাল্লা দিয়ে হাঁটতে হাঁটতে—মানে, ছুটতে ছুটতে—অর্থনীতি আলোচনা করা মানসের পক্ষে অসম্ভব হতো না, কিন্তু তার ইচ্ছা ছিল যুথিকাকেও সঙ্গে নিয়ে যেতে। তাই আবার টেলিফোন করে অন্তসময় চায়। কিন্তু রাজকুমারী অমৃত কণ্ডর বলেন, অসম্ভব। কাভেই মানসও অক্ষমতা প্রকাশ করে।

বর্ধন থাকলে মানস সপরিবারে তারই অতিথি হতো। অগত্যা স্বপনদার উপর আতিথেয়তা চাপাতে হয়। তিনি বলেন, “জায়গার টানাটানি নেই। তোমরা দু’খানা ঘর নিতে পারো। কিন্তু কলকাতায় রেশনিং হবার পর থেকে আমরা মহা মুশকিলে পড়েছি। রেশনে যেটুকু দেয় সেটুকুতে আমাদেরই কুলোয় না। বাধ্য হয়ে চোরাবাজারে কিনতে হয়। আমরা কি চোর। জাঘা দাম দিয়ে বরাবর কিনেছি, এখনো পারি। কিন্তু সরকার থেকে দর যেমন বেঁধে দিয়েছে পরিমাণও তেমনি বেঁধে দিয়েছে। এখন যার দরকার সে পায় না, যার দরকার নেই সে পায়। তারপর সে কালোবাজারে বেচে। কী করব। বাধ্য হয়ে কিনি।”

মানস বেশ অস্বস্তি বোধ করে। বলে, “আমরা রাতের বেলা ভাত খাইনে। দিনের বেলা খুব কম খাই। তার জন্তো তোমাকে চোরাবাজারে চাল কিনতে হবে নী। আমরা রেস্টরাণ্টে গিয়ে লাঞ্চ খেয়ে আসব।”



ব্যক্তি নই ? আমার কি ব্যক্তিসত্তা নেই ? আমিও কি যৎকিঞ্চিৎ উপার্জন করতে পারিনে ? অফিসার শ্রেণীর মহিলারা স্বামীদের মৰ্যাদার ধার করা আলোকে আলোকিত। আমিও সেইরকম একজন। একজন কেরানীর স্ত্রীও আমার চেয়ে সুযোগ্য। অথচ আমার সঙ্গে মিশতে কুণ্ঠিত। সবাইকে নিয়ে কাজ করতে চেষ্টা করি, কিন্তু তলে তলে এমন ঈর্ষাষেষ যে সুযোগ্যদের সহযোগিতা পাইনে। যারা আসে তারা একটা না একটা ফেভার চাইতে আসে। সব রকম বাধাবিঘ্ন সত্ত্বেও কিছু না কিছু কাজ করতে পারা যায়, যাতে পাঁচজনের উপকার হয়, কিন্তু বদলীর জ্বালায় কাজ আধখানা হয়ে পড়ে থাকে। জজের কাজ জজের পদাধিকারী চালিয়ে যেতে পারেন, কিন্তু জজ গৃহিণীর কাজ পরবর্তী জজগৃহিণীর দ্বারা হবার নয়। এত খারাপ লাগে হাতে গড়া প্রতিষ্ঠান ফেলে আসতে ! আমার পিয়ানো বাজানোর শখ ছিল। বিয়ের পর ক্রমাগত বদলী হতে হতে সে শখেও জলাঞ্জলি দিতে হয়েছে। টিউন নষ্ট হয়ে যায়, টিউনার পাওয়া যায় না।”

“সত্যি ! এর মতো দুঃখের কথা আর নেই। কত বড়ো একটা বিঘা বহনসজ্জীত। আমার তো সে বিঘা নেই। যার আছে তাকে আমি শ্রদ্ধা করি। তা, ভাই, আপনারা কলকাতায় বদলী হয়ে আসেন না কেন ? এখানে টিউনার পাওয়া যায়। নিবিঘ্নে বাজাতে পারবেন।” দীপিকাদি সহানুভূতি জানান।

“কলকাতায় বদলী !” যুথিকা ভ্রূভঙ্গী করে বলে, “কলকাতা চাইলে চাটগাঁয় পাঠায়। অন্তত আমাদের অভিজ্ঞতা তাই। ‘কলকাতা’, ‘কলকাতা’ করে সবাই পাগল। আমরা কিন্তু মফঃস্বলেই ভালো থাকি। বড়ো বড়ো বাড়ী, বিশাল হাতা, চারদিকে খোলা মেলা জায়গা ! বাতাসে নিঃশ্বাস নিয়ে সুখ আছে। এখানে তো দম বন্ধ হয়ে আসে।”

দীপক আর মণিকা এলফকে নিয়ে জমে গেছে। এতদিন পরে সেও ছ’জন গুণগ্রাহী পেয়ে খোশ মেজাজে রকমারি খেলা দেখাচ্ছে। মুখে করে নিয়ে আসছে একটার পর একটা জিনিস। জুতো, ছাতা, বাঁটা, পেয়াল, পিরিচ, চামচ। বই, খাতা, পেনসিল, কলম। স্বপনদা দেখতে পেয়ে হৈ হৈ করে ছুটে আসেন। এলফ খাটের তলায় আশ্রয় নেয়। সেখানে একখানা পুরনো হাড় লুকনো ছিল। সেখানা চিৰায়। তাতে দীপকের তীব্র আশক্তি।

“এল্ফ কোন্ জাতের কুকুর, জ্যাঠাইমা ?” সে দীপিকাদিকে সুধায়।

“পমেরানিয়ান। পমেরানিয়া এখন রাশিয়ার অধীনে চলে গেছে। বেচারি এল্ফ বোধহয় সেইজন্তে আজকাল বিমর্ষ।” দীপিকাদি বলেন।

“তা নয়।” স্বপনদা হাসেন। “ওর এখন বিয়ের বয়স হয়েছে, আমরা ওর জুড়ি খুঁজে পাচ্ছিনে। ও এখন আমার বই খাতা লুটপাট করে বিক্রোহ প্রকাশ করছে। দেখি, ওর বৌ যদি কোথাও মেলে।”

ব্র্যাক আউট উঠে গেছে। কলকাতা এখন আবার আলো বালমল। স্বপনদার বাড়ীর জানালাগুলো থেকে কালো পর্দা সরানো হয়েছে, কিন্তু শাশির কালো রং এখনো মুছে যায়নি। জানালা খোলা রেখে মানস রাস্তার দৃশ্য দেখছিল। স্বপনদা তার পাশে আসন নিয়ে বলেন, “তোমার সঙ্গে কতকাল কথাবার্তা হয়নি। তুমি আজকাল কী লিখছ ? কই, কোথাও তো তেমন চোখে পড়ে না।”

“চিত্রকলায় যামিনী রায় যা করছেন সাহিত্যে আমিও সেইরকম কিছু করতে চেষ্টা করছি। রস আছে মাটির ভিতরে। পীপলের অন্তরে। পীপলের সঙ্গে একাঝা নী হলে মনে অনুমগন হতে পারে যাবে না। বিদগ্ধ সাহিত্য তো তের হয়েছে। আর কেন ?” মানস জিজ্ঞাসা করে।

“যামিনীদার ছবি আমারও ভালো লাগে। কিন্তু তাতে বিংশ শতাব্দীকে পাইনে। আমি বিংশ শতাব্দীর মানুষ। আমারও তো একটা অন্তর আছে। সে অন্তরও তো নীরস নয়। আমাকে বাদ দিয়ে পীপল নয়। পীপলের তেমন ব্যাখ্যা সাহিত্যকে একদিন বন্ধ্য্য করবে। যেমন করেছে সোভিয়েট রাশিয়ায়। এর নাটের গুরু অবশ্য টলস্টয়। ফোক আর্ট নিশ্চয়ই ভালো আর্ট। কিন্তু বড়ো আর্ট নয়। পরে আমাদের দেশেও একটা ক্লাসিকাল সাহিত্য ছিল, সেটা সংস্কৃত ভাষায় রচিত। আমাদের দেশের ঘড়ির কাঁটা বহু শতাব্দী ধরে বন্ধ ছিল। ইউরোপের ঘড়ির কাঁটা বন্ধ ছিল না। তাই ওদেশের ঘড়ির সঙ্গে এদেশের ঘড়ি মিলিয়ে নিতে হয়েছে। অনেকটা মিলেও গেছে। আমাদের কর্তব্য ওদের সঙ্গে সমানে পাল্লা দিয়ে বিংশ শতাব্দীর সাহিত্য সৃষ্টি করা। লোকসাহিত্য তোমার সহায়ক হতে পারে, কিন্তু নিয়ামক নয়। যামিনীদাকে এ তত্ত্ব বোঝানো যাবে না। তাঁর স্থানজ্ঞান টনটনে, কালজ্ঞান তেমন নয়। অমন করলে ঘড়ির কাঁটা আবার বন্ধ হবে।” স্বপনদা সাবধান করে দেন।

মানসের দৃষ্টি জনগণের উপরে। মানুষ কেবল কুটি খেয়ে বাঁচে না, তাকে ক্ষুধার অম্লের সঙ্গে সঙ্গে সুখা ভোগাতে হবে। নয়তো সে সূরা পান করবে। সুখা কী? যা তার হৃদয়কে স্পন্দিত করে। হৃদয়ের লক্ষ্য ভেদ করে। হৃদয়ে বিঁধে থাকে। সে ভুলতে পারে না। এই যেমন ছড়া, ব্যালাড, রূপকথা, উপকথা। কালের ছাপ তার উপর পড়ে না, তা নয়। কিন্তু সে কালজয়ী। টলস্টয়ের ‘তেইশটি উপকথা’র অনেকগুলি যেমন।

“কিন্তু পরেও তো তিনি আরো লিখেছিলেন।” স্বপনদা বলেন। “নিজের তত্ত্ব নিজে অনুসরণ করেছিলেন কি? করেননি, কারণ ‘রেজারেকশন’ ওভাবে লেখা যেত না। ওই ধরনের উপন্যাস রূপকথা বা উপকথা মার্গীয় নয়। ওটাও একটা বলবার মতো কাহিনী। জরুরি। না বললে নয়। যা একমাত্র টলস্টয়ই বলতে পারতেন। জনগণ আজ বুঝতে না পারে কাল বুঝবে। কোনো সৃষ্টিই রসিকের জন্তে অপেক্ষা করে না। রসিক পরে আসে, আবিষ্কার করে, উপভোগ করে। গরম গরম লুচি ভেজে পাতে দিলে পেট ভরে, কিন্তু প্রাণ ভরে না। পীপলকে নিয়ে পপুলার বই কি কম লেখা হচ্ছে? টলস্টয়কে বা রবীন্দ্রনাথকে সে কাজ করতে হবে কেন? তাঁরা লিখবেন ‘গোরা’। তুমিও কি তেমন কোনো বিরাট বিষয়, মহৎ বিষয়, খুঁজে পাচ্ছ না? ওসব চুটকি লিখে যাদের সঙ্গে একাত্ম হতে চেষ্টা করছ ভজন কীওনই তারা ভালো বোঝে। তুলসীদাস তার চূড়ান্ত করেছেন। চণ্ডীদাসও।”

মানস জানতে চায় স্বপনদা কী লিখছেন।

“আমি! আমি কী লিখছি!” স্বপনদা হকচকিয়ে যান। “ভাষ, মানুষ, আমি পপুলার লেখক নই। হতেও চাইনে। আমি নিঃসঙ্গ লেখক। নিঃসঙ্গই থাকতে চাই। যতবার চেষ্টা করি গোষ্ঠী বা গ্রুপ গঠন করতে ততবারই ব্যর্থ হই। এটা প্যারিস নয়। সেখানে ‘ট্র্যানজিশন’ পত্রিকার লেখকগোষ্ঠীতে আমিও ছিলাম। কিন্তু সে রকম একটা পত্রিকাও এদেশে হয় না, সে রকম একটা লেখক গোষ্ঠীও না। একক লেখককেই তার নিজস্ব থিয়োরি, তার নিজস্ব মতবাদ তার নিজস্ব ধরনে ও নিজস্ব আঙ্গিকে পরিবেশন করতে হয়। এর জন্তে চাই দারুণ মনের জোর। সুদৃঢ় আত্মবিশ্বাস। প্রতিদিন রেওয়াজ। যেমন নকীবের। আমার কি তেমন মনের জোর আছে? আত্মবিশ্বাসও নড়বড়ে। আর প্রতিদিন রেওয়াজের সময় কোথায়?”

“কিন্তু তোমার তো বলবার মতো কাহিনী ছিল। তুমি যদি না বলে যাও

আর কে বলবে ? শিল্পীর কাছে এটা একটা দায়। তুমি দায়মুক্ত হবে কী করে ?” মানস চাপ দেয়।

“আমি কাককা বা জয়েস নই। সেইখানেই আমার দুর্বলতা। নইলে আমার হাতে যে মালমশলা আছে তা দিয়ে কত কী গড়া যায় ! না, আমি ছাড়া আর কেউ পারবে না।” স্বপনদা দীর্ঘশ্বাস ফেলেন।

“তুমি যদি লাভাবর্ষণ না করো কেউ বিশ্বাস করবে না যে তুমি একটি জীবিত আগ্নেয়গিরি। ভিস্কাভিয়াস কি এটনা। একদা তুমি লাভাবর্ষণ করেছিলে এটাই তোমার একমাত্র পরিচয়। তোমাকে সক্রিয় হতে হবে। এদেশে তুমি মনের মতো গোষ্ঠী কোনো দিনই পাবে না। ওদেশের তুলনা এদেশে অচল। ওদেশে গোষ্ঠী গড়ে ওঠে একটা তত্ত্বকে ঘিরে। যেমন ইমপ্রেসনিস্ট, এক্সপ্রেসনিস্ট, সুররিয়ালিস্ট, এগ্জিস্টেনশিয়ালিস্ট। এদেশে তেমন কোনো পরিষ্কার পার্থক্য নেই। লেখকেরা দল বাঁধেন ব্যক্তিগত পছন্দ অপছন্দের ভিত্তিতে। কিংবা রাজনৈতিক মতবাদের ভিত্তিতে। তা বলে তুমি নিষ্ক্রিয় হবে কেন ?” মানস তর্ক করে।

“নাটক লিখতে চাই। কিন্তু লেজের সঙ্গে সম্পর্ক নেই। এদেশে যদি মস্কো আট থিয়াটার থাকত তা হলে আমিও কি চেকভের মতো ‘চেরি অরচার্ড’ লিখতে পারতুম না ? সেটা আমারও একটা প্রিয় বিষয়। মাড়োয়ারিরা বাঙালী জমিদারদের আম বাগান ও গোলাপবাগ কিনে নিচ্ছে। বাগানবাড়ী কিনে নিয়ে কারখানা তৈরি করেছে।” স্বপনদা আক্ষেপ করেন।

“তা হলে তো অবশ্যই লিখতে হয় ‘বাগানবাড়ী’ বলে একটা নাটক। না, ‘চেরি অরচার্ডের’ মতো সেটিমেন্টাল হলো না।” মানস ফরমাস দেয়।

স্বপনদা অনেকক্ষণ নীরব থাকেন। তারপর বলেন, “এই যুদ্ধ আরও সর্বপ্রকার মোহভঙ্গ করে গেছে। মানুষ মরেছে, মানুষ আবার জন্মাবে, বাড়ীঘর ভেঙেছে, বাড়ীঘর আবার গড়ে উঠবে। কিন্তু সেই যুগটাকে তুমি পাবে কোথায় যে যুগে তুমি আমি ইউরোপে ছিলাম ? এ যুগে আমি জল বিনা মীন। তুমি কী তা আমি জানিনে। বোধ হয় গান্ধীজীর উপর আশা রেখে নিশ্চিন্তে আছো। ভাবছ গান্ধীই ভারত, ভারতই গান্ধী। ইংরেজ চলে গেলে কী হবে সেটা রঙিন চশমা দিয়ে দেখছ। খোলা চোখে যখন দেখবে তখন মোহমুক্ত হবে।”

“ভারতের একা বলতে বোঝায় প্রথমত ইংরেজের দেওয়া শ্রীক্য, দ্বিতীয়ত



গান্ধীজীর দেওয়া ঐক্য। তৃতীয় কোনো ঐক্য নয়। ইংরেজ থাকবে না, সেটা ধরে নিতে পারি। কিন্তু গান্ধীও থাকবেন না, তিনিও সদলবলে বিদায় হবেন, এটা যদি মেনে নিই তো ভারত কি আর এই ভারত থাকবে? বলকানে পরিণত হবে।” মানসের কাছে সেটা একরকম স্থানিশ্চিত।

“বলকান হয়েও কি বাংলার ঐক্য থাকবে? যে রকম লক্ষণ দেখছি জিন্নাহ সাহেবের দুই নেশন থিয়োরির হাড়িকাঠে বাংলা দ্বিখণ্ডিত হবে। জিন্নার কথা হলো তিনি হিন্দুর একাধিপত্য সহ্য করবেন না। আর গান্ধীর একাধিপত্য কি-না হিন্দুর একাধিপত্য। তিনি যদি একটু কম হিন্দু হতেন তা হলে মিটমাটের আশা ছিল। কিন্তু হিন্দুকে তিনি কম হিন্দু হতে, মুসলমানকে কম মুসলমান হতে, শিখকে কম শিখ হতে বলবেন না। অতি মাত্রায় ধর্মপ্রাণ হলে কী হয় তা জার্মানীর ইতিহাসে দেখেছি। ক্যাথলিক প্রটেস্ট্যান্ট মিলে মারামারি করে দেশ ভাগ করে নেয়। রবীন্দ্রনাথ নাকি একবার বলেছিলেন যে সবাই যদি মুসলমান হয়ে যায় তাহলে এ সমস্যা একটা সমাধান হয়ে যায়। সেটাও তো ধর্মীয় সমাধান। সবাই মুসলমান হয়ে গেলেও শিয়া সূফীর বিরোধ থাকবে। ধর্মীয় নয়, এমন সমাধান যদি চাপ আমেরিকার দিকে তাকাও। আর নয়তো রাশিয়ার দিকে। আমেরিকা ধর্মকে রাজনীতির আসরে নামায় নি। আর রাশিয়া তো গির্জা থেকেও তাড়িয়েছে। সেকুলার স্টেট না হলে ভারত তার ঐক্য রাখতে পারবে না।” স্বপনদার বিশ্বাস।

“তা না হলে বাংলাই বা তার ঐক্য রাখবে কী করে? হিন্দুর প্রাধাত্য মুসলমান সহিতে পারে না, মুসলমানে প্রাধাত্য হিন্দুর কাছে অসহনীয়। গান্ধীর প্রভাব, কংগ্রেসের প্রভাবও ক্ষীণ। সুভাষের প্রভাবই প্রবল। কমিউনিস্টরাও তলে তলে প্রভাব বিস্তার করে যাচ্ছে। শুনছি তেভাগা না কী যেন একটা ইচ্ছাতে লড়াই করবে। তা হলেও বাঙালী বাঙালীই। হিন্দু মুসলমান কমিউনিস্ট নির্বিশেষে। কাল সকালে তোমাকে মীর সাহেবের ওখানে নিয়ে যাব।” স্বপনদা প্রস্তাব করেন।

মানস রাজী হয়ে যায়। ঠুর সঙ্গে তার পত্রালাপ ছিল।

“আহ্নন, আহ্নন। কবে এলেন?” মীর সাহেব মানসকে স্বাগত করেন।

“কালকেই। এবার বদলীর পথে।” মানস উত্তর দেয়।

“কই, লেখী তো তেমন দেখিনে।” তিনি অহুযোগ করেন।

“পুরনো ধরনে লিখতে চাইনে। নতুন ধরনে লেখার কথা ভাবছি, কিন্তু কাজে দেখাতে পারছিনে। দেশের জন্তেও চিন্তিত।” মানস জানায়।

“চিন্তার কারণ আছে বইকি ! জিন্নার নাম বাঙালী মুসলমানরা কেউ কোনোদিন করত না। এখন সকলের মুখে মুখে। হিন্দু আর মুসলমান দুই ধর্ম বলে জানতুম। এখন শুনি দুই নেশন। শিক্ষিতরাই এ তত্ত্ব প্রচার করে অশিক্ষিতদের মাথা খাচ্ছেন। ইংরেজদের কাছ থেকে এঁরা নাকি গোটা বাংলাদেশটাই এঁদের ভাগে পাবেন। তাও স্বতন্ত্রভাবে নয়। পাকিস্তানের অঙ্গ হিসাবে। এঁদের মতে ভারত বিভাজ্য, বাংলাদেশ অবিভাজ্য। এঁরা ভুলে গেছেন যে চল্লিশ বছর আগে ইংরেজরাই বাংলাদেশকে দু’ভাগ করেছিল। একীকরণটা ইংরেজদের ইচ্ছায় হয়নি। হিন্দু মুসলমানের মিলিত ইচ্ছাতেই হয়েছে। স্বাধীনতাতেই সে সময় চালু থাকলে মিলিত ইচ্ছা থাকত না। এই আজগুবি তত্ত্বের ফলে মিলিত ইচ্ছা বলে কিছু থাকবে না। বাঙালী বিভক্ত হবে। বাংলা বিভক্ত হবে।” মীর সাহেব অতিথিচর্চা করতে বলেন।

মানস জানতে চায় মীর সাহেব এর বিরুদ্ধে কিছু লিখছেন কিনা। একজন বিশিষ্ট ইনটেলেকচুয়াল হিসাবে মুসলিম সমাজকে নেতৃত্ব দেওয়া কি তাঁর কর্তব্য নয় ?

“লিখছি বইকি। মনে করিয়ে দিচ্ছি বঙ্গভঙ্গের সময়কার কথা। তখনকার দিনের সাম্প্রদায়িকতাবাদী বহু মুসলমান নেতা মুসলিম সম্প্রদায়ের জন্তে বিশেষ স্বযোগ সুবিধা দাবী করলেও ঢাকার নবাবের মতো বঙ্গভঙ্গ সমর্থন করেন নি। তাঁদের ইস্তাহারে বলেন দুই সম্প্রদায়ে বিভক্ত হলেও বাঙালীরা এক নেশন। স্বতরাং বাংলাদেশ দু’ভাগ হওয়া উচিত নয়। সেদিন যদি বাঙালীরা এক নেশন না হতো তাহলে কাটা বাংলা অত সহজে জোড়া লাগত না। আর তাতে মুসলমানদেরই মেজরিটি হত না। তোমরা মেজরিটি পেয়েছ, মেজরিটির জোরে সরকার চালাতে পারছ, আপাতত না হলেও কালক্রমে সরকারী চাকরিতেও তোমাদেরই মেজরিটি হবে। মেজরিটি পেয়েও তোমরা সন্তুষ্ট নও। তোমরা চাও টোটালিটি। বাঙালী জাতির হোমল্যাণ্ড হবে মুসলিম জাতির একার হোমল্যাণ্ড। সেখানে অমুসলমান থাকবে না। যেমন মুসলিম নির্বাচনকেন্দ্রে অমুসলমান ভোটদাতা থাকে না। গোটা প্রদেশটাই হবে সেপারেট ইলেকটোরেট। শুধু মুসলমানদের জন্তে। তোমরা

ভেবেছ হিন্দুর্জিত বাংলাদেশে কেবল তোমরা বাঙালী মুসলমানরাই থাকবে। কিন্তু সে ধারণা ভুল। হিন্দুস্থান থেকে বিতাড়িত হয়ে কোটি কোটি উর্দুভাষী মুসলমানও এসে ভাগ বসাবে। তারাও মুসলিম জাতি বা নেশন। তোমরা তাদের ফেরাতে পারবে না। পাকিস্তান বলতে যদি বাংলাদেশের সঙ্গে পাক্কাব, সিন্ধু, বেলুচিস্তান ও সীমান্ত প্রদেশের ফেডারেশন বোঝায় তো পাক্কাবী পাঠান সৈন্যদলও এসে হাজির হবে। মিলিটারি পাওয়ার তো তাদেরই হাতে, তোমাদের হাতে নয়। সিভিল পাওয়ারও যে তোমাদেরই হাতে থাকবে তেমন নিশ্চয়তা কে দেবে? মুসলিম লীগ হাইকমান্ড তো অবাঙালীদের হাতে। কেন্দ্রীয় সরকার তাঁরাই চালাবেন। বাংলাদেশ সরকারও তাঁদেরই নিয়ন্ত্রণে চলবে। যারা তোমাদের প্রতিবেশী, তোমাদের সুখ দুঃখের সাথী, তাদের সঙ্গে বাগড়া করে তোমরা খাল কেটে কুমীর ডেকে আনতে চাও। জলে বাস করে কুমীরের সঙ্গে বিবাদ বাধবে না? তখন কে তোমাদের বাঁচাবে? বাঙালী হিন্দুরাও কি নির্বিবাদে তাদের হোমল্যাণ্ড ছাড়বে? আধখানা কেটে নেবে না?” মীর সাহেব সিগারেট বাড়িয়ে দেন।

“নো, থ্যাঙ্কস। আমি সিগারেট খাইনে।” মানস বলে, “কিন্তু আপনার কথা থেকে মনে হয় আপনার মতে বাঙালীরা একটা নেশন। তা হলে ভারতীয়রা কী? ভারত কি একটা নেশন-স্টেট না একটা নেশন সমবায়?”

“ভারত শাসন আইনে নেশনের কোনো স্বীকৃতি নেই। কনস্টিটিউয়েন্ট অ্যাসেম্বলি যদি ডাকা হয় সেইখানেই এর একটা হেস্তনেস্ত হবে। ইণ্ডিয়ান ন্যাশনাল কংগ্রেস অবশ্য ইণ্ডিয়ান নেশনকেই স্বতঃসিদ্ধ বলে ধরে নিয়েছে। অল-ইণ্ডিয়া মুসলিম লীগ কিন্তু তা করেনি। ভারতীয় মুসলমানরা প্রথমে ভারতীয় না প্রথমে মুসলমান এ প্রশ্ন এখনো অমীমাংসিত। জিন্নার মতো যারা কংগ্রেসে ছিলেন তাঁদের অনেকেই ডিগবাজি খেয়েছেন গান্ধীর উপরে রাগ করে। তিনি আগে ইংরেজদের সঙ্গে সেটলমেন্ট না করে আগে মুসলমানদের সঙ্গে সেটলমেন্ট করবেন না। জিন্না চান আগে মুসলমানদের সঙ্গে সেটলমেন্ট, পরে ইংরেজদের সঙ্গে সেটলমেন্ট। এখনো অনেকের ধারণা মুসলমানরা হিন্দু নয় বলে ভারতীয় নয়।” মীর সাহেব হাসেন।

স্বপনদার মৌনভঙ্গ হয়। তিনি সাগ দেন। “এইটেই সব কথার সার কথা। ভারতীয় হিন্দুরা আগে হিন্দু কি আগে ভারতীয় এতে কিছু আসে যায় না। কারণ তাদের আর কোনো হোমল্যাণ্ড নেই। কিন্তু ভারতীয় মুসলমানরা

যদি ভারতকে আপনার হোমল্যাণ্ড মনে করত তা হলে পাকিস্তানের চিন্তাই তাদের মাথায় আসত না। ভারত হোমল্যাণ্ড নয়, অতএব ভারতের যে অংশটা মুসলিমপ্রধান সেই অংশটাই হোমল্যাণ্ড। সেটা বাংলাদেশ না হয়ে যুক্ত-প্রদেশও হতে পারত। এর মধ্যে জন্মভূমির প্রতি মমতা নেই। আছে সংখ্যার জোরের উপর নির্ভরতা। হিন্দু মুসলমানে গৃহযুদ্ধ বাধলে মুসলিমপ্রধান অঞ্চলগুলিই হবে মুসলিম পক্ষের ঘাঁটি আর হিন্দুপ্রধান অঞ্চলগুলি হিন্দুপক্ষের ঘাঁটি। একপক্ষ অপর পক্ষকে ঘাঁটিচ্যুত করতে না পারলে ঘাঁটিভাগই হবে চিরস্থায়ী বন্দোবস্ত। জার্মানীর ইতিহাসে তিন শতাব্দী পূর্বে এই জিনিসটি ঘটে। ক্যাথলিক ও প্রটেস্ট্যান্ট তিন দশক ধরে লড়াই করে এইভাবে এক চিরস্থায়ী বন্দোবস্ত করে। তবে মাথার উপরে থাকেন এক নির্বাচিত সম্রাট। তাঁর ক্ষমতা সীমাবদ্ধ। যতবার সম্রাট নির্বাচন হয় ততরার ক্যাথলিক প্রার্থীই সম্রাট হন। কিন্তু কালক্রমে বলীয়ান হন প্রটেস্ট্যান্ট অধ্যুষিত অঞ্চলগুলির রাজগণ। বন্দোবস্ত ভেঙে যায়। বিসমার্ক ও সমগ্র জার্মানীকে একত্র দিতে পারেন না। ক্যাথলিক অস্ট্রিয়া ও প্রটেস্ট্যান্ট প্রাসিয়া এক নেশন হলেও একাকার হয় না। একজনের জায়গায় দু'জন সম্রাট হন। একজন হাঙ্গেরিসমেত অস্ট্রিয়ার, অল্পজন প্রাসিয়াকে বাড়িয়ে নিয়ে জার্মানীর। এর পরে আসে হিটলারের পালা। তিনি হন একচ্ছত্র অধিনায়ক। এটা কিন্তু সম্ভব হতো না, যদি তিনি ক্যাথলিক বলে পরিচয় দিতেন। তিনি না ক্যাথলিক, না প্রটেস্ট্যান্ট। তিনি খ্রীস্টানই নন। তিনি পেগান। কে প্রটেস্ট্যান্ট, কে ক্যাথলিক এ ভেদবুদ্ধি ছেড়ে জার্মানরা সবাই না হোক বেশীর ভাগই জড়ো হয় হিটলারের পতাকাতে। জার্মান একেবারে প্রাথমিক শর্ত হয় ক্যাথলিক প্রটেস্ট্যান্ট ভেদবুদ্ধির উল্লেখ ওঠা। হিটলারের স্বৈরতান্ত্রিক জোর প্রুশের আমি সমর্থন করিনে, কিন্তু ক্যাথলিক হয়েও প্রটেস্ট্যান্টদের প্রিয়তম নেতা একমাত্র তিনিই হয়েছিলেন, কারণ একমাত্র তিনিই জার্মানীকে ক্যাথলিক প্রটেস্ট্যান্ট স্বন্দের উল্লেখ তুলে এক নেশন করতে পেরেছিলেন।”

মীর সাহেব সম্মত হয়ে বলেন, “সর্বনাশ। আপনি হিন্দুকে হিন্দু আর মুসলমানকে ইসলাম ভুলিয়ে দিতে চান নাকি? পারেন তো হিন্দুকে মুসলমানের সঙ্গে ও মুসলমানকে হিন্দুর সঙ্গে যুক্ত করুন। কিন্তু হিন্দুকে হিন্দুত্বের থেকে ও মুসলমানকে মুসলমানত্বের থেকে বিযুক্ত করতে পারবেন না, গুপ্ত সাহেব।”

“আমি ধর্ম ত্যাগ করতে কাউকে বলব না, কিন্তু রাষ্ট্রকে বলব সেকুলার হতে। রাষ্ট্র হবে হিন্দু মুসলমান ভেদবুদ্ধির উদ্বেষ। ভারতবর্ষের একতার আর কোনো সূত্র নেই। যদি না সে হয় চির পরাধীন।” স্বপনদা স্থানান্তরিত।

“আপনি দেখছি কমিউনিস্টদের মতো কথা বলছেন। ওরা ধর্ম মানে না, ঈশ্বর বা আল্লাহ্ মানে না। ওদের রাষ্ট্র সেকুলার।” শিউরে ওঠেন মীর সাহেব।

“সোভিয়েট ইউনিয়নের মতো আমেরিকার যুক্তরাষ্ট্রও সেকুলার। তা বলে ওখানকার লোকজন ধর্মহীন নয়। ঈশ্বরবিশ্বাসহীন নয়। হিন্দু মুসলমানের যদি তাতেও আপত্তি থাকে একদিন কমিউনিস্টরাই সমগ্র ভারতকে একাধিক করবে। বাছবলে, এই বা দুঃখ।” স্বপনদা শেষকথা বলেন।

## ॥ দশ ॥

একই গাভীতে এসেছিল জুলি আর মিলি, মিলির ছেলে রণ, সৌম্য আর হুকুমার। মিলিকে পেছনে ফেলে জুলি এগিয়ে যায়, তার হাত ধরে রণ আর তাদের পথ দেখিয়ে এলফ।

ওদিকে দীপক আর মণি অপেক্ষা করছিল। মণি ছুটে এসে রণকে কেড়ে নেয়। মিলি তা দেখে বলে, “চোরের উপর বাটপাড়ি।”

তখন জুলি যুথিকার কাছে নালিশ করে। “রণ যদি আমাকে বেশী পছন্দ করে সেটা কি আমার অপরাধ?”

যুথিকা রণকে ডেকে বলে, ইংরেজীতে, “কাকে তোমার বেশী পছন্দ। মাকে না মাসীকে?”

রণ একবার এদিকে একবার ওদিকে তাকিয়ে বলে, “মাসীকে।”

মিলি শক পাবার ভাণ করে বলে, “বাপ যাকে পছন্দ করে ছেলেও তাকে পছন্দ করে? জুলি কি জাহ্নু জানে?”

হুকুমার তা শুনে বলে, “মায়ের চেয়ে মাসীর বেশী দরদ। কে না জানে? কিন্তু আমাকে এর মধ্যে টেনে আনা কেন? জুলি তো অনেকদিন আমাকে

কিক আউট করেছে। আমি ফুটবলের মতো গড়াতে গড়াতে মিলির গোলে ঢুকেছি। নাথি খাবার সে যে জালা তা কি আমি কখনো ভুলতে পারি ? মাঝে মাঝে হুঃস্বপ্ন দেখি। বলে উঠি, ‘জুলি। জুলি। তুমি আমাকে পদাব্যাহত করলে।’ মিলি সবটা শুনেতে পায় না, তাই আমাকে ভুল বোঝে।”

যুথিকার শিক্ষা জুলির মনে ছিল। সে মিলির দিকে চোখ টিপে বলে, “মিলিও তো মাঝে মাঝে স্বপ্ন দেখে। বলে ওঠে, ‘সৌম্য! সৌম্য! তুমি কবে তোমার ভীষ্মের প্রতিজ্ঞা ভঙ্গ করবে?’ কিন্তু স্বপ্ন হলো স্বপ্ন। তা নিয়ে মন খারাপ করতে নেই। আমি তো কিছু মনে করিনে।”

মিলি কপট কোপ দেখায়। “আমি স্বপ্নে কী বলি না বলি তোর তা জানার কথা নয়। বল, বল, কে তোকে বলেছে?”

“কেন? ওটা কি তোর মনের কথা নয়? অবচেতন মনে যে যা চায় সেইটেই স্বপ্ন হয়ে দেখা দেয়। যাক, তোর বিয়ে হয়ে গেছে, আমারও বিয়ে হয়েছে। এখন আর ওসব কথা নয়। রণ যা বলেছে তা শুনে তোর মনে কষ্ট হয়েছে। আচ্ছা, রণকে আমি জিজ্ঞাসা করছি। রণ, কাকে তুই বেশী ভালোবাসিস? মাকে না মাসীকে?” জুলি প্রশ্ন করে।

রণ উত্তর দেয়, “মাকে।” প্রশ্ন আর উত্তর ইংরেজীতে।

“সাবাস! এতেই তো প্রমাণ হয়ে গেল ওর বাপও ওর মাকে বেশী ভালোবাসে। বাপকা বেটা। বেটাকা বাপ।” যুথিকা রসিকতা করে।

স্বপনদা স্কুয়ারকে ধরে নিয়ে যান তাঁর স্টাডিতে। বলেন, “বহুদিন ইউরোপে যাইনি। যেতে ইচ্ছে করে, কিন্তু পারিনে। বিয়ে করলে মাহুয আর স্বাধীন থাকে না। আমার উনি ইংরেজদের উপর হাড়ে চটা। ওরা নাকি মুসলিম লীগের বকলমে ভারতের উপর অশ্রুণ রাখতে চায় তোমার তো লেবার পার্টির হাঁড়ির খবর জানা। তুমি কি মনে করো ঝাংহা টোরি তাঁহা লেবার? ঝাংহা চার্চিল তাঁহা অ্যাটলী?”

স্কুয়ার পাইপ টানতে টানতে বলে, “ব্রিটেনে একটা নিঃশব্দ বিপ্লব ঘটে গেছে, স্বপনদা। লেবার পার্টির রংটা লাল নয়, গোলাপী। তার যে প্রোগ্রাম সেটাও সেই রঙের। এখন থেকে ওয়েলফেয়ার স্টেট। তাতে একজনও নাগরিক বেকার থাকবে না। সবাই কাজ পাবে। এখন থেকে কেউ অচিকিৎসিত থাকবে না, ওষুধপত্রও বিনা খরচে বা নামমাত্র খরচে পাওয়া যাবে। শিল্প, বাণিজ্য, ব্যাঙ্ক, ইনশুরান্স এভুতির উচ্চতম শৃঙ্খলি রাষ্ট্র

কর্তৃক অধিকৃত হবে। তাতে সামাজিক নিরাপত্তা বাড়বে। একলক্ষের চেয়ে বেশী এগানো যায় না। লেবার পার্টির নেতারা বাস্তববাদী। টোরি দলের দশা এখন প্রথম মহাযুদ্ধের পরে লিবারলদের মতো। তাঁদের যুগ গেছে। তাঁরা যে আর কোনোদিন ফিরে আসবেন একথা বিশ্বাস করা শক্ত। তবে লেবার যদি দুর্বলতা দেখায় তার পক্ষপাতীরা তাকে ভোট না দিতেও পারে। গণতন্ত্রে কেউ চিরস্থান নয়।”

“কিন্তু আমি জানতে চেয়েছিলুম ভারত সম্পর্কে লেবার পলিসি কি একই রকম না আমাদের পক্ষে আশাপ্রদ?” স্বপনদা জেরা করেন।

“খুবই আশাপ্রদ। লেবার পার্টি এতদিন বিশেষ কিছু করতে পারেনি, কারণ যুদ্ধকালে ওটা ছিল সর্বদলীয় সরকার। চাচিলই বড়ো কর্তা। অ্যাটলী ছোট কর্তা। ক্রিপস বিফল হয়ে ফিরে গেলেন। দুর্ভাগ্য! আবার তাঁকে পাঠাবার কথা হচ্ছে। এবার যেন তাঁকে বিফল হতে না হয়। ব্রিটেনের সর্বশ্রেণীর রাজনীতিকরা উপলব্ধি করছেন যে সাম্রাজ্য রাখতে হলে তাকে কমনওয়েলথে রূপান্তরিত করতে হবে। কমনওয়েলথে ব্রিটেনেরই প্রাধান্য, কিন্তু কানাডা বা অস্ট্রেলিয়া বা দক্ষিণ আফ্রিকা ব্রিটেনের হাতের পুতুল নয়। এই যুদ্ধে দেখা গেল আমেরিকার সঙ্গেই অস্ট্রেলিয়ার নিকটতর সম্পর্ক। আমেরিকাই তাকে রক্ষা করতে পারে, ব্রিটেন নয়। কানাডার বেলা একথা আরো বেশী প্রযোজ্য। ভারতকে রক্ষা করা যে মোটেই সহজ নয় তা তো জাপানী আক্রমণের সময় প্রমাণিত হলো। ভারতীয়রাই যদি জাপানকে স্বাগত জানাত তা হলে তো ভারতরক্ষা অসম্ভব হতো। সে কাজটা তারা করেনি। কংগ্রেসের আন্দোলন অ্যাণ্টিব্রিটিশ হলেও প্রো-জাপানীজ ছিল না। কর্তারা তখন বিশ্বাস না করলেও পরে বিশ্বাস করেন যে কংগ্রেস জাপানকে ডাকেনি, ডাকত না। সরকারের ভার পেলে জাপানকে রুখত। এর থেকে শিক্ষান্তে পৌঁছনো গেল যে কংগ্রেস সরকারের ভার পেলে সোভিয়েট রাশিয়াকে ডাকবে না, রুখবে। কংগ্রেস নেতারা বিশ্বাসযোগ্য। তাদের সঙ্গে কথাবার্তা চালানো যায়। তাঁদের হাতে ক্ষমতা হস্তান্তর করা যায়। কিন্তু তাই বলে খারি ব্রিটেনের পুরাতন সখা বা সহযোগী তাদের তো পথে বসানো যায় না। পরিস্থিতিটা কতকটা প্রথম মহাযুদ্ধের পর আয়ারল্যান্ডের মতো। আইরিশ ন্যাশনালিস্টদের হাতে হস্তান্তর ততদূর পর্যন্ত সমীচীন যতদূরপর্যন্ত আলস্টরের প্রটেস্ট্যান্টরা সম্মত। ওরাও একটা প্রয়োজনীয় পক্ষ। এক্ষেত্রে মুসলীম লীগ।

কংগ্রেস যদি এটা মেনে নেয় তবে ক্ষমতার হস্তান্তর অথবা বিলম্বিত হবে না। কিন্তু গান্ধীজী কি এটা মানবেন? ক্রিপস বা কেউ ভবিষ্যৎবাণী করতে পারেন না। গান্ধী তাঁদের কাছে একটি ধাঁধা। নেহরু তেমন নন। তবে সব চেয়ে মুশকিল জিন্নাকে নিয়ে। এটা তাঁরা হাড়ে হাড়ে বুঝেছেন, তবু তাঁকে প্রাশ্রয় দিয়ে যাচ্ছেন। নইলে টোরি সমর্থন পাওয়া যাবে না। চার্চিল বিরূপ হবেন।”

“জিন্না কখনো কংগ্রেসকে একমাত্র উত্তরাধিকারী হতে দেবেন না। আর গান্ধী কখনো দুই উত্তরাধিকারী স্বীকার করবেন না। বুখা চেষ্টা।” স্বপনদা বলেন “আচ্ছা, গান্ধীকে বাদ দিয়ে কি কংগ্রেসের সঙ্গে আর জিন্নাকে বাদ দিয়ে কি মুসলিম লীগের সঙ্গে মিটমাট সম্ভব নয়?” স্বকুমার আশ্চর্য হয়। “ব্রিটিশ প্রতিনিধিদের কেন এই দুই বৃদ্ধের দ্বারস্থ হতে হবে?”

“এই দুই বৃদ্ধকে অনায়াসেই বাদ দেওয়া যায়। কিন্তু কংগ্রেস হাইকমান্ড আর লীগ হাইকমান্ডকে বাদ দেওয়া অসম্ভব। ক্ষমতা হস্তান্তরের পর কেন্দ্রীয় সরকার চালাবেন যারা তাঁরা এঁদেরই মনোনীত সদস্য। কিন্তু একমত হয়ে চালাতে না পারলে স্বদেশী সরকার এক বছর কি দু’বছর বাদে ভেঙে যাবে। তখন সেই বড়লাটই নিজের হাতে সরকারের ভার নেবেন। যেমন গভর্নররা নেন কংগ্রেসের মন্ত্রীদের প্রাদেশিক সরকার পরিত্যাগের পর। বিভিন্ন প্রদেশ গভর্নরের শাসন চলেছে ছ’বছর ধরে। তেমনি বড়লাটেরও শাসন চলবে কে জানে ক’বছর ধরে। সেটা অবশ্য স্বদেশী শাসন নয়, তবু অরাজকতার চেয়ে ভালো। বড়লাট যদি গদী ছেড়ে দেন তা হলে যে শৃংখলা সৃষ্টি হবে তার স্বযোগ নিয়ে জনতা উন্মাদ হবে। নিরীহ নাগরিকদের কে রক্ষা করবে? পুলিশের আহুগত্য কার প্রতি? আর্মির মাথা কে? জঙ্গীলাটও তো থাকবে না। শৃংখলা পূরণের শক্তি কি একা কংগ্রেসের আছে না একা লীগের আছে? থাকতে পারে দুই পার্টি যদি একজোট হয় তবে সেই জোটের। এই কথাটা জিন্না সাহেব বলে আসছেন পঁচিশ বছর ধরে। তাঁর মতে হিন্দু মুসলমানের একতাই হচ্ছে স্বরাজ। অর্থাৎ কংগ্রেস লীগ চুক্তিই হচ্ছে স্বরাজ। সে রকম একটা চুক্তি হয়েছিল ১৯১৬ সালে। তারই ভিত্তিতে প্রাদেশিক সরকারের আংশিক স্বায়ত্তশাসন লাভ হয়। এবার যেটা চাই সেটা কেন্দ্রীয় স্বায়ত্তশাসন। এবার আংশিক নয়, পূর্ণ। গোড়ার দিকে ইংরেজ বড়লাট থাকবেন। পরে বড়লাট নিযুক্ত হবেন কংগ্রেস লীগ মন্ত্রীমণ্ডলীর সুপারিশে। ক্ষমতা বলতে তাঁর বিশেষ



কিছু থাকবে না। যেমন নেই ব্রিটেনের রাজার। প্রায় সমুদয় ক্ষমতাই কংগ্রেস লীগ মন্ত্রীমণ্ডলীর। বলা বাহুল্য প্রত্যেক প্রদেশেই কংগ্রেস লীগ মন্ত্রীমণ্ডলী গঠিত হবে। প্রকৃত ক্ষমতা নির্বাচিত মন্ত্রীদেরই, নাটসাহেবদের নয়। এরই নাম ভারতের স্বাধীনতা তথা ভারতের ঐক্য। পরে রাজন্যরাও কেন্দ্রীয় মন্ত্রীমণ্ডলীতে প্রজ্ঞাপ্রতিনিধি পাঠাবেন। আরো পরে শাসনতন্ত্র প্রণয়ণ ও প্রজ্ঞাতন্ত্র প্রতিষ্ঠা। বছর পাঁচেক তো লাগবেই। কিন্তু মূল কথা হলো কংগ্রেস লীগ সমঝোতা। তার মানে হিন্দু মুসলিম একতা। সেটা ইংরেজরা উপর থেকে চাপিয়ে দিতে পারে না। আমাদেরই নিচের দিক থেকে গড়ে তুলতে হবে। এ কাজ গান্ধী জিন্না ভিন্ন আর কাাদের নেতৃত্বে হতে পারে? ত্রিশবছর পূর্বে যে ভূমিকা ছিল টিলক ও জিন্নার তেমনি এক ভূমিকাই এখন গান্ধী ও জিন্নার। না, এঁদের বাদ দেওয়া যায় না। না গান্ধীকে, না জিন্নাকে। বিশুদ্ধ কংগ্রেস শাসন বা বিশুদ্ধ লীগ শাসন কোনোটাই ধোপে টিকবে না। হাত মেলাতেই হবে। যে কোনো সম্মানজনক শর্তে।” স্বপনদা একজন প্রোফেসরের মতো ভবিষ্যদ্বাণী করেন।

“কিন্তু তা যদি সম্ভব না হয়।” স্বকুমার সংশয় প্রকাশ করে।  
 “ইংরেজর দেওয়া অ্যাওয়ার্ড কি উভয়পক্ষের গ্রহণযোগ্য হবে না?”

“হলে তো ভালোই হয়। কিন্তু সেটা যেন বাপ-মায়ের দেওয়া বিয়ে। ভালোবাসার বিয়ে নয়। টিকে যেতেও পারে। বলা যায় না। কিন্তু না টিকলে কী হবে, জানো তো? সেপারেশন ও ডিভোর্স। পার্টনারশিপ কার্যকর না হলে পার্টিশন বা সিসেশন। সেটা অশুভ চিন্তা।” স্বপনদা জিব কাটেন। টেবিলে হাত ঠেকিয়ে বলেন, “টাচ উড।”

ওদিকে সৌম্যর সঙ্গে মানসের কথাবার্তা। মানস জানতে চায় গান্ধীজীর সঙ্গে দেখা হয়েছে কি-না।

“হয়েছে বইকি। সেইজন্মেই তো কলকাতায় আসা।” সৌম্য জানায়।

“সেই প্রসঙ্গটা তুলেছিলে?” মানস ইঙ্গিত করে।

“কোনটা?” সৌম্য না বোঝার ভাণ করে।

“বিবাহিত ব্রহ্মচর্য।” মানস মুখ ফুটে বলে।

“পনেরো বছর প্রতীক্ষার পর আমরা বিয়ে করেছি শুনে বাপু নরম হন। জুলিয় মুখ দেখে ওঁর মায়া হয়। আমরা ব্রহ্মচর্য রক্ষা করতে পারিনি শুনে তিনি রাগ হানেন। বন্ধন, তোমরা গঠনের কাজ নিয়েই থেকো। তাতেই

দেশের মুক্তি হবে। দেশ মানে তো দেশের গরীব দুঃখী।” সৌম্য বিবরণ দেয়।

“তাহলে তুমি এখন ভীষ্মের প্রতিজ্ঞা থেকে মুক্ত।” মানস প্রীত হয়।

“কিন্তু সঙ্গে সঙ্গে সত্যগ্রহের দায় থেকেও মুক্ত। আবার যখন সত্যগ্রহের দিন আসবে বাপু আমাকে ডাক দেবেন না। সেদিন কংগ্রেস ওয়ার্কিং কমিটি মিটিং-এ তিনি যা বলেছেন সদস্যদের মুখে তা শুনে আমার মাথা হেঁট। রেললাইন ওপড়ানো, ট্রেন ডিরেল করা, টেলিগ্রাফের গার কাটা, সাঁকো ওড়ানো, স্টেশন পোড়ানো, থানা দখল, আদালত দখল, কাচারি দখল, জাতীয় সরকার গঠন করে দণ্ডদান প্রভৃতি যা নিয়ে আমাদের গর্ব তা তিনি ভায়োলেন্সের প্রয়োগ বলে না-মঞ্জুর করেন। তবে আমরা যে সেদিনকার পরিস্থিতিতে হাত গুটিয়ে বসে থাকিনি এর জন্তে পিঠ চাপড়ে দেন। তার তাৎপর্য কাপুরুষতার চেয়ে ভায়োলেন্স ভালো।” সৌম্য ব্যাখ্যা করে।

“তোমার কি ধারণা আবার বড়ো মাপের সত্যগ্রহের দরকার হবে? তা যদি না হয় তবে ছোট মাপের সত্যগ্রহে তুমি নাই বা যোগ দিলে। বিয়ে করেছে। সংসার হচ্ছে। এখন স্থিতি চাই।” মানসের মতে।

“নেতাদের সঙ্গে কথাবার্তা বলে মনে হলো না তাঁরা সত্যগ্রহের জন্তে তৈরি থাকছেন। বরং তৈরি হচ্ছেন সাধারণ নির্বাচনের জন্তে। সামনের সাধারণ নির্বাচন যুগান্তকারী হবে। কারণ মুসলিম লীগ মুসলিম নির্বাচকদের কাছে পাকিস্তানের একখানি মনোহর প্রাণচিত্র তুলে ধরবে। গুজরাতী বণিক বাণাভাই খোজানীর পুত্র মহম্মদ আলী বাণা তাঁর পিতৃনামকেই করেছেন তাঁর পদবী। সেটি এমনভাবে লেখা হয় যাতে ইংরেজের মুখে জিনা আর ভারতীয়ের মুখে জিন্না। এখন মুসলমানের মুখে হয়েছে জিন্নাহ। ওনলে মনে হবে আরবী ভাষার শব্দ। যেমন আল্লাহ্। ইসলামের খলিফাদের মতো ইহলোকের আদর্শ রাষ্ট্রে নিয়ে যাবেন সবাইকে পাকিস্তানের রাস্তা ধরে। কংগ্রেস এবার বিস্তার মুসলিম ভোট হারাবে। কংগ্রেস যে হিন্দু মুসলমান শিখ খ্রীষ্টানের ধর্ম নিবিশেষে প্রতিনিধি এ দাবী দুর্বল হবে।” সৌম্য চিন্তিত।

“তার ফলে কি কংগ্রেস লীগের বোঝাপড়া ব্যাহত হবে?” মানস প্রশ্নায়।

“বোঝাপড়া মানে গিভ অ্যাণ্ড টেক। কংগ্রেস খালি দেবে, লীগ খালি নেবে, এর নাম বোঝাপড়া নয়। লীগকে কিছু দিতে হবে। তা হলেই কংগ্রেসও কিছু দেবে। পাকিস্তানও বাপু দিতে পারেন, তারু বিনিময়ে যদি পান

তিনটি বিষয় পরিচালনার জন্তে গঠিত একটি কেন্দ্রীয় সরকার।” সৌম্য উত্তর দেয়।

“সেটা কোথাও ধোপে টেকেনি।” মানস মনে করে অবাস্তব।

পাশের ঘরে যুথিকা স্বধায় মধুমালতীকে, “এটা কি ঠিক যে তুমি আর বিলেতে ফিরে যেতে চাও না? রণকে এ দেশের ছেলে করবে?”

“হ্যাঁ, ভাই। সেইরকমই ভাবছি। কিন্তু ওর বাবার ভিন্ন মত। ওর বাবা লণ্ডনের শহরতলীতে আমার নামে বাড়ী কিনেছে। আমার বাবাও ওর সঙ্গে একমত। আমার বাবা বলেন দেশে এখন গুণ্ডগোল চলবে। হুশো বছরের সাম্রাজ্য হঠাৎ ভেঙে গেলে অরাজকতা অনিবার্য। আমরা যে বাংলাদেশে থাকতে পারব তাই বা কে জোর করে বসতে পারে? মুসলিম লীগ নাকি লোক বিনিময় করবে বলে শাসাচ্ছে। আমাদের ঘর-বাড়ী নাকি দখল করবে বিহারী মুসলমান। আর আমরা নাকি ঘর-বাড়ী পাব বিহারে। কলকাতার ভাগ্য অনিশ্চিত। হয়তো দীপিকাদিদেরও যেতে হবে পাটনায়। পাটনা থেকে কোনো মুসলিম ব্যারিস্টার এসে বসবেন এখানে।” মিলি উত্তর দেয়।

দীপিকাদি পাশের সোফা থেকে শুনে পেয়ে বলেন, “দেখব এ বাড়ী থেকে আমাকে সরায় কোন গভন মেন্ট। তার আগে স্টেনগান জোগাড় করব।”

“আপনার স্টেনগান কোন্ কাজে লাগবে, দীপিকাদি, গোরা সৈন্যরা যাবার আগে যদি পাঞ্জাবী মুসলমান সৈন্যদের ফোর্ট উইলিয়ামে বসিয়ে দিয়ে যায় আর তাদের হাতে কামান বন্দুক ট্যাক ইত্যাদি যাবতীয় মারণাস্ত্র ধরিয়ে দিয়ে যায়? দেখবেন কলকাতা শহর সাতদিনের মধ্যেই তিনভাগ খালি হয়ে যাবে। বাঙালীতে ছেয়ে যাবে বিহার, ওড়িশা, মধ্যপ্রদেশ, যুক্তপ্রদেশ. আর তাদের জায়গা ভরে যাবে অবাঙালী মুসলমানে। কলকাতায় থাকার ইচ্ছে যদি থাকে তবে ভালো ছেলের মতো কমনওয়েলথে যোগ দিতে হবে। তাহলে বাংলাদেশের এক টুকরো রাখতে পারা যাবে। ফোর্ট উইলিয়ামে শিখ সৈন্য মোতায়েন হবে।” মধুমালতী ভরসা দেয়।

“এরই নাম স্বাধীনতা? ধোভেরি!” দীপিকাদি মুখ ফিরিয়ে নেন।

“তা হলে ফোর্ট উইলিয়াম ক্যাপচার করার সংকল্প নাও। বিহার থেকে হিন্দু সৈন্য এসে লড়াই করে দখল নেবে। সত্যিকার স্বাধীনতার মূল্য গৃহযুদ্ধ। রাজী?” মিলিকে দেখে মনে হয় সে সিরিয়াস।

“গৃহযুদ্ধ কেন? বিপ্লব কেন নয়।” বাবলী বলে ওঠে এক কোণ থেকে। “রাস্তায় রাস্তায় ব্যারিকেড। রেডিও স্টেশন, রেল স্টেশন, পোর্ট অধিকার। গভর্নমেন্ট হাউস, রাইটাস’ বিল্ডিং, লাল বাজারের উপর লাল নিশান। পাঞ্জাবী মুসলমান সৈন্যরাও লাল নিশানের মহিমা বোঝে। ওরা আমাদের দিকেই চলে আসবে।”

মিলির নজর পড়ে জুলির উপরে। “তুই চূপ করে আছিস যে।”

“বিপ্লব যদি অহিংস হয় আমি অংশ নেব, নয় তো নয়।” জুলি উত্তর দেয়।

“সে কী রে। তুই কবে থেকে অহিংসাবাদী হলি?” মিলি বিস্মিত হয়।

“বিয়ের পর থেকে। ও আমার জন্তে ব্রহ্মচর্য ত্যাগ করেছে। আমি ওর জন্তে হিংসা ত্যাগ করেছি। বাপু আমারও বাপু। কাল দর্শন করে এলুম। তিনি আমাদের আশীর্বাদ করলেন।” জুলির মুখ উজ্জল হয়ে ওঠে।

মিলি হো হো করে হেসে ওঠে। “ব্রহ্মচর্যত্যাগ একটুও কঠিন নয়। হিংসা ত্যাগ একটুও সহজ নয়। তুই ঠকে গেছিস, জুলি। বোকা মেয়ে।”

যুথিকা জুলির পক্ষ নেয়। “পনেরো বছর অপেক্ষার পর বিয়ে। ওর বিয়েটা ভেঙে গেলে কাঃ কী লাভ? ভেঙে যাবেই ওর বর যদি লত্যাগ্রহী হয় আর ও হত্যাগ্রহী। জুলি ঠকে যাবে তখন। আশা করি ঠকবে না।”

“না, না। বিয়ে ভেঙে যাবে না। আমি আবার ভায়োলেট হলে ও আবার ব্রহ্মচারী হবে।” জুলি সরল মনে বলে।

মিলি, যুথী, বাবলী সবাই হেসে ওঠে। দীপিকাদি গম্ভীরভাবে বলেন, “পুরুষের হাতে ওটাও একটা অস্ত্র। ফেমিনিস্টদের জেনে রাখা উচিত।”

হংসো মধ্যে বকো যথা সে ঘরে একমাত্র পুরুষ ছিল চাহ। সে পুরুষদের পক্ষ নেয়। “না, দিদি, ওটা একটা অস্ত্র নয়। সবাই কি সোম্য চৌধুরী?”

ওদিকে সোম্য বলছিল মানসকে, “ইংরেজীতে একটা কথা আছে না, ডেস্পারেট ডিজিজেস কল ফর ডেস্পারেট রেমিডিজ। আমাদের এদেশের ডেস্পারেট ডিজিজ হচ্ছে সাম্প্রদায়িকতা। ইংরেজ থাকতে এর মূলোচ্ছেদ হবে না। স্বতরাং ইংরেজকেই সর্বাগ্রে উচ্ছেদ করতে হবে। ওরা দেশ ছেড়ে চলে যাক এটা কেউ চায় না। ওরা গদী ছেড়ে দিক এইটেই গান্ধীজী চান। শূন্যতা পূরণের জন্তে ওরা যদি মুসলিম লীগকে গদীতে বসিয়ে দেয় তাতেও তাঁর আপত্তি নেই। দুশো বছরের ইংরেজ রাজত্ব যদি হাওয়া হয়ে যায় পাঁচ দশ বছরের মুসলিম লীগ রাজত্বও ধোঁয়া হয়ে যাবে। তবে মুসলিম

মাইনরিটির জন্যে কতকগুলো সেফগার্ড সত্যিই আবশ্যক। ওরা যদি মাইনরিটি স্টেটাসে সন্তুষ্ট হয় তা হলে ওদের জন্যে ও ওদের মতো মাইনরিটিদের জন্যে বিশেষ ব্যবস্থা করতে হিন্দু মেজরিটিকে তিনি পরামর্শ দেবেন। মেজরিটির উপরেও কড়া নিয়ন্ত্রণ চাই। তা না হলে সেও অত্যাচার করবে। হিন্দুরা যে দেবতা তা নয়। মুসলমানরা যে শয়তান তাও নয়। কিন্তু সম্প্রতি মুসলমানদের মধ্যে একটা পরিবর্তন দেখা যাচ্ছে। ওরা মাইনরিটি স্টেটাস চায় না। চায় মেজরিটি স্টেটাস। সারা ভারতে নয়, ভারতের মুসলিম-প্রধান প্রদেশগুলিতে ও সেগুলিকে একত্র করে স্বতন্ত্র একটি রাষ্ট্রে, যার নাম পাকিস্তান। জিন্না সাহেব দশ বছর আগেও পাকিস্তানের বিপক্ষে ছিলেন। এখন তিনি পক্ষপাতী শুধু নয়, বোর পক্ষপাতী। ইংরেজদের অস্ত্রপরিবর্তনের লক্ষণ দেখা যাচ্ছে, কিন্তু জিন্নার বা মুসলিম লীগের নয়। বরং ঠিক উল্টোটি। মুসলমানদের মধ্যে যারা উদার ছিলেন তাঁরাও হয়ে উঠছেন অসহদার। এক্ষেত্রে ডেসপারেট রেমিডি হচ্ছে ইংরেজের গদীতে জিন্নাকে বসানো। তিনি দেশের মঙ্গলের জন্যে সহযোগিতা চাইলে সহযোগিতা পাবেন। দেশের অমঙ্গল তথা হিন্দুর অমঙ্গল করলে পাবেন অহিংস অসহযোগ। যতদিন না অস্ত্রপরিবর্তন হয়।”

“ডেসপারেট রেমিডি বলতে কি বোঝায় এমন এক গভর্নমেন্ট যা শাসনালও নয়, ডেমোক্রাটিকও নয়? দেশের লোক যা চায় তা কেবল বিদেশী শাসনেরই নয়, অগণতান্ত্রিক শাসনেরও অবসান। সারা ভারতের উপর মুসলিম লীগের কতৃৎ কি হবে গণতান্ত্রিক কতৃৎ? কাদের কাছে ওদের জবাবদিহি? সব নাগরিকের কাছে, না কেবলমাত্র নিজের সম্প্রদায়ের কাছে? যারা কর দেবে তারা যদি বলে তাদের প্রতিনিধিদের দ্বারা ধার্য না হলে কর দেবে না তা হলে জিন্না সাহেব কেমন করে কর আদায় করবেন? কর আদায় করতে না পারলে সৈন্যদের মাইনে দেবেন কী করে? হিন্দু ও শিখ সৈন্যরা কি বিদ্রোহ করবে না? জিন্না সাহেব একথা জানেন বলেই সারা ভারত চান না, আধখানা ভারত চান। তিনি কনফেডারেশনে রাজী হলে গান্ধীজীও পাকিস্তানে রাজী হবেন, ভারতের ঐক্য বজায় থাকবে। কিন্তু গোড়া কেটে আগায় জল ঢাললে যা হয় তাই হবে। ব্রিটেনের গণতন্ত্রের ভিত্তি যৌথ নির্বাচন পদ্ধতি, ভোটকেন্দ্রে জাতের বিচার বা ধর্মের বিচার নেই। ভারতে স্বতন্ত্র নির্বাচন পদ্ধতি। জাতেরও বিচার আছে, ধর্মেরও বিচার আছে। ফল

হয়েছে এই যে বাংলার মুসলিম মন্ত্রীরা কেবলমাত্র তাঁদের সম্প্রদায়ের নির্বাচকদের কাছেই দায়ী। একই কথা খাটে মুসলমান বাদ দিয়ে আর সব সম্প্রদায়ের 'সাধারণ' নির্বাচন কেন্দ্র থেকে নির্বাচিত মন্ত্রীদের বেলায়ও। অর্থাৎ হিন্দুদের বেলায়ও। আইনসভাকে দুটি বিচ্ছিন্ন কক্ষে বিভক্ত করলে মন্ত্রীমণ্ডলীকেও দুটি বিচ্ছিন্ন কক্ষে বিভক্ত করতে হয়। লিবারল কনসারভেটিভ হতে পারে, কনসারভেটিভ লিবারল হতে পারে, কিন্তু হিন্দু মুসলমান হতে পারে না, মুসলমান হিন্দু হতে পারে না। বর্তমান শাসনতন্ত্রের বিসমিল্লায় গলদ। এমন একটি মন্ত্রীমণ্ডলী গঠন করতে পারা যায় না যার উপর উভয় সম্প্রদায়ের আস্থা আছে। নয়তো একটা গোটা সম্প্রদায়ই বিরোধীপক্ষে পরিণত হয়। বাংলাদেশে তারা হিন্দু, বিহারে তারা মুসলমান। সারা ভারতে যদি কংগ্রেস মেজরিটি শাসনভার পায় তবে সারা ভারতেও বিরোধীপক্ষ হবে মুসলমান? ডেসপারেট রেমিডি হিসাবে মুসলিম লীগকে সারা ভারতের শাসনভার দিলে হিন্দু সম্প্রদায় হবে বিরোধীপক্ষ। সেই সঙ্গে শিখ, খ্রীষ্টান প্রভৃতি সম্প্রদায়গুলিও। এর নাম পার্লামেন্টারি ডেমোক্রাসী নয়। এটা একপ্রকার ডেস্পটিজম। মোন্দা কথা ইংরেজরা মোগলদেরই মননদে বসিয়ে দিয়ে যাবে। তা দেখে মারাঠা, রাজপুত, শিখ বিদ্রোহ করবে। ভারত খণ্ড বিখণ্ড হবে। এটা একটা সমাধানই নয়। এটা একটা এক্সপেরিমেন্ট। মুসলিম লীগ বিপাকে পড়ে কংগ্রেসকে সাধবে তার সঙ্গে মননদে বসতে। কিন্তু মেজরিটি হতে দেবে না, নিজেও মাইনরিটি হবে না। ওরকম জোড়াতালি দেওয়া সরকার দু'দিনেই ভেঙে যাবে। তখন কংগ্রেস যদি শাসনভার নেয় লীগ হবে বিরোধীপক্ষ। সেই সঙ্গে মুসলিম সম্প্রদায়ও। একমুঠো কংগ্রেসী মুসলিম কি মুসলিম বিদ্রোহ ঠেকাতে পারবে? কংগ্রেস সরকার কি অহিংসভাবে বিদ্রোহ দমন করতে পারবে? আবার সেই পদত্যাগ। এবার লীগ মননদে বসবে না। ইংরেজও না। দেশ আপনা থেকে বলকান হয়ে যাবে।" মানস আশঙ্কা করে।

ওদিকে মিলি বলছিল যুথিকাকে, "ভাই, আমি যদি এদেশে থেকে যাই তো আমার বরও এসে চাকরি জুটিয়ে নিয়ে বসবে। তখন গুরু হবে আবার জুলির সঙ্গে প্রেম। তাই ভাবছি আবার ওদেশে ফিরে যাব।"

জুলি তখন অল্প বরে বাচ্চাদের খাওয়া দেখছে। শুনতে পায় না। যুথিকা বলে, "ভাই, তোমার এ সন্দেহ অযূলক। জুলি এখন ওর বর আর ঘর নিয়ে ভাবে ভোর। ও এখন ওর বরের সঙ্গে পা মিলিয়ে নিচ্ছে। হিংসা ছেড়েছে,

তবে অহিংসা মন থেকে মেনে নিতে পারেনি। ওর অতীতের সঙ্গে ওর সম্পর্ক চুকে গেছে। ওর সাবক স্বপ্নর ওকে মাসোহারা পাঠাতেন, ওর বিয়ের পরেও পাঠাতে ভোলেন নি। ও ফেরৎ দিয়ে মাফ চেয়েছে। স্বকুমারদার দিকে ও ফিরেও তাকায় না। তবে তোমাকে ও সন্দেহ করে। সোমাদাকে নিয়ে।”

“দূর! আমি ওকে আমার প্রতিদ্বন্দ্বী ভাবি নাকি? আমিও ওর প্রতিদ্বন্দ্বী নই। কিন্তু স্বকুমার যে কিছুতেই জুলিকে ভুলতে পারছে না। বছর বছর স্বপ্ন দেখছে ওকে। স্বপ্নে কথা বলছে। আমার তো সমুদ্রেপথে আসারই কথা। আকাশপথে উড়ে এলুম কেন ছেলেকে নিয়ে? ওর স্বপ্নের জালায়ই তো?” মিলি কবুল করে।

ওদিকে স্বকুমার বলছিল স্বপনদাকে, “এই মরা দেশে আপনার মতো জীৱন্ত সাহিত্যিক পড়ে আছেন কী করতে? এখানে কে আপনাকে চিনবে? চলুন ওদেশে, লিখুন ইংরেজীতে, থাকুন রুমসবেরীর আশেপাশে। পাব-এ আড়া দিন। মেঘার হোন অ্যাথিনিয়াম ক্লাবের। আপনাকে নিয়ে কাড়াকাড়ি পড়ে যাবে। এদেশ কি বাঁচবে? ইংরেজরা চলে গেলে তাদের পরেই প্লাবন। হিন্দু মুসলমানে চতুর্থ পাণিপথের যুদ্ধ। বিপ্লবের বুলি আওড়াচ্ছে একদল টিয়াপাখী। জানে না যে বিপ্লবের প্রথম শর্তই হচ্ছে হিন্দু জনগণের টিকিচ্ছেদ আর তাদের পুরোহিত কুলের উপবীতদাহ। টিকিও থাকবে, পৈতেও থাকবে, সাম্যও হবে, এর মতো আত্মপ্রবঞ্চনা আর নেই। আর মুসলমানরা যদি পণ করে থাকে যে প্রত্যেকটি বালককে সারকামসাইজ করবেই তা হলে হিন্দুদের সঙ্গে ওদের সাম্য কোনোদিনই হবে না। ওদের বেলা বিপ্লবের প্রথম শর্তই হচ্ছে অক্কেদন নয়, অক্কেরণ। এটা ওরা পেয়েছে ইহুদীদের কাছ থেকে। ইহুদীরা বিপ্লবী হওয়া সত্ত্বেও আদিম সংস্কার ছাড়বে না। সোভিয়েট রাশিয়াতেও এরা এখন বেথাপ। জার্মানীতে তো বেথাপ ছিলই। জার্মানিস্টরা প্যালেস্টাইনে ফিরে যাবার আয়োজন করছে। ওরা ফিরে যাবে দু’হাজার বছর পূর্বে। তুমি আমি বিংশ শতাব্দীর সন্তান, আমরা মনে করি মধ্যযুগের মুসলিম রাষ্ট্রে বা গুপ্তযুগের হিন্দু রাষ্ট্রে বা দু’হাজার বছর পূর্বের ইহুদী রাষ্ট্রে ফিরে যাওয়ার চেয়ে ইংলণ্ড বা ফ্রান্সে বসবাস করা ভালো।”

স্বপনদা ফরাসী ধরনে দুই কাঁধ তুলে বলেন, “বিবাহের পর কেউ স্বাধীন নয়। তুমিও না আমিও না। এখন আমরা বনের পাখী নই, খাঁচার পাখী।”

ওঁরা নিচে নেমে এসে দেখেন বুফে ডিনার শুরু হয়ে গেছে।

“এই যে চকোলেট! কখন এলে? এই যে কমরেড চাহু! মস্কোর কী হালচাল? এস, ইন্ট্রাডিউস করিয়ে দিই। সুকুমার দত্তবিশ্বাস। লণ্ডনের শোশিয়ালিস্ট। কমরেড অপরাজিতা সেন, ওরফে বাবলী, ওরফে চকোলেট। কমরেড প্রণব লাহিড়ী, ওরফে চাহু। মস্কোর কমিউনিস্ট। সম্প্রতি এঁরা অর্ধেক ইউরোপ, অর্ধেক জার্মানী, আর অর্ধেক বালিন জয় করেছেন।” স্বপনদা একটা প্লেট হাতে করে ঘুরে ঘুরে আলাপ করেন।

“বড়ো আনন্দিত আমি দেখে আপনাদের।” সুকুমার ইংরেজী থেকে তর্জমা করে বলে, “আমার হুংপিওটাও লাল। আমি সতেরো আঠারো বছর হলো ব্রিটেনবাসী। ইদানীং বি. বি. সি. তে চাকরি করি। লাল জ্বাকড়াকে জন বুল ডরায়। তবে আমার পাটির সম্প্রতি জয় হয়েছে। আমি ওদেরই মতো গোলাপী।”

স্বপনদা ওকে সাবধান করে দেন। “এদের সঙ্গে ইয়াকি কোরো না, সুকুমার। ইংরেজরা যদি চলে যায় আর হিন্দু মুসলমানে গৃহযুদ্ধ বেধে যায় তবে এরাই ফোর্ট উইলিয়াম ক্যাপচার করবে। লালবাজার তো লাল হয়েই রয়েছে। রাইটার্স বিল্ডিংও লাল। ওদিকে রেড রোডও লাল রঙের নাম বহন করছে। এক এক করে সব কিছু লাল হয়ে যাবে। গভর্নমেন্ট হাউস, রেডিও স্টেশন, হাওড়া স্টেশন, শেরালদা স্টেশন, এয়ারপোর্ট, রিভার পোর্ট। সবশেষে দিল্লীর লাল কেল্লা। সর্বত্র উড়বে লাল ঝাণ্ডা।”

“কক্ষনো না।” প্রতিবাদ করে জুলি। “লালকেল্লা নেতাজীর লক্ষ্য। আমরাই সেখানে দ্রাবর্ণ পতাকা ওড়াব। তবে ফোর্ট উইলিয়াম সংক্ষেপে আমার সন্দেহ আছে। সেখানে হয়তো মুসলিম লীগের সবুজ নিশান উড়বে। আমাদের মুসলিম ভাইদের সঙ্গে তো আর আমরা মারামারি করতে পারিনে। লিভ অ্যাণ্ড লেট লিভ।”

দীপিকাদি দৃঢ়কণ্ঠে বলেন, “ফোর্ট উইলিয়াম আমরাই জিতে নেব।”

মিলি হাততালি দিয়ে বলে, “আমরাই। আমরাই। আমি দেশেই থেকে যাব। রণও থাকবে। সুকুমার, তুমিই বিলেতে ফিরে যাও।”

যুথিকা রঙ্গ করে, “গো ব্যাক, সাইমন।”

সুকুমার কোণঠাসা হয়ে বলে, “আমি নেহরু বলে একটি ঘোড়ার উপর বাজী রেখেছি। বাজী জিতলে এই দেশেই চাকরি নিয়ে বসে যাব।”



## ॥ এগারো ॥

ডিনারের পর বিলিতী কেতা মেনে মহিলারা অগ্ন ঘরে যান। পুরুষরা স্বচ্ছন্দ বোধ করেন। স্বপনদা রিফ্রিজেরাটর থেকে একটি বোতল বার করে, বলেন, “বোর্দো। আমার সমবয়সী। বিশ বছর আগে ফ্রান্সে কেনা। আরো তিনটে ছিল, খরচ হয়ে গেছে, এটিই এখন সবে ধন নীলমণি। এরও তো প্রায় শেষ দশা। বিশিষ্ট অতিথি না হলে খুলিনে। স্বকুমার আজকের দিনের চীফ গেস্ট।”

তা শুনে স্বকুমার উঠে দাড়িয়ে পানপাত্র হাতে টোর্ট প্রস্তাব করে। “টু গ্ন হেলথ অভ গ্ন লার্শ্ট রোমান্টিক অভ বেঙ্গলী লিটেরেচার, স্বপনমোহন গুপ্ত।”

স্বপনদা তখনো তাঁর পরিবেশন লারা করেন নি। “সৌম্য তো মহাত্মা হতে চলেছে। মানসও আমাদের মতো দুরাত্মা নয়। এই জুল'ভ পানীয় আমি অশাস্ত্রে অশচয় করব না। কমরেড চাহু, তুমি তো ভডকা ছাড়া আর কিছু ঠোঁট দিয়ে ছোঁবে না। তোমার জন্তে এখন ভডকা পাই কোথায়? তোমাদের তিনজনকে কফিই দিচ্ছি। কারো আপত্তি আছে?”

সৌম্য আর মানস আপত্তি করেন না। চাহু স্বপনদার দিকে এমন সতৃষ্ণ দৃষ্টিতে তাকায় যে তাঁর মায়া হয়। তাঁর মনে পড়ে যায় যুদ্ধক্ষেত্রে আহত সৈনিকের সতৃষ্ণ দৃষ্টি। সার ফিলিপ সিডনীর মতো তিনি নিজের গ্লাসটা ওর দিকে বাড়িয়ে দিয়ে বলেন, “দাই নীড ইজ গ্রেটার থান মাইন।”

চাহু সস্কোচের সঙ্গে তুলে নিয়ে মুখে দেয়। এদিক ওদিক তাকায়। বাবলী দেখছে না তো?

স্বপনদা নিজের জন্তে আরেক গ্লাস ঢেলে চাহুর দিকে চেয়ে বলেন, “তোমার পার্টি তোমাকে নির্ঘাত পার্জ করবে। যদি টের পায় যে তুমি প্রোপারিটারিয়ানদের প্রিয় পানীয় ভডকা ছেড়ে বুর্জোয়াদের মতো ক্ল্যারেট ধরেছ। গাবেই, চকোলেট তোমার মুখের গন্ধ থেকে টের পাবে।”

বেচারি চাহু বাবলীর ভয়ে তেষ্ঠা ভুলে যায়। স্বপনদার দয়া হয়। তিনি তাকে অভয় দিয়ে বলেন, “প্রাণ ভরে পান করো। গুটুকুতে নেশা হবে না। বাবলী ভালো করেই জানে যে অনেকেই ডুবে ডুবে জল খায়।”

এর পর তাঁর খেয়াল হয় যে টোস্টের উত্তরে কিছু বলতে হয়। “সুকুমার আমাকে যে কমপ্লিমেন্ট দিয়েছে আমি তার যোগ্য নই। এই তো মানস রয়েছে। এ কি কম রোমান্টিক? চান্দ্রদের দলেও রোমান্টিক কবি আছেন। তবে তাঁরা বর্ণচোরা রোমান্টিক। আগেকার দিনে প্রেমে পড়ার বয়স হবার আগেই বিয়ে হয়ে যেত। রোমান্সের অবকাশ ছিল না। এখন তো মেয়েরাও ছেলেদের কলেজে যাচ্ছে। কো-এডুকেশনও বিশ্ববিদ্যালয়ে চালু হয়েছে। রোমান্টিক প্রেমের এই শেষ নয়, শুরু। কার কী মতবাদ সেটা তুচ্ছ। কার কী অহুভূতি সেইটেই আসল। মেয়েরা এখনো নির্ভয়ে প্রকাশ করতে পারছে না। যখন পারবে তখন দেখবে রোমান্টিকতায় সাহিত্য প্রাবিত হবে। যেমন হয়েছিল ইউরোপে গত শতাব্দীর প্রথম পর্বে। ইউরোপের বিচারে আমিই হয়তো লাস্ট, কিন্তু এদেশের বিচারে তা নই। ধনুবাদ, সুকুমার। আমিও তোমার স্বাস্থ্য পান করি।”

প্রসঙ্গটা ঘুরিয়ে দিয়ে মানস স্বধায় সুকুমারকে, “এত নেতা থাকতে নেহরুর উপর বাজী রেখেছ কেন?”

“কংগ্রেস যেটাকে স্বাধীনতা বলছে সেটা ক্ষমতার হস্তান্তর ছাড়া আর কী? হস্তান্তর যারা করবে তারাই স্থির করবে কার হাতে হস্তান্তর করা যায়। নেহরু হচ্ছেন হ্যারো আর কমব্রিজে শিক্ষিত। ইংরেজদের কাছে তাঁদেরই একজন। সোশিয়ালিস্টদের কাছেও তেমনি একই পালকের পাখী। বিলেতফের্তা অবস্থা আরো আছেন, তাঁদের বেশীর ভাগই শুধুমাত্র ব্যারিস্টার। এই যেমন গান্ধী, জিন্না, বল্লভভাই, ভুল্লাভাই, লিয়াকৎ আলী। তাঁদের কারো হাতে ভারতের ভার দিলে ব্রিটেনের সঙ্গে কালচারাল ইউনিটি থাকবে না। জানো তো, আমি ফেব্রুয়ারি সোসাইটির বহুদিনের সভ্য। লেবার গভর্নমেন্টের কয়েক নওতাই। আমি ক্রাশনাল লেবার ক্লাবেরও বহুদিনের মেম্বর। ক্লাবে গিয়ে প্রথম কাজ বার থেকে এক পেয়ালা মদ কেনা, কেউ সঙ্গে থাকলে তাকেও কিনে দেওয়া। তারপর লাউজে বসে মদ হাতে আড্ডা দেওয়া। লেবার পার্টির কেউবিট্টুদের সঙ্গে আলাপ হয়। লেবার গভর্নমেন্টের রাজা উজীরদের সঙ্গেও পরিচিত হই। ভিতরের খবর জানতে পারি। আসছে, আসছে, অবিলম্বে আরো এক কিস্তি রিফর্মস আসছে। এবার সেন্টারে। পুরোপুরি ভারতীয় মন্ত্রীদের নিয়েই সেন্ট্রাল গভর্নমেন্ট হবে। পরে তাদের হাতেই ক্ষমতা হস্তান্তর ঘটবে। প্রত্যেক গভর্নমেন্টের একজন প্রধানমন্ত্রী বা প্রেসিডেন্ট থাকেন। ভারতের

বেলা প্রেসিডেন্টের কথা ভাবা যায় না। তা যদি হয় ব্রিটেনের রাজা ভারতেরও রাজা হতে পারেন না। ইংরেজরা সবাই রাজভক্ত। মায় শ্রমিক শ্রেণী। রাজাকে রাজ্যচ্যুত করার মতো মহাপাপ তাদের দ্বারা হবে না। কিন্তু রাজাকে নামে মাত্র রাজা করতে তাদের বাধে না। কার্যত প্রধানমন্ত্রীই সর্বস্বাধীন। তেমন লোক ভারতে নেহরু ভিন্ন আর কে? তবে এর পেছনে একটা প্রচ্ছন্ন শর্ত আছে। মুসলিম লীগকেও সঙ্গে নিতে হবে। তা নইলে টোরি অপোজিশন বাগড়া দেবে। চার্চিল থাকতে মুসলমানদের ডুবিয়ে দেওয়া চলবে না। ঠাঁর কাছে মুসলমান মানেই লীগপন্থী মুসলমান। কাজেই বেশ কিছু অনিশ্চয়তা থেকে যাচ্ছে। কেউ বলতে পারছেন না শেষপর্যন্ত কী হবে। ক্রিশ কী যেন মুসাবিদা করছেন। তাঁর পেট থেকে কিছু বার করা অসম্ভব। তিনি মদ স্পর্শ করেন না। নিরামিষাশী।” স্কুমার একনিঃশ্বাসে বলে যায়।

অপনদা দুই কাঁধ উঁচু করে বলেন, “এ জগতে সব কিছুই অনিশ্চিত, কিন্তু একটি বিষয় স্থানান্তরিত। জিন্নাকে নিয়ে কেউ গভর্নমেন্ট চালাতে পারবেন না। জিন্নাকে বাদ দিয়েও কেউ গভর্নমেন্ট চালাতে পারবেন না। জিন্না হচ্ছেন সেই দিল্লীকা লাডু যাঁকে খেলেও পশ্চাতে হয়, না খেলেও পশ্চাতে হয়। নেহরু যদি গভর্নমেন্ট গঠনের দায়িত্ব নেন তাঁকেও পশ্চাতে হবে।”

মানস তর্ক করে, “কেন? ইংরেজরা কি পলিসি পরিবর্তন করতে পারে না? সরকার মনোনীত সদস্যদের গোষ্ঠী যদি নিরপেক্ষ থাকে কেন্দ্রীয় আইনসভায় কংগ্রেসেরই তো মেজরিটি। ব্রিটিশ পার্লামেন্টারি প্রথা অনুসারে যে দলের মেজরিটি সেই দলের দলপতিকেই তো গভর্নমেন্ট গঠন করতে বলা হয়। আপাতত ভুলাভাই দেশাই করতে পারেন, পরে উপনির্বাচনে জিতে জবাহরলাল করবেন।”

“তা হলে তো জিন্না কোনো দিনই প্রধানমন্ত্রী হতে পারবেন না। তাঁর দল কোনো কালেই মেজরিটি হবে না। সেই জন্মেই তো তিনি পাকিস্তান দাবী করছেন। পাকিস্তান হলে সেখানেই প্রধানমন্ত্রী হতে পারবেন। মুসলিম লীগ হবে মেজরিটি পার্টি। মুসলমান সম্প্রদায় হবে মেজরিটি সম্প্রদায়। সম্প্রদায়কে নেশন বলা অবশ্য একটু বাড়াবাড়ি। কিন্তু তারও নজীর আছে। ইহুদীরাও সেই কথা বলে ইহুদীস্থান দাবী করছে। ইংরেজরা এখন দোমনা। না পারে আরবদের চটাতো, না ইহুদীদের। এক্ষেত্রেও তাই। না পারে হিন্দুদের চটাতো, না মুসলমানদের।” স্কুমার ইংরেজদের পক্ষ নেয়।

এবার লোম্য মুখ খোলে। “সেইজন্মেই বাপু বলেন, তোমরা হয় কংগ্রেসের হাতে ক্ষমতা দিয়ে যাও, নয় মুসলিম লীগের হাতে। আর নয় তো কারো হাতে ক্ষমতা না দিয়ে অমনি ভারত ছেড়ে যাও। দিনকতক অরাজকতার পর যে পারে সে গভর্নমেন্ট গঠন করবে। প্রাদেশিক স্তরে গভর্নমেন্ট গঠনে কোথাও কংগ্রেস, কোথাও লীগ, কোথাও অন্যান্য দল এগিয়ে আসবে। কেউ বাধা দেবে না। গোলমাল যা হবে তা কেন্দ্রীয় স্তরেই। লেটাও মিটে যাবে, কংগ্রেস যদি জিন্নাকেই প্রধানমন্ত্রীর পদ দেয়। নেহরুকে সবুর করতে হবে।”

“তা হলে আমার রাজী রাখা নিফল।” হুকুমার হতাশার ভাণ করে।

“ব্রিটিশ কর্তারা জিন্না সাহেবের হাতে একটা ভীটো ধরিয়ে দিয়েছেন। তিনি বড়লাটের উপরেও ভীটো প্রয়োগ করে সিমলা বৈঠক বানচাল করলেন। এরপরে সেক্রেটারি অভ স্টেটের উপরেও তাই করবেন। জিপস কেন মিছি-মিছি আসছেন? জিন্নার হাতে ভীটো যতদিন থাকবে গান্ধীজী ততদিন সবুর করবেন। বয়স বাড়তে বাড়তে যদি একশো বছর হয় তা হলেও তিনি ধৈর্য ধরবেন। এমন দিন আসবে যেদিন ব্রিটিশ কর্তারাই অধৈর্য হবেন। সে কথা ভেবে বাপু আর নতুন কোনো আন্দোলনের কথা বলছেন না। তা হলেও আমাদের প্রস্তুত থাকতে হচ্ছে। যদি ডাক আসে তবে সাড়া দিতে হবে। গঠনের কাজই সেই প্রস্তুতি। তবে কংগ্রেস আপাতত নির্বাচনে নামবে ও সফল হলে প্রাদেশিক স্তরে মন্ত্রিত্ব গ্রহণ করবে।” সোম্য যতদূর জানে।

মানস তাকে সতর্ক করে দেয়। “জিন্না সাহেব বলেছেন কংগ্রেস যদি আবার মন্ত্রিত্ব গ্রহণ করে ও তাঁর দলকে বখরা না দেয় তবে তিনি তুলকালাম কাণ্ড করবেন। এদিকে আমাদের এখানকার কংগ্রেস নেতারাও প্রত্যাশা করছেন যে এখানকার প্রাদেশিক মন্ত্রীমণ্ডলের তাঁরাও শরিক হবেন। নয়তো তাঁরাও সহ্য করে যাবেন না। কারো কারো মাথায় প্রদেশ ভাগের চিন্তাও ঘুরছে। বাপু কি এসব জানেন না? তাঁর একশো বছর বয়স মানে তো আরো পচিশ বছর। কে ততদিন ধৈর্য ধরবে? বাংলা আর পঞ্জাব তো বিপ্লবীদের লীলাক্ষেত্র।”

“ট্রাজেডী ঘনিয়ে আসছে।” স্বপনদা বেদনার স্বরে বলেন, “কর্ম থেকে কর্মফল এটাই তো সাধারণ নিয়ম। কজ্ থেকে এফেক্ট। কিন্তু ইতিহাস পড়লে মনে হয় এফেক্ট আগে থেকে নির্ধারিত হয়ে থাকে। কজ্ তার দিকে

অনিবার্যভাবে এগোয়। যেমন চুষকের টানে লোহা। যুদ্ধ বলো, বিপ্লব বলো, এক একটা চুষক। ঘটনার লোহা অপ্রতিরোধ্য গতিতে তার দিকে এগিয়ে যায়। দেশ গৃহযুদ্ধের অভিমুখে চলেছে, আমি নীরব দর্শক।”

“আমি নীরব দর্শক হতে নারাজ।” মানস দৃষ্টকণ্ঠে বলে।

“আমিও কি নিষ্ক্রিয় দর্শক হয়ে থাকতে পারি? আমি সত্যগ্রহী। প্রতিরোধই আমার কর্তব্য। সত্যগ্রহীর অভিধানে অপ্রতিরোধ্য বলে কোনো শব্দ নেই। মানব ইতিহাসের আদিপর্ব থেকেই অত্যাচার বিরুদ্ধে কতক মানুষ প্রতিরোধ করে আসছে। সহিংসভাবেই বেশী, অহিংসভাবে কম। আজকের দিনে তাদের কর্তব্য যুদ্ধের বিরুদ্ধে প্রতিরোধ। গৃহযুদ্ধও তো যুদ্ধ। তার বিরুদ্ধেও প্রতিরোধ চাই। দেশ যে গৃহযুদ্ধের অভিমুখেই অগ্রসর হচ্ছে এর কি কোনো সন্দেহ আছে? মরণকালে বিপরীত বুদ্ধি। কতরকম আজব তত্ত্বই না শুনছি। মুসলিম লীগ নেতারা বলছেন হিন্দু আর মুসলমান দুই নেশন। যেমন ইংরেজ আর আইরিশ। হিন্দু মহাসভার নেতারা বলছেন হিন্দুরাই একমাত্র নেশন, আর মুসলমানরা এলিয়েন। যেমন ইংরেজরা এলিয়েন। তফাতের মধ্যে এই যে মুসলমানরা রেসিডেন্ট এলিয়েন। এসব কথা শুনলে কার না গা জ্বালা করে? কে না মারমুখো হয়? হিন্দুস্থানে মুসলমানরা যদি এলিয়েন হয়ে থাকে তবে সেই এলিয়েনদের জন্মে আলাদা একটা রাষ্ট্র স্থাপন করলেই মামলা মেটে। নয়তো মামলায় লড়ো। হামলায় পড়ো। ইংরেজরাই বিচারক হয়ে একটা রোয়েদাদ দিয়ে নিষ্পত্তি করুক। আমরা একটা রোয়েদাদ দেখেছি। আরেকটা দেখতে চাইনে। জানি যে ইংরেজরা অপক্ষপাত নয়। কংগ্রেস তাদের শত্রু, লীগ তাদের मित्र। শত্রুর চেয়ে মিত্রের দিকেই ওরা ঝুঁকবে। সেটাই স্বাভাবিক। শেষকালে দেখা যাবে হিন্দুর হাতে মুসলমানের কান আর মুসলমানের কানে হিন্দুর কান ধরিয়ে দিয়ে ওরা ক্ষমতার হস্তান্তর করেছে। ক্ষমতা পেয়ে আমাদের প্রথম কাজই হবে কোরবে পাওবে কুরুক্ষেত্রের যুদ্ধ। কেউ কি অমন একটা কৃত্রিম সীমান্ত নিয়ে সন্তুষ্ট থাকবে? বাংলা আর বিহারের মধ্যে কোথায় প্রাকৃতিক সীমান্ত? পঞ্জাব আর যুক্তপ্রদেশের মধ্যোই বা কোথায়? রোয়েদাদ মেনে নেওয়ার চেয়ে গৃহযুদ্ধই শ্রেয়, কিন্তু সেটাই বা অবশ্যজ্ঞাবী হবে কেন? একপক্ষ যদি বলে, আমরা যুদ্ধ করব না, তার বদলে সত্যগ্রহ করব, তোমরা যদি একতরফা যুদ্ধ করতে চাও তো কৈরো, তা হলে তেমন একতরফা যুদ্ধ আপনি থেমে যাবে।

মুশকিল হচ্ছে এইখানে যে এই কয়েক বছরে হিংসার প্রেক্ষিত, সাময়িক শক্তির প্রেক্ষিত বহুগুণ বেড়ে গেছে। জঙ্গী মনোভাব সর্বত্র। লোকের ধারণা অহিংসা হচ্ছে দুর্বলের অস্ত্র। সবলের অস্ত্র হিংসা। হিন্দুদের মধ্যেও একটা জঙ্গী মনোভাব ব্যাপক। শিখদের মধ্যে তো কথাই নেই। আর মুসলমানদের তো জঙ্গী ঐতিহ্য। আমরা কোন্ পক্ষকেই বা বলব যুদ্ধের বদলে সত্যগ্রহ করতে? নৈতিক প্রতিরোধ করতে? দুই পক্ষকে নিবৃত্ত করতে গিয়ে আমরাই মাঝখানে দাঁড়িয়ে দুই পক্ষের মার খেয়ে প্রাণ হারা'ব।” সোম্য আবেগের সঙ্গে বলে।

“এই পাগলের সঙ্গে ক্যারামেলের বিয়ে দেওয়া ভুল হয়েছে। এখন আর সংশোধনের উপায় নেই। মেয়েটা আবার বিধবা হবে ভাবতেও কষ্ট হয়।” স্বপনদা উত্তেজিত হয়ে বলেন।

“ঘটনার গতি ভালোর দিকেও যেতে পারে। সব চেয়ে খারাপটা আমরা ধরে নেব কেন? ইংরেজরা সকলেই কি লীগের দুই নেশন তত্ত্বের সমর্থক ও পার্টিশনের গুণপাতী? লেবার পার্টি সেটা পরিহার করতেই চেষ্টা করেছে ও করবে। গৃহযুদ্ধও ইংরেজরা কেউ চায় না।” স্বকুমার বিশ্বাস করে।

“ত্যাখ, স্বকুমার, ইংরেজরা কী চায় না চায় সেটা তাদের বিদায় মুহূর্তে অবাস্তব। ভারতীয়রা কী চায় না চায় সেইটেই বড়ো কথা। ভারতীয়দের অধিকাংশ চায় অবিভক্ত ভারত। কিন্তু আরেক অংশ পণ করেছে কিছুতেই হিন্দুদের আধিপত্য বা প্রাধান্য স্বীকার করবে না। দেশকে দু'ভাগ করে একটা ভাগের উপর মুসলিম আধিপত্য বা প্রাধান্য প্রতিষ্ঠা করবে। তার জন্যে যদি দরকার হয় গৃহযুদ্ধে নামবে। গৃহযুদ্ধ এড়াতে হলে তৃতীয় পক্ষেরই মধ্যস্থতা চাই। তৃতীয় পক্ষ যতই ত্রায়নিষ্ঠ হোক না কেন কোনো পক্ষের দাবী পুরোপুরি মঞ্জুর করবে না, করতে পারে না। এটা এথিক্যাল প্রশ্ন নয় যে একপক্ষে ত্রায়, অপর পক্ষে অত্রায়। এটা পলিটিক্যাল প্রশ্ন। অল্পরূপ প্রশ্নে জার্মানী একদা দু'ভাগ হয়েছে। জার্মানী আর অস্ট্রিয়া। নেদারল্যান্ডস একদা দু'ভাগ হয়েছে। হলান্ড আর বেলজিয়াম। আয়ারল্যান্ডও এই শতাব্দীতেই দু'ভাগ হলো। আইরিশ ফ্রী স্টেট আর উত্তর আয়ারল্যান্ড। ক্যাথলিক আর প্রটেস্ট্যান্ট তো একই ত্রাণকর্তার উপাসক। তাদের মধ্যে কতটুকু পার্থক্য? হিন্দু আর মুসলমান তাদের তুলনায় অনেক বেশী শৃংখল। এই পার্থক্যের উপর রাষ্ট্র প্রতিষ্ঠা করতে গেলে আজ না হোক কাল, কাল না হোক পরন্তু ভারত

বিখ্যাত হয়ে যাবেই। ইংরেজ থাকতেও যা, না থাকতেও তাই। এটাই আমাদের ঐতিহাসিক নিয়তি। ইংরেজরা যদি না আসত এইরকমই হতো। ইণ্ডিয়ান ইউনিটি ইজ অ লস্ট কজ্। আমরা এ নিয়ে কান্নাকাটি করতে পারি, কিন্তু মারামারি করতে গেলে ব্যর্থ হব। বুথা রক্তক্ষয়। তেমনি একতরফা সত্যাগ্রহ আর আত্মবলিও বুথা। শহীদ হতে হলে এই ইস্যুতে নয়। অত্ৰ কোনো ইস্যুতে। যার একদিকে গায়, অপর দিকে অন্ঠায়। তার সময় হয়তো পরে আসবে।” স্বপনদা প্রত্যয়ের সঙ্গে বলেন।

“কী যে বলো, স্বপনদা।” মানস স্থির থাকতে পারে না। “তুমি কি ডিক্টিটস্ট? মুসলিম লীগের কাছে বিনা যুদ্ধে আত্মসমর্পণ করবে? ওরা কি সব মুসলমানের প্রতিনিধি? তার প্রমাণ কী? সামনের সাধারণ নির্বাচনে জিততে পারবে? পাঠানরা ওদের দিকে নয়, পাঞ্জাবের ইউনিয়নিস্ট মুসলমানরা ওদের দিকে নয়, বাংলার কৃষক প্রজা মুসলমানরা ওদের দিকে নয়। অত্ৰ ইংরেজরা ধরে নিচ্ছে যে সব মুসলমান ওদের দিকে। এটা ইংরেজদের অন্ধতা। ইচ্ছাকৃত অন্ধতা। নেলসনের মতো কানা চোখে টেলিস্কোপ লাগানো। রোয়েদাদ কখনো নয়। দরকার হলে লড়তে হবে। হিংসা অহিংসা উভয়েরই আশ্রয় নিতে হবে। ফাইট ইট আউট।”

“আমিও বলি রোয়েদাদ কখনো নয়। কিন্তু আমি এটাও বলি, হিংসা কখনো নয়। লড়তে যদি হয় তবে সেটা অহিংস পদ্ধতিতে। অবশ্য এই মুহূর্তে আমরা কেউ তার জন্ঠে প্রস্তুত নই। ইংরেজদের সঙ্গেও না। লীগপন্থী মুসলমানদের সঙ্গেও না। আমরা মিটমাটের জন্ঠেই প্রাণপণ চেষ্টা করব। যতদিন পারি গৃহযুদ্ধ ঠেকিয়ে রাখব। বেধে গেলে মাঝখানে দাঁড়াব। ফলাফল আমাদের হাতে নয়। ভগবানের হাতে।” সৌম্য চোখ বুজে ধ্যান করে।

“তার আগে তোমাদের ক্ষমতার মায়া কাটাতে হবে। ইংরেজদের সর্বাস্তঃকরণে বলতে হবে যে তোমরা ক্ষমতা চাও না। ওরা যাকে ইচ্ছে তাকে দিয়ে যাক। নয়তো শূন্ঠতা সৃষ্টি করে যাক। তার পর যার ইচ্ছে সে ক্ষমতা দখল করুক। কিন্তু সেটা সম্ভবপর নয়। যেটা সম্ভবপর সেটা হচ্ছে এক একটা প্রদেশের ভার এক একটা দলকে দিয়ে যাওয়া। তখন গড়ে উঠবে কংগ্রেসের একটা ফেডারেশন, মুসলিম লীগ ও অন্যান্ঠ মুসলিম দলের একটা ফেডারেশন, রাজন্ঠদের একটা ফেডারেশন। পরে হয়তো সকলের সম্মতি নিয়ে কনফেডারেশন গড়ে উঠবে। কিন্তু কোথাও সে ব্যবস্থা স্থায়ী হয়নি, হয়ে

থাকলে হয়েছে অত্যন্ত ক্ষমতাশালী এক কেন্দ্রীয় সরকারের অধীনে। এদেশে তার সম্ভাবনা অতি ক্ষীণ। যতদূর দৃষ্টি যায় ইংরেজ চলে গেলে এক্যঙ চলে যাবে। ইণ্ডিয়ান ইউনিটি ইজ আ লস্ট কজ্। চূষক যেমন লোহাকে টানে, আগুন যেমন পতঙ্গকে টানে, এফেক্ট তেমনি কজ্কে টানে। সব নদী যেমন সমুদ্রের পানে ধায় সব কারণ তেমনি বিচ্ছেদের পানে। গান্ধীজী যদি বিচ্ছেদকে মিলনে রূপান্তরিত করতে পারেন তা হলেই ইংরেজ চলে গেলেও এক্য বজায় থাকবে। সে আশা আমি রাখিনে। তবে এখনো বিশ্বাস করি যে ভারত ভেঙে গেলেও বাংলা ভেঙে যাবে না। ইণ্ডিয়ান ইউনিটি ইজ আ লস্ট কজ্, বাট বেঙ্গলী ইউনিটি ইজ নট। কিন্তু কে জানে, সেটাও হয়তো লস্ট কজ্। ট্রাজেডীর উপর ট্রাজেডী।” স্বপনদার কণ্ঠে বিবাদ।

“তুমি আর একটি ক্যাসাণ্ড্রা।” মানস জলে ওঠে। “কেবল ট্রাজেডীর ভবিষ্যদ্বাণী করতেই জানো। তুমি ডিটারমিনিস্ট, ডিক্টিটিস্ট, পেসিমিস্ট। তোমাকে হিউমানিস্ট বলে মনে হয় না। হিউমানিস্ট হলে তুমি বলতে ভারতের এক্য বহু শতকের বিবর্তনের ফল। বিবর্তনের চাকা মধ্যযুগের দিকে ঘুরতে পারে না। মুসলিম লীগ বাগডা দিতে পারে, টোরি পার্টি ধাধা দিতে পারে, কিন্তু বিবর্তনের স্ত্রো যে এক্য এসেছে সেটা ইংরেজ বিদায়ের পরেও আপনার পথ আপনি করে নেবে। গৃহযুদ্ধ অসম্ভব নয়, কিন্তু গৃহযুদ্ধে লিঙ্কনেরই জয় হয়, জেফারসন ডেভিসের নয়। এদেশেও নেহরুর জয় হবে, জিন্নার নয়। বাপুর নাম করছিনে, তিনি তো যুদ্ধবিরোধী। লড়তে হবে নেহরুকেই। কিন্তু হবেই বা কেন গৃহযুদ্ধ? ব্রিটিশ প্রধানমন্ত্রী অ্যাটলী যদি নেহরুকেই একমাত্র উত্তরাধিকারী মনোনীত করেন, বাপু যেমন করেছেন। নইলে যেটা হবে সেটা ওয়ার অফ্ সাকসেসন। কংগ্রেস গোড়ায় বিদ্যমান হলেও “আখেরে সফল হবে।” মানসের ভবিষ্যদ্বাণী।

“না, ভাই, আমরা যারা আন্তর্জাতিক যুদ্ধের বিরোধী তারা কখনো গৃহযুদ্ধ বা উত্তরাধিকারের যুদ্ধ সমর্থন করতে পারিনে। তবে অহিংস সংগ্রাম আমরা করতে পারি, যদি উপায়ান্তর না থাকে। কিন্তু সেটা বিদেশী শাসকদের সঙ্গেই, স্বদেশবাসী মুসলমান ভাইদের সঙ্গে নয়। জিন্না সাহেব আমাদেরই এক ভাই, তাঁর অহুগামীরাও আমাদের কয়েক লক্ষ কয়েক কোটি ভাই। অজুনের মতো আমাদেরও দোটানা। সংগ্রাম করব, না করব না? অহিংস সংগ্রামও ক্রমে হিংসার বদলে প্রতিহিংসায় পথভ্রষ্ট হতে পারে। অন্যায়সেই পরিণত



হতে পারে হিন্দু মুসলমানের দাঙ্গায়। সাম্প্রদায়িক ঐক্য বিনষ্ট হবেই, আর সাম্প্রদায়িক ঐক্য বিনষ্ট হলে মিলন হবে কী করে? বিচ্ছেদই তো তার অনিবার্য পরিণাম। আমরাই ডেকে আনব পার্টিশন। ভারতেরও, বাংলারও। একযাত্রায় পৃথক ফল হয় না। ঐক্য যাবেই, ঐক্য গেলে স্বাধীনতাও আসবে না। ঐক্য আর স্বাধীনতা একই মুদ্রার এপিঠ ওপিঠ। ইংরেজরাই থেকে যাবে। যেতে চাইলেও চারদিক থেকে রব উঠবে, ‘তুমি যেয়ো না এখনি, এখনো আছে রজনী।’ না, অরাজকতার সামনে দাঁড়াবার মতো শক্তি আমাদের নেই। জাপানী আক্রমণের মুখে যেটা মন্দের ভালো ছিল হিন্দু-মুসলিম বিরোধের মুখে সেটা মন্দ।” সৌম্য স্থনিশ্চিত।

ওদিক দীপিকাদির কফির আসরে বসে সিগারেটের ধোঁয়া ছাড়তে ছাড়তে মিলি বলছিল জুলিকে, “এই একটা বদ্ অভ্যাস ওদেশে গিয়ে আমি পেয়েছি, কিন্তু আর সবই সদ অভ্যাস। অমন শৃঙ্খলাবদ্ধ জীবন আমাদের এদেশে কোথায়? আমরা না জানি ঠিক সময়ে খেতে, না বি চাকরকে বিরাম দিতে, না বাইরে গিয়ে বাজার করতে, না নিজেরাই বয়ে আনতে। অথচ মুখে বিপ্লবের বুলি। কাজের সময় কাজ, আড্ডার সময় আড্ডা। কাজে কাকি দেওয়া কাকে বলে ওরা জানে না। কাজের সময় মুখ বুজে কাজ করে যায়, বড়ো জোর একটু আবহাওয়া নিয়ে মস্তব্য করে। আর আমরা? গল্প করতে পারলে আর কিছু চাইনে। যাক, ওসব বলে তোকে বোর করছি না তো? তুই নিজেও তো ওদেশে ছিলি। তোকে নতুন কথা আর শোনাও কী? ই্যা, একটা কথা শতি শোনাবার মতো। যুদ্ধকালে ইংরেজদের যে সম্ভবদ্বতা, যে ডিসিপ্লিন, যে আদেশ বা নির্দেশ মেনে চলা, যে কত ব্যাজান তার তুলনা আমাদের দেশে কোথায়? আমরা সবাই রাজা, কেউ কারো অধীনে কাজ করব না। দল ভেঙে টুকরো টুকরো হয়ে যায়। নীতিগত কারণে নয়। সেটা একটা মুখোশ। কারণটা ব্যক্তিগত। ইংরেজরা যে আমাদের চেয়ে বেশী বুদ্ধিমান বা বেশী লাহসী তা আমি মানব না। কিন্তু তারা জানে কেমন করে বিপদ কালে মাথা ঠাণ্ডা রেখে তাদের নেতাদের নিয়ন্ত্রণে কতব্য পালন করতে হয়। ওদের অগ্নিপরীক্ষার গ্রহণে আমি ওদের দেখেছি। যাকে বলে ইংলণ্ডের ফাইনেন্ট আওয়ার। যখন নাৎসীরা আকাশ থেকে বোমা বর্ষণ করে লণ্ডন গুঁড়িয়ে দিচ্ছে। একজনও ভয় পায়নি, পালায়নি। নাৎসীদের মার খেয়ে অটল থেকেছে বা অকাতরে মরেছে। নাৎসীরা ভেবেছিল ফ্রান্সের

মতো ইংলণ্ডকেও কাবু করবে। জানত না চার্চিল কেমন দৃঢ়প্রতিজ্ঞ। আর সেই সঙ্গে কৌশলী। আমার দেশ আমেরিকাকে নামিয়ে দিয়েছেন যুদ্ধে, তার অনিচ্ছাসত্ত্বেও। যা কেউ কখনো পারত না সোভিয়েট রাশিয়াকেও করেছেন ক্যাপিটালিস্ট ইংলণ্ডের মিতা। ইংরেজরা যে জিতে গেল তার অর্ধেক কারণ তো তাদের ডিপ্লোমেসী। বাকীটা তাদের মনোবল। যাকে বলে মরাল। ছ'বছর ধরে আমি সব দেখে শুনে যা শিখেছি তা হাজার পুঁথি পড়ে শেখা যেত না। না রে, ডিগ্রী আমি পাইনি। ছেলের মা হয়ে পড়াশুনায় মন দেব কী করে? রণই আমার ডিগ্রী।”

জুলি পরিহাস করে বলে, “তোর আর আশা নেই, মিলি। ঝাঁসীর রাণী হওয়া তোর ভাগ্যে নেই। রাণীর তো সম্মান ছিল না। ইয়া, ছিল। তার নাম ঝাঁসী। ফাইনেস্ট আওয়ার ভারতেরও আসবে। বিদ্রোহী সিপাহীরা তোর দিকে ফিরেও তাকাবে না।”

মিলি পাণ্টা দেয়। “তোরও আশা নেই, জুলি। জোন অভ আর্ক হওয়া তোর অদৃষ্টে নেই। তার বদলে হবি কস্তুরবা গান্ধী। সিপাহী বিদ্রোহের দিন তোর কোনো ভূমিকা থাকবে না। ইংরেজরা তোকে ভুলেও ধরবে না, পোড়ানো দূরে থাক। তবে জনতা তোকে দেবী বলে ভক্তি করবে।”

দীপিকাদি ওদের মাঝখানে না বসলে ওরা হয়তো হাতাহাতি করত। তিনি রণকে আদর করতে করতে বলেন, “ততদিনে রণ বড়ো হয়ে থাকবে। ও-ই সিপাহীদের পরিচালনা করবে। সিপাহী বিদ্রোহের ঢের দেরি আছে, মিলি আর জুলি। তার আগে হিন্দু মুসলমানের একজোট হওয়া চাই। তার লক্ষণ কই?”

“সত্যি বলেছেন, বৌদি। এ সমস্যা তো ইংলণ্ডে ছিল না। াকলে ওরাও একজোট হতো কি-না সন্দেহ। নেতাজী স্বভাব জাপানের যুদ্ধবন্দীদের একজোট করতে পেরেছিলেন, সেটা কিন্তু ভারতের বাইরে। দেশে ফিরে এসে তারা আবার বিভক্ত হয়ে গেছে। কতক চলে গেছে মুসলিম শিবিরে। লড়লে তারা লড়বে ইংরেজের সঙ্গে নয়, হিন্দুর সঙ্গে। ভারতের আজাদীর জন্যে নয়, পাকিস্তানের স্বাভাব্য জন্মে। লক্ষণ শুভ নয়।” মিলি আফসোস করে।

“আমি, ভাই, সিপাহী বিদ্রোহের উপর নির্ভর করা ছেড়ে দিয়েছি। ওরা মার্লিনারি। যার নিমক খায় তার বিরুদ্ধে লড়বে না, লড়লে ওই চবি টবি

একটা কোনো অরাজনৈতিক ইস্যুতে লড়বে। আমি নির্ভর করি জনগণের স্বতঃপ্রসব বিদ্রোহের উপরে। তবে তার জন্তেও চাই দীর্ঘকাল ধরে প্রস্তুতি। হাতিয়ার হাতে নয়, শুধু হাতে। এমন কোনো ইস্যুতে লড়তে হবে যেটা হিন্দু মুসলমান নির্বিশেষে সকলের কাছে জীবন মরণের ব্যাপার। সেটা ঠিক এই মুহুর্তে পরিষ্কার নয়। বাপু আমাদের নেতৃত্ব করে এসেছেন, তিনিই নেতৃত্ব করবেন। তাঁকে তো আমরা আরো পঁচিশ বছর পাচ্ছি। তিনি একশো বছর বয়স অবধি বাঁচবেন। ইতিমধ্যে তাঁর মনের মতো একটা ইস্যু পাওয়া যাবে নিশ্চয়। আমরা অপেক্ষা করব। ক্ষমতার জন্তে যারা লোলুপ তাঁরাই আপসের কথা ভাবছেন। আর আপসের সম্ভাবনা দেখা দিলেই জিন্না তার স্বযোগ নেবার জন্তে মুখিয়ে আছেন। কংগ্রেস কিছু পেলে তো লীগও কিছু থাকবে। হিন্দুস্থান বলে একটা রাষ্ট্র হলে তো পাকিস্তান বলে একটা রাষ্ট্রও হবে। কিন্তু হিন্দুস্থান হতে দেব না আমরা। পাটিশন হতে দেবই না। আমরা জাতীয়তাবাদী।” জুলি উদ্দীপ্ত স্বরে বলে।

“ঘটনা তোদের জন্তে অপেক্ষা করবে না, জুলি। অ্যাটলী চাচ্ছিল নন। তিনি ক্ষমতা হস্তান্তর করতে রাজী। কিন্তু কয়েকটা শর্ত আছে, তাই নিয়ে কথাবার্তা চালাতে চান। তা হলেও আমাদের মনে রাখতে হবে যে চাচ্ছিল শেষমুহুর্তে জিন্নার মুখ চেয়ে কাঁচিয়ে দিতে পারেন। তখন আমাদের লড়াই না করে উপায় থাকবে না। আর সে লড়াই তোদের বাপুর খাতিরে অহিংস হবে না। কিন্তু আমার বোধহয় বাঁসীর রাণী হওয়া চলবে না। রণ কবে বড়ো হবে, ততদিন কি লড়াই বন্ধ থাকবে?” মিলি গালে হাত দিয়ে বলে।

“এবার রোজা লুকসেমবুর্গ কী বলেন শোনা যাক।” দীপিকাদি বাবলীর দিকে তাকান। বাবলীর কোলে এল্ফ ছিল। তার দিকেও।

এল্ফের মুখে একখানা ক্র্যাকার ধরিয়ে দিয়ে বাবলী বলে, “ও কী, বৌদি, আপনিও পরিহাস শুরু করলেন? কার সঙ্গে কার তুলনা! আমি কি রোজা লুকসেমবুর্গের মতো অসাধারণ মনস্থিনী নারী! তবে আজকের ভারতে আমাদেরও একটা ভূমিকা আছে। আমরাও জনগণের মধ্যে সক্রিয়। দেশ যতদিন না সত্যিকার বিপ্লবের জন্তে তৈরি হয়েছে, বূর্জোয়া বিপ্লবের জন্তে নয়, ততদিন আমরা মার্ক টাইম করব। তার মানে ছোটখাটো সংগ্রামের পায়চারি। এই যেমন তেভাগা আন্দোলন। আমাদের যে-কোনোদিন কলকাতার বাইরে গিয়ে আন্দোলনে নাহতে হবে। গ্রেপ্তার যদি না করে তবে আমার ঠিকানা

অনির্দিষ্ট। এটা ঠিক ইংরেজদের বিরুদ্ধে নয় বলে অনেক কটু কথা শুনতে হবে। মিলি আর জুলি আমাকে দেশদ্রোহীও বলতে পারে। কিন্তু আপনি যেন বিশ্বাস করেন যে আমাদের লক্ষ্য সত্যিকার বিপ্লব।”

## ॥ বারো ॥

পরের দিন বিদায় নেবার সময় মানস বলে স্বপনদাকে, “তোমার বাড়ীতে তোমাকেই আমি কাল যা তা বলে অপমান করেছি। ক্ষমার অযোগ্য অপরাধ। ক্ষমা যদি করো তো নিজ গুণেই করবে।”

“দূর পাগলা! তোমার সঙ্গে আমার যে সম্পর্ক তাতে মান অপমানের প্রশ্নই ওঠে না। তুমি এমন কী বলেছ যে আমার মানহানি হবে? তোমার বৌদি তো বলেন আমি একজন প্রচ্ছন্ন মুসলমান। হা হা হা! হাসব না কঁাদব! আরে বাবা, বাদের সঙ্গে দুশো বছর একসঙ্গে কাটিয়েছি তাদের কি কেবল ঘৃণাই করেছে, ভালোবাসিনি? তারাও কি কেবল ঘৃণাই করেছে, ভালোবাসেনি? তেমনি, বাদের সঙ্গে সাতশো বছর একসঙ্গে কাটিয়েছি তাদের কি কেবল ঘৃণাই করেছে, ভালোবাসিনি? তারাও কি কেবল ঘৃণাই করেছে, ভালোবাসেনি? তুমি আমি রাজনীতির লোক নই, আমরা সাহিত্যিক। অর্ধসত্য নিয়ে আমাদের কারবার নয়। আমরা পূর্ণসত্যের পূজারী। পূর্ণ সত্যটা এই যে ইংরেজদের সঙ্গে আমাদের সম্পর্কটা শুধুমাত্র শাসনিক শাসিতের নয়। কিংবা শুধুমাত্র শোষক শোষিতের নয়। ওরা এদেশ থেকে মহাপ্রস্থান করলেও একই পৃথিবীতেই বাস করবে। ওদের সঙ্গে মিত্র সম্পর্ক আত্মীয় সম্পর্ক বজায় রাখতে হবে। ঘৃণার চেয়ে বলবান হবে প্রেম। প্রেমই ওদের আপন করবে। আপন করবে আমাদেরও। আমি যদি স্বদীর্ঘ অতীতের চেয়ে স্বদীর্ঘতর ভবিষ্যতের কথা ভেবে কাজ করি তবে আমি একজন প্রচ্ছন্ন ইংরেজ হইনে, হই একজন প্রকৃত ভারতীয়। একই কথা খাটে মুসলমানদের বেলাও। ওরাও ভাবগতিক দেখে মহাপ্রস্থানের তালে আছে। কিন্তু আরবে ইরানে মধ্য এশিয়ায় নয়। ভারতেবই একটা ভাগ কেটে নিয়ে সেই ভাগটাকে আস্ত একটা রাষ্ট্রের আকার দিয়ে সেই আঙ্গব স্থানে। যার আনকোরা নাম পাকিস্তান। আদমের পাজরের হাড় থেকে হাওয়ার সৃষ্টি।

খ্রীস্টানরা যাকে বলে ইভ। আমাদের পাঞ্জরের একখানা হাড় কেটে নিলে আমাদের কষ্ট হবে বইকি। আদমেরও হয়েছিল। কিন্তু পরে তার থেকেই তো আসে মধুর রস। এবারেও তাই হবে। ওরাও আমাদের আপন হবে, আমরাও ওদের আপন। কেউ কাউকে ছেড়ে বাঁচতে পারবে না। তবে একটু আধটু ফ্লাট করবে বইকি পরনারী বা পরপুরুষের সঙ্গে। এক যেখানে দুই হয়েছে সেখানেই এই রঙ্গ। আর এইজন্মেই তো স্বাধীনতা। আমরা কেন ধরে নেব যে পাকিস্তান হিন্দুস্থানের চিরশত্রু হবে? না, হিন্দুস্থান নামটা আমি পছন্দ করিনে। ইণ্ডিয়া কী দোষ করল? ভারতের কী দোষ? বিনা দোষে ওদের তালুক দিতে নেই।”

মানস আশ্চর্য হয়। “বাংলাদেশ তা হলে পাকিস্তানে যাচ্ছে! তুমিও যাচ্ছ সেই স্বপ্নে! ভারতের হয়ে কথা বলার এক্সার তো তোমার নয়।”

“না, না, বাংলাদেশ পাকিস্তানে না যেতেও পারে। সে একাই একটা স্বাধীন রাষ্ট্র হতে পারে। এই অপশনটা তাকে দিতে হবে। আমরা বাঙালীরা হচ্ছি ভারতবর্ষের ফরাসী। ফ্রান্স যেমন অবিভাজ্য বাংলাদেশও তেমনি। বিপ্লব আমাদের রক্তে। হিন্দু মুসলমানের লড়াই আমাদের বিপ্লব ভুলিয়ে দেবে। কলকাতা আমাদের প্যারিস। এখানেও যদি ওখানকার মতো ধর্মের জন্মে সেন্ট বার্থলোমিউজ্ ডে ম্যাসাকার হয় তবে সব মাটি। বাংলাদেশও ভাগ হয়ে যাবে।” স্বপনদা অল্প দু’এক কথার পরে বলেন “Au revoir!” পূর্নদর্শনায় চ।

ট্রেনের কামরায় মানসরাচারজন ছাড়া আর কেউ ছিল না। গুছিয়ে বসে যুথিকা স্বপ্নায় মানসকে, “তোমাকে অমন মনমরা দেখাচ্ছে কেন? পূব বাংলায় ফিরতে তুমি চাওনি, তবু যেতে হচ্ছে। এইজন্মেই কি?”

“না, জুঁই। তা নয়। পশ্চিম বাংলার চেয়ে পূব বাংলাই আমি পছন্দ করি। কিন্তু এই ছ’বছরে একটা ব্রেক হয়ে গেছে। জোড় মেলাতে সময় লাগবে। সেসব পরের কথা। যা নিয়ে আমি চিন্তিত তা স্বপনদার সঙ্গেও আমার ব্রেক ঠিক নয়, তবে পায়ে পা মিলছে না।”

“তাই নাকি? ব্যাপার কী?” যুথিকা বিচলিত হয়।

“স্বপনদা হাল ছেড়ে দিয়ে বসে আছেন! যা হবার তা হবেই। কেউ ঠেকাতে পারবে না। আর আমি যদি মনে করি সেটা ভুল পদক্ষেপ আমার তো কর্তব্য সেটা নিবারণ করা। তা না করলে পরের পদক্ষেপগুলোও

ভুল পদক্ষেপ হবে। তখন নিবারণ করা আরো কঠিন হবে। স্বপনদার কী? ঐতিহাসিক নিয়তি বা গ্রীক ট্রাজেডী বলেই তিনি সব সহ্য করবেন। আর আমি ইমপোটেন্ট হয়ে ছটফট করব। আমাদের দুই বন্ধুর সম্পর্কে চিড় ধরেছে, জুঁই।”

“কিন্তু ব্যাপারটা কী? খুলে বলছ না কেন?” যুথিকা কৌতূহলী হয়।

“আহা, ধৈর্য ধরো। ব্যাপারটা সংক্ষেপে এই যে ইংরেজরা চলে গেলে ভারত কি আশু থাকবে, না ভাগ হয়ে যাবে? স্বপনদা ধরে নিয়েছেন যে দেশটা ভাগ হয়ে যাবে, সেটাই নাকি ভারতের নিয়তি। কিন্তু বাংলাদেশের বেলা আরো একটা অপশন আছে। বাংলাদেশ হতে পারে তৃতীয় এক স্বাধীন রাষ্ট্র। কারণ আমরাই এদেশের ফরাসী, ফ্রান্সের মতো বাংলাদেশও অবিভাজ্য। আর বিপ্লব নাকি আমাদের রক্তে। তবে তিনি আশঙ্কা করেন যে কলকাতায় যদি প্যারিসের মতো সেন্ট বার্থলোমিউজ ডে ম্যাসাকার পুনরাবৃত্তি হয় তা হলে বাংলাদেশ ভাগ হয়ে যাবে।” মানস শক্তিত স্বরে বলে।

“বটে? কিন্তু ওই যে কী ডে বললে ওটাতে কী হয়েছিল? আমার ইতিহাসের জ্ঞান তোমার মতো ব্যাপক নয়।” যুথিকা জিজ্ঞাসা।

“ফরাসীদের ইতিহাসে অবিস্মরণীয় রক্তাক্ত দিবস। তারিখটা ১৫৭২ সালের ২৪শে আগস্ট। রাজমাতার প্ররোচনায় রাজার আদেশে সেই রাত্রে যে নিধন পর্ব শুরু হয় তা দিনের পর দিন কয়েকদিন ধরে চলে ও প্যারিসের বাইরেও ছড়িয়ে পড়ে। শত শত প্রটেষ্টান্ট নিহত হয়।” মানস বর্ণনা করে।

যুথিকা শিউরে ওঠে। “ও প্রসঙ্গ থাক। বাচ্চারা এখনো ঘুমে গনি। রাত্রে দুঃস্বপ্ন দেখবে।” সে অল্প প্রসঙ্গ পাড়ে।

“শোন, কাল কেমন মজা হলো। আমরা পাঁচজনে বসে একটা নতুন আবিষ্কার করলুম। খেলাটার নাম কোণঠাসা। পাঁচজনের তিনজন জেল-ফেরতা—বাবলী আর মিলি আর জুলি। বৌদি আর আমি কোণঠাসা। পাঁচজনের তিনজন বিলেতফেরতা—বৌদি আর জুলি আর মিলি। বাবলী আর আমি কোণঠাসা। পাঁচজনের চারজন বিবাহিতা—বৌদি আর মিলি আর জুলি আর আমি। বাবলী কোণঠাসা। পাঁচজনের দু’জন মা হয়েছে—মিলি আর আমি। আমরাই কোণঠাসা। পাঁচজনের একজন দু’বার মা হয়েছে—আমি। আমিই কোণঠাসা। অন্যার্স ভাগ করে নিই বাবলী আর

আমি। এ তোমার দেশভাগ প্রদেশ ভাগের চেয়ে ভালো খেলা।”  
যুথিকা হাসে।

দীপক আর মণি ঘুমিয়ে পড়েছে অহুমান করে যুথিকাই আবার কথাবার্তা  
খেই হাতে নেয়। “তোমরা ভারতবর্ষের ফরাসীও নও, ইংরেজও নও, তোমরা  
ভারতবর্ষের পোল।”

উপরের বার্থ থেকে দীপক বলে ওঠে, “নর্থ পোল না সাউথ পোল?”

“না, বাবা। পোল মানে এখানে পোলাণ্ডের লোক। যেমন মাদাম  
কুরী। যেমন শোপ্যা।” যুথিকা তার পিয়ানোয় শোপ্যা বাজিয়ে শুনিয়েছে।

“মাদাম কুরী তো রেডিয়াম আবিষ্কার করেছিলেন। আমিও ভাবছি  
সেই রকম একটা কিছু আবিষ্কার করব।” দীপক ইতিমধ্যেই ভাবুক হয়েছে।

“আগে তো বড়ো হও, তার পরে গুণ্ডা ভাববে।” যুথিকা আশ্বাস দেয়।

“ততদিনে সবাই সব কিছু আবিষ্কার করে থাকবে। আমার জন্মে কিছু  
বাকী থাকলে তো?” দীপক শুষ্ক কণ্ঠে বলে।

মানস তা শুনে গুরুদেবের কবিতা আওড়ায়, “ভয় নাই, ওরে ভয় নাই,  
কিছু নাই তোর ভাবনা। নিঃশেষ হয়ে যাবি যবে তুই ফাগুন তখনো  
যাবে না।”

দীপক ঠাণ্ডা হলে যুথিকা আবার খেই ধরে, “তোমাদের মধ্যে রবীন্দ্র  
অরবিন্দ, জগদীশ, অবনীন্দ্র হয়েছেন। পোলদের চেয়ে তোমরা কিসে কম?  
কিন্তু তাদের মতোই তোমরা আত্মকলহে জর্জর, তেমনি বিপ্লবপ্রেমিক। তাই  
তেমনি ভাগ্যহত। ওরা তেভাগা হয়ে যায়, ওদের দেশ ভাগ করে নেয়  
রাশিয়া, প্রাসিয়া আর অস্ট্রিয়া। আর তোমরা তো পলাশীতে যে রেকর্ড  
দেখালে সেটা বিশ্ব রেকর্ড। একমুঠো ইংরেজের হাতে হেরে গিয়ে তিন তিনটে  
প্রদেশ হারালে। সেটাও একরকম তেভাগা। পোলরা প্রায় দেড়শো বছর  
পরাদীন হয়ে কাটিয়ে দিল। তোমরাও তো দেড়শো বছর কাটালে, আর  
কদিন কাটাও কে জানে! স্বাধীন হলেও যে অবিভক্ত হবে তাও নয়। কেউ  
কেউ এখন থেকেই লর্ড কার্জনের সিদ্ধান্তে ফিরে যাবার কথা ভাবছেন। কিন্তু  
যতই চেষ্টা করো ভারতের রাষ্ট্রধানী আর কলকাতায় ফিরবে না। যতদিন  
তোমরা ভারতের রাষ্ট্রধানীর লোক ছিলে ততদিন রাজনীতিক্ষেত্রেও তোমাদের  
নেতৃত্ব ছিল। সে নেতৃত্ব তোমরা বরাবরের মতো হারিয়েছ। একজন  
দেশবন্ধু কি একজন নেতাজী সেই শূন্যস্থান পূরণ করতে পারেন না।”

মানস ঠেস দিয়ে বলে, “তুমি তো প্রায় আজন্ম দিল্লীওয়ালী। তোমার নিজের তো আমাদের মতো অবনতি বা অধোগতি হয়নি।”

‘ব্যক্তিগত প্রসঙ্গে আমি আসতে চাইনি, তুমি যখন কথাটা তুলেছ তখন শোন। দিল্লীতে বদলীর বছর এগারো বারো পর্যন্ত বড়লাটের দিল্লীর বা সিমলার বাড়ীতে যখন বড়গোছের পাটি হয়েছে আমার বাবাকেই তার তত্ত্বাবধান করতে হয়েছে। আর আমাকেও তিনি সেখানে সঙ্গে করে নিয়ে গেছেন। সেই স্মৃতি বহু সাহেব মেম ও বিশিষ্ট ভারতীয় অতিথির সঙ্গে পরিচয় হয়েছে। বার বার দেখাসাক্ষাতের ফলে আলাপও হয়েছে। বার বার আলাপের ফলে ঘনিষ্ঠতাও হয়েছে। এখনো ষাঁরা বেঁচে আছেন তাঁদের মধ্যে অগ্রগণ্য মিস্টার জিনা।’

উপর থেকে দীপক বলে ওঠে, “জিনা।”

“না, বাবা। জিনা। সাহেবী উচ্চারণ। তুমি এখনো জেগে। যাও, ঘুমাবুর দেশে যাও। ওখানে খুব মজা।”

মানস উৎকর্ণ হয়ে শুনছিল। আরো শুনতে চায়। যুথিকা শোনায়। “জিনার মধ্যে যে আত্মসম্মানবোধ দেখেছি তা আর কারো মধ্যে নয়। সাহেবদের সঙ্গে তিনি সমানে সাহেব। কারো চেয়ে খাটো নন। বড়লাটের সঙ্গে তিনিও বড়লাট। নজরুলের ভাষায় বলতে হয়, চির উন্নত মম শির। শির নেহারি আমারি নতশির ওই শিখর হিমাদ্রির। দেখে আনন্দ হয় যে সরকারী বা আধা-সরকারী মহলে এমন একজন ইণ্ডিয়ান আছেন ষাঁকে লাট বেলাটরাও সমীহ করেন। গোথলেকে যখন প্রথম দেখি তখন আমার বয়স পাঁচ ছয়। আবছা মনে পড়ে। সাহেব নন, দুর্ধ্ব স্বদেশী। জিনার বৈশিষ্ট্য হলো তিনি সাহেব হয়েও দুর্ধ্ব। তাঁর চেয়ে আমার আরো ভালো লাগত মিসেস জিনাকে। তিনি কিন্তু মেমসাহেব ছিলেন না, ছিলেন আক্রমণশীল ব্যতীর। বড়লাটকে দিয়ে নমস্কার করিয়ে নেন। বলেছি সে কাহিনী। যে কথা বলিনি তা শোন। আমাকে দেখে তিনি এত খুশি হয়েছিলেন যে বাবাকে জিজ্ঞাসা করেন, হওর ডটার? বাবা বলেন, ইয়েস, মি লেডী। মাই ওনলি ডটার। ষাঁদের স্বামীরা লর্ড বা নাইট নন তেমন কোনো মহিলাকেই বাবা মি লেডী বলতেন না। মিসেস জিনাই একমাত্র ব্যতিক্রম। বাবার বোধহয় বিশ্বাস ছিল যে মিস্টার জিনা শীগগিরই নাইট হতে যাচ্ছেন। ঠিক জানিনে, তবে জিনাকে বার বার অতি উচ্চ পদ বা সম্মান অফার করা



হয়েছিল। তিনি গ্রাহ্য করেননি। সেটা কিন্তু তিনি অসহযোগী বলে নয়। তাঁর নীতি ছিল আমি আপনারে ছাড়া কারেও করি না কুর্নিশ। সম্রাট বা তাঁর প্রতিনিধির হাত থেকে কিছু নিলে তো নত হতে হয়। যাক, মিসেস জিনার কথাই হোক। সেদিন তিনি আমাকে দেখে বলেন, আমারও যদি এইরকম একটি মেয়ে হতো। ঈশ্বর বোধ হয় আড়ি পেতে শোনেন। তাঁর মনস্কামনা পূর্ণ করেন।”

উপর থেকে আওয়াজ আসে, “তোমার মতো একটি মেয়ে হয়?”

“দুই ছেলে! এখনো তুমি ঘুমবাবুর দেশে যাওনি।” মিষ্টি করে ধমক দেন তার মা। তার পর বলেন, “আহা বেচারি রতনপ্রিয়া! অকালে মারা যান। জিনার পারিবারিক জীবনে আর কী বাকী রইল? ওই কন্যাই তাঁর নয়নের মণি। তাঁর জন্তে আমি বেদনা বোধ করি। কিন্তু বুঝতে পারিনে হাসব না কাঁদব যখন শুনি যে তাঁর কন্যা তাঁকে না জানিয়ে বিয়ে করে চলে গেছে বিলেত। বর সার নেস্ট ওয়াড্ডিয়ার ছেলে নেভিল। নেভিল কিন্তু ডেভিল নয়। সে তাঁর ধনকুবের পিতার উত্তরাধিকারী হলে কী হবে, মুসলমান নয়, পার্শী খ্রিস্টান। বলা বাহুল্য, জিনার মাও ছিলেন পার্শী। রক্তেরও তো একটা টান আছে। আর বিয়ের বয়স হয়ে থাকলে মেয়ের কি স্বাধীন ইচ্ছা বলে কিছু নেই? জিনাকে বোঝায় কে? আগুন হয়ে বাপ বায়ে বায়ে দিলেন অভিষাপ। অবিকল আমার বাবার মতো। ভুলে গেলেন যে নিজেরও তিনি রতনপ্রিয়াকে সার জাহাঙ্গীর পেতিতের অমতে বিয়ে করে নজীর রেখেছিলেন। সেইদিনই আমি প্রথম উপলব্ধি করি যে জিনা আর সেই সেকুলার ইণ্ডিয়ান বা প্রায় ইউরোপীয়ান নন, নেতা হতে গিয়ে তিনিও হয়ে উঠেছেন গোঁড়া মুসলমান। সেই জিনা কখনো দেশভাগের কথা কল্পনাও করতেন না। এই জিনা শাইলকের মতো ছুরি আফালন করছেন। এক পাউণ্ড মাংস কেটে নেবেন। যেমন দৃঢ়প্রতিজ্ঞ পুরুষ, তাঁর দাবী তিনি আদায় করে নেবেনই।” যুথিকা হুনিশ্চিত।

মানস আত্মগত ভাবে বলে, “তা হলে বাপু আর প্রাণে বাঁচবেন না। অনশনে দেহত্যাগ করবেন। তাতে যদি লীগপন্থীদের অন্তঃপরিবর্তন হয়।”

“বর্ণাঙ্ক ইংরেজ আর ধর্মাক্ষ মুসলমান একই ধাতুতে গড়া। সে ধাতু ইম্পাত। তাদের অন্তঃপরিবর্তন ঘটানো মহাশ্রম সাধ্য নয়। গতবারের অনশনে তো লক্ষ করলে। লর্ড লিনলিথগোর বা মিস্টার জিনার কি বিন্দুমান্ত

সহায়ত্ব প্রকাশ গেলো। তাঁরা সম্পূর্ণ নির্বিকার ও নির্মম। জিনা তাঁর সমস্ত শক্তি সঞ্চয় করে রেখেছেন, বার বার জেলে গিয়ে অপচয় করেননি। কংগ্রেস নেতারা যেমন করেছেন। এঁরা শাস্ত ক্রান্ত নিঃশেষিত। তিনি একদম তাজা। বড়লাট যদি তাঁর দিকে ঝাঁকেন তা হলে কি আর রক্ষে আছে? একমাত্র ভরসা অ্যাটর্নী। কিন্তু তাঁর বিপরীত দিকে চাটিলও তো বিঘ্নমান। ব্যাপারটা এমনভাবে জট পাকিয়ে রয়েছে যে হাত দিয়ে জট খুলতে পারা যাবে না। কাঁচি দিয়ে কাটতেই হবে; তার মানে পাটিশন। তা বলে শুধুমাত্র ভারতের নয়। লীগপন্থীদের সমঝিয়ে দিতে হবে যে পাকিস্তানের তথা বাংলারও। তাতে যদি তাঁদের অন্তঃপরিবর্তন হয়। তবে ইংরেজকে তাড়াতেই হবে। যত নষ্টের গোড়া ওদেরই ডিভাইড অ্যাণ্ড কল পলিসি। তার থেকেই এসেছে জিনার ডিভাইড অ্যাণ্ড কুইট।” মুখিকা নিদ্রার উত্তোগ করে।

“তা হলে জিন্নাকেই দিল্লীর মসনদে বসিয়ে দিয়ে বড়লাট বিদায় হোন। এই একমাত্র সমাধান। আমরা বুঁকি নেব।” ইতি মানস।

“মরি মরি কী চমৎকার সমাধান! মুসলিম শাসনের পর ব্রিটিশ শাসন, ব্রিটিশ শাসনের পর ফের মুসলিম শাসন, ভারতের ভাগ্যে যেন আর কোনো বিকল্প নেই। কিন্তু শিখ বলে এখনো একটা সম্প্রদায় রয়েছে। শিখেরা যখন ক্ষেপে গিয়ে যুদ্ধুটুদু বাঁধিয়ে দেবে তখনই হবে সমস্ত তর্কের অবসান।” ইতি মুখিকা।

সকালবেলা স্ত্রীমারযাত্রা। দীপককে তার নতুন জ্যাঠাইমা একজোড়া বাইনোকুলার কিনে দিয়েছেন, তাই চোখে লাগিয়ে সে নদীর হুঁধারের গ্রামে গঞ্জে কত কী আবিষ্কার করছে। আর মণিকাকে তিনি কিনে দিয়েছেন একটা মিহি নীল শাড়ী। তাই পরে সে ফুর ফুর করে পরীর মতো উড়ে বেড়াচ্ছে। ডেকের উপর পাঁয়চারি করতে করতে তাদের মা তাদের হুঁজুরের উপর দুই চোখ রেখেছেন।

ওদিকে মানস জমে গেছে সহযাত্রী এক মুসলিম অফিসারের সঙ্গে। তিনি নানা স্থানে টুর করে বেড়াচ্ছেন। মানসের চেয়ে সিনিয়র, কিন্তু অল্প সার্ভিসের। তাঁর কাছে মানস শুনছে, “মক্কেস্বলে আজকাল ইউরোপীয় অফিসার আপনি বিশেষ দেখতে পাবেন না। একধার থেকে বদলী হয়ে চলে যাচ্ছেন কলকাতায়। যাদের জায়গায় যাচ্ছেন তাঁরা যাচ্ছেন দিল্লী। নিত্য

নতুন পদ সৃষ্টি হচ্ছে তাঁদের খাতিরে। এর পেছনে কী বে রহস্য তা আপনার হয়তো জানা আছে, আমার অজানা। একজন ইনটেলিজেন্স অফিসারের কাছে গোপনে একটা ক্লু পেয়েছি। সাহেবরা আশঙ্কা করছেন যে সিপাহী বিদ্রোহের মতো একটা কিছু ধোঁয়াচ্ছে। আমরা টের পাচ্ছি, ওঁরা পাচ্ছেন। যেখানে যত ইংরেজ আছে এক রাড্রেই সব ক’টাকে নিকেশ করবে। সবই তো আছে ছড়িয়ে ছিটিয়ে। কে কাকে রক্ষা করবে? তাই শাবধানের মার নেই। দিল্লী, কলকাতা, বম্বের মতো বড়ো বড়ো শহরে ওরা র্যালি করছে। হয় প্লেন ধরবে, নয় জাহাজ ধরবে। যারা পালাবার সুযোগ পাবে না তারা দলবদ্ধ হয়ে লড়বে। তার আগে ক্ষমতা হস্তান্তরের জন্তে কথাবার্তা চালিয়ে যাবে, দেশবাসীদের আশায় আশায় রাখবে।”

মানস বিস্মিত হয়। “না, আমি তেমন কোন ক্লু পাইনি। তবে আমিও খবর পেয়েছি যে ইংরেজরা পেনসন ও ক্ষতিপূরণের হিসেব কষছে। এর থেকে অনুমান হয় কেন্দ্রে একটা রদবদল হতে যাচ্ছে, নতুন সরকার পুরনো সরকারের দায়দায়িত্ব হাতে তুলে নেবেন। ক্ষমতার হস্তান্তর মানে দায়িত্বের হস্তান্তর, দায়ের হস্তান্তর। তাই যদি হয় তবে ক্ষমতা কেড়ে নেবার জন্তে বিদ্রোহ কেন? আর তার আশঙ্কায় বড়ো বড়ো শহরে র্যালি করা কেন? যারা আপনি যাচ্ছে তাদের তাড়াতে গেলে তারাও তো ঘুরে দাঁড়াতে পারে, আত্মরক্ষার জন্তে, আত্মসম্মানের জন্তে। বিদ্রোহীরা কি মনে করে ইংরেজরা এত দুর্বল হয়ে পড়েছে যে গায়ের জোরে লাল কেল্লা বা মসনদ দখল করা অতি সহজ।”

“ঠিকই বলেছেন। তবে এটাও ঠিক যে বহু লোকের হাতে বন্দুক, রিভলভার, স্টেনগান ইত্যাদি কী জানি কেমন করে এসেছে। বহু লোক যুদ্ধবিগ্রহের তালিমও পেয়েছে। তাদের ধারণা জন্মেছে তারা না জানি কত বলবান। আগামী জুলাই কি আগস্টে ঘটতে পারে একটা রাইজিং। যেমন আগারল্যাণ্ডের স্ট্রীটার রাইজিং। সে রকম একটা সম্ভাবনার বিরুদ্ধে প্রস্তুতির অঙ্ক হিসেবে সরকার এখন নানা জায়গায় নতুন নতুন জেলখানা তৈরি করে রাখছেন। কিংবা পুরনো জেলখানার নতুন ওয়ার্ড। বিদ্রোহের ঝাঁচ পেলেই সন্দেহভাজন ব্যক্তিদের ফাঁটকে পুরবেন।” ভদ্রলোক ফিস্ ফিস্ করে বলেন।

“তার মানে ইংরেজরা ডানকারের মতো দৌড় দেবে না। আক্রমণের সম্মুখীন হবে। কিন্তু মানে মানে ক্ষমতার হস্তান্তর যদি হয়ে যায় তার কোনো

দরকার হবে না, খান সাহেব। তবে আমি ভাবছি ক্ষমতার হস্তান্তরে পাকিস্তানের দাবী নিয়ে মুসলিম লীগ বাদ সাধবে না তো? জানিনি আপনি লীগপন্থী কি-না। হয়ে থাকলে মাফ করবেন।” মানস জ্বিত কাটে।

“আজকাল মুসলিম অফিসারদের মধ্যে লীগপন্থী নন কজন? এখন কি কংগ্রেসের বা কৃষক প্রজাপন্থীদের তেমন প্রভাব আছে? মহাত্মা গান্ধীর উপরেও তেমন ভক্তি নেই। এখন কায়দে আজমের উপরে অগাধ বিশ্বাস। আর পাকিস্তান তো মুসলমানদের কাছে খেলাফতের পরিবর্ত। এতে তাদের ধর্মীয় ইমোশন পরিতৃপ্ত হয়। এটা যুক্তিতর্কের ব্যাপার নয়। কংগ্রেসের পক্ষে যুক্তিতর্কের কমতি নেই, কিন্তু ধর্মীয় ইমোশন কোথায়? কেন আমরা ভারতরাষ্ট্রে চিরস্থায়ী মাইনরিটি হব, যদি পাকিস্তান রাষ্ট্রে চিরস্থায়ী মেজরিটি হতে পারি? ভারতমাতা বলতে আপনারা যেমন ভাবাবেগে আণ্ডুত হন আমরা তেমন হইনে। তা ছাড়া আরো একটা জিনিস আছে যেটা আবেগের পর্যায়ে পড়ে না, গণনার পর্যায়ে পড়ে। ইংরেজরা সরে গেলে যত উচ্চতর পদ খালি হবে সব আপনাদের ভাগ্যেই জুটবে, কেননা আপনারা মিনিয়র। আমরা চাই আমাদের ভাগেও পড়ুক। যদিও আমরা জুনিয়র। পাকিস্তান হলে আমরা চোখ বুজে তিনভাগের এক ভাগ পাই। মিলিটারিতে আরো বেশী। এককথায় বলতে পারি, স্বাধীনতা বলতে আপনারা বোবোন ইংরেজের অধীনতা থেকে মুক্তি আন আমরা বুঝি হিন্দু মেজরিটির গ্রাস থেকে মুক্তি। এর জন্তে আলাদা একটা মুক্তিযুদ্ধের প্রয়োজন নেই। ইংরেজরা যাবার সময় ভাগ বাঁটোয়্যারা করে দিয়ে যেতে পারে। চাই শুধু কংগ্রেসের সম্মতি।” খান সাহেব নিবেদন করেন।

মানস দুঃখিত হয়ে বলে, “আপনারা যদি ভারতীয় হতে না পারেন আমরাও পাকিস্তানী হতে পারব না। কংগ্রেস কী করে সম্মতি দেবে?”

খান সাহেব মুখ ফিরিয়ে একটু হাসেন। তারপর বলেন, “কংগ্রেস কী করবে তার নজীর আমরা দেখেছি। সেই নজীর থেকে বলতে পারি কংগ্রেসের নীতি হচ্ছে ‘না গ্রহণ ও না বর্জন’। কার্যত গ্রহণ। পার্টিশন সে গ্রহণও করবে না, বর্জনও করবে না। কার্যত গ্রহণ করবে। তামাম বাংলাদেশ হবে পাকিস্তানের সামিল। আপনার যদি পাকিস্তানে থাকতে আপত্তি থাকে আপনি হিন্দুস্থানে বদলী হয়ে যাবেন। আপনার এমন কী হানি হবে?”

মানস বিশ্বাস করে না যে কংগ্রেস এমন কিছু করবে। কিন্তু ইংরেজদের

হাত থেকে ক্ষমতা নেবার সময় যে দরাদরিটা হবে সেটা যে পার্টিশনের ভিত্তিতে হবে না তা কি সে জোর করে বলতে পারে? আর পার্টিশনের ভিত্তিতে যদি হয় তবে প্রদেশও ভাগ হয়ে যেতে পারে।

“হিন্দু মুসলমান যদি দুই নেশন হয়ে থাকে তা হলে বাংলাদেশও দুই নেশনের মধ্যে ভাগ হয়ে যেতে পারে, খান সাহেব। তামাম বাংলাদেশ কি শুধুমাত্র মুসলমানদের হোমল্যান্ড? হিন্দুদেরও নয়? বাঙালী হিন্দুদের হোমল্যান্ড তা হলে কোন্‌খানে? আমার মতো কয়েকজন অফিসার অল্প প্রদেশে বদলী হয়ে যেতে পারেন, কিন্তু বাঙালী হিন্দুরা ঝাড়ে মূলে বদলী হতে পারে না। তেমন ব্যাপার যদি ঘটে তবে সমানসংখ্যক মুসলমানও উত্তর ভারত থেকে ঝাড়ে মূলে বদলী হয়ে আসবে। তাতে বাঙালী মুসলমানের আখেরে লাভ হবে না ক্ষতি হবে?” মানস ভদ্রলোককে ভাবনায় ফেলে।

তিনি হাওয়া হয়ে যান।

যুথিকা এসে সুধায়, “ওই অচেনা অজানা মানুষটির সঙ্গে কী এত কথাবার্তা হচ্ছিল? তোমার যা স্বভাব। সবাইকে বিশ্বাস করে পেটের কথা বলবে। আমার তো সন্দেহ উনি গোয়েন্দা বিভাগের কেউকেটা।”

মানস অপ্রতিভ হয়ে বলে, “হতেও পারেন। কিন্তু আমিও এমন কিছু ফাঁস করিনি যা খুবই গোপনীয়।”

এর পরে স্ট্রিমার থেকে ট্রেন। ঘণ্টাখানেক পরে ট্রেন থেকে মোটর। মোটর থেকে জঙ্গ কুঠি। বালি খালি করে দিয়ে গেছেন। একদিন বিশ্রামের পর জঙ্গ কোটে গিয়ে মানস চার্জ নেয় ও কাজকর্মের মধ্যে ডুবে যায়।

রাত্রে শুতে যাবার সময় একটা কথা তার মনে পড়ে যায়। যুথিকাকে শোনায়। “ওই লোকটির দেওয়া খবর যদি নির্ভরযোগ্য হয় তবে এই বছর জুলাই কি আগস্ট মাসে একটা রাইজিং প্রত্যাশা করা যায়। আয়ারল্যান্ডের যেমন ইস্টার রাইজিং।”

“ওমা! তাই নাকি?” যুথিকা চমকে ওঠে।

“তখন থেকেই আমি ভাবছি এর পেছনে কে থাকতে পারে? তুমি অনুমান করতে পারো?” মানস চোখ টেপে।

“কে? স্বভাষচন্দ্র?” যুথিকা আন্দাজে বলে।

“স্বভাষচন্দ্র এখন কোথায় কে জানে? ধরা পড়লে ওয়ার ক্রিমিনালস ট্রায়াল। আমার সন্দেহ আরেকজনকে।” মানস রহস্যটাকে ঘোরালো করে।

“বলো না গো, কে ?” যুথিকার সবুর সয় না।

“জুলির বাস্কাবী মিলি। মধুমালতী মুস্তাকী। ও যে বিলেত থেকে এসেছে সেটা এই উদ্দেশ্য নিয়ে।” মানস সন্দেহ করে।

“মধুমালতী দত্তবিশ্বাস।” যুথিকা সংশোধন করে। “কিন্তু তোমায় সন্দেহটা অহেতুক। মিলি মা হয়েছে। অমন অ্যাডভেঞ্চার করবে না।”

এর মাসখানেক বাদে বোম্বাইতে রয়াল ইণ্ডিয়ান নেভীতে মিউটিনি। মানস খবরটা শুনে যুথিকাকে বলে, “হাঁউ মঁাউ খাঁউ। মিলির গন্ধ পাউ।”

যুথিকা বলে, “তুমি ভুল ঠাউরেছ। মিলি নয়, অশোকা।”

“মিলি খুব সম্ভব অশোকার দলেই ভিড়েছে। তুমি কলকাতায় বৌদিকে চিঠি লিখে মিলির খোঁজ নাও।” মানস পরামর্শ দেয়।

বৌদি উত্তর দেন, “মিলির দাদা বোম্বাইতে থাকেন। মহারাষ্ট্রকন্ঠা বিয়ে করেছেন। একটি বাচ্চাও হয়েছে। মিলি দেখা করতে গেছে।”

মানস বলে, “আমি ঠিকই অনুমান করেছিলুম সে এখন বোম্বাইতে। বাকীটা তর্কসাপেক্ষ।”

কিছুদিন পরে স্কুয়ারের চিঠি। সে তার বৌ আর ছেলেকে সঙ্গে নিয়ে বিলেত যাচ্ছে। এবার জাহাজে। ইতিমধ্যে একটা কাঁড়া কেটে গেছে। মিলি কী জানি কেমন করে মিউটিনির সঙ্গে জড়িয়ে পড়ে। পুলিশ তাকে ধরে নিয়ে আটক করে। স্কুয়ার তখন দিল্লীতে। বোম্বাই থেকে মিলির দাদার ট্রাঙ্ক কল পেয়ে বোম্বাই ছুটে যায় ও সরাসরি গভর্নরের সঙ্গে সাক্ষাৎ করে। মিলি যুদ্ধের সময় ইংলণ্ডে ছিল ও নানা ভাবে সাহায্য করেছিল। লাট সাহেব তাকে ছেড়ে দেন ও ডেকে পাঠান। বলেন, “অবোধ বালিকা, এই নেভী আমরা সঙ্গে করে নিয়ে যাব না, তোমাদের হাতেই দিয়ে যাব। তখন তোমরা একে শাসন করবে কী করে, যদি এই রেটিংদের অবাধ্য হতে শেখাৎ? আমি বা নেভী বা পুলিশ ট্রেড ইউনিয়ন নয়। এরা যদি অবাধ্য হয় তবে সর্বনাশ।”

“ঠিকই তো।” মানস বলে, ‘সিপাইদের যাবা বিদ্রোহী হতে শেখায় তারা পরে আর তাদের শাসন করতে পারে না। সেই বিদ্রোহীরাই পরে হয় শাসক। মিলিটারি ডিক্টেটরশিপ অমানি করেই কায়েম হয়। ব্রিটিশ শাসনের পরিবর্তে মিলিটারি ডিক্টেটরশিপ কি কারো কাম্য? যাক, মিলি ফিরে গিয়ে ভালোই করেছে।”

“ভালো ওর সংসারের দিক থেকেও। স্বামী এক দেশে, স্ত্রী আরেক

দেশে, ছেলে যে কার কাছে তাও অনিশ্চিত। ওরা ছাড়াছাড়ির অভিমুখেই যাচ্ছিল। ইয়া, ফাঁড়া কেটে গেছে।” যুথিকা স্বস্তির নিঃশ্বাস ফেলে।

“আমি অতটা জানতুম না।” মানস বলে।

“তুমি কতটাই বা জানো? মিলি বেশীদিন এদেশে থাকলে ওর নিজের ঘর তো ভেঙে যেতই, জুলির ঘরও ভেঙে দিত। সৌম্যদাকে ও ভুলতে পারেনি। ওর দৃঢ় ধারণা সৌম্যদা ওরই হতো, যদি না জুলি আর সুকুমার হঠাৎ কোনখান থেকে এসে হাজির হতো। মাহুঘের ভাগ্য অমনি করেই উলটো পালটা হয়ে যায়। কিন্তু একবার অদল বদল হয়ে গেলে পরে আর জোড় মেলানো যায় না। সৌম্যদার সঙ্গে মিলির ও সুকুমারের সঙ্গে জুলির আর কোনোদিনই মিলন হবার নয়। জুলির দুর্বুদ্ধি হবে না, মিলির সুবুদ্ধি হলেই বাঁচি। বেশ বোঝা যায় মেয়েটা অবোধ নয়, অসুখী।” যুথিকা দীর্ঘনিঃশ্বাস ছাড়ে।

“মিলিও ভালো, জুলিও ভালো, বাবলীও ভালো, দীপিকাও ভালো, কিন্তু সবাই চাইতে ভালো যে আমার ঘরের আলো—জুঁই।” মানস ওকে বার বার চুমু খায়।

## ॥ তেরো ॥

এই স্টেশনে মানসের একমাত্র চেনা অভিসার রমণীরঞ্জন নাগ। ন'বছর আগে অগ্নিত্র যিনি পুলিশ সুপারিনটেন্ডেন্ট ছিলেন এখন তিনি এখানকার অ্যাডিশনাল এস. পি.। এ কেমন কথা?

এর উত্তরে তিনি বলেন, “বাঙালীকে বাঙালী না মারিলে কে মারিবে? নাম করব না, আপনারই সাভিসের এক জেলা ম্যাজিস্ট্রেট আমার নামে কনফিডেনশিয়াল রিপোর্ট দেন, নাগ ইজ আ গুড দারোগা, বাট আ উইক পুলিশম্যান। শুধুন কথা! আমি রোজ স্যাণ্ডো করি, আমার ওজন একশো আশি পাউণ্ড। আমি কিনা উইক পুলিশম্যান!” এই বলে মাসল ফোলান।

অন্তরঙ্গ মহলে সুপারিনটেন্ডেন্ট অফ পুলিশকে বলা হয় ‘জু পুলিশম্যান’। সেই পদে নিযুক্ত হয়ে কেউ যদি কোনো একটি পরিস্থিতিতে দুর্বলতা দেখান

তবে তাঁকে 'উইক' বলে অভিহিত করা ঐ শব্দটার অপপ্রয়োগ নয়। মানস তার সিনিয়রের পক্ষ নিতে পারত, কিন্তু নেয় না। বলে, “আমাদের এই জেলা ক্রাইমের দিক থেকে সর্বপ্রধান দুই জেলার অন্যতম। এখানে একজন ভালো তদন্তকারী অফিসারের দরকার। তিনি হিন্দু হলে আরো ভালো, কারণ হিন্দুরা এখানে সংখ্যালঘু। সুতরাং নার্ভাস।”

“নার্ভাস যদি বলেন ইউরোপীয়ানরা এখন আরো নার্ভাস। বার্লো আপনার পূর্ববর্তী, তিনি কলকাতা বদলী হয়ে গেছেন। হামিলটন আমার বস, তিনিও গুনছি দিল্লী যাচ্ছেন। ইউরোপীয়ান বলতে একজনও থাকবেন না। অথচ ওঁদের পক্ষে এটা ছিল একটা প্রাইজ স্টেশন। কালে কালে কী না হয়! আপনার কি মনে আছে? আপনি যখন ডি. এম. ছিলেন আর আমি এস. পি. তখন আপনাকে আমি একবার গোপনীয় র‍্যালিং পয়েন্ট প্ল্যান দেখিয়েছিলুম! সিপাহী বিদ্রোহের পর থেকে সে রকম একটা প্ল্যান প্রত্যেক জেলাতেই রয়েছে। মিউটিনির গুয়ারলেন্স মেসেজ পাওয়ামাত্র জেলার যেখানে যত ইউরোপীয়ান ও উচ্চপদস্থ ইণ্ডিয়ান আছেন তাঁদের সবাইকে রাতারাতি খবর দিয়ে পূর্বনির্দিষ্ট একটা স্থানে জড়ো করতে হবে। সেখানেই তাঁরা পুলিশের হেফাজতে থাকবেন। পুলিশ তাঁদের রক্ষা করবে। বিচ্ছিন্নভাবে থাকলে নির্ধাত মৃত্যু। সেখানেও যদি তাঁদের বাঁচানো অসম্ভব হয় তবে তাঁদের মিলিটারি প্রোটেকশন দিয়ে বৃহত্তর র‍্যালিং পয়েন্টে পাঠাতে হবে। অবশ্য সব চেয়ে বুদ্ধিমানের কাজ হবে মিউটিনির সম্ভাবনা আঁচতে পেরে আগে ভাগেই মহিলা ও শিশুদের বিলেত পাঠিয়ে দেওয়া। আর নিজেরাও কলকাতা বা দিল্লীতে বদলী হয়ে সেখানেই দালালীর সময় র‍্যালি করা। কিন্তু আমি ভাবছি এসব তো হলো ইউরোপীয়ানদের বেলা আপংকালীন ব্যবস্থা, আমাদের মতো উচ্চপদস্থ ইণ্ডিয়ানদের বেলা কী হবে?” নাগ উদ্বেগের সঙ্গে স্বধান।

“কেন, আপনি কি আশঙ্কা করছেন আরেকটা মিউটিনি আসন্ন? কই, কাগজে তো কোথাও তার আভাস নেই।” মানস যতদূর জানে।

‘প্যানিকের ভয়ে ওরা জানলেও জানাবে না। দেশের অবস্থা এখন অগ্নিগর্ভ। আমরা একটা আগ্নেয়গিরির শিখরে বসে আছি। বামপন্থীরা এর সুযোগ নিয়ে মিউটিনি বাধাবার ফিকিরে আছে। আর লীগপন্থী মুসলমানরা দাঙ্গা বাধাবার।’ নাগ উত্তর দেন।



দেশের অবস্থা যে অগ্নিগর্ভ এটা আরো একজনের মুখেও মানস শোনে। তিনি নিয়মিত ক্লাবে আসেন, টেনিসের পার্টনার হন। দেবাদিদেব গুহ। কেমব্রিজের স্নাংলার। না কলকাতা বিশ্ববিদ্যালয়, না ঢাকা বিশ্ববিদ্যালয়, না বাংলাদেশের সরকার কেউ তাঁকে তাঁর উপযুক্ত পদ দেননি। তাই তিনি অভিমান করে বাড়ীতে বসে আছেন। কবে ডাক আসবে সেই আশায়। বয়স বাড়তে বাড়তে পঞ্চাশের কাছাকাছি। অবলম্বন শৈল্পিক জমিদারি। বিয়ে করেছিলেন, স্ত্রী মারা গেছেন, সন্তানাদি নেই। ঝাড়া হাত পা। থাকেন ইঙ্গবঙ্গ স্টাইলে। খেলার জন্তে ক্লাবে আসেন। টেনিসের অভ্যাস রেখেছেন। উত্তম স্বাস্থ্য। তাঁর শখ হচ্ছে যত রাজ্যের বই কাগজ কেনা ও পড়া। বিচার জাহাজ। কখনো কোনো রেফারেন্সের প্রয়োজন হলে কলেজের অধ্যাপকরাও তাঁর দ্বারস্থ হন। জজ ম্যাজিস্ট্রেটরাও বাদ যান না। কী ইউরোপীয়ান, কী ইণ্ডিয়ান। পরিসংখ্যান তাঁর নখদর্পণে। অত আধুনিক লাইব্রেরী এখানে আর কারো নেই।

মানস নতুন বইয়ের সন্ধানে তাঁর লাইব্রেরীতে যায়। তিনি খুশি হয়ে বই দেখান। বলেন, “আপনি সর্বদাই স্বাগত। মনে করুন এটা আপনারই লাইব্রেরী।”

বলা বাহুল্য তিনিও আসেন মানসের কুঠিতে। যুথিকার সঙ্গে আলাপ হয়। পিয়ানো শুনতে চান। বাজালে শোনেন।

“ইউরোপ থেকে চলে এসেছি কবে! তবু তো ইংরেজ ছিল, তাই ওখানকার জীবনধারার সঙ্গে যোগসূত্র ছিল। ওরাও তো শুনছি ষাবার মুখে। দেশের অবস্থা অগ্নিগর্ভ। ভারতে সবশুদ্ধ নব্বই হাজার ইউরোপীয় আছে। শতকরা একজনও নয়। সময় থাকতে যদি না পালায় তো আগুনে পুড়ে মরবে। তবে ওরা যেমন তুখোড় পলিটিসিয়ান ভারতীয়দের লেলিয়ে দেবে ভারতীয়দের গায়ে আর নিজেরা সালিশী করবে। বাধাবেও ওরা, মেটাবেও ওরা। আর লড়ে মরবে হিন্দু মুসলমান শিখ।” গুহ অহুমান করেন।

“গান্ধীজী থাকতে লড়াইই বা বাধবে কেন, বাধলে তিনিই বা থামাতে পারবেন না কেন? সালিশী যদি করতে হয় পার্শ্বীরা করবে। কিন্তু ইংরেজ কেন? ওরা কবে থেকে নিরপেক্ষ হলো?” যুথিকা ভেবে পায় না।

“মুসলমানদের কথা হলো ওরা এদেশের রাজা ছিল, রাজত্ব হারিয়ে না হয় ইংরেজের প্রজা হয়েছে। তা বলে কি ইংরেজ চলে গেলে হিন্দুর প্রজা

হবে? তাদের রাজ্য তাদের ফিরিয়ে দিতে হবে, পুরো না দিলে তার অর্ধেক দিতে হবে, কিন্তু গণতন্ত্রের নিয়ম অনুসারে হিন্দু মেজরিটিকে সমগ্র ভারত দেওয়া চলবে না। গণতন্ত্র ব্যাপারটা মুসলমানরা তো নয়ই হিন্দুরাও যে মনে প্রাণে মেনে নিয়েছে তা নয়, বহু হিন্দু ডিকটেরশিপ পছন্দ করে। কংগ্রেসকে দেখছেন তো? কংগ্রেস হাই কমান্ডই কংগ্রেস। আর কংগ্রেস হাই কমান্ড বলতে বোঝায় তিন প্রধান নেতা। ষাঁদের গুরু গান্ধীজী। ওদিকে মুসলিম লীগও একটা হাই কমান্ড খাড়া করেছে, তার একজনমাত্র মেম্বর। তিনিই সর্বেসর্বা। জিন্না সাহেব একদা কংগ্রেস লীগ উভয়ের মধ্যে মেল বন্ধন করেছিলেন। এখন সে আশা ত্যাগ করেছেন। মেলবন্ধন লক্ষ্য নয় বলেই তিনি ডিভাইড অ্যান্ড কুইট মন্ত্র উদ্ভাবন করেছেন। তাঁর একমাত্র ভরসা প্রস্থানকালে ইংরেজ সরকার রাজ্যভাগ করে একভাগ তাঁর হাতে দিয়ে যাবেন। না দিলে জেহাদ ঘোষণা করতে হবে। ইংরেজ ও কংগ্রেস উভয়েরই বিরুদ্ধে। ইংরেজ কী করবে আপনিই বলুন, মিসেস মল্লিক! আমি তো দেখছি এর একমাত্র প্রতিকার ইংরেজকে যেতে না দেওয়া। ওরা থাকুক আরো দশ বিশ বছর। ইতিমধ্যে আমাদেরও গণতন্ত্র শিক্ষা হোক। ছ'বছর মন্ত্রিত্ব করে ছ'বছর বনবাস গণতন্ত্র শিক্ষার সম্যক উপায় নয়। মল্লিক সাহেব কী বলেন?" গুহ মানসের দিকে তাকান।

“শুধু গণতন্ত্র নয়, জাতীয়তাবাদকেও আরো মজবুত করা চাই। আমাদের জাতীয়তাবাদ পুরোপুরি ভারতীয় জাতীয়তাবাদ নয়, এর অনেকখানি হচ্ছে হিন্দু জাতীয়তাবাদ। মুসলমান বন্ধুরা তো বলবেনই, তোমাদের জাতীয়তাবাদ যখন অনেকখানি হিন্দু তখন ভারতের অনেকখানিই তোমরা নাও, বাকী স্থান আমাদের দাঁও। সেই বাকী স্থান হোক পাকিস্তান। আমাদের সেই স্থানে আমরা মুসলিম জাতীয়তাবাদ প্রতিষ্ঠা করব। ইংরেজের মুখাণ্ণী হতে হবে না। কেনই বা ইংরেজকে ধরে রাখতে চাওয়া? স্বাধীনতা দশ বছর বাদে নয়, বিশ বছর বাদে নয়, এক বছরের মধ্যেই হবে। আমি তাঁদের মুখের মতো জবাব দিতে পারিনে। এটা তো সত্য যে ‘বন্দে মাতরম’ই আমাদের জাতীয়তাবাদের মূল সুর। আর মুসলমানরা কেউ তুলেও সে সুর গুন গুন করে না। গ্রাশনালিজম আইডিয়াটাই ইসলামের সঙ্গে বেখাপ। তবে ইদানীং একটা পরিবর্তনের হাওয়া পালে লেগেছে। ওরাও গ্রাশনালিস্ট হবে, যদি মুসলিম গ্রাশনালিস্ট বা পাকিস্তানী গ্রাশনালিস্ট বলে

পরিচয় দিতে পারে। না, গ্রাশনালিস্ট মুসলিম নয়, মুসলিম গ্রাশনালিস্ট। গ্রাশনালিস্ট মুসলিমরা ভারত ভাগ করতে চায় না, মুসলিম গ্রাশনালিস্টরা ও ছাড়া আর কিছু চায় না। লোকের ধারণা সব মুসলমান একমত। সেটা একটা ভুল ধারণা। জিন্না সাহেব হয়তো অধিকাংশ মুসলমানের প্রবক্তা। কিন্তু সব মুসলমানের প্রতিনিধি নন।” মানস রায় দেয়।

“কিন্তু জিন্না সাহেব যদি শয়তান হয়ে থাকেন তবে শয়তানকেও তার পাওনা দিতে হবে। গোটা কয়েক প্রদেশ তাঁকে ছেড়ে দেওয়াই বিজ্ঞতা। সেখানেই মুসলিম গ্রাশনালিজমের তথা পাকিস্তানী গ্রাশনালিজমের পত্তন হোক। সঙ্গে সঙ্গে গণতন্ত্রের চর্চা। জিন্নার মতো অমন একজন প্রতিভাশালী পুরুষের প্রতিভার সম্ভাবহার হচ্ছে না, সবাই মিলে তাঁকে কোণঠাসা করেছে। কোণঠাসা হলে একটা বেড়ালও আঁচড়ায় কামড়ায়, চোখের মণি উপড়ে নেয়। জিন্নার প্রত্যেকটি প্রস্তাবে আপত্তি না করলে কি নয়? গ্রাশনালিস্ট মুসলিম থেকে উনি মুসলিম গ্রাশনালিস্ট হয়ে দাঁড়িয়েছেন এটা আমাদের দুর্ভাগ্য। গোড়ায় তিনি ডেমোক্রেটাই ছিলেন, ইদানীং মেজরিটির উপর মাইনরিটির ভীটো প্রয়োগই তাঁর পলিসি। তাতে ব্যর্থ হলে পাকিস্তান অর্জন। এখন ইংরেজরা কী করে দেখা যাক।” গুহ যুথিকার দিকে তাকান।

“ওরা এই আগ্নেয়গিরি আগলে রেখে কার কী উপকার করবে, মিস্টার গুহ? আরো দশ বিশ বছর কি লাভাবর্ষণ ক্ষান্ত থাকবে? ওরা ডিভাইড না করেই কুইট করুক। মিভিল ওয়ার বাধবে না, আশা করি। মুসলিম লীগকে তার পাওনা সংখ্যার অনুপাতে দেওয়া হবে। উচ্চতর পদও ওরা পাল্লা করে পাবে। আর যদি দেশ ভাগ অনিবার্য হয় তবে প্রদেশ ভাগও সেই সঙ্গে হবে। হিন্দুরাই বা কেন ফের মুসলমানদের প্রজা হবে? ‘বন্দে মাতরম্’ ওদের কণ্ঠে শোনা যায় না। ‘আল্লা হো আকবর’ও হিন্দুদের কণ্ঠে মানায় না। কিন্তু আগে ইংরেজ যাক। তার পরে আমরা ভাইয়ে ভাইয়ে সম্পত্তি ভাগ করে নেব। পাকিস্তান ইংরেজের হাত থেকে নয়, ভাইয়ের হাত থেকেই ওরা পাবে।” যুথিকা ফয়সালা করে।

মানস বলে, “আমি কিন্তু দেশভাগ প্রদেশভাগ কোনোটাই সমর্থন করিনে। ভাগাভাগি ওই চাকদিকারির উপর দিয়েই যাক। নইলে আবার লোক জাগের প্রস্ন উঠবে। সব হিন্দু এক গোয়ালে, সব মুসলমান এক খোঁয়াড়ে। ঐতিহাসিক বিবর্তনটাই উন্টে যাবে। অমার্জনীয়!”

যুথিকা চূপ করে থাকে। গুহ বলেন, “আচ্ছা, আপনাদের আমি পরিসংখ্যান শোনাই। তার পরে বিবেচনা করবেন। সারা বাংলা আর আসাম জুড়লে মুসলমানদের সংখ্যাহুপাত শতকরা একাশ ছাড়িয়ে উনসত্তর শতাংশ। আর অমুসলমানদের সংখ্যাহুপাত শতকরা আটচল্লিশ ছাড়িয়ে পয়ত্রিশ শতাংশ। তা হলে মুসলমান অমুসলমানকে দাবিয়ে রাখে কী করে? একটা ভোটে জিতে কেউ কখনো নিজের সিদ্ধান্ত অপরের উপর চাপিয়ে দিতে পারে? লড়তে হয় তখনি লড়া যাবে। তার আগে কেন? নিক না ওরা গোটা বাংলা আর গোটা আসাম। সেটা আমাদেরও নেওয়া। এমন সময় আসবে যখন হিন্দু মুসলমান নির্বিশেষে পূর্ব পাকিস্তানের লোক পশ্চিম পাকিস্তানবাসীদের উপর আধিপত্য করবে। পশ্চিমাদের মোট সংখ্যা হিন্দু মুসলমান শিখ মিলিয়ে তিন কোটি ষাট লক্ষের চেয়ে কিছু বেশী। আর পূর্ববিয়াদের সংখ্যা হিন্দু মুসলমান ট্রাইবাল মিলিয়ে সাত কোটির চেয়ে একটু বেশী। একদিকে দুই তৃতীয়াংশ, আরেক দিকে এক তৃতীয়াংশ। আমরা যা বলব তাই হবে। কলকাতা হবে সমগ্র পাকিস্তানের রাজধানী।”

মানস হেসে ওঠে। “মাফ করবেন, মিস্টার গুহ, আপনার এই স্বপ্ন কোনোদিন সাধক হবার নয়। মুসলিম নেণনের জন্তে যাঁরা পাকিস্তান রাষ্ট্র উদ্ভাবন করেছেন তাঁরা কোনোদিনই বাঙালী হিন্দু মুসলমানকে দুই-তৃতীয়াংশ ভোটে জিততে দেবেন না। তাঁদের উদ্ভাবনী শক্তি এমন এক ফরমূলা উদ্ভাবন করবে যাতে সত্যিকার ক্ষমতা থেকে যায় পশ্চিমা মুসলমানদের হাতে। বাংলাভাষাকে তাঁরা আমল দেবেন না, বাংলার রাজধানী কলকাতাকেও ক্ষমতার কেন্দ্র করবেন না। শাসনতন্ত্র প্রণয়নের সময় আটঘাট এমনভাবে বাঁধবেন যে ওয়েস্টেজ, ভীটো, প্যারিটি ইত্যাদি মন্ত্রগুলি পশ্চিমাদের স্বার্থেই ব্যবহৃত হবে। কিছুতেই কিছু না হলে মাইট ইজ রাইট তো তাঁদের দিকেই। কারণ পাঞ্জাবী মুসলমানদের হাতেই মিলিটারি পাওয়ার। ব্যালটের চেয়ে বলেটের জোর বেশী। তার সঙ্গে মোল্লাদের যোগসাজস। জিন্না সাহেব ব্রিটিশ ঐতিহ্যের ভিতর দিয়ে এসেছেন বলেই মিভিল পাওয়ারের মর্খাদা বুঝেছেন, পাকিস্তান হাসিল করে মুসলিম ঐতিহ্যের ভিতরে ফিরে গেলে মোল্লা আর মিলিটারিতে মিলে তাঁকে কাঁদিয়ে ছাড়বে। পাকিস্তান এসেছে ইসলামের ইতিহাস থেকে। ব্রিটেনের বা ব্রিটিশ ভারতের ইতিহাস থেকে নয়। যে ইতিহাসে জিন্না সাহেবের জন্ম। আপনার ও আমার জন্ম। পাকিস্তানে

আমরা দম বন্ধ হয়ে মারা যাব, মিস্টার গুহ। যারা বাঁচবে তারা কচ্ছপের মতো খোলার ভিতর হাত পা গুটিয়ে নিয়ে বাঁচবে।”

“তা হলেও আমি গৃহযুদ্ধের পক্ষপাতী নই, মিস্টার মল্লিক। এ প্রদেশে বাদে মেজরিটি তারা যদি পাকিস্তানে থাকতে চায় তো আমিও তাদের সঙ্গে থাকব। তাদের অদৃষ্টে যা ঘটবে আমার অদৃষ্টেও তাই ঘটবে। তারাই তো আমাকে খাইয়ে পরিয়ে বাঁচিয়ে রেখেছে। আমার আয় তো তাদের পরিশ্রম থেকেই আসে। তারা তো আমাকে ছাড়েনি, আমিও তাদের ছাড়ব না। আপনার কী? আপনি আজ এখানে আছেন, কাল বদলী হয়ে চলে যাবেন। আমি এ বয়সে বেদুইন হতে নারাজ।” গুহ মাথা নাড়েন।

যুথিকা বিস্মিত হয়ে বলে, “সে কী! পাকিস্তান যদি হয় আপনি এই পাণ্ডববর্জিত দেশে বাস করবেন?”

“মিসেস মল্লিক, রাজা বদল ইতিহাসে কতবার হয়েছে। তা বলে কি প্রজারা সাতপুরুষের ভিটেমাটি ছেড়ে পালিয়েছে? তবে এবারকার ব্যাপারটা একটু অন্তরকম মনে হচ্ছে। তুর্ক আর মোগল আমলে ছোটলোকরা দলে দলে মুসলমান হয়ে যায়। ইদানীং মুসলমানরা দলে দলে পাকিস্তানী হয়ে যাচ্ছে। ওটা মুসলিম রাজ প্রতিষ্ঠার মোহে না হিন্দুদের জায়গাজমি বেদখল করার লোভে তা বলা শক্ত। আজ যারা দলে দলে পাকিস্তানী হচ্ছে পরে তারা দলে দলে কমিউনিস্ট হবে। সোভিয়েট প্রতিষ্ঠা করবে। আমাকে যদি কেউ তাড়িয়ে দেয় সেটা আমি কানফের বলে না আমি জমিদার বলে তা কী করে জানব? হিন্দু মুসলমানের বিবাদ কি ধর্মীয় বিবাদ না রাজনৈতিক বিবাদ না অর্থনৈতিক বিবাদ না সামাজিক বিবাদ? হয়তো সব ক’টা বিশেষণই ঠিক। দেশের লোক ভিতরে ভিতরে পরস্পরের কাছে পর হয়ে যাচ্ছে। এই যে এস্টেজমেন্ট এটা আপনারা সরকারী মহলে আঁচ করে থাকবেন। আমরা বাইরেও অনুভব করছি। ইংরেজদের ছেড়ে যাওয়া তখ্তে কংগ্রেস বসবে এটা ভারতের মুসলমান মনে প্রাণে গ্রহণ করতে পারছে না। তেমনি ইংরেজের ছেড়ে যাওয়া মসনদে মুসলিম লীগ বসবে বাংলার হিন্দু এটা মেনে নিতে পারছে না। এই হলো এস্টেজমেন্টের হেতু।” গুহ অস্থমাম করেন।

জজ কুঠির মালী একদিন জিজ্ঞাসা করেছিল, “আচ্ছা, মা, ওই যে ওরা বলছে পাকিস্তান হচ্ছে সেটা কী?”

যুথিকা উত্তর দিয়েছিল, “পাকিস্তান হলে মুসলমানদের আপনার বলতে একটা রাজ্য হবে।”

“সে রাজ্যে আপনারা থাকবেন না?” মালী প্রশ্ন করেছিল।

“কেমন করে থাকব, বলো? আমরা যে হিন্দু।” যুথিকার উত্তর।

“না, মা, এটা ভালো নয়।” মালী দুঃখিত হয়।

এর কিছুদিন পরে মালী এসে নালিশ করে, “মা, মোল্লারা আমাকে ভয় দেখাচ্ছে আমি যদি পাকিস্তানকে ভোট না দিই তবে আমি মারা গেলে আমাকে কেউ কাঁধ দেবে না। তা হলে কী হবে, মা? আমার দাফন হবে না?”

সাংঘাতিক নালিশ। কিন্তু যুথিকা নিরুপায়। মানসও তাই।

মালী ভোট দিয়ে এল ঠিকই। কাকে সেকথা মানস বা যুথিকা জানতেও চায়নি, সেও জানায়নি। ভোটের ফলাফল যখন জানা গেল তখন দেখা গেল লীগ প্রার্থীরা অল্প সব মুসলিম প্রার্থীদের পরাভূত করে বাংলার আইন সভার ১২৩টি মুসলিম আসনের ১১৫টি জয় করেছেন। কংগ্রেসের আসন-সংখ্যা ৬২টি।

মুসলিম লীগই তফসীলভুক্ত জাতি ও অত্যাচারীদের সঙ্গে হাত মিলিয়ে সরকার গঠন করবে বোধ হয়।

এর পরে একদিন কামালউদ্দীন আহমদ বলে এক ভদ্রলোক সাফাং করতে আসেন। “আমাকে চিনতে পারছেন? কলকাতায় মীর সাহেবের ওখানে আলাপ। লিবারল ইউনিয়নিস্ট গ্রুপ। মনে পড়ে?”

“বুঝেছি। কৃষক প্রজা দলের মুখপাত্র। তাদের এক পত্রিকার সম্পাদক। তা আপনি এখানে কেন? পার্টির কাজে এসেছেন?” মানস জানতে চায়।

“আমি এই জেলারই লোক। কলকাতায় কর্মোপলক্ষে থাকা। কাজটা উঠে গেছে। এখন আমার পেশা ওকালতী। কিন্তু আজ আমি উকীল হিসাবে আসিনি। মীর সাহেব চিঠি লিখে দেখা করতে বলেছেন। আলাপ করতে এসেছি।” কামালউদ্দীন বলেন।

একথা সেকথার পর নিবাচনের প্রসঙ্গ ওঠে। “কাজী নজরুল লিখেছেন, কামাল, তুনে কামাল কিরা, ভাই। আপনি কি কামাল করেছেন?” মানস জিজ্ঞাসা করে।

“এ বড়ো নিষ্ঠুর রসিকতা! আমার জামানত বাজেয়াপ্ত হতে যাচ্ছে।

শুধু তাই নয়, আমি যে মুসলিম লীগের বিরুদ্ধে দাঁড়িয়েছি এর মানে আমি লাচ্চা মুসলমান নই, আমাকে বয়কট করা হবে, আমি উকীলহিসাবেও মুসলমানদের মামলা চালাতে পারব না। আমাকে বাধ্য হয়ে হিন্দুর উপর নির্ভর করতে হবে। তখন শুনেতে হবে আমি একজন প্রচ্ছন্ন হিন্দু। কামাল তো নয়, কমল।” তিনি উত্তর দেন।

মানস দুঃখিত হয়। “কিন্তু কৃষক প্রজা পাটির অমন ভরাডুবি হলো কেন? ছিল কংগ্রেসের পরে সব চেয়ে যড়ো দল, এখন সব চেয়ে ছোট। মাত্র পাঁচটি আসন।”

“এর জন্মে দায়ী রায়মজে ম্যাকডোনাল্ড ছ সেকেণ্ড। প্রথম জন কমিউনাল এ্যাওয়ার্ড জারি করে বাংলার কংগ্রেসের দফা রফা করেছেন। কংগ্রেস কোনো কালেই বাংলাদেশের আইনসভায় মেজরিটি পাবে না, সুতরাং এককভাবে সরকার গঠন করতে পারবে না। দ্বিতীয় জন কৃষক প্রজাদলের প্রসাদে প্রধানমন্ত্রী হয়ে মুসলিম লীগের লাহোর অধিবেশনে পাকিস্তান প্রস্তাব পেশ করে আসেন। ভেবেছিলেন দেশভাগ হলে বাংলাদেশের জন্মে আলাদা একটা পাকিস্তান হবে, তিনিই সেখানকার প্রেসিডেন্ট বা প্রধানমন্ত্রী হবেন। তাঁর কোনো উপরওয়ালা থাকবে না। লাহোরের সেই প্রস্তাবের উপর খোদকারি করে জিন্না সাহেব যা খাড়া করেছেন তা একাধিক নয়, একটিমাত্র পাকিস্তান। বাংলাদেশ তার অন্তর্ভুক্ত প্রদেশ ছাড়া আর কিছু নয়। হক সাহেব পাকিস্তানের উচ্চতম ক্ষমতার অধিকারী হবেন না। জিন্না সাহেব তাঁর উপরওয়ালা হবেন। হক সাহেবের জিন্নাবিরোধী ভাব দেখে মুসলিম লীগ তাঁকে পরিত্যাগ করে। কিন্তু কৃষক প্রজা দলের চরিত্র আর অসাম্প্রদায়িক থাকে না। হিন্দুরা তাদের মুসলিম সাথীদের অবিশ্বাস করে। ক্রমশই মুসলিম জনমত পাকিস্তানের অভিমুখে যায়। কৃষক প্রজা দল পাকিস্তান চায় না শুনে মুসলমান কৃষক প্রজারাও দলের উপর আস্থা হারায়। তাদের ধারণা পাকিস্তান হচ্ছে তাদের স্বার্থরক্ষার জন্মে। মুসলমান হিসাবে স্বার্থরক্ষা। দলপতির সঙ্গে দলের বিচ্ছেদ ঘটে। তিনি এবারেও আসন লাভ করেছেন বটে, কিন্তু দলের টিকিটে নয়। লেবার পার্টির রায়মজে ম্যাকডোনালডের মতো নিঃসঙ্গ। বোধহয় ভাবছেন মুসলিম লীগ তাঁকে নেতা করে নেবে। কিন্তু নেতা এখন সুহরাবদ্দী। প্রধানমন্ত্রী হবেন তিনিই। হক সাহেবকে

অরণ্যবাস করতে হবে। যে নিজের দলকেই ডোবায় কেউ তাকে বিশ্বাস করে না।” কামালউদ্দীন তিক্তস্বরে বলেন।

“একজন নেতার বিশ্বাসঘাতকতার জন্যে এত বড়ো বিপর্যয় তো ব্রিটেনেও হয়নি, কামাল সাহেব। নিশ্চয়ই অগ্নি কোনো কারণ আছে।” মানস সন্দেহ করে।

“পাকিস্তানের হজ্জুগ। লীগপন্থীদের ছল বল কোশল। ইস্পাহানীর টাকা। দুভিক্ষের মরহমে তো কম রোজগার করেনি। কিন্তু সকলের উপর জিন্মা সাহেবের হাতঘণ। এক টিলে তিনি দুই পাখী নয়, পাঁচ পাঁচটা পাখী মেরেছেন। প্রথমে মেরেছেন মুসলিম লীগ ব্যতীত মুসলমানদের বা মুসলমানযুক্ত যতগুলো দল আছে সব ক’টা দল। কৃষক প্রজা, ইউনিয়নিষ্ট, কংগ্রেস মুসলিম, ন্যাশনালিস্ট মুসলিম, আহরার ইত্যাদি। তার পরে মেরেছেন জমিদার ও ক্যাপিটালিস্ট শ্রেণীর শ্রেণীশত্রুদের। কমিউনিষ্টরা পর্যন্ত এখন মারের ভয়ে পাকিস্তানের কলমা পাঠ করছে। পাকিস্তানে কোনো দিনই ওরা মাথা তুলতে পারবে না। বিপ্লবের পাখীটিকে খতম করে দিয়েছেন জিন্মা। তার পরের ঘায় ইণ্ডিয়ান ন্যাশনালিজম জখম। ইণ্ডিয়ান নেশনের পা দুটো কেটে নিয়ে পাকিস্তান বানানো হবে। ইণ্ডিয়ান নেশন দাঁড়াবে কিসের উপরে? এর পরের ঘায়ে ডেমোক্রাসী খতম। গণতন্ত্রে বিরোধী পক্ষ থাকে, বিরোধী পক্ষই পরে নির্বাচনে জিতলে সরকার পক্ষ হয়। পাকিস্তানে বিরোধী পক্ষ বলে কেউ থাকবে না। কৃষক প্রজা, ইউনিয়নিষ্ট প্রভৃতি তো হারাম। কংগ্রেস দল তো হিন্দু নেশনের সামিল, হতরাং এলিয়েন। চারটে চিড়িয়ার পরে আরো একটা থাকে। বাংলা দেশে মুসলিম নেশনের নিশান উড়িয়ে অবাঙালী মুসলমানরা আসবেন বাংলাদেশ জয় করতে। তাঁরাই হবেন সিভিল ও মিলিটারি অফিসার। ধনিক ও তাঁরাই, উচ্চতন পর্যায়ের রাষ্ট্রপতি, দলপতি ও সেনাপতিও তাঁরাই। আরবী, ফারসী, উর্দু শিখে তাঁদের সঙ্গে প্রতিযোগিতায় সফল হতে না পারলে বাঙালী মুসলমানের ভবিষ্যৎ থাকবে না। কিন্তু তাঁরা তো তখন আর বাঙালী মুসলমান নন, তাঁরা পাকিস্তানী ন্যাশনাল।”

মানস স্বীকার করে কায়েদে আজমের বাহাদুরি আছে। কিন্তু মুসলিম নির্বাচকমণ্ডলীতে অগ্নিগ্ন মুসলিম দলগুলিকে হারিয়ে দিলেই তো ভারতের কেন্দ্রীয় আইনসভার অগ্নিগ্ন দলগুলিকেও হারিয়ে দেওয়া হয় না। সেখানে



যদি পাকিস্তান প্রস্তাব তোলা হয় অধিকাংশ ভোটে পরাজিত হবে। শেষপর্যন্ত দেখা যাবে নির্বাচনই ভবিষ্যৎ জয় নিয়ামক নয়।

“তা হলে কি গৃহযুদ্ধ ?” কামাল সাহেব জিজ্ঞাস্থ।

“তা খাড়া আর কী ? পাঁচ পাঁচটা চিড়িয়ার সঙ্গে লড়তে হবে। উত্তর-পশ্চিম সীমান্ত প্রদেশের পাঠান, পাঞ্জাবের হিন্দু ও শিখ, আসামের হিন্দু ও টাইবাল, বাংলাদেশের তথাকথিত বর্ণ হিন্দু, সর্ব ভারতের কংগ্রেস। গৃহযুদ্ধে এদের সবাইকে হারিয়ে দিলে শুধু পাকিস্তান কেন, তামাম হিন্দুস্থান কায়দে আজমের পদানত হবে। মোগল আমল আবার ফিরে আসবে। আমরা হিন্দুমাত্রেই আবার জিজিয়া কর দেব। যাদের উপর কর বসানো হবে তাদের প্রতিনিধিদের মতামত শুনতে হবে না। আইন সভা তুলে দিলেও চলবে। জিন্না সাহেবকে আমরা ডেমোক্রাট বলেই জানতুম। তিনি কোথায় নেমে গেছেন দেখে দুঃখ হয়। তিনি যখন ইণ্ডিপেন্ডেন্ট পার্টির নেতা ছিলেন তখন তাঁর দলে হিন্দুও ছিলেন, পার্শীও ছিলেন। দলটি ছোট, কিন্তু তার হাতে ব্যালাল অভ পাওয়ার। সে কখনো সরকারকে জিতিয়ে দেয়, কখনো কংগ্রেসকে। সেই দল ভেঙে দিয়ে তিনি হয়েছেন মুসলিম লীগের নেতা। এখন তাঁর হাতে ব্যালাল অভ পাওয়ার নেই। যা নেই তাকে ফিরিয়ে আনতে চান প্যারিটির ছদ্মবেশে। কংগ্রেস কেন রাজী হবে ? তাঁর শেষ ভরসা ব্রিটিশ প্রধানমন্ত্রীর নতুন এক রোয়েদাদ। এবার তার রূপ হবে হিন্দুস্থান আর পাকিস্তান। কিন্তু কংগ্রেস যদি প্রত্যাখ্যান করে তা হলে আইন অনুসারে দেশভাগ হবার নয়। হলে হবে বেআইনী ভাবে। তলোয়ারের জোরে। শুনছি পাঞ্জাবে তার তোড়জোড় চলেছে। মুসলিম মেয়েদেরও হাতিয়ারের তালিম দেওয়া হচ্ছে। শিখরাও কম যায় না। বুন্দে ওল আর বাবা তেঁতুল। অবস্থা যে অগ্নিগর্ভ তা ঠাঁচ করতে পারছি। বাংলাদেশে মুসলমানরা লড়াই করে পাকিস্তান নিতে চায় তো দশ আনা পেতে পারে, ষোল আনা নয়। আসামে পেতে পারে ছয় আনা। তাতে কি তাদের মন ভরবে ? বাংলা ভাগ, আসাম ভাগ কে চায় ?” মানস তো চায় না।

“না, না, বাংলা ভাগ নয় আসাম ভাগ নয়। ভারতেই পারা যায় না। মুসলিম লীগ যদি তাতে রাজী হয় পরের বার নির্বাচনে হেরে যাবে। অবশ্য নির্বাচন যদি আবার হয়। অকারণে হিন্দুদের ক্ষেপিয়ে দেওয়া হচ্ছে। ক্ষেপে

গেলে তারা যে কতদূর যেতে পারে তা তো চটগ্রাম অস্কাগার' লুঠনের সময়ই প্রমাণ হয়েছে। না, বাংলাদেশকে আমরা যুদ্ধক্ষেত্র হতে দেব না। হিন্দু মুসলমান একমত হয়ে যেটা করবে সেটাই হবে। কংগ্রেস লীগ একমত হবে কি-না সন্দেহ। কিন্তু তারাই তো সব নয়। সাধারণ হিন্দু ও সাধারণ মুসলমান শান্তিপূর্ণ মীমাংসা চায়।" কামাল এবার গুঠেন।

কত্নার বিবাহ উপলক্ষে মুসলিম লীগ নেতা খান বাহাদুর মনিরুজ্জামান মানসকে নিমন্ত্রণ করেছিলেন। পাশে বসিয়ে বলেন, "চোখ বুলিয়ে দেখুন আজকের অতিথিদের অর্ধেক হিন্দু অর্ধেক মুসলমান। ব্যক্তিগত জীবনে আমার ভেদবুদ্ধি নেই। আমার বন্ধুদেরও অর্ধেক হিন্দু অর্ধেক মুসলমান। কিন্তু রাজনীতি কবতে গেলে ভেদজ্ঞান করতে হয়। নইলে ভোট মেলে না। এবার তো আমাকে মন্ত্রী করা হবে। সেটা নির্ভর করবে মুসলিম ভোটের উপরেই। কী করি, বলুন। এখানকার হিন্দুরাও তো চান যে আমি মন্ত্রী হয়ে জেলার কিছু উপকার করি। আমাকে দিয়ে যেটুকু সম্ভব সেটুকু নিশ্চয়ই করব। তাতে হিন্দু মুসলমান উভয়েরই লাভ। পাকিস্তানের স্নেগান দিয়ে ভোটে জিতেছি বটে, কিন্তু পাকিস্তান আমার অন্তরের কথা নয়। ওটা একটা বার্গেনিং কাউন্টার। ওর বিনিময়ে কংগ্রেস নেতারা কী দেবেন দেখা যাক। যদি সারবান কিছু হয় তবে পাকিস্তান মূল্যবোধ রাখা হবে। দশ বছর শিকেয় তোলা থাকলেও কেউ তাড়া দেবেন না। পাকিস্তান চাই বলেছি। কবে চাই তা তো বলিনি। ধরুন, কংগ্রেসের সঙ্গে লীগের যদি সব ক'টি প্রদেশে কোয়ালিশন হয়ে যায়—একটি বাদে—তা হলে কেনই বা লাগ পাকিস্তানের জন্তে চাণ দেবে?"

"একটি বাদে ? কোনটি বাদে ?" মানস কৌতূহলী হয়।

"উত্তর-পশ্চিম সামান্ত প্রদেশ। কংগ্রেস মুসলিমদের সঙ্গে লীগ মুসলিমবা এক টেবিলে বসবে না। কংগ্রেস মুসলিমদের সরে যেতেই হবে। ইয়া, অত্যাচ্ছ প্রদেশেও। আর কেন্দ্রে যদি কোয়ালিশন হয় তবে কেন্দ্রেও। কায়দে আজমের আরো কয়েকটা শর্ত আছে, কিন্তু আমরা তাঁকে বুঝিয়ে সুঝিয়ে নিরস্ত করব। কংগ্রেসের উপর বেশী চাপ দিলে কোয়ালিশনই হবে না, কোয়ালিশন না হলে পার্টিশনই আমাদের মতে একমাত্র বিকল্প। কিন্তু এই মুহুর্তে পার্টিশনের জন্তে আমরা ব্যগ্র নই। তার চেয়ে ব্রিটিশ শাসিত কেন্দ্র

ভালো। ইংরেজরা চলে যাক এটা আমাদের অন্তরের কামনা নয়।” খান বাহাদুর কবুল করেন।

মানস হেসে বলে, “কিন্তু ওরা তো আপনি চলে যাচ্ছে। বালোঁ চলে গেছেন, হ্যামিলটন বদলীর হুকুম পেয়েছেন। আপনি কোথায় আছেন, খান বাহাদুর? একদিন লাট সাহেবও চলে যাবেন, তারপর চলে যাবেন জঙ্গীলাট আর বড়লাট। হিন্দু মুসলমানে ভাগাভাগি একটা হবেই। আপনারা সেইরকম একটা স্বীম তৈরি করে কংগ্রেস নেতাদের দিন। জিন্না সাহেবকে বড়লাট পদ দিতে কংগ্রেস রাজী হতে পারে। গান্ধীজী ‘ওপদ নেবেন না। কোনো পদই নেবেন না। জঙ্গী লাট পদটা একজন শিখ নেতাকে দিতে হবে। তিনি হবেন ডিফেন্স মেশ্বর। প্রধান মন্ত্রী বলে একটা নতুন পদ সৃষ্টি করতে হবে নেহরুর খাতিরে। মওলানা আবুল কালাম আজাদকে কিন্তু ক্যাবিনেট থেকে বাদ দিলে চলবে না।”

খান বাহাদুর দুই কানে আঙুল দেন।

## ॥ চৌদ্দ ॥

সেদিন খান বাহাদুর তাঁর ভাতুপুত্র আখতারউজ্জামানের সঙ্গে পরিচয় করিয়ে দিয়েছিলেন। কিন্তু আলাপের অবকাশ হয়নি। আলাপের জন্যে একটা দিন ফেলা হয়েছিল। সেই অহুসারে তিনি সন্ধ্যাবেলা ক্লাবে এসে বিলিয়ার্ড খেলায় যোগ দেন। বিলেতফের্তা ব্যারিস্টার। কলকাতায় প্র্যাকটিস করেন কিন্তু নিবাস এই শহরেই। সেইসঙ্গে ক্লাবের মেশ্বর।

খেলার পর ড্রিঙ্কস হাতে নিয়ে নিভৃত কক্ষে আলাপ। মানসের হাতে সফ্ট ড্রিঙ্ক। তাঁর হাতে ছোট্ট পেগ।

“চাচাজান প্রস্তাব করেছিলেন আমি যেন তাঁর কন্ঠারত্বকে উদ্ধার করি আর তাঁর প্র্যাকটিসের উত্তরাধিকারী হই। তিনি এখন থেকে মুসলিম লীগের কাজে আত্মনিয়োগ করবেন। কায়দে আজম তাঁকে বিশেষ করে চেয়েছেন। কিন্তু আমি কি সহজে ধরাছোঁয়া দিই? বিলেত থেকে ফিরে আমি কলকাতায় বসেছি। এখনো এক বছর হয়নি। হ্যাঁ, যুদের সময়

আটকা পড়েছিলুম। আমি ক্যালকাটা হাইকোর্টের বার লাইব্রেরীর মেম্বর। অমর জাতই আলাদা। আমি কি বার এসোসিয়েশনের মেম্বরের মেয়েকে সাদী করতে পারি? হলোই বা পরভীন আমার সোদর চাচাতো বোন।” তিনি মশগুল হয়ে বলেন।

“সোদর চাচাতো বোন!” মানস ভুল ধরে।

“আহা! এদিককার লোক সেইরকমই বলে। আদালতে শুনে থাকবেন। বলতে চায় আপন চাচাতো বোন। মুসলিম সমাজে অতি উত্তম সম্বন্ধ। কিন্তু ওই যে বলেছি আমার জাতই আলাদা। আমি বিলেতফের্তা ব্যারিস্টার। আমাকে তো আমার ব্যারিস্টার সমাজে সমানভাবে মেলামেশা করতে হবে। পরভীন আমার আদরের বোন। কিন্তু ওকে আমি মদ ধরাতে পারব না। ক্লাবে নিয়ে এসে টেনিস খেলাতে পারব না। মফঃস্বলের মুসলিম সমাজ আমাদের বয়কট করবে। কলকাতার জীবন অত্যন্ত ব্যয়বহুল। চাচাজানকে বলেছি আমি পাঁচ হাজারী মনসবদার না হয়ে সাদী করব না। লাগে লাগবে পাঁচ বছর।” তিনি জমিয়ে বসেন।

‘চাচাজান ততদিন সবুর করবেন কেন?’ মানস মন্তব্য করে।

“জানতুম। তিনি লোকাল বারের এক ছ’ হাজারী উকীলের সঙ্গে বিয়ে দিয়েছেন। বয়সটা একটু বেশী। আগেও তাঁর একবার বিয়ে হয়েছিল। ছাড়াছাড়ি হয়ে গেছে। পরভীনের যেমন ভাগ্য। কাঁদছে। বিয়ের পর মেয়েরা অমন একটু আধটু কাঁদবেই। পরে সব সয়ে যাবে। চাচাজান যদি মন্ত্রী হন তাঁর দামাদ উকীল সরকার হবেন। তার পরে জেলা বোর্ডের চেয়ারম্যান। বোকে সোনা দিয়ে মুড়ে দেবেন। ওদিকে আম’ নিজস্ব একটা লাইব্রেরীই নেই। মিষ্টার শরৎ বোস দয়া করে তাঁর লাইব্রেরীতে বসে পড়তে দিয়েছেন। ওয়ান অভ দ্য বেস্ট। নিজেও তিনি অগাধ পণ্ডিত। তাঁর রোরিং প্র্যাকটিস। পলিটিকসের জন্তে সময় কখন? নইলে নেহরুর সঙ্গে টক্কর দিতেন।” আখতার মুক্তকণ্ঠে প্রশংসা করেন।

“দেশের ভবিষ্যৎ সম্বন্ধে তিনি কী ভাবছেন?” মানস স্বধায়।

“বাংলাদেশের হিন্দু মুসলমান তাঁর মতে এক মায়ের সন্তান। আফ্রিকার অর্থে। ধর্মটাই পৃথক, আর সব এক। কাজেই বাংলাদেশ ছ’ভাগ করা চাবে না। হিন্দুরা যদি শাকিস্তানে থাকতে না চায় আর মুসলমানদের যদি অথও ভারতে আপত্তি থাকে তবে স্বতন্ত্র ও স্বাধীন বঙ্গ কেন নয়? কিন্তু কেউ তেমন

সাড়া দিচ্ছেন না। আমিই বোধ হয় তাঁর একমাত্র সাগরেদ। তবে তিনি এবার সেন্ট্রাল লেজিসলেটিভ অ্যাসেম্বলীতে যাচ্ছেন, দিল্লীই হবে তাঁর কর্মক্ষেত্র। কংগ্রেস থেকে তাঁকে পানামেন্টারি লীডার করার প্রস্তাবও এসেছে। তিনি আশ্রয় চেষ্টা করবেন দেশ যাতে অখণ্ড থেকে যায়। তার জন্মে অবশ্য মুসলিম লীগের সঙ্গে সমঝোতা চাই। তার মানে জিন্না সাহেবের সঙ্গে। তিনিই তো মুসলিম লীগ। আর সবাই তাঁর ডিটো।” ব্যারিস্টার বলেন।

“আপনি কি আশাবাদী?” মানস প্রশ্ন করে।

“সেদিন লক্ষ করলেন না মওলানা সাহেবের নাম উল্লেখ করায় চাচাজান কেমন কানে আঙুল দিলেন? আজাদ থাকতে জিন্না কংগ্রেসের সঙ্গে কথা বলবেন না। গান্ধীজীর সঙ্গে কথা ইতিমধ্যেই বন্ধ হয়েছে। তা হলে কি নেহরুর সঙ্গে? তিনিও তেমনি নাছোড়বান্দা। আসফ আলীকে, কিদওয়াইকে, ডাক্তার খান সাহেবকে তিনি বর্জন করবেন না। এঁরা থাকতে কোয়ালিশন হয় কী করে? তবে বাংলাদেশে তেমন কোনো গ্রাশনালিষ্ট মুসলিম নেতা নেই যাকে বর্জন করার কথা উঠতে পারে। নওশের আলী তো নির্বাচনে হেরে গেছেন। কংগ্রেস লীগ কোয়ালিশন সহজেই হতে পারে, আজাদ আর জিন্না যদি অহুমতি দেন। সেটা আবার নির্ভর করছে কনস্টিটিউয়েন্ট অ্যাসেমব্লী আর ইন্টারিম গভর্নমেন্ট গঠনের উপরে। আপনার পক্ষে আশার একটা কারণ আছে।” আখতার বলেন।

“কী কারণ?” মানস জানতে চায়।

“ব্রিটিশ প্রধান মন্ত্রী ঘোষণা করেছেন যে মেজরিটির শাসনতান্ত্রিক প্রগতিতে মাইনরিটি ভীটো দিতে পারবে না। ভীটো দেবার ক্ষমতা কারো হাতে নেই। নৌসেনাদের বিদ্রোহের পিঠ পিঠ এই বোষণার মর্ম ব্রিটেন আর দারিদ্র্য বইতে চায় না। ঘাড থেকে যত শীগগির পারে বোঝা নামাতে চায়। কিন্তু মিস্টার জিন্নার তো ভীটো ছাড়া আর কোনো অস্ত্র নেই। ইন্টারিম গভর্নমেন্টে যদি কংগ্রেস মুসলিম যান লীগ মুসলিম সেখানে যাবেন না। কনস্টিটিউয়েন্ট অ্যাসেম্বলীতে যদি কংগ্রেস মুসলিম যান লীগ মুসলিম সেখানেও যাবেন না। তাঁর মানে একটা পা যদি অচল হয় আরেকটা পা চলতে পারে না। অচল অবস্থার সৃষ্টি হবে। অগত্যা জিন্নাকে তাঁর দাম দিতে হবে। সে দাম পাকিস্তানও হতে পারে, তার বিকল্পও হতে পারে। যেখানে কংগ্রেস লীগ সদস্যদের সমান ওজন।” আখতার ইঙ্গিত করেন।

“কাউন্সেল অফ ডেস্‌পেয়ার। আরো ঐটো একটা বিদ্রোহ না হলে কারো হুঁশ হবে না। আগ্নেয়গিরির লাভাৰ্ষণ।” মানস হাল ছেড়ে দেয়।

“কংগ্রেস লীগ সদস্যদের সমান ওজন হলে কি অণ্ডায় হবে?” আখতার বিস্মিত।

“হবে না? পৃথিবীতে এমন কোন গণতন্ত্র আছে যার পাল্লামেন্টে শতকরা বাইশ জনকে শতকরা পঞ্চাশটা আসন দেওয়া হয়? তা হলে অপর পক্ষের শতকরা আটশটা আসন জোর করে কেটে নেওয়া হয়। যাদের আসন কাটা যাবে তারা বিদ্রোহ করবে না? কংগ্রেসের ভিতরে অন্তর্বিদ্রোহ ঘটবে। হিন্দুদের ভিতরেও। ওজন তো ইতিমধ্যেই যথেষ্ট দেওয়া হয়েছে। সেটাকে আরো বাড়িয়ে প্যারিটি করা কারো সাধ্য নয়। অমন করলে কংগ্রেসও ইন্টারিম গভর্নমেন্টে বা কনস্টিটুয়েন্ট অ্যাসেম্বলীতে যাবে না। মুসলিম লীগ গেলে খোলা মাঠে গোল দেবে। তাই হোক।” মানস বিরক্ত হয়।

“তা হলে বিকল্প নেই, মিণ্টার মল্লিক।” আখতার ক্ষুব্ধ হন।

মানস সন্তোষভাবে বলে, “কত কাল পরে স্বাধীনতার সুযোগ এল। স্বাধীন হয়েই যদি মুসলমানরা স্বাধীনভাবে সিদ্ধান্ত নেন যে তাঁদের অংশের নাম হবে পাকিস্তান আর পাকিস্তানী মানে মুসলিম ও মুসলিম মানে পাকিস্তানী তবে একজনও হিন্দু পাকিস্তানে বাস করবে না। বাংলাদেশের সবটাই যদি পাকিস্তানের সামিল হয় তবে পোনে তিন কোটি বাঙালী হিন্দু বাংলাদেশ ছেড়ে বিহারে, ওড়িশায়, যুক্ত প্রদেশে ও মধ্য প্রদেশে আশ্রয় নেবে। তাদের গৃহতা পূরণ করবে ওইসব প্রদেশের সমসংখ্যক উদ্বাস্তু মুসলমান। ওরাই হবে শতকরা পঁয়তাল্লিশ। আসাম জুড়লে শতকরা আটচল্লিশ। তপ্ত কটাহ থেকে আপনারা ছিটকে পড়বেন জলন্ত আগুনে। বাংলার লীগপন্থী নেতারা আগুন নিয়ে খেলা করছেন। কাগজে লিখেছে, লর্ড পেন্ডিক-লরেন্স জিন্মা সাহেবকে জিজ্ঞাসা করেন, মিণ্টার জিন্মা, আপনি কি ইণ্ডিয়ান নন? তিনি তৎক্ষণাৎ উত্তর দেন, না, আমি ইণ্ডিয়ান নই। তিনি হিন্দু নন বলে যে ইণ্ডিয়ানও নন এটা একটা বৈপ্রবিক পরিবর্তন। এই মনোভাব যদি নয় কোটি ভারতীয় মুসলমানের হয় তবে লোকবিনিময় রোধ করা যাবে না। এটা একটা সর্বনেশে খিওরি। ইংরেজ চলে যাচ্ছে বলে কোটি কোটি হিন্দু ও কোটি কোটি মুসলমানও যে যার ঘরবাড়ী ক্ষেতখামার মন্দির মসজিদ ছেড়ে চলে যাবে এটা তো স্বাধীনতার সম্ভাবহার নয়, অপব্যবহার।”

হকচকিয়ে যান আখতার সাহেব। এত কথা তিনি জানতেন না। বলেন, “যে যেখানে আছে সে সেখানে থাকবে। কেউ বাংলার বাইরে যাবে না, কেউ বাইরে থেকে আসবে না! দুঃস্বপ্ন! নাইটমেয়ার! জিন্না, লিয়াকৎ আলী এলেও আমরা তাঁদের ফেরৎ পাঠাব। ইচ্ছা করলে তাঁরা পশ্চিম পাকিস্তানে যেতে পারেন।”

“কিন্তু তাঁরা যেখানে যাবেন সেইখানেই তো হবে রাজধানী। তাতে কলকাতার কী লাভ? আমাদের পক্ষে দিল্লীই তো নিকটতর, লাহোর দূর অন্ত। যদি জানতুম যে কলকাতাই রাজধানী হবে, তার পূর্ব মহিমা ফিরে আসবে, তা হলে না হয় পাটিশন সমর্থন করতুম। তবে ওই নামটা নয়। ওটা পালটে দিতে হতো।” মানস ইঙ্গিত করে।

সম্ভবপর নাম নিয়ে কিছুক্ষণ আলোচনা হয়। কোনোটাই দু’জনের পছন্দ হয় না। আপাতত পাকিস্তানই মেনে নিতে হয়।

“ধন্যবাদ, মল্লিক সাহেব। আপনি আজ আমার চোখ ফুটিয়ে দিলেন। এবার আমিও আপনাকে এমন কিছু বলব যাতে আপনারও চোখ ফোটে।” আখতার বলেন।

“সে কেমন কথা?” মানস আশ্চর্য হয়।

‘সাত বছর আগে আমরা বাঙালী মুসলমান ছিলাম। ইতিমধ্যে এমন ক’ হলো যার ফলে আমরা আজ পাকিস্তানী মুসলমান হয়েছি বা হতে চাইছি? সেটা আর কিছু নয়, কায়দে আজম আমাদের আশা দিয়েছেন যে বাঙালী মুসলমান হিসাবে শুধুমাত্র সীলেন্ট নয়, পাকিস্তানী হিসাবে অসমীয়াভাষী ব্রহ্মপুত্র উপত্যকা ও পার্বত্য অঞ্চল সমেত সমগ্র আসামই আমরা পাব। আমাদের ভূমিহীন চাষীরা সেখানে গিয়ে বসবাস করতে পারবে। দশ বিশ বছরের মধ্যে আসাম প্রদেশও মুসলমানপ্রধান ও বাঙালীপ্রধান হবে। তাতে আপনাদেরও তো লাভ। কিন্তু ওই যে আপনি বললেন, পাইকারী হারে লোকবিনিময় যদি হয়ে যায় তবে উদ্ভাষী মুসলমান এসে বাংলাভাষী মুসলমানদের কিস্তিমাংস করবে।’ আখতার স্বীকারোক্তি করেন।

“গুড গড, মিস্টার জামান।” মানস মাথায় হাত দিয়ে বসে। “এক ডিলে ক’টা পাখী আপনারা মারবেন? পাঁচটা মেরেও সন্তুষ্ট নন। আগে একটা মারবেন? আসাম?”

‘পাঁচটা পাখী কী বলছেন, বুঝতে পারলুম না।’ আখতার বলেন।

কামালউদ্দীন সাহেবের সঙ্গে যে কথাবার্তা হয়েছিল মানস তার বিবরণ দেয়। “কামালউদ্দীনও জানতেন না যে আরো একটা পাখী মরবে।”

আখতার লজ্জিত হন। “কংগ্রেস কক্ষনো এতগুলো দাবী মানবে না। একমাত্র ভরসা ইংরেজ। তাদেরই বা এমন কী গরজ যে মুসলিম লীগের পক্ষ নিয়ে কংগ্রেসের সঙ্গে লড়তে যাবে? বিশেষত যাবার মুখে। যদি সত্যি সত্যি যায়!”

“না গেলে মুসলিম লীগের সাহায্যে একটার পর একটা মিউটিনি দমন করতে হবে। ছুভিক্ষেরও পদধ্বনি শোনা যাচ্ছে। ছুভিক্ষে দমন করার উপায়ও নিশ্চয় মুসলিম লীগ বাতলে দেবে। যেমন তেতাল্লিখ মালে দিয়েছিল। আমি তো বলি জিন্না সাহেবকে দিল্লীর সিংহাসনে বসিয়ে দিয়ে ইংরেজরা তাঁর মাথার উপরে রাজছত্র ধরুক। কংগ্রেস জেলে ফিয়ে যাক। মহাত্মা সেদিন কাকে যেন বলেছেন, জবাহরলাল কেন ওদের চোয়ালের ডিতর ঢোকাক জ্ঞো ছুটে যাচ্ছেন? ব্যস্ততাটা জবাহরলাল আর আজাদেরই বেশী। গান্ধীজীর তো নয়ই, বল্লভভাইয়েরও নয়। বড়লাটকেই এঁদের কাছে ছুটতে হবে, এঁদেরকে বড়লাটের কাছে নয়। আগ্নেয়গিরি শিখরে বসে বড়লাট কতদিন লাভাবর্ষণ ঠোকড়ে রাখতে পারেন দেখা যাক। লর্ড ওয়েভেল সিদ্ধাপুর, মালয়, বার্মা থেকে অপসরণ করেছেন, এবার ভারত থেকেও অপসরণ করবেন। যদি সব দিক সামলাতে না পারেন। ওদিকে ইউরোপীয় অফিসাররা ঘরমুখো। তাঁদের ক্ষতিপূরণ ও পেনসন সম্বন্ধে সিদ্ধান্ত নেবার জ্ঞোও একটা ইন্টারিম গভর্নমেন্ট প্রয়োজন। সেটা গঠন করা জিন্না সাহেবের প্রথম কর্তব্য হবে, যদি তিনি বড়লাটের আমন্ত্রণ পান। এক টিলে ছয় পাখী মারা তো পরের কথা।” মানস উপহাস করে।

“আপনি কি মনে করেন কংগ্রেস আবার জেলে ফিরে যাবে? পাট আটটা প্রদেশের মন্ত্রীপদ ত্যাগ করবে? কেন্দ্রে অর্ধেক রাজত্বের প্রস্তাব উপেক্ষা করবে? আজাদকে বর্জন করলে এমন কী ক্ষতি হবে?” আখতার ভেবে পান না।

“আজাদ সেই প্রথম মহাযুদ্ধের সময় থেকেই বন্দী হয়ে আসছেন। সাম্রাজ্যবাদের বিরুদ্ধে তাঁর সংগ্রাম গান্ধীজীরও পূর্বের। নৈতিক বলুন, রাজনৈতিক বলুন তাঁর দাবী কারো চেয়ে কম নয়। সাম্প্রদায়িক কারণে তাঁকে বর্জন করলে কংগ্রেস তার নিজের মুখে চূণকালি মাখবে। এর পরে



যদি সংগ্রামের দরকার হয় একজনও মুসলমান কংগ্রেসের ডাকে লাড়া দেবে না। মুসলিম নির্বাচকদের ভোট কংগ্রেস প্রার্থীরাও বহু ক্ষেত্রে পেয়েছেন, তবে বহুল পরিমাণে নয়। কংগ্রেসের প্রতি আহুগত্য হিন্দু মুসলমান শিখ খ্রীষ্টান সকলেরই আছে, তাই কংগ্রেস শুধু হিন্দুর প্রতিষ্ঠান নয়। কংগ্রেস চায় সেকুলার স্টেট, আমেরিকা যার আদর্শ। দুঃখের বিষয় ইংরেজদের এটা বিশ্বাস হচ্ছে না, পাছে তাঁদের মুসলিম মিতাদের মামলা দুর্বল হয়। বেশ তো, তাঁরা তাঁদের মুসলিম মিতাদের নিয়ে যতদিন চালাতে পারেন, চালান। কে তাঁদের পায়ে ধরে সাধছে যে কংগ্রেসকেও সঙ্গে নিতে হবে, তার জন্তে আজাদকে বিসজ্ঞ দিতে হবে। এটা ক্রিকেট নয়। কংগ্রেসকে ডাকলে সে কংগ্রেস হাই কমান্ডের তিনজন নেতাকেই নেহেরু সাথী করবে।” মানস যতদূর জানে।

“কিছু মনে করবেন না, মল্লিক সাহেব। আজাদের মহত্ব আমিও মানি। কিন্তু ভারতের নিয়তি নির্ভর করছে কংগ্রেস লীগ মীমাংসার উপরে। জিন্নাকে বাদ দিয়ে সে মীমাংসা হতে পারে না। আজাদকে বাদ দিয়ে হতে পারে। তিনি যদি সেরে দাঁড়ান মীমাংসা সুগম হয়।” আখতার বলেন।

মানস হেসে বলে, “কিন্তু তিনি সরে গেলেও তো ভারতের কেন্দ্রীয় আইন সভা থেকে কংগ্রেসের ক্রট মেজরিটি সরে যাবে না। সরকার মনোনীত সদস্যরা যদি নিরপেক্ষ থাকেন। জিন্নার মাথাব্যথার কারণ কংগ্রেসের ওই ক্রট মেজরিটি। কংগ্রেস যেমন ব্রিটিশ সরকারের ক্রট ফোর্সের কাছে সারেগার করবে না জিন্না সাহেবও তেমনি কংগ্রেসের ক্রট মেজরিটির কাছে সারেগার করবেন না। তাঁকে নিষ্কণ্টক করতে হলে কংগ্রেসের ক্রট মেজরিটিকেও সরাতে হবে। শুধু আজাদকে নয়। ওয়েটেজ, প্যারিটি ইত্যাদি কত রকম দাবী গুর রুলিতে! সেসব একে একে বেরোবে। কংগ্রেস একে একে প্রত্যেকটি খারিজ করবে, কারণ তার মেজরিটির পায়ের তলায় রয়েছে ছাব্বিশ সাতাশ বছরের অফুরন্ত সংগ্রাম। লক্ষ লক্ষ মানুষের কারাবরণ। হাজার হাজার কর্মীর ত্যাগ ও সেবা। নেতাদের পারিবারিক জীবনের বিপর্যয়। দীর্ঘকালের ঐকান্তিক সাধনার ফলে সে যদি মেজরিটি পেয়ে থাকে তবে সেটা জনসাধারণের আহ্বার জোরে। গায়ের জোরে বা মস্তের জোরে নয়। কংগ্রেসের সেই কষ্টার্জিত মেজরিটিকে ক্রট মেজরিটি বা হিন্দু মেজরিটি বলে খাটো করতে গেলে মীমাংসা কারো সঙ্গেই হবার নয়। না

মুসলিম লীগের সঙ্গে, না ব্রিটিশ সরকারের সঙ্গে। আজাদের অবশ্য সেরে যাবার সময় হয়েছে। তিনি ছ'বছর ধরে কংগ্রেস প্রেসিডেন্ট।”

“কিন্তু আমি বলছিলাম ইন্টারিম গভর্নমেন্ট ও কনস্টিটুয়েন্ট অ্যাসেম্বলী থেকে সেরে দাঁড়ানোর কথা। মীমাংসা তো সেই দুটি ফোরামেই হবে। সে দুটি ফোরামে যদি আজাদ থাকেন তবে জিন্না থাকবেন না বলেই আমার ধারণা। আর জিন্নাই তো হ্যামলেট নাটকের প্রিন্স অভ্ ডেনমার্ক। তিনি না থাকলে নাটক জমবে না।” আখতার ভবিষ্যদ্বাণী করেন।

মানস চমকে ওঠে। সে কখনো এ লাইনে ভাবেনি। “কিন্তু এই অ্যাংগ্লিগিরির শিখরে বসে বড়লাট কী করে সরকার চালাবেন? কতদিনই বা চালাতে পারবেন? মীমাংসা জরুরি। মীমাংসা হবেই। নয়তো লাঙ্গাবর্ষণের সময় বিনা মীমাংসায় অপসরণ করতে হবে।” মানসও ভবিষ্যদ্বাণী করে।

‘বাঁশের চেয়ে কঞ্চি দড়। গান্ধীর চেয়ে জিন্না দড়। এ বছরটা জিন্নার বছর। যেমন ১৯৪২ সালটা ছিল গান্ধীর বছর। জিন্না ডাক দিলে তুলকালাম কাণ্ড বাধবে।’ আখতার আশঙ্কা করেন।

“তা যদি হয় তবে শাপে বর হবে। ইংরেজরা আরো আগে কুইট করবে। ডিভাইড করারও সময় পাবে না। আজাদও বাদ নন, জিন্নাও বাদ নন, বড়লাটই বাদ। ত্রিভুজের একটা ভুজ বাদ গেলে বাকী দুটোর মধ্যেই মীমাংসা হবে। এক দফা গৃহযুদ্ধের পর সন্ধি। সে দুটো ভুজও বড়ো আর ছোট। মেজরিটি আর মাইনরিটি। মীমাংসা যেটা হবে সেটা সমানে সমানে নয়, অসমানে অসমানে। মুসলিম লীগ কলকাতা পাবে না, দিল্লী পাবে না, লাহোর পাবে কি-না সেটা নির্ভর করবে শিখ মাইনরিটির উপরে, হিন্দু মেজরিটির উপরে নয়।” মানস সেটা অনিশ্চিত রেখে দেয়।

“কিছু মনে করবেন না, মল্লিক শাহেব, সেই যে একটা কথা আছে না, বারো হাত কাঁকুড়ের তেরো হাত বাঁচি। তেমনি এক কাঁকুড় হচ্ছে সারা বাংলাদেশ আর তেমনি এক বাঁচি হচ্ছে কলকাতা মহানগরী। বাঙালী হিন্দুর মাথায় ঢুকেছে যে বারো হাত কাঁকুড়ের চেয়ে তেরো হাত বাঁচির গুরুত্ব বেশী। তাই সে কলকাতার জন্তে লড়বে, সারা বাংলার জন্তে লড়বে না। কী করে এদের বোঝাব যে সারা বাংলার রক্ত চুষে কলকাতা আজ ফুলে ধোঁপে উঠেছে। সারা বাংলার থেকে বিচ্ছিন্ন হলে তার রক্ত শুকিয়ে যাবে, সেটা হবে একটা মরা

শহর। এই ঐতিহাসিক মুহূর্তে প্রকৃত সমাধান হচ্ছে সারা বাংলার জগ্রে স্বতন্ত্র ও স্বাধীন এক রাষ্ট্র। যার রাষ্ট্রপতি একজন হিন্দু ও প্রধানমন্ত্রী একজন মুসলমান। কিংবা রাষ্ট্রপতি একজন মুসলমান ও প্রধানমন্ত্রী একজন হিন্দু। শাসনতন্ত্র এমনভাবে প্রস্তুত হবে যাতে এই ব্যবস্থাই হয় পার্মানেন্ট সেটলমেন্ট। তখন দেখবেন মুসলমানরা পাকিস্তান চাইবে না, পূর্ব পাকিস্তান তো কিছুতেই না। যে সমস্তা শরৎ বোস আর সুহরাবর্দী মিলে মিটিয়ে দিতে পারেন তার জগ্রে নিখিল ভারত কংগ্রেস ও নিখিল ভারত মুসলিম লীগের মুখের দিকে তাকিয়ে থাকা কেন? ওঁরা কি বাংলার নাড়ী জানেন? বাঙালীর মন বোঝেন? লর্ড কার্জন সেটা জানতেন না। তাই একটা ঐতিহাসিক অপসিদ্ধান্ত গ্রহণ করেছিলেন। সেটা রদ করার জগ্রে কলকাতার সুরেন্দ্রনাথ, ময়মনসিংহের আনন্দমোহন, বর্ধমানের আবুল কাসেম, কুমিল্লার আবদুল রশ্বল এককটা হয়েছিলেন। উপায়ান্তর নেই দেখে ঢাকার নবাব মুসলিম এডুকেশনাল কনফারেন্সের অধিবেশনের শেষে সমবেত অবাঙালী মুসলমানদের নিয়ে রাতারাতি একটা পলিটিকাল সংস্থা পত্তন করেন। নাম রাখা হয় অল ইণ্ডিয়া মুসলিম লীগ। হ্যাঁ, মুসলিম লীগ হঠাৎ ভুঁই ফুঁড়ে ওঠে। যেখানে ওঠার কথা নয় সেইখানে, ঢাকায়। তেমনি পাকিস্তানও হঠাৎ ভুঁই ফুঁড়ে উঠছে। যেখানে ওঠার কথা নয় সেইখানে, বাংলাদেশে। পাকিস্তান শব্দটি তো বিভিন্ন প্রদেশের নামের আশ্রয় অক্ষর জুড়ে জুড়ে বানানো। কই, তার মধ্যে বেঙ্গলের বি কই? ওর একটা ধর্মীয় ব্যাখ্যা দিয়ে বাঙালী মুসলমানকে ভোলানো হয়েছে। এরাও পাইকারিভাবে ভোট দিয়েছে। কিন্তু সত্যি কি ওটা বাঙালী মুসলমানের স্বার্থে? বাঙালী হিন্দুর স্বার্থে তো নয়ই। বাঙালী হিন্দু মুসলমানের স্বার্থ স্বতন্ত্র ও স্বাধীন রাষ্ট্র প্রতিষ্ঠা। যার রাষ্ট্রপতি হিন্দু হলে প্রধানমন্ত্রী হবেন মুসলমান। কিংবা প্রধানমন্ত্রী হিন্দু হলে রাষ্ট্রপতি হবেন মুসলমান। ক্ষমতার বন্টন হবে এমন ভাবে যে কোনো সম্প্রদায়ই প্রভু সম্প্রদায় হবে না। যেটা পাকিস্তান হলে অনিবার্য, অথও ভারত হলে তো অবশ্যস্বাবী। ইংরেজরা যাচ্ছে যাক, কিন্তু সেটা শাপে বর না হয়ে চিরস্থায়ী অভিশাপ হবে, যদি বাঙালী হিন্দু মুসলমান ক্ষমতা ভাগাভাগি না করে বাসভূমি ভাগাভাগি করে। কিছু মনে করবেন না, সার। আমি তো আপনার তুলনায় শিশু। এই সেদিন বিলেত থেকে ফিরেছি। দেশের রাজনীতির খেই হাগিয়ে ফেলেছি! কে জানে আমিই হয়তো ভ্রান্ত।” আখতার সাহেব এক নিঃশ্বাসে বলে যান।

“না, না, আপনি ভ্রান্ত নন, মিস্টার জামান। কিন্তু ব্যাপারটা ঘোরালো। পার্টিতে পার্টিতে কোয়ালিশন যদি না হয় হিন্দু রাষ্ট্রপতি আর মুসলিম প্রধানমন্ত্রী আগ্নেয়গিরির লাভাবর্ষণ রোধ করতে অক্ষম হবেন। পার্টিশন আপনাআপনি ঘটে যাবে।” মানস আশঙ্কা করে।

“কিন্তু পার্টিশন হলে তো প্রদেশকে ভিত্তি করেই হবে।” আখতারের ধারণা।

“তেমন কী কথা আছে? অঞ্চলকে ভিত্তি করে কেন নয়? হিন্দুদের ক্রট মেজরিটির ভয়ে যদি ভারত ভাগ হয় তবে মুসলমানদের ক্রট মেজরিটির ভয়ে বাংলা ভাগ হবে না কেন? আমি কিন্তু কোনোটারই পক্ষপাতী নই। ক্রট মেজরিটি আমার উক্তি বা আমার যুক্তি নয়। জিন্না সাহেবই এর জনক। মেজরিটি হলেই সে ক্রট হবে, এটা ধরে নেওয়া ভুল। উত্তর-পশ্চিম সীমান্ত প্রদেশে মুসলমানদের মেজরিটি, কিন্তু হিন্দুরা তার জন্তে ভীত নয়, তাদের মুখে শোনা যায় না যে মেজরিটি হচ্ছে ক্রট মেজরিটি। বাংলাদেশেও আমরা মুসলিম মেজরিটিকে ভয় করিনে, ক্রট মেজরিটি বলিনে। কিন্তু মুসলিম লীগের সঙ্গে কোয়ালিশন যদি না হয়, তার পরিবর্তে যদি হয় পার্টিশন, তা হলে প্রদেশের ভিত্তিতে নয়, অঞ্চলের ভিত্তিতে পার্টিশনের দাবী উঠবেই। মেটা তেরো হাত বীচির মোড় নয়, দুই নেশন থিওরির আনুযায়িক মিথ্যা ও মিথ্যার আনুযায়িক হিংসার প্রতিবাদে। সারা বাংলাদেশটাই হিন্দুর হোমল্যাণ্ড। তাকে মুসলিম হোমল্যাণ্ড বলে পাকিস্তানের সামিল করতে গেলে এই হবে তার উত্তর। এটা খাদের পছন্দ নয় তারা প্রশ্নটা তুলে নিন। ভারত অবিভক্ত থাকলে বাংলাদেশও অবিভক্ত থাকবে। মুসলিম মেজরিটি প্রদেশ শাসন করলে হিন্দুরাও তা মেনে নেবে। এতদিন তো মেনে নিয়েছে। আমার কথা যদি বলেন আমি মন্ত্রীদের জাত ধর্ম বিচার করিনে, পলিসি বিচার করি। অফিসারদের জাত ধর্ম বিচার করিনে, যোগ্যতা বিচার করি। রাইট ম্যান, রাইট পলিসি এইসবই বিচার্য। মুসলিম লীগের যেসব পলিসি গ্রাসঙ্গত সেসব পলিসি আমি সমর্থন করি। মুসলিম অফিসারদের মধ্যে তারা হিন্দু মুসলমান সকলের উপকার করেন আমি তাঁদের প্রশংসা করি। কেন তাঁরা পর হয়ে যাবেন, কেন আমাদের পর মনে করবেন, এর কোনো মঙ্গত কাবণ আমি জানিনে। ইংরেজরা চলে যাবে বলে মুসলমানরাও চলে যাবে এটা কি ইতিহাসের নির্দেশ? না দুই নেশন থিওরির পরিণাম? সব চেয়ে দুঃখের

বিষয় সাধারণ নির্বাচনে এই থিওরি অধিকাংশ মুসলমানের ভোট পেয়ে জিত্তা সাহেবের উপর আস্থা প্রমাণ করেছে। তিনি এখন সেই ভোটের জোরে পাকিস্তান দাবী করবেন, না পেলে গায়ের জোরে তুলকালাম কাণ্ড করবেন। করা সহজ, কারণ দেশের অবস্থা এখন অগ্নিগর্ভ। ক্যাবিনেট মিশন যদি তাঁকে নিরস্ত করতে গিয়ে নতুন এক এ্যাওয়ার্ড দেয় তা হলে কংগ্রেস তা এবার সরাসরি বর্জন করবে। নয়তো তিনিই প্রকারান্তরে ভীটো দেবেন। আমি এই নাটকের নীরব দর্শক। এ নাটক বিয়োগান্ত না হলেই রক্ষা।” মানস চিন্তাকুল।

“আমার নিজের মতে দুই নেশন থিওরি হচ্ছে বুটো আর পাকিস্তান হচ্ছে ফাঁকিস্তান। বাঙালী মুসলমান একদিন এটা হৃদয়ঙ্গম করবেই। কিন্তু ব্যাপার এতদূর গড়িয়েছে যে এখন আর মোড় ঘুরিয়ে দিতে পারা যাবে না। তার জন্মে চাই আরো একটা সাধারণ নির্বাচন। আমাদের এখন দেখতে হবে যাতে কংগ্রেস লীগ কোয়ালিশন অন্তত আমাদের এই প্রদেশে হয়। বাংলাদেশ আজ যা করে অবশিষ্ট ভারত কাল তা করে। গোথলের সেই উক্তি কি মিথ্যা হবে? আমি তলে তলে চেষ্টা করে যাব। ইনশা আল্লা, যদি সফল হই তবে বাকী ভারত ভাগ হয়ে গেলেও বাংলাদেশ ভাগ হবে না। স্বতন্ত্র ও স্বাধীন হবে। শরৎ বোস প্রেসিডেন্ট, সুহরাবর্দী প্রাইম মিনিস্টার। খোদা হাফেজ।” আখতার বিদায় নেন :

বাড়ী ফিরতে দেরি হয়েছিল। খাদি কর্মী বন্ধিম কর তার জন্মে প্রতীক্ষা করছিলেন। সৌম্যদার বন্ধু। একসঙ্গে জেল খেটেছেন।

“সৌম্যদার চিঠি পেয়েছি। ওরা ভালোই আছে। কিন্তু ওদের কুঁড়েঘর এখনো বাসযোগ্য হয়নি। বৌদি চান কলকাতার মতো বাথরুম ও টয়লেট। শহরের ক’জন বড়লোকের বাড়ীতে তা আছে? কুঁড়েঘরে তো একেবারেই বেমানান। তার সঙ্গে দু’খানা পাকা ঘর জুড়তে হবে। টাকা অবশ্য বৌদিই জোগাবেন, তাঁর অর্থের অভাব নেই। কিন্তু লোকে বলবে কী?”

মানস যুথিকার দিকে তাকায়। “এক আজব সমস্যা।”

“সমস্যা না ছাই। জনগণের সঙ্গে একাত্ম হতে হবে বলে কি তাদের মতো মাঠে ডগ্গলে ছুটতে হবে? শৌচের ব্যবস্থা যার যে রকম রুচি। এ ক্ষেত্রে জোর জবরদস্তি করা অহিংস নয়। সে অধিকার জনগণেরও নেই। সৌম্যদা যদি জনগণের কাছে নত হয় তা হলে জানব স্বাধীন ভারতে ব্যক্তি স্বাধীনতা বলে কিছু থাকবে না।” যুথিকা জুলির পক্ষ নেয়।

“যশ্মিন্ দেশে যদাচারঃ। ইংরেজরাও তো বলে, হোয়েন ইউ আর ইন রোম ডু আজ ছা রোমানস ডু।” বক্ষিমবাবু সাফাই নেন।

“কী, জঙ্গসাহেব? তোমার রায় কী।” যুথিকা কৌতুক করে।

“শরৎচন্দ্র তাঁর ‘পল্লীসমাজ’ উপন্যাসে এর উত্তর দিয়ে গেছেন। তুমি যদি লোকের উপকার করতে যাও তো তাদের একজন হতে হবে। তার জন্মে তাদের লেভেলে নামতে হবে। গান্ধীপন্থী কর্মীরা যদি বিদেশী মিশনারীদের মতো বাস করে তবে উপকারও তেমনি ভাঙ্গা ভাঙ্গা হবে। তারা যখন চলে যাবে তখন কেউ তাদের শিক্ষা মনে রাখবে না। সৌম্যদাও কি ওখানে বরাবর থাকবে। তা তো মনে হয় না। স্বরাজের পর কাজ ফুরিয়ে যাবে। সঙ্গে সঙ্গে সহধর্মিণীরও।” মানস যতদূর বোঝে।

“গান্ধীপন্থী কর্মীদের কাজ স্বরাজের পরেও ফুরোবার নয়, জঙ্গ সাহেব। স্বরাজ একটা অবশ্য প্রয়োজনীয় প্রথম পদক্ষেপ। আমাদের লক্ষ্য সর্বোদয়। আমরা শেষ মানুষটি পর্যন্ত যাব। তাকে দারিদ্র্য থেকে উদ্ধার করব, কর্মহীনতা থেকে উদ্ধার করব, অজ্ঞতা থেকে উদ্ধার করব, দুর্বলতা থেকে উদ্ধার করব। সে অজ্ঞায়ের বিরুদ্ধে খালি হাতে লড়াইতে পারবে। তার মতো লোকদের মত না নিয়ে কেউ রাজা হতে পারবে না, তাদের উপর খাজনা ধার্য করতে পারবে না, তাদের ইচ্ছার বিরুদ্ধে তাদের ধরে নিয়ে গিয়ে যুদ্ধক্ষেত্রে পাঠাতে পারবে না। এই হচ্ছে স্বরাজের তাৎপর্য। কে কার হাতে ক্ষমতা হস্তান্তর করল না করল সেটা গোপ। দেখছেন তো তাদের সর্বপ্রধান সেবক গান্ধীজীর সঙ্গে নেগোশিয়েশন না চালিয়ে ব্রিটিশ ক্যাবিনেট মিশন তাঁর অন্তর্ভুক্ত ও প্রতিদ্বন্দ্বীদের সঙ্গে চালাচ্ছেন। গান্ধীজীকে বাদ দেওয়া মানে পীপলকে বাদ দেওয়া। হস্তান্তর যেটা হবে সেটা উপরে উপরে হবে। সব নিচের মানুষটি পর্যন্ত পৌঁছবে না। কাজেই সৌম্যদাকে থাকতে হবে সেই মানুষটির কাছে। তাকে ছেড়ে গেলে চলবে না। আর বৌদি যদি সমস্ত জেনেশুনে বিয়ে করে থাকেন তবে তাঁকেও অন্তর্ভুক্ত হতে হবে।” বক্ষিমবাবুর মতে।

“দাদা, আপনি কি বিয়ে করেছেন?” যুথিকা সন্দিক্ষ স্বরে জিজ্ঞাসা করে।

“দাদা, আমার বিয়ে হয়েছিল ভিখারী স্বামীকে তিনি ত্যাগ করেছেন। আমিও মুক্ত, তিনিও মুক্ত।” বক্ষিমবাবু দীর্ঘনিঃশ্বাস ফেলে নেন।

## ॥ পনেরো ॥

জাহাজে ওঠার আগে মিলি চিঠি লেখে জুলিকে। বলে, “আমি আবার অকূলে ভাসলুম রে! জীবন আমাকে যেখানে নিয়ে যাবে সেখানেই আমার স্থান। রানীর রানী হতে চাইলেই কি হওয়া যায়, ভাই? তোকেও বুঝতে হবে যে জোন অর্ক হতে চাইলেই হওয়া যায় না। নৌসেনা বিদ্রোহ বা সিপাহী বিদ্রোহ কোনোটাই এদেশে জন্মবে না। তার আগেই এদেশ স্বাধীন হবে। আগ্নায়াল্যাণ্ডের মতো স্বাধীন। তার পরেও যদি কেউ আইরিশ রেশাবলিকান আমির মতো অথও ভারতীয় সেনা গঠন করতে চায় করতে পারে। কিন্তু আমি তার মধ্যে নেই। বারা আমাদের নয় তারা আমাদের নয়। জোর করে তাদের আপন করা যায় না। ওরা যদি আলাদা হতে চায় আলাদাই হোক। শুধু দেখতে হবে যেন আমাদের ভাগ থেকে কলকাতা বাদ না পড়ে! ইংরেজদের ঘটে ওটুকু বুদ্ধি আছে। ওরা যদিও পিটারকে বঞ্চিত করে পলকে দিতে ওতাদ তবু ভারত ত্যাগের সময় পিটারকে চিরশত্রু করতে সাহস পাবে না। বাণিজ্য তো পিটারের সঙ্গেই। আর ওরা বণিক জাতি।”

এর পর মিলি আসে আসল কথায়। “জুলি, আমার বিশেষ অন্তর্বোধ যতদিন না তোর নিজের কুটীর হয় ততদিন আমাদের বাড়ীই তোর বাড়ী। আমার মা বাবাই তোর মাসিমা মেসোমশায়। তুই ওঁদের কাছেই থাকিস্। তাতে ওরা আমাকে কাছে না পাওয়ার দুঃখ ভুলবেন। তুই ওঁদের আরেকটি মেয়ে। শুধু মনে রাখিস্ যে ওঁরা রাজনীতির লোক নন, রাজনীতি এড়িয়ে চলেন। ওঁদের পক্ষে ওটাই নিরাপদ পলিসি। জলে বাস করে কুমীরের সঙ্গে বিবাদ সাজে না। ওঁদের কাছে এটা স্পষ্ট যে ওঁদের বাসস্থানটা কুস্তারীস্থান হতে যাচ্ছে। যদি না কংগ্রেস লীগ কোয়ালিশন হয়।”

মিলির নৌসেনাবিদ্রোহে জড়িয়ে পড়ার বিশদ বিবরণ সে নিজে লেখেনি। লিখেছেন তার দাদা। জুলিকে নয়, ওর বাবাকে। ক্যাপটেন মুস্তাফী সেটা শোনান ওর মাকে। ওর মা শোনান জুলিকে। আর জুলি সৌম্যকে।

সৌম্য তা শুনে বলে, “ওর ভিতরে যে আগুন ছিল তা দেখছি এতকাল পরেও নিবে যায়নি। ধন্নি মেয়ে!”

জুলির তা শুনে কী অভিমান ! “তোমার সঙ্গে ঠিক মানাত। আমি তো কবে নিবে গেছি, যদি আদৌ জলে থাকি।”

“না, না, তোমার জিতরেও আগুন আছে, জুলি। সে আগুন তুমি লক্ষ লক্ষ নরনারীর জীবনে ধীরে ধীরে ও অলক্ষ্যে সঞ্চারিত করবে। বাক্য দিয়ে নয়, ব্যক্তিত্ব দিয়ে। জন জাগরণ না হলে আমরা ক্ষণস্থায়ী অগ্নিকাণ্ড নিয়ে কী করব ! আমরা যাকে গঠনের কাজ বলি তা জনজাগরণের সূত্র। দেখতে নাটকীয় নয় বলে বামপন্থীরা বিমুখ। দক্ষিণপন্থীদেরও চাড়া নেই, কারণ তাঁরা আইনসভায় গিয়ে মর্দা হতে চান। এবার বড়লাটের শাসনপরিষদের সদস্য হয়েই তাঁদের ইচ্ছাপূর্ণ। যার জগে আজীবন দুশ্চর্য তপস্তা। এর পরে একদিন শুনবে তাঁরা পদত্যাগ করে ফিরে এসেছেন। আমাদের পথ তেমন পথ নয়। আমরা জনগণের কাছে যাই ভোটের জগে নয়। ওদের ভিতরে আগুন সঞ্চার কবতে। যে আগুন হিংসার আগুন নয়, তেজস্বিতার আগুন।” সৌম্য জুলিকে বোঝায়।

ইনটারিম গভর্নমেন্টের প্রসঙ্গ ওঠে। সৌম্য বলে, “জবাহরলাল ও আজাদ অত্যধিক ব্যগ্র। তাঁদের মতে ওটা নাকি প্রোভিজনাল গভর্নমেন্ট। বিপ্লবের পর যেমন হয়। বিপ্লব কবে হলো যে প্রোভিজনাল গভর্নমেন্ট হবে ? কোদালকে কোদাল বনাই ভালো। ওটা বড়লাটের নিয়ন্ত্রণাধীনই থাকবে, নেহরু নামক প্রধানমন্ত্রীর নয়। প্রধানমন্ত্রী পদটাও কবিকল্পনা। বড়লাট বা মুসলিম লীগ কেউ সেটা মেনে নেবে না। উপরতন দায়িত্ব ব্রিটিশ ক্যাবিনেট তথা ব্রিটিশ প্যারলিামেন্টেরই থাকবে। ভারতের কেন্দ্রীয় আইনসভার নয়। অনাস্থা প্রস্তাব পাশ করে আইনসভা কাউকে পদচ্যুত করতে পারবে না। বড়লাট অসম্মত হলে কিছুর তা করতে পারবেন। আর মুসলিম লীগকেও মাসুল জোগাতে হবে। রকমারি মাসুল। নয়তো ওরা সহযোগিতা করবে না। ওরা সহযোগিতা না করলে বড়লাট কংগ্রেসকেই বলবেন ওদের মান ভঙ্গন করতে। বাপু কী করবেন ? জবাহর ও আজাদকে টেনে রাখবেন না যেতে দেবেন ? ভিতরে ভিতরে এটা গান্ধী বনাম জিন্না। বাইরে থেকে মনে হর ব্রিটেন বনাম ভারত।”

মিলির অহুরোধে নয়, মুত্তাফীদের অহুরোধেই ওরা তাঁদের ওখানে থাকে। আশ্রমে ওদের উল্লেখ স্বতন্ত্র বন্দোবস্ত হলে সেখানে উঠে যাবে।

মুত্তাফীরা প্রত্যেক শুক্রবার রিসিভ করতেন। সন্ধ্যাবেলা তাঁদের



বৈঠকখানায় আসতেন শহরের গণ্যমান্য উকীল, ডাক্তার, অধ্যাপক ও সরকারী কর্মচারী। সবরকম বিষয়েই আলাপ আলোচনা হতো।

রায় বাহাদুর বাহুদেব হালদার বলেন, “কেবল ইংরেজদের সঙ্গে নয় মুসলমানদের সঙ্গেও একটা হৃদয়ভরা সম্পর্ক চাই। যেটা শাসক শাসিতের নয়, শোষক শোষিতের নয়, উচ্চ নীচের নয়। স্বীকার করতেই হবে যে ইংরেজদের কাছ থেকে আমরা যে সমানভাব প্রত্যাশা করি অথচ পাইনে আমাদের কাছ থেকে মুসলমানরাও সেই সমানভাব প্রত্যাশা করে অথচ পায় না। তাই মুসলিম লীগের প্রথম শর্ত হলো তাকে কংগ্রেসের সঙ্গে সমান মর্যাদা ও সমান ওজন দিতে হবে। যাকে বলে প্যারিটি। কিন্তু তার মানে দাঁড়াচ্ছে একই সিংহাসনে দুই রাজা। যার নাম ঐরাজ্য। ব্রিটিশ রাজের দুই উত্তরাধিকারী সমান ক্ষমতা ও দায়িত্ব নিয়ে একই সিংহাসনে বসবে এটা কী করে সম্ভব? সঙ্গে সঙ্গে গৃহযুদ্ধ বেধে যাবে না? দারা শিকো বনাম আওরংজেব। আধুনিক আওরংজেবের সামর্থ্য থাকলে তিনি আধুনিক দারা শিকোকে সম্পূর্ণ পরাস্ত করে সমগ্র সাম্রাজ্য অধিকার করতেন। তেমন সামর্থ্য নেই জেনে ছয়টা প্রদেশের বিপরীতে ছয়টা প্রদেশ দাবী করছেন। এটাও একপ্রকার প্যারিটি। গান্ধীজীর কথা শুনে মনে হয় তিনি বিনা স্বন্দে ছয়টা প্রদেশ ছেড়ে দেবেন, কিন্তু একটি শর্তে। সোভারেনটি থাকবে ঊর্ধ্বতম পরে ফেডারল গভর্নমেন্টের হাতে। সে তিনটিমাত্র বিষয় পরিচালনা করবে। দেশরক্ষা, পররাষ্ট্রনীতি, যোগাযোগ। জিন্না সাহেবের এতে প্রদল আপত্তি। সোভারেনটি তিনি কিছুতেই ছাড়বেন না। তা হলে গিভ অ্যাণ্ড টেক হয় কী করে? গিভ অ্যাণ্ড টেক বিনা কি কংগ্রেস লীগ চুক্তি সম্ভবপর? কংগ্রেস লীগ চুক্তি না হলে কংগ্রেস লীগ সংঘর্ষ রোধ করবে কে? ইংরেজ? ইংরেজ কি চিরস্থায়ী? ওরা তো এখন যাই যাই করছে।”

এর উত্তরে সৌম্য মুখ খোলে। “গান্ধীজী তো একথাও বলছেন যে, হস্ত কংগ্রেসকে নয় লীগকে কেন্দ্রের ভার দিয়ে ওরা এক্ষুণি বিদায় হোক।”

প্রখ্যাত উকীল মোহিনীমোহন ধর রাজনীতিতেও ধুরন্ধর। তিনি চোখ বুজে শুনছিলেন। চোখ মেলে বলেন, “জিন্নার মতো তুখোড় পলিটিসিয়ান এদেশে আর জন্মাননি। গান্ধী চলেন ডালে ডালে তো জিন্না চলেন পাতায় পাতায়। ক্যাবিনেট মিশনকে তিনি আগেই জানিয়ে রেখেছেন যে দীর্ঘমেয়াদী সমাধানের আশ্বাস না পেলে ত্রুটিময় সমাধানে তাঁর আগ্রহ নেই।

পাকিস্তান হবে কি হবে না সেইটেই প্রথম কথা। ইনটারিম গভর্নমেন্ট তার পরের কথা। আর পাকিস্তান বলতে তিনি কেবল সেপারেট নয়, সোভারেন স্টেটও বোঝেন। বাংলাদেশ হবে তার একটা প্রদেশ। আসামও আরেকটা। সেটাও নাকি মুসলিম নেশনের অংশ। ক্যাবিনেট মিশনকে তিনি ধাঁধায় ফেলেছেন। ইংরেজরা শাস্তিপূর্ণ হস্তান্তরের পক্ষপাতী। অশাস্তিপূর্ণ হস্তান্তর কংগ্রেসও চায় না। কিন্তু মুসলিম লীগ যদি বলে, আমরা পাকিস্তানের জন্মে লড়তে তৈরি, মরুক না লাখে লাখে হিন্দু মুসলিম শিখ তা হলে অশাস্তির চূড়ান্ত হবে। এই নির্বাচনেই তো দেখা গেল মুসলিম নির্বাচনকেন্দ্রে মুসলিম লীগের জয়জয়কাব। ‘জব্বার যম জাব্বারুলীন। হিন্দুব যম হুরুদীন। হুরুদীনকে ভোট দিন। পাকিস্তান জিতে নিন।’ বিপুল ভোটাধিক্যে মুসলিম লীগের জয়। কৃষক প্রজার জামানত বাজেয়াপ্ত। জিন্না সাহেব এখন থেকেই পাকিস্তানের বাদশা বনে বসে আছেন। অশান্তিকে তিনি ডরান না। জেহাদ বলে একটা অস্ত্র আছে তাঁর তুণে। গান্ধীজীর সত্যগ্রহের চেয়ে ঢের বেশী দোঁরালা। দেশের জন্মে যাবা প্রাণ দিতে অনিচ্ছুক ধর্মের জন্মে তারা প্রাণ দিতে ও প্রাণ নিতে প্রস্তুত। গান্ধীজীর পরামর্শে সারা ভারত যদি মুসলিম লীগের হাতে ধরিয়ে দিয়ে ইংরেজরা বিদায় হয় তা হলে তার পরের দিনই পানিপথের যুদ্ধ। হিন্দু মহাসভা অথবা ভারতের জন্মে লড়বে। দিন দিন তারও প্রভাব বাড়ছে। সমান ভায়েলেঙ্গ। আওরংজেব বনাম শিবাজী।”

সৌম্য প্রাতিবাদ করে না। গ্রামে গ্রামে ঘুরে সেও আঁচতে পারছে হিন্দু মুসলমানের জঙ্গী মনোবৃত্তি। হিন্দুদের সংখ্যার দোর কম, তাই দাপট কম, নইলে তারা যে অহিংসার পূজারী তা নয়। সে সর্বপ্রকার যুদ্ধের বিরোধী। গৃহযুদ্ধের বিরোধী তো বটেই। কিন্তু আর-একটা যুদ্ধবিরোধী আন্দোলন করার মতো দম তার সহকর্মীদের নেই।

গৃহকর্তা কাপটেন মৃত্যুফী বিতর্কে যোগ দেন। “এর কোনো সামরিক সমাধান নেই, মোহিনী। তোমরা নেতারা একটা রাজনৈতিক সমাধান খুঁজে বার করো। ক্যাবিনেট মিশনও তারই অন্বেষণ করছে। আমার জামাতা সুরুমারের মুখে শুনেছি ব্রিটিশ প্রধানমন্ত্রী অ্যাটলী স্বয়ং ভারত সম্পর্কে সিদ্ধান্তের ভার নিয়েছেন। ভারত সম্পর্কে ফাইল এখন তাঁর নিজের দেরাজে। কাউকে জানতেই দিচ্ছেন না ব্রিটেন কী করবে না করবে। তবে

গান্ধীকে তিনি পছন্দ করেন না, গত মহাযুদ্ধের সময় গান্ধী ইংরেজদের পিঠে ছোঁরা মেরেছিলেন। জিন্নাকেও তিনি আস্কারা দিতে চান না। জিন্নার অস্ত্র জেহাদ নয়, ভীটো। সে অস্ত্র অ্যাটর্নী সাহেব জিন্নার হাতে থাকতে দেবেন না। জিন্নাও কিছুদিন পরে টের পাবেন যে ইংরেজ তাঁর খেলা খেলবে না, তাঁকেই ইংরেজের খেলা খেলতে হবে। মান অভিযান বুখা।”

মোহিনীবাঈ চোখ মিটমিট করে বলেন, “তাত, কালীকৃষ্ণ, তুমি ছাড়া আর কেউ আমাকে নেতা বলে লজ্জা দেয় না। আমার কৃষক প্রজা দল তো গোহারান হেরেছে। লোকের মেজাজ এখন তিরিফি হয়ে রয়েছে। যেখানে অবজেকটিভ চেঞ্জ সম্ভব নয়, সেখানে সাবজেকটিভ চেঞ্জ দিয়ে পরিস্থিতিকে শান্ত করতে হয়। অবজেকটিভ চেঞ্জ বলতে বৃষি ভূমিহীনকে ভূমিদান, কর্মহীনকে কর্মদান, মুদ্রাস্ফীতিরোধ, বনিকদের উপর বর্ধিত কর। ইংরেজ কর্তাদের দিয়ে এসব প্রয়োজনীয় বস্তুগত পরিবর্তন হবে না, ওঁরা সেটা উপলব্ধি করেছেন। আর সাবজেকটিভ চেঞ্জ বলতে বোঝায় ক্ষমতার হস্তান্তর। ইংরেজরা এখন এর গন্তে তৈরি। তারা জানে এখন যদি যায় মানে মানে যাবে। দেবি করলে মারামারির মধ্যে জড়িয়ে পড়বে। জট খুলতে পারবে না। শত কতক ইংরেজ প্রাণে মরতেও পারে। কিন্তু প্রশ্ন হলো শ্রীরাধা যেমন বলেছিলেন, কাত্ত হেন গুণানিধি কারে দিয়ে যাব ? ভারত হেন সাম্রাজ্য কাকে দিয়ে যাব ? কংগ্রেসকে ? না, কংগ্রেসকে যোল আনা কিছুতেই নয়। মুসলিম লীগকে ? না মুসলিম লীগকে হিন্দুপ্রধান বা শিখপ্রধান অঞ্চল কখনো নয়। তা হলে কি পার্টিশন ? পার্টিশন হলে কেবল ভারতের কেন ? বাংলার নয় কেন ? পাঞ্জাবের নয় কেন ? সে রকম একটা সিদ্ধান্ত নেবার আগে দুই বা তিন পক্ষের সম্মতি নিতে হবে। উপর থেকে চাপিয়ে দিতে গেলে বিপত্তির অবধি থাকবে না। পক্ষপাতের অভিযোগ উঠবে। হিন্দু মুসলিম শিখ আলাদা আলাদা করে ইংরেজদেরই পদাধাত করে তাড়াবে। নেগোশিয়েশন ফেল করলে ইংরেজদের সর্বনাশ, অথচ কংগ্রেস শীগগির পৌষমাস নয়। এই দুই দলের মধ্যে একটা বোঝাপড়া দরকার। তার জন্তে যদি সালিশী করতে হয় এই অধমকে ডাকলে এই অধম দোরে দোরে গিয়ে পাবে ধরে সাধতে রাজী। শিখদের আমি চিনি। কিন্তু অল্প দুই পক্ষকে চিনি। একদা কেন্দ্রীয় আইনসভার সদস্য ছিলাম। জিন্নার ইণ্ডিপেন্ডেন্ট পার্টির মেম্বর। সেদিনকার সেই প্রীতির সম্পর্ক আর নেই। তিন সেই দল ভেঙে

দিয়ে আইনসভায় মুসলিম লীগ দল গড়ায় আমিও ছিটকে পড়ি। কেন্দ্রে নয়, বাংলার আইনসভায় আমার দল হয় কৃষক প্রজা দল। তবু পরিচয় দিলে জিন্না নিশ্চয়ই চিনবেন। কংগ্রেসও এককালে ছিলুম। তার পর সি. আর. দাশের স্বরাজ পার্টিতে। অনেক ঘাটের জল খাওয়া হয়েছে। কিন্তু এখন আমি না ঘরকা না ঘাটকা। সকলের সঙ্গে কথা বললে তবেই তো বুঝতে পারব কোন্ সমাধানটা সকলের গ্রহণযোগ্য হবে। একপক্ষ নিল, অপরপক্ষ নিল না, এমন যদি হয় তবে আমিও তো ব্যর্থ।”

বাহুদেব হালদার হাসেন। “সকলের গ্রহণযোগ্য সমাধান দেবু ন জানন্তি কৃতো মনুখ্যঃ। ইংরেজরা যদি তার জন্তে অপেক্ষা করে তবে আরো অর্ধ শতাব্দী অপেক্ষা করতে হবে। ততদিন অপেক্ষা করা ওদেরও মত নয়, আমাদেরও মত নয়। চেঙ্গ একটা চাইই চাই। তার জন্তে চাই একটা রাজনৈতিক সমাধান। সেটা যে আদর্শ সমাধান হবে এমন কোনো বাধ্য-বাধকতা নেই। নাই আমার চেয়ে কানা মামাও ভালো। বোল আনা কোনো পক্ষই গাংবে না। লড়াই করলেও না। বুদ্ধিমানের কাজ গিভ অ্যাণ্ড টেক। সেটা যেভাবেই হোক। ক্ষমতা ভাগও হতে পারে। দেশ ভাগও হতে পারে। প্রদেশ ভাগও হতে পারে।”

দৌমা প্রতিবাদ করে। “না না, দেশভাগ নয়। সিদ্ধ, গঙ্গা, ব্রহ্মপুত্র অবিভাজ্য। না, না, প্রদেশভাগ নয়। বাংলার ভাষা, বাংলার সঙ্গীত অবিভাজ্য। ক্ষমতা ভাগে আমার আপত্তি নেই। ক্ষমতা ভাগ কেন, ক্ষমতার সবটাই নিক না মুসলিম লীগ। ক্ষমতা মানেই দায়িত্ব। দায়িত্বকে ভাগ করতে পারা যায় না। মুসলিম লীগ এককভাবেই নিক বাংলাদেশ সরকার গঠনের দায়িত্ব। অবিচার, অত্যাচার দেখলে আমরা সত্যগ্রহ করব। এমন ইস্যুয়ে সত্যগ্রহ করব যে মুসলমানদের একভাগও আমাদের সঙ্গে যোগ দিয়ে সরকারের ভুল নীতি বানচাল করে দেবে। আমার কাছে বিরোধিতা করার অধিকারটাই গৌরবের। বিরোধিতা অবশ্য কথায় কথায় নয়। মূলনীতির প্রশ্নে। যেখানে সরকার গঠনের দায়িত্ব কংগ্রেস নিয়েছে সেখানে মূলনীতির প্রশ্নে সত্যগ্রহ করার অধিকার মুসলিম লীগেরও রয়েছে। আমিই তখন লীগের পক্ষ নিয়ে সত্যগ্রহে নামব। গণতন্ত্রে বিরোধী পক্ষেরও মর্যাদা অনেক। মুসলিম লীগ সেই মর্যাদা লাভ করবে কেন্দ্রীয় আইনসভা ও বহুসংখ্যক প্রাদেশিক আইনসভায়। তবে অচ্যুত গণতান্ত্রিক ব্যবস্থার কয়েক বছর অন্তর অন্তর

পালাবদল হয়। বিরোধীপক্ষ হয় সরকারপক্ষ। সরকারপক্ষ হয় বিরোধীপক্ষ। তাই দুই পক্ষেরই স্বার্থ গণতান্ত্রিক শাসনতন্ত্রকে বলবৎ রাখা। আমাদের দেশে সেটা কিন্তু ব্যাহত হয়েছে স্বতন্ত্র নির্বাচন পদ্ধতির দ্বারা। তার বদলে যদি যৌথ নির্বাচন পদ্ধতি থাকত স্বতন্ত্র নির্বাচননির্ভর মুসলিম লীগ গড়ে না উঠে যৌথ নির্বাচননির্ভর ইউনিয়নিস্ট পার্টি গড়ে উঠত ও সে পার্টি একদিন কংগ্রেসের মতো হিন্দু মুসলমানের মিশ্র ভোটে নির্বাচনে জিতে সরকার গঠন করত। কনস্টিটিয়েন্ট অ্যাসেম্বলীর প্রথম কাজ হবে স্বতন্ত্র নির্বাচনের পরিবর্তে যৌথ নির্বাচন প্রবর্তন। তখন জিন্না সাহেব আবার ইণ্ডিপেন্ডেন্ট পার্টির মতো একটা মিশ্র দল পত্তন করবেন ও হিন্দু মুসলমান পার্শী খ্রিস্টানের ভোটে জিতে সরকার গঠন করবেন। কংগ্রেস কি চিরস্থায়ী? এর উৎপত্তি হয়েছে ব্রিটিশ গভর্নমেন্টের অপোজিশন হিসাবে। ব্রিটিশ গভর্নমেন্ট মহাপ্রস্থানে গেলে কংগ্রেসও মহাপ্রস্থানে যাবে। সঙ্গে সঙ্গে নয়, পাঁচ দশ কি বিশ বছর বাদে। কংগ্রেস সরকারের বিরোধী পক্ষই কংগ্রেসের পবাজয় ঘটিয়ে সরকার গঠন করবে। এমনও হতে পারে যে কংগ্রেসও ছ'ভাগ হয়ে যাবে। দক্ষিণপন্থী বনাম বামপন্থী। গত কয়েক বছর হলো তার লক্ষণ দেখা যাচ্ছে। এই মুহূর্তে বামপন্থীর দক্ষিণপন্থীদের চেয়ে দুর্বল, কিন্তু বুদ্ধদের মৃত্যু বা অবসরগ্রহণের পর বামপন্থীরাই প্রবল হবে। আমার তো বিশ্বাস এই অধ্যায়ের শুরু হয়েছে স্বতন্ত্র নির্বাচন পদ্ধতি প্রবর্তনের পর থেকে। সেই স্বতন্ত্র নির্বাচন থেকেই ধাপে ধাপে এসেছে স্বতন্ত্র বাস্তব পরিকল্পনা। তবে ইংরেজরা বোধ হয় ভাবতেই পারেনি যে তাদের ডিভাইড অ্যান্ড রুল নীতির পরিণাম হবে ডিভাইড অ্যান্ড কুইট। তারা কুইট করতে চায় করুক, নগতো আরো কিছুকাল থেকে আবার এক বিদ্রোহের সম্মুখীন হোক। কিন্তু ডিভাইড করতে হয় তো ওদের বিদ্রোহের পর আমরাই ভাইয়ে ভাইয়ে করব, ওরা নিরপেক্ষ সেজে পিঠে ভাগ করে দিয়ে যাবে কেন? আমি বিশ্বাসই করিনে যে ওরা ব্যালান্স অভ পাওয়ার নিজেদের হাতে রাখবে না। কংগ্রেস নেতাদের মতো একটা দোনোমনো ভাব আছে। গান্ধীজী কিন্তু অটল ও অনড়। পাকিস্তান দিতে হয় আমরাই দেব, ইংরেজরা নয়।”

মোহিনীবাবুকে দেখ মনে হচ্ছিল তিনি ঘুমিয়েই পড়েছেন। তা নয়। তিনি চাঞ্চা হয়ে বলেন, “জিন্না মানুষটি যে কত বড়ো তুখোড় পলিটিসিয়ান তার ধারণাই নেই গান্ধী মহারাজের। হবে কী করে? তিনি কি সত্যগ্রহ

আর গঠনকর্ম ছাড়া আর কোনো বিষয়ে মাথা খাটিয়েছেন? তিনি যেমন সত্যগ্রহ ও গঠনকর্ম বিশেষজ্ঞ, জিন্না তেমন পার্লামেন্টারি ও কনস্টিটিউশনাল স্পেশিয়ালিস্ট। তিনি এই নিয়ে লেগে আছেন পঁয়ত্রিশ বছর ধরে। গান্ধী, বল্লভভাই, রাজেন্দ্রপ্রসাদ, আজাদ, নেহরু এঁরা তাঁর তুলনায় এমেচার। ধরো, মুসলিম লীগ যদি কনস্টিটিউয়েন্ট অ্যাসেম্বলী বয়কট করে তবে কংগ্রেস কি মেজরিটির ভোটে সেপারেট ইলেকটোরেট তুলে দিয়ে জয়েন্ট ইলেকটোরেট প্রবর্তন করতে সাহস পাবে? দেশময় দাঙ্গাভাঙ্গানা বেধে যাবে না? কে থামাবে যদি ইংরেজরা না থামায় বা থামাবার শক্তি রাখে? মুসলমানরা যেদিন একবাক্যে বলবে যে স্বতন্ত্র নির্বাচন চাইনে, যৌথ নির্বাচন চাই, সেদিন এ আপদ যাবে। কিন্তু সেটা হবে পাকিস্তান অর্জনের পর তার কুফল দেখে। তার আগে নয়। আপাতত মুসলিম লীগ যদি শাসনতন্ত্র রচনায় সহযোগিতা না করে তবে শুধুমাত্র মেজরিটির ভোটে বিরাট কোনো পরিবর্তন আশা করা যায় না। কারণ কংগ্রেসের মেজরিটি হচ্ছে কয়েকটি ব্যতিক্রম বাদে হিন্দু মেজরিটি : একটা সম্প্রদায় কখনো আবেকটা সম্প্রদায়ের নিয়তি নির্ধারণ করতে পারে না। করতে গেলে গৃহযুদ্ধ অবধারিত। তবে একবার পাকিস্তান স্বীকার করে নিলে দুই সম্প্রদায়ে মিলে একটা আপসে পৌঁছতে পারে। জিন্না বার বার সেই কথাই বলে আসছেন। আপস মানে কংগ্রেস লীগ কোয়ালিশন। কংগ্রেসের মন মেজাজ যতদূর আমি বুঝি সে কারো সঙ্গে কোয়ালিশনে রাজী হবে না, যদি না কংগ্রেস হাই কমান্ডের পরামর্শ অনুসারে কোয়ালিশন সরকারের মন্ত্রীরা কাজ করেন। মুসলিম লীগেরও একটা হাই কমান্ড হয়েছে। সে তাতে নারাজ। দুই হাই কমান্ডেব গুঁতোগুঁতি কোয়ালিশন সরকার ছত্রভঙ্গ হবে। আর কোথায় না হোক বাংলাদেশে কংগ্রেস লীগ কোয়ালিশন গভর্নমেন্ট গঠন করতে পারা যেত। কিন্তু পাওয়া যাবে না। কারণ কংগ্রেস হাই কমান্ড বা লীগ হাই কমান্ড কোনো পক্ষই তাঁদের কন্ট্রোল ছাড়বেন না। এই অধর্মের উপর যদি ভার দেওয়া হতো এই অধর্ম সালিশী করতে এগিয়ে যেত। কিন্তু এই অধর্ম এখন সর্বদল পরিভ্যক্ত। তবে আমি একবার চেষ্টা করে দেখব কনস্টিটিউয়েন্ট অ্যাসেম্বলীর নির্বাচনে দাঁড়ালে কেউ আমাকে ভোট দিয়ে সেখানে পাঠায় কি না। জিন্নার সঙ্গে আমার যেমন যোগাযোগ বাংলাদেশে আর কারো তেমন নয়। আর জিন্নাই যে নারীর গুরু এটা তোমাকে স্বীকার করতেই হবে, সৌম্য। নাটের গুরু ভালোর জগ্গেও বটে, মন্দের জগ্গেও বটে।

সেবার লখনউতে কংগ্রেস লীগ প্যাক্ট হয়েছিল টিলক আর জিন্নার মধ্যস্থতায়। এবারও সেইরকম একটা প্যাক্ট হতে পারে রাজাজী আর জিন্নার মধ্যস্থতায়। রাজাজীর সঙ্গেও এই অধমের প্রীতির সম্পর্ক। কিন্তু এখন তাঁর দুদিন যাচ্ছে। তিনি কুইট ইণ্ডিয়া আন্দোলনে যোগ দেননি বলে মাদ্রাজের প্রাদেশিক গভর্নমেন্ট গঠন করার সময় তাঁকে প্রধানমন্ত্রী করা হয়নি। অথচ তিনিই তো সর্বপ্রথম পদত্যাগ করেছিলেন। কোথায় কৃতজ্ঞতা? রাজনীতিতে কৃতজ্ঞতা বলে কোনো পদার্থই নেই। মহাত্মারও একদিন সেই দশা হবে।”

সৌম্য বৈরাগ্যের সঙ্গে বলে, “তিনি রাজক্ষমতা চাননি ও চান না।”

এতক্ষণ বাদে মৌনভঙ্গ করেন অধ্যাপক মাহমুদ শরীফ। “কাথদে আভম জিন্নাহ্ সাহেবও কি ক্ষমতা চেয়েছেন না চান? তিনি চান সমতা। হিন্দু মুসলমানের সমতা, কংগ্রেস লীগের সমতা, হিন্দুস্থান পাকিস্তানের সমতা, গান্ধী জিন্নাহর সমতা। কংগ্রেস নেতাদের কাছে লিবার্টিই সবচেয়ে কাম্য। লীগ নেতাদের কাছে ইকুয়ালিটিই সবচেয়ে কাম্য। এই যে পাকিস্তানের দাবী এটা প্রকৃতপক্ষে সমতার দাবী। স্বরাজের দাবী যেমন স্বাধীনতার পাকিস্তানের দাবী তেমনি সমতার। ইংরেজরা বিদায় নিলে স্বাধীনতা আসবে, কিন্তু সমতা আসবে না, যদি না পাকিস্তানের রূপ ধরে আসে। তার মানে এক নেশন নয় দুই নেশন। সমতার প্রয়োজন আছে এটা যদি মেনে নেন তা হলে পাকিস্তানেরও প্রয়োজন আছে এটাও মেনে নিতে হবে। সমতার খাতিরেই বাংলাদেশকেও পাকিস্তানের সার্মিল করা হচ্ছে, বাংলাদেশ হবে পূর্ব পাকিস্তান, স্বতন্ত্র ও স্বাধীন বাঙ্গালীস্থান নয়। সমতার প্রয়োগ না থাকলে এর মতো ধোঁকাবাড়ি আমরা সহ্য করতুম না। এখনো সময় আছে, এখনো দেশভাগ নিবারণ করা যায়, কিন্তু কংগ্রেসের নাছোড়বান্দা মনোভাব ও মুসলিম লীগের যুদ্ধং দেহি মনোবৃত্তির ফলে দেশ যদি সত্যি সত্যি ভাগ হয়ে যায় তবে স্বাধীনতাও আসবে, সমতাও আসবে, কিন্তু আসবে না মৈত্রী। সাম্য মৈত্রী স্বাধীনতার একটি বাদ পড়বে। হিন্দু মুসলমান পরস্পরের বৈরী হয়েই কে জানে কতকাল কাটাতে! দেশ একবার ভাগ হয়ে গেলে আবার একদিন জোড়া লাগবে এটা একটা দিবাস্বপ্ন। একাকার করার জন্তে একটা রাষ্ট্র হাতিয়ার শানাতে অপরটাও হাতিয়ার শানাবে। বলপরীক্ষায় হিন্দুস্থান জিতবে, পাকিস্তান হারবে, এমন সম্ভাবনা দেখলে ব্রিটেন ছুটে আসবে হস্তক্ষেপ করতে। পাকিস্তান একবার হলে বরাবরের ভুলেই হলো মনে রাখবেন।

তৃতীয় পক্ষ যতদিন থাকবে দেশভাগও ততদিন থাকবে। ভারত ছেড়ে যাওয়া মানে ছুনিয়া ছেড়ে যাওয়া নয়। ইংরেজকে ছুনিয়া ছাড়াতে পারে এত শক্তি কংগ্রেসের বা হিন্দুর বা হিন্দুস্থানের নেই। গান্ধীজী ও তাঁর অহিংসা দেশকে স্বাধীন করতে পারে, কিন্তু একাকার করতে পারে না। অন্তত এখনো তা পারেনি। একাকার যে এখনো রয়েছে এটা তৃতীয় পক্ষের কল্যাণে। তবে একাকার করাই যদি শ্রেয় হয় তবে কায়দে আজমের সঙ্গে সমানে সমানে এগ্রিমেন্ট করতে হবে। একপক্ষ মেজরিটি অপরপক্ষ মাইনরিটি এটা এগ্রিমেন্টের মূলস্বত্র নয়। আমরা আজকাল নিজেদের আর ইণ্ডিয়ান আশনাল মাইনরিটি বলে ভাবিনে। আমরা পাকিস্তানী আশনাল মেজরিটি। এটা একটা ঐতিহাসিক বিবর্তন। আপনারা এখনো ভাবছেন যে আপনারা ইণ্ডিয়ান আশনাল মেজরিটি। আপনাদের চিন্তার বিবর্তন হয়নি। প্যারিটিই হচ্ছে পাকিস্তানের বিকল্প। আমরা যদি সারা ভারতে প্যারিটি পাই তা হলে পাকিস্তানের ওয়ে উদগ্রীব হব না। পাকিস্তানে সারা ভারতের সব মুসলমানের লাভ হবে না। যারা হিন্দুস্থানে থাকতে চাইবে বা থাকতে বাধ্য হবে তাদের অপূরণীয় ক্ষতি হবে। আর আমরা বাঙালী মুসলমানরাও যে অবাঙালী মুসলমানদের সর্বস্বটে দেখে স্থখী হব তা নয়। আপিস আদালত, দোকান বাজার, কল কারখানা, চায়ের জমি ভরে যাবে তাদের মাইগ্রেশনে। পাকিস্তানের পক্ষে তারা ভোট দিয়েছে, তাদের মাইগ্রেশনের অধিকার আছে। সব চেয়ে বড়ো বৈষম্য হবে যদি পূর্ব পাকিস্তান বলতে বোঝায় কেবল পূর্ব বঙ্গ ও সীলট। দেশভাগ চাইলেও প্রদেশ ভাগ আমরা চাইনে। আশা করি কংগ্রেসও চাইবে না। চাইলে কিন্তু বাঙালী হিন্দু আর বাঙালী মুসলমান উভয়েরই ধর ভেঙে যাবে। বাঙালী জাতীয়তার বনিয়াদ ধসে যাবে।”

সিভিল সার্জন বীরেন্দ্রনারায়ণ নিয়োগী উত্তেজিত হয়ে বলেন, “আপনারা দেখছি গাছেরটাও খাবেন, তলারটাও কুড়োবেন। মুসলমান হিসাবে পাকিস্তান আর বাঙালী হিসাবে সমগ্র বাংলাদেশ। লর্ড কার্জনের বঙ্গভঙ্গ রদ করার জন্মে কত লোক ফাঁসী গেল, আন্দামানে গেল, জেলে গেল, বেত খেল, জরিমানা দিল। তার ফলে বঙ্গভঙ্গ রদ হলো। এখন সারা বাংলার তথুতে আপনারাই রাজা হয়ে বসেছেন, তাতেও সন্তুষ্ট নন, গোটা বাংলাদেশকে স্টেপিং স্টোন করে পাকিস্তান নামক স্বতন্ত্র এক রাষ্ট্রের সিংহাসনে আরোহণ



করতে চান। বঙ্গভঙ্গ রদ করে আমরা বিহারে ঠকে গেছি, ওড়িশায় ঠকে গেছি, আসামে ঠকে গেছি, বাংলাদেশেও ঠকে গেছি। কোনোখানেই একজন বাঙালী হিন্দু প্রধানমন্ত্রী নেই। বাঙালী হিন্দু অফিসার ক্লাস এখন অনাথ।”

মুস্তাফী তাঁকে শাস্ত করে বলেন, “দেখুন, ডাক্তার সাহেব, বঙ্গভঙ্গ রদ না হলে বাঙালী হিন্দু অল্প দিক দিয়ে ঠকে যেত। বাঙালী জাতীয়তাবাদ বলে একটা মতবাদ গড়ে উঠত না। সাহিত্য, চিত্রকলা, কারুশিল্প, ইণ্ডাস্ট্রি, শিক্ষাদীক্ষা—কত দিক দিয়ে কত প্রগতি হয়েছে ভেবে দেখবেন। এই যে আজ বাঙালী মুসলমানের মুখে বাঙালী জাতীয়তাবাদের তত্ত্ব শুনেছেন এটাও সেই আন্দোলনের সফল। তবে এঁদের দোটানা এখনো যায়নি, এঁরা ইসলামের প্রতি আনুগত্য আর মাতৃভূমির প্রতি আনুগত্য দুই আনুগত্যের মধ্যে দোল খাচ্ছেন। এটা একটা সাইকোলজিকাল কেস। এটাকে সংখ্যাধিক্য বা সংখ্যালভা দিয়ে বোঝানো যায় না। কিছুকাল পাকিস্তানে বাস করলে পরে এঁদের দোটানা কেটে যাবে। তখন দেখবে এঁরাও সমান বাঙালী জাতীয়তাবাদী। দুঃখের বিষয় তার জন্মে হয়তো আবার বঙ্গভঙ্গের দরকার হবে। আমার মেয়ে মিলি এখন সেই সিদ্ধান্তে পৌঁছেছে।”

“মধুমালতীর পক্ষে ওটা একটা ডিফিট।” মোহিনীবাবু বলেন। “বাঙালী হিন্দুদের পক্ষেও, ওদের দাবী যদি হয় কার্জনোর প্রেতকে জীয়াণো। হিন্দু মুসলমানের সম্পর্ক একটা পুরনো বোতল। এর মধ্যে একটা নতুন মদ এসে ঢুকেছে। ইণ্ডিয়ান ন্যাশনালিজম। ইণ্ডিয়ান ন্যাশনালিস্টরা যখন আট আটটা প্রদেশ সাধারণ নির্বাচনে জিতে মন্ত্রিত্ব নেয় তখনি আমার বুকটা ছাঁৎ করে ওঠে। যেখানে নবাব বাদশারা রাজত্ব করেছেন সেখানে গোবিন্দবল্লভ পস্তু, শ্রীকৃষ্ণ সিংহ প্রধানমন্ত্রী। মুসলিম জনমত সহ্য করবে? এর পরের ধাপ তো দিল্লীর লাল কেল্লায় ত্রিবার্ষিক পতাকা উত্তোলন। মুসলিম জনমত ফেটে পড়বে না? সেটা বন্ধ না করতে পরে তারা করবে স্বাধীনভাবে কলকাতার ফোর্ট উইলিয়ামে চাঁদ তারা মার্কী সবুজ নিশান উত্তোলন। তার জন্মে করতে হবে পাকিস্তান হাসিল। হয় কংগ্রেসের সঙ্গে চুক্তি করে, নয় ইংরেজের সঙ্গে যুক্তি করে, নয় গ্রামে গ্রামে শহরে শহরে রাণ্ডায় রাণ্ডায় লড়াই করে। ইংরেজ লেখক এডওয়ার্ড টমসনকে জিন্না সাহেব একথা বলেছেন। কথাটাকে হালকাভাবে নেওয়া উচিত নয়। জিন্না একজন তুখোড় পালটিসিয়ান।”

মুতাকী হাত জোড় করে বলেন, “আপনারা কেউ না খেয়ে যাবেন না মিলির বন্ধু জুলির আজ রান্নার পরীক্ষা। ওর মাসিমা ওকে শেখান।”

## ॥ ষোল ॥

যারা যাবার কথা ভাবছিলেন তাঁরা খাবার কথা ভেবে জঁকিয়ে বসেন।

ডাক্তার নিয়োগী অধ্যাপক শরীফের দিকে চেয়ে বলেন, “হিন্দু মুসলমানের মতাব কে না চায়? কিন্তু তার জন্তে হিন্দুকেই দাম দিতে হবে, মুসলিমকে নয়। এ কেমন কথা? প্যারিটি চ্যারিটি নয়। দরাদরির ব্যাপার। দরাদরির জন্তে সরাসরি কথাবার্তা চালাতে হয়। তৃতীয় পক্ষকে মাঝখানে রেখে সরাসরি কথাবার্তা হয় না। আর প্যারিটি বা চ্যারিটি সেই তৃতীয় পক্ষ অনিচ্ছূকের উপর চাপিয়ে দিতে পারে না। হিন্দুদের উপর জোর জুলুম করার সাধ বা সাধ্য কোনোটাই আজ ইংরেজদের নেই। তারা এখন চাচার মতো अपना বাঁচাতেই ব্যস্ত। আর গ্রামে গ্রামে শহরে শহরে রাস্তায় রাস্তায় লড়াই করার হুমকি তারা দিচ্ছেন তারা যদি তুখোড় পলিটিসিয়ান হয়ে থাকেন তবে তাদের জানা উচিত যে শৃশান ও গোরস্থানের মধ্যে প্যারিটি হলে ন’কোটি হিন্দু ও ন’কোটি মুসলমান ফোঁত হবে। তার পরেও বাইশ কোটি হিন্দু বেঁচে থাকবে, কিন্তু একটিও মুসলমান বেঁচে থাকবে না। যদি না ইংরেজ তাদের পক্ষ নেয়। কিন্তু পক্ষ নিলে ইংরেজও তো কয়েক হাজার মরবে। সে স্পৃহা কি তাদের কারো আছে? হিন্দুরা ও শিখেরা তাদের জন্তে জার্মানদের সঙ্গে, ইটালিয়ানদের সঙ্গে লড়েছে। জাপানীদের সঙ্গে লড়তে গিয়ে বন্দী হয়েছে। আবার যদি মহাযুদ্ধ বাধে আবার হয়তো ইংরেজদের পক্ষে লড়বে। তাদের শত্রু করে ইংরেজদের কী লাভ? জিন্না সাহেব যদি হুমকি দেবার সময় মনে মনে ধরে নিয়ে থাকেন যে ইংরেজরা তাঁর হয়ে হিন্দু ও শিখদের সঙ্গে লড়বে তা হলে তিনি তাঁর ব্রিজ খেলার পার্টনারের হাতে কী কী তাস আছে তা না জেনে নিজের হাত দেখেই ওভারকল করছেন। যারা তুখোড় খেলোয়াড় তারা ওভারকল করে না। তিনি হয়তো এটাও ধরে নিয়েছেন যে অহিংসাবাদী গান্ধী অনশন টনশন করে হিংসাবাদী হিন্দুদের নিবৃত্ত করবেন। অমনি করে মুখরক্ষা ও শেখরক্ষা হবে। কিন্তু জেহাদ যারা

শুরু করবে তারা অত সহজে সেটা থামাতে পারবে না। হিটলার পারেনি, তোজো পারেনি। থামবে যখন তখন দেখা যাবে যে লক্ষ লক্ষ হিন্দু মুসলমান শিখ নিহত হয়েছে। আরো বেশী প্রাণ নিয়ে পালিয়েছে। সর্বনাশের মুখে দাঁড়িয়ে একটা নীজ-ফায়ার হয়েছে। নীজ-ফায়ারের সময় যা হয়, এ পক্ষও কিছু রেখেছে, ও পক্ষও কিছু রেখেছে। সেই পর্যন্ত পাকিস্তানের সীমানা, হিন্দুস্থানের সীমানা। কোনো পক্ষই তাতে বিশেষ লাভবান হবে না। পরে আবার একহাত লড়বার জগে মনে মনে তৈরি হবে। সেটা আর যাই হোক অহিংস নয়। গান্ধীর দিন গেছে। জিন্নাকে মোকাবিলা করতে হবে জবাহরলালের সঙ্গে।”

অধ্যাপক শরীফের মুখ শুকিয়ে যায়। মৃত্যুকী বলেন, “ডাক্তার সাহেব, আপনি অত উত্তেজিত হচ্ছেন কেন? ক্যাবিনেট মিশন এসেছেন তিন পক্ষের গ্রহণযোগ্য সমাধান বার করতে। সকলের সঙ্গেই তাঁরা কথা বলছেন। সকলেই চায় শান্তিপূর্ণভাবে ক্ষমতার হস্তান্তর। ইচ্ছা থাকলে উপায় থাকে। ইংরেজদের দিক থেকে আমি তো ইচ্ছার কোনো অভাব দেখছিলাম। কংগ্রেস নেতারাও ইচ্ছুক। লাগ নেতারাও তাই। দেশের আবহাওয়া ইতিমধ্যেই অনেকটা ঠাণ্ডা হয়ে এসেছে। আরো কিছুদিন পরে আরো ঠাণ্ডা হবে। তবে পুরোপুরি নরমাল হবে বলে মনে হয় না। অর্থনৈতিক কারণে মানুষ আজ উদ্ভ্রান্ত। কী হিন্দু, কী মুসলমান।”

মোহিনীবাবু চোখ বুজে কী ভাবছিলেন। চোখ মেলে বলেন, “জিন্নার সঙ্গে আমি কাজ করেছি। তাঁকে আমি ভালো করেই চিনি। পাকিস্তানের উদ্ভাবক চৌধুরী রহমৎ আলী লগুনের এক রেস্টোরাণ্টে এক ভোজ্য দেন, তাতে যারা উপস্থিত ছিলেন তাঁদের একজন হলেন ইকবাল, আরেকজন জিন্না। পাকিস্তানের প্রস্তাব জিন্না সরাসরি খারিজ করে দেন। ওটা অবাস্তব। তা হলে এমন কী ঘটল যে সেই জিন্নাই বছর পাঁচেক বাদে লাহোরে মুসলিম লীগের অধিবেশনে মুসলমানদের জগে স্বতন্ত্র বাসভূমির প্রস্তাব পাশ করিয়ে নিলেন? এর উত্তর নতুন ভারত শাসন আইন অনুসারে প্রাদেশিক স্বায়ত্ত-শাসন প্রবর্তন করতে গিয়ে দেখা গেল কংগ্রেস ছয়টি প্রদেশে একক মেজরিটি পেয়েছে, আরো দুটি প্রদেশেও সে লীগকে সঙ্গে না নিয়েও মন্ত্রিমণ্ডল গঠন করতে পারে। কোন্‌ হুঁশে সে লীগের সঙ্গে কোয়ালিশন করতে চাইবে? ব্রিটিশ সরকারের সঙ্গে মতবিরোধ হলে সে বরং পদত্যাগ করে বনবাসে যাবে

তবু মুসলিম লীগের শর্তে রাজী হবে না। শাসনতন্ত্রের অস্থায়ী অস্থায়ী  
 প্রতি ক্ষেত্রে মাইনরিটিদের প্রতিনিধি থাকা আবশ্যক। জিন্না আশা  
 করেছিলেন যে মাইনরিটি প্রতিনিধি একমাত্র মুসলিম লীগ থেকেই নেওয়া  
 হবে আর গভর্নররাও সেই নির্দেশ দেবেন। দেখা গেল কংগ্রেস তার নিজের  
 দল থেকেই মুসলিম সম্প্রদায়ের প্রতিনিধি নিয়েছে। আর গভর্নররাও  
 কংগ্রেসকে চটাতে সাহস পাননি, পাছে সে মন্ত্রিসভাই গ্রহণ না করে। মাস  
 ছয়েক ধরে গান্ধীজীর সঙ্গে বড়লাটের যে পত্রব্যবহার চলে তার নীট ফল হয়  
 কংগ্রেস হাই কমান্ডের বলবৃদ্ধি ও লাটসাহেবদের বলক্ষয়। এসব দেখে শুনে  
 জিন্না সাহেব ফেডারেশনের উপরে বিশ্বাস হারান। রাজস্বরা যদি প্রতিনিধি  
 মনোনয়ন না করেন, যদি তার পরিবর্তে নির্বাচিত প্রতিনিধি পাঠান, তা হলে  
 কেন্দ্রীয় মন্ত্রিমণ্ডলও কংগ্রেস এককভাবে গঠন করতে সমর্থ হবে, লীগের  
 মুখাপেক্ষী হবে না। মুসলিম সম্প্রদায়ের প্রতিনিধি সে নিজের দল থেকেই  
 আহরণ করবে, লীগ যদি মুসলমানদের একমাত্র দল বলে স্বীকৃত না হয়।  
 যেমন করে হোক কংগ্রেস একাধিপত্য বানচাল করতেই হবে। জিন্না সাহেব  
 তাই ফেডারেশন অগ্রাহ্য করে তার বদলে দাবী করেন দুই স্বতন্ত্র রাষ্ট্র।  
 একটা হিন্দুদের, অণ্ডটা মুসলমানদের। এরাও মেজরিটি, ওরাও মেজরিটি।  
 এরাও নেশন, ওরাও নেশন। তাঁর সমস্ত জীবনের চিন্তাধারা সহসা খাত  
 বদলায়। তার মধ্যে একটা যুদ্ধং দেহি ভাবও আসে। টমসনের সঙ্গে  
 সাক্ষাৎকারে সেই ভাবটাই ব্যক্ত হয়। ইংরেজ চলে গেলে কংগ্রেস তার  
 একমাত্র উত্তরাধিকারী হবে অসহ, অসহ এই নিয়তি। অপর উত্তরাধিকারী  
 হবে মুসলিম লীগ, প্রয়োজন হলে ওয়ার অভ্যাস কেসন লড়বে। এই সিদ্ধান্তে  
 উপনীত হতে তাঁর দীর্ঘকাল লেগেছে। ইতিমধ্যে কংগ্রেস বা গান্ধী তাঁর  
 দিকে মিটমাটের হাত বাড়িয়ে দেননি। যুদ্ধের ইস্যুতে বনবাসে গিয়ে তাঁকে  
 উপবাসী রাখেন। ভেবেছিলেন তাতে তাঁর বল কমে যাবে, বল কমে  
 যাওয়া দূরে থাক, সব ক'টা প্রদেশেই বেড়েছে। কংগ্রেস-মুসলিমরা এখন  
 মুষ্টিমেয়। তাঁর বল এতখানি বৃদ্ধি পেয়েছে যে তিনি ইংরেজদের ডিকটেট  
 করতে পারেন। কংগ্রেসকে তো গ্রাহ্যই করেন না। প্রয়োজন থাকলেও  
 কোয়ালিশনের জন্তে কংগ্রেসের দিকে হাত বাড়িয়ে দেবেন না। পর্বতকেই  
 মহম্মদের কাছে আসতে হবে।”

সৌম্যদা আর স্থির থাকতে পারে না। বলে, “কংগ্রেস-মুসলিমরা

সংখ্যায় মুষ্টিমেয় হলেও ধর্মে মুসলমান আর জন্মস্থলে ভারতীয়। ভারতের স্বাধীনতা সংগ্রামে তাঁদেরও ভূমিকা আছে, সে ভূমিকা এখনো শেষ হয়নি, যে কোনো দিন আবার তাঁদের ডাক পড়তে পারে। আমরা কি তাঁদের প্রতি বেইমানী করতে পারি? লীগ বললেও না। বড়লাট বললেও না। ইন্টারিম গভর্নমেন্টে এঁদের একজন না থাকলে কংগ্রেসও থাকবে না। মুসলিম লীগই গভর্নমেন্ট চালাক। কংগ্রেস আপস করবে না, লড়াই করা তো দূরের কথা। গ্রামে গ্রামে শহরে শহরে রাত্তায় রাত্তায় যদি হাতাহাতি মারামারি খুনোখুনি বাধে কংগ্রেস তার মধ্যে থাকবে না, সেটা থামাবার দায় দায়িত্ব কংগ্রেসের নয়, তবে মানবতার খাতিরে গান্ধীপন্থীরা মাঝখানে দাঁড়িয়ে উভয় পক্ষকে ক্ষান্ত হতে বলতে পারেন। শুধু গান্ধীপন্থীদের কেন, মানুষমাত্রেয় কর্তব্য মানুষকে গুণ্ডার হাত থেকে রক্ষা করা। পুরুষমাত্রেয়ই কর্তব্য নারীকে ধর্ষকের হাত থেকে উদ্ধার করা। এক্ষেত্রে কে হিন্দু কে মুসলমান বাছবিচার করা অসুচিত। এমন মুসলমান নিশ্চয়ই আছেন যিনি নিজের প্রাণ বিপন্ন করে হিন্দুর প্রাণ বাঁচাবেন। জিন্না সাহেবের খীসিসটা তো এই যে ইংরেজ রাজ চলে গেলে কংগ্রেস রাজ কায়ম হবে, সুতরাং মারো শত্রু পারো যে প্রকারে। খীসিসটাই ভুল। দেশ স্বাধীন হলে কংগ্রেসের অস্তিত্বের প্রয়োজন থাকবে না। কংগ্রেস যদি থাকে মুসলিম লীগের সঙ্গে মিটমাট করেই থাকবে। মিটমাটের জন্তে কংগ্রেসের ছুয়ার সব সময়ই খোলা। তা না হলে গান্ধীজী জিন্না সাহেবের ছুয়ারে সতেরো দিন ধরে ধরনা দিতেন কেন? কায়দে আজম যদি কংগ্রেসের সঙ্গে মিটমাট না করে ইংরেজের সঙ্গেই মিটমাট চান তাতেও কংগ্রেস রাজী হবে, যদি তার মূলনীতিতে খা না পড়ে। সেরূপ ক্ষেত্রে কংগ্রেস নিজেকে সরিয়ে জেলখানায় ফিরে যাবে। কংগ্রেসকে সঙ্গে নিয়ে চলতে হলে কংগ্রেসের মূল নীতির সঙ্গেও পা মিলিয়ে নিতে হবে। কংগ্রেসের মেজরিটি হিন্দু মেজরিটি নয়, হিন্দু মুসলমান শিখ খ্রীষ্টানের মিলিত মেজরিটি। সাম্প্রদায়িক মেজরিটি নয়, রাজনৈতিক মেজরিটি। তেমন মেজরিটি জাতীয়তাবিরুদ্ধ তো নয়ই, গণতন্ত্র বিরুদ্ধও নয়। আর কংগ্রেসের সংগ্রামকেও মাইনরিটিবিরুদ্ধ বলা যায় না। কংগ্রেসপন্থীরা কখনো মুসলমানের গায়ে হাত দেয়নি, কখনো দেবেও না। কংগ্রেস মন্ত্রীদেবর গদীচ্যুত করার জন্তে লীগপন্থীরা অনেক কিছু বানিয়েছেন। ভবিষ্যতেও বানাতে পারেন। উদ্দেশ্যটা কী? কংগ্রেস মন্ত্রীদের আবার গদীচ্যুত করা? তার জন্তে

তারা প্রস্তুত। তা না হয়ে উদ্দেশ্য যদি হয় ভয়ভাবের মিটমাট তা হলে কোয়ালিশনের জন্তে আন্তরিকভাবে চেষ্টা করতে হবে, পার্টিশনের জন্তে ঝগড়াঝাটি নয়।”

শরীফ সাহেব তারিফ করেন। কোয়ালিশন লীগপন্থীরাও চায়। কিন্তু হিন্দুর সঙ্গে, লীগবহির্ভূত মুসলমানের সঙ্গে নয়। ওরা স্টুজ, ওরা কুইসলিং। মওলানা আজাদই বলুন, খান আবদুল গফ্ফার খানই বলুন, এঁরা কেউ সাক্ষাৎ মুসলমান নন। হিন্দুর সঙ্গে মিটমাট একদিন না একদিন হবে, পাকিস্তানেও হিন্দু থাকবে, কিন্তু এঁদের সঙ্গে কোনোদিন নয়। যদি না এঁরা কংগ্রেস থেকে বেরিয়ে এসে লীগে যোগ দেন। মুসলিম ইউনিটের খাতিয়ে সব মুসলমানকেই লীগের নিশানতলে সমবেত হতে হবে। তার পরে হবে কোয়ালিশন অথবা পার্টিশন।”

সৌম্য আর কথা বাড়াতে চায় না। এই ফ্যানাটিকদের সঙ্গে তর্ক বৃথা। তখন রায় বাহাদুর খেই হাতে নেন। “শরীফ সাহেব, এটা কি আপনারা ভেবে দেখেননি যে ভারত ভেঙে দু’খানা হলে ভারতীয় মুসলিম সম্প্রদায়ও ভেঙে দু’খানা হবে? তা যদি হয় তবে মুসলিম ইউনিটি যাকে বলছেন তাই হবে মুসলিম ডিসইউনিটির নিদান। ভারতের সর্বনাশ তো হবেই। আপনাদের তাতে কী এসে যাবে? আপনারা তো ভারতীয় নন, আপনারা মুসলমান। কিন্তু ভারতের সঙ্গে সঙ্গে মুসলমানেরও সর্বনাশ হবে। সেটা নজরে পড়ছে না, হিন্দু আধিপত্যকে খর্ব করাই একমাত্র লক্ষ্য। জিন্না যেমন দৃঢ়প্রতিজ্ঞ পাকিস্তান তিনি আদায় করবেনই। তার জন্তে নিজের এজমালী ঘরে আগুন দিতেও তাঁর হাত কাঁপবে না। কিন্তু সারা ভারতের সব মুসলমান যদি পাকিস্তানে জড়ো না হয় তো যারা হিন্দুস্থানেই থেকে যাবে তাদের দশা কী হবে? পাকিস্তানে তারা হবে বিদেশী। হিন্দুস্থানে তারা হবে বিধর্মী। সর্বত্র কুপার পাত্র। জিন্না সাহেব পাকিস্তানে গিয়ে রাষ্ট্রপতি হতে পারেন, কিন্তু জাতি গোষ্ঠী সবাই কি সেখানে গিয়ে এখানকার ক্ষতিপূরণ পাবে? ব্যবসায়ীরা পাবে ব্যবসায়, ব্যারিস্টারেরা পাবেন প্র্যাকটিস, শ্রমিকরা পাবে কলকারখানার কাজ, কৃষকরা পাবে কর্ণেলের জমি? বিশ্বাস হয় না। অধ্যাপক সাহেব। তার পর ভেবে দেখুন দুই রাষ্ট্রের মধ্যে যদি কোনো কারণে যুদ্ধ বেধে যায় মুসলমানের বোমা পড়বে মুসলমানের মাথায়। ধর্মভাই বলে সে এঁরাই পাবে না। বোমা যে ফেলবে সে হিন্দু মুসলমানে বাছবিচার করবে না। হিন্দু মুসলমান একই মহল্লায় না

হোক একই শহরে বাস করে। বোম্বা এত উপর থেকে ফেলা হয় যে তার লক্ষ্য শুধুমাত্র হিন্দু হতে পারে না। এমন একটিও শহর নেই যেটি মুসলিমবিহীন। আজকের মুসলিম ইউনিট কালকের মুসলিম নিধনের পথ করে দেবে, যদি সেটা পার্টিশনের জন্তে আকাশ পৃথিবী তোলপাড় করে। আজাদ ও আবদুল গফ্ফার খান মুসলমানদের প্রকৃত বন্ধু। কায়দে আজম জিন্না মুসলমানের নন, মুসলিম লীগ নামক দলের শ্রেষ্ঠ নেতা।”

“মুসলমানের প্রকৃত বন্ধু কে সে বিচার মুসলমানের উপরেই ছেড়ে দিলে ভালো হয়, রায় বাহাদুর।” শরীফ উত্তপ্ত হয়ে বলেন। “আজাদ যা পেয়েছেন তা হিন্দুর কাছ থেকে পেয়েছেন। কংগ্রেস সভাপতি পদ। জিন্নাহ যা পেয়েছেন তা মুসলমানের কাছ থেকে পেয়েছেন। লীগ সভাপতি পদ। বাদশাহ বাহাদুর শাহ জাফরের পতন ও কায়দে আজম মহম্মদ আলী জিন্নাহর উত্থান এর মধ্যবর্তী যুগটা আমাদের গৌরবের যুগ নয়, আপনাদেরই গৌরবের যুগ। এখন আমরা যে মওকা পেয়েছি তার সদ্যব্যবহার করলে ভারতের অর্ধেক অথবা পাকিস্তানের গোটা সিংহাসন আমাদের হবে। মুসলমানের হাতে মুসলমান হয়তো একদিন মরবে, কিন্তু ভয়ে পেছিয়ে গেলে চলবে না। লক্ষ্য হচ্ছে মুসলিম রাষ্ট্রের রেস্টোরেশন। আমাদের নিন্দাবাদ না করে বরং এই বলে ধন্যবাদ দিন যে আমরা নিখিল ভারত দাবী করছি। রেস্টোরেশন চাইলেও পুরো মোগল সাম্রাজ্যের নয়। আপনাদের সঙ্গে সদ্ভাবের খাতিরেই দিল্লী, আগ্রা, আজমীর, আলীগড় ত্যাগ স্বীকার করছি। কায়দে আজমের এই ত্যাগ স্বীকার মহাত্মা গান্ধীর ত্যাগ স্বীকারের চেয়ে কম নয়। জেলে যাওয়াটাই কি ত্যাগ স্বীকারের একমাত্র নিরিখ?”

“এতই যখন ত্যাগ করছেন”, ডাক্তার নিয়োগী রাগ চেপে বলেন, “তখন কলকাতাসম্মত পশ্চিমবঙ্গও ত্যাগ করুন।”

শরীফ সাহেব কী বলতে যাচ্ছিলেন, মোহিনীবাবু কথা কেড়ে নিয়ে বলেন, “ওটা একটা আত্মঘাতী প্রস্তাব। বাংলাদেশ দু’ভাগ হলে পশ্চিম ভাগটা হবে হিন্দুস্থানের ল্যাজ আর পূর্ব ভাগটা পাকিস্তানের ল্যাজ। যে প্রদেশ সারা দেশের মাথা ছিল সে কোনো অংশেরই মাথা হবে না। বাঙালী জাতির গোড়া কেটে আগায় জল দিলে সে কি দিন দিন শুকিয়ে যাবে না? একেই বলে, রোগের চেয়ে দাঁওয়াই আরো খারাপ। কার্জনোর আমলেও এ দাঁওয়াই এত খারাপ ছিল না, কারণ কেন্দ্র ছিল একটাই, তার কাছে গিয়ে নালিশ

করতে পারা যেত। এবার দেশ দু'ভাগ হয়ে দুই কেন্দ্র হবে। পূর্ববঙ্গের হিন্দুর উপরে অত্যাচার হলে সে হিন্দুস্থানের কতৃপক্ষের কাছে নালিশ করতে পারবে না, কারণ সে সেখানে এলিয়েন। পাকিস্তানের কতৃপক্ষ সেটাকে দেশদ্রোহিতা বলে গণ্য করবেন। পশ্চিমবঙ্গের হিন্দুও তাকে সাহায্য করবার জন্মে ছুটে আসবে না। ছুটবে পূর্ববঙ্গের হিন্দুই পশ্চিমবঙ্গের হিন্দুর কাছে সাহায্যের জন্মে। তখন আমরা কবির ভাষায় গাইব, এরে ভিখারী সাজায়ে কীরঙ্গ তুমি করিলে! না, ডাক্তার সাহেব, এ দাওয়াই আপনার উপযুক্ত হয়নি, এটা একটা হাতুড়ে দাওয়াই। এর থেকে মালুম হচ্ছে বাঙালীর মস্তিষ্ক এখন দেউলে। বাঙালী বলতে আমি বাঙালী মুসলমানকেও বোঝাতে চাই। পাকিস্তানের জন্মে অবাঙালী মুসলমানদের সঙ্গে গাঁটছড়া বেঁধে তাঁরাও দেউলেপনার পরিচয় দিচ্ছেন। শরীফ সাহেব, আপনারা ভাবছেন আপনারা তাঁদের ব্যবহার করছেন। তা নয়। ওঁরাই আপনাদের ব্যবহার করছেন। আমি আবার বলি, জিন্না সাহেব একজন তুখোড় পলিটিসিয়ান। তিনি আপনাদের এক হাতে কিনে আরেক হাতে বেচবেন। এর মধ্যেই তিনি বাঙালী মুসলমানের স্বতন্ত্র হোমল্যান্ডের প্রতিশ্রুতি ভুলে গেছেন ও ভুলিয়ে দিয়েছেন। ইতিমধ্যেই তিনি প্রস্তাবটার উপর কলমচালিয়ে দেশকে প্রদেশে পরিণত করেছেন। পাকিস্তানের অগ্রতম প্রদেশে। পাকিস্তান হলে সেখানকার কেন্দ্র থেকে শাসক নিয়োগ হবে। মেশাসক বাঙালী না হতেও পারেন। হিন্দুস্থানের মুসলিম অফিসারগণ দলে দলে চলে আসবেন পাকিস্তানে চাকরি করতে। আপনাদের সম্মানরা তো হিন্দুস্থানে চাকরি করতে যেতে পারবেন না। একেই বলে এক হাতে কিনে আরেক হাতে বেচা।”

“আপনি তা হলে আমাদের কী চাইতে পরামর্শ দেন? দুই প্রাং দুই স্বতন্ত্র পাকিস্তান, মধ্যখানে হিন্দুস্থান? হিন্দুস্থান কি দুই পাকিস্তানকে দুই বগলে পুরবে না? দুই পাকিস্তানের এক হওয়াই তো বাঞ্ছনীয়।” শরীফসাহেব বলেন।

“সেলফ ডিটারমিনেশনের অধিকার আপনাদের আছে। আপনারা সে অধিকার প্রয়োগ করতে পারেন। কিন্তু আমাদেরও কি সে অধিকার নেই? আমরাও কি সে অধিকার প্রয়োগ করতে পারব না? আপনারা ভারতে মাইনরিটি হতে রাজী না হলে আমরাও পাকিস্তানে মাইনরিটি হতে নারাজ হব, প্রোফেসর শরীফ। আমরা চাইব কলকাতা সমেত পশ্চিমবঙ্গ।” ডাক্তার সাহেব বলেন।



“তা হলে ‘বন্দে মাতরম্’ মিথ্যা ? ‘বঙ্গ আমার জননী আমার’ মিথ্যা ? ‘আমার সোনার বাংলা আমি তোমায় ভালোবাসি’ মিথ্যা ? বঙ্কিমচন্দ্র, বিজ্ঞেন্দ্রলাল, রবীন্দ্রনাথ মিথ্যা লিখেছেন ? তা নয়। আপনারাই ভুল করছেন। পাকিস্তানকে আপনারা অকারণে ভয় করছেন। পাকিস্তান হিন্দুর শত্রু নয়। আপনাদের স্বার্থ অক্ষুণ্ণ থাকবে। যেমন ছিল সিরাজউদ্দৌলার আমলে।”

তাগের মাত্রা বাড়ছে দেখে মুস্তাফী তর্কের মোড় ঘুরিয়ে দেন। সৌম্যর দিকে ফিরে জানতে চান গান্ধীজী আজকাল নীরব কেন।

“তিনি আজকাল সম্পূর্ণ নিঃসঙ্গ। এমন নিঃসঙ্গতা জীবনে অল্পভব করেননি। এমন এক দিন ছিল যেদিন সমগ্র দেশে কংগ্রেসের কোনো প্রতিদ্বন্দ্বী ছিল না। সেদিন তিনি ভারতীয় প্রাণশক্তির একমাত্র প্রতিভূ হিসাবে ব্রিটিশ রাজপ্রতিনিধি আরউইনের সঙ্গে কথাবার্তা চালিয়েছিলেন। তেমন দিন আর ফিরল না। কংগ্রেসের ভিতরেই দেখা গেল তাঁর কথার দাম কমে গেছে। ভোট নিলে হয়তো তিনিই জিততেন। কিন্তু তেমন জয় তিনি চাননি। তিনি কংগ্রেসের চার আনার সদৃশও থাকেন না। প্রতিনিধিত্বের দাবী সম্পূর্ণ পরিত্যাগ করেন। কংগ্রেসকে তিনি ছাড়লেও কংগ্রেস কিন্তু তাঁকে ছাড়ে না। কমলি নেহি ছোড়তি। কংগ্রেস নেতারা যখন তাঁর পরামর্শ নিতে যান তখন তিনি তাঁর পরামর্শ দেন। কিন্তু নিতে বাধ্য করেন না। লোকে ভাবে তিনি একজন ডিকটেটর। কিন্তু ডিকটেটর যদি তিনি হয়ে থাকেন তবে সেটা নৈতিক বলে বলীয়ান মহাপুরুষের ডিকটেটরশিপ। মেটার পরিচয় মেলে সংগ্রামের সময়। তখন কংগ্রেস তাঁকে দেয় সেনাপতির ভূমিকা। শাস্তির সময় কিন্তু তিনি আর সেনাপতি নন। তিনি পরামর্শদাতা। কংগ্রেসের হয়ে কথা বলার দায় তাঁর নয়, কংগ্রেস সভাপতির। গত ছ’বছর ধরে মণ্ডলানা আজাদের। বড়লাট যদি কংগ্রেসের সঙ্গে কথাবার্তা চালাতে চান তবে আজাদকেই কংগ্রেসের প্রতিনিধিত্ব করতে হয়। এখন দেশে কংগ্রেসের বহু প্রতিদ্বন্দ্বী হয়েছে। কংগ্রেসের ভিতরেও কংগ্রেস হাই কমান্ডের বহু প্রতিদ্বন্দ্বী। সবচেয়ে বড়ো কথা গান্ধীজীর সঙ্গেও কংগ্রেস নেতাদের পায়ে পা মিলছে না। ভারতের শাসনব্যবস্থার কংগ্রেস নেতারা চান কেন্দ্রীকরণ। মুসলিম লীগ নেতারা চান বিকেন্দ্রীকরণ। আর গান্ধীজী চান বিকেন্দ্রীকরণ। যেখানে এতখানি মতভেদ আর সব ক’টা মতই নীতিগত

সেখানে অত্যাচার নেতাদেরকে কথা বলতে দিয়ে নিজের সরে থাকাই শ্রেয়। সকলেই জানে তিনি কেন্দ্রের হাতে মাত্র তিনটি বিষয় রেখে দিয়ে আর সব বিষয় প্রদেশের হাতে ছেড়ে দেওয়ার পক্ষপাতী। ফলে প্রদেশের বল বাড়বে, কেন্দ্রের বল কমবে। কংগ্রেস নেতাদের কিন্তু উণ্টো মত। তাঁরা প্রদেশকে দুর্বল না করে কেন্দ্রকে বলবান করতে চান। যেমন ব্রিটিশ আমলে। যেমন মোগল আমলে। শক্তিশালী কেন্দ্র না থাকলে ভারতের বলকামীকরণ হতে পারে। অগচ জিন্না সাহেব পাকিস্তানের দাবী তুলে ভারতকে বলকানের অভিমুখে রওনা করে দিতে উদ্যত। ভারত যদি ধর্মের নিরিখে দু'ভাগ হয় ভাষার নিরিখে বহু ভাগ হবে না কেন? একবার যদি ভাঙন শুরু হয় সেটা কি সেখানেই থামবে? শক্তিশালী কেন্দ্র না থাকলে সে জলতরঙ্গ রোধাবে কে? মুসলমানদের নিশ্চয়ই একটা বখরা দিতে হবে। কিন্তু দাবীদার তো একমাত্র মুসলমানরাই নন। এ এক জটিল সমস্যা। এর একটা শান্তিপূর্ণ মীমাংসা না হলে ঘোর অশান্তি। যে আগুন জলবে তাতে সবাই দগ্ধ হবেন—গান্ধী, জিন্না, আজাদ, তারা সিং, আশ্বেদকর, সাভারকর, লর্ড ওয়েভেল। ব্রিটিশ গভর্ন মেণ্ট সময় থাকতে তার প্রতিবিধান করতে চান বলেই ক্যাবিনেট মন্ত্রীত্রয়কে ভারতে পাঠিয়েছেন। পোথক-লরেন্স দীর্ঘকালের ভারতবন্ধু। ক্রিপসও তাই। শুনছি তৃতীয়জনের নাম আলেকজান্ডার।”

“শান্তিপূর্ণ মীমাংসা আমরাও চাই, চৌধুরীজী। ক্যাবিনেট মিশন ব্যর্থ না হলে শান্তিপূর্ণ মীমাংসাই হবে। ইন্টারিম গভর্ন মেণ্টে নেতারা সবাই থাকবেন, আজাদ সাহেব বাদে। দরাদরি সেইখানে বসেই চালাবেন। তার পর কনস্টিটুয়েন্ট অ্যাসেম্বলীতে তাঁদের মিলিত সিদ্ধান্ত পেশ করবেন। সেখানে তা পাশ হয়েও যাবে। কেন্দ্রীকরণ, বিকেন্দ্রীকরণ, বিকেন্দ্রীকরণ যেটাই হোক না কেন সর্বসম্মতিক্রমেই হবে। কিন্তু ব্রিটিশ পালামেন্টে যেমন অধিকাংশের ভোট বিল পাশ হয়, কখনো কখনো একটামাত্র ভোটের ব্যবধানে, ভারতের মতো বহুধর্মী, বহুভাষা দেশে সেটা অনুসরণ করা চলবে না। এই কথাটাই কায়দে আজম বলে আসছেন পঁচিশ বছর ধরে। মেজরিটি ভোট মামুলী বিষয়ে প্রযোজ্য। কিন্তু যেসব প্রশ্নে গৃহযুদ্ধের আশঙ্কা থাকে সেসব প্রশ্নে একারজনের মেজরিটি ভোটই যথেষ্ট নয়। অস্তুত দুই-তৃতীয়াংশ ভোট সংগ্রহ করতে হয়। এমন প্রশ্ন থাকতে পারে যার নিষ্পত্তির জগ্গে অস্তুত তিন-চতুর্থাংশ ভোটের আবশ্যক হয়। ভারতে হিন্দুর সংখ্যানুপাত শতকরা সত্তরের মতো। এখানে

দুই-তৃতীয়াংশ না হয়ে তিন-চতুর্থাংশ ভোটই মাইনরিটিদের পক্ষে নিরাপদ। একটা উদাহরণ দিচ্ছি। কংগ্রেস যদি বলে, ভারতের সরকারী ভাষা হবে হিন্দী আর মুসলিম লীগ যদি বলে, উর্দু, তা হলে সেটা শতকরা একান্নটা ভোটে পাশ হলে গৃহযুদ্ধ বেধে যাবে। শতকরা সাতষট্টি হলেও মুসলিম লীগের বিষম আপত্তি থাকবে। লীগ পক্ষে বহু হিন্দু শিখও ভোট দেবেন। তবু নিরাপত্তার খাতিরে শতকরা পঁচাত্তরই বিধেয়। নয়তো হিন্দী উর্দু উভয়কেই সরকারী ভাষা করতে হয়। ব্রিটেনের মতো একমাত্র ইংরেজীকেই সকলের ঘাড়ে চাপিয়ে দেওয়া উচিত নয়। হিন্দু মুসলিম বিরোধের তলে তলে কাজ করছে হিন্দী উর্দু বিরোধ। এটা যুক্তপ্রদেশে ও বিহারে গত শতাব্দীর শেষ তিন দশক থেকে সক্রিয়। উর্দুকে আদালত থেকে হটানো মানে মুসলিম রাজকর্মচারীদের হটানো। হিন্দীকে তার জায়গায় বৈঠানো মানে হিন্দু রাজকর্মচারীদের বৈঠানো। সার সৈয়দ আহমদ আতঙ্কিত হন হিন্দীভক্তদের উৎসাহ দেখে। তাঁর কংগ্রেসবিরাগের মূলে হিন্দুবিরাগ নয় হিন্দীবিরাগ।” অধ্যাপক শরীফ বিশ্লেষণ করেন।

রায় বাহাদুর কটাক্ষ করেন, “সেই সঙ্গে বাঙালী উকীল ব্যারিস্টার শ্রেণীর প্রতি বিরাগ। এই শ্রেণীটাই নাকি ব্রিটিশ ইণ্ডিয়ান গভর্নমেন্টের অপোজিশন হিসাবে কংগ্রেস পরিচালনা করতে করতে একদিন সেই গভর্নমেন্টের উত্তরাধিকারী হবে। যে পদ্ধতিতে হবে সেটা গণতান্ত্রিক পদ্ধতি। সার সৈয়দের মতে সেটা ভারতের মতো দেশের অমুপযুক্ত। একই কথা শোনা যায়, শাসক শ্রেণীর মুখেও। কিন্তু একটু ঘুরিয়ে। পদ্ধতিটা ভারতের অমুপযুক্ত তো বটেই, ভারতও পদ্ধতিটার অমুপযুক্ত। কিপলিং তো একটা কবিতাই লিখে ফেলেন, ‘হারি চাণ্ডার মুকার্জি ব্যারিস্টার অ্যাট ল’। হা হা হা! পড়েছেন?”

কেউ পড়েনা শুনে রায় বাহাদুর বলেন, “বাঙালী বাবুদের উপর সে কী গায়ের বাল বাড়া! উত্তর-পশ্চিম সীমান্ত থেকে দুর্ধ্ব টাইবাল আক্রমণকারীরা এসে বাঙালী বাবুদের পাল’মেণ্টারি লীলাখেলা সাজ করে দেবে। তাঁদের প্রাণে বাঁচাই দায় হবে। জীবিত থাকলে কিপলিং সাহেবের চোখ কপালে উঠত যখন শুনতেন যে বাঙালী বাবু শূভাষ চাণ্ডার বোস সেই সব টাইবালদের এলাকা দিয়ে কাবুলে গিয়ে ব্রিটিশবিরোধী সংগ্রামের তোড়জোড় করছেন। পাল’মেণ্টারি লীলাখেলায় তাঁরও অনীহা।”

“পার্লমেন্টারি লীলাখেলায় আমাদেরও অনীহা।” সৌম্য গান্ধীপন্থীদের দিক থেকে জানায়। “সাধারণ নির্বাচনের পরে জনগণের সঙ্গে তাদের নির্বাচিত প্রতিনিধিদের আর সংশ্লব থাকে না। তবু পরের বারের নির্বাচনে একটা জবাবদিহির দায় থাকে। যে দায় চার্চিলের মতো মহা প্রতাপশালী জননায়কেরও ছিল। সাধারণ নির্বাচকরা তাঁকে ক্ষমতাচ্যুত করেছে। গান্ধীজীর মতো পার্লমেন্টারি লীলাখেলার উপর আত্মহীন সংগ্রামীর উপরেও এই ঘটনার প্রভাব পড়েছে। পার্লমেন্টারি পন্থাকে তিনি এখন সত্যগ্রহের মতোই গুরুত্ব দেন। ইংরেজরা যদি এখন হারি চাণ্ডার মুকাজির সঙ্গে পার্লমেন্টারি হারজিতের খেলায় যোগ দিতে সম্মত থাকেন তবে কেবল আটটি প্রদেশে কেন, কেন্দ্রীয় আইনসভাতেও কংগ্রেস প্রত্যেকবার জিতবে। হারি চাণ্ডারের দল একদিন মেজরিটি পাবেন সেই আশঙ্কায় তাঁরা মুসলিম লীগের উৎপত্তি ঘটিয়েছেন, তাকে সেপারেট ইলেকটোরেটের মই ধরিয়ে দিয়েছেন, সে মই বেয়ে উপরে উঠেছে কংগ্রেসের মেজরিটিকে ভীটো দিয়ে চালমাং করতে। যেটা করতে বড়লাটেরও বাধে। আর কোনো উপায় পাওয়া যাচ্ছে না বসে বসে টাকাকেই ছুঁতাগ করার প্রস্তাব উঠেছে। সেটা যে মুসলমান সম্প্রদায়ের স্বার্থে, ইংরেজদের স্বার্থে নয়, একথা বিশ্বাস করা স্বাধীনতা সংগ্রামীদের পক্ষে শক্ত। আমাদের সন্দেহ হয় এটা আমাদের সংগ্রামকে সাম্রাজ্যবাদবিরোধী লক্ষ্য থেকে দিগ্‌ভ্রান্ত করার ফন্দি। আমরা ইংরেজের সঙ্গে না লড়ে মুসলমানদের সঙ্গে লড়ব। জনতার রোষ পড়বে জনতার উপরে, হিন্দুর রোষ মুসলমানের উপরে, মুসলমানেরই রোষ হিন্দুর উপরে। ইংরেজরাই হবে দু’পক্ষের রক্ষক ও সালিশ। তাদের সালিশীতে একপক্ষ পাবে পাকিস্তান, অপর পক্ষ হিন্দুস্থান। যেন এইজন্তে এতকালের স্বপ্ন। উমেশ চাঁদার বনাজি থেকে যায় শুরু। স্বভাব চাণ্ডার বোসেও যা শেষ নয়। এই মুহূর্তে আমাদের একমাত্র ভাবনা স্বাধীনতার জন্তে অধীর হয়ে থাকা যেন গৃহযুদ্ধে জড়িয়ে না পড়ি। তা হলে স্বাধীনতা তো হবেই না, হিন্দু মুসলমানের সম্পর্ক চিরকালের মতো বিষিয়ে যাবে। এটা আমাদের আত্মপরীক্ষার আর আত্মশুদ্ধির সময়। এখনকার পলিসির নাম মার্ক টাইম।”

সবাই স্তব্ধ হয়ে শোনে। এর পর অধ্যাপক শরীফ বলেন, “চৌধুরীজী, ইংলণ্ডের মতো দেশেও এককালে গৃহযুদ্ধ বেধেছিল। পিউরিটান বনাম অক্সফোর্ড। এ রকম বিরোধ কোথায়ই বা না বেধেছে! ইংরেজরা আপনাদের

হাতে ক্ষমতা হস্তান্তর করে গেলেও এরকম বিরোধ বাধবে। ভারতবর্ষ কেবল হিন্দুর দেশ নয়, হিন্দু মুসলমান উভয়ের দেশ। তাকে যদি আপনারা মেজরিটির ভোটে আপনাদের মনোপলি করতে যান তো আমরাও ভোটের রাজনীতির উপর আস্থা হারিয়ে নেতাজী সুভাষ বোলের পক্ষা অহুসরণ করব। উদ্দেশ্য হোমল্যাণ্ড অর্জন। গান্ধীজীর মতো জিন্নাহ সাহেবের বুকের ভিতরেও একই আগুন জ্বলছে। কিন্তু সেটা কেবল ব্রিটিশ শাসন থেকে মুক্তির নয়, হিন্দু আধিপত্য থেকেও মুক্তির। ইংরেজদের কথায় তিনি নাচছেন না। আটটা প্রদেশ কংগ্রেস দখল করেছে বলেই নাচছেন। উপরন্তু নিয়েছে পাঞ্জাব মস্জিদগুলোরও একাংশ। কংগ্রেস এখন তার দখল পাকা করতে চায়। তার পলিসি কনসলিডেশন। তাই মার্ক টাইম। লীগ পলিসি তার বিপরীত। কায়েদে আজম বেশীদিন সবুর করবেন না। প্রলয় নাচন নাচবেন।”

## ॥ সতেরো ॥

ভুরিভোজনের পর বিদায় নেবার পালা। মোহিনীবাবু বলেন, “ত্রেতাযুগে দ্রৌপদী এর চেয়ে এমন কী ভালো রাখতেন হে, বাসুদেব?”

“কথাটা ঠিক। তবে ত্রেতাযুগে নয়, দ্বাপর যুগে।” রায় বাহাদুর হাসেন।

“কিন্তু কোফতা আর কালিয়া কি দ্বাপরযুগেও ছিল?” শরীফ সাহেব তর্ক করেন। “আমি ভাবছি চৌধুরানীজী কার কাছে এ বিদ্যা শিখলেন।”

“কেন? আমাদের বাড়ীর বাবুঁচির কাছে। মানে বাপের বাড়ীয়। পিণ্ডিতে যখন ছিলুম তখন থেকেই আবু তালিব আমাদের সঙ্গে আছে। বছর তেইশ চব্বিশ।” জুলির যতদূর মনে পড়ে।

“সে কী, আপনারা পশ্চিম পাকিস্তানে ছিলেন?” শরীফের তাক লাগে।

“এখনো তো দেশভাগ হয়নি। হবে না আশা করি। কিন্তু যদি হয় তবে আবুকে বিদেশী বলে তার বুড়ো বয়সে জবাব দিতে আমাদের ভীষণ কষ্ট হবে।” জুলি বলে।

“কেন? বিদেশী বলে কেন?” শরীফ চমকে ওঠেন। “পূর্ব পাকিস্তানও হবে তার স্বদেশ। আপনারও তাই।”

“কিন্তু আমরা যে কলকাতার মানুষ। কলকাতা কি পূর্ব পাকিস্তানের সামিল হবে? যদি দেশভাগ হয়। হবে না আশা করি।” জুলির ধারণা।

“কলকাতা বাদ দিয়ে কি পূর্ব পাকিস্তানের কথা ভাবা যায়? আপনারা ঠাওরেছেন পূর্ব পাকিস্তান মানে পূর্ববঙ্গ। ভুল! ভুল! বিলকুল ভুল! গৃহযুদ্ধ এড়াবার জন্তে দিল্লী ছেড়ে দিচ্ছি, আগ্রা ছেড়ে দিচ্ছি। তার উপর কলকাতাও ছাড়ব! এ তো ভারী মজার কথা।” শরীফ সাহেব বিদ্রূপ করেন।

ডাক্তার নিয়োগী আর সহিতে পারেন না। বলেন, “দিরাজউদ্দৌলার কলকাতা অভিযান মনে পড়ে? কলকাতার গোরাদের তিনি মানুষ বলে গণ্য করেননি। পরিণাম পলাশীতে পরাজয় ও পতন। এবার কলকাতার হিন্দুদের মানুষ বলে গণ্য করা হবে না, যেন তাদের সম্মতি অসম্মতির কোনো দায় নেই। মুসলিম লীগ চাইবে, ব্রিটিশ সরকার দেবেন। ব্যস্! অমনি কলকাতার হিন্দুরা ক্রীতদাসের মতো হস্তান্তরিত হবে!”

ক্যাপটেন মুস্তাফী উভয় পক্ষকে থামিয়ে দেন। “আর কটা দিন সবুর করুন। শোনা যাক ক্যাবিনেট মিশন কী নিষ্পত্তি করেন। তাঁরা এক এক করে গান্ধী, জিন্না, নেহরু, আজাদ প্রভৃতি বড়ো বড়ো নেতাদের সকলের সঙ্গেই আলোচনা করছেন। নিজেদের মন খোলা রেখেছেন। গান্ধীজী নাকি দেশভাগে রাজী হবেন জিন্না সাহেব যদি দুই রাষ্ট্রের এক ডিফেন্স, এক ফরেন অ্যাফেয়ার্স, এক রেল পোর্ট অফিসে রাজী হন। কতকাতা তা হলে পূর্ব পাকিস্তানেই যাবে। কিন্তু কলকাতার লোক ইণ্ডিয়ান পাশপোর্টেই সর্বত্র যেতে আসতে পারবে। আমরা যারা এখানে বাস করব তাদেরও সেই একই পাশপোর্ট।”

শরীফ সন্তুষ্ট হন না। “গান্ধীজী এক হাতে যা দেবেন আরেক হাতে তা ফিরিয়ে নেবেন। বাহু পলিটিসিয়ান। কিন্তু জিন্না সাহেব কি ভুলবেন? ভবী ভোলে না। বিকেন্দ্রীকরণ নয়, দ্বিকেন্দ্রীকরণ তাঁর লক্ষ্য। কেউ তাঁকে লক্ষ্যভ্রষ্ট করতে পারবেন না। ক্যাবিনেট মিশনও না। তাঁর পেছনে নাকোটি মুসলমান। সবাই লড়াই। তবে গৃহযুদ্ধ এড়ানোই স্বপ্ন। তার জন্তে ত্যাগস্বীকার করতে হবে উভয়কেই।”

মিলির মা বাবাকে, জুলি ও সৌম্যকে ধন্যবাদ জানিয়ে অতিথিরা একে একে বিদায় নেন। তখন চাপা নিঃশ্বাস ছেড়ে মিসেস মুস্তাফী বলেন, “ভগবান যা করেন মঙ্গলের জন্তে।”

“কেন ওকথা মনে হলো, মাসিমা?” জুলি জিজ্ঞাসা করে।

“ওদের ওইসব কথাবার্তা শুনে আমার ভয় হচ্ছে কলকাতা নিয়ে হিন্দু মুসলমানে কাড়াকাড়ি পড়ে যাবে। মিলি থাকলে ওই আগুনে বাঁপ দিত। ভাগ্যিস সে এখন নিরাপদ দূরত্বে। তার সঙ্গে রণও। ওদের আচমকা দেশ ছেড়ে যাওয়ায় শক পেয়েছিলুম। জুলি এসে পড়ায় সামলে নিই। এখন দেখছি ওদের চলে যাওয়াই শাপে বর হয়েছে। বেঁচে থাকলে আবার কতবার দেখা হবে। মিলির যা স্বভাব। আগুন দেখলেই ও বাঁপ দেবেই।”

“সেটা তো আমারও স্বভাব, মাসিমা। কলকাতা জ্বলছে শুনলে আমি কি এখানে বসে বেহালা বাজাব নাকি? আমার মা রয়েছেন ওখানে। তা ছাড়া আমার মুখের দিকে চেয়ে থাকবে জনতা। হিন্দুদের মুসলমানদের হাত থেকে, মুসলমানদের হিন্দুদের হাত থেকে বাঁচাতে হবে। চার বছর আগে ওরা সবাই আমাকে ইংরেজদের হাত থেকে বাঁচিয়েছে। নইলে আমার তো কোর্ট মার্শাল হতো, মাসিমা।” জুলি মনে করিয়ে দেয়।

“তোমাকে আমরা কলকাতা যেতে দেব না, জুলি। সৌম্যকেও না। সেটা শুধু তোমাদের নিরাপত্তার জন্তে নয়। আমাদের নিরাপত্তার জন্তেও। কলকাতার আগুনের দুলকি এখানেও তো উড়ে আসতে পারে। হুজুর্দীনের দলবল কি আমাদের রেহাই দেবে? জরের যম জারমলান, হিন্দুর যম হুজুর্দীন। গায়ে কাঁটা দেয়। কেন যে তোমরা ইংরেজদের তাড়িয়ে দিতে চাও বুঝতে পারিনে। ওরা তো ঘরের ঢেঁকী কুমীর নয়, যেমন এরা।” মিলির মা অকপটে বলে গান।

“আমরা তো মনে মনে ঠিক করে রেখেছি যে এদিকে পাকিস্তান হলে ওদিকে কলকাতায় গিয়ে আশ্রয় নেব।” মুস্তাফী প্রকাশ করেন। “কিন্তু কলকাতা নিয়ে যদি লড়াই বাধে তবে যেখানে আছি সেখানে থাকাই ভালো। এখানে আমাদের অসংখ্য পেসেন্ট। অধিকাংশই মুসলমান। ওরা যদি বাঁচতে চায় তো ওদের ডাক্তার পরিবারকেও বাঁচাবে। আর তোমরাও তো আশ্রমের মাধ্যমে জাতিধর্ম নির্বিশেষে বহু লোককে জীবিকা জোগাচ্ছ। ওরা বাঁচবে কী

করে তোমরাই যদি না বাঁচো? যাকে বাঁচাও সে বাঁচায়।” মুত্তাফী বিশ্বাস করেন।

সৌম্য সেকথা সমর্থন করে। “আমি কাসাবিয়াস্কার মতো একটাই দাঁড়িয়ে থাকব। সেটাই আমার পিতার আদেশ। মরতে হয় মরব। আমাদের উদ্দেশ্য অপর পক্ষের অন্তঃপরিবর্তন ঘটানো। ইংরেজদের বেলা সেটা অনেকদূর সফল হয়েছে। কিন্তু লীগপন্থী মুসলমানদের বেলা আদৌ সফল হয়নি। কেমন করে হবে, কতদিনে হবে, এই এখন আমাদের ভাবনা। মূলনীতি বিসর্জন না দিয়ে এটা যদি সম্ভব হয় তো গান্ধীজী বাঁচবেন। নয়তো তাঁর জীবন সংশয়। জীবন্ত ব্যবচ্ছেদের ভাবনা। জুলির জন্তে আমি চিন্তা করিনে। সে দ্রোপদীর মতো রক্তনের পরীক্ষায় পাস করেছে। দ্রোপদীর মতো বীরত্বের পরীক্ষায়ও পাস করবে।”

‘তোমাকে একলা রেখে আমি কোথাও যেতে পারব না। তুমি যেখানে আমি সেখানে।’ জুলি বলে দৃঢ় স্বরে।

মুত্তাফীরা তা শুনে আশ্চর্য হন। মিলির মা বলেন, “আমার মেয়ে নও বলে কি তুমি আমার মেয়ের চেয়ে কম আপন? তোমাকে কি আমি বিপদের মুখে কলকাতায় ঠেলে দিতে পারি?”

মিলির বাবা বলেন, “আমার মনে হয় না ব্যাপার ততদূর গড়াবে। গড়ালে ইংরেজরাই এদেশে অনির্দিষ্টকাল আটকা পড়বে। বাটন সাহেব আমাকে বলে গেছেন সামনের জাহুয়ারি মাসেই তিনি ইণ্ডিয়া কুইট করবেন। তবে যদি ক্ষতিপূরণের প্রতিশ্রুতি পান তা হলে আরো এক বছর দেরি করতে পারেন। একই মনোভাব আরো অনেক সাহেবেরই। এদেশ থেকে ওঁদের মন উঠে গেছে। দেশে ফিরে গেলে অল্প কোনো চাকরির আশা আছে। কিন্তু বেশী দেরি করলে চাকরি বাকরি খালি থাকবে না। ক্যাবিনেট মিশন এটা বোঝোন। তাই একটা মিটমাটের জন্তে সর্বতোভাবে চেষ্টা করবেন। তথা, সৌম্য, তোমরা স্বীকার করো আর না করো মুসলিম লীগেরও একটা কেস আছে। বিলেতের গভর্নমেন্টে এক পার্টি যায়, আরেক পার্টি আসে। কনসারভেটিভের পর লিবারল, লিবারলের পর কনসারভেটিভ। ইদানীং লিবারলের জায়গায় লেবার। এর নাম রোটেশন। আমাদের দেশে কি রোটেশনের জো আছে? কংগ্রেসের পর মুসলিম লীগ, মুসলিম লীগের পর কংগ্রেস এ রকম পালাবদল কি সম্ভব? দিল্লীতে মুসলিম লীগ কোনো কালেই



মেজরিটি পাবে না। তা হলে কি সে কোনোদিনই ক্ষমতার মুখ দেখবে না? তার জন্তে কি তাকে কংগ্রেসের অহুগ্রহে কংগ্রেসের জুনিয়র পার্টনার হতে হবে? জিন্না সাহেব কারো অহুগ্রহ চান না। না কংগ্রেসের, না ইংরেজের। সেইজন্তে তিনি একটা তৃতীয় বিকল্প বার করেছেন। মুসলমানদের জন্তে পাকিস্তান। পাকিস্তান হলে সেখানে কংগ্রেসই তাঁর অহুগ্রহপ্রার্থী হবে। তাঁর জুনিয়র পার্টনার হতে পারবেন কংগ্রেস মন্ত্রীরা। যেমন এই বাংলাদেশে। কংগ্রেস ও লীগের মধ্যে একটা বোঝাপড়া একদিন না একদিন হবেই। কোথাও কংগ্রেস সিনিয়র ও লীগ জুনিয়র পার্টনার। কোথাও লীগ সিনিয়র ও কংগ্রেস জুনিয়র পার্টনার। বলা বাহুল্য এর জন্তে চাই দুই পার্টির মধ্যে চুক্তি। আর সেই চুক্তি পাঁচ বছর অন্তর অন্তর রিনিউ করা চাই। কিন্তু তার গ্যারাণ্টি দেবে কে? নতুন শাসনতন্ত্র কি গ্যারাণ্টি দিতে পারে? নতুন শাসনতন্ত্র তৈরি করার অপূর্ব সুযোগ এসেছে আমাদের জীবনে। আমরা যেন এর সদ্ব্যবহার করতে পারি।”

সৌম্যকে স্বীকার করতে হয় যে ইংলণ্ডের মতো রোটেশন ভারতে চলবে না। কোয়ালিশনই শ্রেয়। কিন্তু সময়নস্ক পার্টি না হলে কোয়ালিশন মানে নিত্য ধৈর্য। তা হলে কি তৃতীয় বিকল্প বলতে পার্টিশন? দুই আমি, দুই ফরেন অ্যাফেয়ার্স, দুই রেলওয়ে সিস্টেম? এক রাষ্ট্রের নাগরিক অপর রাষ্ট্রে এলিয়েন? পাকিস্তানে গাঙ্গা, হিন্দুস্থানে জিন্না? ইণ্ডিয়ান নেশন দু’ভাগ? ভারতীয় মুসলিম সমাজ দু’ভাগ? কোনো গুরেই এক্য থাকবে না? পা থেকে মাথা পর্যন্ত দু’চির? মোগল সম্রাট বা ব্রিটিশ বড়লাট কেউ এমন বিচ্ছেদ কল্পনা করতে পারেননি। জিন্নাকে বড়লাট করলে যদি তাঁর অন্তঃপরিবর্তন ঘটত!

“আমাদের গণসংযোগ প্রোগ্রাম ব্যর্থ হয়েছে। তাই মধ্যবিত্ত শ্রেণীর হিন্দু মুসলমানই পাউরুটি আর মাছ ভাগাভাগি করে নেবার জন্তে জনগণকে বিভ্রান্ত করছে। এর প্রতিকার ইংরেজের গদীত্যাগের সঙ্গে সঙ্গে কংগ্রেসেরও গদীত্যাগ। অত্যাচারী দল মুসলিম লীগের সঙ্গে মিলে মিশে রাজত্ব করুক। কিন্তু পার্টিশন কদাচ নয়।” সৌম্য এই বলে শুভরাত্রি জানায়।

সৌম্যর ‘সর্বোদয় আশ্রম’ ধর্মীয় আশ্রম নয়। তার বাইরের ফটকে উৎকীর্ণ: “শুনহ, মাহুখ ভাই। সবার উপরে মাহুখ সত্য তাহার উপরে নাই!” ফটকের একপাশে বড়ো বড়ো অক্ষরে লেখা ছিল: “এখানে

হিন্দু মুসলমান, ব্রাহ্মণ হরিজন, উচ্চ নীচ, নরনারী ভেদ নাই। সকলেই সমান অধিকার ও দায়িত্ব।” আর একপাশে : “শ্রমই এই আশ্রমের প্রাণ। শ্রমই জপ তপ উপাসনা ও আরাধনা।”

আশ্রমের কাজকর্ম সকাল ছ’টায় শুরু, সন্ধ্যা ছ’টায় শেষ। সে সময় সকলেই যে যার বাড়ী ফিরে যায়, থাকে কেবল চৌকিদার, মালী আর জনা কয়েক আবাসিক কর্মী, যাদের আর কোথাও থাকবার জায়গা নেই। তাদের আহালাদিক ব্যবস্থা তারাই করে,। কিন্তু দুপুরবেলা সকলেই আশ্রমের লঙ্করখানার অতিথি। সেখানে নিখরচায় ডাল, ভাত ও একটা কি দুটো সবজি খেতে দেওয়া হয়। পরিবেশন করে ব্রাহ্মণ হরিজন, হিন্দু মুসলমান, নর নারী, যখন যাদের নাম লটারিতে ওঠে। আর রান্না করে যারা রন্ধননিপুণ। তাদের জাত বা ধর্ম দেখে নয়, গুণ ও কর্ম দেখে বাছাই করে আশ্রম কমিটি। তারাও পালা করে রাঁধে। অল্প সময় করে যার যার নিজের কাজ। কামারের কাজ, কুমোরের কাজ, ছুতোরের কাজ, দজির কাজ, তাঁতীর কাজ, কাটুনীর কাজ। এমনি হরেক রকমের কাজ। ময়লা সাফাইয়ের কাজ নিয়মিত করতে ২৫ কর্মীদের সবাইকেই। বাসন মাজা, কাপড় কাচা যার যার নিজের।

সকলে এক সঙ্গে বসে খায়। কিন্তু মেয়েদের আলাদা পঙ্ক্তি। রাত্রে মেয়েদের থাকতে দেওয়া হয় না। তবে যারা স্ত্রী নিয়ে থাকতে চায় তাদের জন্মে কয়েকটি স্বতন্ত্র কুটির আছে। তার জন্মে ভাড়া দিতে হয়। সেটা আসে উপার্জন থেকে। উৎপাদন অনুসারে উপার্জনের হিসাব হয়। উপার্জনে তারতম্য থাকে। আশ্রম কাউকে মজুরি দেয় না। নিজের খরচে খেলে আশ্রম খেতে নিষেধ নেই, কিন্তু আশ্রমের খরচে খেলে নিরামিষই বিধি। নইলে খরচ বাড়ে। আশ্রমের সাধ্যের বাইরে। এই আশ্রম একটা ট্রাস্ট। সৌম্যও ট্রাস্টিদের একজন। তার পৈত্রিক সম্পত্তির কতক অংশ ট্রাস্টের তহবিলে খয়রাত করেছে। বাকী ছ’জন ট্রাস্টি গুজরাটী। তাঁরা সৌম্যর উপরে আস্থাভান। তাকে পরিচালনার স্বাধীনতা দিয়েছেন। সে নিয়মিত রিপোর্ট পাঠায়।

রোজ আশ্রমে গিয়ে তার প্রথম কাজ বাডু আর বালতি হাতে সাফাইয়ের অভিযানে যোগ দেওয়া। এটাই আশ্রমিকদের সমবেত প্রার্থনা। শরীরকে শুচি রাখা যেমন প্রাথমিক কর্তব্য পরিবেশকে পরিষ্কার রাখাও তেমনি

প্রাথমিক কর্তব্য। অপরিষ্কার পরিবেশ থেকে কতরকম ব্যাধির উৎপত্তি সভ্য জাতি বলে যাদের পরিচয় তারা পরিবেশ পরিষ্কার রাখে! আমরা কি সভ্য জাতি? তা যদি হয়ে থাকি তবে আমাদের পরিবেশকেও নিজের মতো সাজ স্তরো রাখা চাই। দুঃখের বিষয় যত জন নিখরচায় আশ্রমের ভাত খায় তত জন নিখরচায় আশ্রম সাজ রাখতে এগিয়ে আসে না। সৌম্য ধৈর্য ধরে সহ্য করে যায়। এর পেছনে বহু শতাব্দীর উচ্চ নীচ মনোভাব আছে। আমরা উচ্চ বর্ণ, আমরা নীচ বর্ণের মতো ধাক্কাড়ের কাজ করব? তা হলে করবেটা কে? যারা চিরকাল করেছে তারাই চিরকাল করবে। পূর্বজন্মের কর্মফল। কত বড়ো বড়ো মহাপুরুষ এলেন আর গেলেন, কেউ কি এ প্রথা বদলে দিতে পারলেন? মহাত্মা গান্ধী পারবেন? পাগলামি! সৌম্য একটু একটু করে সাড়া পায়। জুলি বাড়ুদারনীর মতো গাছকোমর বেঁধে সাথী হয়।

এখানকার কর্মীরা সবাই সবাইকে সাথী বলে। যেমন কমিউনিস্টরা পরস্পরকে বলে কমরেড। এটা ছোটখাটো একটা সমাজ। অথচ ধর্মীয় সমাজ নয়। তা বলে ধর্মহীনও নয়। যে যার নিজের ধর্মে বিশ্বাস করে। কিন্তু যে প্রেরণা এদের চালিয়ে নিয়ে যাচ্ছে তা পুরাতন তাঁত চরকা ঘানি ইত্যাদি অবলম্বন করলেও নতুন এক আদর্শের প্রেরণা। সারা দিন তারা অক্লান্তভাবে কাজ করে।

“আমরা যদি মাহুষের হৃদয় জয় করতে পারি তা হলে বিশ্ব জয় করতে চাইনে। বিশ্ব জয় করে কী লাভ হবে, যদি নিজের আত্মাকেই হারাই? ইউরোপ আমেরিকা ও জাপানের দিকে চেয়ে ছাখ। মিলিটারি ইণ্ডাস্ট্রিয়াল কমপ্লেক্স তাদের মনঃশক্তি ক্ষয় করছে। যার পরিণতি জার্মানদের গ্যাস চেম্বারে ইহুদীদের গণহত্যা আর মার্কিনদের পারমাণবিক বোমায় জাপানীদের গণবিনাশ। এ ছাড়া আর কোনো পরিণতি হতে পারত না ও পারবে না। অপর পক্ষে সোভিয়েট রাশিয়ার দিকে চেয়ে ছাখ। সেখানেও মিলিটারি ইণ্ডাস্ট্রিয়াল কমপ্লেক্স। তবুও এই যে প্রাইভেট ক্যাপিটালিজমের স্থান নিয়েছে স্টেট ক্যাপিটালিজম। শ্রমিকদের ও কৃষকদের তাদের ইচ্ছার বিরুদ্ধে খাটিয়ে নিয়ে ও নাগরিকদের তাদের ইচ্ছার বিরুদ্ধে সৈনিক বানিয়ে ওরা ভাবছে ওরা একটা নতুন শৃঙ্খলার প্রতিষ্ঠা করছে। একদিন উপলব্ধি করবে ওটা একটা নতুন শৃঙ্খল। যদি তৃতীয় মহাযুদ্ধের পর কোনো পক্ষে

কেউ জীবিত থাকে। আমরা মনুষ্যত্বের বিনাশের উপর নয়, বিকাশের উপরেই জোর দিই। চরকা চিরকাল চরকা থাকবে না, তারও বিবর্তন হবে। কিন্তু সে থাকবে কাটুনীর আয়ত্তে। কাটুনী তার আয়ত্তে নয়। মানুষের জন্তেই যন্ত্র, যন্ত্রের জন্তে মানুষ নয়। যন্ত্রকে দিয়ে মানুষের পরিশ্রম কমাতে গিয়ে যন্ত্র মানুষকেই ছাঁটাই করছে, আর সেই ছাঁটাই মানুষগুলিকে যুদ্ধের ব্যবসায় লাগিয়ে দিয়ে মরণের মুখে পাঠিয়ে দিচ্ছে। ভারতেও তাই হবে কংগ্রেস নেতারা যদি গান্ধীজীর পন্থা থেকে বিচ্যুত হন। যদি মিলিটারি ইণ্ডাস্ট্রিয়াল কমপ্লেক্স গড়ে তোলেন। স্বাধীনতা যতই নিকটতর হচ্ছে সত্য ও অহিংসা ততই দূরতর হচ্ছে।” সৌম্য তার প্রিয় সাথীকে শোনায।

জুলি বিনা বাক্যে মেনে নেয়। কখনো ঝাড়ুদারনী হয়ে ঝাড়ু দেয়, কখনো টেকিশালে গিয়ে টেকিতে পাড় দেয়, কখনো তাঁতঘরে গিয়ে রাউসের কাপড় বুনতে বসে, কখনো কাটুনীদের সঙ্গে বসে তার জন্তে স্তুতি কাটে। বাগানে গিয়ে মাটি কোপায় কখনো। সারাদিন খেটে খুটে সন্ধ্যায় বাড়ী ফেরে যখন তখন তার শরীরময় ক্লান্তি আর ব্যথা। আহারের পর সকাল সকাল বিছানায় গা এলিয়ে দেয়। ঘুমের ঘোরে সৌম্যকে লতার মতো জড়িয়ে ধরে। পাছে সে উঠে পালিয়ে যায়। যখন ঘুম ভাঙে তখন দেখে সে কখন থেকে জেগে আছে। জুলিকে জাগিয়ে না দিয়ে অপেক্ষা করছে।

মনে মনে সে তার বাস্তুবী বাবলীর সঙ্গে টক্কর দেয়। ত তাদের বিপ্লবের আগে আমাদের বিপ্লব হবে, আমরাই জনগণের হৃদয় জয় করব। একবার ওদের হৃদয় জয় করতে পারলে ওদের যা করতে বলব তাই করবে। না, আর ভাঙ চুর নয়। খুন খারাপি তো নয়ই। প্রত্যেকটি গ্রাম স্বাধীনতা ঘোষণা করবে ও বাইরে থেকে আক্রমণ এলে আত্মরক্ষা করবে। ভাত কাপড়ের জন্তে কারো মুখাপেক্ষী হবে না। মোটা চাল মোটা কাপড় নিজেরাই উৎপন্ন করবে। নুনটাই যা দুলভ। সেটাও লোনা জমিতে পাওয়া যায়। পঞ্চায়তই হবে সত্যিকার সোভিয়েট।

জুলি যে শর্বতোভাবে সৌম্যর সঙ্গে একাত্ম হতে চেষ্টা করছে এটা লক্ষ করে সে আনন্দিত হয়। কিন্তু একই কালে বাবলীর সঙ্গে টক্কর দেবার কথাও ভাবছে। এর জন্তে সে দুঃখিত। জুলিকে বলে, “বাবলীদের দলেও ত্যাগী পুরুষ ও নারী আছেন। তাঁদের উদ্দেশ্য মহৎ। কিন্তু উপায় মহৎ নয়। আমরা যদি আমাদের উপায়ে দৃঢ় থাকি তা হলে একদিন জনগণ তুলনা করে

দেখবে কোনটা শ্রেয় আর কোনটা শ্রেয়। আপাতত আমাদের নিজেদের মধ্যেই যথেষ্ট দোঁনোমনো। সত্যিকার গান্ধীপন্থীর সংখ্যা এখন আঙুলে গোনা যায়। পঁচিশ বছর আগে আরো অমেক বেশী ছিল। এইভাবে যদি চলতে থাকে পঁচিশ বছর বাদে একটি কি দুটিতে ঠেকবে। বাপু বলেন একজন সত্যগ্রহীই যথেষ্ট। হ্যাঁ, একজন সত্যগ্রহীই প্রতিরোধের জন্তে যথেষ্ট। কিন্তু দেশের পুনর্গঠন বা সমাজের পুনর্বিষ্ঠাসের জন্তে যথেষ্ট নয়। বাবলীদের সে সমস্যা নেই। তারা সবাই একমত যে জমিদার, মহাজন আর পুঁজিশক্তির খতম করে সমস্ত অর্থনৈতিক ক্ষমতা রাষ্ট্রের হাতে তুলে দিলে আর রাষ্ট্রকে পার্টির হাতের মুঠোর মধ্যে আনলে আর পার্টিকে একজন প্রোলিটারিয়ান ডিক্টেটরের আজ্ঞাবহ করলেই প্রগতির পরাকাষ্ঠা হবে। ইতিহাস ক্রশদেশে ওদের একটা স্বযোগ দিয়েছে। তার থেকে ওদের ধারণা হয়েছে সব দেশে দেবে। আমাদের এদেশে দিলেও আশ্চর্য হবার কিছু নেই। ওদের সঙ্গে টুকর দিতে যাওয়া বুঝা। শুধু নিজের লক্ষ্য আর নিজস্ব উপায়ে স্থির থাকতে হবে। তোমার আমার যদি সেই পরিমাণে বিশ্বাসের জোর না থাকে তবে আমরা ইতিহাসের সঙ্গে পাল্লা দিয়ে পারব না। ইতিহাস আমাদের পেছনে ফেলে এগিয়ে যাবে। তবে বাপুকে পেছনে ফেলার সাধ্য কারো নেই। তিনি ছ'শো বছর এগিয়ে রয়েছেন। নৈতিক নেতৃত্ব ছাড়া মানব সভ্যতা বাঁচতেই পারে না, আর সে নেতৃত্ব তিনি ভিন্ন আর কে দিতে পারে? তাঁর রাজনৈতিক নেতৃত্ব শেষ হয়ে গেলেও নৈতিক নেতৃত্ব বজায় থাকবে। প্রবতারার মতো তিনি পথ দেখাতে থাকবেন। ইংরেজরা বলে, স্লো অ্যাণ্ড স্টেডি উইনস ছ রেস। তুমি যদি বাবলীর সঙ্গে দৌড়ে জিততে চাও তবে তোমাকে ধীর স্থির আর তল্লিষ্ঠ হতে হবে।”

“তোমার কি মনে হয় বাপুর রাজনৈতিক নেতৃত্ব শেষ হয়ে যাবার সম্ভাবনা আছে? কংগ্রেস কি তাঁর নেতৃত্ব মানবে না?” জুলি জানতে চায়।

“কংগ্রেস নেতারা যদি একবাক্যে বলতেন যে ব্রিটিশ গভর্নমেন্টের সঙ্গে কংগ্রেসের তরফ থেকে একমাত্র গান্ধীজীই কথাবার্তা চালাবেন ও তাঁর যা সিদ্ধান্ত কংগ্রেসেরও সেই সিদ্ধান্ত তা হলে তিনি সরে দাঁড়াতেন না। কিন্তু নেতাদের মধ্যেই এখন একটা অধীর ভাব দেখা যাচ্ছে। তাঁরা ক্ষমতা হস্তান্তরের জন্তে যে কোনো দাম দিতে প্রস্তুত! ওদিকে ব্রিটিশ গভর্নমেন্টও দিল্লীকা লাড্ডু খাবার জন্তে সাদরে ডাকছেন। যে থাকে সেও পশতাবে, যে

খাবে না সেও পশতাবে। কংগ্রেসের ভিতরে একটা খাই খাই ভাব আর ইংরেজের ভিতরে একটা ঘাই ঘাই ভাব লক্ষ করা যাচ্ছে। ওরা আর থাকতে চায় না। কিন্তু ওদের শর্ত কংগ্রেসকে মুসলিম লীগের সঙ্গে ভাগ করে খেতে হবে। ভাগ করে খেতে গেলে বাগড়া বাধবেই। সে বাগড়া কতদূর গড়াবে তা কেউ বলতে পারে না। আমাদের হয়তো শহীদ হতে হবে।” সৌম্য গম্ভীর মুখে বলে।

“না, না। তা কিছুতেই হবে না।” জুলি চেষ্টাশে ওঠে। “কাজ নেই এমন লাড়ুতে। বিনা শর্তে দিলে খাব, নয়তো খাব না। এই হবে কংগ্রেসের জবাব।”

“বিনা শর্তে দিলেও খাওয়া মুশকিল হবে। মুসলিম লীগ এমন গুণগোল বাধাবে যে গিলতে পারা যাবে না, উগরে ফেলতে হবে। পদত্যাগ করে পালিয়ে আসতে হবে। তার চেয়ে ওরা মুসলিম লীগকেই দিল্লীকা লাড়ু দিক। ওরাই গ্রাস করুক। শিখদের সঙ্গে যখন বেধে যাবে তখন টের পাবে কেমন মজা। তখন হয়তো কংগ্রেসের দিকে মিটমাটের জন্তে হাত বাডাবে। মিটমাট হলে পার্টিশনের ভিত্তিতে নয়, বিকেন্দ্রীকরণের ভিত্তিতে।” সৌম্যর মতে।

“যদি বিকেন্দ্রীকরণের ভিত্তিতে না হয় তা হলে?” জুলি প্রশ্ন করে।

“তা হলে মিটমাট শব্দই না। শহীদ হবার জন্তে তৈরি থাকতে হবে। বাপুকেও। তিনি তৈরি।” সৌম্য ঠিক জানে।

জুলি কঁাদো কঁাদো ভাবে বলে, “তা হলে আমরা কেন ঘর বাঁধতে যাচ্ছি? কুটির নির্মাণের কাজ বন্ধ করে দিই?”

“না, বন্ধ করে দেব না। সব চেয়ে খারাপটা ধরে নেব কেন? সেটা না ঘটতেও পারে। ইংরেজদের মতো লীগপন্থী মুসলমানদেরও অন্তঃপাতিত্ব ন সম্ভবপর। বিকেন্দ্রীকরণে ওদেরও তো কিছু লাভ হবে। নিতান্ত ফ্যানাটিক না হলে তাতেই তারা রাজী হবে।” সৌম্যর মনে হয়।

“নিতান্ত ফ্যানাটিক যদি হয়?” জুলি জেরা করে।

“তা হলে ছরাশা।” সৌম্য হাল ছেড়ে দেয়।

“তা বলে তোমাকে আমি অনর্থক শহীদ হতে দেব না। বাপুকেও বারণ করব। আমরা বাঁচব ও বাঁচাব।” জুলি ভেবে চিন্তে বলে।

জুলিদের গৃহপ্রবেশের আগের দিন মুস্তাফীরা একটা পার্টি দেন।

বিশিষ্ট অতিথিদের মধ্যে ছিলেন মানসের বন্ধু ও সেইমুখে সৌম্যর আলাপী সত্যভূষণ সমাদ্দার। ষাট্টিমারের জায়গায় নতুন জেলা জজ। মিলেস সমাদ্দারও ছিলেন।

মুস্তাফী বলেন, “এরা দুটিতে ঘরকরা পাতছে বটে, কিন্তু কে জানে ক’দিনের জন্তে! হঠাৎ একদিন সত্যাগ্রহের ডাক আসবে, অমনি এরা ঘর ছেড়ে পথে বেরিয়ে পড়বে।”

সমাদ্দার তাঁর সঙ্গে একমত হতে পারেন না। বলেন, “সত্যাগ্রহ হবে কার বিরুদ্ধে? ইংরেজরা তো ক্ষমতা হস্তান্তর করে দিয়ে চলে যাবার তালে আছে। যারা আপনি চলে যাচ্ছে তাদের বিরুদ্ধে সত্যাগ্রহ কেনই বা দরকার হবে? এক যদি কংগ্রেসের দাবী হয় ক্ষমতার হস্তান্তর কালে তাকেই একমাত্র উত্তরাধিকারী করা। তেমন দাবী ইংরেজ মানবে কেন? মানলে যে মুসলিম লীগকে শত্রু করা হবে। তাতে ইংরেজের কী লাভ? কংগ্রেস কি তার বিপদের দিন পাশে দাঁড়াবে? পুরাতন শত্রুকে উত্তরাধিকারী করে পুরাতন মিত্রকে শত্রু করা কি সম্ভব? ওটা ইংরেজ চরিত্র নয়। ইংরেজরা তেমন কাজ করতে গেলে মুসলিম লীগ জেহাদ ঘোষণা করবে। আর সেই জেহাদের লক্ষ্য কেবল ইংরেজ নয়, কংগ্রেসও হবে। মুসলিম লীগ ধর্মের নামে মাঠে নামলে যা হবে তা আর একটা কুরুক্ষেত্র। গান্ধীজী কি এটা বোঝেন না?”

সৌম্য এর উত্তরে বলে, “কংগ্রেস বলবে মুসলিম লীগকে একমাত্র উত্তরাধিকারী করতে। তার জন্তে সত্যাগ্রহ করতে হবে কেন? পদত্যাগ করলেই চলবে। পদত্যাগের পর গঠনের কাজ নিয়ে ব্যাপৃত থাকলেই হলো।”

“বামপন্থীরা সে নির্দেশ মানলে তো?” সমাদ্দার সন্দেহ করেন।

সৌম্য মোন থাকে। মুস্তাফী বলেন, “বামপন্থীরা দূরে থাক, দক্ষিণ-পন্থীরাও কি মানবে? সাড়ে ছ’বছর ধরে যারা অভুক্ত রয়েছে তারা এখন খেতে বসেছে, লাটসাহেবরাও তাঁদের জামাই আদরে খাওয়াচ্ছেন। এবার তো যুদ্ধের অভূহাতে উপবাস করা যায় না, যুদ্ধ আবার কবে বাধবে তারও ঠিক ঠিকানা নেই। এখন যদি অকারণে বা তুচ্ছ কারণে উপবাস করেন তবে ভবিষ্যতে যখন সত্যি সত্যি বিশ্বযুদ্ধ বাধবে তখন করবেন কী? বামপন্থীরা যদি অবুঝ হয় তবে তারাই দেশ শাসনের দায়িত্ব নিক। মুসলিম লীগের হাতে ক্ষমতা তুলে দেওয়া কেন? ক্ষমতা বলতে দেশ ভাগ করার ক্ষমতাও

তো বোঝায়। ক্ষমতার আসনে বসে যদি ওরা ওদের ইচ্ছামতো দেশভাগ করে তবে তো সারা বাংলাদেশ ওদেরি হবে। মায় আসামও। এবার ইংরেজরা সত্যি সত্যি কুইট করছে, এবার প্রত্যাশা করতে পারা যাবে না যে তারাই কংগ্রেসের শূন্য গদী আগলাবে। ইতিহাসের পুনরাবৃত্তি ষিটীয়বার হবে না। এবারকার ইহু ইংরেজদের শূন্য স্থান পূরণ করবে একমাত্র কংগ্রেস, না যুগ্মভাবে কংগ্রেস ও লীগ, না বিভক্ত ভাবে কংগ্রেস ও লীগ। ইংরেজও থাকবে না, কংগ্রেসও থাকবে না, মুসলিম লীগ যা খুশি তা করবে, আর কোথাও না করুক বাংলাদেশে তো করবেই। তাকে সংযত করবে কে? কী উপায়ে? সত্যাগ্রহ কি সেই উপায়?”

সৌম্য নিরুত্তর থাকে। জুলি বলে ওঠে, “সত্যাগ্রহ বিফল হলে গৃহযুদ্ধ।”  
 . “ছেলেমানুষি। মিলিও সেই কথা বলে। গৃহযুদ্ধ যদি সৈনিকে সৈনিকে হয় তা হলে হয়তো আমরা বেঁচে বর্তে থাকব, কিন্তু যদি জনতায় জনতায় হয় তবে সপরিবারে পরলোক যাত্রা করতে হবে। যাদের পরলোকে যেতে আপত্তি তারা পর প্রদেশে যাত্রা করবে। যঃ পলায়তি স জীবতি।”  
 মুস্তাফী বলেন।

সমাদ্দার আবার খেই হাতে নেন। “উপরের শ্রেণীর মুসলমানরা প্রায় দু’শো বছর ধরে অভুক্ত। একবার রক্তের স্বাদ পেলে তারা পঞ্চাশ বছরের আগে গদী থেকে নামবেন না। ছলে বলে কৌশলে গদী আঁকড়ে থাকবেন। তাঁদের কাছে গণতন্ত্রের কোনো মূল্য নেই। সত্যাগ্রহ বা গৃহযুদ্ধ কোনোটাই তাঁদের নড়াতে পারবে না। নিচের শ্রেণীর মুসলমানরা যতদিন না সাম্প্রদায়িক চেতনা থেকে বিমুক্ত হয়ে অর্থনৈতিক চেতনায় উপনীত হয় ততদিন ‘ঈ’দের টলাবে কে? বুখা অপেক্ষা। আপাতত আমাদের কর্তব্য ইংরেজদের সঙ্গে বোঝাপড়া। ইংরেজদের সঙ্গে বোঝাপড়া হলে ইংরেজরাই মুসলিম লীগের সঙ্গে বোঝাপড়ার পথ প্রশস্ত করে দেবে। কতকটা নিজেদের স্বার্থে, কতকটা ভারতের স্বার্থে। ভারতকে দুর্বল রেখে গেলে সোভিয়েট রাশিয়া এসে ষাড় মটকাবে। ভারতরক্ষার দায়িত্ব ওরা বিভক্ত করতে চাইবে না। সেটা হবে যৌথ দায়িত্ব। তা হলে বিদেশ নীতিকেও যৌথ রাখতে হয়। যোগাযোগ ব্যবস্থাকেও। শুনতে পাচ্ছি ক্যাবিনেট মিশনও সেই মর্মে চিন্তা করছেন।”

সৌম্য এইবার মুখ খোলে। “গান্ধীজীও সেই মর্মে চিন্তা করছেন।”

প্রতিমা সমাদ্দার জুলিকে একান্তে বলেন, “আপনাদের কুটির দেখতে



যাব একদিন আমরা। আপনারাও আমাদের কুটির দেখতে আসবেন একদিন।”

জুলি খুশি হয়ে বলে, “নিশ্চয়। কিন্তু আমাদের কুটিরটা বাস্তবিকই কুটির। আপনাদের কুটিরটা কাল্পনিক।”

প্রতিমা সমাদ্দার হেসে বলেন, “তা হোক। আসবেন কিন্তু।”

## ॥ আঠারো ॥

স্বপনদার বাড়ীর কাছাকাছি বাস করেন যশোবিকাশ রায়। ব্রাহ্মণ তথা জমিদার তথা ব্যারিস্টার। এর জন্তে তাঁর গর্বের কারণ ছিল। কিন্তু বিধাতা তাঁর মুখরক্ষা করেননি। শিতামহের অমতে বিলেত যাত্রার সময় অর্থাভাবে পিরালী বংশে বিবাহ করেন। ফলে পিরালী হন। বাঘে ছুঁলে আঠারো বা। যে পিরালী হয় তার ভাই বোন ছেলেমেয়েরাও পিরালী হয়। তাদের বিয়ের সময় মুশকিলে পড়তে হয়। তাঁর একমাত্র কন্যা যশোধরাকে তিনি লোরোটোতে পড়িয়েছিলেন। সঙ্গে সঙ্গে গান বাজনাও শিখিয়েছিলেন। দেখতেও সুন্দরী। তরী। দীর্ঘাজী। কিন্তু পিরালীদের মধ্যে সুপাত্র পাওয়া দুষ্কর। রক্ষণশীল ব্রাহ্মণ পাত্ররা গুরুজনের ভয়ে পেছিয়ে যায়। যদি বা কেউ রাজী হয় সে মোটা পণ চায়, সেটা খরচ হবে তার বোনের বিয়েতে।

অসবর্ণ বিবাহ যদিও তাঁর অহঙ্কারে বাধে তবু তিনি মেয়ের মুখ চেয়ে তাতেও রাজী হন। হাতের কাছে পান স্বপনদাকে। তিনি তখন বিলেত থেকে ফিরে লবে প্র্যাকটিস শুরু করেছেন। রায় সাহেবেরই কাছে শিক্ষানবীশ। যাকে বলে ডেভিল। নিজের ডেভিলের সঙ্গে মেয়ের বিয়ে তো প্রায়ই হয়। প্রস্তাবটা করেন মেয়ের মা। কিন্তু বিলিভী কেতা অলুসারে করতে হতো স্বপনদাকেই। বলতে হতো, “টুকটুক, তুমি কি আমার হবে?” স্বপনদা প্রেমের শিক্ষানবীশী করতে আসেননি, সে বিছা তিনি ছাত্রজীবনেই আয়ত্ত করেছেন। প্রয়োগও করেছেন। ব্যর্থও হয়েছেন। বলেন, “আমাকে মাফ করবেন। আমার ভাড়া হৃদয় জোড়া দেবার ক্ষমতা একমাত্র তারই আছে যে ভেঙে দিয়েছে। তার জন্তেই আমি অপেক্ষা করছি ও আরো কয়েক বছর করব।”

স্বপনদা জানতেন না যে টুকটুক দারুণ আঘাত পাবে। বিভিন্ন পাত্রের দ্বারা একটা না একটা অজুহাতে প্রত্যাখ্যাত হয়ে সে এক কাণ্ড করে বসে। বিলেত পালিয়ে গিয়ে এক মুসলিম যুবককে বিয়ে করে। বাপ মা মাথায় হাত দিয়ে বসেন। সমাজে মুখ দেখাবেন কী করে? যতদিন পারেন চাপা দেন। কিন্তু পরে জানাজানি হয়ে যায়। বন্ধুরা রসিকতা করে বলেন, মুসলমানদের উপর পিরালীদের একটা পতঙ্গের মতো আকর্ষণ আছে। কন্ঠার পিতা কৈফিয়ৎ দেন, “পাত্রটি তো ভালো। সৎশীল। ওদের বংশের কে যেন নবাব ছিলেন। ওদের পূর্বপুরুষ নাকি উত্তর-পশ্চিম সীমান্ত প্রদেশের পার্শ্ববর্তী সোয়াটের আখন্দ।” রেজা আলী আখন্দের সঙ্গে প্রথম আলাপের দিন স্বপনদা ইংরেজীতে ছড়া কাটেন—

“Who, or why, or which, or what,  
Is the Akond of Swat?”

ভ্রমলোক হকচকিয়ে যান। তাঁকে জিজ্ঞাস্য দেখে স্বপনদা বলেন, “ছড়াটা আমার নয়। এ ওয়ার্ড লীয়ারের। ইংরেজরা জানত না আকন্দ বলতে কী বোঝায়, কাকে বোঝায়, কেন বোঝায়। আমরাও কি বুঝি? আমরা তো ভাবি আকন্দ ফুল। একজন আকন্দকে চাক্ষুষ করে আমি ঠিক বুঝতে পারলুম। নিজেকে ধন্য মনে করছি।”

বরটি উদার হলে কী হবে? তাঁর গুরুজন খোর রক্ষণশীল। তাঁর বেগম পর্দা মানেন না, পিয়ানো বাজান, ক্যারল গান করেন, ছদ্মনামে সিনেমায় অভিনয় করেন। আকন্দ পরিবারের মাথা হেঁট। ব্যারিস্টারি পসারেও টান পড়ে। স্বামীজীতে মনোমালিগা। তখন টুকটুক আবার এক কাণ্ড বাধায়। যুদ্ধের সময় যেসব মার্কিন মিলিটারি অফিসার এসেছিলেন তাঁদের একজনের সঙ্গে ইলোপ করে। স্বামী তালাক দেন।

কিছুদিন পরে খবর আসে টুকটুক আবার বিয়ে করেছে। বরের নাম জন শারম্যান উডরো। পূর্বপুরুষ মিডিল ওয়ারে নাম করেছিলেন। টুকটুকের মনোগত উদ্দেশ্য ছিল হলিউডে গিয়ে চিত্রতারকা হওয়া। স্বত্তরবাড়ীর সেটা পছন্দ নয়। এ বাড়ীর মেয়েরা কেউ অভিনেত্রী হয় না। হলিউডের প্রযোজকরাও তাকে আমল দেন না। আজ বাজে ভূমিকা নিতে বলেন। সে রাজী হয় না। তার উদ্দেশ্য ব্যর্থ হয়। ততদিন জনেরও ক্লান্তি এসেছে। টুকটুক ডিভোর্স চায় ও পায়।

স্বপনদা একদিন আইনের পরামর্শ নিতে গিয়ে দেখেন ব্যারিস্টার সাহেবের মুখখানা কালো। কেন জানতে চাওয়ার আগে তিনি কাতর স্বরে বলেন, “স্বপন, টুকটুক আমার এক গালে কালি মাখিয়েছিল, এখন আরেক গালে চুণ মাখিয়েছে। আমি মুখ দেখাব কার কাছে? মেয়ে দ্বিতীয়বার ডিভোর্স পেয়েছে।”

স্বপনদা সাহাবার স্বরে বলে, “অসুখী হওয়ার চেয়ে বিচ্ছিন্ন হওয়া শ্রেয়।”

মেয়ের মা জলে ওঠেন, “এর জন্মে তুমিই দায়ী। তুমি যদি ওকে বিয়ে করতে ও সুখী হতো। এসব কলঙ্কারি করতে না।”

“আমি কেমন করে জানব? আমি কি সর্বজ্ঞ?” স্বপনদা জবাবদিহি করেন।

“তোমার জানা উচিত ছিল যে তোমার নভেল পড়ে তরুণী মেয়েরা তোমাকেই তাদের রোমান্টিক নায়ক করতে চাইবে। আরো ক’জনের মাথা খেয়েছে কে জানে? ওরাও হয়তো এমনি অসুখী।”

“গ্যেটের ‘তরুণ ভেরটারের দুঃখ’ পড়ে সকালের তরুণদের মধ্যে আত্মহত্যার হিড়িক পড়ে যায়। তার জন্মে কি গ্যেটে দায়ী? এ কী সর্বশেষে কথা! ক’জন প্রেমিকাকে আমি বিয়ে করতে পারতুম?” স্বপনদা কপট ভয়ে ভীত।

যশোবিকাশ বলেন, “আট যেমন জীবনের অনুসরণ করে জীবনও তেমনি আটের অনুসরণ করে। কার উক্তি? ওঙ্কার ওয়াইল্ডের না?”

“আর কার? যা চটকদার উক্তি।” স্বপনদা বলেন।

“আমি ভাবছি ও মেয়ে ইবসেনের সৃষ্টি না চেখভের? তোমার নয়, তা এতদিনে বোঝা গেছে। তুমি জানো কেমন করে সব দিক সামলাতে হয়। কিন্তু বলতে পারো ওর ভবিষ্যৎ কী? ও চায় স্বাধীন জীবিকা। সিনেমা লাইনই ওর পছন্দ। এদেশে তার কী রকম প্রসপেক্ট?” জানতে চান যশোবিকাশ।

“উচ্চমান বিসর্জন দিলে অসীম পরিসর। কিন্তু টুকটুক আর টুকটুক থাকবে না। দেবিকারানী আর দেবিকারানী থাকতেন না। তিনি সময়মতো সরে যান। অবশ্য মনের মতো স্বামী পেয়ে। অতি উচ্চমনা পুরুষ। টুকটুকের ভাগ্যে কী আছে কে বলতে পারে! আর একজন খেতোস্লাভ রেরিখ্‌ই বা কোথায়?” স্বপনদা সহানুভবী।

“তেমন একটি বর খোঁজা বাপ মায়ের সাধ্য নয়। আমরাই বা আর কদিন? আমাদের পরে মেয়েটার ভার নেবে কে? টাকার অভাব হবে না। কিন্তু তাই বা কেমন করে বলি? পারমানেন্ট সেটলমেন্ট রদ হয়ে যেতে পারে। ওটা ইংরেজদেরই সৃষ্টি। ওরা চলে গেলে ব্যারিস্টারিও তো উঠে যেতে পারে। ব্যারিস্টাররাও ইংরেজদেরই সৃষ্টি। আমাদের রুজি রোজগারের স্রোত থাকবে না। তোমাকে ধরতে হবে বৈত্তবৃত্তি। আমাকে যজ্ঞমান বৃত্তি।” যশোবিকাশ হাহতাশ করেন।

স্বপনদা হেসে বলেন, “শিরসি মা লিখ, মা লিখ, চতুরানন।”

“হাসির কথা নয়, স্বপন। ইংরেজী এসেছিল ফার্সীর জায়গায়। এর পর হিন্দী আসবে ইংরেজীর জায়গায়। পারবে তুমি হিন্দীতে আদালতের কাজ চালাতে? আমি তো অক্ষম। এ বয়সে হামাগুড়ি দিতে নারাজ!” যশোবিকাশ হাসেন না।

“হিন্দী কেন বলছেন? উহুঁই তো হবে পাকিস্তানের আদালতের ভাষা। আর বাংলাদেশ তো পড়বে পাকিস্তানে।” স্বপনদা মনে করিয়ে দেন।

“ভাবনার কথা। ইংরেজরা আমাদের উপর শোধ তুলে যাবে। ক্ষুদ্রিরাম থেকে সূর্য সেন পর্যন্ত সকলের সন্ত্রাসবাদী কাজকর্মের জন্তে প্রতিশোধ। তুমি তো জানো আমরা স্কাউটরা সন্ত্রাসবাদ সমর্থন করিনি। আমরা ছিলুম দূরদর্শী। আর এক্সট্রিমিস্টরা অদূরদর্শী। এখন ডে অড্ রেকমিং আসন্ন। ইংরেজরা যদি গোটা বাংলাদেশটাই মুসলিম লীগকে দিয়ে যায় কংগ্রেস বা মহাসভা সেটা থামাবে কী করে? এবারকার নির্বাচনে মুসলিম লীগেরই একাধিপত্য। সুহরাবর্দী একজন বর্ণহিন্দুকেও তাঁর মন্ত্রিমণ্ডলীতে নেননি। আর তাঁরই বা কতটুকু স্বাধীনতা? দাবার ঘুঁটি চালাচ্ছেন জিন্না। কংগ্রেসকে জব্দ করাই তাঁর পলিসি। কংগ্রেস হয়তো ইংরেজের সঙ্গে আপস করবে, কিন্তু লীগ কখনো কংগ্রেসের সঙ্গে আপস করবে না। ইংরেজের সঙ্গে কংগ্রেসের আপসে বাধা দেবে। কৈকেয়ীর মতো। দশরথকে বলবে, তুমি আমাকে বর দেবে বলে প্রতিজ্ঞা করেছিলে। আমি চাই পাকিস্তান। বার সামিল হবে সারা বাংলা, সারা আসাম, সারা পাঞ্জাব। আমাকে আমার প্রার্থিত বর না দিয়ে তুমি কেমন করে বনবাসে যাও, দেখব। তোমার বিপদের দিন কৌশল্য। কি তোমার সেবা করেছিল? তোমাকে বাঁচিয়ে দিয়েছিল? বুঝলে, স্বপন? ইংরেজরা মুসলিম লীগকে তার পাওনা না দিয়ে ছাড়া পাবে না। না দিয়ে

গেলে লীগপন্থীরা বিদ্রোহ করবে। গুলি করে হাজার হাজার মুসলমান মারতে হবে। সম্ভব নয়।” যশোবিকাশ মাথা নাড়েন।

“ক্যাবিনেট মিশনের স্টেটমেন্ট পড়েছেন? ওঁরা সাফ বলে দিয়েছেন যে ওঁরা পাকিস্তান সমর্থন করেন না। মুসলিম লীগ যদি নাছোড়বান্দা হয় তবে অর্ধেক বঙ্গ, অর্ধেক পাঞ্জাব ও আসামের সিলেট জেলা পাবে। তাছাড়া উত্তর-পশ্চিম সীমান্ত প্রদেশ, বেলুচিস্তান ও সিন্ধুপ্রদেশ। যদি গোটা বাংলা, গোটা পাঞ্জাব ও গোটা আসামের জন্তে জেদ ধরে তবে সোভারেনটি পাবে না। সৈন্যসামন্ত, পররাষ্ট্রবিভাগ ও যোগাযোগ ব্যবস্থা থাকবে অবিভক্ত ভারতের কেন্দ্রীয় সরকারের হাতে। মুসলিম লীগকে খুশি করার জন্তে তাঁরা কেন্দ্রীয় সরকারের অত্যন্ত ক্ষমতা তিনটি গ্রুপের মধ্যে ভাগ করে দেবেন। হিন্দুপ্রধান প্রদেশগুলিকে নিয়ে একটা গ্রুপ, পশ্চিম প্রান্তের মুসলিমপ্রধান প্রদেশগুলিকে নিয়ে আর একটা গ্রুপ, বাংলাদেশ ও আসামকে নিয়ে আরো একটা গ্রুপ। শেষের গ্রুপটাতে মুসলমানদের সংখ্যা শতকরা বাহ্যিকের নিচে। অমুসলমানদের সংখ্যা শতকরা আটচল্লিশের উপরে। প্রায় সমান সমান। গ্রুপদের নিজস্ব আইনসভা ও সরকার থাকবে। কোয়ালিশনের সম্ভাবনাই বেশী। এই হলো ভাবী শাসনতন্ত্রের রূপরেখা। সেটা কারও উপর চাপিয়ে দেওয়া হবে না। সেটা একটা এ্যাওয়ার্ড নয়।” স্বপনদা সংক্ষেপে প্রস্তাবের মর্ম শোনান।

“কেন্দ্র ও প্রদেশের মাঝখানে আরো একটা স্তর? গ্রুপ? ছনিয়ার আর কোন শাসনতন্ত্রে কেউ দেখেছে? ওটাকে চালু করে দেবার জন্তে ইংরেজদের আরো কিছুকাল থেকে যেতে হবে। নয়তো দু’দিনেই ভেঙে পড়বে। কেন্দ্রকে অমন করে কমজোরী করা বিজ্ঞতা নয়। মোগলরাও তা করেনি, ইংরেজরা নিজেরাও তা করেনি। কংগ্রেস তাতে রাজী হবে? লীগ যদি রাজী হয় তবে তা সেই মই বেয়ে গাছে ওঠার জন্তে। গ্রুপ থেকেই পৌছবে স্বাধীন পাকিস্তানে। সমগ্র বঙ্গ, সমগ্র পাঞ্জাব ও সমগ্র আসাম সমেত। ডাঙন ধরাবে কেন্দ্রীয় সৈন্যদলে। কংগ্রেস লীগ আপস ছাড়া এ পরিকল্পনা কার্যকর হবে না। সে আপস ইংরেজের হাতে নেই। আছে দুই দলের দলপতিদের হাতে। আমি তোমার মতো আশাবাদী নই, স্বপন।” যশোবিকাশ বলেন।

“আমিও কি আশাবাদী? লক্ষণ যা দেখছি তা আপসের নয়, গৃহযুদ্ধের। দু’পক্ষই তৈরি হচ্ছে। বিনা যুদ্ধে কেউ কাউকে স্বচ্যগ্র মেদিনী দেবে না। আমি এতে জড়িয়ে পড়তে চাইনে। আমি দূরে সরে থাকতে চাই। কিন্তু

যাবই বা কোথায় ? ইউরোপে যেতে ইচ্ছে করে, কিন্তু দীপিকা কলকাতা ছেড়ে কোথাও যাবে না। তার কুকুরই তার সর্বস্ব।” স্বপনদা বিলাপ করেন।

টুকটুকের মা মেথলা দেবী হেসে ওঠেন। “কুকুরই তার সর্বস্ব ? স্বামী নয় ? এই হচ্ছে তোমার শাস্তি। টুকটুককে বিয়ে করলে দেখতে তুমিই হতে তার ঠাকুর। সে হতো ঠাকুরসর্বস্ব।”

দীপিকা যদি শোনে তবে রক্ষে থাকবে না। স্বপনদা কথাটা ঘুরিয়ে নিয়ে বলেন, “তা নয়। দীপিকা কলকাতায় থাকতে চায় সম্পত্তি পাহারা দিতে। ইংরেজরা যদি সৈন্ত সামন্ত নিয়ে ভারত থেকে অপসারণ করে তবে তার পরে যেটা হবে সেটা জোর যার মূলুক তার। মালিক পালিয়ে গেলে সম্পত্তি লোশাট হয়। এটাই তো নিয়ম। আদালত কোথায় যে নালিশ করে ফেরৎ পাবে। এসব অচল হবে। লর্ড ওয়েভেল ইনটারিম গভর্নমেন্টের জন্মে চেঁচা চালিয়ে যাচ্ছেন। যদি সফল হন তবে কংগ্রেস আর লীগ একসঙ্গে কাজ করতে করতে পরস্পরকে বিশ্বাস করতে শিখবে। একটা মোডাস ভিভেন্ডি গড়ে উঠবে। হিন্দু মুসলমান যদি এক না হয় ভারত এক হবে কোন্ মন্ত্রবলে ? ইংরেজরা ক্ষমতা হাতে দিয়ে গেছে বলে ? আমি চাই হিন্দু মুসলমানে কোলাহুলি। তুমি আমাকে কিছু দাও, আমি তোমাকে কিছু দিই। গিভ অ্যাণ্ড টেক। কিন্তু ওরা তো কেউ কারো সঙ্গে কথাই বলছে না। প্রত্যেকেরই সম্পর্ক ইংরেজের সঙ্গে। অপর পক্ষের সঙ্গে নয়। কৌশল্যাতে কৈকেয়ীতে মুখ দেখাদেখি নেই।”

“ত্যাগ, স্বপন, কংগ্রেস আর লীগ যদি মুসলিম নির্বাচন কেন্দ্রে পরস্পরকে অপোজ করে, যদি প্রাদেশিক আইনসভায় পরস্পরের বিরোধী পক্ষ হয়, যদি কেন্দ্রীয় আইনসভায় পরস্পরের বিরুদ্ধতা করে, তবে বড়লাটের শাসন পরিষদে তারা মিলে মিশে শাসনকার্য চালাবে কী করে ? গিভ অ্যাণ্ড টেক সর্ব ক্ষেত্রেই করতে হবে। কেবলমাত্র শাসন পরিষদে নয়। গান্ধীজী ওনেছি ওয়েভেল সাহেবকে পরামর্শ দিয়েছেন কংগ্রেস বা লীগ এদের এক পক্ষের উপর গভর্নমেন্ট ছেড়ে দিতে। লীগ যদি গভর্নমেন্ট চালায় তাতে তাঁর আপত্তি নেই। কিন্তু দুই দলের যেমন সম্পর্ক তাতে ওদের মেলাতে গেলে বিস্ফোরণ ঘটবে।” যশোবিকাশ বলেন।

ব্র্যাণ্ডি এল। স্বপনদার দিকে বাড়িয়ে দিয়ে যশোবিকাশ বলেন, “আমার বয়স হলো সত্তর। কোর্টে যাওয়া আসা করা আর চলবে না,

গাউন্টের মতো হয়েছে। যতদিন পারি চেয়ার প্র্যাকটিস চালিয়ে যাব, যদি ইংরেজী থাকে। এখন আমার প্রধান ভাবনা টুকটুকের কী হবে। তোমার কি মনে হয় ও আবার বিয়ে করবে?”

“কেমন করে জানব? স্ত্রিয়াং চরিত্রং দেবা ন জানন্তি কুতো মহুগ্ধাঃ।”

যশোবিকাশ হাসেন, কিন্তু মেথলা দেবী চটে যান। “নারীজাতিকে অত বড়ো অপমান আর কেউ করেনি। পচা রসিকতা।”

যশোবিকাশ তাঁর স্ত্রীকে প্রবোধ দেন। “খারী সীতা, সাবিত্রী, উমা হৈমবতীর চরিত্র এঁকেছেন তাঁরা নারীকে কত বড়ো আসন দিয়েছেন। সম্মানও তো আর কেউ তেমন করেনি।”

“টুকটুক আসছে কবে।” স্বপনদা জিজ্ঞাসা করেন।

“যে কোনো দিন। আমাদের কাছেই থাকবে। বরাবর থাকলে তা আরো ভালো হয়। এ বয়সে আর কে আমাদের দেখাশুনা করবে? ভাস্কর? ভাস্কর তো বো নিয়ে মিলিটারি ক্যানটুনমেন্টে। শুনছি-ব্রিগেডিয়ার হবে। ইংরেজরা এক এক করে উচ্চ পদ ছেড়ে দিচ্ছে। ওদের এখনকার পলিসি হলো আর্মিটাকে ওদের সাগরেদ দিয়ে ভরিয়ে দেওয়া। গোরা ইংরেজের জায়গায় কালা ইংরেজ। যাতে ব্রিটিশ ঐতিহ্যের সঙ্গে অঙ্গায় রক্ষা হয়। ভারতের স্বাধীনতায় ওদের আপত্তি নেই। যেটা অবশ্যম্ভাবী সেটাকে মেনে নেওয়াই তো বিজ্ঞতা। এবারকার যুদ্ধে এস্তার ছেলেকে কমিশন দেওয়া হয়েছে। তারা বেকার হলে তো শত্রুতা করবে। আর তাদের বহাল রাখতে গেলে নিজেদেরই হটতে হয়। সেটার জন্তে ওরা মনে মনে প্রস্তুত। তবে ওদের পেনসন ও ক্ষতিপূরণ দিতে হবে। মিভিলিয়ানদেরও ওই একই ব্যক্তব্য। কিন্তু দেবেটা কে? হোম গভর্নমেন্ট না ভারত গভর্নমেন্ট? হোম গভর্নমেন্ট দীর্ঘকাল ধরে পেনসন ও ক্ষতিপূরণের দায় বহিতে রাজী হবে না। বহিতে হবে ভারত সরকারকেই। কোন ভারত সরকারকে? যারা বিদায় নিচ্ছে তাদের ভারত সরকার নয়। যারা ক্ষমতা বুঝে নিতে চায় তাদেরই সরকার। ক্ষমতার হস্তান্তর মানেই দায়িত্বের হস্তান্তর। ইন্টারিম গভর্নমেন্ট গঠন করার জন্তে বড়লাট যে ব্যাকুল হয়েছেন তার কারণ এদেরই নিতে হবে পেনসন ও ক্ষতিপূরণ দেবার সিদ্ধান্ত। রাজী হলে মিটমাট, নারাজি হলে বিচ্ছেদ। কংগ্রেস বা লীগ কেউ ব্রিটেনের সঙ্গে বিচ্ছেদ চায় না। শত্রুতার অধ্যায় সমাপ্ত হয়েছে। মিত্রতার অধ্যায় আরম্ভ

হয়েছে। আমরা মডারেটরা এইটেই কল্পনা করেছিলুম। দাদাভাই নওরোজী, ফিরোজ শাহ মেহতা, ডব্লিউ সি বনাজি, সুরেন্দ্রনাথ বানার্জি, গোপাল কৃষ্ণ গোখলে, লর্ড সিন্ধা কেউ তাঁবেদার ছিলেন না। তখনকার দিনে মহম্মদ আলী জিন্নাও ছিলেন এঁদের সঙ্গে। তিনিও সমান স্বাধীনচেতা। পরিবর্তন তো মানুষ মাত্রেরই হয়। তাঁরও হয়েছে। গোখলের শিষ্য গান্ধীও। দুঃখ এইখানে যে এঁদের মাঝখানে এখন দূতর ব্যবধান। গান্ধীজী যেমন বড়লাটের প্রতিপক্ষ জিন্না সাহেব তেমনি গান্ধীজীর প্রতিপক্ষ। বিরোধীপক্ষই তো অলটারনেটিভ গভর্নমেন্ট গঠন করে। গান্ধীজী একদিন তা করবেন, কিন্তু জিন্না সাহেবের কী আশা। যদি না দেশ ছ'ভাগ হয়। বাধা দিলে মিডিল ওয়ার। ফলাফল অনিশ্চিত। ইংরেজ তার আগেই কুইট করবে।" যশোবিকাশ অহুমান করেন।

স্বপনদা জানতে চায়, "জিন্নাকে কি আপনি চিনতেন?"

"চিনব না? তখনকার দিনে কংগ্রেস ছিল আমাদেরি হাতে গড়া। কলকাতা হাইকোর্টের ব্যারিস্টার, এ্যাটর্নি ও উকীলরাই নিজেদের মধ্যে আলোচনা করে স্থির করতেন কংগ্রেসের অধিবেশন কোথায় হবে, সভাপতি হবেন কে, পলিসি কী হবে। 'আমরা বিলেতকে'তা ক'টাই দেশে কংগ্রেস আদি ঘটাই।' স্বর্ণকুমারী দেবীর স্বামী জানকীনাথ ঘোষাল থাকতেন আমাদের এই পাড়ায়। কংগ্রেসের কাজ দেখাশুনা করতেন। গান্ধীজীর আত্মচরিতে যে ঘোষালবাবুর নাম আছে তিনি আর কেউ নন, জাদকীনাথ। হ্যাঁ, তিনিও ব্যারিস্টার। সরলা দেবী তাঁরই কন্যা। কংগ্রেসের অধিবেশনে গান বাজনার ভার ছিল তাঁর উপরে। রবীন্দ্রনাথও গান গেয়ে শুনিয়েছেন। কংগ্রেস মুসলমানদেরও সভাপতি করত। মেঘর তো ঢ়াংতই। জিন্না ছিলেন আমাদের তুরুপের তাস। ইংরেজদের বলতুম, এই দাখ জিন্না আছেন আমাদের সঙ্গে। ইংরেজ মহলে তিনি অপ্রিয় ছিলেন। প্রিয় মুসলমানরা ঢাকায় শিক্ষা সম্মেলন করতে গিয়ে শেষ মুহূর্তে একটা চমক দেন। মুসলিম লীগ বলে একটা প্রতিষ্ঠান পত্তন। খবরটা আসে রয়টারের মারফৎ লণ্ডন থেকে। ঢাকা থেকে সরাসরি নয়। তা হলে বোঝার কার কারসাজি। ওটা যে ব্রিটিশ গভর্নমেন্টের সেক্রেট ফ্রন্ট এ বিষয়ে কারো সন্দেহ ছিল না। বড়লাট লর্ড মিণ্টো এঁদের মুখ দিয়ে বলিয়ে নেন যে মুসলমানদের দিতে হবে সেপারেট ইলেকটোরেট। আমরা যে শাসনভিত্তিক পরিবর্তন দাবী করেছিলুম



তার পরিণতি হয় নির্বাচনের সময় হিন্দু মুসলমানের পৃথক ভোট। নির্বাচন জিতে কেন্দ্রীয় আইনসভায় যেতে হলে হিন্দু প্রার্থী মুসলিম ভোটারের ঝরঝ হবেন না, মুসলিম প্রার্থী হিন্দু প্রার্থীর ঝরঝ হবেন না। যে যার নিজের সম্প্রদায়ের প্রতিনিধি হয়ে নির্বাচিত হবেন। জিন্নাকে বাধ্য হয়ে মুসলিম নির্বাচনকেন্দ্রে প্রার্থী হতে হয়। মুসলিম লীগের মেম্বর হতে হয়। তা হলে তিনি কংগ্রেস ত্যাগ করেন না। তিনি দুই নোকায় পা রেখেছেন কেন এ প্রশ্নের উত্তরে তিনি বলেন, ভারতের জাতীয় স্বার্থে আমি কংগ্রেসে আছি। মুসলমানদের সাম্প্রদায়িক স্বার্থে মুসলিম লীগেও আছি? তখনকার দিনে এটা নিষিদ্ধ ছিল না। ফলে জিন্না ছিলেন বরের ঘরের পিসী ও কনের ঘরের মাসী। প্রথম মহাযুদ্ধের মাঝখানে লখনউতে যে কংগ্রেস লীগ প্যাক্ট স্বাক্ষরিত হয় সেটা ছিল টিলক ও জিন্নার যৌথ উদ্যোগে। লখনউতে আমিও উপস্থিত ছিলাম। লীগ সদস্যরা কংগ্রেসের অধিবেশনে আসেন, আমরাও যাই লীগ অধিবেশনে। টিলক বলেন, 'হিন্দু মুসলমান ও ইংরেজের ত্রিকোণীয় সংগ্রাম চলতে দেওয়া উচিত নয়। সংগ্রাম হবে এখন থেকে দ্বিপাক্ষিক। একপক্ষে হিন্দু মুসলমান। অপর পক্ষে ইংরেজ। সেটা কংগ্রেস ও লীগ উভয়ের মনের কথা। সে সময় আমাদের লক্ষ্য ছিল প্রাদেশিক স্বায়ত্তশাসন। পরে যখন সেটা হয় কেন্দ্রীয় স্বায়ত্তশাসন বা স্বরাজ তখন জিন্না বলেন, 'তার আগে আরো একটা কংগ্রেস লীগ প্যাক্ট চাই।' টিলক জীবিত থাকলে সেটাই বোধ হয় পলিসি হতো। কিন্তু ইতিমধ্যে গান্ধীজী এসে কংগ্রেসের হাল ধরেছিলেন। তাঁর লক্ষ্য ছিল একবছরের মধ্যে স্বরাজ। উপরন্তু খেলাফত সমস্যার স্তমীমাংসা। তা ছাড়া শাঞ্জাবের অত্যাচারের সুরিচার। তাঁর উদ্দেশ্য সাধনের উপায় ছিল অহিংস অসহযোগ। গণ সত্যাগ্রহ। তার জগ্রে নির্বাচন বয়কট। আদালত বয়কট। আমি সেই সময় সরে পড়ি! জিন্না সাহেবও। কংগ্রেস লীগ প্যাক্ট তে; পার্লামেন্টরি রাজনীতির অঙ্গ। গান্ধীজী পার্লামেন্টারি রাজনীতি বর্জন করেন। পরে সি আর দাশ ও মোতিলাল নেহরুর খাতিরে স্বরাজ দলের সঙ্গে আপস করেন, কিন্তু জিন্নার সঙ্গে নয়। সেই ইস্যু গান্ধী জিন্নার মতভেদ ও পথভেদ বেড়েই চলেছে। জিন্না দাবী করছেন যে মুসলিম লীগই মুসলমানদের একমাত্র প্রতিনিধিত্বান্বিত প্রতিষ্ঠান, কংগ্রেস মুসলিমরা লীগ মুসলিমদের সঙ্গে এক আসনে বসতে পারেন না, তাঁদের বিসর্জন না দিলে কোনো চুক্তিই সম্ভব নয়, কোনো চুক্তি সম্ভব না হলে ক্ষমতার

হস্তান্তর একই কেন্দ্রীয় সরকারের উপর বর্তাতে পারে না, তার জন্তে চাই দুটো কেন্দ্রীয় সরকার, একটা হিন্দু নেশনের হোমল্যাণ্ডের ও আরেকটা মুসলিম মেশনের হোমল্যাণ্ডের প্রতিনিধিদের নিয়ে গঠিত। একটিমাত্র কেন্দ্রে কোয়ালিশন যদি একান্তই হয় তবে দুই পক্ষের প্যারিটি তার জন্তে অত্যাৱশ্যক। কংগ্রেসকে সেটা মেনে নিতে হবে। নইলে লীগের সহযোগিতা পাওয়া যাবে না। সে সংঘর্ষের পথ ধরবে। সেই জিন্না আর এই জিন্না! চিনতেই পারা যায় না। মুখের চেহারা একই রকম আছে, কিন্তু মনের চেহারা বেবাক বদলে গেছে। টিলক মহারাজ যেটা বন্ধ করে দিয়েছিলেন সেইটেই আবার আমাদের সামনে—তিনকোণা সংগ্রাম। কিন্তু ইংরেজ যদি স্বেচ্ছায় অপসরণ করে তা হলে আর তিনকোণা নয়, দ্বিপাক্ষিক।” যশোবিকাশ তন্ময় হয়ে বলেন ও স্বপনদা একাগ্র চিত্তে শোনেন।

এর পরে আর জমে না। যশোবিকাশের হৃদয় ছিল ভারাক্রান্ত। মেথলা দেবীরও। টুকটুকের ভবিষ্যৎ কী হবে সেটাই প্রথম কথা। ভারতের ভবিষ্যৎ কী হবে সেটা দ্বিতীয়।

স্বপনদা মার আইনের পরামর্শ চেয়ে তাঁকে বিব্রত করতে চান না। তিনিও কন্নার জন্তে চিন্তিত। সেদিন এই শেষ।

ওদিকে দ্বীপিকা দি ক্যাবিনেট মিশনের পরিকল্পনা পড়ে নিশ্চিত হয়েছেন। তাঁর কাছে বড়ো কথা কলকাতার ভবিষ্যৎ। মুসলিম লীগ যদি স্বাধীন ও সার্বভৌম পাকিস্তান চায় তবে তাকে কেবল হিন্দুপ্রধান প্রদেশগুলির নয়, পাঞ্জাব, বঙ্গ ও আসামের হিন্দুপ্রধান অঞ্চলগুলিরও মায়া কাটাতে হবে। কলকাতা তথা পশ্চিমবঙ্গ তার ভাগে পড়বে না। তবে সে যদি নিতান্তই সেসব অঞ্চল হাতছাড়া করতে না চায় তা হলে তাকে সার্বভৌমতার মায়া কাটাতে হবে। সার্বভৌমতার প্রতীক ডিফেন্স, ফরেন এ্যাফেয়ার্স ও যোগাযোগ ব্যবস্থা। সেগুলি তুলে দিতে হবে এক যৌথ গভর্নমেন্ট ৷ অথরিটির হাতে। সেটাও একপ্রকার কেন্দ্রীয় সরকার। হিন্দুস্থান ও পাকিস্তান দুই উপরাষ্ট্রই তার অধীনস্থ। যেমন হায়দরাবাদ ও কাশ্মীর। অবিভক্ত ভারতই অল্প ভাবে বহাল থাকবে। সেই পরিপ্রেক্ষিতে বাংলাদেশ, পাঞ্জাব আর আসামও থাকবে অবিভক্ত।

“লেবার যে আমাদের কত বড়ো শুভামুখ্যায়ী এই পরিকল্পনাই তার প্রমাণ। মুসলিম লীগ কিছুতেই অত ছোট পাকিস্তান ও অত বড়ো

হিন্দুধানে রাজী হবে না। তা হলে ভারত ভাগের দাবী ত্যাগ করতে হয়। আর কলকাতার মায়া কাটানোও কি মুখের কথা? সুহরাবদী কি পারবেন বাংলা ভাগে রাজী হতে? আমরা অনায়াসে ধরে নিতে পারি যে পাকিস্তান কলকাতা পাবে না। লড়াই করা বুখা। কলকাতা আমাদেরই থাকবে। আমরাও কলকাতায় থাকব।” দীপিকাদি বলেন।

“হ্যাঁ, ঘাম দিয়ে জর ছাড়ল। আমাকে আর বঙ্গভঙ্গ দর্শন করতে হবে না। এক জীবনে একবারই যথেষ্ট। ইংরেজদের উপর তোমার অবিশ্বাস জন্মেছিল। সেটা সেই কমিউনাল এ্যাওয়ার্ডের পর থেকে। এখন তুমি বুঝতে পারছ ওরা হিন্দুর উপর জাতক্রোধ নয়। কী ভোগানটাই ওদের ভোগানো হয়েছে ১৯৪২ সালের কুইট ইণ্ডিয়া আন্দোলনে! একদিকে জাপান, আরেক দিকে কংগ্রেস। কিন্তু তার জন্তে ওরা প্রতিশোধ নিতে চায় না। পেথিক-লরেন্স আর ক্রিপস গান্ধী ও নেহরুর পুরাতন বন্ধু।” স্বপনদা বলেন।

“পেথিক-লরেন্সের মতো ফেমিনিষ্ট কি আর আছে? স্ত্রীর পদবী বহন করে চলেছেন। ওর নিজের পদবী তো পেথিক। লরেন্স পদবীটা ঠর স্ত্রীর। হ্যাঁ, একেই বলে প্রেমের জন্তে ত্যাগস্বীকার। স্ত্রীরাই তো স্বামীর পদবী বহন করে বেড়ায়, স্বামীরা স্ত্রীর পদবী বহন করা দূরে থাক বিয়ের পরে রাখতেও দেয় না। যেমন তুমি।” দীপিকাদি খোঁটা দেন।

স্বপনদা জানতেন যে দীপিকাদি কটর ফেমিনিষ্ট। বাবলী যেমন কটর কমিউনিষ্ট। এ নিয়ে আগেও তর্কাতর্কি হয়ে গেছে। ইংরেজ মেয়েরা আজকাল স্বামীর পদবী ধারণ না করে পিতার পদবীই রক্ষা করে। দীপিকাদি ইচ্ছা করলে দীপিকা ঘোষ লিখতে পারেন। কিন্তু স্বপনদাকে যদি বলেন গুপ্ত-ঘোষ লিখতে তা হলে সেটা হবে শ্রুতুমার রায়ের হাঁসজার বা হাতিমির মতো কিস্তুত। স্বামীর মতো স্ত্রীও হাস্যাস্পদ হবেন। আসলে ফেমিনিজম তত্ত্বটাই স্বপনদার পছন্দ নয়। এই যে মেয়েরা চাকরির জন্তে আজকাল ক্ষেপেছে এটা বিবাহের সঙ্গে বেথাপ। টুকটুক তার নবতম নিদর্শন। স্বামী আর সন্তান নিয়েই মেয়েদের জীবন।

আজ এ নিয়ে আর তর্ক না করে স্বপনদা বলেন, “পেথিক-লরেন্স ব্যারিস্টার, ক্রিপস ব্যারিস্টার, গান্ধী ব্যারিস্টার, নেহরু ব্যারিস্টার, পাটেল ব্যারিস্টার, জিন্না ব্যারিস্টার, লিয়াকৎ আলী ব্যারিস্টার। ওদিকে ব্রিটিশ প্রধানমন্ত্রী অ্যাটলীও ব্যারিস্টার। এই ক’জন ব্যারিস্টারই ভারতের ভাগ্য

নিয়ন্ত্রণ করছেন। ইতিহাসের নির্বন্ধ। অথও ভারত বা দ্বিখণ্ড ভারত যেটাই হোক না কেন সিদ্ধান্তটা ব্যারিস্টারদের হাতে। নেহরু ও পাটেলকে বাদ দিয়ে হিন্দুস্থান সরকার হয় না। জিন্না আর লিয়াকৎকে বাদ দিয়ে পাকিস্তান সরকার হয় না। তোমাকে মানতেই হবে যে ব্যারিস্টোক্রাসীর যুগ যায়নি ও যাবে না। ডেমোক্রাসী, বুয়োক্রাসী আর ব্যারিস্টোক্রাসী এই তিনটি যেন এক বৃন্তে তিনটি ফুল। যেমন বিলেতে।”

দীপিকা দি রসিকতা করে বলেন, “এ যে দেখছি অষ্টবজ্র সম্মিলন। এর ফল হবে বহুব্রাহ্মে লঘু ক্রিয়া। কনস্টিটুয়েন্ট অ্যাসেম্বলী বসবে কি-না সন্দেহ। ইন্টারিম গভর্নমেন্ট গঠন করতে পারা যাবে কি-না সন্দেহ। ক্যাবিনেট মিশন সফল হবে কি-না সন্দেহ। গাছে কাঁঠাল গোঁফে তেল। ঘোরতর নৈরাজ্যের মধ্যে আইন আদালত টিকে থাকবে কি-না সন্দেহ। ঘোলা ভলে কমিউনিষ্টরা মাছ ধরবে কি-না সন্দেহ। সারা জীবনের তপস্যা বার্থ হলে গান্ধীজী বেঁচে থাকবেন কি-না সন্দেহ। স্টালিন তাঁর শৃংখলা পূরণ করতে এগিয়ে আসবেন কি-না সন্দেহ। স্টালিন এলে টুমানও আসবেন নিঃসন্দেহ। ক্যাবিনেট মিশন প্রত্যাবর্তন করছেন। কিন্তু শিখদের তুষ্ট করবার জগ্গে কী উপায় করছেন? ওরা কি সহ্য করবে?”

## ॥ উনিশ ॥

দীপিকা দির মনে শান্তি, স্বপনদার অশান্তি। ক্যাবিনেট মিশন তৃতীয় কোনো বিকল্প রাখেননি। বাংলাদেশ ইচ্ছা করলে স্বাধীন ও সার্বভৌম হতে পারবে না। হিন্দুরা চাইবে তাকে হিন্দুস্থানের সামিল করতে, মুসলমানরা চাইবে পাকিস্তানের সামিল করতে। হিন্দুস্থান ও পাকিস্তান যদি একই কেন্দ্র মেনে নেয় তবে বাংলাদেশ অবিভক্ত থাকবে, কিন্তু জিন্না যদি পাকিস্তানের জগ্গেও প্যারিটি দাবী করেন তবে কংগ্রেস কিছুতেই রাজী হবে না। প্যারিটি মানে ব্যালাঙ্গ অভ পাওয়ার। ব্যালাঙ্গ অভ পাওয়ার কেউ কাউকে ছেড়ে দেয় না বলেই জার্মানী দ্বিধাবিভক্ত। বালিন দ্বিধাবিভক্ত। শেষ পর্যন্ত বাংলাদেশও দ্বিধা হবে। সীতার মতো স্বপনদাও পাতালপ্রবেশ করবেন। আর একটি

লাইনও লিখবেন না। কার জন্তে লিখবেন ? বাঙালীর জন্তেই লেখা, বাঙালীর ভাষাতেই লেখা। বাঙালী কোথায় ? তার ভাষা কোথায় ? এ কি সেই বাঙালী ? এ কি সেই ভাষা ? কলকাতা বালিনের মতো ভাগ হবে না। এই যা লাভ্যনা। পূর্ব বঙ্গ ? সে কি থেকে যাবে প্রহরীবেষ্টিত সীমান্তের ওপারে ?

পূর্ব বঙ্গের জন্তে দীপিকাদির মাথাব্যথা ছিল না। ওখানে যত মুসলমান আছে আরব উপদ্বীপে, তুরস্কে বা ইরানেও তত নেই। ওরা যদি মনে করে ওরাও সেইরকম একটি নেশন তবে ওরাও একটি নেশন। নেশন শব্দটার নির্দিষ্ট কোনো সংজ্ঞা নাই। তা যদি থাকত ইহুদীরা বলত না যে ওরাও একটি নেশন। কখনো দেশ থেকে নেশন হয়, কখনো নেশন থেকে দেশ হয়। ইহুদীরা চলেছে দেশের সন্ধানে প্যালেস্টাইনে। ওদের পরামর্শ দেওয়া হয়েছিল বিরলবসতি কোনো দ্বীপে গিয়ে উপনিবেশ স্থাপন করতে। ওরা কর্ণপাত করেনি। প্যালেস্টাইন ওদের পূর্বপুরুষের দেশ। সেইখানেই ওরা হোমল্যান্ড পুনরুদ্ধার করবে। ভারতের মুসলমানরাও সেই দৃষ্টান্ত অনুসরণ করেছে। তারা পূর্বপুরুষের দেশে ফিরে যেতে পারছে না, কারণ সেসব দেশে তো একটি নয়, বহুসংখ্যক। কতক আবার সোভিয়েট ইউনিয়নের অন্তর্ভুক্ত। তাই তারা ভারতের ভিতরেই তাদের হোমল্যান্ড প্রতিষ্ঠা করবে। হিন্দুদের বেলা দেশ থেকে নেশন। মুসলমানদের বেলা নেশন থেকে দেশ। ইতিহাসে এর নজীর আছে। তুর্করা তো তুরস্কের আদি অধিবাসী ছিল না। তুরস্কও ছিল না তার নাম। মধ্য এশিয়ার তুর্করা সদলবলে গিয়ে বলপূর্বক সে দেশ অধিকার করে দেশের নাম তুরস্ক রেখেছে। হাঙ্গেরার নামকরণ হান বা হন থেকে। তারাও গেছে এশিয়া থেকে।

“ওরা যদি কলকাতা ছেড়ে দেয় আমিও ঢাকা চট্টগ্রাম রাজশাহী যশোর ছেড়ে দিতে রাজী আছি। গৃহযুদ্ধ আমি এড়াতেই চাই। কিন্তু কলকাতা দাবী করলে যুদ্ধং দেহি। তোমাকে নোটস দিয়ে রাখলুম। না, বালিনের মতো কলকাতা ভাগ করতে দেব না। কিন্তু বাংলাদেশ ভাগ করতে দেব।” দীপিকাদি বলেন।

“সেটাও তো বাঙালী জাতির পক্ষে অগৌরবের বিষয়। যেমন জার্মান জাতির পক্ষে। গোমার রক্ত গরম হয়ে ওঠে না ? অগৌরবের বিষয় নিয়ে কি কোনো কালে কালজয়ী নাটক উপন্যাস লিখতে পারা যাবে ? উত্তর-পূর্বকে আমরা জগৎ কবিসভায় মাথা উঁচু করে দাঁড়াতে দেব কী করে ?

কী সাহিত্যকীর্তি নিয়ে তারা ইউরোপের সঙ্গে পাল্লা দেবে? ব্যাড বার্গেন। ভেরি ব্যাড বার্গেন। এব চেয়ে ঢের ভালো স্বাধীন সার্বভৌম অবিভক্ত বাংলাদেশ।”

“তার মানে প্রকাশ্য পাকিস্তান নয়, প্রচ্ছন্ন পাকিস্তান। মুসলিম মেজরিটিই স্থির করবে করেন পলিসি, ওয়ার অ্যাণ্ড পীস। হিন্দু মাইনরিটি ভুলের মাশুল দেবে। স্বাধীন বাংলাদেশ যদি ব্রিটেনকে মিলিটারি বেস দেয় তা হলে ফোর্ট উইলিয়ামে আবার গোরা ফৌজ মোতায়েন হবে। ব্রিটেন যদি আবার যুদ্ধে জড়িয়ে পড়ে বাংলাদেশও আবার যুদ্ধে জড়িয়ে পড়বে। সেটা মুসলমানদের পক্ষেও খারাপ হবে। কিন্তু ওরাও পারবে না পলিসি বদল করতে। ওরা যদি স্বতন্ত্র স্বাধীনতা চায় তো পূর্ববঙ্গ নিয়েই সন্তুষ্ট হোক। আমরা ওদের দিকে তাকাব না। চোখ ফিরিয়ে নেব। ওরা যাকে খুশি তাকে খাল কেটে ঘরে ডেকে আনতে পারবে। পরে পশতাবে।” দীপিকাদি বলেন।

স্বপনদাকে স্বীকার করতে হয় যে পাকিস্তানী মানসিকতা যেখানে এত ব্যাপক সেখানে বাঙালী মানসিকতা পাত্তা পাবে না। কিন্তু এর একটা ভালো দিকও আছে। ঊনবিংশ শতাব্দীর হিন্দুদের মনেও ধর্মকে অবলম্বন করে নেশনবোধ জাগে। সেই নেশনবোধকে অবলম্বন করে সাহিত্যে ও জীবনে নব জাগরণ হয়। নেশনবোধ থাকলে মুসলমানদের মধ্যেও সাহিত্যে জীবনে নব জাগরণ আসত। হিন্দুরা এখন আর ধর্মের কাছ থেকে প্রেরণা পায় না। পৌরাণিক নাটক দেখে না। পৌরাণিক কাব্য লেখে না। উপন্যাসেও ধর্মের প্রভাব ক্ষীণ। মুসলমানদেরও ধর্মের প্রভাব কাটিয়ে উঠতে হবে। নইলে তাদের কাব্য, উপন্যাস, নাটক তাদের দেশের মানুষ পছন্দ করবে না।”

“তোমার সঙ্গে এখানে আমি একমত। তোমার মতো আমি ঐতিহাসিক নিয়তি মানিনে, কিন্তু ঐতিহাসিক বিবর্তন মানি। বিবর্তন বাঙালী হিন্দুকে যে যুগে উপনীত করেছে বাঙালী মুসলমানকে সে যুগে উপনীত করেনি। অন্তত অর্ধ শতাব্দীর ব্যবধান। ইংরেজদের ভেদনীতির উপরেই আমরা এতদিন সবটা দোষ চাপিয়েছি। সেটা পূর্ণ সত্য নয়, অর্ধসত্য। যে কোনো কারণেই হোক ওরা অর্ধ শতাব্দী ব্যবধানে রয়েছে। ধর্মের ব্যবধানই একমাত্র ব্যবধান নয়। যুগের ব্যবধানও একটা ব্যবধান ও আমার মতে আরো দ্রুতর ব্যবধান। কামাল পাশা তুর্কদের আধুনিক যুগে পৌছে দিয়েছেন। তেরশো বছরের পুরনো খেলাফৎ থেকে মুক্ত করেছেন। সঙ্গে সঙ্গে অন্যান্য মুসলিম দেশ থেকেও

খেলাফৎ রহিত হয়েছে। কামাল তেমনি স্বদেশকে শরিয়তী আইন থেকেও মুক্ত করেছেন। সেটাও এক অর্থে যুগপরিবর্তন। প্রবর্তন করেছেন সুইস আইন। ফলে সমাজকেও তিনি মোল্লাদের শাসন থেকে মুক্ত করেছেন। পাকিস্তানেও তাঁর মতো মুক্তিদাতার আবির্ভাব হবে। জিন্না সাহেব তাঁর জন্তে পথ তৈরি করে দিয়ে যাচ্ছেন। মুক্তি বলতে তিনি বোঝেন তাঁর এক নম্বর শত্রু গান্ধীর কবল থেকে মুক্তি। গান্ধী যেমন বোঝেন তাঁর এক নম্বর শত্রু ব্রিটিশ গভর্নমেন্টের কবল থেকে মুক্তি। দু'জনেরই মনোবাঞ্ছা পূর্ণ হবে। তার লক্ষণ সুস্পষ্ট। যদি না গৃহযুদ্ধ বেধে যায় ও ইংরেজ আটকা পড়ে।” দীপিকাদি বলেন।

“আমি কিন্তু অতখানি আশাবাদী নই। ক্যাবিনেট মিশনের স্বীকৃতি যদি খারিজ হয় তা হলে হয় পার্টিশন, নয় গৃহযুদ্ধ। অথবা একই সঙ্গে দুই। ইংরেজরা কি অনন্তকাল অপেক্ষা করবে? কংগ্রেসকে ক্যাবিনেট মিশনের প্রস্তাব গ্রহণ করতেই হবে। কনস্টিটিউয়েন্ট অ্যাসেম্বলীতে যোগ দিতেই হবে। ইন্টারিম গভর্নমেন্টেও অংশ নেওয়া চাই। গৃহযুদ্ধ বাধাবার সঙ্গে কংগ্রেস যেন না দেয়। দিলে দেবে লীগ। কিন্তু সে-ই বা কেন দেবে?” স্বপনদা অবিশ্বাস করেন।

দু'জনেরই ভাবনা বাংলাদেশকে ঘিরে বা কলকাতাকে ঘিরে। আসামের দিক থেকে কেউ ভেবে দেখেননি। ওরা ওদিকে তার স্বরে চিৎকার করছে যে আসাম গেল! আসামকে যদি বাংলাদেশের সঙ্গে বন্ধনীভুক্ত করে গ্রুপ গঠন করা হয় তবে সেই গ্রুপে দুই প্রদেশের মুসলমানসংখ্যা দাঁড়াবে একুনে শতকরা পঞ্চাশের উপর। তারাই তাদের ভোটাধিক্যে আসামের নিয়তি নিয়ন্ত্রণ করবে। কিংবা এমনও হতে পারে যে বাঙালী হিন্দু মুসলমান একজোট হয়ে তাদের ভোটাধিক্যে আসামকে বানাবে বাঙালী হিন্দু মুসলমানের উপনিবেশ। অসমীয়ারা যেমন ভয় করে বাঙালী মুসলমানদের তেমনি ভয় করে বাঙালী হিন্দুদেরও। গ্রুপের হাতে ভাগ্য সমর্পণ যেন ডাইনির হাতে সম্ভান সমর্পণ। ওদের আগতি অহেতুক নয়।

কংগ্রেসকে ওদের আগতি বিবেচনা করতে হয়। ক্যাবিনেট মিশন আশা দেন আসাম ইচ্ছা করলে পাঁচ বছর বাদে গ্রুপ থেকে বেরিয়ে যেতে পারবে; কিন্তু ইতিমধ্যে যদি গ্রুপ কনস্টিটিউশন তৈরি হয়ে থাকে ও প্রাদেশিক কনস্টিটিশন পালটে দেওয়া হয়ে থাকে তবে নবগঠিত আসাম গভর্নমেন্ট বেরিয়ে

যেতে চাইবে না, চাইলেও গ্রুপ গভর্নমেন্ট বেরিয়ে যাবার দুয়ার খোলা রাখবে না। কিন্তু এইটুকু কারণে কংগ্রেস ক্যাবিনেট মিশনের গোটা স্কীমটা বর্জন করতে চায় না। ব্যাপারটার চুলচেরা বিচারের ক্ষেত্রে ফেডারেল কোর্টে পাঠানো স্থির করে। কেননা মিশনের স্টেটমেন্টের ভাষায় কিছু ত্রুটি ছিল। মিশন যেভাবে ব্যাখ্যা করেছে তার থেকে অন্য ভাবেও ব্যাখ্যা করা যায়। অন্য ব্যাখ্যা অনুসারে আসাম আদৌ না ঢুকতেও পারে। না ঢুকলে তাকে বাধ্য করতে পারা যাবে না।

গান্ধীজী তো আসাম কংগ্রেস নেতাদের সরাসরি পরামর্শ দেন কংগ্রেস ত্যাগ করতে। তা হলে কংগ্রেস ওয়ার্কিং কমিটির নির্দেশ মানতে হবে না। আসাম গভর্নমেন্ট কংগ্রেস দলের গভর্নমেন্ট। কংগ্রেস ত্যাগ করলে কংগ্রেস টিকিটে নির্বাচিত মন্ত্রীরা গভর্নমেন্ট ত্যাগ করতে সম্মানবদ্ধ। তা হলে তো উদ্দেশ্য সিদ্ধ হলো না। তাঁদের জায়গায় যারা মন্ত্রী হবেন তাঁরা গ্রুপে ঢুকতে রাজী হতে পারেন। কয়েকটা ভোট ভাঙিয়ে নিতে পারলে লীগ নেতা সাহুজা সাহেব গভর্নমেন্ট গঠন করতে পারবেন। গান্ধীজী সেদিক থেকে ভাবেন নি। ওয়ার্কিং কমিটি কংগ্রেস গভর্নমেন্ট বজায় রাখতে চান। মন্ত্রীরা কংগ্রেস ত্যাগ করেন না। জনমতও তার পক্ষপাতী নয়।

ক্যাবিনেট মিশন কেন্দ্রকে ডিফেন্স, ফরেন অ্যাফেয়ার্স ও যোগাযোগ ব্যবস্থা ব্যতীত আর সমস্ত বিষয় থেকে বঞ্চিত করতে চান। গান্ধীজীরও এতে সায় ছিল। তিনিই তো এর প্রথম প্রবক্তা। কংগ্রেস নেতারা মনে করেন কেন্দ্রের হাতে আরো কয়েকটা বিষয় না থাকলে কেন্দ্র শক্ত সমর্থ হবে না। নিচের তলা থেকে সহযোগিতা না পেলে কেন্দ্র অচল হবে। শেষে ভেঙে পড়বে। জিন্না ঠিক সেই ভাঙনটার জন্তে দশ বছর অপেক্ষা করবেন। আগেও তাঁর উদ্দেশ্য সিদ্ধ হতে পারে। এটা একটা তুচ্ছ কারণ নয়, গুরুতর কারণ। এই কারণে কংগ্রেস ওয়ার্কিং কমিটি ক্যাবিনেট মিশনের স্কীম বর্জন করতে উত্তম হয়েছিলেন, কিন্তু গান্ধীজী তাঁদের হাত চেপে ধরেন। ক্যাবিনেট মিশন বলেননি যে তাঁদের স্কীম গ্রহণ করতেই হবে। অগ্রাহ্য করার স্বাধীনতা কংগ্রেসের আছে। কিন্তু ক্রিপসকে দ্বিতীয়বার খালি হাতে ঘুরিয়ে দেওয়া যায় না। তাঁর মুখরক্ষা করতে হবে। কংগ্রেস ক্যাবিনেট মিশনের শাসনতন্ত্র প্রণয়ন-সংক্রান্ত প্রস্তাব গ্রহণ করে, কিন্তু ইন্টারিম গভর্নমেন্ট সম্বন্ধে বড়লাটের প্রস্তাব অগ্রাহ্য করে। এটা বড়লাটকে হতভম্ব করে দেয়।



লর্ড ওয়েভেল সম্পূর্ণ আন্তরিকভাবে ইন্টারিম গভর্নমেন্টের জন্তে কংগ্রেস ও লীগ উভয়ের সঙ্গে কথাবার্তা চালিয়ে যাচ্ছিলেন। কালবিলম্ব না করে তিনি কেন্দ্রে রদবদল ঘটাতে উদগ্রীব। যেটা চার বছর আগে সম্ভব ছিল না সেটা এবার সম্ভব হবে। জঙ্গীলাটকে বাদ দিয়ে ভারতীয়দের একজনকে ডিরেক্টরের ভার দেওয়া হবে। তিনিই হবেন ভারতীয় ফৌজের সর্বোচ্চ পরিচালক। ইংরেজ সেনাপতিদেরও উপরওয়াল। এতেই সূচনা করছে যে ব্রিটিশ সৈন্য অচিরে ভারত ত্যাগ করবে। বাকী রইল বড়লাটের ভীটো দানের ক্ষমতা। সেটা তিনি আপাতত হস্তান্তর করবেন না। কিন্তু ক্ষমতা থাকলেও ক্ষমতা প্রয়োগ করবেন না। তাঁর গভর্নমেন্ট ব্রিটিশ পাল্‌মেন্টের কাছেই এখন যেমন দায়ী পরেও তেমনি দায়ী থাকবে। কেন্দ্রীয় আইনসভার কাছে নয়।

কংগ্রেস এ নিয়ে পীড়াপীড়ি করে না। কিন্তু বড়লাট যখন লীগের মুখ চেয়ে প্যারিটির প্রস্তাব করেন তখন কংগ্রেস বৈকে বসে। সমগ্র দেশে মুসলমান যতজন হিন্দু তার প্রায় তিন গুণ। কেন্দ্রীয় আইনসভায় মুসলিম লীগ সদস্য যতজন কংগ্রেস সদস্য তার দু'গুণ। প্যারিটি কেমন করে মেনে নেওয়া যায়? কংগ্রেস নারাজ হয়। তখন বড়লাট পাঁচজন মুসলমান, পাঁচজন বর্ণ হিন্দু ও একজন তফসীলা হিন্দু নিয়ে সমস্তার মীমাংসা করতে চান। জিন্না সাহেব কী করবেন? মেনে নেন। নইলে তার সঙ্গে কথাবার্তা এগোয় না। এগোয় কংগ্রেসের সঙ্গে।

ক্যাবিনেট মিশন পাকিস্তানের আজি খারিজ করেছেন বড়লাট প্যারিটির আজি। বাকী থাকে মুসলিম লীগের অসপত্ত মুসলিম প্রতিনিধিত্বের দাবী। কংগ্রেস যখন একজন মুসলমানকে কেন্দ্রীয় শাসন পরিষদে তার জ্যে নিদিষ্ট আসনগুলির একটি দিতে চায় জিন্না তখন বাপের মতো কাঁপ দিয়ে বলেন, কিছুতেই না। কংগ্রেস হিন্দুদের দল, হিন্দুব জাগ্রায় মুসলমান পাঠাতে পারে না। কংগ্রেস বলে, মুসলমান তো কংগ্রেসের আদিকাল থেকেই কংগ্রেসে আছেন। কেউ কেউ প্রেসিডেন্টও হয়েছেন। যেমন বদরুদ্দীন তৈয়বজী, রহিমতুল্লা সাগানী, আবুল কালাম আজাদ, মহম্মদ আলী। মহম্মদ আলী জিন্নাও হতে পারতেন, যদি কংগ্রেস না ছাড়তেন। এখনো একটা প্রদেশ শাসন করছেন কংগ্রেস মুসলিম মন্ত্রীরা। কেন্দ্রে অনধিকারী হলে প্রদেশেও তো তাঁরা অনধিকারী হবেন। তবে কি তাঁদেরও গদী ছাড়তে হবে?

কংগ্রেসের ভাগ থেকে একটি আসন যদি কংগ্রেস একজন মুসলমানকে দেয় লীগের ভাগ তো কমে না। বরং হিন্দু মুসলমান সমানসংখ্যক হয়। ইসলামের উপর আঘাত এলে সব মুসলমান একজোট হয়ে প্রতিরোধ করবেন।

বড়লাট কংগ্রেসকে অস্বরোধ উপরোধ করেন এই নিয়ে সে যেন গীড়াপীড়ি না করে। জিন্না এক্ষেত্রে অটল অনড়। নিজের দলের একজন মুসলমানকে মনোনয়ন করার অধিকার কংগ্রেসের আছে, কিন্তু এক্ষেত্রে অধিকার প্রয়োগ না করাই বিজ্ঞতা। অমন করলে ইন্টারিম গভর্নমেন্ট স্বিদলীয় হবে না, একদলীয় হবে। সেটা দুর্ভাগ্যজনক হবে। গণগোল বাধবে।

কংগ্রেস ওয়াকিং কমিটি বড়লাটকে জানায় কংগ্রেসের পক্ষে নিজের মৌল নীতি বিসর্জন দেওয়া সম্ভব নয়। অমন করলে প্রতিষ্ঠান ভেঙে যাবে। কংগ্রেস ভেঙে গেলে ক্ষমতা নিয়ে কী হবে? কংগ্রেস ইন্টারিম গভর্নমেন্টে যোগ দেবে না।

তা হলে দাঁড়াল এই যে, ক্যাবিনেট মিশনের মুখ রক্ষার জন্তে কংগ্রেস কনস্টিটিউয়েন্ট অ্যাসেমবলীতে বসতে রাজী, কিন্তু বড়লাটের মুখ রক্ষার জন্তে তাঁর শাসন পরিষদে বসতে রাজী নয়। কংগ্রেস নেতারা না থাকলে পেনসন, ক্ষতিপূরণ ইত্যাদি বিষয়ক সিদ্ধান্তগুলি একতরফা গ্রহণ করা যাবে না। ব্রিটিশ অপসারণের পর সিভিল ও মিলিটারি অফিসারদের পেনসন ও ক্ষতিপূরণ বন্ধ হয়ে যেতে পারে। কংগ্রেস নেতারা বলতে পারেন, মুসলিম লীগ দিতে চায় দিক, কংগ্রেস দেবে না। বড়লাট পড়ে যান বেকায়দায়। এখন যদি কংগ্রেসের সঙ্গে সমঝোতা না হয় তবে পরে কখন হবে? তখন কি কংগ্রেস নেতারা ইন্টারিম গভর্নমেন্টে যোগদানের জন্তে চড়া দর হাঁকবেন না? পাঁজা দিয়ে লীগ হাঁকবে আরো চড়া দর। কোনো পক্ষকেই সন্তুষ্ট করতে পারা যাবে না। হয় নির্দলীয় সরকার চালাতে হবে, নয় একদলীয় সরকার চালাতে হবে, আর নয়তো এক একটি প্রদেশ এক একটি দলকে দিয়ে কেন্দ্রের স্বন্দোবস্ত না করেই ভঙ্গ দিতে হবে।

জিন্না সাহেব অধীর হয়ে অপেক্ষা করছিলেন কবে বড়লাটের আমন্ত্রণ আসবে, তিনি কংগ্রেস নেতাদের অবর্তমানে ইন্টারিম গভর্নমেন্ট জুড়ে বসবেন। সবচেয়ে গুরুত্বপূর্ণ পদগুলি তাঁর দলের ভাগেই পড়বে। কংগ্রেস যদি পরে আসে আর সব পাবে, কিন্তু সেগুলি নয়। তিনি যা ডিকটেট করবেন ওয়েভেল তাই শুনবেন। তাঁর নির্দেশে উত্তরপশ্চিম সীমান্তের কংগ্রেস মুসলিম

গভর্নমেন্টের পতন হবে, তার পরে পাঞ্জাবের ইউনিয়নিষ্ট মুসলিম কোয়ালিশন গভর্নমেন্টের, পশ্চিম পাকিস্তানে লীগ গভর্নমেন্ট ভিন্ন আর কোনো গভর্নমেন্ট থাকবে না। আরো পরে আসামের কংগ্রেস কোয়ালিশন গভর্নমেন্ট খতম হবে, তার জায়গায় নেবে লীগ কোয়ালিশন গভর্নমেন্ট। অমনি করে পূর্বপাকিস্তানেও মুসলিম লীগ নিষ্কটক হবে। অবশেষে দুই পাকিস্তান মিলিয়ে এক পাকিস্তান। পাকিস্তানের সর্বসর্বা হয়ে তিনি হিন্দুস্থানের কর্তাদের সঙ্গে বার্গেন করবেন। সর্বত্র কোয়ালিশন গভর্নমেন্ট হবে। কংগ্রেস মুসলিম বাদে।

বড়লাট জিন্না সাহেবকে জানিয়ে দেন, আপাতত ইন্টারিম গভর্নমেন্ট গঠন করা সমীচীন হবে না। সমস্ত ব্যাপারটা নতুন করে তলিয়ে দেখতে হবে। সময় লাগবে। ইন্টারিম গভর্নমেন্টের বদলে গঠিত হবে কেয়ারটেকার গভর্নমেন্ট। আকারে ছোট। সদস্যরা সবাই সরকারী কর্মচারী। পরে তাঁরা পদত্যাগ করবেন। এটা একটা সাময়িক ব্যবস্থা।

জিন্না সাহেব তো ক্ষেপে লাল। বড়লাট তাঁকে কথা দিয়ে কথা রাখলেন না। কথা ছিল কংগ্রেস আত্মক আর না আত্মক লীগ আসবেই। তা হলে দেখা যাচ্ছে তাঁর কথার কোনো দাম নেই। তিনি কংগ্রেসের সহযোগিতা পাচ্ছেন না বলে লীগের সহযোগিতাও উপেক্ষা করবেন। অপেক্ষার অর্থ উপেক্ষা। তাঁর জীবনে রাজকুলের উপেক্ষা এই প্রথম। বড়লাটের সকাশে তিনি তাঁর তাঁত্র প্রতিবাদ জানান। যে পার্টি কনস্টিটিউয়েন্ট অ্যাসেম্বলীতে যেতে রাজী হবে সেই পার্টি ইন্টারিম গভর্নমেন্ট যাঁবার হকদার হবে, এই তো ছিল শর্ত। তিনি এ শর্ত পূরণ করেছেন, এর জন্মে পাকিস্তানের দাবী ত্যাগ করেছেন, প্যারিটির দাবী ত্যাগ করেছেন, আর কত ত্যাগ করবেন? অসম্ভব মুসলিম প্রতিনিধিত্বের দাবী ত্যাগ করা অসম্ভব। সেই কারণে যদি কংগ্রেস বড়লাটের শাসন পরিষদে যোগদান না করে সেটা কার দোষ? কংগ্রেস তো এমনিতেই যোগদানের হকদার নয়, যেহেতু সে বঙ্গ ও আসামকে এক গ্রুপভুক্ত করতে দ্বিধাশিভ। কংগ্রেসের দোষে কি লীগের সাজা হবে?

স্বপনদার বন্ধু মীর আবদুল লতিফ স্বপনদাকে বলেন, “নেহরুও আসছেন না, জিন্নাও আসছেন না। বেসরকারী সদস্যদেরও বড়লাট বিদায় দিয়েছেন। কেয়ারটেকার হবেন জনা কয়েক বাছা বাছা সিভিলিয়ান। তাই এর নাম কেয়ারটেকার গভর্নমেন্ট। এদিকে হিন্দু মুসলিম টেনশন বেড়েই চলেছে।

তবে ইঙ্গ-ভারতীয় টেনসন কমেছে। গান্ধীজী জয়প্রকাশ নারায়ণকে জেল থেকে ছাড়িয়ে এনে তাঁর নিজের কাছে টেনে নিয়েছেন। বামপন্থীরা শান্ত। কংগ্রেসের দিক থেকে কোনো গোলমাল বাধবে না। গান্ধীজী বাধতে দেবেন না। তিনি কংগ্রেস কর্মীদের বলেছেন কনস্টিটিয়েন্ট অ্যাসেম্বলী হচ্ছে গণ সত্যাগ্রহের পরিবর্ত। আপাতত বছর দুই নতুন শাসনতন্ত্র রচনার কাজে মনোনিবেশ করা যাক। ইংরেজরা দু'বছর সময় নিক। এর ত্যাগপর্শ বুঝতে পারছেন ?

“না, মীর সাহেব। রাজনীতি আমি বুঝিনে। সেই জন্তেই তো আপনার কাছে শুনতে চাওয়া।” স্বাকার করেন স্বপনদা।

“গান্ধীজীর পরামর্শ হয় কংগ্রেসকে ইন্টারিম গভর্নমেন্টে নেওয়া হোক, নয় লীগকে। দুই সতীনকে একই বাড়ীতে রাখলে তারা বিক্ষোভ ঘটাবে। কংগ্রেস ক্ষমতার জন্তে লালায়িত নয়, লীগ যদি উদ্যীব হয়ে থাকে তবে লীগকেই আমন্ত্রণ করা হোক। বলা বাহুল্য, কেন্দ্রায় আইনসভায় কংগ্রেসেরই নিরক্ষণ মেধাবিটি। অবশ্য মনোনীত সদস্যরা যদি নিরপেক্ষ থাকেন। বাজেট অধিবেশনে লীগ হেরে যাবে। বড়লাট বোধ হয় সেই আশঙ্কায় জিন্না সাহেবকে আমন্ত্রণ করছেন না। আবার, কংগ্রেসকে আমন্ত্রণ করতে তিনি পেছপাও। কংগ্রেস যদি যায় একজন কংগ্রেস মুসলিমকেও সঙ্গে নেবে। জেলযাত্রার দিন যারা সহযাত্রী রাজসভাযাত্রার দিন তারা বিবর্জিত, এ কী রকম বিচার ? এ কি সেই পথি নারী বিবর্জিতা ?” মীর সাহেব উচ্চহাস্য করেন।

স্বপনদা বিস্মিত হয়ে বলেন, “তা হলে কি কেয়ারটেকার গভর্নমেন্টই দু'বছর পায়চারি করবে ? যতদিন না নতুন শাসনতন্ত্র তৈরি হয়।”

“না, না, কেয়ারটেকার গভর্নমেন্ট কোথাও বেশী দিন কাজ করে না। এমন সব গুরুতর সিদ্ধান্ত নিতে হয় যা নেওয়া কেয়ারটেকারদের কর্ম নয়। ওই ইন্টারিম গভর্নমেন্টই গঠন করতে হবে। সেটারই মেয়াদ হবে দু'বছর কি তিন বছর। কংগ্রেসকে বাদ দিলে মেজরিটিকে বাদ দেওয়া হবে। আবার, মাইনরিটিকেও বাদ দেওয়া যায় না। মুসলিম, শিখ, খ্রীষ্টান এই তিন মাইনরিটিই থাকবেন। উপরন্তু পার্শী। তাঁদের তো আর কোনো দেশ নেই। আর তাঁরা গোড়া থেকেই কংগ্রেসে আছেন। দাদাভাই নওরোজী, ফিরোজ শাহ মেহতা এঁরাই তো একদা কংগ্রেসের প্রাণপুরুষ ছিলেন।

‘স্বরাজ’ আমাদের লক্ষ্য, কার কণ্ঠে এটা প্রথম উচ্চারিত হয়? দাদাভাই নরৌজীর সভাপতির অভিভাষণে। চল্লিশ বছর পূর্বে। সেই রকম সময়ে মুসলিম লীগ প্রতিষ্ঠা। এতদিনে জল অনেকদূর গড়িয়েছে। স্বরাজের পালটা লক্ষ্য হয়েছে পাকিস্তান। দাদাভাইয়ের রাজনৈতিক শিষ্য জিন্নার এই রূপান্তর। দাদাভাই যাকে স্বরাজ বলেন জিন্না তাকে বলেন হোমরুল। হোমরুল লীগ বলে একটা প্রতিষ্ঠানের হন সভাপতি। গান্ধীজী তখন ছিলেন তার উপসভাপতি বা সেইরকম কিছু। তাই আজকের গান্ধীপ্রাধান্য তাঁর চক্ষু:শূন্য।” মীর সাহেব বলেন।

“হোম রুল কথাটা এল কোন্‌খান থেকে? আয়ারল্যান্ড থেকে। আইরিশ হোম রুল আন্দোলনের অনুসরণে ইণ্ডিয়ান হোম রুল আন্দোলন। মিসেস বেসান্ট ছিলেন অন্যতম নেত্রী। তাঁরও ছিল আর একটি হোম রুল লীগ। আইরিশরা হোম রুল পেতে যাচ্ছে, ব্রিটেন দিতে ভৈরি, এমন সময় থালস্টারের প্রটেস্ট্যান্টরা পাল্টা আন্দোলন শুরু করে দেন। তাঁরা ক্যাথলিক মেজরিটির আধিপত্য মানবেন না, তাঁদের ভগ্নে চাই স্বতন্ত্র একটি খণ্ড। সেটা হবে ব্রিটেনের সঙ্গে যুক্ত। কার্সন তার প্রবন্ধ। বিখ্যাত ব্যারিস্টার। আমার মনে হয় জিন্না সাহেব আইরিশ হোম রুল চেয়েছিলেন, এখন হিন্দু আধিপত্যের ভয়ে কার্সনের অনুকরণে আলস্টার অর্থাৎ পাকিস্তান চাইছেন। আইরিশ হোম রুলের নেতারা শেষ মুহূর্তে আপস করেন। আইরিশ ফ্রী স্টেটের দোদার হয় নর্দার্ন আয়ারল্যান্ড। স্বাধীন নয়, স্বতন্ত্র। গ্রেট ব্রিটেনের সঙ্গে যুক্ত। পাকিস্তান যদি বিচ্ছিন্ন হয় তবে ব্রিটেনের সঙ্গে যুক্ত হবে। আরো এক ডোমিনিয়ন।” স্বপনদার আন্দাজ।

মীর সাহেব এ লাইনে চিন্তা করেননি। মনের মধ্যে তলিয়ে যান। তাঁর পরে বলেন, “সম্ভবত তাই হবে। ক্যাবিনেট মিশন স্কীমে ক্ষুদ্রতর পাকিস্তানের আউটলাইন রয়েছে। জিন্না যদি তাতেই তুষ্ট হন তবে তারই সম্ভাবনা আছে। বৃহত্তর পাকিস্তানের নয়। কলকাতা তাঁর নাগালের বাইরে থাকবে। কিন্তু পূর্ববঙ্গের মুসলমান কি সত্যি তাই চায়? আমার সন্দেহ আছে। তার প্রগতি আবার এক পুরুষ পেছিয়ে যাবে।”

স্বপনদা তা শুনে বলেন, “তাই যদি হয় তবে সেই ওদের ঐতিহাসিক নিয়তি। আমার স্ত্রী কিন্তু আমার সঙ্গে একমত নন। তাঁর মতে ঐতিহাসিক বিবর্তন।”

“মাহুশ যেটা হেচ্ছায় বেছে নেয় সেটা তায় নিয়তি নয়। ওরা যদি হেচ্ছায় দেশের একভাগ ও প্রদেশের একভাগ বেছে নেয় তবে সেটা নিয়তি নয়, অপশন। এটা রেফারেণ্ডাম করে অপশন দিতে হবে। জিন্নার উপরে যেন সেটা ছেড়ে দেওয়া না হয়। লাগের উপরেও না।” মীর সাহেবের অভিমত।

“কেন? এবারকার নির্বাচন কী পাকিস্তান অর্জনের ম্যাগেট নয়? লীগ তো প্রায় সব ক’টা মুসলিম আসন জিতেছে। কৃষক প্রজা দলের আসন সংখ্যা নগণ্য।” স্বপনদা বলেন।

“সেকথা ঠিক। কিন্তু পাকিস্তান কত বড়ো বা কত ছোট সেটা তো ভোটারদের জানানো হয়নি। তারা ধরে নিয়েছে গোটা বাংলাদেশটাই হবে পাকিস্তানের সামিল। হিন্দুদের ভাগ দিতে হবে না। চোখ বুজে যারা ভোট দিয়েছে চোখ খোলা রেখে তারা ভোট দিক, তা হলেহ বোঝা যাবে তারা ছোট পাকিস্তান চায় না বড়ো পাকিস্তান। যার ডিফেন্স, ফরেন অ্যাফেয়ার্স ও যোগাযোগ ব্যবস্থা যৌথ।” মীর সাহেব বিশদ করেন।

‘তা হ’ল আবার সেই হিন্দু প্রাধান্য যেনে নিতে হলো। প্যারিটি তো হিন্দুপ্রধান গ্রুপের সঙ্গে মুসলিমপ্রধান দুই গ্রুপের হতে পারে না। মুসলিম লীগ কি তাতে রাজী হবে? আমার মনে হয় বাঙালীর নিয়তি আগে থেকেই স্থির হয়ে রয়েছে। ওরা জার্মানদের মতো ভাগ হয়ে যাবেই। কলকাতা যদি বার্লিনের মতো ভাগ না হয়ে যায় তবেই আমি বাঁচি।’ স্বপনদা বলেন।

“দেখুন, গুপ্তসাহেব, আপনি ধরে নিয়েছেন যে ভারতবর্ষ হচ্ছে আর একটি ইউরোপ, বাংলাদেশ হচ্ছে তার জার্মানি আর কলকাতা হচ্ছে তার বার্লিন। এই ধারণাটাই ভুল। তাই আপান মনে মনে ভ্রান্ত গণছেন। সলমানরা হিন্দুদের মতোই ভারতময় ছড়ানো। তারা কেউ মন থেকে পাকিস্তান বলে একটা পৃথক রাষ্ট্র চায় না, কারণ তা হলে তারা দিল্লী আগ্রা লখনৌ, পাটনায় পরদেশী বনে যাবে। তারা বোম্বাই, মাদ্রাজ, দিল্লী থেকেও আস্থানা গুটোবে। অগচ বোম্বাইতে জিন্না সাহেবের বিরাট ভবন। সারা জীবনের সঞ্চয় দিয়ে তিনি ওই প্রাসাদ তৈরি করেছেন। না, ওটা প্রাণ ধরে ত্যাগ করবেন না। মেয়েকেও দেবেন না। তাঁর সঙ্গে চিরাবচ্ছেদ। শুনেছেন বোধহয় তার মেয়ে যাকে বিয়ে করেছে সে পার্সী খ্রীষ্টান। জবাহরলাল তাঁর জামাতাকে গ্রহণ করেছেন, জিন্না কিন্তু তাঁর জামাতাকে গ্রহণ করেননি। গ্রহণ করলে নেতৃত্ব হারাতেন।”

“জবাহরলাল তাঁর নেতৃত্ব হারাতেন না।” স্বপনদা স্বধান।

“হারাতেন, যদি গান্ধীজী ইন্দিরার বিবাহের বিপক্ষে দাঁড়াতেন। তিনি সায় দিয়েছেন। তিনি উপলব্ধি করেছেন যে হিন্দু মুসলমান পারস্পরী খ্রীষ্টানকে জুড়ে জুড়ে এক নেশন গঠন করা যাবে না। পাতানো সম্পর্কই যথেষ্ট নয়। রক্ত সম্পর্কও অত্যাবশ্যক। জার্মানরা এটা মানতে চায়নি। ইহুদীরাও কি মানতে চেয়েছে? এই নিয়ে কত বড়ো অনর্থ ঘটে গেল হিটলারের আমলে। আকবরের নীতি সফল হলে হিন্দু মুসলমানের জাতিবৈর এতদিনে মিতালীতে পরিণত হত। হিন্দু হিন্দুই থাকত, মুসলমান মুসলমানই থাকত, কিন্তু অসংখ্য পরিবার আত্মীয়তাসূত্রে আবদ্ধ হতো। অতীতের জ্ঞাতো আফসোস করে ফল নেই। ভবিষ্যতের দিকেই দৃষ্টি রাখা যাক। যা বলছিলুম, মুসলমানরা মন থেকে হিন্দুদের সঙ্গে চিরবিচ্ছেদ কামনা করে না। জিন্না সাহেবের কাছে পাকিস্তান হচ্ছে বার্গেনিং কাউন্টার। তিনি যদি সমান শর্তে পার্টনারশিপ পান তবে পাটিশন মূলতুবি রাখবেন। গান্ধীজী যদি সমান শর্তে পার্টনারশিপে রাজী হন তা হলে ক্ষমতার হস্তান্তর কংগ্রেস ও লাগের যুক্ত হস্তে হবে। স্বাধীনতার আনন্দ হিন্দু মুসলমান সমানে উপভোগ করবে। আর নয়তো হিন্দুর কাছে যা স্বাধীনতা মুসলমানের কাছে তা নতুন এক পরাধীনতা। ওরা বিদ্রোহের নিশান তুলবে। সেটা নেবে গৃহযুদ্ধের আকার। জিন্না সঙ্গে সঙ্গে পাকিস্তান দাবী করবেন। মূলতুবি রাখবেন না।” মীর সাহেব হুঃখিত।

“আপনারা ক্রাশনালিস্ট মুসলমানরাও তার শিবিরে যাবেন? ইউনিয়নিস্ট মুসলিমরাও?” স্বপনদা জেরা করেন।

“আমরা পড়ে যাব বিষম দোটানায়। সেটা পরিহার করাই কর্তব্য। আমরা চেষ্টা করছি যাতে আর কোথাও না হোক বাংলাদেশে একটা কোয়ালিশন গভর্নমেন্ট গড়ে ওঠে। কংগ্রেস লীগ কোয়ালিশন। শহীদও তাই চায়, কিরণশঙ্করও তাই। কিন্তু দুই হাই কমান্ড অনড় অটল। কংগ্রেসকে স্বীকার করতে হবে যে মুসলিম লীগই মুসলিম নেশনের একমাত্র প্রতিনিধি প্রতিষ্ঠান, কংগ্রেস শুধু হিন্দু নেশনের। মুসলিম নেশন আর হিন্দু নেশনের মধ্যে সমতা রক্ষা করাও চাই, কেউ কারো চেয়ে খাটো নয়। তাদের সম্পর্ক মেজরিট মাইনরিটির নয়, দুই মেজরিটির। যে যার ক্ষেত্রে মেজরিটি। এসব তত্ত্ব যদি কোয়ালিশনের পূর্বশর্ত হয় তবে তো কোয়ালিশনের কোনো আশাই থাকে না। আমরা দুর্ভাবনায় পড়েছি।” মীর সাহেব বিষম্ব।

## ॥ বিশ ॥

দীপিকাদি এতক্ষণ মৌন ছিলেন। এবার মুখ খোলেন। “আমি কি কিছু বলতে পারি ?”

মীর সাহেব বলেন, “সে কী কথা ! আপনি হলেন গৃহের কর্ত্তা। আপনি বলবেন না তো কে বলবে ?”

“আমি একজন সাধারণ নাগরিক। খবরের কাগজ খুললেই দেখতে পাই বাংলাভাষায় বাঙালীকে বাঙালী এমন কদৰ্শভাবে গালমন্দ করছে যে মেছুনীরাও লজ্জা পায়। এঙ্গেলরাও কাঁদে। কলম হাতে থাকতেই এই ! তলোয়ার হাতে পেলে তো এরা একে অপরের মাথা কাটবে। দুনিয়ার লোক দেখবে বাঙালী হিন্দু খুন করছে বাঙালী মুসলমানকে, বাঙালী মুসলমান খুন করছে বাঙালী হিন্দুকে। কিন্তু কেন ? বাগড়াটা তো হিন্দুর সঙ্গে মুসলমানের নয়। কংগ্রেস মুসলিমের সঙ্গে লীগ মুসলিমের। মওলানা আজাদের সঙ্গে কায়দে আজম জিন্নার। বড়লাটের শাসনপরিষদে আজাদ যদি যান জিন্না যাবেন না। জিন্না না গেলে শাসনপরিষদ সর্বজনগ্রাহ্য হবে না, বড়লাট তাই কংগ্রেসকে অনুরোধ করেন কংগ্রেস মুসলিম বাদ দিতে। কংগ্রেস তার উত্তরে বলে, কংগ্রেস মুসলিম বাদ গেলে কংগ্রেসও বাদ যাবে। বড়লাট ভাবতেই পারেননি যে কংগ্রেস এই ইস্যুতে ব্যাক আউট করবে। জিন্নাকে তিনি বলেন সবুর করতে। যথাকালে তিনি ডাকবেন, এখন নয়। জিন্না তো রেগে টং। গ্রাশনালিস্ট মুসলিমদের স্বীকৃতি দিলে তথাকথিত মুসলিম নেশনের সংহতি নষ্ট হয়। ইউনিয়নিস্ট মুসলিমদের বেলাও সেই যুক্তি। সিমলা বৈঠকের সময় তিনি বড়লাটের মনোনীত একজন ইউনিয়নিস্ট মুসলিমকেও কেন্দ্রীয় শাসনপরিষদে আসতে দেবেন না, বড়লাটও ইউনিয়নিস্টদের যুক্তকালীন সহযোগিতার কথা স্মরণ করে তাঁদের একজনকে আনতে ভুলবেন না। শাসনপরিষদের রদবদলের প্রস্তাব ভেঙে যায়। একই পরিস্থিতির উদ্ভব হয়েছে এবারেও। বড়লাট যদি কংগ্রেসের সঙ্গে মিটমাট চান তো একজন কংগ্রেস মুসলিম বা গ্রাশনালিস্ট মুসলিমকেও তাঁর শাসনপরিষদে না নিয়ে পারেন না। তা করতে গেলে কিন্তু জিন্না সাহেবের সঙ্গে কথাবার্তায়



ছেদ পড়বে। আর কায়দে আজমই তো আজকের ভারতে অধিকাংশ মুসলমানের মুকুটহীন বাদশাহ। বড়লাট কি তাদের বিদ্রোহের মুখে ঠেলে দেবেন? তা হয় না। এখন ব্রিটিশ প্রধানমন্ত্রী অ্যাটলী কী নির্দেশ দেন তারই অপেক্ষায় থাকবেন। এদিকে দেশ হয়েছে অগ্নিগর্ভ। একটা দেশলাইয়ের কাঠির শিখা থেকে যে কোনো দিন যে কোনো উপলক্ষে অগ্নিকাণ্ড ঘটে যেতে পারে।” দীপিকাদি আশঙ্কা করেন।

মীর সাহেব একথা শুনে বলেন, “আমরা সকলেই তার জন্তে উদ্বিগ্ন। কিন্তু কায়দে আজম কেন বুঝতে চাইছেন না যে মওলানা সাহেবকে আসতে দিলে তিনি যেতেন মুসলমান হিসাবে নয়, ভারতীয় হিসাবে। বসতেন কংগ্রেসের জন্তে নির্দিষ্ট অত্যন্তম আসনে। কংগ্রেস হাই কমান্ডের একজন সদস্য হিসাবে রাজপ্রতিনিধির সঙ্গে তিনি কথাবার্তা চালাতেন ভারতের বৃহত্তম দলের তরফ থেকে। তাঁকে সামনে রেখে যারা কুইট ইণ্ডিয়া আন্দোলন করেছে, তিন বছর যিনি বন্দিশালায় কাটিয়েছেন, কংগ্রেস পলিসি যিনি প্রথম অক্ষর থেকে শেষ অক্ষর পর্যন্ত জানেন তাঁর অল্পপস্থিতিতে কংগ্রেস প্রতিনিধিরা বড়ো বড়ো সিদ্ধান্ত নেবেন কী করে? ইন্টারিম গভর্নমেন্ট তো শাসনযন্ত্র চালাবার জন্তে নয়। সে কাজ কেয়ারটেকার গভর্নমেন্টও করতে পারে। যেটা ইন্টারিম গভর্নমেন্টের আসল কাজ সেটা ব্রিটিশ গভর্নমেন্টের সঙ্গে দর কষাকষি। দু’শো বছরের একটা সাম্রাজ্য গুটিয়ে নেওয়া হচ্ছে। তার অ্যাসেসমেন্ট কী, লায়াবিলিটিজ কী না জেনে চোখ বুজে তো গভর্নমেন্টের দায়দায়িত্ব ষাড়ে তুলে নেওয়া যায় না। ক্ষমতার হস্তান্তর হচ্ছে দায়িত্বের হস্তান্তর। মওলানা সাহেব যাবেন কংগ্রেস প্রতিনিধি হয়ে, তাঁর যাবার ফলে লীগ প্রতিনিধির সংখ্যা একটিও কমবে না, বরং মুসলমানের সংখ্যা একটি বাড়বে। তথাকথিত মুসলিম নেশন যদি এটা না বোঝে তবে সেই অবুঝকে বড়লাট বোঝাবেন। নয়তো তার বিদ্রোহের ভয়ে ইন্টারিম গভর্নমেন্ট গঠন মূলতুবি থাকবে মাসের পর মাস, বছরের পর বছর। এর নাম প্রগতি নয়, গতিরোধ। এটাও একপ্রকার ভীটো। ব্রিটিশ প্রধানমন্ত্রী অ্যাটলী তো পাল’ামেন্টে ঘোষণা করেছেন যে ভীটো দিয়ে প্রগতি বন্ধ রাখা চলবে না। তাঁর সেই ঘোষণা কি মাঠে মারা যাবে? জিন্না সাহেব সদলবলে আসুন, পণ্ডিতজীকেও সদলচলে আসতে দিন। খ্রীস্টান, শিখ, পার্সী প্রতিনিধিও আসুন। পরস্পর পরস্পরের হাত ধরে স্বাধীনতার পথে এগিয়ে চলুন। পরস্পরের সঙ্গে সংঘর্ষের প্রয়োজন নেই,

ব্রিটিশ শাসকদের সঙ্গেও না। ওরাও চান স্বাধীনতা দিতে। মিত্রতা করতে। ভারত যদি স্বৈচ্ছায় কমনওয়েলথের মেম্বর হতে চায় তবে ব্রিটেন স্বাগত জানাবে।”

দীপিকাদি প্রীত হয়ে বলেন, “আপনার সঙ্গে আমি একমত। এখন আমার প্রশ্ন হলো এই সঙ্কটক্ষেণে আপনি ও আপনার মতো চিন্তাশীল মুসলমানরা নীরব কেন? আপনারা কি খবরের কাগজে লিখে অবুদদের বোঝাতে পারতেন না? এটা হিন্দুদের নয়, হিন্দুরা লিখতে গেলে শুনবে ওরা মুসলমানের সংহতি পছন্দ করে না। মুসলমানের সংহতির কমতি কোথায়? ধর্মীয় ব্যাপারে তো ওরা সবাই এককাটা। কিন্তু এটা হলো রাজনীতির ব্যাপার। এক্ষেত্রে মুসলমানরা কবে এককাটা ছিল? মোগলরা এসে তুর্কী বা পাঠানদের হাত থেকে ক্ষমতা কেড়ে নেয়নি? নাদির শাহ এসে মোগল বাদশাহের ময়ূর সিংহাসন ও কোহিনুর হরণ করেননি? কমিউনিস্ট পার্টিতেও মুসলমান আছে, কেবল কংগ্রেস পার্টিতে নয়। কংগ্রেসের লক্ষ্য স্বাধীনতা, কমিউনিস্টদের লক্ষ্য বিপ্লব। কখনো যদি কমিউনিস্ট পার্টির হাতে ক্ষমতা পড়ে তবে তাঁদের একজন মুসলিম কমরেডকেও তাঁরা ক্ষমতার আসনে বসাবেন। কংগ্রেস যে বড়লাটের অগ্রগ্রহে প্রদেশে মন্বিত্ব করছে তা নয়। কেন্দ্রেই বা কেন বড়লাটের অগ্রগ্রহনির্ভর হবে? তার চেয়ে বাইরে থাকাই তাব পক্ষে সম্মানজনক। তাই বলে সে এই কারণে বিদ্রোহ করবে না। কনস্টিটিয়েন্ট অ্যাসেম্বলিতে গিয়ে শাসনতন্ত্র তৈরি করবে। মুসলিম লীগও সেখানে গিয়ে সেই কাজে হাত লাগাতে পারে। মিলে মিশে কাজ করলে হিন্দু মুসলমান শিখ খ্রীস্টান সকলেরই স্বার্থ সুরক্ষিত হবে। না হলে তখন না হয় বিদ্রোহ করতে পারে।”

মীর সাহেব বলেন, “ও কথা আমারও কথা, দিদি। আমি যে নীরব রয়েছি তা কিন্তু মানব না। আমি বোঝাতে চেষ্টা করছি বিহার ও যুক্তপ্রদেশ ডিভিডিয়ে পাঞ্জাবের সঙ্গে বাংলাদেশকে জুড়ে দেওয়া একটা মিসজয়েগার। বাঙালী হিন্দু আর বাঙালী মুসলমান মিশ খাবে। বাংলাদেশকে আলাদা একটা স্বাধীন রাষ্ট্র করলেই বরং উদ্দেশ্যসিদ্ধি হয়, উদ্দেশ্য যদি হয়ে থাকে হিন্দু মেজরিটির হাত থেকে মুসলমানদের আত্মরক্ষা। স্বাধীন বাংলাদেশে হিন্দুর সংখ্যা কম, কিন্তু প্রভাব বেশী। আমার সন্দেহ আসল উদ্দেশ্য তা নয়, ব্রিটিশ এ্যাওয়ার্ড।”

“এ্যাওয়ার্ড”! স্বপনদা যেন বাকশক্তি ফিরে পান। “এ্যাওয়ার্ড যদি লীগ নেতাদের অস্থিষ্ট হয় তবে সেটা ক্যাবিনেট মিশনের পরিকল্পনার ভিতরেই নিহিত রয়েছে। একটা নয়, দুটোর একটা। ওঁরা যদি ছ’টা প্রদেশ চান তো ছ’টা প্রদেশেই পাবেন, মায় আসাম, যেখানে মুসলমানরা মেজরিটি নয়। কিন্তু যৌথ সোভারেনটিতে রাজী হতে হবে। আর যদি তাঁরা একক সোভারেনটি চান তবে তাঁরা পাবেন আসামের একাংশ, বাংলার আধখানা, পাঞ্জাবের আধখানা, সমগ্র সিন্ধু, উত্তরপশ্চিম প্রদেশ ও বেলুচীস্থান। ইংরেজের হাত থেকে যদি পেতে হয় তো এইপর্যন্ত ওঁদের দৌড়। এর চেয়ে বেশীদূর নয়। কিন্তু কায়দে আজমের সাক্ষোপাঙ্গদের মধ্যে এমন উচ্চাভিলাষীও আছেন যারা দিল্লী আগ্রা না পেলে সন্তুষ্ট হবেন না। তাঁরা চান গোটা মোগল সাম্রাজ্য। কারণ তাঁরা মোগল বংশধর! ইংরেজ যা দিতে পারে দিক। বাকীটা তাঁরা তলোয়ারের ছোরে পুনরধিকার করবেন। স্বতরাং কংগ্রেসের সঙ্গে চূড়ান্ত মিটমাটে সম্মত হবেন না। আপাতত আপস করবেন, যদি কংগ্রেস এ্যাওয়ার্ড মেনে নেয়। আরো উচ্চাভিলাষী যারা তাদের মতবাদ প্যান-ইসলামিজম। খেলাফতের পুনঃপ্রতিষ্ঠা। তাঁদের সাম্রাজ্যের বিস্তার মরক্কো থেকে ইণ্ডোনেশিয়া। সেটা অবশ্য সময়সাপেক্ষ। মোগল সাম্রাজ্য পুনরুদ্ধারের পর তারা বেরিয়ে পড়বেন তুর্কী সাম্রাজ্য পুনরুদ্ধারে। তার পরের ধাপ স্পেন পুনরুদ্ধার। সোভিয়েট ইউনিয়নের সামিল হয়েছে যেসব মুসলিম অধ্যুষিত ভূখণ্ড সেসব ভূখণ্ডের উপরেও তাদের দাবী আছে। কিন্তু তার আগে তাঁদের আরো বলসঞ্চয় করতে হবে। ইরান, ইরাক, সিরিয়া, তুরস্ক প্রভৃতিকে দলবদ্ধ করতে হবে। ইয়া, রোমানিয়া, বুলগারিয়া, গ্রীস প্রভৃতিও তাদের চাই। মুসলিম অধ্যুষিত বলে নয়, পূর্বপুরুষের বিজিত বলে। আমি তো ভেবে দেখছি জিন্নাই সব চেয়ে কম উচ্চাভিলাষী। সবচেয়ে বেশী মডারেট। আফটার অল, তিনিও আমাদের মতো একজন ব্যারিস্টার।”

মীর সাহেব হো হো করে হাসেন। “সেইজন্তে যতরকম কুযুক্তি পেশ করে বড়লাটের কান ভারী করেছেন। একজন কংগ্রেস মুসলিমকেও বড়লাটের সঙ্গে এক টেবিলে বসতে দেবেন না। পারতপক্ষে গভর্নরের সঙ্গেও না। ওঁদের স্থান জেলে। ওঁরা জেলেই ফিরে যান।”

“ওঁরা তো ইংরেজদের বোঝাচ্ছেন কংগ্রেস মুসলিমরা হিন্দুদের ঈর্ষ। মুসলমান লেজে মুসলিম নেশনের শিবিরে ঢুকেছেন।” দীপিকাদি হুঃখিত।

“আর ওঁরা কার ঈজু ? ইংরেজদের ? জিন্না সাহেব নন, তিনি যথার্থই স্বাধীনচেতা। নাইটও নন, নবাবও নন। জমিদারও নন, চাকরিও করেননি। নেতা হবার যোগ্য, সন্দেহ নেই। কিন্তু ঝাঁদের নেতা তাঁরা ত্যাগের জোরে নয়, কষ্ট স্বীকারের জোরে নয়, ধর্মপ্রাণ মুসলমানদের ভোটের জোরে। ভোট তারা না বুঝেই দিয়েছে। যেদিন ওঁদের চোখ ফুটেবে সেদিন এঁরা থাকবেন কোথায় ?” মীর সাহেব রহস্য করেন।

“এঁদের চেয়ে আরো কট্টর মুসলিম রাজনীতিতে নামবে। আমি এঁদের সঙ্গেই আপসের পক্ষপাতী। তার জন্তে যদি আজাদকে বিসর্জন দিতে হয় তাও না হয় দেওয়া যাবে। তাতে করে যদি গৃহযুদ্ধ এড়ানো যায়।” স্বপনদার আশা।

“তাতে করেও গৃহযুদ্ধ এড়ানো যাবে না, শুণ্ড সাহেব। ওঁদের দাবীর ফিরিস্তি কি ওই একটিতে সীমাবদ্ধ ?” মীর সাহেব এক কথায় হেসে উড়িয়ে দেন। “যেখানে ওঁরা মেজরিটি সেখানে ওঁরা চান মেজরিটির স্বত্ব-সুবিধা। যেখানে ওঁরা মাইনরিটি সেখানে ওঁরা চান মাইনরিটির সেকুগার্ড। হেডস্, আই উইন। টেলস্, ইউ লুজ। কারণ ? কারণ তাঁরা মুসলমান।”

দাঁপিলাদি স্বপন, “কিন্তু আগনিও তো মুসলমান।”

“আমি নিজের পায়েই দাড়িয়েছি, মুসলমান হিসাবে কিছু চাইনি বা পাইনি। কংগ্রেসেব কাছেও না, ইংবেজের কাছেও না।” মীর সাহেব উত্তর দেন। “মুসলমান হিসাবে কিছু চাওয়া উচিত নয়, পাওয়া গৌরবের নয়। কিন্তু মুসলমান বলেই যদি একজন গুণী ব্যক্তিকে তার উচিত পাওনা থেকে বঞ্চিত করা হয় তবে আমি নিশ্চয়ই প্রতিবাদ করব, তাতে ফল না হলে প্রতিরোধ করব। কারো উপর যেন তার ধর্মের দরুন ভবিচার বা অত্যাচার করা না হয়। এক্ষেত্রে হিন্দুদেরও দোষ আছে। না থাকলে বাঙালীতে বাঙালীতে এমন মলীযুদ্ধ বেধে যেত না। কর্পোরেশনে, ইউনিভার্সিটিতে স্বরাজ বলতে বোঝায় হিন্দুরাজ। তাকে বর্ণ হিন্দুরাজ বললেও খুব বাড়িয়ে বলা হয় না। ওয়াকিং মডেল অফ্ স্বরাজ দেখে যদি মুসলমানদের মনে সংশয় জাগে যে সারা ভারতেও স্বরাজ বলতে বোঝাবে বর্ণ হিন্দুরাজ তা হলে তাদের সংশয় দূর করা সহজ নয়। তারা ভাবে ভাগ বাঁটোয়ারার পথই এর সমাধানের পথ। সেই পথ ধরে চললে সমাধানের চূড়ান্ত পর্যায় হচ্ছে দেশ ভাগ প্রদেশ ভাগ। কিন্তু পাকিস্তানেও কি হিন্দু থাকবে না, হিন্দুস্থানেও কি মুসলমান

থাকবে না? যে যার পাণ্ডা দাবী করবে না? না শেলে সেও তো প্রতিবাদ করবে, তাতে ফল না হলে প্রতিরোধ করবে। হিন্দুরাজের পাণ্ডা মুসলিম রাজ নয়। লোকে বলবে এর চেয়ে ব্রিটিশ রাজ ছিল ভালো। ওয়াই মোটের উপর আয়বিচার করত। এমন এক রাষ্ট্রের পত্তন করতে হবে যার হিন্দু মুসলমান ভেদবুদ্ধি বা ভেদনীতি নেই, যে ধর্মনিরপেক্ষ বা সেকুলার। নামে নয়, কামে। ভারতের সুদীর্ঘ ইতিহাসে ইংরেজ আমলই তার অভিমুখে প্রথম পদক্ষেপ। ওরা খ্রীস্টান বলে এ দেশ শাসন করেনি, তা হলে তো আমরা বলতুম খ্রীস্টান আমল। করেছে ইংরেজ বলে। ওদের দলে বিস্তর ইহুদী। খোদা বড়লাট লর্ড রেডিং। ওদের যেটা দোষ সেটা ধর্মগত নয়, চর্মগত। তুমি যদি নৈকণ্য শ্বেতাজ না হও তা হলে উচ্চতম পদ কোনোকালেই পাবে না, যতই যোগ্য হও না কেন। ওদের চোখে হিন্দু মুসলমান সমান কালো। ভারতীয় খ্রীস্টানও কম কালো নয়। ওদের সঙ্গে বিরোধটার মূলে বর্ণবৈষম্য। এই কলকাতা শহরেই এমন কয়েকটা ক্লাব আছে যেখানে মেসর হতে হলে একজন দেশীয় খ্রীস্টানেরও ধর্ম ব্যথেষ্ট নয়, কর্ম ব্যথেষ্ট নয়, চর্ম শ্বেতবর্ণ হওয়া চাই। তবে তিনি বাবুচি খানসামা বেয়ারা হতে পারেন। ভাগ্যবান হলে অতিথিও হতে পারেন। দক্ষিণ আফ্রিকায় গান্ধীজী এই বৈষম্যের তীব্রতা সর্ব স্তরে অনুভব করেন। তার প্রতিকার খুঁজতে গিয়েই তিনি হন সত্যাগ্রহী। সেইসময়েই তিনি ভারতের স্বাধীনতা সংগ্রামের অগ্রগণ্য নেতা হয়েছেন। ব্রিটিশ শাসনের মন্দ ছাড়া ভালো দেখেছেন না। এটাও একটা পরিবর্ধিত দক্ষিণ আফ্রিকা। ক্ষমতা কেন্দ্রীভূত হয়েছে একদল শ্বেতাজের মুঠোয়। বিশেষ করে আমিতে। তাঁর মতে সেটা আর্মি অভ্ অকুশেশন। তাকে ঝেঁটিয়ে বিদায় করতে হবে। কিন্তু তাই যদি হয় তবে হিন্দু মুসলিম শিখ সৈন্যদের মধ্যে গৃহযুদ্ধ বেধে বাওয়া বিচিত্র নয়।”

কংগ্রেস যেটি করবে লীগ তার উল্টোটি করবে। এটাই তো রেওয়াজ। কংগ্রেস কনষ্টিটুয়েন্ট অ্যাসেম্বলীতে যাচ্ছে, স্বতরাং লীগ যাচ্ছে না। যেহেতু কংগ্রেসের নতুন প্রেসিডেন্ট নেহরু জানান কংগ্রেস আগে থেকে কোনো স্কীম মেনে নেয়নি। কংগ্রেস ওয়ার্কিং কমিটি জানিয়েছেন যে নেহরুর উক্তি তাঁদের দ্বারা অসমর্থিত। জিন্না কিন্তু কংগ্রেসকেই দায়ী করেন।

কংগ্রেস যখন ইন্টারিম গভর্নমেণ্টে যোগ দিচ্ছে না তখন উল্টোটি করার জন্যে লীগের তো যোগ দেওয়াই উচিত। লীগ যাবার জন্যে তৈরি, এমন

সময় বড়লাট ইন্টারিম গভর্নমেন্ট গঠন স্বগিত রেখে কেয়ারটেকার গভর্নমেন্ট গঠন করার সিদ্ধান্ত নেন। এটার অর্থ কংগ্রেস যদি না থাকে লীগও থাকবে না। কী অপমান! জিন্না বলেন বড়লাট লীগকে কথা দিয়ে কথা রাখেননি। বড়লাট বলেন তিনি এমন কোনো কথা দেননি। জিন্না তাঁর কথার ভুল অর্থ করেছেন। জিন্না তা স্বীকার করেন না। তখন বড়লাটের সঙ্গে আড়ি।

কনস্টিটিয়েন্ট অ্যাসেম্বলীতে কংগ্রেস যায়, যাক, খোলা মাঠে গোল করুক। কিন্তু লীগ যাবে না। আর ইন্টারিম গভর্নমেন্টে যাবার ইচ্ছা থাকলেও উপায় নেই। সেখানে যাবার প্রাইম ওঠে না। লীগ তা হলে কী করবে? ওয়েটিং ক্রমে বসে অপেক্ষা করবে, যতক্ষণ না ট্রেন আসে, কংগ্রেস ওঠে, তার সঙ্গে একজন কংগ্রেস মুসলিমও ওঠেন। হিন্দুর স্ট্রীক। না, লীগ উঠবে না। ওয়েটিং ক্রমে বসে থাকা বুখা। বড়লাটকে বিশ্বাস নেই, লেবার গভর্নমেন্টকে বিশ্বাস নেই। অসহযোগ। টাইটেল বর্জন। আরো অনেক কিছু।

মীর সাহেবের সঙ্গে আবার দেখা হয়। এবার তাঁর ওখানেই।

“যা আশঙ্কা করেছিলুম তাই হলো। লাহোর প্রত্যাবের পর বোম্বাই প্রত্যাব মুসলিম লীগের সবচেয়ে গুরুত্বপূর্ণ সিদ্ধান্ত। লাহোরে স্থির হয়ে যায় তার উদ্দেশ্য পাকিস্তান অর্জন। বোম্বাইয়ে স্থির হলো উদ্দেশ্য সিদ্ধির উপায় ডাইরেক্ট অ্যাকশন। উদ্দেশ্য আর উপায় দুটোই স্থির।” তিনি বলেন।

“কাগজে পড়ে আপনার কাছে ছুটে এসেছি।” স্বপনদা জানতে চান, “কবে থেকে শুরু? দিন ধার্য হয়েছে?”

“শুনছি ১৬ই আগস্ট।” মীর সাহেব যতদূর জানেন।

“আচ্ছা, আপনার কি মনে হয় মুহরারবদী সাহেব এসব বেআইনী কার্যকলাপ চলতে দেবেন? আফটার অল, তিনি একজন ব্যারিস্টার।” স্বপনদা বলেন।

“হো হো! আপনি আবার সেই কথা বলছেন। ব্যারিস্টার তো জিন্না সাহেবও। শহীদ পড়ে গেছে দোটানায়। শ্রাম রাখি না কুল রাখি? লীগ রাখি না উজিরি রাখি? লীগ ছাড়লে উজিরীও ছাড়তে হয়। নয়তো পার্টিই ওকে তাড়াবে। আর উজিরী ছাড়লে রাজনীতিও ছাড়তে হবে। সেটা ওর পক্ষে আত্মহত্যা।” মীর সাহেব গম্ভীরভাবে বলেন। “আর তাতে লাভটা কী হবে? শহীদে জায়গায় বড় উজির হবেন সার নাজিমউদ্দীন। এখন মিষ্টার নাজিমউদ্দীন। তিনিও তো ব্যারিস্টার। হা হা!”

স্বপনদা শুনে ব্যথিত হন যে প্রধানমন্ত্রীই বেআইনী কার্যকলাপ চলতে দেবেন সরকারী ছত্রছায়ায়। যদিও তিনি একজন ব্যারিস্টার। অক্সফোর্ডে শিক্ষিত। সেখানে বেশ নাম করেছিলেন। প্রসিদ্ধ অভিজাত পরিবারে জন্ম।

“হ্যাঁ, বুঝতে পারছি ঠুঁর দোটারানার কারণ। এই সেদিন প্রথম বার প্রধান মন্ত্রী হয়েছেন। ভোগ যথেষ্ট হয়নি।” স্বপনদা নরম হন।

বড়লাট এতদিন চিন্তা করছিলেন কী করে বন্ধ তাল খোলা যায়। তিনি নতুন এক প্রস্তাব পাঠান। কংগ্রেস যাকে চায় তাকে বড়লাটের শাসন পরিষদের সদস্য মনোনয়ন করতে পারে। কংগ্রেসের সেই অধিকারে লীগ হস্তক্ষেপ করবে না। তেমনি, লীগ যাকে চায় তাকে সদস্য মনোনয়ন করতে পারে, কংগ্রেসও লাগের সেই অধিকারে হস্তক্ষেপ করতে পারবে না। আর লব আগের মতো থাকবে।

কংগ্রেস সেই প্রস্তাব গ্রহণ করে ও ইন্টারিম গভর্নমেন্টে যোগদানের সম্মতি জানায়। কিন্তু লীগ তার বিপরীতটি করে। জিন্না বড়লাটকে জানিয়ে দেন যে কংগ্রেস যদি একজন মুসলিম মনোনয়ন করে তবে লীগ তাঁর ইন্টারিম গভর্নমেন্টে যোগ দেবে না। বড়লাট আর অপেক্ষা করার প্রয়োজন দেখেন না। নেহরুকে আমন্ত্রণ করে গভর্নমেন্ট গঠনের ভার দেন। নেহরু যাবেন প্রায়ে জিন্নার কাছে যোগদানের অনুরোধ করতে। তাঁদের হৃদয়ের মধ্যে বোঝাপড়া হয় তো সেই অনুরোধে গভর্নমেন্ট গঠিত হবে। নয়তো লীগের ওত্তে কয়েকটা আদম শূত্র রেখে নেহরু তাঁর ইচ্ছামতো গভর্নমেন্ট গঠন করবেন।

নেহরু জিন্নার সঙ্গে সাক্ষাৎ করে তাঁকে অনুরোধ করেন, কিন্তু তিনি অটল অনড়। কংগ্রেস মুসলিমকে নিলে লীগ মুসলিম আসবে না। লীগের সম্মতি পেতে হলে কংগ্রেস মুসলিমকে বর্জন করতে হবে। নেহরু ব্যর্থ হয়ে দিগে আসেন ও বড়লাটকে জানান। তখন কাকে কাকে নেওয়া হবে স্থির করার জন্তে সময় নেন। ইতিমধ্যে ১৬ই আগস্ট এসে পড়ে। ডাইরেক্ট অ্যাকশন ডে।

মুসলিম লীগ এই দিবসটির জন্তে তোড়জোড় করছিল। নাজিমউদ্দীনের ‘স্টার অফ ইণ্ডিয়া’ দৈনিকপত্রে কলকাতার কর্মসূচী প্রকাশ করা কয়েকদিন আগে থেকে শুরু হয়। মীর সাহেব একদিন একথানা কপি নিয়ে স্বপনদাকে দেখাতে যান। বলেন, “গুপ্ত সাহেব, চার বছর বাদে হতে যাচ্ছে একটা অন্তত অধ্যায়ের সূচনা। এরা কেউ ইংরেজের গায়ে হাত দিতে সাহস পাবে

না, গুলী ভয় আছে। কিংবা তার সম্পত্তির গায়ে হাত দিতে। জেলের ভয় আছে। হিন্দুর উপরেই, শিখের উপরেও। এঁরা ইন্টারিম গভর্নমেন্টে যাচ্ছেন। হিন্দু ও শিখ ঠাণ্ডাভাবে সব মুসলমানই এর জন্তে দায়ী। কে যে লীগপন্থী, কে যে নয় তা গণনা করবে না। বহু নিরীহ মুসলমান মার খাবে, মরবে। শহীদকেও হিন্দুরা বিশ্বাস করবে না। অর্ধেক বাঙালীকে অর্ধেক বাঙালীর গায়ে লেলিয়ে দিয়েছেন বলে তাঁর বদনাম হবে। তাঁর মানে মানে পদত্যাগ করা উচিত। নয়তো গভর্নর তাঁকে পদচ্যুত করতে বাধ্য হবেন। গভর্নর শাসনভার স্বহস্তে নেবেন। সে এক কেলঙ্কারি। নাজিমউদ্দীনের কী! তাঁর তো কিছু হারাবার নেই। গভর্নর যে তাঁকে ডেকে নিয়ে গদীতে যসাবেন সেটা নির্বোধের প্রত্যাশা। যদি না তিনি এ আন্দোলন খামিয়ে দিতে পারেন। সেটুকু সংসাহস কি তাঁর আছে? তিনি যে জিন্না সাহেবের পরম অহুগত সেবক। আমি যে অশান্তি বোধ করছি তা কী করে প্রকাশ করব? হিন্দুরা হয়তো আমাকেও দোষ দেবেন, আমি কেন ডাইরেক্ট অ্যাকশনাবরোধী স্টেটমেন্ট দিয়ে মুসলমানদের নিবৃত্ত করিনি। আমি কেন নীরব। ধরে নেবে মোন সম্মতিলক্ষণ। কিন্তু তা হলে যে আমাকে ঘোর বিপদে পড়তে হবে! আমার পরিবারকেও। গ্যাশনালিস্ট মুসলিমদের হুঁদিক থেকেই বিপদ। হয় রায়ে মারবে, নয় রাবণে মারবে। আমরা মারাচ কুরঙ্গ।”

স্বপনদা তাঁকে অভয় দেন। “না, না, ইংরেজ থাকতে অমন কোনো মারামারি হতে দেবে না। গভর্নর আছেন কী করতে? সডলাট আছেন কী করতে? পুলিশের আহুগত্য তাঁদেরই কাছে। বেশী বাড়ি ডি হলে আমি আসবে। আমার আহুগত্যও তাঁদেরই কাছে। জিন্না, লিয়াকৎ, শহীদ, এঁরা সবাই ব্যারিস্টার। এঁরা কখনো আইন হাতে নেবেন না।”

“কেন? গান্ধী, নেহরু, পাটেলও কি ব্যারিস্টার নন? ওঁরাই তো পথ দেখিয়েছেন। জিন্না দেখছেন কংগ্রেসকে অহুসরণ করলেই তিনি তাঁর সাধের পাকিস্তান পাবেন। তবে তিনি অহিংসার ধার ধারেন না। মুসলিম লীগের গর্ব সে হিংসায় বিশ্বাস করে। জিন্না বিপক্ষের সবাইকেই শাসিয়েছেন যে তার হাতেও পিস্তল আছে। কথা হচ্ছে পিস্তল বলতে যদি ভায়োলেঞ্চ বোঝায় আর বিপক্ষ বলতে যদি ব্রিটিশ সরকার বোঝায় তবে তিতুমীরের এই অভিযান ব্যর্থ হবে। তবে কি হিন্দু বোঝায়? সেইটেই আমার আশঙ্কা। এটা



নামে আইন অমান্ত, অসলে মারদাঙ্গা। লড়কে লেঙ্গে পাকিস্তান। এই ওদের স্লোগান।”

দীপিকাদি ত্রুঙ্ক হয়ে বলেন, “ওরা ভেবেছে কী? লড়াই কখনো একতরফা হয়? আরো একটা তরফ থাকে। সেই আরেক তরফ যদি ইংরেজ হয়ে থাকে আমাদের কিছু বলবার নেই। ইংরেজকে যেই হোক একজন তাড়ালেই হলো। আমি বরং মনে মনে তিতু মীরের সাফল্য কামনা করব। কিন্তু তিনি যদি হিন্দুদের উপর ঝাঁপিয়ে পড়েন তবে হিন্দুরাও দেখিয়ে দেবে যে তাদের হাতে পিস্তল নয় স্টেন গান আছে। ইংরেজ যদি নিরপেক্ষ থাকে তবে জিং হবে হিন্দুদেরই।”

মীর সাহেব একটু ক্ষুণ্ণ হয়ে বলেন, “সেটা তো যুদ্ধক্ষেত্রে কখনো প্রমাণিত হয়নি। এবার হতেও পারে, না হতেও পারে। মুসলমানদের ধারণা এক একজন মুসলমান সৈনিক তিন তিনজন হিন্দু সৈনিকের সমান।”

দীপিকাদি গর্জে ওঠেন, “আরবরাও তো ভেবেছিল স্পেনে তাদের রাজত্ব ঐশ্বর্যমানকাল বিঘ্নমান থাকবে। কিন্তু আটশো বছর রাজত্বের পরে তারা স্পেন থেকে নিমূল হয়। গড়ে থাকে কয়েকটি অতি সুন্দর স্মৃতিচিহ্ন। তাজমহলের মতোই অপূর্ব। আর মোতি মসজিদের মতোই অমূল্য। আমরা সেগুলি লবণে রক্ষা করব। কিন্তু লড়াইতে জিতলে লীগপন্থী আরবদের আমাদের স্পেন থেকে লমুলে উচ্ছেদ করব।”

মীর সাহেব ব্যথা পান। বলেন, “আর লড়াইতে হারলে?”

“হারতেই পারিনি। হিন্দু আর শিখ শৈল্যসংখ্যা মুসলিম শৈল্যসংখ্যার চেয়ে বেশী। আমাদের দিকে গুথারাও থাকবে। তারা একাই একশো। জানেন ভিক্টোরিয়া ক্রস কারা সব চেয়ে বেশী পেয়েছে? যারা জার্মানীতে গিয়ে জার্মানদের সঙ্গে লড়েছে, আফ্রিকায় গিয়ে ইটালিয়ানদের সঙ্গে লড়েছে, মেসোপটেমিয়ায় গিয়ে তুর্কদের সঙ্গে লড়েছিল তারা পারবে না পাঞ্জাবী মুসলমানদের সঙ্গে লড়তে? তা ছাড়া পাঠানরা আমাদের বিপক্ষে নয়।”

মীর সাহেব ওঠেন। “এ লড়াই কিন্তু সৈনিকে সৈনিকে নয়। ইংরেজ সরকারের অফিসারদের হুকুম না পেলে ওরা লড়বে না। এ লড়াই গুণায় গুণায়। নিরীহ নিরস্ত্র মানুষও তাদের হাতে মরবে। তবে ইংরেজ চলে গেলে সৈনিকে সৈনিকে বাধতে পারে। ফলাফল অনিশ্চিত। কংগ্রেস কি সে ঝুঁকি নেবে?”

দীপিকাদি বেশ উত্তেজিত অবস্থায় লেদিন শুতে যান। স্বপনদার সেদিকে নজর ছিলো না। তিনি কতকটা আপন মনে বলে যান, “মুসলমানরা ফ্রেশ অভ মাই ফ্রেশ, ব্লাড অভ মাই ব্লাড। ওদের সঙ্গে কি আমি লড়তে পারি? আর ইংরেজদের সঙ্গে আমার অ্যাফিনিটি যে একজন প্রিয়জনের মতো। তাদের সঙ্গেও কি আমি বাগড়া করতে পারি? বিশেষত ওরা যখন আপনা থেকেই যাচ্ছে।”

দীপিকাদি ফেটে পড়েন। “তুমিও একজন প্রচ্ছন্ন মুসলমান ও প্রচ্ছন্ন ইংরেজ। তোমার মতো স্নেহ ও যবনের সঙ্গে শুলে আমার পাপ হবে। আমি ভারতীয় অর্ধ নারী। তোমাকে বিয়ে করা একটা হিমালয়ান ব্লাগার। বিলকুল ভুল। চললুম আমি ও ঘরে শুতে।”

স্বপনদা তো হতভম্ব। বলেন, “যা বলবার তা বিশুদ্ধ বাংলাভাষায় বল। ইংরেজী আর ফার্সীর ফোড়ন দিচ্ছ কেন? ওসব তো স্নেহ ও যবনদের বুলি।”

“তা হলে কী বলব? হিমালয়সদৃশ প্রমাদ। সম্পূর্ণ ভ্রম।” দীপিকাদি একটু অপ্রস্তুত হয়ে আবার শুয়ে পড়েন।

“রান্ন, তুমি কি জানো আমি কখনো স্বীকার করিনি যে, East is East and West is West and never the twain shall meet, প্রীচ্য ও প্রতীক্ষ্যের মিলনই আমার ইস্ট ওয়েস্ট ক্লাব পত্তনের উদ্দেশ্য। সেই ক্লাবেই তোমার সঙ্গে আমার চার চোথের মিলন। সেই স্ববাদে তোমার সঙ্গে আমার জীবনের মিলন। তেমনি, আমি কখনো মেনে নিইনি যে, হিন্দু হচ্ছে হিন্দু আর মুসলমান হচ্ছে মুসলমান, কখনো এদের মিলন হবে না। তা হলে তো ভারতীয় জাতির জন্তিত্বই থাকে না। ভারতীয় জাতীয়তাবাদ একটা মায়া। আমরা মায়াযুগের পান্ডাতে ছুটেছি। জিন্নাই ঠিক আর গান্ধী, নেহরু ও স্বভাষ বেঠিক। আমার কথা যদি বল আমি প্রচ্ছন্ন মুসলমান, প্রচ্ছন্ন খ্রীষ্টান তথা প্রচ্ছন্ন বৌদ্ধ। একই কালে আমি প্রচ্ছন্ন ইংরেজ, প্রচ্ছন্ন ফরাসী তথা প্রচ্ছন্ন জার্মান। আমার বোম্বের কথা সত্য হলে আমি এদেশের টুর্গেনিভ, তাই প্রচ্ছন্ন রাশিয়ান।” স্বপনদা বলেন আবেগভরে।

“বুঝেছি, তুমি একটি বহুরূপী। তুমি হিন্দুও নও, ভারতীয়ও নও। তোমার সঙ্গে শোওয়া আর নয়। তোমার তাতে কষ্ট হবে না। তুমি স্বপ্নে বরনারী লজ পাবে। বরনারী কেন, পরনারী।” এই বলে দীপিকাদি ছুম করে বিছানা থেকে নেমে দড়াম করে দরজা বন্ধ করেন। কুকুরটা

আটকা পড়ে কুঁই কুঁই করে। তখন দরজা খুলে সেটাকেও নিয়ে যান।  
উর্বশীর মেঘ।

স্বপনদা চৈচিয়ে বলেন, “উর্বশী, উর্বশী, ফিরে এস।”

দীপিকাদি বলেন, “গুড নাইট। শুভরাত্রি। কাল দেখা হবে।”

পরের দিন প্রাবার সন্ধ্যাব। কিন্তু রাতের বিছানা যায় যার ঘরে।  
দীপিকাদি শুভরাত্রি জানিয়ে বলেন, “স্বপনমোহন, তুমি তোমার স্বপন দেখ।  
তেল আর জল মিশ খেয়েছে। কালার আর ধলা ভেদ ভুলেছে। মায়ায়ুগ ধরা  
পড়েছে। ওদিকে একটা শো-ডাউনের তোড়জোড় চলেছে। আচ্ছা, শো-  
ডাউন কথাটার বাংলা কী?”

স্বপনদা রসিকতা করেন, “শো মানে শোও। ডাউন মানে নিচে। স্বীরা  
স্বামীদের নিচে শোয়। প্রকৃতির বিধান।” দীপিকাদি রাঙা মুখে পালান।

## ॥ একুশ ॥

স্বকুমার সপরিবারে বিলেত ফিরে যাবার সময় যে চিঠি লিখেছিল তার  
জবাবে মানস বলেছিল, “ভালোই করেছ। দেশটা এখন একটা আগ্নেয়গিরি।  
যে কোনো দিন লাভাবর্ষণ শুরু হতে পারে। তার আগেই ইংরেজরা সরে পড়বে  
মনে হচ্ছে। এই তো.সেদিন এই স্টেশনের শেষ ইংরেজটিও বদলী হয়ে গেলেন।  
পুলিশ সাহেব। তাঁর জায়গায় এলেন একজন মুসলমান। পূর্বপরিচিত।  
অসাম্প্রদায়িক। জেলা ম্যাজিস্ট্রেটও তেমনি অসাম্প্রদায়িক মুসলমান। কিন্তু  
আমাদের সকলেরই অগ্নিশরীক্ষার দিন আসবে, যেদিন পলিটিসিয়ানদের  
বিরোধ সম্পূর্ণ অমীমাংস হবে। এক উত্তরাধিকারী না দুই উত্তরাধিকারী এই  
প্রশ্নের উত্তর দেবার জন্তে অশ্রুশব্দের প্রয়োজন হবে। যাদের হাতে অশ্রুশব্দ  
তাদের ডাক দিলে কেউ হাঁক দেবে, ‘আল্লা হো আকবর’, কেউ হাঁক দেবে,  
‘সং শ্রী অকাল’, আবার কেউ হাঁক দেবে, ‘দুর্গামাতা কী জয়।’ একজনও হাঁক  
দেবে না, ‘বন্দে মাতরম্’ বা ‘ভারতমাতা কী জয়।’ জানো তো, গতবার যুদ্ধে  
যাবার সময় এরা কেউ দেশের নামে প্রাণ দিতে যায়নি। রাজার নামেও নয়।  
রাজার প্রতি আহুগত্যের স্থান নিয়েছে ধর্মের প্রতি আহুগত্য। বিপ্লববাদিনী

মধুমালতী আর সব দিক থেকে নিরাশ হয়ে এখন সিপাহীদের উপর শেষ ভরসা রেখেছেন। কিন্তু ইংরেজরা চলে যাবার আগে যদি উত্তরাধিকারী কারা হবে এই প্রশ্নের সর্বসম্মত মীমাংসা না করে যায় তবে ধর্ম অমুসারে বিভক্ত সিপাহারা পরস্পরের উপর অস্ত্র প্রয়োগ করে এর একটা ধর্মসম্মত মীমাংসা করবে। ভারত স্বাধীনও হবে, বিভক্তও হবে। মধুমালতী কি এ রকম একটা সমাধান চান? কেন তবে সিপাহীবিরোধের স্বপ্ন দেখছেন? শুধু তিনি নন, বামপন্থীদের অনেকেই। জনগণকে তাঁরা সঙ্গে নিতে পারেননি, সেই অভাব পূরণ করতে চাইছেন জওয়ানগণকে সঙ্গে নিয়ে। নৌসেনাবিরোধ তারই প্রথম ধাপ। মধুমালতী ঘটনাচক্রে সেই ধাপে পা দেন। পা তুল জায়গায় ফেলেছিলেন। ফিবে গিয়ে ভালোই করেছেন।”

এর উত্তরে সুকুমার এক লম্বা চিঠি লেখে। তার সঙ্গে গৌজা ছিল একটা ছোট চিঠি। মিলি লিখেছে যুথিকাকে। “ছ’বছর বিদেশে থাকার পর দেশে ফিরে দেখি আমি আর একটি রিপ ভ্যান উইক্ল। বিদেশই আমার কাছে দেশ, দেশ আমার কাছে বিদেশ। তুল ভ্রান্তি স্বাভাবিক। তবে একটা বিষয়ে আমি তুল করিনি। লক্ষ করেছি ইংরেজরা ভারত ছাড়বে, তবু মুসলমানদের ছাড়বে না। আর কংগ্রেসওয়ালারা গদী ছাড়বে, তবু মুসলমানদের ছাড়বে না। কংগ্রেস নেতারা একজন মুসলিমকে সঙ্গে না নিয়ে ইন্টারিম গভর্নমেন্টে আসবেন না। বরং ওয়েভেলের আমন্ত্রণ প্রত্যাখ্যান করবেন। ওয়েভেলের এর পরে কর্তব্য কী? জিন্নাকে কথা দিয়ে কথা না রাখা? জিন্না সেই অভিযোগই করেছেন। কেয়ারটেকার গভর্নমেন্ট গঠন করা? ওয়েভেল সেই পন্থাই ধরেছেন। এটা তৃতীয় পন্থা। কিন্তু এ পথে কারো সঙ্গেই মিটমাট হতে পারে না। তালা যেমন বন্ধ ছিল তেমনি বন্ধই থাকবে। সকলেই বলাবলি করছে এবার কংগ্রেস করবে কী? গণ সত্যাগ্রহ? লীগ করবে কী? গণ হত্যাগ্রহ? রাজদ্রোহ নয়। সেটা তার ইংরেজ মিতারা বরদাস্ত করবেন না। বেড়াল তা হলে কোন্‌দিকে ঝাঁপ দেবে? জানো তো ভিতরের খবর দিয়ে। জুলি তো তার বরকে নিয়ে যেতে আছে। তা ওরা সুখী হোক। রণকে নিয়ে ভাবনায় পড়েছি। সে কেবল দাছ দিহুর কথাই বলছে। তাঁদের খুঁজছে।”

মিলির চিঠি যুথিকাকে দিয়ে মানস সুসুমারের চিঠি পড়তে বসে।

সুকুমার লিখেছে, “জাহাজে এবার বিষম ভিড়। সাহেব মেমসাহেব

বোঝাই। আমরা ক'জন কালা আদমী একেবারে কোণঠাসা। আলাদা একটা ডাইনিং টেবিলে বীশান্তরিত। আমাদের মুখোমুখি খাদের আসন তাঁরা এক গুজরাটী মুসলিম দম্পতি। সুলেমান সোমজী ও আয়েশা সোমজী। আমরা তখন ধর্মলচেনন নই, চর্মলচেনন। ইংরেজীতেই কথাবার্তা চালাতে হয়, তাই বেশরোয়াভাবে সাহেবলোকের বর্ণবিষেষের নিন্দাবাদ করতে পারিনে। বয়ঃ একটু অগুরুপ্পা বোধ করি। আহা, বেচারিরা ছ'লাত বছর পরে দেশে ফিরছে। ডেকে যখন বেড়াই একসঙ্গে-বেড়াই। সেইসূত্রে মনের কথা খুলে বলি। ওঁরা স্বাধায়সী। যাচ্ছেন চিকিৎসার জন্তে লণ্ডনে। মাস ছয়েক থাকবেন। ভদ্রলোক একটা গুজরাটী পত্রিকার সম্পাদক। সেটার কয়েক পাতা ইংরেজী।

বললেন, “গান্ধীও গুজরাটী, জিন্নাও গুজরাটী, বল্লভভাইও গুজরাটী, মুনশীও গুজরাটী, আমিও গুজরাটী। আমরা পরস্পরের জাতি। তা হলে দুই নেশন বলে দাবী করতে যাই কেন? মেজরিটি মাইনরিটি কোন্ দেশে নেই? তা বলে কি তারা দুই নেশন? এটা যুক্তিসহ নয়। তবু অর্থবহ। আসলে যা হয়েছে তা এই যে বুদ্ধ বাণশাহ শাহ্ জাহান এখন মুম্বু। তাঁর পুত্রদের মধ্যে বেধে গেছে উত্তরাধিকার নিয়ে ঝন্ড। মোগলদের মধ্যে এমন কোনো নিয়ম ছিল না যে জ্যেষ্ঠপুত্রই হবে পিতার একমাত্র উত্তরাধিকারী, অন্তেরা হবে তাঁর অধীনস্থ অনধিকারী। এই নিয়ে প্রত্যেকবারই গোলমাল বাধে। এর নিষ্পত্তি হয় গায়ের জোরে। জোর যার মূলুক তার। শাহ্ জাহানের নিজের বেলাও তাই হয়েছিল। এখন আমাদের সামনেও আছে একই প্রশ্ন। বর্তমান শাসনভন্ডে এমন কোনো ব্যবস্থা নেই যে ইংরেজরা চলে যাবার সময় ক্ষমতার হস্তান্তর করে যাবে কেন্দ্রীয় আইনসভার মেজরিটির হাতে। মেজরিটি রুল একটা বিদেশী কনভেনশন। এদেশে সেটা প্রথাসিদ্ধ বা বিধিবদ্ধ হয়নি। কংগ্রেসকে আমরা একমাত্র উত্তরাধিকারী বলে মেনে নিতে পারিনে। এ যুগের আওরংজেব এ যুগের দারাকে আপসে দিল্লী ছেড়ে দিতে রাজী, কিন্তু দারাকেও আপসে কলকাতা আর লাহোর ছেড়ে দিতে হবে।

তা শুনে আমি চমকে উঠি। বলি, জানেন না, কলকাতা হচ্ছে রয়াল বেঙ্গল টাইগারের ডেন। বাঘের বাচ্চারা কেউ বা টেররিস্ট, কেউ বা কমিউনিস্ট। দারার কথায় আওরংজেবকে ওরা ওদের আস্তানা ছেড়ে দেবে কেন? উনি বলেন, ইংরেজরা যদি যাবার আগে এ্যাওয়ার্ড দিয়ে যায়? আমি

বলি, তা হলে প্রথম কামড় বসবে ইংরেজদেরই ঘাড়ে। ওদের রাজত্ব তো যাবেই, বাণিজ্যও যাবে। দ্বিতীয় চোট পড়বে লীগপন্থী মুসলমানদের গায়ে। ওঁরা কেমন করে রাজত্ব করে দেখে নেবে বামপন্থীরা। তিনি বলেন, এ তো বড়ো অজ্ঞায়! আমরা গুজরাটী মুসলমানরা রাজ্য চাইনে, বাণিজ্য চাই। বোম্বাই হাতছাড়া হলে কলকাতাই হতো আমাদের বাণিজ্যকেন্দ্র। কলকাতা না থাকলে পাকিস্তান কাণা হয়ে যাবে। আমি বলি, তা হলে পার্টিশনের দাবী তুলে নিন। কোয়ালিশনের জন্তে চেষ্টা করুন।

ওদিকে আয়েশা বেগমের সঙ্গে মিলির খুব ভাব। বেগম বলছিলেন, লগুনে আমরা মহামাণ্ড আগা খানের অতিথি হব। তিনি আমাদের ধর্মগুরু। তাঁর অসংখ্য হিন্দু শিষ্য। তাদের কাছে তিনি বিষ্ণুর দশম অবতার। আমরা হিন্দুবিদ্বেষী নই।

লগুনে ফিরে আমার প্রথম কাজ হলো ক্যাবিনেট মিশনের ভারত রওনা হবার মুখে ক্রিপসের অন্তরঙ্গ মহলে খোঁজ খবর নেওয়া। ওঁরা কি কোনোরকম এ্যাওয়ার্ড হাতে করে নিয়ে যাচ্ছেন? তাই যদি হয় কলকাতা কার ভাগে পড়বে? জানেন তো ওটা টেরিস্ট আর কমিউনিস্টদের আস্তানা। তারা সবাই বাঙালী হিন্দু। ওঁরা আমাকে আশ্বাস দিলেন মিশন এখনো মনঃস্থির করেননি, বিভিন্ন পার্টির নেতাদের সঙ্গে কথাবার্তা বলে সব দিক বিবেচনা করে তাঁদের এ্যাওয়ার্ড নয়, সুপারিশ ঘোষণা করবেন। এখন থেকে ও এখান থেকে বলতে পারা যায় না কী কী সুপারিশ। তবে ব্রিটিশ পলিসির সার কথা কী সেটা বলতে বাধা নেই। এককালে ব্রিটিশ পলিসি ছিল, র্যালি ও মডারেডটস। তার পরে হয়, র্যালি ও মুসলিমস। স্ক্রল পর থেকে হয়েছে, র্যালি ও রাইটিস্টস। এখন সব চেয়ে বড়ো আপদ হয়েছে বামপন্থীরা। চন্দ্র বোস নেই, কিন্তু জয়প্রকাশ নারায়ণ আছেন। তাঁর পেছনে আছেন পণ্ডিত নেহরু। নেহরুর শিঠে চেপে রয়েছেন সিন্ধুবাদ নাবিকের সেই বুদ্ধ। ব্রিটিশ অফিসাররা কেউ আর কংগ্রেসের সঙ্গে লড়তে চান না, অথচ ব্রিটেনের একমাত্র উত্তরাধিকারী বলে একমাত্র তারই হাতে ক্ষমতার হস্তান্তর করতেও অনিচ্ছুক। শেষপর্যন্ত হয়তো তাঁরা ক্ষমতার হস্তান্তর না করেই ভারত ত্যাগ করবেন। তার পরে ভারত যদি এক থাকে তবে ভারত সরকারের সঙ্গে সন্ধি, যদি বিধা হয় তবে দুই সরকারের সঙ্গে সন্ধি, যদি তিন হয় তবে তিন সরকারের সঙ্গে সন্ধি। আমি বলি, তিন কেন? এর উত্তরে তাঁরা বলেন, শিখদেরও আলাদা

একটা রাষ্ট্র থাকতে পারে। পাটিয়ালা, কাপুরথাল, নাভা প্রভৃতি শিখ রাজ্যের সঙ্গে ব্রিটিশ শাসিত জেলা জুড়ে জুড়ে শিখিস্তানও কি গড়ে উঠতে পারে না? শিখেরা পাকিস্তানের মাইনরিটি হতে চাইবে কেন? আমাকে আশ্বাস দেওয়া হয় যে বাঙালী, অসমীয়া ও পাঞ্জাবী হিন্দুকেও পাকিস্তানের মাইনরিটি হতে বাধ্য করা হবে না। এসব সমস্তার মীমাংসার জন্যে কনস্টিটিয়েন্ট অ্যাসেম্বলীর অধিবেশন ডাকা হবে। অ্যাসেম্বলীয় তৈরি শাসনতন্ত্রই ব্রিটেন গ্রহণ করবে। যদি সর্বসম্মত হয়। মেজরিটির ভোটে মাইনরিটির ভবিষ্যৎ নির্ধারিত হবে না। তা সে শিখ মাইনরিটিই, হোক আর মুসলিম মাইনরিটিই হোক, আর হিন্দু মাইনরিটিই হোক।

স্বকুমার আরো লিখেছে, ক্যাবিনেট মিশনের সুপারিশ কংগ্রেস তার আপত্তিসত্ত্বেও মেনে নিয়েছে দেখে প্রীত হয়েছি। এ না হলে কনস্টিটিয়েন্ট অ্যাসেম্বলীই বসত না। কিন্তু বড়লাটের আপ্রাণ প্রয়াসসত্ত্বেও কংগ্রেস তাঁর ইন্টারিম গভর্নমেন্টে যোগ দেবে না শুনে মর্মান্বিত হয়েছি। আমার বাগীর খোড়া তো নেহরু। তিনি যদি প্রধানমন্ত্রী না হন তো আমিই বা কার ভরসায় চাকরির খোঁজে স্বদেশে ফিরব? একা মুসলিম লীগ যোগ দিয়ে আখের গুছিয়ে নেবে; কিন্তু শুনে অবাক হয়েছি যে বড়লাট ইন্টারিম গভর্নমেন্ট গঠন স্বগিত রেখে কেয়ারটেকার গভর্নমেন্ট গঠন করছেন, তাতে শুধু অফিসিয়ালরাই থাকছেন। খোঁজ নিয়ে শুনতে পাই তিনি জিন্নাকে ডিক্লেস আর লিয়াকৎ আলী খানকে হোম দিয়ে সন্তুষ্ট করতে গিয়ে শিখদের ও কংগ্রেস সদস্যদের যোগদানের পথ বন্ধ করবেন না। তাঁদের জন্যে দুয়ার খোলা রাখাই তাঁর পলিসি। জিন্না বলছেন, বড়লাট তাঁকে কথা দিয়ে কথার খেলাপ করেছেন। বলবেনই তো। পারফিডিয়াস আলবিয়ন বলে একটা প্রবাদ আছে না? এখন তিনি কী করবেন? বিদায় করেছ যারে নয়নজলে আবার ফিরাবে তারে কিসের ছুঁলে?

ইতিমধ্যে যমুনা নদীর জল অনেক দূর গড়িয়েছে। জিন্না সাহেব এক টিলে দুই পাখী মেরেছেন। কনস্টিটিয়েন্ট অ্যাসেম্বলী ও ইন্টারিম গভর্নমেন্ট। শুধু তাই নয়, ডাইরেক্ট আকশনের প্রস্তাব পাশ করিয়ে নিয়েছেন। আগস্ট মাসের দু'দিন আগে হলও এই তাঁর আগস্ট প্রস্তাব। গান্ধীজীর আগস্ট প্রস্তাবের মতো এটাও বোঝাইতে গৃহীত। কিন্তু কী আশ্চর্য! কেউ তাঁকে বা তাঁর ওয়াকিং-কমিটির সদস্যদের গ্রেফতার করে নজরবন্দী করেনি।

উণ্টে বড়লাট তাঁকে আবার আমন্ত্রণ করেছেন, কিন্তু তাঁকে কংগ্রেস মুসলিমদের একজনকে বড়লাটের ক্যাবিনেটে নেওয়ার উপর ভীটো জারি করছে দেননি। এটা যে কেবল কংগ্রেসের উপরেই নিষেধাজ্ঞা তাই নয়, বড়লাটের উপরেও নিষেধাজ্ঞা। মুসলিম লীগ তাঁর আমন্ত্রণ প্রত্যাখ্যান করলেও কংগ্রেস কয়েনি। কংগ্রেস মুসলিম লীগের উপর কোনো রকম ভীটো জারি করেনি। বড়লাট কংগ্রেসের নতুন সভাপতি জবাহরলাল নেহরুকে ইন্টারিম গভর্নমেন্ট গঠনের ভার দেন, কিন্তু নিজে সাক্ষীগোপাল হতে নারাজ হন। তিনি ব্রিটিশ পার্লামেন্টের কাছেই দায়ী থাকবেন, ভারতের কেন্দ্রীয় আইনসভার কাছে নয়। সে দায় কংগ্রেসের। লীগ থাকলে লীগেরও। মতবিরোধ বাধলে নেহরু সদলবলে পদত্যাগ করতে পারেন। বড়লাট তাঁকে ঢালা অহুমতি দিলেও জিন্নার সঙ্গে পরামর্শ করতে বলেন। জিন্না যদি তাতে রাজী হন তা হলে কোয়ালিশন গভর্নমেন্ট হবে। সেটাই বড়লাটের অস্থিষ্ট। আপাতত না হলেও পরে হয়তো সেটা সম্ভব। তিনি চেষ্টা চালিয়ে যাবেন। তাই ডাইরেক্ট অ্যাকশন শুরু করলেও মুসলিম লীগের সাত খুন মাক।”

চিঠি ছুটো পড়ে যুথিকা বলে, “আমি তো দেখছি ইংরেজদের আর ভারতশাসনে রুচি নেই। ওরা মানে মানে ক্ষমতার হস্তান্তর করে দেণে কিয়ে যেতে পারলে বাঁচে। তবে, হ্যাঁ, ভারতের সঙ্গে প্রীতিপূর্ণ সম্পর্ক পাতাতেও চায়। যাতে তাদের বাণিজ্যে হাত না পড়ে, যাতে তাদের শত্রুরা ভারতে এসে তাদের স্থান না নেয়। তারা এতদিনে হৃদয়ঙ্গম করেছে যে কালু বিনে গীত নেই, কংগ্রেস বিনে কেন্দ্রীয় গভর্নমেন্ট নেই। এককভাবে মুসলিম লীগের সে কর্ম নয়। তাই কংগ্রেসের অবর্তমানে মুসলিম লীগকে গভর্নমেন্টের দায়িত্ব দেয়নি। বাধ্য হয়ে কংগ্রেসকেই তারই শর্তে দিতে হয়েছে। তার ভাগ থেকে একটি আসন সে একজন মুসলমানকে দিতে পারবে, বিশেষত যখন একটা প্রদেশ কংগ্রেস মুসলিমরাই শাসন করছেন। কেন্দ্রীয় সরকারে তাঁদের কি কোনো প্রতিনিধি থাকতে মানা? মানা করছেন যিনি তাঁরই তো অনধিকার।”

মানস স্বীকার করে। “কিন্তু জিন্নার ধারণা মুসলিম একেবারে খাতিরে মুসলিম লীগকেই একমাত্র মুসলিম প্রতিনিধি বলে মেনে নিতে হবে। কংগ্রেস মুসলিমরা কুইসলিং। নরওয়ার্ডের নাংসী সমর্থক কুইসলিংএর অমুরূপ। এই মহান সত্যটা চার্চিল হলে মেনে নিতেন, অ্যাটলী মানতে রাজী নন।



নেহরুকে বন্ধুরূপে পেতে হলে নেহরুর বন্ধুকেও বন্ধুরূপে পেতে হবে। মণ্ডলান' আজাদও নেহরুর মতো যুদ্ধে সহযোগিতা করতে রাজী ছিলেন, যদি গান্ধী বিমুখ না হতেন। আর ইউনিয়নিষ্টরা তো অকুপণ সহযোগিতা করেছিলেন, তাঁদের কেমন করে কুইসলিং বলে গণ্য করা যায়? বড়লাট তাঁদের একজনকে একটা আসন দিতে উদ্যত হয়েছিলেন, জিন্নার আপত্তি থাকায় তিনি পেছিয়ে যান। নইলে এক বছর আগেই ইন্টারিম গভর্নমেন্ট গঠন করা সম্ভব হতো। ইংরেজদের দিক থেকে অনিচ্ছা ছিল না, কংগ্রেসের দিক থেকে অনিচ্ছা ছিল না, ইউনিয়নিষ্ট মুসলিমদের দিক থেকে অনিচ্ছা ছিল না। একমাত্র মুসলিম লীগের দিক থেকেই ছিল অলিখিত এক ভীটো। লেবার গভর্নমেন্ট অস্বীকার করেছেন। এইটেই ডাইরেক্ট অ্যাকশন প্রস্তাবের অন্তর্নিহিত কারণ। জিন্নার বোধ হয় ধারণা ছিল যে এবারেও তিনি বড়লাটকে নিবৃত্ত করতে পারবেন। কিন্তু ঘটনার গতি বড়লাটকেও ভাসিয়ে নিয়ে যেতে পারে। কেন্দ্রীয় সরকারের রদলবদল জরুরি। ইউরোপীয় অফিসাররা ছ'সাত বছর হলো দেশে ফেরার অল্পমতি পাননি। পাবেন পয়লা জাহুয়ারি থেকে। স্বীদের পাঠাতে আরম্ভ করেছেন, তাই জাহাজে এত ভিড়। ক্ষমতা হস্তান্তরের তাড়াহুড়ো ইউরোপীয়দের মধ্যেই বেশী। জিন্না সাহেব ডাইরেক্ট অ্যাকশনের হুমকি দিচ্ছেন, কিন্তু গান্ধীজী হুমকি না দিলেও সকলে জানে যে তিনি আবার গণ সত্যাগ্রহের াক দিতে পারেন। সেটা আরো মোক্ষম।”

যুথিকা তা শুনে তর্ক করে। কিন্তু ইংরেজ যদি খেচ্ছায় ভারত ছাড়ে তবে আবার গণ সত্যাগ্রহের কী প্রয়োজন? সঙ্গে সঙ্গে যদি গৃহযুদ্ধ বেধে যায় গণ সত্যাগ্রহ কোন কাজে লাগবে? দেখতে দেখতে সেটা গণ হত্যাগ্রহে পরিণত হবে। তখন তাকে খামানোই দায়। তাতে মুসলিম লীগেরই সুবিধে। হিন্দুদের হাতে সংখ্যালঘু মুসলমানরা যদি মরে মুসলিম জওয়ানরাও যুদ্ধে নামবে। শহরকে শহর লুট করবে, পুড়িয়ে দেবে। সংখ্যালঘু হিন্দুরা প্রাণ নিয়ে পালাবে। তখন সেই সব ছেড়ে আসা জায়গা নিয়ে পাকিস্তান হবে। অহিংসা দিয়ে তা রোধ করতে পারা যাবে না। সারা দেশে একশো জন সত্যিকার অহিংসাবাদী আছেন কি-না সন্দেহ। সৌম্যদা পর্যন্ত ডাইনামাইট দিয়ে পুল উড়িয়েছেন। মানুষ মরেনি, এই তাঁর সাফাই। যারা রেল স্টেশন পুড়িয়েছে তারাও তো সেই সাফাই দেবে। না, এক মুঠো সত্যিকার সত্যাগ্রহীকে নিয়ে গণ সত্যাগ্রহ হয় না। ইণ্ডিয়ান আর্মিকে ইংরেজদের হাত

থেকে নিজেদের হাতে নিতে হবে। ক্ষমতার হস্তান্তর বলতে এই বোঝায়। মুসলিম রেজিমেন্টগুলো কংগ্রেসের হাতে পড়তে রাজী হবে না, তারা লীগকেই পছন্দ করবে। শিখ রেজিমেন্টগুলোর বোধহয় শিখিস্থানের উপর ঝোঁক। সময় এসেছে রিয়ালিটি হবার। ইংরেজের সঙ্গে আপস করতেই হবে। কিন্তু মানে মানে আপস। অ্যাটলী কংগ্রেসের মুখ রেখেছেন, লীগের মুখ রাখেননি। তাই লীগ ক্ষেপেছে। কিন্তু ইঙ্গ-কঙ্গ এক হলে রণে ভঙ্গ দেবে। কী ভাগ্য লেবার ক্ষমতায় এসেছে! স্বর্ঘের আলো থাকতে ঘর ছেয়ে নাও। চাচিল ফিরে এলে পশতাবে! পাঁচ বছর পরে লেবার থাকবে কি-না কে বলতে পারে! আরো আগেই যাবে, যদি আবার যুদ্ধ বেধে যায়। বালিন নিয়ে বাধতে পারে।”

একেই বলে কাস্তাসম্মিত। মানস হাসে, “এই প্রথম শুনছি যে তুমি আপসের পক্ষপাতী। কিন্তু ইংরেজের সঙ্গে আপস তো মুসলিম লীগের সঙ্গেও আপস। লীগ মুখে যাই বলুক তার পিছল একজন ইংরেজেরও গায়ে লাগবে না। লাগলে লাগবে শত শত হিন্দুর গায়ে। ইয়া, জিন্না বলছেন তাঁর হাতেও একটা পিছল আছে। তিনি আর কনস্টিটিউশনাল উপায়ে আন্দোলন করবেন না। গৃহযুদ্ধ বাধাবেন। গৃহযুদ্ধ থামাবার জন্তে তাঁকে আপসে কতক জায়গা ছেড়ে দিতেই হবে। আর নয়তো লিঙ্গনের মতো এস্পার কি ওস্পার না হওয়া পর্যন্ত ঝড়তে হবে। সে দায়িত্ব কংগ্রেস নেবে না। সে সত্যগ্রহই শিখেছে, ইত্যগ্রহ শেখেনি। চরিত্রও হারাবে, যুদ্ধেও হারাতে পারে। ওদেশ ছিল স্বাধীন দেশ, এদেশ তা নয়?”

দিনকয়েক পর খাদি কর্মী বক্সিম কর দেখা করতে আসেন। বলেন, “সৌম্যদার বার্তাবহ হয়ে এসেছি। গৃহপ্রবেশ উপলক্ষে ওদের ওখানে নিমন্ত্রণ ছিল। ও দফায় দফায় নিমন্ত্রণ করছে ওর পুরনো সঙ্গী কর্মীদের। উদ্দেশ্য বৌদির সঙ্গে আলাপ পরিচয় করিয়ে দেওয়া। উনি তো গান্ধীমার্গে নবীন আগন্তুক। আমরা কারা, কী আমাদের লাধনা, কেন সত্যগ্রহ, গঠনকর্মের সঙ্গে তার কী সম্পর্ক ইত্যাদি নিয়ে বৌদিকে খুব কম সময়ের মধ্যে তৈরি করে নিতে হচ্ছে। তাঁকে বোঝাতে হচ্ছে বীরত্বের আরো একরকম অর্থ আছে। অত্যাচার যে প্রতিরোধ করে, অথচ করতে গিয়ে নিজে অত্যাচার করে না, সেও একজন বীর পুরুষ বা বীরান্না। গত পঁচিশ বছরে আমি বহু দৃষ্টান্ত দেখেছি। এক এক করে বিবরণ দিই। বৌদি আগ্রহের সঙ্গে শোনেন। তার পর

সৌম্যদার সঙ্গেও তাত্ত্বিক আলোচনা চলে। আমরাও একজাতের ডায়ালেকটিকসে বিশ্বাস করি। ডায়ালেকটিকাল ননভায়োলেন্স। এইসব নিয়ে দিন সাতেক কেটে যায়। বাঃ! চিঠিখানাই দিতে ভুলে গেছি। এই নিন।”

মানস চিঠিখানা খুলে পড়ে। সৌম্যদা লিখেছে, “আমাদের খবর বন্ধিমের মুখে শুনবে। আমরা নতুন বাণীর এসে নতুন করে জীবন আরম্ভ করেছি। কিন্তু সামনে আসছে এক প্রাণান্তকর পরীক্ষা। এত বড়ো চ্যালেঞ্জ আমাদের জীবনে আর আসেনি। জিন্না সাহেবের ডাইরেক্ট অ্যাকশনের কথা বলছি। উনি নাকি নিজেই বলেছেন যে এটা কেবল ইংরেজের বিরুদ্ধে নয়, কংগ্রেসেরও বিরুদ্ধে। এ তো বড়ো মারাত্মক কথা! কংগ্রেস কি জিন্না সাহেবকে আশা দিয়ে আশাভঙ্গ করেছে? কংগ্রেস তো চায়নি যে বড়লাটের শাসন পরিষদে মুসলিম লীগের সদস্য সংখ্যা কমুক। তাদের সংখ্যা কমেওনি। নিজের সদস্যদের একজন হিন্দু না হয়ে মুসলিম হোন এটাই তার অনুরোধ। বড়লাট তার অনুরোধ রক্ষা করেননি বলে কংগ্রেস তাঁর আমন্ত্রণ প্রত্যাখ্যান করেছিল। কংগ্রেস কী করে জানবে যে বড়লাট মুসলিম লীগকে গভর্নমেন্ট গঠনের ভার না দিয়ে কেবারটেকার গভর্নমেন্ট গঠন করেন? এটাই বা কী করে সে জানবে যে তার একজন মুসলিম কর্মীকে নিজের ভাগের একটি আসন দেবার অধিকার তার আছে এটা বড়লাট তাঁর পরবর্তী প্রস্তাবে মেনে নেবেন? এর ফলে বড়লাটের শাসন পরিষদে মুসলমান সংখ্যাটা তো একটি বেড়ে গেল। হিন্দু সংখ্যা তো একটি কমে গেল। হিন্দু মুসলমানের সংখ্যা সমান সমান হলো। অগ্ন্যারটা হলো কোথায় ও কার প্রতি? মুসলমানরা সম্প্রদায়ই হোক আর নেশনই হোক তাদের প্রতি বড়লাট বা কংগ্রেস কেউ কোনো অগ্ন্যায় করেননি। কিন্তু মুসলিম লীগ যদি দ্বিমুখী ডাইরেক্ট অ্যাকশন চালায় তবে ইংরেজ ও হিন্দু উভয়েরই বিপদ। যদি না অহিংসা পালিত হয়। এঁরা যদি একই মূদ্রায় শোধ দেন তবে দুই পক্ষেই অগ্ন্যায় হবে। আমরা পড়ব মুশকিলে। সত্যগ্রহ বলতে এতদিন আমরা বুঝেছি একপক্ষে অগ্ন্যায় ও অপর পক্ষে গ্নায়। আমরা ন্যায়ের পক্ষ নিয়েছি। এবার সম্ভবত হবে দুই পক্ষেই অগ্ন্যায়। দুই পক্ষেই বহু নিরীহ মানুষ হতাহত হবে। আমরা তবে কোন্ পক্ষে দাঁড়াব? কোনো পক্ষেই না। আমাদের কর্তব্য হবে মাঝখানে দাঁড়িয়ে উভয়কে থামানো ও থামাতে গিয়ে উভয়ের হাতের মার থাওয়া। হয়তো মার খেয়ে

মরা। বলা বাহুল্য আমরা আর ক'জন? এইটুকুতে কি গৃহযুদ্ধ থামবে? যেখানে ইংরেজরাও স্বীকার করছে যে কংগ্রেসের অধিকার আছে সেখানে ছায় তো কংগ্রেসেরই পক্ষে। কিন্তু হিংসার ছুঁই বুতে জড়িয়ে পড়লে অন্যায় দুই পক্ষেই হবে। হিংসার উত্তর অহিংসভাবেই দিতে হবে। সহিংসভাবে নয়। এ এক প্রাপ্যন্তকর পরীক্ষা। আমরা এ পরীক্ষায় সফল না হলে গান্ধীজীর শিক্ষা ব্যর্থ হবে। তিনি কি আর বাঁচতে চাইবেন?”

চিঠিখানা যুথিকার দিকে বাড়িয়ে দিয়ে মানস বন্ধিমবাবুর সঙ্গে আলাপ করে। জিজ্ঞাসা করে জুলিকে তিনি কেমন দেখলেন।

“ঝি চাকর রাখেননি। নিজেই যাবতীয় গৃহকর্ম করেন। ঘর ঝাঁট দেওয়া, মেজে নিকোনো, বাসন মাজা, কাপড় কাচা, তরকারি কোটা, রান্না-বান্না করা সমস্তই তাঁর একার কাজ। আশ্রমের কর্মশালায় গিয়ে সূতো কাটেন, কাপড় বোনের, লঙ্গরখানায় গিয়ে পরিবেশন করেন, কারো অসুখ করলে সেবা করেন। আশ্রমে একটা লঙ্গরখানা আছে। নিখরচায় কর্মীরা সবাই দুপুরবেলা খেতে পায়। ডাল, ভাত, একটা ছক্কা, তার সঙ্গে চাটনি ও আলু। পুরুষেরা সবাই এক পঙ্ক্তিতে। কী হিন্দু, কী মুসলমান। কী ব্রাহ্মণ, কী হরিজন। তেমনি মেয়েদের সবাই এক সারিতে। একটু তফাতে। পরিবেশনটা মেয়েরাই করে। রান্নাটা পুরুষেরা। সবাই স্বেচ্ছাসেবক ও সেবিকা। কামার আছে, কুমোর আছে, তাঁতী আছে, কাটুনী আছে, তেলী আছে। আর আছে ছুতোর মিস্ত্রি। তবে সোম্যাদার সহকর্মীরা অনেকে সরে পড়েছেন। তাঁদের কেউ বা এখন কমিউনিষ্ট, কেউ বা নেতাজী ভক্ত, কেউ বা সাবারকর শিষ্য। কয়েকজন এখনো টিকে আছেন শত প্রলোভন ও নির্ধাতন সত্ত্বেও। আশ্রমের কাজকর্ম সঙ্কুচিত হয়েছে। কয়েকটা বিভাগ উঠে গেছে।” বন্ধিমবাবু হুঃখ করেন।

যুথিকা জানতে চায়, “জুলি কি রাজনীতি ছেড়ে দিয়েছে?”

“না, ছেড়ে দেননি। কিন্তু ঔর স্বামীর সঙ্গে পা মিলিয়ে নিচ্ছেন। হিংসা আর অহিংসা এদের মধ্যে মাত্র একটি অক্ষরের ব্যবধান। তবু তা গভীর ও দুত্তর। উনি আন্তরিকভাবে চেষ্টা করছেন স্বামীর রাজনীতিকে নিজের রাজনীতি করতে। তবে ঔর নিজেরও তো একটা সাধনা আছে। উনি চান একই পুরুষের বো হতে, বোন হতে, মা হতে, বাস্তুবী হতে, প্রেমিকা হতে, সঙ্গিনী হতে। অথচ বিপ্লবের ভূত ঔর বাড় থেকে নামছে না। উনি চান

ওঁর বন্ধু বাবলীর সঙ্গে পাল্লা দিয়ে জনগণের সঙ্গে একাত্ম হতে, চাষানীর সঙ্গে চাষানী, মজুরনীর সঙ্গে মজুরনী। অমনি করে শ্রেণীচ্যুত হয়ে বিপ্লব ঘটাতে। ওঁর মাথায় কি একটু ছিট আছে?” বক্ষিমবাবু হাসতে হাসতে বলেন।

“শুধু ওর মাথায় কেন? ওর পতিদেবতার মাথায়ও।” যুথিকা খিল খিল করে হাসে। “উনি ভেবেছেন শহীদিয়ানা দিয়ে উনি হিন্দু মুসলিম সমস্তার সমাধান করবেন। এদেশে চল্লিশ কোটি ভারতীয়, আর ইংরেজ মাত্র চুয়াল্লিশ হাজার। চল্লিশ কোটি ইচ্ছা করলে চুয়াল্লিশ হাজারকে ফুঁ দিয়ে উড়িয়ে দিতে পারে। ইঙ্গ-ভারতীয় সমস্যা তো একটা সমস্যাই নয়। অপর পক্ষে হিন্দু মুসলিম সমস্যা একটা অমীমাংসিত সমস্যা। আমরা ওদের তাড়িয়ে দিতেও পারিনে, আপনাদের করতেও পারিনে, রাজা করতেও পারিনে, প্রজা করতেও পারিনে। ওরাও আমাদের তাড়াতেও পারে না, কনভার্ট করতেও পারে না, রাজা করতেও পারে না, প্রজা করতেও পারে না। সেই যে আরব আর তার উট তারই মতো ব্যাপার। আরব ছিল তার তাঁবুতে। কাঁপতে কাঁপতে উট এসে আশ্রয় চায়। প্রথমে ঢোকায় মুখ, তার পরে গলা, তার পরে সামনের দুটো পা, তার পরে ধড়, তার পরে পেছনের দুটো পা। আরব হি-হি করে কাঁপতে কাঁপতে তাঁবু ছেড়ে আর কোথাও আশ্রয় খুঁজে বেড়ায়। তেমনি, এদেরও কি দাবীর অন্ত আছে? এক এক করে কত কাঁনা পেয়েছে, এবার চায় পাকিস্তান। সেইখানেই কি ইতি? না, পরে একদিন বলবে, ‘হিন্দুস্থান হামারা।’ ভাগো হিঁয়াসে। ইংরেজদের মতো আমরাও তাড়া খেয়ে পালাব। কিন্তু কোথায়? দেওয়ালে পিঠ রেখে লড়তেই হবে একদিন না একদিন। সেদিন ক’জন অহিংস থাকতে পারবে, শহীদ হতে পারবে?”

বক্ষিমবাবু নিরুত্তর। চা শেষ করে বিদায় নেন।

জিন্নার সঙ্গে জবাবহরলালের সাক্ষাৎ নিষ্ফল হয়। এখন যোলই আগস্টের প্রতীক্ষা। তার দু’দিন আগে দেবাদিদেব গুহ এসে গম্ভীর মুখে কিছুক্ষণ বসেন। মুখ ফুটে একটি কথাও বলেন না। শুধু একখানা খবরের কাগজ পড়তে দেন। তেরোই তারিখের ‘স্টার অফ ইণ্ডিয়া’। খাজা নাজিমউদ্দীনের দৈনিকপত্র। তাতে ছিল ‘ডাইরেক্ট অ্যাকশন ডে’ কেমন ভাবে পালন করতে হবে তার নির্দেশ। শেষের দিকে কলকাতা জেলা মুসলিম লীগ সেক্রেটারির আবেদন :

“I appeal to the Musalmans of Calcutta, Howrah, Hooghly, Matiabura and 24-Parganas to rise to the occasion and make the rally a unique success. We are in midst of the rainy season and the month of Ramazan fasting. But this is a month of real Jihad of God’s grace and blessings, spiritual armament, and the moral and physical purge of the nation. It is a supreme occasion of our trial. Let Muslims brave the rains and all difficulties and make the Direct Action Day meeting a historic mass mobilisation of the Millat.

Muslims must remember that it was in Ramazan that the Quran was revealed. It was in the Ramazan that the Battle of Badr, the first open conflict between Islam and Heathenism was fought and won by 313 Muslims and again it was in Ramazan that 10,000 under the Holy Prophet conquered Mecca and established the kingdom of Heaven and the commonwealth of Islam in Arabia. The Muslim League is fortunate that it is starting the action in this holy month.”

মানসও গম্ভীর মুখে কাগজখানা যুথিকার হাতে বাড়িয়ে দেয়। একটি কথাও বলে না। যুথিকার মুখও গম্ভীর। চারদিক নিঃশব্দ।

“তবে আসি।” গুহু ওঠেন। কাগজখানা ভাঁজ করে পকেটে ভরেন। অনেক সাধাসাধির পর এক পেয়ালা কফি খেয়ে যান।

মানস বলে যুথিকাকে, “এর শুরু কোথায় ও কবে তা তো জানা গেল। সারা কোথায় ও কবে তা একমাত্র আল্লাহ্‌ই জানেন। জিহাদও জানেন না। লক্ষ লক্ষ মানুষ মরবে, কিন্তু মীমাংসা এর ফলে হবে না। মীমাংসার পথ এ নয়।”

“মীমাংসা কি ওরা সত্যি সত্যি চায় যে মীমাংসা হবে? ওরা চায় বল-পরীক্ষা। বেশ তাই হোক। হিন্দুরা এ চ্যালেঞ্জ গ্রহণ করবে।” যুথিকা বলে দৃষ্ট কণ্ঠে।

## ॥ বাইশ ॥

মাস মোবিলাইজেশন ? বদরের লড়াই ? মক্তার যুদ্ধ ? এ কি সেই ধরনের যুদ্ধের উদ্বোধন ? কার সঙ্গে কার যুদ্ধ ? হীদেনের সঙ্গে মুসলিমের ! হীদেন কারা ? ইংরেজরা নয় নিশ্চয়। এমনিতেই তারা মুষ্টিমেয়। তাদের বিরুদ্ধে মাস মোবিলাইজেশন যেন মশা মারতে কামান দাগা। তা ছাড়া তাদের হাতে যেসব মারাত্মক অস্ত্র আছে তা দিয়ে একশোটা জালিয়ানওয়ালা বাগ হত্যাকাণ্ড ঘটানো যায়। মিঞা সাহেবরা পলাশীর পুনরাবৃত্তি চাইবেন না। তা হলে এটা হিন্দুদেরই উপর আক্রমণের তোড়জোড়।

তাই যদি হয়ে থাকে বাংলার গভর্নর কী মনে করে ঘোলই আগস্ট পাবলিক হলিডে ঘোষণা করলেন ? এটা হিন্দু, মুসলমান, খ্রীস্টানদের কারো পক্ষে নয়। রাজার জন্মদিন বা ব্যাক্সের হিসাবের দিনও নয়। মুসলিম লীগের ডাইরেক্ট অ্যাকশনের এমন কী গুরুত্ব ? ওরা হয়তাল করতে চায় তো করুক। আর-কেউ হয়তাল করবে কেন ? কিন্তু পাবলিক হলিডে হলে সরকারী আপিস আদালতও বন্ধ থাকবে, সেটাও প্রকারান্তরে সর্বজনীন হয়তাল। মানসের মতো অফিসারদেরও। সেদিনকার জন্তো যেসব মামলার শুনানি নির্দিষ্ট রয়েছে সেসব মূলতুবি রাখতে হবে। আরো একটা দিন খুঁজে বার করতে হবে। দায়রার মামলা দিনের পর দিন লাগাতর ভাবে চলে। শুক্রবারের বকেয়া মামলা শনিবার শুনতে হবে, শনিবারের বকেয়া মামলা সোমবার শুনতে হবে। সোমবার থেকে তো অল্প এক মামলা। একটা শেষ না হলে তো আরেকটা শুরু হতে পারে না। একটা দিন হঠাৎ বন্ধ হলে কত লোকের সময় নষ্ট, অর্থ নষ্ট ! লাক্ষী, আসামী, জুরি। আসামী যদি নির্দোষ হয়ে থাকে তবে কেনই বা বেচারী জেলে আরেকদিন আটক থাকবে ? জুররদের কি নিজেদের কাজকর্ম নেই ? আর লাক্ষীরা কোথায় রাত কাটাবে ? এ ছাড়া উকীলদেরও অসুবিধে আছে।

গভর্নরকে যথেষ্ট ক্ষমতা দেওয়া হয়েছে। তিনি মন্ত্রীদের প্রত্যেকটি পরামর্শ গ্রহণ করতে বাধ্য নন। তিনি পাবলিক ইন্টারেস্ট দেখবেন। পাবলিক

বলতে শুধু মুসলিম পাবলিক বোঝায় না। এটা লীগ মন্ত্রীমণ্ডল। এঁদের ম্যাণ্ডেট পাকিস্তান হাসিল করা। আর পাকিস্তান মুসলিম লীগ ভিন্ন আর কারো স্বার্থে নয়। অন্তত আর কেউ সেই দাবী নিয়ে নির্বাচনে নামে নি। গভর্নর হয়তো ইউরোপীয়দের নিরাপত্তার খাতিরে তাঁদেরই পরামর্শে পাবলিক হলিডে ঘোষণা করেছেন। এতে তাঁদের মুখরক্ষা হয়। নয়তো আগিসে গেলে তাঁরাও মার খেতেন, দোকান খোলা রাখলে তাঁদেরও দোকান লুট হতো। হিন্দু নেতারা মির্জাপুর পার্কে সভা করে জানিয়ে রেখেছেন যে হিন্দুরা নিজেদের ক্ষতি করে দোকানপাট বন্ধ রাখতে বাধ্য নয়। হরতাল যারা করতে চায় তারা করুক, কিন্তু যারা নারাজ তাদের উপর যেন জোর জুলুম না হয়। হলে নেতারা বাধ্য দেবেন। আইন তাঁদেরই পক্ষে। পাবলিক হলিডেতে প্রাইভেট দোকানপাট খোলা থাকা তো বেআইনী নয়। অত্যাচার পাবলিক হলিডেতে খোলা রাখাই রেওয়াজ। সরকারী অফিসারদের উপরে সরকার নির্দেশ জারি করতে পারেন, বেসরকারী সাধারণের উপরে নয়। তারা কি তাজা মাছ কিনে খেতে পারবে না ?

মানসের খুন আসে না। সে অনেক রাত অবধি তার কুঠির দোতালার লম্বা বারান্দায় নিঃশব্দে পায়চারি করে। মুসলিম লীগ তা হলে এমনি করে ওয়ার অভ্যাসে দাঁকসেনন শুরু করে দিচ্ছে। পাল'ামেন্টারি ইলেকশন যথেষ্ট হলো না। কনস্টিটিউশনাল মীল যথেষ্ট হলো না। জিন্না সাহেব বলেছেন তাঁরও একটা পিস্তল আছে। এবার তিনি পিস্তল হাতে নিচ্ছেন। ষোলই আগস্ট তাঁর সেনাবাহিনীর কুচকাওয়াজের দিন। বলা যেতে পারে মেটা তাদের D-Day. যেমন দ্বিতীয় মহাযুদ্ধের সময় ইঙ্গ-মার্কিন-ফরাসী বাহিনীর নর্মাণ্ডির উপকূলে অবতরণের জন্তে নির্দিষ্ট দিবস।

দেশের অবস্থা এখন অগ্নিগর্ভ। একটি দেশলাইয়ের কাঠিও একটা দাবানল সৃষ্টি করতে পারে। জিন্না এ করছেন কী! গোটা দেশটাই যদি পুড়ে ছাই হয়ে যায় তাঁর সাধের পাকিস্তান কি আস্ত থাকবে? তিনি কি জানেন না যে শিখ বলেও একটি সম্প্রদায় আছে, তারও ধারণা সেও একটি নেশন, তারও একটা হোমল্যান্ড চাই। প্রত্যেক সম্প্রদায় যদি স্বতন্ত্র হোমল্যান্ড চায় তো দেশে ছ'ভাগ কেন বহু ভাগ হবে। আর নেশন কি কেবল ধর্ম অহুসারে হয়, ভাষা অহুসারে হয় না? মতবাদ অহুসারে হয় না? ইউরোপের ইতিহাস কী বলে? ভারত যদি একবার ভাঙতে আরম্ভ করে তো পাকিস্তানও



পরে একদিন ভাঙতে পারে। তার আগে বাংলাদেশ যে অবিভক্ত থাকবে তা নয়। পাঞ্জাবও না। এসব যদি হবার থাকে তো কনস্টিটিয়েন্ট অ্যাসেম্বলীতে বসেই হোক। কেন ইংরেজদের সহায়তায় হতে চাওয়া? তাদের রোয়েদাদ যদি সবাই মেনে না নেয়? তবে কি গৃহযুদ্ধের ভিতর দিয়েই যেতে হবে? বেশ, তাই মই। কিন্তু যোলই আগস্ট থেকেই তা শুরু হবে কেন? তবে কি এটা ইন্টারিম গভর্নমেন্ট ঠেকিয়ে রাখার জন্তে হচ্ছে? অমন করে কি ব্রিটিশ গভর্নমেন্টকে নিবৃত্ত করা যায়? কিংবা কংগ্রেস হাই কমান্ডকে? ওয়েভেল বার বার ওয়েভার করছেন, কিন্তু তিনিও উপলব্ধি করেছেন যে কেয়ারটেকার গভর্নমেন্ট দিয়ে আর চলছে না। বড়ো রকম রদবদল চাই। মেজরিটিকেই তার উদ্যোগ নিতে হবে। মেজরিটি মাইনরিটিকে ডেকে আনবে। যেমন অত্রাহ হয়ে থাকে।

কংগ্রেস ও লীগের বিবাদটাই হিন্দু মুসলিম বিবাদে পরিণত হতে যাচ্ছে। কিন্তু বিবাদটা আসলে কংগ্রেস-মুসলিমের সঙ্গে লীগ-মুসলিমের বিবাদ। হতে পারে কংগ্রেস-মুসলিমরা সংখ্যায় কম, লীগ-মুসলিমরাই সংখ্যায় বেশী। তা বলে কি তাদের পক্ষে একবিন্দুও সত্য নেই? এমন কথা কি বলতে পারা যায় যে উত্তর-পশ্চিম সীমান্ত প্রদেশের পাঠানদের ১৯৩০ সালের সত্যাগ্রহ মিথ্যা, ১৯৪১ সালের সত্যাগ্রহ মিথ্যা? ওরা গত নির্বাচনেও ভোটে জিতে মন্ত্রীমণ্ডল গঠন করেছে। তার মানে ওরা ভারতেই থাকতে চায়, পাকিস্তানে থাকতে চায় না। কংগ্রেস তার মনোনীত একজন মুসলমানকে নিজের ভাগের একটি আসন দিতে বন্ধপরিকর। বড়লাট যদি কংগ্রেসের সঙ্গে মিটমাট আকাজ্জা করেন তো তাঁকে এ সত্য স্বীকার করতেই হবে। এ ছাড়া তিনি আর কী করতে পারতেন? কংগ্রেস লীগের বিবাদের মূলে রয়েছে আরো এক কারণ। সেটা আরো ফাণ্ডামেন্টাল। লীগ কংগ্রেসের সঙ্গে সমান আসন, সমানসংখ্যক পোর্টফোলিও, সমান গুরুত্বপূর্ণ পোর্টফোলিও, সমান মর্যাদা দাবী করে। যেন সে আইন সভায় মাইনরিটি নয়, সারা ভারতেও মাইনরিটি নয়। বড়লাট ওয়েভার করতে করতে শেষকালে এ দাবীটাও মেনে নিতে নারাজ হয়েছেন। নয়তো কংগ্রেসের সঙ্গে মিটমাটের আশা ছাড়তে হতো। লীগের শেষ তুরুপের তাস পাকিস্তান, বিকল্পে গ্রুপিং। বাংলাদেশের সঙ্গে আসামও গোষ্ঠীভুক্ত হবে। পাঞ্জাবের সঙ্গে উত্তর-পশ্চিম সীমান্ত প্রদেশও গোষ্ঠীভুক্ত হবে। কে না জানে যে অসমীয়াতে বাঙালীতে আদায় কাঁচকলায়? তেমনি,

পাঠানে ও পাঞ্জাবীতে ভাষা নিয়ে, রেস নিয়ে রেঘারেবি। প্রাদেশিক সরকার বন্ধনীভুক্ত হতে অনিচ্ছুক, তবু অনিচ্ছুকের উপর গ্রুপিং চাপিয়ে দিতে হবে। এই প্রশ্নে বড়লাট পুরোপুরি কংগ্রেসকে সমর্থন করতে পারছেন না, বিবাদটা ফেডারল কোর্টের ব্যাখ্যার জন্তে বুলে থাকছে। জিন্না সাহেবের আশঙ্কা—বড়লাটেরও আশঙ্কা—ক্যাবিনেট মিশনের প্রস্তাবের ভাষায় গলদ আছে। কংগ্রেস তার স্বযোগ পাবে। কিন্তু কোর্টের বিচারের উপর কথা বলা চলে না। বড়লাট অপেক্ষা করবেন না, গভর্নমেন্ট ঢেলে সাজবেন। জিন্না অপেক্ষা করবেন না, কংগ্রেস গদ্যোক্তে বসার আগেই তিনি যুদ্ধে নামবেন। যুদ্ধটা ব্রিটিশ রাজত্বের বিরুদ্ধেও বটে, কংগ্রেস মন্ত্রিস্বের বিরুদ্ধেও বটে। খেতাবদেবের গায়ে হাত দিতে সাহসে কুলোবে না, হিন্দুদের মাথায়ই বাড়ি পড়বে, হিন্দুদের পিঠেই ছোরা বসবে।

মনটা খারাপ হয়ে যায়, উষ্মেগে ভরে যায়। এই কি ভারতের স্বাধীনতার মাণ্ডল ? এই সাম্প্রদায়িক সংঘর্ষ ? জাতীয়তাবাদের কতটুকু এই অগ্নিশরীক্ষায় অক্ষত থাকবে ? এটা কি কোনো মতেই এড়ানো যায় না ? থাকুক না ইংবেজরা আবার কয়েক বছর। কিন্তু তাতে কি সমাধান স্তম্ভ হবে ? না সাম্প্রদায়িকতা আরো জোরদার হবে ? সময় কার পক্ষে ? কংগ্রেস-মুসলিমদের পক্ষে না লীগ-মুসলিমদের পক্ষে ? গত দশ বছর ধরে দেখা যাচ্ছে কংগ্রেস-মুসলিমদের জোর কমছে, লীগ-মুসলিমদের জোর বাড়ছে। কংগ্রেসে মুসলিম সদস্যসংখ্যা বাড়ছে না, কমছে। দশ বছর পরে কংগ্রেস সত্যি সত্যি মুসলিমবর্জিত দল হবে। হু'জন কি তিনজনই ততদিন কংগ্রেসে থাকবেন। যদি ততদিন বাঁচেন। এটা এক নিদারুণ সত্য যে ভারতীয় জাতীয়তাবাদ মুসলমানদের কাছে ততখানি আকর্ষণীয় না। যতখানি পাকিস্তানী জাতীয়তাবাদ। সাম্প্রদায়িকতাবাদকেই ওরা জাতীয়তাবাদ বলে ভ্রম করছে। এ ভ্রমটাতে মেজরিটি বনবার প্রত্যাশা। আজকাল সব রাষ্ট্রেই মেজরিটিই তো ক্ষমতাসীন। ডিকটেটরশাসিত রাষ্ট্র পর্যন্ত মেজরিটির মুখ চেয়ে কাজ করে। আমাদের মুশকিল এইখানে যে লোকে রাজনীতিক্ষেত্রেও ধর্মকে টেনে আনতে অভ্যস্ত। মুসলমান বলে বা শিখ বলে পরিচয় না দিলে নির্বাচনে-নামতে দেওয়া হয় না, নির্বাচনকেজেই ভেদবুদ্ধি। চাকরির ক্ষেত্রেও তাই। সেকুলার স্টেট আমাদের কল্পনাতীত। সে রকম একটা রাষ্ট্রের কনস্টিটিউশন রচনা করতে দিচ্ছে কে ? ধর্ম সংখ্যালঘুরা একধার থেকে বাধা দেবে।

জিন্না এখন থেকেই কনস্টিটিয়েন্ট অ্যাসেম্বলী বয়কট করছেন। কেবল ইন্টারিম গভর্নমেন্ট নয়। দশ বছর সময় দিলে কি তাঁর সেকুলার স্টেটে রুচি হবে? হবে না, কারণ ধর্মের উপরেই দাঁড়িয়ে আছে মুসলিম লীগের অস্তিত্ব। তাঁর দলের পক্ষে সেটা একটা জীবন মরণ প্রশ্ন, গান্ধী নেহরু আজাদের দলের পক্ষে নয়। মুসলিম লীগ যেমরণ কামড় দেবে এটাই ধ্রুব। কালহরণ এক্ষেত্রে নিষ্ফল।

জিন্না সাহেবের নির্দেশে মুসলিম লীগ যে আগুন জ্বালাতে যাচ্ছে সে আগুন নেবানোর সামর্থ্য বা ইচ্ছা ইংরেজদের নেই। তাঁরা দমন নাতি অবলম্বন না করে তোষণ নাতিই অবলম্বন করবেন। তা হলে দমন নাতি অবলম্বন করবে কে? আটটি প্রদেশের কংগ্রেস গভর্নমেন্ট। পাঞ্জাবের ইউনিয়নিস্ট গভর্নমেন্ট। মুসলিম জনতা যদি বেপরোয়া হয়ে খুন জখম ঘর জ্বালানো ইত্যাদি অপরাধ করে তবে তাকে শাস্ত দেওয়া খুব সহজ ব্যাপার হবে না। অপোজিশনে থাকলে মুসলিম লীগ এতে উস্কানি দেবেই। তার হারাবার কী আছে? সে যদি জানত যে সেও একদিন গভর্নমেন্ট গঠন করবে বা কোয়ালিশনের পার্টনার হবে তা হলে সে সংযত হতো ও সংযম শেখাত। কংগ্রেস থাকতে তার কি সে রকম কোনো আশা ভরসা আছে? কংগ্রেসও এটা বোঝে। সেও এটা এড়াবার জন্যে পদত্যাগ করে অপোজিশনে যেতে তৈরি। কিন্তু ইংরেজ থাকলে তো? কংগ্রেসের উৎপত্তি ইংরেজের অপোজিশন হিসাবে। সে চিরজ্বলন্ত হয়ে মুসলিম লীগের অপোজিশন হলে লক্ষ্যভ্রষ্ট হবে। লক্ষ্য তার ভারতবর্ষের স্বরাজ। আর মুসলিম লীগের লক্ষ্য হয় কংগ্রেসের সঙ্গে কোয়ালিশন, নয় যেখানে সম্ভব সেখানে স্বতন্ত্র গভর্নমেন্ট গঠন। এক এক করে পাঁচটি কি ছ'টি প্রদেশে। পরে ছ'টি স্বতন্ত্র গ্রুপে। অবশেষে একটি স্বতন্ত্র রাষ্ট্রে। এক কথায়, মুসলিম লীগের লক্ষ্য হয় পার্টনারশিপ, নয় পার্টিশন। পার্টনারশিপ ইংরেজ থাকতে হয়নি, ইংরেজ গেলেও যে হবে তেমন অঙ্গীকার নেই, যেমন দেখা যাচ্ছে সে চিরকাল অপোজিশনেই থাকবে, কেন্দ্রে তো বটেই, অধিকাংশ প্রদেশে। তা হলে পার্টিশনই একমাত্র গতি। আর সেটা ইংরেজ থাকতেই সমাধা হোক।

এর প্রতিকার কি পার্টিশন? বাংলা ভাগ? পাঞ্জাব ভাগ? আসাম ভাগ? মানস তা মনে করে না। বঙ্গভঙ্গের বিরুদ্ধে আন্দোলনে নেমে যারা প্রাণ দিয়েছে, ধন দিয়েছে, জীবিকা দিয়েছে, জেলে গেছে, আন্দামানে

গেছে তাদের প্রতি বিশ্বাসঘাতকতা হবে, তাদের উত্তরপুরুষ যদি আবার সেই বঙ্গভঙ্গকেই সাদরে বরণ করে। কিন্তু মুসলমানদের মনোভাব আঁচ করে সে গভীর বেদনা বোধ করছে। এরা কি পাকিস্তানী হতে চায়, না বাঙালী থাকতে চায়? এরা কি বুঝতে পারছে না যে পাকিস্তান আর বাংলাদেশ সমার্থক নয়? বাংলাদেশ বাঙালীমাত্রেয় দেশ। একে কেবল মুসলমানের দেশ করতে গেলে বিহার থেকে, যুক্তপ্রদেশ থেকে, মধ্যপ্রদেশ থেকে, ওড়িশা থেকে মুসলমান এসে বাঙালী হিন্দুকে ভিটেছাড়া করবে। মানস ভাবতেই পারেনি যে পাকিস্তানের পক্ষে বাংলাদেশে এত বেশী ভোট পড়বে ও তার ফলে মুসলিম লীগ একটি গভর্নমেন্ট গঠন করবে। সঙ্গে একজন তফশীলি হিন্দু। পেছনে কয়েকজন ইউরোপীয় বণিক। বাঙালী হিন্দুরা এমনিতেই তাদের প্রাপ্য ক্ষমতার ভাগ থেকে বঞ্চিত, তার উপর তাদের পায়ের তলার মাটি পর্যন্ত তাদের দখলে না থাকার আশঙ্কা। এতদিন ইংরেজই ছিল তাদের একমাত্র বৈরী, এখন দেখছে ব্রিটিশ রাজ গেলে মুসলিম রাজ হবে। ইসলামী স্বার্থ ছাড়া সে আর কিছু বোঝে না। বাংলাদেশ তার কাছে আর একটা আরব কি ইরান কি আফগানিস্তান।

দুই নেশন তত্ত্ব অসত্য হলেও দুই রাষ্ট্র তত্ত্ব অসত্য নয়। অবিভক্ত ভারতে মুসলিম লীগ চিরকাল অপোজিশনে থাকতে পারে না, তার পক্ষে যদি অধিকাংশ মুসলমান ভোট দিয়ে থাকে তবে অধিকাংশ মুসলমানও চিরকাল রাজনৈতিক ক্ষমতা থেকে বঞ্চিত হয়ে থাকতে পারে না। এরূপ স্থলে কোয়ালিশনের ব্যবস্থা থাকা আবশ্যিক। তা যদি একেজো হয় তবে পার্টিশনের ব্যবস্থাও থাকা যুক্তিযুক্ত। মানস এইপর্যন্ত লীগপন্থীদের সঙ্গে একমত হতে পারে, কিন্তু উদ্দেশ্যসিদ্ধির জন্তে যে উপায় তারা অবলম্বন করতে যাচ্ছে তা কখনো সহ করা যায় না। সাধারণ মুসলমানের সঙ্গে সাধারণ হিন্দুর সম্পর্ক অহিনকূল সম্পর্ক নয়। বাগড়া মাঝে মাঝে বেধেছে, বাগড়া মিটেও গেছে, তারপর ওরা একসঙ্গে বাস করেছে। একসঙ্গে চাষ করেছে। একসঙ্গে মাছ ধরেছে। একসঙ্গে শিল্পদ্রব্য নির্মাণ করেছে। এখন এমন কী হয়েছে যে ওরা বরাবরের মতো পরস্পরকে ছেড়ে ভিন্ন রাষ্ট্রে চলে যাবে। মুসলিম ও হীদেন এই ভেদবুদ্ধি কেন? হীদেনকে মুসলিম করাই ছিল পেকালের নীতি। সেটা কি একালেও অমূল্য হবে?

আর ওই যে মাস মোবিলাইজেশন ওর পারগাম তো মধ্যযুগের ক্রান্তির

লেন্ট বার্থোলোমিউজ ডে। মুসলিম লীগের ডাইরেক্ট অ্যাকশন ডে মানসকে আতঙ্কিত করে। বাংলাদেশের হিন্দুরাও কি ক্রাসের প্রটেস্টান্টদের মতো বাড়ে মূলে সাবাড় হবে? মাইনরিটি বলে যদি কারো অস্তিত্ব না থাকে তবে মাইনরিটি সমস্যা বলেও কোনো সমস্যাই থাকে না। আরবে ইরানে তুরস্কেও নেই। তুরস্ক থেকে আর্মেনিয়ানদের মূলোচ্ছেদ করা হয়েছে। গ্রীকদের খেদিয়ে দেওয়া হয়েছে। এবার হবে পাকিস্তান থেকে, যদি ডাইরেক্ট অ্যাকশন সফল হয়।

পরের দিন পনেরোয় আগস্ট। মানস কোর্টে গিয়ে কাজকর্মের মধ্যে ডুবে থাকে। ফাঁকতালে একদিন ছুটি পাচ্ছে বলে অনেকেই উৎফুল্ল। যারা রোজা রাখছে তাদের তো কথাই নেই। কেউ বিশ্বাস করে না যে ষোলই আগস্ট অবটন কিছু ঘটবে। ঘটলে কলকাতায় ঘটবে, এ শহরে নয়। শহরে হিন্দুর সংখ্যাই বেশী। মুসলমানরাও শান্তিপ্রিয়। গ্রামে অবশ্য মুসলমানের সংখ্যাই বেশী, কিন্তু খুনোখুনি হরদম হলেও সম্প্রদায়ে সম্প্রদায়ে নয়। তবে ইদানীং একটি গঞ্জে হিন্দু ব্যবসায়ীদের দোকানপাট যারা লুট করে পুড়িয়ে দিয়েছে তারা মুসলমান। কারণটা বোধহয় অর্থনৈতিক। পূর্ববঙ্গের মুসলমানরা যদি হিন্দুদের বিরুদ্ধে উত্তেজিত হয় তবে তার প্রধান হেতু অর্থনৈতিক। জমিদার, মহাজন, নায়েব, পেয়াদা কে না তাদের শোষণ করেছে? কিন্তু শুধু কি তাদের? হিন্দুদেরও কি নয়?

কোর্ট থেকে উঠে সে যখন চেষ্টারে যায় তখন নাজির সাহেব এসে তাকে সেলাম করেন। বলেন, “সার, অমুমতি পাই তো একটা কথা নিবেদন করি। কালকের বাজারটা আজকেই করে রাখলে ভালো হয়। শুনছি হিন্দুরাও কাল হরতাল করবে। পাছে দোকান পাট লুট হয় কি পুড়ে যায়। সাবধানের মার নেই।”

মানস মনে মনে চটে যায়। বলে, “কেন, ওরা কি মগের মূল্যে বাস করেছে? সরকারকে ট্যাক্স দেয় না? সরকার ওদের প্রোটেকশন দিতে বাধ্য নয়? ডি. এম. কী করছেন? এস. পি. কী করছেন?”

নাজির নিরুত্তর। তখন মানস টেলিফোন করে জেলা ম্যাজিস্ট্রেট তার নিজের সার্ভিসের বাঙালী সিনিয়র অফিসার মির্জা আফজল সিরাজীকে। “শুনছি কাল শহরসুদ্ধ সব দোকানপাট বন্ধ থাকবে। জেলা জজও শাক সবজি কিনতে পারবেন না। তাঁকেও কি সপরিবারে রোজা রাখতে হবে?”

সিরাজী লজ্জিত হয়ে, বলেন, “পাবলিক হলিডেতে আগিস আদালত বন্ধ হয়। হাটবাজার কখনো বন্ধ হয় না। আমিও শুনছি সে রকম কিছু হবে। এটা কিন্তু সরকারের হুকুমে নয়, মল্লিক। হুকুম যদি কেউ জারি করে থাকে তবে সে এখানকার মুসলিম লীগ জেলা কমিটির সেক্রেটারি শফিকুদ্দীন। সে এবার জেলা স্কুল বোর্ডের চেয়ারম্যান হয়ে আঙুল ফুলে কলাগাছ হয়েছে। আমার সঙ্গে ভারিচ্চি চালে কথা বলে। তা কাল সকালেই শাক সবজির বোঝা নিয়ে একজন ফেরিওয়ালী হাজির হবে। আপনারা যেটা খুশি কিনবেন। নো প্রব্রেম। সপরিবারে রোজা রাখতে হবে কেন? ইউ আর নট আ মুসলিম। আমিও কি রাখছি নাকি? রোজা রাখি তো অত খাটব কী করে?”

এর পরে মানস পুলিশম্যানকে ফোন করে। ইনি ওর পূর্ববর্তী কর্মস্থলে ওর প্রতিবেশী ছিলেন। টুর করে বেড়াচ্ছেন, বাড়ীতে স্ত্রীর প্রসবব্যথা। অন্য কোনো স্ত্রীলোক নেই যে সাহায্য করে। জঙ্ঘ গৃহিণী খবর পেয়ে ছুটে যান। রাত জেগে সেবা যত্ন করেন। ডাক্তার ডাকতে হয় না। সুপ্রসব হয়। সেই খেঁকে ওঁরা ঘনিষ্ঠ বন্ধু। প্রমোটেড অফিসার। পাঞ্জাবা মুসলমান। চিয়াং কাইশেক যখন এদেশে আসেন তখন তাঁর স্পেশাল ট্রেনের ডাইনিং কারের ওয়েটার সেজেছিলেন ফিদা হোসেন খান। রাজপুত বংশীয় বলে গৌরব বোধ করেন। বংশের একটি শাখা এখনো হিন্দু। দুই শাখার মধ্যে বৈবাহিক আদান প্রদান চলে। কত্যা ধর্মাস্তরিত হয় না। এটা নাকি ওই বংশেরই প্রথা। পাকিস্তান পছন্দ করেন না। তাঁর মতে জিন্না নিজে সাচ্চা মুসলমান নন।

“হরতাল হবে, শুনছি। মীটিং, প্রোসেসন এ ‘ কিছু হচ্ছে না তো? আয়ন্তের বাইরে চলে গেলে কমিউনাল মোড় নিতে পারে, খান। জানি, আপনি সব সময় সতর্ক। আপনাকে সতর্ক হতে বলা অনাবশ্যক। প্লীজ ডোন্ট মাইণ্ড।” মানস তাঁকে টেলিফোন করে।

পুলিশ সাহেব তাকে আশ্বাস দেন যে শান্তিভঙ্গের বিন্দুমাত্র আশঙ্কা নেই। “আজ সন্ধ্যায় জেলা ম্যাজিস্ট্রেটের কুঠিতে চূড়ান্ত সিদ্ধান্ত হবে প্রোসেসনের অহুমতি দেওয়া হবে কি-না। দশ হাজার লোকের মিছিল যদি বেরোয় আমার অত লোকবল নেই যে সামলাতে পারব। ওরা যদি হাতিয়ার হাতে নিয়ে বেরোয় তবে ওদের নিরস্ত্র করাও তো ছুঁয়। তবে মিটিং-এর ঝুঁকি

নেওয়া যেতে পারে। ডাইরেক্ট অ্যাকশন নাকি ব্রিটিশ রাজের বিরুদ্ধে। কিন্তু রাজদ্রোহের অপরাধে মামলা হলে জেলে যাওয়ার মুরোদ একজনেরও নেই। আর হিন্দুবিরোধী আফালনে মুসলমানের কতটুকু লাভ? নেহরু যাচ্ছেন ইন্টারিম গভর্নমেন্টের প্রধান মেম্বর হয়ে। তিনি কি বেঙ্গলের হিন্দুদের প্রোটেকশন দেবেন না? বড়লাটও দেবেন। গভর্নরও দেবেন। দেখবেন কলকাতায় কাল নর্মাল থাকবে। গোলমাল বাধতেই দেওয়া হবে না। বাধলে সঙ্গে সঙ্গে ঠাণ্ডা। তবে একটা খবর আপনাকে জানিয়ে রাখছি। বাইরে থেকে এখানে হিন্দু এজেন্ট প্রোভোকেটর এসেছে। স্থানীয় হিন্দু জনতাকে উস্কানি দিতে।”

পরের দিন বোলই আগস্ট। ভারতবর্ষের ইতিহাসে একটি দিক্‌নির্গমক দিবস। মুসলিম লীগের লক্ষ্য স্থির হয়ে যায় ছ'বছর আগে লাহোরে। আজ কলকাতায় স্থির হবে লক্ষ্যভেদের উপায়। গোলমাল হয়তো হবে না। না হওয়ারই সম্ভাবনা বেশী। স্বয়ং গভর্নর রয়েছেন, ফোট উইলিয়ামে আমি রয়েছে, লালবাজারে পুলিশ রয়েছে। সুহ্রাবর্দী একজন সুদক্ষ প্রশাসক। পরিস্থিতিতে তিনি আয়ত্তে রাখতে পারবেন। তিনিও জানেন যে দিনকয়েক বাদে নেহরু সদলবলে ক্ষমতায় আসছেন। জিন্নার রাজনৈতিক জীবনের সর্বপ্রথম ভুল ইন্টারিম গভর্নমেন্টে যোগ দেবার আমন্ত্রণ প্রত্যাখ্যান করা। তাঁর হাতের তাসের ট্রাম্প করার শক্তির অনুপাতে তিনি অত্যধিক 'কল' দিয়েছেন। ব্রিজ খেলার পরিভাষায় একে বলে 'ওভারকল'।

কিন্তু মাস মোবিলাইজেশন যদি হয় তার ফলাফল হবে সুদূরপ্রসারী। কার সাধ্য কে সেই ধর্মোন্মাদ জনতাকে আয়ত্তে রাখবে? তারা মারবে, মরবে, সামনে থাকে পাবে তাকেই। কী ইংরেজ, কী হিন্দু। গভর্নরের প্রশ্নে সুহ্রাবর্দী মন্ত্রামণ্ডল যা করছেন তা আশুন নিয়ে খেলা। আজকের এইদিনটা শাস্তিতে কাটলেই রক্ষা। মানস ও যুক্তিকার মনে একটা কী হয় কী হয় ভাব। মানস কিছু লিখতে চেষ্টা করে। কিন্তু সময় পেলেও মূড় পায় না। সাত পাঁচ ভাবে।

টেনিসের সময় হলে সে ছটফট করে। খেলতে গিয়ে খেলবে কার সঙ্গে? কেউ কি আজ আসবে? খেলাতেই বা মন লাগবে কেন? এমন দিনে কি খেলা যায়? রেডিও খুলে বসে থাকে যদি কলকাতার কোনো খবর দেয়। তেমন কিছু পায় না। নো নিউজ ইজ গুড নিউজ। নেই খবর তো ভালো খবর।

সন্ধ্যাবেলা পাবলিক প্রোসিকিউর রায় শরদ্দিন্দু নিয়োগী বাহাদুর আসেন দেখা করতে। বলেন, “শুনলুম আপনি খুবই চিন্তিত। তাই জানাতে এলুম আজকের দিনটি শান্তিতে কেটেছে। হিন্দুরাও উৎসাহের সঙ্গে হরতাল পালন করেছে। জলে বাস করে কুমীরের সঙ্গে বিবাদ করা সাজে না। এখানে একজনও ইংরেজ অফিসার নেই, জেলা ম্যাজিস্ট্রেট আর পুলিশ সাহেব দু’জনেই মুসলমান। দু’জনেই প্রো-হিন্দু। ম্যাজিস্ট্রেটের কুঠির সভায় আমাকেও ডাকা হয়। জিজ্ঞাসা করা হয় মিছিল বেরোতে দেওয়া সমীচীন কি না। আমি বলি, আলবৎ। তবে তাকে কন্ট্রোলের মধ্যে রাখতে হবে। আমি থাকব মিছিলের সঙ্গে। হিন্দুরা যে যোগ দিচ্ছে এটা জানলে তাদের মনোভাব বদলাবে। হিন্দুরা পাকিস্তানের বিরোধী নয়। মোগল রাজত্বেরও বিরোধী ছিল না। তবে রাজপুতদের মতো তাদেরও বিশ্বাস করতে হবে, বড়ো বড়ো পদ দিতে হবে, তাদের উপর জিজিয়া বসানো চলবে না। আমি আল্লাহো আকবরও বলেছি, পাকিস্তান জিন্দাবাদও বলেছি। মিছিল শহর ঘুরে আসে। কারো উপরে হামলা করে না। মীটিংও হয়েছিল। সেখানেও আমি একজন বক্তা। শফিকুদ্দীন ইংরেজদের বাঁচিয়ে বক্তৃতা দেয়, জানে যে ইংরেজ চটলে গভর্নরস রুল হবে, তখন আমিই ওঁকে প্রোসিকিউট করব। হিন্দুদের উপরেই গায়ের ঝাল ঝাড়ে। বিশেষত মহাত্মা গান্ধীর উপরে। কিন্তু শ্রোতার তারিফ করে না। আমার উকীল বন্ধু আবু হেনা তরফদার উঠে দাঁড়িয়ে বলেন, গান্ধীজী কুইট ইণ্ডিয়া না বললে কি কায়দে আজম ডিভাইড অ্যাণ্ড কুইট বলতেন? ইংরেজরা কুইট না করলে কি মুসলমানরা পাকিস্তান পাবে? সভার লোক শুনে শান্ত হয়। আপনি নিশ্চিন্ত থাকুন।”

“কলকাতার সংবাদ না পাওয়া পর্যন্ত আমি নিশ্চিন্ত হতে পারছি নে, রায় বাহাদুর। তবু ভালো যে এখানকার সব খবর ভালো।” মানস এতে খুশি।

“কলকাতা আমার এলাকা নয়, তার জন্তে আমার কোনো নৈতিক দায়িত্ব নেই। সেটা যাদের এলাকা তাঁরাই ঈশ্বরের কাছে দায়ী থাকবেন। আমরা কেন ধরে নেব যে কলকাতায় এমন কিছু ঘটবে যেটা ইতিহাসের শ্রোত ঘুরিয়ে দেবে। বাংলাদেশ বাংলাদেশই থাকবে, যদিও এর নতুন নাম হয়তো হবে পূর্ব পাকিস্তান। হোক না, তাতে কী এসে যাবে। গোলাপকে আপনি যে নামেই ডাকুন সে গোলাপই থাকবে। হাজার বছর আগে আমাদের পূর্বপুরুষদের নাম কি হিন্দু ছিল? সংস্কৃত সাহিত্যে যে। থাও কি এর উল্লেখ আছে? আমাদের



বাসভূমির নাম কি হিন্দুস্থান ছিল? প্রাচীন সাহিত্যে কোথাও পড়েছেন এ নাম। তা হলে পাকিস্তান আর পাকিস্তানীতে এত আপত্তি কেন? পাকিস্তানের পাঁচটি কি ছ'টি প্রদেশের মধ্যে বেঙ্গল বা বাংলাদেশও থাকবে। অধিবাসীরা বাঙালীই থাকবে। আমরা হিন্দু মুসলমান মিলে তামাম পাকিস্তানে মেজরিটি হব। পশ্চিমা যদি ডিভাইড অ্যাণ্ড কন্ট্রল না করে তবে আমরাই কেন্দ্রীয় সরকার গঠন করব, প্রধানমন্ত্রী হব, প্রেসিডেন্ট হব। মিলিটারি পাওয়ার হয়তো ওদের হাতে থাকবে, সিভিল পাওয়ার আমাদেরই হাতে। বগড়া যদি করতে হয় পশ্চিমা মুসলমানের সঙ্গে করব, বাঙালী মুসলমানের সঙ্গে কদাচ নয়। আমাদের হাতে যে তাস আছে সে তাস বুদ্ধিমানের মতো খেললে পাকিস্তানের রাজধানী হবে কলকাতা। কিন্তু এক শ্রেণীর মুসলমান আছে তাঁরা বাঙালী বলে পরিচয় দিতে সঙ্কোচ বোধ করেন। পাছে কেউ মনে করে নেটিভ মুসলমান। ওঁদের মতে ওঁরা আরব ইরান আফগানিস্থান থেকে এসেছেন বিজয়ীর বেশে। চেহারাটা কিন্তু আমাদেরই মতো।” রায় বাহাদুর হাসেন।

যুথিকার সঙ্গে আলাপ করিয়ে দেয় মানস। তিনি বলেন, “আপনার ছেলে আর আমার নাতি একই জ্বলে ও একই ক্লাসে পড়ে। ওরা অন্তরঙ্গ বন্ধু। একদিন আমাদের কুটিরে পায়ের ধুলো দিলে কৃতার্থ হব।”

আপ্যায়নের পর তিনি বিদায় নেন।

এখানে কোনো অনর্থ ঘটেনি জেনে মানস ও যুথিকা স্বস্তির নিশ্বাস ছাড়ে। কিন্তু বাড়ির কেন্দ্র বা ভূমিকম্পের এপিসেন্টার তো কলকাতা। কলকাতায় তুলকালাম কাণ্ড ঘটলে এখানেও তার প্রতিক্রিয়া হবে। তাই ভাবনা থেকে যায়।

রাত ন'টায় রেডিওতে শোনায় কলকাতায় হাঙ্গামায় পাঁচ হাজার জন হতাহত। লুটপাট। অগ্নিসংযোগ। কারফিউ জারি হবে।

“St. Bartholomew's Day Massacre!” মানস বলে ওঠে।

যুথিকার মুখ চূণ। তার মা বাবা যদিও তাকে ত্যাজ্য কত্তা করেছেন তবু সে তো তাঁদের ত্যাগ করেনি। তাঁরা অবসর নিয়ে কলকাতায় বাস করছেন। কে জানে তাঁদের কী অবস্থা। সে কান্না চাপতে পারে না।

“ও কী। তুমি কঁাদছ কেন? তুমি তো খুব শক্ত মেয়ে। কখনো কঁাদ না। ছি। কঁাদতে নেই। যাও, শুতে যাও।” মানস নিজে কিন্তু শুতে যায় না।

অর্ধেক রাত অবধি পায়চারি করতে করতে ভাবে হিন্দু মুসলমানের এই  
 ঝন্ড কি একদিনেই থামবে? গড়াবে অনেক দিন, ষতদিন না একটা রাজনৈতিক  
 সমাধান পাওয়া যায়। দুই পক্ষই দোষী, কোনো এক পক্ষকে নির্দোষ বলা  
 যায় না। কিন্তু সে কি মহাযুদ্ধের মতো গৃহযুদ্ধের বেলাও নীরব সাক্ষী হবে?

## ॥ তেইশ ॥

রাত দুটোর সময় শুতে গিয়ে সে দেখে যুথিকা তখনো জেগে আছে।  
 ফুঁপিয়ে ফুঁপিয়ে কাঁদছে। চোখের জলে বিছানা ভিজে গেছে।

“ও কী। তুমি কাঁদছ এখনো? এক গঙ্গা অশ্রুধারায়ও হিন্দু মুসলমানের  
 রক্তের দাগ মুছবে না। এ রক্ত বাঙালীর বুকের রক্ত। বাংলাদেশের কলিজার  
 লহ।” মানস সান্ত্বনা দিতে গিয়ে বলে।

যুথিকা মুখ ঘুরিয়ে নেয়। “তোমার বক্তৃতা শুনতে শুনতে কান ঝাড়াপালা।  
 তার উপর কাব্যি করা শুরু হলো।”

মানস বুঝতে না পেরে বোবা হয়ে থাকে। তখন যুথিকাই মুখোমুখি  
 হয়। কাঁদতে কাঁদতে বলে, “কান্না পাচ্ছে, তাই কাঁদছি। পাঁচ হাজার  
 হতাহত। আরো কত হবে কে জানে! মা বাবার কথা ভেবে কান্না পাবে  
 না? বাড়ী কিনেছেন পার্ক সার্কাসে। চার দিকে মুসলমান গিজ গিজ করছে।  
 ওরা ক্ষেপে না গেলে চমৎকার লোক। কিন্তু ক্ষেপে গেলে চণ্ডী।”

“না, না, কেউ ওঁদের গায়ে হাত দেবেন না। স্বপ্ন কায়দে আজমের  
 সঙ্গে সিমলায় ওঁদের দহরম মহরম ছিল। সেখানকার ভাৎসরিগাল লজ্জা।  
 জিন্না সাহেবের নিশ্চয়ই সেসব দিনের কথা মনে পড়বে।” মানস  
 শ্রোতৃক দেয়।

“তাকে জানাবার আগেই যা হবার তা হয়ে যাবে। তোমার যদি  
 দয়ামায়া থাকে তুমি একবার ট্রান্স কল করে খবরটা নাও তাঁরা বৈঁচে আছেন  
 কি-না। বৈঁচে থাকলে নিরাপদ স্থানে সরে গেছেন কি-না।” যুথিকা  
 ব্যাকুলভাবে বলে।

সে এর আগে কখনো এমন কোনো অনুরোধ করেনি, পাছে মানস ভুল  
 বোঝে। তার বাবা তার স্বামীকে অপমান করে তাড়িয়ে দিয়েছিলেন,

জামাতা বলে স্বীকার করতেই রাজী হননি। তার মা তো গয়না পৰ্ব্বস্ত কেড়ে নিয়েছিলেন। সম্পর্ক যখন কেটে গেছেই তখন আবার জোড়া দিতে যাওয়া কেন ?

মানস বলে, “আচ্ছা, কাল সকালেই আমি ট্রাঙ্ক কল্ করে খবর নেব। কিন্তু আমার নয়, তোমার নামে।”

“না, না, আমার নামে নয়, আর কারো নামে। বিল অবশ্য আমরাই মেটাব।” যুথিকা ভেবে পায় না কার নামে।

মানস পরের দিন ট্রাঙ্ক কল্ বুক করতে গিয়ে শোনে কলকাতার লাইন খারাপ। শত খানেক কল্ জমে আছে। নতুন কল্ বুক করা বন্ধ। তখন একটা প্রি-পেড টেলিগ্রাম ডাকঘরে পাঠায়। চাপরাশি ফিরে এসে জানায় টেলিগ্রামও কলকাতায় যাচ্ছে না। লাইন খারাপ। অল্পমতি নিয়ে নাম ঠিকানা দিয়েছিল ক্লাবের অনরারি সেক্রেটারি পরমেশ মিত্রের। তিনি ইম্পীরিয়াল ব্যাঙ্কেরও এজেন্ট। সর্বজনপ্রিয় পরোপকারী ভদ্রলোক।

এখন কী উপায় ? মনে পড়ে যায় যে পুলিশ সাহেবের হেফাজতে পুলিশ ওয়ারেন্স আছে। সেখান থেকে কলকাতা ওয়ারেন্স মেসেজ পাঠানো সম্ভব। কিন্তু সকলের পক্ষে নয়। কেবল জেলা ম্যাজিস্ট্রেট ও জেলা পুলিশ সুপারিনটেন্ডেন্টের পক্ষে। মানস তখন ফিদা হোসেনকে অহুরোধ করে লালবাজারে ওয়ারেন্স করে ওয়ারেন্সে উত্তর আনিয়ে নিতে। তিনি নিজের নামেই মেসেজ পাঠান, কিন্তু লালবাজার সাড়া দেয় না। বার বার তিনবার নিরুত্তর।

খবরের কাগজ আসেনি, আসবেও না। কলকাতা থেকে ট্রেন ছাড়েনি। একই কারণে চিঠিপত্রও আসেনি, আসবেও না। যাত্রীরাও আসেনি, আসবেও না। মুখে মুখে কতরকম গুজব রটে যায়। কোর্টে গেলে একজন উকীল বলেন, “কলকাতায় কাল পঞ্চাশ হাজার জন মারা গেছে। তাদের মধ্যে চল্লিশ হাজার হিন্দু।” আরেকজন উকীল এসে জানান, “ষাট হাজার লোক মারা গেছে, তাদের মধ্যে পঁয়তাল্লিশ হাজার মুসলমান।” ঘণ্টায় ঘণ্টায় গুজব পল্লবিত হয়। কেউ বলে, “পাঁচটা মন্দিরে গোরুর মাথা পাওয়া গেছে।” কেউ বলে, “দশটা মসজিদে শ্যোর ঢুকেছে।” গির্জার কথা কিন্তু একজনও বলছে না। যদিও ব্রিটিশ বিরোধী প্রত্যক্ষ সংগ্রাম দিবস।

“হৃদিস পেলেন ?” যুথিকা জিজ্ঞাসা করে। মানসকে ফিরতে দেখে।

“পুলিশম্যান নিজের নামে মেসেজ পাঠিয়েছেন তাঁর বন্ধু শামসুল হুদার নামে। তিনি ডেপুটি কমিশনার। থাকেন পার্ক সার্কাসেই। তাঁর পক্ষে অসুস্থত্বান সোজা। কিন্তু দাঙ্গাহাঙ্গামার সময় তো তাঁর চব্বিশ ঘণ্টা ডিউটি। তাঁকে তাগাদা দিয়েও সাড়া মেলেনি। সবুর করো। ধৈর্য ধরো।” মানস কৈফিয়ৎ দেয়।

যুথিকা মুখ ভার করে থাকে। “মিসেস সরকার কী করে খবর পেলেন? ধলে গেলেন সরকার পরিবারের সবাই নিরাপদে আছে।”

“ওঁদের তো টাকার অভাব নেই। বোধ হয় রেডিও ট্রান্সমিটার আছে। তা ছাড়া আর কোন স্ত্রে মিসেস সরকার খবর পেলেন?” মানস চিন্তা করে।

দিনের বেলা রেডিওতে যা শোনা যায় তা কতকটা স্থিতাবস্থার। রাত ন’টায় জানায় বাইরে থেকে সৈন্য এসে শান্তিরক্ষায় সাহায্য করেছে। কিন্তু ক’জন হতাহত তার উল্লেখ নেই।

“তার মানে অবস্থা আরো খারাপ।” যুথিকার কণ্ঠ অশ্রুসিক্ত।

মানস তাকে কী বলে সাহুনা দেবে? সেও তো শক্তিত্ব স্বপনদার জন্মে, বোধির জন্মে। তাঁদের বাড়ীর পেছনে মুসলমানদের বসতি। তাঁদের বাবুচি ও ড্রাইভার মুসলমান। বেয়ারা ও মেড হিন্দু। বিকে ওঁরা মেড বলেন। তার আরো কয়েকজন প্রিয় বন্ধুও তো কলকাতায় নিযুক্ত। একাশকরাও কলকাতানিবাসী।

কিংকর্তব্যবিমূঢ় হয়ে মানস রাত জেগে পায়চারি করে। ঈশ্বরকে ধন্যবাদ দেয় যে তার নিজের কর্মস্থলে তেমন কোনো বিপদ নেই। তবু বলা যায় না। জিজ্ঞাস্য যে ভাবে পরিস্রবিত হচ্ছে সেখানেও কলকাতার ঐতিহ্যবাহী মারামারি বেধে যেতে পারে। এক পক্ষ মার দিলে কি অপর পক্ষ তার শোধ দেবে না?

তবে ভরসার কথা সিরাজী আর খান্। দু’জনেই অসাম্প্রদায়িক প্রকৃতির অফিসার। তাঁদের কারো বিরুদ্ধে সাম্প্রদায়িকতার অভিযোগ শোনা যায় না। তবে মুসলিম লীগ মন্ত্রীমণ্ডলের অধীনে গার। কাজ করেন তাঁদের উপরে শফিকুদ্দীনের মতো মোড়লদের চাপ একেবারেই কি পড়বে না?

কিন্তু এই দুই অভিজ্ঞ অফিসারের নিশ্চয় স্বেচ্ছায় আছে যে ইণ্টারিম গভর্নমেন্ট আজ বাদে কাল গঠিত হবে ও তাতে মুসলিম লীগ থাকবে না, কংগ্রেস থাকবে। কাজেই দিল্লী থে। যে চাপ পড়বে সেটাই কলকাতার

মন্ত্রীমণ্ডলকে ও তাঁদের স্থানীয় মোড়লদের অফিসারদের উপর চাপ দেওয়া থেকে নিবৃত্ত করবে। অফিসাররা আইন মোতাবেক কর্তব্য করে গেলেই স্বাভাবিক অবস্থা ফিরে আসবে।

পরের দিনও খবরের কাগজ আসে না, ট্রেন আসে না। রবিবার চিঠি আসার প্রত্যাশাও ওঠে না। টেলিগ্রাফ বন্ধ, ট্রান্স টেলিফোন বন্ধ। পুলিশ ওয়্যারলেস নিরুত্তর। মানস কোটে যায় না, কিন্তু গুজব তার কাছে পায়ে হেঁটে আসে। কলকাতায় নাকি দস্তুরমতো যুদ্ধ চলছে। মুসমানরা নাকি তলোয়ার হাতে রাস্তায় বেরিয়ে পড়েছে। একহাতে তলোয়ার, আরেক হাতে কোরান। ডাক ছাড়া, “আল্লাহো আকবর।” হিন্দুরা নাকি বোমা ফাটাচ্ছে। কারো কারো হাতে স্টেনগান। হাঁক ছাড়া “জয় মা কালী কলকাতা-ওয়ালী।” ওদিকে শিখরাও রূপাণ হাতে কাঁপিয়ে পড়েছে। ভবানীপুরকে ওরা মুসলিমমুক্ত করবে। গোরা দৈনিকরা চারদিকে পাহারা দিচ্ছে। কিন্তু গুলী গোলা এখনো চালায়নি। গোরা পুলিশও নিরপেক্ষ।

এসব গালগল্পের উৎস কী? বারোজনের আড্ডা? না কোনো চোরাই রেডিও ট্রান্সমিটার? না লগুনের বি. বি. সি.? মানস এসব গুজবে কান দেয় না। যুথিকাকেও বলে কর্ণপাত না করতে। কিন্তু অশ্রুপাত তা সত্ত্বেও থামে না।

শেষকালে পুলিশ থেকে একজন কনস্টেবল মেসেজ নিয়ে এসে দেখায়। কলকাতা থেকে পুলিশ ওয়্যারলেসে এসেছে। “রায়চৌধুরী পরিবার পুলিশের গাড়ীতে স্থানান্তরিত হয়েছেন। নিরাপদে আছেন। হুদা।” পুলিশ সাহেব তার উপরে লিখেছেন “শো জজ।”

মানস যুথিকাকে জড়িয়ে ধরে চুমু খায়। যুথিকা হেসে বলে, “ছাড়ো। ছাড়ো। দেখছে।” পুলিশের লোক পালায়। মুচকি হাসে।

দীপক আর মণি ছুটে আসে। কী হয়েছে? কী হয়েছে? তখন তাদের খুলে বলতে হয় যে তাদের দাদামশায় ও দিদিমা বেঁচে আছেন। তারা অবাক হয়। তাঁদের কথা ভোমা কোনোদিন বলে না। প্রশ্ন করলে এড়িয়ে যায়। দীপকের বোঝাবার বয়স হয়েছে যে বলবার মতো নয়। সে আরও প্রশ্ন তোলে না। কিন্তু মণি মাঝে মাঝে বায়না ধরে। যুথিকা নিরুত্তর।

রেডিওতে দিনের বেলা যা বলে তা আশাভ্রম নয়। দাঙ্গা থামেনি। সরকার আরো কড়া ব্যবস্থা করেছেন। রাত নটায় শোনায় দাঙ্গা এবার

ভাঁটার মুখে। কিন্তু হতাহতের সংখ্যা দেয় না। আর শুনেই বা কী হবে? হিন্দু মুসলমানের শ্রান্তি না এলে ইংরেজদের কিসের গরজ? সে তো আরো দশ বিশ বছর সুস্থ শরীরে ও বহাল তব্বিতে রাজত্ব করতে পারবে। সাম্রাজ্যের উপর স্বর্ষ অস্ত যাক এটা কি লজ্য ওরা চায়? ওরা যদি চলে না যায় স্বাধীনতাও হবে না, পার্টিশনও হবে না। না হবে হিন্দুস্থান, না পাকিস্তান। আর কিছু না হোক, পূর্ববঙ্গের হিন্দু মাইনরিটি নিরাপদ।

পরের দিনও খবরের কাগজ আসে না, চিঠিপত্র আসে না। ট্রান্স কল বুক করে না, টেলিগ্রাম পাঠায় না। তেমনি অচল অবস্থা। তবে বিকেলের দিকে দু'চার জন ব্যক্তি পায়ে হেঁট কলকাতা থেকে পৌছয়। যত সব ভয়ঙ্কর ভয়ঙ্কর কাহিনী ছড়ায়। তাদেরই হাত থেকে কয়েকখানা দু'পাতার পত্রিকা ধার করে এনে নাজির দেখান মানসকে। হিন্দুদের কাগজে লিখেছে মুসলমানরা হিন্দুদের ধরে নিয়ে গিয়ে নাখোদা মসজিদের প্রাঙ্গণে কোরবানী করেছে। আর হিন্দুরা মুসলমানদের ধরে নিয়ে গিয়ে কালীঘাটের কালীমন্দিরে বন্দি দিয়েছে। খুঁটিনাটি সমেত বর্ণনা দেওয়া হয়েছে।

মানস তো হাঁ! এ কি কখনো সম্ভব! বাঙালী হিন্দু মুসলমান কি এত নিচে নামতে পারে। বিশ্বাস হয় না। অথচ হয়ও। যুদ্ধে কী না সম্ভব? ত্রিশ বছরে এ যুদ্ধে জার্মানীর ক্যাথলিক ও পুটেস্ট্যান্টরা নাকি মাহুঘের মাংস খায়। সে ঐতিহ্য এখনো লুপ্ত হয়নি। গত মহাযুদ্ধে নাসীর লক্ষ লক্ষ ইহুদীকে গ্যাস চেম্বারে পুড়িয়ে মেরেছে, তবে খায়নি। হিন্দু মুসলমান যদি এ গৃহযুদ্ধে একুনি না খামায় তা হলে কার কপালে কী আছে তা কেউ জানে না। হার জিং তো সব যুদ্ধেই থাকে, কিন্তু এই যে ব্রিটিশ 'জেশন এর জন্তেও প্রস্তুত থাকতে হবে। মানস যুথিকাকে এসব কথা জানায় না। ছেলে-মেয়েকেও না।

পরের দিন 'স্টেটসম্যান' পায়, হেডলাইন হলো 'গ্রেট ক্যালকাটা কিলিং'। ভিতরে লিখেছে কলকাতায় যা ঘটে গেল তা ইউরোপের মধ্যযুগের মতো একটা 'ফিউরি' (Fury)। সীমাহীন উত্তপ্ত ক্রোধ। আগুন এখনো নেবেনি। খামেনি। তলে তলে ধোঁয়াচ্ছে। 'অমৃতবাজার' গভীর পরিতাপ প্রকাশ করে হিন্দু-মুসলমান উভয়কে দোষ দিয়েছে। এ তোমার এ আমার পাপ। এ রকম যদি চলে তবে স্বাধীনতা দূর অন্ত। সভ্যতাও থাকে কি না সন্দেহ।

রাস্তায় ঘাটে রাশি রাশি শব। বিস্তর শব গজায় নিক্ষেপ করা হয়েছে তাই সঠিক বলতে পারা যাচ্ছে না কত লোক মরেছে। হিন্দু কত, মুসলমান কত। লুটপাট অজ্ঞপ্ত হয়েছে। গৃহদাহের সংখ্যাও কম নয়। যুদ্ধক্ষেত্রের মতো দৃশ্য। শকুন উড়ে এসে মাংস ছিঁড়ে খাচ্ছে। সরকার ও মিউনিসিপালিটি নাজেহাল। আমি এসে শব তুলে নিয়ে সংকার করছে। নইলে মড়ক।

মানস যুথিকাকে দেখাবে কি দেখাবে না? সে ওং পেতে থাকে, হোঁ মেরে নিয়ে যায়। বিশিষ্ট ব্যক্তি কে কে নিহত তাঁদের নাম তন্ন তন্ন করে দেখে। না, তার বাবা মার নাম নেই। বিশিষ্টরা গা বাঁচিয়েছেন, গরিবেরা মরেছে। যারা দিন আনে দিন খায়, পথে না বেরিয়ে পারে না। আর যারা বস্তিতে থাকে।

ওরা দু'জনেই স্থির করে যে একদিন অনশনে থেকে নিহতদের জন্তে শোক করবে। ছুটির দিন দেখে। সেদিন তাদের মোনিং ড্রেস।

এর পরে কাগজ খুললে যথারীতি গালাগালি বর্ষণ। যত দোষ স্মরণাবর্দী, যত দোষ বারোজ, যত দোষ জিন্না, যত দোষ ওয়েভেল। গান্ধী নেহরুও বাদ যান না। রোম পুড়ছে, নীরো বেহালা বাজাচ্ছেন। গান্ধী বাঙালীকে কোনোদিন ভালোবাসেননি, জবাহরলাল তো বাঙালীকে ঘৃণাই করেন।

“সত্যি, বাপু কেন একবার কলকাতায় এলেন না?” যুথিকার ধারণা তিনি এলেই সবাই শান্ত হতো।

“ওদিকে ওয়েভেল আবার ওয়েভার করছেন। শান্তির জন্তে লীগকে কিছু কনসেসন দিতে হবে। অর্থাৎ কংগ্রেস-মুসলিমদের ডুবিয়ে দিতে হবে। নেহরুকে বল জোগাবার জন্তে বাপুকে থাকতে হচ্ছে দিল্লীতে। সেটাই তো প্রথম কর্তব্য। দেশের স্বাধীনতাই তো সকলের আগে।” মানস যতদূর বোঝে।

মাসের শেষে হঠাৎ বাবলী আর তার বাম্ভবী আসে দেখা করতে। তারা তেভাগা আন্দোলন উপলক্ষে এ জেলায় পর্যটন করছে। কলকাতার অবস্থা কী রকম জানতে চাইলে বলে, “৬ড়কে লেঙ্গে পাকিস্তান। লড়াইরের ফলে কলকাতা এখন হিন্দুস্থান পাকিস্তান হয়ে গেছে। এক পক্ষ অপর পক্ষের এলাকায় পা দিতে ভয় পায়। আমরা তৃতীয় পক্ষ বলে নির্ভয়ে ঘুরে বেড়াতে পারি। আমাদের পাটি কাঁড়ই আমাদের পাশপোট।”

মানস ও যুথিকা স্মৃদায়, “স্বপনদার খবর কী? বোদির কী খবর?”

বাবলী উত্তর দেয়, “সেইকথাই তো বলতে এসেছি। ওঁরাই জানাতে বলেছেন। ওঁদের উপর দিয়ে একটা ঝড় বয়ে গেছে। শিকড়স্বল্প উপড়ে দিয়েছে। এখন ওঁরা হিন্দুস্থান পার্কে সুবিনয় তালুকদারের অতিথি। ইচ্ছে ছিল সাত আট দিনের মধ্যে অবস্থা শান্ত হলে বালীগঞ্জ পার্কে ফিরবেন। কিন্তু মুসলিম লীগ গভর্নমেন্ট থাকতে হয় কোয়ালিশন, নয় গভর্নরস ক্লস ছুটোর একটা হলেই ওঁরা ফিরবেন, নয়তো অন্য কোথাও একটা খালি ফ্ল্যাট ভাড়া করবেন।” পরের বাড়ীতে চাকর ও কুকুর নিয়ে থাকা যায় না, বান্নার উপরেও এক্টিয়ার নেই। কিছুদিন রাঁচীতে কি দেওঘরে গিয়ে থাকতে পারতেন, কিন্তু বৌদির ভয় বেওয়ারিস পেয়ে বাড়ীটা বস্তির মুসলমানরাই বেদখল করে নেবে। ওঁদের জালাতেই আধ ঘণ্টার নোটসে বাড়ী থেকে পালাতে হলো।”

“সে কী কথা! আধ ঘণ্টার নোটসে।” মানস ও যুথিকা হতবাক।

“সংক্ষেপে বলি। উদূর্কে বাংলায় তর্জমা করে বলছি। ষোল তারিখ রাত্রে ওঁরা যথানিয়মে শুতে গেছেন। ঘুমিয়েও পড়েছেন। হঠাৎ এলফের অবিরাম চীৎকার শুনে ওঁদের ঘুম ভেঙে যায়। বেয়ারা ছুটে এসে বলে, ডাকাত পড়েছে। জানালায় মুখ গলিয়ে দেখেন মশাল আর নিশান হাতে বারো তেরা জন লুন্ডী পরা লোক চেষ্টিয়ে বলছে, দরজা খোল। নইলে দরজা ভাঙব। স্বপনদা দু’তিনজনকে চিনতে পারেন। বস্তিতেই থাকে। মাঝে মাঝে চাঁদা নিতে আসে। আপদে বিপদে আইনের পরামর্শও চায়। ব্যাপার কী, চাঁদ মিঞা? এত রাতে কী মনে করে? স্বপনদা স্বধান। সালাম আলায়কুম, সাহেব। উত্তর কলকাতার হিন্দু মুসলমানদের মধ্যে খেদিয়ে দিয়েছে, কেটেও ফেলেছে কয়েক হাজারকে। দক্ষিণ কলকাতায় তাদের জায়গা দিতে হলে হিন্দুদেরও মেরে খেদিয়ে দিতে হয়, দরকার হলে কেটেও ফেলতে হয়। আপনি আমাদের মুরক্বি, আপনাকে মারতেও পারিনে, কাটতেও পারিনে, খেদিয়ে দিতেও কি পারি? না, সে রকম বেইমান আমরা নই। কিন্তু মেহেরবানি করে বাড়ীটা আমাদের ছেড়ে দিতে হবে। আজকেই সমস্তটা নয়, শুধু নিচের তলাটা। আপনারা তো দোতালাতেই থাকেন, আপনারা যেমন আছেন তেমনি থাকুন। কাল যেখানে পারেন চলে যাবেন। মালপত্র, চাকরবাকর, কুকুর বেড়াল সব কিছু নিয়ে। আমরাই বয়ে নিয়ে টাকে তুলে দেব। দাদা দেখেন তর্ক করা বুখা। ধাঁ করে



টেলিফোনের ধরে গিয়ে রিং করেন। কিন্তু লাইন এনগেজড। পুলিশের আশা ছেড়ে দিয়ে বৌদির দিকে অসহায় দৃষ্টিতে তাকান। বৌদি চেষ্টা করে বলেন, রামদীন, বন্দুক নিকালো। জানালায় মুখ গলিয়ে বলেন, গোলী চলগি। দো আদমীকো জান জায়েগা। ওরা বিশ্রী ভাষায় বৌদিকে যাচ্ছেতাই গালাগাল দেয়। শাসিয়ে যায় যে কাল আবার আসবে, সঙ্গে সব রকম অস্ত্রশস্ত্র ও আরো অনেক জন। লাট সাহেব ওদের পক্ষে, বড়া উজীর ওদের পক্ষে। গোলী চলগি তো দোনো তরফসে চলগি। দাদা ততক্ষণে ঠক ঠক করে কাঁপছেন। বৌদি দাপটের সঙ্গে বলেন, বড়লাট আমাদের পক্ষে, মিলিটারি আমাদের পক্ষে। ট্যাঙ্ক চালিয়ে বস্তি বিলকুল সাফ করে দেবে। পরের দিন সকালে মীর সাহেব পুলিশের গাড়ী নিয়ে উপস্থিত। বলেন, যশোবিকাশ রায়কে নিরাপদ স্থানে পৌঁছে দেবার জন্তে বেরিয়েছি। তাঁর মেয়ে টুকটুক আমাকে খবর দিয়েছে যে আপনারাও বিপন্ন। আপনাদের বোঝা তার সঙ্গে দেখা করে কালকের ঘটনার বর্ণনা শুনিয়েছে। কী লজ্জার বিষয়। শহীদকে রিং করতেই তিনি পুলিশের গাড়ী পাঠিয়ে দিয়েছেন। দুটি পরিবারের জন্তে জায়গা আছে। আধ ঘণ্টা সময় দিচ্ছি। জান বাঁচাতে চান তো অবিলম্বে তৈরি হোন। ইতিমধ্যে রায় পরিবারকে নিয়ে আসি। ওঁদেরও আধ ঘণ্টা সময় দিয়েছি। কোন ঠিকানায় যাবেন মনঃস্থির করুন। আগে থেকে টেলিফোনে খবর দিন। মনে করুন এটা মিলিটারি ইভাকুয়েশন। সাত আট দিন পর বাড়ী ফিরবেন। যাবার সময় বন্দোবস্ত করে যান কে চার্জ থাকবে। গাড়ীতে চড়ে তিনি উধাও হন।” বাবলী বলে যায়।

“এ যে রীতিমতো নাটক!” মানস কোতুলী হয়।

“উঃ। কী দুঃখের। নিজ বাসভূমে পরবাসী!” যুথিকা ব্যথিত হয়।

“টুকটুকের এটা নোবল রিভেঞ্জ, স্বপনদা বলেন। বৌদি শিউরে ওঠেন ডবল ডাইভোর্সের সঙ্গে একগাড়ীতে যেতে হবে? আমার তো ভয় করছে ওর মতলব ভালো নয়। কিন্তু কী করা যায়! বিপাকে পড়লে বাঘে হরিনে এক ঘাটে জল খায়। বৌদি কী কী সঙ্গে নেবেন চট করে স্থির করে ফেলেন। স্বপনদা কোনটা রেখে কোনটা নেবেন ভেবে পান না। তাড়াতাড়ি যা হাতের কাছে পান তাই নিয়ে গাড়ীতে ওঠান। সব দরজা জানালা ভালো করে বন্ধ করা হয়। বোঝা থাকে চার্জে। বাবুটিকে ছুটি দেওয়া হয়। ড্রাইভারটিও মুললমান। তাকে নিলে অকারণে বুঁকি নেওয়া হয়। হিন্দুরা হয়তো মেরেই

ফেলবে। বৌদি নিজের গাড়ী চালাতে জানেন। কিন্তু তালুকদারের ওখানে গারাজ পাবেন কোথায়? গাড়ী ও বাড়ী পাহারার বন্দোবস্ত করতে মীর সাহেবের সাহায্য চান। তিনি পুলিশের উপরে বরাত দেন। তালুকদারকে ফোন করা হয়। তিনি আশ্রয় দিতে খুশি হয়ে রাজী হন। এলফকেও স্বাগত জানান। গুপ্তদের হিন্দুস্থানে পার্কে নামিয়ে দিয়ে রায়েরা চলে যান রিজেন্টস পার্কে। সেখানে দে পরিবারের অতিথি হবেন। সেখানেও গারাজ পাবেন না বলে নিজের গাড়ী বাড়ীতে রেখে গেছেন। পুলিশের গাড়ীতে উঠে স্বপনদা বলেন যশোবিকাশ রায়কে, আফটার অল, শহীদ ইজ আ ব্যারিস্টার অ্যাণ্ড অ্যান অকসোনিয়ান। যশোবিকাশ বলেন, ইয়েস। হী ইজ ওয়ান অভ আস অ্যাট হার্ট। বৌদি আর টুকটুক ছু'জনেই ফেপে যান। বৌদি বলেন, গোর মেরে জুতো দান! টুকটুক বলেন, অক্সফোর্ড শু। হাসাহাসি পড়ে যায়। সেই থেকে গুরা ছু'জনে ছুই বান্ধবী। টুকটুক আর প্রেমে পড়তে চান না, বিয়ে করতে চান না। নাচ গান নিয়ে বাকী জীবনটা কাটাতে চান। ঋগ্নিগী দেবী আরাণ্ডেলের সঙ্গে যোগ দেবার কথা ভাবছেন। আমি তো জানতুম না যে স্বপনদার বাড়ী বদল করেছেন। গুর ওখানে গিয়ে রামদীন বেয়ারার মুখে বৃত্তান্ত শুনি। সে একপাল ভোজপুরীকে ডেকে এনে জাঁকিয়ে বসেছে। তাদের সকলের হাতে ইয়া ইয়া লাঠি। তারপর তালুকদারদের ওখানে গিয়ে দেখা করি। উনি যখন শোনেন আমি তেভাগার তদারক করতে মফঃস্বলে বেরোচ্ছি তখন আমাকে বলেন আপনাদের সঙ্গে দেখা করে সব কথা শোনাতে। স্বপনদার এখন লিখতে হাত কাঁপে, হাঁটতে পা কাঁপে। ডাক্তাররা বলছেন ট্রাউমা (trauma)। বৌদি বিষম ভাবনায় পড়েছেন। আচ্ছা, ওটা কি সারে না?" বাবলী . ায়।

মানস ভয় পায়, কিন্তু অভয় দিয়ে বলে, "সারে বইকি।"

বাবলী আরো বলে, "ওদিকে পুলিশের লোক গিয়ে রামদীনের কাছ থেকে সে রাত্তির ঘটনার বিবরণ শুনে লিখে নিয়ে গেছে। বস্তিতে হয়েছে ধরপাকড়। চাঁদ মিঞা এখন সদলবলে জেল হাজতে। মুসলিম লীগের উকীলরা ওদের জন্মে আদালতে জামিন প্রার্থনা করে বিফল হয়েছেন। গভর্নরের এখন টনক নড়েছে। তিনি ম্যাজিস্ট্রেট আর পুলিশের উপর কড়া হুকুম জারি করেছেন। মুসলিম লীগ গভর্নমেন্টে রয়েছে বলে গভর্নরের ছত্রছায়ায় থেকে আইন ও শৃঙ্খলা ভঙ্গ করবে এটা তিনি সহ্য করবেন না।

যে কোনোদিন বরখাস্ত করবেন। নয়তো তাঁর নিজের আসন টলমল। অবস্থার উন্নতি হচ্ছে বললে ভুল হবে না, আবার হচ্ছে বললেও ভুল হবে। হিন্দুরা এখন বরপোড়া গোত্র। তারা সিঁদুরে মেঘ দেখলে ডরায়। মুসলমানদের মধ্যে যদিও বিতর সজ্জন আছেন, তারা বহু হিন্দুকে রক্ষাও করেছেন, আশ্রয়ও দিয়েছেন তবু মুসলমানদের কাউকেই হিন্দুরা অন্তর থেকে বিশ্বাস করে না। নখী দস্তী শৃঙ্গীদের মতো মুসলমানদের থেকেও ওরা শত সহস্র হস্ত দূরে থাকতে চায়। যারা পাড়া ছেড়ে পালিয়েছে তারা আর পাড়ায় ফিরতে রাজী নয়। এ সমস্তার সমাধান গভর্নমেন্টের হাতে নয়। তিনি তাই কোয়ালিশন গভর্নমেন্টের পক্ষপাতি। কিন্তু তার জ্ঞানো জিন্নার অহুমতি দরকার। জিন্না সেটা কেন দেবেন যদি বড়লাট ও কংগ্রেস হাই কমান্ড তাঁর মুখ রক্ষা না করেন? বড়লাট কংগ্রেসের সঙ্গে বাগড় করতে অনিচ্ছুক। বাগড়া করতে হলে করতেন ব্রিটিশ স্বার্থে। কিন্তু মুসলিম লীগের স্বার্থে একটিও ইউরোপীয় জীবনকে তিনি বিপন্ন করবেন না। তিনি ভালো করেই জানেন যে কংগ্রেস আরেক দফা আন্দোলন শুরু করলে বামপন্থীরা গান্ধী, নেহরু কারো তোয়াক্কা রাখবে না। ইউরোপীয়দের পিটিয়ে তাড়াবে। মুসলমানদের গায়ে হাত দেবে না। দেশ এখন আগুন হয়ে রয়েছে। বড়লাট মুসলিম লীগের স্বার্থে বড়ো জোর এইপর্ষন্ত করতে পারেন যে নতুন গভর্নমেন্টে মুসলিম লীগের জ্ঞানো পাঁচটি আসন সংরক্ষিত থাকবে, কিন্তু ফংগ্রেসের জ্ঞানো সংরক্ষিত আসন সে হিন্দুকে দেবে না মুসলমানকে দেবে সেটা কংগ্রেসের মজি। লীগের মজি নয়। আশ্চর্যের বিষয় এই সামান্য পয়েন্টটুকু মেনে নিতে তাঁর দু' দু' মাস লাগল। স্নেহি কংগ্রেস হাই কমান্ড কংগ্রেস লীগ কোয়ালিশনের খাতিরে একজন কংগ্রেস-মুসলিমকে বাদ দিতে উদ্যত হয়েছিলেন, মওলানা আজাদ পর্যন্ত অহুমোদন করেছিলেন, কিন্তু গান্ধীজী বাধা দেন। কংগ্রেস-মুসলিমদের স্বার্থত্যাগ কারো চেয়ে কম নয়। ত্যাগের দিন যারা ত্যাগের সাথী ভোগের দিন তাঁরা ভোগের সাথী হবেন এটাই তো ন্যায়নীতি। তিনি বোধহয় অহুমান করতে পারেননি তার পলিসির পরিণাম কী হবে। হয়েছে মুসলিম লীগের প্রত্যক্ষ সংগ্রাম দিবস। যার ভুক্তভোগী অসংখ্য নিরীহ হিন্দু মুসলমান। শতকরা পঁচানব্বই জন গরিব মানুষ, যারা দিন আনে দিন খায়। আমরা এ পলিসি কী করে সমর্থন করি? এটা ন্যায়নীতি হতে পারে, রাজনীতি নয়। যাই হোক, এতে আমাদেরই লাভ হয়েছে। আমরাই এখন দুই সম্প্রদায়ের

মাঝখানে একমাত্র সেতুবন্ধ। নির্ভয়ে বিচরণ করি। উভয় পক্ষকেই অভয় দিই। আমাদের উপর লোকের আস্থা বেড়েছে। আজ যে আমরা এই মুসলিম-প্রধান জেলায় ঘুরে বেড়াচ্ছি এটা কি সম্ভব হতো যদি আমাদের পরিচয় হতো আমরা কংগ্রেসের লোক বা হিন্দু গান্ধীর শিষ্য? জ্বলি কি সে রকম পরিচয় দিয়ে মুসলমানদের মন পেতে পারছে? সৌম্যদাও কি আজকের এই পরিস্থিতিতে সেতুবন্ধন করতে পারছেন? সেতুবন্ধ তো চার বছর আগে টের করলেন।”

যুথিকা স্বপনদার জন্তে উদ্বিগ্ন। “ওঁর দ্রো ঠিক আছে তো?”

“ঘোল আনা ঠিক আছে। শকটা তো এনে নয়। প্রাণে। ওই যারা র’তের মাঝখানে এসেছিল তাদের হাতে ভাগিাস্ অস্ত্রশস্ত্র ছিল না। থাকলে বৌদির দোনলা বন্দুক কতটুকু কাজে লাগত? হিংসা পরাস্ত হতো প্রবলতর হিংসার কাছে। বৌদির অপমানের নীমা থাকত না। আর দাদার তো প্রাণটাই যেত। কথাটা নির্জলা সত্য। আমিও চিন্তা করে দেখছি মুসলমানরা যে হিংসার মার্গ ধরেছে এই মার্গ যদি হিন্দুরাও ধরত তা হলে হিন্দুর সর্বনাশ যা হতো তার চেয়ে চার গুণ বেশী হতো মুসলমানের সর্বনাশ। যেতা’ লড়ে খুঁটির জোরে। ওরা লড়ছে ইংরেজদের জোরে। সে খুঁটিও আর আগের মতো জোরদার নয়। তার পরীক্ষা হয়ে গেল এবার কলকাতায়। কলকাতাব তিনদিনের দাঙ্গাহাঙ্গামাকে যদি ব্যাটল অভ্ ক্যালকাটা বলেন তা হলে হিন্দুরাই জিতেছে, মুসলমানরা হেরেছে। প্রত্যেকবারই এ রকম হবে। এটা একটা ডিসাইমিভ ইভেন্ট। যেমন ব্যাটল অভ্ প্ল্যাসী। আমার খুব খারাপ লাগছে একথা ভাবতে যে হিন্দুরা মুসলমানদের চেয়েও হিংস্র হয়েছে। ওরা ছিল মাইল্ড হিন্দু। হয়েছে ওয়াইল্ড হিন্দু। বর্বরতার প্রতিযোগিতায় ওরাই পয়লা নম্বর। ওদের হাতে হুংগ ভারত সঁপে দিয়ে যাবে কেন ইংরেজ? মুসলমানদের নিরাপত্তার জন্তে ওদেরও একভাগ দিয়ে যাবে। এটা একরকম নিশ্চিত হয়ে গেল। তবে এটাও নিশ্চিত যে কলকাতা পাকিস্তানের ভাগে পড়বে না।” বাবলীর সিদ্ধান্ত।

মানস গভীরভাবে বিচলিত হয়। তার তাৎপর্য কী বোঝো, বোন বাবলী? ভারতীয় জাতীয়তাবাদীদের তিন পুরুষের তপশ্যা ব্যর্থ হবে। আর তাঁদের মধ্যে যারা গান্ধীপন্থী তাঁদের এক পুরুষের সাধনা মুছে যাবে। সৌম্যদা তার শাহাদাত দিয়ে কী করে এ তরঙ্গ রোধ করবে? আর তার বাপুয় যা হবে তা কি বিয়োগান্ত নাটকের শেষে যা হয়?”

যুথিকা বেদনা বোধ করলেও হাসির ভাণ দিয়ে ঢেকে দেয়। “তোমরা থাকতে আমাদের ভাবনা কী? একটা বিপ্লব টিপ্তব কিছু ঘটানো। মানুষের মনটা এই মধ্যযুগের মিথ্যা বন্দ থেকে মুক্ত হোক। এরাও বুর্জোয়া, ওরাও বুর্জোয়া। ঝাঁহা কংগ্রেস তাঁহা মুসলীম লীগ। বুর্জোয়াতে বুর্জোয়াতে এক মুহূর্তেই কোলাকুলি হবে, যেই দেখবে লাল কেল্লার মাথায় লাল বাণ্ডা উড়ছে। প্রতিবিপ্লবের জন্মে ওরা হিন্দু মুসলমান নিবিশেষে এককাটা হবে। আজকের নেতাদের দিন ফুরিয়ে এসেছে। কী বল, ভাই? তোমার নামটি কী?”

“মাধুরী হোম। আমি এই শহরেরই মেয়ে। গাইড হয়ে এসেছি। কমরেড নই। রাজনীতি বুঝিনে। মেয়েদের স্কুলে পড়াই।” বান্ধবী বলে।

“ওঃ। আমার ধারণা ছিল তুমিও ঘরসংসার ফেলে বিপ্লব করে বেড়াচ্ছ। এসো একটু খাবার টেবিলে বস। যাক! আচ্ছা, বাবলী, বৌদিকে কেমন দেখলে বললে না তো। আর তাঁর এল্‌ফকে।”

“বৌদি হোমসিক। আর এল্‌ফ পরের বাড়ীতে এসে প্রতিক্রিণে অকৃত্রিম করছে সে আর স্বাধীন নয়। তার মুখে রা নেই। দেখে মায়া হয়। স্বপনদা তো বলছেন আর ওমুখো হবেন না। ওইসব লোকের মুখ দর্শন করবেন না। শেষে কি স্বামীস্বীতে ছাড়াছাড়ি হয়ে যাবে? কলকাতার দাস্রায় ওঁদের সোনার সংসার ছারখার হবে? এটাও কি কম ট্রাজিক?” বাবলী জিজ্ঞাসা করে। জিজ্ঞাসার ভিতরেই উত্তর।

## ॥ চবিশ ॥

ভোজনের মাঝখানে মানস বলে, “বোন বাবলী, তোমার কাছে আমার একটি অনুরোধ আছে। তুমি সোজা পথে কলকাতা ফিরে না গিয়ে বাঁকা পথে ঘুরে যেতে পারবে?”

“কেন পারব না? তবে পার্টির কর্মীদের সঙ্গে পরামর্শ করতে হবে। জানো তো, পার্টি ফার্স্ট। কিন্তু ব্যাপার কী, বলো তো?” বাবলী বিস্মিত।

“তুমি স্বপনদাদের খবরটা জুলিদের একবার শুনিয়ে গেলে ভালো করতে। সেইসঙ্গে জুলির মায়ের খবরটাও।” মানস উত্তর দেয়।

“নিশ্চয়। আমি কালকেই রওনা হয়ে যাব। তার আগে একটা টেলিগ্রাম করে দিয়ো। জুলিটাকে দেখতে এত ইচ্ছে করে। দেখা হলে খুব বাগড়া করব ওর সঙ্গে। লডাই টড়াই ছেড়ে কেমন বর নিয়ে ঘরসংসার করছে।” বাবলী হাসে।

সবাই হাসাহাসি করে। যুথিকা বলে, “তা তোমাকেই বা মানা করছে কে ? পার্টিতেও তো সুপাত্রেয় অভাব নেই। বিয়ের নজীরও তো রয়েছে।”

“আচ্ছা, যুথীদি, তুমি কি এদেশের মেয়ে নও ? তুমি কি জানো না যে শস্তুর শান্তুডীর মত না থাকলে বিয়ে সুখের হয় না ? জুলির শস্তুর শান্তুডী থাকলে বিয়েই হতো না। তার বদলে বিপ্লব হতো।” বাবলী রসিকতা করে।

“খাক, বোন বাবলী। কেঁচো খুঁড়তে সাপ বেরিয়ে পড়বে। ও প্রসঙ্গ খাক। এখন শোন। তোমার হাতে আমি একখানা চিঠি দিতে চাই। সেটা সৌম্যদার জন্তে। ওর মাথায় একটা ভূত চেপে রয়েছে, শাহাদাত ! ও শহীদ হবে। তুমি কি ওকে বুঝিয়ে বলতে পারবে যে বিয়ের পরে শহীদ হওয়ার স্বাধীনতা ওর নেই ? শহীদই যদি হবে তো বিয়ে করতে গেল কেন ? অমন বৌ বহু ভাগ্যে মেলে। ও বেচারি শবরীর মতো কতকাল প্রতীক্ষা করেছে। ওর কি আর কারো সঙ্গে বিয়ে হতো না ? পাত্র তো বিলেত থেকে বার বার খাওয়া করে এসেছিল। ওই, যার সঙ্গে মিলির বিয়ে হলো।” মানস বলে।

“ওমা, তাই নাকি। মিলির বর জুলিকে বিয়ে করতে এসেছিল ? কাব সঙ্গে কার বিয়ে হয় প্রজাপতিই জানেন ” বাবলী যেমন শুনেছে।

“সত্যি। আমিই কি জানতুম যে এই বরটির সঙ্গে আমার বিয়ে হবে ? ইনিও সৌম্যদার দোসর। ইনি নীলব দর্শক হবেন বা। যুদ্ধের সময় যুদ্ধক্ষেত্রে যাবেন। কলকাতার দাঙ্গার খবর শুনে ছটফট করছিলেন, দাঙ্গাটাও তো একরকম যুদ্ধ। ইনি বলেন উত্তরাধিকারের যুদ্ধ। পদত্যাগের কথা তো হামেশাই বলেন। তা তুমি সৌম্যদাকে বুঝিয়ে বলবে যে দেশ তাঁর কাছে শহীদিয়ানা চায় না। ইংরেজরা এখন যাবার মুখে, তারাই ডেকে নিয়ে কংগ্রেসকে তাদের সিংহাসনে বসিয়ে দিচ্ছে। পরশু জবাহরলালের অভিব্যেক। কৈকেয়ী বাগড়া দিতে চেষ্টা কবেছিলেন, ব্যর্থ হয়েছেন। কলকাতা ছাড়া আর কোথাও বিশেষ কোনো কাণ্ডকারখানা হয়নি। আর কলকাতায় যা হয়েছে তা তো ইংরেজের বিরুদ্ধে বিলাহ নয়, ইংরেজদের সঙ্গে যারা এককাল

লড়াই করে এসেছে সেই হিন্দুদের উপরেই অঘাচিত আক্রমণ। গজনীর মাহমুদের মতো। ইতিহাসের পুনরাবৃত্তি কিন্তু অত সহজ নয়। ওদের গজনীতেই ফিরে যেতে হবে। ইংরেজরা যাচ্ছে, ওরাও যাক।” যুথিকা উত্তেজিত হয়ে বলে।

মানস মুহূ হেসে বলে, “গজনীতে ফিরে যেতে চাইলেও পাশপোর্ট লাগবে। ভিসা লাগবে। যতজন এসেছিল তাদের সংখ্যা নগণ্য। বাড়তে বাড়তে যতজন হয়েছে তাদের সংখ্যা আফগানিস্থানের মোট জনসংখ্যাকেও ছাড়িয়ে যায়। তা হলে আফগানরা যাবে কোথায়? একই কথা মোগল বংশধরদের বেলাও। তা ছাড়া ন'কোটি মুসলমানের সবই তো আরব, ইরানী, তুর্ক, আফগান, মোগল বংশের নয়। তারা স্বীকার না করলেও তাদের চেহারা, তাদের ভাষা ধরিয়ে দেয় যে তারা ভারতীয় বংশধর। ধর্মাস্তর বংশাস্তর নয়। এখন এদের পা কী স্থানে যাবে? এই প্রশ্নের উত্তর তোমরা কেউ দিতে পারো?”

“পাকিস্তানে।” যুথিকা, বাবলী, মাধুরী একসঙ্গে বলে ওঠে।

তখন মানস বলে, “কেউ ওদের যেতে বাধ্য করছে না। ওরাই পা তুলে বসে আছে। ইংরেজ যাচ্ছে, স্কটল্যান্ড ওরাও যাবে। ইংরেজ যাবে তার হোমে, অতএব ওরাও যাবে ওদের হোমল্যান্ডে। যাওয়াটা দু'দশবছর পরে হলে চলবে না। একই সঙ্গে, একই সময়ে। বরং একদিন আগে। হিন্দু নেটিভদের আওতায় বা অধীনে একটা দিনও নয়। সেই দুর্ভাগ্য এড়ানোর জন্যে ওরা প্রত্যক্ষ সংগ্রাম বাধিয়ে দেবে। সে সংগ্রাম অস্ত্রশস্ত্র ও মশাল নিয়ে। হিন্দুরা যদি সমান সর্হিংস হয় তবে যা হবে তা সাধারণ দাঙ্গা নয়, মধ্যযুগের ইউরোপে যাকে বলা হতো 'ফিউরি'। অন্ধ আক্রোশে পরস্পরের উপর কাঁপিয়ে পড়ে বহু পশুর চেয়েও নৃশংস হওয়া। জিন্না সাহেব বছর পাঁচ ছয় আগে এডওয়ার্ড টমসনকে বলেছিলেন, পাকিস্তানের জন্যে লড়াই বাধবে গ্রামে গ্রামে গঞ্জে গঞ্জে শহরে শহরে মহলায় মহলায়। টমসন চমকে ওঠেন। এটা কি কখনো সম্ভব? জিন্না সাহেব দেখিয়ে দিলেন যে সম্ভব। আপাতত কলকাতায়। মুসলমানরা যদি জেতে তবে তো পাকিস্তান আদায় হবেই, যদি হারে তা হলেও পাকিস্তানের কেস মজবুত হবে। সম্রাটের দরবারে হিন্দুদের অত্যাচারের দোহাই দিয়ে পাকিস্তান প্রার্থনা করা হবে। সে প্রার্থনা মঞ্জুর হবেও। হিন্দু মুসলমানের সম্পর্ক যেন নর্মান ও অ্যাংলো-স্রাকসনের সম্পর্ক।

তেমনি পুরাতন। তেমনি অবিচ্ছেদ্য। কে যে নরমান, কে যে অ্যাংলো-স্যাকসন তা কি এখন জোর করে বলবার উপায় আছে? একই রকম পোশাক পরলে, দাড়ি গোঁফ কামালে কেউ কি বুঝতে পারে কে মুসলমান, কে হিন্দু? হিন্দুরাও চোন্ত উহ্ বলে, মুসলমানরাও খাঁটি ভোজপুরী। মেয়েদের বেলা তো কথাই নেই। গ্রামে গ্রামে যখন লড়াই বাধবে তখন দেখবে রাতারাতি সবাই ভোল পালটেছে বা সদলবলে পালিয়েছে। এখন আমার ভাবনা কলকাতার মহামারী যেন পূব বাংলায় সংক্রামিত না হয়। আমাদের ম্যাজিস্ট্রেট ও পুলিশ সাহেব মুসলমান হলেও কমিউনাল নন। তাঁরা শান্তিরক্ষা করতে দৃঢ়প্রতিজ্ঞ। আমিও তাই। কিন্তু আমরা আর ক'জন! তবে আমাদের বিশ্বাস অধিকাংশ অধিবাসীই শান্তিপ্রিয়। তারা সহযোগিতা করবে।”

এর পর ওদের গল্প করতে বলে মানস চলে যায় ওর লেখার টেবিলে! চিঠি লেখে সৌম্যদাকে ও স্বপ্নদাকে। চিঠি দুটো বাবলীর হাতেই পাঠাবে। বাবলীকে অচরোধ করবে সৌম্য ও জুলির সঙ্গে দেখা করে কলকাতা ফিরতে।

সৌম্যকে লেখে, “স্টেটসম্যান যাকে বলছে গ্রেট ক্যালকাটা কিলিং আমি তাকে বলব সেন্ট বার্থোলোমিউজ ডে ম্যাসাকার। প্যারিসে যা ঘটেছিল প্রায় চার শতাব্দী পূর্বে। রাজমাতার প্ররোচনায় ক্যাথলিকরা প্রটেস্ট্যান্টদের সদলবলে নিপাত কিংবা বিতাড়ন করে। বিতাড়িত প্রটেস্ট্যান্টরা ইংলেণ্ডে গিয়ে রানী এলিজাবেথকে জানায়। এলিজাবেথের প্রতিবাদে ক্যাথারিন ডি মেডিসি উত্তর দেন, তোমার যদি ইচ্ছে হয় তুমিও তোমার প্রটেস্ট্যান্টদের নিপাত কিংবা বিতাড়ন করতে পারো। তাই হয়। এখন আমার আশঙ্কা এদেশেও সেইরকম কিছু না ঘটে: অহিংসাবাদীরা অল্প রকম উত্তর খুঁজে বার করতে হবে। যাতে হিন্দুও বাঁচে আর স্বস্থানে বাস করে। মুসলমানও বাঁচে আর স্বস্থানে বাস কবে। বাপু বোধ হয় এটাকে সাধারণ ‘ল অ্যাণ্ড অর্ডার’র প্রশ্ন মনে করে ব্রিটিশ শাসকদের উপর ছেড়ে দিয়ে নিশ্চিন্ত আছেন। কিন্তু তিনি কি জানেন না যে এটা তার চেয়েও সীরিয়াস? এটা একপ্রকার গৃহযুদ্ধ। কলকাতার ঘটনার বিবরণ না শুনিছি ও পড়ছি তাতে মনে হয় হিন্দু মুসলমানের ক্রোধ এত প্রচণ্ড যে তারা বন্দুক বেয়োনেট হাতে পেলে তাও ব্যবহার করত। ডাইনামাইট হাতে পেলে তাও। নন্দীর এক দিকে হিন্দুদের ক্রট মেজরিটি। অন্যদিকে মুসলমানদের ক্রট ফোর্স। এর



কোনো সাময়িক সমাধান নেই। রাজনৈতিক সমাধানই ভেবে বার করতে হবে। বাপু থাকতে আর কে সে কাজ করতে পারেন? আমরা যারা 'ল আও অর্ডার' বজায় রাখতে নিযুক্ত তাদের দৌড় ততদূর নয়। আর আমরাও তো হিন্দু মুসলমানে বিভক্ত। হিন্দু যদি কাঁকে কাঁকে মরে আমিও কি উত্তেজিত না হয়ে পারি? তেমনি, মুসলমান যদি কাতারে কাতারে মরে কোন্ মুসলিম অফিসার মাথা ঠাণ্ডা রেখে মন দিয়ে হিন্দু রক্ষা করতে পারবেন? বলা বাহুল্য ইউরোপীয় অফিসার এখানে একজনও নেই, থাকলেও তিনি হয়তো কলকাতার গোরা পুলিশের মতো নিরপেক্ষ ও নিষ্ক্রিয় থাকতেন। যতদূর শুনেছি। বাস্তবিক, তাঁরা তো যাবার মুখে। তাঁদের কী স্বার্থ, কেন তাঁরা হিন্দুর দিকে বা মুসলমানের দিকে ঝুঁকতে চাইবেন? ঝুঁকলে সমতা রাখবেন। সেটাই তাঁদের পলিসি। বেশী হিন্দু বা বেশী মুসলমান ধরলে বা মারলে পক্ষপাতিত্বের অভিযোগ উঠবে। ওঁরা দু'পক্ষেরই গুডউইল চান। কোনো একপক্ষের নয়।"

স্বপনদাকে যা লেখে তা কতকটা একই প্রকার। তার সঙ্গে যোগ করে দেয়, "তুমি ফরাসী মানুষ। তুমি কী না দেখেছ? চারশো বছর আগে সেন্ট বার্থোলোমিউজ ডে ম্যাসাকার। জনগণ দারুণ কমিউনাল ও মধ্যযুগীয়। তার দু'শো বছর বাদে তাদের উত্তরপুরুষরা আশ্চর্যরকম সেকুলার ও আধুনিক। রাজমাতার উত্তরনারী রাজরানী মারী আঁতোয়ানেতকেই তারা গিলোটিনে নিপাত করে। রাজত্বকেও উচ্ছেদ করে। ক্যাথলিক চার্চের সম্পত্তি রাষ্ট্রায়ত্ত্ব করে। চার্চের উপর থেকে পোপের আধিপত্য রহিত করে। চার্চের হাত থেকে শিক্ষাব্যবস্থা কেড়ে নেয়। আইনকাহন বদলে দেয়। সব মিলিয়ে যা হয় তাকেই বলে ফরাসীবিপ্লব। অপেক্ষা করো আর ছাখো। এইটুকুকেই তোমার হাত পা কাঁপছে! আরো কত কী দেখতে হবে, তখন তো হুংকম্প হবে। যদি না নিজেকে সামলাতে সমর্থ হও। বৌদিই তোমাকে সামলাবেন। তিনি শক্তিমতী।

তোমার কর্তব্য দেশের লোককে বৃহত্তর ও মহত্তর ভূমিকার জন্মে প্রস্তুত করা। ভলতেয়ারের মতো, রুশোর মতো, দিদেরোর মতো। এনসাইক্লোপীডিস্টদের মতো। হাত গুটিয়ে বসে না থাকলেই হাতের কাঁপুনি থেমে যাবে। পায়ের কাঁপুনিও থামবে সভায় সমিতিতে গেলে। উঠে দাঁড়াস, উঠে দাঁড়াস, ভেঙে পড়িস না রে।"

চিঠিখানা বাবলীর হাতে দেবার আগে মানস সবাইকে পড়ে শোনায়।  
 বাবলী বলে, “যদি কিছু না মনে কর, মানসদা, তোমার খীসিসের বিসমিল্লাতেই  
 গলদ। কংগ্রেস নেতারা তো বড়লাটের আহ্বানে ইন্টারিম গভর্নমেন্টে  
 যোগ দিতে পা বাড়িয়েছিলেনই আজাদকে বাদ দিয়ে। কিন্তু গান্ধীজীর  
 ধর্মুর্ভঙ্গ পণ আজাদকে বা অন্য একজন গ্রাশনালিস্ট মুসলমানকে সঙ্গে নিয়ে  
 যেতে হবে। নয়তো যাওয়া চলবে না। ওদিকে জিন্না সাহেবেরও অনমনীয়  
 জেদ লীগপন্থী ভিন্ন অন্য কোনো মুসলমান গেলে লীগ নেতারা যোগ দেবেন  
 না। বড়লাট একপক্ষকে তুষ্ট করতে গিয়ে আরেক পক্ষকে রুষ্ট করতে চান  
 না। তাই কেয়ারটেকার গভর্নমেন্ট গঠন করেন। সেটা নিতান্তই ঠিকা  
 বন্দোবস্ত। শেষে মনঃস্থির করেন যে কংগ্রেসের শর্তে রাজী হবেন, একজন  
 গ্রাশনালিস্ট মুসলমানকে কংগ্রেসের জন্মে নির্দিষ্ট আসনের একটা দেবেন।  
 তার মানে গান্ধীর পণই বহাল রইল, জিন্নার জেদ খারিজ হলো। জিন্নার  
 রাগটা পড়ল ইংরেজ ও কংগ্রেস উভয়ের উপরেই। রাগের মাথায় তিনি  
 ডাইরেক্ট অ্যাকশনের প্রস্তাব পাশ করিয়ে নিলেন ও ঘোষণার দিন ধার্য  
 করলেন। ব্যস্, অমনি বেধে গেল ভারতের বিভিন্ন স্থানে দাঙ্গা। অত্যাণ্ড  
 স্থানে সে আঙুন সঙ্গে সঙ্গে নিবিয়ে ফেলা হয় কিংবা জলতেই দেওয়া হয়  
 না। ইংরেজ ও কংগ্রেস উভয়েরই পলিসি এক। ব্যতিক্রম একমাত্র  
 কলকাতা। আর সে কী বিফোরক ব্যতিক্রম! এটা বিলেতের লেবার  
 গভর্নমেন্ট পছন্দ করেননি, ভারতের বড়লাটও না। বাংলার গভর্নরও যে  
 করেছেন তাও না। সুহরাবদীকে বিশ্বাস করতে গিয়েই এ ব্যাপার ঘটেছে।  
 তুমি নিশ্চিন্ত থাকতে পারো বাংলাদেশের আর কোনোখানেই হিন্দু মুসলমানের  
 দাঙ্গা বাধবে না। মুসলিম লীগের ডাইরেক্ট অ্যাকশন একটা কঁাকা আওয়াজ।  
 কংগ্রেস একজন গ্রাশনালিস্ট মুসলমানকে নিয়ে ইন্টারিম নর্মেটে যাচ্ছে।  
 তবে ওটাও প্রোভিজ্ঞনাল গভর্নমেন্ট নয়। ওটাও কঁাকি। ওয়েভেলের  
 নায়েব হয়ে নেহেরু ইংরেজের জমিদারি চালাবেন। স্বাধীনতা না হাতী!  
 বিপ্লব! বিপ্লব ছাড়া লাচ্চা আজাদী হতে পারে না। বিনা বিপ্লবে আজাদী  
 বুটা আজাদী। এই হলো যথার্থ খীসিস। আর তোমার ওই ফরাসী বিপ্লবও  
 সেকেলে বিপ্লব। একেলে বিপ্লব হচ্ছে রুশ বিপ্লব। তার জন্মে দেশকে তৈরি  
 করতে হলে রুশো, ভলতেয়ার কোনো কর্মের নয়। মার্কস, এঙ্গেলস, লেনিন,  
 স্টালিন পড়তে হবে, গণনাট্য অভিনয় করতে হবে। অমনি করে হবে গণ-

ভাগরণ ও রণ আয়োজন। অহিংসা! হা হা! হো হো! হি হি! সৌম্যদার  
যা হাশ্চকর উপায়! এটা একটা মীথ। মানে মিথ্যা।”

মানস চূপ করে থাকে। যুথিকা মুখ খোলে। “তোমরা কবে একেলে  
বিপ্লব ঘটাবে ততদিন ঘটনার স্রোত অপেক্ষা করবে না। ইনিশিয়েটিভ  
এতকাল গান্ধীজীর হাতেই ছিল, এখন জিন্না সাহেবের হাতে চলে গেছে।  
এই নির্মম সত্যকে বাপু কী ভাবে গ্রহণ করেন, কী ভাবে এর সঙ্গে মোকাবিলা  
করেন তার উপর নির্ভর করছে ভারতের ভবিষ্যৎ।”

বাবলী বিদায় নিয়ে পরের দিন সৌম্যর কর্মস্থলের অভিমুখে রওনা হয় ও  
সেইদিনই পৌছয়। সৌম্য তখন তার আশ্রমে উপস্থিত ছিল না। জুলি তার  
কুটিরের মেজের উপর আলপনা আঁকছিল। দিল্লীতে আজ প্রোভিডেন্সাল  
গভর্নমেন্ট। কী আনন্দ! কী আনন্দ! কী আনন্দ!

জুলির সরল বেশ, সরল ভূষা, গৃহকর্ম নিপুণতা দেখে বাবলী রসিকতা  
করে, “তুই যে পুরোদস্তুর কস্তুরবা বনে গেলি রে! তোকে দেখে বিশ্বাস হয়  
না যে তুই জুলি। পতিব্রতা বলে এতখানি পতিব্রতা! তুই যে সীতা,  
সাবিত্রী, সতী, দময়ন্তী, শৈব্যা প্রভৃতির একজন হয়ে গেলি রে। চিরন্তনী  
ভারত নারী। পরে যখন মা হবি তখন উমা হৈমবতী। অবাক করলি,  
জুলি।”

কলকাতার প্রসঙ্গ ওঠে। বাবলী স্বপনদাদের দুর্ভোগের কাহিনী বিস্তারিত  
ভাবে শোনায়। এলফের কথাও ভোলে না।

“আমার মা কেমন আছেন? অনেকদিন খবর পাইনি।” জুলি স্বধায়।

“দেখা হয়নি। খোঁজও নিতে পারিনি। তবে ও পাড়াটা এখনো  
পাকিস্তান হয়নি। সবাই নিরাপদ।” বাবলী অভয় দেয়।

এর পরে অনেক সুখদুঃখের কথা। জুলিকে মিলি দু’চক্ষে দেখতে পারে  
না। ওর মা বাবার ভালোবাসার টানে সে ওঁদের ওখানে এতদিন ছিল, এখন  
ওর নিজের কুটিরে উঠে এসে হাঁক ছেড়ে বেঁচেছে। কিন্তু এদিকেও নিন্দুকের  
টিটকারী শব্দেতে হচ্ছে। দিশী কুঁড়ে ঘরে বাস করে, বিলিভী টয়লেটে  
মাং করে।

“ওদের চুকলিতে কান দিতে নেই, ভাই। গায়ে গায়ে বেড়াতে গিয়ে  
আমারও কি কম অসুবিধে হচ্ছে? তা বলে তো কমোড আশা করতে  
পারিনে। তুই বোধহয় গ্রাম অঞ্চলে যাসনি। শহরে বসেই গ্রাম উন্নয়ন

করছি। আজ হোক, কাল হোক তোকেও গ্রামে গ্রামে ঘুরতে হবে। যদি শত্যা কস্তুরবা হয়ে থাকিস। ওইটেই অ্যাসিড টেস্ট।” বাবলী খিল খিল করে হাসে।

“গ্রামে যাইনি তা নয়।” জুলি সঙ্কোচের সঙ্গে বলে। “দিনের বেলা চেপে রেখেছি। রাতের অন্ধকারে মাঠে জঙ্গলে গেছি। এখন বুঝতে পারি কেন এত নারীহরণ হয়। স্বরাজ তো হলো। এবার এর একটা স্থায়ী প্রতিকার চাই।”

“স্বরাজ তো হলো!” ব্যঙ্গ করে বাবলী। “রক্তবর্ণ শূণাল ওই জবাহরলাল নেহরু। বিপ্লবও করেননি, জারকেও তাড়াননি, জারের অনুগ্রহে তাঁর শাসনপরিষদের পারিষদ হয়ে বলছেন ওটাই নাকি প্রোভিডেন্সাল গভর্নমেন্ট! দু’দিন বাদে লাখি মেরে বিদায় করে দেবে, অ-পদস্থ হয়ে জেলে ফিরে যাবেন, মুসলমানরা এমনি আনন্দের সঙ্গে ‘মুক্তি দিবস’ পালন করবে। আর জিন্না শাসাবেন, কংগ্রেস গদীতে ফিরে এলে আবার তুলকালাম কাণ্ড করব। লেনিনের ভাষায় কথা বললে কী হবে? লেনিন তো নন। গান্ধীও নন। আসলে উনি একজন ফেবিয়ান। লেবার গভর্নমেন্টের বেশীর ভাগ সদস্যই ফেবিয়ান সোসাইটির সদস্য। ওঁরাও যে শক্ত হয়ে গদীতে বসতে পারবেন তাও নয়। রাজতন্ত্রের ছত্রছায়ায় সমাজতন্ত্র প্রতিষ্ঠা করতে যাওয়া এক দিবাস্বপ্ন।”

এমন সময় সোম্যার প্রবেশ। হাতে সাদ্ভিভরা লাল পদ্ম। বাবলী উঠে দাঁড়ায়। কী মনে করে আত্মমি প্রণত হয়।

সোম্য চমকে ওঠে! “ও কী! কমিউনিস্টরাও প্রণাম করে নাকি!”

“তোমার কাছে আমি কমিউনিস্ট নই, আমি ছোট বোন। তুমি ছাড়া তুমি একজন মানুষ নন্ত। মাথা আপনি নত হয়ে আসে।”

আচার্য প্রফুল্লচন্দ্রের মতো ওর পিঠে একটা কিল ব দেয় সোম্য। বলে, “এই যে কুটিরটা দেখছ এটা আচার্য প্রফুল্লচন্দ্রের আত্মাইঘাটের কুটিরের অনুকরণে তৈরি হয়েছে। সাজানো হয়েছে। সিলিং থেকে শিকেয় করে ঝুলছে হাঁড়ি পাতিল। তাতে চিঁড়ে, মুড়ি, খই, পাটালি, বাতাসা, দুধ, দই, ছানা, চা, চিনি। দড়ি ধরে টান দিলে ঝড় ঝড় করে নোম আসে। কোন্টো খাবে, বলো।”

বাবলী ইতস্তত করে। সোম্য তখন ওর সঙ্গিনীর দিকে তাকায়। সেও প্রণাম করেছিল। “তোমার পরিচয় তো দিলে না।”

“মুরলারানী সরখেল। আমি এইখানকারই মেয়ে। বেহলাদির গাইড হয়ে এসেছি। কিন্তু কমিউনিস্ট নই।” মেয়েটি বলে।

“বেহলাদি! বেহলাদিটি কে?” সৌম্য বাবলীর দিকে তাকায়।

“ওঃ! তোমরা জানো না যে আমাদের একটা ছদ্মনামও থাকে। পুলিশের চোখে ধুলো দিতে হলে ও ছাড়া আর উপায় কী! লেনিন, স্টালিন, ট্রটস্কি, গকি এসব ছদ্মনাম ছাড়া আর কিছু নয়। আমারও তেমনি ছদ্মনাম বেহলা। হিন্দুদের কাছে বেহলা দেবী। মুসলমানদের কাছে বেহলা বিবি। কিন্তু যতই যাই করি না কেন পুলিশ সব খবর রাখে।” বাবলী হাসে।

সৌম্য শিউরে ওঠে। “তুমি কি বোঝাতে চাও আমাদের আশ্রমেও?”

“হ্যাঁ, তোমাদের আশ্রমেও। তেমনি, পুলিশেও আমাদের লোক আছে। কোথায় নেই? প্রত্যেকটি আপিসেই। প্রত্যেকটি স্কুল ও কলেজেই। এই যুদ্ধের স্বযোগ নিয়ে আমরা সর্বত্র ঢুকেছি।” বাবলী হাসিমুখে বলে।

জুলি কৌতূহলী হয়ে স্বধায় লখিন্দর বলে কেউ আছে কি-না। বাবলী হেসে উড়িয়ে দেয়। “কোন সাহসে লখিন্দর হবে? সাপের কামড়ে মরবে না? তখন ওকে বাঁচাবার জন্তে আমাকে ভেলায় করে ভাসতে হবে নাকি?”

দড়ি টেনে একে একে নামানো হয় হাঁড়ি পাতিল। যে যার পছন্দ মতো খায় যেটা খুশি।

“তোরা আজ এইখানেই ভাত খেয়ে যাবি। সবাই মিলে একটু গল্প গুজব করা যাবে। রাজনীতি নয়।” জুলি নিমগ্ন হইয়া যায়।

বাবলী রাজী হয়। তখন জুলি রান্নাঘরে গিয়ে রান্নার উত্থোগ করে। মুরলা তার সার্থী হয়। কুটিরে আর একটি মেয়েও ছিল। আশ্রমিকা। কালী।

বাবলী সৌম্যকে স্বপনদার কাহিনী শোনায়। সেটা শোনানোর জন্তেই এখানে আসা। মানসের অনুরোধে। স্বপনদা নিজে তো লিখবেন না, হাত কাঁপে।

“স্বপনদা তো বৌদির মতে প্রচ্ছন্ন মুসলমান। ওঁর মাতুল বংশ মোগল আমলের রইস। তাঁদের লাইব্রেরীতে এনতার ফার্সী কেতাব। আদব কায়দাও অনেকটা অভিজাত মুসলমানদের মতো। তাঁদের মতো সেই দোষ দুটোও ছিল। সুরা ও সাকী। ওঁরা লখনউ থেকে, বেনারস থেকে বাদ্গীদের আনিয়ে গান শুনতেন, নাচ দেখতেন। স্বপনদার শৈশবটা তো গুঁশদাবাদের নবাবী আবহাওয়াতেই কেটেছে। সেই মানুষকে যে মুসলমানরাই ঘরছাড়া

করবে এটা কি কখনো ভাবা যায় ? এর অভাবনীয়তাই তাঁকে বিহ্বল করেছে। বৌদিকে নয়।” বাবলী বিবরণ দিয়ে বলে।

সৌম্য দুঃখ প্রকাশ করে। “শুধু প্রচ্ছন্ন মুসলমানরা কেন, প্রকাশ্য মুসলমানরাও আজ দারুণ এক বিভীষিকার রাজত্বে বাস করছেন। ইংরেজ থাকতেই এই ! ইংরেজ চলে গেলে মুসলিম লীগ যে কী না করবে তাই ভেবে মুসলমানরাও আতঙ্কিত। মোলানা ইসমাইল হোসেন জালালাবাদীর নাম শুনেছ ? খেলাফৎ আন্দোলনে তিনি ও আমি জেলবন্দী ছিলাম। সেদিনকার অনেকেই মুসলিম লীগে যোগ দিয়ে ঘোরতর কমিউনাল হয়েছেন। কিন্তু মোলানা সাহেব এখনো খাদি পরেন, চরকা কাটেন, গঠনের কাজে আমার সঙ্গে সহযোগিতা করেন। যদিও গান্ধীজীর মতো কংগ্রেস ছেড়ে দিয়েছেন। এমন মাহুঘের উপরেও লীগপন্থীদের রোষ। কেন তিনি পাকিস্তান সমর্থন করেন না ? কেন তিনি ডাইরেক্ট অ্যাকশন দিবসের অনুষ্ঠানে যোগ দেননি ? তাঁর নাম এখন হয়েছে কালো ভেড়া। মুসলমানরা আর সবাই শাদা ভেড়া। ওরা ইংরেজ সরকারের বিরুদ্ধে নামকা ওয়াস্তে একটা প্রস্তাব পাশ করেছে বলে ওরা নাক লয়ালিস্ট নয়। ওরাই খাটি গ্যাশনালিস্ট। মুসলিম গ্যাশনালিস্ট। আর মোলানা সাহেব নাকি লয়ালিস্ট। তাঁকে ওরা একধরে করেছে। পারলে ধরছাড়া করবে। দিল্লীতে আজ যে রদবদল হচ্ছে তাতে থাকছেন আজাদের বদলে আসফ খান। তিনি কি মুসলমান নন ? আর থাকছেন আলী জহীর ও শাফাত আহমদ খান। এঁরাও কি মুসলমান নন ? শাফাত আহমদকে বার বার ছোঁরা মেরেছে এক লীগপন্থী মুসলমান যুবক। ভদ্রলোকের প্রাণ নিয়ে টানাটানি। স্বপনদার তো প্রাণ নিয়ে টানাটানি নয়। প্রকাশ্য মুসলমান হলে সেই আশঙ্কা ছিল।”

বাবলী স্বীকার করে যে লীগপন্থীদের পয়লা নম্বর শত্রু এখন পাকিস্তান-বিশুদ্ধ অল্প দলের মুসলমানরাই। তবে কামউনিষ্ট মুসলমানদের কথা আলাদা। তাঁরা পাকিস্তানের জন্তে মন খোলা রেখেছেন। হয় ভালো, না হয় ভালো। হলে তাঁরা পাকিস্তানেও থাকবেন, হিন্দুস্থানেও থাকবেন। কংগ্রেসীদের মতো পাকিস্তান ছাড়বেন না। এটা সুবিধাবাদ নয়, এটাই বাস্তববাদ।

জুলি অঁতকে ওঠে। “তুই কি বলতে চাস পাকিস্তান হলে আমাকেও এই আশ্রম, এই কুটির ছাড়তে হবে ?”

“যদি কংগ্রেসে থাকিস তা হলে ছাড়তে হবে। নিছক গঠনের কাজ নিয়ে

থাকলে কেউ তোকে আশ্রম ছাড়তে, কুটির ছাড়তে বলবে না। কিন্তু তুই কি রাজনীতি ভুলতে পারবি?” বাবলী সন্দেহ করে।

সোম্য নীরব থেকে কী যেন চিন্তা করে। তারপরে বলে, “না, বাবলী, আমি ভুলতে পারব না যে আমি একজন সত্যাগ্রহী। পাকিস্তান যদি যুদ্ধে জড়িয়ে পড়ে আমাকে প্রমাণ করতে হবে যে যুদ্ধের নৈতিক বিকল্প হচ্ছে সত্যাগ্রহ। সঙ্গে আর কেউ না থাকলেও আমি সত্যাগ্রহ করব। সত্যাগ্রহী যে হবে তাকে শহীদ হবার জন্মে প্রস্তুত থাকতে হবে। জুলি একথা জানে, বিয়ের আগেই ওকে জানিয়েছি। তবে এইটুকু আমি বলতে পারি যে প্রাণটা আমি সত্যিকারী বিকিয়ে দেব না। এর জন্মে প্রভূত মূল্য নেব। দেশের স্বাধীনতা বা বিশ্বের শান্তি বা হিন্দু মুসলমানের নিঃশর্ত মৈত্রী বা শ্রেণীতে শ্রেণীতে নির্বৈরী।”

জুলি এতক্ষণ মানসের চিঠিখানা দেয়নি। মনে পড়তেই জিব কেটে বলে, “ভুলে গেছলুম।”

সোম্য মন দিয়ে পড়ে। তার পর ভাঁজ করে রেখে দেয়। বলে, “হঁ। এখানেও কলকাতার পুনরারুতি হতে পারে। সতর্ক থাকতে বলেছে। হিন্দুরা সকলেই সতর্ক রয়েছেন। সেইজন্মে আজ তাঁদের একজনও আনন্দ প্রকাশ করছেন না। মুসলমানদের মতো তাঁরাও শোকদিবস পালন করছেন। আমাদের এই ঘরোয়া আয়োজনেও আমরা আশ্রমের লোককে ডাকিনি। নিজেরাই স্বাধীনতা আনন্দ করছি। জানি এটা পূর্ণ স্বাধীনতা নয়। এমন কী আধাখানা স্বাধীনতাও নয়। এর মহত্ব এইখানে যে ইংরেজ কংগ্রেসে বৈরীভাব দূর হয়েছে। ওদের করমর্দন আন্তরিক। আমাদের করমর্দনও আন্তরিক।”

“কিন্তু ইংরেজে কংগ্রেসে বৈরীভাব দূর হলেই কি ইংরেজে মুসলিম লীগে মিত্রভাব দূর হবে? ওরা দু’পক্ষের মিত্র হয়ে দুই বেড়ালের মধ্যে পিঠে ভাগ করে দেবে। নিজেদের জন্মেও কিছু রাখবে। এ ছাড়া আর কী হতে পারে, সোম্যদা? তুমি নৈতিক বিকল্পের কথা না ভেবে রাজনৈতিক সমাধানের কথা চিন্তা করো। কলকাতার গণহত্যার পর অনেকেই বলাবলি করছেন যে এর চেয়ে দেশভাগ ভালো, সেইসঙ্গে প্রদেশভাগও। সেটা ইংরেজরাই করে দিয়ে যাক। ওরা ছাড়া আর কেউ করতে পারবে না। কংগ্রেসেরও সাধ্য নয়, লীগেরও অসাধ্য। জানিনে এ ছাড়া আর কোনো রাজনৈতিক

সমাধান সম্ভব কি-না। ক্যাবিনেট মিশনের সুপারিশ মুসলিম লীগ খারিজ করেছে। কংগ্রেসও যে সেটা মন খুলে গ্রহণ করেছে তা নয়। দেশের অবস্থা দিন দিন অগ্নিগর্ভ হচ্ছে। যে কোনো প্রদেশে, যে কোনো অঞ্চলে অগ্নিকাণ্ড ঘটতে পারে।” বাবলী হুঁশিয়ারি দেয়।

“তা বলে আমি বেঠিককে সমর্থন করব না। দেশভাগ বেঠিক। তার উত্তরে প্রদেশভাগও তেমনি বেঠিক, দুটো বেঠিক মিলে একটা ঠিক হয় না। ইংরেজদের কী? ওরা দুই বেড়ালের মধ্যে পিঠে ভাগ করে দিয়ে যাবে, দুটোকেই সোভারেন ও স্বাধীন বলে স্বীকৃতি দেবে, দুই রাষ্ট্রেই বাণিজ্যিক সুবিধা পাবে। কতক লোকের লাভ হবে নিশ্চয়ই, কিন্তু জনগণের দুঃখের বোঝা বাড়বে। তখন আমি স্বাধীনভাবে সত্যাগ্রহও করতে পারব না। হিন্দুস্তানের নাগরিক হয়ে পাকিস্থানে বা পাকিস্থানের নাগরিক হয়ে হিন্দুস্থানে সত্যাগ্রহ করা চলবে না।”

বাবলী আবেগের সঙ্গে বলে, “এই যে কতক লোকের মনে আনন্দ আর কতক লোকের মনে নিরানন্দ আজ আমরা দেখছি এর শেষ কোথায়? তুমি কি বঝতে পারছ না, সৌম্যদা, যে যখন তখন যত্র তত্র দাঙ্গা বাধবে আর তা বন্ধ করতে গিয়ে পুলিশ হিমশিম খাবে? পুলিশ একদিন হাল ছেড়ে দিয়ে বলবে, আমাদের দ্বারা হবে না, বামিকে ডাকুন। আমিও কি দাঙ্গা বন্ধ করতে পারব? ক’টা যায়গায় পারবে? আমিও হাল ছেড়ে দিয়ে বলবে, আমাদের দ্বারা হবে না, সত্যাগ্রহীদের ডাকুন। তখন পারবে তোমরা দলে দলে শহীদ হয়ে দাঙ্গাহাঙ্গামা বন্ধ করতে? তোমার যদি বাস্তববোধ থাকে তুমি সময় থাকতে মানবে যে দেশের অবস্থা সত্যাগ্রহীরাও শান্ত করতে পারবেন না। তার জগে চাই রাজনৈতিক সমাধান। সে সমাধান মুসলিম লীগের সঙ্গে ক্ষমতা ভাগাভাগি। সেটা কার্যকর না হলে দেশ ভাগাভাগি। প্রদেশ ভাগাভাগি। ঠিক না, বেঠিক। তবু শান্তির জগে একান্ত আবশ্যক।”

সৌম্য তর্ক করে না। স্বচক্ষেই তো দেখতে পাচ্ছে ঘরে ঘরে নিরানন্দ। যেন স্বদেশী শাসন নয়, নতুন এক বিদেশী শাসন। জুলিকে বলে, “সন্ধ্যায় আজ দীপাবলী হবে না। শুধু প্রার্থনা সভা হবে।”

যাবার সময় বাবলী সৌম্যকে চুপি চুপি বলে যায়, “লক্ষণ যা দেখছি জুলি বোধহয় মা হবার পথে। শহীদ হতে গিয়ে ওকে তুমি পথে বসিয়ে না।



তোমার ভাবী সন্ধানের খাতিরেও তোমাকে বাঁচতে হবে। শহীদ যদি কেউ হয় তো সে আমার মতো ভাগ্যবিড়ম্বিত। সেটা কিন্তু বিপ্লবের দিন, বিপ্লবের প্রয়োজনে। সেদিন দেখবে হিন্দু মুসলমান এক হয়ে গেছে। কেউ কারো গলা কাটছে না। বরং গলায় মালা দিচ্ছে। হাসছ যে? আসিবে সেদিন, আসিবে। তোমরাও সেদিন দেখবে সকলের মনে আনন্দ, নিরানন্দ কারো মনে নয়। যাদের মনে নিরানন্দ তারা পা দিয়ে ভোট দেবে।”

## ॥ পঁচিশ ॥

সুকুমার লগুনে এই দিনটির প্রতীক্ষায় ছিল। বি. বি. সিতে জবাহরলালের অভিষেকের বার্তা শুনে লাফ দিয়ে ওঠে। মিলিকে বলে, “একটা দিনও দেরি করা উচিত নয়। আমি কালকেই প্লেন ধরে রওনা হচ্ছি। তোমরা জাহাজে করে ধীরে স্বস্থে এসো। এখন চলি মেননের সঙ্গে দেখা করতে। নেহরু তাঁর সুপারিশ উপেক্ষা করতে পারবেন না।”

জবাহরলাল ঈতিমধ্যেই কর্মপ্রার্থীদের জালায় অস্থির হয়ে উঠেছিলেন। সুপারিশ যারা করেছিলেন তাঁরাও এক একজন দিকপাল বা দিকপালিকা। কাশ্মীরী ব্রহ্মণদের তালিকাটিও ছোট নয়। তিনি নিজেও জানেন না তাঁর স্থায়িত্ব কতদিন। কংগ্রেস হাই কমান্ডের মতিগতি তিনি কংগ্রেস প্রেসিডেন্ট হয়েও জানেন না। আর গান্ধীজীর মতিগতি বল্লভভাই, রাভেনস-প্রসাদ ও আবুল কালাম আজাদ হাই কমান্ডের triumvir হয়েও কতটুকু জানেন! পাকা ঘুটি কাঁচিয়ে দিতে ওই বৃদ্ধটি সিদ্ধহস্ত।

নেহরু কাউকেই কথা দেন না, সবাইকেই সবুর করতে বলেন। যারা গোড়া থেকেই এদেশে রয়েছেন তাঁদের দাবীই অগ্রগণ্য। যারা বিদেশে থেকে মদত গিয়েছেন তাঁদের দাবী তার পরে। হরনুর তবু নাছোড়বান্দা। সে দিল্লীতেই ধর্না দিয়ে পড়ে থাকে। গান্ধীজীর প্রার্থনা সভাতেও নিয়মিত যায়। একবার যদি গান্ধীজীর দূত হয়ে একথানা চিঠি নিয়ে বড়লাটের সঙ্গে সাক্ষাৎ করতে পারে তবে কাগজে নাম উঠবে। সঙ্গে সঙ্গে সেও একজন গণ্যমান্ত ব্যক্তি হবে।

ওদিকে মিলিও অস্থির বোধ করছিল। বিলেত তার আর একটুও ভালো লাগছিল না। বুদ্ধকালীন সে প্রেরণা আর নেই। যুদ্ধোত্তমের সঙ্গে যে একতা দেখে সে মুগ্ধ হয়েছিল সে একতাও আর নেই। রণের শিক্ষা সমস্তা মেটেনি, তাই সেও আর অপেক্ষা করতে পারে না। আবার আকাশপথেই ফেরে। সঙ্গে রণ। কিন্তু বিলেতের ঘরকন্না গুটিয়ে নেয় না। দেশে কাজকর্ম না জুটলে ফিরতে হতে পারে। স্বকুমারও চাকরি ছাড়েনি। ছুটি নিয়েছে।

মুস্তাফীরা একদিন সৌম্যকে ও জুলিকে নিমন্ত্রণ করে এই সন্মেলার শুনিয়ে দেন। তাঁদের মুখে আফ্লাদ ধরে না। জুলি কিন্তু পুলকিত হয় না। কাঠ হাসি হাসে। সৌম্য কুটনীতিবিদের মতো দুটি একটি কথা বলে। “তা আপনাদের তো সঙ্গ দরকার। নাতিকে নিয়ে খেলা করবার বয়স তো হলো। মিলিকে নিয়েই ভাবনা। সে বোধ হয় দিল্লী চলে যাবে।”

“স্বকুমার যদি কাজ পায়।” মুস্তাফী বলেন, “নেহরু কি আর সেই নেহরু? বৃন্দাবনের কৃষ্ণ এখন মথুরার কৃষ্ণ। রাখাল বন্ধুদের যিনি চিনতে পারেন না।”

মিলির মা বলেন, “বেশ তো! মিলি এই সেবা প্রতিষ্ঠানেরই ভার নেবে। তোমারও উচিত জামাইকে বসিয়ে দিয়ে অবসর নেওয়া। কেন ওরা হিল্লো দিল্লী করবে? লঙনে থাকারও কোনো মানে হয় না।”

জুলি শ্রমাদ গণে। মিলি আর স্বকুমার যদি এখানেই গুছিয়ে বসে তা হলে আবার না দ্বিকোণ সম্পর্কের স্রষ্টাপাত হয়। সে মুখ ফুটে কিছু বলে না। সৌম্যর মুখের দিকে তাকায়।

“ওরা কি পাকিস্তানে থাকতে রাজী হবে, যদি পাকিস্তান হয়?” সৌম্য বলে।

বোমা পড়ার আওয়াজ হয়। মুস্তাফী বলেন, “তু তো গান্ধীজীর কাছের লোক বলেই শুনি। তোমার কি মনে হয় তিনি কংগ্রেসকে পার্টিশন মেনে নিতে দেবেন? পার্টিশন কি ডিভিসেকশন নয়?”

‘যা বলেছেন, মেসোমশায়। তিনি বেঁচে থাকতে মেনে নিতে দেবেন না। কিন্তু যেমন দেখছি মুসলিম লীগ কিছুতেই কংগ্রেসকে একমাত্র উত্তরাধিকারী বলে স্বীকার করবে না। এমন অনর্থ বাধাবে যে ইংরেজকেই অনন্তকাল থেকে যেতে হবে। এত বড়ো একটা মহাদেশের মতো দেশকে তো অরাজকতার কবলে ফেলে রেখে যাওয়া চলে না। তাদেরও তো

বাণিজ্যিক স্বার্থ ব্যাহত হবে। যে কারণে তারা রাজনৈতিক ক্ষমতা হাতে নিয়েছিল সেই কারণেই হাতে রাখতে চাইবে। কংগ্রেস জেলে ফিরে গিয়ে ক'বছর অপেক্ষা করবে ? আরো ছ'বছর ? জেল থেকে বেরিয়ে কি দেখবে মুসলিম লীগের চিতাবাঘ তার দাগ মুছে ফেলেছে ? পলিসি বদলেছে ? নির্বাচনের সময় পাকিস্তানের জিগীর তুলে কংগ্রেসী মুসলিমদের ভোট হারাচ্ছে না ? তাঁদের অস্তিত্ব মেনে নিয়ে নিছক অর্থনৈতিক কর্মসূচীর জোরে মুসলিম ভোট পাচ্ছে ? অত দূর যেতে হবে কেন, সামনেই তো নতুন শাসনতন্ত্র প্রণয়নের জন্তে কনস্টিটিয়েন্ট আসেম্বলীর অধিবেশন। ওরা যদি যোগ না দেয় অন্তের তৈরি শাসনতন্ত্র কি ওরা গ্রহণ করবে ? ওরা চায় আলাদা একটা কনস্টিটিয়েন্ট আসেম্বলী। আলাদা এক শাসনতন্ত্র। তার তাৎপর্য আলাদা এক রাষ্ট্র। অধিকাংশ মুসলমানেরও যদি সেই দাবী হয় তবে তো ডিভিসেকশন অনিবার্হ। কে ওদের উপর গায়ের জোর খাটাবে ? গান্ধীবাদীরা তো গায়ের জোরে বিশ্বাসই করেন না। জাতীয়তাবাদীরা করেন, কিন্তু কোথায় তাঁদের গায়ের জোর ? কামান বন্দুক তো উভয় পক্ষেরই আছে। সৈনিক আছে উভয় পক্ষের। আলুক মিলি। দেখুক এসে সিপাহী বিদ্রোহের মর্ম কী। সিপাহীর বিরুদ্ধে সিপাহীর বিদ্রোহও কি সম্ভবপর নয় ?" সৌম্য উচ্চ স্বরে চিন্তা করে।

“বুঝেছি তুমি কী বলতে চাও, সৌম্য। নেহরুর সরকারের সৈন্যদের মধ্যেই অন্তর্বিদ্রোহ।” মুস্তাফী বোঝেন।

“জিন্না সাহেবকে সরকার গঠনের ভার দিলেও একই কথা। জিন্না সরকারের সৈন্যদের মধ্যেও অন্তর্বিদ্রোহ দেখা দিতে পারে। নেহরু বেল হিন্দু-শিখের বিরুদ্ধে মুসলিম। জিন্নার বেলা মুসলিমের বিরুদ্ধে হিন্দু-শিখ। এক্ষেত্রে ক্যাবালিশন গভর্নমেন্টই ডিভিসেকশন এড়াবার একমাত্র উপায়। বডলাট সেই চেষ্টাই এতদিন করেছেন, কিন্তু জিন্নার নাছোড়বান্দা মনোভাবের জন্তে সফল হননি। উর্ন্তে কংগ্রেসকেই দোষ দিচ্ছেন জিন্না। কংগ্রেস কেন গ্রুপিং সম্বন্ধে ক্যাবিনেট মিশনের সুপারিশ সর্বাস্তঃকরণে গ্রহণ করছে না ? কেন তার ব্যাখ্যার জন্তে ফেডারল কোর্টে আবেদন করছে ? পলিটিকাল ব্যালান্সের কি কোর্টে মীমাংসা হতে পারে ? তাঁর মতে আসামকে নিক্তির পাল্লায় না চাপালে ব্যালান্স সমান হবে না। সত্যের খাতিরে আমাকেও স্বীকার করতে হচ্ছে যে মুসলিম লীগের সঙ্গে মিটমাট চাই তো এক পক্ষের পাল্লা

ভারী হলে মিটমাট হবে না। উভয় পক্ষের পাল্লাই সমান ভারী হওয়া দরকার। এটা জরুরিও বটে। আসামের মায়া না কাটালে পার্টিশন অবশ্যবাসী। তা নয় তো সিভিল ওয়ার। সিভিল ডিসওবিয়েন্সে কাজ হবে না। শতীদ হয়ে আমি কী বা করতে পারব? বাপুই বা কী করতে পারবেন?”

“শহীদ হবে কে? তুমি? পাগল! তোমাব এই সেদিন বিয়ে হয়েছে। সম্মানব স্চনাও লক্ষ করছি।” মুস্তাফী কানে তুলতে চান না। তাঁর স্ত্রীও না।

এতক্ষণে জুলির মুখ ফোটে। “এই, বাবুনীকে তুমি সেদিন যা বলেছিলে তার সঙ্গে তোমার আজকের বক্তব্যের মিল কোথায়?”

সৌম্য একটু ভেবে নিয়ে বলে, “আমি চোখ কান খোলা রেখেছি। নানা মনের সঙ্গে মিশছি। বিভিন্ন সম্প্রদায়ের সঙ্গে আমার কারবার। তাই আমি আগে যা ভেবেছিলুম তার সঙ্গে এখন যা ভাবছি তার মিল থাকছে না। ক্রমে ক্রমে উপলব্ধি করছি যে দেশের স্বাধীনতা একপক্ষের ইচ্ছাতেই সম্ভব হতে পারে কিন্তু রাষ্ট্রের একত্র অপরপক্ষের ইচ্ছাপক্ষে। আমাদের পক্ষে যেসব মুসলমান ছিলেন তাঁরাও কলকাতার দাঙ্গার পর আমাদের ছেড়ে গেছেন বা যাচ্ছেন। অধিকাংশ মুসলমানের ইচ্ছার বিরুদ্ধে ভারতরাষ্ট্রের অথগুতা কিসের জোরে টুক ব ইংরেজদেব বেয়োনেটের জোরে? হিন্দু-শিখ তলোয়ারের জোরে? তা হলে অহিংসার মর্গাদা রইল কোথায়? অহিংসার ভবিষ্যৎ কী? বাপু বলবেন, মুসলিম লীগকে সিংহাসন ছেড়ে দিয়ে তোমরা রামচন্দ্রের মতো বনবাসে যাও। বনবাসে যেতে আমরা রাজী আছি, কিন্তু সাম্রাজ্যবাদের জায়গায় সাম্প্রদায়িকতাবাদকে বসিয়ে দিলে জাতীয়তাবাদ মর্গাদা থাকে না। অহিংসাবাদ হয়তো রক্ষা পেল, কিন্তু জাতীয়তাবাদ ঝেঁরে গেল। যারা ইংরেজের সঙ্গে লড়াই করে হার মানেনি তারা মুসলিম লীগপন্থীদের সঙ্গে লড়াই না কবেই যুদ্ধক্ষেত্র থেকে অপসারণ করবে। ওরা ভাববে আমরা দুর্বল, আমরা ভীক, তাই রণছোঁড়। বলবে, দেখলে তো, ডাইরেক্ট অ্যাকশনের হাতে হাতে ফল। মুসলিম লীগ সিংহাসন জুড়ে বসে দেশের সর্বসাধারণের স্বার্থে শাসন পরিচালনা করবে না, করবে নিজের সম্প্রদায়ের স্বার্থে। তার মিত্র হবে রক্ষণশীল ইংরেজ আর প্রগতিবিমুখ আরব, ইরান, আফগানিস্থান প্রভৃতি রাজ্য। গণতন্ত্র মেনে চললে অধিকাংশ প্রজার ভোটে আইন পাশ

করাতে হবে, ট্যাক্স ধার্য করতে হবে। সেসব কি সে করবে? আইনসভা ডাকবেই না, কনস্টিটিউশন তৈরি করবেই না। গণতন্ত্রের মর্যাদা রাখবে না। ভারতের একমুখী নিশ্চয়ই মহামূল্য, কিন্তু জাতীয়তাবাদেরও তো মূল্য আছে, গণতন্ত্রেরও তো মূল্য কম নয়। অহিংস নীতি নিশ্চয়ই মহামূল্য, কিন্তু স্বাধীনতার এই পরিণাম দেখে ক'জন অহিংসবাদী অহিংসার ভবিষ্যতে বিশ্বাস রাখবে? আর আমি কি শুধু অহিংসবাদী? সেইসঙ্গে জাতীয়তাবাদীও নই? গণতন্ত্রেও আস্থাবান নই? দেশ খণ্ড খণ্ড হবে, সেই আশঙ্কায় কি আমি নিজের অন্তরাত্মাকে খণ্ড খণ্ড হতে দেব? বহু ত্যাগস্বীকারের ফলে আমরা দিল্লীতে প্রোভিজনাল গভর্নমেন্ট লাভ করেছি, বড়লাটের সঙ্গে সরাসরি কথাবার্তা চালাবার এমন সুযোগ এর আগে পাইনি, কথাবার্তা নিষ্ফল না হলে আমরা ইংরেজ রাজত্বের শেষ দিনটি পর্যন্ত থাকব। তার পরের দিন থেকে উত্তরাধিকারী হব। নিষ্ফল হলে অবশ্য গদী ছেড়ে ইংরেজের বিরুদ্ধেই লড়াই। মুসলিম লীগের বিরুদ্ধে নয়। ইতিমধ্যে মুসলিম লীগকেও ক্ষমতার ভাগ দিতে হবে। তাতে ওদের মন না ভরলে রাজ্যের ভাগ দিতে হবে! হয়তো প্রদেশেরও ভাগ। যেসব অঞ্চলে মুসলিম মেজরিটি সেসব অঞ্চলের মায়া কাটাতে হবে। নিরুপায়।”

“সে কী?” জুলি তাঁতকে ওঠে! “সীমান্ত গান্ধীকে নেকড়ের মখে ঠেলে দেবে? মহাত্মা গান্ধী রাজী হবেন?”

“আটকাচ্ছে তো সেইখানেই। পাঞ্জাবকে আত্মনিয়ন্ত্রণের অধিকার দিলে সে যদি বিচ্ছিন্ন হয়ে যায় তবে উত্তর-পশ্চিম সীমান্ত প্রদেশও সঙ্গে সঙ্গে বিচ্ছিন্ন হয়ে যায়। নেহরু ও পাটেল এতে রাজী হলে বাপু নিজের মত চাপিয়ে দেবেন না। সাধারণ অবস্থায় তিনি শুধু পরামর্শদাতা। অসাধারণ অবস্থায় সেনাপতি।” সৌম্য স্বর করে বোঝায়।

মুত্তাফী মন্তব্য করেন, “কংগ্রেস তো আর মুসলিম লীগ নয় যার এক হাতে পুলিশের ব্যাটন, আরেক হাতে গুণ্ডার ছোরা। কে কাকে ঠেকাবে? আমাদের কপালে কী আছে ভেবে ভয়ে ভয়ে রয়েছি। কংগ্রেস দিল্লীর মসনদে বসেছে বলেই এখানে এখানে বাস করছি, কংগ্রেস যদি মসনদ ছাড়ে আমরাও পূর্ববঙ্গ ছাড়ব। আশা করি কলকাতা অপেক্ষাকৃত নিরাপদ। সেখানে আমাদের একটা আশ্রয় আছে, জানো। কলকাতা যদি গুণ্ডাদের রাজধানী হয় তবে আমরা লগুনে গিয়ে স্কুয়ারের আশ্রয় মাথা গুঁজব।”

দিন কয়েক পরে স্কুমার এসে সশরীরে উপস্থিত। সঙ্গে মিলি আর রণ।  
ওদের কলকাতায় রিসিভ করেছে স্কুমার।

ওরা একদিন কুটির দেখতে আসে। মিলি জুলিকে দুই হাতে জড়িয়ে  
চুমুর পর চুমু খায়। “এই চমৎকার ইন্ডেন্টটি কবে নাগাদ ঘটবে রে, মেয়ে ?  
আহা, ব্রহ্মচর্যের কিবা মহিমা ! ভার্জিন বার্থ নয়তো ?”

জুলি ওর দুই গালে দুই চড় কষিয়ে দেয়। “নিজের কথা ভেবে ত্যাখ।  
কোথায় তোর চিরকুমারী ব্রত ?”

দু’জনেই হাসাহাসি করে লুটোপুটি খা’। তার পর জুলি রণকে আদর  
করতে বসে। মিলি ঘুরে ফিরে দেখে। টয়লেট দেখে বলে, “বিলেতের  
কটেজেও এমনটি দেখা যায় না।”

ওর বাড়া সার্টিফিকেট আর কী হতে পারে ? জুলি ধন্য হয়ে যায়।

ওদিকে স্কুমার বলছিল সোম্যাকে, ‘না, ভাই, চাকরি জোটাতে পারিনি।  
মোগল যুগের দরবার। সব ধরাধরির ব্যাপার। কাকে ধরলে কী মেলে তা  
জানতে হলে আরো কয়েক মাস দিল্লীতে থাকতে হয়। ততদিন কংগ্রেস  
পরিচালিত গভর্নমেন্টটাই থাকবে কি-না সন্দেহ। নেহরু এখন পরম অস্বস্তিতে  
দিন কাটাচ্ছেন। বড়লাট রোজ মনে করিয়ে দিচ্ছেন মুসলিম লীগকে বখরা  
না দিলে ওরা জেহাদ ঘোষণা করবে। মুসলিম রেজিমেন্টগুলো কন্ট্রোলার  
বাইরে চলে যাবে। দিল্লীর ভিতরের খবর মুসলিম লীগ ইন্টারিম গভর্নমেন্টে  
আসছে। ওরা এলে ওরাও চাকরির বখরা চাইবে। আমার কতটুকু আশা ?”

সোম্য আশ্বাস দেয়, “চাকরির দরকার কী ? তোমার শ্বশুরের প্রতিষ্ঠান  
তোমরাই চালাবে। তুমি হবে সেক্রেটারি, মিলি হবে ডাইরেক্টর, কিংবা  
মিলি হবে সেক্রেটারি, তুমি হবে ডাইরেক্টর। পারিশ্রমিক যা পাবে তাতেই  
তোমাদের চলে যাবে। একটাই তো সম্ভাবনা।”

“হঁ। প্রস্তাবটা নতুন নয়। কিন্তু এই অধ্যমেরও আত্মমর্যাদা বলে কিছু  
থাকতে পারে। সে ঘরজামাই হতে যাবে কোন দুঃখে। লগুনে তার নিজস্ব  
আস্তানা রয়েছে। উপার্জন আছে। ক্রিপস থেকে আরম্ভ করে অনেকেই  
তাকে এক ডাকে চেনেন। গ্রাশনাল লিবারল ক্লাবের সে মেম্বর। ফেবিয়ান  
সোসাইটিতেও তাঁর যাতায়াত আছে। ইণ্ডিয়া অফিস আর ইণ্ডিয়া হাউস  
দুই জায়গাতেই তার কনটাক্ট রয়েছে। সে বিশ্বস্ত সূত্রে অবগত হয়েছে  
ক্যাবিনেট মিশন স্কীম যদি উভয় পক্ষ মেনে না নেয় তবে পূর্ণাঙ্গ পাকিস্তানেরই

ভাগে পড়বে। তাই এখানকার সম্পত্তির উপরে তার একরত্তিও লোভ নেই। মিলি যদি রাখতে চায় রাখবে। বেচতে চায় বেচবে। আর মেসোমশায়ের সেবা প্রতিষ্ঠান তো কারো ব্যক্তিগত সম্পত্তি নয়। এটা একটা পাবলিক ট্রাস্ট। ট্রাস্টীরা মেসোমশায়ের অবর্তমানে মিলিকে বা আমাদের সেক্রেটারি বা ডাইরেক্টর পদে বহাল রাখবেন কি না তার নিশ্চয়তা কোথায়? বিশেষ পাকিস্তানী আমলে। আর সব প্রতিষ্ঠানের মতো ওটাকেও ওরা ইসলামাইজ করবে। পাকিস্তান মানেই তো মুসলিমদের জগো মুসলিমদের দ্বারা শাসিত মুসলিমদের রাষ্ট্র। স্থানীয় হিন্দু প্রধানরা এখন থেকেই কলকাতায় বাসা খুঁজছেন। তাঁদের আশঙ্কা এবার ঢাকা বা চটগ্রামে তাঙ্গমা বাধবে।” স্বকুমার এক নিঃশ্বাসে বলে যায়।

“যাতে না বাধে তার জগোও স্থানীয় অফিসাররা সন্মোগ রয়েছেন। ডাইরেক্টর আকশন ডে এখানে শান্তিপূর্ণ ছিল। দোসরা সেক্টরের শোকদিবসও শান্তিতে কেটেছে। তারা সবাই চান কংগ্রেসের সঙ্গে আপস। কটর লীগপন্থীদের আপসবিরোধী পলিসি তারা সমর্থন করেন না। হিন্দু মুসলমান বরাবর একসঙ্গে বাস করেছে, বরাবর একসঙ্গে বাস করবে। এটা যেমন আমাদের কথা, তেমনি ওদেরও কথা। কটর মুসলিমদের নিয়ে ওদের যেমন মুশকিল কটর হিন্দুদের নিয়ে আমাদেরও তেমনি মুশকিল। এক হাতে তালি বাজে না। আরেক পক্ষ পাণ্টা না দিলে দাঙ্গা জমে না। পূর্ববঙ্গে দাঙ্গা বাধলে হিন্দুর পক্ষে শোচনীয় হবে, তাই হিন্দুকেই হতে হবে যথাসম্ভব অহিংস। রামকে রহিম মারলে রাম রহিমকে আত্মরক্ষার জগো যতটুকু দরকার ততটুকু মারতে পারে, কিন্তু প্রতিশোধ নেবার জগো করিমকে বা আবদুলকে মারবে না। নির্দোষ মুসলমানকে মারার মধ্যে হিন্দুখান্দ পৌরুষ নেই। তেমনি নির্দোষ হিন্দুকেও।” সৌম্য হিংসার সীমা বেঁধে দেয়।

কৃষ্ণ মেননকে জবাহরলাল তাঁর পর্যটক প্রতিনিধি করে নিউ ইয়র্ক ও মস্কো পাঠাতে চান। তার পরে চান লগুনে ভারতের হাই কমিশনার করতে। বিশ্বস্ত স্বত্রে এই খবরটা পেয়ে স্বকুমার সঙ্গে সঙ্গেই লগুনে উড়ে যায়। মিলিকে ও রণকে মুতাকীদের হেফাজতে রেখে। মুকুবি না থাকলে বা লবিতে না ভিড়লে দিল্লীতে কিছুই হবার জো নেই। হবার থাকলে হাই কমিশনারের ব্যক্তিগত অনুরোধে হবে। নয়তো ইণ্ডিয়া হাউসেই মেনন ওকে কোনো এক চেয়ারে বসিয়ে দেবেন। ইণ্ডিয়া অফিসের সঙ্গে লিয়াজ রক্ষা করতে।

মিলি এর পর থেকে জুলির সঙ্গে ঘন ঘন দেখা করে। দু'জনায় গা-গলি ভাব। একদা ওদের স্বপ্ন ছিল স্বাধীন ভারত, সুখী ভারত। যার জন্তে ওরা জীবন পণ কবেছিল। সে স্বপ্নের কতটুকু বাস্তব হয়েছে? স্বাধীনতা যতই নিকটতর হচ্ছে পারস্পরিক হিংসা ঘেষ ততই বেড়ে যাচ্ছে। দেশ বোধহয় অথও থাকবে না, প্রদেশও খণ্ডিত হবে বোধ হয়। আর সুখ? একজনও কি আছে যাকে সুখী বলতে পারা যায়? সর্বক্ষণ ভয়। মিলির মা বাবা ভয়ে ভয়ে আছেন, প্রতিষ্ঠান ভয়ে ভয়ে চলছে। মিলি যদি এখানেই থেকে যায় ভয় নিয়েই ঘর করবে। জুনিই বা নির্ভয়ে থাকবে কী করে? মোগাখানীতে কী হয়েছে শোনেনি?

নোয়াখালীর বিবরণ খবরের কাগজে ফলাও করে ছাপা হবার আগেই খুব সংক্ষিপ্ত আকারে সৌম্যর কানে আসে। সে সঙ্গে সঙ্গে রিলিফ নিয়ে নোয়াখালী অভিমুখে রওনা হতে যায়। সেখানকার গান্ধীবাদী কর্মীদের সঙ্গে তার আগে থেকেই যোগাযোগ ছিল। বিবরণটা তারাই পাঠিয়েছিলেন।

কলকাতার কাগজে লিখেছে পাঁচ হাজার হিন্দু খুন হয়েছে, তাদের মেনাদানা গেন্ডা জরু লট হয়েছে, বাড়ীদর পোড়ানো হয়েছে। বারা প্রাণ হারায়নি তারা ধর্ম হারিয়েছে। ধর্মস্থান হাবিয়েছে। পালিয়ে বেঁচেছে ও ধর্ম বাঁচিয়েছে বিশ শত্রুরা ক ত্রিশ হাজার। সম্পত্তির ক্ষতি অপরিমেয়। গমি বেদখল হয়েছে। হিন্দুদের সম্মুখে উৎপাতন করাই পলিমি। এটা বেশ সুপরিকল্পিত ভাবেই সাধিত হয়েছে। সহসা ঘটে গেছে তা নয়। পেছনে মাথা আছে। অথচ মুসলিম লীগ থেকে ঘোষণা করা হয়েছে যে এসব ঠুঁদের কাজ নয়, ঠুঁদের কোনো শত্রুর কাজ। তার জন্তে তাকে শাস্তি দেওয়া হবে।

সৌম্য এ বিষয়ে মোন অববন্দন করেছে। পাউকে দোষ দেয়নি। মুসলিম লীগকেও না, তার তথাকথিত শত্রুকেও না। সে সরেজমিনে তদন্ত করবে ও তার তদন্তের ফল সরাসরি দিল্লীতে বাপ্পুক জানাবে। তিনি যদি ইচ্ছা করেন ঘটনাস্থলে এসে অবস্থা পর্যবেক্ষণ করতে পারেন। তার পর ব্রিটিশ গভর্নমেন্টের গোচরে আনতে পারেন। ব্রিটিশ শাসন তো এখনো হস্তান্তর হয়নি।

বাপু যে এতদিন দিল্লীতে আটক রয়েছেন এটার কারণ মুসলিম লীগকে ইন্টারিম গভর্নমেন্টের ভিতরে আনার জন্তে বড়লাটও সচেষ্ট, কংগ্রেসও সচেষ্ট, গান্ধীজীও সচেষ্ট। লীগের দিক থেকেও লাড়া পাওয়া গেছে, কিন্তু শর্তে



বনছে না। সেইজন্তে দেরি হচ্ছে। লীগ যেদিন গভর্নমেন্টে যোগ দেবে বাপু তার পরের দিনই নোয়াখালী অভিমুখে রওনা হবেন। ইতিমধ্যে লীগ একটা চমক দিয়েছে। তার জন্তে বরাদ্দ একটা আসন সে একজন হরিজনকে দিতে চেয়েছে। কংগ্রেস যদি একজন মুসলমানকে নিজের আসনগুলোর থেকে একটা দিতে পারে লীগও কেন একজন হরিজনকে নিজের আসনগুলোর থেকে একটা দিতে পারবে না? জিন্না সাহেব স্বয়ং যোগ দিতে চান না। বড়লাট দুঃখিত।

মোহিনীবাবুর মুখে মোনা লিসার হাসি। সোম্য সুধাংশু, “এর অর্থ কী, কাকা? হর্ষ না বিবাদ?”

তিনি চোখ বুজে বলেন, “একই সঙ্গে দুই। গত দু’শ বছরের মধ্যে ভারতের কেন্দ্রীয় সরকার এই প্রথম পুরোপুরি ভারতীয়দের দ্বারা গঠিত হচ্ছে। বড়লাটকে বাদ দিলে সব ক’জন ক্যাবিনেট মেম্বরই ভারতীয়। জঙ্গীলাটেরও আসন নেই। তাঁর উপরওয়ালা সর্দার বলদেও সিং। এই পরিবর্তনটি সাত বছর আগে ঘটলে ইংরেজদের সঙ্গে আমাদের সম্পর্ক কত মধুর হতো! এটা বিস্ময়কর অগ্রগতি, যদিও বিলম্বিত। এখন গভর্নমেন্ট অভ ইণ্ডিয়া বলতে বোঝায় গভর্নমেন্ট অভ ইণ্ডিয়ানস। ব্রিটিশ আমলের পূর্বে যে আমল ছিল সে আমলের পাঁচশো বছরের মধ্যে হিন্দুস্থানের কেন্দ্রীয় সরকারে হিন্দুদেরই স্থান ছিল না। আকবরের রাজত্বই বোধহয় একমাত্র ব্যতিক্রম। তবে জাহাঙ্গীরের দরবারেও হিন্দুদের প্রতিপত্তি ছিল। এখন হিন্দু মুসলমান শিখ খ্রীষ্টান পার্শী সবাইকে নিয়ে কেন্দ্রীয় সরকার গঠিত হয়েছে। সবাই যদি ট্যাক্স দেয় তো সবাই পাবে ট্যাক্স ধার্য করার অধিকার। এরই নাম জাতীয় স্বাধীনতা। কত বড়ো পরিবর্তন! তার পর এটাও মনে রেখো। মুসলমানী আমলের আগে যতবার কেন্দ্রীয় সরকার গঠিত হয়েছে ততবার শুধু উত্তর ভারতীয়দের নিয়েই। দক্ষিণের লোকের তাতে কোনো অংশ ছিল না। তা হলে দেখছ আড়াই হাজার বছরে এই প্রথম উত্তর-দক্ষিণবাসীরা পাশাপাশি বসে ভারত শাসন করছে। তার পর আরো আশ্চর্যের কথা, আর্থশাসিত ভারতে ক্ষত্রিয় রাজগুরা অনার্য বা অস্পৃশ্যদের পায়ের তলাতেই রাখতেন। এখন দু’জন অস্পৃশ্য গদীতে চড়ে বসেছেন। তিন হাজার বছরের ইতিহাসে এই প্রথম এমন অলৌকিক ঘটনা ঘটল।”

সোম্য স্বীকার করে। “তা হলে বিবাদ কেন?”

মোহিনীবাবু চোখ মিটমিট করে বলেন, “ভাখো, সোম্য, সরকার গঠন করা

যত না কঠিন তার চেয়েও কঠিন তাকে টিকিয়ে রাখা। সমবেত দায়িত্ব ছাড়া সরকার টেকে না। ঘোড়ার গাড়ীতে চারটে ঘোড়া জুততে পারা যায় কিন্তু চার ঘোড়া যদি চার দিকে দৌড়ায় তবে গাড়ী ভেঙে থান্ থান্ হয়। মুসলিম লীগ কেন্দ্রীয় সরকার চালাবার জন্যে যোগ দেয়নি, বানচাল করবার জন্যেই চুকেছে। চালাবার উদ্দেশ্য থাকলে জিন্নাকে পাঠাত, নাজিমউদ্দীনকে পাঠাত। তাঁদের বদলে পাঠিয়েছে রাসিদ মালকে। তা দেখে বড়লাট পর্ষস্ত স্তম্ভিত। তিনি বিশ্বাস করতে পারছেন না যে ভারতীয় মুসলমানদের মধ্যে স্বদক্ষ রাজনীতিক বা প্রশাসক নেই। এক লয়াবৎ আলী থান্ বাদে।”

নোয়াখালী ঘুরে এসে সৌম্য বলে জুলিকে, ‘যত রটেছে তত ঘটেনি। অতিরঞ্জিত বিবরণ পড়ে বিহারী হিন্দুরা অতিমাত্রায় প্রতিশোধ নিয়েছে। কী করি, বলো তো? আমার বাড়ী বিহারের দেহাতে। আমার মুসলমান ভাইবোনদের প্রতি আমার কি কোনো কর্তব্য নেই? কী তাদের অপরাধ? উদার পিণ্ডি কেন বুধোর ঘাড়ে পড়বে? ভাবছি বিহারে গিয়ে দেখি কী করতে পারি। তোমার আপত্তি নেই তো, লক্ষ্মীটি?’

“সে কী কথা! তুমি বিহারের অরজলে মাথুয হয়েছ। তোমার প্রাথমিক কর্তব্য বিহারে গিয়ে হিন্দুদের শাস্ত করা, মুসলমানদের অভয় দেওয়া। নোয়াখালীর প্রতিশোধ বিহারী হিন্দুরা নিয়েছে, যেমন কলকাতার প্রতিশোধ নিয়েছে নোয়াখালীর মুসলমানরা। এর পর কি পাঞ্জাবের মুসলমানরা নেবে বিহারের প্রতিশোধ? এই হিংসা প্রতিহিংসার কি সামা আছে না শেষ আছে? বাপু এ বয়সে ক’টা জায়গায় যাবেন? ক’টা দিক সামলাবেন? তিনি বুড়ো হয়েছেন। তোমরা তাঁর জোয়ান ছেলেরাই তো ছোটোছুটি করবে। পারলে আমিও তোমার সঙ্গে য়েহুম। কিন্তু পারছিনে তা হুমি জানো। যেটি আসছে ছোটোছুটি করে সেটিকে অকাণ্ডে হারাতে চাইনে। আপত্তি নয়, অল্পরোধ, আমাকে তুমি এখানে এ ফলা ফেলে যেয়ো না, কলকাতায় মার কাছে রেখে যেয়ো।” জুলি বলে।

সৌম্য রাজী হয়। খবরটা শুনে মিলি ছুটে আসে বাগড়া করতে। “এই মেয়ে, তুই তো আমার মায়ের কাছেই অনায়াসে থাকতে পারতিস্। সেবা প্রতিষ্ঠান রয়েছে তোর মতো মেয়েদের সেবা করতে। আমি রয়েছি তোকে সন্দ্ব দিতে। না, আমি লগনে ফিরে যাচ্ছি। দেশের স্বাধীনতা আমি প্রত্যক্ষ করতে চাই। দাওয়াহাঙ্গামাই তা শেষ কথা নয়। স্বাধীনতাই শেষ

কথা। এর পরে যখন বিলেত যাব তখন স্বাধীন দেশের নাগরিক রূপেই যাব। ব্রিটিশ প্রজা রূপে নয়।”

“আমি, ভাই, ওসব এখন ভাবতেই পারছি নে। আমার বরের সঙ্গে এই প্রথম আমার ছাড়াছাড়ি হচ্ছে। পারলে ওর সঙ্গে আমিও বিহারে যেতুম। দেশের মানুষকে আগে প্রাণে বাঁচতে দে। বেঁচে থাকলে তো স্বাধীনতার মুখ দেখবে। প্রাণের সঙ্গে সঙ্গে মানও বাঁচাতে হবে। আচ্ছা, ভাই, মেয়েগুলোর কী অপরাধ? ওদের কেন ধরে নিয়ে যায়? যেমন নোয়াখালীতে তেমন বিহারে। আমি তো লজ্জায় মরে যাচ্ছি। ক্রোধে জলে উঠতে পারছি নে। কেন তা তুই ভানিস। এ অবস্থায় জলে ওঠা কি ভালো?” জুলি ব্যাকুলভাবে স্বধায়।

“না, ভালো নয়। সাবধানে থাকিস্ ও রাখিস্। শোন, আমি যা দেখেছি তা তুই দেখিস্ নি। মহাযুদ্ধ। এ যা দেখছিস্ তা মহাযুদ্ধ নয়, ছিঁচকে যুদ্ধ। তবু যুদ্ধ তো। যুদ্ধে কী না হয়? অল ইজ ফেয়ার ইন লাভ্ অ্যাণ্ড ওয়ার। খুন জখম, লুটতরাজ, ধর জালানো, নারীহরণ। শেকালে সীতাকেই উন্টে সাগা দেওয়া হয়েছে। একালে আমরা বিপ্লবী কলারাসে অবিচার উন্টে দিতে চাই। বিপ্লব বনতে বোবায় ওলট পালট। অযোধ্যায় লোকের ঝাম অন্ডায় বোবের ওলট পালট ঘটতে হবে। উদ্ধারের পর সীতাদের কলঙ্ক মুছে ফেলতে হবে। কাউকে কোনো প্রশ্ন করা হবে না। অগ্নিপরীক্ষা তো দূরের কথা। বনবাস তো কিছুতেই না। সম্মানে পরিবারে ও সমাজে পুনঃপ্রতিষ্ঠা করতে হবে। যাস্নে, জুলি। তুই গেলে আমি কার কাছে বল পাব?” মিলি ওকে বুকে জড়িয়ে ধরে।

॥ তৃতীয় পর্ব সমাপ্ত ॥